

# 001 洞玄靈寶三洞奉道

## 科戒營始

經名：洞玄靈寶三洞奉道科戒營始。原題金明七真撰。六卷。底本出處：《正統道藏》太平部。

### 目錄

- 卷一
  - 罪緣品一
  - 善緣品
  - 總例子三
  - 置觀品四
- 卷二
  - 造像品
  - 寫經品
  - 度人品
- 卷三
  - 法具品

法服品  
居處品

### 卷四

誦經儀  
講經儀

法次儀

靈寶中盟經目

### 卷五

上清大洞真經目

法服圖儀

### 卷六

常朝儀

中齋儀

中會儀

度人儀

## 洞玄靈寶三洞奉道科戒營 始卷之一

金明七真撰

七真曰：尋三洞大經，率備威儀科戒。若道士，若女冠，舉動施為，坐起卧息，衣服飲食，住止居處，莫不具於經旨。其立觀度人，造像寫經，供養禮拜，燒香明燈，讀誦講說，傳授啓請，齋戒軌儀，修行法相，事事有則，皆著科條，其來已久。但文字浩漫，披按頓周，或一時雖見，過後便忘，或見而不行，或行而不遍，或各率乃心，任情所施，登壇入靜，各異威儀。禮懺讀經，人爲軌則遞相指斥，罕共遵行，遂使晚學初門，莫詳孰是，既多方喪道，則寡識迷途，惰慢日生，威儀時替。加復競爲辭飾，爭逞伎能，啓告之辰，皆興新制，陳謝之日，全棄舊儀，歲月久盈，科戒遺泯，積習生常，十不存一。若依經戒者，具科行事，反見嗤鄙，違損正典，既而昧多悟少，達竟更迷，守法不精，

翻致訛廢，眇詳先世，已其陵遲，俯思今後，浸成深谷，故指修時要，凡五百十二條，儀範八章，分爲三卷，題曰《三洞奉道科戒》，皆依經錄出，非構虛詞，庶萬古同軌，十方共則，與我齊者，宜弘之焉。各疏品目，列於篇首云爾。

罪緣品一

經曰：毀壞天尊大道形像者，死入九幽十八地獄，萬劫方生病癩身。

經曰：訾毀三洞大法經典者，死歷九幽十八地獄，百劫方生野獸身，若還人中，當舌根爛壞。

經曰：誹謗出家法身者，見世得蟲癩病，過去生六畜中。

經曰：破壞靈觀玄壇者，見世眉鬚墮落，身體爛壞，過去生毒蛇身。

經曰：不敬天尊大道者，見世愚癡，過去生六畜中。

經曰：不信經法宿命報對者，見世盲聾，過去生鳥獸中。

經曰：不信罪福因緣者，見世爲奴婢，過去生六夷中。

經曰：輕慢出家法身者，見世跛

躄，過去生猪狗中。

經曰：穢汙三寶福地者，見世形容臭腥，過去生糞穢中。

經曰：姪犯出家法身者，見世孤寡，爲人憎嫌，過去生廁溷中。

經曰：邪姪好色者，見世患風邪，過去生猥猪中。

經曰：偷盜三寶財物者，見世受貧窮，過去生奴婢六畜中。

經曰：偷盜常住衆物者，見世得風病，過去生猪羊六畜中。

經曰：偷盜四輩信施財物者，見世得顛狂，過去生愚癡中。

經曰：啖食三寶果實蔬菜者，見世得消渴飢病，過去生餓虎毒蛇中。

經曰：盜齋食及供齋法食者，見世逢霹靂惡鬼殺，過去生蟒蛇身，死在餓鬼中。

經曰：盜供齋物者，見世生奴婢中，飢寒永不得衣食，過去生餓狗毒蛇中。

經曰：盜經像財物者，見世得癩病，死入諸地獄，萬劫不得原。

經曰：罵詈出家法身者，見世得風癩，過去生狂狗中。

經曰：凌辱出家法身者，見世遭枷落獄，過去生蠅蛆中。

經曰：破戒者，見世遇三災，過去生毒蜂及聾盲中。

經曰：破齋者，見世得噎病，過去生餓虎中。

經曰：殺害衆生者，見世得短命，長宿牢獄戾身，過去生六畜中。

經曰：食肉者，見世生百病，過去生麋鹿中。

經曰：嗜酒者，見世生風狂，逢猛火，過去生泥穢土中。

經曰：好食葷辛穢者，見世得腥臭身，過去生糞穢中。

經曰：持心不堅固、好弄出家人者，見世爲猴猿，死入鑊湯中。

經曰：手脚攣跛者，從不禮敬三寶中來。

經曰：手脚斷壞拳縮者，從不恭敬三寶中來。

經曰：兩眼盲者，從不信經法、輕

忽三寶中來。

經曰：中道惡疾者，從供養三寶中怠中來。

經曰：舌爛壞者，從毀訾三洞大乘經教中來。

經曰：瘖瘂不能言語者，從道說出家三寶法身中來。

經曰：鼻塞不聞香臭者，從好啖酒肉五辛中來。

經曰：身體爛壞者，從毀壞三寶中來。

經曰：眉毛墮落者，從誹謗三寶中來。

經曰：脣寒齒露，鼻梁崩倒者，從破壞道場中來。

經曰：曲腰歧胸、偻背短脚者，從噴嚏欺忽三寶中來。

經曰：顛狂風邪迷惑者，從不信因緣罪福中來。

經曰：形容瘡腫醜陋者，從罵詈三寶中來。

經曰：眼赤口斜、鼻傾不正者，從誹笑出家法身中來。

經曰：愚癡長病、意智不具足者，

從誑惑三寶欺忽中來。

經曰：劫賊相逢、殺傷財物者，從劫奪三寶財物中來。

經曰：水溺漂沉者，從飲酒穢慢中來。

經曰：火燒灼爛者，從損費三寶中來。

經曰：毒蛇吞噬者，從殺傷出家中來。

經曰：毒蛇入口鼻中者，從毒惡呪詛中來。

經曰：遇虎狼猛獸啖食者，從陰謀毒惡中來。

經曰：飢寒凍餓、衣食常不充足者，從盜齋食、及偷三寶常住財物中來。

經曰：父母妻子離隔、常不同居者，從嫉妬姦淫、破人和合、離人種親中來。

經曰：貧窮困苦者，從破齋戒中來。

經曰：奴婢下賤身者，從偷盜慳

貪中來。

經曰：生世得人憎嫌者，從憍慢噴嚏中來。

經曰：生世耽淫、不避親疏好醜者，從猪狗六畜中來。

經曰：生世嗜酒猖狂者，從魚鼈蝦蟆中來。

經曰：生世嗜肉好殺者，從毒蟲猛獸中來。

經曰：生世不淨臭穢者，從蝌蚪蟲中來。

經曰：身體臭穢不淨邪淫者，從好食五辛猪狗中來。

經曰：六畜生身者，從殺生抵債中來。

經曰：野獸麀鹿身者，從食肉偷盜中來。

經曰：毒蟒蛇身者，從嫉妬毒害中來。

經曰：餓虎生身者，從欺凌劫奪中來。

經曰：生廁溷中蟲者，從淫欲不淨中來。

經曰：生蝦蟆蝌蚪者，從不供養

三寶中來。

經曰：生魚鼈身者，從輕洩寶經

中來。

經曰：生小蟲螳身者，從違犯經

教中來。

經曰：生獠犬野猪身者，從背師

棄本中來。

經曰：生鸞雀身者，從評論經教

多口中來。

經曰：生鳩鴿身者，從好自是、作

法異常中來。

經曰：生鷹鷲身者，從破戒、違

經、慢法中來。

經曰：生孤獨貧寒者，從犯出家

法身、及墮胎害子中來。

經曰：形容醜陋者，從誹笑三寶、

傲誕出家中來。

經曰：風邪癩病狂言者，從布施

不還、及墮子落胎中來。

經曰：腹大項細者，從犯靈觀玄

壇、姪欲中來。

經曰：牢獄枷鎖切身者，從諂毒

阿黨中來。

經曰：鞭棒楚撻者，從毒害衆生、

不慈中來。

經曰：猫子生身者，從食肉入靈

觀玄壇中來。

經曰：蝨蟠生身者，從食葷辛近

三寶中來。

經曰：豺狼生身者，從慳慳不布

施中來。

經曰：狐貉生身者，從虛誑矯詐

中來。

經曰：鼠鼫生身者，從食齋殘竟、

飲酒食肉中來。

科曰：凡八十一條罪業因緣科

戒，出《太上業報因緣經》，皆生犯罪

目，死經地獄，依科受罪，報訖受生，方

得此身。亦有見世即報而生身者，悉

由先身所犯，報得此身也。具諸經典，

若道士，若女冠，皆當精心信奉，明示

將來，令內外衆不犯科戒，克得道真。

善緣品

經曰：廣造經像，置觀度人，布施

齋戒，濟死度生者，普救一切，大弘福

善，利益衆生者，生天王國主身。

經曰：持經奉戒，誦念禮拜，廣建

福田者，生皇后國母身。

經曰：供養三寶，燒香明燈，晨夕

不倦，造經鑄像者，得生天王門。

經曰：信樂經法，依科奉行，持齋

念道，布施立功者，生富貴身。

經曰：持奉經戒，誦念住持者，生

聰明身。

經曰：七世樂道，奉戒誦經，布施

救貧，濟生度死，常行慈悲，供養三寶

不怠倦者，得生出家身。

經曰：世世積善，廣建福田，持齋

奉戒，禮敬三寶，誦念大乘，修行不犯

者，得生大德法師、衆人尊仰身。

經曰：奉信三洞大法，修行供養

者，生天人中，見世清淨長命身。

經曰：供養出家法身者，得長命

端正身。

經曰：成就觀宇玄壇者，生大富

貴身。

經曰：信敬天尊大道，注心歸仰

者，生具足身。

經曰：信奉經戒，因緣宿命者，生貴敬身。

經曰：布施救貧，成就功德，無所吝者，生中國長壽富貴身。

經曰：不殺生、偷盜、飲酒、食肉者，生長命具足身。

經曰：好誦經戒，長齋奉道者，生出家恭敬身。

經曰：供養出家，愛念三寶法身者，生清淨端正身。

經曰：常憐念一切，慈悲於物者，生高上貴豪身。

經曰：若帝王國主，從累劫修齋、廣建福田中來。

經曰：若皇后國母者，從無量世中、廣造福田、供養天尊大道中來。

經曰：帝子天孫帝姬妃主者，從歷劫修善積因中來。

經曰：長命老壽者，從持齋奉戒、慈救衆生中來。

經曰：子孫昌熾、長命富貴者，從供養天尊大道中來。

經曰：父子、夫妻、男女，恒同居

處者，從柔順和睦、不隔恩愛中來。

經曰：在處得人敬仰，甘膳美衣，衣充身食足口者，從陪常住福田中來。

經曰：豪貴尊勝、人見畏敬者，從敬信三寶中來。

經曰：富有豐足者，從布施持齋、成就福田、救濟貧窮中來。

經曰：聰明智慧者，從樂誦經法、能住持中來。

經曰：形容端正者，從供養三寶出家法身中來。

經曰：出家法身爲人敬奉者，從說法教化、持奉齋戒福田中來。

經曰：富貴巍巍、永劫不衰者，從布施成就、常住福田中來。

經曰：在所得人尊敬愛仰者，從布施、持經、奉戒中來。

經曰：身心清淨、智慧明了者，從護持三洞大乘中來。

經曰：所在快樂、無諸灾厄者，從放生濟物、不犯衆生中來。

經曰：身體香潔、人見愛念者，從不飲酒、食肉葷辛，常清淨中來。

經曰：子孫豐多、富貴圓滿者，從廣行布施求福中來。

經曰：婦人建生子胤、夫妻敬愛者，從道場教化信心中來。

經曰：生世音聲清雅者，從道場歌讚中來。

經曰：生世歡樂、福慶自然者，從道場專誠、聞法聽經、布施中來。

科曰：凡三十八條福善緣對，出《太上業報因緣經》，皆生世或祖曾所行所種，致得今身之報，或一身積善，見世受報。若道士，若女冠，當須依科，明示男女，使遵科戒，得福无量。

### 總例品三

科曰：按《玄都律》及《正一法文》，凡道士、女冠，或凡人，違犯經戒，皆奪筭，或言減促。筭者，謂奪減人之命筭，令壽不延也。或以六十日爲一筭，二說有異，故具言之。又減奪筭後，身死或見存，皆更依科目，受罪奪減命筭而已。益筭者，加其筭，使更延也。若道士、女冠，須識科戒，按法奉行。

科曰：或言犯違科、罪得違罪者，皆依本科目得罪也。

置觀品四

科曰：夫三清上境，及十洲五嶽，

諸名山或洞天，并太空中，皆有聖人治處，或結氣為樓閣堂殿，或聚雲成臺榭宮房，或處星辰日月之門，或居煙雲霞霄之內，或自然化出，或神力造成，或累劫營修，或一時建立，其或蓬萊、方丈、圓嶠、瀛洲、平圃、閩風、崑崙、玄圃，或玉樓十二，金闕三千，萬號千名，不可得數，皆天尊太上化跡，聖真仙品都治，備列諸經，不復詳載。必使人天歸望，賢愚異域，所以法彼上天，置茲靈觀，既為福地，即是仙居，布設方所，各有軌制，凡有六種：一者山門，二者城郭，三者宮掖，四者村落，五者孤迥，六者依人。皆須帝王營護，宰臣修創，度道士、女冠住持供養，最進善之先首，不可思議者也。造天尊殿、天尊講經堂、說法院、經樓、鐘閣、師房、步廊、軒廊、門樓、門屋、玄壇、齋堂、齋廚、寫經坊、校經堂、演經堂、熏經堂、浴堂、

燒香院、昇遐院、受道院、精思院、淨人坊、驟馬坊、車牛坊、俗客坊、十方客坊、碾磑坊、尋真臺、鍊氣臺、祈真臺、吸景臺、散華臺、望仙臺、承露臺、九清臺、遊仙閣、凝靈閣、乘雲閣、飛鸞閣、延靈閣、迎風閣、九仙樓、延真樓、舞鳳樓、逍遙樓、靜念樓、迎風樓、九真樓、焚香樓、合藥堂等，皆在時修建，大小寬窄，壯麗質朴，各任力所營。藥圃果園，名木奇草，清池芳花，種種營葺，以用供養，稱為福地，亦曰淨居，永劫住持，勿使廢替，得福無量，功德第一。

科曰：凡天尊殿，或三間、五間、七間、九間、十一間，或十三間，皆大小在時，裝嚴任力，徘徊四注。聖人所居稱殿，凡世所處，通名為堂。凡造諸屋宇，總有六種相：一者名木靈材，二者因時所出，三者金玉雕飾，四者甄石葺構，五者丹青圖畫，六者茅茨土階。或刻鳳雕龍，或圖雲寫月，或倒芰植荷，蓮池華海，或明璫皎璧、鏤檻文軒，或丹墀碧砌、青鎖綠紋，或金鋪銀扃、霞梁雲棟，或日窗月牖、陰戶陽扉。上限

義舒，下縈霄霧，其廣狹脩闊，任時所為，不定常式也。

科曰：凡天尊堂，或一間、兩間、三間、五間，大小寬窄，亦因時所矣。

科曰：凡法堂，說法教化之所，宜在天尊殿後安置，務在容眾多為美，或於他處建立，皆任其所宜也。

科曰：凡說法院，皆在天尊左右，別寬廣造，令容納聽眾，得多為上，其中屋宇，皆依時取便。

科曰：凡造經樓，高下、大小、華素，亦任人力。然要容納見在三洞寶經、四輔玄文，使風日流通，雨露隔絕，即為第一上安置，並須宜便，此非永制。

科曰：凡造鐘閣軌制，與經樓同。務令牢固，四面疏薄，使鐘聲不礙，六時嘹亮。宜在天尊殿前，即與經樓對，左鐘右經，精思院別置亦然。

科曰：凡造齋堂，多在東邊別院，大小寬窄，量時所宜。開門啓窗，皆令得所，當門安帳座，著天尊左右，鋪牀席氈褥並如法。天尊前，置香鑪幡華

淨巾，安食牀几褥，並須具足如法。

科曰：凡造齋厨，宜與食堂相附近，釜竈倉庫，應供齋所，須皆安置，令不疏越。

科曰：凡在觀中，皆須先造寫經坊，當別立一院，勿通常人造堂，或小屋。若廊舍，并立校經堂，浴室潢竈，治紙處所，碓杵裁刀、解牀切藥刀碓，乃至浴中淨巾淨衣，熏經敷經，架修舍香臼杵器物，緣所須，並在經坊中安置。每事清淨，不得交凡俗，穢汗混雜，臨事闕少，此最大忌。

科曰：凡是觀中，須造浴室，乃至別院私房，此最爲急。每行道讀經，登壇入靜，奏告啓願，謝過首愆，外犯俗塵，內違真戒，或汗垢流漓，灰塵染汗，少不清淨，則犯靈司，既觸仙官，便乖正氣，皆須沐浴，澡鍊身心，使香氣芬芳，方可行事。故行道之日，皆當香湯沐浴也。其緣浴所須，釜鑊井竈、牀席香粉，並皆具備。

科曰：凡精思院，本欲隔礙囂氛，清淨滓穢，須爲別院，置之幽靜，東西

南北、遠近闊狹，適時宜便。置天尊殿，入靜室鍊氣處，浴室、藥堂，緣師所須，皆爲備設，勿使闕少。

科曰：凡尋真鍊氣，祈真吸景，散華望仙，承露九清，遊仙凝靈，乘雲飛鸞，延靈迎風，九仙延真，舞鳳逍遙，九真焚香靜念，臺閣樓等，並是道士、女冠，翹想雲衢，騰誠星路，遊心方外，送目寰中，冀八景俯臨，十仙遙集，既非常事，理須遐絕。宜近精思院，或兩殿別院，出迴建立，遣風露不侵，使雲霞無礙，眇通天漢，遠矚星躔，外啓四景之門，旁開八風之牖，令仙輶出入，真騎往來，可仰可希，彌高彌廣，則晉携手常生撫袂，旦夕可得矣。

科曰：衆妙之門，往來之逕，群真之戶，出入所由，譬之於身，若目之居面，不可闕也。凡諸觀門，皆須造閣或立樓，上安觀額，以標傑出。重級大小，事屬一時，兩下三門，在時奢儉。凡是別院，皆須造立，裝嚴雕飾，各盡所宜，不可守常，周爲定式。

科曰：凡觀門左右，皆別開車馬

牛驢出入門，不得於正門中來往。

科曰：師房在天尊殿堂周迴四方安置，間架多少，各依當時所造。

科曰：凡道士、女冠入道，即須受持經戒、符籙，須別作受道院造壇，及對齋堂靜室，緣法所須，皆備此院。

科曰：凡道士、女冠身亡，皆別置昇遐院，須別立一院造堂室，供器所須，皆備此院。

科曰：凡道士、女冠死，法衆同義，須相開度，宜近昇遐院，造燒香院，安几席牀座，一事已上，備此院內。

科曰：凡觀天尊殿前，皆須築土，或壘甄砌石。若構木作壇，三級、五級，至十二級，皆按本經，欄纂門榜，並須如法。

科曰：凡是殿堂、樓閣、臺榭、引院，並須作行廊、步廊、軒廊、房宇，使四面周匝。

科曰：凡淨人坊，皆別院安置，門戶井竈，一事已上，並不得連接師房。其有作客，亦在別坊安置。

科曰：凡車牛騾馬，并近淨人坊，

別作坊安置。不得通同師房，及齋厨院內出入，并近井竈。

科曰：凡十方道義，或為法，或緣身，來詣觀中，所將人畜，皆別安置。不得師例，須別立客院。若未有別院，即安淨人坊，驢騾置驢騾坊，所損常住，皆須陪填，不得直爾，師同法衆例。

科曰：凡有俗客，或門徒，若本部官人，皆別安俗坊，所將人畜，並不得侵損常住，若贖者住。

科曰：凡藥者，救病所須，當別立藥圃栽蒔，當處所有。

科曰：華果供養之先，繞觀院內，及廊舍內外，皆栽花果珍草，以時收採，供養三寶。

科曰：凡菜，齋食所資，當除五辛之外，時有名菜瓜瓠之屬，皆須種植。

科曰：莊田碾磑，常住所資，隨處訪求，依法置立。其中區別淨穢，檢校營為，皆適當時，務令得所。

科曰：凡出家之人，務存清素，遠棄驕奢，須從儉省。所居之處，皆不得華麗靡曼，牀席器玩，并須敦朴，不得

同俗，使內外開通，表裏無擁，不得以簾幔帷幌而自隱藏其繩牀。凡拂、如意、香鑪、法具，常安左右。凡諸非法器服玩弄，皆不得畜。此道士之重戒。

科曰：凡觀，皆須別造一院，屋宇如法，擬供修造天尊等，功德所須，浴室釜竈之屬，並備其內。

科曰：凡天尊殿堂，及諸別院，私房內外，皆種果林華樹，綠竹清池，珍草名香，分階列砌，映帶殿堂，蒙籠房宇，使香起靈風，華明慧日，時歌好鳥，乍引高真，上擬瑤臺，下圖金關，契心之所，是焉棲記。

洞玄靈寶三洞奉道科戒營始卷之一

洞玄靈寶三洞奉道科戒營始卷之二

造像品

科曰：夫大像無形，至真無色，湛然空寂，視聽莫偕，而應變見身，暫顯還隱，所以存真者係想聖容，故以丹青金碧，摹圖形相，像彼真容，飾茲鉛粉。凡厥繫心，皆先造像。有六種相，宜按奉行：一者，先造無上法王元始天尊、太上虛皇玉晨大道、高上老子太一天尊；二者，造大羅已下，太清已上，三清無量，聖真仙相；三者，造過見未來，無邊聖相；四者，造繪諸天星斗真仙；五者，造聖真仙品，無數聖相；六者，造隨感應緣，無窮聖真形相。如此發心，有一十八種，以狀真容：一者雕諸寶玉瓊瑤、琅玕七珍之類，二者鑄以黃金，三者鑄以白銀，四者鑄以赤銅，五者鑄以青鐵，六者鑄以錫鐵，七者雕諸香物栴檀沉水之屬，八者織成，九者繡成，十者泥塑，十一者夾紵，十二者



素畫，十三者壁畫，十四者鑿龕，十五者鏤諸文石，十六者建碑，十七者香泥印成，十八者印紙範泥、刻甄團土、鏤瓦磨骨、雕牙剗木、聚雪畫灰。一念發心，得福無量。或長一寸、二寸、三寸、四寸、五寸，乃至於尺，大小無礙，多少不限。暨乎一尺、二尺、三尺、四尺、五尺，以及于丈，一丈、二丈、三丈、四丈、五丈、六丈，百尺、千尺，萬尺，一區、十區、百區、千區、萬區，一鋪、十鋪、百鋪、千鋪、萬鋪，一龕、十龕、百龕、千龕、萬龕，一幀、十幀、百幀、千幀、萬幀，一座、十座、百座、千座、萬座，一室、十室、百室、千室、萬室，一堂、十堂、百堂、千堂、萬堂，乃至巨億兆京載。或一天尊、二天尊，乃至十百千萬億兆京載，并真人、仙人、聖人、玉童、玉女、諸天帝王、金剛神王，香官使者、侍香、龍虎、獅子、辟邪，殿堂帳座、幡華幡蓋、飛天音樂、種種侍衛，各隨心力，以用供養，禮拜燒香，晝夜存念，如對真形，過去未來，獲福無量，克成真道。

科曰：凡造像，皆依經。具其儀相，天尊有五百億相，道君有七十二相，老君有三十二相，真人有二十四相，衣冠華座，並須如法。天尊上帔，以九色離羅，或五色雲霞山水，雜錦黃裳，金冠玉冠。左右皆纓絡環珮，亦金玉冠，綵色間錯，上帔皆不得用純紫丹青碧綠等。真人又不得散髮、長耳、獨角，并須戴芙蓉飛雲元始等冠，復不得戴二儀平冠、鹿胎之屬。左右二真，皆供獻，或持經執簡，把諸香華，悉須恭肅，不得放誕手足，衣服偏斜。天尊平坐，指捻太无，手中皆不執如意塵拂，但空而已。

科曰：凡天尊、道君、老君左右，皆有真人、玉童、玉女、侍香、侍經、香官使者，左右龍虎君、左右官使者、天丁力士、金剛神王、獅子辟邪、龍麟猛獸、騰蛇神虎、鳳凰孔雀、金翅朱雀、四靈八威、護法善神，備衛左右，各隨力所建。

科曰：真人名號極多，不可稱數，皆是昔劫種因道成果極所致，得在天

尊、道君、老君左右，侍衛啓請，變化自在，天尊所處，皆隨侍衛。

科曰：玉童、玉女，皆是道氣化生，非因胎育，各有司存，或侍經侍香，或散華奉言，或給仙人，或侍得道，階品亦有差降。

科曰：侍經、侍香，皆是結氣而生，常在天尊及真經所處，傳奏流通，記列善惡。

科曰：金剛天之四極神，立天之四隅，或天門地戶，長一千二百丈，按劍持杖，身掛天衣飛雲寶冠，足躡巨山神獸、大石諸鬼之上，立作殺鬼之勢，主天下地上一切非法鬼神，怒目噉聲，邪精畏伏。若天尊都治門戶，殿堂左右，皆立其像，防護守衛，變化無方，非常厥體，是道之烈氣所生，非胎誕而得也。今之觀內，門戶、殿堂、經藏，並制其像也。

科曰：神王、衆神之主，凡有三種。一者結氣，二者報生，三者業因。結氣者，不由胎誕，因自然之氣。報生者，從諸鬼神，有功於道，生得此身。

業報者，承其積劫因緣，主令身執。凡人成真得道，皆來監度。神王之名，抑亦無數，皆衣甲冠矛，持刀按劍，或立或坐，不常其體，役御群鬼，驅除凶惡，具諸經誥，不復詳備。

科曰：魔王，亦神王之流，凡有三種。一者三天魔王，二者五帝魔王，三者飛天魔王。皆戒鍊保舉學道行人，故大勳魔王保舉爾身也。

科曰：天丁力士、龍虎左右、香官使者，並因氣化生，應緣而出，降魔召鬼，傳言驛行，護法之靈官也。

科曰：八威，謂毒龍、猛虎、騰蛇、電獸、長牙、奔牛、獾天、雷晶，並是積業惡物，天尊威伏，使備門守關，洞穴墻圻，防非也。

科曰：四靈，謂龜、龍、麟、鳳，皆應星辰異氣，合五行之秀，或口誦靈文，身生圖籙，知代休否，因時下世，並天尊苑囿，祥禽瑞獸也。

科曰：凡天尊法座，凡有八種。一者千葉蓮華，二者五色獅子，三者七寶金牀，四者九層玉座，五者伏九龍，

六者摧八毒，七者坐雲霄，八者御煙霞。皆隨變現形，因機居住。今之帳座，但以七寶八珍，珠玉金碧，裝飾擬像而已，非所備也。

科曰：凡諸天尊、道君、老君，及諸聖真仙相，年久時深，或風雨飄零浸損，皆以時修，復勿使真容彫墜，當得福無量。

科曰：凡天尊形像、金銅寶玉者，每至月十五日，設齋香湯洗飾。若夾紵雕木，即揩拭使光淨，最得功德。

### 寫經品

科曰：經者，聖人垂教，叙錄流通，勸化諸天，出生衆聖，因經悟道，因悟成真，開度五億天人，教化三千國土，作登真之徑路，為出世之因緣，萬古常行，三清永式，結飛玄之氣，散太紫之章，或鳳篆龍書，瓊文寶籙，字方一丈，八角垂芒，文成十部。三乘奧旨，藏諸雲帙，閉以霞扃，使三洞分門，四輔殊統，寔天人之良藥，為生死之法橋，使衆生普超五濁之津，俱登六度之岸者也。凡有十二相，以造真經：一

者金簡刻文，二者銀版篆字，三者平石鏤書，四者木上作字，五者素書，六者漆書，七者金字，八者銀字，九者竹簡，十者壁書，十一者紙書，十二者葉書。或古或今，或篆或隸，或取天書玉字，或象雲氣金章，八體六書，從心所欲。復以總、別二門，遍生歸向。總者，盡三洞寶藏，窮四輔玄文，具上十二相，總寫流通。別者，或一字一句，或卷或裘，隨我本心，廣寫供養，書寫精妙，紙墨鮮明，裝潢條軸，函笥藏舉，燒香禮拜，永劫供養，得福無量，不可思議。

科曰：夫經，皆須作藏。凡藏，有二種。一者總藏，二者別藏。總藏者，三洞、四輔，同作一藏，上下或左右前後作重級，各安題目三洞寶經藏。別藏者，三洞、四輔，各作一藏。凡有七種：一者大洞真經藏，二者洞玄寶經藏，三者洞神仙經藏，四者太玄經藏，五者太平經藏，六者太清經藏，七者正一經藏。皆明題目，以相甄別，若次安之。若各藏，如並藏法，皆安經臺，或天尊殿，當陽左右間，左三洞、右四輔，

每藏皆作臺舉之，不得正爾頓地，巾帕裘蘊如法。置几案、香鑪，龍壁燒香，明燈存念，並須得所。藏之大小，皆在時之所制，不復爲常。

### 度人品

科曰：夫道以人弘，教因師得，若不度人，則法橋路斷，所以弘教先在度人。度人之相，凡有十二種：一者帝子天孫，二者大臣宰輔，三者皇后妃主，四者聰明智慧，五者識量明敏，六者富貴男女，七者形相端嚴，八者仁信淳厚，九者行業精苦，十者講誦精熟，十一者勇猛精進，十二者凡厥有心。擇此十二，度使出家，下自一人，上至億載，紹隆法教，宣揚經傳。又有二十五種相，可使出家：一者家世奉道、信樂經法，二者見世奉道、信樂經法，三者己身奉道、信樂經法，四者家世淳善、信奉正真，五者見世淳善、信奉正真，六者己身淳善、信奉正真，七者經業優長，八者行業精苦，九者鍊氣斷穀，十者專誠於道，十一者誓弘大道，十二者志宣經教，十三者習道來久，十

四者清淨身心，十五者無健羨心，十六者無世間愛著心，十七者無世間勝負心，十八者無世間憎慢心，十九者無世間矯妄心，二十者無世間毀譽心，二十一者運心舉意、唯欲出家，二十二者願得出家、紹隆正法，二十三、二十四者願得出家、爲帝王國主、天下地上君臣吏人建大福利，二十五者願得出家、爲一切衆生作生死福田、講說大乘、廣開愚暗、悉使悟道。復有十種，不得使出家：一者背臣逆子，二者刑戮子孫，三者殺師叛道，四者不信大法，五者屠沽淫慾，六者偷盜姦矯，七者飲酒食肉，八者不識罪福宿命因緣，九者形容不具足，十者凡厥兇頑。有此十種，勿使出家，損道威儀，破壞法教。又有二十五相，不合入道：一者家世誹謗、不信經法，二者見世誹謗、不信經法，三者己身誹謗、不信經法，四者家世浮僞、不奉正真，五者見世浮僞、不奉正真，六者己身浮僞、不奉正真，七者貪酒嗜肉，八者心不奉道，九者破壞大道，十

者不念經法，十一者耽習色慾，十二者專求俗事，十三者身心穢惡，十四者心懷健羨，十五者心有是非，十六者愛著聲色，十七者有世間勝負，十八者有世間憎慢，十九者常懷矯妄，二十者常思放蕩，二十一者無心奉法，二十二者唯貪世利，二十三、二十四者捉心不專，二十五者但利於己、不利一切。度人之時，依科揀擇，必須合法，方可出家，或爲國主、帝王，或爲天地日月，或爲宗廟社稷，或爲父母己身，或爲妻子眷屬，或爲亡人，或爲見存，或初登位，或新誕育，或爲八表不安，或爲四生有識，或風雨不順，或星宿乖違，或兆人疫毒，或穀稼水旱。種種福田，度人爲上，度人功德，不可思議。

科曰：凡出家，有三十相：一者常行精進、於世無染，二者常行勇猛、於道不退，三者常行慈悲、不殺衆生，四者常行愍念、濟度群品，五者常行忍辱、不懷瞋怒，六者常行歡喜、導引一切，七者常發善心、紹隆三寶，八者常發大心、修營靈觀，九者常發大心、宣

揚經教，十者常願發心、開導一切、使歸正道，十一者常願發心、講說大乘、

一切世間，若有識、若無識，一切衆生，成無上道。

因沾法位、自欲宜便、恃此紀綱、專求私利者。有此十事，不得居於此職。若不依此科簡，阿曲補舉同情之人，減筭三千六百。

開悟愚暗，十二者常願發心、爲帝王國主建大福利，十三者常願發心、爲宰輔

科曰：凡道士、女冠，出家之後，先須綱紀，整齊法教。凡有五種：一

科曰：又有二十五事綱紀，法徒可常遵奉。一者不得指三寶財物生欺

大臣作諸福田，十四者常願發心、爲一切衆生並皆離苦，十五者常願國王萬

願成就者，二擇其清廉正直、不犯於物、志建福田者，三擇其德行高遠、明

負心，一者不得於常住衆物生欺負心，三者不得於四輩施物生欺負心，四者不得於諸大德尊者生凌忽心，五者不得於中年時輩生凌忽心，六者不得於諸下座晚生生凌忽心，七者不得於諸

壽、國土安寧，十六者常願天下太平、五穀豐熟，十七者常願經教大弘、普得

閑法教、道俗歸依、善方便者，四擇其妙識時務、令於世宜而不違經教者，五

犯，九者善能和悅、撫接上下，十者巧以方便、導引法徒，十一者於諸利益、深識機宜，十二者於諸三寶、心常住

悟解，十八者常願天下衆生遍皆回向大道，十九者常持齋戒、心心不退，二

擇其勤苦、善能營始、利益法門者。擇此五者，立爲綱紀，整齊法教，以爲弘軌。若於中，有一行損於法門，則不可

下賤生凌忽心，八者身奉科戒、施爲不

十者常奉經法、念念修行，二十一者常對天尊、燒香行道，二十二者廣寫經

立。復有虛妄之人，矯立名行，情求潤己者，最不可立。又有真淳謹心不願

持，十三者於常住處、恒不破壞，十四者舍受非識、不生憎愛，十五者於諸法衆、無偏頗心，十六者於諸事宜、不自

教、散布人間，二十三者廣修靈觀、使一切回向，二十四者願我法身堅固不

樂，如此之人，詳其可否。復有十種，不可彊立：一不信宿命、罪福因緣者，

專擅，十七者內心正直、不犯於物，十八者每事發心、皆願成就，十九者凡諸財物、毫分不犯，二十者凡於三寶常

退，二十五者大作福田、遍及一切，二十六者廣行乞取、造諸功德，二十七者

二不知羞恥、唯欲利身者，三恃勢貴豪、情不潤衆者，四運心舉意、唯損常

住、皆欲利益裝嚴，二十一者善達機宜、和悅世事、令不毀壞三寶，二十二

廣運慈心、濟度群品，二十八者廣行慈悲、施惠一切，二十九者常持法相、不

住者，五每有施爲、常作機心者，六不解經戒、復不敬者，七不識時事、狼戾

自用者，八外清內濁、外愚內智、外真內僞、外廉內貪、外口是內心非者，九

捨威儀，三十者普爲三塗地獄、以無上妙法使悉昇度、永免幽苦。以此三十

事，爲出家法相，常願過去、未來、見在三世，念念不退，常在法身，永不休懈，

雖不損衆、亦不利衆、虛沾法位者，十

紹隆大道，作一切衆生，無量福利，使

紹隆大道，作一切衆生，無量福利，使

紹隆大道，作一切衆生，無量福利，使

紹隆大道，作一切衆生，無量福利，使

紹隆大道，作一切衆生，無量福利，使

紹隆大道，作一切衆生，無量福利，使

者能營護法衆、不使外犯，二十三者常教法衆、使依科戒，二十四者能得貴賤內外歸依、前心後心、堅固如一，二十五者廣運誠心、成就法門、令不破不壞、爲永劫福田、作當來衆生種善窟宅。以此二十五事，綱紀法門，成就功德，當令過去、見在、未來，獲福無量。

科曰：又有三十事不可，綱紀法門，檢校常住。一者常於三寶財物、生欺負心，二者常於常住衆物、生欺負心，三者常於四輩施物、生欺負心，四者於諸大德尊者、常生凌忽，五者於諸中年時輩、常生凌忽，六者於諸下座晚生、常生凌忽，七者身違科戒、施爲皆犯，八者於諸上下、不能和悅，九者於諸法徒，不能導引，十者於諸利益，不能方便，十一者於三寶處、心不住持，十二者於常住處、常欲破壞，十三者不容非議、生憎愛心，十四者於諸法衆、心不均普，十五者於諸事宜、常能自用，十六者姦詐、所爲矯妄，十七者每事發心、皆不成就，十八者凡諸財物、毫分必取，十九者凡於三寶常住、皆不

利益、唯潤於己，二十者不識機宜、違戾世事、令外衆侵犯、損壞三寶，二十一者不能營護法衆、益加非法，二十二者不教法徒、多違科戒，二十三破內外貴賤歸依心，二十四者前心後心、竟無定法，二十五者運心偏曲、永無成就、令法門破壞、損失福田，二十六者依附勢豪、經紀賣易三寶，二十七者依託法門、自取聲利、穢汙經教，二十八者賣三寶力、縱恣是非，二十九者聞人彈議、彌行非法，三十者侵損三寶常住、自恣身心。凡三十事，有一不可。若犯，當來生中在畜鳥獸，任人殺活，永失人道，見世盲聾瘖瘂，手攣足跛，形容不具足。若道士、女冠，當明識此科戒，依行勿犯。

科曰：凡道士、女冠爲綱紀者，須依法奉行，勤宣科戒，教示徒衆。若犯科者，各依法罰香油，鳴鐘禮拜。如再犯不悛，當致重役。若使營修觀內，又彊梁不順者，決以法科，擯還本主，必使愚人向道，不犯科戒，皆當執正，不得偏曲，敗亂科典。違者，減筭二千四

百。

洞玄靈寶三洞奉道科戒營始卷之二

### 洞玄靈寶三洞奉道科戒營 始卷之三

#### 法用品

科曰：凡法具，供養之先，道士、女冠威儀之本，不可闕也。並備諸經，但在觀中，及私房內供養之者，總名法具。

科曰：凡鐘者，四衆所會，六時急務，此器若闕，則法集乖軌。經曰：長齋會玄都，鳴玉扣瓊鐘。又法鼓會群仙，靈唱靡不同是也。凡有五種造：一者金鐘，二者銀鐘，三者五金合鑄成鐘，四者銅鐘，五者鐵鐘。或九角、八角，或四角、兩角，復有無角。或大則萬石，小則一斗，各在時耳。既造成已，皆須鐫勒銘記國號、年歲、郡縣、觀名、所爲之意，使萬代有歸，六時不替矣。

科曰：凡磬，以節度威儀，容止所要。有六種相：一者玉，二者金，三者銀，四者銅，五者鐵，六者石。或兩角、

四角，或九角、無角，或狀若鈎，並題所識，永爲供養。凡鐘磬，皆須作虞懸之。

科曰：凡天尊殿堂，及諸安置經像處所，皆須造帳座，幡蓋旌旆，節輿香鑪，華珮几案，帕縵幡竿，燈臺燈檠，燭檠燈籠，壇纂門榜，香合法具，事事種種。或羅綺錦縵，飾金琢玉，翠羽翡翠，丹青珠璧，琉璃玳瑁，連貫填錯，七寶九光，三明六出，華麗解淨，種種如法，供養天尊，永世福田，一不可闕，當須修造，最爲功德。

科曰：凡幡，有二十一種。一者連金，二者貫玉，三者綴珠，四者線銀，五者繡綺，六者織成，七者雜錦，八者諸羅，九者錯綵，十者雕鏤，十一者結絲，十二者叢縷，十三者雲霞，十四者變書，十五者線作，十六者純色，十七者間色，十八者顯畫，十九者畫字，二十者五色，二十一者九色。或長或短，或闊或狹，或三尺、五尺、七尺、九尺，一丈、二丈、四十九尺、百尺、千尺，或一首、兩首、十首、百首、千首、萬首，皆

隨時所辦。復爲亡人，有遷神轉魂、度生九天三塗等幡。爲病人，又造度厄消灾解厄、延年長命保護等幡。居家平常，復有致福延祥、期年保壽、修齡益筭等幡。蓋任力所造，皆長竿懸之於庭，或經像左右，并房廊院宇之側，所在供養。

科曰：凡造香鑪，有一十五種相。一者雕玉，二者鑄金，三者純銀，四者鍮石，五者鑄銅，六者柔鐵，七者七寶，八者雕木，九者彩畫，十者純漆，十一者瓷作，十二者瓦作，十三者石作，十四者竹作，十五者時作。皆大小隨時，舞鳳盤龍，飛雲卷霧，或蓮華千葉香山，或復雕鏤隱起，或朴素平縵，三足、六足、九足、獨足，各隨所宜也。

科曰：凡造巾帕，有八種。一者雜錦，二者雜羅，三者雜綾，四者織成，五者繡作，六者錯綵，七者純色，八者畫作。皆大小在時，脩短任制，或鏤金垂玉，連珠綴藥，種種裝飾，皆襍裊藏諸匣匱矣。

科曰：凡經，每一部，或五卷、十

卷，皆須著裘。凡裘，有五種。一者錦綺，二者織成，三者繡作，四者純綵，五者畫繪。皆內安裏及帶如法，皆書題曰某經。

科曰：經函，凡有十二種。一者雕玉，二者純金，三者純銀，四者金鏤，五者銀鏤，六者純漆，七者木畫，八者彩畫，九者金飾，十者寶裝，十一者石作，十二者鐵作。大小任宜。

科曰：凡經厨，有六種。一者寶裝，二者香飾，三者金銀隱起，四者純漆，五者沉檀，六者名木。大小在時。

科曰：凡造經藏，皆外漆內裝沉檀，或表裏純漆，或內外寶裝，或表裏彩畫，或名木純素，各在一時，大小多少，並隨力辦。或作上下七重，或三重。並別三間，或七間，安三洞、四輔，使相區別。門上皆置鎖鑰，左右畫金剛神王，悉須作臺安，不得直爾頓地。

科曰：凡講經座，高九尺，方一丈，四脚，安牙版裙，朱漆，或木素，皆畫金剛神王。或十座、百座，并須有偶。安閣道欄楯，并須如法。

科曰：凡常讚經座，高五尺，方亦如之，與講座同軌制，裝飾與講座等。

科曰：凡經架，有十種。一者玉作，二者金作，三者銀作，四者沉水，五者紫檀，六者白檀，七者黃檀，八者名木，九者純漆，十者金銀隱起，或金玉珠綵裝校。皆須作函藏舉，勿得隨宜頓地。

科曰：凡造天尊前案及讀經案，有六種。一者玉作，二者金作，三者銀作，四者石作，五者香作，六者木作。大小任宜。其讀經案，廣一尺二寸，長一尺八寸，高一尺五寸，種種裝校任時，皆上制巾帕相稱。

科曰：然燈之法，先造燈籠，周匝障蔽，勿使風吹，不令蟲入。每經像諸院，并房門行路皆懸，照明內外，不得替闕。

科曰：凡經篋、函笥、簡、襍囊等，各隨時制造，珠玉、錦綺、羅縠，各任力所爲也。

科曰：凡天尊，及真人上蓋，有十種。一者飛雲，二者翔鸞，三者舞鳳，

四者蓮華，五者仙芝，六者七寶，七者繡綺，八者諸物合成，九者純色，十者綵畫。皆珠玉珮帶流蘇，垂鈴貫玉，隨時所建。若道士、女冠所持，但翠碧，八角或四角，圓方任時，垂帶曲柄，自揜而已，故手執晨華是也。

科曰：輦輿車駟，皆仙聖所御，供養威儀，如今王者所建也。

科曰：旌節幢飾，亦神仙所持，既具經典，即威儀之限，如今國家所制也。

科曰：凡華樹華籠，導引所須，每觀須造作架，插天尊前，紙籠勿使損汙。有闕，減筭一百八十。

科曰：凡燒香，火鑪并蓋合、火七筋、杓火鉢、灰篩、盛炭器籠、炭丸、罩灰繖、拭鑪巾、火七筋架合、炭丸器調度，各隨宜作，安天尊殿，或左右小屋中。違，減筭六百八十。

科曰：凡繩牀、夾膝、如意、曲几、塵拂、澡灌，雖非天尊左右急須，亦道士、女冠供養切要，並隨時造備，不得闕替。

### 法服品

科曰：道士、女冠三洞法服，各有儀制，具如本經，當依法制服，具依下卷。其山文霞納暈畫等帔，無擬天尊身上九色離羅之狀，講說三洞大乘，敷揚妙道，陞高座大德法師所服。若具上法，登壇入靜，告齋行道，啓導之首，及常修經法，或傳授經戒，威儀所須，聽臨事暫披，事竟還罷。除此之外，皆不得輒服，減筭一千二百。

科曰：凡諸女冠裙，皆全幅帖緣，染用梔黃，深色綽袖，如道士制，皆不得淺淡雜色。違，減筭二百四十。

科曰：道士、女冠執役衣，先不具科，今備出之。其上、中、下衣，皆用淺黃色，若黃屑土黃，作淡色，短小稱身制之。若在觀居房，供養師主尊年耆德，或修飾經像，執捉營爲，皆服此衣，名爲執役。若道士、女冠，裊袴衫襦，並作黃屑色，不得餘色及白。違，減筭三百六十。

科曰：道士、女冠，皆有冠幘，名有多種，形制各殊，具在經中，具如下

卷。並用穀皮筍籜，或烏紗純漆，依其本制。皆不得鹿皮，及珠玉綵飾，其簪聽用牙玉骨角，亦自須依法，皆函筍盛舉，勿使顯露，及俗人犯觸。違，減筭二百六十。

科曰：道士、女冠履制，皆圓頭，或二儀像，以皮布繩絹裝飾，黃黑其色，皆不得羅綺錦繡、畫繡間錯、珠條隱帖。及俗履，或青紫錦繡。其襪，並須純素繩布絹爲之。其鞞圓頭闊底，鞣唯麻而已。自外皆不得著。違，奪筭二百四十。

科曰：凡道士、女冠卧具，皆用繩布絹，染作黃屑，或淺槐色，若青綠碧緋紫、錦綺纈雜暈綵，皆不得服。用其氈席、牀褥，悉皆如之。褥，聽用紫碧褐等。枕，用木或純漆，正四方作之，不得斜曲爲異形，或承髻金銀雕飾，皆下鋪淨巾。違，奪筭三百六十。

科曰：凡道士、女冠，體佩經戒、符籙，天書在身，真人附形，道氣營衛，仙靈依託，其所著衣冠，名爲法服，皆有神靈敬護。坐卧之間，特宜清淨，或

赴緣入俗，教化人間，不可將我法身，混同俗事。凡人狀席，穢氣稍多，衣服尊卑，自須分別，須各作坐。褥方四尺，表裏帖緣，大德尊者法師、及具上法者用紫，餘皆槐色，並不得以錦綺珠條帖絡，出入隨身。若入俗間，則不用也。違，奪筭三百六十。

### 居處品

科曰：道士、女冠，居處鋪牀，宜依四壁單行，不得前後合鋪。若坐若卧，皆獨處一牀。違，奪筭一百二十。

科曰：道士、女冠坐卧處，皆不得施帳座、屏風、障子。若屋宇穿漏，風塵出入，聽作青布縵，或縵帳周匝而已。違，奪筭一百二十。

科曰：凡道士、女冠居處，唯虛淨素朴而已。除曲几、夾膝、如意、塵拂、香鑪、香合、經案、巾帕、函筍、坐褥、繩牀、經藏、燈臺、衆生食盤、澡灌等，非法器玩具，皆不合畜用。違，奪筭三百六十。

科曰：道士、女冠食器，有五種相。一者純漆，二者銅作，三者石作，



四者鐵作，五者瓦作。皆三重，大者五升，中者三升，小者一升五合。衆生食盤或鉢一，容半升，匙挾銅漆，餘並不得充用。淨巾二，唯供齋堂所用，自他所及他用，悉不得。常須清淨，名曰齋器。每洗拭安架筯，勿雜他器。違，奪筭二百八十。

科曰：道士、女冠房內，皆須造浴室，內外密淨。凡犯穢及汗垢，即浴。違，奪筭一百二十。

科曰：凡道士、女冠居住，先須有泉井，每令清淨，勿使穢雜、及六畜屍產穢。凡用水，皆先濾後用。違，奪筭一百二十。

科曰：凡道士、女冠居處，先須備澡灌注椀，或盆器，貯淨水。舉動運爲，須漱口洗手。其器，金銀銅瓦，任時所有，皆安蓋，無使風塵蟲物穢汗，兼淨巾相覆。違，奪筭八十。

科曰：凡道士、女冠居處，先須造厠，當隨土深淺，上造小屋，使表裏密淨，不得露見穢汗，違，奪筭一百二十。

洞玄靈寶三洞奉道科戒營始卷之三

## 洞玄靈寶三洞奉道科戒營始卷之四

### 誦經儀

初入堂，祝漱如法，三上香，繞經一周，復三上香，各依位，拱手或執簡端身，唱人各恭敬。

至心稽首太上無極大道。

至心稽首三十六部尊經。

至心稽首玄中大法師。

唱，平坐如法。行淨水訖，一人持香旋行。熏淨訖，行經，復持香熏經，乃唱讚詠如法，呪曰：宿命有信然，弱譽謂之无。皆欲眼前見，過目則言悠。大賢明道教，慘戚憫頑夫。哀哀念子苦，懃懃令我憂。次唱，靜念如法。各放手簡，著几案上，平坐接手，叩齒三十六通，冥目存思五色雲氣覆滿一室，青龍、白虎、獅子、玄龜、朱雀、鳳凰備守前後，仙童玉女、五帝靈官、神仙兵馬、九億萬衆營衛左右，便搖身三過，祝曰：寂寂至無宗，虛峙劫刃阿。豁

落洞玄文，誰測此幽遐。一入大乘路，孰計年劫多。不生亦不死，欲生因蓮華。超凌三界塗，慈心解世羅。真人無上德，世世爲仙家。次唱一切誦，各念無上尊七遍訖，唱請轉法輪，乃一時開經。若別推一人，上座誦經，便唱請法師陞高座。法師起，執簡當經像三禮，從南西北向上座，左轉東向叩齒，有思如法。下座，還從南面下，三拜。此洞玄法。餘洞真、洞神，各依本法。若修行經法者，復各案本科，今不復具。讀經竟，收經一人，行水灑淨，復持香旋行。歛淨總訖，讚詠如法，唱人各恭敬，三上香，執簡平立，至心歸命太上三尊、十方衆聖。高德一人歎經啓願，詳夫三洞寶經，萬天勝範，結飛玄之氣，成雲篆之章，義冠无生，文垂永劫。故天地持之以分判，日月因之以運行，鬼神敬之以變通，人民奉之以開度。是以詠之者，則形陟絳霄；聞之者，乃神生碧落。莫不人天仰賴，生死依憑，爲群品之津梁，寔衆真之戶牖。不可得而言者，其大乘之蘊乎。

甲等今爲某事，轉某經若干卷若干遍爾。其開函演奧，則響徹三千；執卷吟玄，乃聲聞五億。當願侍香金媛，結香字於天中；典經玉郎；進經文於簡上。即使愆消昔劫，福降今辰，存亡喜開泰之恩，動植悅生成之德。以茲勝善，遍采裝嚴，三塗罷楚毒之勞，九夜絕辛酸之苦，暨乎悠悠庶品，蠢蠢群生，俱乘六度之舟，並上三清之岸。願轉經已後，萬善扶持，千災蕩滅，至心稽首正真三寶。願轉經已後，福被幽明，功沾遠近，至心稽首正真三寶。願以此轉經功德，資被群生，離苦解脫，至心稽首一切衆聖。若常修經法，當修行誦太極經讚七首、靈書四天王頌四首，及真文八景讚、上經歌頌，今不復具。

科曰：凡讀誦經，依此儀。違，奪筭二千四百。

### 講經儀

法師盥漱，冠帶如法。弟子持香花，拜請導引，一如科說。法師登經像前席，端立執香鑪當心訖，唱人各恭

敬，歸依大道。當願衆生解悟正真，發無上心，歸依經法。當願衆生智慧洞開，深廣如海，歸依玄師。當願衆生辨幽釋滯，並弘正道。法師登閣道平立，唱平坐如法。待法師三上香竟，復唱靜念如法。又存念訖，唱讚詠如法。呪曰：寂寂至無宗，虛峙劫刃阿。豁落洞玄文，誰測此幽遐。一入大乘路，孰計年劫多。不生亦不死，欲生因蓮華。超凌三界塗，慈心解世羅。真人無上德，世世爲仙家。次唱請轉法輪，復唱一切誦，普誦無上尊七遍。都講便叙經唱經，法師皆約敕座下，禮經一拜。按文解釋罷，講作安和，樂未央聲。每講罷，法師執香鑪捻香，願以此講經功德，莊嚴皇帝太子、諸王公侯牧伯、州縣令長、天下人民、講經信士、見在法徒、一切衆生、三塗苦輩，藉此善根，悉得體解大乘，歸心正道，咸出愛河，俱遊法海。更唱人各恭敬，至心歸命太上三尊、十方衆聖。願皇帝百福莊嚴，萬善雲集，至心稽首正真三寶。以此講經功德，資被群生，離苦解脫，

至心稽首，禮得道衆聖、依法弟子，香花送法師至本處，禮拜如法。

科曰：凡講經，皆依此法。違，奪筭一千二百。

### 法次儀

科曰：道士、女冠法位、次第、稱號，各有階級，須知尊卑上下，不得叨濫，今具之于下，宜熟詳之。違，各奪筭一千二百。

科曰：道民、賢者、信士、善男子、善女人、行者，皆是道士、女冠美前人之稱，非是詞狀控告之限。即法師、大德、尊師、上人，是外屬男子美出家之稱，亦非啓奏表請之宜。又如貧道，是出家之謙詞，弟子是在俗之卑稱，復非三寶前所用。此又異三洞弟子、法師之稱，宜熟詳之，今備具之：

男人、女人、即常人未參經戒之稱也戶長、輪誠於道，係名戶籍者也。大道弟子、天尊弟子、三寶弟子、歸心大道、勲經教者，得加此號也。清信弟子、受天尊十戒、十四持身，或十二可從、六情等戒，得加此號也。男生、女生、七歲、八歲，受更令一將軍錄，得加此號。錄生、

十歲已上，受三將軍符籙、十將軍符籙、三歸五戒，得加此號。

科曰：凡十號男女，詞告啓奏，得稱此號於天尊大道前，皆下言某甲，不得直爾。違，奪筭三百六十。

正一法位童子，一將軍籙、三將軍籙、十將軍籙、籙生三戒文、正一戒文。  
七歲、八歲，或十歲已上受，稱正一籙生弟子。

七十五將軍籙、百五十將軍籙、正一真卷、二十四治、正一朝儀、正一八誠文。受，稱某治氣男官、女官。

黃赤券契、黃書契令、五色契令、八生九宮契令、真天六甲券令、真天一契令、五道八券。受，稱三一弟子、赤陽真人。

九天破殄、九宮扞厄、都章畢印、四部禁氣、六宮神符、九天都統、斬邪大符、九州社令、天靈赤官、三五契、三元將軍籙。受，稱某治氣正一盟威弟子。

陽平治、都功版、九天真符、九天兵符、上靈召、仙靈召、七星籙、二十八宿籙、元命籙。受，稱陽平治太上中氣，領二十四生氣，行正一盟威弟子、元命真人。

逐天地鬼神籙、紫臺祕籙、金剛八

牒仙籙、飛步天剛籙、統天籙、萬丈鬼籙、青甲赤甲籙、赤丙籙、太一无終籙、天地籙、三元宅籙、六壬式籙、式真神籙、太玄禁氣千二百大章、三百六十章、《正一經》二十七卷、老君一百八十戒、正一齋儀、老子三部神符。受，稱太玄都正一平氣，係天師陽平治太上中氣，二十四生氣督察，二十四治三五大都功，行正一盟威、元命真人。

《洞淵神呪經》十卷、神呪券、神呪籙、思神圖、《神仙禁呪經》二卷、橫行玉女呪印法、黃神赤章。受，稱洞淵神呪大宗三昧法師、卜兆真人。

老子金鈕青絲、十戒、十四持身戒。受，稱老子青絲金鈕弟子。

老子《道德經》二卷、《河上真人注》上下二卷、《五千文朝儀雜說》一卷、《關令內傳》一卷、戒文一卷。受，稱高玄弟子。

《老子妙真經》二卷、《西昇經》二卷、《玉歷經》一卷、《歷藏經》一卷、《老子中經》一卷、《老子內解》二卷、《老子節解》二卷、《高上老子內傳》一卷、皇人三一表文。兼前，稱太上高玄法師。

太一八牒遁甲仙籙、紫宮移度大籙、老君六甲祕符、黃神越章。受，稱太上弟子。

金剛童子籙、竹使符、普下版、三皇內精符、三皇內真諱、九天發兵符、天水飛騰符、八帝靈書內文、黃帝丹書內文、八成五勝十三符、八史籙、東西二禁、三皇三戒、五戒、八戒文。受，稱洞神弟子。

天皇內學文、地皇記書文、人皇內文、三皇天文大字、黃女神符、三將軍圖、九皇圖、昇天券、三皇傳版、三皇真形內諱版、三皇三一真形內諱版、三皇九天真符契令、三皇印、三皇玉券、三皇表、繫帶、《洞神經》十四卷。受，稱無上洞神法師。

《太上洞玄靈寶昇玄內教經》一部十卷、昇玄七十二字大籙。受，稱昇玄法師。

元始洞玄靈寶赤書真文籙、太上洞玄靈寶二十四生圖三部八景自然至真玉籙、太上洞玄靈寶諸天內音籙、靈寶自然經券、元始靈策。受，稱太上靈寶洞玄弟子。

靈寶中盟經目

《太上洞玄靈寶五篇真文赤書》上下二卷、《太上洞玄靈寶玉訣》上下二卷、《太上洞玄靈寶空洞靈章經》一卷、《太上升玄步虛章》一卷、《太上洞玄靈寶九天生神章經》一卷、《太上靈寶自然五勝文》一卷、《太上洞玄靈寶諸內音玉字》上下二卷、《太上洞玄靈寶智慧上品大戒經》一卷、《太上洞玄靈寶上品大戒罪根經》一卷、《太上洞玄靈寶長夜府九幽玉匱明真科經》一卷、《太上洞玄靈寶智慧定志通微妙經》一卷、《太上靈寶本業上品》一卷、《太上洞玄靈寶玄一三真勸戒罪福法輪妙經》一卷、《太上洞玄靈寶無量度人上品妙經》一卷、《太上洞玄靈寶諸天靈書度命妙經》一卷、《太上洞玄靈寶滅度五鍊生尸妙經》一卷、《太上洞玄靈寶三元品戒經》一卷、《太上洞玄靈寶二十四生圖三部八景自然至真上經》一卷、《太上洞玄靈寶五符序經》一卷、《太上洞玄靈寶真文要解經上》一卷、《太上洞玄靈寶自然經上》一卷、《太上

洞玄靈寶敷齋威儀經》一卷、《太上洞玄靈寶安志本願大戒上品消魔經》一卷、《仙公請問上下》二卷、《衆聖難經》一卷、《太極隱訣》一卷、《靈寶上元金錄簡文》一卷、《靈寶下元黃錄簡文》一卷、《靈寶朝儀》一卷、《步虛注》一卷、《靈寶修身齋儀》二卷、《靈寶百姓齋儀》一卷、《靈寶三元齋儀》一卷、《靈寶明真齋儀》一卷、《靈寶黃錄齋儀》一卷、《靈寶金錄齋儀》一卷、《靈寶度自然券儀》一卷、《靈寶登壇告盟儀》一卷、《靈寶服五牙立成》一卷、《太上智慧上品戒文》一卷、《靈寶衆簡文》一卷、《衆經序》一卷。受，稱無上洞玄法師。

五嶽真形圖、五嶽供養圖、五嶽真形圖序、靈寶五符、五符序、五符傳版、上清北帝神呪文、太玄河圖九皇寶錄、洞真八威召龍錄、洞真飛行三界錄、上清大洞衆經券、上清大洞真經券、上清八素真經券、上清步五星券、上清步天綱券、上清四規明鏡券、上清飛行羽章券、上清金馬契、上清玉馬契、上清木馬契、上清黃庭契、上清太上玉京九天

金霄威神玉呪太上神虎玉錄、上清太上太微天帝君金虎玉精真符錄、上清太上玉京九天金霄威神玉呪經、太上大神虎符錄、上清太微黃書八錄真文、一名玄都交帶錄、上清太上上皇二十四高真玉錄、上清高上太上道君洞真金玄八景玉錄、上清太上三天正法除六天文錄、上清太極左真人曲素訣詞、一名九天鳳氣玄丘太真書錄、上清太微帝君豁落七元上符錄、上清太上石精金光藏景錄形攝山精法錄、上清太上元始變化寶真上經九靈太妙龜山元錄、上清太上上元檢天大錄、上清太空中元檢仙真錄、上清太上下元檢地玉錄、上清玉檢檢人仙錄、上清太上素奏丹符錄、上清太上瓊宮靈飛六甲錄、上清高上元始玉皇九天譜錄、上清中央黃老君太丹隱書流金火鈴錄、上清傳版。受，稱洞真法師。

洞玄靈寶三洞奉道科戒營始卷之四

# 洞玄靈寶三洞奉道科戒營始卷之五

## 上清大洞真經目

《上清大洞真經三十九章》一卷、  
《上清太上隱書金真玉光》一卷、《上清八素真經服日月皇華》一卷、《上清飛步天剛躡行七元》一卷、《上清九真中經黃老祕言》一卷、《上清上經變化七十四方》一卷、《上清除六天文三天正法》一卷、《上清黃氣陽精三道順行》一卷、《上清外國放品青童內文》二卷、《上清金闕上記靈書紫文》一卷、《上清紫度炎光神玄變經》一卷、《上清青要紫書金根上經》一卷、《上清玉精真訣三九素語》一卷、《上清三元玉檢三元布經》一卷、《上清石精金光藏景錄形》一卷、《上清丹景道精隱地八術》上下二卷、《上清神州七轉七變舞天經》一卷、《上清大有八素大丹隱書》一卷、《上清天關三圖七星移度》一卷、《上清九丹上化胎精中記》一卷、《上清太上

六甲九赤班符》一卷、《上清神虎上符消魔智慧》一卷、《上清曲素訣詞五行祕符》一卷、《上清白羽黑翮飛行羽經》一卷、《上清素奏丹符靈飛六甲》一卷、《上清玉珮金璫太極金書》一卷、《上清九靈太妙龜山元錄》三卷、《上清七聖玄紀徊天九霄》一卷、《上清太上黃素四十四方》一卷、《上清太霄琅書瓊文帝章》一卷。此三十四卷玉清、紫清、太清大洞經限，是王君授南真。《上清高上滅魔洞景金玄玉清隱書》四卷、《上清太微天帝君金虎真符》一卷、《上清太微天帝君神虎玉經真符》一卷、《上清太上黃庭內景玉經太帝內書》一卷。右七卷，紫虛元君南嶽上真魏夫人在世受經限。《上清三元齋儀》二卷、《上清傳授儀》一卷、《上清告盟儀》一卷、《上清朝儀》一卷、《上清投簡文》一卷、《登真隱訣》二十五卷、《真誥》十卷、《八真七傳》七卷、《洞真觀身三百大戒文》一卷。右受，稱無上洞真法師。上清經，總一百五十卷。上清太素交帶，上清玄都交帶，上清白紋交帶，上清紫紋交帶，一曰迴車交帶，亦謂畢道

券，又名元始大券。右受，稱上清玄都大洞三景弟子，无上三洞法師。

科曰：道士、女冠，參受經戒法錄，須依此次第名位，不得叨謬。受法之日，師宜詳審分明，示其品目。違，奪筭三千六百。

科曰：道士、女冠受經戒已，皆當誦其戒文，使精熟。每至月一日、十五日、三十日，總集法堂，遞相簡閱。三犯不通，罰香五斤，違，奪筭一千二百。

科曰：道士、女冠所受經戒法錄，皆依目抄寫，裝褙入藏，置經堂、靜室或閣，如法具龍壁幡花真文，朝夕供養禮懺。不得輕慢洩穢，傳付他人，常當誦念轉讀。若身之後，門人、同學校錄供養，不得洩慢。其正一符錄、及諸券契函盛，隨亡師所在山谷，或墓內，別作坎安置，餘皆不得輒隨身去。所以者，真經寶重，靈官侍奉，尸朽之穢，寧可近之，此最至慎。違，魂謫三官，殃及七世子孫，各明慎之。

科曰：道士、女冠，總兼前法、備

修行者，啓奏之曰：稱上清玄都大洞三景弟子，奉行靈寶自然昇玄法師、某獄某帝真人、三皇洞神洞淵神呪大宗三昧小兆真人，臣某上啓，或再拜。若正一法備，稱太玄都正一平氣，係天師陽平治太上中氣，領二十四生氣，督察二十四治三五大都功，正一盟威元命真人，臣甲再拜上言。若叨僭此位，魂考三官，奪筭總盡，慎之慎之。

法服圖儀

科曰：服以象德儀形。道士、女冠，威儀之先，參佩經法，各須具備，一如本法，不得叨謬。違，奪筭三千六百。

正一法師：玄冠、黃裙、絳褐、絳帔，二十四條，列圖如左。



高玄法師：玄冠、黃裙、黃褐、黃帔，二十八條，列圖如左。

洞神法師：玄冠、黃裙、青褐、黃帔，三十二條，列圖如左。



洞玄法師：芙蓉冠、黃褐、黃裙、紫帔，三十二條，列圖如左。



洞真法師：元始冠、青裙、紫褐、紫帔青裏，表二十四條，裏十五條，列圖如左。



大洞法師：元始冠、黃裙、紫褐、

如上清法，五色雲霞帔，列圖如左。



三洞講法師：元始冠、黃褐、絳裙、九色離羅帔，列圖如左。



科曰：道士、女冠，若不備此法衣，皆不得輕動寶經。具其法服，皆有神童侍衛。正一法衣，將軍五人、力士八人侍衛。高玄法服，神童、神女各二人侍衛。洞神法衣，天男、天女各三人侍衛。洞玄法衣，玉童、玉女各八人侍衛。洞真大洞三洞法衣，玉童、玉女各十二人侍衛。總謂之法服。違，侍童遠身，四司考魂，減筭二千四百。

科曰：凡道士、女冠，欲參經法，皆預備法衣。既告齋傳法位訖，即須冠帶法服，執簡稱名位，拜其本師，朝

謁太上。違，靈官不附身，魂考五帝，奪筭一千二百。

科曰：女冠法服，衣褐，並同道士，唯冠異制。法用玄紗，前後左右皆三葉，不安遠遊。若上清大洞女冠，冠飛雲鳳氣之冠，今列圖如左。



山居法師法服：二儀冠、上下黃裙，帔三十六條，列圖如左。



凡常道士法服：平冠、上下黃裙，帔二十四條，列圖如左。



凡常女冠法服：玄冠、上下黃裙，帔十八條，列圖如左。



科曰：凡道士、女冠履屨，或用草，或以木，或純漆。布帛絕絹，漫飾衣帔，皆二儀，或山像，內外朴素，不得綵飾華綺。違，奪筭一千四百。

科曰：凡履，下皆有龍虎神伏，夜安版簀牀几上，不得正爾頓地，及履廁溷。違，奪筭八百二十。

科曰：簪用牙角、竹玉，任依時制，皆不得雕鏤為異形像。違，奪筭八百二十。

科曰：道士、女冠法衣，皆不得冒犯穢惡，假借他人，須箱篋藏揲，冠履亦然。違，奪筭一千二百。

洞玄靈寶三洞奉道科戒營始卷之五

### 洞玄靈寶三洞奉道科戒營始卷之六

#### 常朝儀

四衆三洞，可旦夕常行，所以謂之常朝。若別入室朝真，自依五等朝法也。

洗漱如法。

初入堂，上香旋行，頌曰：

學道當勤苦，歛信運丹誠。燒香歸太上，真炁雜煙馨。唯希開大宥，七祖離幽冥。

三上香，各依位，端身執簡，禮十方，從東始。上香訖，唱人各恭敬。

至心歸命東方玉寶皇上天尊，至心歸命南方玄真萬福天尊，至心歸命西方太妙至極天尊，至心歸命北方玄上玉晨天尊，至心歸命東北度仙上聖天尊，至心歸命東南好生度命天尊，至心歸命西南太靈虛皇天尊，至心歸命西北无量太華天尊，至心歸命上方玉虛明皇天尊，至心歸命下方真皇洞神天尊。各長跪執簡，當心懺悔曰：

衆等至心歸身無極大道天尊，懺悔皇家、及臣衆等一切衆生，前代今身，或身形所犯，四肢舉措，動違戒律，不依經典。身業大罪，無量無邊，因今禮懺，並乞蕩除，皆願衆等，身入至仙，會道合真，稽首十方真正三寶。

衆等至心歸神無極大道天尊，懺悔皇家、及臣衆等一切衆生，前代今身，或神識所犯，志念不專，情浮意動，馳騁不息。心業大罪，無量無邊，因今禮懺，並乞蕩除，皆願衆等，神合真寂，洞入自然，稽首十方真正三寶。

衆等至心歸命無極大道天尊，懺悔皇家、及臣衆等一切衆生，或口業所犯，善惡反論，綺言飾非，華詞惑衆。口業大罪，無量無邊，因今禮懺，並乞蕩除，皆願衆等，性命合道，玄會無爲，稽首十方真正三寶。

人各平立唱，一禮北向，平立誦經，頌曰：

樂法以爲妻，愛經如珠玉。持戒制六情，念道遣所欲。淡泊正氣停，蕭然神靜默。天魔並敬護，世世受大福。

鬱鬱家國盛，濟濟經道興。天人同其願，縹緲入大乘。因心立福田，摩法輪昇。七祖生天堂，我身白日騰。大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

至心稽首太上無極大道，至心稽首三十六部尊經，至心稽首玄中大法師。

一願二儀長久，覆載無窮，至心稽首真正三寶；二願日月運行，光明普照，至心稽首真正三寶；三願皇家宗廟先靈，神昇九天，志心稽首真正三寶；四願皇帝聖化無窮，德合一儀，至心稽首真正三寶；五願皇儲仁孝貞明，紹隆聖緒，至心稽首真正三寶；六願諸王兄弟、文武職僚，奉上盡誠，安人用道，至心稽首真正三寶；七願天下太平，兵戈止息，至心稽首真正三寶；八願師尊父母，亡者生天，見存安樂，至心稽首真正三寶；九願衆等慧業日新，智燈無盡，至心稽首真正三寶；十願十方施主，凡厥有緣，俱捨苦

因，咸登道岸，至心稽首真正三寶；十一願法界威靈、金剛力士，用道神通，攝邪歸正，至心稽首真正三寶；十二願三塗五苦、法界衆生，並出欲纏，同昇福岸，至心稽首真正三寶。

詠學仙頌

學仙行爲急，奉戒制情心。虛夷正氣居，仙聖自相尋。若不信法言，胡爲棲山林。

科曰：凡朝，依此儀。違，奪筭一千二百。

中齋儀

時至澡漱，供養悉如法，唱人各恭敬。

至心稽首太上無極大道，至心稽首三十六部尊經，至心稽首玄中大法師。

行道行香，一切衆官誦無上尊，行香。頌曰：

道以齋爲先，勤行登金闕。故設大法橋，普度諸人物。宿世恩德報，道心超然發。身飛昇玄都，七祖咸解脫。至心稽首太上三尊、十方衆聖。



齋官長跪，歎道功德。

原夫无色之己，示妙色於人間；无身之身，見真身於象外。故能形分百萬，變化无窮，影散億千，隨迎莫測。由是慈周法界，則劫劫度人；德被塵沙，乃方方教化。或遊行八十一國，化被西戎；或在世九百餘年，導茲中夏。普使人天悟道，長登解脫之門，生死歸真，並出輪迴之浪。然後神凝金闕，獨爲萬聖之宗；體妙瓊都，高步九清之上。是知天上天下，三界十方，巍巍最尊，惟吾大道。今日齋官某甲爲某事，修營妙供，以薦微誠，歸命十方，虔心三寶。當願神通自在，俯念衆生；妙應無邊，仰垂慈澤。即使飛天下降，示罪福之科；妙行齊臨，按因緣之格。塵沙咎累，並乞消除；浩劫愆尤，皆蒙蕩滌。見在善根增長，共騫樹以同年；過去惡業消亡，等香林之受樂。憑茲勝福，普暨无窮，九幽絕悲痛之魂，六趣罷輪迴之識，逮乎凡諸品彙，普是含靈，俱超愛欲之河，並陟逍遙之岸。

願齋官七世父母，神生淨土，勝報

無窮，至心稽首正真三寶；願齋官宅舍安寧，闔門和睦，至心稽首正真三寶；願齋官子孫昌熾，世出賢明，至心稽首正真三寶；願齋官罪累蕩除，福慧圓滿，至心稽首正真三寶；願天下太平，萬姓安樂，至心稽首正真三寶；願一切衆生，免離諸苦，同入正真，至心稽首得道衆聖。

平坐如法，施食呪願曰：此受食呪。

一切作福田，施食最爲先。見世受快樂，過去得生天。當來居淨土，衣食常自然。是故今供養，普獻於諸天。食遍，齊拱手呪曰：

香厨妙供，上獻天尊，中獻真聖，下及衆生，普同飽滿，福流齋官，如水歸海。

食訖，施食懺食曰：上啓十方天尊，敬白見前。大衆弟子今日所營齋供，或恐手觸不淨，衣服不淨，器物不淨，米麥不淨，事事種種，多不如法。願三寶弘慈，布施歡喜，殘有供具，迴施一切。當願施者得福，食者無罪。

齋官捻香，供養如法，唱讚詠如

法。爲諸來生，作善因緣。如蒙開悟，仰受聖恩。

次齋官持淨施，云布施呪，願上啓十方三寶，一切真聖，齋官某甲爲某事，設齋已訖，猶恐功德未圓，更捨淨財，迴施三寶。當願布施已後，七祖生天，見存快樂，世世生生，得福無量。

次唱持念，人各恭敬，至心稽首太上三尊、十方衆聖。願齋官百福裝嚴，萬善歸集，至心稽首正真三寶。

以此設齋功德，資被群生，離苦解脫，至心稽首禮得道衆聖。

科曰：凡一中齋，依此儀。違，奪筭一千六百。

### 中會儀

入道戶，呪漱、捻香、叩齒，並如行道法。發鑪呪曰：

无上三天玄元始氣，太上老君，召出臣身中三五功曹、左右官使者、侍香玉童、傳言玉女、五帝直符，各三十六人，出關啓此間土地里域真官正神。今故燒香，願得太上十方正真妙氣，降

注臣身中，令所啓速達徑詣至真无極道前。

稱名位。

太上靈寶洞玄法師某嶽真人某，上啓太上无極大道、至真无上三十六部尊經、玄中大法師、三界官屬、一切威靈，今故燒香，願以是功德，歸流某家，九玄七祖，見前人口，乞丐原赦，前生今身，一切所犯，元逆醜惡，兆罪億過，悉乞除蕩。即願亡者，上生天堂，衣飯自然，見存灾消禍滅，長居福慶善緣之中，門戶清貴，子孫昌熾，世世享祚，萬願從心。今故燒香，克獲感通，徑至无極道前。

至心稽首東方无極太上靈寶天尊，十方同。次南，次西，次北，次東北，次東南，次西南，次西北，次上方，次下方。

誦三契頌。

至心稽首太上无極大道，至心稽首三十六部尊經，至心稽首玄中大法師。

重稱名位。

太上洞玄靈寶法師某嶽真人某，上

啓太上無極大道、三十六部尊經、玄中大法師、上相上宰、四司五帝、三界官屬、一切真靈，某等今故捻香，願為某懺謝無量劫來至于今日，生死宿罪重過，或違天犯地，輕慢三寶，殺害衆生，罵詈呪詛，嫉妬慳貪，邪淫放蕩，愚癡竊盜，口是心非，三業六根，罪愆無量。因今首謝，並乞消除，願亡者生天，見存安樂，子孫昌熾，福慶自然。暨乎天下地上，五苦三塗，咸出幽牢，俱蒙惠潤，凡諸有識，並入道場。謹啓，二上香，復鑪呪曰：香官使者、左右龍虎君、侍香諸靈官，當令此間朝會之所，自然生金液丹碧，芝英百靈，衆真交會，集在香火案前。十方仙童玉女，侍衛香煙，傳奏臣向來言啓，徑至无極道前。

旋行，頌出。

道以齋為先，勤行登金闕。故設大法橋，普度諸人物。宿世恩德報，道心超然發。身飛昇玄都，七祖咸解脫。

科曰：凡中會，依此儀。違，奪筭

一千六百。

度人儀

齋時未至，應度人列階下，西面辭父母，謝九玄，合十二拜。次北面拜天子，四拜。所以者，冠帶天尊法服，更不復拜父母、國君故也，於此入道之際，須辭謝耳。既訖，拱手端身，北向三歸三寶三禮。

至心歸身太上无極大道，至心歸神三十六部尊經，至心歸命玄中大法師。迴面西禮監度三師，各三拜訖，便長跪。先保舉師為著法裙，次監度師為著雲袖，次度師為著法帔。然後便為戴法冠畢，退禮三師，三拜，北面執簡端立，師面東平立，誦智慧三首。其詞曰：

智慧起本无，朗朗超十方。結空峙玄霄，諸天挹流芳。其妙難思議，虛感真實通。有有竟不有，无无无不容。

智慧恒觀身，學道之所先。眇眇入玄津，自然錄我神。天尊常擁護，魔王為保言。晃晃金剛軀，迢迢太上清。

智慧生戒根，真道戒為主。三寶

由是興，高聖所崇受。汎此不死舟，倏歛濟大有。當此說戒時，諸天並稽首。

每至首終，齊唱善禮，一拜總訖，迴身禮十方，從北始，至心歸命北方無極太上靈寶天尊，十方同。次東，次南，次西，次東南，次東北，次西南，次西北，次上方，次下方。次退，居東面西。師西面東向，爲說十戒。新度人皆稱名受。

天尊言：善男子、善女子，能發自然道意，來入法何，受我十戒，則爲大道清信弟子，皆與勇猛飛天齊功，於是不退，可得超凌三界，得爲上清真人。汝當伏受，諦聽在心。

一者不殺，當念衆生；二者不姪，妄行邪念；三者不盜，取非義財；四者不欺，善惡反論；五者不醉，常思淨行；六者宗親和睦，無有非親；七者見人善事，心助歡喜；八者見人有憂，助爲作福；九者彼來加我，志在不報；十者一切未得道，我不有望。

天尊言：修奉清戒，每合天心，常行大慈，願爲一切，慊慊尊教，不敢中

怠，寧守善而死，不爲惡而生，於此不退，可得拔度五道，不履三惡，長齋奉戒，自得度世。新度人禮師三拜，北向禮三尊三拜。

誦奉戒頌，其詞曰：

道爲无心宗，一切作福田。立功無定主，本願各由人。虛己應衆生，注心莫不均。大聖弘至教，亦由雨降天。高陵靡不周，常卑故成淵。海爲百川王，是能合龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

科曰：凡度人，依此儀。違，奪筭一千二百。

科曰：凡八儀，道士、女冠，行事所要，指擿時須，集成此卷，當依而奉之。違，四司考魂，不復名上道科，奪筭二千四百。

洞玄靈寶三洞奉道科戒營始卷之六

（吳亞魁點校）

# 002 三洞奉道科誠儀範

敦煌本

經名：三洞奉道科誠儀範。原題金明七真撰。底本出處：敦煌 S.3863、P.3682、S.809、P.2337 號抄本。

## 三洞奉道科誠儀範

理須遐絕，宜近精思院，或兩殿別院，出迴建立，遣風露不侵，使雲霞無闕，眇通天漢，遠矚星躔，外啓四景之門，旁開八風之牖，令仙斬出入，真騎往來，可仰可希，彌高彌廣，則子晋携手，常生撫袂，旦夕可得矣。

科曰：衆妙之門，往來之徑，群真之戶，出入所由，如口之在身，方目之居面，不可闕也。凡諸觀門，皆須造閣，或立樓，上安觀額以標傑出。重級

大小，事屬一時，兩下三間，在時奢儉。凡是別院，皆須造立，莊嚴彫飾，各盡所宜，不可守常，用爲恒式。

科曰：凡觀門左右，皆別開車馬牛驢出入，不得於正門中來往。

科曰：師房在天尊殿堂周迴，四面安置，間架多少，各依當時所造。

科曰：凡道士女官入道，即須受持經誠符錄，須別作受道院，造壇及對，齋堂靜室，緣所須，皆備此院。

科曰：凡道士女官身亡，皆別置遷化院，須別立一院，造堂容供□所須，皆備此院。

科曰：凡道士女官死，法衆同義，須相開度，宜近遷化院造燒香院，安几席床座，一事以上，備此院內。

科曰：凡觀天尊殿前，皆須築土，或壘磚砌石。若構木作壇，三級五級，乃至十二級，皆案木經，蘭幕門榜，並須如法。

科曰：凡是殿堂樓閣、臺榭別院，並須作行廊、步廊、軒廊、房宇，使四面周迴。

(前缺)已，至於宰輔大臣、公侯牧伯，皆須敬挹，勿得妄趣勢利。違減筭三百六十。

科曰：凡道士女官見世人，皆當合掌正容，隨直接引，令歸正道，勿生嗔怒。違減筭一百廿。

科曰：凡道士女官，有世人致敬禮拜，皆當合掌，稱禮敬三寶，滅無量罪，得無量福，不得微誕。違減筭一百廿。

科曰：凡在路同法相逢，於尊者下路挹禮，同輩但挹而已。若女官見道士，不問老少，但下路過，不須致禮，皆不得率爾直過。違奪筭一百廿。

科曰：凡道士女官受施，皆合掌祝曰：願施主當當來生，獲福無量。違，減筭一百卅。

科曰：凡同時出家，未受經誠，計年爲長。若受經誠，計法尊卑爲長。凡有七種：第一大洞，第二洞真，第三洞玄，第四洞神，第五高玄，第六錄生，第七清信，即清信不得與錄生同座，錄生不得與高玄同座，以此例之，洞玄不

得与洞真同座。若出家在先，受經法居後，或年雖長而法位卑，皆在下坐，具依下科中違，三官考魂，減筭一千六百。

科曰：凡道士女官經法具身，或未具法，但天尊法服在身，雖父母帝王之親嚴，皆當別位別席，不得与同座，及居出家人上倚立。違五帝伐魂，減筭一千二百。

#### 道科誠慈濟品第廿四十九條

科曰：凡出家之後，常以慈爲先，每事舉心，皆生愛念，行坐卧息，恒思濟度。萬行之中，此最爲急。若違此行，道不可得。違，減筭一千六百。

科曰：凡道士女官，於空山迴路，常念發心，建立義堂，使過去未來、風寒暑濕、泥雨勞苦之人，得居廕庇，永免飄露，得福無量，增筭三百六十。

科曰：凡道士女官，常念發心，於諸津濟道路阻絕，營脩橋梁，令過去、未來、見在一切衆生，無諸鄣闕，得福無量，增筭四百廿。

科曰：凡道士女官，於窮山遠路，

常念發心，恒立義井，使過去、未來、見在一切衆生，皆得解其焦渴，潤益無闕，得福無量，增筭三百六十。

科曰：凡道士女官，所在之處，常念發心，廣植果林，令過去、未來、見在一切衆生，皆得同甘，免於飢苦，得福無量，增筭三百六十。

科曰：凡道士女官，常於暑時，常念發心，恒立義漿，散施一切，普免渴災，得福無量，增筭二百廿。

科曰：凡道士女官，所在發心恒作，悲田遍爲，一切衆生，飢寒老病不具足者，皆得飽煖，得福無量，增筭五百廿。

科曰：凡道士女官，常念發心，囚徒老病，一切厄難，普願開度，悉皆免離灾厄，得福無量，增筭三百廿。

科曰：凡道士女官，常念發心，若一切衆生有急投人，皆願救度，使永免憂苦，得福無量，增筭三百六十。

科曰：凡道士女官，若己身及父母、兄弟、眷屬、國君、帝主，一切衆生，常念發心，願贖一切生命，令免死，告

病者得差，死者得生，囚者得出，厄者得度，得福無量，增筭六百廿。

科曰：凡道士女官，常念發心，一切衆生，若在籠檻繫繫之者，普願放生，令得自在，得福無量，增筭六百廿。

科曰：凡道士女官，常念發心，一切奴婢、下賤、不自在人，皆願放免，得從賢良，永受快樂，得福無量，增筭七百廿。

科曰：凡道士女官，常念發心，一切貧窮，恒願救濟，永令豐足，得福無量，增筭七百廿。

科曰：凡道士女官，常念發心，恒行布施，令功德成就福田員滿，使一切飢寒悉皆飽足，貧窮利益，得福無量，增筭八百廿。

科曰：凡道士女官，常念發心，普施神水，洗除一切宿根罪惱，久固重病，悉令清淨，得福無量，增筭五百廿。

科曰：凡道士女官，常念發心，施諸良藥，普治一切苦病，皆令差愈平復，如故得福無量，增筭五百廿。

科曰：凡道士女官，常念發心，願

以神符，普除一切鬼摩，令人民安樂，得福無量，增筭五百廿。

科曰：凡道士女官，常念發心，施諸福食，与一切衆生，皆得飽滿，得福無量，增筭六百廿。

科曰：凡道士女官，常念發心，以善巧慈悲，勸誘一切，悉令悟道，永得福利，增筭一千二百。<sup>②</sup>

三洞奉道科誠經卷第三右見P. 3682

（前缺）年，皆依本經須師弟相對，同心一意，□□六感，不得外□，□内心怠縱。每登壇入室，行道對齋，弟子皆須肘行拜伏，罄其誠節，勿得墮慢。違，奪筭一千二百。

科曰：對齋各依本儀。如傳正一法，用正一齋，或旨教法。五千文，用靈寶法。若三皇、洞神、洞玄、上清、洞真，各用本法齋告，不得違互如弟子參受不同，或上或下，當總用靈寶法，所以者何，靈寶兼上下洞故也。既告齋已，齋中師弟皆須得警誠，靈應祥瑞，方可登壇告盟，付授經法誠錄。雖風不飄揚，星辰明朗，而無此感應，皆須

退齋，不得直尔。師當備詳科律，案其儀式，勿貪名利，冒犯明禁，此最大忌。

各宜慎之。違，奪筭一千二百。

科曰：凡三洞大經傳有年限，上聖以四万劫，上真以四劫，上仙以四千年，或千年七百歲。凡世以四十者，將明經不可易得，賢知其難遇，必使學士傾心期於一會，師真授道方於萬劫也。

若世苟有人，亦可旦暮相許如時，無其人，即萬劫未可耳，可不思之。又傳經受誠，本在厥心，精感明神，即須盟授，不要擇日。至於擇日，乃是權行小法，非為通方大道。凡厥傳付，但經法備已，即須對齋。感限畢，便付誠錄。皆不得簡擇月日，致迫時經法不具，遂持空紙，或抱白素，及假經本，冒尔登壇，深違聖旨，豈唯弟子目前叨謬，實亦師主冥中考罰。違，奪筭二千四百。

科曰：受法後三日，弟子皆須相率隨時設一供齋，以賀諸天大聖、師尊厚恩，不得正尔。違，奪筭二千八百。

科曰：師付經誠將訖，不明示弟子科誠，及法位修行次第。違，奪筭一

千二百。<sup>③</sup>

右見S. 809

## 三洞奉道科誠儀範卷第二

金明七真撰

誦經儀品第一

講經儀品第二

法次儀品第三

法服圖儀品第四

常朝儀品第五

一午儀品第六

中會儀品第七

度人儀品第八

道科誠誦經儀品第一

初入堂，洗漱如法，三上香，繞經一周。復三上香，各依位合掌，或執簡端身。唱人各恭敬，至心稽首太上無極大道，至心稽首三十六部尊經，至心稽首玄中大法師。

唱平坐如法。行清水洗漱，一人持旋行。熏淨訖，行經。復持香熏經，乃唱讚詠如法。

宿命有信然，若喪謂之無。皆欲眼前見，過目則言悠。大賢明道教，慘

蹙敏頑夫。哀哀念子苦，勤勤令我憂。

次唱靜念如法。各放手簡，著几案上，平坐接手，叩齒卅六通，冥目存思五色雲氣覆滿一室，青龍白虎，獅子玄龜，朱鳥鳳皇，備守前後。仙童玉女，五帝神官，神仙兵馬，九億萬衆，營衛左右。便搖身三過，祝曰：

寂寂至無宗，虛峙劫刃阿。豁落洞玄文，誰測此幽遐。一入大乘路，孰計年劫多。不生亦不死，欲生因蓮花。超凌三界塗，慈心解世羅。真人無上德，世世爲仙家。

次唱一切誦。各念無上尊七遍訖，唱請轉法輪，乃一時開經。若別推一人，上座誦經，便唱請法師昇高座。法師起，合掌當經像三拜，從南面北，向上座，左轉東向，叩齒存思如法。下座，還從南面下，三拜，此洞玄法。餘洞真、洞神，各依本法。若脩行齋法者，復各案本科，今不復具。讀經竟，收經一人行水洗淨，復持香旋行。歛淨摠訖，讚詠如法。唱人各恭敬，三上香，平立合掌。

至心歸命太上三尊、十方衆聖。高德一人，歎經啓願。

詳夫三洞寶經，萬夫勝範，結飛玄之氣，成雲篆之章，義冠無生，久垂永劫。故天地持之以分判，日月因之以運行，鬼神敬之以變通，人民奉之以開度。是以詠之者則形陟絳霄，聞之者乃神生白骨，莫不人天仰賴，生死依憑，爲群品之津梁，寔衆真之戶牖。不可得而言者，其惟大乘之蘊乎？甲等今爲某事，轉讀某經若干卷、若干遍，其開函演奧則響徹三千，執卷吟玄乃聲聞五億。當願侍香金媛，結香字於天中；典經玉郎，進經文於簡上。即使愆消昔劫，福降今辰，存亡喜開泰之恩，動埴悅生成之德，以慈勝善，遍悉莊嚴。三塗罷楚毒之勞，九夜絕辛酸之苦。暨乎悠悠庶品，蠢蠢群生，俱乘六度之舟，並上三清之岸。願轉經已後，萬善扶持，千災蕩滅，至心稽首正真三寶。願轉經已後，福被幽明，功沾遠近，至心稽首正真三寶。願以此轉經功德，資被群生，離苦解脫，至心

稽首一切衆聖。

若常脩經法，當旋行誦太極經讚八首，靈書四天王誦四首，及真文八景讚上經歌頌，今不復具。

科曰：凡讀誦經，依此儀。違，奪筭二千四百。

### 道科誠講經儀品第二

法師灌漱，冠帶如法。弟子持香花，拜請導引，一如科訖，法師登經像前席，端立執香鑪當心訖，唱人各恭敬。

歸依大道，當願衆生解悟正真，發无上心。

歸依經法，當願衆生智惠洞開，深廣如海。

歸依玄師，當願衆生辯幽釋滯，普弘正道。

法師登閣道平立，唱平坐如法。侍法師三上香竟，復唱靜念如法。又存念訖，唱讚詠如法。

寂寂至无宗，虛峙劫刃阿。豁落洞玄文，誰測此幽遐。一入大乘路，孰計年劫多。不生亦不死，欲生回蓮花。

超陵三界塗，慈心解世羅。真人无上德，世世爲仙家。

次唱請轉法輪，復唱一切誦。普誦无上尊七遍，都講便叙經。唱經法師皆約勅座下，禮經一拜。案文解釋罷，講作安和，樂未央聲。每講罷，法師執香鑪，捻香願曰：

以此講經功德，莊嚴皇帝太子，諸王公侯牧伯，州縣令長，天下人民，講經施主，見在法徒，一切衆生，三塗苦輩，藉此善根，悉得體解大乘，歸心正道，咸出愛河，俱淤法海。

便唱人各恭敬，至心歸命太上三尊，十方衆聖。

願皇帝百福莊嚴，萬善雲集，至心稽首正真三寶。以此講經功德，資被群生，離苦解脫，至心稽首，禮得道衆聖。

依法，弟子香花送法師至本處，禮拜如法。

科曰：凡講經，皆依此法。違，奪筭一千二百。

### 法次儀三

科曰：道士女官，法位、次第、稱號，各有階級，須知尊卑上下，不得叨濫。今具之于下，宜熟詳之。違，各奪筭一千二百。

科曰：道民、賢者、施主、善男子、善女子、行者，皆是道士、女官美前人之稱，非是詞狀控告之限。即法師、大德、尊師、上人，是外屬男女美出家之稱，亦非啓奏表請之宜。又如貧道，是出家之謙詞。弟子，是在俗之卑稱。復非三寶前所用，此又異三洞弟子、法師之稱，宜熟詳之，今備具之。  
男人，女人  
右即常人未參經誠之稱也。  
户主王甲  
右輸誠於道，係名户藉者也。  
大道弟子、天尊弟子、三寶弟子  
右歸心大道、勤誠經教者，得加此号也。

清信弟子

右受天尊十誠、十四持身，或十二可從、六情等誠，得加此号。



男生、女生

右七歲、八歲，受更令一將軍錄，得加此号。

錄生

右十歲已上，受三將軍、十將軍符錄，三歸、五誠，得加此号。

科曰：凡十号男女，詞告啓奏，得

稱此号於天尊大道前，皆下言王甲，不得直尔。違，奪筭三百六十。

正一法位：

更令錄、童子一將軍錄、三將軍錄、十將軍錄、錄生三誠文、正一五誠文

右七歲、八歲，或十歲已上受，稱正一錄生弟子。

七十五將軍錄、百五十將軍錄、正一真券、二十四治、正一朝儀、正一八誠文

右受，稱某治炁男官、女官。

黃赤券契、黃書契令、五色契令、八生九宮契令、真天六甲券令、真天三契令、五道八券

右受，稱黃赤弟子、赤陽真人。

九天破淹、九宮扞厄、都章畢印、四部禁炁、六宮神符、九天都統、斬邪大符、

九州社令、天靈赤官、三五契、三元將軍錄

右受，稱某治炁、正一明威弟子。

陽平治、都功版、九天真符、九天兵符、上靈召、仙靈召、七星錄、廿八宿錄、元命錄

右受，稱陽平治太上中炁、領廿四生

炁、行正一明威弟子、元命真人。

逐天地鬼神錄、紫臺秘錄、金剛八牒仙錄、飛步天剛錄、統天錄、萬丈鬼錄、青甲赤甲錄、赤丙錄、太一无終錄、天地錄、三元宅錄、六壬式錄、式真神錄、太玄禁炁、千二百大章、三百六十章、《正一經》廿一卷、老君一百八十誠、正一齋儀、老子三部神符

右受，稱太玄都正一平炁、係天師陽

平治太上中炁、領廿四生炁、督察廿

四治三五大都功、行正一明威、元命

真人。

《洞淵神祝經》十卷、神祝券、神祝錄、思神圖、《神仙禁祝經》二卷、橫行玉女祝印法、黃神赤章

右受，稱洞淵神祝大宗三昧法師、小

兆真人。

老子金劍青系、十誠、十四持身

右受，稱老子青系金劍弟子。

《老子道德經》二卷、《河上真人注》上下二卷、《想尔注》二卷、《五千文朝儀》一卷、《雜說》一卷、《關令內傳》一卷、《誠文》一卷。

右受，稱高玄弟子。

《老子妙真經》二卷、《西昇經》一卷、《玉歷經》二卷、《歷藏經》一卷、《老子中經》一卷、《老子內解》二卷、《老子節解》二卷、《高上老子內傳》一卷、皇人三一表

右兼，前稱太上高玄法師。

太一八牒遁甲仙錄、紫宮移度大錄、老君六甲秘符、黃神越章

右受，稱太上弟子。

金剛童子錄、竹使符、普下版、三皇內精符、三皇內真諱、九天發兵符、天水飛騰符、八帝靈書內文、黃帝丹書內文、八威五勝十三符、八史錄、東西二禁、三皇三誠、五誠、八誠文

右受，稱洞神弟子。

天皇內學文、地皇內記書文、人皇內文、三皇天文大字、黃女神符、三將軍圖九皇圖、昇天券、三皇傳版、三皇真形內諱版、三皇三一真形內諱版、三皇表、鞶帶、《洞神經》十四卷

右受，稱無上洞神法師。

《太上洞玄靈寶昇玄內教經》一部十卷、昇玄七十二字大券

右受，稱昇玄法師。

元始洞玄靈寶赤書真文錄、太上洞玄靈寶廿四生圖三部八景自然至真玉錄、太上洞玄靈寶諸天內音錄、靈寶自然經券、元始靈策

右受，稱太上靈寶洞玄弟子。

靈寶中盟經曰：

《太上洞玄靈寶五篇真文赤書》上下二卷

《太上洞玄靈寶玉決》上下二卷

《太上洞玄靈寶空洞靈章》一卷

《太上升玄步虛章》一卷

《太上靈寶洞玄九天生神章經》一卷

《太上靈寶自然五勝文》一卷

《太上洞玄靈寶諸天內音玉字》上下二

卷

《太上洞玄靈寶智惠上品大誠經》一卷

《太上洞玄靈寶上品大誠罪根經》一卷

《太上洞玄靈寶長夜府九幽玉匱明真

科經》一卷

《太上洞玄靈寶智惠定志通微妙經》一

卷

《太上靈寶本業上品》一卷

《太上洞玄靈寶太上玄一三真勸誡罪

福法輪妙經》一卷

《太上洞玄靈寶無量度人上品妙經》一

卷

《太上洞玄靈寶諸天靈書度命妙經》一

卷

《太上洞玄靈寶滅度五練生尸妙經》一

卷

《太上靈寶三元品誠經》一卷

《太上洞玄靈寶廿四生圖三部八景自

然至真上經》一卷

《太上洞玄靈寶五符序經》一卷

《太上洞玄靈寶真文要解經上》一卷

《太上洞玄靈寶自然經上》一卷

《太上靈寶敷齋威儀經》一卷

《太上洞玄靈寶安志本願大誠上品消

摩經》一卷

《仙公請問》上下二卷

《衆聖難經》一卷

《太極隱決》一卷

《靈寶上元金錄簡文》一卷

《靈寶下元黃錄簡文》一卷

《靈寶朝儀》一卷

《步虛注》一卷

《靈寶脩身齋儀》二卷

《靈寶百姓齋儀》一卷

《靈寶明真齋儀》一卷

《靈寶金錄齋儀》一卷

《靈寶黃錄齋儀》一卷

《靈寶度自然券儀》一卷

《靈寶登壇告盟儀》一卷

《太上智惠上品誠文》一卷

《靈寶衆簡文》一卷

《衆經序》一卷

右受，稱無上洞玄法師。

五岳真形圖、五岳供養圖

五岳真形圖序、靈寶五符

五符序、五符傳版

上清北帝神祝文、太玄河圖九皇寶錄  
洞真八威召龍錄、洞真飛行三界錄  
上清大洞衆經券、上清大洞真經券  
上清八素真經券、上清步五星券  
上清步剛券、上清四規明鏡券  
上清飛行羽章券、上清金馬契  
上清玉馬契、上清木馬契  
上清庭契  
上清太上玉京九天金霄威神王祝太上  
神虎玉錄  
上清太上太微天帝君金虎玉精真符錄  
上清太上玉京九天金霄威神王祝太上  
經太上大神虎符錄  
太清太微黃書九天八錄真文，一名玄  
都交帶錄  
上清太上上皇廿四高真玉錄  
上清高上太上道君洞真金玄八景玉錄  
上清太上三天正法除六天文錄  
上清太極左真人曲素決詞，一名九天  
鳳氣玄丘太真書錄  
上清太微帝君豁落七元上符錄  
上清太上石精金光藏景錄形攝山精法  
錄

上清太上元始變化寶真上經九靈太妙  
龜山元錄

上清太上上元檢天大錄

上清太上中元檢仙真錄

上清太上下元檢地玉錄

上清玉檢人仙錄

上清太上素奏丹符錄

上清太上瓊宮靈飛六甲錄

上清高上元始玉皇九天譜錄

上清中央黃老君太丹隱書流金火鈴錄

上清傳版

右受，洞真法師。

上清大洞真經目：

《上清太洞真經卅九章》一卷

《上清太上隱書金真玉光》一卷

《上清八素真經服日月皇華》一卷

《上清飛步天剛躡行七元》一卷

《上清九真中經黃老秘言》一卷

《上清太清上經變化七十四方》一卷

《上清除六天文三天正法》一卷

《上清黃氣陽精三道順行》一卷

《上清外國放品青童內文》二卷

《上清金闕上記靈書紫文》一卷

《上清紫度炎光神玄變經》一卷

《上清青要紫書金根上經》一卷

《上清玉精真決三九素語》一卷

《上清三元玉檢三元布經》一卷

《上清石精金光藏景錄形》一卷

《上清丹景道精隱地八術上下》二卷

《上清神州七轉七變舞天》一卷

《上清大有八帝太丹隱書》一卷

《上清天關三圖七星移度》一卷

《上清九丹上化胎精中記》一卷

《上清太上六甲九赤斑符》一卷

《上清神虎上符消摩智惠》一卷

《上清曲素決詞五行秘符》一卷

《上清白羽黑翮飛行羽經》一卷

《上清素奏丹符靈飛六甲》一卷

《上清玉珮金璫太極金書》一卷

《上清九靈太妙龜山元錄》三卷

《上清七聖玄紀徊天九霄》一卷

《上清太上黃素卅四方》一卷

《上清大霄朗書瓊文帝章》一卷

右卅七卷玉清紫清大清大洞經限，

是王君授南真。

《上清高上減摩洞景金玄玉清隱書》四

卷

《上清太微天帝君金虎真符》一卷

《上清太微天帝君神虎玉經真符》一卷

《上清太上黃庭內景玉經太帝內書》一卷

右卅四卷紫虛元君南岳上真巍夫人在世受經限。

《上清三元齋儀》三卷

《上清傳授儀》一卷

《上清告盟儀》一卷

《上清朝儀》一卷

《上清投簡文》一卷

《登真隱決》廿六卷

《真誥》十卷

《八真七傳》七卷

《洞真觀身三百大誠文》一卷

右受，稱无上洞真法師。

《上清經摠》一百五十卷

上清太素交帶

上清玄都交帶

上清白紋結帶

上清紫紋交帶，一曰迴車交帶，亦謂畢道券，又名元始大券。

右受，稱上清玄都大洞三景弟子、无上三洞法師。

科曰：道士、女官參受經誡法錄，須依此次第名位，不得叨謬。受法之日，師宜詳審分明，示其品目。違，奪筭三千六百。

科曰：道士、女官受經誡已，皆當誦其誡文，使精熟。每至月一日、十五日、卅日，摠集法堂，遞相簡閱。三犯不通，罰香五斤。違，奪筭一千二百。

科曰：道士、女官所受經誡法錄，皆依目抄寫，裝潢入藏，置經堂、靜室或閣，如法具龍壁幡信真文，朝夕供養禮懺。不得輒輕慢泄穢，傳借他人，常當誦念轉讀。若身化之後，門人同學檢錄供養，不得泄慢。其正一符錄，及諸券契、函盛，隨亡師所在山谷，或墓內，別作坎安置，餘皆不得輒隨身去。所以者，真經寶重，靈官侍奉，尸朽之穢，寧可近之，此最至慎。違，魂擿三官，殃及七世子孫，各明慎之。

科曰：道士、女官，摠兼前法，備脩行者，啓奏之曰，稱上清玄都大洞三

景弟子，奉行靈寶自然昇玄法師、某岳某帝真人、三皇洞神洞淵神祝大宗三昧小兆真人，臣某上啓，或再拜。若正一法備，稱太玄都正一平炁，係天師陽平治太上中炁，領廿四生炁，督察廿四治三五大都功，正一明威元命真人，臣甲再拜上言。若叨僭此位，魂考三官，奪筭僭盡，慎之慎之。

#### 道科誡法服儀品第四

科曰：服以象德儀形。道士、女官，威儀之先，參佩經法，各須具備，一如本法，不得叨謬。違，奪筭三千六百。

正一法師：玄冠、黃裳、絳褐，廿四條，列圖如左。（缺圖）

高玄法師：玄冠、黃裳、黃褐，廿八條，列圖如左。（缺圖）

洞神法師：玄冠、黃裳、青褐，卅二條，列圖如左。（缺圖）

洞玄法師：芙蓉冠、黃裳、黃褐，卅二條，列圖如左。（缺圖）

洞真法師：元始冠、青裙，紫褐、青裏，表廿四條，裏十五條，列圖如左。

(缺圖)

大洞法師：元始冠、黃裙、紫褐，如上清法，五色雲霞帔，列圖如左。

(缺圖)

三洞講法師：元始冠、黃褐、九色雲霞帔，列圖如左。(缺圖)

科曰：道士、女官，若不備此法衣，皆不得輒動寶經。具其法服，皆有神童侍衛。正一法衣，將軍五人、力士八人侍衛。高玄法服，神童、神女各三人侍衛。洞玄法衣，玉童、玉女各八人侍衛。洞真大洞三洞法衣，玉童、玉女各十二人侍衛。摠謂之法服。違，侍童遠身，四司考魂，減筭二千四百。

科曰：凡道士、女官，欲參經法，皆須備法衣。既告齋傳法位訖，即須冠帶法服，執簡稱名位，拜其本師，朝謁太上。違，靈官不附身，魂考五帝，奪筭一千二百。

科曰：女官法服，衣褐並同道士，唯冠異制。法用玄紗，前後左右皆三葉，不安遠遊。若上清大洞女官，冠飛雲鳳氣之冠，今列圖如左。(缺圖)

山居法師法服：二儀冠、上下黃裙，帔卅六條，列圖如左。(缺圖)

凡常道士法服：平冠、上下黃裙，帔廿四條，列圖如左。(缺圖)

凡常女官法服：玄冠、上下黃帔十八條，列圖如左。(缺圖)

科曰：凡道士、女官履屨，或用草，或以木，或純漆。布帛絕絹，漫飾衣持，皆二儀，或山像，內外樸素，不得綵飾華綺。違，奪筭一千四百。

科曰：凡履，下皆有龍虎神伏，夜安板簀床几上，不得正爾頓地，及履廁溷。違，奪筭八百廿。

科曰：簪用牙角、竹、玉，任依時制，皆不得彫鏤為異形像。違，奪筭八百廿。

科曰：道士、女官法衣，皆不得冒犯穢惡，假借他人，須箱匾藏舉，冠履亦然。違，奪筭一千二百。

### 常朝儀五

四衆三洞，可旦夕常行，所以謂之常朝。若別入室朝真，自依五等朝法也。洗漱如法。

初入堂，上香旋行，誦曰：學仙行為急，奉誠制情心。虛夷正氣居，仙聖自相尋。若不信法言，胡為栖山林。長作聲誦一周，衆官誦經。三上香，各依位，端身合掌，禮十方，從東始。

至心歸命東方玉寶皇天尊。  
至心歸命南方玄真万福天尊。  
至心歸命西方大妙至極天尊。  
至心歸命北方玄上玉晨天尊。  
至心歸命東北度仙上聖天尊。  
至心歸命東南好生度命天尊。  
至心歸命西南大靈虛皇天尊。  
至心歸命西北无量天尊。  
至心歸命上方玉虛明皇天尊。  
至心歸命下方真皇洞淵天尊。  
各長跪合掌，當心懺悔曰：衆等至心歸身无極大道天尊，懺悔皇家、及臣衆等一切衆生，前代今身，或身形所犯，四支舉措，動違誠律，不依經典。身業大罪，無量無邊，因今禮懺，並乞蕩除，皆願衆等身入至仙，會道合真，稽首十方真正三寶。

衆等至心歸神無極大道天尊，懺悔皇家、及臣衆等一切衆生，前代今身，或神識所犯，志念不真，情浮意動，馳騁不息。心業大罪，無量無邊，因今禮懺，並乞蕩除，皆願衆等，神合真寂，洞入自然，稽首十方真正三寶。

衆等至心歸命无極大道天尊，懺悔皇家、及臣衆等一切衆生，或口業所犯，善惡反論，綺言飾非，華詞或衆口業大罪，無量無邊，因今禮懺，並乞蕩除，皆願衆等，性命合道，玄會无爲，稽首十方真正三寶。

人各恭敬。

至心歸命太上三尊、十方衆聖。

北向平立，誦禮經祝曰：

樂法以爲妻，愛經如珠玉，持誠制六情，念道遣所欲。淡泊正氣停，蕭然神靜默。天摩並敬護，世世受大福。

鬱鬱家國盛，濟濟經道興。天人同其願，飄眇入大乘。因心立福田，摩法輪昇。七祖生天堂，我身白日騰。

大道洞玄虛，有念無不咎。練質入仙真，遂成金剛體。超度三界難，地

獄五苦解。悉歸太上經，靜念稽首禮。

至心稽首太上无極大道。

至心稽首三十六部尊經。

至心稽首玄中大法師。

願二儀長久，覆載无窮，至心稽首

真正三寶。

願日月運行，光明普照，至心稽首

真正三寶。

願皇家宗廟先靈，神昇九天，至心

稽首真正三寶。

願皇帝聖化无窮，德合二儀，至心

稽首真正三寶。

願皇儲仁孝貞明，紹隆聖緒，至心

稽首真正三寶。

願諸王兄弟、文武職僚，奉上盡

誠，安人用道，至心稽首真正三寶。

願天下太平，兵戈止息，至心稽首

真正三寶。

願師尊父母，亡者生天，見存安

樂，至心稽首真正三寶。

願衆等惠業日新，智燈無盡，至心

稽首真正三寶。

願十方施主，凡厥有緣，俱捨苦

因，咸登道岸，至心稽首真正三寶。

願法界威靈、金剛力士，用道神

通，捨邪歸正，至心稽首真正三寶。

願三塗五苦、法界衆生，並出欲

纏，同昇福岸，至心稽首一切衆聖。

立誦曰：

學仙行爲急，奉誠制情心。虛夷

正氣居，仙聖自相尋。若不信法言，胡

爲栖山林。從作聲誦

科曰：凡朝，依此儀。違，奪筭一

千二百。

午齋儀六

時至澡漱，供養悉如法，唱人各恭

敬。

至心稽首太上无極大道。

至心稽首三十六部尊經。

至心稽首玄中大法師。

行道、行香，一切誦。衆官誦无上

尊，行香。誦曰：

道以齋爲先，勤行登金闕。故設

大法橋，普度諸人物。宿世恩德報，道

心超然發。身飛昇玄都，七祖咸解脫。

至心稽首太上三尊、十方衆聖。

齋主長跪，歎道功德。

原夫無色之色，亦妙色於人間；無身之身，見真身於象外。故能形分百萬，變化無窮，景散億千，隨迎莫測。由是慈周法界，則劫劫度人；得被塵沙，乃方方教化。或遊行八十一國，伏彼西戎；或在世九百餘年，導茲東夏。普使人天悟道，長登解脫之門；生死歸真，並出輪迴之浪。然後神凝金闕，獨爲萬聖之宗；體妙瓊都，高步九清之上。是知天上天下，三界十方，巍巍最尊，惟吾大道。今日齋主王甲爲某事，修營妙供，以薦微誠，歸命十方，虔心三寶。當願神通自在，俯和衆生；妙應無邊，仰垂慈澤。即使飛天下降，示福罪之科；妙行齋臨，案因緣之格。塵沙咎累，並乞消除；浩劫愆尤，皆蒙蕩滌。見在善根增長，共騫樹以同年；過去惡業消亡，等香林之受樂。憑茲勝福，普暨無窮，九幽絕悲痛之魂，六趣罷輪迴之識，逮乎凡諸品彙，結是含靈，俱超愛欲之河，並陟逍遙之岸。

願齋主七世父母，神生淨土，勝報無窮，至心稽首正真三寶。

願齋主宅舍安寧，合門和穆，至心稽首正真三寶。

願齋主子孫昌熾，世出賢明，至心稽首正真三寶。

願齋主罪累蕩除，福惠員滿，至心稽首正真三寶。

願天下太平，万姓安樂，至心稽首正真三寶。

願一切衆生，免離諸苦，同入正真，至心稽首得道衆聖。

平坐如法。

施食祝願曰：此受食祝

一切福田中，施食最爲先。見世受快樂，過去得生天。當來居淨土，衣食常自然。是故今供養，普獻於諸天。

食遍，齊合掌祝曰：

香厨妙供，上獻天尊，中獻真聖，下及衆生，普同飽滿，福流齋主，如水歸海。

食訖，乞食懺食曰：上啓十方天尊，敬白見前。大衆弟子今日所營齋

供，或恐手捉不淨，衣服不淨，器物不淨，米麥不淨，事事種種，多不如法。願三寶弘慈，布施歡喜，殘有供具，迴施一切。當願施者得福，食者無罪。

齋主捻香，供養如法，唱讚詠如法。

爲諸來生，作善因緣，如蒙開悟，仰受聖恩。

次齋主持淨施，云布施祝願。上啓十方三寶，一切真聖，齋主某

乙爲某事，設齋已訖，猶恐功德未員，更捨淨財，迴施三寶。當願布施已後，七祖生天，見存快樂，世世生生，得福无量。

次唱持意，人各恭敬。

至心稽首太上三尊、十方衆聖。願齋主百福莊嚴，萬善歸集，至心稽首正真三寶。

以此設齋功德，資被群生，離苦解脫，禮得道衆聖。

科曰：凡一午齋，依此儀。違，奪筭一千六百。

### 中會儀七

入道戶，祝漱、捻香、叩齒，並如行道法。發爐祝曰：无上三天玄元始炁，太上老君，召出臣身中三五功曹、左右官使者、侍香玉童、傳言玉女、五帝直符，各卅六人，出關啓此間土地里域真官正神，今故燒香，願得太上十方正真妙氣，降注臣身中，令所啓，速達逕御至真无无極道前。

#### 稱名位。

太上靈寶洞玄法師某岳真人某，上啓太上無極大道、至真無上卅六部尊經、玄中大法師、三界官屬、一切威靈，今故燒香，願以是功德，歸流某家九玄七祖，見前人口，乞丐原赦，前生今身，一切所犯，元逆醜惡，兆罪億過，悉乞除蕩。即願亡者上生天堂，衣飯自然，見存灾消禍滅，長居福慶善緣之中，門戶清貴，子孫昌熾，世世享祚，萬願從心。今故燒香，克獲感通，逕至無極道前。

至心歸命東方無極太上靈寶天尊。

次南，次西，次北，次東北，次東南，次西南，次西北，次上方，次中方，次下方。

誦三契。如朝文中

至心稽首太上无極大道。

至心稽首三十六部尊經。

至心稽首玄中大法師。

重稱名位。

太上靈寶洞玄法師某岳真人某，上啓太上无極大道、卅六部尊經、玄中大法師、上相上宰、四司五帝、三界官屬、一切神靈。某等今故捻香，願爲某懺謝无量劫來，至于今日，生死宿罪重過，或違天犯地，輕慢三寶，煞害衆生，罵詈祝咀，嫉妬慳貪，邪淫放蕩，愚癡竊盜，口是心非，三業六根，罪愆无量。因今首謝，並乞消除，即願亡者生天，見存安樂，子孫昌熾，福慶自然。暨乎天下地上，五苦三塗，咸出幽牢，俱蒙惠潤，凡諸有識，並入道場。謹啓，三上香，復鑪祝曰：

香官使者、左右龍虎君、侍香諸靈官，當令此間朝會之所，自然生金液丹

碧，芝英百靈，衆衆具交會集，在香火案前。十方仙童玉女，侍衛香烟，傳奏臣向來言啓，逕至无道極前。旋行，誦出。

道以齋爲先，勤行登金闕。故設大法橋，普度諸人物。宿世恩德報，道心超然發。身飛昇玄都，七祖咸解脫。

科曰：凡中會，依此儀。違，奪筭一千六百。

#### 度人儀八

齋時未至，應度人列階下，西面辭父母，謝九玄，合十二拜。次北面拜天子，四拜。所以者，冠帶天尊法服，更不復拜父母、國君故也，於此入道之際，須辭謝耳。既訖，合掌端身，北向三歸三寶三禮。

至心歸身太上无極大道。

至心歸神三十六部尊經。

至心歸命玄中大法師。

迴面向西，禮監度三師，各三拜訖，便長跪從下。師爲着法裙，次師爲着法衫，次師爲着法帔，監度長官爲加法冠畢，退禮三師，三拜，北面合掌端



立。師面東平立，誦智惠三首，其詞曰：

智惠起本无，朗朗超十方。結空峙玄霄，自然挹流芳。其妙難思議，虛感真實通。有有竟不有，無无無不容。

智惠恒觀身，學道之所先。眇眇任玄肆，自然錄我神。天尊常擁護，摩王爲保言。晃晃金剛軀，超超太上仙。

智惠生誠根，真道誠爲主。三寶由是興，高聖所崇受。汎此不死舟，倏歛濟大有。當可說誠時，天真並稽首。

每至首終，齊唱善禮，一拜摠訖，迴身禮十方，從北始。

至心歸命北方无極太上靈寶天尊。十方同。

次東，次南，次西，次東北，次東南，次西南，次西北，次上方，次下方。

次退，居東面西，師西面東向，爲說十誠，新度人皆稱名受。

天尊言：善男子、善女子，能發自然道意，來入法門，受我十誠，則爲大道清信弟子，皆与踊猛飛天齊功，於是不退，可得超陵三界，得爲上清真人。

尔當伏受，諦聽在心。

一者不煞，當念衆生；

二者不邪淫顛到；

三者不盜取非義財；

四者不欺，善惡反論；

五者不醉，常思淨行；

六者宗親和穆，無有非親；

七者見人善事，心助歡喜；

八者見人有憂，助爲作福；

九者彼來加我，志在不報；

十者一切未得道，我不有望。

天尊言：脩奉清誠，每合天心，常行大慈，願爲一切，慊慊尊教，不敢中怠，寧守善而死，不爲惡而生，於是不退，可得拔度五道，不履三惡，長齋奉誠，自得度世。

新度人禮師三拜，北向禮三尊三拜。

誦奉誠誦，其詞曰：

道爲無心宗，一切作福田。立功無定主，本願各由人。虛己應衆生，注心莫不均。大聖弘至覺，亦由雨降天。高陵靡不周，常卑故成淵。海爲百川

王，是能舍龍鱗。萬劫保智用，豈但在厥年。奉誠不慙虧，世世善結緣。精思念大乘，會當體道真。

科曰：凡度人，依此儀。違，奪筭一千二百。

科曰：凡八儀，道士、女官，行事所要，指擿時須，集成此卷，當依而奉之。違，四司考魂，不復名上道科，奪筭二千四百。<sup>④</sup>

### 三洞奉道科誠經卷第五

① 此據敦煌S. 3863 號抄本。

② 此據敦煌P. 3682 號抄本。

③ 此據敦煌S. 809 號抄本。

④ 此據敦煌P. 2337 號抄本。

(吳亞魁點校)

# 003 洞玄靈寶道學科儀

經名：洞玄靈寶道學科儀。原  
題太極太虛真人撰。二卷。底  
本出處：《正統道藏》太平部。

## 目錄

### 洞玄靈寶道學科儀上

- 言語品
- 講習品
- 禁酒品
- 忌葷辛品
- 制法服品
- 巾冠品
- 敬法服品
- 背道品
- 山居品
- 理髮品
- 沐浴品

### 洞玄靈寶道學科儀下

- 解穢品
- 鍾磬品
- 必齋品
- 讀誦品
- 坐齋相罰品
- 壇禮品
- 然燈品
- 飲水先呪品
- 奏章品
- 醮請品
- 都禁品
- 神枕品
- 明鏡要經品
- 九節杖品
- 作神劍法品
- 詣園廁便曲品
- 解惡夢品
- 父母品
- 老病品
- 滅度品
- 師資制服品
- 父母制服品

追福功德品  
滅度財物品

# 洞玄靈寶道學科儀上

太極太虛真人

## 言語品

科曰：凡是道學，當知樞機緩急，言語善惡，招禍得福，唯聞口業。出家之人，若道士，若女冠，在房在觀，與長德師尊有所言對，諮決可否，和聲下氣，奉聽長德師尊之言。若未如意，道理不明，待上辭盡，然後徐徐決定，無容以私亂衆，及口氣狼藉，雖復在內，不爲惡心，而招在外，大小不順，一得在內二衆謗，二得在外一衆謗。若在法朋友，年類相當，或大友於小，或小接於大，所有論說，或言及衆事，或言身事，寬心緩語，務令理盡，不得因此呵喚，驚張內外二衆，不忌師尊，不忌道俗，辱及父母、兄弟、宗親。若在房院，若在徒衆，發心吐言，皆當評論正事，問答法問，智者諮之，愚者教之，使智慧增明，愚癡日破，雖終日言而合道，事亦無苦。若對外衆、六親眷屬、

一切男女，有所道說，問訊寒涼，及俗間正事，不可不道者聽之。自此已外，非法聲說，雖喜非法之俗，不與出家相宜，慎勿言之。一言已致大凶者，是爲上多言；一言而致辱者，是爲中多言；一言而見窮者，是爲下多言。古今賢聖之出言，文辭滿天地之間，尚苦其少，天下以爲法，不敢厭其言，故善言無多，惡言無少。古者聖人之將言，皆思之，出言成經，置爲人法；愚者出言，爲身災害，還以自傷，此重誡也。

## 講習品

科曰：凡是道學，當知聽習回向，須得明師。師若不明，翻成傷道慧。若道士，若女官，棲身法門，志求玄悟，應離七種耽著：一者耽著朋遊，二者耽著酒色，三者耽著名利，四者耽著玩弄，五者耽著伎樂，六者耽著飲食，七者耽著城市。離此著已，當發四種願見：一者願見明師，不論遠近；二者願見明師，不論貧富；三者願見明師，不論愛憎；四者願見明師，不論貴賤。一念、二念，至于多念；一時、二時，至

于多時。驅策身心，如飢如渴，詢請妙義，得聞得思，得行得證，稱揚功德，玄化興隆，無令二衆得迷悞苦。若女冠衆，性理怯懦，本位無人可講習者，當三人、五人，乃至多人，清淨三業，齋其道具，聽受法本，親近大師，一日一至，退著本位。若近本師住處法門，無女冠住處法門，應近本師住處左右，投精專奉道之家居止，朝禮讀誦，依如本科，講授聽受，正身、正言、正心，以時傳示，不得違科奉道，招得內外二衆，動靜嫌謗，敗壞真實清淨法門。有犯者，招損辱惡報，非清淨品，計其赴緣行道。若二衆同緣，大師應行法事；若二衆各緣，聽二衆各行法事。

## 禁酒品

科曰：凡是道學，當知持戒發慧，安身鍊心，無惑酒惡。求靜念者，若道士，若女冠，入我法門，是我真子，非法耽湎於十二時犯者，有十種昏亂：一者不孝師尊、外衆父母，二者累負門人、外衆妻孥，三者鬪亂同學、外衆兄弟，四者過誤王法，五者觸犯朋友，六

者墮落乘騎，七者燒溺水火，八者迷路失道，九者頓失念慧，十者對境生麤。有此十惡，能令內眾外眾，當時過時，身心昏亂，甚狂病人，不明時節，不分內外，二觀摧壞，用心失次，三善銷毀，行化無依。常得三種近者：一者種惡業之人，二者噉食牲血之人，三者屠戮生命之人。又五種交遊者：一者違遠父母、不孝之人，二者姪逸無度、悖禮之人，三者破家失業、無計之人，四者越科犯律、偷盜之人，五者貪著俗樂、非道之人。日復一日，月復一月，年復一年，不能攝念，失本違宗。目前見有六種遺棄：一者師尊遺棄，二者父母遺棄，三者兄弟遺棄，四者姊妹遺棄，五者朋友遺棄，六者內眾遺棄。凡此因緣，是見在報師寶因緣。當轉法輪，次次宣告，無前親近，無前交遊，則為修行上法，是真出家。若老病，聽隨分使藥，若過分貪競，與前見在報同。

### 忌葷辛品

科曰：凡是道學，當知修身潔心，無犯禁忌。若道士，若女冠，食五種葷

辛，名為惡菜，內外非法，不宜輒犯。何為五種：一者韭，二者大蒜，三者小蒜，四者葱，五者薤。又諸菜中，辛者見在際，有四種損害，無三種分。何為四種：一者損害五藏，二者損害道行，三者損害內眾，四者損害外眾。上詣、中請、下化，三種無分：一者上詣道場無分，二者中請神明無分，三者下化男女無分。當攝三業，莫令心思，莫令身求，莫令口食，神明可希，道場可詣，男女可化，藏府清寧，口氣香淨，朝夕朝謁，住處虛空，有感有降，利益眾緣。

### 制法服品

科曰：凡是道學，當知身得入道，內除俗念，外息俗緣，內守法門，外修法服。出家之人，若道士，若女冠，山居自修，人間遊化，內外法服，須有條準。若始得出家，未漸內錄，上衣仙褐法帔，皆應著條數，不合著二十四條。若受神呪五千文，皆合著二十四條，通二十四氣。若年二十五已上，受洞神靈寶大洞者，上衣仙褐，合著三十二條，以法三十二天，天中之尊；法帔二

十八條，以法二十八宿，宿中之神。亦聽二十四條。隨道學之身，過膝一尺，皆以中央黃色為正。若行上法，聽著紫。年法小為下座者，勿著紫。若中衣法衫，筒袖、廣袖，竝以黃及餘淺淨之色為之，皆大領，兩向交下，揜心已上，覆內衣六寸。若內衣法裙，聽以餘淺深色為之內，以黃為外。若有相，聽以淺為外，皆垂及踝。若女冠具上法者，聽以輕紫紗為褐，若裙，必用深黃，不得輒用餘淺色，其上、中、下之衣，不可計緣之內外，皆大幅帖緣為之，莫自專執，為一眾所嫌，一者得同俗謗，二者得異道謗，真靈去身，姪邪內起，不能精持內心，三尸潛匿，赤子飛颺，長離玄室，破形解骸，身死名滅。若能冠服常依道，得道之日，天帝授子離羅九光錦帔、丹羅寶曜之巾、天寶之珮，師子文履，謂之飛仙之服，以酬積功專勤求道之德兆。勿慕世間之冠冕，輕憾道之服也。世間雖目下榮耀，不脫於死，道學巾帔，上法於天，著之求道，令人飛仙乘虛也。

### 巾冠品

科曰：凡是道學，當知具足威儀，衆事已辦，名行非俗，是爲出家。出家之人，上首巾冠，須知法象，及諸用捨。若道士，若女冠，平常修道，戴二儀巾。巾有兩角，以法二儀。若行法事，陞三籙衆齋之壇者，戴元始遠遊之冠，亦有輕葛巾之上法，元始之所服，故天真上聖，或巾九德，或巾七星者，即冠巾有七星之文也，亦謂玄冠。玄即天也，亦言天有七星。若道學，行卧住息，常須簪戴，神靈敬奉，不得暫捨，令泥丸、玄華二神有所怨慢。唯每日梳理玄華之時，要須暫捨，安著淨巾之上，又不得令外衆男女，及非同契之人，輒有窺見，輕取戲弄。能慎之者，有五種利益：一者爲己身尊重，二者與外衆避罪，三者得真神稱歎，四者令含靈生善，五者增內外福田。不能保慎，輕我巾冠，令彼外人妄取戲弄之者，道學之人生五種惡報：一者己身爲人輕笑，二者令外衆之人生輕笑罪，三者真神咎責、道氣飛散，四者含靈不敬，五者

內外獲罪。道學二衆，當須明慎，令起五種利益，滅五種惡報。因此敬人，善芽增長，勿令慢人，善根朽壞，則爲外俗之人敬我大法，不生謗笑，明各慎之。

### 敬法服品

科曰：凡是道學，當知入道，上衣、中衣、下衣，皆當尊敬，不得漏慢。出家之人，若道士，若女冠，上衣褐帔，最當尊重。何者，天尊聖人，皆同此服。若中衣下裙，助我法儀，隨上通感以法服，故世人致敬，異彼俗流，若生輕慢，隨便得罪。尊敬之相，有五種因緣：一者未著之前，函箱盛之，安高淨處；二者既著之後，坐起常須護淨；三者暫解之時，勿與俗衣同處；四者雖同學同契之人，亦不許交換；五者不得乞借俗人，非法服用，直至破弊，皆須護淨焚棄。違此者，彼此得罪。若尊敬法服者，得五種實因尊重：一者實因法服而得尊重，更不屈形拜於外衆男女；二者實因法服而得尊重，感彼外衆男女屈形禮拜；三者實因法

服而得尊重，所在遊行衣食自至，得彼供養；四者實因法服而得尊重，內修外屈，通感明靈；五者實因法服而得尊重，外衆男女、王公天子，聞見歡喜，不生惡心。何謂輕慢五種因緣：一者未著之前，翻覆狼藉僻惡之處；二者既著之後，隨處倚坐，不揀淨穢；三者暫解之時，與俗衣混雜同處；四者非是同學同法，隨情借換；五者乞借俗人，非法服用。此人見在，當受五種實因輕慢之報：一者實因輕慢，爲人輕賤，同常俗輩，屈形求人；二者實因輕慢，爲人輕賤，不得衆男女屈形禮拜；三者實因輕慢，爲人輕賤，遊居方所，不得衣食以時供養；四者實因輕慢，爲人輕賤，內修外屈，神明不降；五者實因輕慢，爲人輕賤，外衆男女、王公天子，若聞若見，無信敬心。道學二衆，善思尊重，勿爲輕慢，自招禍累。若已破壞，不任衣著，當以除日平日之時，禮拜訖，於淨地燒之，勿令外衆男女輒見。若佩帶真文三衣，服卧止息，不得露頭，須著巾帽，不得露形，須著

衣服也。

### 背道品

科曰：凡是道學，當知始自氤氳，極於成道，度八難苦，受出家身，因我神仙法服、三寶之衣，仙褐法帔、上下三衣，有所法象，因法在身，而獲尊重。若道士，若女冠，承國主恩，承父母恩，承師尊恩，得出家位，當為師尊供養，見前得離二種牢獄：一者內，則牢獄輕苦，所謂父母牢獄、夫婦牢獄、男女牢獄、兄弟牢獄、姊妹牢獄、貴賤牢獄、內外支緣牢獄之中，即有二種：一者歡喜牢獄、恩愛樂具，二者瞋怒牢獄、逼迫苦具，苦樂雖異，牢獄不異。二者外，則牢獄重罪，所謂父母共造、夫妻共造、男女共造、兄弟共造、姊妹共造、貴賤共造、內外支緣共造之中，亦有二種：一者煩惱共造、有願不願，二者歡喜共造、唱和俱願，煩惱歡喜雖異，共造不異。今日出家，離前四緣，誓心精苦，迄至成道。坐道場時，復來遊化，若未證之前，背叛正法，一念生心，欲屈釋道服，求俗中樂，此人見前即得三

種惡報：一者不得惡色、惡命、惡聲、惡氣，自己受苦，他人惡見；二者中得年橫、月橫、日橫、時橫，他人作罪而我為受；三者上得風殘、癩病，若生男女，輒便聾盲瘖瘂，或為王法所見，誅戮在生，惡盡身謝三官，受五色九重幽閻。一切苦具，日月遙長，形身巨大，日月比於五色界時，命業苦具，即滿五色九幽處所，千萬億劫，無有休息，此方天地。若值風水劫時到，即移往他處，及於其處壞中猶受。若有永劫，父母、兄弟、男女、姊妹、貴賤、友屬之親，若自念、共念，若次第念，若他念，若飲食念，若錢財念，若抑屈念，若欺凌念，令出家人捨去法服，背道從俗，當知此人無量劫來，善根朽壞，惡根增長，毀敗道寶，毀敗經寶，毀敗師寶，有於今日，起大惡心，破壞師尊三寶福田。此人初願出家，從信中起；今日退，抑從謗中起。信根既壞，謗火自燒，得此諸苦，明告內外，努力勤修，各求解脫。

### 山居品

科曰：凡是道學，當知道之布化，

聖人設法，接引初行，隱遁山林。出家之者，若道士，若女冠，當棲息山中，以求靜念，不交常俗，引命自安，避諸可欲，去諸穢亂。居山制度，與世間有異，有十事因緣：一、不得領戶化人；二、不得交遊貴勝，以求名利；三、不得行邪禁呪術；四、不得醫卜取錢，與世有隔；五、不得與世俗婦女同牀席坐卧，除異學山居清淨者；六、當朝、中、日没人定、夜半鷄鳴等時，焚香然燈，敬禮十方天尊，悔過滅惡。禮時，從東方為始；七、日中後，不得食穀氣物，非穀氣者：水、玉、芝、石、松、朮、黃精、雲英、靈飛散、枸杞等，食無時，不在禁例；八、凡行山採藥時，三步一彈指，十步一磬效，舉足下足，常當念道，想有神人在於崖間路側，授我仙術，我得如修服之，白日昇天；九、若少得道，分未能達，無自顯揚，輕慢不及；十、當念己身，父母長育之恩勿忘。此謂十事，居山修道之要爾，服御方法，竝具本文矣。

### 理髮品

科曰：凡是道學，當知修身，各有方法，至於頭爲玄華，梳理得所，保精長存，百疾不染。出家之人，若道士，若女冠，在觀出觀，各備淨梳，箱匣藏之，雞鳴早起，未行禮前，面背北方，回向本命之方，淨手梳之。若非同學同契之人，莫令輒見，及傳梳用。梳訖，已當及行禮，若時務忙迫，聽行禮後，然即梳之。梳時，若數多，血液不滯，而不至痛。梳竟，當密呪曰：

太帝散靈，五老反神。泥丸玄華，保精長存。右拘月隱，左引日根。六合清練，百神受恩。若時至不梳，二神怨責，不舉勤功。一者玄華神，二者泥丸神，人間行用，有四種自損：一者似諸辛苦俗事之人，不能梳理；二者似諸病苦困劇之人，不能梳理；三者似諸殘兀手指頓斷之人，不能梳理；四者似諸退慢無道之人，不能梳理。學者當敬二神，當避四損。若女冠，不得法習俗人，不修正用，作虛妄用，金銀銅鐵似爲頭飾，爲內外二衆之所憎嫌，

無罪於人，自招醜辱。若梳理之後，有隨梳不整之髮，當安一淨窠置中，一日、二日、乃至九日，出於淨地燒之，莫令內外二衆輒見也。

### 沐浴品

科曰：凡是道學，當知智體無疵，慧心明鑒，所有塵垢，爲我有身。出家之人，若道士，若女冠，心既緣境有內塵者，當以念念法水洗浴之。身既由他，有外塵者，當以時時香水浴之。然由他之身得塵垢者，有四種緣：一者身爲福田，治齋堂，受人功塵；二者六時起坐，受臨虛塵；三者赴緣行禮，受前種塵；四者不簡淨穢，受著處塵。致令道學之人，積習成垢，上下不淨，內外二衆不起歸依，四隅神祇不作勢力，所有啓奏不降明靈。當依洞神尊經，用五香法：青木香、荆華香、零陵香、蘭香、真檀香，多少隨分，細切煮之，令香水熟已，二衆聞香洗浴。道學之身，若逢時無處，聽用時有處之香。然沐浴之法，有總日、別日，有內衆、外衆。別日者：正月十日、二月八日、三

月六日、四月四日、五月一日、六月二日、七月十五日、八月二十二日、九月二十日、十月十八日、十一月十五日、十二月十二日。

已上月日，宿東井，香湯沐浴，令身輕體香，通達長壽。臨沐浴之時，先叩齒三通，密呪曰：

四大開朗，天地爲常。玄水澡穢，辟除不祥。雙童守門，七靈安房。雲津練濯，萬氣混康。內外利貞，保茲黃裳。朝夕澡漱，皆用此法也。其浴室，當於房內側處安置，內外密泥，莫令沐浴者窺見日月星宿之形。縱同學、同契，當先後入室中，不得相見也。其總日者：聽召內外二衆同日，當於觀內安置二密室，相去隔越，不聞人語、盥水之聲。以一年將終十二月八日，多煮時有處有之香作湯，溫調得所。師先以一符置香湯中，量室大小，聽男女各於室中沐浴也。

### 解穢品

科曰：凡是道學，當知遊居山澤，化導人間。出家之人，若道士，若女

冠，有五穢不可頓免：一者自投穢，二者偶見穢，三者自求穢，四者勢位穢，五者交居穢。自投穢者，行住坐起，虛空之中，無故多少，兩血著人頭面、手足、衣裳，或鴟鴞、鸛鵲，銜持死屍，一分、二分，來投眼前，自上向下，非意所期，名爲自投穢。偶見穢者，行山採藥，教化人間，曲路逢屍，草間見死，男女姪穢，傍正諸見，非意所期，名爲偶見穢。自求穢者，人情狎習，財利交通，服屬之親，喪死弔問，心願自行，無人逼遣，名爲自求穢。勢位穢者，謂勢位俗官，有死之家，上下切逼，畏懼呵嫌，情實不堪，匍匐弔問，臨哀見屍，名爲勢位穢。交居穢者，在家女人，牛馬驢騾、猪羊犬等，生產之穢，心願欲見，眼欲自看，名爲交居穢。凡見穢者，不合關啓齋請，當取竹葉桃枝、及時有處有之香，以淨水煮湯，置大盆內，然後作符以投盆中，見穢者若重，沐浴。見穢若輕，澡雪。臨解穢前，叩齒三通，密呪曰：

四大開朗，天地爲常。玄水澡穢，

辟除不祥。雙童守門，七靈安房。雲津練濯，萬氣混康。內外利貞，保茲黃裳。若爲衆聚齋講，恐外衆男女有見穢者，當以大盆盛貯符水，置大門前，令人者洗眼，聽入聞法也。

### 鍾磬品

科曰：凡是道學，當知趣中道域，如悟心王，同而不異。出家之人，若道士、女冠，有於同道之前而修異行者，有五種人：一者飛鍊治生，二者行藥外救，三者造作立功，四者服食修身，五者念慧度生。講誦經典、修齋行道、建法受供之時，若非鍾磬，警召衆官，各行其道，時則不至，至又不齊。故《中元經》云：長齋會玄都，鳴玉扣瓊鐘。十華諸仙集，紫煙結成宮。當於治舍左前臺上，有懸鍾磬，依時鳴之。非唯警戒人衆，亦乃感動群神。常於六時，人當束帶清嚴，調槌正擊，先概造漸寬，數得八下。再概竟之，待爐火成辦，然後先概造漸希，數得十二下，漸概至微，數得十二下。又概造漸寬，至十二下，餘二槌概竟，至十二下，餘

二槌概竟之。若有召衆，須緩緩者，聽之勿虧時節。鐘若鳴時，有五種不失時利益也。一者衆聚行法不失時，二者受清淨不失時，三者總發心不失時，四者滅惡心不失時，五者別生善心不失時。止行二善，實因鐘磬，讚助勤苦，事在用心。令六時心進，直詣道場。莫令六時心退，還居惡道，宣告將來。若內衆，若外衆，和合大願，有二種因緣：一者和合私願，二者和合衆願。若私造，若衆造，若私聞，若衆聞，精進受持，精進奉行。

### 必齋品

科曰：凡是道學，當知有所修行，或行之在心，或行之在事，莫不以齋靜爲先，立德之本，求道之基。若道士、女冠，誦經必齋，校經必齋，書符必齋，合藥必齋，作金丹必齋，精思必齋，詣師請問必齋，禮拜必齋，受經必齋，救濟消災必齋，致真必齋。太上所敬重，老君所營護，諸聖所寄賴。齋法甚多，在兆所修矣。

錄生朝儀、五千文朝儀、



靈寶朝儀、上清朝儀、

三皇朝儀、上元齋合藥修仙、

中元齋修身謝過、下元齋拔救九祖、

八帝齋、三五大齋、

下元三十二天齋、中元請七十二君齋、

上元六直齋、靈寶金錄齋拔度侯王、

黃籙齋救九祖父母、明真齋修身、

三元齋謝過、靈寶自然齋涉世、

塗炭齋救病、旨教齋救病、

靈寶五練生尸齋救己、五千文齋、

太平洞淵五王齋。

學道菜食，得道乃休，此業第一。

業次，齋千日、百日，月日節食、麤食、服食，亦服氣、服藥、胎食，隨堪中服之，前所謂自修也。右在內衆、外衆，救解大灾病厄，齊舉高德一人爲法師，五人爲從官，露壇大謝，令謝罪者蘭格，散髮泥額，禮三十二天。齋中，奏子午章，苦禱必感，依指教塗炭法。五王齋，齋官春、秋、冬、夏，隨四時之數，四季之月，貧者十二人，大齋一百二十人，壇窄於外禮拜。富貴平常建齋，清

廉道士山學五人、十人、二十人、五十人、百人，患無多人，舞所制服，行道三七日，或一月。若貧賤，隨力所堪，不必要五人。若供齋，清旦進粥，正中蔬食，過中薑蜜清茶，餘一不度齒。解齋食散，民十人、百人、千人，人多益好。長齋持戒，清旦、正中、日入，三時行道，三時講誦。若有重灾大厄、及救度罪根者，平旦、正中、日入、人定、夜半、雞鳴，六時行道，三時講經也。

#### 讀誦品

科曰：凡是道學，當知存念讀誦，經寶在身，則爲慈母。若道士，若女冠，勇猛精進，或捨文誦念，或執文披讀，一念生解，即入慧門。讀誦分中，聽八十分之一二，修理外業，以兼外禮。不得因此流浪乖宗，常思教母，爲我道本，清淨三業，無傷尊敬。思惟微妙，得其義味，有四種慧：一者爲我慧藥，療狂死病；二者爲我慧燈，破愚癡闇；三者爲我慧刀，割煩惱網；四者爲我慧舟，度生死海。是真經法，能生法身，如世慈母，能生之子。故至孝之

子，常念鞠育懷抱之恩，我等如是。因是教母，生無漏身，常應報恩供養，安置堂殿，七寶裝嚴，香花燈燭，伎樂幡蓋，供養讀誦，如事所親也。

#### 坐齋相罰品

科曰：凡是道學，當知具足威儀，陞壇行道，存見太上，如在眼前。若道士、女冠，未練科文，舉措非道，法師陞高座，指事次第，令得開悟，謬妄可矜，未達可恕，戒而勵之，勿瞋勿笑。若善誘而通，不嚴而治，不行彈罰，盛德之風矣。若有背道，恃人間知不謬不妄，懈慢者有四：一者不遵經法，二者不敬法師，三者凌忽衆官，四者外衆誹笑。有犯威儀，依事彈罰，罰而不止，當啓告三寶，退出齋次，不得縱容，任之漏慢。監齋同慢者，罰之。法師有虧，當收愆送失，親對衆官，求乞首悔，起自新念，無爲乘非，不畏冥旨，無益所犯，有陷己身，可不慎哉。

#### 壇禮品

科曰：凡是道學，當知衆官陞壇受戒，以內外二衆羅列四方，拜跪懺

請，須知節度。若道士、女冠，唱禮十方，分爲五句，每於上句，舉聲至下句，引聲抑響，迴轉氣息，以喚次句。臣等至心便斂版當面，以準所禮之方歸命下版當心而止某方無極舉聲喚上方垂版，以聲靡靡下向地，迴版當心，應無極之聲了，太上便下版下，膝前至地靈寶天尊，下頭至地凡抑響住，聲速而手膝遲，或膝已去而聲不及，更相違互，皆爲不齊，謂犯懈惰之罪。當叩齒存之至心，無令疾也。叩齒不得令耳聞行合科典，衆官肅肅，上即屈降神明，下即起信心，無宜怠慢，自犯明科矣。

洞玄靈寶道學科儀上

洞玄靈寶道學科儀下

太極太虛真人

然燈品

科曰：凡是道學，當知供養法門，有早有夜；上燈之法，有然有續。若道士、女官，將闔上燈，名爲續明。闔後上燈，名爲燈明。有二種相：一者總相，二者別相。言總相者，先於見前可見道寶、經寶座前然之，次於見在可見師寶房前然之。或人間宿習所重，道法中敬信時節，人外人內然之，以祈二種福報。一者助天光明，以祈肉眼根淨，障翳消除；二者助天光明，以祈周詣遊處，常得明了。言別相者，一已自行於本命，上然三燈，以照三魂；行年，上然七燈，以照七魄；太歲，上然一燈，以照一身；大墓，上然三燈；小墓，上然五燈；堂前，然七燈，以照七祖；中庭九燈，以照九幽；俠門二燈，以照宮宅；地戶，上二十四燈，以照二十四生氣；向八方，然八燈，以照八

卦；四面、中央，九燈，以照九宮；四面十方，然十燈，以照十方；二十八燈，以照二十八宿；三十二燈，以照三十二天；五燈分於五方，以照五嶽。合一百五十三燈。然燈威儀，功德至重，上照諸天，下照諸地，八方九夜，普見光明。侍燈之官，爲勤用意，每令燈光明徹，不得中滅，半暗半明也。

飲水先呪品

科曰：凡是道學，當知過中不味，聽飲清水，或十二時中，須水止渴，或呪請辟邪。若道士、女官，以杯盛水，向杯三吐氣，仍以物三打杯。凡三呪打杯，吐氣率三，乃飲之。若多人，可以大器。大不可舉，當就打。呪水曰：

金、木、水、火、土，五星之氣，六甲之精，三真天倉，濁雲常盈，黃文赤子，守中無傾。飲水不飢，延壽令肥，辟邪惡也亦可呪曰：

乾、元、亨、利、貞，神水入腹，五藏清明。畢飲之，兩法任用也。

### 奏章品

科曰：凡是道學，當知章奏之法，或請本住神，或請虛應神，作章紙墨清淨，書無草脫，又不得用殘紙截片紙。辭狀素直，無飾繁華，治氣正一，行折紙八分。章表云：上詣三天曹以聞，去再拜。一寸三行，後安臣姓。臣姓後三行，施年月臣姓。中央安太清，長二寸半，亦三寸真正，書令可識，尾餘白紙三行。無者，令紙續。祭酒上章，正避戊辰、戊戌，及計擊。上章訖，即收本隨身滿一百通，作言功章燒之，不得穢慢，犯漏洩之罪。言功燒章如左：出太真科

上言謹按文書，臣某以某年從師某，受將軍內外治，依法修行，宣揚道氣，請召真官，救護萬姓。前後章表，啓告文書，不合即燒者，錄緘封箱閣卷，束積多法，不得散猥處用，及與他人散猥處用。又不得洩露蟲鼠，何施漏濕，爛壞遺落，從來遵行，不敢違旨。即日依科，隨期奏滅，自某年至今日，合若干卷，於靜中火化，煙通昇雲，來

吉除凶。謹請直使正一功曹、治中虎賁威儀鈴下五百將各二人，校尉十二人，功曹主簿、幹佐小吏、金光童子各五人，雲中部章、督郵從事使者各二人，同時監臨對事，省除塵故，採納光新，原赦臣愚短不及之愆後，乞所奏聞，悉免寒池。請諸官證明，將助有功，依都章言功，不負效信。恩惟太上云云。標臣某拜上，請官監臨，斷莫乞除紙章，依常儀也

### 醮請品

科曰：凡是道學，當知修請利益，有心有身，身既由他，未度天道，有所修救，須存醮請。法門內外，雜三教之中，此當雜教，內則起心，外則苦身。醮即一名，自有九品：一者五帝醮，二者七星醮，三者六甲醮，四者三師醮。此四醮，皆請天神，當修饌時，尤須潔淨果具，並令豐新。不得市諸火熟非嚴整食、非潔淨食、非一心食、非救苦食。違者，天神不降也。又有五者五嶽醮，六者三皇醮，七者三一醮，八者河圖醮，九者居宅醮，十者三五醮。此

六醮，并請地神，當修饌時，尤須潔淨果具，並令豐新。不得市諸火熟非嚴整食、非潔淨食、非一心食、非救苦食。違者，地神不降也。凡設天神、地神醮，諸設醮人及師，當先齋淨沐浴，然後始行法事。冬至後、夏至後，先得甲子，即請上元甲子醮也。

### 都禁品

科曰：凡是道學，當知修身求度，終期正道，入次第門，先禁別嗜慾。若道士、女官，身出恩愛，已入法門，切慮法門忌諱，誓願都禁，直詣道場。何謂別欲，略而計之，有十八種，不由於他，己身自敗也。一敗邪淫，二敗陰賊，三敗飲酒，四敗怠慢，五敗逆父母，六敗逆師尊，七敗傷衆生，八敗殺衆生，九敗用衆生肉，十敗食衆生肉，十一敗種五辛，十二敗用五辛，十三敗食五辛，十四敗向北便曲，十五敗對二衆脫巾冠，十六敗慢三光，十七敗八節日威刑，十八敗朔日作怒罵。凡此諸敗，天人大禁，三官告察，是爲重罪。一者敗身，得見在惡報；二者敗心，得將來惡

道，令人三魂相疾，七魄流競，胎神所憎。三官受惡之時，是惡夢絞於丹心，魑魅乘於朱闕，精液馳散，神真恍惚，子能捐欲，則為仙才，當存真齋戒，無犯眾敗，行住坐起，不損威儀，上謝七祖父母三業罪，下謝己身無邊罪。願罪滅己，當免十五種人三業輕賤也。

一者免外眾貴人輕賤，二者免外眾富人輕賤，三者免外眾中人輕賤，四者免外眾病人輕賤，五者免外眾賤人輕賤，六者免內眾師尊輕賤，七者免內眾勝己輕賤，八者免內眾劣己輕賤，九者免內眾高年輕賤，十者免內眾小年輕賤，十一者免內眾齊年輕賤，十二者免內眾上座輕賤，十三者免內眾中座輕賤，十四者免內眾下座輕賤，十五者免內眾疾病者輕賤。凡此諸賤，念之於行，行輕賤；念之於住，住輕賤；念之於坐，坐輕賤；念之於起，起輕賤。己當得免五方地獄之苦，當勤無上，誓願去離輕賤因緣，誓願當受敬重因緣，能得道力，能得道法，能得道行，能得道財，隨分資益，內外二眾，無道中窮，無道

神枕品

科曰：凡是道學，當知欲作神枕，枕中有三十二物。其二十四物，當二五十四氣；其八毒，以應八風。若五月五日，若七月七日，取山林栢以為枕，長一尺二寸，高四寸，空中容一斗二升，以栢心赤者為蓋，厚四分，善製之令密，又當便可開閉也。又鑽蓋上為三行，行四十九孔，凡一百四十七孔，孔容粟米。其藥用：

芎藭 當歸 白芷 辛夷

杜蘅 款冬花 藁本 芎藭母也

蜀椒 桂 乾薑 防風

人參 桔梗 白薇 肉蓯蓉

飛廉 栢實 薏苡仁 白朮

木蘭 衡花 秦椒 藤蕪

荆實 一云杜荆實

凡二十四物，以應二十四氣，又加八毒者：

烏頭 附子 藜蘆 皂莢

礪石 莽草 半夏 細辛

此三十二物，各一兩，先安八味在下，後安二十四味在上，按之令實，為布囊以衣枕。常枕之百日，面有光澤；一年中，所有疾病，及有風疾，皆愈差而身盡香；四年，白髮變黑，齒落更生，耳目聰明。雖以布囊衣枕，猶當復以葦囊重包之。須卧枕時，乃脫去之矣。

明鏡要經品

科曰：凡是道學，當知照鏡。欲令見形之法，當以小開戶，居暗向明，暫閉目思，想見面形。初時漠漠，殊無所見，中宿之後，漸漸洞遠，自見面目，朗朗開明。平旦，及日未入，此時最好。若日中盛明之時，當小閉戶，在灼灼中窺鏡，終無所見也。莫在火下照鏡，當以火自遠，勿得逼近火光。若欲開日照鏡，自視形體，當在灼爍明中，無所苦。若欲閉目，思見面形，居闇向明，然後視形耳。照鏡大要，當安卧思想，精誠凝至，欲卧未卧之間，體條條常。須臾之頃，當有赤黃光從額上出，照耀一室中，於是髣髴恍惚，如覺如

卧，便自見面形在光中。對共相視如頃，即便消滅。卧覺之後，輒照鏡，欲卧便卧，思之如前，法當夕夕自見也。或卧覺，兩面相對，或見己形，兩人共并。坐或卧寐之間，見好神童、玉女，年十五、六，好衣服，頭額正見，輒再拜。或身邊聞語聲，天下吉凶萬事，皆緣預知之。或自在壁東，見壁西。或暮，卧夢照鏡。或還光，内視五藏。照鏡，當以甲始立規之法，以明鏡九寸，無令面中有疵瑕。正令清明左右，各去一尺五寸，與目齊，澡盛井花水著下也。夜照鏡，宜用麻油火也。自見形分，下地再拜長跪言：吾與子同體，今與子分形，萬年乞丐，常與子相隨，身形不衰，萬年相隨受。視中明鏡，先視形，見衆物，聽聞人語聲，修明鏡，有三童九女侍之，三童長六尺，九女長五尺，明鏡君官屬將吏百二十人，治關陽宮主人，兩目童子，精光視見，景知吉凶也。昔有磨鏡道士，賃爲百姓磨鏡，止責六、七錢。無他法，唯以藥塗拭之，而鏡光明，可以分形變化。又能令

人聰明，逆知萬年。又能令人與諸天神相見，行其道得法，則諸神仙皆來，道士得道矣。道士在石室之中，常當懸明鏡九寸於背後，以辟衆惡。又百鬼老物，雖能變形，而不能使鏡中景變也。見其形在鏡中，則便消已，無爲害也。

#### 九節杖品

科曰：凡是道學，當知九節杖，輔老救危，各有名字，不可不知。

第一節名太皇星，第二節名熒惑星，

第三節名角星，第四節名衡星，

第五節名張星，第六節名營室星，

第七節名鎮星，第八節名東井星，

第九節名拘星。

皆刻杖節爲星名字。年四十以下師，未受經法，謂之無爵，不得杖。若病疾，得杖輔病，但在師左右，皆不得杖也。

#### 作神劍法品

科曰：凡是道學，當知作大劍法。齋戒百日，乃使鍛人用七月庚申日、八

月辛酉日，用好鋌。若快鐵作精利劍，鑲圓二寸六分，柄長一尺一寸七分，劍刃長二尺四寸七分，合長三尺九寸。法鈎鑲長三尺九寸，廣一寸四分，厚三分半，以梢九寸，爲左右刃處，頭安鑲，左右面刻之，作九刃字，鑲背上刻作九巳字，皆從劍背下行順刃也，順鑲而刻之深。刻字以金銀鏤字，益分明佳也。鑲中央，復有望，如起小半鑲者，内鑲刻木，左面爲日字，右面爲月字光，又圓刻日外爲郭。欲知劍左右内外，以正二日南，使劍背在上，劍刃在下也，於是以東西爲左右，東面爲左，西面爲右，東面爲外，西面爲内。劍梢九寸，有兩刃處立刻。兩刃處立刻，兩刃中有上内外面。面各作三丁字，從劍兩刃頭始作丁字，分處如三寸爲一字，字向劍梢，刻劍象書如左，刻皆當去柄下一寸半。如此劍，恒置所卧牀上櫛被褥之間，使常不離身，以自遠也，既足以逐辟邪魔萬精，又以照五形，依經奉致飛仙，劍代形耳。或謂曰：分影劍，或曰：揮神刀劍，字干，名良非。若眠

卧恒祝，呼劍名字曰：良非，字干。神金暉靈，使役百精，令我長生，萬邪不害，天地相傾。當密呪劍鑲之中也。刻背上字，下行向劍梢，當切謂調文字，令齊至兩刃之際，刻劍左面，以斗星己字，空面令刃順柄下行，令齊至兩刃之際。刻劍右面，以斗星己字，空面令刃向背順柄下行，令齊至兩刃之際。並當使星字分明，均調布滿劍身之中，勿刻刃中也。刻作星象，皆當周圍，刻如小鑲狀，勿際鑲中央鐵空之實也。外當以青囊裹之，刻作星，便似此作屏鑲，但使外如鑲內實塞也。鑲中作堅起文，如小半鑲者，柄飾玩隨人，刃長二尺四寸七分，柄長二寸七分，稍九寸，為兩邊刃矣。背厚三分，刃廣一寸四分。

### 詣圖廁便曲品

科曰：凡是道學，當知修身敬服，未斷近漏，所詣共有。若道士、女官，當先造一處所，四向密泥，內外周淨，莫為二衆所謗偏曲。如登廁之時，先解上衣於外，然後詣門，呪曰：

左德神，右德神，土司命，青夫人，

除其死籍，入以生門。畢便上廁，一者敬法服之神，二者修己身之行，三者避二衆所觸。當於門側，別安置淨水淨巾。洗淨訖，然後取服著之。若在草野中，呪曰：

林野夫人，林野夫人，除去某死籍，入以生門。

小便，呪曰：

長須、長須，令我入金堂玉戶，使我長生老壽，百歲千歲，常與汝俱。

### 解惡夢品

科曰：凡是道學，當知古之真人，其寢不夢，其覺無憂。鍊心未精，六識緣境，日以心鬪，招得惡夢。若道士、女官，及外衆男女，遇惡夢時，當長跪，向北方啓太上大道君，言其狀，乞得返凶為吉，返禍成福，密呪曰：

太真玉女，侍真衛魂。三宮金童，來守生門。化惡返善，上書三光。使我長生，乘景駕雲。呪畢，嚙唾七過，叩齒七通，返枕更卧，凶邪消化，返禍為福。夢忤所見非常，慎無語人，不言則吉，論之則凶，不論不言，萬代無患

也。

### 父母品

科曰：凡是道學，當知兩儀賦命，父母遺生，生道之中，須知敬愛。出家之人，若道士、女官，身心依道，俗化全隔，然於鞠養，有殊常俗。若在遠，隨四時省問；若在近，隨月朔省問；在寒在熱，在涼在暄，定省之時。見在家兄弟，朝夕寤切，無可資養，既無兄弟資養，出家之人，須知所欲，量減身上賤贖以供之，不得非法之中別有他用。若在家兄弟、姊妹、姑姨、舅氏，不在此例。若獨運慈悲於出家法外，萬一聽許，亦不得以非道中用，不得因此以父母之親、及兄弟姊妹、內外眷屬之親，同牀席坐，同盤而食。解法衣時，不得與俗同處。若逢病患，孝友之心，自須辛苦，勤力醫藥，朝夕愛護，不得於所生父母有所吝惜。今之父母，是我寄附因緣，故以禮報之而稱為父母，故當己父母生長之恩，勿忘之。

### 老病品

科曰：凡是道學，當知地住受生，

由雜報習因，證雜報習果，勿初中後分，吉凶無定。若道士、女官，得內外病，得輕重苦，不能念慧益己，不能遊化利人，一日二時飲食，一年四時衣服，念念病苦，怙恃無從，心連色持，有二種依憑：一者依憑外衆六種人，二者依憑內衆六種人。外衆六種者：一者所在尊德人，二者所在富貴人，三者所在敬信人，四者自己父母親，五者自己兄弟親，六者自己姊妹親。內衆六者：一者受道師尊親，二者受業門人親，三者同業朋友親，四者同行朋友親，五者同處先後親，六者同心朋友親。十二種內外人，當於老病，爲發五種願念：一者願念法門二衆，無孤露苦；二者願念法門二衆，無驚怖苦；三者願念法門二衆，無飢寒苦；四者願念法門二衆，無憶羨苦；五者願念法門二衆，無覆墜苦。五種願念得成辦已，當行六種供給：一者供給隨分棟宇，二者供給隨分牀席，三者供給隨分衣食，四者供給隨分香燈，五者供給隨分瓶盟，六者供給隨分侍役。當知

如此人，未證道前，在三際中，捨身受身，當得五免果報：一者免孤露苦，二者免驚怖苦，三者免飢寒苦，四者免憶羨苦，五者免覆墜苦。病者當受供給之時，隨其氣力，行住坐起，發十二種慙愧：一者慙愧天尊，二者慙愧真人，三者慙愧仙人，四者慙愧高天，五者慙愧厚地，六者慙愧日月，七者慙愧尊德，八者慙愧富貴，九者慙愧敬信，十者慙愧父母，十一者慙愧兄弟，十二者慙愧姊妹。願念所受棟宇等具在我身時，病苦消化，得心業力，得身業力，得口業力，朝夕思惟，讚歎禮拜，所生功德，報前種人恩，廣及有緣，同得遠離一切病苦，成就法門。內外行者，無闕無變，一人、二人，乃至無量人，悲憫一切，咸令受行。若在衆行法，逼以老病，不堪親受供覲與觀同者，內衆六種人，隨分爲受矣。

### 滅度品

科曰：凡是道學，當知修建行門，有遠有近，遠則超凌三界，近則長生久視。若道士、女冠，莫非積福所招，奉

佩三洞，位齊五嶽，冠服巾褐，制爲二儀，修長生之業，習正真之道，或形蛻而密化，或命過爲鬼官，是以軒轅昇遐，劍鳥在焉，高丘剖棺，而形飛冲天。故法身之重，死生莫遺。凡仙品未充，運應滅度，若命謝之時，沐浴梳理，加以冠服，望昇天行，不喚魄也。別安置淨簣，敷以淨席，徙之其中，覆以輕衾，杖策著左，神劍安右，緣簣兩邊，敷以淨草。門內外二種弟子居左，俗緣男女居右，若女冠隔幕。初展哀痛訖，然後以時哭泣，別於棺頭置一函處，盛外法錄。一科云：三錄封送石室深穴中，及資送之具，香藥、服飾、筆硯、巾盥隨身，法物並令具足，勿得厚華金銀財帛也。鑿室有二種處：一者出山林中，二者於高寂之地。

### 師資制服品

科曰：凡是道學，當知入我法門，師資最重，終期不死，理無服制，然捨身受身，有生滅苦。若道士、女冠，門內弟子，變服冠白，哭泣以時，去鹹酸七七，沐浴，百日復巾，服衣作淺黃色，心喪三年。門外弟子，謂少不居門師

變服冠白，哭泣以時，去鹹酸三七日，沐浴復巾，服心喪三年。外學弟子重者，同門外禮輕者，去鹹酸三日，謂師君之重，不可輕也。師君無俗中係嗣，唯弟子當之，相率徒義，幡花巾盥，香供法物，以道安措，几筵處所，百日齋撤之。然日有遠近，在七七外入石室者，仍待入室後，更七日，沐浴復巾服。

若師於弟子有哭泣，去鹹酸七日，入室以後，有心喪，不變服，謂弟子多少不同，不可以人人別制。若同志、同法、朋友相送，冠服微變，尋常入室後，撤一有哀。若是本觀，停以音聲，供養一百日也。

### 父母制服品

科曰：凡是道學，當知出家離俗，資於父母，生成恩重，不可無服，降此次第，不可無哀。若道士、女冠，祖母期年之喪，不得臨尸於別房，制哀哭五日，不得受弔。伯叔兄弟，皆如祖母，五日未殯者，在哀也。兒婦下流，不得哭哀。畢，沐浴復舊，而不得制世服。犯者失道，罪劇上科。若己父母，

聽哭展哀，哀百日竟，復巾服變衣，作淺黃色，心喪三年，無復哀哭。若日有遠近，同師尊，制几筵，小功五月，總麻三月服。及四海周遊共事等，死皆聽殯。斂訖，往問訊，依悒慘愴，而不得哭也。道法無弔問，既在人門，理不容頓却，此為靈寶世間科也。

### 追福功德品

科曰：凡是道學，當知師祖終。雖門內外弟子，及追福功德，皆同一法，唯恨財力不堪。從受化日，坐五六師。齋官若力竭財殫，三追坐齋也。滿一百日，建五練生尸齋，三日三夜，法於安措室邊，室近，亦於觀中。滿期年周化日，建黃籙齋，財貧，靈寶齋也。滿月周化日，修齋而隨力所堪。一者報師祖智慧恩，二者報師尊衣食恩，三者報師祖將護恩，四者報師尊離俗恩。若居弟子，師祖終日，慘切悲哽功德，追其福，不得晏然，謂犯不孝，得四種惡報：一者當得已後弟子見在遺棄報，二者當得已後弟子過去棄背報，三者當得已後弟子未來遺棄報。各宜用

心，令三代追念，更相開度，戒之慎之。

### 減度財物品

科曰：凡是道學，當知修身度心，空堂清室，名為仙家。若道士、女冠，或為功德所須，或為口命資待，或行道而得，在房安置，或在他處安置，未得施用而減度者，經書鎮觀、疏論雜典，分與門內弟子、房內乘騎侍從，及有一物已上。贈送事畢，並入本住常住。一者為本住內眾歷劫福田，二者為他方內外二眾歷劫福田，三者為士師三代歷劫福田。掌事法門，同處徒眾，親加檢錄，無令漏慢，翻為內外二眾三代罪田。若生前有所處分者，從亡師疏。若非本觀，或近或遠，所有隨身亡處者，亦由本觀量準陪死，處香油之費，餘準上條。若有遠一千里外人，隨近法門常住也。

洞玄靈寶道學科儀下



# 004 洞玄靈寶千真科

經名：洞玄靈寶千真科。一卷。  
底本出處：《正統道藏》正一部。

爾時，太極左仙公以吳赤烏三年正月一日，登勞盛山，精思念道。是日中時，有地仙道士三十三人，詣坐燒香。儵爾之時，乃有天鈞伎樂萬鍾樂作。太上道君與諸聖，衆天真真人、扶乘千真、仙童玉女，乘空履虛，同時俱至。變所居處，床座莊嚴，太上道君依位而坐。仙公稽首伏地，良久言曰：玄積劫有幸，好道樂真，銜荷慈尊，降此卑室，千真集會，喜慶難言，沈迹下僚，未由大悟，不審人間，居處道俗，軌儀進退之誠，伏希指示。太上告曰：子有功德，宿著左仙，暫託因緣，寄生下世，爲物宗匠，助道弘宣。乃命千真，爲說科戒。千真唯唯，伏受教言，

護命真人乃說科曰。

科曰：施制立法，要假能行。衆中無法者，不問老幼，悉不得共住。共住之人，必須同遵聖教，動止合儀，惡悉能斷，善共保護。如勸惡者，事在別科。

科曰：道法清虛，不希名利，閑居靜室，謂曰仙家。我弟子中，多畜錢財寶貨，牛馬奴婢，耽着不已。如此之人，斷三寶原，奪衆生眼，能持經奉戒，俱爲滅法。

科曰：大德名人，同住一處，有狡猾弟子，苦欲歸依。或愛情未離，或枉威逼，事不獲已，各試機宜。或先令苦使，或誘引恬言，或獨立坐忘，或擯令遠去，或出經寶教授，令齋戒治除，或懼自尊威，而令傍人撫接。若終惡不改，而無進善之功，畜斯弟子，是滅道法，永須遠離。

科曰：若有弟子，愛樂正法，深經大義，咸願欲聞。直以機在前緣，衆根闇鈍，如此之人，善欲暨發，可須安慰，三戒、五戒，示靜安心。大德法師是衆

生模範，若心性高者，而令低心下意；若動止強梁，而須攝伏；若其懦弱，勸進勇猛。既爲衆生父母，寧不愍憫，必契道法，永無退轉。

科曰：出家之人，能持三戒、五戒、九戒、十戒，乃至三百大戒等，一戒之中，各有二十四善神之所擁護，天人供養，不犯衆惡。有不信戒，衆惡故犯，罪結冥陽，却受生墮落盲道。違戒奉戒，得福獲罪，不問道俗，至理無偏，其功等爾。

科曰：上德尊人，住持大衆，下有小過，須避嫌疑。若有不和於國王、妃嬪眷屬、大臣宰輔，及俗人兒女、小道士、淨人，宿新惡嫌之人前，並不得呵責。若應舉罰，先喚來隱處，自以示語。

科曰：不堪爲衆所惡，乃當白衆舉罰。

科曰：出家之人，務在簡靜，非法行事，動則落邪。非法者：一則廣求利養，自託我能；二則貪積無窮，爲人婚姻卜相；三則強稱多解，貼視天

文；四則行等淨人，躬執稱稼；五則鬪亂大眾，與惡友交游；六則正法爲事，而與凶俗結黨；七則坐起無分，混淆法次；八則不依正道，與俗同床；九則闇夜出行，而不炳炬自照；十則樗櫟雙陸，劫盜行非，恣意所爲，而不自戒。入道依衆，可以矢之，如不自懲，是滅道法。

科曰：上清法師，不應授人大戒，不應受人依止，不得畜弟子，不應爲人教授，不預評論衆事，不得闇夜自行，不得親近邪見，當須動止在法。

科曰：諸小道士所請名德，皆須脩飾形儀，整頓冠履，安庠雅步，稽首三拜。拜訖，長跪啓白：某甲小兆，未備法教，故以遠來，伏願大德，賜垂解結，我有所聞，必無返逆。大德爲白衆：今有某道士，從小來心，有結緣累，不能自解。今稽首求悔，若從生至今，行嗔，行怒，行劫盜，行貪慾，一切不善之行，於今解釋，不敢復犯，進學正戒，通明義理。說竟，謹依所說，乃起更三拜而退。

科曰：亂衆之人，不依正法，飲酒醉亂，輕欺上下者，罰錢及米，或餘貨財，當時同和，後便違拒，不肯輸送，因茲杖罰，或奪財帛，以用供養，或苦役治地，斬伐草木，鋤禾收刈。如一衆不能治罰，捻集道衆。又不能治，可送與國王，以依俗律。

科曰：若有不依正法，遊入他觀，妄有輕欺，科索酒肉；或媒嫁淨人，賣買奴婢，及餘畜產；或造順俗之制，犯罪囚禁，遭赦得免；或自貨財，方便得脫；或奪賊物，因利求利。律有正科，依法與罪。

科曰：住立道場，皆須衆食，登齋應供，十方共同。擊磬鳴鐘，名集法衆，非是齋人，不預斯食，同建福善，道俗無違。恨客閉門，衆所同醜，或有問者，食則有限，客乃無違，既不神通，何能供給。答曰：主客之人，遞互爲作，本供既少，客數又多，聽可均分，減口讓哺。此是人情，勿宜杜絕。

科曰：道法平等，不簡親疏，亦貴賤同處一衆，護惜無僞。若人人作情，

來求輒與，此不存衆，衆即破攘也。各宜慎之。

科曰：若是齋時，俗人來乞食者，監厨之人，即須借問，能齋以否。若能齋，與食，若不能齋，深示因果，使知罪福。非爲悛惜，欲令返悟，謹守道法，是爲第一慈悲。若不示語，衆生得罪。

科曰：若齋食時，有五事：一先當取晷影，二則鳴鐘集衆，三則行水洗淨，鋪巾列席，四則打磬就食，五則說先師食咒。若不爲此五事，非入淨齋，名爲盜食。

科曰：諸大眾人，每用常料，若先約三，不可加減，減爲犯盜，多取亦然。若行食時，果菜已上，並不可長取。若意貪長取，此即犯盜。若行食時，上座須量下座須用多少，不可過取。《昇玄經》云：上下共相顧望也。

科曰：道衆威儀，事在嚴整。衣服清潔，軌行可觀，則生世善心，諸天稱嘆。若形儀疏慢，不喜衆心，不堪衆論，毀辱道法，即是道寶有虧，斷大慈種。若爲衆儀軌，人所欽慕，遠玄教益

隆，法門有異。

科曰：若就齋戒儀軌，大德之人應當前坐，約語徒衆，必使齋整，勿使主人有所嫌鄙。或各爭異論，無有畏忌，非唯道俗賢善惡惡，亦乃十方大聖冥鑒。爲罪招殃，各因己受。

科曰：入衆坐起，皆有法則。若坐時，男先上左脚，正履近床，次上右脚，徐手拓床，平身向後安坐。若下床時，亦徐手拓床，近前取履，先下左脚，次下右脚，安徐而起。女前右脚，坐起咸然。若入堂時，先於門外，端衣笏，正褐帔，束身斂版，存想堂中法衆如十方天尊、如得道衆聖、如見在國王、如州縣府主等，方始安庠進步。

科曰：若入堂時，有門兩頭東西門，各隨左右入。若門西坐者，從門西入；若東坐者，可門東入。不得於門上交過。

科曰：道服，中華之衣，橫裙大袖，與俗有別。不得與白衣叅雜。袍裘皮靴，角柄食器，皆須添素而已，不繁金銀銅器。朝修行事，禮謁衆聖，皆

盛儀服，隨法位次。若上清，衣紫帶珮；靈寶通黃，三五衣絳，非事時，紬絹爲衣，荆槐色而已，不得紋綾羅錦，炫惑時俗。女官不得金玉釵釧，花粧粉飾。一則入道通惡，二則非爲正心。

科曰：道士女官，各須淨行。道士不得畜女童子，女官不得畜男童子，各便遠離，栖肅其心，目不見形，聽不聞聲。老子經云：不見可欲，使心不亂。若有此色，即須白衆，告舉不肯制止，國王有法。

科曰：大觀私房，皆多混亂，特由尊者，不能謹慎，縱恣無方。或是綱維不出教令，身居寶地，心穢慳貪，導引後生，同開惡趣，凶惡長養，塞大道源，使正信者憑心何所。

科曰：共入寶方，同開善趣，懷嗔動煞，咸乖大慈。養牛畜馬，不免鞭撻，獵狗放猫，專懷殺意。今入淨戒，此等並合戒之。

科曰：人有尊卑，戒無大小，或身雖奉戒，意無在法，不脩淨舍，詎飾殿堂，招引凶黨，動爲非法，聞鳴鐘禮拜，

大笑入觀門，見尊德行道，外生誹謗。特由綱維自尔，何能戮力徒衆，遞互作法，風教日乖。

科曰：若衆中有一人不善，可隱處示語云：真品仙階，行人所踐，道無形像，要籍人和，十方法徒，助道揚化，聞有法要，學擬成身。豈得過令他知覺。今大德諸行無犯，唯有其事，不依正道，請即改之，猶如月虧，更滿蘭歇，更薰幸相，用言共匡，法教不悛，即舉白大衆。

科曰：所養子弟，彌加呵責，有大罪過，引五事責之：一我今呵責汝，汝須出去；二則出離之後，莫入我房；三從使無人，誓不用汝；四我之生前，莫至我所；五則寧引化三塗五道，終不與汝共語。此之呵責，折伏爲之甚矣。不用分外，非法拷打枷棒，懸首反縛，晝夜打罵。律無此條，傷大慈種。若師主使令弟子酤酒買肉，坐行販賣，牧牛養馬，並爲邪姪，驅使弟子，弟子可言曰：以此所作，非天尊之行，某不敢爲師弟子，若有嗔責，可須捨去。

科曰：惡行弟子，教不知悔，其行有十：一則為惡不恥，二則見善不修，三則聞諫彌甚，四則動非威儀，五則強梁我慢而無恭肅，六則夷情狠戾，七則友非忠信，八則遊習奸姪，九則好樂屠戮，十則醉亂尊卑。有此十種行人，是破道法。若不為惡，能伏勤苦，清旦入房，除穢清塵，朝中日暮，三時問訊，求有所習，隨用駟使，不辭勞苦，漸盈大器，積德成真。有此弟子，紹隆正法，廣以讚嘆。

科曰：出家之人，與俗既別，置觀立舍，並不得與俗人、及家口寄住。若是十方方法衆，行往經過，看前人德行高低，作三品安置，尊卑居止，要合行所。

科曰：每觀舍，應須精思別院置名，得平常集衆，同在齋堂。若是遠方行人，來暫居止，即須先問，欲何處居止。其十方來人，自量才德，請就居止。若才德高遠，精思別院。若無奇行，請平常居止。若自量卑弱，請乞下房小室，聽可以謙請，不可過分。若是上人讓請下人，可須辭謝改處。若才

非所處，即須黜退。

科曰：出家之人，既能披黃戴青為相。若能淵澄霜潔，玉潤水清，世世福田，行無點污，守持正戒，有五種譬喻：一者如富貴之家，忽生一子而無兩目，經涉三月，兩目忽明，衆家歡喜。無戒之人，猶如無目。二者喻如磨鏡，漸漸增明。有戒之人，念念功積。三者喻如嬰兒，細細長大，能持戒者，以下之高。四者喻如飢人，終念得食，不得食故，必死無疑。不受戒人，長輪盲道。五者喻如航，能度大海。能持戒者，必度生死苦海。

科曰：若國王、大臣、施主、工匠，能有益衆者，可供給飲食，薪火有求索，白衆給之。

科曰：若威勢及惡賊，能損害衆者，亦須供給飲食。此是不善人，能損壞法衆故也。

科曰：常住財物，不得貸借，充私房中用。其有病患，切急白衆求請，後一陪填還。

科曰：非法之物，不得布施。仙

公曰：何為非法之物？真人曰：牛馬奴婢、軍械器械等物，並是也。

科曰：時在饑荒，又遭離亂，各欲隨豐逐靜。能有守固者，衆可分私財物，以與守固之人。

科曰：法物、造像、造經，有所施用，輕重各別。仙公曰：何為法物、什物、經像等之輕重？真人曰：鐘磬幡花、爐合帳蓋、寶幢經緝之屬，此是法物則重，冠履机笏、褐被裙襦衫褶等為什物則輕。本心為重後作輕，犯五刑律。本作輕今作重，不犯。像有二等，天尊為上，真人為中，衆仙、玄中法師等為下。本心捨施，造像為重，不得入輕，入輕犯十惡。若以卑入尊，不犯。經亦然，上清為大乘，是大乘；洞玄靈寶是中乘；洞神三皇為小乘。本心造大乘，後為中、下，犯五刑律。本心造小，今造中、大，不犯。

科曰：盜法物、什物，罪同五逆。  
科曰：將常住食飲，以私餉及歸私者，準盜論。

科曰：常住之物，十方共同，遞互

相付，百代常行。不可當時任意取用，不得共制私自用意，分以歸私，並犯五逆罪。

科曰：若母及姑姊妹等，為病患及急難，要須扶提者，無犯。若是他人兒女，沒水墮火，縱有姪心，亦須極救，不得犯觸。

科曰：出家之人，單景獨宿，與物不群，割愛遺榮，超然宴處。若犯逐亂，世不崇敬。

科曰：若行住道路，逢女人有所求覓，並乞食飲等，只得隔十步外遙言。若得物及飲食等，安致地上，或持，去後任來取，不得親授手中。若路逢婦女，須避路與過。

科曰：居淫心起時，如逢猛虎，如見毒蛇想，如見國王，如為賊癩逢主想，如坐在宅中、宅被火發遺燒想，如乘舡渡海、舡漏欲沒想。作此六心，淫無起處。

科曰：共居觀舍、堂殿、園林、田地，三寶衆有，殿屬天尊，堂屬道士。若其營造尊卑，有其私房，是道士自

造，廣狹等級，出自己身，死後身前，由身處分。若死後而無付囑，徒衆施為白衣童子，自所營造。得度之後，配名則別者，亦聽許自己處分。唯地屬三寶，不得改動。若大眾先有別約，衆例不犯。

科曰：諸初入道，戒行未全，依倚村坊，不住觀舍，上無尊德可畏，下多狡猾為朋，誘引兒女，同床坐起，歌笑嬉戲，飲酒食肉，俗人見之，返生穢慢。如此之類，是滅道法，破他信敬，尊德巡察，依科與罪。設不能治，國王有法。

科曰：若出家之人，將三寶之物贈遺官人豪勢，內求潤己，翻令俗人生怖望心，縱能興建，不如淨坐。如有犯者，准盜物論。

科曰：出家之人，不交世俗，不求名利，不作有為功德，靜思入定，降伏外魔，名為淨戒，是真寶法母。

科曰：出家之人，清堂虛室，耽着既甚，有十惡累：一則廣占荒野、別畜田宅，二則種植園林、自求地利，三則

出入貯積絲綿穀帛，四則畜販奴婢，五則愛養六畜，六則貪聚八珍，七則樂玩，八則銅飾帷帳，九則衣着奇異，十則財寶珍勤。此之十事，並不得為，深宜改革，從道日新。

科曰：若有人來乞索，是因三寶起齋，傳度講誦，轉經受施。但是因三寶得者，准明真科，依十二折傳處分。看是此外，所得聽出意，布施濟惠，仍不得以不淨取，以為不淨施，皆犯枉法得罪。

科曰：若諸弟子，恒畏天寒時亂，遭飢荒等事，儲積絲綿、絹布、五穀，以備時急惠施者，不禁。

科曰：若有人，將器械、禽獸、非法之物，以惠施者，並不合受。

科曰：若有人，將使人奴婢以供給者，悉不合受。其使人能齋菜持戒者，可受。

科曰：出家之人房舍，與俗兒女鄰並者，夜宿各須閉戶，不閉犯律。

科曰：出家之人，寧受犯偷鐘盜像之罪，不得言說他家陰私、穢惡之

事。

科曰：出家之人，衣裳鞋履，皆須整頓，行動坐起語笑，要須得節。若為疾病，或威迫驚懼，或被獸，則趁逐被傷刻，舉足動步及衣服違法者，不犯。非此等，犯律。有故為者，犯律。仙公問曰：何為犯律？何為犯科？真人曰：律無正犯，而言犯律，杖罪；科無正犯，而言犯科，犯答罪。

科曰：若野地得藏，還與國王。若藏中有冢銘記，記云是經像堂殿功德之物，得者，依其銘記，處分施造，不須白王。若不尔，犯十惡律。如路次野中，拾得之物，提取其物，依物標榜，得主分付。如不得主人，送常住，不尔犯律。

科曰：冬天洗浴，每一旬一浴。先作密室，方六尺，安水槽火鑪，筒渠注湯水入其，須桃枝栢葉、蘭香竹葉等，內籠濾湯。至乃鳴厨下鼓，尊卑以次入浴，不得男女同室，亦不得與俗人共浴及浴衣。若不尔，並犯律。

科曰：出家之人，不得飲酒，或妄

託天寒，詐稱腹痛，飲後色變，或鬪亂

尊卑。應供赴齋，或施行章醮，或行遊道路，或應對公私，非惟自失禮義，抑亦穢辱道眾，是滅道法，無生弘讚。然應人就請，本以清潔為先，出公入私，皆用端嚴為首。有如此例，皆犯律論。其實是疾痛，眾所通知分藥，要須不在禁例。須令出外，不得入法席。仙公曰：道法之中，聽許飲酒。《靈寶經》云：置酒浮雲觀，高飲玉清臺。此何頓隔之？真人曰：何見之謬。《太清經》云：化金玉為三十六水，以金為水則為金漿，赤玉為水則為瓊漿，白玉為水則為玉漿，或玉液。《定志經》云玉液五者不醉，常思淨行，何有許法。

科曰：出家之人，出外行遊，見人鬪打，不孝父母，不順兄弟，為偷盜，行軍兵，傷殺人事，皆須歸觀香湯洗浴，入靜思微，不尔犯科。

科曰：齋時受食，皆須淨手巾盛受。

科曰：齋後，須楊枝揩洗口齒。

科曰：齋取時，依立主法，分二十

四炷，以定得失。

科曰：小師若見大德，及經像在背後者，皆須侍衛，不得違背。

科曰：傳經度戒之時，女官得入道士觀，道士得入女官觀，要須請師資，位定白眾，令知嚴整法戒，不得一人自往聽將，二人同行，直入法堂，更不得私房混亂法事。當日即出，不得經宿，不尔犯律。

科曰：男女官各得依止。男官依止男官，女官依止女官，大法者為師。每一旬，至師所受教訓。至時，整理法服，赤心靈宇，恭敬謹肅，直詣師門，不得東西異向。至師門已，通問云：某弟子問訊。師知己，乃端嚴衣帔，燒香於經誦之室，命弟子進。進至師前，安詳三拜，問訊云：師比者起居安否？德無損乎？師無他故，乃答云：亦無虧禮誦。若有疾苦，隨事應弟子。若有罪過，先聞師耳，可云：汝有某事，可加戒誨，令其改隔。弟子拜謝乃云：不能自勵，勞師戒勅。又拜謝云：從今以去，不敢復犯。若是齋前，

設齋。齋後，無所施設，乃辭去再拜：願師以自珍重。師重戒云：所在之處，勤行齋戒，以自慎護，勿起驕慢。唯然即退，三步乃始轉去，不得更入他房。歸至本觀，以師戒誨之言，示衆大小，不得藏匿。若女官無大法，不解傳授者，可訪男官請受。若有高德女官，男官亦得詣請受法。俯仰之格，男女通用。問曰：道士女官，而被俗人不依道理輕凌，若爲依止？答曰：若道士女官，而爲俗人不依道理輕欺者，告父母、兄弟，及村落有勢力者，以爲外護。若道士女官，有不是罪過，可白徒衆，徒衆依律治罪。不受，送與國王。問曰：天尊初得成道，聽許男子出家，未審女人從何乃得入道？答曰：天尊因樂淨信，夫妻結果，道成爲元始，因許男女通令出家。妻以果地，爲金中候太夫人之稱，亦許女人相係入道。傳經度戒之後，大洞女官見男子入道，受老子自然法已，即須敬禮，依法引接，爲能紹隆聖種。若見有過，垂心慰喻，不得罵詈非謗。若治籙童子，須禮

大洞女官，爲敬法故。問曰：男女童子，依奉經戒，王勅與度，作何方法，得度之後，合禮父母以否？答曰：紹隆聖種相係，弘護男女入道，揀取端正慈敏、有道心者，師先試練，十行可軌，聽許講習。王勅與度，依王法制，應合度已，依一大觀，嚴整玄壇，施安蘭纂，依明真拔罪之法。預度男女於壇南，依左右方面以別，兩行倚立。以監度官長正南橫行，須一大洞法師橫行之前，施案席然香，讚嘆曰：大聖天人尊，歷代所崇敬。今有珍貴者，是我大國王。以發慈善心，普令入正道。得入正道已，實由國王恩。永離有爲情，長尋聖境界。必得大法利，同趣證無爲。讚嘆既已，白新度法師：今日之後，禮聖禮真，永離親俗。人各三禮，長爲俗別。第一禮國王帝主，德澤無盡；第二禮州縣官長，度脫之恩；第三禮存沒父母，得與出家離俗。三禮訖，法師投新度一人衣冠曰：大哉，聖化被無窮，星宿爲冠，日月爲服，法天行道，勿替四時，廣度衆生，求超三界。法師令

大衆，普皆唱善彈指三聲，舊人唱善彈指，齊各三聲訖，乃捻着法衣。竟，官人行香如法，行道三周，舊人在前引發壇。嘆道事訖，投齋。齋竟，各謝法徒。從老起至下竟，列坐父母、兄弟，皆來禮拜。於兒女邊，父母並稱弟子，發願之後，師必定成道，與弟子等，同入正真。問曰：出家之後，從少至老，有何階級？答曰：出家之人，有五種階級：從七歲至十一，名蒲車道士；十二至十四，名駟邪道士；十五至十九，名赴施道士；二十至六十，名弘護道士；七十至九十，名住持道士。問曰：三乘之道，何以爲心？答曰：一、小乘之人，隱處山林，自調自愛；二、中乘之人，德澤弘深後，能兼濟度物；三、大乘之人，忘功絕私，發弘誓願。

科曰：能勸他人男女，並捨自子出家，譬如微塵世界之數功德，亦不如勸人捨子等出家之功德。縱有人造幡造蓋懸，至三清之境功德，亦不如勸人出家之功德。

科曰：道俗二徒，造於經像，俗人

仰之，以金木銅綵模寫聖儀，安心供養，名爲造像。

科曰：若有信敬捨施田宅園林，爲人侵奪，請報本施主，令其轉貨。

科曰：出家之人，與俗有別，然而死病亦無定法。然稍修軌制病之時，轉讀然香，晝夜不絕，臨打無常磬送終，依五練生尸法，失以病疾。觀內大衆，數以存問，檢校厨下，令前與病人食。疾病之時，難有達命，福勢既盡，乃欲隱避東西。此並是前路功德無憑，而以臨時驚懼作此，意速死而已。可以淨洒掃，開敞房舍，來往善知識達命之言，更相啓發，請法無常。寧有住者，必應壽盡，量命無機，可移入遷化堂。其堂，可於觀西北角別立，爲院堂三間五架，堂面看西北。其堂中高座，上造昇虛像，身坐蓮花，如人大，舉左手以指天門，左右二真俠。侍病人恐命將絕，移入堂中像座後安置，用黃紋全幅爲幡，長二丈四尺，尖繫左真腰，幡頭與病人手投，令病人直心正念，願隨二真登天門，詣金闕。若未應化，隨

建福田，男向左真，女向右真，一人入此堂，難得平然歸者，臨命將絕，咸稱未困，特是貪生，有此計耳。達命君子，豈去住爲心。

科曰：出外行遊，須思量結覓好伴，當有十可觀：一擇覓知己，二要須正見，三心心相得，四疾苦相憂，五遞樂相師，六威儀勿失，七行動檢攝，八所見鞠躬，九禮敬盡節，十進退合儀。可同行也。

科曰：道學法徒，速來客依，不問大小，各須安置。先與房舍，次給所須，三令隨衆朝拜，四教示門中諱忌，五語去處避就。

科曰：清信俗人，欲入觀舍，觀齋聽法，請會供養者，並須清淨，不染薰辛酒氣，嚴整衣服。結束卑恭，斂身下意，先禮天尊，次拜大德，後小戒道士。既入門，通當崇敬。若是日日齋講，恒在二時，須來者，直於禮座，禮天尊，即以安坐。其善女人來者，亦准此，不得語笑倡蕩，脂粉圖飭，粧眉畫面，常須執志整容，觀聽妙法，捨香發願，同契

成道。

科曰：俗人入觀寄宿，不得眠坐常卧之床，得坐居客別床。眠時，不得脫衣露體。

科曰：恩德大者，無過孝順，父母師主親自供養，溫良無失，此恩最大。又能勸課，令人作善，其功等比。若父母貧老、疾病、死亡，無可以充衣食、湯藥、茶餅者，得供營送。若父母不敬信三寶者，怡顏勸喻，令得法利。問曰：俗人欲齋戒者，何爲教示？答曰：若欲入齋者，可以一日、八日、十五日、二十八日、二十九日六齋日示之。若能進，又以一日、十四日、十五日、二十三日、二十四日、二十八日、二十九日，以八齋日示之。若又能進，以一日、八日、十四日、十五日、十八日、二十三日、二十四日、二十八日、二十九日、三十日十直齋日示之。若又能進，即以正月、七月、十月三元齋示之。若又能進，即以正月、三月、五月、七月、九月、十一月歲中六齋月示之。若欲齋，人先令受戒，戒之所起，三業爲初。身業



有三：殺、盜、邪淫，口業有四：妄言、綺語、兩舌、惡罵，意則有三：貪、嗔、癡。此之十戒，由三業根，先須防之。問曰：齋食，若爲次第？答曰：若自居常齋，厨下監厨一人，先自檢校厨頭菓菜，調和生熟、顏色、氣味，並令得所。次看日時圭影。天陰，取漏刻，以正齋時。時，鳴鐘召食，各送食器於齋堂，量坐處位次安置。斂鐘訖，行道讚嘆竟，各坐定已，水一遍，次行食，中始就食。尊卑得序，前下先師杓，監厨人長跪擎杓於先師座前，節衆人座頭鳴磬子一下，座頭大德咒曰：建齋，爲道真、爲道種、道父、道母、真人、神人、仙人、聖人，或同爲道，同共飲食，長生無極。竟，杓下先師前，次下齋人食，佯聲各唱菓菜飲食名示衆，齋人各捧器物盛受。若不須者，勿取。大德顧望看食，通至下周遍竟，乃令鳴磬子一下云：請就食。大衆安庠正坐，无語无笑，以就食。食時，示不鳴唇，亦不嘔口，亦無歡飲之聲，亦無咯唾，亦無呻聲吐氣，亦無驚匙打筋。上座緩食，相

待行食之時，事事三遍，行上次下第。行食訖，從下收上。行食時至，是時應受，非時不得輒索。齋欲了，斂取衆生飯散與衆生。非監厨人，不得向厨下有所科索。飯食來不及齋，即須下堂食。若強入齋堂，即名觸食。衆食未了，食飽輒起，即名驚座。衆若自居長齋，無先師杓，即無先師，咒即有出。衆生飯咒食了，行飲一遍，次行水一遍，各收食器竟，鳴磬子一下，唱曰：齋食以竟，各隨意下息。大德乃以捧食器出堂，歸房盥漱。監厨人檢校厨下，不得一人不出。若犯前一條者，對衆各罰二十拜。若應俗人齋供，坐起受食並同，唯受菓不得不受，俗人恐生揀擇之意。但受之食竟，餘菓食並面前節，衆人鳴磬子一下，唱白：大衆齋餘長食，充主人無礙用。同者嘿然，不同者說。三唱訖，齋官或有父母、師主老病，得取此餘菓，即起白云：某甲有父母、師主老病，今將某菓歸家餉餽。上座大德答云：好將去。若不此者，並令主人收充家中無礙用。或問曰：

齋時，合出衆生餘否？答曰：棄賢世界初開，元始命行道真人下教，爲遍嘗百草，以得五穀，活於人命，一切餓鬼，無種植功。於齋之次，各出飯七粒，真人德施與一切衆生，亦名神農飯，亦名衆生飯，一切衆生得此飯一粒，能飽千日。

科曰：出家人行動語笑，並避譏嫌。入法之人，不得言殺心殺，不得言奸起奸，不得言盜起盜，纔非正法，並須隱避。

科曰：聖人去代，衆生戀慕，可以駐心，發衆生敬信。堂造堂殿，宮闕臺榭，施置雕飾，造十方天尊、真仙、聖衆，或金、或銅，或鐵、泥木、圖畫，隨力能辨，幡化伎樂，種種供養。若以日月增久，虫鼠侵傷，鳥糞穢污，牛馬衝突，遂致毀壞。能有敬信，身手治理，或顧借工匠，洗飾安置，猶勝前人初造功德。何以故重發人敬信，又續前人基址故也。

科曰：朝晡禮拜三寶，得於禮拜板上。若行道時，得於地鋪席上。若

於路相逢無席，得於地上。如地上禮時，手至地，得屈指，指背着地，不使塵污掌心，名爲護淨。若爲高廣大床、平床、長床、方床上禮拜者，並不合儀，深乖崇敬。譬如見世間高貴，尚當進退合節，何況謁聖朝真，而於床上啓白，冥考一百日。

科曰：尊像之前，即是奉真承聖。對俗間官長，尚乃不敢低頓，豈況朝謁八真七聖，而以倨傲形容，或大語高聲，或更相虧朴，或攘怒眼，或仰卧斜身，並以結罪冥科，亦大爲俗人不生敬信。

科曰：齋戒之家，未至一日，先於門前豎一長竿，懸十絕大幡，標門戶，示絕浮好，以存閉靜。

科曰：出家之人，常合忠正，出入動止，以正爲先。一正己身，二正門徒子弟，三正觀中良賤，四正四遠法衆，五正頑爲俗人。能正己身爲物軌，則能正弟子，承稟有儀，能正觀中大小從順，能正四遠法義稱揚，能正頑爲廣增惠解。能如此者，名爲道士。若身既

不正，爲物所憎，弟子不敬，却賤師主。觀中常無禁忌，大小貴賤混淆，不存信義，四遠同皆厭惡，欺凌愚蔽，增長罪田，不能廣立威恩，却更誘引他家子弟、奴婢，或圖物入己，或私與交關，不依正義在身，恒以邪僻爲行。有如此色逃課凶賊，共所防戒。如不受懲，國王有法。

科曰：出家之人，還歸俗家。若有父母，可歸父母之堂，別床安置，不得與俗人共床坐。若父母有疾，聽得扶持看待。若無父母，可進客堂，安慰大小，並不得嗔聲大語，及俗間戲吓哂笑，參雜男女，經宿居停，並犯戒律。

科曰：若退一紀，即退三百日。若減十筭，減十日。

科曰：參省師主大德，皆三拜侍立，命坐即拜而坐，更問他故，則起立而答，皆條直身體，並脚斂手。

科曰：爲弟子洒掃之禮，必加筭於箕上，兩手捧接腋下而來，次有五事：一則斂塵掃時，以袂拘而却；二則滅跡，勿使有於痕跡，不淨於惡；三

則不背長者，勿生不敬；四則除糞箕自向；五則掃筭還故處。不尔，犯科。

科曰：爲弟子之禮師主，令過授物事。師主若立，則倚授；師主若坐，則長跪授。

科曰：進尊者之房戶，知在房中，或庫內，若不聞聲，嚙咳發覺。如不聞，退。若問，稱名啓白，命入則入，房開則開，戶閉則閉。入戶，正視尊者，左右斜顧犯科。

科曰：爲弟子之禮師主，有客當即拂拭床席枕褥，洒掃前後訖，白師主，師主令命客進，乃命客進。

科曰：弟子有所啓白，得主及同觀、外觀大德，皆整衣至房，房閉，當屈指細細打戶三過。停少時，不聞人聲，又三過，合九過，不聞人聲則退。

科曰：師主大德，若從遠歸，命所使先到觀中，令知歸至。弟子則整衣帔出觀迎接，當以大顧望，不得無故掩人不備。

科曰：若於道路，逢見得主及師知故，皆以下風避影，不隔越道路而與

共言，當以曲腰磬拆，有言則對，無言則退。

科曰：隨從尊者出入，當爲提持机杖、鞋履。登危臨嶮，當以親侍左右，兩手提携，不得散手遠離，老少別用。

科曰：夫爲弟子之禮，出則啓白，還則慰問，問訊上下，乃復常業。

科曰：衆有疑惑，我不勸成。衆有評論，我所審察。衆有擅造，我從衆宜。衆有行遊，我不矯俗。自常卑退，尊敬於前人。

科曰：爲師主大德存衆之法，寬宏以立節容物，慈愛以約衆，行事以恭勤，朝修以肅敬。上乃均平，不生異心，下無怨色，斯爲大德者矣。

科曰：爲人自己有善行，當與在下共之，勿自取歸己。

科曰：學道者，不發他人過，不揚己之能，不拒人之諫，不見己之怨。

科曰：行道時，齋主禮三寶訖，投香爐，拱手長跪法師之前。法師三揲香咒曰：當願主人七世父母得出長

夜，身睹光明，灾消福降，生死昇仙。訖乃行香。

科曰：自臨中食時，咒曰：二玄上道，四極清冷，太乙帝君，百神黃寧，受糧三宮，灌溉脾靈，上饗太和，滄味五聲，魂胎之命，七液流停，百關通和，五藏華明，雙皇合景，飛行上清。

科曰：爲人齋，出飯咒曰：今日是吉日，齋戒向太上。中食天行厨，主人福無量。

科曰：下先師飯咒曰：建齋，爲道真，爲道種、道父、道母、真人、神人、仙人、聖人，或共爲道，同共飯食，長生無極。

科曰：出衆生飯咒曰：勤脩大道法，精誠感太冥。真降魔魅散，衆妖皆滅形。七祖生南宮，兆身登上清。福既無不普，法食施衆生。

科曰：服糜咒曰：今日清淨，服食仙糧。行香吃粥，壽命延長。又曰：乾、元、亨、利、貞，身爲大法王。糜粥入腹，五臟清涼。漱口咒曰：楊枝捶口眼明好，願得一枝供大道。道

在一樹多名香，願將身心奉三寶。

科曰：出家同道，與俗有乖，是我法徒，共相掩蔽，匿惡舉善，遞互生恩，使遠近稱揚，通令深信。

論云：天下善人少，不善人多。今時之人，吹毛覓瑕，互相讒嫉，不知己過，強毀他非。設有一善，爭相毀謗，不能改身就善，乃欲敗善同惡，故壞道法，專由此人。大德尊者，深所約語。

科曰：盜造像物，罪同十惡。若盜將他家，相緣路告訖，又取物入己，被八門長考，萬劫無出。

科曰：盜十方齋供衆物，或爲頭首，私自入己，入火坑獄，萬劫方出，更入酆都，六十年考，長爲餓鬼。

科曰：若有惡口赤舌，凶徒惡黨以相羣聚，常懷遠離。設使偶會，情不獲已，須要口順心。若不能行，灾爲切害。

科曰：凡人爲道，威儀不足，皆爲犯科。以此示子，子明審之。仙公奉科，稽首而退。

洞玄靈寶千真科（吳亞魁點校）

# 005 三洞道士居山修鍊科

經名：三洞道士居山修鍊科。  
一卷。底本出處：《正統道藏》  
正一部。

## 服氣品第一

初時上章，請天官監氣之神。上章訖，服氣，室中設香火。服氣人正東向立，打磬九通，詠曰：某乙求於長生不死之道，今日採服氣，八引、四引、百引、百二十鍊形之氣。日出東方，照於西岡，願天官典氣之神，與某乙身中二十四氣吏兵，合共往迎，生氣唱導，而前入某乙身中。八引之氣，八八六十四氣，從某乙關口而下入。四引之氣，四八三十二氣，陸續從關口而下入。一引之氣，三八二十四氣，陸續從關口而下入。逕之太倉，開穿官府，通利支節，氣滿充實，不飢不渴，調停五藏，延

年益壽，長生飛仙，與神明合德。樂哉，大道清歌，便高引打磬。連續訖已，便就牀，解衣裸身，溫厚被席。枕高四寸，散髮正仰卧，兩脚相去一尺，兩手亦同法。握固心思，存所受六甲姓字、父母真名諱，次思泥丸、丹田神，便以鼻納生氣，以口出死氣。初從三納一吐之，調習之後，增至一、三、五、七、九，至十二氣而一吐。然則中和之氣畢足，久久大調習，增五、一十四、七、三十。初取八引之氣，八八六十四氣訖，復取四引之氣，四八三十二氣訖，復取一引之氣，三八二十四氣都滿，百二十鍊形中和之數足矣。徐和氣閉，鍊長息滿三百六十息，若能滿千二百，久久便閉，不息益善。其閉鍊息數滿訖，極口吐氣時，若氣逆息尋，即還納氣咽氣。咽之不過滿，三四咽則氣定矣。便以兩手大拇指相捉，反兩掌上出過頭，上望太清，縮兩手脚大指中，滿三七止，便解手。次又兩手直豎，翻覆兩三。次以兩大拇指相捉，交肘牽頓，左右各滿三止。次兩手提左

脚，摩胸心上三九。次捉右脚，摩胸心上三九。次以兩手接兩脚踏，急起令頭額拄地，如此滿三止，還偃卧，兩脚相去，如服氣法，氣定，神隨氣上下，數滿百二十息訖，以兩手相叉著心上，數息九九八十一訖。次兩手叉抱，兩脚屈豎，數息二十一，次二十五，次一九，次一七，次一五止。即便抱項，兩屈膝來往三七止訖，卧轉隨人，安之養氣訖。次起著衣服，莊嚴香火，打磬九遍，三唱引音聲詠曰：

某乙之身，採納八引、四引、一引、百二十鍊形之氣一周身已訖已，竟當詠誦，以定氣安神者也。

八引之氣，八八六十四氣，徘徊官府，從關口而上出。四引之氣，四八三十二氣，徘徊官府，從關口而上出。一引之氣，三八二十四氣，徘徊官府而上齊，關口而止還，下之太倉，鎮守官府，安寧五藏，機關調停，百脉通流，三尸走退，疾病除愈，延年益命，長生久壽，大道哀念。典氣之神，當監臨成就，使某乙聰明朗徹，與神靈交通，飛仙昇

騰，受道重恩，樂哉長歌止。次以起行，隨地寬闡，數步五百，若能步益善訖，更能隨日時，至中飢，則復取隨人耳。百二十氣，是竟一年。至二年，一服頓取二百四十氣。三年之後，一服頓取三百六十氣。至中能重取，如前法取之。四年之後，增多益善，亦可以飽足爲度，明慎奉行。

服氣之法，滿三千六百大周身功建，當有一大都導引詠舞之法，打磬節詠曰：

某乙之身，服氣鍊形，求於長生不死之道，採服八引、四引、一引，百二十鍊形之氣，從一周身而數，令滿三千六百大周身，功滿當詠，歌舞導引，調鍊筋骨，以求仙壽。願典氣導引之官，監臨成就，使某乙導引屈伸，筋骨柔弱，不損身形，鍊易肌骨，與氣合同，五藏克實，通靈徹見，與仙人交友。樂哉舞詠，便舉手舞三匝，一導引一舞。其導引之法，口授轉導訖而止，明慎奉行。

服氣求長生之法，絕人語，閉氣靜默，不關人事，仙道遲成，不在倉卒。

能少食穀米果棗，日中以後，裁量食之。一年食米二斗，二年食米一斗，三年食米五升，常食乾棗，日九枚。好玄水，日一升。食雜熟菜，日可一升。無食滑菜，使氣力強健，爾乃得導引屈伸行止，兼得自營養生之具，三年氣調之後，穀可絕斷，是服氣上細也。中者，至二年、一年。下者，百日斷穀。若服氣餌藥，服氣即日斷穀者，上善也。服氣之法，欲得微細而取之，無令耳聞氣出入聲。服氣之法，常含棗核漱華池，溉灌五藏以爲常，明慎奉行。

服氣羸法，攻治疾病。食飯，日減一口，十日斷穀。服氣，飢取飽止，百病除。服氣之法，初閉鍊氣時，皆心思存六甲真父母名諱，次存三元丹田之神。上一在泥丸中、兩眉間，却入三寸，爲上元丹田真人赤子，字元先，一名帝卿。心爲絳官中丹田，爲中元真人，字子丹，一名光堅。臍下三寸，名下元丹田真人嬰兒，字元陽子，一名谷玄。三一，三丹田也，明慎奉行。

服氣人有身受戒氣之法，而志願

未遂之間，俗纏在家，處官行僑，不得靜默專思者，並可人間修習法，善行功成，並兼穀調氣，並能參服羨門子中遁所出六甲符益善，有穢解之，可以除病，攻理五藏，惡不能得干人，可以禳灾除禍。服氣密行之法，暮不食至明，穀氣消盡，五藏空虛，氣即調和。清明日出至中時，法皆向日時取之，坐卧無在。初從少起，取二十四氣，轉增三十二氣調習。復增六十四氣，轉習滿百二十氣，得取得行，不得取則止。歲月日時，其令無廢，常使氣道通利，多少任意，兼得參服餌藥益善。常當存心思神，香火詠誦導引之法，爾乃天神錄人心，記識功效，兼穀行作通神路，以修德行道精思。絕俗之時，明慎奉行。

服氣調習，不復饑渴。飲玄水，雖助氣爲力，飲過一斗以上，則亂氣道，飲水則塞氣經脉。得氣之後，唯飲棗水。取好大棗十枚，以水熟煮，去皮漉取汁，煎得三升，渴飲之以爲常。其食棗日，可煮十枚，若有飢者，遠至二十、三十枚爲限。若不飢，勿食也。以飲

水爲事，水不可極多，無飲冷水，常煮水，令熟而飲之。其若居世俗官，行作習氣調鍊氣道之法，不得食一切血肉，及生菜、葷辛、生五果，當食熟煮，少食之，明慎奉行。

### 授付服氣經方要訣品第二

師姓字，今於此間郡縣鄉里中告弟子某乙，今日授付汝服氣經方要訣，汝當奉慎修習，一如經法盟經令文，奉行焉，如太上大道老君律令。

某年月朔日，某郡縣鄉里弟子某乙，年若干歲，自誓告師，唯唯諾諾，今寫受師服氣要訣經方，法度重律，不敢違令。若某乙傳非其人，一如交刀勅令。

又師勅令文、弟子自誓文，與經卷俱受者，隨身上章訖，受者八拜。師讀勅文告弟子訖，便付弟子經法，飲丹水，復八拜，復讀誓文訖，度交刀訖，復八拜止畢。

持戒德之人，俗纏居世人間，服藥斷穀，兼服氣，及服日精，并六戊氣訣，別有口法，當取師傳口授。此三法，一

法有數等法，是以不載文，上言約盟臣。

謹按文書，臣弟子，某郡縣鄉里，男女官甲乙，年若干，好樂仙壽，佩符籙戒，不越法度，善行功成，求受服氣經方訣要祕法。臣不勝某乙叩搏丹誠，謹按科法，拜章結纓文，交刀丹水，宣勅如法。某乙自誓，若違犯戒律，傳非其人，身受交刀之禍，一如令行。乞願典者通行文書，差下盟約之神，與此間土地里域真官，注氣監臨，盟令文誓，伏須報應。臣某誠惶誠恐上言。

### 受服氣法章儀品第三

謹按文書，臣弟子，某郡縣鄉里，男女官某乙，年若干。某乙修奉籙戒，善行功成。某乙先受佩服氣經法，受樂元氣，今日王相，日好時良，天地清明，冲氣和合，求表章，請受天官氣神監臨。不勝某乙元元之情，謹爲拜章表聞，乞願典者通行文書，賜天官典氣之神監臨成就，使某乙採納八引、四引、一引，百二十鍊形中和清氣，入某乙身中，布流官府，鍊易筋骨，使不飢

渴，長生昇度，唯恩求哀。臣某乙誠惶誠恐上言。

### 服氣時上章儀品第四

謹按文書，臣某乙，年若干歲，好樂長生延壽不死之道。從師某乙，受佩真職籙戒符契，積有年數，不敢違犯戒約，善行功成，受樂元元。前以若干年月日，蒙師某乙，授服氣要訣呼喻採納經方，受勅盟約要，當奉受行。今日王相，日好時良，天地清明，冲氣和合，謹按師科，拜章表聞，乞願典者通行文書，賜下天官典氣之神，鑒臨成就，使某乙採納八引、四引、一引，百二十鍊形中和清正之氣，願入某乙身中，流布官府，鍊易筋骨，使不飢不渴，長生昇度，唯恩求哀，伏願告報。

### 金丹神方法品第五

金精一斤，五色芝草一斤，五色玉精一斤。五仙人治金精，五玉女治五色芝草。黃金釜中煮之，七日藥成，齋戒百日。二月寅日合之，戊寅日服之。日出卯時，東向向日八拜，然後仰口咽一丸，如雞子黃一枚，即昇天，上登紫

宮。天上五帝，即下而迎之。金精者，肺上白鑲是。玉精者，喉嚨結中氣是。青芝者，肝中九孔脉是。赤芝者，心中九孔脉是。白芝者，肺中九孔脉是。黑芝者，腎中九孔脉是。黃芝者，脾中九孔脉是。金丹者，舌上氣是。金釜者，中黃氣是。五仙人者，甲、丙、戊、庚、壬是。五玉女者，乙、丁、己、辛、癸是。人能存之，舉家昇仙。天子服之，一國泰清，五瘟毒病，三鬼盡伏，伏匿不行，兵甲休息，人民昌樂，上無科賦，下不輸送，草木由蒙榮潤，況合丹者乎？金丹一斤一丸，重於天地山嶽，物豈能匹？華蓋子問玉子曰：人皆言天地有九重之等？玉子笑曰：天上豈復有九天也。吾盡遊民間，記善掇惡，行求賢人，夜遊九天之上，下越九地之下。天有九星，故稱九天。地有九宮，故稱九地。人有九孔，故稱九竅。北斗九星，兩星匿於陰。人有九孔，兩孔隱於陰。魁剛，一名璇璣，制治萬神，揮斥八極。天居高，人行從之，能知魁剛得與天地並生，日月同明，恍惚變

化，昇入太清，吾謂汝國之可為萬世法。玉子曰：上有九天，下有九地，上有九星，下有九宮。故東方木王，名曰蒼天，主溫，生萬物。南方火王，名曰赤天，主熱，養萬物。西方金王，名曰皓天，主涼，成萬物。北方水王，名曰玄天，主寒，殺萬物。中央土王，名曰圓天，主風。西北方極高，名曰高天，主清。東南方名曰元天，主氣。西南方名曰涼天，主陰。東北方名曰皇天，主政。九天之君，都號皇天。玉子曰：第一九君，名太皇，號曰高天，主清，玄元氣，愛養真人、聖人、道人，故制曰皇天上帝太一道君。第二北極君，名曰北辰，號曰真天，主八風，帝王之令，故制曰皇天上帝，制萬物。第三清陽君，名曰蒼天，主青，生萬物，錄真人。第四太陽君，名曰炎天，主熱，能養成萬物。第五元君，名曰涼天，主真人、仙人，熟萬物。第六少陽君，名曰皓天，主成萬物。第七太陰君，名曰玄天，主寒，殺萬物。第八開天君，名曰高天，主災變。第九陽君，名曰元天，

主氣，為雲雨電，使作萬神，普受玄師，教吾三五步綱。所求者得所願，亦良求道得道，昇為仙王，出入玄門，安樂壽長，高官顯位，金紫煌煌，求財得財，玉帛盈堂，心中所欲，不求自彰，心中所願，不索在傍，出乘舟車，入御三光，女為貴人，男為侯王。如得飛仙，少小高翔，亦皆躡斗，非但步剛。三官六紀，一名三令，一名三生，一名三寶，一名六害，玄氣為吾籬落，元氣為吾屋宅，始氣為吾牀席。天為玄氣正清，從我頭上而下，入我舍，止我肝，貫串九天，從我兩目而出。水為元氣正白，從我左右脉下，入我舍，止我肺，貫串九天，從我兩鼻孔中而出。地為始氣正黃，從我左右足下，而入我舍，止我脾，貫串九天，從我口中而出。願其三氣俱來，覆被其身，周年竟歲，永無窮極。次念人身中二十七生氣君，髮為青城君，頭為三台君，眉為八極君，兩耳為決明君，左目為玄明君，右目為元明君，鼻為周天妙戶君，口為列元玉戶君，齒為八王君，舌為無極君，咽為校

尉君，喉爲九卿君，肝爲絳宮君，肺爲華蓋君，膽爲長命君，心爲丹元君，膈爲紫白君，脾爲黃庭君，胃爲太倉君，大腸爲食母君，小腸爲導引君，左腎爲玄妙君，右腎爲玄元君，藏爲越道君，三焦爲玄老君，兩膝爲小車徘徊君，兩足爲雷電雲氣君。願獅子取中二十七生氣，常當在獅子身中，不得妄出。

次存獅子身中赤子三君，爲我存泥丸，行絳宮丹田，不得妄出。真人，字子丹，治人心中，主人萬神長生。赤子，字太上，治人頭中，主人延年益壽，制靈不欲，長生無爲，照明三萬事畢。上一在人腦中，其神赤子是。中一在人心，其神真人是。下一在人膈下三寸，其神嬰兒是。凡人生之道，一切由是，念之不止，即見神矣。腦爲紫微宮，心爲洞房宮，膈下三寸，名丹田宮。人常念三宮中神氣，則可長生久視。

次念人身中五宮。六腑五藏，肝爲木宮，心爲火宮，肺爲金宮，腎爲水宮，脾爲土宮，亦爲五藏。肝爲左將軍府，肺爲右將軍府，心爲前將軍府，腎

爲後將軍府，膈爲中騎大將軍府，頭爲上將軍府。知內者見外，知內有五行六府、五藏五行者，肝爲木，心爲火，肺爲金，腎爲水，脾爲土，謂之五藏。肺爲玉堂宮、尚書府，心爲絳堂宮、元陽府，肝爲清冷宮、蘭臺府，膽爲紫微宮、元極府，腎爲幽牧宮、太和府，脾爲中黃宮、太素府，謂之六府。肺藏魄，肝藏魂，心藏神，腎藏精，脾藏志，謂之五藏。五行者，在天爲五星，在地爲五行，在人爲五藏，在色爲五色。在天爲五星者，東方歲星，南方熒惑，西方太白，北方辰星，中央鎮星。在地爲五行者，金、木、水、火、土。在人爲五藏者，心、肝、脾、肺、腎。在色爲五色者，青、赤、白、黑、黃。所以有間色者，甲，己，爲妻，夫以黃入青爲綠；丙，辛，爲妻，夫以白入赤爲紅；丁，壬，爲妻，夫以赤入黑爲紫；戊，癸，爲妻，夫以黑入黃爲紺。故今有間色者，甲爲木，乙爲林，丙爲火，丁爲灰，戊爲土，己爲赭，庚爲金，辛爲礦，壬爲水，癸爲泥。夫木氣有所生，火氣有所長，金氣有所殺，水

氣有所滅。何以明之？木氣有所生者，春二月，萬萌皆簇地而生，故知木氣有所生；夏三月，萬物皆成大，故知火氣有所長；秋三月，萬物皆死，故知金氣有所殺；冬三月，蠢動皆蟄，不能飛走，故知水氣有所藏滅也。夫木氣有所生者，乙爲庚妻，故包金氣，先從陽造，後准陰化，以榆化成棗豆，故名爲東方之蒼穀。夫火氣有所長者，丁爲壬妻，故包水氣，先從陽造，後準陰化，以稭化成麥，故名爲南方之丹穀。夫土氣有所育者，己爲甲妻，故包木氣，先從陽造，後准陰化，以瓜化成稷，故名爲中央齡穀。夫金氣有所殺者，辛爲丙妻，故包火氣，先從陽造，後准陰化，以棗化成稻，故名爲西方素穀。夫水氣有所藏者，癸爲戊妻，故包土氣，先從陽造，後准陰化，以橘化成大豆，故名爲北方之玄穀。夫五行更爲夫妻者，何皆有夫妻故？土欲東遊，木往剋之，戊嫁己爲甲妻；木欲西遊，金往伐之，故甲嫁乙爲庚妻；金欲南遊，火往殺之，故庚嫁辛爲丙妻；火欲北



遊，水灌而滅之，故丙嫁丁爲壬妻；水欲南遊，土往竭之，故壬嫁癸爲戊妻。故知妻矣。夫五行有相刑，滅毀或死者何？木之穿土不毀，火之燒金不毀者何？木火者，皆陽氣，好生不殺，金之伐木死，水之灌火死，皆陰氣貪故，所刑皆死。五行，心爲火行，肝爲木行，肺爲金行，腎爲水行，脾爲土行。五藏法五行，肝爲木，所以得水而沈者，何也？爲甲妻，得土氣，令其沈。肺爲金，所以得水而浮者何？辛爲丙妻，得火氣故浮。脾者土，得水居中央。癸爲戊妻，夫土者，五行之中，癸動土。故脾得水，上不至上，下不至下，正在其中央。何癸爲戊妻？夫土者，五行之中義說之，以合五行意。木從亥生，盛於卯，死於未亥，卯爲陰賊，不可興百官，百事不吉。水從申生，盛於子，死於辰申。子爲貪狼，不可行用。辰日姦，未日邪，戌日爲正，丑日爲公，姦、邪、惡、公、正辯。

### 絕穀品第六

絕穀真丹煎方：用白蜜三兩，白



蠟半斤，真丹三兩，凡三物。洋蠟於火上，乃納真丹及蜜。火煎，當九上九下，藥成丸如梧。子服一丸日三，輕身益氣，終歲不飢。作之，勿令女人見，獨於密處，合作之好耳。

令人長生方：以七月，取穀楮二升正赤者，陰乾，擣水，服方寸七。既令人久久見鬼，及見地下物。

神仙服食丹砂長生方：丹砂三斤，細擣，下重絹篩之，盛銅瓮中，以淳大醋九升灑之，令如泥狀，置高熱處使乾。復灑之，如前法。一斤丹砂，盡三升大醋乃藥成，常暴之三十日。當紫色攪之，不汗手引之，如飴乃可矣。丸如麻子，以井華水，日服三丸，常早晨服之。若欲服藥，先齋戒三十日，沐浴五香湯乃可。服之一日，三蟲盡出；服之六日，身中一切諸病，盡皆除愈；服之六十日，則有所見；服之一年，髮白更黑，齒落更生；服之二年，色如十五時，神人自至。日加一丸，至九丸止。服之三年已上，當有神人來見，服紫芝蘭衣，持案來上，有紫芝蘭而食

之，勿恐怖，安心定意，自然萬物來至，役使百鬼神皆得見。其一神名爲上，其二神名爲壽，其三神名爲恒。此神皆能致萬物，呼百鬼名字，皆可致也。能入水、火、木、金、石、土，略而言之，及一切所入，悉皆無礙，變化自然，徹見萬里之外，道力興盛，無爲自然，內視五藏，爲真人諸神皆識之，出入幽冥，道所成矣，壽命萬八千歲，常能服，壽命無窮。服但少飲水，欲作藥，當齋戒潔淨，在夏至前合藥，勿夏至後服藥。法禁食血飲酒，諸肉生菜，此非賢不傳，殃及子孫。神仙祕方，甚良矣。

修真之道，精思服符，守神鍊氣爲本。凡鍊氣者，先服此符，一年斷穀，然後傳之賢良，明慎奉行如法。符，朱書。




服上二符，百日如飢，服此一符助之。

右此服氣斷穀神符。清朝，以井華水，若東流水，日吞六符，一時吞之以為常，則誦曰：服氣初法，起於卯時，頭首向卯，辰時向辰，巳時向巳，午時向午。日中後至亥時，是死氣時，不得取氣，當避大風、大雨、雷、陰寒、昏晦，候天地清明日出，乃可取氣耳。若日取已午後，此則陰氣陵陽，傷損五藏，服氣無益，明慎奉行。


服符品第七

扁鵲救卒死符，正一真人所出。




此符治卒中惡，飛尸入腹，痛急口噤。丹書水中，及書紙作符。三丸與吞之，不愈復作，令滿三畢。以書心下及腹，大書之，無不愈。

長桑公子秘符




此符治感忤傷心，不得氣息。以

丹書白紙，寫此符三通，置三杯鹽湯中，按次從左始盡，服三符愈。



此符治卒腹痛腹脹，氣欲絕者，如飛尸狀。以丹書此符，於病人腹上，大書之，令滿長竟腹益佳，亦可服符。



此二符治卒逢惡，客鬼刺心，痛氣欲絕。方以白紙，丹書之，先服上符，須臾不止，復服下符。不止，更從上起，病已死，而心下溫纔動者，服符皆治。口噤不可開者，當折齒納符，符入口而已，不必入腹，亦可折葱葉納符中。納鼻極深入，當復以水推送之，搖通復推之，即活。此符神驗。

又張天師說扁鵲卒暴立起死方，

初與南嶽夫人，故列之于左。書符當盥潔，乃後就事向月王閉氣書之。法先以青黑，郭外四周，乃以丹書。符文於內，若無青丹，亦可用墨書。治邪病

符，當用虎骨真珠合研畢，乃用筆書符。

大素真人教裴君二事為真之法：

日旦初出之時，臨目閉氣，十息止。又咽日光十過，當存日光，使入口中，即吞之畢，仍存青帝君從日光中來，在我之左。次又存赤帝從日光中來，在我之右。次存白帝從日光中來，在我之背。次又存黑帝從日光中來，在我左手，次又存黃帝從日光中來，在我右手。五帝都來，乃又存陽燧絳雲之車，駕九龍，從日光來，到我之前，仍與五帝共載而奔日也。裴君止於空山上，修行精思，一年之中，髣髴形象。二年之中，五帝遂乘日見形在左右。三年之中，終日共言語笑樂。五年之中，五帝日君遂與裴君驂乘飛龍之車，東到日窟之天，東遊長丘大乘之宮、八極之城，登明真之臺，坐希林之殿，授裴君以揮神之章、九有之符，食青精日糒，飲雲碧玄腴，於是與五帝日君，日而遊，此所謂奔日之道矣。日中亦有五帝，一曰日君，《太上隱書中篇》

曰：子欲爲真人，當存日君驂駕朱鳳，乘天景雲，東遊希林，遂入帝門精思，仍得要道，名上清靈，列位真官，乃執鬱儀文章，二事爲真之法。日夕視月，臨日閉氣，九息止。又咽月光九過，當存月光，使入口中。即吞之畢，仍存青帝夫人從月光中來，在我之左。次又存赤帝夫人從月光中來，在我之右。次又存白帝夫人從月光中來，在我之背。次又存黑帝夫人從月光中來，在我之左手上。次又存黃帝夫人從月光中來，在我之右手上。五帝夫人都來，乃又存流靈飛雲之車，駕十龍，從月光中來，到我之前，仍存五帝夫人共載而奔月也。裴君止於空山之上，修行精思，一年之中，髣髴有姿。二年之中，五夫人俱乘月形見，在君左右，並共笑樂。五年之中，五帝月夫人遂與君共乘飛龍之車，西到六領之門、八終之丘、協晨之宮、八景之城，登七靈之臺，坐太和之殿，授裴君流星夜光之章、十明之符，食黃紫津之粉，飲月華雲膏，於是與五夫人夕夕共遊，此所謂奔月

之道矣。月中亦有五帝夫人。《外經》云：日君夫人者，日月君也。《太上隱書中篇》曰：子欲昇天，當存月夫人，駕十飛龍，乘我流靈，西到六領，遂入帝堂精思，乃見上朝天皇，乃執結璘文章。裴君曰：精思對日，思日中五帝君。夜則精思對月，思月中五夫人。五年之中，日月精神並到，共乘飛龍，上遊太玄。始學，則五靈形見，授書賜芝。修成，則日月五帝君夫人，驂轡清虛，乘雲太丹，朝謁三元，稽首金闕，乃獲玉靈金真，威制群神，玉女玉童，朝夕侍側，受書爲真。假神虎之符，以制嚴六天；授流金之鈴，以命召衆精；仗青毛之節，以周流九宮。皆由精思玄微，幽感天心，是以靈降兆身，上昇於帝庭耳。道士行者則是耳，不必已仙人也。君處密室，日月不見時，但心中存而思之亦可，不待見日月耳。要見而視之，志往唯訣，精思心盡，無所不通，此言要矣。先存五星在體中，夫注心於道，真靈亦具，鑒其意也。若大難未披，假謙存實，復未能迴，西榆之

年，還髮玄童矣。耽玄篤也，志之勤也。縱令力凋面皺、頂生素華者，我道能變之爲嬰兒，在須臾之間耳。但問志之如何耳，老少之學，無所在也，吾往即其人也。

又一法，作齋奏：長一尺二寸，丹書其文，某郡縣鄉里、某甲，欲得長生，登仙度世，飛行上清，真人至神，五嶽群靈，三官九府，乞除罪名。書奏畢，以青絲係金環一雙，合以纏奏，再禮北向，置奏著石上，因以火燒奏，令焚盡成灰，乃藏環於密石間而去，勿反顧無環。亦可作足火，脫一雙以代環用，古人名之爲從容珠子也。多口嫉妬之人盜之，盜之非但無益，乃更致死，如此十過，天上五帝，三官九府，更相屬敕，除人罪過，著名注仙，錄形定籍。入山求芝草靈藥，所求皆得。神仙玉女，自來營衛。虎狼百害，不敢犯人。神仙祐助，恒欲使人得道，開人心意。惡鬼老魅，不敢試人。行此學者，易而無患。若道士不知此術，入山必多疾病不利，數爲鬼物所試。若在人間，則多

輒軻，疾病不昌，願不從心。能行此道，長生神仙矣。

建志學道養神求仙所忌品第八

夫建志學道、養神求仙者，常當沐浴，致靈氣王女降。不沐浴者，神氣不來。

夫學道者，常當閉口勿言。言學道者，三官壞人，急當慎之。

夫學道，每密言事泄者，減一筭。

夫精思者，當先燒香於左右。

夫學道者，當獨處一室，不得與人雜。

夫衣物類，亦忌借與人，致邪氣不祥。

同志者，謂同契耳。當忌穢汗，見死屍，犯真氣。

服雲母末，不絕房內，不斷血食，則不延年，久久使人關節發癱。

服玉，當服雄黃。不爾，久久令人發熱，身內以水灌之，如灌沃燠即殺人。

服玉屑，便斷陰陽。

服玉漿，當飲冷水，不可熱食。

諸服玉，當斷五辛，及於血食。不爾，不能長生。

諸服草藥，而食猪肉者，皆益病。

諸服雲母，宜先服胡麻一年。不爾者，不損人，亦可後服。

諸服雄黃、八石，皆宜斷血食。不爾者，久久令人半身不遂，慎之慎之。

服丹藥，入汙穢家，及食肉葷之味，即傷人。學道者，通忌之。

服黃精，禁食梅。服朮，禁食桃。

服地黃，禁食大肉。服天門冬，禁食鯉魚。

入山採藥品第九 採藥日月附

諸入山精思，不欲聞犬吠，慎之慎之。

諸入山，皆絕慮百日。不者，令人恐驚，見虎狼蛇。

入山採八石，牽白犬，抱白雞，即得所在。

入山採芝者，以有陰雲不見日，勿以有日也。又當執一斗白鹽，令求易得。二豆爲一刀圭，二刀圭爲一撮，二撮爲一方寸匕。

散藥丸服之者，一寸匕得梧子十丸。

老君乘龍符：丹砂五斤，水銀三斤，末丹砂和水銀，置屋東行雷下，百日便禹步引氣取之。納雲母粉三斤，納甌中蒸之，一日一夜中和。白蜜一升攪之，蠟密塞口重裹之。立春日，納井底。秋分日，出之。其藥如水銀狀，服如一寸匕。日三竟，並齋。乘雲上下，無有係著，玉童侍從，動移萬里。夫合此藥，宜先齋戒，不宜至喪葬之家，乃見諸穢、婦女、雞犬，致壞精誠。此藥使人神化，余有服食方千卷，自昔及今，世傳此八方以爲妙訣，不稽日月，而可制御群靈，化容改形，神變混淪，白日陸沈，不妨於九經。夫道物所用，皆奏太一，樵薪所用，皆從福上來。近已教授，無不如意，此少能施，則仙也。

正月一日、二月二十五日、三月二十日、四月十六日、五月十一日、六月六日、七月二日、八月二十五日、九月二十一日、十月十六日、十一月十一

日、十二月六日，此皆是天倉開日，可入名山，行採吉。

正月子、二月丑、三月寅、四月卯、五月辰、六月巳、七月午、八月未、九月申、十月酉、十一月戌、十二月亥十二日，是地倉開日，可入名山久居，安穩無患。

神仙方，常以六丁日，沐浴五香，令人身清淨。六丁日掃除內，徹視千里，五年出無間入無，孔通神明，入水不溺，入火不焦，長浮雲中，一舉千里。能修之，可長存也。

#### 治蟲諸方品第十

茱萸東行根一把，剉截兩頭，好米一斗，合釀熟去滓，宿勿食。明旦飽服，蟲盡隨大便出下。

又方：茱萸東行根長一尺，麻子八升，以玄水八升，浸之一宿，絞去滓，宿不食。明朝盡服，尸蟲盡出矣。

又方：茱萸一升，擣下篩淨。清玄水二斗，浸之一宿。宿不食，絞去滓。服一升，蟲皆出去，壽百二十歲。

又方：蕪荑一升，末之。麻子汁

一升，合和。宿不食，盡服之，九蟲皆出，壽百二十歲。

又方：栢子四枚，豉四枚，桃核仁四枚，巴豆四枚。凡四物，皆熬之，令黃擣下篩，以蜜和丸，如麻子。小兒服二丸，中人服如小豆二丸，大人服如大豆三丸，下蟲千萬枚。

又方：桑白皮一斤，玄水淹之，微火煎之，令得三升，去滓，宿不食。服一升半而不耐者，服一升，蟲當下。明日復服，必當下蟲。非但治蟲，亦治寒冷，餘病爲治，久久復發，此永無發時。欲服藥，取炙棗食，乃服之治蟲，令人志强目明。淮南祕方：用雄黃末之，混沌白和之，服如大豆三丸，目見千里。

初入名山，求隱藏度世，出天藏，入地戶。六癸爲天藏，六己爲地戶，欲得天心，時加天心，求道得仙吉。

初欲入山求仙，當以天心日者，寅日六己。是天心時者，己巳、己卯、己丑、己亥、己酉、己未是也。

初出，當須此日。又入名山，常用

甲子開除日。以五色繒各五寸，安大石上，所作事必得。

初行，避三庚、三辛、三壬。庚者，庚日、庚時，入庚地是也。三辛、三壬，皆是如此也。

欲入山林野澤禁蛇法：至山下，入時作一氣，左手取左面草一把。又作一氣，安草與道中。又作一氣，以石錄之，便過去，勿反顧。若將人從行，令先度前，去訖能禁止。安草間，立作一氣，一人度與一氣，人人皆受氣，通了便去，亦勿反顧，過數百步，可以意行，前後若行，逢蛇成索，逢虎成石。

真人入山大禁法：左手持刀，一名握固，三十八氣入氣，出二十八氣，無所畏也。

治人卒中蟲毒腹中痛：若謂蝦蟆、科斗、蛻蝦，取秦鷲屎水，服二錢匕，則吐諸蟲也。

三洞道士居山修鍊科

（吳亞魁點校）

# 006 太上洞玄靈寶法身製論

經名：太上洞玄靈寶法身製論。  
一卷。底本出處：《正統道藏》  
洞玄部戒律類。

入爲道性，以忍辱爲上，禮之爲用，唯和爲貴。入道之法，宜忌忿爭，若聲與色厲，驚衆駭羣，執愚專性，輕用手舞，如此則損氣傷學，犯者永不得預法座。若不依科，奪治削錄。

酒性敗德，爭慢所由，科戒顯詳，而犯者未復。凡籙生，皆宜節慎，况復學士，寧得不禁。經文酒制，宜應遵用，其和神將藥，節宜得理。若起齋定座，設啓狀求感，不得因色到衆，或潛暴隱愆，謂衆不知，犯者禁錮百日，再犯奪治錄。

惡言綺語，明賢禁戒，利口覆邦，

先聖高誨。若有反覆白黑，評論得失，妄宣是非，空造貝錦，爲衆所患，宜應防杜。犯者，依科禁錮一年，三犯奪治錄。

生爲大德之主，仁爲儒道之宗，慈爲福端，殺爲罪首，立功樹德，莫如去害，故濟生之苦，皆由慈心於物。頃來男女學士，每以五月夏節，逆唱放生，未至其日，先已羅捕，造於臨流，悉已薨夭，既欲招福，反尤大罪。自今以後，不宜預云放生，若有善心卒遇，便買義設齋福之家，師主亦禁戒，輕侮任辦，則是事主之愆。犯者，禁錮二百日。

齋戒威儀，厨福科令，陸先生具已詳之，可設備矣。既遠近親聞德音，亦宜共稟規誨。若有越用法典，假因觴跪蹲鐘椀，如此則與遊宴無別，爲傍觀者可哂，宜應悉改悛，不得懼萬姓嫌疑，乃全科典有聞。犯者，禁錮一年；三犯，依律治罪削名。

五辛之菜、六畜之肉，並戒所禁，學士無嘗，或以傷神損性，或使祈奏無

感。若請疾救厄，宜以自戒，仍不忌嫌疑，爲識士所譏，遂令同法，橫爲其哂。犯者，禁錮百日。

德不孤立，必須鄰友，黨輩往來，不可都斷。且人有德，不能無行，行應有方。脫善信之家，設齋辦厨，推敬之心，三界並記，何況學士，寧無一感，而耽著觴宴，或爲競利所拘，致令福主合門，心懷煩惱，望賓淹遲，神疲體倦，忿心內發，此已爲衆情嗟恨，切尋冥理，安得無罪。自今以後，先已名被，必有急事，逆報請主，當更詮覓，而逼慕奢寬，遂使主見之，咸有恨色，此宜慎杜。有犯，禁錮二百日；三犯，永墮不得復預法座。

韶武之樂、雅頌之音，由來久矣，邈然難追，邁及鄭衛遺聲，妖艷辭章，西羌雜伎，北胡鼓舞，既不能輔性娛神，正足亂志。若於曲集法會，饒送同法，觴既過限，遂令俗翫，不招自泄，此皆亂神傷形，損道悖德。有犯，禁錮百日。

右八條

夫靈寶妙法，生于元始之先，真體空寂，湛然常靜，有善斯見，無緣則隱，雖真韻夷妙，圓通無方。智者體之，有無之間；愚者起疑，謂之永滅。故睹其卷軸，不可謂有；就其常靜，不可謂無。故無中生有，有中生無，了然無質，故不可窮，混成也，無爲也。仁者得仁，智者得智，愚者因之，發解神照，以之生慧。故知經從理生，孰謂不然，勸求則神慧因鑒，棄捨則精神昏闇，故經是大解之宗，理爲棲義之宅，常靜崇高，則凡賢絕仰。

太上洞玄靈寶法身製論

（吳亞魁點校）

## 007 洞玄靈寶鐘磬威儀經

經名：洞玄靈寶鐘磬威儀經。  
一卷。底本出處：《正統道藏》  
洞玄部威儀類。

爾時，智德真人與五百真人等衆，同詣太上，稽首請問集衆威儀。

太上曰：衆有二種，一者聖衆，二者凡衆。若說法齋戒，禮拜下謝，救度生死，一切福會，應當來集，皆聽擊鍾。昔元始天尊於色界天中，教化說法。時至不齊，衆有前後，放十種相，光從眉間出，徹照諸天，五億世界、無量國土，普使聞知，示大神力，演真一妙道，合五和之精，成無量寶鐘。各隨方域，同發靈音，聲遍天地，響若琳琅，皆作洞章，晝夜震動，應十二時。一切衆生，聞悉歡喜，百惱皆除。時不信者，未悟者悟，生諸善慧，興正念心。

自是之後，鐘聲制度，普遍十方。汝今所請，當欲開悟諸衆生智德，稽首弟子、後生末學，雖聞鐘磬，未解威儀，不審諸天所有，同於下界，亦有等差。

太上告曰：三清上境，三界十方，大小名目，亦有不同。今粗說之，汝其聽焉。

太上告曰：大羅天中，有九明華鐘、七曜神鐘、洞光浮鐘、飛精空鐘、大光雲鐘、開天光鐘、自然神鐘。玉清天中，有鳳生天鐘、華寶雲鐘、霄焰靈鐘、玉龍華鐘、空明寶鐘、九合光鐘、萬變瑤鐘。上清天中，有十華寶鐘、四華鳳鐘、電耀明鐘、龍耀明鐘、鸞翔華鐘。太清天中，有九精合成鐘、百寶空明鐘、結雲華鳳鐘、天飛龍鐘。九天中，有自鳴華鐘、九色光鐘、萬寶華鐘、大自然鐘。皆結自然真精、妙炁而成，光明洞徹，神化無方，千形萬象，應變難名。或大或小，隨運自鳴，音聲響亮，和雅應神。四梵天中，有度命神鐘、長生靈鐘、濟生神鐘、消魔神鐘、反魂神鐘、制魔神鐘、降魔神鐘、伏邪神鐘、揮

靈寶鐘、集仙瓊鐘、歸真和鐘。三界天中，有保生之鐘、昌樂之鐘、自鳴之鐘、安國之鐘、應命之鐘、寶齡之鐘、延和之鐘、長壽之鐘、護神之鐘，皆以紫鳳翠龍之金，照夜明霄之寶，承九天之氣、九泉之火，合而成之。宛利天中，有蓮花之鐘、翔雲之鐘、宛鳳之鐘、交龍之鐘、遐齡之鐘、消災之鐘、度厄之鐘、護國之鐘、定生之鐘、保命之鐘、修期之鐘、辟兵之鐘、消魔之鐘，皆以金銀銅鐵、瓊瑤寶玉，鎔鑄雕刻而成，各有百千萬億，或六時、九時、十二時，悉有典鐘靈官、玉童玉女、金精猛獸、獅子辟邪、金剛神王，防守侍衛，晝夜考擊，開悟羣生。於是授智德威儀科誡，告下三界十方，令得見聞。於是，智德禮拜太上，伏受威儀。

太上曰：世間鐘，用金銀銅鐵作，兩角、三角、四角、六角、九角、無角，大小隨宜，懸治左方臺閣樓殿，依時整法服、祝誦讚唱擊之。皆初急之，緩疏打三下。若八下，爲節急之。復初急之，緩疏擊二十四槌。急之復急之，緩徐



擊十二槌畢。

太上曰：非時不得妄擊。若不整法服，清淨祝誦，失其節度，皆五帝考之，死墮寒冰之中，百劫當生無眼之報。慎之焉。

太上曰：若道士終亡，擊鐘三百六十槌，示人知終。

太上曰：磬，以金銀銅鐵玉作。若行道禮誦、讚唱齋誠，擊以節之，皆當作架懸之。智德因說祝頌十三章：

平旦

六梵應天關，萬帝朝雲宮。飛香靄朱日，流詠順清風。神真散瑤華，靈音泛太空。衆聖赴期來，遠近聽鳴鐘。

日出

紫微發天光，青華生琅音。萬景照雲宮，衆仙禮玉岑。流響動長空，餘聲振寶林。慶此天真樂，散我幽滯心。

辰時

披雲登天軒，環日矚九清。遐想排雲逸，俯聞空洞聲。衆動非所觀，妙音良可聽。發彼瓊瑤響，解茲幽蔚情。

禺中

玉女秉靈機，金鐘振遐響。開覺萬天人，拔度九幽爽。苦魂披雲出，沉魄乘運上。神力叵思議，法音被無象。

正中

太虛包六氣，至道敷一元。梵聲綸地絡，法鼓出天端。境空心自靜，情攀志更諠。察此六時響，釋我百憂煩。

日映

圓童轉空輪，神女撫幽機。晝夜天關盡，循環星杜希。鳳鳴十二時，龍翔百六歸。擊以瓊華音，暢我天尊威。

晡時

四龍隨天運，五帝推日車。月女散寶香，雲宮下瑤華。十仙聆法鐘，俱集太上家。五苦長解脫，恒吟空洞歌。

日入

高抗萬天機，晝夜相循環。太上敷聖教，普告於世間。應境立真王，分職有司官。仙童擊玉鐘，衆聖朝天關。

黃昏

朱景控朝暉，紫輪乘夜月。二曜遞推遷，四序無停歇。玉童唱時至，寶

鐘鏗然發。稽首無上尊，携駕登金闕。

人定

陽輪下幽室，陰景照雲房。珠臺鏗瑤音，碧殿藹瓊香。妙聲發空洞，微響含幽章。共美虛中曲，清音風外揚。

中夜

靈童啓星扉，聖母御雲龍。日月相代謝，晝夜更故新。天下萬合香，空降千品真。玉音羅太虛，金鑪生紫烟。

鷄鳴

五億諸天境，三千世界中。方方列仙域，處處有神鐘。梵音生法宇，妙韻起靈風。因緣常不絕，功德永無窮。

常鳴鐘磬偈

盥潔披天衣，端念陟雲臺。時至當鳴鐘，仙聖步虛來。瓊音微玄都，金香藹紫微。萬騎雲間逸，九華空外飛。鳳凰翩翩翔，獅子縱橫馳。

王女羅瑤饌，仙人坐誦經。稽首禮十方，虛想在三清。天尊住虛空，惚恍本無形。湛然自靈應，常能感精誠。西妃撫瑤磬，齊和空洞聲。地獄無罪魂，天堂奏善名。一振琅鐘響，萬衆稽

首聽。

太上曰：此頌偈，龍漢劫初，元始傳諸天。帝王誦之者，魂神清暢，衆真降房，鳴鐘祝之，與響齊聞，朗徹十方，萬聖歡樂，九幽赦魂，男女歌詠，國土安寧，永享福祚，世世無窮。

太上曰：衆集時，聽三下鐘，冠帶整香。長鐘竟，嚴淨威儀，復與梵音齊發庠雅。詣座旋繞竟，已叩磬節之，人天聖凡，皆以之集。當審慎焉，勿罹五帝之罰也。

太上曰：玄都有八瓊華鐘，置中天之臺，應六梵氣，周十二機，不擊自鳴，聲徹十方。衆真稽首，聽聲而會玄都，諸天取則矣。智德真人及同來五百衆，一時稱善，稽首而退。

洞玄靈寶鐘磬威儀經

（吳亞魁點校）

# 008 玄門十事威儀

經名：玄門十事威儀。一卷。  
底本出處：《正統道藏》洞神部  
威儀類。

## 玄門十事威儀

爾時，太上老君告無想真人等衆法服科戒已，又說威儀十事，未與子宣，今授此言，最爲切要。如人欲行，非足不步；欲進妙道，非門不入。十事科戒，爲道之門。入吾門者，欲與仙齊，隔離外俗。凡夫之人，若持十事者，名爲不凡。夫生死因緣，罪惡輪轉，毀辱法身，輕慢法服，進道無序，善業不生，人我自恣，無慚愧之心，九幽大罪，日夜增長，行住坐卧，出入有法。如是凡夫，衆生不異，真仙大聖，不喜見聞，天魔神鬼，皆所惡嫉，人王君長，

不生恭敬，十方男女，無不輕薄，自無功德，長他惡根，兩頭營罪，苦報何極。吾見此輩，痛哉寒心。今故殷勤，重告於子，宜遵奉行，曉示來學，提携指掌，必令調熟，十事成就，諸天鑒觀，十方人天，天神鬼，悉皆畏敬，咸生善意，無敢違犯，增長福田，善果普生，功德無量。能如是者，是我弟子，堪傳妙法，道宜速近。不如是者，魔鬼眷屬，日夕親近，不得遠離。無想等聞，是妙旨稽首，心驚慚愧，悲喜交集，涕淚俱下，願聞十事威儀，彌劫奉行。太上曰：

- 一者執壇，二者禮謁，
- 三者出入，四者坐起，
- 五者執瓶，六者洗漱，
- 七者巾器，八者齋食，
- 九者請法，十者護持。

此之十事，是吾教門中事也，當付汝等，習而行之，勸教男女，昇入仙品。無想稽首，扣頭著地，長跪信受。

### 執坐壇品第一

夫坐壇者，隔凡去穢，護淨自持，

擅道德之不羣，慕天真之高迹。

第一，起坐出入，常不離身。若因事暫放，不得輒安雜穢之所，先以具拂拭其所，或以淨物盛之。第二，每將行用，或掛膊上，或搭左手，以緣口向外。第三，每欲作拜禮，先將右手提角懸起，便將左手以三指挾極，兩頭平放，下面著地。第四，先舉左足心，安第二稜上立，次舉右足，向上半跪而鋪，務在平正。第五，拱手起退，右足歸第二稜上，立平穩乃禮，三拜訖。第六，便起仰右手，就角二指取收，勿令觸他，或取中稜亦得。第七，著鞋履訖，便過入左手，側身而摺，勿近人面。第八，摺訖，掛於左手，以道衣霞帔覆之，向前起居。

### 禮謁品第二

夫禮謁者：一名屈己，二名敬己，三名敬他。心敬難識，形屈可見，故須形禮殷勤，以表內心珍重。屈己致敬，爲有所求事，有一十二種：一慚愧，二悔謝，三求法，四除傲慢，五尊德，六慰賀，七滅罪，八懲戒，九報恩，十物奉，

十一現世人歡喜，十二未來天下恭敬。

第一，禮謁安詳得所，容止可觀。第二，秉簡當心，端身平立。第三，五體投地，前後平齊。第四，見尊像經法，或值禮懺法事，必須作禮。第五，見尊師名德，必須作禮。第六，見受業師作禮。第七，見勝己善友作禮。第八，見四海同學作禮。第九，事師辭去，及歸室宿，已上皆先作禮，言限來日，珍重而去，到家亦須作禮，然後起居問評安否。第十，辭出外境及歸，或經月，或經年，且須先禮三拜，然後長跪伏地，重感拜訖，乃通寒溫起居，此爲事師之禮。第十一，或師主隔絕他州別縣，相去稀疏，久經歲月，皆須作禮長跪，言其情狀，伏地悲感，再拜起居。若彼此會，有吉凶言及，皆須稱賀，弔慰再拜。第十二，吉凶慶弔則悲。禮畢，然後重悲。待長者語畢，又須作禮。若自受慶弔亦然。第十三，若得長者善言教示，或責辱訓罰，皆須作禮，言謝低聲，以酬德教。第十四，凡受禮拜，皆須擎拳，拱手辭謝，推高

託尊。第十五，凡禮拜師，皆須待坐。合拜，須坐而受。若師自外遠還，送至方丈，待師坐定，然後作禮，不得於門下、廊下，忽忽即事。第十六，凡在殿堂，對聖像，及師長大德，皆不得受人禮拜。若他人不知，忽然作禮，須言其事止之。忽於殿堂見年尊有德者，亦須言其事，云未敢就便作禮。

### 出入品第三

第一，凡行住，有難處、置疑處，皆須要伴，不得獨行，以自明白故。第二，遠近出入，皆須辭徒弟衆，或同院窗。無人，須向童行說去甚處，某時即歸。第三，若往男女非類之處，或因吉凶齋會，暫時停止，解脫出入，羣徒共住一處，不得獨因親故，潛隱幽僻之處，來須逐伴，去則隨衆。第四，若非急難事，有所需求，不須頻頻出入，數令人見，自致輕薄。第五，出入若逢官長，預須隱避，勿令露現。苟無隱處，宜向僻處，或人影樹影中立，仍須斂容恭敬。第六，出入忽逢尊貴車馬輦輿，並須避道，低身佞形。第七，若無急

事，不須冒涉風雨泥塗，隆寒大熱，披褐狼籍，人所惡見。第八，出入城邑聚落、人物之處，行立須是斂容正色，不得高聲大笑。若有咨問，皆須以禮言對，非急事，不語爲上。第九，凡出入遇惡人、愚人、童稚，邪言穢語，相輕調謔，猶若不聞，勿變顏色。第十，出入不計遠近，皆須坐壇相隨，仍用手巾瓶等，與住時相似，並適其宜。第十一，若值雜牀，或施主家事須寢宿，即覓水灑牀席，以巾拭之，名曰靜牀，用之無觸。第十二，出入城市、村曲，見人行非禮不軌之事，或聞不善調謔之詞，即低頭直過，慎勿顧之。第十三，女冠出入，無論遠近，疑與不疑，必須逐伴相隨，以避嫌疑。第十四，凡經像及大人門戶出入，勿向中門，必從邊小門側身進退。

### 坐起品第四

第一，凡起坐法，有尊有卑。若無上下稟承，此與異類無別。第二，法會之所，男官一人向前三禮，長跪拱手云：已下法小師某甲請坐。第三，女

冠二人，亦如前請坐。若有像處，大師念禮經像，童子亦然，善男安置得所。第四，凡對經像、長者行處，須整斂容貌，不得倨傲放誕，言辭非法。第五，凡對經像、長者，不得背經法尊像、大人師長。第六，侍從尊師，及長者所在，皆須正立，不得倚托牀壁，及諸等物。第七，侍從師長，但須整肅，非顧問勿語。第八，凡侍從師長所在，且須立地。待命與坐，再三指揮，然後稽首致謝而坐。第九，凡侍從師長之所，人或更尊於師長，即從前人所命，仍須謝於前人而坐。第十，凡齋堂，講習經典、禮懺法事之所，坐起須依法位，不得越坐，一如科戒定式所排。第十一，凡法堂宣經之後，忽若後來，須方便隨處而坐。縱恃尊德，亦須隨便，不得向前，起動喧撓。第十二，凡一坐而後，若非急事，不得數有起動，出入亂人。第十三，凡所在之處，行住坐卧，不得與非類之人混同一處。第十四，凡師長尊上、及他人，看讀書疏委曲，不干己事者，不得向前窺視，同爲無識。

#### 執瓶品第五

第一，男不得將石榴瓶。第二，女不得將檳榔瓶。第三，須頻換水磨洗，常令光淨，不令塵垢穢污。第四，瓶不得宿水在內。第五，夏月每日易之，一日不易，名爲穢水。第六，冬月許兩日一易。第七，瓦瓶可三日一易，不得安置穢處，切宜忌之。第八，凡大小便處，須別用瓶。先淨於前後，淨於前後，然後以磚石磨手，仍以灰皂角淨之。如違，不得朝真，陞殿禮師，亦不得受人禮拜，及隨大眾。第九，凡瓶用了，須要置穩處，勿令觸倒，於此大忌。第十，凡瓶，有人欲看，并童稚提擎，勿使穢手觸把，須令潔淨。第十一，護瓶內外，甚於餘物，與經像潔淨一般。

#### 洗漱品第六

第一，凡洗漱，有四種：一平旦漱，二讀書漱，三食後漱，四卧起漱。第二，凡漱口，並須三過。第三，若食後，須用楊柳枝湯水，一能洗穢，二除齒風。若無柳枝，即用淨灰。第四，凡初用楊柳，呪曰：太陽和氣，開春發

柳。折取一枝，能淨身口。學道修真，願度三有。急急如律令。第五，凡用灰，呪曰：洗灰除垢，用灰爲首。穢去真來，淨心淨口。成道度人，天長地久。急急如律令。第六，漱盥，皆偏側，并背人，不得當人爲之。第七，凡用水，不得以手觸盆中水，當以木杓於盆中取，又不得著杓於盆中觸。第八，既有犯觸，當須自首懺悔，仍自役力，換水置中，即不結罪。第九，漱口洗面，不得漱縮作聲，鼻口泡出，又不得扣打水器驚衆。第十，凡用水，不得狼籍括踏。第十一，口中穢水，不得噴噴於衆人前，及淨地上。第十二，凡用物，不獨在水，諸件等物，皆須儉約而已，不得等閑費用。

#### 巾器品第七

第一，巾器者，受用齋食。第二，齋食，獻施聖凡，最爲重事。第三，衣宜淨，牀宜端潔，故先鋪坐壇，而後坐。第四，巾器宜淨，故先洗手，而後執器。第五，先行淨水，然後開器受食。賢智以食爲天，凡夫以食爲命，故爲最重。

第六，凡巾、器二物，其用一也。若但安閑，必同一處也。第七，巾、器二事，護淨如一，但除齋食，不得別用。第八，凡齋器，別立龕架安置，不得與諸器雜安，古人號之曰齋器。第九，齋器有五事之體，法有五行之用，受五味之食，銅漆製之，隨力而辦。第十，凡齋巾二首，厚密布爲之，長四尺，編褫縫之，恒令潔白。

### 齋食品第八

第一，凡齋時，先立一人爲監堂，亦名監齋。齋者，齊也，專知鐘磬節奏，檢校得失，所以名監齋法師。第二，凡登齋就食，必須潔淨衣冠。第三，先須淨手執器，上堂安置於左，以巾盛之。第四，凡禮懺，隨衆多少，一時平坐，脫履坐底，勿礙祇供人。第五，先須行淨水，勿令器衝撞著人。第六，受水訖，先取巾，把中央角向前，垂牀七寸鋪之，次安齋器了，又鋪第二巾於膝上，並須仰手鋪之。第七，出齋器，從一至五，次第出之，不得越亂。第八，監堂一人，於堂上磬子處正立，

鳴磬一下，奉爲當今皇帝祝延聖壽，或應十方施主，祈禳薦拔，隨事舉揚諸施等事，保護答報。次師一人，即令祝願，其文出在七真科中。第九，施粥，呪曰：今晨香粥，上獻三尊。利益家國，饒益施主。六道含靈，普同飽滿。第十，施食，呪曰：一切福田中，施食最爲先。見存受快樂，過去得生天。當來居淨土，衣食常自然。是故今供養，普獻於諸天。第十一，凡呪訖，次行食。監齋須先約語行食人，必須教其食名，分明高唱，料量多少，務在均平。第十二，行食訖，監齋鳴磬一下云：等供養齋官，須一時稽首，相顧恭敬，然後方可就食。第十三，凡受食三徧，自料取足，勿令餘剩狼籍，人所惡見，不生敬信。第十四，凡聞唱食名，須把器就手而受。第十五，不要者，指點令去，嫌多即退手，嫌少即進手，不得言喧。第十六，凡齋，上下相顧，望食遲者，稍須急食。食急者，即須遲食，務令齊整。第十七，凡齋食時，監齋須都看之，若過半食，盡可再行。第

十八，不得縱其本性，令遲者嫌。第十九，凡食須細，口急意徐，勿令啜呷作聲，觸擊匙筋，負慈悲罪。第二十，凡齋坐食之後，除非軍機、急速、水火、盜賊、死亡之事，不得輒有言語，喧括齋堂。第二十一，其齋，須有教示處分，必須自手指揮，唯在低聲。第二十二，凡齋訖，有餘果食等物，收取與諸在下、及乞病人等，不得隨器將去。第二十三，食訖，先摺膝上下巾，次收齋器，自第五至第一，皆安巾上。第二十四，凡食訖，當行淨水洗器，收水訖，鳴磬，唱布施祝願訖，唱餘迴施祝願，其文具載七真科戒中。第二十五，若非別緣貼會，則不用祝文。第二十六，祝曰：修齋已畢，尚恐功德未圓，更捨淨財迴施三寶，施者獲福，功德圓滿。第二十七，施食，祝曰：三寶法食，供養已周，轉施童役之人，當願童稚，同霑齋功，無諸障礙。第二十八，鳴磬唱食訖，普誦法食已畢，普被福田，十方解脫，三界安閑。第二十九，凡在齋中，忽有犯戒者，監齋須告白，隨令犯者禮拜。第

三十，又鳴磬，唱勸善偈祝曰：我衆等聞是法已，身心清靜，如瑠璃瓶，歡喜頂戴，稽首敬禮無上三尊。第三十一，須唱三禮。若有別緣，唱三願，更不具載。第三十二，齋事總畢，鳴磬，唱隨意，並須稽首恭敬，持器而去。第三十三，先後下起，行列而行，各歸房院，不得羣集喧話，撓亂清衆。

### 請法品第九

夫法者，名之爲寶，人能敬受，實爲妙也。一則利己，傳法教人；二能益他，同登妙果。傳法之功，進入仙階，故曰：請法必在珍重虔誠。

第一，請法師有二種：一者請法師，演法講經，傳科傳戒；二者權時請授，決其所疑，並須禮拜，殷勤珍重，虔誠稽首。第二，講經演法，須量大小遠近，預前陳疏其書，皆須好紙真楷，如法淨潔，不得造次羸弱，言語輕怠。第三，凡授疏者，若小事，先須禮，三拜訖，須執疏長跪，陳其意旨，即拱手而授疏於前人。受疏訖，即禮三拜，言謝而退。第四，凡大段事授疏，以執疏作

禮，或七拜、至九拜，然後長跪，面陳其

事訖，又三拜。拜訖，長跪授疏。授疏竟，即禮拜長跪言謝云：小人蒙賜慈悲，不勝多幸。第五，若前人未受疏，唯知禮拜，不限徧數，以許爲度。如復未許，即須宜且退，更待後時，再三稽首而授。《定志經》云：血出數斛，心亦莫止，自非志心，扣幽靈囿，肘舁師門，頓首德宇，終不造受也。第六，凡權請決疑，先須三禮，長跪拱手，陳所疑事，更三禮解說，竟起拱手言謝云：小子愚昧，伏蒙法師不棄凡愚，解說真理，不勝喜躍。三禮而退。第七，或灼然年高德重，來授疏請齋，或解說經義經題、講論其理等，宜平旦坐受，拜疏訖，言告謝云：小子愚懵，不聞解說，伏蒙見命，不勝悚惕。仍三禮答之，敬其德也。第八，若是師長，曾經受法業者，或有授疏命及者，待禮三拜，即伏地而受，乃長跪，即兩手橫捧於頂，良久乃放案上。三禮長跪謝云：死罪小子，忽奉嚴命，不勝惶悚。又云：不敢三禮而退。第九，凡言，不敢有二種

### 護持品第十

夫護持者，凡有七種：一護法服，二護法，三護經，四護師，五護身，六護十方施主，七護一切衆生。

第一，凡經像，一種無別，且如奉道。科云：凡經像所在，皆須護淨，竹架圍隔。暫離，即須淨巾蓋之。凡有看讀，開展不得過三行，有事即隨手捲之。卷軸未終，不得暫停。如急事，此卷不了，然後從首，再行宣懺。第二，不得令不淨人，并不淨身口穢氣觸動。第三，擬執經像，須淨手意，不得把他物。應上牀，或推却諸物，憑傍人爲之。忽若無人，自須小小推撥，即洗手經牀，上下亦然。若把他物，即須重洗手。第四，經像不得同房，若黑漆等函著經像者，又在櫥內，得權居卧息，若素函及蘊，雖在櫥內，亦爲不可。第五，若在大堂之內，宿集之所，經日積夜，或倦於法事，疲怠之極，止可暫時歇息，仍須屈伏側身，不得頓爾肆布脚手，鼻口哮齟。若有傍人，須語之。若

聞不語，與慢法同罪。第六，凡在四衆，坐起行立，不得招外人共語，多有言笑。第七，凡勤學，不如擇師。師若德薄，慎勿投刺。既能修學，必在明師，似得於寶，即盡力奉承，極至道成，不相離捨。第八，師若錯有過誤，慎勿謗論，宜隱然方便，言拜咨陳再三已，依奉道科。若別人言及其師善惡，須分解。力所不及，拂起而去，是名護師之相也。第九，凡師牀案、几杖、衣服、朱墨，一事已上，皆須護持，不得觸污。第十，凡在衆會，忽有違犯經科，爲衆所彈，事應合罰，即須踴躍歡喜，愧恥言笑，美樂受之，此名爲能人，滅無量罪。此人學道，速成無上善果，是名大護持。第十一，凡護持十方施主，或相識、不相識者，上下男女、大小貴賤、內外遠近，凡見皆敬奉。居止來去、安置坐起、校諸驅使、苦樂饑飽、惡好逆順、有無健病、恭敬慰喻、賞罰辱責，皆須得所，務在均平。第十二，凡含靈蠢動，有命之物墮水落火，但是危命之處，是力所及，皆須救護，使得安寧。

第十三，凡行住出入，宿息過逢，州縣名利，親疏男女，戲弄邪言，預是衆生所疑，更不須行，是名護持一切衆生善果。第十四，若有再三違犯、亂撓清衆、彈糾不伏、拒諫飾非者，須告白衆人，退出齋次，具如齋戒威儀論。第十五，道衣法服，凡脫著，切須摺打整齊，或安袱帕，或安靜處。稽首畢，方可脫著。第十六，若是於法請事，往往傲戾好鬪爭者，則須上下舉告凶吉等事，勿與往還，名曰幽殯，莫令隨衆。第十七，凡受食受財，皆讓少取，爲儉唯省，勿令衆生有嫌疑薄賤，損命損德，深得護持。

太上曰：威儀說十事，及諸律名，總係一百四十餘條。若能習而誦之，勤而行之，已具前十事，及諸科令，總名護身，已所不犯。又復教人此之善果，計不能盡，衆聖歡仰，諸天慚愧。若此之人，見世獲十種福德恭敬。且如《昇玄經》云：亦如法服科說，如是之人，名曰大順真士，不出一生，入次聖品。若復有人，無心奉道，倚傍法

門，窺求利潤，污道法服，辱道法流，及構惡徒，嫉他行善，自違科戒，勸人莫修，不奉師訓，聞教愈甚，不生慚愧，不生思念，如是等人，名曰罪逆惡獸，近入人道，未得人心，乍入人倫，污聞聖法，所爲趣向，尚似陰囚畜獸，脫離衆生，猶未覺悟，憶彼類習，欲還本身，深所痛哉，甚可悲憫。若人見在，失十種功德，失十種恭敬，得十種輕賤，離十種聖賢，五苦八難，備具形體，纔滅此生，當入長夜，九幽地獄，一切苦痛，悉皆備受，輪轉三惡，無解脫時。無想真人等聞太上說此要言，悉皆垂淚，歡喜踴躍，稽首禮謝，信受奉行。

玄門十事威儀

(吳亞魁點校)



# 009 神人所說三元威儀

## 觀行經

經名：神人所說三元威儀觀行經。一卷。底本出處：敦煌 P.2410 號抄本。

### 神人所說三元威儀觀行經 卷第二

道士問：經有十事，何等爲十？一者當如法卑下牀間；二者不得共坐而請；三者有不解當直問；四者不得思憶外因緣；五者設解當頭、面著地，作禮反向出戶；六者不得唾人淨地；七者不得咄狗；八者若從倚；九者如法呵之，□□□□，十者應歎讚。

道士爲人師，備卅三事。何等爲卅三？一者、當知戒；二者、當知持戒；三者、不犯戒、及威儀；四者、當

知輕；五者、當知犯、不犯相；六者、當自守持；七者、當恒護惜威儀；八者、當敬經法；九者、當恒作利益意；十者、當以己所解、盡心教授；十一者、當稍稍授；十二者、當教人經法；十三者、當□□遠行；十四者、當能致物情；十五者、己之所解，不得隱匿，畏己法盡，從衆分散；十六者、若得布施，當言皆爲衆人來，非我德招；十七者、當自占視病瘦，鑿藥令等；十八者、有弟子當能衣食；十九者、當能教經文句；廿者、當能爲解經令知；廿一者、有所問當能報語；廿二者、當恒爲說罪惡、示教利喜；廿三者、當能教點慧，如我勝我；廿四者、當能教令守戒；廿五者、當教令識邪正；廿六者、當教曉解戒相；廿七者、當令能得諸弟子意；廿八者、若有之短，當供給所須；廿九者、當具有戒德；卅者當具解慧；卅一者、當自精進持戒；卅二者、當能分別爲說罪福；卅三者、應當教誦誦經；卅四者、當教解深義；卅五者、當親近善知識，遠離惡知識；卅

六者、當教令恭敬；卅七者、當教令莫違大德教令；卅八者、當教令朝暮問訊同止大德；卅九者、有罪當教如法悔；卅者、當晝夜教誨，無令於道生厭退心；卅一者、當知弟子入出處所；卅二者、當教弟子師教坐三語乃坐；卅三者、當教動心得所；卅四者、當一平等，善取人心。

道士事師，有卅三事。何等爲卅三？一者、當畏師；二者、當隨師教戒；三者、當從意；四者、當識師語；五者、不得違師教；六者、當朝暮往問訊；七者、問安否；八者、當著法服；九者、至戶當三聲嗽；十者、不得縱橫入；十一者、當作禮；十二者、當長跪問消息；十三者、師語言某人，來說卿犯如是罪，不得過大反應；十四者、設有當悔過言，其實愚癡，犯如是罪；十五者、悔罪竟，即嘿然還戶；十六者、當爲師取藻洗水；十七者、當備藻豆、楊枝、皂莢；十八者、當爲師拂牀席；十九者、次當爲師襞疊衣服；廿者、當著常處；廿一者、入戶當在左邊立；

廿二者、師教坐不得便坐；廿三者、師若教坐，語至三當坐；廿四者、師若問卿經義利，不若教讀，應便受讀；廿五者、若有所忘，當得解了；廿六者、若藻洗，當白師令知；廿七者、沐浴當報師知；廿八者、出行當白師；廿九者、若作衆事亦報；卅者、若病服藥；卅一者、常當親近；卅二者、常當恭敬；卅三者、若有所作，常當諮稟。

道士作法衣，有九事。何等爲九？一者、當如法作；二者、若欲作衣，當先白師，師若許作當作；三者、當依法條縫；四者、若已有內外法衣，不得作；五者、不得五方色物作法衣；六者、不得使非親里女官作法衣；七者、當正好色作衣；八者、未有法衣當急作；九者、當稱形作。

道士染法衣，有五事。何等爲五？一者、當用淨器；二者、當作屏處；三者、灑之，當令乾淨而堅；四者、當數看視，五者、燥即攝取。

道士著法衣，有七事。何等爲七？一者、不得攘肘入他舍；二者、不

得不周正法衣入人門；三者、不得左右顧衣，以爲好入人門；四者、不得露內衣褻法衣入人門；五者、當正持威儀，無令如王大臣，廣步掉臂行；六者、法衣不得極長短；七者、泥中當手舉衣。

道士不應著法衣，有十六事。何等爲十六？一者作館舍事；二者作餘穢事；三者補未竟；四者浣未燥；五者大風；六者雨墮；七者大水；八者大火；九者盜賊；十者與雜人事；十一者汗濕；十二者霧露；十三者不淨；十四者天陰；十五者入山；十六者遠行。

道士暴法衣，有五事。何等爲五？一者風起不得暴；二者六日一暴；三者不得當人逕；四者不得大久；五者不得即褻，且當熱歇。

道士浣衣，有十三事。何等爲十三？一者、不得持足踐；二者、不得兩手苦掇；三者、不得持衣被戲人；四者、不得非其人浣濯；五者、不得褻著席下；六者、著淨處；七者、持人當著

常處；八者、不得褻法衣服卧上；九者、不得無法衣入衆坐會；十者、衣法不具，不得入觀宇；十一者、至舍後，未澡手不得著；十二者、至舍後，未用水不得上觀堂；十三者、至舍後，當脫法服。

道士欲出行，有四事。何等爲四？一者、當頭面著地作禮；二者、當正作如事說；三者、已可當作禮；四者、若師呵，心不得違。

道士入浴室，有廿事。何等爲廿？一者、當低頭入，不得上向；二者、當隨次路，勿當目前；三者、不得水相澆；四者、不得持水澆火；五者、不得呵火多少；六者、不得多用人水；七者、不得於中浣手巾衣；八者、浴已即出去；九者、師在中不得入；十者、師浴，當入指之；十一者、師浴，當持衣往外待；十二者、已出易衣，當取浴布浣之；十三者、欲自入浴當報；十四者、當用土；十五者、當用藻豆；十六者、當用灰；十七者、當用湯已乃用水；十八者、當以水洗浴處；

十九者、不得住上坐前；廿者、不得當風住；廿一者、當急入室。

道士入温室，有廿一事。何等爲廿一？一者、當隨次坐；二者、各自讀經；三者、當思惟念道；四者、不得妄起，至上坐前；五者、不得與下坐共說世事；六者、聞磬聲，當先禮；七者、當禮上坐；八者、不得至上坐處坐；九者、不得左右顧語；十者、不得唾汗淨地；十一者、不得呵叱下坐；十二者、不得呵人火；十三者、不得數起出入；十四者、行不得使足有聲；十五者、出當反牽戶閉之；十六者、不得大排戶使有聲；十七者、自讀經，不得中語；十八者、讀經時，不得妄語；十九者、讀經未竟，不得數起；廿者、不得亂人意思；廿一者、讀經未竟，不得便卧去。

者、已竟，徐起問疑；八者、不得諍經，以惡意相向；九者、不得瞋恚，卧人牀上。

道士問經，有三事。何等爲三？一者、人身安隱應問；二者、人歡喜時，應問；三者、人自說經，隨時因緣，應問。

道士爲女人說經，有三事。何等爲三？一者、女人不得孤來問經，不得持姪意向；二者、女人聽經，不得隱於帷幔中；三者、不得獨居靜處與女人言。

道士新至，有十三德。何等爲十三？一者、作禮已，當却問觀主姓字；二者、上坐當禮下坐問消息；三者、不得問止處；四者、人與牀席卧具，不得呵好醜；五者、當易供養；六者、不得諍經；七者、不得自在出入；八者、欲去，有卧具付主人；九者、當憂衆；十者、不得妄用觀中淨水；十一者、不得妄至人戶；十二者、不得逆行；十三者、不得踰越觀中牀上。

舊住道士，當以十一事待新至道

士。一者、當避路與戶；二者、當與所須；三者、朝暮往問訊慰勞；四者、當語以國土習俗；五者、當教避諱；六者、當語求索處所；七者、語某可食；八者、當語縣官禁忌；九者、當語盜賊其處有無；十者、當語朝夕恭勤，无有懈怠；十一者、當語專心，請勿生退轉。

道士爲人師，當以十五事教弟子。一者、諸道士會時，當令如法視上下；二者、衆有制令，當語令莫犯；三者、當教隨衆；四者、當教行恭敬；五者、當語國土方俗忌諱，所可食物，應尔不尔；六者、當語求索處所；七者、若有盜賊處，應示；八者、病疾，當占視；九者、衣被破壞，當給與；十者、若有去心，不得留難；十一者、當相視人；十二者、當隨方便所往；十三者、來有所問，當答讓；十四者、欲澆灑地，當謙卑；十五者、有過，不得言我不復與卿語，是爲依師法。

道士爲人弟子事師，有十事。何等爲十？一者、當數往；二者、往至，

當三警嗽；三者、當政面禮；四者、當長跪問消息；五者、去當還向出戶；六者、旦夕往問訊；七者、師呼即著法衣應往；八者、當掃地、具澡水、拂牀；九者、若自有所作，若出入，行心當報；十者、往受經問，解義不得，不應有怨意。

道士欲畜弟子，有十事。何等爲十？一者當知諸經律；二者當知戒；三者當知經；四者當有慧；五者當有德；六者當持戒；七者當不犯戒；八者當能解經；九者當忍辱；十者當自守。

道士有弟子，當教五事。一者、弟子作衆事未竟，不得呼使；二者、不得令弟子求賢者長短；三者、不得信弟子語；四者、不得於衆中大聲罵弟子；五者、不得獨使，當令給衆法事。

道士有三事，不應弟子共居。一者愛端政；二者見之欲瞋；三者疾病。

道士有三事，應逐弟子。一者言犯戒無罪；二者言無聖道；三者向人

說師善惡。

道士欲遠行持，弟子寄人有五事。何等爲五？一者、先問弟子，可汝意不；二者、汝事主，能可人意不；三者、呵罵，不得言非我師罵我；四者、承事主，如視我；五者、如法教汝，不得捨去。

道士將弟子至主許寄時，有五事。一者、當教頭面禮；二者、教自歸；三者、當言卿視我弟子，當如卿弟子；四者、我行來還，自當歸我；五者、我無常，長屬卿。

道士受人寄弟子，有五事。何等爲五？一者、當教讀經；二者、教莫犯戒；三者、當教隨衆上下；四者、教行步法則；五者、教恭敬衆人。

道士飯時，有五事。何等爲五？一者、上坐未坐，不得先坐；二者、上坐未受案，不得先受；三者、上坐未飯，不得先飯；四者、上坐飯未已，不得先止；五者、上坐未起，不得先起。

道士受食案，有十四事。何等爲十四？一者、當持手巾并受；二者、當

開間中尺六寸；三者、不得左右顧視；四者、左右手不得有所携持；五者、不得大呼，有所求索；六者、人未授物，不得身手求；七者、不得食上唾上坐前；八者、不得以手摩面目；九者、不得不淨手政法衣；十者、若人來有所益，常以指隨之；十一者、不見來時，不應食；十二者、若急欲唾，可反履唾之；十三者、以藻漱，不得復持履；十四者、已持履，自知手汗，不取拭者，不得以持衣。

道士飯竟藻漱，有十二事。何等爲十二？一者、不得指挑撩口中；二者、不得涕鼻大嗽唾地中；三者、漱口不得令中有飯；四者、不得大奮手汗左右人；五者、持手巾，不得教濕，當先執摩手；六者、不得奮濕取燥；七者、不得以拭面目鼻口；八者、不言我自有不取持去；九者、常當如法用之；十者、已拭手燥，即當藏去；十一者、下坐藻未竟，不得呵令使來；十二者、上坐爲人說法，當正坐聽。

道士爲衆持藻盥盤，有廿一事。

何等爲廿二？一者、手不淨不得捉；二者、手不淨不得捉上蓋；三者、手不淨不得前捉口；四者、手不淨不得便益水；五者、手不淨不得捉持頸；六者、當從下捧腹；七者、水少且當洗使淨；八者、當出益水；九者、欲益水，先澡外三洗令淨；十者、欲着水，當三例易水滿持入；十一者、欲持入，不得當道住；十二者、安着屏處；十三者、常當使有楊枝；十四者、安之，當心上蓋；十五者、宿成水令滿；十六者、持澡槃，不得使相着有聲；十七者、不得使上邊汗；十八者、不得使中有飯；十九者、弃不淨水；廿者、弃水不得速手徐寫之；廿一者、藻槃，當先藻內外使淨；廿二者、持藻槃手不淨，不得中心持漱口。

道士常用手巾，有五事。何等爲五？一者、當拭上下頭；二者、當用一面拭手，以一頭拭面目；三者、不得拭鼻；四者、以用拭膩汗，當即浣；五者、不得以拭身體，若沐浴，各當自有異巾。

道士爲衆知事人，有十二事。何等爲十二？一者、用法教；二者、惜衆物；三者、當知衆事；四者、不得以法物迴衆用；五者、欲有所作，當自報衆；六者、不得割截衆物，獨匿自入；七者、不得持衆人物，私意饒益，親厚知識；不得斷取衆物，以匿施用，作名字媵上，當數斷理衆家卧具；八者、若有病瘦，當占視，隨所思，得与之。老者，常恭敬瞻視，衆亦當監令作食，每使潔淨；九者、當營隨衆所樂食；十者、不得坐自瞋喜；十一者、欲行清淨，不得露身；十二者、日暮，常當自起案行門戶。

道士飯於堂中，行十三事。何等爲十三？一者、有所分布，皆當白衣；二者、有所布，皆當始學；三者、平等行之；四者、分羹，先三迴汁乃斟，令汁滓調；五者、有所分，不得於上語笑；六者、不得遙大呼，言取某來；七者、衆中不食美者，爲取所便與之；八者、若衆中不相便可者，不得即於坐中呵之；九者、急當念養病；十者、飯時

人持物來，當即分布盡之，不得言當遺後日；十一者、急先益羹；十二者、急當益中飯盡者不；十三者、當視所不具。

道士於竈下，有十九事。何等爲十九？一者、盡力忍辱；二者、若人從有所索，有即當與，不得逆言无有；三者、常當早起視具不；四者、一切使人行，若有所買，不得追走；五者、若欲呼使人行，若有所買，不得追走；六者、若欲呼使人，不得遙大作聲呼；七者、一切有所作，不得使物器有聲；八者、一切當可衆人意，不得自在；九者、汲水，不得大投瓶井中，令水濁；十者、不得自擇米；十一者、藻釜，三易水令淨；十二者、勿持釜中熱湯澆瀆中；十三者、不得自炊；十四者、不得自掃生草斷去根；十五者、不得以生菜根弃着火中；十六者、不得持飯瀉瀆中；十七者、一切食具，皆覆上，不得使受塵；十八者、不得持衆物倚身，以作恩惠；十九者、不得分今日食遺旦日。

道士有七事，待新至道士。何等爲七？一者、來至即當問消息；二者、當爲次坐上下；三者、當給與房室；四者、當給與卧具被枕；五者、當給與燈火；六者、當語道士教令；七者、當語國土習俗。

道士使人市買，有九事。何等爲九？一者、當教買淨者；二者、莫使侵人；三者、不得忘走捉人；四者、當獲人意；五者、口不二價；六者、不得挾情貴賤；七者、不得因市別處遊行；八者、不得以所買物置不淨處；九者、當念與人作市，無殆慢心。

道士教人汲水，有五事。何等爲五？一者、當使先淨澡器；二者、當使着屏處；三者、當覆上令淨；四者、不得持膩洿；五者、若人以洿，不得復用。

道士教人破薪，有五事。何等爲五？一者、莫當道；二者、先視斧柄，令堅；三者、不得破有青草薪；四者、不得妄破衆家材柱；五者、積著燥處。

道士教人擇米，有五事。何等爲

五？一者、當自量視多少；二者、不得有草；三者、擇鼠屎；四者、不得令有穢；五者、向淨地。

道士教人洗米，有五事。何等爲五？一者、當用堅器；二者、用淨水；三者、五易水令淨；四者、內著屏處；五者、覆上令密。

道士教澡釜，有五事。何等爲五？一者、不得持水大撞釜底；一者、當便盈器受洿水出弃之；三者、當滿水；四者、淨澡木蓋覆上；五者、暮覆之，當令堅。

道士教人莊米，有五事。何等爲五？一者、當教待氣出所莊；二者、當隨氣上米，稍稍炊之；三者、安正甑，不得令氣洩；四者、着米甑中，當隨覆上；五者、已熟下之，亦當覆上，莫使露。

道士使人擇菜，有五事。何等爲五？一者、當去根；二者、當令等；三者、不得令青黃合；四者、當使澡淨；五者、皆當著淨處。

道士教人作羹，有五事。何等爲

五？一者、當教如次內物；二者、令孰；三者、令味調；四者、當自觀，令淨潔；五者、已熟，當去下火覆之。

道士掃觀中，有七。一者、當先灑地；二者、當使調；三者、當待燥；四者、不得逆掃；五者、不得逆風掃；六者、當以手拈中草去；七者、當取中土，轉著下處。

諸道士應聚會，有五事。何等爲五？一者、當早起，行視門戶開未；二者、當檢空燈內之；三者、當拭案檢；四者、當燒香；五者、當作大燈火，著法堂中。

道士灑地，有五事。何等爲五？一者當却行；二者當輕手；三者當令遍；四者當待燥；五者不得洿人衣。

道士掃地，有五事。何等爲五？一者、不得背經；二者、不得大掉手洿人足；三者、不得掃去土；四者、當自手徐出弃之；五者、不得當人道，亦莫水弃清中。

道士暝然燈，有五事。何等爲五？一者、當持淨布，掃中外令淨；二

者、當作淨炷；三者、當自作麻油；四者、著油不得令滿，亦不得少；五者、當護令堅莫懸，妨人道、洩人。

道士爲衆知一年任事，有九事。何等爲九？一者、爲三寶盡力；二者、若有道士從方來，當迎安隱；三者、當給與牀席，若燈火三日至七日；四者、設戶皆滿，常自避持處與之；五者、當數往問訊占視；六者、當爲說國土習俗；七者、當憂所不具足者；八者、若中有共爭者，不得有所助，常當和解，令安隱；九者、若宿與不相便安，不得於衆中訶罵。

道士爲小知事，有廿事。何等爲廿？一者、欲鳴磬雷，先視早晚；二者、常當報上坐日；三者、常當須待主人，視食具未；四者、當令衆人意；五者、當次諸道士坐處，不得數起；六者、不得正對衆坐；七者、先自彈罰；八者、語且須人意；九者、白事不得增減人語；十者、若有所分，皆當調等；十一者、若衆中有不如法者，不應便自於衆中呵罵；十二者、不得違衆正

令；十三者、不得數出行動；十四者、事畢，當從衆誨，若語言，不可分布不  
等乞餘罪；十五者、白帔已，不得先出去；十六者、朝暮，當行觀病瘦；十七者、當日行問訊上坐諸大人；十八者、當時往至篤信主人家勞問；十九者、若有遠行諸道士來，當安隱之；廿者、若同學中有命盡者，當占視遠送之。

道士踞坐，有五事。何等爲五？一者、不得交足；二者、不得雙前兩足；三者、不得却隱；四者、不得支柱一足；五者、不得上下足。

道士淨住，有十四事。何等爲十四？一者、不得祖軀入衆；二者、不得著履入衆；三者、不得當講堂戶中住觀諸士；四者、不得踞戶外聽諸道士語；五者、不得住戶中大呼坐上人；六者、設講當戶已閉，不得排開急入；七者、當低頭從上至下坐；八者、不得排奪人處；九者、勿道說外因緣；十者、已安坐，不得語諸道士今日會何大太早；十一者、衆識事，不得亂語；十二者、不得妄唾前地；十三者、不得持

手捧膝；十四者、不得張口。

道士至舍後，有廿五事。何等爲廿五？一者、欲大小便，當行；二者、行時，不得道爲某事，亦勿爲上坐作禮，亦勿受人禮；三者、往時當直，低頭視地；四者、往當三警嗽；五者、上已有人，嗽不得迫；六得、已上正，警嗽乃踞；七者、正踞中；八者、不得一足前，一足後；九者、不得令身倚；十者、斂衣，不得使垂圍中；十一者、不得大咽，使面赤；十二者、當直視前，不得顧聽；十三者、不得洩地；十四者、不得低頭視圍中；十五者、不得視陰；十六者、不得以手持陰；十七者、不得畫地作字；十八者、不得以草畫壁作字；十九者、用水不得大費；廿者、用水不得汗滿；廿一者、用水不得使前手著後手；廿二者、用土當三過；廿三者、當用澡豆；廿四者、三過水；廿五者、設見水草土盡，當語直曰主者，若自手取爲善。

神人所說三元威儀觀行經卷第二

（吳亞魁點校）

# 010 正一威儀經

經名：正一威儀經。一卷。底本出處：《正統道藏》洞神部威儀類。

太上曰，正一受道威儀：初入道門，詣師奉受券契。不受券契，土地山川守界真官，不上道名，治官障礙稽留，難為成道。受此券契，天地門戶，不敢稽留。

正一受道威儀：次當詣師奉受治錄、三歸五戒。不受之者，則治司不書，土地不明，不攝五炁，不關四司。受此治錄，則魔王拜伏，自稱下官。

正一受道威儀：次當詣師奉受仙靈符錄。不受之者，攝召不降，神不營衛，宣奏不達。有所謹按，神不流行，三界五帝不敬其形。受此符錄，齋戒啓奏，伏鬼除魔，先當使之。

正一受道威儀：次當詣師奉受九州社令、九州都統。不受之者，遊行九州，所在山川土地神靈，輒見稽留，道路不通。受此符錄，鬼神敬奉，不屬地司魔王衛形。

正一受道威儀：次當詣師奉受斬邪符錄、斬邪法錄。不受之者，魔精鬼祿，橫見干犯，兵病所侵。受之者，誅邪伏凶，萬神潛藏，土地山川侍衛送迎。

正一受道威儀：次當詣師奉受九宮捍戾、六害神符。不受之者，九戾六害，復犯子形，六天兇鬼，得肆其威。受之者，萬災不干，百邪避之，三界五帝，奉子身形。

正一受道威儀：次當詣師奉受九天兵符、九天真符。不受之者，三五神兵，不隨子東西，出入人間，不來侍衛。受之者，三五神兵，隨子東西，出入侍衛，萬邪不干，役召神靈，敢不敬從，一切鬼神，皆憚其威。

正一受道威儀：次當詣師奉受天靈赤官元命符錄。不受之者，天神地

祇，不降爾身，真官散亂，身神飛颺。受之者，天地兵馬，隨爾所須，身中吏兵，纏繞其形，坐卧安和，夢想不驚。

正一受道威儀：次當詣師奉受二十八宿七星符錄。不受之者，諸天星官，不降爾身，延年保命，天官不依，請召不降。受之者，名上天官，保命延年，祈請星官，立依所言，得道昇仙，天門自開。

正一受道威儀：次當詣師奉受都章畢印、四部禁炁。不受之者，奏章行符，禁制方術，神炁不從，關啓不聞。受之者，符章禁祝，莫不如言。

正一受道威儀：次當詣師奉受三百大章、千二百官。不受之者，章中吏兵，不受爾言，徒為謹按，身反招愆。受之奉行，如神心，言此至要，慎勿輕傳，依科修行，無諸灾患。

正一受道威儀：次當詣師受紫宮大錄。不受之者，為國消灾，正天分度，天官不從。受之勤行，天應爾心，所求所願，諸天順從，得道昇天，星官下迎，天門開通，魔王保名。



正一受道威儀：次當詣師奉受破  
魔錄。不受之者，神炁不行，穢炁不  
消，行符敕水，召鬼束靈，真神迸散，祆  
邪干形。受之蕩穢，人鬼清明。

正一受道威儀：次當詣師奉受七  
十二戒、百八十戒。不受之者，三界四  
司，考罰爾身，名削善簿，字列罪科，生  
死父母，不免三塗。受之奉行，諸天稱  
慶，鬼神所宗，七祖生天，身登雲宮。

正一受道威儀：經戒符籙，不詣  
師受，行之不神，反得偷盜之罪，須詣  
師受，依法修行，略舉要領，諸宜如之。

正一受道威儀：凡欲受道，先詣  
師門，丹禱拜伏。師許投辭，請經戒符  
籙，書寫如法，齋糧質信，法衣法物，並  
備具已。然後登壇啓告，裂券斷盟，列  
辭自狀，皆當揀日隔月，不得頻繁，及  
默許易從。

正一受道威儀：夫受道，須詣有  
經戒符籙之師，不得虛傳聲譽，妄受真  
經，此道大禁，魂考九幽。

正一受道威儀：師無法不得妄  
授。弟子拜請，虛傳盟誓，風刀萬劫，

七祖同辜，切慎之焉。

正一受道威儀：同姓九祖，服從  
已來，不得傳授，以爲師資。所以者  
何，師資犯約，九祖同考。

正一受道威儀：有法即師，勿論  
奴僕下隸。若身無戒籙，天之上尊，亦  
不得師尊法故也。

正一受道威儀：登壇，皆須立三  
師、五保，監臨授度，檢察得失，用對三  
天、五帝之司。

正一受道威儀：登壇付授已，便  
令弟子冠帶法服，傳其位號。弟子稱  
位號，朝本師、及太上十方也。

正一受道威儀：受道畢，以黃素  
書三師名諱、形狀、年幾，及登壇三師  
五保與弟子。

正一受道威儀：受道，各依法位  
尊卑，不得叨謬，即俗人不得與清信弟  
子同坐，清信弟子不得與清信道士同  
坐，清信道士不得與正一道士同坐，正  
一道士不得與高玄法師同坐，高玄法  
師不得與洞神法師同坐，洞神法師不  
得與洞玄法師同坐，洞玄法師不得與

洞真法師同坐，洞真法師不得與大洞  
法師同坐。登壇行道，齋戒講說，私房  
別室，行住坐卧，以此位號，爲其尊卑。  
上、中、下座，宜相咨白請益，決當自謙  
下，敬重法教，勿損威儀。

正一法服威儀：受道先具法服，  
玄冠絳褐，黃裙帔襪，草履執笏。傳授  
既已，便當冠帶。

正一法服威儀：法服不得用五色  
綾錦羅綺，當以繒布，制度如法，常須  
清淨，勿過三通。

正一法服威儀：法服不得輒去  
身。若浣濯替代，勿令俗人犯觸混雜。  
凡衣，常有神男、神女守護。

正一法服威儀：法服不得假借，  
當須自備。若破壞，任以火淨化之。  
若住山林靜處，或埋瘞之。

正一法服威儀：法服脫著，置清  
淨之處。如詣厠溷，把諸物，皆先洗濯  
手足，然後取之。

正一入靖威儀：先整頓法服，澡  
漱祝誦，旋行唱讚，並須如法，不得隨  
宜，吏兵謫言。

正一入靖威儀：登壇入室，臨事不得責罵於人，及與外人交言，左右迴顧，執心不專。

正一入靖威儀：靖中所須，皆當預備，不得臨時闕少，呼外人求索。

正一入靖威儀：入靖，脫著履屨，皆須面向經像，不得迴背出入。舉足，隨其左右，順其陰陽。

正一啓奏威儀：西面平立，執簡曲躬，調聲正氣，直詞小語，樸略曲素，勿得厲響繁飾。

正一啓奏威儀：至心丹禱，情訴懇惻，隨事簡要，勿失威儀。爲己及人，皆當一意，不得惰慢。

正一啓奏威儀：凡諸所請，先自悔過，然後請事，言辭摶正，情理須中，勿多綺飾，失其誠懇。

正一啓奏威儀：初中後心，皆當專一，言辭准定，事意齊同，不得旦夕異陳，初恭終慢。

正一讀經威儀：冠帶祝漱，捻香存念，須依本文，端身恭坐，調柔聲氣，至心誦讀，從標至軸，不得中停。

正一讀經威儀：讀經，須心心相繼，念念不絕，無中漏忘。若誤言句，却五百言畢，啓謝自歎厥懷。

正一讀經威儀：五百言，若干言，及章末，輒許嚙液，飲諸清水，以利聲氣，於法不虧。

正一讀經威儀：畢卷，若有事起時，收經入函韞，三捻香禮拜，還亦如之。

正一讀經威儀：先當洗手、熏手及經，然後讀之。竟，復斂淨洗手，不得正爾便行。

正一讀經威儀：讀經，皆先就師，受其音旨句度，諳識文字，不得經堂之中，臨事交錯，誼亂衆人。

正一讀經威儀：讀經之時，不得受人借問文句意義，及爲人解說問難，處分他事，雜亂真靈。

正一讀經威儀：經中不了，須有諮訣，及問文字句度，皆當別時，就師拜請，勿得隨宜，輒則諮求。

正一講經威儀：弟子先當諮白法師，爲某等、若男女、若某事、請於某

處、講說某經，願見開悟。

正一講經威儀：法師許已，裝嚴高座於講堂中，百座、千座，皆當如法，威儀可觀。

正一講經威儀：安置高座，東西南北，隨其所宜，左經右師，男東女西，勿令混雜，失其威儀。

正一講經威儀：如意几拂、香鑪函韞、經案巾帕、旛華帳蓋、敷張牀席，悉須如法，不得隨宜。

正一講經威儀：弟子聽衆，各持香華，旛幢音樂，唱讚導引，燒香禮拜，迎請法師，隨時來往，不得闕怠。

正一講經威儀：法師隨事，爲諸道俗，懺悔禮願，受戒持齋，時時勸化，使悟道真，弘道利物，於此爲先。

正一講經威儀：法師以講經功德，裝嚴國主人王、大臣宰輔、土地官長、人民品物、五苦三塗、一切衆生，悟道成真。

正一講經威儀：講經畢，弟子及諸聽衆，一切有心，隨分發意，建大寶齋，福被無邊。

正一事師威儀：旦夕，正其法服，執簡朝本師、三師，如父母禮。若同居住，晨昏省覲，和顏悅色。

正一事師威儀：遠師百里，一月一省；二百里，三月；五百里已上，一年。若師有疾病、老劣、他故，不依此限，書疏無限。

正一事師威儀：省師，皆自齋，糧食所須、香油之屬，悉不得損耗於師。

正一事師威儀：弟子以時賞師。衣服藥物、几杖巾拂、履屨瓶器、米麥果菜，供其所須，勿使乏少。

正一事師威儀：師有疾病、灾厄，供侍左右，為建功德，燒香禮懺，放生贖命，延年度厄，設齋行道。

正一事師威儀：師亡，持服百日，心喪三年，殯諸山林，几棺布囊，舉尸而已。造眾福田，思念容止。

正一奉齋威儀：為己及人，建諸齋福，皆須精志，所有米麥，並須清淨，不得假換，私竊非義等物。

正一奉齋威儀：凡為吉凶、生死福業，先當脩齋，造一切功德。成就

日，皆須設齋慶喜。

正一奉齋威儀：凡齋，皆有三界五帝、四司靈官，監察其所供齋用，不得汙穢偷竊。

正一奉齋威儀：登齋供施，若貴若賤，若老若少，皆當平等，不得生諸二心，起愛憎念。

正一奉齋威儀：所請齋官，隨分施散，名為買福，不得口許心悔，生不均意，起怠慢想。

正一奉齋威儀：齋官起供，依位行列，啓告陳請，各稱名位，不得交互，須依次第告知，勿使偏併不平。

正一奉齋威儀：主人列辭，具陳事意，詣請投辭。法師受疏，依名告赴，不得違越失時，更受便近家供。

正一奉齋威儀：齋官隨分食已，餘便折還主人，不得將歸，清淨眾食，亦不得啖，各宜慎之。

正一奉齋威儀：八解、十直、甲子、庚申、本命、八節吉辰，皆宜持齋，三界五帝、四天十部，悉來監臨。

正一受誠威儀：三戒、五戒、六

戒、九戒、十二可從戒、二十七戒、四十六戒、七十二戒、八十戒、百二十戒、三百戒，各依法受持。

正一受戒威儀：若國主人王、大臣宰輔、人民男女，及以鬼神，一切眾生，各隨分授與，敕護戒神官，使其營衛，萬灾不干。

正一受戒威儀：持戒之人，不得與非持戒人同牀共席，行住坐卧，飲食居止，衣服履屨，車輿几杖，皆宜異之。

正一懺悔威儀：旦夕朝真，登壇入靖，讀經禮拜，先當懺悔國主人王、大臣宰輔、土地官長、父母師尊、三塗五苦、一切眾生，後及己身。

正一懺悔威儀：行住坐卧，舉心運意，三業六根，故誤成罪，猶如沙塵，注心懺悔，後心不生，一切清淨，萬罪消除。

正一禮拜威儀：入靖朝真，行住坐卧，若心及形，禮拜五億諸天、十方世界，真應化法無量天尊、仙真聖眾。

正一禮拜威儀：動心運形，歸依虛空，微塵沙數，過去、未來、見在三

世，無極大道，大身小身，無量等身，一切敬禮。

正一禮拜威儀：上自大羅，下窮無際，十方三界，大道應化，說法演教，三十六部，真法化法，外藏內藏，符圖寶經，普起歸依。

正一燒香威儀：先當洗拭香奩、鑪挾、匙盤、灰炭等具，然後裝治，平正瑩淨，火不見赤，法則可觀。

正一燒香威儀：所有灰炭火等，皆當別貯，不得以竈下爨，餘及不淨，柴薪葷穢，非法處灰火。

正一燒香威儀：凡是捻香，皆須三指端身，正意坐立，宜就取便三指捻之。每當三獻，使煙氣相續，不得中停。

正一燒香威儀：祈告啓請，入靖登壇，使晝夜相續，勿令斷絕，而神道無形，寄香氣宣通。

正一燒香威儀：凡諸讀經行道，齋戒禮誦，講說祈告，皆先行香三周，然後列辭。

正一燒香威儀：上界天香，千名

萬號，不焚自熏，迎風隨雲，周徧十方。下界凡境，任世有無，衆事之中，唯此難闕。

正一然燈威儀：燈象星形，助天光明，延年續命，却禍消災，一燈十燈，百燈千燈，萬萬億燈，在時所能。

正一然燈威儀：行道讀經，禮拜講說，周繞壇座，如環列星，一萬二千，應天之精，晝沒夜明，順炁修行。

正一然燈威儀：然燈，去地三尺，作籠蓋之，勿使飛蟲得入，及絕風塵飄汗。

正一鳴鐘威儀：鐘者，威儀寶器，四衆所聽，六時急務，不可闕也。左鐘右經，皆置臺閣舉之。

正一鳴鐘威儀：若二時、三時、六時、九時、十二時，皆須整頓衣服，洗手漱口，調正身心，先叩齒誦呪，然後打之。

正一鳴鐘威儀：打鐘法，先須概漸疏，徐打三槌，上謂之三下後，先概漸疏，徐打二十四槌概之，謂之長打。

復初漸概，徐打十二槌，謂之終。合三

十九槌，以應三十九戶。

正一鳴鐘威儀：三下鐘，安致燈火，整飾席座，澡漱冠帶，悉須如法，候打長鐘，徐徐舉出之，衆會所依位行列，香華贊引，並宜齊整。待後起鐘，唱導舉聲，行不得臨時迫迫，失其威儀。

正一鳴鐘威儀：不得失時，及非法打擊。若非時集衆，別立小鐘。

正一鳴磬威儀：以止節，登壇入室，威儀所須，每禮拜稱善，初終導引，俯仰節度，齋講坐起，皆當擊之。

正一章奏威儀：章法最難，慎不得輕，紙墨令淨，辭狀正直，須合真氣，勿使謬妄，吏兵陳論。

正一章奏威儀：拜章面向，隨其所申，皆當別立席座，巾案如法，低身小坐，平聲讀之，勿得高傲不恭。

正一章奏威儀：不受治錄、千二百官君、三百六十大章、都章畢印，皆不合奏章出官，各出身中仙官，不得謬監。

正一醮請威儀：醮者，祈天地神

靈之享也。亦有多種，所有餅果，並須清潔，不得肉脯葷穢，天官不祐。

正一醮請威儀：所跪信物，不得假借，闕少不充，欺誑明靈。事畢，施散山棲道士、饑寒老病、囚徒役人。

正一醮請威儀：事畢，所設餅果食訖，餘皆埋之。

正一醮請威儀：當夜半已後，日中之前，生氣之時。

正一醮請威儀：所用餅果，並須芳新，不得經宿，及生產尸穢、家鳥鼠食餘，則神靈不歆，徒失爾功。

正一法具威儀：道士法具，香鑪澡灌、几拂如意、環珮劍杖，當常整飾，安置供養，隨事所須。

正一食器威儀：道士食器，三重匙挾巾帕，並須如法，不得用金銀寶玉、牙角雕鏤，混雜凡器，常須清淨。

正一器用威儀：道士器用漱盤，衆生食盤，注留澡盆，擣香臼杵，合藥釜甌，隨事所宜，不可假借。

正一居處威儀：道士居處，樸素虛淨，內外開通，勿張帳幔簾幌屏障之

屬，遮擁左右。

正一居處威儀：道士居處，卑房小室，容身而已，不得高堂廣屋，雕畫赭堊，華麗顯敞。

正一居處威儀：道士居處，依壁敷牀，不得前後合鋪，坐卧獨居，勿同諸凡人。

正一居處威儀：道士居處，藜牀布被，藁席蒲蓋，繩牀夾漆，木盤瓦器，不得用銅鐵金銀。

正一卧具威儀：布單布被，枕石木屨，及裙襦衫袴，皆當繒布，染作荆黃，梔子竹葉，黃屑壞色。

正一履履威儀：作山形二儀，皮布縵飾，不得五色錦綺裝褉。若草屨、木履，皆須異俗，勿雜世凡。

正一泉井威儀：道士居住，先須井泉，常使清淨，勿令六畜雜物汙穢，皆別立泉井，浣濯飲食牛馬畜產。

正一井泉威儀：凡諸泉井，須數淘泄，勿使草木華葉蛙蠅落中。人家客院各立井泉，無雜供齋所用。

正一用水威儀：凡諸造食，煎炊

藥物，洗浣衣服，沐浴澡潔，所須用水，皆立濾器，令甚細密，先當濾之。

正一飲食威儀：道士飲食，滿腹而已，勿求精細，常當奉齋，非時非法，悉不得食。

正一飲食威儀：道士常當受食呪，施出種種食，別安器中，存見三一，與形俱食，以挾三擊器。就食別器，布散衆生。

正一飲食威儀：道士各立齋器，巾挾當清淨，日供所須，不得與人同器共食，及給他用，穢烝混雜。

正一飲食威儀：道士飲食，不得使人穢觸所食之物，不得臨上，令口氣衣服汙穢。餘便施散，不得積聚將歸。

正一飲食威儀：道士食訖乞懺，然後施散，不得中舉乞人，及使僕侍從雞狗之流。監齋真官，皆見謫罰，名書三官。

正一動止威儀：道士行住坐卧，皆當合道，正容斂色，端直其身，不得傾斜，失其儀相，威儀先首，可不慎之。

正一遊行威儀：道士遊詣府署、

省侍師尊、教化人間、齋請入俗，五人、三人，皆當依法庠序，正其容儀，不得交雜，軌則有失。

正一遊行威儀：道士遊詣人間，及赴齋講，各持座褥，隨處自居，既限穢氣，又別尊卑，上、中、下座，大小同制。

正一住觀威儀：道士既入道訖，即須住觀，持護法相，旦夕燒香，朝真禮懺，奉侍師尊，受持禁戒，諮問大德，學道方法。

正一住觀威儀：更相教誨，自惜法身，修善止惡，存念三寶，慈惠和柔，每事恭順，成就道場，外人干犯，皆當念忍。

正一住觀威儀：上下和睦，尊卑信順，如運手足，存立常住，香油米麥、樵菜等物，相共營求，皆同一己，不得費用。

正一住觀威儀：莊田碾磑，家人使役，五行什物、六畜器具，果木葉藥一切所須，皆共愛惜，供養十方，當來福田。

正一住觀威儀：尊像經法，幡華帳座，堂殿樓閣，牀席氈褥，鍾磬几拂，常共建立，悉使精華，無令闕少。

正一住觀威儀：常住衆物，及三寶財，草葉華果，毫芥已上，不得輒自費用，及以乞人。其罪至重，死入三塗，過去、未來、見在三世，己身父母、兄弟、姊妹，及其子孫，貧窮下賤，聾盲瘖瘂，風癩愚癡，癩狂攣躄，水火兵傷。

正一死亡威儀：若師尊、同學亡，打鐘三百六十槌告終。法徒畢集，哭泣三聲，燒香讀經。暨其藏殮，依用法式。

正一死亡威儀：几棺布囊舉尸，送山林藪澤，入土而已，不得立墳，封樹丘壠。

正一死亡威儀：正一符籙、券契、環劍，布囊盛之，隨身入土。

正一死亡威儀：書七十二符，安佩尸形如法，拜戊己章、棺殮章，法服隨身。

正一死亡威儀：亡師所有衣物、牀卧等具，資送之餘，脩牒名目，施入常住，若親若疏，若內若外，皆不得犯。

正一死亡威儀：師若無財物資送，當用常住，及齋供福田，並以衆物。所以生死同依常住，師天尊也。

太上謂天師道陵曰：凡一百三十二條正一威儀，昔在龍漢劫終，於玉清三華便殿，詣師元始天尊奉受。是時，元始天尊對太上道君、九天真師、元始丈人、三十二天帝、五老上真、無極神王，命五帝玉童，披九雲之韞，出此威儀，分付與我曰：子當流布三界十方，無極世界，一切男女有善心者，皆傳與之。吾得已來，經今五劫，隨處教化，徧滿人天，上聖真仙，悉皆奉受，書之金簡，秘諸天官。今應授子，汝其遵崇，敬則福至，泄則禍臻。元始明戒，宜慎之焉。道陵稽首禮謝曰：臣入證未久，屢遭慈霈，教誨懇勸，賜授經法，不測深淺，更示科戒，微妙難思，敢不盡心，依科奉行。於是諸天聖衆同聲稱善，俱入太空。

正一威儀經

（吳亞魁點校）

# 011 正一修真略儀

經名：正一修真略儀。一卷。  
底本出處：《正統道藏》正一部。

《真經解》云：錄，錄也。修真之士，既神室明正，然攝天地靈祇，制魔伏鬼，隨其功業，列品仙階，出有入無，長生度世，與道玄合。故能濟度死厄，救拔生靈，巍巍功德，莫不由修奉三洞真經、金書寶錄，爲之津要也。錄者，太上神真之靈文，九天衆聖之祕言，將以檢劾三界官屬，御運元元，統握群品，鑒隲罪福，考明功過善惡輕重，紀于簡籍校誡宣示之文，掌覽靈圖，推定陽九百六天元劫數。又當詔令天地萬靈，隨功役使，分別仙品，衆官吏兵，億乘萬騎，仙童玉女，列職主事，驅策給侍之數目，浩劫無窮。太上十方，至真衆聖，皆互稟師資，結盟受授，從俗登

真，永保生道，漸位于極。必使依科次第，明曉階秩，詳審義目，解其要旨，然後終行一一，宜依錄文，明科禁誡，安可率易，乃罪福得失之驗，如其文也。

且夫神符寶錄，其出自自然，故於元始赤明浩劫之初、渾茫之際，空中自結飛玄妙氣，成龍篆之章，乃元始神尊化靈應氣然也。是以生天立地，萬化明分，皆因道氣與靈文也。經云：未始無道，未始無氣，未始無文。由是而言，萬靈相資，與化齊有者也。故知天地萬靈不死，皆由我心，非我心知之，即天地萬靈變化之道，其誰是哉？故云：天地萬物最靈者，人也。可不察歟。但悲夫稟性暗愚，或生微土，而典法莫化，五常莫知，安可聞上聖之言、三清妙法，斯天罰也。嗟乎，慧福兼全，生逢聖運，靈文備世，大法可傳，而封滯俗情，不能信受，亦與夫愚微同矣。世人受道經戒，佩服錄文，縱未能次第依法修行，亦已不爲下鬼，輪轉不滅，與道有緣，而况親行之乎？功用淺深，不離於己，不可預說。今且聊解三洞錄

文修行大旨，將知至聖神真宣詔法教，其文其軌，咸謂符會于玄玄之道焉。

太上三五正一盟威寶錄二十四階太，最尊也。太也，極也，通也。

三界獨尊，衆聖之極，即所謂道君也。於理，即天尊、道君、老君一也，以三清應化之階，即有方品之異矣。今於此錄而言老君也，授正一盟威錄於三天法師，以傳于世，使過度衆災，落除黑簿，召鬼役靈，進品仙職，故曰三五正一盟威寶錄。三者，三才各備。五者，黃中總數，統御生死，以攝萬靈，安鎮人身，元精固守也。又以三、五爲日月之數，戊己配於坎離也。人稟陰陽正氣，三元五運萬象，必全由心而正，心正則神精不虧，與我爲一，然後全日月之明，合五靈之本，故能死生無變，於己何邪異之所能干。由是煥照群陰，威伏六賊，是謂正一盟威學道之士。用此天真靈文赤章雲篆，保守正真，永爲身寶，故曰寶錄。然後可以隨功舉遷，役靈召鬼，玉女給侍，仙厨備供，乘虛躡烟，亦不待諸法，但緣俗間紛擾，

心不能精，故應驗不至耳。昔張天師所受傳示，所以隨其修用，臨事制御，階級不同，名目甚衆。至於修身度厄，以保真正者，師師相傳二十四階，以應上八景、中八景、下八景，二十四氣也。錄生必先受持七十五仙官將軍、七十五靈官將軍，是爲百五十將軍，所以先正人身，二具內外神靈品數，仙靈二品，各有符一，通太上神文也。凡在錄，諸符篆亦不可備識，但當按法而行。其解釋符篆，別具三洞符解，然亦有未詳者，自非得道合神，不能備悉。又不宜曲以俗解，深悞聖旨也。其仙靈二官、百五十將軍錄一階中，仙童玉女、功曹吏兵，皆應氣而有，雖約以位數，若變化無窮，固不可勝紀，今且聊釋陰陽大數云。

### 太上三五正一盟威仙靈百五十將軍錄

仙官三陽之氣，其數七十五者，卯、辰、巳，爲三陽，卯數六，辰數五，巳數四，而以三五乘之得也。所以用五乘之者，五爲中央戊巳終始之大紀也。

以五乘六，五六三十；以五乘五，五五二十五；以五乘四，四五二十，故得七十五也。仙官主治內，以保臟府、關竅、筋骨、氣血，一身之事也。人不犯衆惡，不逆三陽，則仙官祐人，血氣和平，五臟納靈，神室明正，通真契道也。

佩受寶錄，深宜保之。靈官三陰之氣，其數七十五者，酉、戌、亥，爲三陰，酉數六，戌數五，亥數四，而以三五乘之，如三陽數，均得七十五也。靈官主治外，以守衛人身形、舍宇、治邑，四墟所至也。人不犯衆惡，不逆三陰，保守中和之道，幽明咸暢，天地同德。佩受靈文，以時齋醮，祈請靈官吏兵、神童玉女，應人軀使，可往八海之外，求取妙藥，與己同飛洞府諸靈山，功德圓滿，得具上帝任爲正一真人之秩。受道佩錄，可不勉歟。已前仙靈二官、百五十將軍錄，具如數解，是陰陽六氣之正神。然而陰中有陽，陽中有陰，仙靈亦有靈官，靈官亦有仙靈，不可一致，但陰陽各以所治爲師長也。言將軍所以主領群使，以齊禦備衛也。餘一一依錄文，而行不復具述。

### 太上三五正一盟威三元將軍錄

唐、葛、周三將軍，是太上三元宮三氣正神，水火之元精也，下應人身心宮、兩腎，在天主治北斗中圖形數，及符璽靈文盟券具錄，令人知道保真，佩服寶錄。言功醮請以時，則三將軍見形，功業既圖，於是三神與己俱昇也。別具醮法於後。

### 太上三五正一盟威混沌元命赤錄

混沌始生，元胎結形，皆稟璇璣七政，分化萬靈，修存之事，具如錄文。功成道備，元真合昇。

### 太上三五正一盟威都天九鳳破穢錄

丹元之精，爲九色神鳳，足步星罡，鼓翼振威，導達天路，故六宮陰氣，萬類妖氛，莫得干犯真官也。學士佩受此錄，以盪諸穢穢。凡施爲法事，宜以爲先，精思存注，不可闕怠也。久而行之鳳，宜令人形體洞潔，耳目聰明，徹視無外，修行功滿，與己齊昇九天也。



太上三五正一盟威護命長生籙

佩受精持此籙，即北宮落死，南斗注生，三辰煥形，天地同壽。扁鵲醫吏、玉女仙人，存念醮請，一如籙部。

太上三五正一盟威九宮捍厄八卦護身籙

此籙是九真神籍，八卦靈文，太上密旨，勅勒八方九地，主厄之神，使驅除衆害，無犯正氣，度陽九百六陰陽災運，久而修之，八卦真神與己同昇爲九天之任，當隨功果而遷也。

太上三五正一盟威太玄四部禁氣籙

夫制禦萬靈，通真達道，無不由禁攝五行之精，吐納元氣，握覽文節，關啓機源，取捨在己，存乎指掌，以統天地。逮乎昆蟲毒蠱、微蔑蠕喘、禽魚鳥獸、鱗甲羽毛，有形無形，群精異類，莫不調伏，從吾禁舍者矣。受氣諸法，雖具籙文，亦在明師，事事口訣，斯四部禁氣籙。以錄章表上聞，以爲禁術之總統也。深宜佩受，奉而修之，以助真道耳。

太上三五正一盟威龍虎斬邪籙

龍虎者，金木之精，道君左右之衛神，震威以視，則萬魔攝伏，群妖束形。修之感通，得仙道之時，龍虎挾己而昇也。

太上三五正一盟威都章畢印籙

以籙六甲印文中部諸印緘封，章表符圖，並主之籙中。執印將吏、仙童玉女等，以學人勤修精感，則給受驅役，宜醮祭不闕，以期靈應。其造印諸法，別具儀注。

太上三五正一盟威步星綱籙

仙術，出有入無，變化萬端，皆由步綱躡紀。其法，皆象三辰之氣，以致神靈，自有上、中、下三洞綱訣，隨其所用不同，一如本籙。修學，此乃中部三五赤天步星綱事，佩受此籙，可以總括諸禁法，久久精勤，當乘空步虛，白日昇仙也。

太上三五正一盟威天靈赤官斬邪籙

此籙，是三五赤天丹極元陽君，威震萬邪，洞煥凶逆，誅剪群魔惡鬼，使從道化，修事有功，濟度死厄，使人鍊

質昇天也。

太上三五正一盟威九州社令籙

能召命九州里社地司衆靈，一依籙文行事。

太上三五正一盟威百鬼召籙

以召百鬼萬靈，指撝從命，不使妄恣淫害，以擾兆民。當依律令，其法具籙文，及師傅授之。

太上三五正一盟威考召籙

世有雲中鬼子、九醜衆精，及土水木石，隸形異質，變化諸妖，有類魑魅，爲生民害。當以三五考召符吏，追而問之，法具籙訣，從師授之。

太上三五正一盟威斬千鬼萬神籙

萬邪凶逆，干擾世間，不從道化。當召三五赤天吏兵，大震神威，施斧鉞以誅滅之，不可常用。

太上三五正一盟威九天兵符籙

太上九天真符籙

太上九天都統畢籙

此已上籙，都校九天三五靈官吏兵，四荒八極，無鞅數衆，畢具佩受修行。宜三會吉日，簡閱醮請，言功舉

遷，一如錄文行事。

太上華蓋斬邪錄

太上三五辟邪錄

請辟邪斬邪，約十餘階，隨師所傳，不可爲定數。

太上三皇捍厄錄

太上諸度厄過灾錄

太上解六害神符錄

有諸攘却毒螫萬害符錄等，約十餘階，不可定數，當隨師而傳。

太上女青詔書錄

太上九光萬勝錄

太上中部赤錄

太上北帝錄

太上七星錄

太上丹剛粉火錄

太上北斗真券錄

諸錄各依本師傳授，一如錄文奉行。其階數應氣，止於二十四階。

太上童子一將軍錄

此爲童子佩持，亦三五正一之部，具如科文。

### 三五真券

師資授受之約，道科傳付經訣，皆結盟立誓，期以勿洩於非其人。當分環破券，飲丹告誓，不負道真，修諸善事，不殺生淫祀，妄作邪僞，違天背道盟約，故有其真券。其三洞法，各依本科備之，事具傳授儀。

### 天師治局

張天師修治正一法於西蜀，各依本事本法，感應之處，是爲靜治，以象二十四氣，亦有諸治舍，散在名山。按宜當配五行，依本命生月以受之。每一治，應一氣治之，長日陽平治，應左平氣，女人應右平氣，一如科儀本法。若都受諸治氣，傳天師三師都功版。今受治正一錄，祇傳本屬治氣也，事具治儀。

正一經，

正一朝真儀，

正一齋儀，

關奏章表儀，

閱錄儀，

醮錄儀。

此已上儀注科文，具正一經。其

八節、甲子、庚申、本命、三會、三元、朔望日，或朝禮，或醮閱，或言功奏章，各具本儀，依師授傳行之。

右已上，爲正一盟威一部。次進受洞神參爲中法儀，具三洞奉道科。

真文三卷，

諸天内音，

靈寶真文，

八景天書，

五法五卷，

老君六甲祕符，

靈寶五符，

五嶽真形圖，

三皇內文，

西嶽公禁山文。

已上，並各依本文，存思修奉。

此中法部，是爲洞玄，參于上法，具三洞奉道科目正一錄，已釋其文，既歷要門，感應斯驗，參乎中法，具如科條。然三洞靈文，非不周細，修行之要，在於服氣。若五氣大全，則神真咸備，師傳修氣之訣，不在錄文，今謹述

五氣星綱真訣。真師曰：含生成稟一氣，受化於陰陽，以遂其動用，唯人最靈。四大五常，自然全備，動用微妙，與神靈通。夫動念所適，無分遠邇幽深也。不疾而速，不行而至，感通之理，豈外物哉。故萬法去來，由心自造。夫唯無爲無造，故能無所不造。人能淡泊清靜，真氣自全，是故無爲也。能爲萬物之主，而無所不爲焉。

若滑欲亂神，則不能感真應物也。但人間多事，觸情縱欲，散擾神氣，必累幽明，禍繁先後，驗之非遠，可不畏歟。人能無虧於五常，不亂於神氣，但得千日不間雜者，則可以通感神靈，解脫殃厄，受洞玄清靜謹守，必五靈真氣見形，方可存注仙真衆聖之形，得步躡星綱，俯仰如法，勤修五年，或七年、九年，則可以致五帝雲輶，真官下迎，當獲仙道，存亡自在也。守真存氣，躡紀昇綱，勿犯五常，勿亂精神，勿穢觸臟府，勿履雜處，精思齋室，日日爲常，無使間闕，一年之應，便可以威制萬魔，役使鬼吏。當隨思想念，攻擊患害，救

諸疾苦，無不立應，不擇遠近，萬里瞬息間也。所謂萬化之中，唯人最靈也。能存其靈真，保其神氣，乃爲仙人。故曰宇宙在乎手，萬化生乎身。法象之大，修術之原，當佩靈寶五符五嶽真形圖，修存五靈氣，步躡九元，握覽玄機，以通天達地也。世有不負四大、無虧五常者，可按而行其術也。

訣曰：

子若虧於仁，則青帝非真；子若虧於義，則白帝非真；子若虧於禮，則赤帝非真；子若虧於智，則黑帝非真；子若虧於信，則黃帝非真。

夫五氣之道，體通神真，子不負道違真，即可修用。是以道君保而傳之於至人，以助自然，以調元化。修之於身而感於天，天乃五行順序，地乃五嶽安鎮，人乃五臟保和，神乃五靈運御。是故惟虧五德，凶惡順焉。真人存用五氣法，先當勿食葷血之物，勿履穢汗，絕除欲念，檢身口意業。今得清淨，續別造一室，沐浴盛潔，以立春日鷄鳴時，面月建寅方，平坐調氣，瞑目

叩齒三十六通。叩齒欲深，而微緩漱咽津液，督目左右，各三握固臨目，都忘萬慮，放乎太空，無起無絕，良久覺身中通暖。當搖動支體，任吐濁氣，即又調息，當抱守氣海，朝太淵北極丹田真宮，稍用力深深，滿甚大淵，則覺百關氣歸朝其內也。如此數過，復冥心太空，若東方洞然，無有隔礙，徐徐鼻引氣，使極存見五臟，覺東方青帝真氣從肝中周迴，內外一體，念身中三萬六千神與青帝真氣合。又調息咽液，良久起立，再拜事竟，如此日日勿闕。至驚蟄，面卯也。盡寅卯節，至清明日，面辰，存黃氣從脾中周迴，內外洞徹也。至立夏日，面巳，存赤氣從心中周迴內外也。芒種日，面午也。小暑，面未，存黃氣從脾中周迴內外也。至立秋日，面申，存白氣從肺中出，周迴內外也。白露日，面酉。至寒露，面戌，存黃氣從脾中出，周迴內外也。至立冬，面亥，存黑氣從腎中出，周迴內外也。至大雪，面子也。至小寒，面丑，存黃氣從脾中出，周迴內外也。此一

周年，五氣備全矣。其存想調息，次第法用，如初說，督目叩齒，亦初數，不須等級可也。至明年立春日，重習三日，或五日、七日、九日，如去年次第，為常以朝其氣也。用氣由心，由心應手，當抱覽三才、五行、萬靈之目也。夫掌訣以握固為總法，所謂運魁綱，封五嶽，關三畢，捉鬼道，攬河源，固真氣，而幽顯備統之也。事竟，即隨息訣遣，以散其氣。凡指訣，女人尚右，男子即尚左，陰陽之體然也。大指屬土，食指火，中指木，無名金，小指水。從根節，為孟仲節，頭節季。指甲之目，為五行刀支，刀支主殺也，斬邪誅逆用之。五氣既全，當隨五類，互相制伏，無不如意。握固法：以大指掠四指，經人門畢，鬼道三過，隨文關氣握之，指節按十二辰，亦隨其相生相剋類例用之也。諸步綱，起於三步九跡，是謂禹步，其來甚遠，而夏禹得之，因而傳世，非禹所作。所以統三元九星、三極九宮，以應太陽大數。其法：先舉左，一跬一步，一前一後，一陰一陽，初與終同步

置脚，橫直互相，承如丁字，所以亦象陰陽之會也。踵小虛相，及勿使步闊狹失規矩。當握固閉氣，實于太淵宮，督目，三臨目，叩齒存神，使四靈衛己，騎吏羅列，前後左右，五方五帝兵馬都本位。北斗覆頭，斗杓在前，指其方常，背建擊破也。步九跡竟，閉氣却退，復本跡又進，是為三支，即左轉身，都遣神氣綱目，直如本意，攻患害除遣。衆事行用訖，却閉目存神，調氣歸息于太淵宮，當咽液九過。其禁勅符水等，請五方五帝真氣，如常言真師曰：先習五氣一年，乃習三步九跡星綱，一年無差，然後行諸禁法隨意，剋中如神也。能清慎守道，久久飛仙度世。古人真仙聖王，皆得之以佐世治俗。但世傳不真，妄生穿鑿，惟按此行之，乃見其驗。先師云：三步九跡，如既濟卦，得星綱真訣，又須修習五帝之氣，及握固掌訣，始合其宜，是以通徹真原也。若但受持符圖寶籙，不得師傳修用之門，終不獲靈驗，一如籙文。不爾，且謂尊奉供養而已。為之善緣，

用資來業者。

右已上五法，受氣、行氣訣、禹步、星綱，及掌訣。真師曰：有道之士，得佩受修奉諸天內音、靈寶真文、赤書玉訣、八景天書、鍊真秘道、修服老君六甲符、靈寶五符、五嶽真形圖、三皇內文、西嶽公禁山等符籙，一一依科，宜受持存修。不怠者，使得鍊形易骨，坐在立亡，位為洞玄上真之任也。籙中行事訣，各具本文，並在師傅，付別有要妙。修持洞玄部竟，神真感應，得參上清諸法。

#### 上清籙二十四階

太極左真人曲素訣辭，一名九天鳳氣玄丘太真書籙，三天正法籙，上皇玉籙，龜山元籙，飛行三界籙，飛行羽章錄，三元玉檢籙，上元檢天大籙，下元檢地玉籙，中元檢仙真書籙，上清檢人仙籙，靈飛六甲籙，靈飛六甲內思籙，六甲素奏丹符籙，元始玉皇譜籙，太微黃書九天八籙，太微天帝君金虎真符籙，太上神虎玉籙，八威召龍籙，河圖寶籙，太上八景晨圖籙，豁落七元

真符，一名帝君威靈錄，流金火鈴錄，攝山精圖錄。

### 上清洞真諸券

紫紋交帶，白紋交帶，迴車畢道。

右已前上清部，是爲洞真。此略述師傳，以陳梗槩。其受法錄經誥，具奉道科也。

夫三洞六科，總六十階。及三洞真經，共計一十八萬億三千一百八十八卷。今此世綿歷劫運，凶災彌流，仙曹代遷，洞府收隱，存世者鮮。又爲世間傳寫，文篆錯謬，或僞加刪定，隨俗造作，以要名勢，資求財賄。先師代代修定文儀，亦不能要其准的。所以爾者，由其世教之疑，情僞之異也。吾又安知三界內外，諸天世間，既有文字言教，亦因事跡而遷乎？今當隨世所傳，以其天書靈文，信質于道。但當平等一心，仁孝一切，斷情去欲，清虛無爲，事付至公，理歸至當，洞達無礙，不滯有無，是爲洞真之要旨也。

### 修寫經錄訣

真師云：至誠感神，精誠必應。世間受經錄，多不合儀，則又師傅鹵

莽，而修奉懈怠，或謂道錄不靈，神仙無效，斯自咎矣。先師寫經錄儀範，別有一卷，今且略述其要。買紙素丹青、筆墨工用等物，皆當合道，貴其本之所來，不得與人乖爭，言利宜之。情必虛懷潤物，清靜護慎，精意修理，勿得穢雜雞犬異類，及婦人目視。既齋沐經月餘，別處一靖室，東向開小牕，常燒香於左右，施案敷本文，嚴整衣冠，心存玄師，密啓其意，調氣染筆，依儀篆寫丹青。所用切忌牛皮膠，即靈氣不降也。當用鹿角膠，和少乳頭香，即得不脫，以素以紙，其揆一也。錄卷上下，長九寸，以法太陽之大數。欄頭上下，朱郭，凡九分，上法九天，下法九地。其上下朱郭，以法丹元之氣，謂赤書玉文，至陽之色象，以破邪陰也。上下朱郭，各一分，以法一氣之周布也。欄頭上下，皆雙界，不得隙絕不均，所以法四時也，上法春夏，下法秋冬。其行，長七寸，以法七政也。行闊五分，以法五行。若楷隸字數，每行不過二十字，要令調而勻，不得懸生露死，謂

死字不居行首，生字不在行下，當度其行間。若弟子名號，宜甚謹細，亦勿使居行之首也。此其法則，不可不審。至符篆圖畫，務令均勻得所，以畫錄文，在其精詳，用意爲之。每階未近軸，留三行，署監度、保舉、度師等三師法位姓名。其裝飾標軸，宜適豐儉，隨力所辦，務在嚴潔，勿爲分外，妄生憂慮。其質信等物，及符板緘囊，皆先備擬，一依科儀。所說修寫都畢，隨部入函盛之，封題如法。晨夕焚香於靜室，勿使雜觸。至受法齋辰，師當啓授如儀。

正一修真略儀

（吳亞魁點校）

# 012 傳授三洞經戒法錄 略說

經名：傳授三洞經戒法錄略說。  
唐張萬福撰。二卷。底本出處：《正統道藏》正一部。

## 目錄

卷上

戒目

正一法目

道德經目

三皇法目

靈寶法目

靈寶五符

東西禁文

五嶽真形圖

三皇內文

卷下

三天正法除六天玉文

明科信品格

七寶

金銀二十四兩

上金九兩

金環十口

金龍三枚、金紐二十七口

金龍玉璧簡文

金環玉環

斷環

青絲

斷髮歃血

絳巾、碧巾

五香

方綵

命繒

命米

金羊

玉鴈

金魚、玉魚

五色錦

青羅、紫羅

青布

紙、筆、墨

券契

盟

誓

# 傳授三洞經戒法錄略說

## 前闕

張萬福伏尋經旨，人從虛無自然中來，結形抱識，法天象地，備含萬類，神明保衛，貴不可稱尊，亦叵匹而染習，塵勞流浪，生死不能自悟。天尊大慈，善勸方便，說經演戒，開度天人，普使男女同登正道。然氣有清濁，人有賢愚，故教有三乘，形分萬等，法門漸頓，蓋有由矣。略說傳授指要如左。

## 戒目

三歸戒。此三戒者，初起心入道受，令歸依三寶也。

五戒。此五戒者，令除五欲、修五德、持五戒、出五濁也。

八戒。此八戒者，持八事以契八神。上二戒，錄生所受也。

無上十戒。此十戒者，在俗男女所受，斷十惡、行十善也。

初真戒。此初真戒者，新出家所受，謂始脫俗服入道也。

七十二戒。此七十二戒者，正一弟子所

受，即仙靈錄輩是也。

百八十戒重律。此男官、女官、正一道士所受，老君授于吉者也。

天尊十戒十四持身品。此清信弟子久志局所受也。

太清陰陽戒。此五千文錄弟子受。

想爾二十七戒。此太上高玄法師所受。

洞神三洞要言、五戒、十三戒、七

百二十戒門。此三皇弟子所受。

百二十九戒。此昇玄內教弟子所受。

閉塞六情戒。此靈寶初盟所受，即破自然券也。

智慧上品大戒。此靈寶中盟，與入帙經同所受。

三元百八十戒。此靈寶大盟所受。

智慧觀身三百大戒。此上清道士所受。

元始天尊以開皇元年七月一日午時，於西那玉國鬱察山浮羅之嶽長桑林中，授太上道君智慧上品大戒法文。天尊告太上道君曰：今當普宣通法音，開悟群生，為諸男女解災却患，請福度命，拔諸苦根，使生者見道，身脫八難，死者歡樂，飲食天堂，早生人中，

轉輪聖王。修齋求道，皆當一心請奉十戒，諦受勿忘，專精默念，洞思自然，勿得雜想，撓亂形神。天尊又曰：夫欲安身治國，使門戶清貴，天神祐護，地祇敬愛，當修善功，勤心齋戒，廣施法門，先人後身，有惠於萬物，功普於一切，功滿三千，白日昇天。修善有餘，天降雲車，弘道無已，自致不死。斯本行之上戒，可不尊奉之乎。

又智慧觀身戒。太微天帝曰：我始學之時，唯知請經，不知尋戒，乃歷劫生死，不奉觀身大戒，當何由得仙乎？故道學當以戒律為先，道家之宗尊焉。法應習誦，上品大聖，皆祕而不書。若有法而無戒，猶欲涉海而無舟楫，猶有口而無舌，何緣度兆身耶？先須誦習，不容懈惰。萬福曰：凡初入法門，皆須持戒。戒者，防非止惡，進善登仙，衆行之門，以之為鍵。夫六情染著，五欲沈迷，內濁亂心，外昏穢境，馳逐名利，耽滯色聲，動入惡源，永乖賢域。自非持戒，莫之能返。故經云：持戒制六情，念道遣所欲。又

傳授三洞經戒法錄略說 卷上

云：學道不修齋戒，徒勞山林。又云：皆從齋戒起，累功結宿緣。飛行凌太虛，提携高上人。凡受戒，皆須詣師伏受，抄寫誦習。若兼經受者，則不須也。

正一法目

一將軍籙，十將軍籙。此二件，童子所受。

仙官七十五將軍籙。陽主男

靈官七十五將軍籙。陰主女，此二籙，

男女合，名仙靈百五十將軍籙也。

九宮扞戾 六害神符 田部禁炁

都章畢 九天破殄 大小斬邪

天靈赤官 元命赤籙 大小召籙

九州社令 九天兵符 九天真符

翻天倒地 青甲 赤甲

赤丙 無終 八牒

五牒 八宿 七星

紫宮 紫臺 三將軍

此二十四仲、三十六籙，舉其大略，餘一百卷

階，具有本經，分不詳備。

《正一法文科戒品》曰：總統天地

一切神鬼，誅伏邪魔，斬滅妖精，徵靈召氣，制御山川，滌蕩氛穢，章奏傳驛，

通達神仙，莫先乎正一矣。

萬福曰：凡人未受正氣，皆被六天鬼神、妖精魍魎、一切邪魔之所中害，不能分解，以自免脫，煩惱在身，痛苦疾病，妨於修道，天人年筭。太上慈悲，出法施化，制伏強梁，建神立號，布炁徵靈，消滅邪魔，摧攝精彪，使清濁殊貫，人鬼區分，正己除邪，一以統萬，而邪由正理，萬自一宗，故總錄群靈，同歸真道也。其天丁甲卒、仙官吏兵，蓋道一分靈，凝神布炁，外光妙用，內發精明，虛映既彰，真官斯應，可以神會，難用慮思。凡諸經所明，莫得譯究矣。

道德經目

《道德》上下二卷。《河上公注》上下二卷。

《相爾注》上下二卷。《大存圖》一

卷。

《傳儀》一卷。《朝儀》一卷。

《齋儀》一卷。此《太玄經》所明，應受持

修行。

《老君西昇》一卷。《妙真》上下二

卷。

《內解》二卷。《節解》二卷。

《高上傳》一卷。《無上真人傳》一

卷。

《紫虛錄》一卷。此左仙公、及金明所說，

傳授修行也。

《太極左仙公道德經序訣》云：夫五千文，宣道德之源，大無不包，細無不入，天人之自然經也。老君以上皇元年正月十一日丙午太歲丁卯，下為周師，到無極元年太歲癸丑五月壬午去周，以其年十二月二十五日度關，以二十八日授尹真人太上《道德經》。其經，十方諸天人神、仙鬼神，所宗奉也。道士鄭思遠曰：余師葛仙公，受大極真人《道德經》，教以口訣云：此經，道之祖宗也。誦詠萬遍，夷心注玄者，皆以升仙。太上《玉經隱注》曰：常能讀五千文萬遍，太上雲龍下迎。萬遍畢未去者，一月三讀之耳。須雲駕至，便升仙也。《隱注》又曰：居家學道，當受五千文。月朔半晦、本命日、八節日，日中、夜半時，各一遍讀之耳。志



心奉行經上妙事，託形太陰之精，天帝雲車迎人身神，不經泰山三官地獄考罰之中也。上生天堂天帝之前，下生人間侯王之家，相好具足，亦轉女爲男，結緣上清。此經博通群品，無大無小，隨志所求，無有拘礙，送死養生，罄無不宜也。亦能安國寧人，制伏邊夷，莫不順道者也。斯經妙矣，弗有尚焉。

萬福曰：夫五千文，蓋三洞之精華，一乘之奧旨，理身理國，遣有歸無，言象莫詮，尋繹難極，而百王楷式，千劫不刊之文也。故太極左右宮得道諸仙，及太玄都山聖真，常研味道德，誦詠幽玄矣。凡夫得之，清齋千日，誦之萬遍，雲龍下迎，仙童侍衛，萬劫長存之術耳。老君授尹喜，行之道成，從老君化胡，周遊天下，出有入無，變見自在，爲無上真人文始先生，亦爲先師矣。

### 三皇法目

金剛童子錄。普下版。三一真諱。

三將軍圖。九皇圖。三皇內文。

### 三皇大字。

洞神經十四卷。陶先生所傳十三卷

《靈寶經》云：神寶君者，則洞神之尊神。至上皇元年出書時，號三皇洞神。《太清太極宮經》云：三皇者，則三洞之尊神，大有之祖炁，天皇主炁，地皇主神，人皇主生，三合成德，萬物化焉。洞神三皇之經，傳訓下世，領化佐國，扶助兆人，故天子得之，鳳凰下降，祥瑞出見，役使百神，無所不辟。若入名山，遊行八極，天下鬼神，無敢當之，上士昇仙。

萬福曰：夫得道諸仙真聖，雖超出凡界，亦有攝化職統，主諸天地洞府山川，召鬼役靈，呼雲制雨，以活萬姓也。此文，蓋太上自然之章，神真之信，神寶君所說，化乎九仙三皇，各受一篇，而天下大化，因號之焉。文字宛奧，理事精微，具載經中，卒難詳備矣。

### 靈寶法目

自然券。中盟經四十七卷。  
大盟真文。八景內音。

《真文赤書經》云：元始洞玄靈寶

赤書玉篇真文，生於元始之先，空洞之中，天地未根，日月未光，幽幽冥冥，無祖無宗，靈文晦曖，乍存乍亡，二儀待之，以分太陽，待之以明，靈圖革運，玄象推遷，乘機應會，於是存焉。天地得之而分判，三景得之而發光，靈文鬱秀，洞映上清，發乎始青之天，而色無定方，支勢曲折，不可尋詳。元始鍊之於洞陽之館，冶之於流火之庭，鮮其正文，瑩發光芒，洞陽炁赤，故號赤書。靈圖既煥，萬帝朝真，飛空步虛，旋行上宮，燒香散花，口詠靈章。是時天啓十二玄瑞，地發二十四應，上慶九天之靈奧，讚三天之寶明。神風既鼓，皇道咸暢，元始登命，太真按筆，玉妃拂筵，鑄金爲簡，刻書玉篇，五老掌錄，祕於九天靈都之宮，玉女典香，太華執巾，玉童侍衛，玉陛朝軒，九天上書，非鬼神所聞。天寶之以致浮，地祕之以致安，玉帝掌之以得鎮，三光乘之以高明，上聖奉之以致真，五嶽從之以得靈，天子得之以致理，國祚享之以太平，寔靈文之妙德，迺天地之玄根，威

靈恢廓，普加無窮。蕩蕩大化，爲神明之宗，其量莫測，巍巍乎太空。又云：元始五老赤書玉篇，出於空洞自然之文，於未有之中，生天立地，開化神明，上謂之靈，施鎮五嶽，安國長存；下謂之寶，靈寶玄妙，爲萬物之尊。《東方真文》曰：生神寶真洞玄章，南曰南雲通天寶靈衿，中曰寶劫洞清九天靈書，西曰金真寶明洞微篇，北曰元神生真寶明文。五老玉篇，皆空洞自然之書，祕於九天靈都紫微宮七寶玄臺，侍衛五帝神官。依玄科，四萬劫一出靈寶真文，以赤明開玄之始，號曰空洞赤書景皇真文。天地分判，天號之靈，地號之寶，故曰靈寶二十四生。經云：上皇元年九月二日，後聖李君出遊西河。值元始天王，李君稽首曰：昔蒙訓授天書玉字二十四圖，雖得其文，未究妙旨。今遇天尊，願垂成就。於是天王口吐洞玄內觀玉符，以授於君，使清齋千日，東向服符，形神備見，自當洞達，諸疑頓了。李君稽首，奉承教旨，具依天儀，長齋千日，東向服符，八景神並

見身中，金書玉字、二十四圖，空中而明，文彩光鮮，洞徹無窮。赤明元年正月上寅一日午時，元始天尊於赤明天中、南霍之丘丹靈洞宮，敷羅五色，黃金爲壇，白銀薦地，七寶告靈，傳度洞玄。金書紫字，玉文丹章，自然靈圖，二十四真，三部景神，天仙飛仙，神仙地仙，兵馬乘騎，以受太上無極道君，依威儀玄格、明真科文，度人九萬九千九百九十九人，宿有金名，列字諸天。應仙之人，大運之終，當收文還上大羅七寶玄臺紫微宮中。《玉字上經》曰：天真皇人曰：天書玉字，凝飛玄之炁，以成靈文，合八會以成音，和五合而成章，大運啓期，琳琅自生，神風虛奏，韶響洞鳴，煥乎諸天之上，朗耀太幽之中，與龍漢而俱化，披赤明於延康。二儀待之以判，三景待之以分，上聖乘之以神，五嶽寶之以靈，一切得之以生，國祚享之以安，落落大範，巍巍高尊。奉之者長存，寶之者真降，修之者神仙，度死骸於長夜，鍊生魂於朱宮。妙化之文，出於自然，混之不濁，澄之不

清，毀之不滅，滅而復生，高秀太虛，萬帝之宗，威靈恢廓，難可名焉。天真皇人曰：度授諸天內音自然玉字，當依明真典格，以朱書白素上，資七寶鎮靈，金繒效心，拜黃繒章表，告諸天度文，露文中壇，三日三宿，不遇風雨，文無飛揚，合真以傳。天真皇人曰：修飛仙之道，及滅度之法，尸解隱化，輪轉生死，隨運逍遙，無拘太陰，當朱書諸天玉字、無量內音，白素佩身，隨文服御，心不受穢，五內清和，六府恬寂，空碧無爲，八年洞達諸天，坐見十方，神真交降，體生玉光，馳騁龍駕，白日登晨。玉章上道，四萬劫一傳，隨節服御百日，諸天記錄，地官削簡，八年神真自降，體生玉光，洞達幽虛，坐睹自然，死尸更生，反胎還人，轉輪不滅，生死得仙，輕洩漏慢，身負河源風刀，萬劫終不得仙。明真舊格，宜祕之焉。

萬福曰：夫靈寶真文，生於空洞之中，元始之先，天地未根，日月未光，幽幽冥冥，無祖無宗。元始鍊之於洞陽之館，冶之於流火之庭，鮮其正文，

瑩發光芒。於是太真按筆，玉妃拂筵，金童散花，瓊女揚烟，五帝侍衛，三界朝軒。天寶之以致浮，地祕之以致安，五嶽享之而安鎮，一人則之以太平，保制劫運，吐納陰陽，教化一切，儀範萬天。諸得道大聖、衆至真、諸君丈人，莫不奉行靈寶，誦詠其篇，與天地而同沒，共日月以俱懸。大周天地，近存我身，勤修之不死，暫行之長年，爲天人之舟楫，寔幽明之福田，其理宛奧，莫得而言，傳之浩劫，愚豈知焉。

### 靈寶五符

《太玄經》曰：天地萬神，皆六甲之部使也。老君行之，長生度世，坐致行厨，隱形易體，坐在立亡。出不擇日，行不擇時，盡監萬神，辟除疾病，踰江越海，不避風波，從天入淵，虛無自然，逕入崑崙，不死之道，上升太清，登造紫微。

萬福曰：夫陰陽者，道之本。寒暑生殺，動靜之炁也。而清浮圓動，明陽也。濁沈方靜，暗陰也。陽不能獨生，待陰而成。陰不能自成，須陽以

生。一消一息，有虛有盈，二炁和合，萬象乃形。男東女西，金白木青，水土止，天動地寧，上下交泰，變化百靈，乾坤分判，迴轉千精，微妙莫測，陰陽遂呈。甲乙曰干，子丑爲支，以相配合，數成六焉。干者，日也。陽之精稱奇，一、三、五、七、九數也。支者，辰也。陰之靈稱偶，二、四、六、八、十數也。陰陽翕闢，萬二千物具而有神焉。主之者，六甲也。天不用六甲，三景失倫。地不用六甲，五嶽崩摧。天子不用六甲，百官乖緒。學道不用六甲，違其妙理。六甲者，一切之綱紀也。行得其道，萬邪皆伏，鬼神爲使。故道士佩之，坐在立亡，神仙不死，逆知未來也。

《開元經》云：靈寶五符，道之隱文，結飛玄之炁，自然成章，字方一丈，八角垂芒。生於元始之先，空洞之中，保制劫運，使天長存，梵炁彌羅，萬範開張。十方已得道，一切諸神仙，莫不佩奉而得長存，變化自在，驅馭百神，昇入無形，與道合真矣。

萬福曰：靈寶五符，生天生地，分化五行，與炁混合，吐納百神，乘運隱顯，劫劫長存，輪轉五劫，布氣十天。軒轅受之於天真皇人，傳之於子孫，夏禹得之於鐘山，祕之於洞庭。吳王泄之，國祚不隆。道士佩之，道不離身，神將炁化，和理於心，神道炁一，變化自然，壽齊天地，鍊景入真，沒身不殆，永劫獨存，功齊太虛，德冥自然。輕泄毀誹，罪延無窮，保慎敬愛，福常在焉。修行法則，具之經文。

### 東西禁文

萬福曰：其符，離合三皇文，白羊公介君所受，制虎豹蟲狼、山川百精之鬼，不敢爲害。故馭虎撻蛇，即其事也，道士祕之焉。

### 五嶽真形圖

《五嶽真形圖序》云：漢孝武帝好長生之道，常祈祀靈嶽，以求神仙。元封元年正月甲子，登嵩高山，起道宮，帝齋七日，祠訖乃還。到四月戊辰夜，閑居，東方朔、董仲君在側焉。忽有一女人，著青衣，非常麗也。帝問何女？

女曰：我墉宮玉女，爲王母使，從崑山來語帝，聞子欲輕四海，尋道求生，降尊王之位，而屢禱山嶽，勤哉有心，仙道可教者。百日清齋，不交人事，到七月七日，西王母當暫來也。武帝下席跪諾，言訖女隱，忽然失所。帝於是登尋真之臺，齋誠存道，其四方之事，權委於家宰焉。到七月七日，乃肅除宮掖，設座大殿，以紫羅薦地，燔百和香，張雲錦帷，燃九光微燈，設蒲萄蜜，爲客主之饌。帝乃盛服立於階下，內外謐寂，以俟仙官。到夜二唱後，忽見天西南如白雲起，鬱鬱直來，逕趣宮庭。須臾轉近，聞雲中有簫鼓之聲、人馬之響。復半食頃，王母至也，群仙數千，光耀庭宇。別有五十天仙，皆身長一丈。王母上殿東向坐，年可三十許，脩短得中，雲顏絕世，真靈人也。下車登牀，武帝拜跪，問寒溫畢，立如也。因呼帝坐，王母自設廚，非常豐珍，非地所有，甘氣絕殊，帝不能名也。帝見王母巾器中，有一小卷書，盛以紫錦囊。帝請問此書，王母示之，五嶽真形圖

也。此乃三天太上所出，文祕禁重，豈汝穢質所宜佩乎？昔上皇清虛元年，三天太上道君下觀六合，瞻河海短長，察丘山高卑，乃因山源之規矩，睹河嶽之盤曲，陵回阜轉，山高隴長，周旋委蛇，形似書字，是故因象制名，定名實之，號畫形於玄臺，而出爲靈真之信。諸仙佩之，皆如傳章。道士執之，經行山川，百神群靈，尊奉親迎。欣子有心，今以相與，當深奉慎如事君父，泄示凡人，必致禍考。聽四十年得傳一人，四十年無其人，聽八十年頓二人耳。授非其人，是爲泄天道；可傳而不授，是爲閉天寶；不計限而妄授，是爲輕天老；受而不敬，是爲慢天藻。泄、閉、輕、慢四者，延禍之車也。泄則身死道路受土，形濡骸裂；閉則盲聾於來生，命凋枉於卒歿；輕則禍鍾於父母，詣玄都而考罰；慢則暴終而墮惡，或惡疾於後世。復有愈此罪者，宗斷而族沒，同道謂之天親，同心謂之地愛。傳授當相親愛，共均榮辱，營心真一，珍惜精液，共養和氣，氣全神歸，必

齊靈會。如其不爾，天降汝厲。此皆道之科禁，不可不慎，汝欲有所授，董仲君者，以其人也。即命傳畢，更取一圖，王母手付帝，帝再拜跪受。王母曰：三年更來，告汝道也。帝既見王母，乃信天下有神仙之事，欲有去世計數矣。而淫色恣性，殺伐不休，百姓歎於勞役，死者怨於無辜，不從聖母之言，遂不復來也。所與帝經圖之屬，盛以黃金之匱，封以白玉之函，安著栢梁臺上。後到太初元年，天火焚臺，遂爾燒失。王母當以武帝不從訓誨，而灾之耳。但帝先承王母言，以圖授董仲君，仲君謄寫，賴此得存也。魯女生，長樂人，少好道，絕穀八十餘年，色如桃華，一日能行三百里。世傳見之二百餘年後，採藥嵩山，忽見三天太上侍官，以五嶽真形圖與之，並告其施用節度，女生道成。一旦入華山後，五十年先識者，逢女生於華山廟前，乘白鹿從玉女三十人，並令謝其鄉里親族，故人甚分明。今得此圖見於世間者，起由董仲君，及女生二人。仲君臨去傳樂

巴，女生傳封君達。葛洪曰：昔白鄭君五嶽真形，吳越之人，無有得傳，不審先生有不？鄭君曰：吾似有之，傳授禁重，不可妄泄。卿極有心，是故相告，且勿宣之。吾先人受此書於青牛先生，自吾受圖，不傳一人，當以此文與卿。今施用節度，皆出於鄭君也。青牛先生言，家有五嶽真形，一嶽各遣五神，來衛護圖書。所居山川近者，山澤神又常遣侍官，防身營家，凶逆欲見傷害，皆反其殃，辟除五兵五瘟，可帶履鋒刃帶。此文乃執持以履山林者，百山地源靈官主司，皆出境拜迎。尊貴國信鬼神，猶執卑降之禮，何凡人而可慢懂哉？

萬福曰：夫五嶽真形圖，上聖高真神仙所寶。道士佩之，遊行山澤，千山百川之神，皆出迎之。家有此圖，仙靈侍衛，萬厲潛伏，仕官高遷，財產豐積，子孫昌盛，門戶興隆，修行佩奉，自有法矣。

### 三皇內文

《三皇經》曰：三皇自然之文，皆

以金玉爲用。天皇所受，玄玉爲簡，青玉爲文。地皇所受，黃玉爲簡，白玉爲文。人皇所受，赤玉爲簡，黃玉爲文。綴以金鉤，聯以金鎖，擊以玉梭，覆以珠巾，芬以五香，持以十華。玉童玉女執拂左右，真官仙職司承去來，辟邪獅子、騏驎鳳凰、青龍白虎、玄武朱雀、靈禽聖獸、無量伎樂、六甲六丁、三五僚屬，防護宿衛，奉茲文矣。

萬福曰：其三皇文，即《洞神經》，亦曰《洞仙三皇》。受之，召制天地萬靈百精之神。道士佩之，化景飛空，出入自然，呼雲降雨，役使鬼神，所願立剋，益壽延年，生死獲慶，享福無窮矣。

### 傳授三洞經戒法錄略說

## 傳授三洞經戒法錄略說

### 三天正法除六天玉文

道曰：吾生眇莽之內，幽幽冥冥。幽冥之中，生乎空洞。空洞之內，生乎太無。太無變化，而三炁明焉。三炁混沌，生乎太虛，因虛而立洞，因洞而入無，因無而生有，有生而立空。空無之化，虛生自然，上炁曰始，中炁曰元，下炁曰玄。玄炁所生出乎空，元炁所生出乎洞，始炁所生出乎無，故一生二，二生三，三化生，以至九玄。從九反一，乃入道真。炁清成天，滓凝成地，中炁爲和，以成於人。三炁分判，萬化稟生，日月列照五宿，煥明上三天。生於三炁之精，處於無上之上，極乎無極，故無極也。履大運所不能改，經大劫所不能易，總真高虛，可謂高也，故號三天正法。九天之號，亦生於三，三炁生三，故號九天。其六天總民，應化順運，與日月推遷，陰陽否勃，天地炁反，小劫交周，萬帝易位，九炁

改度。當此之時，凶穢滅種，善民存焉。大劫交時，天翻地覆，海涌河決，而萬惡絕種，鬼魔滅迹，八荒四極，萬不遺一。自非勤心於存思，佩除六天之文，修行三天正法，不得免過，此庀奉迎聖君於上清宮也。除六天文，元始天王所出，始青飛玄之炁結成玉文，以告六天，運周度交，收炁檢神，還反土上。正一始生之天佩者，制靈使炁，威攝十方，出空入無，萬道開張，經大劫所不能毀，履洪波所不能沈，萬神稽首，五嶽司迎，侍童六百人、玉女六十人，營衛佩文者身。太上所寶，祕之六合紫房，萬劫一傳。太上受之於九天真王，元君受之於三天玉童，黃軒受之於太上元君，西王母受之於元始天王，四極受之於東海小童，紫陽真人受之於太上大夫，寧封受之於清天上皇君，唐堯受之於後聖帝君。自唐之後，得文乃七千人，皆得駕龍飛空也。《高上玉晨鳳臺曲素上經》云：玄都九曲，峻嶒鳳臺，結自然鳳氣，以成瓊房，處於九天之上、玉京之陽，虛生八會交真之

氣，十折九曲，洞達八方，上招扶搖之翮，傍通明於玄臺之上。字方一丈，文蔚煥爛，洞明九天，飛鳳雲蓋，紫氣鬱溟，遊麟之獸，交躑馳橫，六領獅子，備于下關，五帝玉仙，執五色命魔靈幡，以威御五方。右侍太華玉女，左衛金仙玉童，各三千人，侍真典香，日月俠映，七元迴靈，三晨齊景，玄光洞明，瓊林振條，玉籟激庭，七寶華光，流曜上清，即高上玉晨太上大道君所治，玄都丈人以鳳文真書、憂樂之曲，玄授於道君焉。如是上天萬真，及五嶽飛仙，悉皆以月五日、十五日、二十五日，一月三登鳳臺，晏禮旋香，誦詠憂樂之辭也。上慶神真，下悲兆民，其辭虛微，玉朗洞清，四真稽首，萬仙禮音，散香逸霄，流烟虛庭。凡上宮已成真人，及始學爲仙者，莫不備修九天鳳氣玄丘真書、誦憂樂之曲也。玄古皆萬劫一傳，今有其人，七百年中，聽得三傳，得有其文，飛行上清，登九曲鳳臺，朝謁玉真也。輕泄失明，七祖死責，慎則神仙。太上授太極真人，以傳東海方諸

青童大君，使傳道士，宿有金名、應爲神仙真人者，佩之得見三元君迎聖君於上清金闕。

萬福曰：夫化化者，不化。生生者，不生。不化則長存不滅，不生則永劫無傾。斯道神妙，修之可得而獲焉。凡一切有形，道之委炁，含精通神，識自生，動自行，明辯日月，智落天地，思過鬼神，妙合陰陽，莫不由道，而神理在焉。若乃延促齡於浩劫，擢朽神於億天，迴玄抱景，登真守元，萬劫未始，千椿童顏，周天地於瞬息，役風雷於胸端，愛養群品，師範衆真，布天慈於種智，作仁父於本元。自非元始之法王、太上之玄經，孰能易之哉？而愚者不知大道之化、元始之尊，不信神仙不死。迴顏駐年，亦猶朝菌，不知晦朔蟪蛄，不知春秋，吁可痛矣。且天迴星轉，地靜川流，四炁生成，五行交錯，風雲聚散，寒暑生殺，詎無主而宰之焉。蓋至道神化，分靈布炁，羅絡統御而主之也。雖諸天五億，世界三千，仙真聖尊，開方立域，說法教化，變見無窮，真

應法身，靈應難測。其統之者，皆元始矣。即人身足行手持，目視耳聽，口語鼻歆，心通意識，魄靜魂動，皮膚居外，筋骨持內，血脉榮衛，晝夜運動，豈無君而御之哉。斯固司命納生，桃君保精，白元營魄，無英制魂，二十四真和理百神，太一元父總統我身，虛靜則永世不傾，煩躁則倏忽夭齡矣。

夫人從虛無自然中來，受神抱識，湛然清淨。及稟形之後，則衆欲生而患累起，見世則三灾九厄、十苦八難，痛痒疼酸，生老病死，煩惱形神；死則魂入幽牢，受諸苦惱，晝夜考掠，魂神痛楚，動經萬劫，莫能自免。天尊大慈觀見衆生，愛念在心，乃分靈布化，降迹接凡，天上人間，遊行教化，分身百萬，散景億千，隨其機緣，廣說經教，欲使衆生離苦，永免輪迴。今天昔天，法門常一也。經云：思微定志者，令人安神念道，保其身也。思微者，念昔受生之初，神本清淨也。定志者，除諸妄想，絕思惟也。人所以生者，神在形也。所以死者，炁離身也。子欲長生，

定其心也。身有百神，心爲之主，故《老君內觀經》云：心者，禁也，一身之主，禁制形神，使不邪也。心則神也，變化不測，無定形也。魂在肝，魄在肺，精在腎，志在脾，神在心，所以字殊，隨處名也。神明依泊，從所名也。其神也，非青非白，非赤非黃，非大非小，非短非長，非曲非直，非柔非剛，非厚非薄，非圓非方，變化莫測，混合陰陽，大包天地，細入毫芒，制之則正，放之則狂，清淨則生，濁躁則亡，明照八表，暗迷一方。但能虛寂，生道自常，永保無爲，其身則昌。世以無形，莫之能名，禍福吉凶，悉由之矣。又云：從道受分謂之命，自一稟形謂之性，所以任物謂之心，心有所憶謂之意，意之所謂之志，事無不知謂之智，智周萬物謂之慧，所以通生謂之道。道者，有而無形，無而有情，變化不測，通神群生，在人之身，則爲神明，所謂心也。所以教人修道，即修心也；教人修心，即修道也。道不可見，因生以明之也；生不可常，用道以守之也。若生亡則道

廢，道廢則生亡，生道合一，則長生不死，羽化神仙。人不能保者，以其不內觀於心故也。內觀不遺，生道常存。又云：道以心得，心以道明。心明則道降，道降則心通。神明之在身，猶火之在卮明，從火起火，自炷存炷，因油潤油，藉卮停四者，若廢明何生焉，亦如明緣神照，神託心存，心由形有，形以道全，一物不足，明何依焉。所以謂之神明者，眼見、耳聞、意知、身覺，分別物理微細，悉知由神以明，故曰神明。老君曰：所以言虛心者，遣其實也。無心者，除其有也。定心者，令不動也。安心者，使不危也。靜心者，令不亂也。正心者，使不邪也。清心者，令不濁也。淨心者，使不穢也。此皆已有，今使除也。心直者，不反覆也。心平者，無高低也。心明者，不暗昧也。心通者，不窒礙也。此皆本自然也。粗言數者，餘可思也。學道之夫，當熟觀之矣。

詳夫三洞經教，萬術千方，雖廣略不同，皆制人之心也。而心有明暗，智

有淺深，由形器有清濁，稟炁有薄厚耳。然是非好惡，喜怒趨捨，莫不悉從於心。未知是心，誰之所使，若也定由於心也，心何自取殂落哉。然則尋其本，莫得其源，察其流，靡窮其際。而究其終始，則卒歸其自然也，嘗試論之。夫道以一動生萬物，萬物由一以生一，在人身即老君魂也，亦謂之道識也。照生我神，即我魂也，亦謂之我識。既身由一生，神由道照，則心由於神明矣。由是言之，神見則心朗，神隱則心昏，神之隱見，由心之清濁也。假如油清則燈照，油濁則景微矣。

經云：心則神也，神則心也，心神不殊，是以心由神照，則經之燈喻是也，智者諦詳之焉。

### 明科信品格

凡人初入法門，先受諸戒，以防患止罪。次佩符籙，制斷妖精，保中神炁。次受五千文，詮明道德生化源起。次受三皇，漸登下乘，緣羸入妙。次受靈寶，進昇中乘，轉神入慧。次受洞真，鍊景歸無，還源反一，證於常道。

經云：知常容，容乃公，公乃王，王乃天，天乃道，道乃久，沒身不殆。此謂天地雖沒，而身常存，不危殆也。

凡道由心得，心以道通，誠至感神，神明降接，是以古人求心，末世求財，古人非心，不度末世，非財不仙。是故須財以對心，明心而財見。譬諸世人，欲求心佳偶、良寶珍物、心之所愛，豈計價直也。此暫時賞心悅目，尚竭所懷，況乎真道，得不貴耳。世人惜財不受經，不肯尊師重道，乃將神仙爲虛說，長壽爲自然，不亦慨哉。而聖人善勸方便，質求其心，或七寶告靈，或六誓傳道，良有以也，豈徒然哉。必使經道流通，人神合契，信行不忒，師弟無違矣。

### 七寶

黃金白銀一、珊瑚二、琥珀三、碑磬四、瑪瑙五、真珠六、碧玉七，一云瑠璃、蘇牙、白玉、真珠、碑磬、瑪瑙、琥珀。

義曰：道以一炁化生三炁，三炁化生九炁，九炁各生三炁，爲三十六

天，洞徹無礙，名曰道境，號天中之天。從是以下，二炁流降，分化五行，元和降精，凝魂生身，元父玄母，神散五靈，在人形中，謂之五藏，外通七竅，以照七元，含陰吐陽，養神育氣，爲我身之寶，謂之七寶，而腎藏偶故金銀共焉。元始五老，分位五方，三五流輝，結神五藏，所以將此七寶，上告明靈，質對我心，冀通神道矣。

### 金銀二十四兩

義曰：紫微二十四高真，分靈下降，生於人身，保神養炁，變化自然，出有入無，調理百關，炁血流轉。由二十四高真，所以常存，故言鎮二十四生炁也。

### 上金九兩

義曰：人之受生，九天炁降，迴黃轉白，守一抱元，晝夜變化，以成我身也。及九月神具，司命告靈，萬神侍衛，而得生焉。故上誓九天，質其生元也。

### 金環十口

義曰：天迴地轉，陰陽生成，日東



月西，晝夜分位，周天三百六十五度，四分度之，一陰缺陽舒，天之常道，一歲十二月，四時生化，炁周十天。故質告十方，通誠十極，則神道聞於遠近，真靈降於身形也。

### 金龍三枚、金紐二十七口

義曰：龍者，鱗蟲之長，稟少陽之炁，含歲星之精，木之靈獸，變化自在。故東方七宿，象爲青龍，炁轉五方，或遍九方，隨處言之，則有五龍、六龍、九龍之號。而得道者馭之，如世之乘馬。所以世事云：龍以馭天，馬以行地是也。今所以用龍者，傳言驛奏，聞諸天曹地司，狀學道者之功過也。紐以馭龍，猶馬之銜勒也。

### 金龍玉璧簡文

義曰：人受命長短善惡，富貴貧賤，愚智窮通，吉凶禍福，乃至草木蟲魚，風雲電霰，莫不由之於天。天有北極天尊主之，而天高聽卑，察人善惡，司其得失。若能至誠，則感之於天。是以善惡發乎心，吉凶應乎天矣。聖人慈悲廣救，方便接引，令改惡從善，

祈於上玄，立詞致款，書於簡牘，訴之於天，身中吏兵，善惡童子，及四司五帝、土地真官，關白太上三曹，告下諸天諸地，日月官府，百二十曹，二萬四千靈司令某乙，紀善輟惡，續短延長，則周公金滕，仲尼元辰，子韋移星，魯陽迴日等，是其事也。故簡者，求事之詞璧，乃質誠之信龍，即傳奏之驛，猶諸方奏貢，列詞狀物，馳於闕庭耳。

### 金環玉環

義曰：環者，圓而能通，空而不滯，金剛能斷，柔而不撓，玉潔匪渝，光而有潤。欲使行人決斷世網，從順經道，與代和光，處凡無染，外則不滯於境，內則常虛其心，睹物緣情，攀懷自息，亦樞始得。其環中前心、後心，如之不絕故也。

### 斷環

義曰：斷世恩愛，共契師資，生死永捐，經法相繼，亦是師資同心，其利斷金。又金爲義，義能斷割，除惡就善，內絕疑網，外捐嗜欲，則妄想煩惱，永消除也。

素絲五十尺，若百尺，五兩、十兩。

義曰：素絲，天然質素，柔潔明淨，隨物宛約，順世光塵，貫穿珠玉，織成錦綺，或聖人所服，或凡夫所衣，天上人間，共相寶貴。欲使行人身心清淨，內外柔和，除其剛強，不染穢濁，則人天愛護，仙聖降臨，微妙難思，寶貴斯極，五應五炁，五德五方，百應百神，百關百結，尺有分寸，須識短長，兩與物齊，自明輕重也。

### 青絲

義曰：青者，天之色，冀繫炁於天。又東方之色，庶發生於善，欲使行人當如天行道，慈育蒼生，似春之德，滋榮一切也。

### 斷髮敵血

義曰：割身自信，誓於明神也。

### 絳巾、碧巾

義曰：絳丹色，以代敵血。碧青色，用代落髮。真人不欲傷人，大慈之化也。

### 五香

沈香一、薰陸二、白檀三、青木四、

丁香五、龍腦七、砂三、雄四。

義曰：撤五薰之炁，降五方之靈也。

### 方綵

義曰：五帝主人善惡籍錄，以色幣質之。經云：用脆，五方元老之官也。天子用匹，公王以丈，庶人以尺，各依方數也。

### 命繒

義曰：人受生，天與四萬三千二百算爲一百二十年，而不滿此者，皆犯天地、日月、星辰，違盟負約，背道叛師，不從經戒，爲三官奪減算命所致也。故以紋繒跪對天官，乞延算命，名命繒也。唯天子用紫紋或羅一百二十匹，皇后太子比之。餘依年加匹、丈、尺，王公貴人用匹，富者用丈，貧賤以尺。

### 命米

義曰：食者，人之天，人不食而死。米者，人之所食，切已難忘。命祿少多，係於天府天祿。若盡壽命便終，故用益天倉，冀延短壽。所以正一經

云：算盡爲延，祿盡爲益是也。

### 金羊

義曰：羊能跪乳，謂之禮獸，欲使行人孝於師父，慈於一切也。

### 玉鴈

義曰：鴈，陽鳥也。秋南而春北，順陰陽以往來。又有行伍，知其次序，欲使行人隨順法教，令威儀有度，知其階位，不違品次也。

### 金魚、玉魚

義曰：魚爲陰蟲水官之使，傳驛文牒，詣河侯之所。又斷北帝之長簿，奏水官之符狀。玉取潔白，入水不渝。金取堅剛，得水柔潤，亦取其檢口不言，陰潛自處也。

### 五色錦

義曰：錦者，禁也。五色繪而成文，欲使人處五欲而成道，先須伏從科戒，以禁於心也。

### 青羅、紫羅

義曰：繒輩之微細輕妙，唯羅之最美也。青紫，天之色，重經貴道士，以此精物跪有經之師，充法服之

用，冀體妙入微，同天合道也。

### 青布

義曰：青，清也，亦春之色。布遍也，使行人清心淨行，遍行諸法，慈愛萬物，仁若春陽也。又云：仙人食金玉，衣青素，故以金玉青素爲盟，亦一方之談，未爲絕論也。

### 紙、筆、墨

義曰：天曹雖遠，神與世通，列狀言情，事資文墨，故以此具，跪對天曹，庶文字上聞，言詞可記也。

### 券契

義曰：受道之日，關奏天曹地府、四司五帝、一切神仙，以爲監證，所以召七祖以監臨，對五帝而結券。若後違盟犯約，背道輕師，則勘契合券，以自證驗。亦猶世之交易，各執券契，以相信也，亦曰昇天券。得道之日，過天門地戶，魔王主司，以相按驗，乃至神仙洞府，諸天曹局，悉皆勘會，如世之公驗也。券即正一真券、五色券、八道券、三五券、洞神券、昇玄券、自然券、上清七券等例是也。契即正一黃契、

三五契、三十六部尊經契、上清四契等例是也。

### 盟

義曰：盟，明也。彼此未信，對神以相明也。神者無形，宵冥不測，莫睹其端。若違盟約，必致殃考，是其驗耳。依盟崇約，福亦無忒。但以凡心易動，神理難明，故須立約以契之，必令通神合道也。盟即靈寶初、中、大等是也。

### 誓

義曰：誓，制也。以言契心，告神盟也。而自制其情，欲不使放逸，期於會道耳。夫上士聞道，勤能行之，不須盟誓，以自契也；中士已下，引之則進，排之則退，故須盟誓，制止其心，令不改也。蓋聖人大慈之教，勸於合道，既授之以法，又使從科戒，必令不犯，克得道也。所以末代傳道，皆須共立盟誓也。誓即六誓、十二誓等是也。夫神道無形，天理遼曠，幽昧不測，言議莫知，若能精至，便即通感，所以令其脆信用質於心也。心信則輕財，財

輕乃貴道，賤財則神明降接，脆命可延，命久年長，神仙可得。未有神仙，不能體變入化，與道長存也。世人不悟，遂妄生非毀，外不行功立德，內不洗垢清神，而貪穢滿心，愛憎恣意，徒言入定，躁甚羈猿，唐說淨心，臭踰溷豕，但見坐禪者，毒心彌盛，穢迹逾彰，虛語內修，竟無中實，至於飢寒痛痒，病惱煩怨，不異常人，矯云同俗，吁可悲也。愚人聞余此言，謂之誹謗，吾豈欲銜於言詞而自陷也，直欲使人釋迷從悟耳。智者幸熟思之，勿役妄也。其所用法信事畢，並依經散之也。伏尋經中信物，或云出自神州，非世間所有，今請以某物準當者，將欲引接於貧賤，使同入道也。若富有之家，幸得力辦，未宜準當之。且金錢七寶，天子、儲君、皇后、妃主、公王能有，豈凡賤得辦也。其金龍玉龍、金魚玉魚、金羊玉鴈、羅錦之流，又非寒栖所得，皆聽以雜物準當。若要令依法，則經道永闕，難於引接耳。又經中法物，自屬明靈，須依色目，力營取辦。若信物自是弟

子施師，多少無限，或名衣上服、牀帳卧具、茵席几杖、玩弄器物、餅罐履屨、車馬奴僕、莊園屋宅、金銀珠玉、綾羅錦綺、錢絹布帛、釵梳環釧、米麥花果、供養法具、繩牀坐褥、緣身所有，施道及師，立觀度人，寫經造像，放贖生命，拯濟飢寒，免賤為良，弛囚宥罪，廣行慈救，大設悲田，發無上心，大弘勝業，為家為國，濟物及身，遍為三塗，眾生苦惱，各隨心力，屬在一時，任其所懷，亦無定格。若貧賤之人，供師使役，不憚苦辛，遠近陪隨，給侍香火，修營觀宇，植種果林，墾闢田園，栽蒔花藥，捨身落髮，剋己自勞，毫分之間，無所吝惜，晝夜不懈，供事師尊，如此勤勞，至乎得道也。竊見金仙、玉真二公主，以景雲二年，歲次辛亥春正月十八日甲子，於大內歸真觀中，詣三洞大法師金紫光祿大夫、鴻臚卿、河內郡開國公，上柱國太清觀主史尊師，受道破靈寶自然券，受中盟八帙經四十七卷、真文二籙、佩符策杖。乃埵土為壇三級，高一丈二尺，金蓮華纂，紫金題榜，青絲

周遶壇內。東方青錦，南方丹錦，西方白錦，北方紫錦，中央黃錦爲褥。復有龍鬚鳳翮等席，藉地五方案，各依方色，制錦虬金龍玉璧鎮之。又青羅十八匹，緋羅六匹，白羅十四匹，皂羅十匹，黃羅二十四匹，以安五方。紫羅二百四十匹，絹四百八十匹，錢二百四十貫，黃金二百兩，五色雲錦二十五匹，香一百二十斤，七寶周足，青絲五百兩，奏紙二萬四千番，筆墨各二百四十八管挺，書刀十二口，護戒刀巾各三十八具，金龍六枚，金鈕五十四枚，俱用鎮於壇中，以質靈官也。復有盤龍香鑪，舞鳳香鑪，瑞葉香鑪，祥花香鑪，蓮花香鑪，芝草香鑪，並香合香奩，並純金純銀製造。復有對鶴雙鸞，飛龍宛鳳，錦帕敷案。復有金剛神王，仙童神女，烟雲山水，草樹蟲魚，聖獸靈禽，瓌奇珍物，繡韞覆經。復有彫玉之案，鏤金之案，紫檀之案，白檀之案，沈香之案，皆作翔鸞舞鶴，金花玉葉，裝飾彫鏤。復有七寶函，九仙函，黃金函，白玉函，以盛於經。復有青錦之囊，絳錦之囊，

素錦之囊，紫錦之囊，黃錦之囊，雲錦之囊，五色繡囊，以盛法錄。復有厨盃筭藏，皆珠玉裝飾，巧妙華麗，非世所有，眼未曾睹，價直億千也。又有真人幡，玉童玉女幡，金剛神王幡，蓮花鏤幡，芝草鏤幡，盤龍鏤幡，舞鳳鏤幡，翔鸞鏤幡，飛鶴鏤幡，或霏雲耀日，隱景含煙，轉字開花，連金綴玉，或山水畫象，鳥獸奇形，瑞草祥花，披雲漏日，懸壇之四面。復有金蓮花樹，銀蓮花樹，七寶花樹，五色花樹，千株萬株，列壇上下，及觀院內，光明洞徹。復有五色花燭，金盤龍燭，銀翔鸞燭，千葉蓮燭，九色雲燭，同心之燈，分華之燈，連珠之燭，貫花之燈，轉輪神燈，飛臺靈燈，紫焰蘭燈，青光芝燈，霄華百枝燈，月照千葉燈，五星燈，七曜燈，一十八宿燈，三十六天燈，韜光燈，滅煙燈，照耀內外。二七日夜，行道禮誦，始啓齋，則瑞雪飄花，將露真文，乃卿雲浮蓋。其夜四更，老君降壇，與公主語。傳法之日，瑞雲五色，香煙八引。傳法既畢，二公主各捨牀卧几褥，音樂器具，

及在俗衣服，各五百副，絹一萬匹，羅錦錢綵，並供養法具等，價逾萬貫。鎮壇法物，仍不在其數。又以先天元年壬子歲冬十月二十八日甲子，復受五法，上清經法，具依科格，別院建壇，法天象地，內圓外方，裝嚴妙麗，乃至法物、信物、鎮綵、命繒等物，皆勝於前百千萬倍。其經法，並金書寶軸、繡帙錦表，悉珠玉連綴，代未曾有，不可名目。

萬福自惟凡鄙，戒行無取，謬奉恩旨，濫預臨壇大德、證法三師，既睹茲法會，實懷悚作緣，公主受道，並別有記。今羸書之，冀萬代之後，知道法之尊重也。大唐先天元年，歲次壬子十二月丙申十二日丁未，太清觀道士張萬福謹記。

傳授三洞經戒法錄略說

(吳亞魁點校)

# 013 洞玄靈寶道士受三洞經誠法錄擇日曆

京三洞弟子清都  
觀道士張萬福撰

經名：洞玄靈寶道士受三洞經誠法錄擇日曆。原題張萬福撰一卷。底本出處：《正統道藏》正一部。

伏尋三洞經教，四輔法文，元始所說，道君傳授，而衆聖修行，群真禮誦，祕之三境，流布十方。代歷塵沙，年踰浩劫，方乎日月，論之水火，凡聖共觀，人天等用，法雖無量，軌範不殊。世雖有革，威儀恒一，至如出家入道，須有受持，大德法師，宜相指授。弟子既來丹倒，師主當備科儀。理須敬奉經文，遵承典格，必使三盟，可則六證匪虧。學道有師，持經不犯，而辭誓已納，齋

奏在期，各從所請，預宜擇日，期之經法，難以改移，須自分明，詎容混漫。頃諸師者，先用甲子爲良，或以正一受道曆，通傳三洞，且如甲子，道德三皇用之。受道之曆，治錄符圖等事，至於上清、靈寶，自有吉辰，豈得雷同，莫分涇渭。而吳蜀二境，京洛兩都，遞相承用，因循靡革。萬福仰惟積善，慶及庸微，既厠道流，又參真祕，自升淨域，向五十許年，從師結誓，亦四十餘載，敢窺瓊檢，竊誦金章，香燈之暇，輒此撰錄，祇望示之門人，未敢聞之于外。先修三洞衆戒，已具二十一卷中，恐披卷軸繁多，罕能存錄，今指行此一卷，庶弟子誌之。

## 正一仙靈符錄等

甲子和合，乙丑上剋下，丙寅、丁卯和合，戊辰自刑、己巳和合，庚午下剋上，辛未和合，壬申、癸酉和合，甲戌上剋下，乙亥和合，丙子下剋上，丁丑相生，戊寅下剋上，己卯下剋上，庚辰相生、自刑，辛巳下剋上，壬午上剋下，癸未下剋上，甲申、乙酉下剋上，丙戌

上生下、和合，丁亥下剋上，戊子上剋下，己丑專和合、吉，庚寅上剋下，辛卯上剋下，壬辰下剋上，癸巳上剋下，甲午上生下，乙未上剋下，丙申、丁酉上剋下、凶，戊戌專吉，是天門不入靖己亥上剋下、自刑，庚子和合，辛丑下生上、和合，壬寅、癸卯上生下、和合，甲辰上剋下、自刑，乙己上生下、吉，丙午專火自刑，丁未上生下、吉，戊申、己酉上生下、自刑，庚戌下生上、吉，辛亥上生下、自刑，壬子專水、吉，癸丑下剋上，甲寅、乙卯專木、吉，丙辰自刑，丁巳專火、吉，戊午下生上、自刑，己未專土、吉，庚申專金、吉，辛酉專金、自刑，壬戌下剋上，癸亥專水、自刑。

凡受道合和，上下相生，大吉，專小吉；自刑，上下相剋，凶，不可度法錄經戒。

## 陽平鹿堂等二十四治，及遊散宿治

正月、二月子日，五十倍；丑日，二十倍。寅日殺子，卯日殺婦，辰日大吉，巳日自如，午日九倍，未日殺身，申日殺婦，酉日小吉，戌日七十倍，亥日

五十倍。

三月、四月子日五十倍，丑日殺母，寅日大通，卯日小吉，辰日小凶，巳日十倍，午日師自殃，未日三十倍，申日三十倍，酉日五十倍，戌日二十倍，亥日二十倍。

五月、六月子日殺母，丑日害母，寅日大凶，卯日殺父，辰日殺母，巳日小凶，午日殺子，未日殺子，申日殺母，酉日五十倍，戌日二十倍，亥日不吉。

七月、八月子日大通，丑日大凶，寅日小凶，卯日殺父，辰日殺母，巳日二十倍，午日殺母，未日五十倍，申日殺子，酉日殺母，戌日二十倍，亥日五十倍。

九月、十月子日自如，丑日自如，寅日小凶，卯日二十倍，辰日五倍，巳日六十倍，午日大凶，未日三十倍，申日二十倍，酉日二十倍，戌日殺子，亥日殺婦。

十一月、十二月子日殺子，丑日殺婦，寅日小凶，卯日五十倍，辰日五十倍，巳日殺婦，午日殺父，未日七十倍，

申日三十倍，酉日三十倍，戌日大凶，亥日殺婦。

凡十二件，度道吉凶日，明尋之，勿犯二條，出《正一法文度錄度治儀》。

**老君金鈕，及經目並經等**

右凡受道營齋，用王相、本命、甲子、朔望日皆佳，出太玄部《老君傳儀注訣》。

**神呪、符契、圖經等**

右用正月上甲，及每月一日、十五日、卯酉時良，出《神呪經》。

**洞神三皇符圖經等**

右齋之辰及傳授，皆擇王相、本命、甲子、甲申、甲寅，此為三元最吉，出《洞神經》十四卷。

**洞玄靈寶自然券中盟經真文二**

**錄、靈策神杖等**

右春用甲寅、乙卯，夏用丁巳、丙午，四季用戊辰、戊戌、己未、己丑，秋用庚申、辛酉，冬用癸亥、壬子。建王之日，登壇也。

**五法**

右受六甲符，當以甲子日，夜於庭

壇，風雨入室。禁山云：以夜半設祭，不言其日，五嶽用月上，建夜半。三皇云：夜半於庭壇敷席，不言日。五符云：吉日清淨夜半時，於庭壇敷席，出《陶公傳儀》。今以六甲附老經禁山三皇，同洞神法。五嶽五符，依靈寶法也。

**河圖寶錄**

右以元正之夜，行之最吉。諸月三日、二十七日，此是尊皇降見之日。及甲子、甲午、庚申、本命、太歲、八節日，皆大吉，出九皇醮儀、上清七券經目，及經三錄諸法、太素玄都紫絞交帶等。

正月九日、十日，二月八日、九日，三月七日、八日，四月六日、七日，五月五日、六日，六月四日、五日，七月三日、四日，八月二日、三日，九月一日、二日，十月十日、十一日，十一月十一日、十二日，十二月十二日、十三日。

已上謂之天關九開之日，亦曰朝天素日。陶云：今歲某子直辰，天關九開，每月止一日。臧宗道云：傳三

洞經法，用天關九開日，出《上清經》及《真誥》中。

凡厥受道，皆有三盟，初中微心以誠信。又須六證，監視威儀，正其虧闕，既人有利鈍，致法有尊卑，而漸頓宜殊，勤怠須隔，自微至著，以近涉深。聖人垂旨，接引如流。即初請法，各有階差，依其次第，不可乖越。但以世中道士，衣食累身，且救目前，未思死後，少能向道已。是勇猛難勝，若不携提，便恐歸依路絕。所以一壇之內，數法不同，三盟之中，參受各異。若人人別受，法法殊壇，非唯師與弟子弊其形勞，抑亦仙官煩於召請，欲使古今取則。凡聖合宜，事以道通，法因人制，庶上則諧於聖旨，下則得於凡心，即天尊善權，至道含育，其爲博也。如抱愚不變，執滯匪移，實恐拯接路迷，信向情斷。其有假道賣法，求利取人，罔冒賢良，欺謾愚駭，而高張聲譽，遠俟招呼，妄設執模，空爲法則者，置之言外，吾所不論也。竊見男女同壇，或師弟不相對齋，或師弟各自遊行，或結齋之

後，始來告赴，或不投辭誓，或抱素盡空，或師借經法，及假人經法，或師爲出法信，或數師同壇，或不書表刺，不分契券，或法次交互，不期良日，或虛注保證，及廣書名德，如此之流，情所不忍。復有無經法，恃其豪富勢力，及名望高遠，耻人不歸，強相招引，爲他傳授。亦有曾受一法、兩法，或道德十戒，乃唱言自云：凡諸道法，我並師受。或薄解符章禁祝小技，出入天庭。或富貴人驅使，或百姓信向，豐衣足食，少有僮僕，使人傳唱，招致弟子，爲傳經法。或恃以年高德重，俄然戴冠，爲人師範。此之流例，舉目皆是，豈思冥咎罪殃，及乎己身。分甘冥苦，其奈七祖、九玄、所生父母，何世有殺父弑君、反天違地、自取夷滅者，亦同怪乎哉。既一壇之內，參受不同，宜就尊法，告齋立限，取其良日，其中小法，齋內傳授。昔嘗遊江淮吳蜀，而師資付度，甚自輕率，至於齋靜，殊不盡心，唯專醮祭，夜中施設。近來此風少行京洛，良由供奉道士，多此中人，持茲鄙

俗，施於帝里。又云：靖，忌道父母，忌不入靖燒香。愚人景慕，用爲奇訣。其道父母，靖忌上禁祭酒、奏章設醮，元不及三洞上法，至如戊辰、己巳、戊戌、己亥，隨日流行。而十齋八節、五通太素朝第山等，天之定日，求仙要領。若與之會，得不朝真者乎。此蓋濟世小道，非修身法，汝之弟子，宜識之焉。其或十齋八節，既是衆聖按行，條記功過，亦曰良辰。雖經不指言例之，爲善傳道，所用必諧聖旨。復有上帝殺伐日云：不可舉百事，此祇合藥營建，諸所禁防。至於受道，固應無礙，而始學初門，幸能避之佳也。三洞上法久悟，法人自不拘也。按金明道科，但法具周辦，即登齋告盟，未使擇日，賢者詳之。

洞玄靈寶道士受三洞經誡法錄擇日曆

（吳亞魁點校）

# 014 洞玄靈寶三師名諱 形狀居觀方所文

三洞弟子京太清觀  
道士張萬福編錄

經名：洞玄靈寶三師名諱形狀  
居觀方所文。原題張萬福編錄。  
一卷。底本出處：《正統道藏》  
洞玄部譜錄類。

萬福曰：經云，非師不度，非師不仙。又云，先存三師，然後行道。凡厥讀經講誦，行道燒香，入室登壇，皆先禮師存念，次當起願開度九祖及以己身。此法不遵，真靈靡降。禮師則須知方所，存念則審識形容。受道之辰，師當指授，故自正一以上，至乎洞真，參受三師名諱形狀、住觀方所，並具儀于左云爾。

## 正一師諱

國號某年太歲某某月、某朔某日、某州縣鄉里，男女官某甲、年若干某，於某州郡鄉里觀宇，受正一盟威某籙。三師姓諱如左：

度師，某州郡鄉里觀，男女官治炁，姓名，年若干歲，形狀。

籍師，某州郡鄉里觀，男女官治炁，姓名，年若干歲，形狀。

經師，某州郡鄉里觀，男女官治炁，姓名，年若干歲，形狀。

保舉法師，某治炁男女官某甲保舉。五人例前

## 五千文師諱

某國某號、某年太歲某某月、某朔某日、某州郡縣鄉里，男女弟子姓名，年若干，字某，於某州郡縣、某山觀宅舍，受道德五千文、三品要戒。三師姓諱如左：

度師，某州郡縣鄉里，男女官道士先生，姓某，諱某，年若干歲，字某。

籍師，某州郡縣鄉里，男女官道士先生，姓某，諱某，年若干歲，字某。

經師，某州郡縣鄉里，男女官道士先生，姓某，諱某，年若干歲，字某。

一、三師三人。謂之法師

二、五保五人。謂之都講

三、六明六人。謂之監濟

四、七證七人。謂之侍經

五、八度八人。謂之侍香

六、九成九人。謂之侍燈

右六品三十八人，皆是師之同學、高德、親知，或神足弟子、俊彥英才，同為署辭，更相獎勸，敬之如師，號曰尊人。奉獻巾刀，以期拂拭塵垢，斷割纏縛，解釋煩惱之羅，破除障滯之網，義存解脫，逍遙淨明，淺識末學勿叨。此次單記名於三師諱下。

## 神祝師諱

國號年歲月日，某州縣鄉里，男女某甲，年若干，今於某郡縣，受洞淵神呪契籙經戒。三師名諱如左：

度師，某州觀，某洞法師，姓諱，年歲，形狀。籍師、經師例。

## 洞神師諱

國號年歲月日，州縣觀，洞神弟子



某甲，今於某所，受洞神經戒、諱錄券契、三皇大字。三師名諱如左：

度師，某州觀，某洞法師，姓諱，年歲，形狀。下二師例

臨壇證明三師名諱，其如上例。

### 昇玄師諱

國號年歲月日，州縣觀，昇玄弟子某甲，今於某處，受昇玄七十二字大券、太一百二十九戒，兼經契。三師名諱如左：

度師、籍師、經師例前。

### 洞玄師諱

國號年歲月日，州縣觀，洞玄弟子某甲，年若干，於某州縣靈山靖室，受靈寶自然契券、閉塞六情上品戒、中盟經智慧上品大戒、大盟三元百八十戒、真文二籙。三師名諱如左：

度、籍、經三師，具如前例。

臨壇證明三師名諱，具如上例。

### 上清師諱

國號年歲月日，大洞三景弟子、某嶽某帝真人某甲，年若干歲，今於某所靈峰幽谷，奉受上清七券四契、觀身大

戒、寶經符籙、太上神文。三師名諱如左：

經師，某州縣觀，大洞法師，姓某，諱某，年若干歲，形狀。籍、度師例。

臨壇證明三洞法師，某嶽某帝真人某甲，年若干歲。下二例。

右墨書黃素，師爇香授之。弟子每受一師諱，三再禮。若師有譜，兼別如經寫授之。諳鍊已，與法同緘。其六明、五保、三證，雖非存念之限，是我成就之因，亦宜存憶，爲入真之階，故編記耳。

洞玄靈寶三師名諱形狀居觀方所文

(吳亞魁點校)

# 015 醮三洞真文五法正 一盟威籙立成儀

三洞弟子張萬福撰

經名：醮三洞真文五法正一盟威籙立成儀。原題張萬福撰。一卷。底本出處：《正統道藏》正一部。

凡醮者，所以薦誠於天地，祈福於冥靈。若不精專，則不足以通感，盡誠而福不應者，未之有也，誠不極而望臻者，亦未聞矣。修佩之者，宜竭誠焉。凡設座，得山洞穴是佳，不然，即幽閑虛寂，亦可施置其器物座具。時果芳饌，必在豐新。山洞間無席，即藉草以木葉。若淨爲巾，預慎內外，不得犬鼠畜產，離穢葷肥，登臨犯觸，及呵叱大小。盛饌一如齋法，世人心昧，不睹精微，即云酒脯，但生不信。且道法清

虛，特忌穢穢。星辰嶽瀆，皆是真仙主之。不究根尋源，直信邪說，若斯之類，吁可痛哉。知上士之所勤，下愚之大笑也。

設壇座位第一

潔壇解穢第二

入戶呪第三

發爐第四

出靈官第五

請官啓事第六

送神真第七

勅小吏神第八

內官第九

復爐第十

送神頌第十一

出戶呪第十二

醮後諸忌第十三

設壇座位第一

夫神道非形，至誠斯感；真靈無象，啓必有方。修之者，須立壇位，以祈福應也。其壇，請依靈寶招真法，開東、西、南、北、王上五門，方二丈四尺，欄纂如法。何者？三洞經法，洞玄居

中，故用其事，以通上下也。立壇訖，置上清位於壇中，稍近前，南向施青絳紋巾，以法籙開安座上，前設五尺盤三枚。一盤九分，一盤六分，三盞燈，一盤一分，都合十六分十六杯，三爐香。

次北近西六甲位，南向敷絳巾，以符開安座，前設六盤，每盤一分，一爐香，六杯，燈一。

次東頭三皇位，南向敷碧巾，以符開安座上，從東天皇，次地皇，次人皇，前設三盤。盤一分，三香，三杯，三燈。

次東面北頭，五嶽真形圖，西向敷絳巾，以圖符安座上，前三盤。近北一盤，五分，五嶽君位近南，一盤二分；佐命君位次南向，二盤，各一分；青城廬山使者位，三盤，九分。九杯，四燈，四爐香也。


次南五符位，西向敷巾，以符安座上，前三盤。一盤一分，稍前，或別席敷皂巾。人鳥山位一盤，一杯，一香，一燈。次後二盤，真文五符八景內音位，各五分，合十分，十杯，一香，一燈。次南設盟威位，東向敷絳巾，符安

座上，前設三盤。盤八分，合二十四分，二十四杯，或十二杯，或八，或三，各有法象，一香，一爐。

次北設東西二禁位，東向敷青巾，以符安座上，前設三盤。近北一盤一分，西嶽君位；次近南，中黃太一位，一盤一分；次近西，四神君位，一盤四分。都三盤，合十六分，或六盤，三分，二香，一燈。

若修七星，即於壇中上清後、六甲前，南向敷紫巾，設七盤。盤一分，七杯，一香，一燈，此位縱不修，亦宜設位。夫醮法，以斯為首也。

河圖，附上清，亦可於上清後、三皇前，敷青巾，南向設一盤九分，一香，九杯，一燈。醮餘鎮信鹽、豉、米等，於上清前，小近東一席置之。項見師，作如是設位，非敢自專其所，須香燈、鎮信，並須如法。或能每座設案，更以淨巾，以錄於案上更佳。各設版壇，四面並須絳繩欄之。不然，即灰，或麥麩圍之。欲使真靈有位想念，可以淨幕遮圍，不使香燈散亂尤佳也。



### 潔壇解穢第二

夫所以潔壇者，蕩滌故炁，芳澤真靈，使內外清通，人神俱感。凡啓醮，悉皆如之，非直此也。向王書解穢符於紙上，其水桃皮、竹葉、沉香、雞舌、香柏葉等，剉絹袋沉湯中煮之，以灑壇及器物中，並沐浴。或以清泉新水，亦得用也。依前章鋪訖，具法服，以劍水於地戶上，先劍後水，相去各三步，啓奏作三才步。步畢，握固瞑目，存經、

籍、度師在西面，存唐將軍兵馬佩劍執印在左，葛將軍兵馬執戟佩劍在右，周將軍兵馬執節在前，真人著朱衣，乘九鳳，步斗臨壇收穢。七星覆己，頭上柄指前，不得遮己目。畢，開目誦四靈呪。呪曰：

東方青龍，角亢之精云云，並依常。畢，以手撫心，丁字立，呪曰：吾召百神既集，即當遊云云，次三才步。

次勅水江河淮海，非凡水云云，乃噴水一下，唱攝三下。

次稱名位訖，謹請東方青龍，降以真氣入臣身中云云。

次作三才步、九跡或既濟卦。次請五童君云云，其他並常也。次作七星剛步，放水碗訖。

### 入戶祝第三

四上功曹、龍虎使者、正一生炁、侍靜素女，夜有所啓，請得開明童子、上玄少女，與我俱入黃宮之裏，通達所啓，皆使上聞。畢便入，繞壇一周，啓事人西北設位而立。餘衆宮男設位向

東，先上諸座香，次上啓告香也。

次唱，各禮師存念如法。

次存三師如常。

### 發爐第四

鳴法鼓三十六通。

無上三天玄元始三炁太上老君，召出臣某身中三五功曹、左右官使者、左右捧香、驛龍騎吏、侍香金童、散花玉女、五帝直符、直日香官，各三十六人出關，啓州縣土地里域真官正神，臣某今正爾燒香設醮，願得十方正真生炁降流臣等身中，令所啓，速達徑御三清玉帝至真几前。

次上奏按香，衆官再拜。

### 出靈官第五

長跪，叩齒二十四通。

謹出臣某身中五體真官、上仙上靈、直使功曹、正一功曹、左右官使者、陰陽神決吏、科車赤符吏、剛風騎置驛馬、上章吏官，各二人；出臣某身中虛無自然左右侍郎、混沌玉帝太真、左右領仙玉郎、九玄上虛功曹、三元功曹，各二十四人；出上清玉虛使者、神仙

使者、太山使者、金晨玉童、太華玉女、左右靈飛、玉虛侍郎，各二十四人；出五帝、元皇、太真，各九千人；出檢天輔仙騎、輔真騎、輔神騎、輔帝騎、輔靈騎，各九億萬衆；出五帝飛輪策空騎、五帝飛仙騰空騎，各九億萬衆；出九天飛瓊羽蓋騎、飛轅綠駢騎、制地龍騰騎，各九億萬衆；出自然招真生芝玉仙吏、招神生芝玉仙吏、神丹生芝玉仙吏，各九億萬衆；出金真輝電騎、陽精興雲降雨騎、陰精興雲降雨騎、陽明照曜逐電騎、雲門執節金光騎，各九億萬衆；出臣某身中靈寶洞玄三部八景諸天内音神仙、繡衣玉女、五帝直符、傳言奏事、日月星宿、五帝官屬、神龍騎、飛龍騎、驛龍騎、雲龍騎乘等，一合嚴裝冠帶，整其威儀，對立臣某前，告勅上下八方、天官、地官、水官、五嶽四瀆、九江八極、名山大澤、五帝真官、四司監察、九部考召、玄元四始、甲子諸官君，無極無窮、無高無下、無幽無明、無深無淺、無鞅數衆真官，注氣乾皇、九宮八卦、六甲直符、虛無直事、五嶽飛

仙、神龍羽騎等，並爲關啓。

奏聞臣某，去某年、某月、某日，詣上清大洞法師某君門下，奉受仙靈畢法、上清仙籙、靈寶真文、八景五法、六甲祕符、西嶽名山、五嶽真仙圖籙、三皇五帝神符、九天鳳炁正法真籙、金神虎符、豁落七元靈飛、六甲紫文交帶，迴車畢道，佩服身形，存修供養，吉辰於某觀靈壇之上，旋設薄醮，陳情獻歎，以契真靈三界官屬，與臣某身中五體三萬六千神吏，分形合影，營護壇所，滅滅妖氛，咸令肅穆，無使參差，聽臣某關奏啓請，必蒙降赴。

### 請官啓事第六

從此已後，並須平聲低言讀之，每至再拜，皆住良久，不得高厲也。

上清玄都大洞三景弟子、某嶽先生、某帝小兆真人臣某，再拜請官。

謹奉請上皇二十四高真、玉清紫虛高上元皇道君等，各神仙、玉童、玉女，一合乘雲馭炁，應景分靈，垂光降臨醮席。再拜。

謹奉請三天正法三元大君、太微

靈都元皇真君、神仙丈人、玉童玉女、六十三部靈官真人，一合分靈應景，馭炁乘雲，騰空遍下，垂光降臨醮席。再拜。

謹奉請太清高仙、景雲真人、太上丈人、上皇君、九華太帝、玄黃玉女，一合流精散氣，逐感隨機，駕景通神，乘光降席。再拜。

謹奉請瓊宮左右靈飛、真童玉女神仙等衆，垂光降席。再拜。

謹奉請河圖太尉、玉帝府九晨君、真皇夫人、諸靈官使者、玉童玉女等，一合馭景分暉，垂光降席。再拜。

謹奉請太平下教二十四高真人，一合留神應感，布大慈悲，念彼有心，同塵接世，分暉列照，垂光降席。再拜。

謹奉請北斗七星真君、輔弼真宰、仙靈騎從，一合馭景分暉，垂光降席。再拜。

謹奉請六甲所領六旬真神、六丁玉女、符吏從官、直日直符、十二守土，並臨降醮席。再拜。

謹奉請西嶽君，及飛天丈人、太一中黃、玄上玉童、虎王李君、猛獸先生，一合來下，降臨醮席。再拜。

謹奉請五嶽君、佐命潛霍儲君、青城丈人、廬山使者，及當境山川真靈，並降臨醮席。再拜。

謹奉請天皇天一君、地皇太一君、人皇玄一君、真靈騎從，並降臨醮席。再拜。

謹奉請人鳥山形、真靈騎從，一合來下，降臨醮席。再拜。

謹奉請東方靈威仰蒼帝君、青牙九炁天君、太上真王、青腰玉女、東鄉諸靈官，並臨醮席。再拜。

謹奉請南方赤熛弩赤帝君、朱丹三炁天君、元炁丈人、朱宮太丹玉女、南鄉諸靈官，並臨醮席。再拜。

謹奉請中央含樞紐黃帝君、太帝真人、子丹黃庭戊己天蒼玉女、中央太帝靈官，並臨醮席。再拜。

謹奉請西方曜伯寶白帝君、明石七炁天君、元炁丈人、太上白素玉女、西鄉諸靈官，並臨醮席。再拜。

謹奉請北方隱侯局黑帝君、玄滋五炁天君、太上靈君、夜光玉女、北鄉諸靈官，並臨醮席。再拜。

謹奉請夏帝君、五嶽靈山真人、江河四瀆、三官九府諸靈官、地仙玉女、五嶽飛仙諸仙官，並臨醮席。再拜。

謹奉請斗宮諸真人、玉童玉女、高仙神官，服紫翠十華之帔、雲錦鳳羅之裙，右佩虎章，左帶龍劍，御碧林之輦，乘三素之雲，垂光迴眄，曲賜下臨。再拜。

謹奉請左上仙蔽身大將軍一人，姓唐，名宏，字文明。赤幘朱衣大冠，左手執節，右手持符。佩劍兵士三千萬衆，下臨醮席。再拜。

謹奉請右上靈隱形大將軍一人，姓葛，名雍，字文度。赤幘朱衣大冠，左手執戟，右手持符。佩劍兵士三千萬衆，下臨醮席。再拜。

謹奉請中上神藏影大將軍一人，姓周，名武，字文剛。赤幘朱衣大冠，左手執節，右手持符。佩劍兵士三千萬衆，下臨醮席。再拜。

謹奉請臣身中所佩太上正一童子一將軍籙，籙中正一功曹使者、仙童侍從，降臨醮席。

謹奉請臣身中所佩太上正一童子十將軍籙，籙中功曹使者、郎吏虎賁等，降臨醮席。

謹奉請臣身中所佩太上正一上仙上靈百五十將軍籙，籙中功曹使者、將軍吏兵，降臨醮席。

謹奉請臣身中所佩太上赤天三部唐將軍、葛將軍、周將軍，並侍從兵吏，各三十萬衆，嚴裝盛服，降臨醮席。

謹奉請臣身中所佩太上上靈百鬼召籙，籙中功曹使者、將軍吏兵，降臨醮席。

謹奉請臣身中所佩太上元命混沌赤籙，籙中功曹使者、仙人玉女、將軍吏兵，降臨醮席。

謹奉請臣身中所佩太上三五上仙百鬼召籙，籙中將軍吏兵，降臨醮席。

謹奉請臣身中所佩太上九州社令籙，籙中功曹使者、將軍吏兵，降臨醮席。再拜。

謹奉請臣身中所佩太上三五星剛五斗籙，籙中功曹使者、魁罡斗步、將軍吏兵，降臨醮席。

謹奉請臣身中所佩太上河圖寶籙，籙中功曹使者、仙童玉女，降臨醮席。

謹奉請臣身中所佩太上解六害神符籙，籙中真官，解刑却害，將軍吏兵等，降臨醮席。

謹奉請臣身中所佩太上九鳳破穢籙，籙中五方破穢將軍吏兵，降臨醮席。

謹奉請臣身中所佩太上都章畢印籙，籙中真神、功曹使者、仙童玉女，降臨醮席。

謹奉請臣身中所佩太上斬邪華蓋籙，籙中功曹使者、將軍吏兵，降臨醮席。

謹奉請臣身中所佩太上九天兵符籙，籙中統領九天神君、將軍吏兵，降臨醮席。

謹奉請臣身中所佩太上九宮捍厄籙，籙中諸官、却厄君、將軍吏兵，降臨醮席。再拜。

謹奉請臣身中所佩太上八卦護身籙，籙中功曹、八方護身君、將軍吏兵，降臨醮席。

謹奉請臣身中所佩太上考召籙，籙中考召君、將吏、攝召靈官，降臨醮席。

謹奉請臣身中所佩太上斬邪赤籙，籙中辟斥將軍吏兵、斬邪靈官，降臨醮席。

謹奉請臣身中所佩太上辟邪神籙，籙中功曹使者、將軍吏兵，降臨醮席。

謹奉請臣身中所佩太上四部禁炁籙，籙中禁炁將軍、功曹吏兵，降臨醮席。

謹奉請臣身中所佩太上大斬邪籙，籙中誅邪、斷絕水府精邪、將軍吏兵，降臨醮席。

謹奉請臣身中所佩太上功曹籙，籙中功曹使者、仙童玉女、吏兵，降臨醮席。

謹奉請臣身中所佩太上保命長生籙，籙中保命君吏，降臨醮席。再拜。

謹奉請太上三元大將軍券契中貴神將吏，降臨醮席。再拜。

謹奉請陽平治都功治錄。若不受都功，不請也。

言治典二十四治，治有二十四人，官有二十四職，職有二百四十軍，軍有二千四百將，將有二萬四千吏，吏有二十四萬兵，男官、女官、二十四官，男職、女職、二十四職，男氣、女氣、二十四氣。

治中虎賁威儀鈴下五百將，各二十四人。

治中校尉百二十人。

治中功曹二人。

治中主簿二人。

治中幹佐十二人。

治中金剛童子十二人。

治中小吏十二人。

治中部章督郵十二人。

治中從事十二人。

治中使者十二人。

治中通章二人。

治中典治君十二人。

治中考召吏二十四人。

治中左右陰陽二十四生炁吏。

治中建節監功大將軍二十四人。

治中前步效功吏二十四人。

治中後步效殺二十四人。

治中驛亭丞二十四人。

治中監章從事二人。

治中按章從事二人。

治中錄章從事二人。

治中校章從事二人。

治中呈章從事二人。

治中鈴下百鬼中王二十四人。

治中定章從事二人。

治中齋章從事二人。

治中御章從事二人。

謹奉請名山大澤守土真官、當界主司、虛空監察、四司五帝、應感真靈，各領分輝垂光，降臨醮席。再拜。

請衆聖事畢，便伏想見真靈百匝千重、億乘萬騎，悉在壇所，各依位次，儼然陳列，靈真光輝煥耀，肅然在目。前畢再拜。

次讀詞，詞訖亦拜。

次稱名位。

上清玄都大洞三景弟子，奉行三

洞醮法事某嶽先生，某帝小兆真人臣某等，誠惶誠恐，謹叩頭再拜，上啓虛無自然元始天尊、無極大道太上老君、上相上宰、無極元君、太上玉晨高上道君、太微天帝君、後聖金闕帝君、玉皇二十四高真、玉清紫虛元皇道君、四輔上相上宰、東華方諸青童大君、三天正法三元君、太微靈都元皇真君、九天鳳炁太清上仙、太上丈人、神仙丈人、玉童玉女、三台七元輔弼尊帝、神真上聖、上保南極紫元夫人、上傳太素真君、上宰西城總真王君、太極真人、南嶽赤君、太平下教二十四真人、司命南嶽魏夫人、紫微王夫人、九華安妃、太元真人、東卿司命茅君、清靈真人裴君、紫陽真人周君、仙侯侍帝晨、二許真人、司命楊君、句曲真人、定錄右禁郎茅中君、三官保命司直茅小君、華陽洞府領括蒼吳越生死罪福衆真、三十六司命官君、河圖九晨君、六甲諸靈官、西嶽君、中黃太一君、五嶽九山佐命君、三皇真君、无上元始太上大道君、五老上帝、至真大聖尊神、玄中大

法師、道德衆聖、天尊大帝、天帝玄一三真人、太上明威正一天尊、天師嗣師、係師、女師、三師門下典者君吏、上皇太上道君、太清玄元上三天无極大道太上老君、太上丈人、九老仙都君、九炁丈人等，百千萬重道炁，千二百官君，太清玉陛下南上大道君、四方三界一切真靈、三洞典經玉郎、神仙官屬，臣某七世積德，慶及今生，少懷慕道，心思妙法，潔志清嚴，歸命師門，勤求俛仰，以詣某君門下，奉受寶經、天書、玉字、符圖、要訣、內外治籙，佩服身形，存修供養，未契真靈。以今吉日良會，沐浴熏修，敷陳法座，施設芳饌，啓薦真靈。伏惟大聖衆尊，願迴雲駕，俯垂采納，鑒映凡情，省理所言，留恩降福。臣某稽首再拜。

三上香。

三上湯。

臣某謹重上啓：

夫大道微妙，神用無方，吐納陰陽，生成萬物。有形之類，皆是道生，長養成就，如母所受。凡厥迴向，莫不

感通。伏惟太上衆尊，哀憐有心，賜見開悟。若臣某上代七祖，有大罪，負越科禁，穢犯天地、日月星辰，或罵詈神鬼，指斥真靈，誹經謗道，抑弱欺貧，三業六根，驕慢四輩，殺生偷盜，萬罪千愆。啓大宥之恩，普賜原赦。臣某七祖父母，先化亡魂，永離幽牢，遷昇福地，南宮受鍊，仙化成人，高步九天，無爲自在。臣某宿根重積，固疾深災，衆病潛消，諸殃殄滅，凶謀惡逆，姦鬼邪神，一切消除，天祿永延，福樂無盡。同師共法，及以姻宗，久視長生，巍巍貞吉。乞臣某心靈朗悟，智慧圓通，真聖冥扶，神靈降接，良師善友，玉液金丹，必自相逢，不求而至，行道得道，求仙得仙，舉意從心，萬向皆遂。臣某稽首再拜。

三上香。

三上湯。

臣某謹重上啓高靈衆尊、上聖尊

神、三洞神真、四司五帝，臣某有幸，宿世恩深，九天之劫，轉及今身，值遇明運，道法流行，得以穢質參染靈文、高上秘籙、三洞符圖寶章。自叨竊以來，

尊仰上真，心希神仙，而精誠淺末，未能感靈，常恐罪身沉傾，梟穢，淪沒九泉。天慈廣大，展其功效，心守誠信，志度無窮。今日上告，萬願開陳，清心啓謝，披露宿新。伏願上聖高尊、諸君丈人、至真天尊，曲降卑賤，誠慙誠恐，不敢自寧，天光遐照，無幽不鑒，披心上啓，敢奉以聞，乞真符寶籙、神靈侍衛，營護臣身登山涉險，出入林澗，所向，皆得如言。金石開通，神明交會，萬願從心。採服芝藥，不得隱藏。山精伏匿，萬試不干。虎狼毒蟲，令不加身。仙童玉女，給侍東西。萬神靈炁，降入身形，安鎮五臟，內外聰明，心開意悟，逆知吉凶，三尸消滅，九蟲不生，身有奇毛，早得神仙。惟蒙高尊大帝真人，降福垂恩，流下衆庶，賜如所陳，不勝洪澤，輒以自效。臣某誠惶誠恐，稽首再拜。

三上香。

三上湯。

送神真第七

臣某啓：



上勞尊靈，下降凡穢，加以食膳寡薄，詞理庸拙，久稽真儀，罪當萬責。今雲車已整，里路方披，仰勞尊神還登金闕。臣某不逮，願賜開宥昇車之恩，伏希罔極。臣某誠惶誠恐，稽首再拜。四散香湯及醮胙，收法籙及位版，然勅小神吏。

### 勅小吏神第八

夫上下尊卑，人神共軌，不可謬濫，須依次序。今尊神既昇，諸有營護侍衛土地真官、及身中兵吏，主掌符圖，位卑職小，未預法座之者，請各配位，依其上下，受臣某言啓。

上香。

上湯。

伏以龍輿整馭，不敢久停。幸願降臨之後，各還所職，如常守衛，降福除禍，留恩布德。侍經玉童玉女、左右玉郎，兼臣某所受真官，各依掌衛，與臣某同心一體，行住動止，不相去離。若有安危厄患，神惑氣昏，違犯契盟，吏兵先坐，玄科格律，罪譴不輕，神宜慎之。

散香湯等。

### 內官第九

臣某設醮已畢，向來所出身中五體真官、三洞玉郎吏、一切靈騎，並願還臣某身中，各依所守，在左還左，在右還右，安坐金堂玉室，保炁全真，須臣某後召復出，一如故事，伏良久閉目，叩齒三通，想見身神，翕然盡還身中，如世中州府兵馬，各還營幕，帖然澄靜，然後復鑪。

### 復鑪第十

此後一章，平聲高唱，一如齋法事。

香官使者、左右龍虎君、侍香諸靈官，當今壇靜之所，自然生金芝玉英。臣某求道得道，求仙得仙，七祖三師，悉蒙昇度，遍沐玄恩。十方仙童玉女，接侍香煙，傳臣向來言奏，速達徑御三天太上、無形、無名、無極、元尊玉帝几前。

### 送神頌第十一

眇眇空無像，悠悠感有情。敬則垂天貺，洩則被魔精。吉凶隨運起，否泰應緣生。道不貴珠玉，神權在志誠。丹碧盡勤苦，懇歎竭中情。自然通大

聖，皆得降明靈。捻香陳所願，稽首冀嘉貞。天尊常湛寂，迴心歸杳冥。

誦畢，學仙下壇，一如常法。

### 出戶祝第十二

玄上太陰，八窗開明。向有所陳，少女通靈。事畢復位，萬神潛寧。

### 醮後諸忌第十三

凡醮食，可以飯賢人、道士，不得與雜俗昏穢之人，孝子、婦人尤忌，亦不道餉遺俗流之類，舊法皆送於長流水中，及土地埋之。勿飲酒，其氣亂；勿食五辛，其氣昏；勿與別人同坐，其氣雜；勿視死看生，其氣穢；勿嗔怒，其氣奔；勿悲哀，其神傷；勿見血，其氣污。

已上七戒，宜依七日，或二七日不違之，能滿四十九日更佳。大都道人忌之，悉然非止醮後。

夫求市醮物，皆須時新豐潔，無虫孔及塵穢之物。又不得論其財，錙其入土。沉穢之物，不充醮物，蔗芋、薯藥、藕葛之徒，若以人參、伏苓之類，不禁。此皆靈物所育，營辦之時，先沐浴

清淨，燒香洗滌器物、刀机，不得高言厲語，嗔怒小大，交遊外俗。如不解自營，須求造食，人先約勒，令沐浴換新衣，專自看之。

醮三洞真文五法正一盟威錄立成儀

（吳亞魁點校）

# 016 三洞衆戒文

經名：三洞衆戒文。原題張萬福編錄。二卷。底本出處：《正統道藏》洞真部戒律類。

## 目錄

序

卷上

始起心入道三歸戒文

弟子奉師科戒文

卷下

靈寶初盟閉塞六情戒文

三戒文

五戒文

八戒文

三訣文

八敗文

三要文

十三禁文

七百二十門要戒律訣文

## 三洞衆戒文序

三洞弟子京太清觀  
道士張萬福編錄

萬福伏按三洞諸經，說戒多矣，難以具詳。學道求真，莫不先持齋戒。故靈寶昇玄步虛章云：皆從齋戒起，累功結宿緣。又太極左仙公云：學道不修齋戒，亦徒勞山林矣。由是詳之。夫戒者，戒諸惡行，防衆行之最，若不持戒，道無由得，然道經不師受，則行之不神。三洞科儀，備有條格，而師資稟訓，各據一門，吳蜀京都，相承或異，良以教戒，須漸頓悟。人有賢愚，設法隨機，要存合道。恐踴見之徒，妄生疑惑，其傳授經法次第，已如三洞法目。今又依經，錄出戒文，附諸法次，受法之日，隨法轉授，令道士誦習，防非止惡，以制六情，進品上仙，遠超三界，自淺之深，非無優劣，從凡入聖，各有等差。聊舉大綱，庶通玄覺，即始起心入道，受三歸戒；錄生，五戒、八戒；在

俗男女，無上十戒；新出家者，初真戒；正一弟子，七十二戒；男官、女官，老君百八十戒；清信弟子，天尊十戒、十四持身品；五千文金紐，太清陰陽戒；太上高玄法師，二十七戒；洞神，三道要言、五戒、十三戒、七百二十戒門；昇玄內教，百二十九戒；靈寶初盟，閉塞六情戒；中盟，智慧上品大戒；大盟，三元百八十品戒；上清，智慧觀身二百大戒。凡受法，各授法服，宣示法服科戒，簡授法位，乃授天尊要戒，及勸戒三日後，設齋謝恩，授三師名諱形狀，居觀方所，並具之于左。

右與所授經法，同時書寫，雖具在經中，臨事披覽難見也。

### 三洞衆戒文卷上

始起心入道三歸戒文 出太玄部

元始天尊告太上大道君曰：夫道莫而無也，動而有也，布炁行神，衆兆生也，抱一含元，虛無空寂，文應象成，包真吐精，稟識作狀，迴黃化青，乘機赴會，緣感物情，吾故告汝，塞耳心聽。道者，衆物祖首，至無生神，造化天地、日月、山川，流精散炁，無所不之，遠而莫極，邇難得窮，大無不包，細無不入，經緯宇宙，潤洽毛髮，守之清虛，悟之神明，淡泊不渝，躁聒勿譁，常在不亡，虛通無閔，載劫詎易，永世爲範，可以保神，可以守身，可以治國，可以得仙。道、經、師者，衆常通也，抑惡舉善，戒人天也。身、神、命者，生妙寶也，迴元轉化，根聖真也，身權假也，精構炁凝，歸於虛寂，神附託也，道行生存歸於常，命自來也，飲食呼吸歸於衆，罪福緣對，善惡吉凶從之興，群形生化，變幻浮虛，不可保久，歸之於道、經、師。

若赤子歸母，衆物依地，不可須臾失戒。天不用此道，不能運行；地不用此道，不能載植；日月不用此道，不能明照；陰陽不用此道，不能生化；鬼神不用此道，不能徹視；君長不用此道，不能治理；道士不用此道戒，不能常在，三道神妙，長生可守。太上大道君稽首上白天尊曰：願以此道，教諸天人。於是熾百和寶香，奏鈞天廣樂，衆真散花，諸天齊到，命諸男女伏受三歸依戒。

第一戒者，歸身太上無極大道；

第二戒者，歸神三十六部尊經；

第三戒者，歸命玄中大法師。

天尊曰：三歸戒者，天地之樞紐，神仙之根柢，發行之初門，建心之元兆，運炁啓靈，冥真入理，包羅有象，聯形無外。持之者，天地神明，慶快心智，耳目開張，萬物敬畏，六府和樂，衆真衛護，群生父母，長世不遺，人神交泰。

#### 弟子奉師科戒文

弟子別師經月，皆冠帶執簡問訊，

不得白服。弟子別師經宿，皆禮拜長跪，還亦如之。弟子不得向師稱弟子，言皆稱名。弟子詣師，不得專輒而坐，命坐方坐。弟子不得喚師作道士，皆云家師。弟子不得犯師名諱，若人問不止，下聲荅之。弟子不得唐突師，左右皆有司察之官。弟子見師有過失，當於深隱處長跪諫之，不得在人前言師是非醜鄙。弟子與師言，不得高聲大語。弟子與師共室，不得先卧在後起。弟子與師同食，不得在師前食聽在前止。弟子問訊師，皆當隨其所受高下，巾褐執簡，不得趣爾白服。弟子隨師起居行止，皆當謙卑恭敬，不得斯須無敬。弟子事師，師年少，弟子年高，弟子皆應恭敬，譬如官長二千石、父母同等，不得自恃高貴，輕忽於師，其關不小，具在《明真科》。弟子與師同在席坐，師若起動行止，弟子即須倚立，不得安然端坐。弟子先未受法戒，或烝類齊等，或復耆年，或是姓從兄弟子孫，後詣師受法，皆須謙卑恭敬，言皆稱名，不得比常。弟子與師親服總

麻者，皆不得相爲師，所以爾者，受法，皆證三曾七祖父母，來監臨子孫所受，若違盟，九祖受考，殃及受法之身。弟子不得忿嫉責怒師主，及懷恨在心，罪科具出《明真經》。弟子詣師請道法，皆當冠帶執簡，謙苦求請，不得趣爾。弟子與師別經年，月朔皆冠帶執簡，禮三拜長跪，問訊訖，復再拜，合成五拜，別亦如之，明各識焉。弟子不得與師爭口，忽忽哂意。弟子事師，皆當恭敬，不得傲慢無禮，罰在《明真經》中，宜各慎之。弟子不得與師爭競功名，無有推讓之心。弟子詣師，當請問所受，不得論及私鄙。弟子事師，師若遠行還，弟子皆當隨路遠近奉迎，不得端坐晏然，待師至，弟子與師同行，不得踐師影，慎之。弟子與師共在座，不得受人跪拜，所以爾者，座無二尊。弟子不得陰行橫勃，忿鬪師主。弟子若出入，及所營作，每先諮問於師，不得自專。弟子事師，皆當恩愛信實，不得猶豫二心。弟子不得竊盜、發泄師器笈中，犯師禁戒，科律得罪。弟子不得背

判師主，慎之，具在《明真經》文。弟子與師同處，不得洩唾左右，慎之。弟子侍從師，若值賓客，弟子侍衛師左右，不得高抗大坐，與凡俗無別，皆入不孝，慎之。弟子受師法業，後玄德成就，爲人所宗，皆當謙下，存憶本師，勿忘先恩也。弟子事師，不得輒坐師牀席處所，神司之禁也。

右弟子奉師科戒，合三十六條。

三洞衆戒文卷上

### 三洞衆戒文卷下

三洞弟子京太清觀  
道士張萬福編錄

#### 靈寶初盟閉塞六情戒文

第一戒者，目無廣瞻，亂諸華色，亡睛失明，光不朗徹。

第二戒者，耳無亂聽，混於五音，傷神敗正，惡聲啼吟。

第三戒者，鼻無廣嗅，雜炁臭腥，易有混濁，形不澄正。

第四戒者，口無貪味，脂薰之屬，濁注五神，藏府憤潰。

第五戒者，手無犯惡，不竊人物，貪利入己，禍不自覺。

第六戒者，心無愛欲，搖動五神，傷精喪炁，體發迷荒。

天尊言：其六戒者，身之大患。來生男女雖受人形而六情不純，未見經教，不聞法音，形不自覺，沉迷罪門，致令短促，不竟天年，長處惡道，甚可哀憐。故說是戒，開度天人，善心信

向，一意歸命，尊奉聖教，閉諸惡門，則形入虛空，六通智慧，六情恬夷，神自寧也，炁自和也，精自固也，壽命長遠，終不亡也。

萬福曰：六情者，染罪之門，喪身之源也，所以持戒先制六情，六情恬夷，神道歸也。故學士初入中乘，先須閉塞六情，然後漸階一道。故以為次，達者詳之矣。

#### 三戒文

經曰：凡學妙精、玄變神化、大道衆術，當潔己清齋，誦習清戒，洞曉義趣，動靜通神，勤行善道，謹密妙事，諦在功過，勿生謬妄，心識明定，戒業又全，然後行道，應心如口。不能修此，人鬼亂壤，滅己誤他，為道兼濟，濟物安己，慎勿戲弄，以道誇人。又勿害他，以利於己，當持此戒，以制之也。

第一戒者，諦識因緣，勿忘本逐末。

第二戒者，諦守少私，勿利我損物。

第三戒者，諦習勤行，勿混俗失

真。

右三上戒，上皇所行，上帝所奉，上士所修，修行奉持，全而不破，三炁正神，降與為一，身神又一，一無二焉，得道常存，號曰太上。不行此戒，服佩符文，勞而無驗，非太上弟子也。

#### 五戒文

經云：帝昊英告黃帝曰：吾受太上老君衆經要戒，勤行之報，得有今日，法應流布，勸化將來，不得閉塞，杜絕後生。子心精鍊，方與長生，宜廣宣戒，以成兼濟之功矣。黃帝稽首再拜，奉旨遵行。

第一戒者，目不貪五色，誓止殺，學長生。

第二戒者，耳不貪五音，願聞善，從無惑。

第三戒者，鼻不貪五氣，用法香，遣俗穢。

第四戒者，口不貪五味，習胎息，絕惡言。

第五戒者，身不貪五綵，履勤勞，

以順道。

右五戒，五老帝君各遣二十五神，防護受持者身，免脫災害，延年壽命，安國寧家，救度一切。受授之時，依如三戒法，三戒招玄元始三炁，五戒延仁、禮、信、義、智五炁，三五為八，周有遍無，鍊而精之，洪纖畢備。

### 八戒文

太上曰：凡諸戒律，通應共行，其間緩急、繁簡、高卑，各有意義，准儀玄元，變化生數，階漸相成，三五八九，十百千萬，雖隨緣所堪，亦不可越略。知迴向正法，修長生不死，三、五已參，宜受八戒。

- 第一，星解五行，備修五德。
- 第二，習五事，不可無恒。
- 第三，平理八正，行藏順時。
- 第四，明識五紀，與炁同存。
- 第五，精審皇極，上下相和。
- 第六，修三德，期會三清。
- 第七，決定疑惑，化偽為真。
- 第八，考校徵驗，消禍降福，鍊凡登聖，無負三尊。

右八戒，持之必全，犯破即謝，首悔責躬，改意革心，堅防後失。行之三年，八方善神僉來擁護。六年，保免六極。六極者，凶禍短折，常多疾苦，恒懷憂慮，積苦貧乏，形容醜惡，尪弱無施也。八年，永享五福。五福者，長壽，富貴，康寧，好德，考終。鍊有入無，自識宿命也。九年神通，超凡成聖矣。

### 三訣文

經曰：志學之士，才力未強，多知為敗，怠墮致殃，善行教者，照其所堪，隨品稍授，悻憤日新，且閉繁科，示以要訣，衆經諸法，漸次修行，功德成就，自然遍通，通由要起，要訣有三。

一者曰因。無始中來，仍有識性，性靈無滅，死苦尚存，生樂無機關。不識因者，定不怨天，不尤人，不咎物，不感身，苦樂是甘，無妄惑也。

二者曰緣。因循動靜，內外取和，不侵人益身，不陷己誤物，損而無傷，利而無害，識本知末，無邪疑也。

三者曰勤。謹慎心口，嚴勅身神，

聞聖尋請，受教遵承，增廣善緣，斷絕惡因。正見子精進無退，不違師自任，不漫信浮隨，不驕怠亂群，不苟執干衆，不藏真出偽，不有始無終也。

右久憶此訣三，度人濟己，三皇神吏自然見形，為之使役，通達真靈，鍊凡成聖，變羸為精，不知此三，終不得道。

### 八敗文

經曰：齋以齊整為急，急以齊整身心，身心齊整，保無亂敗。敗起多端，大略有八：

一者殺生自活，二者盜他自供，三者淫欲為快，四者妄語誑人，五者醉酒恣意，六者雜卧高廣大床，七者競翫香油華飾，八者耽著歌舞作唱。

右八者，大人君子、學聖真仙，不為此八事，則八敗無從起，八敗無起，則八成自然立，立則不失，延年保命，神通洞達，思真行道，明驗必速也。

### 三要文

天皇曰：第一之要，先求長生；

第二之要，當求藏形；第三之要，當避世榮。

### 十三禁文

仙人曰：夫欲延壽長生，避諸禁忌如右。

禁無施精，命夭没；禁無大食，炁脉閉；禁無大飲，膀胱急；禁無大温，消髓骨；禁無大寒，傷肌肉；禁無寒食，生病結；禁無欬唾，失肌汁；禁無久視，令目曠；禁無久聽，聰明閉；禁無久泣，神悲感；禁無卒呼，驚魂魄；禁無內念，志恍惚；禁無恚怒，神不樂。

### 七百二十門要戒律訣文

經曰：七百二十門要戒律文，諸天寶秘，佩身傳口，不書經中。若未遇其師，當服符取應，見神來降，仍請受之。凡人從无始中來，有識在心，心識浮動，迴易須臾，駟馬過隙，比之遲也，雲間迅電，亦非速也。心之善惡，反覆無常，一切諸急，莫若心之疾也。心之難持，甚於虎豹，猴猿鹿馬，皆易制也，一切之中，心難馭也。善能調御心者，

其唯上聖之人乎？中下聖真，恒與心爭，晝夜俯仰，內省外觀，常恐越逸，損滅心神，神散不可追還，身殞豈得重立？立身不殞，養神不散，長生神仙，位登上聖，要在清齋。齋各有品，五情六欲，縱橫競興，內外參差，致生迷亂，背正向邪，棄本逐末，欺負幽明，招考沉淪，九泉之府，楚掠萬端，解脫無期，由於不齋故也。志學之士，急務修齋，齋直齊心，守戒為主，主以制心，心定則生，忘戒失主，心亂則死，死中求生，生求不死，悉當清齋，誦習行戒。情欲既多，戒遂無量，無量法門，衆聖開設，趣引群生，使之能入，各有方所，諸天不同，時有行藏，歷世舛異，大略不殊，一切所共，七百二十門最爲妙勝。持之全者，入道究竟，故能變化七十四方，九天各八，八九七十二，爰上及下，合七十四方。不能持戒，或持之不全，各隨階品，變化不同，變化不同則不免累患，是故上聖令持之矣。一切含生，皆有三五，又有多少，愚智不同，更相領攝，抑揚相緣，一識既動，無端競興，

守一不可，直指三五，交互扶持，三炁流行，八會相輔，太一遊歷，九宮相成，一源爲本，九化爲末，有本有末，九一居宗，宗本引末，末同還源，源一應末，末感既動，本應恒寂，寂應諸動，動名外來。外來曰動，內住曰寂，寂動於半，有異有同，同動以救去，異寂以濟來，來不驚寂，去不勞動，動而不勞，不離寂也；寂而不驚，不疑動也。寂照明徹，故無驚疑；動以徐生，故無勞隔。無勞隔者，常合長生；無驚疑者，長樂常住。住無所住，爲而無爲，爲道之最。用本一焉，分化成數，八九迴旋，相乘積門，七百二十也。門者，文也，理也，還也，散逸應還，還修由文，得門能入，未歸源也。本因羸多，增緣精少，少多相傾，補續相涉，識悟轉開，見門稍審，長善勇猛，詣闖速臻，臻未速者，經屆無央，大略變化，捨故即新，駭聽殊觀，正在七百二十門中，積歷八九，究鍊畢竟，七百二十，共爲一矣。守一勿失，行一難堅，念念相仍，不可暫替，暫替則邪干，邪干則正翳，正翳



則門塞，門塞則見迷，迷者陷苦，苦極思迴，識神感發，超然醒悟，更堅其念，念念相續，因積積久，一炁浹身，身神通徹，八九朗然，變化無窮，由悟守一，守一須資，唯戒爲急。持之不虧，邪不得入，邪不得入，正炁相親，親密久之，自然混合，與道同真。資戒果遂，由戒入道，故謂爲門，精志之儔，諦從之耳。萬福曰：夫人心不一，識有暗明，妙道無方，神化難測，心明則悟道，神昧則迷真，而心以寂明，神由動亂，亂則失道，明乃會真，故守正除邪，則妄心不起，背明向暗，乃惡念斯生。善否非他，諒自身造，迷悟在己，亦不由人，是以大聖天尊，弘慈化物，善權方便，接引無遺，廣設法門，招提一切，隨宜授藥，衆病消除，普勸行人，悉令持戒。戒有多種，大小異門，究竟歸根，同成正道，但三五六八，漸頓稍殊，識悟既明，終持一戒。一戒者，唯戒於心，不起他念也，即此戒謂守一勿失，念念相仍是也。學士當諦思行之矣。

三洞衆戒文卷下

（吳亞魁點校）

# 017 三洞法服科戒文

三洞弟子京太清觀  
道士張萬福編錄

經名：三洞法服科戒文。原題  
張萬福編錄。一卷。底本出  
處：《正統道藏》洞神部戒律類。

## 天師請問法服品

太上授道陵三天法師、正一真人  
已，乃命雲宮玉女，出九光寶耀蓮冠，  
五色丹羅錦帔，雲縠絳文仙褐，翔鳳飛  
錦羽裙，七色寶雲錦襪，瑤華藥珠文  
履，碧瑤之笏，七寶之函，流精華佩，琅  
英繡璫，龍錦坐褥，瓊鳳香鑪，交龍玉  
几，斑麟翠拂，明光如意，十有五種，以  
錫天師。天師冠帶法服，五體投地，禮  
拜太上，因啓問曰：未審三清上境，及  
諸凡界，聖真仙服，爲有差降，爲復等  
乎？愚所未睹，願垂分別，以示將來。  
太上曰：衣服者，身之章也。隨其稟

受品次不同，各有科儀。凡有九等，汝  
可諦聽，當爲子說。一者大羅法王元  
始天尊，冠須臾萬變九色寶冠，衣千種  
離合自然雲帔，著十轉九變青錦華裙，  
七明四照參差寶襪，五種變化十寶珠  
履。左右侍真，皆悉同然。二者玉清  
法王無形天尊，冠須臾千變七色寶冠，  
衣百變離合飛雲之帔，九轉七變翠錦  
飛裙，七明四照流霞錦襪，七寶變化丹  
雲繡履。左右侍真，亦復同矣。三者  
上清法王無名天尊，冠須臾百變五色  
寶冠，衣十種離合流霄之帔，八轉五變  
黃錦霞裙，七明四照飛光錦襪，五采變  
化自然瓊履。左右侍真，亦復同也。  
四者太清法王太一天尊，冠須臾十變  
蓮精寶冠，衣九種離合五雲華帔，七轉  
四變紫錦羽裙，七明四照玄光丹襪，自  
然變見獅子文履。左右侍真，亦復同  
焉。五者四梵天中化主無相天尊，冠  
流精耀日花冠，衣玄鳳瑤華之帔，翠錦  
丹羽飛裙，五明景雲寶襪，飛龍轉變之  
履。左右侍真，亦復同耳。又紫帔青  
裙、蒼帔丹裙、綠帔絳裙、丹帔黃裙、黃

帔素裙、絳龍錦裙，悉侍真之服，自四  
梵以上，皆飛雲流霄、自然妙氣，結成  
衣服。九色寶光，而生萬物。長短大  
小，隨境應形。或明光八照，圓象洞  
煥，景耀遠近，變化自然；或九色合  
成，萬種分輝，或龍鳳結彩，山水流形，  
千變萬化，不可得名。乃至都治城郭，  
宮闕殿堂，樓閣臺榭，草木禽獸，車輿  
器物，幡幢帳座，種種法具，皆是自然，  
應緣而見，本無質礙，隱顯靡常。六者  
無色天中仙真聖服及諸天帝，冠飛雲  
寶冠，衣九色無縫之帔，翠龍華裙，五  
色錦襪，祥鸞瓊履。皆自然而生，應念  
來至。乃至宮殿臺閣，車輿器物，玩弄  
服飾，苑囿花果，音樂法具，一切所須，  
悉皆如是。七者色界天中仙真聖品，  
及諸天帝，冠蓮華晨冠，衣飛雲錦帔，  
絳霄飛裙，流景錦襪，瓊鳳文履。雖有  
形礙，而非世間所造，同於自然。乃至  
居住，車騎法具，隨心所欲，應念而生，  
變化自在，不比於常。八者欲界天中  
仙真聖品，冠珠玉之冠，衣五雲之帔，  
飛華翠裙，流光羽襪，九光文履。皆以

當界所植，或於諸天中得，或下方神仙奉獻，結造所成，不同下界，有所勞苦。乃至居處房殿，車輿法物，亦復如是。九者山上靈宮，及五嶽名山洞宮諸神仙、靈官真官、守土職司，冠七寶之冠，衣九光霞帔，飛青華裙，雲錦繡襪，鸞鳳文履。悉以諸天錦綺，及下方珍物，或變練而成，非如世間之所製造。或乘鸞駕鶴，控馭龍虎，白鹿獅子，靈禽神獸，飛雲丹霄，綠輿瓊輪，持幢鼓節，執符把籙，出入人間，應心所欲，隨感而至。或上界真仙，下世教化，因時所服，不異人間；或下界真仙，上朝諸天，其所服馭，參同上境，而變化自然，實非汝凡情之所測度。天師又問曰：夫衣服者，本為有形，今上聖既無形質，衣服何所設耶？

太上曰：上聖無形，實不資衣服。但應迹人間，而有衣服。若歸真反本，湛寂自然，形影尚空，何論衣服。今雖示迹，略有九階，要而言之，大歸二種：一者無衣之衣，謂四梵以上，妙體自然，變化無常，本無形質，或隱或顯，

應見化身，接引下凡，暫假衣服，隨機設教，逐境分儀，神用自然，變化不測。此不衣而衣，示同凡也。二者有衣之衣，謂三界以下，乃至棄賢，形質尚麤，未能合道，遊行出處，要籍威儀。衣服階修，致有差別，又有七種，須案奉行，劫運雖傾，此法無變。一者初入道門，平冠黃帔；二者正一，芙蓉玄冠，黃裙絳褐；三者道德，黃褐玄巾；四者洞神，玄冠青褐；五者洞玄，黃褐玄冠。皆黃裙對之，冠象蓮花。或四面兩葉，褐用三丈六尺，身長三尺六寸；女子二丈四尺，身長二尺四寸。袖領帶楯，就令取足，作三十二條帔，用二丈四尺，二十四條，男女同法。六者洞真，褐帔用紫紗三十六尺，長短如洞玄法。以青為裏，袖領楯帶，皆就取足，表二十五條，裏一十四條，合三十九條。飛青華裙，蓮花寶冠，或四面三葉，謂之元始冠。女子褐，用紫紗二丈四尺，長二尺四寸，身二十三條，兩袖十六條，合三十九條，作青紗之裙，戴飛雲鳳炁之冠。七者三洞講法師，如上清衣服，

上加九色。若五色雲霞山水袖帔，元始寶冠，皆環佩執板獅子文履，謂之法服，悉有天男天女、玉童玉女侍奉護持，不得叨謬，諸天敬仰，群魔束形，子其勉之。

天師曰：未審下世道士紹聖教者，法服云何？太上曰：若當來男女，修行我法，捨俗出家，當須持奉三洞符籙經戒，依此制服，隨其經戒高下，勿得叨謬，混雜仙真。常須清淨，燒香左右，無使穢污，濁辱仙靈。冠者，觀也，內觀於身，結大福緣，天地百神，威奉於己。當自寶貴，以道護持，制斷六情，抑止貪欲，虛心靜慮，滌盪塵勞，念念至誠，尅登道果。外觀於物，悉非我有，妄生貪著，惑亂我心。當須觀妙，常使無欲，以其觀察，德美於身，上法三光，照明內外，如彼蓮花，處世無染。又花為果始，用冠一形，舉之于首，圓通無礙。帔者，披也，內則披露肝心，無諸滓穢；外則披揚道德，開悟衆生。使內外開通，彼我皆濟，隨時教化，救度衆生，一切歸依，此最為上。褐者，

遏也，割也，內遏情欲，使不外彰，割斷諸根，永絕萌蘖；外遏貪取，使不內入，割斷諸物，永無煩惱。內外遏絕，物我兼忘，行道誦經，不可闕也。裙者，群也，內斷群迷，外祛群累，攝化萬物，令入一乘，永出樊籠，普令解脫。冠以法天，有三光之象；裙以法地，有五嶽之形；帔法陰陽，有生成之德。總謂法服，名曰出家。內服己身，六根三業，調練形神；外服衆生，三塗五道，救拔人天，遍及聖凡，知有所法，景行可尊。又法天尊聖真仙服，住持經戒，教化人間，必使師資相習，真道流通，易此俗衣，著彼仙服，道能服物，德可法人，以是因緣，名法服也。

太上曰：吾昔服日光帔，讀洞真寶經；服月光帔，讀洞玄真經；服星光帔，讀洞神仙經；服九色離羅帔，講三洞大乘經；服五色雲帔，教化人間；服自然之帔，遊行諸天；服萬變雲帔，上朝大羅；服光明寶帔，下救三塗。常使玉女玉童二百四十人，典侍法服，清淨燒香。若道士，常須備其法

服，整飾形容，沐浴冠帶，朝奉天真，教化一切。勿得暫捨法服，不住威儀，無使非人，犯法服也。天師稽首，禮拜奉行。

天師受法服已，即說科戒四十六條，傳教將來。

第一，不冠法服，不得登壇入靜，禮願啓請，悔過求恩。第二，不冠法服，不得逼近經戒，講說念誦，看讀敷揚。第三，不冠法服，不得持奉齋戒，受人禮拜，飲食供養。第四，不冠法服，不得禮拜師尊長德，及受弟子禮拜。第五，不冠法服，不得出入所居，人間遊行，見諸凡人。第六，不冠法服，不得祝禁符劾，章奏表啓。第七，不冠法服，不得覲見國主、父母，及諸世民。第八，寢息休暇，當脫法服。第九，沐浴浣濯，當脫法服。第十，大小便曲，當脫法服。第十一，泥雨濁穢，當脫法服。第十二，供養給使師尊、父母，勿脫法服。第十三，檢校修造，一切功德，勿脫法服。第十四，檢校營造，齋供花果，勿脫法服。第十五，檢

校種植，勿脫法服。第十六，非枷獄病苦，勿脫法服。第十七，手足不淨，勿犯法服。第十八，器物不淨，勿犯法服。第十九，牀席不淨，勿犯法服。第二十，車輿不淨，勿犯法服。第二十一，裸露身形，勿犯法服。第二十二，鳥獸蟲魚，勿犯法服。第二十三，口氣臭穢，勿犯法服。第二十四，非同學弟子，勿犯法服。第二十五，始欲出家，先備法服。第二十六，欲受經戒，須備法服。第二十七，詣師請經道戒錄，須上法服。第二十八，詣師請福，解免厄苦，須上法服。第二十九，法服不得用五綵作。第三十，法服不得以非義物作。第三十一，法服不得用錦繡綺作。第三十二，法服不得非法作。第三十三，法服不得假借他人。第三十四，法服不得隨宜拋擲。第三十五，法服不得安卧牀上。第三十六，法服不得坐卧其上。第三十七，法服不得以脚踏洗，及槌拍。第三十八，法服破壞，當須火淨。第三十九，法服不得過三具，餘便施人。第四十，法服破壞及餘

物，不得充非用，并凡人著。第四十一，法服作成，燒香啓告，禮拜三寶，先獻三寶，及諸仙真聖，然後取著。第四十二，法服近經像者，不得著人間，及不淨處。第四十三，法服須勤洗濯，燒香清淨，箱籠藏舉，勿使污穢，常置淨室。第四十四，不得著法服，遊五種家。第四十五，不得擅脫法服，潛遊人間。第四十六，坐起卧息，常依科戒。

天師曰：道士護持法服，當如兩眼，又如手足。何以故？人若無眼，不能睹見天地萬物、好惡是非。若無手足，不能運轉身形，遠近行坐。名不具足，是盲衆生。道士不持法服，失十種恭敬，得十種輕賤：一者諸天生不恭敬，二者諸魔生不恭敬，三者鬼神生不恭敬，四者帝王生不恭敬，五者父母生不恭敬，六者兄弟生不恭敬，七者姊妹生不恭敬，八者眷屬生不恭敬，九者貴人生不恭敬，十者賤人生不恭敬；一者得諸天輕賤，二者得諸魔輕賤，三者得鬼神輕賤，四者得帝王輕賤，五者得父母輕賤，六者得兄弟輕賤，七者得姊

妹輕賤，八者得眷屬輕賤，九者得貴人輕賤，十者得賤人輕賤。見世所在之處，失其勝福，過去受猪狗之身。若護持者，見世所在之處，得其果報。過去生諸天中者，凡諸男女，寧脫己之服，不得脫出家法服；寧犯毒蛇，不得犯出家法服；寧坐大火坑，不得與出家同坐。若道士，自外法服，邀世榮華，是其福盡。雖暫光耀，不久惡至，過去入寒冰地獄，後受裸露之身。何以故？此人自取沉淪也。

天師曰：應服不服，非服而服，皆四司考魂，奪筭一千二百。

天師曰：道士衣服、卧具、坐褥，皆不得用青綠紺絳、紅碧玄素、錦綺繡畫、珠玉間錯。違者，四司考魂，奪筭八百。

### 三洞法服科戒文

（吳亞魁點校）

## 018 受錄次第法信儀

經名：受錄次第法信儀。一卷。  
底本出處：《正統道藏》正一部。

### 初受道法信

銀鑲一雙，細紙一百張，刀一口，筆兩管，朱砂一兩，墨一挺，青絲五兩，細席一領，薪十束，米一碩二斗，絹一百二十尺，錦囊一盛錄。

### 受四部禁氣法信

大刀一口，命米兩碩四斗，薪一百束，絳紋七尺五寸，銀鑲一雙，白素四十尺，紙一百張，墨一挺，香十兩，書刀一口，朱砂二兩。

### 受二十八宿、及諸錄等法信

金龍六頭，銀鑲八枚，命繒年加一尺，鎮錢一千二百文。

### 受治職法信

米五斗，薪一束，章紙一百張，筆

兩管，墨一挺，書刀一口，單衣一領，黑幘一枚，履一緇，飯賢二十四人。

### 受道德經法信

銀鑲一枚，青絲一百二十尺，手巾布一丈五尺，朱砂一兩，刀子一口，白綾五十尺，刺板十二片，長一尺一寸、闊五寸，錦囊一盛經。

### 受紫虛錄法信

紫紋八十一尺，五方綵各四十尺，金鑲五枚，刀子一口，香五斤，手巾五枚。

### 受洞神三皇法信

白絹四十尺，金二兩，銀二兩，真丹二兩，米五斗，薪二束，手巾九枚，刀子九口，黃素四十尺，銀鑲一雙，金鑲六雙，絳紋四十尺，紫紋四十尺，朱砂五兩，碧線五兩，黃布八十一尺，黃紙一百張，金刀子一口，筆一管，淨甕一枚，盟盤一枚，東方青紋九尺，南方緋紋三尺，西方白紋七尺，北方阜紋五尺，中央黃紋一丈二尺，席一領，金龍五枚，香一斤，佩版二片，長一尺二寸、闊五寸、外厚二分、內厚二分，版衣紫紋七尺，青絲四條，朱蠟一兩，錦囊一盛錄。

### 受靈寶真文法信

金錢二萬四千，質二十四氣朱砂一兩，上金九兩，上質九天五色紋繒各四十尺，請五老上真本命紋繒二十四尺，青紙十張，金鑲二十四枚，金龍九頭，內三頭，各連九劍，投簡用中盟龍一頭，鎮龍五枚，香二斤青絲四條，神策杖一枚，長短等身，八節元空，一左一右，穿作五孔，以根為頭杖中五色符各方二寸，杖衣絳紋盛杖足，餘五尺版衣絳紋，長一丈三尺佩版三片，長一尺二寸、外厚三分、闊二寸四分、內厚二分，謁版一十五枚，各長一尺二寸、闊一寸二分朱蠟一兩。

### 受五符法信

金鑲三雙，手巾一枚長五尺，絹三疋，銀二兩，鏡五面，九寸者五方綵各一疋，佩版二片，大小與三皇同，版衣絳紋七尺，青絲線四條，朱蠟一兩。

### 受上清法信

上金九兩，明鏡五面，青羅九十尺，絳紋四十尺，白紋四十尺，黃紋四十尺，青紋四十尺，紫紋四十尺，本命紋繒隨年加一尺，緋羅巾五尺，香爐五枚，香合五具，香案五具，大席五領，青

絲繩九尺，金環十四枚，鎮龍三枚，玉龍三枚，玉魚三枚，玉人四枚，金人四枚，金魚三枚，絹五疋，朱砂一兩，佩版二片，版衣碧紋七尺，朱蠟一兩，青絲線四條，謁版十七片，投版三片。

### 受畢仙券法信

金環三雙，上金九兩，明鏡五面，香一斤，五方綵各一疋，本命紋繒年加一尺，筆一管，刀子一口，手巾一枚，墨一挺，米一碩二斗，薪十束，席五領，細紙一百張，絹五疋，金童僕一人五尺五寸。

### 受法職位次第

#### 正一法位：

清信道士，十戒弟子，錄生弟子，正一盟威弟子，係天帥某治、太上中氣左右某氣、正一盟威弟子，正一盟威弟子、三五步綱元命真人。

### 受七星錄

北斗七元真人。

### 受都功版券

門下大都功。

### 受道德法位

金鈕弟子，太上高玄法師某嶽先

生，太玄都太上三寶弟子。

### 受洞神法位

洞淵神呪九天法師小兆真人又稱洞淵神呪大宗三昧法師小兆真人洞神弟子，洞神太一金剛畢券弟子。

### 受昇玄法位

靈寶昇玄內教法師。

### 受洞玄法位

靈寶弟子，洞玄弟子，太上靈寶无上洞玄弟子某嶽先生。女曰仙姬

### 受五符法位

洞神三皇內景弟子，太上靈寶无上洞神弟子。

### 受河圖法位

太玄河圖寶錄九官真人。

### 受洞真法位

上清弟子，上清大洞弟子，上清大洞三景弟子某嶽真人。

### 受畢道法位

上清玄都大洞三景弟子某真人。用印法

封真文策，上用元始印，下用五老印，皆字首向外。

封杖，上用元始之章印，下用五老之章印。

封三皇版，以九老仙都印，紫衣上下並同，以印向外。後同

封五符策，以三天太上印。緋衣

封上清策，以十迴之印。碧衣

### 命係氣籍

正月、二月生命，係九氣天君、青天領籍。

四月、五月生命，係三氣天君、丹天領籍。一云赤天

七月、八月生命，係七氣天君、素天領籍。

十月、十一月生命，係五氣天君、玄天領籍。一云黑天

三月、六月、九月、十二月生命，係一氣天君、黃天領籍。一云梵氣天君

八景內音云：某於某氣天者，正月、二月，受法於九氣天中。四月、五月，受法於三氣天中。七月、八月，受法於七氣天中。十月、十一月，受法於五氣天中。三月、六月、九月、十二月，受法於一氣天中。一云梵氣天中

寅卯生人，青帝領籍。

巳午生人，赤帝領籍。

申酉生人，白帝領籍。

亥子生人，黑帝領籍。

辰戌、丑未生人，黃帝領籍。

金剛童子籙中召氣

正月生，東上夷平氣長生氣君召。

二月生，中夷素饗氣君召。

三月生，九夷下元歷氣君召。

四月生，南八蠻上元素歷生氣君

召。

五月生，中元三陽觀機瀝氣君召。

六月生，下元歷度三陽樂生君召。

七月生，西上戎上仙真明君召。

八月生，中戎中仙真神氣君召。

九月生，下戎下仙真陽氣君召。

十月生，北上狄和明氣君召。

十一月生，北中狄練仙氣君召。

十二月生，北下狄練神真文氣君

召。

右已上，如不知生月，即男從正

月，女從十月為定。

寅卯生人，青帝，東嶽太山命，係

九氣天東斗領籍。

巳午生人，赤帝，南嶽衡山命，係

三氣天南斗領籍。

申酉生人，白帝，西嶽華山命，係

七氣天西斗領籍。

亥子生人，黑帝，北嶽恒山命，係

五氣天北斗領籍。

辰戌、丑未生人，黃帝，中嶽嵩高

山命，係一氣天中斗領籍。

正月生人，四月胎，丹天降真。

二月生人，五月胎，丹天降真。

三月生人，六月胎，黃天降真。

四月生人，七月胎，素天降真。

五月生人，八月胎，素天降真。

六月生人，九月胎，黃天降真。

七月生人，十月胎，玄天降真。

八月生人，十一月胎，玄天降真。

九月生人，十二月胎，黃天降真。

十月生人，正月胎，青天降真。

十一月生人，二月胎，青天降真。

十二月生人，三月胎，黃天降真。

星屬

子生人，屬第一陽明星。

丑亥生人，屬第二陰精星。

寅戌生人，屬第三真人星。

卯酉生人，屬第四玄冥星。

辰申生人，屬第五丹元星。

巳未生人，屬第六北極星。

午生人，屬第七天關星。

正月、二月生，青天度氣統真。

四月、五月生，赤天度氣統真。

七月、八月生，素天度氣統真。

十月、十一月生，玄天度氣統真。

三月、六月、九月、十二月生，黃天

度氣統真。

右已上，填八景紫虛籙，及紫虛

表，並同用。

仙召

正月生，被微清氣君召。

二月生，被玉理通氣君召。

三月生，被中玄曜氣君召。

四月生，被下玄微明化氣君召。

五月生，被左官歷氣君召。

六月生，被中官左歷氣君召。

七月生，被左官歷氣君召。

八月生，被中夷化氣君召。



九月生，被中辟萬道氣君召。  
十月生，被上始明歷氣君召。  
十一月生，被上始明歷氣君召。  
十二月生，被始明道氣君召。  
右件召，與金剛童子錄通用。

靈召

正月生，被東上夷君召。  
二月生，被東中夷君召。  
三月生，被東下夷君召。  
四月生，被南上蠻君召。  
五月生，被南中蠻君召。  
六月生，被南下蠻君召。  
七月生，被西上戎君召。  
八月生，被西中戎君召。  
九月生，被西下戎君召。  
十月生，被北上狄君召。  
十一月生，被北中狄君召。  
十二月生，被北下狄君召。  
右件召氣，諸治並同用。  
上清謁版文十七片，長一尺  
鬱單无量天玉郎門下。  
禪善無量壽天玉郎門下。  
梵監須延天玉郎門下。

寂然兜術天玉郎門下。  
波羅尼密不驕樂天玉郎門下。  
化應聲天玉郎門下。

梵寶天玉郎門下。

梵摩迦夷天玉郎門下。

波黎答想天玉郎門下。

南嶽上真紫虛元君魏夫人門下。

玄師楊真人門下。

侍帝宸許先生門下。

太極真人徐法師門下。

太上玄一第一真人門下。

太上玄一第二真人門下。

太上玄一第三真人門下。

太上正一真人三天法師門下。

真文謁版十五片

東方無極太上靈寶天尊、東鄉諸

靈官座下，洞神弟子某乙，稽首再拜

謁。已後十方，並五真人準此

道德刺版文十二片，九行界

某府、某縣、某觀，正一弟子某乙，

年若干歲，請受老子《道德經》。

上清玄都大洞三景弟子，奉行三

洞法師臣某乙稽首再拜，白刺。

右牒，府縣宮觀年名，所請經法，具如前件，明日卯時付授。謹以今時，先白版刺請某官兵馬，至時監臨。臣某乙稽首再拜，白刺詣。

太歲某月、某朔某日、臣姓，某府縣觀，今於某處宮觀中，白刺其官門下某官如後：

天官、地官、水官、青帝、赤帝、黃帝、白帝、黑帝、司命、司錄、司非、司危。

諸治名目

陽平治，左平氣，金。鹿堂治，右平氣，木。

鶴鳴治，左長氣，金。漓沅治，右長氣，土。

葛瓊治，左都領氣，火。更除治，右都領氣，水。

秦中治，左領神氣，水。真多治，右領神氣，金。

右八治，上品，无上治。

昌利治，左都監氣，土。隸上治，右都監氣，土。

湧泉治，左監神氣，木。具山治，右監神氣，金。

稠稷治，左監察氣，水。本竹治，右監察氣，木。

蒙秦治，左領功氣，火。平蓋治，右領功氣，土。

右八治，中品，玄老治。

雲臺治，左監功氣，火。澣口治，

右監功氣，木。

後城治，左都氣，土。公墓治，右

都氣，金。

平剛治，左貢氣，水。主簿治，右

貢氣，金。

玉局治，左察氣，水。北邙治，右

察氣，土。

右八治，下品，太上治。

《三師五保名諱形狀居觀方所次

第經》云：非師不度，非師不仙。又

云：先存三師，然後行道。凡欲讀經

講誦，行道燒香，入室登壇，皆先禮師

存念。次當起願，開度九祖，及以己

身，此法不遵，真靈不降。禮師須知方

所，存念則審識形容。受道之時，師當

指授。故自正一已上，至乎洞真，參受

三師名諱、形狀、住觀方所，具列如左。

### 三師諱

大明某年、某歲、某月、某朔、某

日，某子，某州、某縣、某鄉、某里、某

觀，正一盟威弟子，係天師某治、太上

中氣某氣、正一盟威弟子，三五步綱元

命真人、北斗七元真人門下大都功金

鈕弟子、太上高玄法師某先生，太玄都

太上三寶弟子、洞淵神呪九天法師小

兆真人、洞神弟子、洞神太一金剛畢券

弟子、靈寶昇玄內教法師、靈寶弟子、

洞玄弟子、太上靈寶无上洞玄弟子某

嶽先生，洞神三皇內景弟子、太上靈寶

无上洞神弟子、太玄河圖寶籙九宮真

人、上清弟子、上清大洞弟子、上清大

洞三景弟子某嶽真人，上清玄都大洞

三景弟子某嶽真人，姓名，年若干歲，

本命，某子，某月生。今於本府縣某觀

中，奉受正一及三洞經法，請三師名諱

如左：

度師，上清玄都大洞法師，姓名，

年若干歲，次形赤。

籍師，上清玄都大洞法師，姓諱，

年若干歲，次形赤，唐色，少有髭。

經師，上清玄都大洞法師，姓諱，年七十二，次黃白色。

### 臨壇三師名諱

上清玄都大洞法師姓名。

上清玄都大洞法師姓名。

上清玄都大洞法師姓名。

### 五保師名諱

上清大洞三景弟子姓名。

上清大洞三景弟子姓名。

上清太洞三景弟子姓名。

上清太洞三景弟子姓名。

上清大洞三景弟子姓名。

右三師五保，皆是師之同學、高

德、親知，或上足弟子、後彥英才，同為

署辟，更相獎勸，敬之如師，號曰三師。

奉獻巾刀，以其拂拭塵垢，斷割纏縛，

解釋煩惱之羅，破除障滯之網，義存解

脫，逍遙淨明。淺識末學，忽叨此籙

云：弟子某甲，謹依師法，受三師名諱

如前，終身存念，不敢違犯。違者，七

祖同受風刀，稽首再拜。

凡寫師諱，經、籍、度師等，皆須具

所屬州縣觀、年、姓名、形狀、法位，臨

壇三師、五保，不用年幾，亦須具法位。

上將軍一人，偏將軍一人，中將軍一人。

右男女受取此三將軍，男則取左，女則取右，常例也。

### 填三將軍錄中君召

子生，中玄三氣君召。丑生，下玄三氣君召。

寅生，泰始三氣君召。卯生，上始三氣君召。

辰生，中始三氣君召。巳生，下始三氣君召。

午生，泰元三氣君召。未生，上元三氣君召。

申生，中元三氣君召。酉生，下元三氣君召。

戌生，泰玄三氣君召。亥生，上玄三氣君召。

右三將軍錄，隨人所屬召，十二月生召，同此用之。

### 上清儼版文

五行界

大明某年、太歲某甲、某月、某朔、某日、某甲、某處、某觀道士某乙，年若

干歲，謹拜受蓬萊高上真書玄成青天上皇，昔以傳審封，佩此真策，橫行江河四海，群龍衛從，水精震伏，一名蓬萊太玄之札，一名九流真書。北陵丈人，以授馬皇，致龍來乘而昇天。

### 三皇儼版文

五行界

大明某年、太歲某甲、某月、某朔、

某日、某甲、某處、某觀道士某乙，年若干歲，今奉受太上本文三皇符傳，以劾召萬神某，為君遊行天下名山大川，群靈司迎，出入天門，上謁真人，如九老仙都符信。

### 五符儼版文

五行界

大明某年、太歲某甲、某月、某朔、

某日、某甲、某處、某觀道士某乙，年若干歲，今奉受三天太上八威神策，以召伏山精龍虎，入山林，渡江海，履刀兵疫毒，千災萬害，不得加某乙身。

### 真文儼版文

師文有符者是

大明年、月、朔、日、某辰，靈寶某

帝真人某乙，佩元始上三天、太上大道君制六天、總八威策文，召天下神，攝地束靈，封山呼雲，制河上龍，承師某

帝先生某君元始之章。

### 下版

弟子文

某府、某州、某縣、某觀弟子某乙，年若干歲，某月生。太歲某子、某月、某朔、某日、某辰，謹於某氣天中，請太上靈寶八威策文。

### 天師治儀上

十二世孫、梁武陵王府參軍張辯撰。

### 治名氣

第一陽平治。主金

上治角宿，在蜀郡繁縣。

第二鹿堂治。主木

上治亢宿，在蜀郡繁縣。

第三鶴鳴治。主金

上治氏宿，在蜀郡臨邛縣。

第四瀆沅治。主土

上治房宿，在蜀郡繁縣。

第五葛瓊治。主火

上治心宿，在蜀郡繁縣。

第六更除治。主水

上治尾宿，在廣漢郡陽泉縣。

第七秦中治。主水

上治箕宿，在廣漢郡綿竹縣。

第八真多治。主金

上治斗宿，在蜀郡新都縣。

右上八品，無上治

第一昌利治。主土

上治牛宿，在廣漢郡雒縣。

第二隸上治。主土

上治女宿，在廣漢郡陽泉縣。

第三涌泉治。主木

上治虛宿，在廣漢郡綿竹縣。

第四具山治。主金

上治危宿，在犍爲郡南安縣。

第五稠稷治。主水

上治室宿，在犍爲郡南安縣。

第六本竹治。主木

上治東壁宿，在犍爲郡南安縣。

第七蒙秦治。主火

上治奎宿，在越雋郡都縣。

第八平蓋治。主土

上治婁宿，在犍爲郡江陽縣。

右中八品，玄老治。

第一雲台治。主火

上治胃宿，在巴西郡閬中縣。

第二濫口治。主木

上治昴宿，在漢中郡江陽縣。

第三後城治。主土

上治畢宿，在漢中郡南鄭縣。

第四公墓治。主金

上治觜宿，在漢中郡南鄭縣。

第五平岡治。主水

上治參宿，在犍爲郡南安縣。

第六主簿治。主金

上治東井宿，在犍爲郡棘道縣。

第七玉局治。主水

上治輦鬼宿，在蜀郡成都縣。

第八北邙治。主土

上治柳宿，在京兆府長安縣。

右下八品，太上治。

太上以漢安二年正月七日中時，

下二十四治，三八應天二十四氣，合二

十八宿，付天師張道陵，奏行布化。受

者，上厨，飯賢二十四人。

左平氣一，陽平鹿堂右平氣。

左長氣二，鶴鳴瀛沅右長氣。

左都領三，葛瓚更除右都領。

左領神四，秦中真多右領神。

左都監五，昌利隸上右都監。

左監神六，涌泉具山右監神。

左監察七，稠稷本竹右監察。

左領功八，蒙秦平蓋右領功。

左監功九，雲台濫口右監功。

左都氣十，後城公墓右都氣。

左貢氣十一，平岡主簿右貢氣。

左察氣十二，玉局北邙右察氣。

右陰陽二十四氣官祭酒位號，同

日付道陵。氣唯二本，宛同如上，餘三本從長氣

以去，各各顛倒，不可校理。今定以宛同爲是，故加

朱筆記識次第，並各以次配治。於其下竟，尋陰名

屬女，陽號主男，男則左平，女則右平，積舊相害，斯

傳爲元，何以覈諸。出官儀云：男女氣二十四，明

男女共茲十二，左右倍之，爲二十四耳。事據有所，

幸無疑難。或云：陽平得左平，鹿堂得右平，豈有

男受鹿堂，反無陰名，女佩陽平，越任男號哉。斯理

決非，其典他做此。

第一剛互治。主火

上治星宿，在漢陽縣界。

第二白石治。主金

上治張宿，在漢陽縣界。

第三鐘茂治。主水

上治翼宿，在涪口縣界。

第四具山治。主土

上治軫宿，在廣陽縣界。

天師以建安三年《太真科》云元年正月七日，出下四治，付嗣師，嗣師付系師，以備二十八宿。受治，飯賢十八人。《大真科》云：在外名別治，在內名備治，足二十四，備二十八也。別治與三八別也。

第一漓沅治，主金配昌利治。

第二利里治，主木配隸上治。

第三平公治，主水配湧泉治。

第四公慕治，主土配稠稷治。公慕名，同下八第四治。

第五天臺治，主木配本竹治。

第六瀨鄉治，主水配蒙秦治。

第七樽領治，主水配平蓋治。

第八代沅治，主金配雲臺治。

天師以建安元年十月五日日出時，下八品配治，付嗣師，嗣師傳付系師。受治，飯賢十四人。一本云十四人，一本云十二人，一本無飯賢。若承前來云，次而降十四數，允十二，恐誤。而四本並有石室，无樽領，无石堂，《太真科》亦无石堂，而有樽領，今定取樽領爲是也。尋斯並配中八，而獨闕具山，越及雲臺偏配其中以來，可領闕一，彌生其感焉，而不見在郡縣疑逐配，所在未詳也。

第一峨嵋治，主金在蜀郡。

第二青城治，主水在蜀郡。

第三太華治，主木在京兆長安。四本作木葉，誤也。《太真科》亦位太華。

第四黃金治，主木在蜀郡曲陽縣。

第五慈母治，主金在成都郡。

第六阿逢治，主火。

第七平都治，主水在犍爲郡。

第八吉陽治，主土在魏郡鄴縣。

右八品，系師所立，以建安三年十月五日布。受治，飯賢十二人。此名遊治次第，今與《太真科》參同爲定。而儀或云：吉陽第七，平都第八，沒爲非。

左領訣一，峨嵋右領訣。

左宣威二，青城水右宣威。

左功平三，太華右功平。

左廉平四，黃金右廉平。

左行教五，慈母右行教。

左威儀六，阿逢火右威儀。

左承氣七，平都右承氣。

左建儀八，吉陽右建儀。

右十六官祭酒，系師所立。唯二本次第，宛同如上，三本已復，顛倒難詳。尋此官既系師所立，還應以配系師所布峨嵋等治。今各注治於下竟，若配治，當用前都監以下氣，別當用監功以下

氣。可各復依次第配也。

都合四品、四十四治。按治儀式，從早

至尊，先遊治一次，別治二次，配治三次，三八正治

四次，四品治也。《太真科》所列：第一別治、第二遊

治、第三配治、第四同治。推科而言，便是遊治尊於

別治，此非也。何以知之？遊治系所立，別天所付，

付以備宿春秋之義。子不先父，安有孫立。而尊乎

祖哉，斯決非也。定依戎釋之旨，畢遊尊別，是真得

矣。

功平職，主天地氣數，與師併位，

統領諸治，攝知鬼職。

本命符


元治青帝真符東嶽先生某乙，年

若干，本命某某月生。


元始青帝真符青書赤地

元始赤帝真符朱書黃地


元始黃帝真符 黃書白地



元始白帝真符 白書黑地



元始黑帝真符 黑書青地




騰天藉地符




三皇版符 黃地版衣紫紋七尺



上清版符 黃地版衣碧文七尺




五符版符 白地版衣絳文七尺




真文版符 黃地版衣絳文一丈二尺




真文觀版符 黃地




策杖內符 朱地青符




黃地朱符




白地黃符



黑地白符



青地黑書



受錄次第法信儀

(吳亞魁點校)

# 019 要修科儀戒律鈔

經名：要修科儀戒律鈔。原題朱法滿撰。十六卷。底本出處：《正統道藏》洞玄部戒律類。

## 目錄

### 卷一

部秩鈔  
傳經鈔  
折傳鈔  
年限鈔

### 卷二

寫經鈔  
存念呪鈔  
講說鈔  
發心鈔  
受持鈔

### 卷三

### 卷四

衆戒及願念合一千一百條

### 卷五

### 卷六

### 卷七

罪報科

三元罪戒品目

### 卷八

齋名鈔

齋月鈔

齋日鈔

齋時鈔

法師鈔

都講鈔

監齋鈔

侍香鈔

侍燈鈔

### 卷九

衣服鈔

禮拜鈔

坐起鈔

監齋鈔

食禁忌鈔

### 卷十

一治屋

二治名

三治所屬

四治室

章表

治病忌日

### 卷十一

章科信儀

疾病請章次第

避忌諱上章

上章背向

若用日者

雜犯科

上章筆硯

案

書符者

藏章故本

斷章法

### 卷十二

飯賢緣第一

造殿堂緣第二

念道緣第三

殮穢緣第四

盜賊緣第五

過咎緣第六

善功緣第七

度人出家緣第八

卷十三

雜科第一

同學緣第二

造壇緣第三

碑闕第四

卷十四

飲酒緣

斷穀服藥緣

服符水斷穀

治祝緣

卧枕緣

卷十五

道士吉凶儀並序

通啓儀第一

吊喪儀第二

疾病儀第三

初死小殮儀第四

入棺大殮儀第五

卷十六

梵誦三契

禮懺文

章法

成服儀第六

送葬儀第七

安靈儀第八

弟子歸本觀儀第九

除服儀第十

要修科儀戒律鈔卷之一

三洞道士朱法滿撰

部秩鈔

夫聖人應物，必資經教，不立真寶，成濟何由。口吐瓊文，演茲靈祕，還淳反樸，要此憑心，就學有方，現於斯矣。《生神章》曰：天尊以龍漢劫說洞真經、赤明劫說洞玄經、開皇劫說洞神經，此三洞尊經，備明奧典，隨方教化，開度天人，能使六道歸真，三乘體悟。行有高下，法有淺深，三十六部，自茲彰著。《真藏經》云：一者上清，二者妙真，三者太一，四者妙林，五者開化，六者仙人，七者黃林，八者上真，九者道教，十者上鍊，十一者上妙功德，十二者道德。此十二部經，蘊在大洞玉清境藏中。一者洞玄，二者元陽，三者元辰，四者大劫，五者上開，六者內音，七者鍊生，八者靈祕，九者消魔，十者無量，十一者按摩，十二者上通。此十二部經，在上清境藏中。一者太



清，二者徹視，三者集仙，四者洞淵，五者內秘，六者真一，七者集靈，八者中精，九者無量，十者集宮，十一者黃庭，十二者小劫。此十二部，屬太清境藏中。此則三洞著經，列於金格，七聖垂範，明乎玉篇，萬劫一開，法隨人出。

《太真科》曰：太上老君以漢安元年五月一日，於鶴鳴山授張道陵正一盟威之經九百三十卷、符圖七十卷，合一千卷，付授天師大洞真經二十一卷，授於已成真人。《太平經》云：真人問曰：何爲天經？何爲地經？何爲人經？何爲道經？何爲聖經？何爲賢經？何爲吉經？何爲凶經？何爲生經？何爲死經？神人曰然：修積真道，道者，天經也，天者好生，道亦好生，故爲天經；修積德者，地經也，地者好養，德亦好養，故爲地經；修積和而好施與者，爲人經，和氣者，相通往來，人有財亦當相通往來，故和爲人經也；修積上古、中古、下古道辭爲道經；修積上古、中古、下古聖文爲聖經；修積上古、中古、下古賢辭爲賢

經；其師吉者，爲吉經；其師凶者，爲凶經；其師生者，爲生經；其師死者，爲死經也。法由聖顯，道寄人弘。道經云：侯王若能守萬物將自化，當知人王有道，大道興隆，人王無道，大道廢矣。

### 傳經鈔

夫白羽黑翻，標出代之辭；金魚玉龍，豈常人之信。可傳而不可受，難見而亦難遵。特由器宇淺深，緣生麤細。元始明三乘之法鏡，總括殊流；高上開二卷之微言，咸令反一。《本相經》云：身者，三惡之根，神仙之本，一名良福田，二名疾藜園，三名種子戶，四名棄生門，五名道之域，六名膿血村，七名珍寶器，八名瓦礫盆，九名明智室，十名九夜昏人。能知斯理，可名爲真人。然而有言無實，不可聞經；有實有言，乃可傳授。《昇玄經》云：末世人民，有三可畏，宜善詳焉。一者道義嫉妬可畏，二者誹謗可畏，三者貪欲可畏。道義嫉妬，則經法不行；誹謗法師，則使百姓信道不濃；

貪欲財色，人所棄薄。此三者，二在外，一者在內，除此三患，乃可傳道。《本際經》云：具十善願，便可授之。何謂十善願？一者願離世間穢雜境土；二者願得出家，捨俗恩愛，隨緣告乞，廣建福田，常行慈忍，永離人我；三者願逢勝友，引接開示；四者願值明師，謚受上道；五者願聞正法，如說奉行；六者願見天尊，親承聖旨；七者願度一切，後已先人；八者願以法音，廣宣愚暗；九者願諸衆生，皆發道意，勸造經像，修營靈觀，香花燈燭，隨力供養，令諸未悟，普見法門；十者願我此心，堅固不退。具此十願，乃可授之。《昇玄經》云：來世欲流通《靈寶內教經》者，有十一事，信著萬民，爾乃可得宣傳此經。一者奉戒完具，內無毀滅；二者賑給孤老貧窮，有慈愍心；三者勸人遠惡，修善慇懃如父子；四者不求名譽，稱毀如一；五者幽隱之處，勤行禮拜，修諸功德，如處大衆；六者不欺，使民信之如四時；七者總棄榮華，位不加身；八者捨遠

妻子，獨處閑靜；九者親近賢智，博問善道；十者雖在幽冥，不可孤心，與賢者論議，莫自專執；十一者常行謙卑，恭敬於人。是為十一事，通內教行。又有十相，可傳與此經。一者好求勝法，從善如流；二者好近賢智，無猜疑行；三者聰詰，賞別真偽；四者謹慎，言不過行；五者柔和，少無過惡；六者能師勝己，無驕慢心；七者敬師重教，如貧得寶；八者能奉師長，不辭勤勞；九者已於先師，有報復心；十者懇勸請受，晝夜不懈。是為十相。又云：或在下賤，內有實德，人所未悉，其人堪持此法者，出在非意，人所不疑處，當傳授此經。《玉經隱注》曰：受經不敬，師資修之，亦無感而後生疾病及六畜之中。《太平經》云：是其人而不傳，名為閉天之道，其害在己；非人而傳之，後蒙其咎。《定志》云：是其人不授，令人與道隔；非人而趣授，現世被考責，二明犯科。夫羸行易染，妙行難遵，學者如林，成者未一，纔虧正典，即結罪科。《女青律》云：受道不

知輕重，傳非其人，貪財受利，取人自益，借物不還，以為私寶，天奪筭一千二十四。

律曰：不得妄傳經寶，授與於不信，泄真要訣，天奪筭九萬六千。《黃籙簡文》曰：未合傳經而妄傳，考由明梵曹；三被風刀，揚而強傳，考由司正曹；齎信詣師，階品未合，威勢怒師，考由四明曹；不依俯仰之格，考由大儀曹；受經慳吝，不備法信，考由監天曹；不關盟五帝，私相傳度，考由司殺曹；輕泄經目，放露天真，考由盟天曹；香燈不如法，考由威靈曹；不為經師，開度弟子三人，籍師七人，度師九人，並考由明威曹；為三師建功既足，年限又登而故蔽匿，斷絕法門，考由太陰曹；受法之後，不建善功，考由明都曹；受法之後，不廣開化，度物無名，考由下元曹；受法之後，不為三師立願，考由明都曹；受法之後，不度一人，抑絕賢路，自取功名，考由幽都曹；身受經法，不安齋堂上座斗帳香燈，考由明都曹。

《明真科》曰：受真文各用命繒計歲，餘壹有關，考由玄曹。

科曰：受真文，用金龍三枚，投於水府及山宅，不投三處，三官拘人，命籍有違，考九都曹。

科曰：五帝紋繒，各四十尺，以關五帝為告誓之信，有違，考泉曲曹。

科曰：用上金五兩，以盟五嶽為寶經之信，有違，考陰官曹。

科曰：用金錢二十四萬，以質二十四氣，無金錢，銅錢亦可，有違，考都神曹。

科曰：香燈以開九府，有違，考太陰曹。

科曰：受經不持齋，有違，考太陽曹。

科曰：天文祕重，非信不寶，故上聖以信效心，無信則為賤道，無盟則為輕寶，有違，考左右官曹。

科曰：經不師受五帝，無盟妄披篇目，罪同竊經之科，考由明法曹。已上諸條，難遵易犯，尋文撫卷，莫不寒心，端坐勿傳，便為遏絕，始順來意，十

行全乖，進退思量，永炭交結。況乃貪殘之輩，鞅固爲心，不問前人道行，唯欲弟子寶有，傳經不上寶義，何曾借問制伐，既無啓齋科信，寧有關盟軌則，弟子既見師例，後日亦學此傳，不懼冥府書懋，只覓名聲財利，毀道敗法，正由此人。《西昇經》云：迷迷以相傳，輾轉相授與，邪僞來入真，虛無像如有，自僞不別真，爲貪利往守，非常正復忘，癡盲持自咎，如木自出火，還復自燒腐。信哉斯言，幸相自勵。

### 折傳鈔

《明真科》曰：受真文法信，當十分折二，以送祖師，又折二散乞貧人。山栖道士餘信充香燈，爲弟子立功，違犯，考三官曹。

《太真科》曰：受天師治，割配領戶，不得同自化十二之折當中，分其功十折五。進入天師治，宣示此令，咸使知聞，如其有違，五刑律論。

《四極明科》曰：凡傳上清寶經，受弟子信物，三分散之一分，投於山栖，以卹窮乏之士，一分供己法服，一

分以爲弟子七祖立功。投物於山栖之日，當願天下窮乏之人、清苦隱學，並早得道，度世昇仙。作己法服之日，當願兆身與神仙同色，衣冠法服，得仙法則。明燈捻香，當願弟子及兆之身七祖父母，早離刀山、三塗五苦之中，昇度南宮，反胎更仙，事事如法，剋得道真，違盟負科，考及兆身。

科曰：受上清寶經，質信詣師，未充科限。受經之後，年數應傳，皆不得受。他信人已。皆當傳送先師，備充先限，然後乃得三分散之，爾若違科，考及七祖。

《明真科》曰：受經之身，先信未備，後遇賢人，質信請受，皆當以所受之信，充備先師之限，餘者可得爲身法用，有違，考火官曹。已上三處，折傳不同，隨經進退，今人十二折傳，盡營身口，上慢下暴，輕脫之甚矣。

### 年限鈔

夫聖人隨劫，輪轉感應，道交是真，乃傳非賢，不授五稱。符曰：學道受經後四十年傳一人，已延壽者四百

年傳一人，得地仙者四千年傳一人，得天仙者四萬年傳一人，得無上道者四萬劫傳一人，太上靈寶大法傳授之科備矣。《登真隱訣》曰：天真授書，靈人授書，三千年六傳，二千二百年傳十人，千年五傳，七百年三傳，已上年限，並是聖帝相師玉籍金科，非代間可擬。《聖紀經》云：夫有金格玉名者，則眼有日光，青齒白血；若上清有金書玉籙者，則背誌如河魁，胸前有偃骨；若太極有丹簡青文者，則手理有累人倒大之字方；諸有玄青紫名者，則眼有四規，中有紫光；若太清有玉籍者，則聲有玉音金響，口方目圓；若太素有金名者，則白誌見於腹，口中有紫氣；斗中有玄籙者，心中有九孔，肺外錦文，頤下有玉丸，目中有綠筋，眉角有上干。如此之相，仙真之流，出處行藏，本非尸解，傳授年限，聽可依前。今日人師，促齡難保，預逢經教，芥子投鋒，得在受書，盲龜遇孔，若約年限，恐與願違。但令行以慈仁，心懷至道，合前十願，乃可授之。

《登真隱訣》云：有至學之子，唯當勤心幽靈，啓請玄師，才分苟合，必將感悟，得是衆真應付之限，然後乃盟，盟而修，修而必終，吾將分金與之，爲友不如此者，無煩強營，徒守之滿笈，適足累其七祖，考河之石，彌增其多耳。古人謂之皮好，吾今號爲耳學，所以聞道則膝行，道寂則俱亡也。夫道必須授受乃得，遵修者非爲徒然，如世中禁術，若非傳受，則用之不行，舉此一言，足以深悟。

《玄都律》曰：道士女官，身上佩吏兵，不得浪傳授他人道法，若有至心精勤之人，聽可若授，惡逆之人，三世被考。《自然訣》曰：傳授先齋三月，或十日、三十日、二十日竟，師與弟子俱登名山峰壇石上傳經，弟子受經之後，若便有至人丹心好道者，乃齋寶信，求受可授，不須年限，竟而無其人，後聽並傳其法信，爲一切作福田，不得師自私用，其罪深重。

《明真科》曰：浮好三寶，執心不專，輕怠經法，穢慢靈文；或傳授弟

子，不依科年；或不關天地，私傳無盟，自作一法，違負四盟；或齋戒怠慢，傲忽上真，其罪深重，死被髡鉗，循上劍樹，八達交風，吹樹低昂，足落刀山，往返無數，手體爛傷，痛不可忍，毒不可任，萬劫當得還生下愚之中；或嬰六疾，聾盲不聰，長與道隔，永遠學門，轉輪五苦，沉淪罪因，不得開度，長植惡根，非法傳經，自招此考，師資貴愛，妙之道也。

要修科儀戒律鈔卷之一

要修科儀戒律鈔卷之二

三洞道士朱法滿編

寫經鈔

夫龍章炳著，鳳篆流慈，紫筆題篇，青林奏響，浮黎國土，廣度天人，冶鍊池中，高明智炬，皇人注之於曩劫，青童授之於往年，既開元始之章，便勒帝君之筆，法橋以架，福岸可登，抄寫書治，於斯見矣。《本際經》云：若復有人，紙墨縑素，刻玉鏤金，抄寫素治，裝褫條軸，流通讀誦，宣布未聞，當知其人已入道分，名書金格，列字玉篇。大戒云：抄寫經文，令人代代聰明，博聞妙蹟，恒值聖代，當知今日，明賢博達，皆由書寫三洞尊經，非唯來生得益，及至見在獲福。大戒云：抄寫尊經，一錢已上，皆得七十四萬倍報；萬錢已上，報不可稱。然捨一得於萬倍，常所讚嘆，何況七十四萬之倍，功德巍巍，富貴之家，可是虛受。

《千真科》云：若寫三乘經寶，本

寫大乘而寫中小者，得五逆罪；本寫小中令寫大乘者，無犯。

### 存念呪鈔

夫經出聖口，法乃凡修，妙意難詳，羸心易滯，既立文字，必不孤然，部秩有殊，存念亦異，依所誦習，各明典制。

一誦《本相經》，存念。先鳴法鼓三十六通，禮經三禮，呪曰：玄玄至真道，清淨歸冲寔，天真洪曜集，百靈交景日，四輩傾心享，故集大仙質，天堂周時開，咸爾等檢膝，妙品布宣化，拔度三塗出。

二誦《黃庭經》，存念。《四極盟科》曰：誦《黃庭經》，當燒香清齋，身冠法服，入戶北向，四拜長跪，叩齒二十四通，上啓高上萬真玉晨太上大道君，甲今當入室，誦詠玉經，鍊神保藏，乞胃宮華榮，身得乘虛，上拜帝庭，畢還向東，四揖太帝。又叩齒十二通，上啓扶桑大帝、暘谷神王，甲今入室披詠玉經，乞使靜室，英芝自生，玉華實耀，三光洞明，萬徧胎仙，得同帝靈。畢，

東向誦十徧爲一過，一過竟，便還北向四拜，東向四揖，不須復啓，若違科，風刀之考。

三誦《老君經》，存念。《太極隱訣》曰：先燒香，整法服，禮十拜，心存玄中大法師、老君河上真人、尹先生。因《開經蘊呪》曰：玄玄至道宗，上德體洪元，天真雖遠妙，近緣泥丸君，宮室皆七寶，窗牖自然分，清淨常致真，駕景乘紫雲，日月左右照，昇仙長年全，七祖上生天，世爲道德門。畢叩齒三十六通，咽液三十六過，先心存左青龍、右白虎、前朱雀、後玄武，足下八卦神龜、三十六獅子伏在前，頭巾七星，五臟生五氣，羅文覆身上，三一侍經，各從千乘萬騎，天地各有萬八千玉女玉童衛之。讀經五百言，輒叩齒三、咽液三也。

四誦《上清經》，存念。《金錄簡文》曰：讀《上清經》，當北向，經前九拜，向東上座，左轉北向。《玉經隱注·開經蘊呪》曰：微微玄宗門，煥朗徹崆峒，至道由靜默，當見三素宮，大道於

此成，驂景乘雲龍，左右侍經人，玉女及玉童，身濟不死津，解羅順靈風，七祖及胎生，世爲神仙宗。《金錄簡文》云：當叩齒九通，思九色雲氣覆滿室，青龍白虎、獅子玄龜、仙童玉女、三界五帝之官，備衛左右，前後便行，乘天偃地而誦經，經竟，當從西面下床，禮如初。《玉注》云：叩齒三十六通，咽液三十六過，先存徊風混合帝一、百神萬真，然後讀經。

五誦《靈寶經》，存念。《金錄簡文》曰：讀《靈寶經》，當東向，經前燒香，禮三拜，北向上座。《玉經隱注·開經玄蘊呪》曰：寂寂至無宗，虛峙劫仞阿，豁落洞玄文，誰測此幽遐，一入大乘路，孰計年劫多，不生亦不滅，欲生因蓮花，超凌三界塗，慈心解世羅，真人無上德，世世爲仙家。畢，叩齒三十六通，咽液三十六過，存五藏五色之氣，上注五星之精而讀經。

六誦《三皇經》。《金錄簡文》曰：讀三皇文，當南向，經前燒香再拜，西向上床，左轉南向。《玉經隱注·開經

《靈呪》曰：太上定神符，勒命天地惠，聞召不俟駕，萬仙儵忽萃，招靈無小大，豈況於滓穢，清齋絕人事，眇然與神對，上昇玉清宮，邀宴九遐外。畢，《簡文》云：當叩齒三通，思三色雲氣覆滿一室，青龍、白虎、朱雀、玄武，備守四方，神童玉女，營衛左右，咽氣三過而誦經，經竟，當東面下床，禮如初。

七步虛。《玉經隱注》曰：誦步虛經時，先叩齒三下，咽液三通，心存日月，在己面上，從鼻孔入洞房金華宮，光明出頂後，煥然作九色圓象，薄入玉枕，徹照於十方，隨我繞經旋迴而行矣。日從鼻左入，月從鼻右入，畢又叩齒如初，因誦命魔密呪。百姓齋威儀云，命魔呪曰：黃中策氣斬妖，宗察制強，精斷邪翁，太上有命，太上房急召北帝，詣玉宮，受承威令，宣魔王五氣，翁鬱與命，衝祕藏玉，文方就隆，三天運明，六天運終，賢者哉。都講可唱云：衆官各思九色圓象，咽液三通，存命魔密呪，步虛如法。

入出道戶，存念《金籙簡文》。朝

入道戶齋堂，於戶外，叩齒三通。呪曰：四明功曹、通真使者、傳言玉童、侍靖玉女，爲我通達，道室正神，上元生氣，入我身中。便進《老子存思圖》

曰：四明功曹一人，通真使者一人，傳言玉童二人，侍靖玉女二人。《金籙簡文》云：夜入道戶，於戶外向戶叩齒三通。呪曰：四上功曹、龍虎使者、正一生氣、侍靖素女，夜有啓請，願開明童子、上玄少女，與我俱入黃房之裏，通達所啓，皆使上聞。便進《老子存思圖》云：四上功曹一人，龍虎使者二人，侍靖素女一人，開明童子一人，上玄少女一人。《金籙簡文》云：出戶，又叩齒三通。呪曰：出陰入陽，萬神開通，關啓事訖，請閉黃房，侍靜玉女，明備神宮。《存思圖》云：玉女者，是自然妙氣，應感成形，形質明淨，清皎如玉，隱而有潤，顯又無邪，學者真階，漸昇，進退在形，出入在道，道氣妙微，洪纖畢應，應引以次，從卑至尊。故白日則玉女守宮，夜則少女通事，濟度危難，登道場也。《金籙簡文》云：夜出

戶左顧，又叩齒三通。呪曰：玄上太陰，八窗開明，向有所陳，少女通靈，事畢復位，萬神潛寧。

### 講說鈔

夫真經聖典，煥發諸天，玉字金篇，流傳今日，道深甚奧，祕藏難開，若非大大能人，寧使迷迷見曉。

一明背向者。《昇玄經》曰：講經之時，法師與經師對坐，座高五尺，坐時東西南北隨便，以三拜爲限。

二明存思者。《老君存思圖》曰：上講時，先存三色，次存三一，行道有六時，上講恒三時，食後上晡人定，三時入齋堂，捻香，禮三拜，巡迴依次坐。坐竟，有衆者法師，以板擊席，仍放板膝前，臨目握固，存頭氣青，兩手氣赤，兩足氣白，三氣繞身訖。次存三一者，三處之神，同一道也。其道本一，應感成三，三界內外，無乎不在。統化主物，號三天；太上宣教侍經，號三素；老君降人成德，號日三一。三一在人，人有三宮，頭腦名爲上元宮，其神曰夷；心內名爲中元宮，其神曰希；臍

下名爲下元宮，其神曰微。皆如嬰兒，俱長一寸，靜坐正拱，無欲無爲，體無應有。次存三師，先起向座，於座前禮三尊，三拜；次仍存經師、籍師、度師，各禮一拜，合六拜，乃登高座。次存侍衛，登座大坐斂板，當以鳴鼓三十六通，咽液三十六過，臨目見左青龍、右白虎、前朱雀、後玄武，足下八卦神龜、三十六獅子伏在前，頭巾七星，五臟生五氣，羅文覆身上，三一侍經，各千聖萬騎、仙童玉女衛之。夫存思爲靜念之首，入定爲息慮之端，辯鑿神遊，不疾而速。座下以存三師三一，上座又思侍衛威靈，三拜足表三尊，六拜乖於四衆。今座下無勞存思，但三拜訖。上座安坐，先存三一，次三師，後存威靈侍衛，稍將簡要存思之法，心想易周，過事盤迴，乃近時務，謹依舊典，書而述焉。

三明讚誦。《本相經》云：齋主請法師開講，便起三上香齋香爐，詣法師前，三拜長跪，請曰：弟子等千載幸會，遭值法輪，元始遺教，流布於世。

今日某雖復奉道，希聞靈音，唯願法師，流布慈澤。法師許欲，昇高座詠曰：

弟子仰法師，敢啓有所陳。衆生闔塞久，思聞至法音。大慈開長夜，設化萬劫新。主人建福齋，延及四輩人。

法師昇高座時詠曰：

齋直道所務，妙品元始貴。故設祖劫橋，廣度諸民物。爾日設清齋，帳座羅五色。天仙遊誕上，五帝列方職。功曹傳符命，擁衛左右直。我昇龍輿座，玉梯附機息。神霄助授護，天魔不舉目。五神不移動，披宣太上域。

定座詠曰：

大道無爲中，積氣運起形。爲衆設橋梁，故遺無等經。修之得長樂，莫有三界生。燒去六塵垢，一心靜念聽。

下座詠曰：

妙品演布化，迢迢霄玄音。等受無礙智，三梁度黃津。神霄功曹使，疲勞小停神。三會因勞賞，當報不負言。須啓更當白，便曹未恚懸。下座服居位，禮拜三寶尊。

夫論修建福田，皆希言簡事，要類以繁重，行者難遵。今人唯受齋主拜請，兼以上座、下座讚誦，足得以成法事，何俟曲碎云爲，故兩存焉，恐情有去取耳。

### 發心鈔

發心者，聞說大乘，皆須夷心注念，歷耳雖言，是一悟入，即乃不同，有六種緣，緣行不等：一則或見邪託正，則知非正；二則或信邪是正，則以入邪；三則或聞大悟小，則入粗；四則或聞小悟大，則入妙；五則或從心進，乃白發願，六則或從心退，乃自成咎。亦由說有巧拙，亦由悟有淺深。《本際經》云：若悟理明師，巧說諸法，無修無得，無滅無生，非有非無，非因非果，而有而無，非不因果，巧解因緣，假名中道，解此說者，能感異類。如《本際經》云：天尊一音演說法，衆生隨類各得解。又如《本相經》所明，天尊於禪黎說洞玄真文，七十萬劫不起于座，七百萬衆悉不迫迨，十方龍王放光而來聽法。天尊弟子靜惠云：龍獸尚復樂

道，而況於人？言畢，龍王忽怒，興雲下雹，積高十丈，於是天尊布五色之氣，結雲成縵，上軒雪雹，不傾不動，說法如故，有此威神，十方通悟。《本際經》云：若說小乘有得之義，生滅相法，有有無，有因有果，如是說者，名為明師。

《大真科》曰：當聽法說，賞議五音，調和五德，時習讚詠，長遠鄭聲，和言徐語，漸息靜辭，誦詠靈文，應和法唱，久剋玉響，世音之根永斷。若修經習業，以千文為先，講說令通，度人濟己，化物無窮，此為大乘之人，雖才議未堪，當發勇猛之志，願得大乘，超出三界，勿戀小乘，貪著利養，樂人天樂，為私己之業，苟存細益，忘忽大功，為人齋章，規化瞋信，醉酒耽色，聲味快心，假言大乘，實不能解，所學小術，妄求大成，誤己墮苦可悲。

《玄都律》曰：法師宣化天下，萬民是救，蒼生之道，不得貪財傳奴婢等法，違律，考病一年。若有德法師，為行清苦，上衣法服，理合供養。大戒

云：施散法師香油、齋食、法服一錢已上，二十四萬倍報，功多報重，代代豐有，恒無窮乏。一則若見邪為正，則知非正者。如《真藏經》云：突敖國王，恒信正道，妖人來，欲化王，令習偽道，變形騰空，音樂讚誦。宮人綵女，觀之迷惑，三七五旬，遂無悟醒。王告之曰：汝是妖邪，急須早去。妖人言：我是正道，勸王修善。王曰：我聞有道士，藏名匿迹，人眾不知，正道杳冥，有形則偽。命臣通靈，令與論說。通靈曰：外道多偽，不足堪談。共論惠源，形無立所，仍即絕對，竄影逃蹤，三千餘人，更無敢出，自然磨滅，國內清正，信向大乘，當知邪不害正，其來久矣。二則若信邪是正，則以入邪者。如《真藏經》云：自通國王，行善智劣，為野狐所惑，野狐語群狐徒眾云：自通國王，樂善棄惡，智淺不深，我有妙術，能飛能隱，向王殿前，去地百丈，為人端正，談空解義，使王布施捨命，攝歸共食，可非上計？群狐徒眾，俱聲唱善。狐王因誦幻術經文數百餘卷，飛

王殿前，去地百丈，坐虛空中，口誦經典。國王眷屬，大小悲泣，嗟嘆無已，出國寶物，悉皆捨施。復有三十餘人，一時捨命。狐王唱言：捨命之人，最是上士。忽作疾風，死屍寶物，悉皆攝去，到群狐窟，共食人肉，復遣狐子，變作人形，齎寶市貨，至屠兒行中。猛狗爭骨相嚙，狐子心怕，不覺變形，狗便嚙殺，屠兒惶怖，即告市官，官告州，州即申奏，王見寶物，俱皆自識。王云：此物並將布施聖道，何故得在野狐手中？時有大臣，名曰仙靈，上白王言：前所說經教化，此是狐魅，但誦其文，不解其理，勸人作善，心口乖違，飛行殿前，即知虛偽。王曰：錯失奈何？仙靈曰：可集軍眾，圍彼丘陵。狐即變作人形，迎王再拜，猛狗來逼，變為野狐，狗即嚙殺。王命群臣，鑿土窟中，大得寶物。當知王無深智，為邪所惑。三則若聞大悟小，則入羸者。如《昇玄經》云：道陵所問云：眾中小行者多，大心者少，若其不說，無由可悟。若說大法，恐迷小機；如說小乘，復迷



大行。天尊曰：此其不難，機在請緣，不論多少。小緣請者，即爲說小；大緣請者，即爲說大。其中悟入，亦復無常，或有聞小悟小，或有聞小悟大，或有聞大悟大，或有聞大反小。昔有善男女等八千四百餘人，雖解信從，執求上道，起有得心，求無得想，封執大乘，人成不業，經四千餘載，正得地仙。四則若聞小悟大，則入妙者。《昇玄經》云：天尊云，我於始青之天大浮黎國初說法時，有一地仙，厥乃姓洪，名曰法起，爲發教緣，請我開說。我觀其人，未宜說大，即隨其心，說三雜經。爾時大衆，無億數人，其中乃有一十八萬六千餘人，聞說小乘，深悟大道，即超三有，迴出道場。五則若從心進，自發願者。《本際經》云：若有讚說，敷揚妙義，應當讚嘆，稱其功德，無使外魔，破亂其事。又云：若講其義趣，勿使法師遇諸橫惱，明以資須，給其所乏，要令妙教，必得流通。《本相經》云：天尊說法之時，八萬四千之衆心開意解，發無上正真之心而不退轉，即

除七十二結、百種煩惱。又云：有長者子，名曰法龍，信解恭敬，有七十二萬人，皆心務真空無上之道。《真藏經》云：天尊說法之時，有三童子，發願各別：一則惠力童子，發願修習；二則寶明童子，發願說經；三則山際童子，發願學道。經云：有惠力童子及諸眷屬，俱發願言，修習大乘，誓無退轉，了諸法性，得到邊底，悟解大乘，成無上道。又有寶明童子，發弘願心，講大乘法，誓度衆生，到解脫處，成無上道。又有山際童子，勇猛精進，發弘誓心，學大乘道，修四大城，決五逆賊，除七惑鬼，殺十礙魔，剗無明障，刻三賊心，堅硬不退。又云：有大弟子，修行讀誦，講說尊經，能生信心，常行不怠，當知是人，於諸尊所，施行功德，而種福田，無量劫來，尊師大乘，今遇此經，能生信心。六則若從心退，自成過咎者。《昇玄經》云：有八百七十二人，聞說大乘，有八男子、十一女人，生不信意，從座而退，爲天魔異道，惑亂其心，此輩即得重病，髮毛隨落，死入

三塗，生輒聾盲，縱有耳目，好言善譽，初不聞見。當知悟法深淺，總從心生，以此諸緣，足明證信。

### 受持鈔

有四緣：夫以經文，誰而能入，雖云空有，非修不成。若以修持，要乎真確，行合規矩，道位遷昇，穢慢靈文，罪罰明矣。

一明讀誦緣者。《四極明科》曰：誦經當令言句相屬，不得越略，天音失一句，更却一百言；而讀失二句，却二百言；失至五句，却五百言，始就誦失一句，便誦一篇而補之，至三十犯，刀山之考。又云：誦經當令目注經文，心念神真，不得臨經，他念異想，以亂天音，三十犯，刀山之考。又云：誦經千言以下，不得臨經進飲；千言以上至五千言，得一進飲；五千言以上，得二進；萬言以上，得三進；至三十犯，身被左官考；若至萬言，神疲氣極，得中住消息，後得續句竟篇，雖爾不得經宿殘句，十犯，死入地獄。誦經時，有善男女欲聽者，得男左女右，東西異

位，道俗殊別，不得男女混亂，同床共席。要在出家人後，不得前行，有犯，身被左官考。

《玄都律》曰：若通經語，論及世務，罰油三升。又云：讀經忽亂，請問敗句，罰油五升。《請問下》云：讀誦如對太上，勿得傲慢狡笑，論及流俗榮利之務，侍經仙童即奏名於三天司直，三天司直上奏太上，三奏太上，子必失經，鬼神亂考，必不得以壽死，將何仙之有？又云：經不從師受，則侍經仙童恒司考人，殃及七世。《金籙簡文》曰：上座誦經，當禮經師、籍師、度師，各一拜，餘如常法，皆始登座，一行之後，重誦經則不復如始也，明日更一過行之耳。誦經之次，不得與下座交語。經句不竟，亦不得中住，若住，後皆更從上始，五百言得進清飲咽液也。此與前《四極盟科》稍有通塞。《盟科》云：萬言得中住，即從前始，前似稍通，此文全塞。誦經時，得存念節度，並不犯科條，立有靈應。《本際經》云：若復讀誦此經，依經修行，晝夜不

懈，是人所在之處，自然安樂，隨所往生，得居淨土。又云：若復有人於此經中，受持一句，意樂諷誦，一念之中，即能滅除無量無邊宿根罪惱。譬如積夜暗室，一念燈明，暗暗皆盡。若入大海，遭值惡風，誦念是經，風浪恬靜；若入山林，逢毒蟲猛獸，誦念是經，蟲獸却退；若值盜賊，冤家相逢，誦念是經，冤仇渙釋；若在怖畏，誦念是經，鬼魅消却。當知夷心注念，無不果剋。大梵國王，為國大旱，迎請尊經，以滅旱災。多惱國王，國多障難，迎請尊經，故疾新痾，並皆痊愈。當知經有威神，誦念必應。《太極隱注》曰：誦《道德經》，常有三萬六千仙童玉女，侍經、燒香、散花，通致衆仙。《隱注》又曰：誦《道德經》萬遍，雲輿下迎，若不至，可一月三誦之，無不至者。《真藏經》云：昔有玉印童子，燒香讀誦此經，忽有仙童玉女，徧滿虛空，一時來至，燒反風名香，讚詠靈文，驚動一國。玉印童子安然不恐，今日建齋之家，亦選能人上座，誦經者雖妙極音句，座下者曾

不存心，或鬧語喃喃，兩兩相對，或爭色欲，或競錢財，大德高枕安眠，低頭踞傲，上既不能秉正，下則豈為虔恭。一則交闕威儀，二則不生善信，三則主人鄙薄，四則宣考至身。幸須三思，寧繁苦勸大德。若能勉勵法衆，何慮不從，頃不切磋，是滅道法。

二明聽誦經之得益緣。《自然經訣》曰：聽誦經人至章句輒心拜，隨意願念，唯令心苦，必有感應。

《玄都律》曰：若聽經倚據不正，罰油一升；若不注念清虛，心想意倦，為衆所覺，罰油三升；若能心聽誦，與自受持無別。《本際經》云：若復有人，一心正念，聽讀此經，歡喜踴躍，得其義味，忘於寢食，不覺為久，當知此人，過去世中，已曾聞值，暫生下世，寄惠人間，不久仙度，終歸得道。

三明供養持經緣。《真藏經》云：天尊問善明童子，有人將金玉重寶並悉捨施，此人功德以為多不？答曰：功德希有，然不及於此經中講說，書寫受持，供養功德，勝彼百千萬倍。此經

名爲惠力法城，善護群生，除邪惑障。《本際經》云：若復有人捨家資財，或賣妻子，市諸香油、種種法具，及以齋食供養資給，持此經人所得功德，最爲無量。何以故？是人能成功十方天尊、出生衆聖。故《昇玄經》云：供養持經者，功德相亞，次供給香油燈，奉上旛花。《本際經》云：若有國王及以民庶殿堂帳座、寶蓋旛幢、香花燈燭供養此經者，汝等四衆及諸天帝、三五吏兵、天龍神鬼、金剛力士、侍經真官，應將徒衆，隨逐尊奉，禮敬供養，護其國土，保佑人民。《本行經》云：昔有女人，奉受是經，晨夕誦習，夫恒供給香火，婦遂昇天，受號今爲梵行元君。夫後命過，經入大山，具陳供給之功，婦即來，授夫是經，即昇南宮，百年得生國王之家，大受經法，令爲九宮真人。又有賢士，受持此經，婦意憐惜，不與夫同，夫得昇天，婦後化爲餓鷹。夫以化度，還爲女身，受持經法，今爲南極元君皇妃。當知持經奉法，明明不虛，誹謗慢黷，自招其考。

四明謗法緣。《真藏經》云：衆生不信法者，是爲謗法，是爲滅法。不信根中而有三寶，不信去來而爲真實，不信大乘而爲根本，不信衆生等天尊性，不信諸法寂滅無根、無因無果，不信衆生從無量劫積種未形而無生滅。如此不信，是名毀法，是名滅法，法不可滅，障法不見，名爲滅法，既滅法已，而得身相，是爲生死，輪迴不絕，必墮地獄，無緣得出。《本相經》云：若見經法，忽若土草，了無恭敬之心；見他行善，背面皆笑，永無助仰之性。斯人從六畜中來，始得人形，故不信法。《真藏經》云：往古劫時，有五貧士，不信經法，不信衆生有真道性，不信衆生即經妙法，不信衆生不生不滅，不信衆生心大如海，不信衆生爲太空聚。如此不信，即得重病，生入閻獄，死入閻獄，食入閻獄，息入閻獄，諸善男女，各自思惟，勿生不信。天尊因作頌曰：

爲人不信法，毀謗於賢良。死受  
艷都報，劍樹碎形傷。萬劫無期出，魂  
神痛斷腸。叫聲聲不絕，獄卒染鑊湯。

受報無休息，瞋眼四邊張。誰能受此  
苦，迷惑亂猖狂。寄語修真子，修福永  
無殃。

然聖人之言，本無虛誕，爲不信  
法，自以招殃。若更語云，經有萬八千  
玉女玉童侍衛，益不信受，或以敞露，  
或雜世典，或不洗手，或無護淨，但  
不依讀經儀則，即名誹謗。《請問下》  
云：經污，不以香水洗沐，則魂魄奔  
落。《本際經》云：若復有人，誹謗此  
經，生不相信，輕慢法寶，疑毀聖文。  
當知此人，無量劫來，沉淪下鬼，受諸  
苦報，備歷異形，始得受生，還於人道，  
愚癡觸辟，無所解知，習惡種因，不能  
信受，所行非法，動爲罪由，背正入邪，  
違真信俗，三官九府記入功過，書名黑  
簿死錄之中，或在見世，恒縈諸苦；  
或犯王法，執繫鞭笞；或在惡風，蟲癩  
之病，憂厄惱難，貧窮困乏；或爲外魔  
異道惑亂，其心雖在世間，人所棄薄，  
周詣遊處，不值善緣，一失生道，永乖  
賢域，死入地獄，無有還期，受報幽牢，  
緘閉重檻，晝夜考掠，不睹三光；或抱

銅柱，形體焦傷；或上刀山，痛毒難忍，冥冥長夜，萬劫無出，縱得受生，還爲六畜非人之類，永失人道。總明經法，諸緣以畢，於此開經受誦，子細詳之。

要修科儀戒律鈔卷之二

要修科儀戒律鈔卷之三

三洞道士朱法滿編

科曰：俗人受錄，殆未閑科法，來諮所疑，隨解實答，不得有欺，妄云不知。必諫惡還善，勸是除非，不可阿黨，爲私害法，損己誤人。《九刑論科》曰：高德道士、大治祭酒、八十一賢，清齋登壇。壇是崇虛堂所，皇靈之壇者，如是不須受法及錄而傳錄治，唯二十四卷，悉微言要旨、三洞寶經、衆符祕諱，悉應師受。師是道民參受備者，盛德爲師。天師子孫雖是師，即皆爲弟子之禮，天師子孫受衆法，法信依百姓不得闕，闕則三官不憫。

科曰：受諸券及自然券，後傳券無有經，此謬妄之師。券本度經，無經何券，師須寫經，盟可爲師耳。年限未得爲師，當爲前弟子覓有經具足師。不具足者，且稍受之，以足爲期，不限師之多少，不格師之男女，師不得禁錮弟子，不得背叛本師。背叛，受十苦之

考，後生六畜之中，禁錮者，幽牢檻繫，後生邊荒。愚癡之群，明各慎之。

科曰：寶經禁重，萬劫一出，天地促運，輔正須賢，七百年聽傳。若有骨分，七年得傳，三年之內，無有灾厄，四年可傳，傳得其人，人我共福，非其人同罪，俱入火灌風刀、萬劫負石之役。

科曰：凡事師，恒如兩手捧物，當心勿有墜失。師如父也，但奉道事師，有二種人：一曰名，二曰義。凡言事道，係名師門，不修妙義，不修大功，不行無爲，處處有滯，煩惱生死，不能知常，妄作致凶，此有名事師也；若專心憑師，動止依法，建大福田，濟身度物，無爲而無不爲，所在通利，無諸障礙，長生不死，永享貞吉，此有義事師也。

科曰：師與弟子言，皆稱吾我卿弟子，弟子亦如此，天親也。凡事師門，外稱弟子，內稱名不稱姓。師之師，准祖師；祖師之師，准曾祖；曾祖之師，准高祖；高祖之師，一號宗師。宗師至弟子身，是爲五代。祖師至敬，禮訊言語。書略同，悉稱弟子，不得慢

言，若有違，七刑論。

科曰：事先達與師同。先達者，言堪爲師，崇彼如師，一名心師。問訊時，諸師並在，先拜宗師，次問訊祖師，次問訊籍師、度師也。

科曰：弟子法身，通辭書疏，皆真書不得草。犯者，五刑論。道士敬先達，恒下師一階。

律曰：弟子謁拜於師，朔望皆朝服而朝，不得陽說陰私，背向異辭。

律曰：道民籙生與師主期，失信，魂魄閉繫水官五十日役。

律曰：弟子見師不敬，不恭無禮，語言我汝，魂魄在水官拘閉六十日。考竟，減筭一紀。

律曰：弟子見師，敬事如父母，師主見弟子，念之如赤子。違律，罰筭各一紀。

律曰：正一家三師者，一正一師，二天師，三度師。三五治籙，等三師也，通當有敬。違律，被考三十。

律曰：弟子作書與師主，須啓書，悉稱名，不得輕慢。違律，考杖十五。

律曰：道民與師主共言，語稱道民，不得稱名。違律，考一十。

律曰：弟子別師主經月，晦朔及三元吉日不見師，須拜三拜。違律，師罰考一十，重病二十日。

律曰：七世不同，得爲師授度，七世尚同，不得爲師，犯者，減筭三紀。然看此律，直恐弟子有過，累於九祖父母，傍及師之祖先。若弟子忠誠，七戒無犯，德合十行，骨相應圖，父亦可以傳其子，令能九祖俱仙，寧有奪筭之咎。

律曰：弟子聞師有疾病、厄急、貧窮、彫悴，不能創心，則無仁孝，違負誓言，考五十日，重病一百日。

律曰：道士不得來他弟子前，語罵及他弟子師長，皆須平正，若論善惡，人身中魂魄即去。違律，水官考病五十日。

律曰：弟子他人前，語及師主、父母不善，身中吏兵即奏天曹，罰病一百日，考三十日。

律曰：弟子得師書告，皆燒香執

笏，整衣冠，拜三拜，發書讀之，即是崇依上聖，弘道孝敬，乃合先聖心。違律，罰筭一紀。

律曰：弟子別師，經一月已下，皆冠帶執笏問訊，不得白服隨時。違律，罰油三斗；拒不輸者，杖二十。

律曰：弟子別師主，經一宿已上，五宿已下，皆整衣服，執笏再拜，問訊還如法。違律，罰香五兩，入三寶。弟子向師主，皆稱名。弟子詣師，不得輒而坐，師命方坐。違律，考病十日。

律曰：弟子不得喚師作道士，皆言家師、和師、大師、尊師、師主也。違律，罰油三斗，入三寶，考病十日。弟子不得犯觸名諱，若尊人問不已，宜須下聲答名也。違律，罰筭一紀。弟子不唐突師左右，左右有問察之神。違律，罰筭一紀。弟子見師過失之事，當於深隱處長跪斂手恭諫請，不得在別人前，言師是非醜事。違律，罰筭一紀。弟子與師共房，不得先在師前眠卧，不得在後起。違律，考病五十日。弟子於師處同食，不得先食，皆須師

前、弟子後也。若師命同食，弟子食聽在前止住。弟子隨師起居、行止、遊履，皆正當謙卑恭敬，不得斯須無有禮法，罰考三十下。弟子事師，師年少，弟子年高，弟子皆應恭敬，譬如官長二千石、父母同等。不得自恃高年，輕忽於師主，罰杖八十，主者宜科弟子。師同在座席，若師起居行止，弟子起下地倚，不得晏然端坐。違律，考三十。弟子先未受法戒，或氣類有等，或復耆年，後詣師法，便爲師事，言皆稱名恭敬，不得准前。違律，考四十。弟子先與師主姓族，同從弟兄孫姪，後詣師受法，皆須謙卑恭敬，言皆稱名，不得比尋常。違律，杖四十，主者宜科弟子。與師親屬總麻者，皆不得相爲師弟。所以爾者，受法，皆證三曾七祖父母，來盟子孫所受。若違盟，九祖受考，殃及受法人身病百日。弟子不得嗔怒嫉責忿恨師主，及懷恚恨在心。違律，被考三十。弟子詣師請道法，皆當冠帶執笏，謙苦求請，不得輒爾。違律，考四十。弟子不得與師主諍口，違律，考

四十。弟子事師，師若來還，弟子皆當隨路遠近奉迎，不得端然晏坐，以待師主。違律，罰考四十。弟子與師同行，不得身踐踏著師影。違律，三十。弟子出入及所作事，每先啓告諮審師主，不得自專。違律，考五十。弟子事師，皆當思念信實，不得猶豫二心。違律，考三十。弟子不得竊盜發泄師器具、籠笈、錢物、飲食、禁誡、科律。違律，杖三十。弟子與師主同坐，不得汗唾左右。違律，考二十。弟子侍從師主，若值賓客，弟子皆侍衛師左右，不得放抗大座，與凡無別。違律，杖七十。弟子受師法業後，道德成就，爲人所崇，皆當謙謙，存憶師主勿忘恩。違律，罰筭二紀。

律曰：道士女冠，年雖已老，受法卑下，行道不得在大法身小者前，其年雖少，法戒大者，可行於前，不得錯亂。違律，考杖六十。

科曰：大德名人，同住一處。有狡猾弟子，若欲歸依；或愛情未離，或枉被威逼，應須教習，各誠機宜。或先

令苦使，或誘引甜言，或獨立坐忘，或擯令遠去，或出經寶教授，或令齋戒治除，或懼自尊威，而令傍人撫接。若終惡不改，而無進善之功，畜斯弟子，是滅道法，永須遠離。

科曰：若有弟子，愛樂正法，深經大義，咸願欲聞，直以機在前緣，衆根闔鈍。如此之善，預既發可，須安慰三戒、五戒，示靜安心。大德法師，是衆生依止，若心性高者，而令低心下意；若動止強梁，而須折伏；若其懦弱，勸進勇猛。既爲衆生父母，寧不慇懃，必契道場，永無退轉。

科曰：上清法師，不應授人大戒，不應受人依止，不應畜弟子，不應爲人教授，不預評論衆事，不得闍夜自行，不得親近邪見，當動止在法。

科曰：所養弟子，彌加呵責，有大罪過，引五事責之：一我今呵責汝，汝須出去；二則出離之後，莫入我房；三則我縱無人，亦不用汝作使；四則我之生前，莫至我所；五則我能引化三塗五道，終不與汝共語。此之呵責

折伏，爲行之甚，不用分外，非法考打枷棒，懸首反縛，晝夜打罵，律無此條，傷大慈種。若師主使令弟子，沽酒買肉，坐販賣，牧牛養馬，并爲邪淫，驅使弟子。弟子可言，以此所作，非天尊行，某不敢爲。師若有嗔責，可須捨去。

科曰：惡行弟子，教不知悔，其行有十：一則爲惡不恥，二則見善不修，三則聞諫彌甚，四則動非威儀，五則強梁我慢而無恭肅，六則懶惰狠戾，七則友非忠信，八則遊習奸姪，九則好樂屠戮，十則醉亂尊卑。有此十種行人，是破道法。若不爲惡，能伏勤苦，清旦入房，除小便器，朝中日暮，三時問訊，求有所習，隨用驅使，不辭勞苦，漸盈大器，積德成真。有此弟子，紹隆正法，廣以讚嘆。

科曰：男女官各得依止，男官依止男官，女官依止女官，大法者爲師。每一句，至師所受教訓。至時，整理法服，赤心靈宇，恭敬謹肅，直詣師門，不東西異向。至師門已，通白云某弟子

問訊。師知己，乃端嚴衣帔，燒香於誦經之室，命弟子令進。進至師前，安詳三拜，問訊云：師比者起居安不，德無損和。師無他故，乃答云：比日亦無虧禮誦。若有疾苦，隨事應答。弟子若有罪過，先聞師耳，可云：汝有某事，可加誡誨，令其改革。弟子拜謝乃云：不能自厲，勞師誠勅。又拜謝云：從今以去，不敢復犯。若是齋前，設齋。齋後，無所施設乃便。去再拜云：願師以自珍重。師重誠云：所在之處，勤行齋戒，以自慎護，勿起驕慢。

唯然起退，三步乃始轉去，不得更入他房，歸至本觀，以師誠悔之言，示衆大小，不得藏匿。若女官無大法，不解傳授者，可詣男官。請受有高德女官、男官，亦得請詣受法，俯仰之格，男女官通用。

科曰：師主大德若從遠歸，命所使先到觀中，令知歸至，弟子則整衣帔出觀迎接，當以大小顧望，不得無故掩人不備。

科曰：弟子有所啓白師主及同觀

外觀大德，皆整衣至房。房閉，當屈指細細打戶三過，停少時不聞人聲，更三過，又不聞人聲，又三過，不聞則退。

科曰：弟子之禮，師主有客，當即拂拭牀席、机褥，灑掃前後，師主令命，客進乃命。

科曰：弟子之禮，師主令過授物事，師主若立，則立受；師主若坐，則長跪受。

科曰：參省師主大德，皆再拜侍立，命坐則拜而坐。更問他故，則起立而答。皆條直身體，並脚斂手。

科曰：進尊者之房戶，知在房中或庫內，若不聞聲，聲咳發覺，如不問則退，若問稱名啓白，命入則入，房開則開，閉則閉。入戶正視尊者，不得左右斜顧。

科曰：出家之人，常合忠正，出入動止，五正爲先：一正己身，二正門徒弟子，三正觀中良賤，四正四遠衆法，五正頑愚俗人。能正己身爲物軌，則能正弟子，承稟有儀；能正觀中，大小從順；能正四遠，法義稱揚；能正頑

愚，廣增慧解。能如此者，名爲道士。若身既不正，爲物所憎，弟子不教，却賤師至觀主，恒無禁忌，大小貴賤混淆，不存信義，四遠同皆厭惡，欺陵愚蔽，增長罪目，不能廣立威恩，却更誘引他家子弟奴婢，或圖物入己，或私與交關，不依正義立身，恒以邪僻爲行。有如此色名，爲逃課兇賊，共所防戒，如不可懲，國王有法。

要修科儀戒律鈔卷之三

要修科儀戒律鈔卷之四

三洞道士朱法滿編

衆戒及願念合一千百條

夫經以檢惡，戒以防非，總任枝流，難以取用，撮其機要，易可尋求。《登真隱訣》云：戒者，遏穢垢之津路，防邪風之往來。《千真科》曰：出家之人，不交世俗，不求名利，不作有爲功德，靜思入定，降伏外魔，名爲淨戒，是真實法母。觀身大戒云：有經而無戒，猶欲涉海而無舟楫，有口而無舌，何緣度兆身邪？夫學者不知尋經戒，是未悟真要之根，長夢而不覺，可爲痛心矣。《千真科》曰：出家之人，能持三戒、五戒、九戒、十戒乃至三百大戒等，一戒之中，各有二十四善神之所擁護，天人供養，不犯衆惡，有不信戒者，衆惡故犯，罪結冥陰，劫劫受生，墮落盲道。違戒奉戒，得福獲罪，不問道俗，至理無偏，其功等爾。《易注》云：洗心曰齋，防患曰戒。《本際》云：聖

真所修，必名爲教。凡夫所行，名之習業。施教造業，一而無二。所謂一戒，是發無上自然道意，如是正因，最爲根本。又有二戒，所謂二觀，氣觀、神觀，即是定、慧。又有三戒，所謂三捨，捨身、命、財。又有四戒，謂四寄心，慈、愛、善、忍。又有五戒，所謂五念，思道，清靜；思道，離諸色欲；思道，動與俗反；思道，無有禁忌；思道，非形聲法。昇玄又有五戒者：若見色利，榮華粲綵，以戒掩目；若聞好惡之言，五音之屬，以戒塞耳；若有八珍之饌，甘香之美，以戒杜口；若願想財貨、七寶、奇珍，放情極欲，以戒挫心；若憶奸姪，貪趣惡事，以戒折足。能行此五事者，七祖生天。又有六戒，所謂六度：勤、信、雌、終、揀爭、離酒色等。又有七戒，所謂七覺：知一，知三，知凶，知吉，知俗，知道，知有無。又有八戒，所謂八能：能受非不自申，能讓德於人，能不欲人所欲，能容無理不爭，能遠無道、藏身幽處，能不達心，不能負經戒，能不伐口、閉塞六情。六度生



六通三十八戒，亦曰六覺，亦曰六慧。閉塞六情者：第一戒者，目無廣瞻，亂諸華色，亡精失童，光不明徹；第二戒者，耳無亂聽，混於五音，傷神敗正，惡聲啼吟；第三戒者，鼻無廣豐，雜氣臭腥，易有混濁，形不澄正；第四戒者，口無貪味，脂熏之屬，濁注五神，藏腑憤潰；第五戒者，手無犯惡，不竊人物，貪利入己，禍不自覺；第六戒者，心無愛欲，搖動五神，傷精喪氣，體發迷荒。此六戒者，身之大患。六度生戒者：其一者，見人窮急，度其死厄，見世明達，能制凶逆，年命長遠，世享無極；其二者，見人窮乏，寒饑困急，損己布施，令人富貴，福報萬倍，世世歡樂；其三者，含血之類，有急投人，能為開度，濟其死厄，見世康強，不遭橫惡；其四者，施惠鳥獸，有生之類，割口飼之，無所愛惜，世世飽滿，常在福地；其五者，度諸蠢動，一切衆生，咸使成就，無有夭傷，見世興盛，不履衆橫；其六者，常行慈心，愍濟一切，放生度死，其功甚重，令人見世，居危

得安，居疾得康，居貧得富，舉向從心。此六戒者，皆以心通智慧，能施其德，行合自然。六通者，天為洞視，則天明智高，慧洞無窮，自上自下，四面八方，無所不照，無所不明，雖曰一通智慧，而五色總焉。天洞自然，故無損傷。人則法天，目中朱童，亦有五色之光，人不持戒，六覺之氣，不通人孔竅，智慧未開，廣視五色，則眼童飛揚，光精昏翳，令人目盲。故設是戒，以度天人，咸使男女，得聞法音。欲得過度，年命長遠，當奉是戒，勤行勿忘，慎勿色視，放蕩目神，每自制御，愛養眼童，思真靜念，令通智慧，洞觀虛空，持戒制己則五色歸身，五色自歸則無傷損，保爾年命，可得無窮。天尊言：地為洞聽，智遠慧聞，故響應天上，下徹四方，無所不窮，無所不聞，雖曰一通智慧，而五音總焉。地洞自然，以生五音，朕而不動，故無損傷。人則象地，耳中則有五聲之神，人不持戒，則智慧不通。不可亂聽五音之聲，五音使人

啼泣，致令耳聾。故說是戒，以度天人，咸使男女，普聞法音。欲得長壽，當持大戒，以制耳神，勿為多聽非法之音，靜聽妙經神真人章，令通智慧，洞響太空，持戒制己則五音歸身，五音自歸則耳無惡聲，保爾年命，刻得長遠。天尊言：東為洞空始陽之氣，氣出於空，智明慧遠，故曰洞空，洞遠無礙，不可得窮始青之氣，雖曰一通智慧，而五氣總焉。空無所納，故無損傷。人雖有形，形亦法空，鼻有黃寧辟非之神，人未持戒，則智慧不通。未入智慧，不可雜食臭腥之物。臭腥之氣，使人鼻神壅塞徑源，易有斷絕，明梁不通。故說是戒，以度天人，咸使男女，得聞法音。欲度諸苦八難之中，當受是戒，以制鼻神，勿多受臭，滌蕩明梁，道引生氣，通明智慧，洞氣入空，持戒制己，則衆氣歸身，衆氣自歸，與氣混同，長保身命，終不毀傷。天尊言：西為洞虛少陰之氣，氣出於虛，智微慧朗，故曰洞虛，虛之無礙，洞遠難窮少陰之氣，雖曰一通智慧，而五味總焉。虛無不

入，虛無不容，人雖法虛，身不持戒則智慧不通，智慧未入則五味爲患，貪啖脂熏，五神不安，致有傾危，年命不長。故說是戒，以度天人，咸令男女，普聞法音。欲得長命，當持大戒，以制五神，慎貪五味，甘其脂熏，滌蕩五臟，每令清涼，身有智慧，則五味和香，內則恬夷，年命不傷。天尊言：南爲洞清太陽之氣，氣出於清，智清慧開，關而洞清，故南有赤帝洞陽之庭，冶鍊萬物，受鍊而明也。人不持戒則智慧不通，智慧未通則心神振動，生於愛欲，使人迷荒，喪神傷命，壽不得長。故說是戒，以度天人，咸使男女，普聞法音。欲得長壽，過度諸患，當受是戒，以制心神，除情遣欲，棄塵入清，通明智慧，六覺開津，身入洞清，與氣自然，保爾年命，永得長存。天尊言：北曰洞微，微生於玄，智遠慧深，微而洞真，陰察罪福，主人生元，手法四時，上應天關，天關恒轉，手亦動焉，手有大神，接生方盈，運人四大，觀人敗成，人不持戒，智慧不通，則搖動人心，衆惡並生，手

作不覺，貪竊自營，致有智命，不終天年。故說是戒，以度天人。欲得長壽，過度惡根，當奉是戒，以制手神，通明智慧，心自開明，手不貪窮，惡根不生，應天順氣，身入自然，保爾年命，永得長存。《昇玄經》云：太清九戒者，第一戒曰：身不得穢濁不清，耽染欲境，蒙冒身禍，誕縱自恣，甘惡爲非，綺麗華飾，所便細滑，濡軟自適，無有厭足，不知動入罪網，不能自覺，身之罪大，不可稱計，不得身犯，不得教令於人，攝意持戒，終身奉行。是吾太上太上太一第一戒也。第二戒曰：心不得興惡想惡念，不得形想評想，貪欲務得，蒙冒財利，貪毒陰賊，謀議非法，淫邪偏僻，意不平等，嫉妒愚癡，自是狼戾，濁欲饕味，無有厭足，不知動入罪網，不能自覺，心過之罪，大無有極，不自心興，不得教令於人，攝意持戒，終身奉行。是吾太上太上太一第二戒也。第三戒曰：口不得妄言善惡，呪詛罵詈，欺誑妄語，幻惑兩舌，鬪訟告訴，持人長短，自作是非，生灾造害，興生無

端，敗衒道法，歌誦嗟詠，吟嘯歎息，貪美恃味，無有厭足，不知動入罪網，不能自覺，口過之罪，大無有極，不得口犯，不得教令於人，攝意持戒，終身奉行。是吾太上太上太一第三戒也。第四戒曰：手不得殺害衆生，蚊行蠕動，含血之屬，皆不得殺，劫略強取，奪盜偷竊，取非其物，拾遺取施，執持兵器，興用非法，不知動入罪網，不能自覺，手過之罪，罪之莫大，不自手犯，不得教令於人，攝意持戒，終身奉行。是吾太上太上太一第四戒也。第五戒曰：目不得視非道非法非義，榮華容飾，淫視女色，照曜盈目，貪欲洋溢，綺麗珍寶，淫邪妖孽，不正之色，目爲後，主收百凶，來致禍毒，罪釁臻集，一皆目致，心、目、口、手，致殃禍主，動爲禍端，收罪之府，不可不進，不可不伏，不可不慎，不可不恣之，不知動入罪網，不能自覺，目過之罪，罪之莫大，當宣目戒，勸化一切，一能戒目，心想息滅，想滅意空，空意無著，無著入無，便得道慧，攝意持戒，奉行勿廢。是吾太上太上太

一第五戒也。第六戒曰：耳不得聽八音五樂，淫聲妖孽，亂正亡國，妖僞之樂，無有厭足，不知動入罪網，不能自覺，耳過之罪，罪亦復大，不自耳犯，不得令教於人，攝意持戒，終身奉行。是吾太上太上太一第六戒也。第七戒曰：鼻不得貪香惡臭，妄察善惡，不知動入罪網，不能自覺，鼻過之罪，罪亦爲次，不自鼻犯，不得教令於人，攝意持戒，終身奉行。是吾太上太上太一第七戒也。第八戒曰：足不得蹈不義，不踐非法，不涉惡履非，妖惑境界，不知動入罪網，不能自覺，足過之罪，罪亦爲次，不自足犯，不得教令於人，攝意持戒，終身奉行。是吾太上太上太一第八戒也。第九戒曰：身不得放情任意，強興神物，攻非其敵，精消神散，三氣亡逸，放情縱恣，無有厭足，不知動入罪網，傾宗滅族，不能自覺，如斯之罪，罪之莫大，不自身犯，不得教令於人，攝意持戒，終身奉行。是吾太上太上太一第九戒也。十戒者有五，《定志》云：度十戒法，法師居南，弟子

向師三禮，禮畢，請曰：願見成就，授以十戒，當終身奉行，誓不敢有違。於是長跪心存，見十方大聖，在於上方，乃擎拳諦受，法師燒香，便爲說戒：一者不殺，當念衆生；二者不淫，妄行邪念；三者不盜，取非義財；四者不欺，善惡反論；五者不醉，常思淨行；六者宗親和睦，無有非親；七者見人善事，心助歡喜；八者見人有憂，助爲作福；九者彼來加我，志在不報；十者一切未得道，我不有望。是爲十戒。受者並云：弟子某甲受，終身奉修。又禮師都畢。

#### 要修科儀戒律鈔卷之四

### 要修科儀戒律鈔卷之五

三洞道士朱法滿編

天尊曰：能受是十戒，修行如法，十方天官，無不衛護，必致得道。子若逼世累，不盡十者，九八七六，乃至於五，擇其能者。然五戒之福，福亦難稱。《大戒經》云：修齋求道，皆當一心請奉十戒，諦受勿忘，專精默念，洞思自然，勿得雜想，撓亂形神，能如是者，便當靜聽：第一戒者，心不惡妬，無生陰賊，檢口慎過，想念在法；第二戒者，守仁不殺，愍濟群生，慈愛廣救，潤及一切；第三戒者，守貞讓義，不淫不盜，常行善念，損己濟物；第四戒者，不色不欲，心無放蕩，貞潔守慎，行無點汙；第五戒者，口無惡言，言不華綺，內外忠直，不犯口過；第六戒者，斷酒節行，調和氣性，神不損傷，無犯衆惡；第七戒者，不嫉人勝己，諍競功名，每事遜讓，退身度人；第八戒者：不得評論經教，訾毀聖文，躬心承法，

恒如對神；第九戒者，不得鬪亂口舌，評詳四輩，天人咎恨，傷損神氣；第十戒者，舉動施爲，平等一心，人和神穆，行常使然。十善勸助戒者：一者，勸助禮敬三寶，供養法師，令人世爲君子、賢孝、高才，榮貴巍巍，生爲人尊，門族昌熾；二者，勸助治寫經書，令人世世聰明，博聞妙蹟，恒值聖世，見諸經教，能誦章句；三者，勸助建齋靜治，令人世世芳盛，香潔光明，容眸絕偉，天姿高秀；五者，勸助法師法服，令人世世長雅，逍遙中國，不墮邊夷，男女端正，冠冕玉佩；六者，勸助國主父母，子民忠孝，令人世世多嗣，男女賢儒，不受諸苦；七者，勸助齋靜讀經，令人世世不墮地獄，即昇天堂，禮見衆聖，速得反形，化生王家，存意所欲，玩服備足，七祖同歡，善緣悉會，終始榮樂，法輪運至，總行仙道；八者，勸助道士衆人經學，令人世世才智洞達，動靜威儀，常爲人師；九者，勸助一切布施諫諍，令人世世壽考富樂，常無怨惱；十者，勸助一切人民，除嫉去

欲，履行衆善，令人世世安樂，禍亂不生，疾者自愈，仕官高遷，爲衆所仰，莫不吉祐，門戶清貴，天人愛育，神魔敬護，常生福地。《請問》云，太上十戒，以授仙公：一者，不得嫉妒勝己，抑絕賢明；二者，不得飲酒放蕩，穢亂三宮；三者，不得姪邪顛倒，好貪細滑；四者，不得棄薄老病窮賤之人；五者，不得誹謗善人，毀攻同學；六者，不得貪積珍寶，弗肯施散；七者，不得殺生祠祀六天鬼神；八者，不得議論經典，以爲虛誕；九者，不得背師恩愛，欺詐新學；十者，平等一心，仁孝一切。能奉此十戒，分明立願，無不必報。又有十惡戒不可犯。一者，飲酒姪色，貪欲無已；二者，陰賊世間，訕謗道士；三者，輕師慢法，傲忽三寶；四者，竊取經書，妄宣道要；五者，借換不還，欺誘萬民；六者，殺生貪味，口是心非；七者，不孝，背恩違義，犯諸禁戒；八者，誦經忽略，嘖嘖自是；九者，責望人意，瞋恚四輩；十者，意斷經旨，損益聖典，不信宿命，快情所爲，穢慢四

大，不念生道。是爲十惡之戒。犯之者，或見世爲鬼神所枉殺，陽官所考治，居安即危，履善遇惡，百事不偶。十二可從者，《大戒經》云：作諸善功，當行十二可從，而得度世。第一者，見真經出法，開度一切，便發道意心，願後世得登大聖；第二者，常行慈心，願念一切，普得見法，開度廣遠，無有障礙；第三者，好樂經教，深遠覽達，意志堅明，開化愚闇；第四者，遵受師訓，廣開勸化，令入法牆，遠離盲道；第五者，信向玄妙，尊奉經訣，晨夕誦習，無有怠倦；第六者，不務榮華，斷俗因緣，專心定志，所營在法；第七者，勤誦大經，願念一切，廣開橋梁，爲來生作緣；第八者，恒生善心，不邪不僞，無嫉無害，無惡無妒；第九者，所在墮生，常值聖世，與靈寶法教，相值不絕；第十者，潔身持戒，修齋建功，廣救群生，咸得度脫；第十一者，學業廣覽，宣通同法，預以天人，普令開度；第十二者，常與明師，世世相值，受教宣化，度人無量，一切善心，皆得

道真。十四治身之法者，《請問上》云：與人君言則惠於國，人父言則慈於子，人師言則愛於衆，人兄言則悌於行，人臣言則忠於上，人子言則孝於親，人友言則信於交，人婦言則貞於夫，人夫言則和於室，人弟子言則恭於禮，野人言則勤於農，賢人道士言則止於道，異國人言則各守其域，奴婢言則慎於事。三十六戒者，《老君禁戒》云：行無爲，行柔弱，行守雌，勿先動，上最三行；行無名，行清靜，行諸善，中最三行；行忠孝，行知足，行推讓，下最三行。右九行第一，八十一章，集合爲道舍，尊卑同科。上備者，神仙；六行者，倍壽；三行者，增年不橫夭。戒勿怒喜，邪與怒同；戒勿費用精氣；戒勿食含血之物，樂其美；戒勿貪寶貨；戒勿傷王氣；戒勿違道；戒勿爲物動；戒勿枝形名道；戒勿殺；戒勿名功。上最九戒。戒勿爲耳目鼻口所誤；戒勿貪高榮強求；戒常常謙下；戒勿學邪文；戒勿學百事，當詳心，勿調謔；戒勿求名譽；戒勿輕

躁；戒勿盈溢；戒勿恣身，好衣美食。中最九戒。戒勿爲諸惡；戒勿多忌諱；戒勿禱祠鬼神；戒勿惡貧賤，強求富貴；戒勿強梁；戒勿自是；戒勿與人爭曲直，得爭先避之；戒勿稱聖名大；戒勿樂兵。下最九戒。右二十七戒第二，共合爲道淵，尊卑同行。上備者，神仙；持十八戒，倍壽；持九戒，增年不橫夭。合爲三十六戒。又有十二禁：禁姪戲不節。姪戲不節，使神氣不專，傷於魂魄，魂魄傷則喜虛狂發。禁大笑大呼。大笑大呼，使神氣飛揚，傷於腸氣，腸氣傷則喜驚悸振懾。禁悲愁恚怒。悲愁恚怒，使魂魄不行，傷於五臟，五臟傷則志意悖亂妄語。禁大醉大飽，大醉大飽，使神氣不藏，傷於六腑，六腑傷則癱疽妄起。禁久憂久思。久憂久思，使神氣失常，傷於陰氣，陰氣傷則喜自恐惶。禁久言久語。久言久語，使神氣越泄，傷於陽氣，陽氣傷則惚恍喜忘。禁久立。久立，使神氣竭絕，傷於骨髓，骨髓傷則蹙侗流關節。禁久坐。久坐，使神氣

結閉，傷於筋脉，筋脉傷則腰臂肌骨不仁。禁久渴。久渴，使神氣根爽，傷於心，心傷則喜喘悸，胸滿逆氣。禁久視。久視，使神氣擾亂銷散，傷於精，精傷則溢精洩或不樂。禁久卧。久卧，使神氣併積，傷於肌膚，肌膚傷則喜吽心戰慄。禁久聽。久聽，使神氣寡不理，傷於志，志傷則喜忘不存，喜悲泣。老君曰：能行此十二禁，乃可存精氣，集神靈，駕六龍，馳窈冥，觀九都，后土庭，乘浮雲，入太清，宿虛無，捷六丁，入仙府，得長生。四十五念者，《法輪經》云：若學神仙，思念無量，普得長生，身與我神，入定妙通；若奉師宗，思念無量，普得訓勵，身與我神，同受制度；若奉經教，思念無量，普得聰慧，身與我神，同得昇仙；若見講說，思念無量，普得瞻聽，身與我神，了解玄義；若見齋戒，思念無量，普入法門，身與我神，內外清肅；若見行香，思念無量，普入芳盛，身與我神，不履穢塵；若見三光，思念無量，闡冥普消，身與我神，長處光明；

若見雨注，思念無量，普得灑潤，身與我神，得天廕流；若見行雲，思念無量，普得廕覆，身與我神，同入雲輪；若見素雪，思念無量，普居潔白，身與我神，凝氣成真；若見霜露，思念無量，保貞不落，身與我神，無不制伏；若見淨水，思念無量，普得沐浴，身與我神，洗垢除穢；若見大江，思念無量，普注淵澤，身與我神，無不包容；若見太山，思念無量，普得障遏，身與我神，棲託巖穴；若見樹木，思念無量，普無凋悴，身與我神，鬱成茂林；若見種植，思念無量，普得滋長，身與我神，學日成生；若見果林，思念無量，普得成就，身與我神，結實生根；若見飛鳥，思念無量，普得空行，身與我神，時生羽翮；若見禽獸，思念無量，不生害心，身與我神，隱學幽林；若見宮闕，思念無量，普得瞻仰，身與我神，轉輪諸天；若見城社，思念無量，普得入朝，身與我神，修整嚴飾；若見臺館，思念無量，普瞻八極，身與我神，洞見幽微；若見靈壇，思念無

量，普履法門，身與我神，得道無爲；若見童子，思念無量，普得出家，身與我神，同得道真；若見道士，思念無量，普棄榮累，身與我神，早得飛仙；若見賢人，思念無量，普推貞義，身與我神，教化齊同；若見聖人，思念無量，普得其道，身與我神，通真達靈；若見盛年，思念無量，普不衰老，身與我神，長保劫年；若見美女，思念無量，轉身爲男，身與我神，守貞入真；若見伎樂，思念無量，普無哀憂，身與我神，靜默宮商；若見王子，思念無量，普得從容，身與我神，轉輪王家；若見富貴，思念無量，普得豐足，身與我神，儉散功德；若見貧人，思念無量，普離窮厄，身與我神，轉人歡泰；若見厨食，思念無量，普得飽足，身與我神，口無爽味；若見平地，思念無量，普得安寂，身與我神，種植並生；若見屋舍，思念無量，普得廕覆，身與我神，宮宅整飾；若身暮卧，思念無量，普得安寧，身與我神，同靜虛空；若朝起居，思念無量，普得曉明，身與

我神，同光太陽；若服衣裳，思念無量，普得嚴飾，身與我神，同生羽服；若戴巾帽，思念無量，普得冠冕，身與我神，同戴華蓋；若著屐履，思念無量，普得乘風，身與我神，足躡紫雲；若見乘船，思念無量，普得濟度，身與我神，不拘橋梁；若見乘車，思念無量，普不步行，身與我神，同策飛駟；若見乘馬，思念無量，普得飛步，身與我神，乘雲駕龍；若見太清，思念無量，普蒙虛泊，身與我神，飛昇金闕。四十五念，功齊天地，數法自然。五十願者，《消魔經》云：若見居家妻子，當願一切早出愛獄，攝意奉戒；若見飲酒，當願一切制於命門，以遠禍亂；若見綵女，當願一切守情忍色，志慕在賢；若見姪人，當願一切除棄邪念，翹心禁戒；若見婦人，當願一切忍割浮華，樂道自娛；若見貞人，當願一切履信正化，自入法門；若見衆人，當願一切推仁無爭，懷道安世；若見善人，當願一切時刻存念，仰軌其道；若見惡人，當願一切棄凶即吉，不犯王法；若

見貧人，當願一切損己施惠，後受大福；若見富人，當願一切救濟萬物，世受祿；若見貴人，當願一切承其教旨，悉合典訓；若見賤人，當願一切勤修匪懈，各得所爲；若見帝王，當願一切奉仰王道，孝如父母；若見宰相，當願一切受其教制，四方歸仁；若見兵甲，當願一切各念仁心，天下讓賢；若見王子，當願一切日歌太平，係國承家；若見賢人，當願一切履行其道德，爲世宗師；若見信心小學，當願一切明解法度，得道成仙；若見棲山道士，當願一切悉見道門，速得昇進；若見教化，當願一切親受聖教，皆爲淵博；若見聖人，當願一切尊禮侍見，諸國並瞻；若見仙人，當願一切真道悉成，飛昇天堂；若見城郭，當願一切嚴整修飾，以道爲基；若見大國，當願一切歸崇慕德，若水注海；若見小國，當願一切知止虛沖，安其所居；若見市朝，當願一切群賢雲萃，悉弘正道；若見靖舍，當願一切功德巍巍，天人得志；若見齋戒行香，當願一切道德日新，庠序

邪正；若見誦經，當願一切盡上高座，咸聞聖旨；若見經教，當願一切各各受讀，禮習普見；若見樓觀，當願一切洞視十方，無所隱藏；若見高山，當願一切立德如彼，無復退轉；若見大海，當願一切智思無量，輔成家國；若憩茂林，當願一切學成師宗，養徒敷教；若見淨手，當願一切常執經卷，無時暫輟；若見善口，當願一切耽詠洞經，日新不厭；若見動足，當願一切超步三界，飛行上清；若見靖止，當願一切滅景停真，安閑空寂；若見飲食，當願一切棄累入淨，存得道味；若見犬藏，當願一切除其災害，施爲福田；若見疾病，當願一切以道自安，免此苦厄；若見死喪，當願一切學道常存，濟度三塗；若見漁獵，當願一切不爲罪始，終入無爲；若見夷狄，當願一切賓主中國，不生邊地；若見少年，當願一切及時學問，遂成盛名；若見老病，當願一切以道攝生，不更衰老；若見三光，當願一切普明靈曜，閻冥即消；若見雲雨，當願一切惠澤盈溢，無所不宜；若

見素雪，當願一切常居潔白，逍遙自在；若見靈風，當願一切蘊懷披散，德流遐邇；若見淨水，當願一切洗垢清虛，平等其心；若見名香，當願一切受茲芳盛，衆穢蕭然；若見好華，當願一切樂散諸聖，相好具足；若見車馬，當願一切得道無爲，乘鳳駕龍；若見弦歌，當願一切玩經散說，以道娛樂；若見福食，當願一切無不飽滿，世享天厨，德流主人，如水歸海，宗廟遐長，常居貴盛，世與四輩俱生王家；若見致施，當願一切禍滅九陰，福起十方，德如山海，莫不興隆，七世生天，子孫賢忠，富貴巍巍，所欲皆從，學道飛仙，駕雲乘龍；道士坐卧，當願我等四大合德，同體道真，長在玄都，師友自然，濟度十方，天下受恩，逍遙有無，洞觀妙門。一百一十九戒者，《昇玄經》云：遠身行，離口過，除惡念，拔速根，絕聲色，捨愛欲，放翫習，洗垢穢，寬斗局，開迫迮，廣心性，緩促縮，勿的莫，省諸勞，却諸累，無疑想，迮動作，伏汲汲，厭諸端，斷諸障，滅諸跡，寬諸見，閻諸

智，遏諸蔽，原諸癡，止諸漏，掃諸患，愈諸疹，去諸計，罷諸求，伐諸株，斬諸種，刈貪冒，盡沈吟，散結束，脫煩惱，制意移，無諸可，無不可，爲無爲，無諸我，無不我，無彼我，無空想，無昏惑，無淫想，勤可行，不疑空，平好醜，不邪還，常住無，絕心想，習勝意，善防害，不亂轉，不吾念，不彼念，不悠想，無常准，無常的，無遺顧，不追懷，無猶豫，忍不忍，無是道，絕無想，常住無，無無爲，行無行，作無作，想無想，興無興，無際止，無際行，無際作，無際想，無際住，察諸性，了無根，如無相，不可滿，以不可滿而自整，當無想，以過止，觀一切，皆虛空，心無欲而常仁，不以有諍無。已知一，能除一，不於一，而起相，如因一，人無際。知因無際入無爲，知因無爲入虛無，知因虛無爲滅盡，知因滅盡成爲道，知因成道爲最大，知安爲安，知安爲樂，知樂不復憂，知無憂爲泰。損附著，蕩意態，休是非，不嫌貳，棄衆累，廢諸蓋，割諸連，刻因緣，慎心轉，事無事，無親疏，等善

惡，寂無想，不我想，無常住，一於無，止無止，住無住，無際興，縷觀法，爲同無，知有本無，知因無際入滅度，知因最大爲了無，知奉無爲極。此一百二十。下明九戒：處衆愛之中，心在道戒之藏；處憂患之舍，心在善救之堂；住閻冥之室，志在斷滅之戶；倚不固之屋，心在方便之護；坐蛇虺之地，心在捨遠之逕；居虎豹之藪，心在福德；立□□□□□□□□□□，心在觀滅之庵；立□□□□□□□□□□，在荆棘之園；戒者也，行智慧方便，拔死生之難，絕一切想，滅一切念，歸無所滅，至真之道也。老君百八十戒者，本爲盟威等說。老君曰：人生雖壽萬年，不持戒律，與老樹久石何異？寧一日持戒爲道而死，不犯惡而生，持戒而死，上補天官，尸解昇仙。世人雖爲王公之位，死有重罪，無益魂神，魂神受罪。正一道士，明而奉行。持戒之時，弟子沐浴，勿食五味、五辛，改衣服。弟子當執禮師教，伏地聽受禁戒。禁戒受已，

當寫一通，諷誦奉行之。師曰：諸賢各明聽，天下萬物，無有長在，人生有死，物成則敗，日出則沒，月滿則虧，從古至今，誰能長存者，唯有道德可久耳。今日亦善，今月亦善，今時亦善，諸賢亦善，師宗亦善，弟子亦善，萬神備具，吏兵皆到。今以老君故，以教諸賢者故，今以萬民惜命故，以弟子善心故，授禁戒重律諾諾，當三讚之，然後說戒。戒曰：弟子不得多畜積，不得盜取人物，不得妄取人一錢以上物，不得畜猪羊，不得食五辛，不得作草書與人，不得以藥毒害人，不得妄摘花果，不得與兵人爲親，不得金銀器食，不得輕慢弟子，不得妄語言，不得獨食，不得知人婚姻事，不得持人長短，不得言人陰私，不得勸人令死自盡，不得因恨殺人，不得自用，不得自驕，不得惡口罵詈，不得厭治病，不得裸形浴，不得竭水澤，不得慢老人，不得調戲，不得阿黨所親，不得門戶別居，不得妄罵人作奴婢，不得印奴婢面，不得快人死，不得張目視人，不得面譽、背處論人之



惡，不得以毒藥投淵水江海中，不得親疏他人之尊，不得強乞、擾亂百姓，不得爲世人作禮頭主，不得干知星宿占相天時，不得教人淫泆、別離夫婦、當視弟子如其子，不得吐苦向人，不得奪人冥中火，不得毀人成功言是己得，不得訛訾人器物以爲不好，不得擇飲食以爲好惡，不得爲人在來惡言，不得預論人間儀典不直之事，不得冬天發掘地蟄、藏自守非急，不得妄行，不得妄上樹，不得以汙穢物著井中，不得貪戀居家。不得誹謗良人爲奴婢，常當慈念萬民，無知如蟲，當勤求生，晝夜勿倦。不得破壞錢物，當勤避惡人，當勤服食，無爲斷穀，斷穀爲不死道。不得以書字之物投於廁前，不得多舌，不得探巢破卵，不得與兵人爲侶，不得爲人作忌諱，不得祠祀鬼神以爲僥幸，不得妄入湖海中浴，不得淫泆家相往來，不得錄毒藥著器中，不得無故走馬馳車，不得妄搗打六畜衆生。不得手圍食，每得萬民，當願令主人坐得福人，呼汝爲師尊，顧畏於人，勿自輕躁，世人並

惡，善人至少，汝勿悒悒，道自護汝，人爲惡向，汝但以善相向，善之攘惡，如水澆火。不得向弟子論人食好惡，無事不得妄多受人禮費，不得妄開決陂湖，女弟子不得爲男弟子畜衣、衣不過三通，不得自往治病、病家當自來求汝，不可食衆生肉，唯菜食爲常。行道無家，居可宿誦百八十戒，神衛三重，慎所投止，先行視之。入人家，當先問主人尊老名諱，不得多廣求寶物，不得飲酒，不得反叛、去本逐末，不得姪犯人婦女，不得殺生蠕動之物，不得燒敗一錢以上物，不得以食物擲火中，不得以足踏六畜，不得多以書相聞，不得以火燒田野山林，不得知軍國中事、占吉凶，不得妄伐樹，不得數見王公官長，不得貪財物，不得飲食過度，不得販賣奴婢，不得自習伎樂，不得言人惡事，不得別離人家，不得投書讒人，不得自貴，不得妄鑿地毀山川，不得掩人目，不得希望人物，不得評論師，不得慢經教，不得觀六畜交陰陽，不得以勢陵人，不得帶刀、軍中不從此律，不得輕

瞋恚，不得立小便，不得亂頭行遊，不得祝人令死，不得以穢污之物調人，不得說人父母本末善惡，不得言人陰私事，不得獨與宗族爲親，不得與世俗人賦歛，不得爲人圖塚宅及起屋，不得教人漁獵、傷害衆生。不得視弟子有偏，人有物與甲，乙不得恨人不與己。不得與世俗人共相群黨，不得馳騁世俗、弔問死喪，不得擇好舍好牀卧息，不得訾人物惡、自言己物好，不得驚怛、令人恐懼，不得縣官中傷人，不得強取人物、以爲恩施，不得輕行望遊、日月馳騁，不得籠鳥獸，不得穿人家壁、看人婦女，不得塞井池。不得妄發人書讀之，當念恩令我長生而勿妄，當令人入名山學。不得積聚財寶、以招凶禍，不得藏埋器物。不得枉於人，當勤避嫌疑，當更相順如父母、兄弟、姊妹。不得平地然火，不得布檜棘著道中，不得向鬼神妄行作禮，不得多畜世俗占事八神圖書，不得溺生草上及人所食水，不得寡婦相親，不得妄假舉人物以爲禮賂，不得爲人保任券支，不得爲人作

辭訟、知人事，不得高聲厲言，每當含顏而笑，不得取人密謀之書讀之，不得驚駭鳥獸，受人食飲，每燒香，常為百姓請願，令天下太平，若有人罵汝，汝但勿答，人設謗汝，汝但自內修大道，勿憂恐怖，天下有災變，水旱不調，勿得患厭之。汝至百姓家，不得希人飲食，不得與女人冥室中共語言，無事不得聚會飲食，見人殺鳥獸，當生大慈，心願濟度。不得輕慢賢聖，吾當度汝，汝遇真人，賢聖尸解，每當從道，勿習俗禮一事，當念清儉，法慕清賢，度食忖飲。不得積聚物，當易事易供養，勿多難。入他國，必先問所禁忌，不得獨行，行與人俱，勤誦百八十戒，不得作劫賊。老君語于吉日：往古諸仙賢聖，皆從百八十戒得道。百病戒者，《老君虛無經》云：是以聖人求福於未兆，絕禍於未有，蓋災生於稍稍，病起於微微。人以小善為無益，故不肯為；以小惡為無損，故不肯改。小善不積，大德不成；小惡不止，以成大罪。故擿出一百病，使知其所坐也。

百病者：喜怒無常是一病，忘義取利是一病，好色壞德是一病，專心係愛是一病，憎欲令死是一病，縱貪蔽過是一病，毀人自譽是一病，擅變自可是一病，輕口喜言是一病，快意逐非是一病，以智輕人是一病，乘權縱橫是一病，非人自是是一病，傷易孤弱是一病，以力勝人是一病，威勢迫協是一病，語欲勝人是一病，貸不念償是一病，曲人自直是一病，以直傷人是一病，惡人自喜是一病，怒喜自伐是一病，愚人自賢是一病，以功自與是一病，泯人有功是一病，以勞自怨是一病，以虛為實是一病，喜說人過是一病，以富驕人是一病，以貴輕人是一病，以貧妬富是一病，以賤訕貴是一病，讒人求媚是一病，以德自顯是一病，敗人成功是一病，以私亂公是一病，好自掩噫是一病，危人自安是一病，陰懷嫉害是一病，激勵旁悖是一病，多憎少愛是一病，評論非義是一病，推負著人是一病，又拒鈎鉅是一病，持人短長是一病，假自祝誓是一

病，施人望報是一病，無施責人是一病，與人追悔是一病，好自怨爭是一病，罵詈蟲畜是一病，蠱道厭人是一病，毀訾高才是一病，憎人勝己是一病，毒藥醜餌是一病，心不平等是一病，以賢噴嗃是一病，追念舊惡是一病，不受諫喻是一病，內疏外親是一病，投書敗人是一病，談愚癡人是一病，煩苛輕躁是一病，擿捶無理是一病，好自作正是一病，多疑少信是一病，笑顛狂人是一病，蹲踞無禮是一病，醜言惡語是一病，輕易老小是一病，惡能醜對是一病，了戾自用是一病，喜好嗜美是一病，喜禁錮人是一病，鬼魅諛諂是一病，嗜得懷詐是一病，兩舌無信是一病，乘酒縱橫是一病，罵詈風雨是一病，惡言好殺是一病，教人毒害是一病，干預人事是一病，孔穴窺視是一病，借不念還是一病，負債逃竊是一病，背向異辭是一病，喜抵捍戾是一病，調戲必固是一病，故迷誤人是一病，探巢破卵是一病，剝胎剖形是一病，水火敗傷是一

病，笑盲聾瘖癡是一病，教人嫁娶是一病，教人擿捶是一病，教人作惡是一病，含禍離愛是一病，唱禍導非是一病，見便欲得是一病，強奪人物是一病。老君曰：能念，除此百病，則無灾累，即爲百藥矣。下出百藥者：體弱性柔是一藥，行寬心和是一藥，動靜有禮是一藥，起居有度是一藥，近德遠色是一藥，除去欲心是一藥，推分引義是一藥，不取非分是一藥，心離憎愛是一藥，好相中用是一藥，爲人願福是一藥，救禍濟難是一藥，教化愚蔽是一藥，諫正邪亂是一藥，誠勅童蒙是一藥，開導迷誤是一藥，扶接老弱是一藥，以力助人是一藥，與窮正分是一藥，矜貧傷疴是一藥，位高下士是一藥，言語謙遜是一藥，恭敬卑微是一藥，不負宿債是一藥，愍慰篤信是一藥，質直端嚴是一藥，推直引曲是一藥，不爭是非是一藥，逢侵不鄙是一藥，受辱不怨是一藥，推善引惡是一藥，推好取醜是一藥，推多取少是一藥，稱歎賢良是一藥，見賢自省是一

藥，不自彰顯是一藥，推功引苦是一藥，不自伐善是一藥，不泯人功是一藥，勞苦不恨是一藥，懷實行實是一藥，覆蔽陰惡是一藥，富有假乞是一藥，崇進勝己是一藥，安貧不怨是一藥，不自尊大是一藥，好成人功是一藥，不好陰私是一藥，得失自觀是一藥，陰德樹恩是一藥，生不罵詈是一藥，不評論人是非是一藥，好言善語是一藥，灾病自咎是一藥，生不價携是一藥，施不望報是一藥，不罵畜生是一藥，爲人祝願是一藥，心平意等是一藥，心靜意定是一藥，不念舊惡是一藥，匡邪弼曲是一藥，聽諫受化是一藥，不干涉人是一藥，忿怒自制是一藥，解散思慮是一藥，尊奉老者是一藥，閨門恭肅是一藥，內修孝悌是一藥，蔽惡揚善是一藥，清廉守分是一藥，好飲食人是一藥，助人報忠是一藥，救日月蝕是一藥，遠嫌避疑是一藥，恬惓寬舒是一藥，尊奉聖文是一藥，思神念道是一藥，宣揚聖化是一藥，立功不倦是一藥，尊天敬地是一

藥，拜謁三光是一藥，恬惓清淨是一藥，仁慎謙讓是一藥，好生惡殺是一藥，不多聚財是一藥，不犯禁忌是一藥，廉潔貞信是一藥，不燒山伐木是一藥，空車助載是一藥，直諫忠信是一藥，喜人有德是一藥，救與窮乏是一藥，代老負擔是一藥，除情去愛是一藥，慈心憐愍是一藥，好稱人善是一藥，因富布施是一藥，因貴爲惠是一藥。右百藥，勸人遵之。是以聖人雖處幽闇，不敢爲非；雖居榮祿，不敢爲利；度形而衣，量腹而食矣。觀身三百大戒云：元始天王授之太上道君，道君傳太微天帝，帝君受戒時，頌三首云：

智慧起本無，朗朗超十方。結空時玄霄，諸天挹流芳。其妙難思議，虛感真實通。有有竟不有，無無無不容。

智慧恒觀身，學道之所先。眇眇任玄肆，自然錄我神。天尊常擁護，魔王爲保言。晃晃金光軀，超超太上仙。

智慧生戒根，真道戒爲主。三寶由是興，高聖所崇受。汎此不死舟，倏

欵濟大有。當此說戒時，天真並稽首。

要修科儀戒律鈔卷之五

要修科儀戒律鈔卷之六

三洞道士朱法滿編

下說三百大戒，約三元：下元一百八十，中元三十六，上元八十四。不得殺生蠕動之蟲，不得飲酒，不得姪犯百姓婦女，不得盜竊人物，不得嫉賢妬能，不得背師恩愛，不得中忠其上，不得罔其下，不得欺枉同學未解之人，不得輕慢弟子，不得口善心懷陰惡，不得說人過惡，不得重貴七寶、不散施四輩，不得樂人錢財觀物爲己重擔，不得畜刀杖兵器，不得養六畜，不得金銀器食飯，不得死厚葬體骨，不得貪樂榮祿，不得燒敗世上土中之物，不得以世間堪食之物投水火中，不得貪世滋味，不得食五辛，不得爲草書，不得以麤物易人好物，不得知預軍國事物，不得設權變謀，不得無故見王侯，不得干知天時、指論星宿，不得以火燒田野山林，不得無故摘衆草之花，不得親近惡人，不得無故伐樹林，不得人中多語、言參

流俗，不得人中獨食，不得與世間婚姻事，不得習世間伎樂，不得泄人陰惡私鄙，不得妄求視人書疏，不得與女人獨語獨行，不得與女人同行、行必有宗，不得與女人同坐、男女同居，不得與女人同食、交借衣物，不得親教女人，不得說人祖父過惡，不得面譽世人，不得以毒藥投淵池江海中，不得親宗族，不得疏異姓，不得落子傷胎，不得因恨報怨，不得偏愛弟子，不得聚集人衆，不得投書譖世人，不得自貴，不得自驕，不得自是用性，不得爲世間妄多忌諱，不得希望人物，不得竭陂池，不得評論師友才思長短，不得輕慢經書、訾毀法言，不得薄賤老病，不得棄薄乞人，不得恃威勢以陵世間，不得阿黨所親，不得父母別門異居，不得瞋恚弟子，不得恚責世人，不得罵人爲奴婢畜生，不得扣奴婢面、傷其四體，不得快人過失，不得歛酷、煩傷世間，不得爲人圖山丘宅，不得占知世間吉凶，不得去就背向，不得與世人群處，不得無故見貴人，不得奪人所欲，不得馳騁流俗、求

譽世間，不得慶弔世間、求悅衆人，不得仍他人之功名爲己德，不得卧寢金寶雕牀，不得名人飲食好惡，不得驚怛百姓、妄說衰危，不得驚怛鳥獸、蹙以窮地，不得驚怖老小，不得輕陵官長有司，不得預人間、論議曲直，施惠不得追吝，不得遊遨無度，不得妄登高樓，不得籠飛鳥走獸，不得塞井及溝池，不得快人家喪禍，不得以棘橫人行道，不得祠祀神祇，不得向神鬼拜，不得裸形三光、妄呵風雨，不得換舉人物、不還債主，不得斷割人財，不得觀人爲惡事，不得禁人爲善事，不得諸天齋日、不齋戒念道，不得違六齋月中齋，不得違經教、科戒、禁律，不得爲人作詞訟，不得信人、以恚世間，不得唱論人惡，不得笑人頑闇貧賤，不得以意增減經戒一字、天司奪筭，不得妄生語言，不得勸人謀叛君長師父，不得傲慢三寶、輕忽天尊，不得勸人不孝父母兄弟，不得矯稱、自異號爲真人，不得信用外道雜術、邪鬼不真，不得衣服盈篋，不得謗人學道，不得無經託學、欺詐人神，

凡諸道學，不得自爲及不得教人爲。

右觀身大戒，從第五戒至一百八十戒，君子之道，名玉清智慧下元品戒，戒前並標道學，以略於此。下出中元三十六戒：道學不得望人禮意，不得竊寫人經戒，不得榮飾衣褐，不得身不潔淨，上高牀讀經，或與人同行，當讓人以前。與人同學，夏執爨供養；與人同學，冬執硯供水；與人同食，其麤及菜；與人同食，當正己前；與人同學，當敬先勝己；與人同住，當任處分；與人同學，當念教未解。人施惡於己，已受惡，不得有怨，不得懷怨志報於人。與女人共語，不得正視面容笑相對。與女人同渡水，不得正眼視之。失物不疑以同學及衆人，失物當委運自悔，多罪多災疾，當恭己自責念，改往修來。當忍人所不能忍，當割人所不能割，當衣人所不能衣，當食人所不能食，當學人所不能學，當容人所不能容，當受人所不能受，當斷人所不能斷。無使精神浮散，真想不通，身不潔淨，魂魄離人。有心則天真斷絕，魔

官不能降；有家則三毒不滅，三真不居；有身則衆邪不去，精思無應。當心靜寂漠與真樹，當安玄泉，不使妄動，先滅識藏見，然後真人見。觀身戒從第五至二百一十六，無上正真之道，名玉清智慧中元戒品。下出上元戒品，下出上元戒八十四：道學當念菜食爲常，當念先度人後度身，當念居山林、幽靜精思，當念燒衆名香、流芳諸天、徹魔境界，當念在賢衆、聽受妙音，當念請受三寶洞經、勤身供養，當念立功度人、終劫不倦殆，當念執師友本德、終劫不殆，當念國中清靜、王化太平、無有不道，當念鄰國有道、各守境界，當念祝願百姓、令常安完，當念萬物爲先、不得道已，當念遠鬼神、不敬不慢，當念遠外術禁忌之道，當念遠聲色歌舞之術，當念無疑惑聖文、損益科法，當念無求無欲，當念崇本守真，當念口不違心、心不負形，當念清白守真，當念一無異想、想念惟空寂，當念寂寂安寧、咸無苦痛，當念世間憂危之人、罪繫苦惱，當念天子聖明弘道、皇

家日盛，當念君臣相輔、常有保道，當念天地日月、風雨霜雪以時，當念父母養我因緣，當念七世父母、上昇天堂，當念我師、早得登度，當念我同學人、來測道源淵奧典章，當念同志、轉相教導、令入正道，當念不違其口所謂之文，當念視人父母如己父母，當念視人子過己子，當念視人身過己身，當念視人傷身、痛過己身，當念視人辱惡過其身，當念我宿命、因緣根斷，當念我生樹已枯、神合大無、無數之劫、體合道真，當念胎根已絕、不能生世因緣種親，當念三徒路塞、地獄長休，當念中食養神、棄諸肥滋，當念慎大法、常存三宮真元子丹，當念觀世和光、不驕於俗，當念三寶經戒、常誦不輟，當念存雌一、誦大洞經、眇若神對，當念登仙度世、乘雲駕龍，當念欲見同師之人，當念見真人道士、修行法事，當念見聖主治世、海外稽首、乘風向化，當念食天厨自然之膳、無飢渴之想，當念與天真共對、淡然無爲，當念使仙童玉女，當念東遊青林東華，當念西遊安養西

華，當念北遊碧羅北華，當念南遊太丹南華，當念遊遨留憩玉京、崑崙中華，當念遊上齋堂、講詳聖道、敷釋淵蹟，當念遊玉清七寶宮、禮三元天尊，當念遊玉清丹霞宮、禮太上二十四高聖，當念遊紫宮、禮洞真三十九高聖，當念遊太上玉京七寶流霞高蔭蓋玉林、禮太上天尊、十方大聖、終劫復始，當念遊三十六天黃金宮、禮天帝，當念遊九天黃金暉宮、禮天帝，當念遊六天七寶宮、觀化大魔王、見度我籍以入仙品、永離泉曲之簿，當念遊諸天宮宅、與天帝問道論經，當念遊日月宮殿、光明煥赫、禮見日月王、飲以日月華金鈞之漿，當念遊大梵天流景宮、禮下仙及天帝衆聖、聽諸霄絕雅妙音，當念遊諸天七寶林、反生靈香、流芳逆風、聞二千里外、獅子飛龍鳴嘯其間，當念遊諸天、沐浴安坐蓮華之上、香潔自然流汨、諸天池皆如一處人快樂，當念遊諸天、聽諸天伎樂、無世間之想，當念遊十方外天，祀大聖衆無上正真人，當念遊天地名山隱宮洞室、禮聖衆先得道

人，當念隱祕天真名諱、不犯我口，當念以爲道經、無見異念、恒令心虛意大、思志玄虛、安雅空寂。觀身戒從第五至三百首，太上無極之道，名高上玉清智慧上元戒品。之微天帝曰：若奉戒，弟子獨宿山林可畏之地，鳴天鼓二七通。心存戒，神衛三重，祿鬼不敢近，福德恒隨身，諸天善神，各各應護也，先是冤家債主，皆生慈心矣。

要修科儀戒律鈔卷之六

# 要修科儀戒律鈔卷之七

三洞道士朱法滿編

## 罪報科

夫淨心直道，王法所不能加；動念全真，地獄去來無畏。若以六根取著，五道輪迴，輕重出自，身行報對，皆由己分，毫分不失，冥府書愆。《三元品戒經》曰：天官三十六曹，地、水各四十二曹，三官九署百二十曹。曹置一考，官百二十考，吏一千二百考，兵萬二千考，士隨人生時作罪，以考促之。

## 三元罪戒品目

天官：一宮中府，十二曹。  
地官：一宮中府，十四曹。  
水官：一宮中府，十四曹。  
上真禪號高下尊卑功過儀典；  
上真衆聖朝禮旋行功過儀典；  
上真大聖遊宴從駕功過儀典。  
上真總校生死圖籙功過；  
上真總領生死命籍筭錄功過；

上真總領生死功德輕重功過；  
上真總領鬼神功德報叙轉輪功過；  
上真總領鬼神幽責開度功過；  
上直總領昇度死魂更生輕重功過；  
上真總領死魂受鍊安靈功過；  
上真總領神仙得道年月品秩功過；  
上真總領萬魔謠歌之音功過。  
學上道，不信經戒，懷疑兩心之罪；  
學上道，輕慢聖文，評論經典罪；  
學上道，輕慢師主，違師主盟誓罪；  
學上道，毀謗師父，不崇大義罪；  
學上道，竊取經書，無有師宗罪；  
學上道，學無師而授弟子罪；  
學上道，誘取經書而傳弟子罪；  
學上道，得經書而無師盟戒受罪；  
學上道，受經不依經科年月傳授罪；  
學上道，受經傳授非其人罪；  
學上道，受法師門，無開度之功罪；  
學上道，無功而傳授弟子罪；  
學上道，傳法宿奏不合而傳罪；  
學上道，傳經不宿奏五帝罪；  
學上道，傳經無信，賤道法之罪；  
學上道，遏斷賢路，自取功名罪；

學上道，朝半八節，不禮師罪；  
學上道，不修齋直之罪；  
學上道，齋直不精之罪；  
學上道，誦經越略之罪；  
學上道，旋行越次爭競罪；  
學上道，恚怒師尊父母罪。  
學士及百姓子，攻擊善人罪；  
學士及百姓子，惡口赤舌罪；  
學士及百姓子，評論師主百姓罪；  
學士及百姓子，飲酒失性罪；  
學士及百姓子，殺生陰賊罪；  
學士及百姓子，貪欲驕逸罪；  
學士及百姓子，穢濁道法罪；  
學士及百姓子，呪詛神鬼罪；  
學士及百姓子，殺害衆生罪；  
學士及百姓子，綺言兩舌不信罪；  
學士及百姓子，奸淫穢濁罪；  
學士及百姓子，盜竊人物罪；  
學士及百姓子，嫉賢妬能罪；  
學士及百姓子，背師恩愛罪；  
學士及百姓子，欺背口舌罪；  
學士及百姓子，泄露天文罪；  
學士及百姓子，毀謗經法罪；

學士及百姓子，修經中悔罪；

學士及百姓子，不忠於上罪；

學士及百姓子，罔略於下罪；

學士及百姓子，欺罔同學罪；

學士及百姓子，欺罔百姓罪；

學士及百姓子，口善心惡罪；

學士及百姓子，說人過惡罪；

學士及百姓子，輕慢三光罪；

學士及百姓子，穢慢神鬼罪。

右六十條罪，由天官一官中府十二

曹，地官一官中府十四曹，水官一官

中府十四曹，風刀考官主之。

天官：左宮左府，十二曹。

地官：左宮左府，十四曹。

水官：左宮左府，十四曹。

學士及百姓子，嫉妒同學罪；

學士及百姓子，淫華妄語罪；

學士及百姓子，貪利無厭罪；

學士及百姓子，精祿重寶不施散罪；

學士及百姓子，樂人寶物入己罪；

學士及百姓子，願人傷敗流散罪；

學士及百姓子，私畜刀杖兵器罪；

學士及百姓子，屠割六畜殺生罪；

學士及百姓子，射刺野獸飛鳥罪；

學士及百姓子，燒山捕獵罪；

學士及百姓子，捕魚張筌罪；

學士及百姓子，金銀器食罪；

學士及百姓子，貪樂榮祿虛正罪；

學士及百姓子，燒敗見物罪；

學士及百姓子，飲食投水中罪；

學士及百姓子，貪濁滋味肥葷罪；

學士及百姓子，貪食五辛罪；

學士及百姓子，草書偽意罪；

學士及百姓子，合聚羣衆罪；

學士及百姓子，圖謀人婦女罪；

學士及百姓子，心謀國事罪；

學士及百姓子，圖謀人家物事罪；

學士及百姓子，羸物易人好物罪；

學士及百姓子，交關天子侯王罪；

學士及百姓子，干知天時星宿罪；

學士及百姓子，火燒田野山林罪；

學士及百姓子，斫伐樹木摘果華罪；

學士及百姓子，與惡人交遊親近罪；

學士及百姓子，交關流俗華競罪；

學士及百姓子，在人中獨食之罪；

學士及百姓子，與世間交關婚姻事

罪；

學士及百姓子，放蕩世間伎樂罪；

學士及百姓子，面譽世人陰毀人罪；

學士及百姓子，說人尊上善惡罪；

學士及百姓子，泄露人陰惡私鄙罪；

學士及百姓子，攻擊善人禍生無端

罪；

學士及百姓子，妄視人書疏司微罪；

學士及百姓子，與女人行獨語罪；

學士及百姓子，男女同座羣居罪；

學士及百姓子，男女共食交錯衣物

罪；

學士及百姓子，男女教化不善罪；

學士及百姓子，自貴僞逸罪；

學士及百姓子，因恨報冤罪；

學士及百姓子，離別家室罪；

學士及百姓子，落子傷胎罪；

學士及百姓子，親宗族疏異姓罪；

學士及百姓子，毒藥投水傷生罪；

學士及百姓子，偏愛弟子罪；

學士及百姓子，收集人衆罪；

學士及百姓子，投書譖世人罪；

學士及百姓子，自許用性之罪；



學士及百姓子，妄作忌諱罪；  
學士及百姓子，希人物事罪；  
學士及百姓子，評論師友長短罪；  
學士及百姓子，輕慢經教法言罪；  
學士及百姓子，薄賤他人老病罪；  
學士及百姓子，棄薄乞人罪；  
學士及百姓子，承勢以陵世間罪；  
學士及百姓子，阿黨所親罪；  
學士及百姓子，父母兄弟別離各居罪。  
右六十條罪，由天官左官左府十二曹，地官左官左府十四曹，水官左官左府十四曹，太陽水官考吏主之。  
天官：右宮右府，十二曹。  
地官：右宮右府，十四曹。  
水官：右宮右府，十四曹。  
學士及百姓子，瞋恚弟子罪；  
學士及百姓子，恚責世人罪；  
學士及百姓子，不放生度死罪；  
學士及百姓子，富貴忘師罪；  
學士及百姓子，食諸天齋果忘道罪；  
學士及百姓子，信人言恚師主罪；  
學士及百姓子，唱論人惡事罪；  
學士及百姓子，笑人頑闇貧賤罪；

學士及百姓子，勸人爲惡事罪；  
學士及百姓子，禁人作善事罪；  
學士及百姓子，快人過失罪；  
學士及百姓子，去就背向罪；  
學士及百姓子，五嶽三河無簡名罪；  
學士及百姓子，汙穢五嶽三河罪；  
學士及百姓子，奪人所欲罪；  
學士及百姓子，馳騁流俗爭競世間罪；  
學士及百姓子，慶弔世間求悅衆人罪；  
學士及百姓子，仍他人功爲己德罪；  
學士及百姓子，名人飲食好惡罪；  
學士及百姓子，驚怛百姓衰厄罪；  
學士及百姓子，驚怛鳥獸促著窮地罪；  
學士及百姓子，驚怖老小之罪；  
學士及百姓子，輕陵官長有司罪；  
學士及百姓子，論議世間曲直罪；  
學士及百姓子，妄論國家衰盛罪；  
學士及百姓子，施惠追悛罪；  
學士及百姓子，籠飛鳥走獸罪；  
學士及百姓子，快人家喪禍罪；

學士及百姓子，以棘刺橫人行道罪；  
學士及百姓子，拜禮鬼神之罪；  
學士及百姓子，裸形三光之罪；  
學士及百姓子，呵罵風雲雷雨罪；  
學士及百姓子，換借不遠之罪；  
學士及百姓子，罔人求榮稱罪；  
學士及百姓子，傲慢三寶輕忽天尊罪；  
學士及百姓子，謀人君長師父罪；  
學士及百姓子，勸人不孝父母兄弟罪；  
學士及百姓子，矯稱自異號爲真人罪；  
學士及百姓子，信用外道術邪見罪；  
學士及百姓子，無經師說學欺詐人神罪；  
學士及百姓子，衣服盈餘弗散窮人罪；  
學士及百姓子，竊寫人經戒慢露罪；  
學士及百姓子，榮飾衣褐華麗罪；  
學士及百姓子，身不潔淨上高座罪；  
學士及百姓子，穢慢師門不恭罪；  
學士及百姓子，師有哀憂不建齋請

罪；

學士及百姓子，棄師父追世盛罪；

學士及百姓子，豪貴隨逐希望罪；

學士及百姓子，師疾厄不侍省罪；

學士及百姓子，遠危厄逐寬樂罪；

學士及百姓子，出入道戶不關啓罪；

學士及百姓子，妄與他人入道戶語

罪；

學士及百姓子，齋請不爲三官遷功

罪；

學士及百姓子，自愁家門不念他窮厄

罪；

學士及百姓子，家有喪疾怨道咎師

罪；

學士及百姓子，得師經道而自稱己得

罪；

學士及百姓子，傳師道法不折送功信

罪；

學士及百姓子，八節不請師言五帝

罪；

學士及百姓子，遨遊無度縱恣罪；

學士及百姓子，登高望下罪。

右六十條罪，由天官右官右府十二

曹，地官右官右府十四曹，水官右官右府十四曹，太陰水官考吏主之。

《真藏經》曰：盜竊人物者，死入

金槌獄；妄取人一錢以上者，死入鑊

湯獄；妄言綺語者，死入拔舌獄；因

恨殺人者，死入五牢大地獄；貪瞋癡

恨者，死入大檻獄；慢老欺人者，死入

豐都獄；呪詛毒心者，死入八閻獄；

罵詈高聲者，死入迷犁獄；訾毀謗人

者，死入北寒獄；兩舌便佞者，死入火

山獄；持人長短者，死入碓地獄；好

言人惡者，死入黑闇獄；毀善自譽者，

死入大劍獄；自驕我慢者，死入樵火

獄；蓄毒藥人者，死入石灰獄；投書

譖人者，死入黃泉大閻獄；輕慢經教

者，死入障明獄；謗毀聖文者，死入銅

火獄；恃威凌物者，死入炎鑪獄；殺

生淫祀者，死入沸山獄；燒野山林遊

獵者，死入分形獄；評論師長者，死入

磨山獄；貪惜財物者，死入餓鬼獄；

言人陰事者，死入黑水獄。

要修科儀戒律鈔卷之七

### 要修科儀戒律鈔卷之八

三洞道士朱法滿編

#### 齋名鈔

夫入靜登真，要資齋戒，假其形外之法，以暢心內之儀。《度人經》云：天地運終，亦當修齋、行香、誦經；星宿錯度，日月失昏，亦當修齋、行香、誦經；四時失度，陰陽不調，亦當修齋、行香、誦經；國主有災，兵革四興，亦當修齋、行香、誦經；疫毒流行，兆民死傷，亦當修齋、行香、誦經；師友命過，亦當修齋、行香、誦經。夫齋戒誦經，功德甚重。上消天災，保鎮帝王；下禳毒害，以度兆民。生死受賴，其福難勝。《聖紀經》云：齋有六種，第一上清齋，有二法：一者，絕羣獨晏，靜氣遺形；二者，清壇肅侶，依太真儀格。先拔九玄，次及家門，後及己身。第二靈寶齋，有六法：一曰金籙齋，救度國王；二曰黃籙齋，拔度祖世；三曰明真齋，懺悔九幽；四曰三元齋，首

謝犯科；五曰八節齋，懺洗宿新之過；六曰自然齋，爲百姓祈福。第三洞神齋，精簡爲上，絕塵期靈。第四太一齋，以恭肅爲首。第五旨教齋，以清素爲貴。第六塗炭齋，以勤苦爲功。以此諸齋目，自古至今，儀格甚重，時移代異，不無詳略於靈寶齋中，或爲半景。半景之齋，即是宿啓，宿啓齋無言功，唯只一時、兩時懺悔，亦不三時上香，既闕步虛，亦略禮經一節，或小小齋中三歎，願隨時去取，逐便製儀，既非大集，心達而已。

### 齋月鈔

《三元品戒》云：正月，天官檢校之月；七月，地官檢校之月；十月，水官檢校之月。此三月，並可長齋。《度人經》云：正月長齋，爲上世亡魂；七月長齋，以爲己身；十月長齋，安鎮國祚。

《明真科》曰：正月、三月、五月、七月、九月、十一月，一年六齋月。《旨教經》云：此六齋月，上三天，令天帝太一使者，司察天下人過失。此日能

齋，令除十苦，拜謁太上。《上清八道祕言經》云：正月、三月、四月、六月、七月、八月、九月、十月、十一月，此九月，九真齋月。

### 齋日鈔

《玄都大獻經》曰：正月十五日，天官校戒，上元齋日；七月十五日，地官校戒，中元齋日；十月十五日，水官校戒，下元齋日。此三日能齋，三官勒名善簿。《皇人本行經》云：月中三齋，一日，十五日，二十九日，乃可清齋。《上清飛玄經》曰：西王母常以正月、二月、四月、六月、七月、八月、九月、十一月、十二月，一年十月，月三日、五日、九日、十五日、二十五日，一月五日，清齋攝心。元始錫禪，西元九靈上真仙母，給九色鳳衣，鳳雲之舄，神鳳紫輪，飛行羽蓋，二十四乘，令百姓子男女人，至此日，能清齋誦念，隨心獲果，去三千之重罪，契九天而受福。《聖紀經》云：正月七日，名舉遷賞會；七月七日，名慶生中會；十月五日，名建生大會。右三會之日，三官

考覈功過，依日齋戒，呈章賞會，以祈景福。又云五臘日：正月一日，名天臘；五月初五日，名地臘；七月七日，名道德臘；十月一日，名民歲臘；十二月節日，名王侯臘。五臘通三元，名八解日，皆可設淨供，建齋求福，兼祀先亡，名爲孝子，得福無量。餘日名爲淫祀，有罪。

《明真科》曰：月一日、八日、十四日、十五日、十八日、二十三日、二十四日、二十八日、二十九日、三十日，名爲十直齋。《旨教經》曰：一日，北斗下；八日，北斗司殺鬼下；十四日，太一使者下；十五日，天帝下。天帝下者，日月星宿，諸官俱下。十八日，天一下；二十三日，太一八神使者下；二十四日，北辰下；二十八日，下太一下；二十九日，中太一下；三十日，上太一下。太一下者，日月五星、二十八宿、璇璣玉衡、七星北斗、司命司錄、司罰司殺、大聖尊神、妙行真人、天帝大王俱下。當此之日，天神地祇，莫不傾悚，周行天下，伺人善惡。其日有執心

精進，不違經教，親敬守戒，誦經行道，遠宣法教，太一歡喜，益其筭祿，度著左契，刻名玉籙，拜為真人。其日若殺生，詐欺淫盜，罵辱道士，訾毀經教，太

一大怒，減其筭祿，度著右契，下名三官，稱為罪人。若甲子日，太一遣中臺大使下；八節日，太一八神下。此日並攝齋，太一歡悅。庚申日，身中伏尸上，言人罪過。本命日，受法之身，吏兵上天，計人功失，並須攝齋。《三皇內文》曰：甲子日，天皇直官下，以夜半時；甲戌日，天皇直官下，以黃昏時；甲申日，地皇直官下，以晡時；甲午日，地皇直官下，以日中時；甲辰日，人皇直官下，以食時；甲寅日，人皇直官下，以平旦時。右天官下直，五嶽四瀆之神，各依方列位，料察善惡，言功記過，無不上聞兆。當以其日修齋，定錄南昌。丁卯日，天皇直官下，以日出時；丁丑日，天皇直官下，以雞鳴時；丁酉日，地皇直官下，以日入時；丁亥日，地皇直官下，以人定時；丁未日，人皇直官下，以日昃時；丁巳

日，人皇直官下，以禺中時。右六丁日，是三皇之陰神日也。依日持齋，五嶽真人各遣五神營衛，記名仙籙也。

### 齋時鈔

《千真科》曰：齋時，先步圭取影。天陰日，以水刻分時。《皇人本行經》曰：齋依時，不依時。法先豎尺圭，圭上為尺寸，於中庭，依二十四氣，取圭影之長短，以為法焉。立春後，影長六尺五寸以為時，五尺六寸為非時。雨水後，影長六尺以為時，五尺二寸為非時。驚蟄後，影長五尺五寸以為時，四尺七寸為非時。春分後，影長五尺以為時，四尺二寸為非時。清明後，影長四尺五寸以為時，三尺七寸為非時。穀雨後，影長四尺以為時，三尺三寸為非時。立夏後，影長三尺五寸以為時，二尺七寸為非時。小滿後，影長三尺以為時，二尺二寸為非時。芒種後，影長二尺五寸以為時，一尺七寸為非時。夏至後，影長二尺以為時，一尺二寸為非時。小暑後，影長二尺五寸以為時，一尺七寸為非時。大暑後，影長三尺

以為時，二尺二寸為非時。立秋後，影長三尺五寸以為時，二尺七寸為非時。處暑後，影長四尺以為時，三尺二寸為非時。白露後，影長四尺五寸以為時，三尺七寸為非時。秋分後，影長五尺以為時，四尺二寸為非時。寒露後，影長五尺五寸以為時，四尺七寸為非時。霜降後，影長六尺以為時，五尺二寸為非時。立冬後，影長六尺五寸以為時，五尺七寸為非時。小雪後，影長七尺以為時，六尺二寸為非時。大雪後，影長七尺五寸以為時，六尺七寸為非時。冬至後，影長八尺以為時，七尺二寸為非時。小寒後，影長七尺五寸以為時，六尺七寸為非時。大寒後，影長七尺以為時，六尺二寸為非時。《皇人》曰：諸善男女，持齋不失，節度童子記名天官簿中。若犯戒失度，為地官所考罰。

### 法師鈔

《玄都律》云：夫齋者，正以清虛為體，恬靜為業，謙卑為本，恭敬為事，戰戰兢兢，如履冰谷，肅肅慄慄，如對

嚴君。至經句處起禮拜，當一心稱善，隨意願念，唯令丹苦，必蒙感應。今以建齋之家，非不用意應赴之者，多不存法，特由大德我慢，使下訛怠，鈔集此律，略示恭勤。《自然訣下》曰：夫感天地，致羣神，通仙道，洞至真，解積世罪，滅凶咎，却怨家，修盛德，治疾病，濟一切物，莫近乎齋。《金錄簡文》曰：登齋，當舉高德法師一人，都講一人，監齋一人，侍經一人，侍香一人，侍燈一人。明日行道，各典所署師一人，廣須宣令。

《太真科》曰：若就齋戒儀軌，大德之人，應當前行前坐，約語徒衆，必使齊整，勿使主人有所嫌鄙，或各爭異論，無有畏忌，非唯道俗，賢善同惡，亦乃十方大聖冥鑒，爲罪招殃，各自己受。

《太真科》曰：作齋之家，請清廉道士，患無多耳。請人不限於數，令不篤信者聞之，生於歸敬，自積福德，非齋不濟。然清廉之人，實堪歸敬；貪淫之輩，人我甚高。就請應物，恒希先

首，設所簡選，曾不責躬，爲建福家，作大患害，能自退省，是稱道子。《金錄簡文》曰：建齋之家，未至一宿，當自沐浴，灑掃內外，丁勅大小，齋等一心。

《太真科》曰：齋官宿到，悉香湯沐浴畢，俱入法堂，宣示科戒，威儀庠序。有違一刑律論。科曰：不從法師，各私用意，二刑論。科曰：不及宿啓，不得入齋，今時之人，明朝尚闕行道。今夜宿啓，豈爲存懷，或貪求外緣，或房中睡卧，分簡受職，即有闕如。明日行香，乃生推注，當由法師，夜不宣告。臨事沸亂喧爭，一則冥府書愆，二則交違法事，三則不生敬信，四則福善無憑。論云：爲不善於顯明之中者，人得而誅之；爲不善於幽闇之中者，鬼得而誅之。明乎人，明乎鬼，然後能獨行。老君云：天網恢恢，疏而不失。既當主人禮供，豈得坐致愆殃，幸各思之，令從己悟。

《太真科》曰：齋官具受宣告，不得與外人交言，二刑論。科曰：齋日清靜，存神念道，標門斷客，內外禁隔。

《千真科》曰：建齋之家，未至三日，灑掃內外，於門首豎一長幡標門，使人客知之，葷辛之侶，不敢至家，敬信之人，來乃恭肅。

#### 都講鈔

夫行齋引衆，唱說爲先。知去就之儀，定早晚之節。《敷齋威儀》曰：都講，其職也，克明正典，詮舉職任，至如行道時節，禮誦容止。先鳴法鼓，次引朋衆，法則執儀，敬憑唱說。夫以建齋行事，都講要用明能：一則參詳法師，二則知主人齋意，三則先定時節，四則擊鼓鳴鐘。若參詳法師者，先取法師進止，可不進退，要共評論，不得自出一意，專制法徒。若知主人齋意者，若主人吉樂齋，威儀悅衆，若主人疾厄齋，勤苦爲務，先定三時、六時行道之數。《金錄簡文》云：朝、中、日入、人定、夜半、雞鳴，爲六時行道。若三時者，朝、中、人定而已。

《太真科》曰：凡爲人告齋，皆三時下，息苦救急，謝罪消災。請福，皆晝夜誦詠祝願，不得卧息，若積日疲

困，分時下息，讀經說戒，晝夜不輟，行道齊同，不得虧闕。若齋官病則啓告，衆則退出齋堂。齋所嚴肅，不得養痾，養痾別房，勿喧齋所。若幸堪在齋，登堂整肅，不得低睡，密相督勵，不須行罰，行罰參差，乖祈感之至乎。常修習用黜罰之科，使內外齊同，令改昏見曉。師不得濫罰弟子，弟子受罰，不得有辭，所罰必謬，許有薄訴，達心而已。不得苦言，苦言怨己，師與弟子，同五行論。若三時行道，當中後下息至晡時，夜半下息至雞鳴，餘皆上講誦經。若六時行道，當中後下息至晡時，黃昏後下息至人定，夜半後下息至雞鳴，三時下息，餘時皆上講誦經。使心目同注，意念玄虛，舉動施爲，每依儀典。若擊鼓鳴鐘，招仙集聖，法鼓有二：一則叩齒，二則金鐘玉磬。一則叩齒者，《威儀》云：先鳴法鼓，次引朋衆。然鳴法鼓，或三通、七通、九通、十通、十二通、二十四通、三十六通、四十九通、七十二通、八十一通，隨時所用。《老君經序》云：叩齒三，咽液三也。《昇

玄經》云：即便叩齒七通爲七曜，道明當發故。《生神章》云：叩齒九通。《昇玄》又云：叩齒十二通，三噓。又云：叩齒二十四通。《度人經》云：叩齒三十二通，上聞三十二天。《昇玄經》云：天師西向叩齒七七四十九通，太上東向叩齒七十二通。又云：太上叩齒九九八十一通。《上清八道祕言經》曰：叩齒之法，左左相叩，名曰折制天鐘；右右相叩，名曰震椎天磬；中央上下對相叩，名曰嚴鳴天鼓。若卒遇凶惡不祥，當折天鐘三十六通；若經凶辟邪、威神大祝，當椎天磬；若存思念道、致真招靈，當鳴天鼓。叩齒雖一，其實有三，故凶惡而畏天鐘之響，山神而攝天磬之洞，招神而肅天鼓之震矣。宮商有節，希微內感，不可以一槩而求，不可以偶然而合召也。《酆都記》云：鮑助，濟北人，年四十餘，亦無道術，中風至口面，齒常自啄。年得一百二十七後，遇大水，隨長壽河而死。北帝數遣殺鬼取之，鬼不敢近。鬼官問其故，殺鬼答云：此人乃多方

術，以制於我，常行叩齒，鳴打天鼓，以警身神，神不得散，鬼氣不得入也。二則鐘磬者，《太真科》曰：齋堂之前，經臺之上，皆懸金鐘玉磬，鐘磬依時鳴。行道上講，悉先叩擊，非唯警戒人衆，亦乃感動羣靈，神人相關，同時集會，弘道濟物，盛德交歸。又曰：法身叩鐘，清嚴束帶，諦心存神，與己相見，調槌正擊，漸微至著，數十二、二十四、三十六，隨衆多少。《皇人本行經》曰：鳴鐘，正法服，先至鐘所，手執鐘槌，祝曰：圓槌震法鐘，流聲徧十方。入下通長夜，登高響玉房。九幽聞離苦，七祖上仙堂。鳴三下，法陰數生於一，成於十。爪彈十下，發長牙之音，陽數生於一，成於九。次引九槌，震瓊瑤之響。三下者，上聞清微、禹餘、大赤之三天，中應無色、色、欲之三界，下警地獄、餓鬼、畜生之三徒。三天，三界，三徒，三三爲九，故九槌也。歛長法，歛長二十七槌，上九通九天之道君，中九覺九宮之真帝，下九招九幽之苦魂。連三下，合四九三十六槌，上聞三十六

天帝，中應三十六部尊經，下徹三十六地戶。若得法，左仙童記善；若失法，右玉女記惡。明各詳之，犯科冥考。《玄都律》曰：若都講行事不唱，自罰香一斤。今出家之人，不依節制鳴鐘，信任在下，師主又無軌儀，非但依帔鞋履不端，亦乃遲疾之節失度，一則人聞可醜，二則龜鏡失常，寫圖樣以示人，庶當來而可軌。

### 監齋鈔

夫道因聖顯，福寄人弘，若不糾彈，無遵典憲。《敷齋威儀》云：篤勵虧怠，彈糾愆過，不偏不黨，無隱無濫，秉執憲章，務存允愜。然所爲法事，要假其人，若不切磋，何取成例，只可依法，勿惜人情。《昇玄經》云：監齋十事。一者，令設供之家，先齋前三日，投辭於法師，陳說所願，並修所、請齋人姓名、道位多少，法師受辭，即對辭主騰辭，上刺請監齋官屬；二者，令供主還家，更報所請齋人云，已投辭上刺訖，宜各潔淨，勿與俗人共同牀座，莫作諸惡、不善之行，此至齋竟，保全身

口意，一如太上威儀之令；三者，令供主不得盜鬼神之餘物，及市買熟食以供齋人；四者，令供主見有異人聞齋，欲來聽經者，不得計飲食之費，遏截不聽；五者，令供主上刺訖，還家便於靜室、齋堂，燒香明燈，爲監齋官屬，當下監察；六者，供主不得辭託齋事，不供當賓客；七者，當令供主解齋布施，隨家豐儉，一錢一縷，亦足表心；八者，令供主不得緩帶裙裳，如給使法；九者，令供主不得迎師，有人去便不送，是去就異心，皆思忘義；十者，不得令供主因解齋之餘，以解神福，是名貪利惜費，無恭肅心。

《玄都律》云：主人內外，不預相檢勅，音聲高厲者，罰油五升；若主供辦，諸物有闕，罰油二升；若執糾見過，不彈私隱，罰油六升；若受闕不啓上補，罰油三升；若齋人妄言綺語，論及私鄙，罰香一斤、油五升、朱三兩。

律曰：若有犯威儀、彈糾不伏者，當啓告三寶，退出齋次；若彈糾不實，以罪罪之；若上座法師，自覺有失，須

收愆送失，如不自收，監齋准法彈糾；若法事有虧，從一至三，監齋依事罰糾；若從三以上，斷功削除，宣示同學，不得容在法座；若監齋容縱不糾，亦與同罪。

### 侍香鈔

夫水以洗塵，香能破穢，假茲百和，託信三清。《敷齋威儀》云：侍香，其職也。炎鑪肅整，芳馨恒然，使畢夜煙流，終朝火續，此法事之所先，宜晨昏而勿怠。《本際經》云：散天香花，猶如雪下，繽紛芳馥，悅樂衆心。又云：熾百和反風名香，散萬種天樹寶花。《衆篇經》云：飛香八湊，流電揚烽。又云：金童揚香，月宮散花。《定志》云：百和寶香，不熾自薰。《昇玄經》云：香氣苾芬，薰於八方。《五符序》云：然百和之香以破穢。又云：燒香醮五帝，看流芳所歸。氣正上中，黃帝先降；氣東流者，青帝先降；氣南流者，赤帝先降；氣西流者，白帝先降；氣北流者，黑帝先降。

《玄都律》曰：誥朝拜竟，其日燒

香，灾殃自滅。違律，罰筭一紀。

《玄都律》云：若翻覆香火，罰香二斤；若侍香煙中絕；罰油四斤；若臨燒香突行，罰油二斤；若行香不洗手、漱口，罰油二斤。《登真隱訣》曰：香者，天真用茲以通感，地祇緣斯以達言。是以祈念存注。必燒之於左右。特以此煙能照玄達意，亦有侍衛之者宣讚辭誠故也。又云：建城縣及高陵，並有然石一燒，令赤便永不糜耗，得一九以燒香，實爲省要。

### 侍燈鈔

夫就齋入靜，燈燭居先，朗耀八門，光暉九夜，續明之功既舉，長更之福可修。《敷齋威儀》云：侍燈，其職也。蘭釭晚映，係明西日，灼爍壇場，照灼清夜。若遇雨權停，值風暫息，賓主參詳，與時興廢，幸勿抑斷，用虧成典。《登真隱訣》曰：真人攝日暉以通照，役月精以朗幽。

《四極明科》曰：立春、春分之日，然九燈於中庭；立夏、夏至，然三燈；立秋、秋分，然七燈；立冬、冬至，然五

燈；本命之日，然十二燈。夜半，露出燈下，春則向東，夏則向南，秋則向西，冬則向北，本命則向太歲，叩齒二十四通，祝曰：

高上太真、萬聖帝皇、五帝玉司、總仙監真，今日吉良，八節開陳，陽絕陰考，絕滅九陰，於今永始，拔釋七玄，免脫火鄉，永離刀山，三塗五苦，不累我身，得同天地，長保帝晨，五願八會，靡不如言。畢解巾叩頭百二十過，當額向地而叩，竟復巾仰天，心念我身，今日上享天恩，賜□形骸，受生飛仙，因仰咽二十四氣止。如此三年，宿愆並除，身與真同，不履五苦，脫過火鄉，尅得真人，遊宴玉房，可謂妙訣，慎勿輕宣。《金錄簡文》曰：拔度生死，建齋於中庭。土壇縱廣，上壇二丈四尺，下三丈二尺，開四面四角，上下十門，門廣五尺，闌纂標榜，法天象地。壇中央，安一長燈，令長九尺，上然九燈，每令光明，上照九天，下照九幽。於門外四面，各安九燈，合三十六燈，以圍壇。《金錄簡文》云：入堂靜，明燈訖，向燈

三拜，呪曰：

正一陽光，焰上朱煙，開光童子，一十二人，洞照一宅，及得我身，百邪摧落，殺鬼萬千，光明朗徹，通真達靈，昇入無形，與道自然。畢，退出堂，滅燈，呪曰：

玄陰閉光，長燈續明，太陽已朗，八威開清，燈通太陰，光附景生，日月二真，與我合并。便滅火。本月上然燈，以照七魄；行年上然燈，以照三魂；太歲上然燈，以照一身；大墓上然燈，以照朽骸；小墓上然燈，以照太陰；堂前然七燈，以照七世；中庭然九燈，以照九幽；俠門然二燈，以照宮宅；地戶然二十四燈，以照二十四生氣；八方然八燈，以照八卦；中央然九燈，以照九宮；天門然十燈，以照十方；然二十八燈，以照二十八宿；然三十二燈，以照三十二天；然五燈，以照五嶽。《金錄簡文》曰：然燈威儀，功德至重，上照諸天，下明諸地，八方九夜，並見光明。侍燈之官，勤爲用意，每令燈光竟夕。《明真齋儀》曰：



於中庭，然九燈於竿上，以照九幽。壇四面，各然九燈，合三十六燈，露經中庭，巡繞九幽，燈燒香行，道禮懺也。《黃籙簡文》曰：然九十神燈。

《明真科》曰：若有災急，可丹書五篇真文於中庭，五方安。又上金五兩、仆五龍，以鎮五篇，五色紋繒之信，以鎮五帝。春則然九燈，亦可九十燈，亦可九百燈；夏則然三燈，亦可三十燈，亦可三百燈；秋則然七燈，亦可七十燈，亦可七百燈；冬則然五燈，亦可五十燈，亦可五百燈；四季之月，則然十二燈，亦可百二十燈，亦可千二百燈。中央安一長竿，上然九燈。《玄都律》曰：若侍燈火中滅，罰香一斤；若翻燈燭，罰油五升。

要修科儀戒律鈔卷之八

要修科儀戒律鈔卷之九

三洞道士朱法滿編

衣服鈔

夫超出塵累，依庇法城，晨夕勤修，離邪歸正，以潔法服，乃可朝真，穢黷褻裳，如何謁聖。然褐是日月之象，帔爲氣數之衣，出入行來，彌須貴敬，一人有失，能敗法徒，總以澆訛，從何取則。今時之輩，或以淨衣穢慢，或以法服借人，或坐地而染塵泥，或藉牀而當氈席，使神童而靡衛，令道俗以驚嗟。巾帽不整，尚累於傍人，實衣猿狙，以周公之服者矣。

《千真科》曰：道衆威儀，事在嚴整，衣服清潔，軌行可觀，則生世善心，諸天稱歎。若形儀慢黷，不喜衆心，不堪就請，毀辱道法，即是道寶有虧，斷大慈種。若爲衆儀軌，人所欽慕，即是道寶光顯，法門有寄。

科曰：通服中華長裙大袖，與俗有別，不得與白衣參服、袍裘皮靴，角

柄食器，皆須漆素而已，不繫金銀銅器。若朝修行事，禮謁衆聖，皆威儀法服，隨法位次。若上清，衣紫；靈寶，通黃；三五，衣絳。非行事時，荆黃壞色而已，不得紋綾羅錦，炫惑時俗。女官又不得金玉釵釧，花裝粉飾。一則入道通惡，二則非爲敬心。

《太真科》曰：勿貪細滑華綺珍奇寶冠纓絡，當服法服，麤澁而已。淨以周身，不得廣大；蔽形止寒，不得重厚。過三通者，即以施人也。

《四極明科》曰：帔令廣四尺九寸，以應四時之數；長五尺五寸，以法天地之氣；裏青表紫，當全二十四條，裏全十五條，內外三十九條，以應三十九帝真之位。爾者，身備帝皇之章，便應冠帝皇之服故也。無有此服，不得妄動寶經。詠一句，則響徹九天，萬帝臨軒，九真存位，所應不輕。單衣誦經，天魔侵景，萬精亂音，神喪氣散，死入幽泉，魂魄艱辛，不得入仙。有此法服威章，給玉童玉女各十二人，典衛侍真。不得妄借異人，並犯穢穢，輕慢真

服。五犯，仙道不成；十犯，被考右官，身死充掠刀山食火二十四獄。又曰：女子學上清白日昇天之法，受寶玉訣，修行大洞，皆元君夫人之位。入室之日，當冠元君之服，披紫紗褐，令用二丈四尺，身袖長短，就令取足，當使兩袖作十六條，身中二十三條，合三十九條。又作青紗之裙，令用四十五尺，作八幅，幅長四尺九寸，餘作襜腰，分幅作三十二條，此則飛青之裙也，元君之服也。身冠此服，萬真束帶，千魔駭形，給玉童玉女各十二人，典掌法服也。無此服，不得詠上經。五犯伐功，十犯陰官所考。《自然經訣》曰：褐背

長三尺六寸，三十條，若鹿皮巾褐至佳，皮褐無條數也。《登真隱訣》曰：上道法衣巾褐，不假人衣服，牀寢不共之也。奉六天山川魔神者，弗入其室，弗享其饌，勿著其衣，勿冠其中。又云：褐者，尋字邊曷，乃取日下月，旨要大顯，是日月字。今褐則是日、月、衣，而法二景者，可以左邊爲九條，右邊爲十條。條者，是間中片片耳，勿數

縫處。世中用三十二條，事無所據，其長短大小隨人耳。《洞玄經》云：三十條，長三尺六寸。《昇玄威儀》云：昇玄法師巾褐，常以服身，當有淨衣，朝拜時，易之服身。衣可於靜外拜，不得入戶。

《玄都律》曰：若齋堂，衣冠履笏不整，罰油五升。

### 禮拜鈔

有四：一稽首，二作禮，三遵科，四心禮。夫入道修真，朝謁爲本，登齋遜謝，禮拜爲先，整肅一心，虔恭五體，從羸入妙，仰賴於斯，歷下登高，必資於此。

一明稽首。《本際經》第四云：稽首三體，右繞七匝。第五云：稽首作禮，繞百千匝。行道之時，或三徧，或百徧，或千徧，或萬徧，以如前釋。其三徧者，論云：主三還之，即是三徧。凡言稽首，皆有三意：一則激令大眾，使有迴向；二則示有宗仰，非爲專擅；三則法有珍貴，令其寶重。《登真隱訣》云：稽首再禮者，先一拜，額叩

地，次再禮，合爲三拜。若言再拜稽首者，即先兩禮，後額叩地一禮，合爲三禮。稽首三禮，是其義也。書云：稽開也，開兩手，將頭首稽留至地，故云稽首。經言：五體投地者，四支并頭爲五體也。《昇玄經》云：天師作禮，長跪脫巾，以頭頂叩地九過。一明禮拜。其拜之時，或一或三。《本際經》云：稽首三禮，是三禮昇玄之衆仙，登進皆禮，太上一禮。《本際經》云：是諸大眾，各禮一拜，依位而坐，一拜則表大道無二，三拜明三寶圓成。《昇玄威儀經》云：昇玄法師，朝方一禮，用五篇威儀，引官常行悔過，東方爲始。

《玄都律》云：若男女官不朝拜，決杖二十，罰筭一紀；佩仙靈錄童子不朝拜，決杖一十，罰筭百日；錄生道民不朝拜，考病一年。《因緣經》云：禮拜腰不申，來生得背偃報。

《千真科》曰：朝晡禮拜三寶，得作低牀禮拜壇上。若行道歎願，得於地鋪席上，不得於高牀、廣平牀、長牀、方牀上禮拜，並不合宜深莊崇敬。譬

如，見世間尊貴，尚不牀上相聞，何況謁聖朝真，而於牀上啓白，此犯，冥考一百日。若於路相逢無席，得於地上禮。地上禮時，手至地，得屈指，指背著地，不使塵污掌心，名爲護淨。四明心禮者。又云：昇玄法師，自可朝暮行心禮，不必勞形於風塵。平旦、正中、日入、人定、夜半、雞鳴六時，常正坐東、西、南、北，務在閉目叩齒，如朝法迴心，隨方想禮，心念口言，便足感降天真矣。

《明真科》云：大慈之道，無量福田，屈折禮拜，叩頭自持，以施遜謝之辭，而心丹意盡，精誠若到，自然感徹。身體疲弊，不任牽曳，可以心拜於天真，無煩於屈折。苟外飾而心急，亦勞形於禮拜耳。信向之士，心口相應，捨香禮願，已徹諸天，生罪死對，靡不釋然，此並施於老病之儀。少壯庸人，聞之而不在意，一則返生我慢，二則無軌勵物，三則事莊勤苦，四則信敬無從。《黃籙簡文》云：禮拜之時，東方九拜，東南方十二拜，南方三拜，西南方十二

拜，西方七拜，西北方十二拜，北方五拜，東北方十二拜，下方十二拜，上方三十二拜，日宮三拜，月宮七拜，星宿九拜，五嶽再禮。此則略舉一齋，衆齋並藉禮拜爲務，各以端坐，何顯威儀。《定志經》云：叩頭自搏，血出斛數，亦要莫止，此則施於少壯年堪之儀。

#### 坐起鈔

夫入道崇真，次位、行坐、倚立，須依典儀，人不位分，法則無緒矣。

《千真科》曰：入衆坐起，皆有法則。若坐時，男先上左脚，正履近牀下；次上右脚，徐徐手拓牀。近前，下左脚取履；次下右脚，安徐徐而起。女前右脚。若入堂時，先於門外，端衣笏，正褐帔，束身斂簡，存想堂中法衆，如十方天尊、如得道衆聖、如現在國王、如州縣府主。若入堂時，若有兩頭東西門，各隨左右入。若門西坐者，從門西入；若東坐者，可關東入。不得於門上交過。

《玄都律》曰：道士女冠，登齋起居，皆當關白監齋，禮法師一拜，次禮

經堂，三拜而去，還亦如法。有違，罰香一斤。到齋堂，坐不正體，罰朱半兩；若坐起不序雅步，罰香一斤；若行不依次第，罰香半斤；若唱善聲不齊，罰油五升；若坐起不揖讓失儀，罰香半斤。

律曰：若齋次當法事，而因起居、逃遁不返，爲衆所糾者，罰油一升；若臨行道事，與外人言，罰香一斤；若垂髮馳步，罰香一斤。

律曰：道士大洞法師，不得與俗人同共食，食則觸忤身神。違律，考病五十日。《金籙簡文》曰：登齋施安，坐起威儀：法師牀在西，東向坐，弟子南面安牀，北向坐；師牀在南，向北坐，弟子當東面安牀，西向坐；師牀在東，向西坐，弟子當北面安牀，南向坐；師牀在北，向南坐，弟子當西面安牀，東向坐。師、弟子不得同在一面坐也。又曰：坐起，皆以職位爲上。職位同者，以年尊爲上；年同者，當以仁德爲上。又曰：坐起威儀，應起之時，弟子當先下西向侍師，然後下座。若

還，師先上座，弟子即位處，禮一拜而坐。《黃籙簡文》曰：奉經威儀，出入經宿，皆當朝禮經堂，動靜以聞，還亦然。違犯，考由監正曹。《旨教經》云：坐起五氣，上中氣，次正治，次內

治，次別治散氣，次百五十將軍籙，次七十五將軍籙，次十將軍籙，次童子，次仙官，上靈官，次更令。若受法同，以先受爲上，後受爲下，男女不得雜錯。若所佩籙將軍種數同日受者，當以奉道先後次。《登真隱訣》云：男女同席而坐息，列罪於北玄；若犯污穢，殃注三祖。《昇玄威儀》云：法師不得坐人下坐，除勢力所加；昇玄法師坐起，當下本師，除受道者；昇玄法師不得與鄙賤人交遊往來，除行道遇伴。《昇玄經》云：齋會行道時，諸正一道士，不得與上清大洞法師共同席坐；上清大洞法師，不得與五篇靈寶法師共同席坐，及傳服飾衣物；靈寶五篇法師，復不得與昇玄內教法師共同席坐。《盟威法師喪服儀》云：受法，從下之高，各有次位，受治籙、老君自然

五法、中盟、大盟、上清，即以上清爲極，不見出昇玄之服，相與承用昇玄服制，三月大盟、上清，並服一暮。若論服之多少，足明上下。可知若據昇玄一經，獨稱高極耳。

### 監齋鈔

夫登齋就食，必須謹節，歡羹把碗，亦備威儀，執筋捉匙，皆須俯仰。《昇玄經》云：太上勅陵陽監厨，視食有十事：一念道恩；二念師恩；三當念衆爲良福田；四當念主人賞別真僞，能供賢善；五當自慶得在僚隸，備充道流；六當念食主人意重，勿令衆人輕說美惡，嫌擇不善；七者，主人若設非法之食，不得令前；八者，若衆中有求非法之食，即便黜遣，不預食例；九者，上下共相顧望，務盡庠序；十者，無畏後食，當有增減。

《千真科》曰：居常齋，厨下監厨一人，先自檢校厨頭，果菜調和，生熟氣味，並令得所；次看日時圭影，天陰取漏刻。正齋時，齋時至已，鳴鐘召食，各送食器於齋堂，量坐處位次。安

置斂鐘訖，行道歎願。歎願竟，各坐定矣。行水一徧，然始就食，尊卑得緒，前下先師杵，監厨人長跪擎杵於先師座前，節衆人鳴磬子一下，座頭大德祝曰：

建齋，爲道真，爲道種、道父、道母、真人、神人、仙人、聖人，或共爲道，同共飲食，長生無極。竟，杵下先師座前，次下齋官食。行食人低聲各唱果菜飯食名，示衆齋人各捧器物承受。若不須者，勿取大德，顧望看食，通至下周徧竟，節衆人鳴磬子一下云：請就食，大衆安庠正坐，無語無笑，以就食。食時，亦不鳴唇，亦無歡飲之聲，亦不咯唾，亦不申聲吐氣，亦不驚匙打筋，上座緩食。行食之時，事事三過，從上次第。行食訖，從下收上。行食時，至是時應受，非時不得輒索。齋欲了，斂取衆生飯散與衆生，非監厨人不得向厨下有所科索，飲食來不及齋，即須下堂食。若強入齋堂，即名觸食。衆食未了，食飽輒起，即名驚座觸衆。若自居常齋，無先師杵，即無先師，祝

即有出。衆生祝食了，行飲一徧，次行水一徧，各收食器竟，節衆人鳴磬一下，唱曰：齋食已竟，各隨竟下息。大德乃以次捧食器出堂，歸房盥漱。監厨人檢校，不得一人不出。若犯一條，對衆各罰二十禮。若應俗人齋供，坐起受食並同。唯受果，不得有受、有不受，俗人恐生諫擇之意，但總受之。食竟，餘果並安面前，節衆人鳴磬子一下，唱曰白：大衆齋餘長食，充主人無礙用，同者默然，不同者說三。唱訖，齋官或有父母、師主、老病，得取此餘果，即起白云：某甲有父母、師主、老病，令將某果歸家，餉遺上座。大德答云：好將去，若不此者，並令主人收充家中無礙用。或問曰：齋時，合出衆生飯不？答曰：棄賢世界，初開元始，命行道真人，行教爲主，徧嘗百草，以得五穀活於人，一切餓鬼，無種植功。於齋之次，各出飯七粒，答真人德施與一切衆生，名爲神農飯，亦名衆生飯。一切衆生，得此飯一粒，能飽千日。出生飯祝三：

一曰：今日是吉日，齋戒向太上。中食天行厨，主人福無量。

二曰：二玄上道、四極清靈、太一帝君、百神安寧，受糧三宮，灌溉脾靈，上饗太和，餐味五馨，魂胎之命，七液流停，百關通和，五臟華明，雙皇合景，飛行上清。

三曰：勤修大道法，精心感太冥。真降魔魅却，衆祿皆滅形。七祖生南宮，兆身登上清。福既無不普，此食施衆生。喫糜粥祝二：

一曰：今日清淨，服食仙糧，行香喫粥，壽命延長。二曰：乾元亨利貞，身爲入法王。糜粥入腹，五臟清涼。漱口祝曰：

楊枝漱口，眼目明好。願得一枝，供養大道。道在一樹，多葉多香。願得一枝，供養十方。《昇玄經》曰：中後，不得食有穀氣物。有穀氣者，不得以近口水、玉脂石、松木、黃精、雲英、靈飛散、枸杞等，藥食無時，不在禁例。《旨教經》曰：早旦喫粥，日中一食，自是之後，水不過齒。

《千真科》曰：若齋食時，有五事：一先當步主馭影，二則鳴鐘集衆，三則行水洗淨，四則打磬就食，五則說先師食祝。若不爲此五事，非人淨齋，名爲盜食。

科曰：諸入齋人，每有常科。若先約三斗，不可加減，減爲犯盜，多取亦然；若行食時，果菜已上，並不可長取，若意貪長取，此亦犯盜；若行食時，上座須量下座，須用多少，不可過取。《昇玄經》云：上下共相顧望。

科曰：道法平等，不問親疏，亦無貴賤，同處一衆，護惜無偏。若人人作情，來求輒與，此不存衆，衆即破壞，各宜慎之。

科曰：若是齋時，俗人來乞食者，監厨之人，即須借問能齋以不。若能齋，與食；若不能齋，深示因果，使知罪福，非爲悽惜，欲令返悟，謹守道法，是第一慈，若不示語，衆生得罪。

科曰：住立道場，皆須衆食，登齋應供，十方共同，擊磬鳴鐘，召集法衆，非是齋人，不預斯食，同建福善，道俗

無遮，限客閉門，衆所同醜。或有問者，食則有限，客乃無遮，既不神通，何能供給。答曰：主客之人，迺互爲作，本供既少，客數又多，聽可均分，減口讓哺，此是人情，勿宜杜絕。

科曰：將常住食，以私餉遺，及以歸私房者，准盜論。

科曰：常住之物，十方共用，迺互相付，百代常行。不可當時，任意取用，不得共制，乃自用意，分以歸私，並犯五逆罪。

科曰：盜十方齋供衆物，或爲頭首，私自入己，入火坑獄，萬劫方出，更入豐都，六十年考，長爲餓鬼。

### 食禁忌鈔

夫欲安身，先資食息，雖爲補益五臟，亦能息害六腑，若依禁忌，可尊生矣。《老君養身經》云：人飲食，慎勿伏食甚熱食，勿令汗液流入食中傷人。人食冷，勿令齒痛；食熱，勿令灼唇。食畢，當摩腹三百，除百病。諸水銀不得近，牙齒發斷，腫善落齒。諸礬石不生入藥，食之破心肝。諸桂不可日日

嚼，食之損骨壞筋。諸空腹不用見臭尸，尸氣入脾，舌上白膜起，口常臭，宜飲酒見之。觸寒未解，食熱成刺風。諸飽食，沐髮作頭風。銅器蓋食，汗入食中，發惡瘡內疽。熱食汗出，勿洗面食中，及覺面上如蟲行。飲水勿急咽，久成氣病，及水痕瘕者，癖也。飽食勿即卧，又作氣病，令背疼傷。飢卒飽，反成心癡，及食癖。飽食走馬，久成心瘕；飲水走，傷心飽，久成心痛；飽食大走，久成氣病。諸山水土中，出泉流者，不可久常食，作癭病。食後，必動搖，以通調百脉。鹹傷筋，酸傷骨，苦傷心，皆勿多食。大渴氣不行，大飽氣不藏，勿生食害腸胃，冷食傷膀胱，大食百脉閉塞。食熱傷腸，食冷傷胃，酸密勿多食。泄下向水漿，不見影勿飲。桃味酸，多食令人有熱；杏味酸，多食傷筋骨，損人年；梨味苦，令人寒中金瘡，及產婦勿食；櫻桃味甘，調中益脾氣；蒲萄味甘，治腸間水，調中利小便，作酒長飲，主利水道；薤味辛，利病人，除寒熱，擣之塗金瘡，除熱

去水氣；苜蓿味甘，可久食利人；蓼味辛，芥味辛，除腎邪氣，久食令人寒；大麥味酸，食之令人多熱；蕪荑味辛除邪，久食調五臟，殺長蟲；小麥味甘，下熱除腸熱；稻米味甘，令人多熱；大豆令身重多熱；蕪菁，一名羅伏，味苦，利五臟，輕身益氣。

### 要修科儀戒律鈔卷之九

# 要修科儀戒律鈔卷之十

三洞道士朱法滿編

## 一治屋

一治屋者。夫治，第一治室，靖室要假修治，下則鎮於人心，上乃參於星宿，所立屋宇，各有典儀。

《太真科》曰：立天師治，地方八十一步，法九九之數，唯升陽之氣。治正中央，名崇虛堂，一區七架、六間、十二丈開，起堂屋上，當中央二間，上作一層崇玄臺。當臺中央，安大香鑪，高五尺，恒爇香。開東、西、南三戶，戶邊安窗，兩頭馬道，厦南戶下、飛格上，朝禮天師子孫。上八大治，山居清苦、濟世道士，可登臺朝禮，其餘職大小、中外祭酒，並在大堂，下遙朝禮。崇玄臺北五丈，起崇仙堂，七間、十四丈、七架，東爲陽仙房，西爲陰仙房。玄臺之南，去臺十二，又近南門，起五間、三架門室。門室東門，南部宣威祭酒舍；門屋西間，典司察氣祭酒舍。其餘小

舍，不能具書，二十四治，各各如此。

科曰：學久德積，受命爲天師，署男女祭酒二千四百人，各領戶化民，陰官稱爲籙治，陽官號爲宰守。又云：家家立靖崇仰，信米五斗，以立造化，和五性之氣。家口命籍，係之於米，年年依會。十月一日，同集天師治，付天倉及五十里亭中，以防凶年飢民往來之乏。行來之人，不裝糧也。又云：十月一日，到集米天師治者，十月初，太陽元氣始生，故令人受命主生。十月五日清旦，朝會天師治，列行集入治堂前，北向俱拜伏地，聽堂上主者，宣令科戒，不得私賚雜食，詣治門穢損真正。十月五日，言上生籍。七月七日，中會，度生命籍，考進中外法氣合會之功。正月七日，衆官舉遷，次會勸賞遷職。又云：初入治怠惰，不念孝慈，不受主者，訓；到治失禮，所言不節，違令，四刑論。

## 二治名

二治名者。科曰：具山治、鍾茂治、白石治、岡互治，右四品，在外名別

治，於內名備治，足二十四，備爲二十八也。別治與三八別也，吉陽治、平都治、阿逢治、慈母治、黃金治、太華治、青城治、峨嵋治，右八品遊治；代元治、樽領治、瀨鄉治、公慕治、平公治、科里治、借阮治，右八品配治。正治有二十四：北邙治、玉局治、主簿治、平岡治、公慕治、後城治、澁口治、雲臺治，右下品八治；平蓋治、蒙秦治、本竹治、稠稷治、北平治、湧泉治、隸上治、昌利治，右中品八治；真多治、秦中治、更除治、葛瓚治、漓沅治、鶴鳴治、鹿堂治、陽平治，右上品八治。右外治四十有四，受之皆賚單衣、履、紙筆、墨、書刀等。星宿治，二十有八，名爲上治，又名大治，又名正治。上皇元年七月七日，太上大道君所立，道陵所受宣行。

## 三治所屬

三治所屬者，陽平、鹿堂、鶴鳴三治，主辰生；漓元、葛瓚，此二治主卯生；更除、秦中，主寅生；真多、昌利，隸上三治，主丑生；湧泉、北邙二治，

主子生；稠稷、本竹二治，主亥生；蒙秦、平蓋二治，主戌生。次中八，玄老治、雲臺治，主戌生；濫口、後城二治，主酉生；公墓、平岡二治，主申生；主簿、玉局、此一治非山餘總是山，北邙三治，主未生。下八，太上治，太上漢安二年正月七日中時，二十四治付天師。岡互、白石二治，主午生；鍾茂、具山二治，主未生。

#### 四治室

四靖室者。科曰：道民入化，家各立靖室，在西向東，安一香火西壁下。天師爲道治之主，入靖，先向西香火存師，再拜，三上香，啓願。次北，次東，次南。訖便出，勿轉顧。科曰：朝半入小治，先向西拜天師，轉向東拜太上。訖出宮閱籙，東向奏章。科曰：朝拜半入治，先向北拜太上，次向東拜九氣丈人，次向南拜道德君，次向西拜天師。小治並同。

《玄都律》曰：民家安靖於天德者，甲乙丙丁，地作入靖。小治，廣八尺，長一丈；中治，廣一丈二尺，長一

丈四尺；大治，廣一丈六尺，長一丈八尺。面戶向東，鑪案中央。違治，罰筭一紀。

又云：民家曰靖，師家曰治。律曰：丙寅、丁卯、丙申、丁酉、丙戌、甲戌，皆不入治。違律，罰筭四十五。入治，平坐東向，存五方氣，先存功曹使者、陰陽吏，正身跪拜，心專恭肅。

《太真科》曰：俗人受治、立治，堂舍靖廬，皆令齊整，內外清嚴，分別出入，在宅西南，供養經。

科曰：香燈相續，存神習真，真靈來降。不得空受治職，而無室廬，而逐利養，請乞啓告，穢雜不精，千靈忤氣，人物疑惑，毀笑成愆。當陋居家，麤衣蔬食，急營治舍。若混雜亂誤，五刑論。

《太真科》曰：兒童受一將軍及署更令九種吏兵，此係名天曹，自得從入靖治，向省禮三拜，告急乞恩。

科曰：受十將軍以上，並出吏兵驅使之，朝半禮拜，緣急奏章。

科曰：第一，更古今切令力政切明其

經，稟真氣，順命施行，生出多厄，父母代受，平常七歲，受此官也。第二，更紀孟切今呂真切奉前，有違，罪考疾厄，或去失所受，今自改悔，謝罪請恩，更受後旨，教令丁寧，捨惡從善，此不隔年。第三，童子一將軍錄，男女八歲至十九，皆爲童子，動而蒙昧，漸染玄風。第四，成人十將軍錄，男女年二十爲成人，尪病愚癡，不堪受化，隨時參詳，量細誘進。第五，七十五將軍錄，七十五錄，有仙有靈，陰氣仙，陽氣靈，靈主地，仙主天，天主文，地主武，武主內，文主外。若弘在師門內，伏膺左右，先受靈；在師門外，去來諮稟，先受仙。受仙後，進受靈，受靈後，進受仙，足前爲百五十，錄滿足也。第六，百五十將軍錄，後猶是前師，不重輸信，若前師授七十五後，別師進七十五，應輸薪米、紙筆墨書刀、朱素如法。若未受一、十、七十五而德高者，并受百五十。又云：先靈後仙，雖相係續法也，則天自近之遠，前用一謝，後用一符，亦不隔門之內外。右六條，名外錄。凡緣



次至滿足如前例，若童女而有成人之功，成人未有所受，而有殊勳異德，皆超受百五十，先仙後靈，由外成內，並用黑官。若先就一師，受一、十、七十五，後至百五十，皆目錄，并出入佩帶，帶後者、前者，悉封箱函中，不得去失，去失輸罰一半，不須重受。十、七十五者，兩受之者，若後別師，皆輸前錄，以付後師，積沓並送。洞淵天師子孫，受氣錄，不受治，治官並隸皇壇，登壇備得而不備。受錄之後，朝禮爲先，次乞恩救物，啓告玄靈，稱如：干部某，將軍錄男女生某，不得稱臣。行符勅水，治病救厄，積勤有效，師自進之。下明契錄，黃書契、六甲契、神錄、真錄、聖仙錄，右二契三錄，明土德，信爲首，主府月，行黃道仙，攝鎮星；赤界契、青童契、赤甲錄、青甲錄，右二契二錄，明火德，禮爲先，主日，行赤道仙，攝熒惑星；真一契、三五契、玄錄、元命錄，右二契二錄，明木德，仁爲端，主歲星；三一契、無終錄，右一契一錄，明水德，智爲源，主辰星；五色一契、太甲錄，

右一契一錄，明金德，義爲本，主太白星。太一券，號金券，券乃契之別名。八契有定階，故言契太一，通八階。故言券金者，練久彌精，變化不滅。八契如前，十錄并滿，錄爲十錄也。百五十將軍錄已下至一錄天師子孫，登皇壇後，不受悉行。若未登皇壇，皆諸高德受之而傳。凡學道立功，當受內外治，皆稱臣妾；天師命授，皆稱官都功；大治行版，署不得稱生。

《玄都律》曰：受錄章等，有鬼吏兵於里中，可著遊行。《本相經》云：問曰，祭酒授民錄得財，有罪不？答曰：祭酒人中師，萬民看爲則，取財不施散，後師效爲法，此是罪之首，禍大殊於劫，受罪如循環，萬世無休市，天門永不容，長與三惡合。

### 章表

赤松子問天老平長，前以建日，己丑日未時上章，何不報？平長曰：己丑日，見扶香案齋章，到門門開，不開便去。復問平長曰：一夜一周何時開？平長曰：

閉，卯、巳、未、酉、亥、丑。開，辰、午、申、戌、子、寅。

子日：

閉，子爲日神傷師母，時不可用  
辰、午、申、戌、子、寅。開，卯、巳、未、酉、亥、丑。

丑日：

閉，丑爲日神傷牛犢，時不可用  
卯、巳、未、酉、亥、丑。開，辰、午、申、戌、子、寅。

寅日：

閉，寅爲日神傷六畜，時不可用  
辰、午、申、戌、子、寅。開，卯、巳、未、酉、亥、丑。

卯日：

閉，卯爲日神傷師父，時不可用  
卯、巳、未、酉、亥、丑。開，辰、午、申、戌、子、寅。

辰日：

閉，辰爲日神傷父母，時不可用  
辰、午、申、戌、子、寅。開，卯、巳、未、酉、亥、丑。

巳日：

閉，巳爲日神傷女婦，時不可用  
卯、巳、未、酉、亥、丑。開，辰、午、申、  
戌、子、寅。

午日：

閉，午爲日神傷物類，時不可用  
辰、午、申、戌、子、寅。開，卯、巳、未、  
酉、亥、丑。

未日：

閉，未爲日神傷病者，時不可用  
卯、巳、未、酉、亥、丑。開，辰、午、申、  
戌、子、寅。

申日：

閉，申爲日神傷遠行，時不可用  
辰、午、申、戌、子、寅。開，卯、巳、未、  
酉、亥、丑。

酉日：

閉，酉爲日神傷飛鳥，時不可用  
卯、巳、未、酉、亥、丑。開，辰、午、申、  
戌、子、寅。

戌日：

閉，戌爲日神傷遠行，時不可用  
辰、午、申、戌、子、寅。開，卯、巳、未、  
酉、亥、丑。

亥日：

閉，亥爲日神傷行人，時不可用  
卯、巳、未、酉、亥、丑。開，辰、午、申、  
戌、子、寅。

建日，可呈章九通，利上開化大  
道，收捕凶殃鬼賊。忌不上誅符破廟，  
傷一門及師，忌申時斗繫下左行。

除日，可呈章十二通，利上治病，  
分解塚墓，列考建子孫。忌不上保護  
錢財，忌酉時。

滿日，可呈章六通，利上安隱塚墓  
及保護錢財。忌不上解，一宅中虛，耗  
傷六畜，忌戌時。

平日，可呈章十七通，利上分解百  
功禁忌，收除衆邪。忌不上保護錢財，  
六畜傷師及奴婢不吉，忌亥時。

定日，可呈章二十八通，利上五方  
保護，安鎮宅。解土公虛耗。忌不上  
收除故氣，天一傷長者，忌子時不吉。

執日，可呈章五通，利上收百鬼  
賊、解中捕者。忌不上治病，傷病者不  
吉，忌丑時斗繫下。

破日，可呈章七通，利上誅房廟，

收滅怪伏尺茲日死。忌不上解塚墓，  
絕世不吉，忌寅時。

危日，可呈章二通，利上度星解亡  
人，復連七世，牽逮子孫。忌不上安  
宅，傷六畜，忌卯時。

成日，可呈章十八通，利上錄署，  
保護大小治病。忌不上遠行保護，行  
人不還，凶，忌辰時。

收日，可呈章百二十通，利上解首  
謝度厄，保護六畜、家宅。忌不上解官  
訟，必有獄死不吉，忌巳時。

開日，可呈章百二十通，利上收除  
故氣，房廟千師萬巫、六畜衆精，室中  
魍魎、雜神之鬼。忌不上解亡人，復連  
六畜死，忌午時。

閉日，可呈章五通，利上解百功禁  
忌，破射年命。忌不上保護大小，傷錢  
財不吉，忌未時。

甲子上章，凶；甲午上章，吉利；  
乙丑上章，凶；乙未上章，吉利；丙寅  
上章，凶女坐死；丙申上章，大吉；一云

忌家長丁卯上章，凶並忌陽官；丁酉上章，  
不吉凶死；戊辰上章，凶諍忌；戊戌上

章，大凶暴諍忌；己巳上章，不吉；己亥上章，大吉；庚午上章，不吉；庚子上章，大吉；辛丑上章，不吉；辛未上章，三年長子坐死；壬申上章，一年長子坐死；壬寅上章，吉利一書云凶；癸酉上章，家母坐死；癸卯上章，大吉利；甲戌上章，大吉利；甲辰上章，不利、凶死；乙亥上章，家宜蠶；乙巳上章，不利、凶死；丙子上章，三人坐死；丙午上章，大吉；丁丑上章，大吉利；丁未上章，有坐死者；戊寅上章，夫婦坐死；戊申上章，不吉、凶死；己卯上章，小吉；己酉上章，大吉利；庚辰上章，大吉；庚戌上章，大吉；辛巳上章，大吉；辛亥上章，凶死；壬午上章，大吉利；壬子上章，大吉利；癸未上章，大吉利；癸丑上章，大吉利；甲申上章，吉；甲寅上章，凶死；乙酉上章，大吉一云凶；乙卯上章，不吉；丙戌上章，家有死者；丙辰上章，不吉；丁亥上章，不吉；丁巳上章，大吉利；戊子上章，小吉；戊午上章，大吉利；丁巳、戊午，凶。己未上章，大吉利；己丑上

章，凶死；庚申上章，吉利；庚寅上章，大凶死；辛酉上章，凶死；辛卯上章，吉；壬戌上章，不吉；壬辰上章，吉利；癸亥上章，不吉利；癸巳上章，女坐死。

上章，當別有筆硯以書章，不得雜他也。磨墨左行，四十九過；重磨，亦准前。書章時，燒香，北向書章，向亥、巳、未、丑。

上章吉時，卯、巳、申、亥，此四時可治病，餘時凶，不可用，慎之。

上章吉時時已，自忌師行年、本命，不可曾觸犯傷師，慎之。

建日，可誅符破廟，繫百鬼精邪。

正月、七月：

建日，晡時下；平日，人定時下；破日，平旦時下；收日，禺中時下；除日，日入時下；定日，夜半時下；危日，日出時下；開日，日中時下；滿日，黃昏時下；執日，雞鳴時下；成日，食時下；閉日，日昃時下。右此十二日，忌斗繫下時，不可上章治病，害師及作章主人，明尋慎之。

諸是出喪、嫁娶、定婚，亦忌時。

### 治病忌日

甲午、甲申、甲戌、甲寅、乙卯、丙辰日，皆凶。又忌寅、卯、申、酉、午、丑，並凶，不可上章，辛未尤甚，章醮及乞福啓告之時，悉避斗繫。

正月、七月，已錄如前。

二月、八月，建日戌時；三月、九月，建日子時；四月、十月，建日寅時；五月、十一月，建日辰時；六月、十二月，建日午時。

右章醮，斗繫時，或以月時。將臨正日，太一下，為斗繫章醮啓告之時，悉避斗繫時也。若欲醮命，當用本命日及天生日者，甲辰、乙巳日是也。本命醮食，不得飼外人；餘醮之食，悉須施散外客。凡就星官，乞福結願，當避凶惡之日。

正月庚申，二月辛酉，三月甲戌，四月癸亥，五月壬子，六月癸丑，七月甲寅，八月乙卯，九月甲辰，十月丁巳，十一月丙午，十二月癸未。

右上章殺害之日，不可請乞，萬事無

宜也。

五德之日，可謝罪、求乞善願。

甲辰、丙辰、戊辰，忌章醮；庚辰，忌章醮；乙巳，忌章醮；辛巳，忌章醮；癸巳，忌章醮；己巳，忌醮；丁巳，忌醮。

右五德之日，宜乞願乞福。欲有所願，常以天願日，己丑是也。所乞善願，易得遂心。

營醮啓告醮曆：

甲子日，壬申、癸酉，辛巳、壬午，甲申、乙酉，丁亥、戊子，己丑、辛卯，甲辰、丙午，丁未、戊申，庚戌、壬子，癸丑、丙辰，丁巳、戊午，己未、庚申，辛酉、甲午，丙申、丁酉。

右醮祠良日，凶日不載。

禁依前後，又有一五德日，甲子、甲午最勝。又忌日時相破，子時破午，午時破子。

凡啓醮之時，宜用子、午二時啓告。若值相破及斗繫，若斗繫在子，須避子時；若斗繫在午，須避午時；若病人大急，亦得非時章醮。

正月，無東向治病，病者死。  
七月，無西向治病，病者死。  
二月，無北向治病，病者死。  
八月，無南向治病，病者死。  
三月，無西向治病，病者死。  
九月，無東向治病，病者死。  
四月，無南向治病，病者死。  
十月，無北向治病，病者死。  
五月，無東向治病，病者死。  
十一月，無西向治病，病者死。  
六月，無北向治病，病者死。  
十二月，無南向治病，病者死。  
庚辛日，晡時、日入時治病，病者死。

正月、十二月，太上虛無丈人宮。  
六月、七月，太上九氣文昌宮。  
二月，太上元老仙都宮。  
八月，太上天帝宮。  
三月、四月，無上三天太清宮。  
九月、十月，太上大道宮。  
五月，太上重道宮。  
十一月，太上侍中、左右監神，諸將軍宮。

一日，建玉曹，治赤虛宮。  
十六日，司非曹，治北府宮。  
二日，太素曹，治太微宮。  
十七日，司奸曹，治南箕宮。  
三日，太微曹，治北平宮。  
十八日，統攝曹，治通明宮。  
四日，都正曹，治太清宮。  
十九日，統錄曹，治西虛宮。  
五日，正一曹，治通明宮。  
二十日，監考曹，治司命宮。  
六日，玄一曹，治上明宮。  
二十一日，監司曹，治陽明宮。  
七日，太素曹，治高靈宮。  
二十二日，典考曹，治太陽宮。  
八日，靈集曹，治紫微宮。  
二十三日，司宮曹，治少陽宮。  
九日，母靈曹，治待春宮。  
二十四日，玄元曹，治太陰宮。  
十日，太清曹，治武靈宮。  
二十五日，太玄曹，治少陽宮。  
十一日，三水曹，治素女宮。  
二十六日，都司曹，治北辰宮。  
十二日，司錄曹，治巨野宮。

二十七日，都候曹，治太白宫。

十三日，清叙曹，治西明宮。

二十八日，直使曹，治林明宮。

十四日，玄正曹，治上絳宮。

二十九日，真司考曹，治清陽宮。

十五日，中都曹，治曲平宮。

三十日，典考曹，治啓明宮。

無上三天、無極大道、太上老君、

都正集曹，領吏兵九百九十九萬人，日月宮曹如故。

右天師所下，分別官曹，諸治職祭酒男女官，上章求乞，皆諦案科文，分別官曹，隨病輕重請官。依千二百官儀，小病輕事，但言稽首再拜；困病重事，皆言頓首死罪，稽首再拜。困病重事，皆別官曹言：

泰玄都正一，平氣係天師。某治氣

祭酒臣甲，頓首死罪，稽首再拜。某郡縣鄉里男女氏，壬年若干歲，戶口若干人，疾病云云。

後言：詣某宮曹如故，臣甲誠惶誠恐，頓首死罪，稽首再拜。

甲辰，林車主入官，存之。

甲戌，張生主入火，存之。

甲申，益章主入草，存之。

甲子，九明主入水，存之。

甲寅，城隍主入病，存之。

甲午，監兵主入鬪戰爭訟，存之。

右六甲，存神思之。

正月平旦，師時；日出，師婦時。

七月日晡時，師時；食時，師婦時。

二月日出，師時；黃昏時，婦時。

八月日入，師時；禺中，師婦時。

三月日出，師時；人定，師女時。

九月黃昏，師時；日出，師婦時。

四月禺中，師時；人定，師母時。

十月人定，師時；日出，師婦時。

五月日中，師時；雞鳴，師婦時。

十一月盡，師時；晡時，師婦時。

六月日出，師時；平旦，師婦時。

十二月雞鳴，師時；日入，師婦時。

右十二月，男女官祭酒為人二章，當避此衰時，不可犯。若病命在轉燭，可上告。諸祭酒為能，移山止流，興雲造雨，坐召萬神，冬生草木，夏結冰霜，若能此者，都不用此書其

身。故為水、火、刀、兵所害，當承告

旨，明各慎之。為道民解厨食，當思

天神五帝，名衛六甲，說諸神仙尊

賢、五嶽名山道士，上願主人得福。

正月二日、二月九日、三月十日、

四月十一日、五月十一日、六月十一

日、七月二日、八月十三日、九月十三

日、十月八日、十一月十五日、十二月

十三日。

已上十二日，不可上章啓事，大凶。

正月十一日、二月三日、十八日、

三月七日、九日、四月十五日、五月二

日、五日、六月三日、十三日、七月一

日、十七日、八月二日、十八日、九月九

日、十月五日、十一月四日、十六日、十

二月二十一日。

右十二月好日，可燒香上章。

正月旦，天臘；五月五日，地臘；

七月七日，道德臘；十月旦，民歲臘；

十二月，王侯臘。

此五臘，吉日。奉道之家，則依此祭先人。先須上章，啓請先人，然後設祭，孝子之道也。

右上章禁忌，不可犯。慎之用事，大吉。治人疾病，可用赤松子時。

凡一日之中，不得再入靖上章。

要修科儀戒律鈔卷之十

要修科儀戒律鈔卷之十一

三洞道士朱法滿編

章科信儀

初化除罪章。

夫妻求子乞男章。

夫妻積病醫治章。

產後疾病、首罪乞愈章。

夫妻興氣、相應首過章。

困病請官、一時相付章。

家道輾軻絕子、請官乞祐章。

宅中光怪、歸命乞白章。

疾病牒所犯、移徙諸忌、請官救章。

疾病歸化、心口有違、改更乞恩章。

清官收捕、妄作一法章。

夫妻離別、斷注消怪章。

違科犯禁、首謝乞原章。

右同用白素四十尺，生米一碩，油一

斗，香一斤，紙百張，筆二管，墨一

丸，書刀一口，席二領，布巾五尺。

憂厄困辱、謝過解答章。

右用紙百張，筆二管，墨一丸，金環

一雙，書刀一口，米五斗，席二領，香五兩。

治覺有疾、首罪乞恩章。

右用錢一百二十文，米三斗，紙百

張，筆一管，墨一丸，香一兩，席一

領，書刀一口。

沈病累日、請醫吏救治章。

右用紙百張，筆一管，墨一丸，書刀

一口，米三斗，香一兩，席一領，錢一

百二十文。

斷瘟疫章。

右用紙百張，香三兩，筆一管，墨一

丸，書刀一口，席二領。隨家口口

別，油一升，錢百文，繒一丈二尺。

夫妻疾厄、斷除鬼訟、扶危保安章。

右用紙三百張，油三斗，青絹四十

尺，墨一丸，筆二管，香五兩，米五

斗，席二領，書刀一口。

請雨章。

右用油三斗六升，筆二管，紙百張，

墨一丸，朱砂一兩，香三兩，席二領，

米五斗，錢三百六十五文。

請晴章。

右用蠟五斤，筆二管，紙百張，墨二丸，朱砂五兩，書刀一口，席二領，米五斗。

### 解子午元辰厄會章。

右用白米一碩三斗，席四領，油一斗二升，絳繒一匹。無疾者，用紙百張，筆二管，墨一丸，書刀一口，筭子一百二十枚，金環一雙，香三斤，色繩三種，種九條，條百二十尺。厄重者，用五色，各三兩。

### 解八卦元辰大厄章。

右用白素四十尺，米一碩，素絲五兩，金環一雙，重二分，紙一百張，筆二管，墨一丸，香十三兩，席二領，書刀一口。道士未受三五赤籙及元辰河圖等法，皆不得醮及上元辰等大章。受百五十將軍籙及治職，只可上餘章。

### 入居改易不利、大小謝宅章。

右用紙一百張，墨一丸，筆一管，書刀一口，蠟五斤，五方綵各隨數，席二領，米五斗，鎮錢百二十文，香三兩。

### 新居恐懼、鎮宅章。

右用繒十尺，錢百二十文，米五斗，席二領，紙百張，筆一管，墨一丸，香三兩，書刀一口。

### 虛耗光怪、斷絕殃注章。

右紙用百張，筆一管，墨一丸，書刀一口，席一領，油一斗，黃布二十四尺，白米一碩二斗，香二兩。

### 釋三曾五祖注訟章。

右木五十斤，燒及作散如法，亦可二十五斤，亦可十五斤，黃布五丈，米一碩五斗，紙百張，墨一丸，筆一管，香一兩，席一領。

### 官私咎譴、死病相連、斷五墓殃注章。

右用紙一百張，筆一管，墨一丸，書刀一口，席一領，油一斗，黃布二十四尺，生米一碩二斗，朱砂一兩，香一兩。

### 數夢見亡人混淆、消墓注章。

右用黃布五丈，素四十尺，油三斗六升，紙百張，筆二管，墨一丸，書刀一口，香三兩，朱砂二兩。

### 宅中怪異、小驅除章。

右用紙五十張，筆一管，墨一丸，米三斗，席一領，香一兩，錢七十二文。喪亡殯後、大驅除章。

右用紙百張，筆二管，墨一丸，書刀一口，香二兩，席一領，錢百二十文，朱砂一兩，鎮繒十尺，米三斗。

### 死病不絕、銀人代形章。

右用銀薄人，隨家口多少，人一形無銀，用錫錢九十九文，奏章投水中，紙一百張，筆一管，墨一丸，書刀一口，米五斗，香二兩，鎮繒十二尺。疾病多怪、收捕故氣章。

右用地奏六十枚，長尺二寸，廣一寸二分，厚三分。赤小豆九斗，左繩百二十尺，大刀一口，紙百張，筆一管，墨一丸，席一領，香二兩，書刀一口。沈滯疾厄、解二十四獄章。

右用青紋二十四尺，香三兩，紙百張，筆一管，墨一丸，米五斗，書刀一口，席一領。

### 拔五嶽、救病章。

右用素絲三兩，金環一雙，香十兩，紙百張，筆一管，墨一丸，席二領，米

五斗，書刀一口。

解五斗閉繫、交絕拔命章。

右用白素四十尺，白絲三兩，金環一雙，紙二百張，筆二管，墨一丸，席二領，香五兩，米五斗，書刀一口。

夢見亡人閉繫、大遷達章。

右用白素四十尺，紙百張，筆一管，墨一丸，書刀一口，油一斗，席二領，香三兩，錢百二十文，米五斗。

夢見亡人愁恨、小遷達章。

右用紙百張，筆一管，墨一丸，書刀一口，油一斗，香三兩，席一領，米三斗，錢百二十文。

服滿後、遷達請恩章。

右用繒四十尺，紙百張，筆一管，墨一丸，書刀一口，油一斗，香七兩，席二領，米五斗，錢百二十文。

解呪咀章。

右用錢三百二十六文，命綵隨年數，紙百張，筆一管，墨一丸，米五斗，席二領，香五兩，書刀一口。

解五方呪咀章。

右用紙百張，筆一管，墨一丸，書刀

一口，五色絲各隨方兩數，錢二百四十文，米五斗，席二領，香三兩。

消口舌誹謗章。

右用蠟三斤，炭五十斤，錢百二十文，米三斗，席一領，香三兩，紙五十張，筆一管，墨一丸，書刀一口。

追盜章。

右用五色左索，隨方丈數，青紋九尺，大刀一口，紙百張，筆一管，墨一丸，香三兩，席二領，書刀一口，米五斗。

乞子章。

右用油二斗四升，米二碩四斗，紙百張，筆一管，墨一丸，朱砂二兩，書刀一口，席一領。

解厄延命章。

右用米九斗，油七升，錢百二十文，紙百張，筆一管，墨一丸，書刀一口，香二兩，席二領。

救積病忽劇色請命章。

右用白素四十尺，米一碩，油五升，香三兩，紙百張，筆一管，墨一挺，書刀一口，席一領。

延筭拔命章。

右用紙百張，筆一管，墨一丸，香五兩，朱砂二兩，書刀一口，席二領，金環一雙，素絲三兩，絹一疋，米一碩二斗，筭子一百二十枚。

錄魂魄章。

右用錢百二十文，席一領，朱砂一兩，香二兩，書刀一口，紙百張，筆一管，墨一丸，米三斗。

度厄保護章。

右用香五斤，席一領，紙百張，筆一管，墨一丸，書刀一口，米三斗，錢一千二百，衣三事。

八方大保護章。

右用紙百張，筆一管，墨一丸，書刀一口，絹一疋，米一碩二斗，銀環一雙，青絲三兩，油三斗，席二領，和香一斗。

五方生養保護章。

右米一石二斗，白素四十尺，香五兩，席二領，紙百張，筆一管，墨一丸，書刀一口。

滯疾進退、解羅網章。



右用白素四十尺，米一碩，金環一雙，紙百張，筆一管，墨一丸，書刀一口，朱砂五兩，席二領，香五兩。

扶衰度厄、解羅網章。

右用金環一雙，素絲二十四兩，白素四十尺，米一碩，紙百張，朱砂五兩，筆一管，墨一丸，書刀一口，席二領，香五兩。

久病大厄、金紫代形章。

右用紙二百張，筆二管，墨一丸，書刀一口，香十兩，席二領，米一碩二斗，油一斗，朱砂五兩，金人一形，重一兩一銖，紫紋四十尺，鎮錢二百四十文。

係天師張君曰：凡詣治請章，大者，紙百張，筆二管，墨一丸；小者，紙五十張，筆一管。此給主者書章起草，換易陋誤，不開信限也。且章信之法，宜明各遵之。章無信，定未可用。奏章已後，其信物多可施貧者，宜行陰德，不可師全用之，十分爲計，師可費入者，三分而已。天科甚嚴，犯者獲罪於三官，殃及九祖，永爲下鬼，慎之慎

之。

凡席一領，香一兩，紙百張，筆一管，墨一丸，書刀一口。貧乏者，隨時所科；富有者，亦增重也。《凡操章》云：謬誤脫漏，事委功曹，此法所起，本用施於闇鈍之者，或行事總切委正之，以氣印寫上官，矜副愚誠，許有斯理。至如才識聰敏，足可校定而還惰慢，仰委功曹，天官必考之，得驕恣之罪，三犯則不原。諸祭酒，特可精勤慎之。

#### 疾病請章次第

《太真科》曰：諸疾病，先上首狀章；若不愈，又上解考章；若不愈，更上解先亡罪謫章；若不愈，上遷達章。故沉，上却殺收注鬼章；復沉頓，上解禍厄大章；復不差，上解五世墓謫章；復不差，上扶衰疫大厄章；復不愈，上還魂復魄章；復不愈，上安墓、解五土耗害章；復不愈，上安宅鎮神、驅除收鬼章；復不愈，上分解中外大考章。若急困，上子午請命、并却三官死解章；若進退，上仰謝三十二天

章；大危篤，上贖命交脆，又拔命，又燭燈，又解退復連，又五燈，又二十八宿，又審宿，又分解先亡大注，復八十一章。無灾病，不得妄求此章。犯者，三刑論。

#### 避忌諱上章

《太真科》云：三會大慶，奏表言科戒，不避疾風猛雨，日月昏晦，天地禁閉。當其日，天帝大會。科曰：三會吉日，並赴言名籍，不避日辰禁忌，並會如故。此日一切大聖俱下，同會治堂，分形布影，萬里之外，響應齊同。此日，奏上衆章，授度籙契，男女衆官，行德修功，消灾散禍，悉不禁制。

《玄都律》曰：入治上章，避戊辰。戊戌不得上章，穢汙不得上章，月朝晦朔不得上章，百姓解穢不得詣治。違律，罰筭二年。入治上章，皆正身趨步，科次左右，肅恭致敬，不得男女雜錯，妄視謬誤。違律，罰玉三兩。不得爲十惡、五逆之人上章，辭質而不文，拙而不工，朴而不華，實而不僞，直而不肆，辯而不煩，弱而不穢，清而不濁，

真而不邪，簡要而輸誠，則感天地、動鬼神，御上天曹，報應立至。違科，罰筭一紀。

上章背向

《太真科》曰：奏章向東，其後奏及露章，並向北。白日授度，向東破契，子午請命星宿請急章，皆向北，存大帝。自非星宿大章、登壇大事，并收捕驅除急章，不煩露上。

《玄都律》曰：章，消疾病，向鬼門；消灾厄，向地戶；求長生、求富貴財利，向天門；消口舌呪咀，向人門。厭虎向寅，厭蛇向巳，與天罡并力大吉。違律，罰筭百日。

律曰：修福延年，消却灾害，厭百病，皆東向上章；解墓除責，開心聰明，過灾度厄，皆西向上章；違律，病百日。疾病百死一生，北向上章；修身養命，溫潤富貴，皆向南上章。

律曰：上章謝罪，家中大小，北向先謝三十二天。舉家大小，散髮交手，北向對章首過。違律，罰病十日。

若用日者

律曰：上章求財，當用天倉日、戊子日。是求爵位，用天府日，不用自刑日。午、酉、亥、辰，皆是刑日，寅刑巳，戌刑未，子刑卯，申刑寅，卯刑子，巳刑申。違律，考病五十日。

律曰：月朝、月半、月晦、戊辰、戊戌，唯應禮拜，修誦經文，不得奏章、啓訴。違律者，水官考，罰六十日病。

律曰：吉日，戊戌、戊辰，得上言功章。大慶之日，不得為他別奏餘章。違律，考病百日。

雜犯科

律曰：道士女官、州縣官人、百姓道民等章，並不得參雜，同共奏呈，官位不同。違者，考病五十日。道士女官齋會呈章，要須笏褐法服整頓。若上章治病，主人不得殺生飴道士，道士知而故食者，師與主人同罰，減筭二紀。上章之時，家中大小，不得歷亂，高聲大語，驚雞動犬，則法氣不安。違律，罰筭一紀。章奏了，不得放縱文書在俗人家，為有太上名字，至一年十月

即燒。違律，罰筭一紀。若承酒氣奏章，罰病一千日，減五年壽。

律曰：大風大雨，不得拜章；連風連雨，亦不得拜章。違律，罰病一年。

律曰：身有六疾，不得為百姓拜章。違律，罰筭三紀。

律曰：家有喪禍不絕，解凶墓謫等，可上木札。

律曰：道士女官上章，不得飲酒、食肉及五辛。違律，罰筭一紀。若上大星宿等章，用夜半時，五燈火，五綵符，香墨書之，以相厭殺，其燈點盡餘油。若以聞著，再拜下，下極者，可在次行安以聞。若書章已成、而有小事，乃經年不可上。若未下細字，經月可上。下細字，上度三寸五分，中度四寸五分，下度五寸，不得過此，今人多言一寸五分，皆是好意，自造非細，法所載也。若章至太歲而紙纔足不可上，餘有行可上，若兩行者，可全紙續之；若錯誤儻字，唯天帝具儀。小章不過三字，大章以意量之。若上章一通，前

後可四拜，讀章竟，太歲皆當緊要，須正心整頓取法也。讀細字法，長跪下聲，出口而已，法無擊案讀者，讀細字一氣耳。

若內官朝法得口章，外官不得口章。

《魏傳》云：若急事上章，用朱筆題署。若不上逐鬼章，當朱書所上祭酒姓名。若治邪病，用青紙，三官君吏，貴在青色。若注氣鬼病，作擊鬼章書，青紙朱書。奏竟，於靖內，真朱二分合章，白中擣之，和蜜爲丸，頓服之。平旦入靖，北向再拜服之，垂死皆活。勿令人知見，他病亦爲之書章，燒香向北書。若困病入靖，四面燒香，安四香火。

### 上章筆硯

《魏傳》云：書章，別筆硯，勿雜也。研墨，左轉四十九過，重磨亦爾。

### 案

《玄都律》曰：上章，要用曲脚案。若非曲脚，不得上章。違律，罰筭一紀。上章，案長二尺四寸，廣一尺二

寸，高八寸，曲脚。違律，考病百日。

### 書符者

《玄都律》曰：勅符法各各，別有呪勅。違律，考病百日。書符板法，長一尺八寸，印上六寸，下一尺二寸。作符香火，不得取竈炭。違，罰病十日。《三皇經》曰：天老曰，何以用戊戌日作符乎？三皇曰：戊者，天門也；戌者，土，中宮君像也。天帝常以戊戌日，從西北天門來出遊觀，當此日作符，故得天帝歡悅，賞賜所欲。戊者，土也，必得官爵，封侯食邑矣。所以用午時佩之者，午是太陽之精、淳金之光也，必得佩金紫高位之像也。

### 藏章故本

《太真科》曰：爲人奏章竟，後諸小章復鑪畢，即卷付函中，齎出，別舉諸大章，一時取之，舉錄如法。若應燒者，復鑪於案前燒之；若在他處，奏章將還與。首題署人，錄本緘封，不得泄露蟲鼠及貨易取利。違，太上勅命章中有真官位號、神鬼姓名、靈祇祕訣，並在章中，不可洩辱。章皆有正本，傳

寫令精，校定分明，不得輒用。故本事狀，不用請官舛異，俗人家不得留故章本。違犯，五刑論。

### 斷章法

《太真科》曰：上言謹案文書，臣以某治法位，依法修行，宣揚道氣，請召真官，救護萬姓。所奏章表，應燒者燒；不燒者，緘封箱閣。卷束積多，法不得散，恐蟲鼠所犯，漏濕爛敗，有所遺落，從來謹遵，不敢違旨。即日依科，隨期斷莫。自某年月日時，至今年月日，合有若干通。今於某靖壇淨處，火化煙通，升雲降氣，布吉除凶，謹請直使正一功曹，治中虎賁威儀，鈐下伍伯各二人，校尉十二人，功曹主簿、幹佐小吏、金光童子各五人，中部章督郵從事使者各二人，同時監臨，對共料省，焚除塵故，採納光新。原赦臣某愚短不及之愆，乞前所印寫，永登天府，後所奏聞，悉免寒池。諸官證明，獎助有功，依都章言功，不負效信，恩惟太上云云。斷章，通數不同。凡時有豐儉，法有行藏，藏時少行，時多計滿，百

通為斷。如前文，每年至十月，為斷也。

要修科儀戒律鈔卷之十一

要修科儀戒律鈔卷之十二

三洞道士朱法滿編

飯賢緣第一

夫聖教興，道風著，賢人出，聖德隆。感應之理既彰，飯賢之儀見矣。

《太真科》曰：家有疾厄，公私設厨，名曰飯賢。可請清賢道士上、中、下，十人、二十四人、三十人、五十人、百人，不可不滿十人，不足為福。賢者廉潔，亦能不食，食亦不多，服餌漿藥，不須厚饌，是世人所重獻之，崇有道耳。此時，應須立壇。先三日清齋，後三日言功。賢人身中，多神故饒之，德重故厚之。食以飽為度，味以適為期。供食一如齋食，不得葷穢。犯者，五刑論。客月以經三請，不可條名。貪腆之客，不可數啖天厨。其科中委細，十以上紙，今人不多為此厨事，故不具抄耳。

《玄都律》曰：三會吉日，質對天官，教化愚俗，布散功德，使人鬼相應

而有雜穢者，殃及後世主者，罰筭一紀。

律曰：正一左右平氣以上，一人當七人望；丘治道士，一人當三人；諸佩籙吏兵以上，一人當二人；更令童子，二人當三人；散民，一人當一人。生男，上厨；生女，中厨；增口益財，下厨。

律曰：道士為人解厨，須擇大德之人，善心者，不用惡逆無禮之人，解不得福。違律，罰筭一紀。

律曰：夫為厨，客一時來，不得參差坐，並皆心存太上善心，不得語殺生、畋漁、獵捕之事。違律，主客被考病三年。

律曰：若道士為人設厨時，客前燒香，不得葷穢。違律，考病百日。

造殿堂緣第二

夫立善方，假憑慈力，取證因果，要藉信生。功德著於因前，妙因彰於來劫者矣。

《太真科》曰：俗人能施散家財，造治堂精室一間瓦屋，賜小筭百二十。

三間，三百六十筭。功多筭多。《大戒經》云：建立靖觀，令人代代門戶高貴，身登天堂，飲食自然，常居無爲。施一錢以上，皆三十二萬倍報；萬錢以上，報不可勝。《本際經》云：大梵國王，國中大旱，轉經得益。乃於國中，造大精舍。《本相經》云：清和國王，崇信道法，建習仙觀，及習靈、七政二廟。《本記》云：周康王時，文始真人結草爲樓觀，占星候氣，真人得道。後周穆王欽尚遺躅，重葺屋宇，號爲樓觀焉，并爲真人建廟立祠。秦始皇三十一年，又於真人南置老君廟。《本傳》云：漢武帝以元封二年正月甲子，上嵩高，登大虞石室，起道宮，使董仲舒、東方朔齋潔思真。

### 念道緣第三

夫道妙難階，寂而莫測，虛而能出，用而不窮。五念彰於聖儀，一心通乎真相者矣。

《道典》曰：子常念道，道亦念子。憂患思道，疾病思道，貧賤思道，窮困思道，飲食思道，入山澤思道，涉江河

思道。常行思道，道與子并。道之所出，萬物皆生，萬神皆成，無所不榮；亡道須臾，身入八冥。《因緣經》云：念真心不退，忠信不忘言。供養諸道德，所生無艱難。又，供養好道德，齋戒見真王。靖念心不懈，七祖昇天堂。《妙真經》云：道人圖生，蓋不謀名，衣弊履穿，不慕尊榮，胸中純白，意無所傾，志若流水，居若空城，積守無爲，乃能長生。道者，一也。人能知一，明如日；不能知一，土中出。道無取，正氣自居；道無去，邪氣自除。此非禱祠鬼神之道也。握之，不盈於手；縱之，布溢四海。學生者生，學道者道。如人墮水知泅者生，不知泅者死，未病者易爲醫，未危之國易爲謀。不好道之人，存念各別。鶉鷄高飛，志在苗禾；鴛鴦高飛，志在陂池；鴻鶴高飛，遊於太清之域，往來九州，棲息八極，乃得其所也。此二鳥憂喜不同，其志各異，而谷自謂爲得其所願也。故大水之淵，神龍所居，小魚走出；高山深澤，虎豹所樂，雞狗所惡。故規矩不同，百

姓心異，是以爲道者，損聰明，棄智慮，反真歸樸，遊於太素，輕物傲世，昭然不汙，喜怒不嬰於心，利害不棲於意，此大聖所體行也。《老君禁戒經》云：夫積德成王，積怨成亡，積石成山，積水成海，不積而成者，未之有也。積道德，天與之，地助之，鬼神輔之，鳳鳥翔其庭，騏驎遊其郊，神龍宿其沼。故以道蒞天下，天下之德；不以道蒞天下，天下之賊。堯舜以有道昌，桀紂以無道亡。

### 殮穢緣第四

夫神氣清虛，神靈所守，身心混濁，邪來害人，入靜思真，要須防患，不履衆惡，吉祥止焉。

《玄都律》曰：民家穢汙，不過晦朔，不得入治。哭亦三日穢。三年之喪，未滿百日，不得入治禮拜、奏表章書。違律，罰筭一紀。又云：遭師主父母大喪，三十日殮，不得齋章。過三十日，外限滿訖，洗浴燒香。違律，罰筭二紀。

律曰：太一極法道士女官，無殮

穢，哭亦不殮穢，佩籙唯著身，不用去脫他人。

律曰：道士女官，被陽官牢獄繫閉出放，皆應香湯洗浣，解殮三日以後，得入靖治禮拜。違律，罰筭一紀。道士及女官，私被陽官杖罰，瘡未差，未滿三十日，不得入靖治禮拜呈奏。違律，考二十。律曰：帶籙，不得入殮穢，上溷即無忌諱。

《黃籙簡文》曰：奉經威儀，常當使身香潔芳盛，以招真氣，不得入濁，神靈蕩散，考由太清曹。若履穢氣，考由清天曹。《三元品戒》曰：常以正月十五日、七月十五日、十月十五日，平旦、正中、夜半三時，沐浴身形，五香自洗。臨沐浴時，向南以金杓迴香湯，東南左轉三十二過，閉眼思日光在左目上，月光在右目上，五星纓絡頭上，五色之雲，匝繞一身，青龍、白虎、朱雀、玄武、獅子、白鶴，羅列左右，仙童執巾，玉女散花，飛仙乘騎，侍衛身形。便即叩齒三十二通，祝曰：天澄氣清，五色高明。日月吐輝，

灌我身形。神津內盥，香湯鍊精，光景洞曜，煥映上清，氣不受塵，五府納靈，罪滅三徒，禍消九冥，惡根斷絕，福慶自生。今日大願，一切告明，身受開度，昇入帝庭。畢，仰咽氣三十二過止，便洗沐五香。沐浴畢，冠帶衣服。又叩齒十二通，祝曰：

五濁已清，八景已明，今日受鍊，罪滅福生。長與五帝，齊真上靈，便出而入室，依法行道。《自然訣下》曰：經汗穢，不沐浴，一則多令病害，二則示民知清濁，三則神鬼不為通靈，四則侍經真官計罪，五則人見交、不恭敬。《三皇經》云：自解殮祝曰：

吾以日洗身，以月鍊精，仙人輔己，玉女佐形，二十八宿與吾合并，千邪百穢逐水而清。急急如律令。《老君養生經》曰：晦日浴吉，朔日浴吉。

《千真科》曰：冬天洗浴，每一旬浴。先作密室，方六尺，安水槽、火鑪、筒渠，注湯水入。其湯以桃枝、栢葉、蘭香、竹葉等內水中，煮取三兩，沸乃去滓，次加五香，然作布籠濾湯。尊卑

以次，不得與俗人共浴，皆須浴衣，不然犯律。

### 盜賊緣第五

夫出家離俗，皆須正念直心，入道朝真，即合防身、口、意。若使心貪一動，猶為萬劫沉淪，何況竊盜常行，當來永失人道也。

《玄都律》曰：盜治中及供養之物，一文以上，皆列考殺。贓過五疋考，害家一人；盜贓不滿文，考病七千日，奪十二年生命。盜符籙職契，考殺，及黃書章印，皆考坐。若闌外拾得者，不准。盜天官租米五斗以上，罪入考殺；一斛以上，入刑殺。罪滅犯，考病七千日，奪十二年生命。劫盜，取人物一文以上，入刑殺；盜一疋以上，入刑殺，考千日及殺。盜罪輸贓，偷一疋、輸十疋，劫盜皆不得入身，同收鬼贓，十疋收、二疋贓。

律曰：罪莫大於劫盜，強乞取、強借、強市，皆為盜，取不以道，准盜論。

律曰：借不還本，主貸不償，本主皆盜，以列上罪。借不還主，考屬監氣

命。借貸不還主，考屬此律。罪滿則凶，罪滿則當定入死。

律曰：盜經書一卷，考滿千日，奪七年命；盜天官祕書所用一卷以上，罪入刑割，殺律論；盜衣服、食具、刀斧、成器之物，皆加罪二等，毀滅罪一等。殺盜語盜，考屬監倉令。盜香鑪，考殺，盜罪入刑殺；盜書刀，奪生命二十年，考病二千日；盜函，奪十年生命，考病千日；盜筭，奪五年生命，考病百日；盜墨，奪三年生命，考病三百日；盜紙，奪二年生命，考病百日；盜食器、杯飴、盤榼、壘缶、雜物，奪十二年生命，考病二千日；盜船車，罪入刑殺律。《本相經》云：寶集則禍門，錢聚則盜臻，是故道心，勤道不勤寶，修德不修帛。又云：賊是人之惡而貪於賊。晝夜候便則，射空入陰默。檐他所愛物，自作家有得。賊露王法斬，魂神入地獄。海中抱沙鬼，鐵針無休息。視之傷人心，不學非來塞。淫賊罪頗視，競共修福德。道降入人身，欣樂常在。又云，道士作偷，有罪不答曰：

道士志存法，不得有傾邪。佩師無上契，存念不得奢。施與猶不取，況復作偷家。刑則受身刑，住還北酆枷。裡祠不復立，上連七世遐。《勸世經》云：劫盜營身口，吞刀入腹內。輾軻致衰窮，申縮不得泰。動止滅身命，白骨受塵穢。終當獲殃考，絕族無苗裔。憂念無知子，不識禍福會。何不修善道，建功自竭勵。功過足相補，延年度厄世。積善有慶集，積惡有殃害。但處一生中，何爲自耻敗。

《玄都律》曰：傷殺人，考屬北平令。《昇玄經》云：若未見經法之前，或手殺人者，當救垂死者一人以贖之，於罪既除，又得活人之功。

《玄都律》曰：諍訟田宅忿鬪，考屬平氣令也。

### 過咎緣第六

夫欲修身，先須避咎。貪瞋發於六欲，過咎出乎五情，動用之愆，現於斯矣。

《玄都律》曰：人身中，常有神隨時上白人善惡。過滿百二十爲病，病

者，令人多凶少吉；百八十過爲一耗，耗者，令人六畜不蕃；一百九十過爲一漏，漏者，令人善致疾病；五百三十過爲一小凶，小凶者，令人破胎傷子；七百二十過爲一大凶，大凶者，令人無男多女；八百二十九過爲一殃，殃者，令人疾，疾者，令人瘖瘡盲聾；千八百過爲一禍，禍者，令人暴夭死亡；千二百過爲一殘，殘者，令人出逆亂之人；千二百六十過爲一咎，咎者，令人絕嗣無子孫；千四百過爲一塞，塞者，殃流於五世；千六百二十過爲一謫，謫者，令人斷無後嗣；千八百過爲一患，患者，主爲奴婢、家出內亂；千九百八十過爲一橫，橫者，家出癩病狂癡；二千六百過爲一暴，暴者，家出兵刃逆死；二千三百四十過爲一虛，虛者，家出反逆，父子兄弟自相攻伐；二千五百二十過爲一增，增者，家出死飢惡病；二千七百過爲一害，害者，家出聾巫鬼病；二千八百過爲一災，災者，家出骨肉淫勃；三千六十過爲一暴，暴者，家出盲疹殘；三千一百四十過爲一

變，變者，家出訟刑獄死，門戶族誅；三千四百二十過爲一怪，怪者，家出都市乞丐，人既死，骸棄損；三千六百過爲一病，病者，滿應定死也。《妙真經》云：罪莫大於淫，禍莫大於貪，咎莫大於惜，此三者，禍之車，小則危身，大則殘家。天下有富貴者三：貴莫大於無罪，樂莫大於無憂，富莫大於知足。知足之爲足，天道遺之祿；不知知足，爲之害及己。失之而憂，得之而喜，夫有排門之禁，必有折關之咎，身死名滅，流歸子孫，事天以德，不以慢於人。

### 善功緣第七

夫心性羸穢，便爲俗態未除；生性和柔，當知上善若水。惡既不作，是善行也。

《洞神經》云：天老百善者。人有十善，必生福子；人有二十善，神明護己；人有三十善，辟除惡鬼；人有四十善，應死不死；人有五十善，終身無罪；人有六十善，道君自存；人有七十善，得與五嶽相連；人有八十善，得脫死名；人有九十善，必爲神仙；人

有百善，必昇九天。《本願經》云：學昇仙之道，當立千二百善功，立功三千，白日昇天，皆濟人應死之難也。《列記》云：夫學道修行之士，廣行陰德，慈向萬物，救人艱危，度人厄難，輕財重道，施惠布德，不悖財寶，救乏窮地，啓誓真氣，虚心跪請。太虛真人曰：飯凡人百人，不如飯一善人；飯善人千人，不如飯一學道者。《老君家令經》云：道人百行，當備千善。當苦雖有九百九十九善，一善不滿，中爲利動，皆失前功。治身關念，守戒不廢，乃得度世也。

《太上科令》云：教人改三過，可爲一勤；勸化三戶，可爲一勤；濟施路窮孤寡三人，亦爲一勤；推護財帛，有瞋不爭，滿三亦爲一勤；憂罪疚、療治三人，可爲一勤。凡如此等，以類求之。《本相經》云：功滿一萬，飛昇太空。誦經之士，一字爲一功，功滿三千，名列上清。若能建立宮觀、壇靖、經室、齋房、厨閣，供養道士，衣服、卧具，悉以供給，如斯之功，受報天宮，衣

食自然，須之便來，不用則去。若居家富有，更能種福，修建功德，此人即從明受記成道。若人之愚癡，定有成道之期。亦如嬰兒，亦有其老，但知修善，足以成道。《太平經》云：惡人入道，損敗善人，亦如拙匠，損敗人材木，拙女毀人布帛，終無成善功。然惡人與善人反，如人健時，喫好美食大美，乃得肥壯；若病人食飯苦，亦不肯食，久久困病而死。令惡人聞善言勸喻，亦如臨死人喫美食耳，反而爲惡。若善人見善人乃喜，賢人見賢人乃喜，智人見智人乃喜，惡人見惡人乃喜，姦人見姦人乃喜，各得其類乃喜。若子不能盡力事父母、弟子，不能盡力事師尊，臣不能盡力事君長，此三行而不善，罪名不可除也。《因緣經》云：周窮救危急，功德甚廣大。增筭益年壽，終身受欣泰。又云：積善不厭多，布惠勿悛惜。功德感仙真，自然書帝籍。《妙真經》云：不善之人，不識元首，不睹本根，詐天輕地，罔鬼欺神，屬辭變意，抱嫌履疑，謂之不善。不善者，動



與天逆，靜與地反，言傷人物，默而害鬼。故分道別德，散樸澆淳，辯言治辭，依義託仁，歆物符驗，運以天文，廢真立僞，務欲傾國。開患害之路，閉忠正之機，阿主之術，以順國家，權者也。《昇玄經》云：修善得善，其鬼亦善；作惡得惡，其鬼亦惡。是故半在吾道堂，半在魔地獄。諭如呼聲，莫不應也。

### 度人出家緣第八

夫累患既除，俗情亦異。捨恩愛而入道，脫樊籠而就真，超八度以爲心，背十轉而齊行者也。

《本際經》云：大梵國王，心自念言，我一國土，得三寶力，唯當歸敬，上報天尊。乃選諸王子，及以國中臣人子弟，擇其端正、第一聰敏、有善心者，皆使出家，紹隆正法。《本相經》云：清和國王，詔度國中男女三千五百人，令男居習靈廟，女居七政廟，爲國行道。《樓觀本記》云：周穆王尚神仙，因尹真人草樓之觀，遂石幽逸人置爲道士，以其器均巢許德爲物範，故令修

弘道事。《本相經》云：范則子與四人，同往大原山中修道。三十六年，夢見神仙真人，項負圓光，無鞅數衆。更得六年，永無髣髴，四人退還家，則子願在山。四人疑恐得道，往看唯見太清玉碑上，兩白鶴因爾而歸，至半山而死，化爲猶預鳥，三身後，生西方兩面國中，雖有人形，而無人情。又云：炎明國王有女，字好求，年十五，發願出家，願捨女身，生落男形，因感天尊放大光明，以照女身，女因騰虛，白日昇天。女去後，父王思慕，即造神仙宮，集靈臺、四周房、三師堂，又宣詔天下出家。

《千真科》曰：男女童子，依奉經戒，王勅與度，作何法得度，後合禮父母以不？答曰：紹隆種相，係敬護男女入道，揀取端正慈憫、有道心者，師先戒鍊，十行可軌，聽許誦習。王勅與度，依王法制度合度己。依一大觀，嚴整玄壇，施安闌纂。依明真拔罪之法，預度男女，於壇南，依左右方面以列兩行，倚立以度。官長正南橫行，須一大

洞法師，於橫行之前設案席，然香讚歎曰：大聖天人尊，歷代所崇敬。今有珍貴者，是我大國王。以發善心故，普令人正道。得入正道已，實由國王恩。永離有爲情，長尋聖境界。必得大法利，同趣證無生。讚歎既已，白新度諸師今日之後，禮聖禮真，離親離俗，人各三禮，長與俗別。第一禮國王帝主，德澤無盡，第二禮州縣官長度脫之恩，第三禮存歿父母得與出家離俗。跪拜三禮訖，法師捉新度行首一人衣冠曰：大哉聖化，衣被無窮，星宿爲冠，日月爲服，法行天道，勿替四時，廣度衆生，永超三界。法師令大衆普皆唱善彈指，三聲脫罪。舊人並唱善彈指。齊各三聲訖，乃總著法衣。竟，官人行香，各行道三周。舊人在前引訖，登壇歎□。事訖，設齋。齋竟，各謝法徒。從老者起至下竟，列坐父母、兄弟，皆來禮拜於兒女邊，父母並稱弟子，發願云：願師必定成道，與弟子等，同入正真。

或云：出家之人，從少至老，有何

階級？答曰：出家之人，有五種階級：從七歲至十一，名蒲車道士；十二至十四，名清信道士；十五至十九，名施惠道士；二十至六十，名弘護道士；七十至九十，名住持道士。

科曰：三乘之道，何以爲心？

答曰：小乘之人，隱處山林，自調自度；中乘之人，德澤弘普，兼濟度物；大乘之人，忘功絕私，發四弘誓願。

科曰：諸勸人出家，有何功德？

答曰：能勸他人男女，并捨自子出家，譬如微塵世界之數功德，亦不如勸人捨子等出家之功德。縱有人造幡蓋懸，至三清境之功德，亦不如勸人出家之功德也。

要修科儀戒律鈔卷之十二

要修科儀戒律鈔卷之十三

三洞道士朱法滿編

雜科第一

《千真科》曰：施制立法，要假能行，衆中無知法者，不問多少，皆悉不得共住。共住之人，必須同遵聖教，動止合儀，惡悉能斷，善共保護。如勸惡者，事在別律。

科曰：道法清虛，不希名利，閑居靜室，謂曰仙家。我弟子中，多畜錢財、寶貨、牛馬、奴婢，耽著不已。如此之人，斷三寶原，奪衆生福，雖持經奉戒，俱爲滅法。

科曰：上德尊人，住持大衆，下小有過，須避嫌疑。若有不和於國王、妃嬪、眷屬、大臣、宰輔、俗人，及兒女、小道士、淨人，宿新怨嫌之前，並不得呵責。若應舉罰，先喚來隱處，自以示語，情所不堪，爲衆所惡，及當白衆舉罰。

科曰：出家之人，務在簡靜，非法

行事，動則落邪。非法者：一則廣求利養、自說我能，二則貪積無窮、爲人婚姻卜相，三則強稱多解、瞻視天文，四則行等淨人、躬執耕稼，五則鬪亂朋衆、與惡友交遊，六則不以正法爲事、而與兇俗結黨，七則坐起無分、混淆法次，八則不依正律、道俗同床，九則闔夜出行、而不秉炬自照，十則擄捕雙陸、劫盜行非、恣意所爲、而不自戒。入道依衆，可以去之，如不自懲，是壞道法也。

科曰：諸小道士所詣名德，皆須修飾形儀，整頓冠履，安詳雅步，稽首三拜。拜訖，長跪啓曰：某甲小末，未備法教，故以遠來，伏願大德，賜垂解結，我有所聞，必無違逆。大德爲白衆：今有道士某甲，從小以來，心有結累，不能自解，今稽首求悔。若從生至今，行瞋、行怒，行劫、行盜，行貪、行一切不善之行，於今解釋，不敢復犯，進學正戒，通明義理。說竟，謹依所說乃起，更三拜而退。

科曰：亂衆之人，多不依正法。

飲酒醉亂、輕欺上下者，罰錢及米；或餘貨財，當時同和，後便違拒，不肯輸送，因茲杖罰；或奪財帛，以用供衆；或苦役治地，斬伐草木，鋤禾收刈，如一衆不能，治罰總集。道衆文不能治，可送與國王，以依俗律。

科曰：若有不依正法，遊入他觀，妄有輕欺，科索酒肉；或媒嫁、爲人買奴婢，及餘畜產；或造順俗之制，犯罪囚禁，遭赦得免；或自貨賕，方便得脫；或奪賊物，因利求和。律有正科，依法與罪也。

科曰：道士女官，各順淨行。道士不得畜女人，女官不得畜男子，各使遠離，棲肅其心，目不見形，聽不聞聲。道經云：不見可欲，使心不亂，若有此色，即須白衆。告舉不肯制止，國王有法也。

科曰：大觀私房，皆多混亂，特由尊者，不能謹慎，縱恣無方；或是綱維不出教令，身居寶地，心穢慳貪，導引後生，同開惡趣，兇惡長養，天塞道源，使正信者，憑心何所。

科曰：共入寶房，同開善趣；懷瞋動殺，咸乖大慈。養牛畜馬，不免鞭打，藉狗放貓，專懷殺意，凡人淨戒此等，並不合畜也。

科曰：人有尊卑，戒有大小。或身雖奉戒，意無在法，不修靜舍，詣飾殿堂，招引兇黨，動爲非法。聞鳴鐘禮拜，大笑入觀；見尊德行道，外生謗誹，特由綱維自爾，何能戮力徒衆，迺互作法，風教日生也。

科曰：若衆中有一人不善，可隱處示語云：真品仙階，行人所踐，道無形相，要藉人弘。十方法徒，助道揚化，聞有法要，學擬成身，豈得有過，令他知覺。今大德諸行無犯，唯有某事不依正道，請即改之，猶如月虧更滿，蘭歇更薰，幸相用言，共匡法教。不得即舉白大衆也。

科曰：出家之人，與俗既別，置觀立舍，並不得與俗人及家口家住。若是十方法衆，行往經過，看前人德行高低，作三品安置。尊卑居止，要令得所也。

科曰：每觀舍，應須精思別院，安置名德，中常集衆，同在齊堂；若是遠方行人，來暫居止，即須先問，欲何處居，才高行潔，精思別院；若無奇行，請平常居止；若是上人，請下分可，須辭謝改處；若才非所處，即須誦退。

科曰：精思入定爲性，披黃載幘爲相。若淵澄霜潔，玉潤冰清，爲世福田，行無點汙，宗持正戒，有五譬喻：一者喻如富貴之家，忽生一子，而無兩目，經涉三月，兩目忽明，舉家歡喜，無戒之人，猶如無目。二者喻如磨鏡，漸漸增明，有戒之人，念念功積。三者喻如嬰兒，細細長大，能持戒者，以下之高。四者喻如飢人，終念得食，不得食故，必死無疑，不受戒人，長淪盲道。五者喻如舟航，能度大海，能持戒者，必度生死苦海也。

科曰：若國王、大臣、施主、工匠，能有益衆者，可供給飲食、薪火，遇有求索，白衆供給也。

科曰：若威勢及惡賊、能損害衆者，亦須供給食，此是不知法人能損壞

法衆故也。

科曰：常住錢物，不得貸借、充私房用，其有病患切急，白衆求請，後一倍償還也。

科曰：非法之物，不得布施。問曰：何爲非法之物？答曰：牛馬、奴婢、軍戎器仗等物是也。

科曰：時在饑荒，又屬離亂，各欲隨豐逐靜。能有守固衆，可分科財物，以與守固之人也。

科曰：若有惡口赤舌，兇徒惡黨，以相羣聚，常懷遠離，設使偶會，情不獲已，要須口順心違。若不能爾，交爲切害。

科曰：法物、什物，造像、造經，有所施用，輕重各別。答曰：鍾磬、幡花、鑪合、帳蓋、寶幢、經韞之屬，此是法物則重，冠履、几笏、褐帔、裙襦、衫褶等，爲什物則輕。本心爲重，後作輕，犯五刑律；本作輕，今作重，不犯。像則有三：天尊爲上，真人爲中，衆仙玄中，法師爲下。本心捨施，造像爲重，不得入輕。入輕，犯十惡，若以卑

入尊，不犯。經亦然。上清爲大洞，是大乘，洞玄靈寶是中乘，洞神三皇爲小乘。本心造大乘，後爲中、下，犯五刑律。本造小，今造中、大，不犯。

科曰：盜法物、什物，罪同五逆；盜造像物，罪同十惡。若盜將他家像，緣路告乞入己，罪備五獄二十四萬劫。若自造像，擬將告乞，取物入己，被八門長考，萬劫無出。

科曰：出家之人，單景獨宿，與物不羣，割愛遺榮，超然宴處。若犯濁亂，世不崇敬也。

科曰：若母、姑、姨、姊等，爲病患及急難，要須扶捉者，無犯。若是他人兒女，沒水隨火，縱有姪心，亦須拯救，不得犯觸也。

科曰：若行往道路，逢女人有所求覓，并乞食飲等，只得隔十步外遙言；若得物及飲食等，安置床及地上，去後來取，不得親授手中；若路逢女婦，要避路與過也。

科曰：出家同道，與俗有乖，是我法徒，共相蔽匿惡興善，遞互生恩，使

遠近稱揚，通令深信。論云：天下善人少，不善人多。今時之人，吹毛覓瑕，互相讒嫉，不知己過，強數他非，設有一善，爭相毀謗，不能改身就善，及欲敗善同惡，故壞道法，專由此人。大德尊者，深所約語也。

科曰：若淫心起時，如逢猛虎想，如見毒蛇想，似見國王想，如爲賊發逢主司想，如坐在宅被火四發遭燒想，如乘船渡海、船漏欲沒想。作此六心，淫無起處。

科曰：共居觀舍、堂殿、園林、田地三寶衆，殿屬天尊，堂屬道士。若其營造，尊卑有等，其私房是道士自造，廣狹等級，出自己身，生前由身處分。若死後而無付囑，從衆施爲。若白衣童子自所營造，得度之後配別處者，亦聽許自己處分，唯地屬三寶，不得改動。若大衆先有別約，例不犯也。

科曰：諸初入道，戒行未全，依倚村坊，不住觀舍，上無尊德可畏，下多狡猾爲朋，誘引兒女，同床坐起，歌笑嬉戲，飲酒食肉。俗人見之，通生穢

慢，乃謂名德，俱應若斯。如此之類，是滅道法，破他信敬。尊德訪察，依科與罪，設不能治，國王有法也。

科曰：若出家之人，將三寶之物，贈遺官人豪勢，求所潤己，翻令俗人，生希望心，縱能興建，不如靜坐，緣此受犯，准盜物論也。

科曰：出家之人，清堂虛室，耽著既甚，有十惡累：一則廣占荒野，別畜田宅；二則種植園林，自求地利；三則出入貯積絲綿穀帛；四則畜販奴婢；五則愛養六畜；六則貪聚八珍；七則好樂玩物；八則雕飾帳帷；九則衣著奇異；十則財寶彌勤。此之十事於身，不得爲清虛，得之在身爲患累。若有此者，妨向道心，礙淨解慧。

科曰：若有人來乞索，是因三寶赴齋，傳度講誦，轉經受施。但是因三寶得者，准明真科，依十二折傳處分。若是此外所得，聽出意布施濟惠，仍不得以不淨取，以爲不淨施，皆抱枉法得罪也。

科曰：若諸弟子，恒懼天寒、時

亂、飢荒等事，貯積絲綿、帛布、五穀，以備時急惠施者，不禁也。

科曰：若有人將器仗、禽獸、非法之物，以惠施者，並不合受也。

科曰：若有人將使人婢奴以供給者，悉不合受。其使人能齋菜持戒者，受也。

科曰：出家人房舍，與俗人兒女鄰並者，夜宿各須閉戶。不閉戶，犯律也。

科曰：出家之人，寧受偷鐘盜像之罪，不言說他家陰私穢惡之事也。

科曰：若野地中得藏，還與國王；若藏中有券，銘記云是經像堂殿之物，得者爲造經像堂殿，依其銘記，處分施造，不須白王。若不爾，犯十惡律。如路次野中拾得之物，捉取其物，依標榜得主分付。如不得主，入常任也。

科曰：出家之人，外行遊見鬪打、不孝父母、不順兄弟、爲偷行盜、軍兵相殺之事，皆須歸觀，香湯洗浴，入靖思微。不爾，犯科。

科曰：道士女官，而被俗人不依道理輕欺，若爲依止，答曰：若道士女官，而與俗人不依道理輕欺者，可告父母、兄弟，及村落有勢力者，以爲外護。

科曰：天尊初得成道，聽許男子出家，未審女人從何乃得入道？答曰：天尊因地淨信夫妻結果成，遂爲元始，因許男子通令出家，妻以果地中候大夫人之稱，亦許女人相係入道，轉經度戒之後大洞女官。男見女子入道，受老君自然法已，即須敬禮，依法引接，爲能紹隆聖種；見其有過，不得罵詈誹謗。若治錄童子，須禮大洞女官，爲敬法故也。

科曰：他人捨田宅、園林，爲人侵奪，若爲處分。答曰：若有信敬捨施，爲人侵奪，報本捨施主，令其轉貨。

科曰：若於道路，逢見師主及師主知故，皆以下風避影，不隔越道路而與共言，當以曲腰折身，有言則對，無言則退也。

科曰：隨從尊者出入，當爲提持机杖、鞋履。登危臨嶽，當以親侍左

右，兩手提携，不得散手遠離老少別朋。

科曰：夫為弟子之禮，出則啓白，還則省慰，問訊上下，乃復常業也。

科曰：衆有疑惑，我不勸成；衆有評論，我所審察；衆有擅造，我從衆宜；衆有行遊，我不矯俗。自恒卑退，尊敬前人。

科曰：為師主大德存衆之法，寬弘以立節容物，慈愛以約衆，行事以衆勤，朝修以肅敬，上乃平不異心，下無怨色，斯為大德者矣。

科曰：為人自己有善行，當與在下共之，勿自取歸己。

科曰：學道者，不發他人過，不揚己之能，不拒人之諫，不見己之怨也。

### 同學緣第二

《太真科》曰：籙生同門、同志，更相切磋，共宣妙化。小生與大生，言偁小生，不得謾語。若僕，可得兄弟齊心一意，明詳科法，為人行事，唯精唯嚴，執憲秉儀，不可怠替。自求吉福，為他祈禱，無有二心，專篤勲行，化惡為善。

違科，五刑論也。

科曰：同學法衆，縱復才德實勝前人，名年在後，猶應敬讓。若前人推之，因讓勿飾；若彼加我，我誓不報；儻來崇我，我誓不敢。當時不獲已，事勢所須，或宜師我，我又三讓，後雖在位，心猶敬前，迹無敬儀比常例。又相知者，道念志同，號之為友，此心友也。雖同學道，志操非堅，此泛交也。其面交瞻其顏色，欲結交迹而無交心，其例甚衆，大略有五：一者門戶由來相似，二者仕宦階級相關，三者位卑而有勢，四者駸賤而有財，五者年色相類。皆為俗交。學道心交，擇人採志同者，貴不黷棄於下賤，賤不諂求於高貴，忘年忘勢，唯志道同。違者，七刑論也。

科曰：前雖結交，後名宦有別，或為師長，或為師友，或為臣下，皆解交，執當時之禮。若上命不解，皆須謙下為交。在上，不得呼下解；在下，不呼上結義，上命之也。

### 造壇緣第三

《二十四生圖》曰：元始天尊延賓

清堂，黃金為壇，白銀薦地。《本際經》云：大梵國王請經得力，乃國中造大精舍，建大寶壇。又云：絕和國王好樂造壇，一月三壇，周而復始。又云：林先生為壇，有女侍於美色，笑調先生，後為醜陋。又云：爾時，地下踴出七寶靈壇，高地一百餘丈，上下九級，周而八面，級有九洽，各有金格玉磬八十一枚，晝夜六時自然而鳴，八十一者同聲而發。又云：靜玄弟子請問天尊，因何壇治從國踴出。天尊答曰：初高上帝王說《本相真經》時，有空王造斯壇治，淪隱不見。今說《本相》，壇治聞而踴出。《五符序》云：帝馨乃祭天帝於北阿之壇也。

### 碑闕第四

《本相經》云：范則子順子得道，但見太清玉碑闕上有二白鶴，碑石書云：往以共學道經，宗三十六部，由心不專，志難會契也。

要修科儀戒律鈔卷之十三

# 要修科儀戒律鈔卷之十四

三洞道士朱法滿編

## 飲酒緣

經云：斷酒節行，調和氣性。《太平經》云：真人問曰：天下作酒以相飲，市道元據。凡人飲酒，洽醉狂詠便作，或即鬪死，或則相傷賊害，或緣此奸淫，或緣茲高墮，被酒之害，不可勝記。念四海之內有幾何市，一日之間消五穀數億萬斗斛，復緣此致害連及縣官，或使子孫呼嗟，上感動皇天，禍亂陰陽，使四時五行之氣乖反。如何故作狂藥，以相飲食，可斷之以否？神人曰：善哉。飲食，人命也。吾言或有可從，或不可從，但使有德之君教勅言：從今以往，敢有無故飲酒一斗者，笞二十；二斗，杖六十；三斗，杖九十；一斛，杖三百。以此爲數，廣令天下，使賢人君子知法畏辱，必不敢爲。其中愚人有犯，即罰。作酒之家，亦同飲者。真人曰：或千里之客，或家有

老弱，或祠祀神靈如何？神人曰：若千里君子，知國有禁，小小無犯，不得聚集，家有老疾，藥酒可通。

《千真科》曰：出家之人，不得飲酒，或託天寒，詐稱腹痛，飲後色變，或鬪亂尊卑，或應供赴齋，或施行章醮，或遊道路，或應對公私。非唯自失禮儀，抑亦穢辱道衆，是滅道法，無生弘讚。然應人就請，本以清潔爲先；出公入私，皆用端嚴爲首。有如此例，皆犯律論。《靈寶經》云：生而飲酒者，死則連汲溟波水灌沃四瀆中，或曰道法之中，聽許飲酒。《靈寶經》云：置酒浮雲觀，高飲玉清臺，此何頓隔？答曰：何見之謬。《太清經》云：化金玉爲三十六水，以金爲水則爲金漿，赤玉爲水則爲瓊漿，白玉爲水則爲玉漿，或云玉液。《定志經》云：五者不醉，常思淨行，何有許法五嶽圖序云。

## 斷穀服藥緣

丹蠟神方斷穀，可千歲不食，自肥不瘦，能力作負重。方：真丹一斤、芒硝半兩、茯苓一斤，皆搗合之，以白蠟

二斤中合煎之，九上九下可丸，便盡丸之，如梧桐子。服十丸，解一月不食也。

老君守中赤丸法：用白蜜一斤、真丹一斤、一方三兩、白蠟一斤，先細切蠟，以銅器煮酒令沸，乃投於蠟，安酒中。蠟消，下器著冷水中，蠟凝復下。如此三上三下，蠟凝出之，棄酒，乃獨以蠟著銅器中火上使沸，九沸九下，後下之內白蜜，復上火一沸，下之內真丹，攪令相得，欲凝，便急丸之如彈丸。欲斷穀，服之。初服，一日服一丸，二日服二丸，三日服三丸。復從一丸始，凡九日，服十八丸爲一劑，便守中。四十年不飢，顏色氣力如故，可負擔遠行，渴者飲少冷水，亦飲少酒，勿復有所食，令人不畏毒，但不能延年長生耳，辟穀輕身，氣力不減，山行不極也。若不能吞大丸，亦可分作小丸，計之合藥。齋七日，王相建滿定日合，勿令小兒、女人、雞犬見之。後若欲還食穀，當煮葵子一升，作薄粥飲之。藥即下，乃先稍稍食糜，勿便頓飽也。此沈

君所用以與牛馬服，皆不復食草而肥健如故。祕驗一方，直洋蠟三上三下，乃內蜜一沸，內丹撓之冷，便成守中。諸鎮丸法：茯苓、乾黃、精朮、楮實、人參各一兩，擣篩以白蜜五合、白蠟二兩，合前和藥，更擣千杵。服如小兒拳一丸，然後可服大小四鎮。服丸後，又應長將前件栢葉丸、茯苓丸爲佳。小鎮丸法：丹沙半斤、茯苓半斤、禹餘糧半斤、麥門冬一升、白蜜三兩，凡五物。丹沙、餘糧、茯苓，下稀和以蜜，擣三萬杵，麥門冬去心，三兩作四丸，手摩令有光。以滿日平旦，東向服一丸，却十日服一丸，却十日復服一丸，是爲三十日服四丸止，服此藥得度世者有三十餘人。合藥時，用王相滿日，當齋戒，勿令小兒、婦人見之，不得食葵菜、生菜及至死喪生產家，此方長史書。

守中徑易法：取大豆必生者三升，手授令光明而體暖，先美食竟，乃頓吞之，可解五十日、百日。渴則飲水，勿餘食。欲去之，服熱粥二升，豆即下。一云：每向日再拜，一服一升

於口中，展轉誦六甲通，乃咽之，三日明日，乃分一升爲三過，小兒則半之。又赤豆肉、吞二升至三升，亦支一歲，又取大豆、黃米三升，一頓餐之，亦可十日、五日不食。後欲食，當服葵莖灰，方寸七，即下服猪膏及酪蘇亦善。

又法：先嚼蠟大如博，綦極令柔，乃內猗氏肥棗，并含嚼之，即皆消而咽之，入腹正氣，除病斷穀。又但食一方寸蠟，辟一日。

又法：取檀榆皮白者各一斤，酒一斗，漬之出乾，復漬盡酒止。一服二兩，十日行三千里。

又法：桑椹黑者，暴乾擣之，水服三合，日三則不飢。

又法：三月三日，若十三日、二十三日，取白茅根淨洗、細切、水服，亦可暴末併備之。日服五六止，勿大飽。長服，令人美色不老，伏鬼神。

又法：薤白五斤、稻米一斗、豉一斗、鹽半合，以水三斗煮，令熟爛。初飽食，後稍稍進，不飢，除寒熱，延年。

服松根法：取東行松根，剥白皮

細判，暴燥擣篩。飽食之，可絕穀，渴則飲水。

又法：但取栢葉，暴燥爲散蜜丸，服之則不飢。亦可水服，亦可酒服，以白酒和散暴乾。又擣服益佳。

服松葉法：四時隨王方面，採近上去地丈餘者，細切如粟，水調若薄粥汁，服二、三，合日三。亦可擣碎，暴乾更末服之。亦可擣末酒漉，暴乾更擣篩，以酒飲及水調。無在千服，久服並令人輕身延年，體香少眠，身生綠毛還白，絕穀不飢。服之，當使有恒，栢葉亦然。

服氣斷穀法：先閉口咽內氣，勿吸外氣也。一日三百六十咽以上，爲但欲多耳，能至千，尤快以漸。斷穀十日後，自不用食。穀斷三日，或稍稍飢，或小便赤黃無苦，可噉兩三乾棗，日中九枚。酒，日中可一、二升，初小極後轉好也。

食十二時氣法：常從夜半九九咽，雞鳴八八，平旦七七，日出六六，食時五五，禺中四四，日中復從九九起。



皆當合口大咽之，令氣入腹，每咽一時足，輒漱鼓津液。吞之數過，各轉向其辰之方面益佳。十四、五日中，當頭眩瘦極，過此漸佳。

### 服符水斷穀

書此六甲陰陽符，皆各隨其日支干書內方中也，可豫□內函中，至其日取以祝水而服之也。

服此陰陽符，平日東向，左手持符，右手持水器，祝曰：真人某甲好樂真道，服食中和之氣。甲子太玄玉女承翼給侍某，用行厨所在，去所當得，無令飢渴，軍無大小，人無多少，皆當得飽。畢，以符著口中水送之，唯在人多耳。若欲斷他人穀，千人、百人，皆東向列，再拜自稱名，各爲書符與之，共飲一器水耳。

甲子旬，太玄玉女承翼。

甲戌旬，黃素玉女飛廉。

甲申旬，太素玉女瓊石。

甲午旬，降宮玉女雲齡。

甲辰旬，拜精玉女靈素。

甲寅旬，青要玉女惠精。

此六旬玉女名，當其呼之，勿誤也。

玉君絕穀符，滿日丹書紙燒，以神水北向再拜服之，執水向月建三祝曰：金木水火土，五星之氣，六甲之精，三真天倉，清氣常盈，黃文赤子，守中無傾。畢輒三叩齒、三啄杯，乃以服符，并飲水一升。右並出太清下卷。

### 老君服水斷穀法

不問清旦，但是須飲即喫，以一杯盛水向水祝曰：

金木水火土，五星之氣，六甲之精，真人天倉，清氣常盈，黃文赤子，守中無傾。三祝、三叩齒飲之，令人不知飢渴，渴復之極有神驗。近往往有人，得力此方是養生經卷，後錄出祝，與前少異，更未得別本勘知之。《道基》曰：祝六畜不食法祝曰，萬物皆含水，如生水入腹中。萬神皆驚，有脉之物皆可絕，無脉之物不可絕，六畜皆牽向王也。

### 治祝緣

《登真隱訣》，諸行事、存想、祝願，並在其中，今略出一兩要急耳。每當經危險之路、鬼廟之間，意中諸有疑難

之處，心將有微忌勅所經履者，乃當先反舌內向，反舌向上柱喉中，臨祝乃申之咽唾三過畢，以左手第二、第三指捻兩鼻孔下人中，本之鼻中隔孔之內際也，三十六過即手息。按勿舉指計數也。此急按中陰數，以一息爲一過之久鼻中隔孔之際，名曰山源，一名鬼井，一名神池，一名邪根，一名魂臺也。此後祝中有此五名，故先出其。紫微夫人云：山源是鼻下人中之本，側在鼻下小入谷中也，針之亦治卒死掩畢，因叩齒七七通，畢又進手心以掩鼻，躡畢未去手，仍叩齒竟，仍進左手掌以掩鼻口，指端至髮際，并覆明堂之上也於是臨目，臨目內存明堂中三君，以鈴鏡赤光煥而擲之，又存泥丸赤子帝君執謁大洞真經，以威攝之也乃微祝曰：朱鳥陵天，神威內張，山源四鎮，鬼井逃亡，神池吐氣，邪根伏藏，魂臺四明，瓊房玲琅，玉莫巍峨，坐鎮明堂，手揮紫霞，頭建晨光，執詠洞經三十九章，中有辟邪神虎，截嶽斬岡，猛獸奔牛，衝刀吞鎗，揭山攫天，神雀毒龍，六領吐火，啖鬼之王，電豬雷父，掣星流橫，梟磔駁灼，逆風橫行，天禽羅陳，皆在我傍，吐火萬丈，以除不祥，羣精啓道，封落山鄉，千神百靈，

併首叩類，澤尉捧燈，爲我燒香，所在所經，萬靈奉迎，十九韻畢，又叩齒三通乃開目，除去左手，於是感激靈根，天獸來衛，千精震伏，莫干我氣。此中並是神獸靈司之名號，故可以震却精邪。

右出大洞真經高上內章遏邪大祝上法，長史書。

北帝殺鬼之法：先叩齒三十六下，乃祝曰：

天蓬天蓬，九元殺童，五丁都司，高刁北公，七正八靈，太上浩兇，長顛巨獸，手把帝鐘，素梟三神，嚴駕夔龍，威劍神王，斬邪滅蹤，紫氣乘天，丹霞赫衝，吞魔食鬼，橫身飲風，蒼舌綠齒，四目老翁，天丁力士，威南禦凶，天驕激戾，威北嚙鋒，三十萬兵，衛我九重，辟戶千里，又却不祥，敢有小鬼，欲來見狀，獲天大斧，斬鬼五刑，炎帝裂血，北帝然骨，四明破骸，天猷滅類，神刀一下，萬鬼自潰。三十六句四言輒一啄齒以爲節，凡三十六句，則三十六啄齒若冥夜白日，得祝爲恒也。此無正時節，修事有閑及曉夜之際，諸疑闇之處，便可祝之，中皆當微言鬼有

三彼此祝者，眼睛盲爛而身死矣。此謂諸殺鬼、邪鬼及天地間，自有惡強、鬼輩聞此而死耳，非人死之魂爽爲鬼者也，如此鬼眼，亦是有睛，故盲爛則便死此上神祝，皆斬鬼之司名，祝中有酆都，中當位及諸神名字，故鬼聞而怖死也，許其領威南兵千人，即此御凶者也。炎帝即大帝，四明即諸公矣。北帝秘其道，北帝應建鬼殺人而值此祝，便不可復得，故秘其法。若世人得此祝，恒能行之，便不死之道也。人之死也，皆爲諸鬼所殺耳。今既不可取，便爲不復死也。男女大小，皆可行之。但患其不知此祝耳，智者密用則無限於大小，此語以是令告長史家困病行此立愈，思既幸走，病豈不除。叩齒，當臨目存神五藏，五藏具，五神自然存在。謂初叩齒三十六時，應臨目內視，存具五藏，以次想之，皆令分明五藏之神，備在於內，然後可得乘正以御邪神，以誅鬼耳。酆都中祕此祝，今密念之耳，不可泄非有道者，宜共祕之乎。此雖非高貴之至典，而是殺鬼之上術，凶惡既消則正氣可接，且以誅邪遏試學者之要法，而諸人多輕其淺少，每致傳洩，使神祝不驗，呵執不行，殊爲可責之也。

楊君掾書兩本。

卧枕緣

《道基經》曰：枕高肝縮，枕下肺

塞，以四寸爲平，枕席令煖，其息乃長。《道林品》及《觀門經》曰：行氣，枕高二寸半。《太清經》曰：下神枕法曰，五月五日，若七月七日，取山林之栢爲枕，長一尺二寸，高四寸，空中容一斗二升，此則廣三寸五分，栢心赤爲蓋，厚四分，善致下之鑽，蓋上爲三行四十九孔，凡百二十孔。凡容一黍粟，乃取藥，內中用芎藭、當歸、白芷、新夷、杜衡、山薊、藁本、木蘭肉、菴蓉、栢實、薏苡、薜蘿、欵冬花、白衡、秦椒、蜀椒、桂、乾薑、飛廉、防風、人參、桔梗、白薇、荆實，凡二十四物，以應二十四氣。又加八毒藥，以應八風，烏頭、附子、梨蘆皂、莢罔草、礬石、半夏、華陰、細辛，都合三十二物，皆咬咀，以毒藥居香藥下，按次滿枕中，爲布囊。以衣枕之百日，筋骨勁強，面有光澤；一年，身盡香；四年，白髮黑，落齒生。常別作一幃囊，卧輒起盛覆之。勿令氣泄，年年易新藥，合三十二種，藥得一斗二升者一種，轉取屑三合，七圭八撮，五分撮之四也。且藥體有虛實，又應作稱兩

率取之。今按《大散家品藥》云：木，十兩六銖得一升四合；乾薑，三兩十二銖得五合；桂，三兩十四銖得五合；防風，二兩四銖得四合；桔梗，二兩九銖得四合；人參，一兩二十銖得三合；黃芩，十七銖得一合；細辛，一兩二十一銖得三合；附子，十九銖得一合；茯苓，十八銖得一合；礬石，一兩六銖得一合；牡礪，十六銖得一合。此並諸藥之舊率，今應分等枕藥，先各依准量戒之。

旬中白虎者，以所克本旬者，甲子旬在辰，甲戌旬在卯，甲申旬在午，甲午旬在子，甲辰旬在寅，甲寅旬在酉也。入山辟虎，並在定訣也。

#### 要修科儀戒律鈔卷之十四

### 要修科儀戒律鈔卷之十五

三洞道士朱法滿編

#### 道士吉凶儀并序

法滿後識晚生，未能窮究至於脉制，深以致疑。竊尋大孟先生，諱景翼，字輔明，對齊文惠太子問道士送終儀體，引《法輪經》云：師如父也。我若無師，不得見經；今見經教，乃知道法。《黃籙簡文》載事師之科典，故學道修法，存師在前，既荷開度，稟佩經圖，濟拔三世，救護存亡。經文言：得眇篇目，九祖同仙。故真人云：我若無師，不得學道成道也。若其託形現世者，皆顯師資之迹；或因劍杖告終者，則是託物，令知變化無常也。自非體道冥真者，自然有欣生惡死之心。蓋人倫本有者孝性，乃至感動天地，通達神明，哀戚之情，觸境自發，雖復賢愚有品而愛惡不殊，乃是道俗難同，大方莫異。昔孔子既為儒學之師，止教世間典禮，死埋泗水之上，弟子皆服三

年，子貢廬住塚邊六載。魯人因從居者，百有餘家。遂名為孔里之民，四時祭禮不輟。況在道家法門，所稟宗匠，能使德踰三界，行超六道，乃復冥一至真，會合常寂，此則內外懸殊，非是情數所能譬也，仍為立儀，略將備盡。又有小孟先生以酌前儀，更加切要。石井公所撰，引《抱朴內篇》云：昔漢太后從夏侯勝受《尚書》，賜黃金百斤，他物不可數。及亡，又賜家錢二百萬為勝，素服五日。成帝在東宮，從張禹受《論語》，即尊位，賜禹爵關內侯，食邑千戶，拜光祿大夫，賜黃金千斤，又遷丞相，進爵安昌。侯年老，賜安車駟馬，黃金百斤，錢千萬。及禹病嗣省之，親拜禹牀下。章帝在東宮，桓榮以《孝經》授。及即帝位，以榮為太宰。天子幸榮，東面坐說，設酒會百官，及榮門生數百人。帝親自持業讚說，賜爵關內侯，食邑五千戶。榮病，帝幸其家，入巷下車把卷，趨如弟子之禮。薨，天子為素服舉哀。此悉儒學指教一經，尚復崇師殷勤若此，求真要而不

准經誥服乎？乃立典儀，訓門中子弟張續先生所制，或異或同，見此四儀，不齊一意，使後徒遵奉，隨執見乖。今會四家，略爲一卷，率愚注訣，并酌異同，隨世沉浮，逐時增減，兼復師在之日，遠離几筵，咨問寒溫，要憑啓疏，脫恐晚學不識重輕，謹述所見，名曰《道士吉凶儀》，合十例，件狀如左。

通啓儀第一

吊喪儀第二

疾病儀第三

初死小殮儀第四

入棺大殮儀第五

成服儀第六

葬送儀第七

安靈儀第八

弟子還觀儀第九

除靈儀第十

通啓儀第一

正月孟春，猶寒，餘寒。

二月仲春，漸暖，已暖。

三月季春，暄和，極暄。

四月孟夏，漸熱，已熱。

五月仲夏，暑熱，甚熱。

六月季夏，盛熱，極熱。

七月孟秋，猶熱，餘熱。

八月仲秋，漸涼，甚涼。

九月季秋，漸冷，已冷。

十月孟冬，薄寒，已寒。

十一月仲冬，甚寒，嚴寒。

十二月季冬，切寒，極寒。

右裴矩云：今為表啓及書，皆云孟春猶寒。以後各依前件時節，十五日一改，亦隨事為之。

刺史縣令初到，道士通啓。題

云：某觀道士姓某啓。謹上明使君，記室明府侍者。

道士姓某惶恐，伏惟明使君縣令云明府德業弘遠，微猷昭著，紆降仁明，屈臨弊境。凡在道俗，莫不歡慶。孟春猶寒，不審尊體何如。貧道抱疾，不獲隨例，不任悅豫之情，謹啓不宣。某謹啓。

月、日，某觀道士姓某啓。餘啓准此。

凡初經正冬，一節書首，須自言感恩，并問前人增懷者，正謂二親不存，

論感恩之語。若不經初節，及彼此二親俱在者，並不須論問。如父亡母在，及二親俱亡，云某節遠感深。母亡父存者，遠思前人。父母有不存者，云念若前又尊於己，云惟增懷舊。書云：頓首、叩頭者，皆為敬彼之辭，父在稱頓首，父亡稱叩頭。但與五服卑親、及在下官屬，云頓首、叩頭者，以為未可。若吊答重喪，書稱為頓首，除此之外，悉去頓首之言。與高祖、曾祖、祖父母書，題云：高祖翁婆、曾祖翁婆、祖翁婆。几前某言疏，女某氏言疏。與父母書。題云：爺孃几前某言疏，女某氏言疏。

月、日某言孟春，伏惟增懷，若無經正冬節，及尊者二親在，不須云伏惟增懷，即移孟春著於猶寒之上，餘皆准此。違離未、已久，思戀無譬，奉某日誨，伏慰下情不得書云：不奉近誨，夙夜惶懼猶寒，不審尊體，起居何如；伏惟寢膳勝常，即日某蒙恩，接待有違，唯增馳結，伏願珍和。某言疏不備，謹疏。若作單書，移月、日於後云：謹疏。自此已下，書皆准此。

修受道師書。未得法師同題云：師

主姓尊師，几前若大德云：某姓法師，几前弟子姓名，惶恐白疏月、日，某惶恐言，孟春遠感，伏惟增懷，不審尊體，起居何如。若非師，直云如何，不用起居之語某即日粗得蒙恩，若離久，即云：違遠日深，下情馳結。若不得書，云：近不蒙誨，思想唯精。若得書，云：奉某日誨，伏慰下情未即拜覲，唯增眷戀，伏惟珍重，某惶恐再拜。

師與弟子書。題云：弟子姓，位省。某告

月、日告某，孟春遠感深，不見汝久，懸憶纏懷，日書爲慰寒。汝可不，吾如常，未即見汝，但以歎滿，好自愛慎，及此不多。師某告。

與同學兄姊書。題云：同學某姓兄姊前，某白疏。

月、日某白，孟春遠思深，伏惟增懷，分違未久，思戀惟積，奉某日間，伏慰下情，不得書云：不奉近問，下情馳懷猶寒，不審體履如何。某粗蒙恩，奉見未由，但增延結，伏願珍重。某謹白疏，不具某再拜。

與同學弟妹書。題云：同學姓

某，弟妹省某。

呈月、日某報，孟春云云，分張未，已久，思憶每深，猶寒比何如。某諸疹弊，言集未由，但增慨滿，善自敬愛。乃書不多，某報。

與伯叔父母書。題云：某次弟伯叔父母，某氏姑在室，云：次弟座前某言疏，女云：某氏女言疏。

與兄姊書。題云：某次弟兄姊，某氏姊，座前某白疏。

與同宗絕服尊行書。題云：某官翁伯叔，座前白疏。

與堂兄書。題云：某位兄前，某白疏。

與弟妹書。題云：某位弟省，妹云：某氏妹省，同堂亦然。書中若親兄弟姊妹無父母，云：孟春遠思深，伏惟同懷。若與堂兄弟，云：惟增懷。

與舅、舅母及姨書。題云：次弟座前某言疏。

與外甥書。題云：某省。

與小童書。題云：謹呈姓位，公某白孟春遠思深云云，謹白，書不具姓，

某呈。

與平懷書。題云：呈姓位，公某白孟春云云，遣白，書不具姓，某呈。

與小輕書。題云：白姓位，不具姓，某白。

與極輕書。題云：姓位。比無言寫，念想爲勞。得某日書爲慰，猶寒何如也。次諸疹弊，相見未期，但增歎滿，善將愛，及此不多。姓某疏。

### 吊喪儀第二

吊刺史縣令、諸貴重喪啓。題云：某觀道士某啓。傍注云：謹上明使君，縣令云明府。

月、日某啓，禍出不圖，某位公母云夫人傾背，若三品以上，并爲高官，云：薨背下情悲惻，伏惟攀慕號踊，荼毒難居，不任下情，謹奉啓不宣，謹啓。

吊師遭父母喪啓。題云：弟子姓名啓。傍注：上尊師几前。

月、日，某頓首、頓首，禍故無常，尊翁、尊婆傾背，哀慕抽剝，不能自勝。伏惟攀號無及，五內摧裂，何可堪居，酷當奈何，未即奉拜，伏增悲咽，謹啓

不備。某再拜。

師父母喪，吊師兄弟書。題云：至孝姓位凶前。郡姓，某白吊，父在母亡，云苦前。

尊府君母云尊夫人不終遐壽，奄棄孝養，情深惻怛，惟攀號躄，荼毒難居，甚痛奈何，甚痛奈何。未獲造慰，望增酸哽，謹遣白書，慘愴不次。道士白吊。

師喪，報同學兄弟書。題云：同學某姓兄前，某白疏。

月、日拜疏某言，無狀招禍，禍不滅身，尊師違和，須論病狀不蒙靈祐，以某日奄垂棄背，號天扣地，貫徹骨髓，不能自勝。伏惟悲慕，無狀奈何，苦毒奈何，伏增號絕。謹言疏，荒迷不備，某再拜。

師喪，報同學弟妹書。題云：同學姓某弟妹省，某白報。

月、日某白報，無狀招禍，禍不滅身，上延滅尊師，攀號躄躄，五內屠裂，不能自勝，唯增哽咽，迷荒不次報。

同學喪，報師啓。  
月、日拜疏某言，禍出不意，同學

姓某夭歿，哀痛抽割，不能自勝。伏惟悲悼傷切，何可堪處，痛當奈何，痛當奈何，未由奉拜，伏增哽咽，謹言疏不備，某再拜。

### 疾病儀第三

二孟云：案仙公門訓云，凡道士疾篤將困之時，皆須香湯沐浴，冠帶如常，儀出所稟經法，佩帶於房前，施安供養，請諸名德，齋戒誦經，懺悔受身以來所犯諸罪，不得有所隱藏，顯而發露，滅罪祈福也。張續師云：可轉《度人經》一兩百徧。仙公云：若須投藏，付囑經法，悉作辭牒條狀，申騰件別名品，奏聞太上，不有隱昧也。

《中元玉籙》云：奉師威儀，師有哀憂，弟子皆當心抱憂戚，出入無歡。

《玉籙》又云：師有疾病，弟子皆當侍近左右，親視氣息，有如父母。

《玉籙》又云：師有灾厄，弟子皆當率諸同學，建齋祈請，以立善功。

《千真科》曰：出家之人，與俗有別，然而死病亦無定法，然稍修執製。疾病之時，轉讀然香，晝夜不絕；臨終

之時，打無常；鍾啓送終，依五練生尸法。夫以疾時，觀內大眾，數以存問，檢校厨下，令前與病人食。疾病之時，難有達命者，福勢既盡，乃欲隱避東西，此並是前路功德無憑，而以臨時驚懼，徒作此意，速死而已。可以淨灑掃，開敞房舍，來往善知識，達命之言，更相啓發，諸法無常，寧有住者，必應壽書，量命無幾，可移入遷化堂。其堂可於觀西北角，別立為院堂，三間、五架，堂面看西北。其堂中高座上，造昇虛像，像身坐蓮花，如人大，舉左手以指天門，左右二真俠侍。病人恐命將絕，移入堂中像座後安置，用黃紋全幅為幡，長二丈四尺，中央繫左真腰，幡頭與病人手捉，令病人直心正念，願隨二真登天門，詣金闕，脫未應化，隨建福田。男官頭向左真，女向右真。一入此堂，難得平然歸者。臨命將絕，咸稱未困，特是貪生，有此計耳。達命君子，豈去住為心。

科曰：男女官年將老病，死期將至，家事錢物，皆委付諸弟子中可親信

者。師有遺書，依書處分，如無遺書，一一條錄生資，與諸子弟有所知者，共議修營功德，及充殯葬。如無子弟，觀衆處分，如無觀衆，道衆處分，不得將與俗家兄弟孫姪等費用。如有父母、師主，在遺書所命者，依書。又不共活，無有命書，輒取者犯五逆罪，私不能制止，送與官司。

#### 初死小殮儀第四

至死時，既不沐浴，無俟安牀上，直敷兩重席於地南首，不須改易，仍著手衣襪冠巾衣居常。出入時，衣佩符籙於左肘，鈴印於右肘，便安下衾，上被覆之。停住，設白粥之奠於尸東，當肩祭訖，次兩邊鋪薦於地，男孝居左，女孝居右，不須如俗人含珠喚魂也。撤奠，亦尸東。祭文云：帝號木歲，某子某月朔某日，弟子某甲，謹以清酌蔬奠，奉祭師尊之靈云云。竟，哭盡哀。此小殮時也。

#### 入棺大殮儀第五

至大殮時，不須香湯洗浴，著衣冠帶，如齋時服飾。先朱膺棺安石灰梓

木七星板，笙篳雞鳴枕，使四人扛衾內棺中，以傳策置左符，鏡置右，少近頭邊。舊來安隨身經法內前，鬲子中堅安之，今安棺外，頭別案盛之，亦好。仍設大殮之奠法，隨用生時所進之食，先鋪席於尸西，進奠於席上果菜。祭文云云，竟，哭祭記，收祭食於糧甕中，安棺頭。舊以白素書移文，今人紙書，亦得先條隨身佩帶於前，次送終物置，後道士移文。

謹條某州郡縣鄉里觀舍，男女官三洞弟子某甲所受經法，扎目如左。

錄治，五千文戒等。

右件，詣某師奉受。

自然券，五老赤書真文，三皇上清三品經。

右件，詣某師奉受。

凡授弟子若干人靈寶法，若干人上清法，謹條三洞弟子某甲，將經法自隨入塚扎目。

百八十戒文，仙靈二官錄，真文佩策符印等。

右件，隨身入棺中。

上清經某卷，七傳某卷，五法佩帶及上清諸佩文。

右件，合一函若干卷，隨身入塚中供養。

謹條三洞弟子隨身寒夏衣裳，及紙筆等扎目，某衣某物。

右件，隨身入棺中。

硯，筆，紙，手巾，墨，書刀，奏案，香鑪。

右件，隨身入塚中。

合經法衣物若干條。

維某年太歲甲子某月朔某日，天老移告：天一、地二、孟仲季、五路將軍、蒿里父老、土下二千石、安都丞、武夷王、里域真官、河伯水府、魂門監司、墓門亭長、山川澤尉、直符使者，今有三洞弟子，某州郡縣鄉里男生某甲，年若干，今月某日某時，生期報盡，奄然捨化，魂昇天府，形入地居，今當還某鄉某里山，造立磚塚。某生時，離俗從師，請道出世，尋學受佩上清三洞大經符圖誥傳，並抱還太陰。及寒夏衣裳，飾身服用，凡若干種，杉棺殯殮，埋定

送終之。具符到明，即安隱形骸，肅衛經寶，料領冠帶，約勅所部，扶迎將送，不得留滯，令無罣礙，逕至藏所，不使左右比盧、東西南北他姓等鬼，貨名詐姓，妄生侵奪，明承符勅，不得有違，一如太玄都鬼法、女青詔書律令。

右移增損隨時耳。

仙公曰：道士經法，能預投於名山福地淨密處者，是為第一，不必將死屍同穴也。滿見今人受法師，猶不盡備經，弟子亦有不能辨本所寫受經，何必與屍同穴？何必預投名山？經留代代，相傳符籙，隨棺入塚，出處隨時，見於斯矣。其有隨身物內，後鬲子中，不須如俗人作穀囊、腰繩、終具等物。事畢，上蓋依科安之棺上，次安應入塚法物於棺南頭，施列供養。燒香道士，皆冠法服，一人棺南頭，唱禮三寶，三拜竟。

要修科儀戒律鈔卷之十五

### 要修科儀戒律鈔卷之十六

三洞道士朱法滿編

#### 梵誦三契

#### 禮懺文

衆等伏聞至聖高真，慈哀六道，冥寂大智，憐愍四生，情慮溺此愛河，神識沉斯苦海，以其善惡命根，因緣未絕，生死報對，倚伏無窮，雖復智火長然，神光不照，寶船恒泛，舟楫未過，所以生此世中，身非己有。今日亡人某甲，見道聞法，奉誠修經，以鳳篆陶心，龍章瑩質，情超十轉，智入九玄，知二世皆空，識四大假合，仙期未滿，更須改易，恐存亡業累，脫有違餘，果報因緣，或繫愆咎，皆藉福田，悉俟功德。即時法衆為某甲家，五服亡靈，三師神路，頓頽歸誠，運心頂禮，禮太上無極大道、十方應現聖人，願降神力，救度亡者，濟拔窮魂，解除罪報，皆得遨遊淨土，練識仙宮，受號玉京，證果金闕，

混合正真無上道。

竊惟衆聖出化，種種度人；真仙示現，時時顯迹。或作形像，乍留聲教，引接凡夫，令無苦報。念其出生入死，疲勞心識，捨身受命，困辱精神，未曉受納前緣，寧知將來後際，漂浪忘反，輪迴不息，如慈悲不救，終沒罪田。今日某甲少秉奇操，從師問道，參經奉法，布德立功，功德脫有，未圓幽顯，須應福助。衆等齊為，俱發大乘之心，行上士之業，普為十方世界、帝王國主、君臣吏民、受法師匠、出世學士，悉為專情，稽首歸命，禮謝三十六部妙經、金簡玉字、龍文鳳采、九品真言、五方正教，特希玄力，廣度公私，同得真仙，俱蒙慧解，四達圓明，六通具足，弘闡三乘，度脫五道，咸令自在，皆趣道場。今此世界，人倫生命，由來斷促，四大虛假，五常浮偽，如逝水之不停，譬石火之飄忽，所以白駒難駐，黑影易流，千載斯須，百年幻惑，縱如彭安，亦從物化。自非乘龍之侶，何能獨免，若大期應盡，誰能運力。以今某甲捨身，



因緣難被，生事宛然，由在光顏，無所對晤，豈親友感慟，亦使行路嗟傷，萬古長辭，一生永別，衆等皆爲廣發慈心，普逮十方，一切含靈抱識、天神地祇、冤親平等，及世間苦受地獄罪魂，名相所總，胎、卵、化、濕，悉爲稽首歸命，禮玄中大法師、得道聖衆，願以六通智慧，放五色光明，普度幽顯，咸令安樂，使惡緣銷盡，善業成就，有識四生，皆歸三寶。三禮竟，乃三契。

宿命有信然，人命以銷盡，大賢樂經戒。

已上並二孟之意。

三契竟，案二孟行吊慰之禮後，更讀移文，恐煩重吟。三契訖，即一人讀移文，不須如俗法言故自有也。竟，內移前鬲子中，內外皆辭，拜別著蓋，未可下釘即奏章。章畢，下釘，哭泣，布總髮，行吊慰之禮。

### 章法

還書移文前經法衣物，別紙書章。謹條某州縣鄉里男生大洞弟子云云，泰玄都正一平氣云云。

上言謹按文書右牒，男生三洞弟子某出身入道，叨稟至法妙品，圖篆略備，而不能幽居習誦，夷神抱一，逢迎人伍，染累風塵，罪結過滿，身盡神逝。以今月某日某時，謝命天地，長沒土官，既有生時經寶、符圖、法具、衣衾等物，便以今日某時，殯殮尸形，緘封丘塚，恐生犯死謫，或爲故氣禁忌之鬼、山川妖僞之精，拘閔死人，不通道理。又恐地下四時主者、蒿里父老、丘丞墓伯、地下二千石，不相安隱，謹條經書、歛具遷件如牒，謹爲伏地拜章一通，上

謹臨尸使者、關歛君吏一合下，監臨殯歛，安隱骸爽，長寧蒿里，隨業轉輪，功成事畢，所請衆官謁還天曹，列受功賞，進秩如常科比，無令失意。有恚恨者，生死犯，並乞原赦，恩惟太上分別云云。

右前是臨殯章，須大治道士受破殮錄者奏之。既有經目，不可示外人，一兩日燒之。

若非大行名人，歛時必無子弟三禮、三契，非卒輒能兼之。上章，事須

明解，一失節度，束手無依，謹依科撰三歸，略陳切要。亡人入棺訖，先依孟先生作移書了，即於棺頭鋪席然香，將小磬子打三下。歛長訖，乃長跪騰亡者情事。

伏聞法本無生，生而有死，匹雲中電火，如海上波城，倏忽不與人期，窈冥誰知趣向。少時暫遇，所倚爲親，念念遷移，俱非常保，時時捨故，咸以哀人。今日亡某，命偶良緣，得生聖代，聞經見道，奉誠修真，旦暮揖其龍章，晨昏朝其鳳篆，本圖鶴舉，永願雲昇，豈悟孔水摧年，莊山促壽，一朝捨命，萬劫長乖。思坐起而無從，對衣衾而洒淚，裝束既整殯服，以施良時入棺。謹依喪禮所有移文，具條列疏。讀移文。讀移文訖，唱三歸依。

當爲亡者歸依十方大道，願降威神，拔七世苦根，解三塗結縛，遨遊妙苑，練識仙官，稽首至真無極大道。

當爲亡者歸依三十六部尊經，願玉字金篇，資神養性，龍文鳳篆，瑩府濤情，永離北酆，長居南極，稽首宗玄

自然法寶。

當爲亡者歸依後聖諸得道玄中大法師，朗七覺光明，照六通智慧，普度幽顯，咸濟死生，稽首十方無邊聖品。事竟，內移文於棺頭，餘任主人下釘安蓋二孟云：若葬日餘至時，移棺於堂上，安白布幔障前。大殮後，三日成服，仍於柩左安靈牀，東向施帷，屏風、机褥、服飾，備具如生時，朝、中進膳。未成服前，孝子於靈南頭，以布巾總髮，薦地北向，以東爲上，晝夜哭，至成服出靈前，再拜稽首。拜畢，至柩所哭。盡哀，還靈牀南頭倚哭；輕者，於靈前西向倚哭。以北爲上，哭拜，行吊慰之禮。今若按此儀，大成難解，非但孝子北向、西向致惑，吊人亦乃從此生疑。今酌此儀，未成服前，以布巾總髮，前安白布幔，男左女右。三日以後，成服訖，於棺頭南安靈，施屏風、几褥，非但吊者見，亦乃孝子左右得宜。張法師制，與此相似。

### 成服儀第六

受治，以滿籙。

三五元命，乃八券、十籙。八券者：定志券、昇玄券，賣子券、乞兒券，上清四券者：血液券、神仙券、大度券、通靈券。十籙者：除滿籙、三五籙、元命籙外，更有斬邪籙、破殮百鬼召籙、都章畢印籙、九州社令籙、太玄四部籙、河圖籙、青甲籙、東野大禁籙、十將軍籙。

右件，依小孟儀，若大孟，無八券、十籙，石井公有十籙，無八券。依小孟，同絲麻三月服，男女十五升布為衣冠，若大孟及石井公並云：發蒙之教，恩情極重。

制舉哀受吊，無成服之儀。今按《易》云：童蒙來求我，匪我求童蒙，若不發童蒙，終當見覆。《昇玄經》云：先師、後師，通當有敬，豈容敬，乃是同服而頓隔。依小孟，三月以爲通允。

五千文、大誡百八十律、真誥、五嶽、六甲、禁山。

右件，二孟同制，小功五月。男女十一升布為裳，十二升布為冠，今人不為冠、直為巾者，務省耳。按儒禮，

喪服以變吉服。吉服頭戴冠，身上著襪，身下著裳。若按二孟，十二升布為冠，用十一升布為褐、為裙。若石井公云：此等同服，小功五月，男絹巾，女練裳，今人既以爲巾，何不絹作？明學道之人，羸衣布褐，及其師死，更著練裳，非但於理有違，亦乃人情未可。既言小功五月，那更將絹為衣。按《喪服儀》云：總麻者，縷小如絲，實是麻作，故曰總麻；小功者，布縷既小，用功則多，故曰小功；布縷既大，用功則少，故曰大功。石井公雖有此條，竊不用也。請依二孟，未葬之前，布冠布褐；若其葬畢，布巾布帔。

自然、中盟、三皇、五符、七傳、寶神等經符。實神，即洞神經也。

右件，二孟同制，服大功九月，男女七升布為衣，十一升布為冠，石井公直云：九月不言升數。

靈寶大盟、真經三品。真經，即上清大洞真經也。三品是上清受道經，有二品經目，合三十五卷。三籙：一、八素曲辭籙，二、上

皇玉錄，三謂三天正法錄；三奔：日奔、月奔、星奔，三奔即是三景，受上清三奔，登上玉清景、上清景、太清景，今受三奔，得稱三景弟子。

右件，二孟同制。服齊衰期，男女四升布為衣，七升布為冠，心喪三年，不從讌樂。若前來五千文、自然大盟等三條中經法，同是一師受者，皆服斬衰三年，從極重之制，飲食言語、觀聽寢處，皆依孝子本儀，竟則服吉而無餘禫。今人大盟之師，則一期散髮。上清之師，或去無服，或至三號，或云九月，非直不識三品、三奔、三錄，未知三品，復是何經，直據七傳，是上清枝條，因而即服九月，坐由不睹經卷，觀覽豈復能周，師以慕廣輕傳，資乃愛紫爭受。陶先生云：古人以為皮好，吾今以為耳學。信哉斯言。豈其受得上清，見經而不識，既不識法，豈得慢師。上清、大盟，同是真經，俱存重服，請各思審，二孟久詳。

### 經師、籍師。

右二孟云：二人而言服，經師小功，籍師大功，亦復看師之輕重。看師輕重者，為師三年，為籍師一期，為經師大功，為師一期，籍師大功，經師小功，為師大功，籍師小功，經師三日，為師小功，籍師三月，經師無服。若師為籍師，皆輕弟子，於師又輕，各從減之也。

### 同學。

右上，二孟同制，總麻三月日服。

### 師為弟子。

右二孟云：師為弟子，例一等為師，三年報一期。齊衰者，九月；大功者，五月；小功，三月。石井公云：報服同弟子，唯不解髮耳。至如俗禮所明，以卑厭尊，從二孟為允，師年過老，若不勝衰，心喪而已。

二孟云：門中弟子為師依經說，度脫生死，恩重二親，而居喪事，用不同俗禮，既無凶苦，不為拔經，諸餘服紀，皆依法輕重，以為制度。石井公云：報服所養，生小成拔，並須散髮，不限受法，大小若著服者，臨時自裁。

### 送葬儀第七

若是大德名人，可依《鎮經》、《五

練生尸經》，預書五石，一依經法，此不具載。至葬日行喪，以入塚經寶，旋安供養，香花、幡蓋、伎樂、誦詠，次第施列在前，道士從喪者於後。以靈舉次之，亦幡花於前，次第三祭食舉，第四喪舉。舉後，孝子是其弟子重者在前，輕者在後。若有俗人，孝子最在後。若船行，應尊者在後。終令前吉後凶，次第逐時，當消息也。

至墓入廣安置法。取中前入棺，安經塚前，供養依法，安靈牀塚，右設祭於前，男孝塚左，女孝塚右，從道七正，正向塚，對經行道懺悔，讀誦行香。都設畢，齋食竟，弟子於祭前誦祭文竟，哭盡哀畢，起辭經法畢，內經於塚中。若路遠，又以時消息之。

入棺竟，於柩頭安石牀，案子置上，內所將經法置中，安仙童於左，玉女於右，神仙兵馬安塚口兩邊龕前，又安方牀，施几案、紙筆、硯墨、手巾、香火等物。孝子皆拜，奉辭塞塚竟，行吊慰之禮畢還。已上並二孟所制。滿案其俗禮，貧富有宜，徧歷真經，亦無等制。信然。還魂水上仁，安反魄火中。古以野為棺，莊周以天地為槨，豈專在

禮法度數，觀於衆人之耳目哉。若以生能重道德，死必賤形骸，隨事變通，逐時增減，不在一、二、三、四之數。

### 安靈儀第八

二孟云：次靈牀位。五尺牀南向，施屏帷帳幔，衣物隨四時法。牀前安橙，列香火、巾笏、梳刷、服飾。朝旦安几褥，暮移別牀席，安枕被。晨仍卷取，朝、中進食，真楊枝、淨水、手巾，一如生時所須。四時用物，陳列咸在。二孟云：若公王、父伯、師長來吊，孝子出戶外迎，從別道還。靈東頭倚哭，以北爲上。次輕孝於靈前，北向倚哭，以東爲上。尊者進客位，位亦以東爲上，伏哭五聲音來吊，孝子跪受。尊者撫手仍再拜畢，送至迎處，還倚哭畢。若俗人重者，不須拜。若次重者，直出靈東頭倚哭，客哭竟來吊，跪受執手，客去哭訖。若平人吊，直依次坐哭，受客吊。吊客卑者，直禮拜，不執手。若次敬者，跪執手。平體者，直倚執手。客若法俗中有親緣者，吊慰竟，更於靈前倚哭，展哀乃去。若客自從

有喪以來、未經相見者，雖於孝子平體，亦須出倚哭受吊。

### 弟子歸本觀儀第九

二孟云：若非時節、各還本館者，則安下下牀於北壁下，南向，以西爲上，坐哭受吊。若客尊者，跪受執手；平者，坐受吊，施安客位於西壁下，安五尺牀東向開後，客東向以次上牀，以北爲上，伏哭五聲起吊，孝跪執手如前。今人不安浮靈，請以空堂受吊。

孝子居寢處，安素下牀，除舊屏帷，以蘆蔕圍牀，戶懸白布幔，蒲履言語，對而不問。

### 除服儀第十

二孟云：自從初七、二七、三七，至百日、周年，隨心功德，竟過此靈上，朝、中無復施設，唯安香火，至再周亦可除之。滿意言亦可除者，當知有不除之義，既無名德，豈久安牀。張法師云：安香牀，弟子旦夕哭泣，三日內設齋，中時下齋，食至四日。已上設清水一盆，百日訖，毀座除服，隨輕重也。既是名德，百日恐情所未申。今若是

至德，朝野共尊，雖劍舄委形，神昇天闕，所在號慕，瞻仰几筵。若永安牀，不俱恒例，如弟子中受法至極而服斬衰，可再周安牀；若弟子盡服一期者，可一周安牀；若服九月者，可九月安靈；若服五月者，可五月安靈；有三月服者，可百日安牀。若過貧窮，又無後胤，雖安靈席，空設几筵，進獻靡增，塵盈垢積，安雖乃易，除甚將難，如情所不勝，請隨時消息。若名德，既不過人，又無後胤，殯葬以足，送終如例，不煩靈席。若是絕於世事，含光藏輝，名譽如泡，身形似夢，不求厚葬，無事几筵。既有遺言，各隨所況也。

要修科儀戒律鈔卷之十六

(吳亞魁點校)

## 020 齋戒錄

經名：齋戒錄。一卷。底本出處：《正統道藏》洞玄部戒律類。

夫入靖修真，要資齋戒，檢口慎過，其道漸階。《南華真經》云：顏回問道於孔子，孔子曰：汝齋戒，吾將語汝。顏回曰：回居貧，唯不飲酒、不茹葷久矣。孔子曰：是祭祀之齋，非心齋也。汝一志，無以耳聽而以心聽，無以心聽而以氣聽，疏淪汝心志，澡雪汝精神，培擊汝智慮，我將語汝。夫道冥然難言哉，將為汝試言其約略爾。《混元皇帝聖紀》云：按諸經，齋法略有三種，一者設供齋，以積德解愆。二者節食齋，可以和神保壽，斯謂祭祀之齋，中士所行也。三者心齋，謂疏淪其心，除嗜慾也；澡雪精神，去穢累也；培擊其智，絕思慮也。夫無思無慮則專

道，無嗜無慾則樂道，無穢無累則合道。既心無二想，故曰一志焉，蓋上士所行也。夫齋者，齊也，齊整三業，乃為齋矣。若空守節食，既心識未齊，又唯存一志，則口無貪味，謂茲二法，表裏相資。《大戒經》云：夷心靜默，專想不二，過中不味，內外清虛是也。子雖薄閑節食，未解調心，故示齋法，令其受道，而未學之徒，孰能虛心一志哉。夫鄙乎祭祀之教，自謂得心齋之理，蓋噴嗚怠慢之失矣。雖口談空寂，無解其目，是自矜也。

### 洞玄靈寶六齋十直

道教五戒：一者不得殺生，二者不得嗜酒，三者不得口是心非，四者不得偷盜，五者不得淫色。十善：一念孝順父母，二念忠事君師，三念慈心萬物，四念忍性容非，五念諫諍蠲惡，六念損己救窮，七念放生養物，種諸果林，八念道邊舍井、種樹立橋，九念為人興利除害、教化未悟，十念讀三寶經律、恒奉香花供養之具。凡人常行此五戒、十善，恒有天人善神衛之，永滅

灾殃，長臻福祐，唯在堅志。

### 年六齋

正月，三月，五月，七月，九月，十一月。

### 月十齋

一日北斗下，八日北斗司殺君下，十四日太一使者下，十五日天帝及三官俱下，十八日天一下，二十三日太一八神使者下，二十四日北辰下，二十八日下太一下，二十九日中太一下，三十日上太一下。

自下、中、上三太一下日，皆天、地、水三官，一切尊神俱下，周行天下，伺人善惡。

甲子日太一簡閱神祇，庚申日伏尸言人罪過，本命日計人功行，八節日有八神記人善惡，三元日天、地、水官校人之罪福。

### 六種齋

第一，《道門大論》云，上清齋有三法：一者絕羣獨宴，靜氣遺形；二者清壇肅侶，依太真儀格；三者心齋，謂疏淪其心，澡雪精神。

第二，靈寶齋有六法：一者金籙齋，保鎮國土；二者黃籙齋，救世祖

宗；三者明真齋，懺悔九幽；四者三元齋，首謝違犯科戒；五者八節齋，懺洗宿新之過；六者自然齋，為百姓祈福。

第三，洞神齋，精簡為上，絕塵期靈。

第四，太一齋，以恭肅為首。

第五，指教齋，以清素為貴。

第六，塗炭齋，以勤苦為功。

已上諸齋，自古及今，登壇告盟，啓誓玄聖，或三日、七日、九日、十五日，皆晝夜六時行道，轉經禮懺，儀格甚重。除上清絕羣獨宴、靜氣遺形、心齋之外，自餘皆是為國王、民人、學真道士，拔度先祖、已躬謝過、禳災致福之齋，此時移代同異，不無詳略於靈寶齋中，為半景之齋，既無宿請，亦無言功，唯只一時或兩時懺悔，亦不三時上香，步虛、禮經並闕。或小小齋中，三禮歎願，隨時去取，逐便制儀，既非大集，心達而已。

### 二種齋

《本相經》曰：齋有二種，一則拯

道，一則濟度。拯道者，謂發心學道，從初至終，念念持齋，心心不退。復有二門：一謂志心，二謂滅心。志心者，始終運意，行坐動形，寂若死灰，同於枯木，滅諸想念，唯一而已；滅心者，隨念隨忘，神行不係，歸心於寂，直至道場。濟度者，謂迴心至道，翹想玄真，願福降無窮，灾消未兆。又云：虔心者，唯罄一心，丹誠十極，燒香禮拜，唯求於道。捨財者，市諸香油，八珍百味，營饌供具，屈請道士，及以凡器，歸心啓告，委命至真，內泯六塵，外齊萬境，冥心靜慮，歸神於道，克成道果，永契無為，救濟存亡，拔度灾苦，隨其分力，福降不差，功德輕重，各在時矣。

### 十二齋

《玄門大論》：一者金籙齋，上消天灾，保鎮帝王，《簡文》亦云：兼為師友；二者玉籙齋，宗云：正為人民，今此本未行於世；三者黃籙齋，拯拔地獄罪根，開度九幽七祖；四者上清齋，求仙念真，鍊形隱景；五者明真齋，學士自拔億曾萬祖長夜之魂；六者指教

齋，諸福謝罪，禳灾救疾；七者塗炭齋，拔罪謝殃，請福度命；八者三元齋，學士已身悔罪；九者八節齋，學士謝過求仙；十者三皇子午齋，輔助帝王，保安國界；十一者靖齋，如千日、百日、三日、七日，修真之用；十二者自然齋，救度一切存亡，自然之中，修行時節。

### 八節齋

凡八節之日，是上天八會大慶之日也。其日，諸天大聖尊神，上會靈寶玄都、玉京上宮，朝慶天真，奉戒持齋，遊行誦經，此日修齋持戒，宗奉天文者，皆為五帝所舉，書名玉曆。

### 心齋

《南華真經》曰：顏淵問道於孔子，孔子曰：汝齋戒，吾將告汝。顏淵曰：回貧，唯不飲酒、不茹葷久矣。孔子曰：是祭祀之齋，非心齋也。汝一志，無以耳聽而以心聽，無以心聽而以氣聽。疏瀹汝心，除嗜慾也；澡雪汝精神，去穢累也；掊擊其智，絕思慮也。夫無思無慮則專道，無嗜無慾則

樂道，無穢無累則合道。既心無二想，故曰一志。

### 齋直

《三天內解經》曰：夫為學道，莫先乎齋，外則不染塵垢，內則五藏清虛，降真致神，與道合居。能修長齋者，則道合真，不犯禁戒也。故天師遺教：為學不修齋直，冥如夜行，不持火燭，此齋直應是學道之首。夫欲啓靈告冥、建立齋直者，宜先散齋，不使宿穢，臭腥消除，肌體清潔，無有沾汗，然後可得入齋。不爾，徒加洗沐，見穢在肌膚之內，湯水亦不能除。

《三元齋品》曰：建齋之日，當輸金真玉光九天之信，置於五帝，以招神致靈。

《三元齋品》曰：學法未備，即俯仰之格多不合儀。《金鎖流珠經》曰：古來呼齋曰社會，今改為齋會。

《太上太真科經》曰：消遣世務，三業為修。齋，存三守一，齋為本基。齋者，齊也，潔也，淨也。不必六時行道，三時講誦，晝夜存念，懺悔請福，干

噪玄虛，更失萬一。能得一者，心攝三業；能攝身者，端拱不擾；能攝口者，默識密明；能攝心者，神與道合。如斯為主，成聖真仙。未合此者，攝身朝禮，離殺、盜、淫；攝口誦經，免妄言、綺語，兩舌、罵詈；攝心存神，脫貪、恚、癡。十惡既去，十善自來，去來至極，與道合真。

### 釋齋有九食法

《玄門大論》云：齋法大略有九，一者麤食，二者蔬食，三者節食，四者服精，五者服牙，六者服光，七者服氣，八者服元氣，九者胎食。麤食者，麻麥也；蔬食者，菜茹也；節食者，中食也；服精者，符水及丹英也；服牙者，五方雲牙也；服光者，日月、七元、三光也；服氣者，六覺之氣、太和四方之妙氣也；服元氣者，一切所稟三元之氣，太和之精，在乎太虛也；胎食者，我自所得元精之和，為胞胎之元，即清虛降四體之氣，不復關外也。麤食，止諸耽嗜；蔬食，棄諸肥膩；節食，除煩濁；服精，其身神體成英帶；服牙，變

為牙；服光，化為光；服六氣，化為六氣，遊乎十方；服元氣，化為元氣，與天地合為體；服胎氣，久為嬰童，與道混合為一也。此之變化，運運改易，不復待捨身而更受身往來死生也。今意方法，未必止是食事，其或是方藥，或按摩等事可尋也。

### 說雜齋法

《三元品戒經》云：正月七日，天、地、水三官檢校之日，可修齋。《聖紀》云：正月七日，名舉遷賞會齋；七月七日，名慶生中會齋；十月五日，名建生大會齋。三官考覈功過，依日齋戒，呈章賞會，可祈景福。

《明真科》云：正月、三月、五月、七月、九月、十一月，一歲六齋月。能修齋，上三天帝，令太一使者，除人十苦。《八道祕言》云：正月、三月、四月、六月、七月、八月、九月、十月、十一月，此九真齋月；一日、十五日、二十九日，此月中三齋日。正月一日，名天臘；五月五日，名地臘；七月七日，名道德臘；十月一日，名民歲臘；十二

月節日，名侯王臘。此五臘日，並宜修齋，并祭祀先祖。《明真科》云：月一日、初八日、十四日、十五日、十八日、二十三日、二十四日、二十八日、二十九日、三十日，已上爲十直齋日。庚申、甲子、八節，太一八神下，司察人過咎。修齋，太一歡悅。庚申日，人身中伏尸，上天言人罪過；本命日，受法人身神吏兵，上天計人功過。《三洞奉道科》云：正旦爲獻壽齋，七日爲延神齋，二月八日爲芳春齋，四月八日爲啓夏齋，五月五日爲續命齋，六月六日爲清暑齋，七月七日爲迎秋齋，八月一日爲逐邪齋，九月九日爲延筭齋，十月一日爲成福齋，十一月十五日爲啓福齋，十二月臘日爲百福齋，二十八日爲迎新齋。立春爲建善齋，春分爲延福齋；立夏爲長善齋，夏至爲朱明齋；立秋爲遐齡齋，秋分爲謝罪齋；立冬爲遵善齋，冬至爲廣慶齋。如此等齋，各具本經儀格。故學道不修齋戒，徒勞山林矣。夫齋者，正以清虛恬靜，謙卑恭敬，戰戰兢兢，如履冰谷，若對嚴

君，丹誠謙若，必祈靈應，檢勅內外，無使喧雜。行齋之人，特忌斬衰孝子、新產婦人、月信未斷，及疥癩、瘡疥、病疾等，並不得昇齋堂庭壇，驅使如願。苦求預齋、乞解過咎者，任投辭爲其陳懺悔謝，不得雜登堂宇。應行法事等，仍遷令別坐，兼忌六畜。蓋此等人穢觸真靈，賢聖不降，乃修齋無功也。

凡修齋，齋主虔誠，齋官整肅，至如香燈不備，亦曰疏遺，啓聖祈真，莫先於此。香，貴在沉水栴檀。依上清，香，珠丸合和，不得用甲麝。招真致靈，務存精志，如寒棲學真道士，修齋單貧不可致者，亦宜以少爲信，無令頓闕；若純以乳頭，非道家所用也。

初登齋靖看焚香，氣向東、南、西、北、直上者，五帝依向而至。《登真隱訣》云：香者，天真用茲以通感，地祇緣斯以達信。非論齋潔，祈念存思，必燒香左右，侍香金童，必爲招真達意。《登真隱訣》云：真人攝日暉以通照，役月精以朗幽，故然九光之微燈，晃八

方之盡夜。

《四極明科》云：立春、春分，然九燈於庭；立夏、夏至，然八燈；立秋、秋分，然六燈；立冬、冬至，然五燈；本命日，十二燈。自此陳乞，謝過祈恩。用燈於庭法，與修諸齋，自有燈數於庭。訖，依記四時向王，唯本命向太歲，叩齒二十四通，呪曰：高上太真、萬聖帝皇、五帝玉司、總仙監真，今日吉辰八節，開陳陽罪陰考，絕滅九陰，於今永始，拔釋七玄，免脫火鄉，永離刀山，三塗五苦，不累我身，得同天地，長保帝晨，五願八會，靡不如言。呪畢，解巾叩頭百二十過，當令額向地而已，勿令痛。竟，復巾仰天，心念我身，今日上享天恩，賜反形骸，受生飛仙。畢，仰咽二十四氣止，如此三年，宿懣並除，身與真同。案諸經齋法，略有三種：一者設供齋，可以積德解愆。二者節食齋，可以和神保壽，斯謂祭祀之齋，中士所行也。三者心齋，謂疏瀹其心，除嗜慾也；澡雪精神，去穢累也；掊擊其智，絕思慮也。夫無思無慮則



專道，無嗜無慾則樂道，無穢無累則合道，既心無二想，故曰一志焉，蓋上士所行也，詳矣。齋者，齊也，要以齊整三業，乃爲齋矣。若空守節食，既心識未齊，又唯在一志，則口無貪味之謂也，一法表裏相資。故《大戒經》云：夷心靜嘿，專想不二，過中不味，內外清虛是也。子雖薄閑節食，未解調心，故云茲齋法，令其受道，而未學之徒，孰能虚心一志哉。夫鄙乎祭祀之教，自謂得心齋之理，蓋怠慢之失矣。雖口談寂，無解其目，是自矜焉。《易》云：聖人以此齋戒。

### 齋科

道士王纂，金壇人也。居馬跡山，常以陰功救物，仁逮蠱動。值晉之末，中原亂罹，饑饉既臻，疫癘仍作，時有毒瘴，損斃者多，閭里凋荒，死亡枕藉。纂於靜室，飛章告玄，三夕之中，繼之以泣。至三夜，有光如晝，照其家庭，即有祥風景雲，紛郁空際。俄而，異香天樂，下集庭中，介金執銳之士三十餘人，羅列如有所候。頃之，珠幢寶蓋，

霓旆羽節，紅旌錦旂，各二人相對前。行節最後，又有四青童執花捧香，侍女捧按。地鋪錦席，前立巨屏，左右龍虎，將軍侍從，官將兵士，二千許人，立兩面，若有備衛焉。復有金甲大將軍二十六人，神王十人，次龍虎二君之外，班列肅如也。須臾，笙簫駭空，自西北而至，五色奇花，灼爍豔逸。一人佩劍持版而前，告纂曰：太上道君至矣。於是百寶大座自空而下，太上道君侍二真人、二天帝，在座之左右。道君坐五色蓮花，二真、二帝立侍焉。纂拜首迎謁，跪伏於地。道君曰：子愍念生民，形於章醮，剝心瀝血，感動幽明，地司列名。蓋化育萬物而五行爲之用，五行互有相勝，各有興衰，代謝推遷，間不容息，是以生之不停，氣氣相續，億劫已來，未暫輟也。得其生者，合於純陽，升天而爲仙；得其死者，淪于至陰，在地而爲鬼。鬼物之中，自有優劣、強弱、剛柔、善惡，與人世無異。玉皇天尊慮鬼神之肆，橫害於人也，常命五帝、三官，檢制部御之

律令、刑章，罔不明備。而季世之民，澆僞者衆，淳源既散，妖詐萌生，不忠於君，不孝於家，廢三綱五常之教，自投死地，由是六天故氣、魔鬼之徒，與歷代已來敗軍死將，聚結爲黨，伐害生民，駕雨乘風，因衰伺隙，爲種種病，中傷甚多。亦有不終天年、罹其天枉者，尋於杜陽宮，出神呪經，授真人唐平，使其流布，以救於物，民間有之。世人見王翦、白起名，謂爲虛誕。此蓋從來將領，生爲兵統，死爲鬼帥，有功者遷爲陰官，殘害者猶居魔屬，乘五行敗氣，爲瘵爲瘥。然以陽威憚之，神呪服之，自當彌戢矣。今以神化、神呪二經，復授於子，按而行之，以拯護萬民兆庶也。即命侍童，披九光之韞，以神化經及三五大齋訣授之於纂曰：勉而勤之，陰功克克，真階可冀也。言訖，千乘萬騎，西北而舉，升遷上清矣。纂案經品齋科，行於江表，疫毒銷彌，生靈又康，自晉及茲，普蒙其福者，不可勝紀焉。

### 持齋

《無上祕要》云：昔有道士，持齋誦經。有一凡人，爲賃作治厨齋堂。道士見其用意，至日中持齋，因喚與同食。食竟，爲其說法，語此賃人：今隨吾持齋，功德甚大，可至明日中時復食，勿壞爾齋，徒勞無益，能如此者，將可得免見世窮厄。此人稽首，受戒而去。暮還家，其婦一日待婿，具以道士戒言喻婦。婦甚不解，遂致嗔怒。賃人不能免其婦意，遂壞其齋，與婦共食。其後命過，天使其人主蜀山千歲樹精，恒給其中食，其樹茂盛。暑夏之月，有精進賢者三人經過，依樹而息。賢者歎曰：此樹雖涼，日已向中，何由得食？此人於樹人曰：當爲賢者供設中食，無所爲憂。須臾食至，賢者共食。食竟言曰：我覓道，道在何所，此自然非道也。因問樹曰：不審大神，可得暫降形見，與其相面否？此人於樹，空中答曰：我非能使人得道者也，具記姓字處所，昔常爲道士，勸使持齋，爲婦人所壞，功德不全，致令使我

守此樹精，不能得出。天以我昔經齋中食，今每至中，給我齋食，口不暇食，又無緣得遷，欲屈賢者，爲至我舍，道我如此，能爲我建三日齋戒，我身便得昇天。賢者感此人意，爲尋其家，具以其言，語家人如此。家人即爲建齋，請諸道士，燒香誦經，三日謝過。此人即得飛行，昇入雲中，於景霄之上，受書爲散仙人。故齋之功德甚重，不可不修。此人半日持齋，死經一日，即時出身，不拘一年而得爲仙。故天計功過，明之不虧也。夫爲學者，可勤持齋戒，以期冥感。能修之者，必獲昇騰之舉。

#### 陰陽雜齋日

##### 三會日：

正月七日舉遷賞會齋、七月七日慶生中會齋、十月五日建生大會齋。三會日，三官考覈功過。宜受符籙，齋戒呈章，以祈景福。

##### 五臘日：

正月一日名天臘齋、五月五日名地臘齋、七月七日名道德臘齋、十月一日名民歲臘齋、十二月節日名侯王臘齋。

五臘日，常當祠獻先亡，名爲孝子，得福無量。餘日皆是淫祀。通前三元日，爲八解日，皆可設淨供奉福焉。

《明真科》云：甲子日、夜半時，甲戌日、黃昏時，已上天皇真官下日。

甲申日、晡時，甲午日、日中時，已上地皇真官下日。

甲辰日、食時，甲寅日、平旦時，已上人皇真官下日。

右其日修齋，五嶽四瀆神君各依方位，糾察善惡，無不上聞。

又丁卯日、日出時，丁丑時、雞鳴時，已上天皇真官下日。

又丁酉日、日入時，丁亥日、人定時，已上地皇真官下日。

又丁未日、日昃時，丁巳日、禺中時，已上人皇真官下日。

其日修齋，五嶽真人各遣五神營衛，記名仙錄。

#### 齋戒錄

（吳亞魁點校）

## 021 玄壇刊誤論

悟微子張若海集

經名：玄壇刊誤論。原題張若海集。一卷。底本出處：《正統道藏》正一部。

悟微子世參簪褐，業在焚修，三洞齋科，誠爲己任，因循而已。踳駁有疑，未遇通人，無所質正。一日，有霓襟雲帔者，云自天台四明而來，容止粹和，瞻視端肅，不言姓氏，稱雲光先生，誠方外逍遙之人也。儒釋該通，仍精三洞科教，由是捨策憩止，獲與之遊，且曰咸洛江湖、甌閩隴蜀、仙壇靈嶽，皆得徧遊。每見齋醮舊儀，不免倒置，子之習誤，能服義而改之乎？悟微子曰：小人顛愚，欣聞良訓，稽首作禮，幸得摳衣。凡蒙指疵，書諸紳帶，其玄壇謬誤，有二十品目，實前賢未曾商

榘，輒思流行，奉三天之法者目之曰：《玄壇刊誤論》，無或執迷而違義也。

### 論入靖品第一

雲光先生曰：凡修齋，三日前，道士入齋堂靖室，澡雪襟神，止息妄念，不履穢穢，不聽笙歌，端然一心，唯在齋法而已。今之道士預於齋官者，能孤潔無雜，常自默朝，造次昇壇，固無觸穢，猶於教法，須示規繩，雖云道德內充，亦在威儀外備，而苟非此輩，寧免混淆，豈可且在塵埃，暮登陞級，俾其自省，汝意安乎。若宮觀之中，不能三日，或一日、二日亦可也。俗家修設，一晝夜入精，其義且通。悟微子稽首曰：敬聞命矣。

### 重論入靖品第二

悟微子白先生曰：入靖之事，近多因循，苟能至誠，豈在預事。雲光先生曰：此乃庸俗道士欺謾庸俗之夫，非通論也。假如國家有事郊廟，其齋官太常卿，上至太尉，並散齋四日，致齋三日，受戒誓後，不吊喪問疾，不作樂，不判刑殺文書，不行刑罰，不親穢

事，不入妻妾之房。祭前一夜，都省鑱宿，明日御史清道。其所往郊廟之路，金吾司勒地界，禁斷師僧、孝子、喪車，不許觸污齋官，有瀆尊神也，況三清上聖乎？悟微子曰：若在官宅，即然。若在宮觀，道士各居靖室，豈俟齋時，方更入靖，得無自鄙耶？先生曰：不然。道士所居靖室，是寢止之室，非入靖朝真之室。今宮觀有精思堂、凝神堂、思微堂、存真堂者，即是入靖之所也。若就所居之室，即精思諸堂復設何用？悟微子曰：誠哉斯言，爾後敢不依稟。

### 論說戒署職品第三

雲光先生曰：說戒署職修齋前，若入靖三日，即於初日戒誓。若入靖一日，即於其日清旦戒誓。集道衆於法堂，玄中法師前啓靈寶自然朝，高功法師即宣揚戒誓，各令淨心，專於齋事，秉持教戒之旨也。然後署六職，各供其職，不得有闕。說戒署職畢，即監齋宣職狀後榜白於齋堂中是也。今睹修齋道士，當日齋集至夜，自玄中法師

前，齋主投詞，法師關告後，便昇壇行事。至重謝後，却轉洞案，說戒署職，此乃先行其事，然後署職，何倒錯之甚也。悟微子載詳斯禮，始覺前科之非，而今而後，得以遵行。

#### 重論說戒事品第四

悟微子屏肅，重白先生曰：今之重謝後說戒，其來久矣，一旦改革，豈有說乎？先生曰：是何言歟，是何言歟，事之不經，何必襲舊，復坐，吾語汝。夫朝真之科，與國家裡祀禮同，而香蔬殺醴有異。享前七日，太尉於都省集齋官戒誓，云某月某日有事，于某廟各揚其職，不供其事，國有常刑，苟致闕遺，祭後舉罰。未聞徹祭之後，方補齋官也。今道士登壇重謝後，是行一朝法事畢也，特地却重說戒，聽其戒詞，又非齋意。自說初入道披度，戒文次第乖違，庠序顛倒，良由昔人不能刊改，按用謬科，致使後來承此誤本。雖云道門高德曾經校勘，吾弗信也。一如王侯命官，豈可蒞事後方受簡牒。子但質於通論，必有尚理者，為吾攘臂

也。悟微子聞義，方悟前非。

#### 論發鑪品第五

雲光先生曰：發鑪者，即高功法師對三清秉鑪，關啓修齋之旨也。其詞云：无上玄元始三炁、无極大道、元始天尊、太上大道君、太上老君、自然玉陛下，然後云：臣今奉為大道弟子某官姓名，為某事修某齋，此乃法師面覲元皇之祖也，以上更無上於三清也，故不兼稱諸聖矣。今之修齋道士，稱無上三天玄元始三炁、太上老君，召出臣身中三五功曹、左右官使者，是令老君召出身中神也。又云當召此間土地，速出嚴裝關啓，臣今所為某人修某齋者，且法象三天，建立壇級，法師升壇，已在三天之上，對御啓奏之次，豈合方仗身神，喚召土地，證明功德，大不可也。未審土地之神，得上三清之壇否？兼云嚴裝，猶慮祕露也，真可笑哉。況道士受法錄者，九州社令一階尚不許入神廟，恐與鬼神不安。今召土地之神，登三清之壇，俾其何以安處？假如人臣朝對次，或令從者，喚街

吏市，胥預丹墀，證明功業，其可耶？其不可耶？悟微子鞠躬稟聽，慙汗沾渙，不知昔人之誤也。

#### 論方懺品第六

雲光先生曰：法師上十方香，是先降十方真炁，自下昇上，然後到上清至尊前。凡對三清啓奏，不兼稱諸天尊號者，所以尊三清而已，乃是土無二王，尊無二上者也。今之修齋者，宣詞及三上香後，却禮十方，兼之懺謝，此又非也無是。入靖時，道士以靈寶自然朝為諸齋之祖。諸齋法出洞玄靈寶部，所以為齋之祖也。

禮十方靈寶天尊，或兼懺謝，不在壇上，而在法堂也。其懺文，或以紙書，或以板札，安於十方香几前，不宜輒朝次宣讀，禱祝下方天尊也。而又更禮日月星宿、五嶽洞府、三河四海、九江水帝，及上方下方，並經寶等，亦有懺文，謂之二十方也。更向其中穿鑿，凡唱禮，禮東方九拜，南方三拜，西方七拜，北方五拜，四維各三拜，上方三十二拜，下方二十四拜，此不軌之甚

也。十方天尊與日月星辰，於三清前，猶可庶幾，五嶽水府之神，大不穩便也。五嶽又不禮海外五嶽，局見之甚也。假如人臣對君，有事啓奏，或有關宰臣者，須候退朝巡廳，詣宅啓白，豈可輒於對揚之次，迴首啓白宰相也。夫三清即帝也，十方天尊即臣也，天上人間，尊卑無異，宣讀方懺，於理未安。悟微子退思其言，高卑甚當，敢不遵聽也。

### 論去繁就簡品第七

悟微子白先生曰：方懺之言，既已聞義，但行之斯久，人其從之乎？先生曰：禮主於敬，不尚於繁，方懺之文，後人所述，雖詞華典瞻，首露周旋，豈令其上聖徘徊，待聽下方祈懺，非所宜也。昔者，季文子祭，繼之以燭，有司跛倚以臨祭，雖有莊敬之心，亦已怠矣。他日，子路預祭，始質明而祭，晏朝而退。孔子嘆曰：孰謂由也不知禮乎？此即多其簡敬也。今開三日道場，凡有十一朝法事，至於方懺，尚占九朝。齋主齋官，久立行事，跛倚壇席，其何以堪。但書懺文，一讀而已，

不猶愈乎。悟微子再白先生曰：或於九朝之中，每朝均讀可乎？先生曰：必不得已，須要宣文，即三日九朝之中，於重謝退朝之後，宣讀三兩遍亦可，只須更換懺文，不可三日之內，重讀舊文也。既不賒延法席，又不勞怠齋官，推此而行，有何不可？且禮非從天降，非從地出，酌人情而已，苟繁略有節，誰謂不然。悟微子拜手謝曰：從事於斯也。

### 論禮拜品第八

雲光先生曰：恭默心拜，不更煩文，凡屈伸跪起，內以心敬，外以形恭，內外相應，亦謂五體投地也。稽首者，一拜額至地。頓首者，亦是一拜，以頭頓地也。再拜者，兩拜也。通云稽首、頓首、再拜者，是四拜也。誠惶誠恐者，即是握簡曲躬，跣地兩過，捧簡長跪。少頃，又跣地兩過而止是也。今之修齋者，皆云誠惶誠恐、稽首、頓首、再拜，却只禮三拜，應數而已。故無首體投地之敬，迺遞相倣此，於禮甚虧。悟微子曰：而今而後，奉而行之。

### 論轉經品第九

雲光先生曰：夫經者，太上所說，人之所稟持，或修之於身，或修之於國，此乃奉經之旨也。凡修齋轉經，本在法堂內，法堂即宮觀正殿，後有說法堂，中列經寶，左列玄中法師，右列天師。若在宮宅，即對壇場後鋪設，供養三寶，便爲法堂也。左右列師子座兩所。每登壇退朝，即高功法師與齋官於堂開啓經文畢，即都講與侍經昇座，演暢經義，開示未悟也。故《侍經簡文》云：衛師子之兩座，即其旨也。今之修齋者，每朝奏罷，却於壇上唱禮轉經，甚無謂也。又開經前有呪誦，是法師存思密念而已。今道衆不候法師存念下次，輒便厲聲朗誦，不其乖乎。悟微子謹佩良訓，不敢失墜。

### 論勅壇品第十

雲光先生曰：勅壇者，本是勅水也，降五方五龍真氣之水，解除穢穢也。在宮觀靈壇、神仙福地，即勿用禁勅，自有靈官護衛，何邪穢之解被？所慮營備齋物，及人物往來，惹諸穢氣，或須行解也。若在宮宅修齋，即宜全

行解禁法事，但請降五方五童君真氣是也。今之修齋者，須云東方青童君身長九千萬丈，從官九千萬人南西北方，皆法方氣又何勞定其長短，拘其人數也。又云飛仙神仙、日月星宿、三河四海，兵馬各億萬騎，又何多也。尺云可蓋屋三重，遶壇三匝，何三清玄壇，既設臨時，方役靈官蓋屋也。又云上張天羅，下布地網，何三清壇上，更張羅網也。鄙猥之語，爾其去之。悟微子豁然，拜手稟命也。

#### 論醮壇品第十一

雲光先生曰：醮者，祭之別名也。肉食謂之祭，禴食謂之醮。凡修齋，上至三清上境，次乃十極諸真，下及五帝三官、神仙靈官之屬。三日三夜，香燈旛花，列位供養，何散齋之日，而又用酒醮靈官也。若行之於未散之前，且爽尊卑之禮；行之於既散之後，又妨導從之儀。天真既預於齋醮，靈官豈須於酒醮，但於散席之日，就靈官位，供養醮饌茶湯即是也。通鑿之士，無或致疑。悟微子曰：以酒爲醮，行之

既久，頓廢可乎？先生曰：若單設醮席，自有科儀，與齋法本殊，不用酒脯，又何嫌也。然齋壇靈官三日，受香飯之供，豈宜不隨軒駕，遲留破齋，求之俗人，尚猶不可，所務允當，勿信凡庸。悟微子受教，永永稟佩。

#### 論三晝四夜品第十二

雲光先生曰：凡修齋，云九時行道者，三晝四夜也。兼言功拜表，都十朝也。九朝，即第一夜，至明日五更及齋時，第二、第三日，各是三朝，凡九朝也。至第三夜一朝，號言功法事。至第四日五更，爲拜表荷恩法事，共十朝也。今修齋者，行十一朝法事，又都不分別言功、荷恩之禮，至第四日，又讀無上齋詞，云表白散齋，此乃十二朝也，何重疊之甚乎？悟微子曰：小子鄙懵不知，仰荷開示。

#### 論唱道及登壇品第十三

雲光先生曰：凡修齋逐朝，登壇之前，法師與官班立於玄中法師前，高功法師啓白後，都講唱：道場衆等，人各運心，歸命三寶，讚詠行道。其所唱

云人各運心者，即是令法師齋官，運心玄極，注想宸嚴，旨在默念冥思，且非齊聲競念也。今之修齋者，不原都講所唱之理，不依注想運心之規，厲其音聲，念其功德，至於聖真品位罔問尊卑。而又每登靈壇，元自地戶昇旋，行至上級，朝退即自天門降之。今之齋者，昇自地戶，降自地戶，了不履於天門，不唯靈官所誅，抑乃識者所誚。悟微子稽首，謹佩明言。

#### 論齋粥前後誦念品第十四

雲光先生曰：凡登堂赴坐，或齋或粥之前，先行淨，後行香。然舒巾畢，供物。至都講聲磬者三，法師默念出生呪畢，復聲磬二次，乃齋也。齋畢，又聲磬三。都講吟爲諸讚，及迴向功德。讚畢，即齋官起也。今之修齋者，於齋粥後，又念功德，上至三清上尊，次及五帝、三官、真仙、神仙、靈官之屬，抑又過也。且齋官每登壇朝奏，莫不俯仰兢兢，衣冠濟濟，對敷宸極，尚慮虧儀，豈可於端坐飽食之間，念上聖天真之號，仍云念斯功德，回福齋

家，即不知晝夜朝修，功德何在，須俟飽飫，復念聖真，唯知數彼釋徒，罔畏掇其天譴。悟微子頓覺前誤，俯伏謝之。

### 論齋主心詞品第十五

雲光先生曰：凡修齋一晝兩夜，或三晝三夜，或七晝七夜，並須詞文逐日更換，在齋意即不殊，於詞言須各別，不可遍遍宣讀元上詞文也。初建齋，一詞述其大綱，所爲意度，未可便祈禱也；次一詞，方露禱祈意旨；末一詞，首謝洩贖聖聽，及荷恩之旨也。今之修齋者，不計日數，即執一文，重重宣揚，得不撓於聽覽也。譬如世之帝王，臣下有事騰奏，或一表再表，只用舊詞可乎？比之一人，尚猶未可，論及三寶，其何以安？悟微子扣頭作禮，誓稟明訓。

### 論教化法式品第十六

雲光先生曰：教化法式，聖人之垂範者也。教者，教也；化者，變也。謂敷弘太上之教，廣變人天之化，教化既布，即有法式。謂軌則制度也，法式既立，

即有科律。律以檢行，科律既立，即有禁戒。戒以檢心，禁戒既立，即有威儀。有威可畏，有儀可象，威儀既備，即俯仰進止，序雅步，存真念道，登壇朝奏，禮拜稽首，動無虧闕，方合教化法式也。且夫弘妙有之教，合虛無之理，豈可不稽典誥，而肆胸襟也哉。悟微子頓首稟命。

### 論凡修齋用樂品第十七

雲光先生曰：凡修齋行道，謂之朝禮，禮既行矣，樂亦備焉。夫樂奏之圓丘，天神降奏之，方澤地祇昇，鼓之以和八風，播之以正四序。行禮作樂者，所以通天地而交神明也。謹按仙書，玉京山諸天仙聖衆，奏鈞天廣樂，鼓雲璈，吹赤簫，鸞歌鳳舞，霓幢羽葆，燃香捧花，步虛讚詠，旋遶天尊，即其事也。今之郊廟登歌，皆述祖宗之德，別無他詞。若以尋常之詞，不可揚于王庭也，而況玉皇上帝之前乎？悟微子曰：今之殿庭，廣陳雜樂，巴歌渝舞，悉參其間，即人間小詩，安得不播於步虛哉？先生曰：帝王宴羣臣，號曰示慈惠，尚有觀優之樂，巴歌下節，

悉可敷陳，若郊廟之詞，無非典雅，豈容鄙猥，預於登歌，何況上帝天真之前，而用凡俗之語，斯不然也。悟微子聞義而退。

### 論露壇品第十八

悟微子白先生曰：壇上施屋，號曰衆妙臺，亦號虛皇臺，廣成杜先生論之備矣。然古者宮觀，皆是露壇，今之國家四郊，亦是露壇。雖有改張，曲不合古，請垂開示。先生曰：杜公之論，吾無間然。但國家諸壇，祭享有時，雨露失容，其禮即廢。今之宮觀，本爲衆人或力辨建修，遇雨而廢，即於齋主，豈不重勞，但能精誠上通，何患重簷所障。露之與蓋，兩不相妨。悟微子審聞斯言，誠吾心也。

### 論坐立功德品第十九

悟微子白先生曰：今之宮觀，三尊同殿而坐，乃至三官、五帝，悉皆塑坐，若並令侍立，其義可乎？先生曰：坐立之儀，不難辯白。宮觀之內，各有院宇。譬如人世帝王，自有正寢，三公四相，各有廳事。至於百執事，皆守司

存，既非趨朝，何必拱立。若當臨軒之日，列班而趨，豈容宰相、三公，相向而坐。吾所謂坐立之儀，不難辨白，正在斯乎。但以宮觀之間，木雕泥塑臨時坐立，不可改更，若是繪畫，一壇功德，並宜立侍，即尊卑之禮，有叶人情。悟微子稽首聞命。

論齋宴儀品第二十

悟微子白先生曰：今之帝王宴會，百執事皆得預坐。安有三清齋席，須令拱立乎？先生曰：人世趨朝，司儀辨等，與夫朝拜三清之禮，其事正同，此謂朝也，非謂宴也。既設齋饌，即退朝就食，又何所妨。但三尊前，不得不侍立也。質於通鑒，方諒斯言。悟微子默然而退。或謂悟微子曰：齋醮之儀，相傳已久，今之駁雜，雅合是非，但慮浮淺之夫、鄙猥之輩，尚執妄說，不信格言，其如衆口因循，久安舛誤，吾子所稟，殆難行乎？答曰：吾得之於通方道人，質之於博學君子，既曰允當，豈恤人言，苟上合於天真，又何憂於俗論，幸希玄鑒，無致詆訶。時天

福八年上元日，於長沙紫極宮寫札，傳於同道，庶幾刊誤，免貽議於識者，開吾徒蒙悛也。

玄壇刊誤論

（吳亞魁點校）



## 022 三洞修道儀

經名：三洞修道儀。五代宋初劉若拙撰，宋孫夷中編。一卷。底本出處：《正統道藏》正一部。

夫道以元精一氣，陶育三才，爰及萬物，有情無情，咸稟此氣。得之者，外可以輔元化，內可以登至真；昧之者，反淳以爲漓，攬清以爲濁，汨亂神性，淪爲下鬼，何神仙之可冀乎？雖大象無形，不可得於視聽。然悟證者，實資於傳授。按《上清大有妙經》，至道始自玄聖，傳與神真，神真傳與靈仙。此三真，口口相授，未有文字。至赤明開圖，方著文篆。迨龍漢延康，漸降靈寶。金闕玉格，自是乃睹出教之科文。此時，太平、靈寶，行於諸天，洎列紀君，始傳於黃帝。靈寶既隱，封五符於鍾山。至大禹理水受之，疏達之後，復

藏之於石碯震水，所謂靈寶或隱或顯是也。後聖黃老帝君，傳洞神經誥、符圖，號黃老道德於世。世之隱逸者，默修其道，洞神漸替。東漢末，三天法師張君，方受太上正一科法，先是蜀當鬼宿之分，下有二十四治陰司，以調二十四氣。北邙一治在洛陽者，以伊闕爲陸渾戎地，以鎮陰都也。後爲六天魔鬼占據，號曰鬼營，天師以正一法而降制焉。至今列爲陰局，鬼爲陰吏。天師之裔，世傳一人，即信州龍虎山張家也。大約此教盛於吳蜀，迄于魏世，有嵩嶽寇謙之天師，復大弘闡歷于唐季。其間道業彰灼者，江左即有，若簡寂先生陸公修靜，中宇即有，若隱真趙先生、潘天師、澄源李先生、司馬天師、宗元先生、吳天師、牛先生、葉孤雲、葉廣寒二天師、希和李先生，皆傳教之光明者，具載道門七葉圖。其於枝分脉散，不可勝數。李氏革隋，太上告以受命之符，由是尊祖奉冊，與國同休。故得芝壇藥殿，羅布四裔。三洞科格，自正一至大洞，凡七等，錄有一百二十階，科有二千四

百，律有一千二百，戒有一千二百，仍以四輔真經以佐之。爲從凡入聖之門，助國治身之業。五季之衰，道教微弱，星弁霓襟，逃難解散，經籍亡逸，宮宇摧頽，歸然獨存者，唯亳州太清宮矣。次有北邙、陽台、陽輔、慶唐數觀，尚有典刑、天台、衡湘、豫章、灕嶽，不甚凌毀，山東即鄰於掃地矣。鄙以頑固，粗通道教，嘗遇至人，勗以整綴從事，荊州難得經書，每想台嶠融峰，恨無羽翼。癸卯歲，有陽臺道士劉君，名若拙，曳策南來，延於所居。劉君精熟法教，因得口授入道儀式、冠服品位，編爲一卷，聊備所闕，他年更睹大教，別俟校勘之。是歲九月二十六日，荆南葆光子孫夷中集。

### 初入道儀

凡初欲學道，男七歲，號錄生弟子，女十歲，號南生弟子，始授訓師門，性行稍淳，與授三戒、五戒，漸止葷血，自此後，不更婚嫁。如已成夫歸者，男稱清真弟子，女稱清信弟子，常依科齋戒，兼行黃赤交接之道，能便斷得，即

為佳也。其童男女秉持，至十五歲，方與詣師，請求出家，捨俗者，不拘少長。稟承戒律稍精，方求入道，誓戒三師，稱智慧十戒弟子，戴二儀冠，黃綬衣七條，素裙七幅，鞞鞋而已。次遷經法於十部大乘之內，精一帙業成後，授初真八十一戒。授竟，及保舉戒師七人，稱太上初真弟子，號白簡道士，冠七真冠，披黃褐文，左九右十，白裳黃裙九幅，檀香木簡玄履，鋪黃坐壇，始入靖誦經，思神行道。次後不選年代，經業轉精，明鍊法式，方參洞經，初詣三師、保舉五人，請授正一盟威錄、二十四品。正一部中，別有一百二十階，總出黃道枝葉，是陰教，輔助太陽也。正一天師子，嗣師諱衡，系師諱魯，散行此法，皆是鍼藥符術禁呪之道，小求福祐，以療生民，即今世上所行雜法。亦有錄文，非上真所修，所謂白黑道也。此中言黃赤者，即陽道之法順行也，法象天地，制治萬神，陰陽律曆之候，人鬼區分之序，上禳天災，下助王化，俾帝王延期益筭，反樸還淳。其次大地生民，能奉此道者，可以洗心畏罪，免其天橫。其有夫歸者，今選時日，順陰陽，行交接，即所育男女，免感悖戾淫濁之氣，亦欲令其保身愛精，不妄貪淫。乃上聖慮愍拯濟之方，使並屬正一部中之所行也。授正一錄後，方可以

為人章醮，為帝王封署山嶽，辟召妖毒，朝拜星辰，以銓律候，稱太上正一盟威弟子，係天師某治某氣祭酒、所稱治氣者，取生月生日，所主不同。赤天三五步綱元命真人臣某。凡道士未受經法，通稱小兆可也。冠玄冠，朱帔二十四條，黃裳蒼裙，佩炎光火玉佩，帶斬邪威神劍，佩黃神越章印綬，木雕鋪八卦壇。所授經業：正一法文經一百二十卷，大章三百六十通，小章一千二百通，朝天醮儀三百座，修真要十卷，玉經三卷，指要三卷，太靈陰陽推遷曆六十卷，禁呪文五卷，按摩通精文三卷，修元命真文一千字，禹步星綱一卷。以前正一所行，皆在三界內。所言十部大乘者，多述罪福冤對，說有說空。凡一千卷已來，修正一道成，告白真官，遷齋上室。

#### 洞神部道士

自正一授金剛洞神錄，此乃上三皇法，非此劫三皇。稱太上洞神法師。如捨俗入道者，自此夫婦隔絕，不茹葷血也。冠交泰冠，絳褐黃裳，丹裙玄履，執白簡，佩青光玉

佩四道，帶皇極洞神印綬，佩陰陽斬魔劍，華陽巾，方勝帽，坐九宮辰象壇，參洞神十二部經。

#### 高玄部道士亦云高上紫虛

自修洞神，有功後遷，授太上高玄錄，稱太上紫虛、高玄弟子、高玄法師、遊玄先生，臣某姓名，冠五嶽冠，碧帔三十二條，白裳，黃裙，玄履，執長生木簡，坐四氣壇，素光丹纓，佩帶五老交真印綬，佩金剛洞清劍，戴籠秀巾，咸昌帽，參究《道德經》、《西昇經》、《玉曆經》、《妙真經》、《寶光經》、《枕中經》、存思神圖、太上文節解、內解、自然齋法儀、道德威儀一百五十條、道德律五百條、道德戒一百八十三科。

#### 昇玄部道士

自高玄部遷授太上昇玄錄，稱太上靈寶昇玄內教弟子、昇玄真一法師、無上等等光明真人，臣某姓名，冠芙蓉冠，綠帔四十二條，素裳，丹裙，玄履，白簡，素文壇，逍遙巾，月紗帽，參授《昇玄錄》一卷、昇玄誓戒三百條、《明真科》三卷、《玉匱律》三卷、昇天券一

道、《昇玄朝禮儀》一卷、《昇玄經》十卷。到此觀六度梵氣，即三界外上清境，非同釋氏梵天也。

### 中盟洞玄部道士

自昇玄遷授中盟錄九卷，計二十六階九券、思微定志券、金馬驛程券、五帝解形券、自然券、大明券、三皇券、水官解七祖券、昇天券、解地根券，稱太上靈寶洞玄弟子、無上洞玄法師、東嶽先生、青帝真人，臣某姓名，戴遠遊冠，五色紫帔，絳綃裳，丹青裙，朱履，五辰紫色壇，青玉交文佩，佩八景金真印，帶陽光洞神劍，服朝天帽，即舊呼南朝帽也三辰巾，參靈寶洞玄經一十二部。

### 三洞部道士

自修洞玄部，遷授三洞寶錄、二十四階，計二十四卷，券亦二十四道，金鈕九雙，銀環一十二對，金龍一對，玉魚一對，玉龜一，玉馬一，蒼玉簡一，黃玉簡一，玄玉簡一，龍頭金刀一雙，稱三洞法師、東嶽青帝真人、昇玄先生，臣某姓名，冠合景冠，青霞帔四十九條，丹光裳，黃裙，朱履，坐召真壇，黃玉佩，

三辰印，銷魔劍，服綠華巾、五嶽帽，授三洞經教、九真科法。自此明鍊所業，弃諸有爲，動合真妙，方遷大洞上法。

### 大洞部道士

自修三洞法後，次參上清金闕，清精選法，應爲得道者，稱上清大洞三景弟子、無上三洞法師、東嶽真人、道德先生，臣某姓名，冠紫宸通精冠，九色離羅帔，紫裳丹文裙，執瑤笏，朱履，坐震靈壇，佩九光玉佩，帶無上畢道印綬，帶景精劍，服黃寧帽，授三官解祖考契、斷地根券、昇天券、五帝大魔合保舉券、三十二天帝君識功券、飛步諸法、金丹大訣。自此，以畢法相次傳與世之學道者，一世傳一人，昇黃壇，告九天，歃血歃，即取自身血也。分券斷契，以金魚玉龍、赤玉珪圓瑤，告誓萬靈，方傳上法。傳法之後，始有迴車之道，功行圓滿。與弟子告别，造素木車一乘，弟子親侍，駕旋掃車，跡入所在名山修行，至山門谷口，方焚此車。從此師一向修金闕後聖飛昇之道，此出三界也，永不入世間也。

### 居山道士

居山道士，冠平氣冠，山水雲霞衲帔，黃布裳、布裙，白履、草履，坐七星壇，佩二禁印，東西二禁伏神劍玄巾。此所行之道，各據所得，自務幽寂，不救世人，教文所謂山林寒棲道士也。

### 洞淵道士

此道，稱三昧法師，冠通玄冠，青文帔三十一條，丹裳、黃裙，玄履，執簡，坐黃文壇，佩洞淵五部印，帶洞光劍，所行洞淵三昧法。其法，上辟飛天之魔，中治五氣，下絕萬妖，亦多救世也。

### 北帝太玄道士

此道，稱上清北帝太玄弟子，冠星紀冠，玄羽服，白裳，黃裙，玄履，坐召靈壇，執簡，佩酆都印，帶斬鬼劍，授《北帝錄》二卷、《伏魔經》三卷、《天蓬經》十卷、《北帝禁呪經》三卷、《飛玄羽章經》十卷、《北帝降靈召魂經》三卷、《北帝雷公法》一卷、《酆都要錄》三卷、《傳鬼策》三卷、《北帝三部符》一卷、《北帝朝儀》一卷，治六天鬼神、辟邪禳

禍之事也。

### 女官部

其儀式，參授諸法錄，與男官一般，參大乘經法者，稱太上全真女弟子，臣某姓名，冠三葉玄冠，服關霞十二條，裏青，表黃有帶繫右肩，素裳、黃裙，握節鞞鞋。

### 正一盟威女官

稱玄都正一盟威女弟子，係天師君門下、某治某氣、赤天三五步綱元童，臣某姓名，冠洞陰冠，黃霞帔二十四條，紅文裳、黃裙，玄履，執簡，坐八卦壇。所謂赤天三五者，大凡日月運行，皆依黃赤二道，號曰二景。凡真人掌黃赤道事，以正陰陽，用日月星宮為治所也。更有白道法，自月一日至望，為白為明；自十六日至晦，為黑為暗。道民或求小小福祐，以白即祈月，以黑即祈星，於是有黑白之道、黑白之說。此二道，卑於黃赤也。

### 洞神女官

稱太上洞神女弟子、洞靈元妃，臣某姓名，冠朱陽冠，朱帔三十二條，黃

裳、丹裙，玄履，執簡，坐九宮壇。

### 高玄女官

稱太上高玄女弟子、紫虛童君，臣某姓名，冠遊玄冠，黃褐、碧裳、素裙，玄履，執簡，坐青壇。

### 昇玄女官

稱太上昇玄女弟子、無上內教真一靈真妃，云小真臣某姓名，冠四玄冠，碧霞帔，黃裳、丹裙，玄履，執簡，坐綠壇。

### 中盟女官

稱太上靈寶洞玄女弟子，亦稱洞玄法師、東嶽夫人，臣某姓名，冠芙蓉冠，紫褐、碧裳、丹裙，執簡，佩陽光劍，白旒珠，佩三道元虛印綬，坐五氣壇。

### 三洞女官

稱上清三洞女弟子、無上三洞法師、東嶽蒼靈夫人，臣某姓名，冠連雲冠，朱褐、青裳、綠裙，玄履，執簡，坐四神壇佩，青玉佩，白旒，帶三洞印綬，九真劍。

### 上清女官

稱上清大洞三景女弟子、奉行無上三洞法師、東嶽蒼靈元君，臣某姓名，

冠玄靈飛鳳冠，五色雲霞帔，青裳、紅紗裙，朱履，坐震靈壇，執簡。其於迴車入山之法，一切與男官同。

### 居山女道士

稱大道女弟子，臣某姓名，冠二氣冠，衲帔二十四條，青絹裳、黃布裙，草履，坐八景壇，執簡。

### 三洞修道儀

(吳亞魁點校)

## 023 太上出家傳度儀

左街都監同簽書教門公事  
崇德悟真大師賈善翔編集

經名：太上出家傳度儀。宋賈善翔編集。一卷。底本出處：《正統道藏》正一部。

引弟子於大道前，禮三拜，上香，度師祝香。

以今焚香，供養三清上聖、十極高真、玉皇大天帝、紫微天皇帝、紫微北極大帝、后土皇地祇、聖祖天尊大帝、元天大聖后、三十二天帝君、十神太一真君、十一曜星官、天地水三官、南北二斗星官、四方二十八宿星官、四聖真君、三元真君、玄中大法師、經籍度三師、正一真人、五嶽聖帝、儲副佐命大洞仙官、三十六洞天仙官、七十二福地、三十六靖廬、二十四化仙官等，

四瀆源王、四海九江水帝龍王、地府酆都北帝，出家弟子本命星官、宮觀里域真官、天曹地府、一切威靈，今辰謹有某人弟子某人，幼離俗網，早慕真風。今蒙國恩，許圓道相，啓壇場於茲旦，服冠簡於昌時，庶竭焚修，上報真聖，仰冀三境慈尊、十方真宰、天曹地府、一切聖賢，曲賜證明，少延飄馭，稽首皈依無極大道。

次度師於三師前，設案坐。華夏引弟子禮度師三拜，面北長跪，聽說出家因緣。設香花供養，度師上香。

謹按《真一本際經》云：爾時，青童君問出家之法何如？天尊曰：夫出家者，義趣甚深，利益洪遠。出家有二種：一者恩愛，二者諸有。始學之人，既值明師，志能勤苦，執事奉承，餐受妙訓。若在居家，父母、妻子，愛累相纏，如處囹圄，不得自在，適意從容，遠近隨師，詢請玄業。故告父母，請別妻子，捨離居室，遠遊山林，依憑道舍，棄俗服玩，黃褐玄巾，捨世榮華，隨緣告乞，廣建福田，惟道是務，是名初出恩

愛之家。既出家已，勤行齋戒，免離三塗，信根已立，學靜入室，離三界愛，登入九清，是名出諸有之家也。

青童君曰：我今乃離三惡道，願得出離諸有家，不知何者名立正教？

天尊曰：若有經文，具十二部，應三洞者，是名正經。目此之外，須辨邪正，方可受持。當自請師，審定分別。青童君聞是說已，歡喜踊躍，稽首而退。自是及後，凡出家之人，既辭恩愛，來入法門，當發神仙行願，貴在自利利他，屏去兇心，惟生善念，敬上接下，動止柔和。每遇設像，諸聖諸真，諦信不二。晨香夜燈，圍繞贊歎，五體投地，禮拜供養。惟冀今生、來世，與道有緣，月帔星冠，雲軒羽駕，名利九天之上，位居三島之中。且金簡玉書，不容妄度，五逆十惡，穢雜下流。若違明科，度師獲罪。而況太上垂經，天尊說戒，遇人不度，殃及己身，非人而傳，禍延祖考。所以法門傳授，戒慎爲先。今汝道心深重，得生中華，仍捨業緣，乃趨真教。

謹按經云：人身難得，中土難生。假使得生，正法難遇，多迷真道，多入邪宗，多縱罪根，多諸巧詐，多恣淫殺，多好羣情，多愛貪嗔，多沈地獄，多失人身。如此等緣，衆生不悟，不知正道，迷惑者多。我今哀見此等衆生，故垂教法，爲說良緣。令使知道，知身性命，皆從道生。了悟此因，長生人道，種子不絕，世世爲人，不生無道之鄉，不斷人之根本。更能心修正道，漸入仙宗，永離輪迴，超昇三界。汝既以難生而生，難遇而遇，不迷真道，不入邪宗，不縱罪根，不爲巧詐，不好淫殺，不愛貪嗔。如此則骨相合經，堪爲法器，傳經演教，佐國度人。今遇良辰，圓具道相，當知此出家因緣，勿生疑惑。苟有異志，即爲下鬼。汝其諦聽，戒之慎之。

今再白：汝今出家，一人有慶，九祖沾恩。況汝骨氣通仙，神情合道，慕清虛之聖境，脫穢濁之樊籠，願效鴛鴦，永歸真聖，澡雪形體，褫裂俗裝，先爲召百靈監度，五帝證明。冀汝名書

玉簡，體掛霞衣，便隨羽客以朝真，早獲仙丹而出世。今宜先禮帝主，次別慈親，後成出世之高人，永作登真之上士。而今而後，只可朝真禮聖，不可享鬼拜邪。凡所立功，先資家國。今於庭下，拜辭以俟披度。

次引弟子於庭下，北向禮帝王。

汝欲窺衆妙，將悟重玄，當脫縫掖之衣，即被彩霞之帔，永參玉帝，上謝人君，便長遂於逍遙，更不須於趨折。教起金母，勅自軒皇，宜北向禮皇帝四拜。

次謝先祖。

汝由先祖積慶，福及後昆。故捨繁華之緣，來持清淨之教，惟憑焚誦，以致薦修。每逢奠祭之時，輒修拜跪之禮，宜望先隴四拜。

次辭父母。

汝自違甘旨，來入法門，雖辜罔極之深恩，蓋慕無爲之妙道，庶持經法，以報劬勞，由此拜辭，有違定省，宜辭父母、叔伯、兄長，各四拜。

次辭親知朋友。

汝久侍巾瓶，致疏交友，息芳春之駘蕩，樂清境之追遊。今披羽衣，不復俗禮，宜辭親知朋友四拜。

次華夏引弟子至三師前立，知磬請三師法事。

次三歸依。

次弟子長跪，具白刺自陳。如念不得，以木簡寫，如不用簡，紙亦得。

某伏念螻蟻穢質，不自揆量，輒罄愚誠，願親衆妙。茲者幸承睿旨，許具冠裳。今就度師，虔請教戒，庶從願念，不敢有違。苟違明科，不辭陰譴。某誠惶誠恐謹言。禮三拜訖，即立。

次度師讀白文。

恭以三洞垂文，七真演教，咸令披度，得入妙門，功德難思，天人稱慶。斯乃從凡入聖，階淺及深，名奏天曹，身居仙列。苟非宿命，寧合因緣。汝既自陳道心堅固，當報四恩，三有以悟，獨立重玄。今則百靈降格，萬聖傾光，直須默運虔誠，無致褻慢。宜請保舉二師，爲脫俗衣，以圓道相。

次保舉師與脫俗衣，先著履。度

師讚云：

汝先足躡雙履，永離六塵。經云：千里之行，始於足下。此一步，爲初之意也。願汝一心奉道，履踐靈壇。凡所行遊，不步凶惡之地，常登法會，逕陟仙階。每遇二漏之時，即須改換。

次繫裙，度師讚云：

裙者，羣也。以羣統爲意，羣於道友，統以清淨。又謂之裳，蓋在上爲衣，在下爲裳，以表守謙下爲常行之法，則能如是者，災害不生，諸聖佑護。

次著雲袖，度師讚云：

輕剪黃雲，裁成法服，上以襯霜羅之帔，下以統飛霄之裙，爲中道之衣，不可須臾離體。

次披道服，度師讚云：

道服者，乃天尊老君之法服也，真聖護持，人天讚仰。既沾於體，當自欽崇，可以滅三世之愆，尤可以令九先之超度。行住坐卧，常須護持，不可置之穢器，不得雜之以俗衣。苟不如是，當招惡報。

次知磬舉仙衣讚：

上界神仙服，天寶自然裳。輕盈六銖妙，佩服齊三光。願今一披奉，逍遙不死鄉。

次頂簪冠，度師持於手中，讚云：

汝頂星冠。冠者，冠也。一身之上，最處崇高，總括衆髮，斗星燦爛，岳勢巍峨，像列真之朝元，作三洞之妙士，不爲臣妾，蓋假於茲。宜其晨夕護持，勿令塵埃染汙。如自輕慢，則天曹奪筭。念茲在茲，則神仙可冀。

次令弟子就坐側長跪，度師與戴冠云：與道合同三遍。

次知磬吟星冠讚：

煥耀七星冠，翩翩降自天。授之有科戒，宿命應神仙。願今一頂戴，永保大椿年。

次執簡，度師讚云：

夫簡者，以簡事爲言，收心斂意爲用。簡則心專，持則有守，瞻星禮斗，祝聖朝真，爲道法之面容，作人天之儀範。能如是者，方獲執持。

次知磬舉三啓頌。

次度師說十戒，弟子長跪。

夫戒者，止惡防非，護正摧邪，無令傲忽，弗敢輕侮。今授汝十戒，以護身心，諦聽受持，不可懈怠。

第一戒者：心不惡妬，無生陰賊，檢口慎過，想念在法。能持否？答云能，下同。

第二戒者：守仁不殺，憫濟羣生，慈愛廣救，潤及一切。能持否？

第三戒者：守正讓義，不欺不盜，常行善念，損己濟物。能持否？

第四戒者：不貪不慾，心無放蕩，清潔守慎，行無點污。能持否？

第五戒者：口無惡言，言不華綺，內外中直，不犯口過。能持否？

第六戒者：不得嗔怒，調和氣性，神無所傷，不犯衆惡。能持否？

第七戒者：不嫉人勝己，爭競功名，每事遜讓，退身度人。能持否？

第八戒者：不得評論經教，訾毀聖文，躬心奉法，常如對神。能持否？

第九戒者：不得爭競是非，評論四輩，天人咎恨，損傷神氣。能持否？

第十戒者：舉動施爲，每合天心，

常行大慈，普度厄難。能持否？

天尊曰：戒有二種，一者有得，二者無得。有得戒者，三戒、五戒、十戒、二十七戒、百八十戒、三百大戒，止惡防非，未達方便，名有得戒也。止離三塗，及人中苦，未入道分，若識識法，畢竟空寂，是名正戒，無持無犯，開正觀門，爲道根本，此名出家持戒也。

次舉智慧頌。

次聽度師教戒，弟子長跪。

汝既圓道相，初入法門，自今已後，語默動靜，常須念道、念經、念師，名曰三寶，作汝皈依處所。

夫念道寶者，能制滅一切惡相。猶金剛刀，無所不斷；猶如猛火，無所不燒。念有二種：一念道身，七十二相，八十一好，具足微妙，人間天上，三界特尊，是我歸依覆護之處。二念法身，猶如虛空，圓滿清靜，即是真道，亦名真身，亦名道性，常以正念，無間餘心，是名念道。

其次念經寶者，有三種：洞真、洞玄，及以洞神，係心受持，常生信慕，存

想不移，審知是法，是出世道，無他雜念，是名念經。若知諸法本無文字，正觀實相，達其旨趣，亦名念經，是名善解念經之相。

其次念師寶。師寶者，父也。我若無師，不能得道，是故應當遠近隨逐，心眼觀想，常在目前，不替須臾，無諸雜想，是名念師。三念既已，當上報四恩：一天地恩，二國王恩，三生身父母恩，四師長恩。次當下資三有：一資天徒，二資地徒，三資水徒。汝當發大善心，晨香暮燈，誦經行道，於諸大道前，旛花果實，禮拜供養。上願皇帝萬歲，家國太平。次願生身父母、九祖先亡，幽顯沾恩，己身得道。次願師尊長壽，法屬興隆。次願十方信施，常蒙道廕。次願江山朋友，學道知音，早遂初心，光榮門族。次當誘化一切有情，令於三清諸聖，結大善緣，或建宮觀，或造經像，或度出家法身，此乃自利利他，功德無量。常須柔弱，不得剛強。經云：柔勝剛，弱勝強者是也。凡朝禮時節，開靜即起，入靜即息。對諸大

衆，不得高聲，舉步安庠，慎勿粗行。苟非病患，不得飲酒茹葷。每遇齋筵，慎勿語笑，疊足端坐，令人天敬仰。接見賓客，先自和顏，貧富貴賤，各隨其心，方便應對，不得輕於貧賤，而奉富貴。裙褐冠簡，鞋履襯袖，務在潔淨，勿要鮮華。又不得殺一切物命，每見人殺，當須勸誘。他人有短，慎勿言之，縱有陰私，亦勿舉訐。若違此戒，身謝之後，永墮惡趣，餓鬼畜生，受諸苦報。良朋善友，常須親近，凶徒惡黨，輒勿交遊。又不得奉事鬼神，學諸邪法，不惟泯黷清靜之教，抑亦自招陰譴。或登靈壇，或預經席，秉簡端謹，如對君父。晝夜便旋，不得向北，當解裙褐，以就掩隈，仍避神祠，及諸尊貴，事已淨手，方拈法服。忽見師長，及尊宿煖帽，方巾逍遙，急須撤去，罄折問訊。常懷慈憫，拯濟危急，勿貪名利，勿畜貨財，勿攻異端，勿習幻術，勿捨吾教，妄親別法，勿生健羨，以破道心，此爲修行之要也。一動一靜，當依十事威儀，即無違科背律之譴。汝既出



家，紹隆教法，將入衆妙，與道合真。當須屏去三惡，洒落六情，勸人忠孝，勸人樂善，不得陰謀，不得是非，不得訕謗，不得色慾，不得輕慢，不得以強凌弱，不得以勢欺人，不得竊盜三寶常住及諸尊像、衣冠服色，竊之，即眉鬚墮落，足跛手攣，死入寒泉，受種種苦報。常孝順師尊，及汝父母。見男官、女冠法身，遞相供養，勿生彼我，當異骨成親。服飾售用，及諸五穀、蔬茹等物，常宜愛惜。見男弟子、女弟子，常須演經化誘，入我法門，令悟重玄，朝禮聖真，五體投地。侍奉師長，旦夕問安，出送入迎，稽首珍重。持守清淨，恬淡無爲，不以富貴聲利輒動身心，宜行陰德，以作今世、來生因果，冀遇神仙，證無上道。且九先超度，乃在於汝；九先沈墮，乃在於汝。汝當洗心刻意，注念無差，一切聖賢，靡不昭鑒。今先參禮三師，誓依教戒。

次引新戒，禮三師。

禮經師。

列真雅誥，上聖綸言，蘊三洞之琅

函，禮九天之金格；青囊紫笈，寶閣雲房，掌八千之靈篇，傳四萬之大劫。既爲道士，先奉經師。凡所誦持，勿令穢觸。當運至誠，參禮經師，三拜。

禮籍師。

玉籙高真，金符上聖，主八景之龍章鳳篆，藏三清之寶策瑤圖，衆聖靈音，諸天隱語。凡爲道士，須奉籍師。每當佩籙行符，切在施功布德，當運至誠，參禮籍師，三拜。

禮度師。

化導真師，拔俗至聖。蒙度之者，星冠月帔。荷指之者，大戒冲科。漸拋塵土之蹤，得遂神仙之列。幸爲道士，切奉度師。永荷真休，常當信禮，當運至誠，參禮度師，三拜。

次十二願。

次學仙頌。

次回向善善。

次引新戒，禮大道功德。

次禮度師等。

太上出家傳度儀

（吳亞魁點校）

# 024 道門科範大全集

經名：道門科範大全集。原題唐末五代廣成先生杜光庭刪定或三洞經籙弟子仲勵編修。八十七卷。底本出處：《正統道藏》正一部。

## 目錄

- 卷一 生日本命儀 清旦行道
- 卷二 生日本命儀 午朝行道
- 卷三 生日本命儀 晚朝行道
- 卷四

懺禳疾病儀

清旦行道

### 卷五

懺禳疾病儀

午朝行道

### 卷六

懺禳疾病儀

晚朝行道

### 卷七

消灾星曜儀

啓壇行道

### 卷八

消灾道場儀

設醮行道

### 卷九

消灾星曜儀

散壇行道

### 卷十

靈寶太一祈雨醮儀

静夜行道

### 卷十一

靈寶太一祈雨儀

設醮行道

### 卷十二

祈求雨雪儀

啓壇行道

### 卷十三

祈求雨雪道場儀

清旦行道

### 卷十四

祈求雨雪道場儀

臨午行道

### 卷十五

祈求雨雪道場儀

晚朝行道

### 卷十六

靈寶祈求雨雪道場三朝坐懺儀

日用朝真懺儀

### 卷十七

靈寶祈求雨雪道場儀

設醮行道

### 卷十八

靈寶祈求雨雪拜章儀

夕景行道

### 卷十九

文昌注祿拜章道場儀

啓壇行道  
卷二十  
文昌注祿拜章道場儀  
清旦行道  
卷二十一  
文昌注祿道場儀  
臨午行道  
卷二十二  
文昌注祿道場儀  
晚朝行道  
卷二十三  
文昌注祿拜章道場儀  
祝神行道  
卷二十四  
文昌注祿拜章道場儀  
散壇行道  
卷二十五  
祈嗣拜章大醮儀  
啓壇行道法事如式  
卷二十六  
祈嗣大醮儀  
清旦行道法事如式  
卷二十七

祈嗣大醮儀  
臨午行道  
卷二十八  
祈嗣大醮儀  
晚朝行道  
卷二十九  
祈嗣大醮儀  
散壇行道  
卷三十  
誓火禳災說戒儀  
法事陞壇如式  
卷三十一  
誓火禳災道場儀  
啓壇行道  
卷三十二  
誓火禳災儀  
清旦行道  
卷三十三  
誓火禳災儀  
臨午行道  
卷三十四  
誓火禳災儀  
晚朝行道

卷三十五  
誓火禳災儀  
設醮行道  
卷三十六  
誓火禳災設醮三時都懺儀  
清旦  
臨午  
靜夜  
卷三十七  
安宅解犯儀  
啓壇行道  
卷三十八  
安宅解犯儀  
清旦行道  
卷三十九  
安宅解犯儀  
臨午行道  
卷四十  
安宅解犯儀  
晚朝行道  
卷四十一  
安宅解犯儀  
一時行道

卷四十二

安宅解犯儀

散壇行道

卷四十三

安宅解犯懺方儀

十方

三光

五嶽

水府

經寶

安宅解犯十方懺謝儀

東方

南方

西方

北方

東北方

東南方

西南方

西北方

上方

下方

安宅解犯都懺儀

二十方

卷四十四

安宅解犯謝竈儀

静夜陞壇

安宅謝竈儀

祭竈法

卷四十五

解禳星運醮儀圖叙

解禳星運儀

啓壇行道

卷四十六

解禳星運儀

入夕行道

卷四十七

解禳星運儀

設醮行道

卷四十八

運星醮啓祝儀

静夜陞壇

卷四十九

南北二斗同壇延生醮儀

啓壇行道

卷五十

南北二斗同醮儀

清旦行道

卷五十一

南北二斗同醮儀

臨午行道

卷五十二

南北二斗同醮儀

晚朝行道

卷五十三

南北二斗同醮儀

設醮行道

卷五十四

南北二斗同醮寶燈儀

静夜行道

卷五十五

北斗延生清醮儀

卷五十六

北斗延生捍厄儀

静夜行道

卷五十七

北斗延生儀

設醮行道

卷五十八

北斗延生懺燈儀

卷五十九

北斗延生醮說戒儀

卷六十

北斗延生道場儀

啓壇行道

卷六十一

北斗延生道場儀

靜夜行道

卷六十二

北斗延生道場儀

設醮行道

卷六十三

真武靈應大醮儀

卷六十四

真武靈應大醮儀

啓壇行道

卷六十五

真武靈應大醮儀

清旦行道

卷六十六

真武靈應大醮儀

臨午行道

卷六十七

真武靈應大醮儀

晚朝行道

卷六十八

真武靈應大醮儀

設醮行道

卷六十九

道士修真謝罪儀

啓壇行道

卷七十

道士修真謝罪儀

清旦行道

卷七十一

道士修真謝罪儀

臨午行道

卷七十二

道士修真謝罪儀

晚朝行道

卷七十三

道士修真謝罪儀

設醮行道

卷七十四

道士修真謝罪十方懺儀

東方

南方

西方

北方

東北方

東南方

西南方

西北方

上方

下方

卷七十五

上清昇化仙度遷神道場儀

清旦行道

卷七十六

上清昇化仙度遷神道場儀

臨午行道

卷七十七

上清昇化仙度遷神道場儀

晚朝行道

卷七十八

上清昇化仙度遷神道場儀

設醮行道

卷七十九

東嶽濟度拜章大醮儀

卷八十

東嶽濟度拜章大醮儀

啓壇行道

卷八十一

東嶽濟度拜章大醮儀

清旦行道

卷八十二

東嶽濟度拜章大醮儀

臨午行道

卷八十三

東嶽濟度拜章大醮儀

晚朝行道

卷八十四

東嶽濟度拜章大醮儀

散壇行道

卷八十五

東嶽濟度上章大醮三時懺方儀

清旦

臨午十方懺

靜夜都懺

卷八十六

靈寶崇神大醮儀

自然行道

卷八十七

靈寶崇神大醮儀

設醮行道

道門科範大全集卷之一

廣成先生杜光庭刪定

生日本命儀

清旦行道

法事陞壇如式。

都講舉，各禮師存念如法。

高功宣衛靈呪。

青陽虛映，耀日回靈。神虎辟邪，

飛天流鈴。摧奸滅試，萬魔束形。九

微迴道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，和與道合真。

都講舉，鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。臣今早朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓，速達徑詣太上無極大道，三清上聖，昊天玉皇上帝，紫微北極大帝御前。

都講舉，請稱法位。

具位臣姓某與合壇官衆等，謹同誠上啓，斗極祖師、洞真大道元始天尊，斗極宗師、洞玄大道太上道君，斗極真師、洞神大道太上老君，玉皇大天尊、玄穹高上帝，斗中之尊、天皇帝，斗中之主、紫微大帝，北斗高上玉皇尊帝君，太微玉帝玄卿大帝君，北斗太尉陽明貪狼玉晨君，北斗上宰陰精巨門玉晨君，北斗司空真人祿存玉晨君，北斗遊擊玄冥文曲玉晨君，北斗斗君丹元廉貞玉晨君，北斗太常北極武曲玉晨君，北斗上帝天關破軍玉晨君，北斗玉帝洞明外輔玉晨君，北斗帝真隱元內弼玉晨君，斗中天罡萬真節度奎光帝君，北斗九皇夫人，九陰內妃，三台華蓋星君，三官五帝，九府四司，斗中道

德諸君，無鞅聖衆，六十甲子本命星君，玄中大法師，三天大法師，寶上真人，二仙使者，九宮官屬，一切真靈。臣聞大道既分，元精啓運，天地垂象，陰陽孕靈。厥初生人，首出群品，毓神太極，凝氣重玄，咸資亭育之功，共稟自然之化。臣等叨承福會，預品人倫。屬三洞開光，五文演奧，琅函玉笈，獲睹玄微；鳳簡龍章，備探幽蹟。而安身順俗，荏苒光陰，未能吸景雲崑，栖神霞壑。惟立功佐命，弘道化時，以副玄科，冀申微效，況奉詞旨，敢不上聞。

宣詞。

按如詞言，丹誠懇切。今屬某誕生本命之日，虔誠歸命，崇啓道場，將祈降福九天，延休茲日，肅恭香火，注念真靈。披十華朝會之儀，法三境焚香之格。所冀元尊降鑒，萬聖垂光，敕五帝於玉宮，詔群真於八極。開南昌之丹秩，增祿延年；注東斗之青文，流祥介福。以今清旦行道，請法衆等運茲初捻上香。

衆和香，至玉清宮，遍玉清聖境，

成華蓋，供養大羅元始尊。

願此香煙，騰空徑上，供養無上至真道寶。臣等皈身、皈神、皈命，首體投地。仰依太上三尊，十方衆聖，願以是捻香功德，上福社稷尊靈，宗祧先聖，凝神天上，降福人間，皇帝壽山增永，辰極齊華，懸日月而照萬方，運元和而康四海。后妃太子，貽景貺於無窮；文武臣僚，播皇猷於浩劫。今故燒香，自皈依道尊大聖衆至真之德。得道之後，保天長存，和與道合真。

以今早朝，陞壇行道，請法衆等運茲二捻上香。

衆和香，至上清宮，遍上清真境，

成寶蓋，供養玉晨大道君。

願此香煙，騰空徑上，供養無上至真經寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流齋主某，八桂齊年，五山等祚。萬仙降祐，餌金液以安神；群聖迴光，開玉書而注祿。九玄七祖，超景朱陵，五族六親，列名丹簡。今故燒香，自皈依經尊大聖衆至真之德。

得道之後，永保長存，和與道合真。

以今早朝，陞壇行道，請法衆等運  
茲三捻上香。

衆和香，至太清宮，遍太清仙境，  
成雲蓋，供養五靈玄老君。

願此香煙，騰空徑上，供養無上至  
真師寶。臣等皈身、皈神、皈命，首體投  
地。仰依太上三尊，十方衆聖，願以是  
捻香功德，歸流天地之內，普及群生，  
九夜開光，三塗朗晏，飛沉動植，咸遂  
生成。今故燒香，自皈依師尊大聖衆  
至真之德。得道之後，永保利亨，和與  
道合真。

懺方，命魔，三啓，三禮。

重稱法位。

具位臣某，與臨壇官衆等，謹同誠  
上啓，三清上聖，十極高真，斗府神仙，  
醮筵真宰，恭望洪慈，洞垂昭鑒。臣等  
伏聞二炁凝和，三靈表質，承大道生成  
之化，鼓太虛陶鑄之功。由是千年爲  
降聖之期，五百乃生賢之數。莫不稟  
神妙運，分星辰日月之華；縱德誕靈，  
結嶽瀆山川之秀。故能功宣濟物，道

叶爲時，恩被生靈，惠覃幽顯。當茲令  
序，宜啓壇場，將擁洪休，仰祈玄聖，冀  
因虔禱，俾獲感通。按靈寶明科，披自  
然祕格，注心三境，皈命十天，燈分鶴  
焰之輝，香散龍煙之穗。玉章飛韻，清  
磬流音，旁周寥廓之間，上達無何之  
外。三尊演貺，增年於玉曆之中；萬  
聖流慈，延祚於瑤緘之上。九丹自得，  
萬善咸臻，長簡帝心，永綏天祿。皇帝  
瑤圖克固，寶運遐昌，萬國宅心，九圍  
順化，星辰合度，日月貞華。海外寰  
中，俱洽無爲之道；天長地久，弘宣不  
宰之功。庶類昭蘇，群生蒙福，上窮三  
界，下及九陰，惠澤普沾，同臻壽域。  
上明天尊大慈之澤，下副臣等皈嚮之  
誠。謹啓以聞。

知磬舉，十二願。

都講舉，存神燒香。

高功復爐。

香官使者、左右龍虎君、侍香諸靈

官，當令臣向來早朝陞壇行道之所，自  
然生金液丹碧，芝英百靈，衆真交會，  
在此香火爐前。當願十方仙童玉女，

接待蘭煙，傳臣向來所啓之誠，速達徑  
御至真無極大道、三清三境天尊、昊天  
玉皇上帝、紫微北極大帝御前。

知磬舉，出堂頌。

出戶，引至六幕堂。

道門科範大全集卷之一



道門科範大全集卷之二

廣成先生杜光庭刪定

生日本命儀

今午朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御太上無極大道、三清三境天尊、昊天玉皇上帝、星主紫微大帝御前。

午朝行道

都講舉，請稱法位。

都講舉，各禮師存念如法。

具位臣姓某與合壇衆官等，謹同誠

高功宣衛靈呪。

上啓，斗極祖師、洞真大道元始天尊，

丹靈朱火，炎霞激風。赤輪剛運，

斗極宗師、洞玄大道太上道君，斗極真

天光八衝。迸威包羅，交變萬方。流

師、洞神大道太上老君，玉皇大天尊、

金豁落，群魔滅蹤。辟奸破妖，明耀元

玄穹高上帝，斗中之尊、天皇大帝，斗

功。金符召制，躡雲策龍。謠歌慶會，

中之主、紫微大帝，北斗高上玉皇尊帝

散花太空。神化宜運，四極安隆。伏

君，太微玉帝玄卿大帝君，北斗太尉陽

御帝前，罔有不恭，和與道合真。

明貪狼玉晨君，北斗上宰陰精巨門玉

都講舉，鳴法鼓二十四通。

晨君，北斗司空真人祿存玉晨君，北斗

高功發爐。

遊擊玄冥文曲玉晨君，北斗斗君丹元

無上三天玄元始三炁，太上道君，

廉貞玉晨君，北斗大常北極武曲玉晨

太上老君，召出臣身中三五功曹，左右

君，北斗上帝天關破軍玉晨君，北斗玉

官使者，左右捧香，驛龍騎吏，侍香金

帝洞明外輔玉晨君，北斗帝真隱元內

童，傳言散花玉女，五帝直符，直日香

弼玉晨君，斗中天罡萬真節度奎光帝

官，各三十六人出。出者嚴裝顯服，冠

君，北斗九皇夫人，九陰內妃，三台華

帶垂纓，關啓玄壇土地，方域神真。臣

蓋星君，三官五帝，九府四司，斗中道

德諸君，無鞅聖衆，六十甲子本命星君，玄中大法師，三天大法師，寶上真人，二仙使者，九宮官屬，一切真靈。臣等伏聞元始開圖，演長生之祕錄；玄元闡化，弘廣濟之妙門。普及人天，同臻福祐。由是宿瑕往結，咸得懺祈，片善微功，備蒙銓錄，洪纖罪福，毫末無遺。臣職在敷揚，願裨大化，凡有祈告，敢不上聞。

宣詞。

按如詞言，誠深修奉，所宜騰奏，冀獲感通。竊惟三十六部尊經，修生爲本；二十七等齋法，崇善爲先。所以本命七星移度之篇，具明神呪三皇監乾之旨，許佩寶符，司馬度籍，以延生太一，制魂而保壽。元父玄母，內鎮百關；金晨玉華，外祛衆惡。降日華於大洞，解宿結於三田。勤而行之，可以雲昇羽化，則本命具存修之理，載彼真經；生日敷大有之書，明于奧旨，司命回十絕之信，元君開定籍之章，三界在庭，萬神列位。然後紀善錄惡，保壽延生。大哉，稟氣毓神，驚天駭地，誕

生之重，聖教所尊，爰屬茲辰，宜申福會，是用虔誠三寶，注仰十華，信幣盟心，香花展禮，轉經行道，悔過祈恩，依按典儀，奉修齋直。以今午朝，陞壇行道，請法衆等運茲初捻上香。願此香

煙，騰空徑上，供養無上至真道寶。臣等志心皈身、皈神、皈命，首體投地。

仰依太上三尊，十方衆聖，願以是捻香功德，上資社稷尊靈，列聖昭穆，神升王闕，品列瓊宮，騰逸駕於上清，介殊祥於大寶，允昌帝業，遐福群生。弟子某家九世七玄，億曾萬祖，克辭幽夜，咸睹光明。今故燒香，自皈依道尊大聖衆至真之德。得道之後，永保長存，和與道合真。

以今午朝，陞壇行道，請法衆等運茲二捻上香。願此香煙，騰空徑上，供養無上至真經寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流今上皇帝。伏冀聖圖悠久，寶祚延洪，日並睿明，山齊聖壽。儲宮妃后，光贊鴻休。百辟忠貞，扶持景運，三光融朗，六炁和

平，穀稼滋豐，兵戈戢息。航深梯險，會萬國以朝宗；車軌書文，總八紘而混一。俗臻有道，化洽無爲。今故燒香，自皈依經尊大聖衆至真之德。得道之後，保天長存，和與道合真。

以今午朝，陞壇行道，請法衆等運茲三捻上香。願此香煙，騰空徑上，供養無上至真師寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流齋主某，及內姻外族，眷屬親緣，體豫神安，福隆壽遠，三灾不染，九厄無侵，家傳忠孝之風，門襲安貞之吉。九圍之內，率土之中，景貺所資，群生咸泰。今故燒香，自皈依師尊大聖衆至真之德。得道之後，永保長存，和與道合真。

懺方，命魔，三啓，三禮。  
重稱法位。

具位臣某等，謹同誠上啓，三清上聖，十極高真，斗府神仙，醮筵真宰。臣聞妙道垂文，三乘演教，至真流化，普度人天，得以微生，參奉玄奧，遵依聖本，敷贊玄科，冀罄丹誠，用裨鴻化。

今齋主某，竊惟上真弘濟，三洞開光，有感必通，惟善是祐。敢因初誕本命之日，願伸祈懺之儀，稽首法筵，披心衆聖，轉經行道，請福希恩。伏願太上三尊，十方衆聖，傾光三境，迴駕九清，鑒省丹襟，滂流洪澤，降無涯之施，開大有之慈。赦除臣某己身，及六親眷屬、九玄七祖、一切親緣，歷劫以來，至于今日，六根障惱，三業罪條，或不孝不忠，不仁不義，犯違天地，穢慢三光，呵忿神明，輕凌四大，染滯聲色，耽翫繁華，傷殺衆生，以爲快樂，妬妬勝己，抑絕賢明，冒利貪財，酷害於物，評論道德，毀敗正真，口是心非，罔上凌下，犯三元品目、百八十條，無邊無涯，不可憶識。因今懺悔，並乞蕩除。上願帝道興昌，寰瀛康泰，三光調理，五緯順常，人歸朴素之風，俗洽和平之化。九幽夜府，咸睹光明；六趣殊倫，共臻禎貺。齋主某椿騫等算，金玉齊身，壽祿內延，灾凶外息，子孫忠孝，門宇清安，三界真靈，潛加佑護。上明天尊廣濟之澤，下副臣等皈命之誠。謹啓以聞。

知磬舉，十二願。

都講舉，存神燒香。

高功復爐。

香官使者、左右龍虎君、侍香諸靈官，當令臣向來午朝陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清三境天尊、昊天玉皇上帝、紫微北極大帝御前。

知磬舉，出堂頌。

出戶，引至六幕堂。

道門科範大全集卷之二

### 道門科範大全集卷之三

廣成先生杜光庭刪定

#### 生日本命儀

#### 晚朝行道

都講舉，各禮師存念如法。

高功宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。群生咸遂，惠遍神州，和與道合真。

都講舉，鳴法鼓二十四通。

高功發爐。

無上三天玄元始三炁，太上虛無大道君，召出臣等身中，三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇天帝天真，當召此間

土地里域真官正神，急上關啓。臣今晚朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御至真無極大道、三清三境天尊、昊天玉皇上帝、星主紫微大帝御前。

都講舉，請稱法位。

具位臣某與合壇法衆等，謹同誠上啓，斗極祖師、洞真大道元始天尊，斗極宗師、洞玄大道太上道君，斗極真師、洞神大道太上老君，玉皇大天尊、玄穹高上帝，斗中之尊、天皇帝，斗中之主、紫微大帝，北斗高上玉皇尊帝君，太微玉帝玄卿大帝，北斗太尉陽明貪狼玉晨君，北斗上宰陰精巨門玉晨君，北斗司空真人祿存玉晨君，北斗遊擊玄冥文曲玉晨君，北斗斗君丹元廉貞玉晨君，北斗太常北極武曲玉晨君，北斗上帝天關破軍玉晨君，北斗玉帝洞明外輔玉晨君，北斗帝真隱元內弼玉晨君，斗中天罡萬真節度奎光帝君，北斗九皇夫人，九陰內妃，三台華蓋星

君，三官五帝，九府四司，斗中道德諸君，無鞅聖衆，六十甲子本命星君，玄中大法師，三天大法師，寶上真人，二仙使者，九宮官屬，一切真靈。臣聞天地之德曰生，延生者大道，洪範之福曰壽，保壽者至真。所以大道垂文，至真演教，延生保壽，豐國安人。臣等獲奉真乘，棲身道域，披八會九光之篆，睹瓊編玉籍之文，皆以曠劫宣行，先天流布，理國太平之旨，修身延壽之篇。而寓迹塵寰，和光陸海，惟期敷贊，以著微功。凡有所陳，理宜關奏，況奉詞旨，敢不上聞。

宣詞。

按如詞言，所宜上達。蓋以初誕本命之日，志切香燈，虔啓法壇，精修齋直，拂三清之寶牒，披三洞之簡章，太一度符之篇，五靈奉籍之要，皆以凝神三境，屬念上玄，期稟受於初天，仰宗元於大道，用祈通感，宜合真靈，滌慮洗心，願孚真佑。以今晚朝，陞壇行道，請法衆等運茲初捻上香，願此香煙，騰空徑上，供養無上至真道寶。臣

等皈身、皈神、皈命，首體投地。仰依太上三尊，十方衆聖，願以是捻香功德，上資社稷宗廟，列聖尊靈，宴處玉京，流祥寶祚，克昌大業，廣福群生。齋主某七祖九玄，登真證道，鍊神丹闕，超迹玄陰，三界十方，同臻勝福。今故燒香，自皈依道尊大聖衆至真之德。得道之後，永保長存，和與道合真。

以今晚朝，陞壇行道，請法衆等運茲二捻上香，願此香煙，騰空徑上，供養無上至真經寶。臣等皈身、皈神、皈命，首體投地。仰依太上三尊，十方衆聖，願以是捻香功德，上祝當今皇帝，伏冀睿圖隆永，聖壽遐長。握金鏡以低臨，萬方昭泰；儼珠旒而端穆，八海澄清。朝有忠貞，俗臻富壽。儲皇妃后，協贊昌期，公主諸王，保寧休運。火鼠燭龍之外，睽瞍爭馳；虞泉蒙谷之鄉，車書混一。今故燒香，自皈依經尊大聖衆至真之德。得道之後，保天長存，和與道合真。

以今晚朝，陞壇行道，請法衆等運茲三捻上香，願此香煙，騰空徑上，供

養無上至真師寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流齋主某家，己身眷屬，內外親緣，福壽增延，罪瑕蠲蕩，灾凶殄息，禎瑞咸臻，普及人天，同均巨福。今故燒香，自皈依師尊大聖衆至真之德。得道之後，永保長存，和與道合真。

懺方，命魔，三啓，三禮。

都講舉，重稱法位。

具位臣某與臨壇官衆等，謹同誠上啓，三清上聖，十極高真，斗府神仙，醮筵真宰，恭望洪慈，洞垂昭鑒。臣聞萬聖傳真，三尊垂訓，濟生保命，正教所先。由是三洞寶經，諸天奧旨，或內修閉視，嚙景胎元；或瓊藥玉霜，五金九鼎；或留神食炁，制魄拘魂；或飛步遯形，藏天隱地。皆欲延其有限，造彼無涯，使薜華參騫木之林，朝籥齊大椿之列，千門善誘，咸俾精修。或愚夫有捕影之譚，而上士契勤行之效，明科要訓，今古攸遵。今齋主某宿稟正真，志崇玄奧，達體道修生之理，悟重玄祕妙

之門，屬初誕本命之辰，啓焚修之會，冥心十極，稽首諸天，行道轉經，祈真請福。臣等輒相携率，依按典儀，共罄丹誠，仰希洪澤。伏冀至真上聖，無極高尊，俯鑒所陳，滂流景祐，賜朱陽玉闕，文昌上宮。韓君開延壽之符，司馬錫長生之籙。真靈翊衛，和炁資熏。右宮削短促之篇，左簡注遐長之算。祿祚增廣，罪啓消平，眷屬乂康，幽明舒泰。上願帝王萬壽，社稷安寧，異域殊庭，同文共軌，三光朗晏，六炁宣和，穀稼豐登，龍神協贊，年無疵癘，俗洽雍熙，泊乎夜府泉關、三塗六趣，惠澤蕩焦勞之苦，天光開昏暗之衢，並出幽沉，盡蒙升度，旁周十極，遐及九圍，動植生靈，俱登壽域。上明天尊大慈之澤，下副臣等皈命之誠。謹啓以聞。

知磬舉，十二願。

都講舉，存神燒香。

高功復爐。

香官使者、左右龍虎君、侍香諸靈官，當令臣向來晚朝陞壇行道之所，自然生金液丹碧，芝英百靈，衆真交會，

在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清三境天尊、昊天玉皇上帝、紫微北極大帝御前。

知磬舉，出堂頌。

出戶，引至六幕堂。

道門科範大全集卷之三

### 道門科範大全集卷之四

廣成先生杜光庭刪定

懺穰疾病儀

清旦行道

法事陞壇如式。

都講舉，各禮師存念如法。

高功宣衛靈呪。

青陽虛映，耀日回靈。神虎辟邪，

飛天流鈴。摧奸滅試，萬魔束形。九

微迴道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，和與道合真。

都講舉，鳴法鼓二十四通。

高功發爐。

無上三天玄元始三炁，太上道君

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，闕啓玄壇土地，方域神真。臣今早朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓，速達徑詣太上無極大道、三清上聖、昊天玉皇上帝御前。

都講舉，請稱法位。

具位臣某與合壇官衆等，謹同誠上啓，虛無自然元始天尊，無極大道太上大道君，大聖祖高上大道金闕玄元天皇帝，太上老君，高上玉皇，十方已得道大聖，衆至真，諸君丈人，三十六天帝君，玉虛上帝，玉帝大帝，東華、南極、西靈、北真、玄都、玉京、金闕、七寶、玄臺、紫微上宮，靈寶至真明皇道君，玄中大法師，三天大法師，上清、日月、九曜、南辰、北斗星君，三官五帝，九府四司，斗中道德諸君，無鞅聖衆，六十甲子本命星君，東嶽上卿，司命真君，西極總真王君，名山洞府得道神仙，三界應感，一切真靈。臣聞妙本自然，因機立化，裁成天地，含孕虛無。日月得以垂光，乾坤由其定位。天元

地府，陽職陰寮，分布萬神，主宰群有。除災降福，河圖明謁謝之文；悔過希恩，太一著修禳之品。臣等職當開度，廣濟爲先，凡有所祈，理宜關奏，況奉詞旨，敢不上聞。

宣詞。

按如詞言，誠情丹切。弟子某以吉凶倚伏，寒暑推遷，否泰不常，災纏是懼，敢憑慈訓，爰備齋壇。按黃籙靈寶簡章，考玄都典式，冀因敷奏，克獲感通。以今清旦，陞壇行道，請法衆等運茲初捻上香，願此香煙，騰空徑上，供養無上至真道寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流皇圖帝業，社稷尊靈，與道無窮，配天齊永。皇帝聖超三五，播有道於九圍；祚越億千，暢無爲於萬國。今故燒香，自皈依道尊大聖衆至真之德。得道之後，保天長存，和與道合真。

以今早朝，陞壇行道，請法衆等運茲二捻上香，願此香煙，騰空徑上，供養無上至真經寶。臣等皈身、皈神、皈

命，首體投地。仰依太上三尊，十方衆聖，願以是捻香功德，歸流某家九玄幽爽、億劫親緣，乘元皇九奏之功，九幽開度；荷玄聖五明之照，五苦寧閑。福利存亡，祚流遐邇。今故燒香，自皈依經尊大聖衆至真之德。得道之後，永保長存，和與道合真。

以今早朝，陞壇行道，請法衆等運茲三捻上香，願此香煙，騰空徑上，供養無上至真師寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流某身，六氣安和，百關調順。宿殃積孽，隨惠澤以蠲銷；滯疾深災，沐靈風而蕩滌。中天注祿，南斗增年，眷屬咸宜，禎祥密降。今故燒香，自皈依師尊大聖衆至真之德。得道之後，永保長存，和與道合真。

懺方，命魔，三啓，三禮。  
重稱法位。

具位臣某與臨壇官衆等，謹同誠上啓，三清上帝，十極高真，醮筵兩班，無邊列聖，恭望洪慈，洞垂昭鑒。臣聞道

本無爲，感而有應；陰陽不測，變化難窮。用常善以導群迷，播鴻慈而育三界。拯危救物，佐國度人，日用不知，神功無際。弟子某仰慮稟神之始，運氣之初，億劫以來，至于今日，不明罪福，罔識因緣，三業構非，六塵積孽，違天元生化之道，犯地司禁忌之文，虧四時應變之功，失萬物遂成之性，故傷誤殺，害及有情，不覺不知，累過無極。前業未懺，後罪有加。三官五帝之司，黑書記惡；泰嶽羅酆之府，丹簡落名。或因三命凶衰，五行刑剋，星文臨照，神殺衝妨；或因動役興功，搥林運石，斬伐林木，穿鑿岡原，驚觸龍神，犯違禁諱，遂成疾厄，未獲痊平，正氣不和，三元失序。敢依科典，啓置道場，下罄丹誠，上祈玄聖，無邊罪咎，咸乞懺除。伏冀衆聖垂光，萬真迴鑒，流大慈之施，降罔極之恩，敕勒四司，明告九府，爲弟子某削除死籍，汪上生名，解厄祛灾，和冤釋對，宿瑕清蕩，積過銷平。星辰迴臨照之文，年運息刑衝之咎，青帝加算，錄肝護魂，白帝遷名，靜魄安

肺，辰星守腎，熒惑鎮心。黃庭真人，和神守臟，天醫將東，太一真靈，神藥潛資，靈津密降。凶隨願解，疾逐雲銷，福壽永延，灾衰殄息。上願帝圖悠久，聖德昭明，四海無波，八紘有泰，干戈自戢，穀稼滋豐，君聖臣忠，天清地靜。然乞弟子某家，九玄享福，七祖生天，五族安寧，六親和睦。泉扃朗晏，九幽無罪考之聲；三界混融，六道罷輪迴之趣。飛行動息，有識含生，共沾廣濟之恩，咸契長生之果。上明天尊弘慈之澤，下副臣等懺謝之誠。謹啓以聞。

知磬舉，十二願。

都講舉，存神燒香。

高功復爐。

香官使者、左右龍虎君、侍香諸靈官，當令臣向來早朝陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之四

### 道門科範大全集卷之五

廣成先生杜光庭刪定

#### 懺穢疾病儀

#### 午朝行道

法事陞壇如式。

都講舉，各禮師存念如法。

高功宣衛靈呪。

丹靈朱火，炎霞激風。赤輪剛運，

天光八儀。迸威包羅，交變萬方。流

金豁落，群魔滅蹤。辟奸破妖，明耀元

功。金符召制，躡雲策龍。謠歌慶會，

散花太空。神化宜運，四極安隆。伏

御帝前，罔有不恭，和與道合真。

都講舉，鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。臣今午朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓，速達徑御太上無極大道、三清上聖、昊天玉皇上帝御前。

都講舉，請稱法位。

具位臣某與臨壇官衆等，謹同誠上啓，虛無自然元始天尊，無極大道太上大道君，大聖祖高上大道金闕玄元天皇帝，太上老君，高上玉皇，十方已得道大聖，衆至真，諸君丈人，三十六天帝君，玉虚上帝，玉帝大帝，東華、南極、西靈、北真、玄都、玉京、金闕、七寶、玄臺、紫微上宮，靈寶至真明皇道君，上清、日月、九曜、南辰、北斗星君，三官五帝，九府四司，斗中道德諸君，無鞅聖衆，玄中大法師，三天大法師，六十甲子本命星君，東嶽上卿，司命真君，西極總真王君，名山洞府得道神仙，三界應感，一切真靈。臣聞至道融真，先天立極，神功獨運，靈化潜彰。播清濁於兩儀，肇裁成於萬象。雖至

虛遼邈，有感必通；玄洞幽遐，無祈不達。聖慈下濟，俯念群生。惟俟精虔，克垂昭覆。臣等夙承明訓，得備職司，凡有誠祈，理宜關奏，況奉詞旨，敢不上聞。

宣詞。

按如詞言，誠情所切。弟子某以五常愆候，六氣失和，疾厄所纏，憂危是切。遂感冥心大道，勵志真乘，虔想清都，仰希玄鑒，開三元品格，按九奏文儀，啓置道場，延降真聖。臣等謹相推率，澡鍊身心，法地像天，修齋行道，披心稽顙，歸命至真，潔念炷香，依科關奏。伏冀天尊大聖，太上衆真，八極高尊，十方化主，三清三界，諸地諸天，日月帝君，星辰主宰，山川嶽瀆，一切威靈，開大宥之慈，降昭彰之應，迴軒駐駕，愍鑒所祈，迂蓋流光，證明深懇，滂垂巨福，允介殊禎，自國及家，普沾景貺。以今午朝行道，請法衆等運茲初捻上香，願此香煙，騰空徑上，供養無上至真道寶。臣等皈身、皈神、皈命，首體投地。仰依太上三尊，十方衆聖，



願以是捻香功德，歸流社稷尊靈，宗祧先聖，遊神紫府，御景青元，會蒙谷以參真，戴列星而演道，垂休大寶，貽厥帝圖，鎮海嶽以傳芳，配乾坤而永祚。今故燒香，自皈依道尊大聖衆至真之德。得道之後，永保長存，和與道合真。

以今午朝，陞壇行道，請法衆等運茲二捻上香，願此香煙，騰空徑上，供養無上至真經寶。臣等皈身、皈神、皈命，首體投地。仰依太上三尊，十方衆聖，願以是捻香功德，上祝當今皇帝，龍圖鳳紀，克保遐長，玄頃黃軒，允齊英睿。八溟昭泰，息戈甲以垂紳；萬國和寧，混車書而契道。今故燒香，自皈依經尊大聖衆至真之德。得道之後，保天長存，和與道合真。

以今午朝，陞壇行道，請法衆等運茲三捻上香，願此香煙，騰空徑上，供養無上至真師寶。臣等皈身、皈神、皈命，首體投地。仰依太上三尊，十方衆聖，願以是捻香功德，奉福弟子某家九玄七祖、一切幽靈。伏願黑簿落書，青宮著錄，鍊營魂於丹霍，乘雲蓋於紫

微，介福見存，垂芳萬葉。某灾銷五運，咎滅三纏，六府宣和，百關調暢。深冤往對，隨懺滌以皆平；舊厄新灾，應啓祈而咸息。然後六親五族，福祉旁資；九夜三塗，禎祥普及。今故燒香，自皈依師尊大聖衆至真之德。得道之後，永保長存，和與道合真。

懺方，命魔，三啓，三禮。

重稱法位。

具位臣某與臨壇官衆等，謹同誠上啓，三清上帝，十極高真，三界醮筵，兩班列聖，恭望洪慈，洞垂昭鑒。臣等竊惟至聖垂文，上真流化，八書演妙，三洞開光，清都弘濟度之儀，黃籙丹簡著懺祈之格，誠情所達，感應可期。弟子某以跡處塵寰，名拘俗網，舉心屬念，未合正真，履行運身，多乖大道；或前生積世，不遇玄經，累結罪尤，未嘗懺滌；或六情三業，過咎所深；或往債宿冤，考延所責，遂使灾凶在運，疾厄所纏，六府失和，百關未泰，緬惟風露，倍切憂兢。是敢瀝懇披心，立齋祈福，按靈仙品格，開八景壇場，精備香燈，

虔伸懺謝。伏冀玉清萬聖，金闕衆真，鑒納丹誠，降流玄祐，使長生御史，開丹籙以延年；度厄尊神，迴紫文而介福。安五神於五臟，正三氣於三田。南天續增祿之符，東斗紀延齡之品。北宮落死，西府紀名，神氣閑和，灾殃殄息，地無簡對，水絕盟言，鬼斷冤仇，人銷謀議。星辰行度，無臨照之凶；本命行年，無刑妨之咎。靈丹密授，妙藥神資，速遂痊平，永期安泰，齋壇巨福，黃籙寶範殊功。上贊帝圖，永昌天祚；旁資境土，克保安寧。外息干戈，內無疵癘，九幽夜府，六趣殊緣，咸享福因，俱登道岸。龍神守衛，境宇康宜，逍遙道風，沐浴惠澤。上明天尊大慈之施，下副臣等懺謝之誠。謹啓以聞。

知磬舉，十二願。

都講舉，存神燒香。

高功復爐。

香官使者、左右龍虎君、侍香諸靈官，當令臣向來午朝陞壇行道之所，自然生金液丹碧，芝英百靈，衆真交會，

在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之五

### 道門科範大全集卷之六

廣成先生杜光庭刪定

懺穰疾病儀

晚朝行道

法事陞壇如式。

都講舉，各禮師存念如法。

高功宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。群生咸遂，惠遍神州，和與道合真。

都講舉，鳴法鼓二十四通。

高功發爐。

無上三天玄元始三炁，太上虛無大道君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠

帶垂纓，關啓玄壇，天帝天真，當召此間土地里域，真官正神，急上關啓。臣今晚朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御至真無極大道、三清上聖、昊天玉皇上帝御前。

都講舉，請稱法位。

具位臣某與合壇官衆等，謹同誠上啓，虛無自然元始天尊，無極大道太上大道君，大聖祖高上大道金闕玄元天皇帝，太上老君，高上玉皇，十方已得道大聖，衆至真，諸君丈人，三十六天帝君，玉虛上帝，玉帝大帝，東華、南極、西靈、北真、玄都、玉京、金闕、七寶、玄臺、紫微上宮，靈寶至真明皇道君，日月、九曜、南辰、北斗星君，三官五帝，九府四司，斗中道德諸君，無鞅聖衆，六十甲子本命星君，玄中大法師，三天大法師，東嶽上卿，司命真君，西極總真王君，名山洞府得道神仙，三界應感，一切真靈。臣聞混成構象，真一凝光，天地稟之以權輿，陰陽運之以

生化。盛衰倚伏，善惡糾紛，日月有代謝之期，寒暑有推遷之數。惟茲大道，統貫幽明，延福垂休，廣濟群品。臣等早探真訣，獲眇靈圖。三洞琅函，有祈禳之品；九天金札，傳拯護之文。四萬劫而敷弘，五億天之宗奉，制伏妖惡，徵召魔靈，佐國立功，扶危救物。凡有祈向，敢不上聞。

### 宣詞。

按如詞言，理惟虔切。弟子某災纏未息，疾厄未平，歸命諸天，披心大道，請崇齋直，延降威靈，輔運丹誠，共希玄祐。以今晚朝，陞壇行道，請法衆等運茲初捻上香，願此香煙，騰空徑上，供養無上至真道寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流皇帝九廟尊儀，駕景三清，流祥萬國，鴻基克固，鳳曆永昌。敬祝太子諸王，允扶大業。以及臣寮百辟，匡贊睿圖，車軌大同，梯航畢集。今故燒香，自皈依道尊大聖衆至真之德。得道之後，保天長存，和與道合真。

以今晚朝，陞壇行道，請法衆等運

茲二捻上香，願此香煙，騰空徑上，供養無上至真經寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流某家七祖九玄、幽儀滯爽，超辭地壤，昇翥天衢，息注訟於冥關，流福祥於後裔。九幽地獄，咸睹慈光；六趣群生，同躋善域。今故燒香，自皈依經尊大聖衆至真之德。得道之後，永保長存，和與道合真。

以今晚朝，陞壇行道，請法衆等運茲三捻上香，願此香煙，騰空徑上，供養無上至真師寶。臣等皈身、皈神、皈命，首體投地。仰依太上三尊，十方衆聖，願以是捻香功德，歸流弟子某身，冤債和平，災凶銷解，邪衰冰泮，疾厄雲收，南斗延生，東宮注祿。洎諸眷屬，普及人天，同享善功，咸臻道域。今故燒香，自皈依師尊大聖衆至真之德。得道之後，永保平康，和與道合真。

懺方，命魔，三啓，三禮。

重稱法位。

具位臣某與醮壇官衆等，謹同誠上啓，三清上帝，十極高真，三界醮筵，兩班列聖，恭望洪慈，洞回昭鑒。臣等參佩寶文，夙漸靈澤，竊披玄奧，志在敷揚，思立善功，廣被群品。弟子某災凶在運，疾厄所纏，列款表心，虔誠禱福，請崇齋直，關奏真靈。是敢遵按典儀，轉經行道，懺謝弟子某前生今世，宿罪深尤。或違天地覆載之仁，或虧日月照臨之德，犯二氣五行之性，傷三光六紀之和。前冤未除，後罪重結，故殺誤傷，肆意任心，不識因緣，罔知忌諱。六情所起，干犯幽明；三業所爲，負越經訓。成茲報對，構此災危。又恐犯觸龍神，興工土木，侵傷地理，違爽天時。又恐宿曜所臨，年運所犯，九宮刑剋，八卦衝妨。疾厄既深，憂危是切。敢因啓齋設款，懺謝過愆，燒香然燈，祈天請命，災殃罪咎，戚乞懺除，使太一延生，三元却死，靈童投藥，大帝降符，六府調和，百關宣暢，壽延祿永，禍滅福生。弟子某家，九祖生天，六親蒙

祐，九幽六趣，動植飛沉，各遂所宜，咸承福利。上願龍圖鴻業，地久天長，文德允修，武功遐著。川浮聖澤，日並睿明。八卦九疇，再彰於清洛；連珠合璧，重睹於玄穹。百穀無愆，三農有積，疵癘不作，水旱無侵，風雨以時，干戈永戢，遍該含識。下及幽途，川嶽職察，陰陽臣佐，誅邪助正，弘道安人，齊契道階，俱昇福岸。則上明天尊大慈之澤，下副臣等懺謝之誠。謹啓以聞。

知磬舉，十二願。

都講舉，存神燒香。

高功復爐。

香官使者、左右龍虎君、侍香諸靈官，當令臣向來晚朝陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之六

### 道門科範大全集卷之七

廣成先生杜光庭刪定

#### 消災星曜儀

#### 啓壇行道

法事陞壇如式。

都講舉，各禮師存念如法。

高功宣衛靈呪。

東方：

九炁青天，明星大神。煥照東鄉，洞映九門。轉燭陽光，掃穢除氛。開

明童子，號曰玄卿。備衛我軒，上對帝君。收魔束妖，討捕兇群。奉承正道，

赤書玉文。九天符命，攝龍驛傳。普

天安鎮，我得飛仙，和與道合真。

南方：

三炁丹天，煥景流光。熒星轉燭，洞照太陽。上有赤精，合契虛皇。開

明靈童，號曰華房。總統火兵，備守玉

堂。斬邪束妖，剪截魔王。北帝所承，

風火莫當。流鈴交換，翊衛壇場。正

道流行，敢有巴狂。我享上功，坐運魁

罡。億劫長存，保天無疆，和與道合真。

西方：

七炁素天，太白流精。光耀金門，洞照太冥。中有素皇，號曰帝靈。保

神安鎮，衛我身形。斷截邪源，王道正

明。宮殿整肅，三景齊并。道合自然，

飛昇紫庭。靈寶符命，普惠萬生。元

皇正炁，來合我身。功加一切，天地咸

寧，和與道合真。

北方：

五炁玄天，元始徘徊。辰星煥爛，

光耀太微。黑靈尊神，號曰層威。統

冠飛天，仙裙羽衣。備衛五門，檢精捕

非。敢有干試，豁落斬摧。玉符所告，

神真八威。邪門閉塞，正道明開。映

照我身，三光同輝。策空駕浮，舉形仙

飛，和與道合真。

中央：

一炁黃天，調理乾坤。陶鎔陰陽，

總統玄真。鎮星吐輝，流煥九天。開

光童子，號曰天璘。元炁陽精，焰上朱

煙。洞照天下，及臣等身。百邪摧落，

殺鬼萬千。中山神呪，普天使然。五靈安鎮，身飛上仙，和與道合真。

都講舉，鳴法鼓二十四通。

高功發爐。

無上三天玄元始三炁，太上道君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣今宿啓告齋，建壇歲事，謹奏爲入意，其諸情悃，具載疏文。以今啓壇設位，備物陳儀，儼清衆以無譁，演真儀而有俶。揆辰協吉，錫羨云初。虔罄精誠，上干層極。天上天下，咸乞聞知。願得太上至真道炁，靈寶慧光下降，流入臣等身中，令臣所啓之誠，速達徑御至真無極大道、三清上聖、昊天金闕玉皇上帝御前。

都講舉，請稱法位。

具位臣某與臨壇列職官衆等，謹同

誠上啓，大羅九皇至尊，十方上聖，三界應感，一切真靈。臣聞天不祐于鮮

德，內盡情而可以動穹極之尊；士不崇於匪儀，外盡文而可以舉仙科之祕。惟致情文之謹，乃蒙真聖之臨。況三籙重黃籙之儀，而九壇貴黃壇之盛。今則恭袂叢楹之祕，肅開華縵之場。旗獵天風，召五方之真氣；劍橫北斗，淨千里之妖氛。衆香馥以揚烟，法鼓琅而振響，儼洪規而肇始，勵衆志以惟寅。吟空洞謠歌之章，延上聖高尊之馭，大敷張於齋格，用懺洗於罪根。伏願凡悃遙通，帝心下降，誕形丕應，洞察至誠。先遣監齋監醮真官，侍經侍香仙媛，傳言玉女，奏事金童，來臨圭潔之場，共領忱情之禱，證明法事，周洽願心。然後玉羽群翔，駐鸞驂於靜夜；翠華咸建，肆玉軼於層空。或乘胎化之仙禽，或駕飛雲之天駟，紛然來格，敢不欽承，啓茲玄感，上御至真無極道前。

知磬舉，起敬贊。

唱十方。

禮足，各長跪皈命懺悔。

臣法衆等，志心皈身、皈神、皈命十

方無極大道，太上靈寶天尊，恭望洪慈，洞垂巨澤，普降洪恩。臣聞盡天下之物，不足以交神明；修胸中之誠，斯可以應天地。矧乃玄元之教，莫非清淨之門。儻三業六根之過存，豈一純二精之能格。當齋科之謹始，欲塵慮以先除。庶藉宣揚，以伸昭格。伏念臣與醮主某，自從曠劫，乃至今生，三業根深，十惡障重。有妙湛之體，爲情所昏；有虛明之用，爲物所蔽。欲惡盛而性有萑葦，聞見疏而智亦聾盲。不能外身，而多身殃；不能減口，而多口過。意有所至，愛有所爲。積其有涯之生，造徧無邊之罪。今則對列真而懺悔，體妙道以修爲。諸業生於諸根，塵塵是妄；有身孰不有患，物物迷真。爰即靈壇，盡祛惡障。心疏淪而內觀無礙，性虛淨而外境不爲。翦翦之佞皆除，津津之惡悉去。已作之故業，永不蹈於覆車；未造之新殃，更不投於深穽。庶全身而遠罪，無見利以忘真。伏願衆聖洞昭，皇靈遠燭，以瑶池之水洒濯於群心，以甘露之華滌除於衆垢。

衰相罪根之消滅，靈光慧性之圓明，恪  
堅為善之心，仰俟降康之澤，禍沉九  
地，福起十方。臣等稽首禮謝無上至真  
三寶。

布真文。

知磬舉，三啓頌，三禮。

重稱法位。

具位臣某與合壇官衆等，謹同誠上  
啓，虛無自然元始天尊，太上玉晨大道  
君，大王金闕老君，太上昊天玉皇上  
帝，九皇至尊，十方靈寶天尊，諸天大  
帝，三十六部尊經玄中大法師，上相上  
宰，上保上傳，三官五帝，十一大曜星  
君，十神太一真君，南斗六司星君，北  
斗七元星君，周天乾象二十八宿，十二  
官神，三百六十五度諸天列宿，本命元  
辰，天曹職司，九天真宰，三山五嶽、福  
地靖廬、厚地洞宮、嶽瀆主宰，三界應  
感，一切真靈。臣聞天不顯符，默有開  
先之命，帝能降鑒，俯垂眷祐之情。  
儻率勵於翹勤，必導迎於景貺。臣等式  
循科法，備舉明科，壇開預夕之嚴，詞  
吐中情之切。上資家國，普濟幽明。

先期齋範之行，倣載真庭之啓，驛龍上  
奏，羽蓋分馳，鑒神壇之。權輿示天，  
威於咫尺。保全釐事，將覃及於人  
天；克舉熏修，庶雄成於志願。披誠  
伊始，隕祉有初，弟子詞誠，謹當宣示。

宣詞。

諦詳詞語，灼見至誠。磬純意以

彌勤，望真旂而乃睭。霞裾旅集，雲篆  
數披，縟壇款劍珮之臨，玉帛轉旌幢之  
影。儼珍饈而侑供，酌醴虞以交神。  
鍾虞奏音，與信詞而並發；爐香騰氣，  
隨馨德以升聞。諒冥感之交通，獲上  
靈之昭應。臣等備員攝事，按式宣科，  
先取陰時說戒，以今建壇為始，敷行法  
事。伏乞太上三尊，十方衆聖，玄中大  
法師，應感真靈，勅勒監齋曹屬、土地  
真官，載肅威神，式嚴壇宇，用僊雲駢  
之集，以迎天仗之來，使邪穢蕩除，埃  
氛遠隔，宇宙澄寂，八風不翔。令臣等  
神氣不遷，思念□感，啓奏上達，成就  
齋功。須明且清曉，依法行道，續以啓  
聞。

發願。

都講舉，存神燒香。  
高功復爐。

香官使者、左右龍虎君、侍香諸靈  
官，當令臣向來宿啓建壇之所，自然生  
金液丹碧，芝英百靈，衆真交會，在此  
香火爐前。當願螳誠上達，鳳輦下臨，  
察其五蘊之情，畢乃一壇之願，使灾不  
生而禍不作，壽彌久而福彌昌，厥子厥  
孫，轉榮轉貴，十方仙童玉女，接待蘭  
煙，傳臣向來所奏之誠，速達徑御至真  
無極大道、三清上聖、昊天金闕玉皇上  
帝御前。

知磬舉，出堂頌。

出戶，引至六幕堂。

道門科範大全集卷之七

# 道門科範大全集卷之八

廣成先生杜光庭刪定

## 消災道場儀

### 設醮行道

都講舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

都講舉，鳴法鼓二十四通。

### 高功發爐

無上三天玄元始三炁，太上老君，

召出臣等身中三五功曹，左右官使者，

左右捧香，驛龍騎吏，侍香金童，傳言

散花玉女，五帝直符，直日香官使者，

各三十六人出。出者嚴裝顯服，冠帶

垂纓，關啓此間土地、方域神真。臣今

設醮朝修，謹奏爲入意，其諸丹悃，具載疏文，願得太上十方正真生炁，靈寶瑞光下降，流入臣等身中，令臣所奏之誠，速達徑御至真無極大道、三清上聖、昊天金闕玉皇上帝御前。

都講舉，請稱法位。

具位臣某與合壇官衆等，謹同誠上

啓，虛無自然元始天尊，太上玉晨大道

君，太上金闕老君，太上昊天玉皇上

帝，九皇至尊，十方靈寶天尊，諸天大

帝，三十六部尊經玄中大法師，上相上

宰，上保上傅，三官五帝，十一大曜星

君，十神太一真君，南斗六司真君，北

斗七元星君，周天乾象二十八宿，十二

宮神，三百六十五度諸天列宿，本命元

辰，天曹職司，九天真宰，三山五嶽、福

地靖廬、厚地洞宮、嶽瀆主宰，三界應

感，一切真靈。臣聞玉天嚴遠，難陞浩

劫之家，金洞渺清，徒仰素靈之館。

奧尊帝而在上，握化紀以居中。啓十

方無礙之心，應物而動；號三界大慈

之父，視人如傷。俯仰鬱羅之臺，卷舒

投芥之劫。回瞻萬兆，悲晉晷之蜉

蟬；俯盼九塵，嘆漢宮之螻螿。自惟下俗，分絕仙階，益憑受著之科，詳罄精微之懇。今有某嚴持信幣，密款仙庭，冀天鑒之下觀，察塵情之片善。伏願九清至聖，離曲密之華宮；十極元皇，從飛虛之法駕。百億天丁，後轡丹鸞；千二官君，前迎翠輦。擲火萬里，下呼陽而召陰；旋香三輪，上出日而入月。極東遊於熾水，盡西景於虞汧，南造朱陵之宮，中盤黃凝之府，北盡夜城之闕，下殫丘寒之泉。至於魯稱教父，由太極之從行；西號世尊，自延真而密侍。元始符命，疇敢不祇，俯傾心請之誠，仰望雲臨之駕。臣等與齋官某，無任欽竚之至，稽首頓首再拜，奉迎聖駕。

降兩班聖位。

三界衆真，醮筵列聖，向伸拜請，

諒沐光臨。請各整於僊班，共祇迎於

帝馭。

降帝，雲輿。

鸞輿至止，鶴駕臨軒，與醮列真，

如儀朝禮。朝禮既周，請陞醮席，禮官

上香，設拜初進酒。

知磬舉，散花，奏樂。

具位臣某與臨壇官衆等，謹重誠上啓，三清上聖，寶界真靈。竊以一元布景，本無高下之私；萬兆肖形，盡育清和之炁。既死生之寢遠，遂好惡之森繁。穢身縱溺於沉迷，大道每垂於善貸。或罪根之彌甚，慮陰責之潛加。苟悟百非，即消萬禍。今弟子某識神冥滯，營魄震驚，由浩劫以淪胥，亡元靈而奔躁。不攀覺樹，樂登於炎鋒；不契真庭，甘焚於火宅。六曹縱逸，三業纏綿。迪惟高聖之宣慈，大庇含生而開度。今弟子某皈道自首，祈天博容。伏乞至聖上靈，高真大帝，垂恩度厄，錫命除殃。解片體之陰愆，除億曾之冥錄。閱罪先期於冰釋，迎釐次竚於雲臻。俯伏對揚，屏營待報。欲陳詞意，仰進丹闈。臣雖已考詳，尚虞舛駁，輒冒天禁，戰悸申聞，齋意詞誠，謹當宣奏。

宣詞。

按如詞言，文理甚切。披陳血膽，

傾寫精誠。俯伸臣子之誠，庶盡謙恭之分。仰乞諸天上聖，三府威靈，俯賜威光，洞垂昭鑒。伏願齋功紀籍，道果資身，增命祿於將來，保椿齡於向去。仰荷真靈之德，將祈福祐之恩。臣與醮官等，無任懇祈之至，再拜上香，酒陳亞獻。

奏樂。

臣謹重伸，上啓九清上聖，十極高真，合座應感，一切真靈。臣聞玉帝鑒觀，金真伺察，感群生之布款，采庶品以流恩。上士希仙，即萬真而獎就；善人徼福，乃百順以妙嚴。真貴精微，事符響答。今弟子某騰詞清夜，驛意紫閣，爰啓誠心，覬膺靈貺。伏願解除世網，進補仙階。如許映全家，俱入華陽之館；類劉綱盡室，溥陞單綠之天。陰陽之數已逃，生死之根永謝。或干利仕使，亦踐於崇高；或計資儲使，亦豐於貨殖。尊卑富壽，中外興昌。幽明息訴訟之冤，出處有亨嘉之美。慶均嗣續，惠及親疏。水火兵賊之灾凶，無侵閭里；夫婦女男之否厄，不犯形

軀。庶保生全，永嚴香火。臣與醮官等，無任激切之至，再拜上香，酒陳終獻。

奏樂。

臣謹重誠上啓，醮筵感降，三府真靈。臣聞太極肇分，二儀列高卑之象；元精既散，五行推變化之方。一寒一暑而歲成，一陰一陽而道立，火炎而雨潤，雷動而風行。生之成之，盡出於陶鎔鼓舞；動者植者，莫逃於消息盈虛。理有盛衰，時有損益。於坎則歸根復命，於艮則反始成終。是以陽生必自於北方，帝出乃由於震地。蓋一元之所始，寔萬化之所宗。故辰極端然居中，則衆星所以拱北，發天地好生之德，運陰陽不測之神，恢張出入之機，總覽生成之柄。況人之禍福，與時之盛衰，悉在統臨，盡由宣納。設醮弟子某，久荷生成之德，肅嚴香火之誠，敢盡懺穢，恭伸懇請。念天人之交可畏，唯善是親，諒神明之德無私，至誠可感。願霈慈悲之澤，爲收悔謝之誠。臣與醮官等，無任激切之至，再拜獻湯。



奏樂。

重稱法位。

具位臣某與臨壇官衆等，謹重誠上啓，大羅九皇至尊，十方上聖，三界應感，一切真靈。臣聞黷則不告，聖人垂簡易之文；天且弗違，至道演披陳之典。臣等欽崇上聖，願被靈恩，敢不淨穢丹元，洞防司殺，奉明科而視禮，約仙禁以踐言。一日告盟，百身無改。今則法事粗息，罄寶月於洪儀；夜如何其，落銀河於清漢。鳳冠燈焰，將欲暗於百卮；鵲尾爐煙，時已然於千和。洞章八闕，玉酒三鍾。燎朱火於天錢，即歸空際；促瓊鐘於仙籟，將返霄間。玉節邈迤於紫虛，寶蓋飄颻於碧漢。向還玉京者，無極之尊帝；復昇金闕者，太上之真皇。衆靈咸從於丹轅，列聖皆驂於紫策。傍飛月鳳，指洞室以分驅；控馭雲龍，瞰滄溟而下邁。神司復職，將吏還司。委釐福以充庭，敞靈光之在目。至於生生萬彙，皆均樂育之私；寂寂九幽，盡被超昇之澤。臣等凝瞻法從，結想太空，極恨塵波，難

留聖躅。臣與醮官等，不勝攀戀之至，奉送聖駕。

知磬舉，送聖頌。

都講舉，存神燒香。

香官使者、左右龍虎君、侍香諸靈官，當令臣設醮朝修之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天金闕玉皇上帝御前。

舉寶花圓滿天尊，奏樂。

送神，化財，向來，回向，禮畢。

道門科範大全集卷之八

## 道門科範大全集卷之九

廣成先生杜光庭刪定

### 消災星曜儀

#### 散壇行道

法事陞壇如式。

都講舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

都講舉，鳴法鼓二十四通。

高功發爐。

無上三天玄元始三炁，太上老君，

召出臣等身中三五功曹，左右官使者，

左右捧香，驛龍騎吏，侍香金童，傳言

散花玉女，五帝直符，直日香官使者，

各三十六人出。出者嚴裝顯服，冠帶

垂纓，關啓此間土地方域神真。臣今設醮朝修，謹奏爲入意，其諸丹悃，具載疏文，願得太上十方正真生炁，靈寶瑞光下降，流入臣等身中，令臣所奏之誠，速達徑御至真無極大道、三清上聖、昊天金闕玉皇上帝御前。

請稱法位。

具位臣某與醮壇官衆等，謹同誠上啓，虛無自然元始天尊，太上玉晨大道君，太上金闕老君，太上昊天玉皇上帝，九皇至尊，十方靈寶天尊，諸天大帝，三十六部尊經玄中大法師，上相上宰，上保上傳，三官五帝，十一大曜星君，十神太一真君，南斗六司星君，北斗七元星君，周天乾象二十八宿，十二宮神，三百六十五度諸天列宿，本命元辰，天曹職司，九天真宰，三山五嶽、福地靖廬、厚地洞宮、嶽瀆主宰，三界應感，一切真靈。臣聞昔在延康，氣未分於清濁；肇判太極，形乃正於方圓。一生二而三生三，地法天而天法道。上羅星斗，下列山川。三清爲衆聖之尊，四府受萬靈之職。杳冥之外，恍惚

之中，或結煙以成宮，或聚雲而作殿。群仙羅列，上朝浩劫之尊；萬象回旋，高拱紫微之帝。以至大千沙界，無極神鄉，府有泉曲之名，山有羅鄩之號。官則掌於天地水，局則分於左右中。三十六曹，二十四獄，杳杳鼇岫，浩浩鵬溟。鯨揚波而噴雲雷，蜃吐霧而成樓閣。金臺玉觀，隔弱水以無邊；蛟室龍宮，鎮深淵而莫測。陽間衆聖，廟食尊神，誠能禦於大菑，或以化而勤事，黃帝正名，百物后土，列位九州。乃至郡邑之封，城隍之守，爲國家者，有社稷焉，載於祀典之文，合於聖王之法。是以太虛清朗，列宿熒煌，燈交蘭芷之光，香裊沉檀之炷。伏望鸞驂鶴馭，翩聯齊下於遙天；風馬雲車，絡繹俯臨於凡界。臣與代禮官等，謹稽首再拜，奉迎聖駕。

降兩班聖位。

三界衆真，醮筵列聖，向伸拜請，諒沐光臨。請各整於仙班，共祇迎於帝馭。

降帝，雲輿。

鸞輿至止，鶴駕臨軒，與醮列真，如儀朝禮。朝禮既周，請陞醮席，禮官上香，設拜初進酒。

知磬舉，散花，奏樂。

具位臣某與臨壇官衆等，謹重誠上啓，三清上聖，寶界真靈。臣聞鬱羅蕭臺，太上所居之處；大浮黎土，天尊說法之時。感一國以傾心，召十方而詣座。初登獅子之上，次入寶珠之中。接引衆生，敷揚妙道。始於一遍，則聾病皆愈；終於十回，則枯骨成人。四炁朗清，悉神光於宇宙；五色鬱勃，益仙仗於虛徐。自是正法恢張，真詮流布，上以消於災變，下以度於人民。兩曜無此而不明，二儀無此而不立，非真人莫之能悉，惟上士可以力行。若夫太上降於周初，天師生於漢世，傳拜表上章之法，示建齋設醮之儀，可謂炳若丹青，昭然日月。顧慚臣等，謬列仙班，蓬心未達於玄關，蒿目難窺於聖域。抱黃回紫，那曉於七液周流；出青入玄，豈明於二氣吐納。修真既昧，濟世爲先。念醮主某身處凡籠，心皈至道，

舉族齊莊之致禱，稽首皈命以迎真。伏惟天象高明，報應猶如於影響；凡情懇切，祈禳莫若於純誠。故黍稷以非馨，惟蘋蘩之可薦。所陳丹悃，具在詞文，仰對高真，謹當宣奏。

宣詞。

按如詞言，誠深修奉。所宣膳奏，必獲感通。臣聞開明三景，敷落五篇，此乃謂之天根，故能保於劫運。元綱流演，既周而於十方；梵氣彌羅，乃生成於萬物。至於首出庶物，陰隲下民。司灾福，則有星曜以推移；示感應，則有雷霆之震怒。惟皇上帝，獨主御於群生；彼蒼者天，實覆臨於下土。故有修禳之法，以爲醮謝之方。醮主某伏念性本恫恻，生爲假借，託聖主休明之運，染中華禮義之風。貪嗔癡，豈免於過訖；身口意，寧無於罪咎。爰從多劫，乃至今生，或事君以未忠，或養親而不孝，捨慈捨儉；或違三寶之文，行盜行姪；或犯九真之戒，愛憎在念，諂曲存懷，指天地以詛盟，引神祇而呪誓。貿遷交易，惟利己以虧人；動作

施爲，輒乖真而背道。俯逐走獸，仰射飛禽，縱殺生於刀几之間，恣懽樂於杯盤之上。遂使業深滄海，罪積丘山，三尸奏於上穹，五帝言於地府。司命奪算，不善而有餘殃；天道禍淫，獲罪而無所禱。今茲懺悔，並願消除。仰憑太上之恩，俯赦多生之罪。自今已往，寧忘改過之心；來者可追，庶獲自新之路。臣與醮官等，無任激切之至，再拜上香，酒陳亞獻。

臣某等，謹同誠上啓，三清上聖，寶界真靈。臣聞大道無形，強名曰道。萬物歸而不爲主，百姓用而莫能知。到襄城之野，則七聖皆迷；聽東郭之言，則九年大妙。副墨初開於洛誦，玄冥得自於參寥。方求魚，則未可以忘筌；欲盡意，則莫先乎立象。然後知色不色，玄覽可以無疵；觀空亦空，虛室從而生白。盡性則始於日損，復命則終於無爲。入衆妙門，離諸疑網。三十六部，五千餘言，或傳受於人間，或祕藏於天上。崇奉敬禮者獲福，輕泄漏慢者招殃。醮主某重念草芥微

生，昆蟲薄類，望高穹而注想，瞻碧落以投誠。猶獺祭魚，顧有感通之德；如葵向日，惟傾祈仰之心。所以誦三洞之經文，伸三三時之香火。璇璣皆轉，而諸天齊到；琳琅振響，而萬神皆聽。託茲甚重之功，求介不回之福。上消陽九之數，下禳百六之灾。長幼康寧，內外清肅。上生監簿，標名姓於丹臺；注算真君，增壽年於青簡。長生久視，日富月昌，享五福之全躋，降百年之有永。必有餘慶，允符大易之文；消諸不祥，克叶仙經之語。臣與醮官等，無任懇祈之至，再拜上香，酒陳終獻。

奏樂。

具位臣某與臨壇官衆等，謹同誠上啓，虛無至聖，三界群真，恭望洪慈，洞回昭鑒。臣聞至道宏深，叩之匪易。真慈杳邈，格以甚難。況蒙降鑒之私，無殆吉蠲之薦。矧敢施薄而望，重在誠詞。切以志慙，固有瀆於聖聰，願少回於真聽。醮主某叨生之後，惟善是從。慮三業之愆非，玷列曹之筆牘。星文

會合，災數當躔。若非密布於祈禳，何以有干於赦宥。臣等謹依科式，嚴列詞情，沐浴身心，精誠關奏，冀升元極，永副凡情。乞爲醮主某上消天災，下散地禍，解除一年之內、四季之月，五星行度，四柱相刑，不祥一切之災。貴使壽算遐長，如松椿之有永；災屯不作，若蘭蕙之馨香。門闕光華，子孫榮盛，輯寧景化，沐詠淳風。三光明照於上穹，九稼滋豐於下土。邊烽罷警，荒徼歸仁。山川效祥，神明會福。三塗六趣，俱息幽牢。動植飛沉，咸均養育。天司地府，月職幽僚，嶽瀆山川，神明正秩，揚道風而助化，蕩邪沴以安人。上願天地節而四時成，陰陽和而萬物遂。巽風坎雨，每潤浹於田疇；旱魃水妖，無侵凌於分野。鬼邪滅爽，時疫不敢流行；神明護門，怪異自然消伏。溥天率土，壽域春臺。臣等無任恭虔，再拜獻湯。

奏樂。

重稱法位。

具位臣某與臨壇官衆等，謹同誠上

啓，大羅九皇至尊，十方上聖，三界應感，一切真靈。臣聞上極圓羅，下窮方載。無邊列聖，有位真仙，或領金闕瓊宮，或治酆都岱嶽，或居河海，或主壇祠。其降也，浮空而來；其去也，不行而至。萬騎齊動，擁儀仗之自然；九鳳交鳴，駕風雲而迅速。臣等仰瞻雲馭，已在青霄，徒切傾心，謹當拜送。

知磬舉，送聖頌。

都講舉，存神燒香。

香官使者、左右龍虎君、侍香諸靈官，當令臣設醮朝修之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天金闕玉皇上帝御前。

舉寶花圓滿天尊，奏樂。

送神，化財，向來，回向，禮畢。

道門科範大全集卷之九

### 道門科範大全集卷之十

廣成先生杜光庭刪定

#### 靈寶太一祈雨醮

此醮不關涉九皇。凡信，止奏碧玉宮。十二分道場，依後壇圖，可使十二分上等紙札，不許公吏上階與事。此醮大有感應，可作十二位座位，不許苟簡。降真香、茆香、沉香、龍涎香、清木香，不用檀香，有礙天條，違者奪算。

#### 靜夜行道

法事陞壇如式。

都講舉，各禮師存念如法。

高功宣衛靈呪。

青陽虛映，耀日回靈。神虎辟邪，飛天流鈴。摧奸滅試，萬魔束形。九微迴道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，大道興行。慶雲流布，合景黃庭，和與道合真。

都講舉，鳴法鼓二十四通。

高功發爐。

無上三天玄元始三炁，太上老君，召出臣法衆等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝，關啓此間土地正神。臣今靜夜，燒香行道，謹有某州某，伏爲當境，自屆陽春，久愆膏雨，夏云自屆長羸，久愆甘雨。秋云自屆商秋，久愆嘉雨。請臣等於某處，開建靈寶太一祈雨道場，罷散設醮一十二分，仰祈真造，俯察愚衷，施甘澤以霽流，副黎元之涸望。其諸誠懇，具載青詞，願得太上十方正真生炁下降，流入臣等身中，令臣所啓之誠，速達上清紫微碧玉宮、太一大天帝御前。

都講舉，請稱法位。

具位臣某與臨壇官衆等，謹同誠上啓，上清紫微碧玉宮、太一大天帝，紫微碧玉宮內院、左仙龍王，紫微碧玉宮內院、右仙龍王，太一真官天順君，太一清靈寶川真人，東嶽天齊仁聖帝，江瀆昭靈孚應威烈廣源王，內院直事一使者，內院直事二使者，內院直事三使

者，日直功曹，當所土地，三界應感，一切威靈。臣聞五方雲篆，實保家寧國之先；三洞明科，迺濟物安民之要。人天仰賴，今古攸遵。上調列宿之差躔，下應群生之瀝禱。切惟當境，自屆某時，雨既愆期，稼將就槁，憂方深於溝壑，功莫遂於田疇。仰惟上帝之好生，忍視下民之就死，故紓誠懇，冀獲殊休。伏願天鑒順臨，道恩善貸。雲升氣上，指揮山澤之靈；甲拆勾萌，沐浴江河之潤。凡有懇悃，敢不上聞，齋意心詞，謹當宣奏。

宣詞。

請官上香。

詞意具宣，齋誠必享。臣聞龍之飛躍，運變化之無方；物有始終，顧生成之有待。既籲天之瀝懇，將指日以迎休。以今陞壇行道，請法衆等運茲初捻上香，願此香煙，騰空徑上上清紫微碧玉宮，供養太一大天帝，合坐高真。臣等歸身、歸神、歸命大道，願以是捻香功德，奉爲某祈求雨澤，溥濟農耕，願推變化之神，用救旱乾之歲。沛然下

雨，大爲三日之霖；倬彼甫田，遂獲千倉之稼。今故燒香，自皈依師尊大聖衆至真之德。得道之後，升入無形，和與道合真。

臣聞一炁肇分，群生以立。運五行而化育，幹四序以推遷。開國承家，仰聖真之垂範；安人利物，惟至道之流恩。故太上開祈謝之門，俾下民有號呼之路，適遇旱乾之變，恐妨播殖之功。州縣官云：嗟吏治之不良。下士民云：恐數否之未亨。愍民饑之無告，雖遍求於靈迹，尚未作於油雲。恭叩天慈，乞回洪造。以今陞壇行道，請法衆等運茲二捻上香，願此香煙，騰空徑上上清紫微碧玉宮，供養太一大天帝，合坐高真。臣等歸身、歸神、歸命大道，願以是捻香功德，奉爲某淨嚴公宇，敷設壇場，祇奉高真，宣揚祕典。冀動清明之鑒，潛消亢旱之災。興彼慈雲，大霈霽霑之澤；成斯嘉穀，遂爲富庶之秋。今故燒香，自皈依師尊大聖衆至真之德。得道之後，昇入無形，和與道合真。

臣聞五行相沴，茲水旱之爲災；萬

物流行，乃榮枯之有數。比愆甘雨，將害豐年。非殫蠲潔之誠，曷冀霑濡之澤。以今陞壇行道，請法衆等運茲三捻上香，願此香煙，騰空徑上上清紫微碧玉宮，供養太一大天帝，合坐高真。臣等歸身、歸神、歸命大道，願以是捻香功德，奉爲某夤奉真靈，請求惠應。願星光回照，道廕興慈。勅彼百神，助舉施生之職；沛然三日，願觀沾足之期。今故燒香，自皈依師尊大聖衆至真之德。得道之後，昇入無形。

唱方，懺方。

臣聞至真大聖，霈惠澤以濟人；無極元尊，扇祥風而育物。是以十回演化，九等垂科，開廣大之法門，洒慈悲之甘露，示之宥罪，許以求哀。今某肅建道場，虔齋法信，皈依上清紫微碧玉宮、太一大天帝，闔坐高真。伏願尋聲赴感，應念垂慈，官吏云：吏積愆尤。士民云：俗有奢淫。乞少寬於威怒，民罹饑饉，冀終格於豐登。齋功廣被於無邊，法雨溥霑於一切，得道之後，昇入無形，和與道合真。

知磬舉，三啓，三禮。

重稱法位。

具位臣某等，謹同誠上啓，上清紫微碧玉宮、太一大天帝，闔坐高真。臣聞上天亢旱，瞻雲漢之昭回；下土焦熬，歎水源之枯竭。不見鸛鳴之候，但懷狼顧之憂。虔命羽流潔嚴，公宇珍供演揚奧典，冀沐殊休，邈天德之未回，惕危衷而增懼。今則再嚴法會，肅建壇場，仰百靈降鑒之恩，俟一念潛通之應，則上明天帝大慈之澤，下副臣等請禱之誠，謹啓以聞。

知磬舉，十二願。

都講舉，存神燒香。

香官使者、左右龍虎君、侍香諸靈官，當令臣道場之所，自然生金液丹碧，芝英百靈，衆真交會，在此香火爐前。上願高真降福，率土蒙恩，十方仙童玉女，接待香煙，傳奏向來所啓之誠，速達上清紫微碧玉宮、太一大天帝御前。

知磬舉，詠小學仙讚。

道門科範大全集卷之十

道門科範大全集卷之十一

廣成先生杜光庭刪定

靈寶太一祈雨儀

設醮行道

法事陞壇如式。

都講舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

都講舉，鳴法鼓二十四通。

高功發爐。

無上三天玄元始三炁，太上老君，

召出臣等身中三五功曹，左右官使者，

左右捧香，驛龍騎吏，侍香金童，傳言

散花玉女，五帝直符，直日香官，各三

十六人出。出者嚴裝，關啓此間土地

里域，真官正神。臣今設醮行事，謹有某州某，伏爲當境，自屆陽春，久愆膏雨，夏云：自屆長羸，久愆甘雨。秋云：自屆商秋，久愆嘉雨。請臣等於某處，開建靈寶太一祈雨道場，罷散設醮一十二分位。仰祈洪造，俯察愚衷，施甘澤以霽流，副黎元之涸望。其諸誠懇，具載青詞，願得太上十方正真生炁下降，流入臣等身中，令臣所啓，速達上清紫微碧玉宮、太一大天帝御前。

高功出，受法錄治職靈官。

謹出臣等身中、五體真官功曹吏出，上仙上靈、二官直使、正一功曹、左右官使者、陰陽神決吏、科車赤符吏、罡風騎置吏、驛馬上章吏、飛龍騎吏等官，各二人出。出者嚴裝顯服，冠帶垂纓，整其威儀，駐立臣前後左右。左官使者持幢在前，右官使者建節在後，陽神決吏立左，陰神決吏立右。狼吏虎賁，察奸勾騎，天驪甲卒，天丁力士，咸受臣口中詞語，分別關啓此間土地正神，監察考召。甲子諸官君將吏等，同誠上啓，上清紫微碧玉宮、太一大天帝

陛下，陰陽主宰，一切威靈。臣等夙慕真風，早依至教，敢殫誠悃，祇叩穹旻。今某以節候爽和，致愆雨澤，實吏民之憂懼，遂懇禱以傾虔。昭薦吉蠲，冀諸感應。今則嚴科云畢，芳醮嗣陳，諒盼靈以丕臨，鑒齋明之允格。庶均道廢，溥佑蒼黔。功曹使者，飛龍騎吏，以次分別，速得上達。臣等誠惶誠恐，頓首頓首，激切之至，謹啓以聞。

都講舉，請稱法位。

具位臣某與臨壇官衆等，謹同誠上啓，上清紫微碧玉宮、太一大天帝，紫微碧玉宮內院、左仙龍王，紫微碧玉宮內院、右仙龍王，太一真官天順君，太一清靈寶川真人，東嶽天齊仁聖帝，江瀆昭靈孚應威烈廣源王，內院直事一使者，內院直事二使者，內院直事三使者，日直功曹，當所土地。臣聞造化至仁，生物必思於成物；吏民無告，呼天終冀於回天。仰紫微北極之垣，遡碧玉上清之境。將祈嘉澤，俯罄凡衷。伏望聖慈，愍臣有救時之心，恕臣以瀆聖之罪，尊臨寶座，曲鑒丹衷，俯伏天

階，奉迎仙駕。臣等無任瞻天，望聖激切。屏營之至，稽首再拜。

降聖，上香，獻茶。

具位臣某等，謹同誠上啓上清紫微碧玉宮、太一大天帝，闔坐高真。臣聞天地之於萬物，均於生成；陰陽之於四時，不無差忒。念農民之良苦，乃雨澤之猶稽。禾稼將至於焦枯，倉箱曷望其豐積。貧窮所迫，將盜賊之肆行；流轉無歸，或父子之不保。顧陰陽之爲鑿，豈天地之不仁。政或乖方，吏則有罪。但知省懼，猶冀哀矜。伏願上帝鑒觀，列真降格。驅六丁之將吏，挽彼天河；同四海之龍王，霑茲法雨。普霑一切，大慰有情。臣法衆等無任，稽首再拜，上香初獻酒。

舉玉清樂，奏樂。

臣等伏聞忠臣拜井，地湧飛泉；孝子居廬，庭零甘露。夫一節可稱，尚關於聰聽；何萬民無告，獨外於仁私。惟其神之所潛，是以應之如響。敢不肅懷祇懼，對越威靈。伏願廣推從欲之仁，大布好生之德。三年耕，九年

蓄，似古之人；五日雨，十日風，樂今之歲。凡有懇悃，敢不奏聞，醮意青詞，謹當宣奏。

宣詞。

按如詞言，已伸宣奏。精誠激切，冒瀆天聰。臣等伏聞雨施雲行，造化有無方之益；木饑火旱，豐凶無一定之常。麗乎數者，雖不可逃；享于誠者，庶幾易動。矧食貨係民生之本，而陰陽惟人事之占，思庶政之乖和，宜常暘之示譴，敢忘恐懼修省之念，更罄懇禱歸依之誠。所冀忱恂，少通淵妙。惟皇上帝，以生育長養而為功；哀此下民，俾鰥寡孤獨而得所。庶寬官吏之責，實賴神明之休。臣與醮官，無任傾虔，稽首再拜，上香亞進酒。

舉上清樂，奏樂。

臣等謹重誠上啓上清紫微碧玉宮、太一大天帝，合座高真。臣聞道判三才，有物總歸於覆載；天經七政，群生成在於照臨。妙若難名，誠焉可格。切念一春夏秋冬不雨，千里如焚。耒耨之利，束手而無所施；山川之神，乞靈

而莫之應。惕然恐懼，靡所歸投。是用恭叩紫宸，畢敷丹悃。伏願聖真無間，神化密移，仰大帝之庭，鼓雷霆而潤風雨；俾曾孫之稼，多稷黍而如茨梁。載歌豐年，永安樂土。臣與醮官，無任激切懇禱之至，稽首再拜，上香終獻酒。

舉太清樂，奏樂。

臣謹重誠上啓上清紫微碧玉宮、太一大天帝，闔坐高真。臣聞天有大德，德本好生。民罔常懷，懷於樂土。若天不雨則苗盡槁，年不登則民有饑。念千里之如焚，憫三農之告病，歲末期於無恙，民敢釋於隱憂。伏願攝彼威光，沛為慈惠。乘時救旱，施霖溥濟於方輿；俾俗蒙恩，擊壤咸歌於帝力。所有疏文，謹當宣讀。

宣疏。

都講舉，重稱法位。

具位臣其等，謹同誠上啓太一大天帝，闔坐高真。臣聞峻若泰山，尚容拳石；注如滄海，終納細流。若蘋蘩蘊藻，可以薦神，則齋戒沐浴，亦能事帝。

荷神遊之肯降，整仙仗以言旋。禮不尚繁，既盡再三之瀆；神無常享，願施終始之恩。仰睇清霄，俯躬拜送。臣與醮官，無任攀戀之至，稽首再拜奠湯。

知磬舉，送神頌。

舉，存神燒香。

高功復爐。

香官使者、左右龍虎君、侍香諸靈官，當令臣設醮之所，自然生金液丹碧，芝英百靈，衆真交會，在此香火爐前。上願高穹降福，闔境蒙恩，十方仙童玉女，接待香煙，傳奏臣所啓，速達上清紫微碧玉宮、太一大天帝御前。

寶花圓滿天尊，化財。

向來，回向。

太一清靈寶川真人

太一真官天順君

紫微碧玉宮內院左仙龍王

上清紫微碧玉宮太一大天帝

紫微碧玉宮內院右仙龍王

東嶽天齊仁聖帝

江瀆廣源王 錢公若在 事南岳蓋其境上之岳也 他境則易 為江則易南岳為之可也

道門科範大全集卷之十一

壇 圖

紫微碧玉宮內院左仙龍王  
紫微碧玉宮內院右仙龍王  
東嶽天齊仁聖帝  
上清紫微碧玉宮太一大天帝  
太一真官天順君  
太一清靈寶川真人



道門科範大全集卷之十二

廣成先生杜光庭刪定

祈求雨雪儀

啓壇行道

法事陞壇如式。

都講舉，各禮師存念如法。

高功宣衛靈呪。

東方：

九炁青天，明星大神。煥照東鄉，

洞映九門。轉燭陽光，掃穢除氛。開

明童子，號曰玄卿。備衛我軒，上對帝

君。收魔束妖，討捕兇群。奉承正道，

赤書玉文。九天符命，攝龍驛傳。普

天安鎮，我得飛仙，和與道合真。

南方：

三炁丹天，煥景流光。熒星轉燭，

洞照太陽。上有赤精，合契虛皇。開

明靈童，號曰華房。總統火兵，備守玉

堂。斬邪束妖，剪截魔王。北帝所承，

風火莫當。流鈴交煥，翊衛壇場。正

道流行，敢有巴狂。我享上功，坐運魁

西方：

七炁素天，太白流精。光耀金門，

洞照太冥。中有素皇，號曰帝靈。保

神安鎮，衛我身形。斷截邪源，王道正

明。宮殿整肅，三景齊并。道合自然，

飛昇紫庭。靈寶符命，普惠萬生。元

皇正炁，來合我身。功加一切，天地咸

寧，和與道合真。

北方：

五炁玄天，元始徘徊。辰星煥爛，

光耀太微。黑靈尊神，號曰層威。統

冠飛天，仙裙羽衣。備衛五門，檢精捕

非。敢有干試，豁落斬摧。玉符所告，

神真八威。邪門閉塞，正道明開。映

照我身，三光同輝。策空駕浮，舉形仙

飛，和與道合真。

中央：

一炁黃天，調理乾坤。陶鎔陰陽，

總統玄真。鎮星吐輝，流煥九天。開

光童子，號曰天璘。元炁陽精，焰上朱

煙。洞照天下，及臣等身。百邪摧落，

殺鬼萬千。中山神呪，普天使然。五

靈安鎮，身飛上仙，和與道合真。

舉，鳴法鼓二十四通。

高功發爐。

無上三天玄元始三炁，太上道君，

召出臣等身中三五功曹，左右官使者，

左右捧香，驛龍騎吏，侍香金童，傳言

散花玉女，五帝直符，直日香官，各三

十六人出。出者嚴裝顯服，冠帶垂纓，

關啓玄壇土地，方域神真。臣今宿啓告

齋，建壇歲事，謹奏爲入意，其諸忱悃，

已錄告聞，願得太上至真道炁，靈寶慧

光下降，流入臣身中，令臣所啓之誠，速

達徑御至真無極大道、昊天金闕玉皇

上帝御前。

請稱法位。

具位臣某與臨壇官衆等，謹同誠上

啓，虛無自然元始天尊，無極大道太上

道君，太上老君，混元上德皇帝，昊天

至尊玉皇上帝，上宮紫微天皇帝，中

天北極紫微大帝，聖祖上靈高道，九天

司命保生大帝，承天效法厚德光大后

土皇地祇，元天大聖后，五福十神太一

真君，三十二天帝君，東華、南極、西靈、北真、仙都、玉京、七寶、瑤臺、紫微上宮靈寶帝君，明皇道君，三十六部尊經玄中大法師，上相上宰，上保上傳，三皇五帝，十一大曜星君，天地水三官，北斗七元星君，二十八宿星君，九宮十精太一真君，北極四聖真君，水府扶桑大帝，暘谷神君，洞淵龍王，十洞五嶽，九江水帝，八海龍王，三河四海、五湖八澤、溪谷川源、名山洞府、靖廬福地、五方行雨龍王，風伯雨師、雷公電母、雲煙將吏，府界縣境、諸廟福神，三界應感，一切真靈。臣聞一氣凝精，渾淪未判；兩儀賦象，清濁迺分。遂普植於神靈，總範圍於造化。雲行雨施，雷動風馳，天地節而四時成，陰陽和而萬物遂。儻一極之未備，則庶咎以遄臨。今某伏爲當境：

春：爰屆芳春，尚愆甘澤，懼常暘之亢令，致農務之愆時。

夏：脩景常陽，油雲未霈，懼蘊隆之爲虐，致蕃啓之失時。

秋：序屆商秋，時愆嘉澤，在農田

之久望，慮年穀之不登。

冬：祈雪自屆嚴冬，未霽嘉雪，懼陰陽之失序，恐疫癘之興災。

是用祇潔華壇，吉蠲熏禱，冀精衷之昭格，迓冲貺之博臨，率霑優渥之恩，溥遂豐登之望。臣等敬遵科簡，恭薦齋誠，願賜鑒觀，克諧丕應，所啓玄感，上御至真無極大道御前。

唱方，禮方。

臣聞二儀肇判，裁雲篆於太虛；三洞闡微，括筌蹄於妙蘊。著靈壇之祕範，總薰事之令儀。凡露懇祈，必諧通感。伏念臣等稟質孱薄，涉道迂疏，早依樓觀之師，誤廁星簪之列。告盟之戒，或忤犯於金科；薦信之誠，懼難通於玉闕。伏願高真垂憫，上聖推慈，恕已積之僇違，許自新之勤恪。無聲無臭，庸敢怠於精思；有翼有嚴，冀克臻於靈感。今常暘稍亢，甘雨、嘉雪久愆，編民憂旱暵之灾，郡守、令尹軫焦勞之慮，式遵寶籙，崇啓清場。祈十日之順調，大霽嘉澤；庶三春之霑足，普潤農田；夏

云活套庶三農之霑足，普潤亢苗；秋云活

套庶九秋之霑足，咸樂豐年。祈雪云祈六出之飛翼，大霽嘉潤；庶三登之協兆，預慶康年。凡資動植之靈，盡荷生成之造。禍沉九地，福起十方。臣等志心稽首，禮謝無上虛皇至真三寶。

吟三啓，宣真文，三禮舉，稱法位。

具位臣某與合壇官衆等，謹同誠上啓，大羅無上三清上帝，太上昊天玉皇上帝，九品高真，十方上聖，諸天諸地，真經真師，圓穹上象，天府列真，厚地洞宮、嶽瀆主宰，扶桑大帝，暘谷神君，洞淵龍王，九江水帝，十二河源，興雲致雨、雷電風伯，諸廟神祇，城隍社令，三界應感，一切真靈。臣聞圓清宅粹，方厚儲精，咸宰制於神靈，總權衡於造化。雖吉凶之有類，蓋禍福之無私。是以冲科存請禱之文，真教闡禳禳之範，克誠是享，至感斯通。今當境伏爲甘雨、瑞雪愆期，亢暘爲沴，匪違寧處，克罄齋莊，仰叩高真，俯傾丹款。伏願重陰遵候，霈澤膺時，致稼穡以豐登，底軍民之康樂。臣叨遵師訓，蚤佩真符，

凡露薰祈，理難裁抑，況奉詞旨，敢不上聞，啓壇詞誠，謹當宣奏。

### 宣詞。

按如詞旨，備極傾虔，爲宣化以承流，故長民而輔世。苟一物有失其所，而大懼豈安於心，恐刑罰不當，而人起怨嗟。或撫宇乖方，而事至煩擾積悔。尤之浸久，致時序以愆常。於是熏潔靈場，稽參寶典，虔省躬而引咎，祈轉福以及民。仰惟三境高真，九天上聖，恕其既往，許以自新，調正陰陽，均和律令，庶良疇之沃潤，俾多稼之順成，郡縣妥安，軍民康樂。臣等恭依齋法，齋露啓聞，冀精意之感通，迓厯休之來格，影隨響答，願滿功圓。須明旦虔誠，依法行道，續以啓聞。

### 發願。

舉，存神燒香。

高功復爐。

香官使者、左右龍虎君、侍香諸靈官，當令臣向來啓壇行科之所，自然生金液丹碧，芝英百靈，衆真交會，在此香火爐前。當願十方仙童玉女，接待

蘭煙，傳臣向來所啓之誠，速達徑御至真無極大道、昊天至尊金闕玉皇上帝御前。

知磬舉，出堂頌。

出戶，引至六幕堂。

道門科範大全集卷之十二

## 道門科範大全集卷之十二

廣成先生杜光庭兌定

### 祈求雨雪道場儀

清旦行道

法事陞壇如式。

都講舉，各禮師存念如法。

高功宣衛靈呪。

乾宮隱聖，道本無名。坎符水德，流謙惡盈。良隅定止，化立崢嶸。震方起象，萬彙資生。巽中風動，群物仰成。離明設位，煥赫陽精。坤居厚德，茂育皆榮。兌金戢耀，蜿蜒素呈。碧波漶漫，鱗甲晶榮。八威召命，九炁司迎。神變無際，舒和衆靈。澁形騰躍，飛空振驚。煙雲虧蔽，周羅太清。霖霖甘澍，霽霽潤豐。不貴金寶，通惟至誠。能迴稔歲，濟彼農民。普天率土，永保咸寧，和與道合真。

鳴法鼓二十四通。

高功發爐。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝真符，直日香官，各三十六人出。出者嚴裝顯服，冠帶垂纓，闕啓玄壇土地，方域神真。臣今清旦，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓之誠，速達徑御太上無極大道、三清上聖、昊天玉皇上帝御前。

請稱法位。

具位臣某與臨壇官衆等，謹同誠上啓，虛無自然元始天尊，無極大道太上道君，太上老君，混元上德皇帝，太上開天執符御曆含真體道昊天玉皇上帝，紫微天皇大帝，中天北極大帝，聖祖上靈高道，九天司命保生天尊大帝，后土皇地祇，元天大聖后，五福十神太一真君，三十二天帝君，三十六部尊經玄中大法師，東華、南極、西靈、北真、仙都、玉京、金闕、七寶、瑤臺、紫微上宮，靈寶至真明皇道君，上相上宰，上

保上傅，三皇五帝，十一大曜星君，北斗七元星君，二十八宿星君，九宮十精太一君，北極四聖真君，扶桑大帝，暘谷神君，洞淵龍王，十洞五嶽，九江水帝，八海龍王，三河四瀆、五湖七澤、溪谷川源、五方行雨龍王，風雲雷電、陰陽主宰，府界縣境、諸廟神祇，城隍社令，三界應感，一切神靈。臣聞妙道難明，運三才於無間；至神莫測，宰萬物於有形。旁昭日月之明，肅震風霆之號，協四時而和象，鑒百善以降祥。惟德乃親，克誠是享。今某伏爲陰陽謬序，風雨、雨雪愆時，將害農田，實憂民疚，輒省循於匪德，懼尸素以貽殃。是敢夤露欽修，祇嚴禳禱，冀誕臻於嘉應，祈溥洽於鴻休。臣等叨佩祕文，獲承師訓，夙殫疏禱，戒奉關行，所具詞誠，謹當宣奏。

宣詞。

按如詞言，精誠允達。臣聞道之爲用，蘊衆妙以若沖；神之格思，本無方而善應。惟齋明之虔恪，符真貺以丕臻，夙薦寶薰，上崇宸祐。以今清旦行

道，請法衆等運茲初捻上香，願此香煙，騰空上徹，供養十方無上道寶天尊。臣等皈身、皈神、皈命，首體投地，以是捻香功德，上祝當今皇帝陛下。伏願天庥滋至，寶曆斯昌，鞏基構於億年，茂本枝於百世。五風十雨，靡愆合序之和；四隩萬邦，共戴承流之化。今故燒香，自皈依道尊大聖衆至真之德。得道之後，保天長存，和與道合真。

以今清旦行道，請法衆等運茲二捻上香，願此香煙，騰空上徹，供養十方無上經寶天尊。臣等皈身、皈神、皈命，首體投地，以是捻香功德，保綏郡宰，迨及屬僚。伏願妙道凝休，至神輔德。愷風綿遠，一麾敦坐肅之良；甘雨應期，百里頌鳴琴之化。官聯雅協，民瘼咸蠲，陰陽無愆伏之災，稼穡有豐穰之望。今故燒香，自皈依經尊大聖衆至真之德。得道之後，保天長存，和與道合真。

以今清旦行道，請法衆等運茲三捻上香，願此香煙，騰空上徹，供養十方無上師寶天尊。臣等皈身、皈神、皈

命，首體投地，以是捻香功德，保佑斯民，迨茲合境。伏願帝暉下燭，道陰俯周，介百順於幅員，殄三災於井邑。雨暘常若，提封無水旱之傷；禾稼多登，比屋有倉箱之慶。今故燒香，自皈依師尊大聖衆至真之德。得道之後，保天長存，和與道合真。

唱方，懺方，命魔。

舉，祈雨頌。

至道合元氣，陰陽育萬靈。下民多過犯。上帝降刑名。懇志勤朝懺，虔心悔杳冥。願當垂雨雪，洒潤遍無情。

三禮。

重稱法位。

具位臣某與合壇官衆等，謹同誠上啓，大羅無上三清上帝，太上昊天玉皇上帝，九品高真，十方上聖，諸天諸帝，真經真師，圓穹上象，列宿星辰，厚地洞宮，嶽瀆主宰，水府洞淵，興雲致雨，城隍社令，一切威靈。臣聞圓穹杳默，神化隱於無言；大道洪濛，元功運乎不宰。至於陰陽舒慘，天地密移，或診

氣之所侵，則因時而爲旱。靡有欽崇之典，曷伸請禱之誠。至忱則景貺丕臨，精感乃靈休乞格。今有某等，伏爲久愆甘雨，將害良田，將周華歲，未降祥雲，念守符於此邦，寔字民之爲務。徒祈求之匪應，每震恐而自思。或治人有暗於詔條，或察獄有差於刑罰，積茲悔吝，罔召和平。是用祇潔瑤壇，茂宣藥簡，敢側躬而謝咎，庶轉禍以爲祥。仰惟瓊闕高真，玉京上聖，十方真宰，三界威神，洞啓靈心，下垂慈施，驅靈隱元冥而呼屏翳，叱雲將而駕風師。大需甘膏，覃霑露潤。普降飛翼，覃霑嘉潤。幅員千里，潛消疫癘之虞；畎畝萬家，俱獲順成之望。上明天尊大慈之澤，下副臣等祈向之誠，謹啓以聞。

舉，十二願。

高功復爐。

香官使者、左右龍虎君、侍香諸靈官，當令臣向來清旦陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑

御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之十三

道門科範大全集卷之十四

廣成先生杜光庭刪定

祈求雨雪道場儀

臨午行道

法事陞壇如式。

都講舉，各禮師存念如法。

高功宣衛靈呪。

丹靈朱火，炎霞激風。赤輪剛運，

天光八衝。迸威包羅，交變萬方。流

金豁落，群魔滅蹤。辟奸破妖，明耀元

功。金符召制，躡雲策龍。謠歌慶會，

散花太空。神化宜運，四極安隆。伏

御帝前，罔有不恭，和與道合真。

舉，鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。

臣今午朝，陞壇行道，謹奏爲入意，其諸

忱悃，已錄告聞，願得太上十方至真道

炁，靈寶瑞光下降，流入臣等身中，令臣

所啓之誠，速達徑御太上無極大道、三

清上聖、昊天玉皇上帝御前。

請稱法位。

具位臣某與合壇官衆等，謹同誠上

啓，虛無自然元始天尊，無極大道太上

道君、太上老君，混元上德皇帝，太上

開天執符御曆含真體道昊天玉皇上

帝，紫微天皇帝，中天北極大帝，聖

祖上靈高道，九天司命保生大帝，后土

皇地祇，元天大聖后，五福十神太一真

君，三十二天帝君，三十六部尊經玄中

大法師，東華、南極、西靈、北真、仙都、

玉京、金闕、七寶、瑤臺、紫微上宮，靈

寶至真明皇道君，上相上宰，上保上

傅，三皇五帝，十一大曜星君，北斗七

元星君，二十八宿星君，九宮十精太一

君，北極四聖真君，扶桑大帝，暘谷神

王，洞淵龍王，十洞五嶽，九江水帝，八

海龍王，三河四瀆、五湖七澤、溪谷川

源、五方行雨龍王，風雲雷電、陰陽主

宰，府界縣境、諸廟神祇，城隍社令，三

界應感，一切神靈。臣聞上天之載，雖

曰蓋高；下民其咨，常加弗忍。或陰

陽之差序，遘風雨之愆常，厥有誠祈，

必昭靈感。今某爰自臨民千里，治政

六條，偶節候之爽和，雨云，雪云。致膏霖

之未霈，祥雲之未兆聿嚴齊拔，夤露懇悰，冀

甘澤之周覃，慶大田之豐稔。仰依道

廡，均被神休。臣等叨佩經科，獲遵教

典，凡伸請禱，敢不上聞，齋意心詞，謹

當宣讀。

宣詞。

詞旨具宣，齋誠必享。臣聞先天地

者大道，妙陰陽者至神，由精感之必

通，非忱辭之匪達。然三時行道，冀成

習坎之功；而六轡馳輪，已屆重離之

位。非馨斯格，明德是祈，奉祕錄以精

嚴，祝寶圖之綿遠。以今午朝，陞壇行

道，請法衆等運茲初捻上香，願此香

煙，騰空上徹，供養十方無上道寶天

尊。臣等皈身、皈神、皈命，首體投地，

以是捻香功德，上祝當今皇帝陛下。伏

願日星煥耀，龜鼎燕寧，頌聲長振於嵩高，寶壽永侔於斗極。雨暘常若，普天共載於凝和；兵革無施，率土洽臻於康靖。今故燒香，自皈依道尊大聖衆至真之德。得道之後，保天長存，和與道合真。

以今午朝，陞壇行道，請法衆等運茲二捻上香，願此香煙，騰空上徹，供養十方無上經寶天尊。臣等皈身、皈神、皈命，首體投地，以是捻香功德，保綏郡宰，逮及屬僚。伏願棠砌政平，柳庭訟簡，仁風揚於千里，惠澤洽於四民，奉天永固於年齡，報國益崇於福祿。五行協順，雨風無失度之愆；六氣均和，禾稼有多登之慶。今故燒香，自皈依經尊大聖衆至真之德。得道之後，保天長存，和與道合真。

以今午朝，陞壇行道，請法衆等運茲三捻上香，願此香煙，騰空上徹，供養十方無上師寶天尊。臣等皈身、皈神、皈命，首體投地，以是捻香功德，溥祐居民，迨茲境土。伏願灑蒼回睭，象緯垂靈，叱咤風霆，敷施雲雨。雪云六出

呈祥，重陰奠候，屏驕陽之灾侵，救旱歲之焦枯，三農共慶於豐和，比屋咸消於疫癘。今故燒香，自皈依師尊大聖衆至真之德。得道之後，永保長存，和與道合真。

唱方，懺方，命魔。

祈雨頌。

至道含元氣，陰陽育萬靈。下民多過犯，上帝降刑名。懇至勤朝禮，虔心悔杳冥。願當垂雨雪，洒潤遍無情。

三禮。

重稱法位。

具位臣某與合壇官衆等，謹同誠上啓，虛無三境至尊，十方醮筵列聖，恭望洪慈，洞回昭鑒。臣聞道生五太之先，彌綸無外；神在兩儀之表，運量莫窮。雖禍福自有基胎，應吉凶敏如影響。是以榮雪之祀，古人載之于禮經；齋醮之文，上聖垂之於科典。蓋式資於善應，豈特示於空言。臣等叨籍靈宮，濫師名教，爰遵寶蘊，祇建靈場。今某伏爲亢旱爲憂，嘉生失望，率正辭而薦信，躬謝過以祈恩。伏冀紫極高

真，清都列象，洞天嶽瀆，福地靖廬，遍高厚之神祇，總陰陽之主宰，無幽不達，有感皆通，盡驅江海之潛鱗，鬱布山川之佳氣。雲行雨施，三農收霽潤之功；春作秋成，百穀協用成之望。四民安分，千里同休，有生皆荷於覆容，無物不蒙於化育，上明天尊大慈之澤，下副臣等虔禱之誠，謹啓以聞。

舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來午朝陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之十四

# 道門科範大全集卷之十五

廣成先生杜光庭刪定

## 祈求雨雪道場儀

### 晚朝行道

法事陞壇如式。

都講舉，各禮師存念如法。

高功宣衛靈呪。

五星高耀，瑞氣飛浮。元始集神，

天地交周。玉符寶節，嘯命微幽。擲

火揚威，奸凶無留。萬魔振伏，紛葩却

消。摧怪滅惡，道炁周流。神光照夜，

陰翳俱收。萬神降格，扇景乘飈。羣

生咸遂，惠遍神州，和與道合真。

舉，鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇天帝天真，當召此間土地里域，真官正神。臣今晚朝，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御至真無極大道、三清上聖、昊天玉皇上帝御前。

請稱法位。

具位臣某與合壇官衆等，謹同誠上啓，虛無自然元始天尊，無極大道太上道君，太上老君，混元上德皇帝，太上開天執符御曆含真體道昊天玉皇上帝，紫微天皇大帝，中天北極大帝，聖祖上靈高道，九天司命保生大帝，后土皇地祇，元天大聖后，五福十神太一真君，三十二天帝君，三十六部尊經玄中大法師，東華、南極、西靈、北真、仙都、玉京、金闕、七寶、瑤臺、紫微上宮，靈寶至真明皇道君，上相上宰，上保上傅，三皇五帝，十一大曜星君，北斗七元星君，二十八宿星君，九宮十精太一君，北極四聖真君，扶桑大帝，暘谷神王，洞淵龍王，十洞五嶽，九江水帝，八

海龍王，三河四瀆、五湖七澤、溪谷川源、五方行雨龍王，風雲雷電、陰陽主宰，府界縣境、諸廟神祇，城隍社令，三界應感，一切神靈。臣聞天經地緯，總萬化以無私；陰慘陽舒，運五行之有序。蓋神功之默定，表殊氣以成和。物得由庚，時惟大順。今某祇膺宸命，來領郡符，務寬厚以臨民，效忠勤而許國。驕陽肆沴，甘澤、嘉雪愆期，懼爲政之過差，致厥殃之荐遘。竊惟衆教，具有真科，聿嚴省悔之修，夙露祈禳之請。臣等告盟之日，薦信以誠，凡預齋薰，益思蠲潔。況茲懇悃，敢不謦聞，爰有心詞，謹當宣奏。

宣詞。

按如詞言，具傾懇切。臣聞混元之教，先萬彙以化成；太始之尊，總百靈而制治。杳冥叵測，響答惟微。然薰禱之誠，仰千於覆燾；而芬馨之薦，敢怠於欽崇。茂祝殊勳，上崇睿算。以今晚朝，陞壇行道，請法衆等運茲初捻上香，願此香煙，騰空上徹，供養十方無上道寶天尊。臣等皈身、皈神、皈命，



首體投地，以是捻香功德，上祝當今皇帝陛下。伏願丕圖日煥，聖壽山崇，導一氣以凝和，與四時而合序。條風塊雨，克成大有之年；璧月珠星，無爽太初之曆。罄九圍而俾乂，均萬國以同休。今故燒香，自皈依道尊大聖衆至真之德。得道之後，保天長存，和與道合真。

以今晚朝，陞壇行道，請法衆等運茲二捻上香，願此香煙，騰空上徹，供養十方無上經寶天尊。臣等皈身、皈神、皈命，首體投地，以是捻香功德，保扶郡守，逮及官聯。伏願天祐考祥，神綏戩穀，敦勤儉清廉之節，揚中和愷悌之風。飛雨隨車，洗旱塵於千里；栽花滿縣，洽康樂於庶民。今故燒香，自皈依經尊大聖衆至真之德。得道之後，永保長存，和與道合真。

以今晚朝，陞壇行道，請法衆等運茲三捻上香，願此香煙，騰空上徹，供養十方無上師寶天尊。臣等皈身、皈神、皈命，首體投地，以是捻香功德，溥祐庶民，逮及闔境。伏願邦閭靖謐，井

邑乂寧，連薨消疫毒之災，百堵絕寇攘之害。春蠶倍稔，奉王賦以無虧；年穀常登，贍倉箱而有慶。今故燒香，自皈依師尊大聖衆至真之德。得道之後，永保長存，和與道合真。

唱方，懺方，命魔。

祈雨頌。

至道含元氣，陰陽育萬靈。下民多過犯，上帝降刑名。懇至勤朝懺，虔心悔杳冥。願當垂雨雪，洒潤遍無情。

三禮。

重稱法位。

具位臣某與合壇官衆等，謹同誠上啓，虛無二境至尊，十方醮筵列聖。臣聞萬彙生成，並資於妙道；百神政令，咸總於上靈。由精拔之所交，故淵通之至感。今某時暘滋亢，甘雨、瑞雪久愆，慮早魃之爲殃，致霖盛之失望。夤恭伸禱，尚未格於高明；怵惕興懷，罔敢違於寤寐。寧避再三之黷，庶伸不二之誠，冀鴻造之曲迴，鑒丹衷之懇側。伏願月將離畢，沃潤遍於三農；雲不崇朝，洒澤周於合境。歲功有獲，地利

無疆，溥洎懷生，俱蒙寶蔭。上明天尊大慈之澤，下副臣等祈禱之誠，謹啓以聞。

舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來晚朝陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之十五

# 道門科範大全集卷之十六

廣成先生杜光庭刪定

## 靈寶祈求雨雪道場三朝坐懺儀

附日用懺于后

臣衆等志心皈命東青西素、南丹北冥、四維上下、十方無極，太上靈寶天尊，扶桑大帝，暘谷神君，洞淵龍王，三河四海、九江水帝，十二河源、四瀆神君，興雲致雨、水府神仙，和諸禮足，虔誠懺悔。

臣衆等伏聞大鈞無象，普化育於群生；真宰不言，總裁成於庶彙。或陰陽之差序，致風雨之愆期。厥有祈求，必諧精感。今謹有某府州縣，以暘滋亢，嘉雨未霽，祈雪云嘉雪未敷。按三洞之沖科，吉蠲申禱；延九清之飈馭，欽翼致虔。齋心諒格於高穹，甘澤未諧於丕應。用臨清旦、午景、澄夕，祇罄丹衷。臣等志心皈身、皈神、皈命十方無極，太上靈寶天尊，扶桑大帝，暘谷

神君，洞淵龍王，三河四海、九江水帝，十二河源、四瀆神君，興雲致雨、水府神仙諸靈官。伏願璿極儲休，瓊都降鑒，興油雲於六合，霈膏霖於九垓，降瑞雪於九霄，豐浸沃於農田，餘潤覃於蔬壤，百穀獲有年之望，黎民除艱食之憂，溥暨含靈，俱蒙道蔭，得道之後，保天長存，和與道合真。

日用朝真懺儀。

啓白，啓堂頌。

唱禮十方。

禮足，各長跪懺悔。

臣法衆等志心皈身、皈神、皈命十方無極，太上靈寶天尊。伏願混元設教，常清靜以爲宗；穹極享誠，非精純而不格。將感通於上聖，先蕩滌於纖瑕，遵奉典彝，許容懺悔。今皇帝仁心周物，孝道格天，丕變太平之風，獨立無過之地，懼萬方之有罪，常引咎以興言，視四海之爲家，每責躬而軫念，尚虞闕誤，咸冀釋除。身口意之所萌，一歸妙道；神氣形之相守，永保長生。下逮群元，共臻丕祐。臣等稽首禮謝無

上至真三寶。

道門科範大全集卷之十六

道門科範大全集卷之十七

廣成先生杜光庭刪定

靈寶祈求雨雪道場儀

設醮行道

法事陞壇如式。

都講舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

都講舉，鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。

臣今設醮行道，謹奏爲入意，其諸忱悃，

已錄告聞，願得太上十方至真道炁，靈

寶瑞光下降，流入臣等身中，令臣所啓

之誠，速達徑御太上無極大道、三清上

聖、昊天玉皇上帝御前。

請稱法位。

具位臣某與合壇官衆等，謹同誠上

啓，虛無自然元始天尊，無極大道太上

道君，太上老君，混元上德皇帝，太上

開天執符御曆含真體道昊天玉皇上

帝，紫微天皇帝，中天北極大帝，聖

祖上靈高道，九天司命保生大帝，后土

皇地祇，元天大聖后，五福十神太一真

君，三十二天帝君，三十六部尊經玄中

大法師，東華、南極、西靈、北真、仙都、

玉京、金闕、七寶、瑤臺、紫微上宮，靈

寶至真明皇道君，上相上宰，上保上

傅，三皇五帝，十一大曜星君，北斗七

元星君，二十八宿星君，九宮十精太一

君，北極四聖真君，扶桑大帝，暘谷神

王，洞淵龍王，十洞五嶽，九江水帝，八

海龍王，三河四瀆、五湖七澤、溪谷川

源、五方行雨龍王，風雲雷電、陰陽主

宰，府界縣境、諸廟神祇，城隍社令，三

界應感，一切神靈。臣聞至道先天，高

真起教，著名萬象，覆育群生。忱辭既

達於嚴恭，洪造必垂於昭應。今某以

祇膺綸命，夤奉邦條，務清儉以愛民，

效公忠而許國。屬以蘊隆爲沴，優渥

未霑，夙禱高穹，冀臻靈感，謝云果臻靈

感。琅函發蘊，誦微妙之真文；瑤席

陳儀，具芳馨之美薦。披迎飛從，欽想

層靈。伏願虎節龍旂，暫出鴻濛之

境；雲輶鶴馭，少臨祕邃之宮。鑒其

顛若之孚，歆此菲然之禮，庶誕膺於景

福，普垂祐於蒼黔。臣等無任瞻天望聖

激切延請之至，奉迎大駕。

降聖，上茶，初獻，散花。

各稱法位。

具位臣某等，謹同誠上啓，虛無三

境至尊，三界醮筵列聖，咸望洪慈，洞

開明鑒。臣聞太極函三，闢兩儀於恍

惚；輕清得一，著列象於昭回。握璿

璣而運五行，震風霆而均四序，裁成庶

彙，陶育群生，雖真筌垂造化之私，然

俗諦有陰陽之患。今某以久愆大潤，將害嘉生，惕厲省躬，憂勞軫念，夙按熏崇之範，聿申懇禱之誠，冀慈衛以丕周，雨云：果霧霏而普洽。雪云：果晷銷而普洽。嚴科備舉，馨醮嗣陳，庸祗迓昭答於天休，庶保康於庖俗。臣等叨承教典，獲預關行，設醮詞誠，謹當宣奏。

宣詞。

按如詞旨，備切至忱。仰惟三境高尊，九清上聖，紫極炳靈之列曜，丹臺無鞅之飛仙，下濟威光，俯歆丹懇。伏願珠躔順軌，玉燭均調，陰陽和而風雨時，祥祉臻而妖氛息。提封千里，永治於康年；比屋萬家，各諧於安堵。覃均動植，俱遂生成。臣等無任懇切之至，再拜上香，酒陳亞獻。

奏樂。

臣謹重誠上啓五嶽真聖，四瀆神祇，福地靈曹，名山主宰，興雲致雨，一切威靈。伏以博厚推尊，方輿宅聖，或中分於洞府，或高配於星躔，蓄泄風雲，均調雨露，幽贊明君之化，輔承宰制之功，凡屬含生，溥膺嘉祐。今某伏

爲當境，偶愆時雨，久亢常暘，夙露誠祈，冀果臻精感。修壇薦事，已告於釐成；馨醮陳儀，載蠲於嚴格。伏惟陰陽主宰，嶽瀆柔祇，洞天紫府之靈官，福地名山之列聖，上符真貺，下濟斯民。然願守禦安寧，井閭綏靖，畎畝常豐於潤澤，倉箱永贍於資儲，矧伊動植之微，盡荷霑濡之惠。臣等無任恭虔，酒陳終獻。

奏樂。

臣謹重誠上啓扶桑大帝，暘谷神君，洞淵龍王，九江水帝，四瀆源王，三河四海，十二河源，溪江川海，下元主宰，興雲致雨，水府威靈。伏以包天帶地，聿彰潤下之功；習坎盈科，式協至柔之德。極洪深而莫測，亘汗漫以難窮。靡宅仙游，曷明善利，總陞沉而效職，一禍福以承天。有感必通，無幽不燭。今某以時暘作沴，天澤愆期。怵惕之心，匪遑於夙寤；懇祈之素，冀格於靈通。精齋具薦於殊熏，淨醮式嚴於丕享。伏惟四溟至聖，百穀神王，盡鱗屋之幽潛，率龍宮之邃密，暫辭貝

闕，來降真庭。歆茲菲薄之修，鑒此精誠之禱，密扶穹昊，溥祐蒼黔。正令順時，合五行而有序；興雲致雨，澤萬物於無方。農田酬耒耜之勞，境邑荷豐穰之賜。臣等無任再三懇禱之至，誠惶誠恐，稽首再拜，奠湯。

嘆道，宣疏。

臣謹重誠上啓太上三清，昊天玉皇上帝，九品高真，十方上聖，諸天諸帝，真經真師，周天列宿，海嶽龍神，三界應感，一切真靈。今則醮禮既陳，齋誠已達，靈音罷奏，仙範停宣。塵境喧凡，久駐鸞輪之駕；雲霄杳邈，將迴丹漢之居。延百福於豐年，保三登於歲序。臣與醮官等，無任攀戀望恩激切奉辭之至，誠惶誠恐，稽首再拜，奉辭大駕。

舉，送神頌。

舉，存神燒香。

高功復爐。

香官使者、左右龍虎君、侍香諸靈官，當令臣向來設醮之所，自然生金液丹碧，芝英百靈，衆真交會，在此香火

爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之十七

道門科範大全集卷之十八

廣成先生杜光庭刪定

靈寶祈求雨雪拜章儀

夕景行道

法事陞壇如式。

舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。臣今建壇行道，謹奉爲入意，其諸情悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御至真無極大道、三清上聖、昊天玉皇上帝御前。

請稱法位。

具位臣某與合壇官衆等，謹同誠上啓，虛無自然元始天尊，無極大道太上道君，太上老君，混元上德皇帝，太上開天執符御曆含真體道昊天玉皇上帝，上宮紫微天皇帝，中天北極紫微大帝，聖祖上靈高道，九天司命保生天尊大帝，承天效法厚德光大后土皇地祇，元天大聖后，五福十神太一真君，三十三天帝君，東華、南極、西靈、北真、仙都、玉京、七寶、瑤臺、紫微上宮，靈寶帝君明皇道君，三十六部尊經玄中大法師，上相上宰，上保上傅，三皇五帝，十一大曜星皇君，天地水三官，北斗七元星君，二十八宿星君，九宮十精太一真君，北極四聖真君，水府扶桑大帝，暘谷神君，洞淵龍王，十洞五嶽，

九江水帝，八海龍王，三河四海、五湖七澤、溪谷川源、名山洞府、靖廬福地，五方行雨龍王，風伯雨師、雷公電母、雲煙將吏，府界縣境、諸廟福神，三界應感，一切真靈。臣聞清靜希微，字之曰道；陰陽舒慘，本之於天。惟天故能佑下民，惟道故能育萬物。以時愆潤澤，民困焦枯，祇被琳宮，莘嚴挂席。按真科於三洞，下真馭於九清，昭俟真休，冀諧精感，謝云昭荷靈休，亟諧精感。今則告祈畢事，拜表言功，臣等皈身、皈神、皈命太上無極大道，三界威靈。伏願俯垂慈鑒，上至無極道前。

唱，禮十方。

臣聞高明之應，雖曰無聲；博覆之私，允彰不宰。蓋玄虛之至教，著襍禱之沖科。蠲袪宜先，精純斯達，盪除灾沴，和正陰陽。或歲偶炎烘，或時逢飢饉，儻傾誠禱，必荷靈休。今為當境，以氣序愆常，雨暘靡若，欽修妙蘊，祇款寥旻，冀上聖之矜憐，霈湛恩而均注；祈雷云：冀瑞色之浮空，總農田之沃潤；謝雨云：果上聖之矜憐，霈湛恩

而均注；謝雷云：果上聖之垂恩，降祥□而沃潤。惠霑合境，澤被群元。臣等叨預齊熏，克周容典，尚慮敷宣謬誤，持誦遺忘，積此過九，懼招冥譴。敢惻躬而謝咎，祈善貸以推慈，廣宥前非，會臻丕貺。然願權衡順合，舒慘適時，副郡邑之傾虔，總黔黎之樂業，禍沉九地，福及十方。稽首禮謝無上至真三寶。

道門科範大全集卷之十八

### 道門科範大全集卷之十九

廣成先生杜光庭刪定

#### 文昌注祿拜章道場儀

#### 啓壇行道

法事陞壇如式。

都講舉，各禮師存念如法。

高功宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。臣今靜夜，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓之誠，速達徑御至真無極大道、三清上聖、昊天玉皇上帝御前。

請稱法位。

具位臣某與臨壇官衆等，謹同誠上啓，太上虛無自然元始天尊，次啓九皇九天上帝，三十六大天帝，三十二天天帝，諸天上帝，紫微、太微垣帝座星君，五帝，三元上真，三十六部尊經玄中大法師，十一大曜星君，北斗南辰星君，二十八宿星君，東壁文章星君，七星賢良真君，十二宮神真君，文昌星君，三台星君，進賢星君，少衆星真君，圓穹星宿真君，上清太微南朱文昌真人，太上九氣文昌宮仙官，建生星斗真君，青城山九天丈人真君，潛山九天司命真君，廬山九天採訪使者真君，五嶽聖帝，四瀆源王，司祿主者，職貢舉真君，英顯武烈忠祐廣濟王，貢舉掌籍考校官屬，道德應感，一切真靈。臣等今故

燒香，願以是功德，上爲宗廟先靈、天子王侯、土地寮屬、經籍度師、隱居山林嚴棲學真之士，同學之人，醮官某等家億曾萬祖、父母師長、九親姻族，天下人民、飛行蠢動、一切衆生，今故燒香，皈身、皈神、皈命太上十方靈寶自然至真無極大道。惟乞原赦前世今生，生死宿對，重過得免，離三惡、五道、十苦、八難、九厄之中。願臣等心智開明，凡所云爲，永與道合。所啓靈感，上御至真無極道前。

唱方，懺方。

臣法衆等，志心皈身、皈神、皈命十方無極大道，太上靈寶天尊。以今建壇，焚香懺悔。臣聞率性爲道，本無愚智之殊；因物而遷，斯有聖凡之別。儻改過而不憚，則入道以何難。以今醮官某等，爰從歷生，至于今日，有高明之智而爲物所蔽，有玄虛之體而爲情所昏，一性不能存存，五官從而擾擾，惡因以積，善益以微，事親不誠，制行不果，昧清心而應物，每縱欲以恣情，文過飾非，見利忘義，以刻薄之行

而背師訓，以褊淺之見而謗真風，意循回邪，行多隱僻，蔽人之善而揚人之惡，護己之短而矜己之長，詬嫚真靈，凌蔑長上，辱人求勝，逞志作威，稔三業之愆，積六根之罪。或錄於三官、九府，或書於五帝、四司。今則啓靈寶之仙科，駐行宮於淨宇，對列聖而懺謝，體妙道以操修。伏願衆聖垂慈，洪恩普宥，削咎愆於既往，斷惡果於將來，洗身器而一新，復性根之無染，開發群心之用，恪奉三寶之尊，小臣之關奏感通，醮者之祈求必獲，恩均動植，福遍幽冥。臣等稽首禮謝無上至真三寶。

三禮。

重稱法位。

具位臣某等，謹同誠上啓，洞真自然元始天尊，洞玄大道玉宸道君，洞神大道混元老君，昊天玉皇上帝，南極天皇帝，北極紫微大帝，后土皇地祇，一切明皇道君，七曲山司祿主者，職貢舉真君，主掌桂籍侍從官屬，一切威靈。臣聞妙道無名，泊今天地之始；強名曰大，泛今品物之歸。爲之始則周

流而不見其終，爲之歸則作成而各遂其性，帝運希夷之道，神贊生成之權，沐上帝之陶甄，亦明神之輔相。此兩儀所以有不宰之德，而明神所以立裁成功之功。醮官某等，叨大帝之生成，荷明神之化育，磨礪鈍質，斲削庸材，欽承造物之洪鈞，導迎威靈之敷佑，夙開壇席，仰格高真，仗玄門祭洒之官，致寸心願仕之懇。況奉精款，敢不上聞，爰有心誠，謹當宣奏。

宣詞。

諦觀詞語，灼見誠衷。方注想於靈壇，諒潛通於真域。爐馥達心香之杳，雲衢縵仙仗之臨，森寶座於淨筵，散玉花於靈境。恩惟三清上聖，十極高尊，玄中大法師，靈寶至真，俯賜矜憐，誕垂昭應，敕監察曹屬、侍經威神、里域真官、城隍社令，同心協德，營衛壇場，肅清內外，滌蕩妖魔。使臣等氣定神凝，思念立感，啓奏上達，齋功克諧。臣等誠惶誠恐，頓首再拜，謹啓以聞。

舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭筵，傳臣向來所啓之誠，速達徑御至真無極大道、三清上聖、昊天玉皇上帝御前。

知磬舉，出堂頌。

出戶，引至六幕堂。

道門科範大全集卷之十九

道門科範大全集卷之二十

廣成先生杜光庭刪定

文昌注祿拜章道場儀

清旦行道

法事陞壇如式。

都講舉，各禮師存念如法。

高功宣衛靈呪。

青陽虛映，耀日回靈。神虎辟邪，飛天流鈴。摧奸滅試，萬魔束形。九微迴道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，大道興行。慶雲流布，合景黃庭，和與道合真。

舉，鳴法鼓二十四通。

高功發爐。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，



冠帶垂纓，關啓玄壇土地，方域神真。臣今清旦，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御太上無極大道、三清上聖、昊天至尊玉皇上帝御前。

請稱法位。

具位臣某與合壇官衆等，謹同誠上啓，太上虛無自然元始天尊，玉晨大道靈寶天尊，萬天教主道德天尊，昊天至尊玉皇上帝，南極天皇帝，北極紫微大帝，后土皇地祇，聖母元君，三十六天天帝，三十二天天帝，諸天上帝，五帝，三元上真，三十六部尊經玄中大法師，十一大曜星君，北斗南辰星君，二十八宿星君，東壁文章星君，七星賢良星君，十二宮神真君，文昌星君，三台星君，進賢星君，少衆星真君，圓穹星宿真君，上清太微南朱文昌真人，太上九氣文昌宮仙官，建生星斗真君，青城山九天丈人真君，潛山九天司命真君，廬山九天採訪使者真君，五嶽聖帝，四瀆源王，司祿主者，職貢舉真君，英顯

武烈惠祐廣濟王，貢舉掌籍考校官屬，道德應感，一切真靈。臣聞陶成萬物，孰窺道德之功；總轄群倫，難議幽冥之宰。況貴賤之階品，係儒士之屈伸，建百官而古今謂之天工，章五服而聖賢屬之天命。將以允諧庶績，分理兆民，翊扶道德之權，輔導幽冥之政。醮宮某自揆凡庸之質，均蒙化育之恩，業儒術以操修，冀科名之利達，蠲明誠意，敬設華壇，時當歲事之初，儀舉告真之始。今則夜漏已盡，晨曦漸昇。雲路澄明，咸俟飄颻之旆；煙壇凝靄，共瞻粹穆之容。羽襴儀鸞，儒冠立鵠，載揚仙範，仰格真靈，庶憑悃悞之懃，以致祈求之懇。臣某棲身道境，委質玄階，達濁世之傾虔，導洪恩之流布。況奉詞款，敢不上聞，爰有心誠，謹當宣奏。

宣詞。

諦詳詞語，灼見誠心，上聖卑其聽於杳冥之間，凡庸盡其性於恍惚之際。既幽冥之交格，宜祈懇之克諧，庶幾蓂爾之軀，獲被霈然之澤，續騰芬馥，俯

薦翹懃。臣聞有物混成，特先於天地；其名不去，長閱於古今。證之者曰聖曰神，玩之者觀妙觀微。廓爲梵氣，孰議根元。惟以清、以寧、以靈，理齊一貫；凡有能、有爲、有守，義許同歸。原此道之流行，係一人之明哲。以今清旦，陞壇行道，請法衆等運茲初捻上香，願此香煙，騰空徑上，供養洞真自然元始天尊，洞玄大道玉宸道君，洞神大道混元老君，昊天玉皇上帝，一切明皇道君。臣等皈身、皈神、皈命，首體投地，以是捻香功德，上祝當今皇帝。伏願福與天而無盡，德並日以俱新，功濟生靈，恩均動植，百蠻面內，萬國歸仁，播混元清靜之風，鼓大道中和之化，俊良登用，姦宄潛消。今故燒香，自皈依道尊大聖衆至真之德。得道之後，保天長存，和與道合真。

臣聞三十六部玄言，超凡立道；千億無量勝論，出慾演真。燦典籍於壁星，出圖書於河洛，說不說之理，窮無窮之端，啓道重玄，敷揚衆妙，鋪張混元之祕，發露聖神之心。際此妙緣，敢

忘報本。以今清旦，陞壇行道，請法衆等運茲二捻上香，願此香煙，騰空徑上，供養太上三尊玉帝大帝，說法演教高真。臣等皈身、皈神、皈命，首體投地，以是捻香功德，歸流醮官某家九玄七祖、滯魄幽魂。伏願蕩滌罪根，達朱陵而開度；超昇道岸，遊仙闕以逍遙。流慶緒以源源，熾遺芳而燁燁，見在尊親，同霑利樂。伏願黑書削咎，青簡延齡，復道性之昭明，介純禧而安逸。今故燒香，自皈依經尊大聖衆至真之德。得道之後，昇入無形，和與道合真。

臣聞玄之又玄、大而化之謂之聖，道非常道，神而明之存乎人。爰自一以分三，孰函三而爲一，必資證入之妙，以暢希夷之風。茲儼儒冠，仰延真馭。以今清旦，陞壇行道，請法衆等運茲三捻上香，願此香煙，騰空徑上，供養三境元尊至聖諸君、上靈傳教度人衆聖。臣等皈身、皈神、皈命，首體投地，以是捻香功德，歸流醮官某等，標名祿籍，增算壽書，沐三境之垂光，荷千真之錫祐，灾殃蕩滅，福祉駢臻。今故燒香，

自皈依師尊大聖衆至真之德。得道之後，永保長存，和與道合真。

唱方，懺方，命魔，三啓，三禮。

重稱法位。

具位臣某與合壇官衆等，謹同誠上啓，太上無極大道，三境至尊，昊天玉皇上帝，十方大聖，三十六部尊經玄中大法師，靈寶衆真，五帝三官，圓穹玄象，天曹一切靈仙，洞天嶽瀆聖衆，司祿主者，職貢舉真君，掌籍考校官屬，道德應感，一切真靈。臣聞道法自然，合大和而普濟；上善若水，凡有欲以必從。默推降監之端，灼有相因之理。竊惟好德居五福之一，積善爲成名之先。若泉之有源，若木之有本。是以上天所畀，必稔之以好德之因；明神所臨，必導之以積善之路。醮官某夙承道化，幸沐真風，知作德以開致福之源，念積善以立成名之本。懼夙愆之障礙，撫弱質以兢惶。是用啓玉笈之真科，延仙都之飈馭，惟冀上天錫智，明神啓衷，作德而魔障不侵，爲善而惡緣不奪，享備身之五福，遂兼濟之夙

心，舉家之長少蒙休，闔會之簪紳同享。尚慮醮官某等，爰從上世，逮及今生，或三業之成愆，或六根之積惡，或在日宮月府而未貸，或在天曹地司以未原，並冀赦除，普蒙恩宥。東華青簡，南極丹書，紀積善之因，錫榮華之慶，所祈進達，獲契情誠，先亡離苦以昇天，見在延齡而增福，普均蠢動，咸遂生成，上明天尊化育之慈，下副臣等歸誠之願，謹拜啓以聞。

知磬舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來早朝陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

舉，出堂頌。

出戶，引至六幕堂。

道門科範大全集卷之二十

道門科範大全集卷之二十一

廣成先生杜光庭刪定

文昌注祿道場儀

臨午行道

法事陞壇如式。

都講舉，各禮師存念如法。

高功宣衛靈呪。

丹靈朱火，炎霞激風。赤輪剛運，

天光八衝。迸威包羅，交變萬方。流

金豁落，群魔滅蹤。辟奸破妖，明耀元

功。金符召制，躡雲策龍。謠歌慶會，

散花太空。神化宜運，四極安隆。伏

御帝前，罔有不恭，和與道合真。

舉，鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，闕啓玄壇土地，方域神真。

臣今臨午，陞壇行道，謹奏爲入意，其諸

忱悃，已錄告聞，願得太上十方至真道

炁，靈寶瑞光下降，流入臣等身中，令臣

所啓之誠，速達徑御太上無極大道、三

清上聖、昊天玉皇上帝御前。

請稱法位。

具位臣某與合壇官衆等，謹同誠上

啓，太上虛無自然元始天尊，次啓九皇九

天上帝，三十六天天帝，三十二天天

帝，諸天上帝，紫微、太微垣帝座星君，

五帝，三元上真，三十六部尊經玄中大

法師，十一大曜星君，北斗南辰星君，

二十八宿星君，東璧文章星君，七星賢

良真君，十二宮神真君，文昌星君，三

台星君，進賢星君，少衆星真君，圓穹

星宿真君，上清太微南朱文昌真人，太

上九氣，文昌宮仙官，建生星斗真君，

青城山九天丈人真君，潛山九天司命

真君，廬山九天採訪使者真君，五嶽聖

帝，四瀆源王，司祿主者，職貢舉真君，

英顯武烈忠祐廣濟王，貢舉掌籍考校

官屬，道德應感，一切真靈。臣聞徧覆

包函，運玄功而莫測；聰明正直，贊道

化於無窮。惟至大，故爲群品之所

依；惟至神，故爲凡庸之所託。自樸

散而爲器任官，必惟其人，善人爲不善

之師，才士爲不才之養。醮官某安居

濁俗，業習儒冠。執古御今，以侍熙朝

之網羅；研精覃思，以應有司之科目。

念得失之有命，知富貴之在天。求而

弗獲者，下愚夙障之纏；感而必從者，

至真大慈之澤。是用伸虔祈之素悃，

啓太上之靈科。望闡闔於杳冥，神游

玉陛；散芳馨於寥廓，默想金容。臣等

奉寶籙之玄文，宣瓊京之至教，屬茲傾

懇，當爲申騰，臨午詞誠，謹當宣奏。

宣詞。

諦觀詞語，灼見至誠。諒上聖之

垂憐，眷此心之輸款，赦過尤而冰釋，

錫祿算以川增，載馥爐薰，俯伸丹悃。

臣聞域中四大，而王與其尊；洪範九

疇，而皇建其極。賢能資之以登用，人

民賴之以安寧。以今臨午，陞壇行道，

請法衆等運茲初捻上香，願此香煙，騰

空徑上，供養太上三境至尊，無極道

寶。臣等皈身、皈神、皈命，首體投地，以是捻香功德，上祝當今皇帝。伏願壽若南山，福如巨海。兵戈偃息，大一統以無疆；海宇乂寧，占五星之同色。賢士不遺於草野，俊民咸覲於清光，錫福庶民，阜成萬彙。今故燒香，自皈依道尊大聖衆至真之德。得道之後，保天長存，和與道合真。

臣聞濁世大恩，無如生育之重；凡人遺體，固宜論報之難。此身因之以有爲，此道賴之而有立。以今臨午，陞壇行道，請法衆等運茲三捻上香，願此香煙，騰空徑上，供養太上瓊樓玉檢，一切經寶。臣等皈身、皈神、皈命，首體投地，以是捻香功德，歸流今辰醮官某家，資度億曾萬祖，九世先靈。伏願鍊沐神魂，超出群迷之徑；滌除愆咎，別生景福之天。入希夷門，斷輪迴路，光生閥閱，慶流子孫，見在尊親，同霑利樂。伏願真氣集而盛充，谷神全而和暢，福基愈固，壽算增延。今故燒香，自皈依經尊大聖衆至真之德。得道之後，昇入無形，和與道合真。

臣聞祿豈徒致，致之必有其基；名豈徒成，成之必有其本。祿以善積而始致，名因德修而及成。以今臨午，陞壇行道，請法衆等運茲三捻上香，願此香煙，騰空徑上，供養太上玄都瑤闕證真，一切師寶。臣等皈身、皈神、皈命，首體投地，以是捻香功德，歸流醮官某。伏願天啓智能，神扶德業，俾善功之山積，致科名之鼎來。除已往之愆，集有餘之慶。所有行年之上、命運之中，或暗曜臨身，或默符加運，或值運元之衝破，或當氣本之衰微，上願各沐玄休，仰承道蔭，變凶爲吉，注祿延齡。今故燒香，自皈依師尊大聖衆至真之德。得道之後，永保長存，和與道合真。

唱方，懺方，命魔，三啓，三禮。  
重稱法位。

具位臣某與合壇官衆等，謹同誠上啓，太上無極大道，三境至尊，昊天玉皇上帝，十方大聖，三十六部尊經玄中大法師，靈寶衆真，五帝三官，圓穹玄象天曹一切靈仙，洞天嶽瀆聖衆，司祿主者，職貢舉真君，掌籍考校官屬，道

德應感，一切真靈。臣聞高者下者，皆妙道之委形；生之畜之，盡一元之沖氣。道寔一元之祖，孰測其神；人處兩儀之中，獨鍾其秀。雖曰九流之異，俱稟五行之和。或星宿儲精，或山川孕粹，寔資造化之陶冶，以爲道德之墳箴。賦以英靈，畀之妙用，渾若樸而曠若谷，事善能而動善時，所以立政教於庶民，發中和於萬國。醮官某託玄功之橐籥，荷造化之胚胎，洪恩未報於涓埃，浮世虛叨於歲月，願應明時之舉，以酬平日之心，每懼業障洪深，福緣鮮薄，恭致齋明之醮，夙開蠲潔之壇，憑妙範以薦誠，藉爐熏而致懇。伏願九清垂盼，列聖流光，憫以洪慈，開以大宥。所有醮官某，爰從歷劫，逮及今生，不悟正真，罔知經戒，縱情恣慾，背義爲非，積惡甚多，擢髮難數，譴逮先祖，殃流後昆。今投解謝之門，冀得自新之路，未赦者蒙赦，未原者蒙原，應其干祿之心，聽其歸誠之願，變灾衰之運，爲吉慶之期。丹桂高科，遂生平之素志；黃耇貽背，與盛世以同休。均

福利於群生，覃恩光於八極，上明天尊大慈之澤，下副臣等歸命之誠，謹拜啓以聞。

知磬舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來臨午陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

舉，出堂頌。

出戶，引至六幕堂。

道門科範大全集卷之二十一

### 道門科範大全集卷之二十一

廣成先生杜光庭刪定

#### 文昌注祿道場儀

##### 晚朝行道

法事陞壇如式。

都講舉，各禮師存念如法。

高功宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。群生咸遂，惠遍神州，和與道合真。

鳴法鼓二十四通。

高功發爐。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，

冠帶垂纓，關啓玄壇土地，方域神真。臣今靜夜，陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓之誠，速達徑御至真無極大道、三清上聖、昊天玉皇上帝御前。

請稱法位。

具位臣某與合壇官衆等，謹同誠上啓，太上虛無自然元始天尊，次啓九皇九天上帝，三十六天天帝，三十二天天帝，諸天上帝，紫微、太微垣帝座星君，五帝，三元上真，三十六部尊經玄中大法師，十一大曜星君，北斗南辰星君，二十八宿星君，東壁文章星君，七星賢良真君，十二宮神真君，文昌星君，三台星君，進賢星君，少衆星真君，圓穹星宿真君，上清太微南朱文昌真人，太上九氣，文昌宮仙官，建生星斗真君，青城山九天丈人真君，潛山九天司命真君，廬山九天採訪使者真君，五嶽聖帝，四瀆源王，司祿主者，職貢舉真君，英顯武烈忠祐廣濟王，貢舉掌籍考校官屬，道德應感，一切真靈。臣聞混元

立道，納品彙於洪鈞；列聖分司，輔陶成之大德。森羅列宿，下應中華。紫微太微，則主張於賢能；南極北極，則注擬於爵祿。東璧實圖書之府，南星列賢良之宮，貴賤有司，壽命有局，總轄係天中之宰，贊行則地上之神，泰山兼官職之曹，七曲持貢舉之柄。高卑玄用，綱紀交參，登庸俊良，輔翊邦政。見天人之迭應，知幽顯之相資，格太和於生靈，用潛扶於梵氣。豈特屬皇朝之重典，抑亦爲上帝之玄機。醮官某叨大道之陶甄，荷明神之廕祐，冀成名於當世，庶行己於盛時，上報洪恩，下據素志，仗霞衣之淨侶，開雲笈於靈壇，洗心棲神，祈天請命。臣致身真宇，闡教人間，當關達於齋禋，式廣宣慈澤，況奉精款，敢不上聞，靜夜詞誠，謹當宣奏。

宣詞。

諦觀詞語，灼見至誠。所以告真者，曲盡其方寸之勤；所以獲祐者，必應其祈求之願。續騰芬馥，俯罄精虔，注想彌深，仰祈昭鑒。臣聞太清演教，

貴虛靜以爲心；尼父宣猷，本中庸而率性。扇玄風於柱下，傳奧旨於洙濱。惟皇天未喪斯文，致聖道不斷如帶。隆茲至教，允屬明君。以今靜夜，陞壇行道，請法衆等運茲初捻上香，願此香煙，騰空徑上，供養洞真自然元始天尊，洞玄大道玉宸道君，洞神大道混元老君，太上昊天玉皇上帝，一切明皇道君。臣等皈身、皈神、皈命，首體投地，以是捻香功德，上祝當今皇帝。伏願一德彌隆，皇極永建，黔首悉沾於化雨，青衿咸沐於教風。耳目股肱，俱星辰之鍾秀；左右前後，皆嶽瀆之降神。壽齊箕翼之遐，福等岡陵之固。今故燒香，自皈依道尊大聖衆至真之德。得道之後，保天長存，和與道合真。

臣聞寶珠垂黍，敷妙法以難思；玉局傳經，演真詮之至正。耀先天之法炬，燭羣品之迷途。眷茲入道以超凡，必念此身之所本。以今靜夜，陞壇行道，諸法衆等運茲二捻上香，願此香煙，騰空徑上，供養虛無三境至尊，昊天玉皇上帝，一切明皇道君。臣等皈

身、皈神、皈命，首體投地，以是捻香功德，歸流醮官某家，九玄七祖，歷世宗祧。伏願罪業冰消，性根月朗，逍遙三界之境，遨遊士寶之林，垂福祿於後昆，覃榮光於來裔，見在尊親，同霑利樂。伏願真元愈固，永延南極之齡；福祉駢臻，長荷太清之廕。今故燒香，自皈依經尊大聖衆至真之德。得道之後，永保長存，和與道合真。

臣聞鋪張道妙，必資德道之上真；敷暢玄風，允賴重玄之至聖。察群倫之根品，應凡俗之純誠。位間天人，理通幽顯。以今靜夜，陞壇行道，請法衆等運茲三捻上香，願此香煙，騰空徑上，供養道經師寶天尊，昊天玉皇上帝，一切明皇道君。臣等皈身、皈神、皈命，首體投地，以是捻香功德，歸流醮官某等。伏願恩覃六趣，澤及四生，萬靈共慶於三登，四海悉臻於五福。升法橋於道岸，咸免輪迴；頒符命於幽扃，普蒙開度。伏願醮官某，惡緣斷絕，善果圓成，或寸長之可書，俾榮名之成遂，庶推廣濟，仰答陶甄。今故燒

香，自皈依師尊大聖衆至真之德。得道之後，永保長存，和與道合真。

唱方，懺方，命魔，三啓，三禮。

重稱法位。

具位臣某與合壇官衆等，謹同誠上啓，太上无極大道，三境至尊，昊天玉皇上帝，十方大聖，三十六部尊經玄中大法師，靈寶衆真，五帝三官，圓穹玄象天曹一切靈仙，洞天嶽瀆聖衆，司祿主者，職貢舉真君，掌籍考校官屬，道德應感，一切真靈。臣聞皇天無親，惟善人之是與；明道若昧，貴上士之勤行。金口所傳，瓊編攸著，是知成己以成物，率本於誠明；有德必有言，寔由於操履。蓋士之學也爲道，而道之傳也以文。儻行有餘而學文，則文不浮於實行，惟文行之兩勝，宜事業之有光。斯古今以得賢爲難，而明哲以知人爲病，諒高真之所祐，必文行之相符。醮官某爲儒家者流，學聖人之道，質性昏塞，操守卑凡，知道之在我而見之不明，知行之難成而行之不力，耗耳目以逐末，弊精神而背真，致黑簿之多

愆，歎雲程之尚阻。今則皈依大道，自悔前非，履百行以無矜，存一真而克己，以爲干祿之本，以爲事天之儀，仰冀真慈，俾諧志願，錫以超騰之翼，啓其經濟之圖。臣某謹爲考仙範於琅函，露天章之雲篆，關申三界，懺謝十方，注想陳詞，依時行道。燈然法炬，燭昏暗以流光；香達誠衷，徹虛無而昭格。伏願玄都紫府，金闕玉京，萬聖垂覆祐之慈，千真播護持之澤，敕下三境，普告諸天，降福延齡，除災滅障，上解宿曜十二次舍之厄，下禳九宮八卦分野之災，一切積殃，無邊重譴，前冤往債，故殺誤傷，三業六根，縱溢過犯，因今懺悔，咸乞蕩除，使冀科名，早諧利達。上願聖祚享無疆之曆，皇圖膺不拔之基，兵革不興，邊烽罷傲，旱蝗不作，休徵來臻。俯冀七祖超升，九幽罷對，五苦齊登於道岸，三途俱沐於玄風，大霽恩光，普均品彙，上明天尊大慈之澤，下副臣等歸命之誠，謹啓以聞。

知磬舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來靜夜陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真无極大道、三清上聖、昊天玉皇上帝御前。

舉，出堂頌。

出戶，引至六幕堂。

道門科範大全集卷之二十二

道門科範大全集卷之二十三

廣成先生杜光庭刪定

文昌注祿拜章道場儀

祝神行道

法事陞壇如式。

舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

高功發爐。

無上三天玄元始三炁，太上五靈

老君，召出臣等身中三五功曹，左右官

使者，左右捧香，驛龍騎吏，侍香金童，

傳言散花玉女，五帝直符，直日香官，

各三十六人出。出者嚴裝顯服，冠帶

垂纓，關啓玄壇土地，方域神真。臣今陞壇行道，謹奏爲入意，其諸忱悃，已錄告聞，願得太上十方真正道炁，靈寶瑞光下降，流入臣等身中，令臣所啓之誠，速達徑御太上無極大道、三清上聖、昊天玉皇上帝御前。

請稱法位。

具位臣某與合壇官衆等，謹同誠上啓，七曲山司祿主者，職貢舉真君，英顯武烈忠祐廣濟王，英惠皇后，貽慶善惠公，柔應贊祐助順靜正夫人，濟美公，善助夫人，承裕公，順助夫人，威烈公，主掌桂籍侍從官屬，一切威靈。臣聞神不可測，擴睿智以無方；民莫能明，運威靈而接物。仰惟水府之真宰，宅乃七曲之秀峰，紫闥高照於潼江，行宮普遍於列郡，雲行雨施，雷厲風飛，英靈鑒燭以無遺，睿澤霽流而不息，布穹蒼之化育，握禍福之樞機，無感弗通，有祈必應。醮官某欽崇玄典，嚴啓仙科，伏願寶節丹幢，暫離於洞府；雲駢飈馭，來集於華壇。監悃悞之拳拳，流恩光於湛湛，臣等無任激切依歸之

至，酒陳初獻。

奏樂。

具位臣某等，謹重誠上啓，七曲山司祿主者，職貢舉真君，合祠一切真靈。臣聞惟道善貸救人，而無棄人；至聖弗居不德，是以有德。以凡求聖，則疑於曠絕；以聖應凡，則出於慈光。仰惟七曲山職貢舉真君，洞造道微，深入聖域，爲儒七十三代，歷世數千百年，昭雲漢之詞章，凜冰霜之威烈，剪妖孽於指顧之頃，震風霆於呼吸之間，澤利含情，恩霑庶彙，奪蜀民之命於豺狼之口，納坤維之地於仁壽之鄉，蠢蠢何知，蚩蚩罔覺。磨蜀山而勒石，不足以紀其德；竭岷江而染毫，不足以書其功。豈謂至真，應接凡士，恍惚錫半宵之夢，須臾應一介之求。是謂道高而無棄乎人，德大而不有其德。今醮官某欽仰聖烈，嚴啓華壇，願垂降鑒之慈，俯遂凡庸之悃。屬臣關奏，敢不申騰，所有青詞，謹當宣奏。

宣詞。

諦觀詞語，灼見至誠。激切勸拳，



曲盡心聲之發；齋莊恭敬，恍臻神鑒之臨。享此夕之多儀，介光亨之景福，吉無不利，迄用有成。臣等無任傾虔懇禱之至，酒陳亞獻。

奏樂。

臣聞上天無爲，賴神威之翊贊；大道至妙，資神德以敷宣。如兩曜爲天之光明，若北斗作帝之喉舌，惟道德之昭合，致體用之相資。仰惟七曲山職貢舉真君，與天爲徒，執古之道，受上帝之眷命，分下土之宏綱。木馬汗流，見大慈之能勇；雨途火熾，知得一以曜靈。今某欽仰德威，重伸丹悃。伏願不行而至，顯妙用之無方；所欲必從，體天心而布惠。臣等無任傾虔祈祝之至，酒陳終獻。

奏樂。

臣謹重誠上啓，七曲山職貢舉真君，合祠一切真靈。臣聞自誠自明，禮載前知之妙；作睿作聖，書名立極之端。惟淵懿以資深，斯眇綿而作炳，擴神明而洞照，本濬哲之流光。仰惟七曲山職貢舉真君，心醉群經，神凝奧

旨。超然自得，既乃聖而乃神；用之無窮，宜能定而能應。傳先儒之心印，掌士子之文衡。醮官某欽仰真儀，禮周薦獻，伏願俯憐愚魯，命巨鑿以破心；孚佑顛蒙，賜綵筆而待問。臣等無任傾虔慕戀之至，上香再拜奠湯。

舉，法事。

重稱法位。

具位臣某與闔壇官衆等，謹同誠上啓，七曲山司祿主者，職貢舉真君，英顯武烈忠佑廣濟王，主掌柱籍侍從官屬，一切威靈。臣聞象立乾坤，陳君臣之貴賤；爰重否泰，述大小之往來。何世不賴於材，何材不資於世，推其利達之理，宜有主張之權。恭惟浩浩蒼天，皇皇后帝，乃眷西顧，委桂籍於七曲真君；不可度思，建洪鈞於四方善士。是用協贊無爲之化，裁成陰鷲之功，扇熙洽於群倫，開休明於六合。醮官某自念性質椎鈍，人品孱庸，荷眷祐之洪恩，被惟新之大德，但以夙親黃卷，未達亨衢，仗仙階佩籙之官，致書生干祿之願，大敷洪澤，咸遂丹衷，爨下焦桐，

獲伸餘韻，月中仙桂，更長新枝。上願聖君壽而四海阜安，皇威振而九夷賓服。多士濟濟，克諧晉接之亨；百僚師師，共底恭通之吉。凡該動植，皆沐恩休。醮官某或身心之不清，或儀矩之紊序，合壇衆士，萬咎千愆，並冀真慈，俯垂原有，上以表神君汪洋之澤，下以副衆等虔祝之誠，謹啓以聞。

舉，十二願。

舉，存神燒香。

高功復爐。

香官使者、左右龍虎君、侍香諸靈官，當令臣向來靜夜陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御太上無極大道、三清上聖、昊天玉皇上帝御前。

舉，回鸞返駕天尊。

念善，化財，回向，向衆。

道門科範大全集卷之二十三

# 道門科範大全集卷之二十四

廣成先生杜光庭刪定

## 文昌注祿拜章道場儀

### 散壇行道

法事陞壇如式。

都講舉，各禮師存念如法。

高功宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

高功發爐。

無上三天玄元始三炁，太上道君，

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，各三十六人出。出者嚴裝顯服，

冠帶垂纓，關啓玄壇土地，方域神真。

臣今設醮，陞壇行道，謹奏爲入意，其諸

忱悃，已錄告聞，願得太上十方至真道

炁，靈寶瑞光下降，流入臣等身中，令臣

所啓之誠，速達徑御太上無極大道、三

清上聖、昊天玉皇上帝御前。

請稱法位。

具位臣某與合壇官衆等，謹同誠上

啓，太上虛無自然元始天尊，次啓九皇九

天上帝，三十六天天帝，三十二天天

帝，諸天上帝，紫微、太微垣帝座星君，

五帝，三元上真，三十六部尊經玄中大

法師，十一大曜星君，北斗南辰星君，

二十八宿星君，東壁文章星君，七星賢

良真君，十二宮神真君，文昌星君，三

台星君，進賢星君，少衆星真君，圓穹

星宿真君，上清太微南朱文昌真人，太

上九氣文昌宮仙官，建生星斗真君，青

城山九天丈人真君，潛山九天司命真

君，廬山九天採訪使者真君，五嶽聖

帝，四瀆源王，司祿主者，職貢舉真君，

英顯武烈忠祐廣濟王，貢舉掌籍考校

官屬，道德應感，一切真靈。臣聞大道

甚夷，廣闢祈求之路；上天善應，廓開

濟度之門。有感必通，無幽不察。故

齋沐可以事帝，而蘋蘩可以薦神，儻通

精意之裡，必遂降臨之願。醮官某確

守儒業，願赴科名，幸靈寶垂修奉之

規，仙籙著關宣之式，敬伸愚悃，嚴建

齋壇，懺洗罪愆而身器昭明，俯降高真

而心神飛越，大則法天象地，小則酌水

獻花，諷玉笈之雲章，誦寶函之鳳篆。

今則一塵不動，萬籟無囂，依稀瓊佩之

搖，髣髴仙韶之奏，煙凝檀篆，器滌匏

樽。伏願列聖垂憐，衆真協應。飈輪

雲駕，齊降於六虛，玉宇瓊樓，森臨於

九地。詔群靈於咸集，享一意之精勲，

擁百祿於簪紳，錫湛恩於品彙。臣與醮

官等，無任懇懃懇祝、俯伏望幸之至，

奉迎仙駕。

降聖，獻茶，初進酒，奏樂。

具位臣某等，虔誠上啓，虛無三境

至尊，昊天玉皇上帝，諸天諸地，諸水

諸山，三界十方，證明列聖。臣聞大道

無爲而無不爲，上聖救物而無棄物，道

賴人而敷暢，德因人以宣揚。是謂道

不虛行，德不孤立，上而誘掖於群士，下以化導於烝人，恢張抱一之風，橐籥至真之教。醮官某夙沾玄化，衣被洪恩，未造道微而稟固有之資，未隆德業而抱良能之素，值聖主開進賢之路，有司舉較藝之章，發兼濟之純衷，起力行之大願，爰資羽禡，仰叩高穹。所念者道，道無不爲；所恃者聖，聖無棄物。陳情瀝懇，注想凝熏，庶集妙因，早酬素志。周天衆聖，必昭鑒於丹誠；大地靈神，諒俯歆於清夜。屬臣關奏，敢不上聞，設醮詞誠，謹當宣奏。

宣詞。

諦詳詞語，灼見至誠。心畫上通，即達高真之聽；慈光下燭，必臻所欲之從。重念醮官某人生難逢，歲華易過，將強學以待問，期得志而有行。伏願道蔭昭垂，天禧廣霑，咸滌歷生之罪咎，俾諧盛世之科名，得其主而遇其時，行其義以達其道。仰冀某億曾上祖，遠近先魂。永離幽途，陟九霄之仙品；長垂密蔭，傳百葉之榮光。臣等無任恭虔，酒行亞獻。

奏樂。

臣聞大道玄妙，運一炁以陶成；至真自然，散一神而發育。氣則貫通於萬類，神則鼓舞於群倫，同出異名，混而爲一，物稟之而無覺，人賦之而有靈。是知至貴之身，可謂胤真之器。于以敷其妙用，于以守其重玄，欲此功之克諧，必壽年之有永。醮官某受神氣於大道，修事業以爲儒。苗而秀者，然後足以猷行；秀而實者，然後可以成就。伏願高真春顧，神聖照臨，降真神以育其神，流道氣而充其氣。既錫之以聰慧，必畀之而榮名；既畀之以榮名，必延之而遐壽。庶效寸心之素，克成兼濟之圖。仰冀見在尊親，灾厄蠲消，休祥駢集，松顏難老，玉液長存，擁慶緒於將來，垂清芬於後裔。臣等無任虔懇戰越之至，再拜酒陳終獻。

奏樂。

臣謹重誠上啓，太上无極大道，三境至尊，昊天玉皇上帝，十方大聖，三十六部尊經玄中大法師，靈寶衆真，五帝三官，圓穹玄象天曹一切靈仙，洞天

嶽瀆聖衆，司祿主者，職貢舉真君，掌籍考校官屬，道德應感，一切真靈。臣聞無觀妙而有觀微，靜徐清而動徐生。蓋入乎有不失於無，雖應乎動而弗離其靜。此道用之所以運，而德行之所以行。矧先聖之垂彝，貴篤學而入仕。不廢君臣之義，以隆道德之風。醮官某欽奉真筌，允稽聖訓，汲汲於行己，皇皇於得君，端一心以待時，應清朝之遴選。伏願帝啓其智，神誘其衷，俾洞曉於玄根，永敷揚於妙用，貯虹蜺於胸次，摛錦繡於筆端，奮迅亨衢，施行儒業，上願皇帝亨無疆之壽，群賢成弼亮之功，玉燭調而五穀豐，海宇安而九夷服。臣與醮官無任荷恩戴德傾虔屏營之至，再拜獻湯。

宣疏。

具位臣某與合壇官衆等，謹重誠上啓，金闕虛無三清上帝，昊天六御宸尊，諸天天尊，諸天天帝，靈寶衆真，五帝三官，圓穹玄象天曹一切靈仙，洞天嶽瀆聖衆，司祿主者，職貢舉真君，掌籍考校官屬，道德應感，一切真靈。臣

聞聖演雲章，敷開天之奧旨；科遵玉笈，設祈祿之靈壇。品物聿陳，馨羞備薦，龍駕駐通宵之永，椒漿上三獻之勤。太常威神，光臨於濁界；百靈上宰，洞照於心神。臣與醮官某等，前世今生，未曾覺悟，六根三業，稔積愆尤，或殺害有情，或侵傷庶類，違真背道，故作誤為，罪積上官，名標黑簿。或在七元曹局之內，或在三官官府之中，或係五嶽之司，或屬四瀆之簿，未蒙原赦，及不懺除。又恐七曜加臨，五行刑剋，支干數盡，大小運窮，三命衰微，九宮滯塞，呪詛為障，冢訟為災，非託上真，無由解謝。今則特伸懺洗，咸冀赦除，上願宗廟保安，干戈永息，民無疫癘之厄，時無水旱之愆。賢俊登庸，盜賊消弭，蠻夷率服，和氣周流，遐邇蔑愁歎之聲，動植遂自然之性。三途離苦，六趣超升，長承至道之恩，永奉高真之化。今則禮周三獻，詞不再陳，懼儀矩之譴張，重凡愚之過咎，深虞屑瀆，並願赦原。仰冀上界高真，旋歸瑤闕；下方列聖，仍返仙曹。流光回盼

於醮筵，凡懇必諧於素願。臣某與醮官等，無任攀戀知歸之至，誠惶誠恐，稽首頓首，再拜奉送真聖。

舉，十二願。

舉，存神燒香。

高功復爐。

香官使者、左右龍虎君，侍香諸靈官，當令臣向來設醮陞壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、三清上聖、昊天玉皇上帝御前。

舉，出堂頌。

出戶，引至六幕堂。

道門科範大全集卷之二十四

### 道門科範大全集卷之二十五

三洞經錄弟子仲勵修

#### 祈嗣拜章大醮儀

##### 啓壇行道

法事如式。

舉，各禮師存念如法。

宣衛靈呪。

東方：

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束妖，搜捕兇群。奉承正道，赤書玉文。九天符命，攝龍驛傳。普天安鎮，我得飛仙，和與道合真。

南方：

三炁丹天，煥景流光。熒星轉燭，洞照太陽。上有赤精，合契虛皇。開明靈童，號曰華房。總統火兵，備守玉堂。斬邪束妖，剪截魔王。北帝所承，風火莫當。流鈴交換，翊衛壇場。正

道流行，敢有巴狂。我享上功，坐運魁綱。億劫長存，保天無疆，和與道合真。

西方：

七炁素天，太皇流精。光耀金門，洞朗大冥。中有索皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普惠萬生。功加一切，天地咸寧，和與道合真。

北方：

五炁玄天，元始徘徊。辰星煥爛，光耀大微。黑靈尊神，號曰層威。統冠飛天，仙裙羽衣。備衛五門，檢精捕非。敢有干試，豁落斬摧。玉符所告，神鎮八威。邪門閉塞，正道明開。映照我身，三光同輝。策空駕浮，舉形仙飛，和與道合真。

中央：

一炁黃天，調理乾坤。陶鎔陰陽，總統玄真。鎮星吐輝，流煥九天。開明童子，號曰天璘。元炁陽精，焰上朱烟。洞照天下，及臣等身。百邪摧落，殺鬼萬千。中山神呪，普天使然。五

靈安鎮，身飛上仙，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣今啓壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣啓奏，速達徑御太上無極大道、昊天玉皇上帝御前。

請稱法位。

具位臣某與臨壇官衆，謹同誠上啓，玉清聖境元始天尊，上清真境靈寶天尊，太清仙境道德天尊，太上開天執符御曆含真體道昊天玉皇上帝，勾陳星宮天皇帝，中天星主紫微北極大帝，承天效法后土皇地祇，高上神霄玉清真王長生大帝，高上神霄玉清真王青華大帝，九天應元雷聲普化天尊，九天雷祖大帝，上清紫微碧玉宮太一

天帝，六天洞淵大帝，六波天主帝君，九天好生可韓司丈人天尊，九天採訪應元保運真君，九天上帝，三十二天上帝，五老上帝，東華木公道君，西靈金母元君，日宮太陽帝君，月府太陰皇君，五方五德星君，二十八宿星君，北斗七元上道真君，南斗六司上生真君，五福十神太一真君，上清四餘四曜真君，天曹諸司真君，三元三官大帝，泰玄樞機三省諸相天君，玄中大法師真君，三天大法師真君，北極四聖真君，上清雷霆院使真君，雷霆九司列職真君，九天注生監生真君，九天司祿梓潼帝君，九天衛房聖母元君，本靖諸省府院司經錄法部主宰真君，三天門下三元真君，上章詞表靈官，五嶽五天聖帝，洞天福地、靖廬治化仙官，本靖祖玄真師、列位真人，經籍度列位真人，北陰玄天酆都大帝，東霞扶桑丹林大帝，四海龍王，四瀆源王，十二河源仙官，九江水帝，五湖七澤大神，名山大川真宰，九天金闕靈濟洪恩真君，九天玉闕靈濟洪恩真君，今年某季典司風

雷雨部、威烈聖衆，府縣城隍、里域土地、遠近廟貌、一切真靈。臣聞至神之化，必神道者有以揆其功；衆妙之門，必妙物者能以索其奧。默探生生之理，密窮疊疊之功。品物流形，際天蟠地，洪惟三境帝尊，十方列聖，河海不足以言其大，山嶽不足以擬其高，惟裔嗣之綿長，表吉人之崇奉。醮官某德修罔覺，善積而彰，始也期慶嗣之克諧，終也冀斯男之永保。並結形於九炁，同稟命於三元。生神唱奉而唱恭，司命敬諾而敬順，悉考誕彌之月，大恢生化之功，調六氣於洪鈞，開八荒於壽域，庶獲綿綿之慶，載嚴翼翼之心。輒按仙科，仰延真馭，祈世嗣於寶軸，薦精悃於玉虛，啓願云初，洪儀方歲，上以謝天地生成之澤，下以祈子孫壽命之休。臣等無任恭虔，再拜上香，淨茶上獻。

散花。

臣謹同誠上啓虛无自然三清上帝，昊天玉皇上帝，三界十方列聖。臣聞化工密運，空浮梵行之天；大道隱存，昭

示好生之德。剖三才而肇序，布九炁以成形。念天下人民，皆因父母寄胎誕育而遂得生成；惟氣連玉清，悉自元始播精移神而化身普度。故反求諸己，而我命在天。醮官某受室以來，添丁未兆，懼承家之弗祀，憂主祭之莫傳，仰啓高真，導迎景貺，虔依科簡，宿啓靈壇。臣今正爾燒香，皈身、皈神、皈命十方無極大道，願以是功德，普度幽明。伏願三境垂光，萬靈翊衛，察丹誠而照鑒，肅飈馭以來臨。簡在帝心，克昌厥後，所啓玄感，上御至真无極大道御前。

唱方，懺方，三啓，三禮。

宣真文。

重稱法位。

具位臣某與臨壇官衆，謹同誠上啓，太上無極大道，三境天尊，昊天玉皇上帝，勾陳天皇帝，星主紫微北極大帝，承天效法后土皇地祇，神霄九宸大帝，諸天天尊，諸天天帝，三界應感，一切真靈。臣聞元始祖劫，化生諸天；二儀出胎，始建寰海。七竅鑿成於混

沌，五文普植於神靈。其回風也，扇碧落以空歌；其聚烟也，貫紫虛而鬱秀。別生分類，有開物成務之功；視履考祥，彰福善禍淫之訓。凡繫化物，敢昧傾心。醮官某萬劫良因，三元道養。念老而無子曰獨，祇自歎於窮民；惟天之德曰生，爰服膺於古訓。用修香火，仰丐恩憐。臣等謬忝治官，恭修醮事。存亡繼絕，實仰奉於天威；接物利生，庶廣揚於道化。凡據誠悃，敢不上聞，爰有心誠，謹當宣奏。

宣詞。

諦詳詞語，灼見至誠。仰丐天聰，曲迴敷祐。竊惟九天官屬，三界職司，惟定罪以紀功，每列言而奏簡。幽明永賴，巨細不遺。今醮官某澡雪精神，虔修齋宜，法天象地，祇建星壇，酌水獻花，皈依道寶。誦洞章於午，清夜，奏雲篆於諸天，降格上真，伸達至願。焚香示信，謹周遍於十方；然燈續明，普光輝於九夜。輒依齋法，宿啓以聞，恩惟太上三尊，十方上聖，玄中大法師，監齋大法師，靈寶至真，三界官屬，垂

神鑒映，省覽所陳。乞勅侍經威神，監察曹屬，傳奏土地里域真官，協力同心，周旋營衛，掃蕩力外，清淨壇場，降伏妖魔，馘滅精祟，使臣等心安氣定，玄感冥通，啓奏上聞，天恩下逮，齋功成就，無有窒礙。明旦行道，續更啓聞，謹啓。

十二願。

復爐。

香官使者、左右龍虎君、侍香諸靈官，當令臣向來啓壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之二十五

### 道門科範大全集卷之二十六

三洞經籙弟子仲勵修

祈嗣大醮儀

清旦行道

法事如式。

舉，各禮師存念如法。

宣衛靈呪。

青陽虛映，耀日回靈。神虎辟邪，飛天流鈴。摧奸滅試，萬魔束形。九微迴道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，大道興行。慶雲流布，合景黃庭，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣

今清旦行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛无自然元始天尊，玉晨大道靈寶天尊，萬天教主道德天尊，昊天至尊玉皇上帝，勾陳星宮天皇大帝，中天星主紫微北極大帝，承天效法后土皇地祇，神霄真王長生大帝，東極注生青華大帝，九天應元雷聲普化天尊，九天雷祖上帝，上清紫微碧玉宮太一天帝，六天洞淵大帝，六波天主帝君，九天好生可韓司丈人天尊，九天採訪應元保運真君，九天上帝，三十二天上帝，五老上帝，東華木公道君，西靈金母元君，日宮太陽帝君，月府太陰皇君，五方五德星君，二十八宿星君，北斗七元上真道君，南斗六司上真道君，五福十神太一真君，上清四餘四曜星君，天曹諸司真君，三元三官大帝，泰玄樞機三省諸

相天君，玄中大法師真君，三天大法師真君，北極四聖真君，上清雷霆院使真君，雷霆九司列職真君，九天注生監生真君，九天司祿梓潼帝君，九天衛房聖母元君，本靖諸省府院司經錄法部主宰真君，三天門下三元真君，上章詞表靈官，五嶽五天聖帝，洞天福地、靖廬治化仙官，本靖祖玄真師、列位真人，經籍度列位真人，北陰玄天酆都大帝，東霞扶桑丹林大帝，三河四瀆、五湖四海龍王，名山大川直宰，九天金闕、玉闕靈濟洪恩二位真君，今年某季典司風雷雨部、威烈聖衆，城隍里社廟貌、一切真靈。臣聞有物混成，生實先於天地；虛離獨立，至亦出於陰陽。或爲之紀而莫見其形，不知其名而字之曰道。故陽居大夏，而生育長養以爲事；天祖羣物，而包含徧覆以無殊。凡屬洪纖，悉歸亭育。不言而喻，四時行而百物生；邪氣莫奸，五穀熟而萬民殖。化工所繫，慶賴攸均。醮官某夙植善根，獲聞正道，責躬引咎，敢不祇畏上天，奉戒修齋，庶幾以拂無子，

令臣關奏，降聖歸依，清旦詞誠，謹當宣奏。

宣詞。

按如詞言，丹誠懇切。恭承聽覽，少賜矜容。望垂至大之恩，乞允綿長之祝。臣聞易有太極，兩儀是生；大哉乾元，萬物資始。凡戴天而履地，率負陰以抱陽。得我之大者，賦性於沖和；得我之小者，播形於飛走。故無物不霑於雨露，而有情盡出於陶鎔。凡賴生成，敢忘皈嚮。葵心雖遠，猶傾向日之誠；獮祭甚微，亦展事天之禮。矧居人道，復處中革，有報有祈，惟精惟一。醮官某齋明盛服，揆日惟良，欽若昊天，昭事上帝，覬百神之來相，庶一索以得男，下副禱祈，式彰生化。以今清旦行道，請法衆等運茲初捻上香，願此香雲，騰空上徹，供養無上至真十方道寶。臣等皈身、皈神、皈命，首體投地，以是捻香功德，上祝當今皇帝陛下。伏願本支百世，壽考萬年，王假有家，天作之合。繼姜嫄之履武，載育生民；邁狄簡之祈天，降祥玄鳥。益慶

藩垣之翰，茂膺長發之期，福及醮官，澤流後裔。斯干考室，如松茂而竹苞；中孚應天，庶鶴鳴而子和。今故燒香，自歸依道尊大聖衆至真之德。得道之後，保天長存，和與道合真。

以今清旦行道，請法衆等運茲二捻上香，願此香雲，騰空上徹，供養無上至真十方經寶。臣等皈身、皈神、皈命，首體投地，以是捻香功德，歸流社稷尊靈、宗祧先聖。伏願闕宮有卹，清廟肅雍。對越在天，夢九齡而增與；流光宗祀，配上帝以無私。下逮醮官，恩加先世，樂遊帝所，聞廣奏於鈞天；悽愴焄蒿，發昭明於神氣。曲垂陰鷲，宜佑見存。今故燒香，自歸依經尊大聖衆至真之德。得道之後，永保長存，和與道合真。

以今清旦行道，請法衆等運茲三捻上香，願此香雲，騰空上徹，供養無上至真十方師寶。臣等皈身、皈神、皈命，首體投地，以是捻香功德，歸流遐邇，遍及幽冥。伏願三辰順軌，四海同文，水旱長蠲，兵刑寢措。五日風而十



日雨，無鳴條破塊之虞；千斯倉而萬斯箱，有東作西成之願。一門薦祉，四海蒙休，共享福於華胥，保昇玄於衆妙。犁牛之子，亦駢角以蕃滋；老蚌增光，蘊明珠而具足。恩均動植，各遂生成。今故燒香，自歸依師尊大聖衆至真之德。得道之後，永保利亨，和與道合真。

唱方，懺方，三啓，三禮。

重稱法位。

具位臣某等，謹同誠上啓，太上無極大道，三清三境天尊，昊天玉皇上帝，三界應感，一切真靈。臣聞遇災而懼，垂大雅之格言；見善則遷，表義經之垂訓。惟天爲大，悔過居先。郊雨反風，克彰明德。熒惑退舍，亦契善言。雖無聲臭之可尋，宛若填箴之相應。而況惡人齋戒沐浴，則可以昭事於上帝；君子恐懼修省，亦能主祭於長男。非惟變咎以爲祥，乃使回心而嚮道。醮官某伏念自從前世，以至今生，意馬奔馳，心猿狂率，愧怍天地，訕謗君師，不孝一親，間離九族。忘哀廢

禮，或不祀於祖先；棄子墮胎，夙自殘於骨肉。陰賊犯上，蔽賢害能，黷真無厭，遏羅不顧。苟利道於錐刀之末，私富貴於壟斷之中。樂禍喜災，妄絕他宗之祭祀；欺孤伐冢，巧增自己之田園。素無惻隱之心，是亦強梁之行。又或焚山竭澤，煮鹵覆巢，枉害衆生，未償夙業，自貽譴責，故觸神靈。又或爲臣不忠，殺人以政。勞民動衆，爲禍首於一時；尸位素餐，曠天工於百辟。伐牛山於旦旦，漏天網於恢恢。凡百所爲，罔知紀極，有一干此，未或不亡，以致朋淫于家，用殄厥世，不德罔大，將墜厥宗。此皆先聖之格言，抑亦天心之可畏。用是存誠潔己，改往修來，敬終日以乾乾，罄小心而翼翼，自陳罪網，仰丐恩憐。伏願浩浩高天，皇皇后帝，發好生之大德，敷曠蕩之深恩，咸與惟新，哀此瑩獨，庶傳種姓，用守宗祊。載育載生，長階庭之蘭玉；以嗣以續，學弓冶之箕裘。庶幾荀氏之八龍，不愧河東之三鳳，願有加於帝力，宜俾肖於後昆。懇禱之誠，朝夕以冀，

再惟蕃衍，尤賴操修。孤立於趙者，爲十世之諸侯；功著於梁者，爲八葉之宰相。或使諫君而知臧孫之有後，或以陰德而信丙氏之必與，于公高門，張湯揚善，儻使一二而悉數，雖至千百而匪周，此皆作善降之百祥，抑亦惟天佑于一德。儻有克艱厥後，爲業所牽，歷考古初，亦存龜鑑。漢侯犯法，四五世而靡有子遺；虞詡多冤，二十一年而不傳一口。或以陰謀六出而廢後，或以爲將三代而覆宗。受玉墮容，尚招惡報；先配後祖，豈保吉祥。顧陰譴之甚明，雖它美而莫贖。苟能見其過而內自省者，將反身而誠樂莫大焉。某敢不寅畏天威，歸依造化，誓從今日，以及來生，惟改過以自新，將迎祥而集慶。資生資始，均有賴於乾坤；成象成形，庶歸功於天地。早符吉兆，下慰凡情，上明天尊大慈之澤，下副臣等歸命之誠，謹啓以聞。

十二願。

復爐。

香官使者、左右龍虎君、侍香諸靈

官，當令臣向來清旦行道之所，自然生金液丹碧，芝英百靈，衆真交會，在此香火爐前。當願罪罟蠲消，慶源增衍。傾心受度，即膺饋鯉之祥；蒙道順生，允獲弄璋之慶。一門被澤，四海霑榮。次願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之二十六

道門科範大全集卷之二十七

祈嗣大醮儀

臨午行道

法事陞壇如式。

各禮師存念如法。

宣衛靈呪。

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破妖，明耀元功。金符召制，躡雲策龍。謠歌慶會，散花太空。神化宜運，四極安隆。伏御帝前，罔有不恭，和與道合真。

鳴法鼓二十四通。

無上三天玄元始三炁，太上道君太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣今臨午行道，謹奏爲入意，其諸忱悃，已

錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，玉晨大道靈寶天尊，萬天教主道德天尊，昊天至尊玉皇上帝，勾陳星宮天皇大帝，中天星主紫微北極大帝，承天效法后土皇地祇，神霄真王長生大帝，東極注生青玄上帝，九天應元雷聲普化天尊，九天雷祖大帝，上清紫微碧玉宮太一天帝，六天洞淵大帝，六波天主帝君，九天好生可韓司丈人天尊，九天採訪應元保運真君，九天上帝，三十二天上帝，五老上帝，東華木公道君，西靈金母元君，日宮太陽帝君，月府太陰皇君，五方五德星君，二十八宿星君，北斗七元上道真君，南斗六司上生真君，五福十神太一真君，上清四餘四曜星君，天曹諸司真君，三元三官大帝，泰玄樞機三省諸相天君，玄中大法師真君，三天大法師

真君，法主四聖真君，上清雷霆院使真君，雷霆九司列職真君，九天注生監生真君，九天司祿梓潼帝君，九天衛房聖母元君，本靖諸省府院司經錄法部主宰真君，三天門下三元真君，上章詞表靈官，五嶽聖帝，洞天福地、靖廬治化仙官，本靖祖玄真師、列位真人，經籍度列位真人，北陰酆都大帝，扶桑丹林大帝，三河四瀆、五湖四海龍王，名山大川真宰，九天金闕、玉闕靈濟洪恩二位真君，風雲雷雨部威烈聖衆，城隍里社廟貌一切真靈。臣聞主器莫若長子，蓋有重於承傳；天道常與善人，惟密移於造化。宛不言而善應，隨有感以必通。粵自神靈，爲之主宰，在昔高禩，請子必嚴。郊外之祈，堯帝多男，亦假華封之祝，況茲凡陋，敢昧歸依。當一意以告虔，冀三元之道養。欽哉，首上圩頂，孔父有禱於尼丘；駿極于天，申甫降神於嵩嶽。或元精之育固，或昴宿之儲蕭。邑姜夢帝，則文在手而曰虞；燕姑夢蘭，則使稱天而與已。未有不關於造化，而能自遂於生成。

醮官某伏念功淺行微，禍盈惡積，放於利而多怨，曠仁宅而弗居，獲罪于天，克艱厥後。念胙之土，而命氏傳自古初；苟墜厥緒，而覆宗誰尸伏臘。恐一旦溘先於朝露，則九原有愧於先靈。顧隻影以自憐，僅如絲而不絕。年高絳縣，辱久矣於泥塗；鬼哭若敖，將餒而於求食。每惛惛而知懼，常慄慄以祈天。又虞豕訟之牽連，欲丐洪恩而普度，乃嚴淨宇，祇薦嘉誠。臣等職奉金科，身參寶籙。祈男禱嗣，音每誦於監生；仙化成人，經獲聞於上品。凡據情素，敢不上聞，爰有心誠，謹當宣奏。

#### 宣詞。

諦詳詞語，灼見忱誠。臣聞不孝有三，無後爲大；生道非一，本出於虛。擬天地而參諸身，致中和而育萬物。宜內循於一己，庶有格於萬靈。用薦苾芬，將祈盼饗。九重金格，奉靈寶之祕言；三級瑤壇，延衆真於珠館。八天雲篆，安鎮九宮；兩極星燈，光連五斗。瀝陳丹悃，拜伏朱章，庶憑衆妙之

功，用格多男之慶。以今臨午行道，請法衆等運茲初捻上香，願此香雲，騰空上徹，供養十方無上道寶天尊。臣等皈身、皈神、皈命，首體投地，以是捻香功德，上祝當今皇帝陛下。伏願璇璣調理，龜鼎燕寧，絕災異而不書，滌妖氛而永息。龍樓鶴禁，繼照重明。甲觀畫堂，含飴增慶。百子協螽斯之詠，六宮歌芣苢之詩，俾萬物各得其宜，無一夫或失其所。今故燒香，自歸依道尊大聖衆至真之德。得道之後，保天長存，和與道合具。

以今臨午行道，請法衆等運茲二捻上香，願此香雲，騰空上徹，供養十方無上經寶天尊。臣等皈身、皈神、皈命，首體投地，以是捻香功德，歸流某家九世七先，億曾萬祖。伏願天慈赦宥，道氣發舒，拔苦除愆，和冤釋對，告下九幽泉曲之府，速登朱陵流火之庭，受鍊生方，逍遙仙界，絕惡根而斷滅，俾胎注以蠲除，庶無天橫之災，永保綿長之慶。今故燒香，自歸依經尊大聖衆至真之德。得道之後，永天長存，和

與道合真。

以今臨午行道，請法衆等運茲三捻上香，願此香雲，騰空上徹，供養十方無上師寶天尊。臣等皈身、皈神、皈命，首體投地，以是捻香功德，歸流某壽德齊明，魂神澄正。結天地氤氳之氣；流注百關；稟陰陽埏埴之功，冥符八景。育嬰端就，寢息無驚，錫其肯穫之人，流以有餘之慶。桑弧蓬矢，將有事於四方；燕頷虎頭，或封侯於萬里。恩霑九有，澤及含生。今故燒香，自歸依師尊大聖衆至真之德。得道之後，永保利享，和與道合真。

唱方，懺方，命魔，三啓，三禮。

重稱法位。

具位臣某等，謹重誠上啓，金闕虛無三寶天尊，昊天至尊玉皇上帝，勾陳星宮天皇帝，中天星主紫微大帝，承天效法后土皇地祇，神霄真王長生大帝，諸天天尊，諸天天帝，三界應感，一切真靈。臣聞茫茫九有，形質既分；蠢蠢含生，陶鎔莫測。雖世間有有無有，皆暗昧於始終；而一氣生生之生，實

全繫於水火。苟賦形於宇內，總托化於仙鄉。唯南斗之六虛，乃太微之都糾。領天樞天機之二省，有司命司錄之尊神。延壽益筭，則度厄於長生大君；起死迴骸，則主錄於韓君司馬。咸彰品物，號南昌之上宮；濟拔三塗，置朱陵之火府。儻超離於陰境，先沐浴於天池。聞八天隱語之音，接三洞飛玄之氣。玉眸鍊質，黃華蕩形，再返人寰，各正性命。然念世人罪福，盡達天司。丹筆善分，列爲等級。姓類既別，毫髮無私。行齊八百者，即證果以登真；刑屬三千者，乃計功而補過。三官鼓筆，常料別於種人；萬聖督仙，實無間於晝夜。皆有條而不紊，故善應以無方。唯此丹天，功高紫極。凡繫道蔭，注上生名，皆逆推三世之業因，以計定一生之祿筭，玉曆考誕彌之月，慶雲開化育之門。俾全受鍊之魂，即注更生之所。或寄胞於貧寒之所，或賦形於積善之家。考筭毫分，搜羅人品。千生父母，有夙世之良因；萬劫子孫，亦三緣之和會。共業所感，聚

爲一家。然後九炁齊并，二儀同化，帝君品命，聖母履綱。道與之貌而天與之形，陽爲之魂而陰爲之魄。四肢五體，各整具於形神；六甲三元，悉扶承於胎命。又千和而萬合，至十月以九周。惟九天司馬，不下於命章；則萬品生根，莫彰於神奧。大矣哉，驚天駭地，貴亦難勝，陶魄鑄魂，神靈微妙。齋官某爰念日暮途遠，嗣緒世微，恥門戶之彫零，究生源之本始，載嚴淨宇，遐企上真，庶通蠲潔之誠，以格蕃昌之裔。伏願九天聖母，浮駕雲輶。八方胎神，各領官屬。流布至真之氣，灌溉胞命之門，胎元結於黃房，祥烟塞於死戶。時貴月吉，擁三界以齊臨；形具神全，保萬靈而稱慶。允獲自天之祐，旁依錫類之仁。乃子乃孫，肯堂肯構，上明天尊大慈之澤，下副臣等皈命之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來臨午行道之所，自然生

金液丹碧，芝英百靈，衆真交會，在此香火爐前。當願忱誠上達，睿澤旁流，赦已往之愆尤，開自新之軌路。九玄七祖，釋注訟以昇形；六甲三元，保胎真而固本。庶獲寧馨之子，率歸仁壽之鄉。次願十方仙童玉女，接待蘭烟，傳臣向來所啓之誠，速達徑御太上無極大道、昊天玉皇上帝御前。

出堂頌。

出戶。

道門科範大全集卷之二十七

### 道門科範大全集卷之二十八

#### 祈嗣大醮儀

#### 晚朝行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。羣生咸遂，惠遍神州，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣今靜夜行道，謹奏爲入意，其諸忱悃，

已錄告聞，願得太上十方至真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，玉晨大道靈寶天尊，萬天教主道德天尊，昊天至尊玉皇上帝，勾陳星宮天皇帝，中天星主紫微北極大帝，承天效法后土皇地祇，神霄真王長生大帝，東極注生青華大帝，九天應元雷聲普化天尊，九天雷祖大帝，上清紫微碧玉宮太一天帝，六天洞淵大帝，六波天主帝君，九天好生可韓司丈人天尊，九天採訪應元保運真君，九天上帝，二十二天上帝，五老上帝，東華木公道君，西靈金母元君，日宮太陽帝君，月府太陰皇君，五方五德星君，二十八宿星君，北斗七元上道真君，南斗六司上生真君，五福十神太一真君，上清四餘四曜星君，天曹諸司真君，三元三官大帝，泰玄樞機三省諸相天君，玄中大法師真君，三天大法師

真君，北極法主四聖真君，上清雷霆院使真君，雷霆九司列職真君，九天注生監生真君，九天司祿梓潼帝君，九天衛房聖母元君，本靖諸省府院司經籙法部主宰真君，三天門下三元真君，上章

詞表靈官，五嶽聖帝，洞天福地、靖廬治化仙官，本靖祖玄真師、列位真人，經籍度列位真人，北陰酆都大帝，扶桑丹林大帝，三河四瀆、五湖四海龍王，名山大川真宰，九天金闕、玉闕靈濟洪恩二位真君，風雲雷雨部威烈聖衆，城隍里社廟貌一切真靈。臣聞碧落浮黎，受六甲保胎之品；紫陽玉笈，開九天生神之章。皆百靈隱韻之音，結三洞飛玄之氣。說之八遍，則婦人懷妊，鳥獸含胎；讀之九過，則萬靈唱恭，司命敬諾。皆太上廣好生之德，勅元陽開大有之民，使民知道以知身，莫不有宗而有本。顧惟後學，希慕神仙。非此文，則生氣無津，九戶闔塞；得此經，則胎神明注，三宮煥騰。錫氣布年，超凡入聖，實脩行之徑路，爲得道之階梯。不但女子可以奉行，亦使形神不

相遠離。臣等受任之日，濟度存心，夙佩靈章，許傳齋範。既晨興而蠲潔，又夕惕以薰修，遵上天俯仰之儀，奉金籙告盟之格，憫凡心之有禱，望霄漢以投詞。爰有心誠，謹當宣奏。

宣詞。

按如詞旨，備竭丹衷。仰冀玄恩，洞回洪造。竊以欽崇大道，每勤精一之誠；激切卑情，不避再三之瀆。惟人處世，在胎曰身，本出一源，遂分六用，目視五色，耳聽五音，鼻以別香，舌惟了味。或運臂而使指，或布武而駿奔，惟一點之靈光，乃化工之成就。如埏埴器，運鈞軸以陶成；譬木偶人，發機關而後用。矧居人道，實有司存，炳蘭炷於夜分，振雲鏃於天表，駐九龍之寶駕，舞三疊之胎仙。伏願迂景俯臨，分輝下盼。主世生道，降沖氣以爲和；有玉嬰兒，庶無中之養就。更希餘祉，溥及含靈。以今靜夜行道，請法衆等運茲初捻上香，願此香雲，騰空上徹，供養十方無上道寶天尊。臣等皈身、皈神、皈命，首體投地，以是捻香功

德，上祝當今皇帝陛下。宗維磐石，治格垂裳。朱芾斯皇，保君王於家室；皇建有極，歛時福於庶民。盈升可比於椒聊，信厚不殊於麟趾。俾萬有歲常，聞嵩嶽之呼；則百斯男允，協華封之祝。今故燒香，自歸依道尊大聖衆至真之德。得道之後，保天長存，和與道合真。

以今靜夜行道，請法衆等運茲二捻上香，願此香雲，騰空供養十方無上經寶天尊。臣等皈身、皈神、皈命，首體投地，以是捻香功德，歸流某家億曾萬祖，昇形於劫初之臺；百子千孫，備順於太和之世。發明道眼，落滅惡根，五臟華敷，三宮寧靜。天人爲子，保胎息於玄牝之根；元氣降身，納戊己於精神之府。今故燒香，自歸依經尊大聖衆至真之德。得道之後，永保長存，和與道合真。

以今靜夜行道，請法衆等運茲三捻上香，願此香雲，騰空供養十方無上師寶天尊。臣等皈身、皈神、皈命，首體投地，以是捻香功德，歸流某徧良緣於

三界，無物不周；散善果於十方，有形皆度。干戈止息，夷夏率從，疫癘不興，休祥沓至。臣等師資善友，皆證果以昇形；翊衛神靈，率言功而進職。竚頒符命，普及幽明，沐此勝因，俱登道岸。今故燒香，自歸依師尊大聖衆至真之德。得道之後，永天長存，和與道合真。

唱方，懺方，三啓，三禮。

重稱法位。

具位臣某與臨壇官衆，謹同誠上啓，金闕至尊三清上帝，昊天玉皇上帝，三界應感，一切真靈。臣聞天道貴生，妙門普度。上無復祖，號碧落爲種民之天；近取諸身，分元始居泥丸之上。五行共稟，七政同科。故道生一，一生二，二生三，三生萬物，爲胎命流布之源；而人法地，地法天，天法道，道法自然，爲形相範圍之本。凡夫性命，皆憑道生；一切聖賢，盡出胎育。是以一身之內，嬰兒姪女，法象陰陽，無英白元，間隔金木。珠凝氣液，有五行顛倒之機；火運金精，藏三田反復

之義。修之者，可混合於百神；悟之者，可超凌於三界。有人於此，以道爲宗。非惟後嗣之可求，抑亦聖胎之成就。臣等質穢氣濁，功淺行微，仰對靈心，虔依上善，惟堅誠懇，庶獲感通。今者醮官某妙蘊心香，離諸疑網。乘愆蹈咎，恥作俑於禍根；修德反身，戒探湯於惡果。皈依紫極，凝叩玄關，內竭丹衷，仰干洪造。伏願玉京三境，金闕高真，保胎神王，長生大聖，鑒其誠悃，錫以湛恩，勅五帝三官，及四司九府，齋持符命，開度存亡，燭以神光，達之天府。七先九祖，俱蒙鍊質之功；四友三師，各證無爲之果。消罪名於北府，注生籍於南宮，懷赤子以注心，制魔王而保舉。出入無疾，升一陽於來復之初；聲氣相求，備三索於純乾之體。然後諸塵漏盡，六度功圓，俾鍊氣以成形，即長生而久視，上明天尊大慈之澤，下副臣等皈命之誠，謹啓以聞。

十二願。

復爐。

香官使者、左右龍虎君、侍香諸靈

官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。

出堂頌。

出戶。

道門科範大全集卷之二十八

道門科範大全集卷之二十九

三洞經錄弟子仲勵修

祈嗣大醮儀

散壇行道

法事陞壇如式。

各禮師存念如法。

宣衛靈呪。

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣

今設醮行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，玉晨大道靈寶天尊，萬天教主道德天尊，昊天至尊玉皇上帝，勾陳星宮天皇帝，中天星主紫微大帝，承天效法后土皇地祇，神霄真王長生大帝，東極青玄上帝，九天應元雷聲普化天尊，九天雷祖大帝，上清紫微碧玉宮太一天帝，六天洞淵大帝，六波天上帝君，九天好生可韓司丈人天尊，九天採訪應元保運真君，九天上帝，三十二天上帝，五老上帝，東華木公道君，西靈金母元君，日宮太陽帝君，月府太陰皇君，五方五德星君，二十八宿星君，北斗七元上道真君，南斗六司上生真君，五福十神太一真君，上清四餘四曜星君，天曹諸司真君，三元三官大帝，泰玄樞機三省諸相天君，玄

中大法師真君，三天大法師真君，北極法主四聖真君，上清雷霆院使真君，雷霆九司列職真君，九天注生監生真君，九天司祿梓潼帝君，九天衛房聖母元君，本靖諸省府院司經錄法部主宰真君，三天門下三元真君，上章詞表靈官，五嶽聖帝，洞天福地、靖廬治化仙官，本靖祖玄真師、列位真人，經籍度列位真人，北陰酆都大帝，扶桑丹林大帝，三河四瀆、五湖四海龍王，名山大川真宰，九天金闕、玉闕靈濟洪恩二位真君，風雲雷雨部威烈聖衆，城隍里社廟貌一切真靈。臣聞龍漢玉曆，明垂開劫之功；靈寶洞章，密著祈男之品。以今某屢陳丹懇，欲厚人倫。瓊席瑤壇，肅罄傾心之仰；雲車風馬，竚因飛步之游。敢禱祭以薦誠，保充閭而襲慶。伏願空浮五色，俱離劫仞之臺；輔翼萬仙，克享蘋蘩之薦。曲流恩德，溥福堪輿。臣與衆官等，無任皈依之至，再拜望雲，奉迎大駕。

降聖，初獻，散花。

臣某謹同誠上啓，虛無自然元始天



尊，上清真境靈寶天尊，太清仙境道德天尊，昊天至尊玉皇上帝，三界應感，一切威靈。臣聞大道杳冥，真靈肇布。玄元始氣，開圖於億劫之初；日月星辰，高列於萬天之上。互分主宰，共濟生民。醮官某念以子息不榮，憂惶在念。謂生非汝有，乃天地之委形；而物以道生，籍陰陽之和氣。載蠲吉日，交薦明誠，望鶴駕以凝情，想瓊輪而注目。伏願仙靈下盼，列聖迴光。六甲三元，各運保胎之節；億乘萬騎，周扶度命之章。享以明馨，庶臻蕃衍。臣叨依真教，獲預闕行，爰有詞誠，謹當宣奏。

宣詞。

諦詳詞語，備見至誠。念人爲萬物之靈，不靈則無以異於物；子者親之後，非後則無以繼其親。用傾豐饗之誠，仰瀆高高之聽。伏願蒼穹降佑，帝祚無疆。后妃符種稔之祥，媒官顯弓矢之異。皇儲錫羨，玉牒增光。君臣胥慶於明良，夷夏共遵於文軌。上以廣蓼蕭四海之澤，下以盡天保歸美

之誠。然後福及醮官，澤流後裔。格于天而格于帝，敢徼四世之五公；拜乎後而拜乎前，庶或一門之萬石。仰祈真造，俯鑒精衷。臣與醮官等，無任祈懇激切之至，再拜上香，酒陳亞獻。

散花。

臣聞元綱流演，布三景於天根；造化樞機，統萬靈於斗柄。分五行而迭運，幹四序以順成。十一曜星，紀灾祥於曆筭；四七列象，注壽夭於胎禽。顧惟陰鷲之司，憑用竭精，衷而有禱。伏念某保姓受氏，積有歲年，侍膳問安，本傳豕嫡，載陳蠲潔，希降仙靈。伏願泰階平而風雨時，火星中而寒暑正。三百六十五度四分之一，並無爽於歲時；萬有一千五百二十之星，悉罔愆於宙伏。然後享其誠意，注上南宮，傳幹蠱以相承，保鳴謙而獲吉。長庚入夢，願符太白之精；箕尾乘天，庶協商巖之祝。臣與合壇衆等，無任祈恩請命之至，酒陳終獻。

散花。

臣謹重誠上啓，諸天上帝，十極高

真，咸望洪慈，洞回昭格。臣聞嶽峙海澄，諒無文而不度；喙鳴口語，皆在地以成形。儲祥蓋本於山川，生物遂成於造化。關東出相，既有賴於風聲；惟岳降神，理亦資於和氣。或汝穎之多士，或巴蜀之好文，允屬地靈，虔依道蔭。醮官某胎嬰病注，子嗣不繁，慮冢訟之牽連，或土工之刑剋，迺陳法供，冀格上真。伏願江漢炳靈，山澤通氣，察丹誠於螻螻，歆菲薦於潢汙。海不揚波，有既陂之九澤；坤厚載物，無皆震之三川。普度幽明，俱蒙惠澤，赦其罪咎，錫以後昆。禮樂書數，則興盛於一門；地水火風，則保和於四大。漢臣官學，照鄉社以彌光；晉輔子孫，並淮流而不絕。臣與齋官無任祈恩激切之至，再拜上香，香湯獻上。

步虛。

重稱法位。

具位臣某與臨壇官衆，謹同誠上啓，玉清玉帝元始天尊，上清上帝靈寶天尊，太清大帝道德天尊，昊天至尊玉皇上帝，諸天諸地，諸水諸山，三界應

感，一切真靈。臣聞齋修行道，教雖准於六時；玄酒大羹，禮必周於三獻。顧惟塵懃，屢瀆天聰，菲薦蘋蘩，稽停儀衛。伏念臣等學法未備，犯科滋多，舉措乖儀，詞章脫略，動罹罪咎，咸乞赦原。惟冀上界高真，各還瑤闕。下方列聖，盡返仙曹。降福流恩，解灾度厄。諸天復位，寂遺響於倏歛之間；太極候烟，保胎氣於延生之府。臣等凝瞻法從，結想太空，極恨塵波，難留聖躅。臣與齋官合壇衆等，無任瞻望拜首天階奉辭聖駕激切攀戀之至，謹言。

### 復爐。

香官使者、左右龍虎君、侍香諸靈官，當令臣向來設醮之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

### 道門科範大全集卷之二十九

## 道門科範大全集卷之三十

三洞經錄弟子仲勵編

### 誓火禳災說戒儀

法事陞壇如式。

念淨天地呪。

洒水，序立。

高功臨案說戒。

具位臣某等，謹焚道香、德香，無爲清靜、自然真香，虔誠奏啓，虛無自然元始天尊，太上道君，太上老君，昊天玉皇上帝，九皇至尊，十方上聖，諸君丈人，三十六部尊經玄中大法師，圓穹上象火德熒惑星君，鶉火鶉首鶉尾之次，雍秦周洛楚荆之分，列宿星君，厚地洞宮，嶽瀆主宰，三界應感，一切真靈。咸望洪慈，俯垂洞鑒。臣今奉爲宣意，其諸情悃，已對敷宣，諒沐天恩，鑒明祀事。臣伏以夫南方火德熒惑星君，主掌萬物，燭幽洞微，福善禍淫，助天行化，攷之前代，效驗灼然。按《前漢·

天文志》云：熒惑出則大兵，入則兵散還止息，乃爲死喪寇亂，在其野亡地以戰則不勝。孝景四年七月癸未入，東井行陰道。又以九月癸未入，輿鬼。戊寅日出，占之曰：爲誅伐火灾。其從有栗氏事未央，東闕灾，元鼎中守南斗，占之曰：所守爲亂賊喪兵，其國絕祀南斗，越分野，其後相殺王及太后。漢兵誅之滅，其國前漢，熒惑示現，凡十七八，莫非凶亂之起也。後漢中元二年，火星犯太微西南星，爲將相後、太尉司徒坐事免官。永平十三年，犯輿鬼，爲大喪；質星，爲大臣誅戮。後楚王英、顏忠等，妖謀事覺而死。後漢熒惑示現，凡十二餘，莫非禍灾之至也。降自晋宋、隋唐五代之間，不可備錄。此於行度之間，變起在國者如此。按《五星明體經》云：熒惑照人，命壽促貧。窮順於命，壽至五旬，刑剋妻男，多有障難。照於疾厄，刑折風勞。逆在運宮，行年必死。此於照臨之位，灾應在人者如此。至於祝融回祿，變現人世。火自天降，名之曰灾。因世

人之罪惡貫盈，則遭其禍。秦起阿房宮，覆壓三百餘里，五步一樓，十步一閣，取之盡錙銖，而用之如泥沙。楚人一炬，火三月不滅，此因人爲所致也。縻竺嘗從洛陽乘車而歸，未至家，見一婦人求寄載。臨別曰：我是天人，使我焚東海縻竺家，今已寄君車，又不可不燒。君但速歸，我當緩來。竺乃至家，收資財以避之，至日中而火大發，此以警悟世人也。汝南桓景，因費長房謂之曰：九月九日，汝家有火災，可速去，令家人各以絳囊盛茱萸，登高山，飲菊花酒，禍乃可銷。景如其言，舉家登高。少頃還，見牛羊雞犬，皆暴死焉。後人因而仍此，有禳制之法也。漢桓帝於正旦大會群臣。欒巴含酒，望西南而嘖。帝問其故，答曰：蜀有火災，故以救之。遣使訪之，果云賴大雨從東北而來，雨中有酒氣，此有救解之術。昔熒惑守心，屬宋之分野，景公憂之，乃出君人之言三，遂徙三度。劉琨守江陵，民家失火。琨乃向火叩頭請罪，俄而，反風滅之，此有回旋之道。

夫禍福之來，皆人所召。天心仁愛，法許祈禳。今有奉道某等，同啓丹誠，修建誓火禳灾道場，命臣等宣行科範，請福禳灾，保寧境土。建壇之初，倘非叙述醮事，敷演科戒，則何以感格上靈。今當以臨壇十戒，宣示同齋之人，各請受持，咸當靜聽。

第一戒者，不得擾亂形神。常懷專一，喜怒哀樂，不萌於心，務致精明，以格上聖。

第二戒者，不得傲忽聖真。常懷恭敬，企仰尊像，心起精虔，天真大神，浮空降接。

第三戒者，不得輕慢靈文。常懷信重，三洞經典，玩味誦持，從悟成真，求證道果。

第四戒者，不得誹謗法門。常當敬護，弘道明法，濟度幽明，各令歸依，廣獲受度。

第五戒者，不得忤觸道場。常懷精潔，齋戒沐浴，始近法壇。臭穢腥血，無求取禍。雞狗禽畜，無使突來。

第六戒者，不得放縱身心，呼叫喝

罵，語笑謹誹，睡眠酗酒。昭事上真，如對君父。

第七戒者，不得退轉道心。常懷堅固，勿因小嫌，便滅誠意，精進崇奉，福利無窮。

第八戒者，不得減省法事。常懷勤恪，行道誦經，朝真拜聖，使功德滿足，幽顯沾恩。

第九戒者，不得錯悞章奏。常懷精審，若鹵莽滅裂，不加參對，則三天門下，有所譴却，圖福反禍，深可震懼。

第十戒者，不得商較財利。常懷謙讓，施者受者，各得歡喜，無使怨恚，自損福田。

已上十戒，衆官能持否？答曰：能持。

天尊言：凡拜章行道，四天帝王皆駕飛雲綠輶八景玉輿，侍從真人玉女手執華旛，前導鳳歌，後從天鈞，白鶴獅子，嘯歌邕邕，燒香散花，浮空而來。瞻禮行道，觀聽法音，天真下降，萬靈朝焉。如是豈可不盡其法邪？當先受十戒，然後行道，庠序雅步，靜心

閑意，坐起卧息，不離儀格，天真歡悅，列名上清，可謂得道方寸之門。

謹白齋官，齋法尊嚴，威禁至重。當須掃洒庭宇，每令潔靜，約飭內外，大小肅靜。勿以常俗誼雜，干冒真靈。若有善信男女，願聞道法，沐浴齋潔，來詣法壇，瞻禮皈依，同沾福利。若傲誕輕慢，不信正真，如是之者，必招冥譴。登齋之士，可不畏之。  
結願，下壇。

道門科範大全集卷之三十

道門科範大全集卷之三十一

三洞經錄弟子仲勵編

誓火禳災道場儀

啓壇行道

法事陞壇如式。

各禮師存念如法。

宣衛靈呪。

東方：

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束妖，討捕兇羣。奉承正道，赤書玉文。九天符命，攝龍驛傳。普天安鎮，我得飛仙。

南方：

三炁丹天，煥景浮光。熒星轉燭，洞照太陽。上有赤精，合契虛皇。開明靈童，號曰華房。總統火兵，備守玉堂。斬邪束妖，剪截魔王。北帝所承，風火莫當。流鈴交煥，翊衛壇場。正

道流行，敢有巴狂。我享上功，坐運魁罡。億劫長存，保天無疆。

西方：

七炁素天，太白流精。光耀金門，洞照太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普惠萬生。元皇正炁，來合我身。功加一切，天地咸寧。

北方：

五炁玄天，元始徘徊。辰星煥爛，光耀太微。黑靈尊神，號曰層威。統冠飛天，仙裙羽衣。備衛五門，檢精捕非。敢有干試，豁落斬摧。玉符所告，神鎮八威。邪門閉塞，正道明開。映照我身，三光同輝。策空駕浮，舉形仙飛。

中央：

一炁黃天，調理乾坤。陶鎔陰陽，總統玄真。鎮星吐輝，流煥九天。開明童子，號曰天璘。元炁陽精，焰上朱烟。洞照天下，及臣等身。百邪摧落，

殺鬼萬千。中山神呪，普天使然。五靈安鎮，身飛上仙。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣今啓壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，太上道君，太上老君，昊天玉皇上帝，九皇至尊，十方上聖，諸君丈人，三十六部尊經玄中大法師，圓穹上象火德熒惑星君，鶉首鶉火鶉尾之次，雍秦周洛楚荆之分，列宿星君，厚地洞宮，嶽瀆主宰，三界應感，一切真靈。臣聞大道混融，並資陶

於一氣；元精既判，咸稟受於五行。惟火德之攸司，總南訛之大柄。凡初覆育，悉荷照臨。某念共業以無知，恐招殃於不測，危疑度日，激切馳誠，瀝膽披肝，獻花酌水，恪遵靈訓，祇奉明威，瞻紫纛之前驅，從翠華之下狩，普加洪覆，俾遂安居，占舍次之休祥，保鄉鄰之綏靖。臣等告盟之始，廣濟爲先，觀其祇畏之詞，宜在關陞之列。仰希大造，允納虔祈。醮官詞誠，謹當宣奏。

宣詞。

諦詳詞語，灼見至誠。不忘累歲之祈禳，仰覲萬靈之憫覆。醮儀既戒，齋範聿陳，殫精意以申聞，竭輿情而俯豫。伏願慈顏妙感，道力旁通，未離玄座而周遍十方，不下宴居而已超塵劫。敢憑靜念，昭事虛皇，少歆祭燿之儀，爲退守心之度。伏乞玄都列聖，紫極高真，洞鑒乃衷，誕垂丕應。勅勒監齋使者，里域真官，奏事金童，傳言玉女，靈寶官屬，一合同心，降臨壇所，肅清內外，降伏妖魔。使臣等百神營衛，一

念清虛，啓奏咸通，思念立感，醮功上徹，善錄天司。普及醮官某家，消蕩千灾，增延百順，息除焚燎，掃蕩瘟邪，同歸道德之風，共樂昇平之化。明日依法行道，續更以聞，謹啓。

十二願。

復爐。

香官使者、左右龍虎君、侍香諸靈官，當令臣向來啓壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。

出堂頌。

出戶。

道門科範大全集卷之三十一

道門科範大全集卷之三十二

三洞經錄弟子仲勵編

誓火禳災儀

清旦行道

法事陞壇如式。

各禮師存念如法。

宣衛靈呪。

青陽虛映，耀日回靈。神虎辟邪，

飛玄流鈴。摧奸滅試，萬魔束形。九

微迴道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，和與道合真。

鳴法鼓三十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，各三十六人出。出者嚴裝顯服，冠

帶垂纓，關啓玄壇土地，方域神真。臣

今清旦行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，太上大道君，太上老君，太上昊天玉皇上帝，紫微天皇帝，紫微北極大帝，聖祖天尊大帝，后土皇地祇，元天大聖后，十方無極大道，諸天天帝，三十六部尊經玄中大法師，圓穹上象火星執法真君，所變所化、列宿星君，厚地洞天、嶽瀆主宰，南方離位丙丁巳午火部官屬，三界應感，一切真靈。臣聞察璿璣以齊七政之運，載在虞書；分星度以觀五緯之躔，記諸周典。仰惟火德，位鎮丹天，稱炎帝以持權，號火星而執法。夏令所主，爲風伯以應時；離卦所司，拱太微而受事。因五凶而作變，體十善以降祥，並行度而有臨，咸炳輝而垂照。某生居塵界，命係星圖。出入往來，久荷照

臨之德；行藏語默，動多過失之愆。屬星火之戒嚴，況炎威之可畏，不藉歸心之祝，曷回陰鷲之私。是用率衆籲誠，恭崇大醮，演琅函而對越，瞻絳闕以欽承，皆所以悔謝愆尤，導迎景貺。臣等棲身真館，戴教人間，觀其深秉心誠，可謂祇畏天命。爰祝釐於三境，敬瀝懇於諸天，仰祈穹極之靈，必副群心之禱。況奉詞悃，敢不上聞，爰有心詞，謹當宣奏。

宣詞。

按如詞語，灼見忱悃。諒達宸聰，恭承睿聽。竊聞瓊臺鳳闕，寶苑龍丘，自始青之肇開，及元黃之既啓。金書玉字，發現於諸天；碧簡丹文，流行於厚地。蕩蕩大化，巍巍神功，溥利有情，遍沾無極，爰遵典式，肅建靈壇，延企真旂，仰希景祐。以今清旦行道，請法衆等運茲初捻上香，願此香烟，騰空上徹，供養太上三尊，十方衆聖。臣等皈身、皈神、皈命，首體投地，以是捻香功德，上祝當今皇帝陛下。伏願體堯仁而御宇，超舜孝以安民。寶祚綿長，

茂建中興之業；聖圖增廣，彌隆泰定之基。壽比天崇，福如川至，六宮安靖，百辟忠良，金枝鬱秀於千春，玉燭均調於四炁。今故燒香，自歸依師尊大聖衆至真之德。得道之後，保天長存，和與道合真。

以今清旦行道，請法衆等運茲二捻上香，願此香雲，騰空上徹，供養太上三尊，十方衆聖。臣等皈身、皈神、皈命，首體投地，以是捻香功德，歸流某家九祖七先、前亡後逝。伏願解除冥謫，超翫仙庭，反形而游太空，脫身而離五濁，永謝九幽之地獄，長依十極之天尊，早契道真，常存正見。今故燒香，自歸依師尊大聖衆至真之德。得道之後，升入無形，和與道合真。

以今清旦行道，請法衆等運茲三捻上香，願此香雲，騰空上徹，供養太上三尊，十方衆聖。臣等皈身、皈神、皈命，首體投地，以是捻香功德，歸流某。伏願火德垂慈，陽靈介福，熒惑不聞於留伏，攙搶永戢於光芒。責己畏威，願退守心之舍；循躔錫祉，勿揚在戶之

星。中興覬王於朝家，明盛更光於人物，封疆靜謐，戶口豐繁，共趨嘉會之亨，同遂大明之上。今故燒香，自歸依師尊大聖衆至真之德。得道之後，永保長生，和與道合真。

懺方。

三啓。

三禮。

重稱法位。

具位臣某與臨壇官衆，謹同誠上啓，太上三清上聖，昊天玉皇上帝，九皇至尊，十方上聖，三十六部尊經玄中大法師，火德上真，三界應感，一切真靈。臣聞清靜之教，大闡於西周；正一之風，宣行於東漢。自虛皇之造物，至道居尊；洎盤古之開天，神化爲主。東西列陰陽之位，南北定坎離之宮，日月運行，星辰經緯，所以斡旋二氣，制御萬神。矧火德之尊星，實中天之景曜。司盜司疾，主饑主兵，所居之國罹殃，所向之方爲亂，本人爲之勃繆，致天變之不常。醮官某恭以斗建南杓，魁每端於坎位；火居夏曆，卦正屬於

離宮。事宜思患以預防，人在省躬而祇畏。欲圖寧謐，敢怠祈禳。臣等夙慕冲虛，冥探道奧，參經佩錄，按法行科，將感格於真靈，必蕩清於塵垢。伏願黃華濯質，赤景分晶，滌陰穢於百關，保靈光於八素，肅清壇席，感降飈旂，恭按明科，儼崇粹象。以小臣之法衆，歌大有之祕章，少伸昭報之誠，祇迓冲游之貺。屬茲關告，輒罄忱詞。伏願列曜收威，法星息照，重華降福，太白辟兵，火無焚燎之災，水息漂流之患。朱陵大帝賜以長生，南極老人錫之上壽。丹靈所統所轄之聖，轉禍爲祥；灾惑所變所化之星，依躔順度。一方蒙佑，比屋霑恩，俱亡卒暴之驚，共享清平之樂，乾元清泰，地紀安寧，聖祚遐長，生民康輯，上明天尊大慈之澤，下副臣等皈向之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來清旦行道之所，自然生金液丹碧，芝英百靈，衆真交會，在此

香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。出堂頌。

道門科範大全集卷之三十二

道門科範大全集卷之三十三

三洞經錄弟子仲勵編

誓火禳災儀

臨午行道

法事陞壇如式。

各禮師存念如法。

宣衛靈呪。

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破妖，明耀元功。金符召制，躡雲策龍。謠歌慶會，散花太空。神化冥運，四極安隆。伏御帝前，罔有不恭，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣

今臨午行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御至真無極大道，昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，太上大道君，太上老君，太上昊天玉皇上帝，紫微天皇大帝，紫微北極大帝，聖祖天尊大帝，后土皇地祇，元天大聖后，十方無極大道，諸天天帝，三十六部尊經玄中大法師，圓穹上象火星執法真君，所變所化，列宿星君，厚地洞天、嶽瀆主宰，南方離位丙丁巳午火部官屬，三界應感，一切真靈。臣聞元精垂象，紫微端北極之尊；列曜交躔，火德御南昌之府。幽贊生成之化，廣敷臨照之功，居絳闕以垂光，司丹天而布政。所臨分野，可驗災祥，應二數以秉權，歷周天而舒彩。或星綱改運，或分野流祥。凡處光明，敢忘寅畏。醮官某叨居塵界，幸託真休，屬星火之戒期，正朱明



之在候。當此流金之日，畏夫爍石之威，震懼靡寧，省循自咎。於是冥心謝過，克己懲愆，啓淨醮於私居，誦真詮於邃宇，仰惟霄極，俯察輿情，冀垂監在之休，可使安常之慶。臣等忝居道職，監主壇科。望天門之九重，神游玉闕；存洞章於太一，默想金姿。冀回有裕之慈，施以無涯之澤。臣既承詞悃，敢不上聞，爰有心誠，謹當宣奏。

### 宣詞。

諦詳詞語，備見忱恂。天無臭而無聲，唯聞善聽；道有情而有性，所應不違。將以感格者，必在至誠；欲祈潛通者，須憑善祝。臣聞元從一炁，肇立陰陽，彰洪化於太空，育飛精於沖極。隆隆神岳，眇眇天階，萬靈翊衛於元皇，列宿制安於羣動。在昔青童畫卦，赤帝滋民，龜龍負河洛之文，麟雀應嘉祥之命。有熊治世，金母傳符，大範備以既陳，天象幽而斯顯，一人崇則萬方昭泰，百王順則千古攸遵，咸繼位於洪猷，居中央而布德。今則薰風應律，畏景當時，仰臨照之無私，奉明威

之有感。式涓良日，嚴啓仙科，冀格高真，康延景福。以今臨午行道，請法衆等運茲初捻上香，願此香雲，騰空上徹，供養十方道寶天尊。臣等皈身、皈神、皈命，首體投地，以是捻香功德，上祝當今皇帝陛下。伏願玉曆延洪，丕基久大，壽同天地，德並唐虞，離明常運於照臨，乾健大施於宰育。皇后坤德厚載，月魄齊輝，翊贊聖君，克昌大業。常推慈儉，宣內則於九圍；永布惠和，慶本支於萬世。今故燒香，自歸依道尊大聖衆至真之德。得道之後，保天長存，和與道合真。

以今臨午行道，請法衆等運茲二捻上香，願此香雲，騰空上徹，供養十方經寶天尊。臣等皈身、皈神、皈命，首體投地，以是捻香功德，歸流某家九先滯識、七祖神儀、過往親緣、已亡眷屬。伏願金書度命，玉匱薦神，靈府凝於黃雲，仙門生於紫戶，澡新舊爽，升陟丹庭，均善利於億曾，覃餘休於來裔。今故燒香，自歸依經尊大聖衆至真之德。得道之後，昇入無形，和與道合真。

以今臨午行道，請法衆等運茲三捻上香，願此香雲，騰空上徹，供養十方師寶天尊。臣等皈身、皈神、皈命，首體投地，以是捻香功德，歸流某家長幼尊卑，親緣眷屬，三宮清淨，九戶圓明，八景榮形，七元通炁。荷清都之純喜，丕對洪休；俾素志之感神，顯增洪筭。推五行，則冀收威於火德；叙八卦，則祈解難於離宮。退舍在茲，回祿不至。今故燒香，自歸依師尊大聖衆至真之德。得道之後，永保長生，和與道合真。

懺方，命魔，三啓，三禮。

重稱法位。

具位臣某與臨壇官衆，謹同誠上啓，虛無自然三清上聖，昊天玉皇上帝，九皇至尊，十方上聖，三十六部尊經玄中大法師，火德上真，三界應感，一切真靈。臣聞景曜舒光，高聳太虛之上；列星拱極，端居寥廓之中。總化育以宣精，輔生成而布德，攝萬魔於三界，張列宿於諸天。大闡真功，普濟羣品。醮官某叨居道蔭，獲處人倫，念茲

一介之微，亦被三辰之照。但以色身所累，妄想難除，沉迷利害之場，汨沒愛憎之境。惟其稔內熱之禍，當必致自焚之災，慮回祿之不虞，乃先事而控告。涓茲穀旦，設此殊科，心意精微，香花芬馥，諷瓊編之隱韻，誦玉笈之空歌，不辭永日之勤，冀達高真之聽。伏願衆真來格，多福漸臻。蠲疫癘於未形，神無出祟；却禍殃於方至，火不爲災。俾里閭之咸安，保室家而胥慶。衆罪永滅，萬災不干，使門戶之昌隆，得生身之受度。世世昌熾，乃子乃孫；劫劫長存，亘今亘古。真根不昧，妄想悉除。上願皇帝義皞齊華，農黃繼躅，峻鼇峰而等福，廓鵬海以增年。妃后諸王，輔寧大寶。文階武列，翼亮洪基。後冀二象昭融，三光貞正，薰風入律，和氣調時。農功有積於京坻，民俗咸登於仁壽。三徒九夜，動植飛沉，同均浩蕩之恩，俱契正真之果，上明天尊大慈之澤，下副臣等懇切之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來臨午行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。

出堂頌。

出戶。

道門科範大全集卷之三十三

道門科範大全集卷之三十四

三洞經籙弟子仲勵編

誓火禳災儀

晚朝行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，

天地交周。玉符寶節，嘯命微幽。擲

火揚威，奸凶無留。萬魔振伏，紛葩却

消。摧怪滅惡，道炁周流。神光照夜，

陰翳俱收。萬神降格，扇景秉飈。羣

生咸遂，惠遍神州，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，各三十六人出。出者嚴裝顯服，冠

帶垂纓，關啓玄壇土地，方域神真。臣

今靜夜行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，太上道君，太上老君，太上昊天玉皇上帝，紫微天皇帝，紫微北極大帝，聖祖天尊大帝，后土皇地祇，元天大聖后，十方無極大道，諸天天帝，三十六部尊經玄中大法師，圓穹上象火星執法真君，所變所化、列宿星君，厚地洞天、嶽瀆主宰，南方離位丙丁巳午火部官屬，三界應感，一切真靈。臣聞陽靈表瑞，火德承天，分日域以繼明，御離方而定位。爰司夏曆，以正歲功。由是出入絳霄，循環黃道，應期不紊，謫見無私。雖懸象著明，係乎邦國；而垂災介福，亦及生靈。臣等叨荷靈休，蹈茲昌運，未能洗心鍊質，遁跡崑巒，混濁塵寰，因循俗境。而濟人助國，救物爲先，凡有投

誠，理宜昇達。況奉詞悃，敢不上聞，爰有心詞，謹當宣奏。

宣詞。

按如詞言，丹誠激切。叩之斯在，格以不違。伏聞眇邈高穹，幽微上境，熒煌火德，寔應鶉星。數推地二之神，宿而彌壯；位據離明之正，尊而不親。生土剋金，出寅入戌，考炎涼而知伏見，眈視象而辨妖祥。在職有功，猶配食心之享；乞靈救疾，尚悖祭燿之儀。矧此凡微，每叨真廕，常軫淵冰之慮，恭投豺獮之誠，肅按祕文，俯陳明薦。以今靜夜行道，請法衆等運茲初捻上香，願此香雲，騰空上徹，供養太上三尊。臣等皈身、皈神、皈命，首體投地，仰惟大聖火星執法真君。伏願暫捨躔宮，遙臨法會。朱幡赤旆，紫霧紅霞，靈突相參，獰神所侍。輝輝天際，扇育物之。晴風赫赫，空中垂照。臨之景貺，有穰必去，無豐不來。金燼蘭膏，照九幽之陰慝；檀烟瑤水，驅不善之時殃。惟冀大火安流，畢方竄匿，偕五行之有慶，覲三伏以無虞，舉至止之百

祥，歸藹然之多士，杳杳洪造，區區此心。今故燒香，自歸依道尊大聖衆至真之德。得道之後，保天長存，和與道合真。

以今靜夜行道，請法衆等運茲二捻上香，願此香雲，騰空上徹，供養太上三尊。臣等皈身、皈神、皈命，首體投地，以是捻香功德，仰惟大聖火星執法真君，虛中作離，包神水淳含之德；日晶爲性，抱畢月生化之宜。以苦滋甘，居常屬禮，虔誠有感，照燭無私。惟冀社稷尊靈，宗祧先聖，怡神絳闕，證品朱宮，流蔭帝圖，永昌大業，茂隆億載，慶集千祥。今故燒香，自歸依經尊大聖衆至真之德。得道之後，昇入無形，和與道合真。

以今靜夜行道，請法衆等運茲三捻上香，願此香雲，騰空上徹，供養太上三尊。臣等皈身、皈神、皈命，首體投地，以是捻香功德，仰惟大聖火星執法真君。願藏烜燿威光，不致侵門害魚之咎；乞止赫烈形勢，永無焚廐傷人之憂。凶悉未萌，吉皆來兆，聞祈不

忒，見請皆從。仍冀某家丹籙祛灾，清都介福，家門叶泰，善念惟新，旁周品彙之中，俱契真常之妙。今故燒香，自歸依師尊大聖衆至真之德。得道之後，永保平康，和與道合真。

三啓，三禮。

重稱法位。

具位臣某與臨壇官衆，謹同誠上啓，太上三清上聖，昊天玉皇上帝，九皇至尊，十方上聖，三十六部尊經玄中大法師，火德上真，三界應感，一切真靈。臣聞濫處人倫，繆居聖世，幸承靈寶蔭育，得睹藥笈真科。聞有福善禍淫，在操心之所致；恐其信邪倒見，莫反念以歸依。惟無上之元尊，假有爲之妙法，昭垂經典，永覺昏蒙，穰於未兆之間，安有追前之悔。今醮官某投誠大道，瀝懇諸天。每惟自不覺知，漸小愆而致甚；常憂變更運數，或積業以難逃。夙夜靡遑，行藏在念。七珍五穀，慮有積而不散之非；六畜二蠶，恐昭物極惡盈之罪。今陳菲薄醮禮，禱謝熒惑星君，恭按闕伯之規模，願遂

景公之仁感。憫茲惕若，錫以安然，里域無卒暴之驚，居止有清閑之慰。四時寧謐，八節欣怡，絕燈燭非次之光，息爐竈殊常之焰。普及各門，康泰一境，澄清樂業，安居懷仁，率善上願，二儀昭泰，三景輝華，九穀滋豐，五兵韜戢，龍神警衛，疫毒無侵，謀生遂安逸之歡，在野有謳歌之樂。飛沉遂性，動植舒榮，九夜開光，三途罷對，見大道無方之應，契聖明有感之祈。普及幽遐，俱升福岸，上明天尊大慈之澤，下副臣等皈命之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。

出堂頌。

出戶。

道門科範大全集卷之三十四

### 道門科範大全集卷之三十五

三洞經錄弟子仲勵編

誓火禳災儀

設醮行道

法事陞壇如式。

各禮師存念如法。

宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，各三十六人出。出者嚴裝顯服，冠

帶垂纓，闕啓玄壇土地，方域神真。臣

今設醮行道，謹奏爲入意，其諸誠意，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與臨壇官衆，謹同誠上啓，虛無自然元始天尊，太上大道君，太上老君，昊天玉皇上帝，紫微天皇大帝，紫微北極大帝，聖祖天尊大帝，后土皇地祇，元天大聖后，十方無極大道，諸天天帝，三十六部尊經玄中大法師，圓穹上象火星執法真君，所變所化、列宿星君，厚地洞天、嶽瀆主宰，南方離位丙丁巳午火部官屬，三界應感，一切真靈。臣聞大道玄妙，混成太極之初；至真自然，倬爲天地之祖。機權造化，開闔陰陽，分八卦而撫萬形，建四時而成庶彙。所以陽居大夏，是爲長養之方；候應南訛，式專化育之事。於是炎帝御宇，熒惑司方，分五事於禮文，專四方之火政。或當見而忽伏，或既縮而復盈。其變不常，皆爲明罰。

今醮官某嚴陳故事，祇奉陽靈，屬星火之正時，報離明之盛德，招延道侶，祇按沖科，嚴設壇場，仰延鸞馭。伏願帝車接軫，自虎關闐闐而來；星馭交驂，從豹尾勾陳而下。澗蘋在薦，澗酌有嚴。臣無任瞻望激切屏營之至，再拜望雲，奉迎仙駕。

降聖，獻茶，初獻，散花。

臣謹虔誠上啓，太上三清玉帝，昊天玉皇上帝，三界應感，一切真靈。臣聞太陽分景，是爲熒惑之星；離德宣精，亦名赤帝之子。八十萬里而騰彩，一百餘日而周天。其所居留，必形灾福，亂常以戒昏政，循度以表明時。同五星聚，而天下咸歸；與四星合，而王者受慶。儻亡亂而失德，則盈縮之無常。仰視乾文，寔存灾數。合歲星則饑饉，合太白則播遷，與土合則政益乖，與辰合則兵不利，月蝕其宮則爲戰亂，心孛其度則主燎焚。惟修德而可禳，在省躬而知畏。運數雖關於國論，灾祥寔系於民生。醮主某深慮積業招殃，修詞請命，仰荷聿臨於法席，敢稽

敷露於凡情，設醮詞誠，謹當宣奏。

宣詞。

按如詞言，丹誠懇切。醮主某念以生逢妙化，夙仰真風，正當炎夏之期，乃屬熒惑之度。居常荷德，久堅祇畏之心；出或爲灾，故啓預禳之典。諷寶經之祕祝，露雲篆之真文，妙範聿陳，宏科備舉。天人交際，憑精稔而傾虔；儀物備豐，諒馨香之昭格。儼衆真之侍坐，瞻上帝之端居，一意欽承，百靈交會。伏願龍旗鳳葆，開下界之休祥；日轂霞車，弭炎官之威烈。臣等無任請命祈恩之至，酒陳亞獻。

散花。

臣聞謹終如始者人之本，懼灾向善者理之常。生成既賴於乾坤，動靜豈離於水火。陰陽爲局，魂魄所司，冬則主事於伺辰，夏則秉權於熒惑。爰茲九夏，昏見三星，庸知闕伯之紀時，正值祝融之行度。醮官某伏念生居凡俗，長處人倫，晝而葵薪，夜而燭道，用雖憑於人火，罹或變於天灾。無私之德難量，有過之民常懼，謹虔誠於回

祿，慮有孛於大辰。被社振除，惟信鄭僑之盡禮；瓚圭弭救，未憑裨竈之知天。重敷祕典之文，載願高真之鑒，望心星之退舍，正天度於高穹，育萬物之豐成，俾羣生之共濟。可燔可炙，不罹扇毒之虞；爰處爰居，無致徙薪之慮。今則蓮燈欲燼，赫曜日之餘光；寶篆將銷，散浮雲之輕靄。千真畢集，三獻已終。龍與將返於丹霄，鸞仗欲迴於絳闕，懼致再三之瀆，冒塵咫尺之威。並願洪慈，俯垂寬貸。臣等無任祈請之至，酒陳終獻。

散花。

重稱法位。

具位臣某，謹重伸上啓，九清上聖，三界真靈。臣等輒嚴祭燿之儀，以被燎原之厄。玉京上聖，荷迂景於紫壇；南極衆星，亦傾光於黼座。已盡流霞之獻，尚騰明燭之輝。再瀝懇於諸天，乞弭災於上象，既展禮於熒惑之度，更舒誠於變化之星。惟執法之餘光，散炎精而示罰。析旦欲彊於君道，昭明蓋主於兵喪。蚩尤如旗見王者之征

伐，天攬如劍謂將帥之殺傷，司危所以平乖爭，赤彗所以掌誅滅，此皆附日而有象，復有因月而垂芒，有天陰晉若之名，有天惑官張之號。赤若異彩，天崔殊形，莫非災厄之官，悉有照臨之分。下降則爲風伯，有神則稱火精。勢焰相乘，光怪交作，願仗天尊之道炁，盡收火德之餘威。國步無艱，勿揚威於多壘；邦家有慶，遂樂業於四民。火無焚廐之小裁，人無表道之先警，暑雨時而沴氣不作，陰陽和而年穀屢豐。臣尚慮五星凌犯，青彗逆流，在東方青龍七宿分野者，請以青帝真文爲解禳之。

若五星凌犯，赤彗逆流，在南方朱雀七宿分野者，請以赤帝真文爲解禳之。若五星凌犯，白彗逆流，在西方白虎七宿分野者，請以白帝真文爲解禳之。若五星凌犯，黑彗逆流，在北方玄武七宿分野者，請以黑帝真文爲解禳之。若五星凌犯，黃彗逆流，在中央勾陳三垣帝座北斗七元星君者，請以黃帝真文爲解禳之。上願帝主萬年，本支百世，天文有序，地紀常容，國富家康，時

和俗阜。然後醮官某家等，神安體裕，益筭延齡，福祿維新，凶衰不作，眷屬亨泰，所止肅清，井邑靜安，方隅寧謐。凡有祈請，悉荷保全，普及生靈，均叨庇佑。臣等無任祈謝之至，拜首天階，謹伸奉送。

復爐。

香官使者、左右龍虎君、侍香諸靈官，當令臣向來設醮之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。

送聖，化財。

道門科範大全集卷之三十五

道門科範大全集卷之三十一

三洞經錄弟子仲勵編

誓火禳災設醮三時都懺儀

清旦

臣等至心皈命南方大聖火星執法真君，侍從靈仙官屬，星宮神仙，和諸靈官。臣衆等伏聞上帝匪忱，道無私於降鑒；高真應感，誠自格於靈承。輒罄丹衷，仰干洪造。竊以緯星應候，祀闕伯於朱明；列曜奠方，配祝融於鶉首。默運司天之紀，優持造化之權，其伏見有時，其吉凶有兆，行天不紊，應物無私，儻嚴知畏之心，必降殊常之祉。奉道某等幸遇昇平之久，時膺保合之和，化被五行，政修六府。食心食味，音呪職嚴火正之官；取柳取槐，法有四時之變。象氣交順，精誠感通，運合升明，祥無灾燿。音闡炎帝之紀，充正而不乖；太陰之原，無過與不及。上自京闕，遠覃庶邦，火焚具修，時令咸

舉，家有徙薪之慮，人懷爛額之傷。是用刻意金科，叩心玉陛，設蘋繁之淨供，薦豺獾之微誠，志心皈命南方離位丹天赤皇上真道君，火德執法真君，析變析旦昭明星君，蚩尤司詭星君，天攬赤彗星君，天陰晉若星君，官張天惑星君，赤若天崔星君，大火宮中一切神仙諸靈官。伏願道眼照臨，靈威覆護，耀熒惑以循軌，弭回祿而降休，千里儲祥，萬家蒙祐。人民平泰，無扎瘡水旱之殃；氣運協和，消伏明赫曦之變。然後方隅寧靜，居止鎮安，普及各門，咸依道蔭。得道之後，昇入無形，和與道合真。

臨午

臣等伏聞赤熒神弩，祝融烈威。在天司權，有或君或相之職；在國出納，有季春季秋之時。上則潔陽燧感格之情，下則嚴木鐸修行之禁。隄防或失，厲降自天；延發有加，幸免無地。大懼昏頑之俗，罔悛僭忒之心，天惡其盈，鬼瞰而罰。永惟焦頭爛額而遏絕，孰與滌慮洗心而禱祠，悔悟一萌，昭回

淵鑒。奉道某等捐軀道蔭，稽首真慈。豺獾報微，敢圖省察；螻蟻誠至，咸冀徹聞。惟靈輝上次之辰，與仙馭下游之分，望蠲威命，陰錫厯休，里閭清寧，井閭澄泰，不虞自息，非意罔干。兵火灾傷，尋度危亡之厄；晦明風雨，更叨利順之功。敢不皈依，以酬化育。至心皈命南方離位丹天赤皇上真，道主火德熒惑星執法真君，精炁所變傳日旁月彗孛異星星君，星中神仙諸靈官。伏冀垂慈人世，憫察凡庸，俯降塵寰，監斯誠悃，流恩賜福，赦罪釋愆，絕焰焰之燎原，無諛諛之妖語。鳥不鳴於亳社，家以靖安；星無孛於大辰，人皆康阜。鸚鵡消去，預禳無妄之灾；鶉首居歆，終獲大來之慶。得道之後昇入無形，和與道合真。

靜夜

臣等伏聞丹天絳府，掌生錄以無私；離位朱宮，布陽威而有赫。運靈芒而燭暗，騰正氣以流輝，凡在照臨，得遵皈依。今有奉道某等，擇芹捧塊，露肝膽於朱陵；潔志清心，降雲霞於

赤府。至心皈命南方大聖火德上真熒惑星真君，星中真人，星中大神，星宮神仙，諸靈官。切以地回三舍，驗彰前典之中；道贊一人，珠貫九霄之上。願回聖鑒，久察丹誠，躡丹霞紅霧以上流，擁緋旆明輿而下降，納斯壅悃，錫以殊祥，祛身罹命偶之灾，除口發心爲之過。草茅生聚，度暑景以清涼；土木形骸，叶元陽之氣序。比屋免飛煙之恐，連薨無烈焰之驚，普及羣生，同依大化。得道之後，升入無形，和與道合真。

道門科範大全集卷之三十一

道門科範大全集卷之三十七

三洞經錄弟子仲勵編

安宅解犯儀

啓壇行道

法事陞壇如式。

各禮師存念如法。

宣衛靈呪。

東方：

九炁青天，明星大神。煥照東鄉，

洞映九門。轉燭陽光，掃穢除氛。開

明童子，號曰玄卿。備衛我軒，上對帝

君。收魔束妖，討捕兇群。奉承正道，

赤書玉文。九天符命，攝龍驛傳。普

天安鎮，我得飛仙，和與道合真。

南方：

三炁丹天，煥景流光。熒星轉燭，

洞照太陽。上有赤精，合契虛皇。開

明靈童，號曰華房。總統火兵，備守玉

堂。斬邪束妖，剪截魔王。北帝所承，

風火莫當。流鈴交換，翊衛壇場。正

道流行，敢有巴狂。我享上功，坐運魁

西方：

七炁素天，太白流精。光耀金門，

洞照太冥。中有素皇，號曰帝靈，保神

安鎮，衛我身形。斷絕邪源，王道正

明。宮殿整肅，三景齊并。道合自然，

飛昇紫庭。靈寶符命，普惠萬生。元

皇正炁，來合我身。功加一切，天地咸

寧，和與道合真。

北方：

五炁玄天，元始徘徊。辰星煥爛，

光耀太微。黑靈尊神，號曰層威。統

冠飛天，仙裙羽衣。備衛五門，檢精捕

非。敢有干試，豁落斬摧。玉符所告，

神鎮八威。邪門閉塞，正道明開。映

照我身，三光同輝。策空駕浮，舉形仙

飛，和與道合真。

中央：

一炁黃天，調理乾坤。陶鎔陰陽，

總統玄真。鎮星吐輝，流煥九天。開

明童子，號曰天璘。元炁陽精，焰上朱

烟。洞照天下，及臣等身。百邪摧落，



殺鬼萬千。中山神呪，普天使然。五靈安鎮，身飛上仙，和與道合真。

鳴法鼓二十四通。

發爐。

請稱法位。

具位某等，謹同闔壇衆官，今故燒香，以是功德，奉爲天子王侯，百辟僚屬，土地官長，經籍度師，山林崑棲修真之士，同學之人，九親姻族，天下人民，飛行動植，一切衆生。今故傾心，普伸懺悔，臣等皈身、皈神、皈命太上十方靈寶自然至真無極大道，乞賜原赦，臣及齋官闔壇衆等，前世今生，無邊之罪，得免離三惡之道、十苦八難、九厄之中，使臣身得道真，飛行虛空，白日昇天，侍衛道君，逍遙無上金闕七寶自然宮殿，永與道合。所啓玄感，上御至真無極道前。

懺悔。

重稱法位。

具位臣某與闔壇衆等，謹同誠上啓，太上無極大道，元始天尊，太上道君，太上老君，昊天至尊玉皇上帝，勾

陳星宮天皇帝，中天星主紫微大帝，承天效法后土皇地祇，十方無極大道，道德衆聖天尊，至真大帝，天帝，三十六部尊經玄中大法師，土府太皇太始五帝，中黃戊己應感真靈。臣等龍漢兆劫，大橫混於無名；開皇御圖，民風成於有欲。元始分真而應化，伏犧出智以開能。既易巢居，遂興棟宇。因稼穡以爲杵臼之利，化毛血以爲竈釜之宜。六府孔修，三綱有叙。爰自陽舒陰慘，甲剛乙柔，生殺寓於無形，禍福冥於莫測，輒披經訓，方悟俗緣。但某草芥微生，塵凡弱質，幸承餘慶，獲遇明時。既將有屋之可居，欲乞自天之垂佑，恭修齋直，告謝真靈。臣既忝真司，獲膺教首，職當宣化，志在立功。凡有投誠，理難寢絕。今奉詞悃，敢不上聞，啓壇詞誠，謹當宣奏。

宣詞。

按如詞言，丹誠懇切。臣謹爲沐浴五體，澄練六情，依解災度厄之科，演安宅利居之法，施壇列纂，法地象天。以醮官某家所齋，紋繒法信，安鎮五

方，香花燈燭，證質丹誠。以今日今時，建齋爲始，至某時聞奏上真，請福祈恩，安神解犯，輒依齋法。宿、先以啓聞，恩惟太上三尊，十方衆聖，垂慈鑒映，省覽所陳，勅勒鑒察使者，土地真官，一合同心，併力營衛，掃蕩內外，清靜壇場，通達虛無，感降真聖，使臣及齋官心安神定，思念立感，啓奏御達，善功周就，無有窒滯。明日行道，續更啓聞。

十二願。

復爐。

香官使者、左右龍虎君、侍香諸靈官，當令臣向來啓壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之三十七

# 道門科範大全集卷之三十八

三洞經錄弟子仲勵編

## 安宅解犯儀

### 清旦行道

法事陞壇如式。

各禮師存念如法。

宣衛靈呪。

青陽虛映，耀日回靈。神虎辟邪，

飛天流鈴。摧奸滅試，萬魔束形。九

微迴道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，各三十六人出。出者嚴裝顯服，冠

帶垂纓，關啓玄壇土地，方域神真。臣

今清旦行道，謹奉爲入意，其諸忱悃，已錄奏聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇官衆等，謹同誠上

啓，太上無極大道，元始天尊，太上道

君，太上老君，昊天至尊玉皇上帝，勾

陳星宮天皇帝，中天星主紫微大帝，

承天效法后土皇地祇，十方無極大道，

道德衆聖天尊，至真大帝，天帝，三十

六部尊經玄中大法師，土府太皇太始

五帝，中黃戊己應感真靈。臣聞天尊孕

化，大道垂功，二氣裁形，萬靈資始。

圓清上結，懸日月而列星辰；方濁下

凝，布山川而融海嶽。由是百神受職，

以定方隅；五帝司分，各安其位。至

乃清都紫閣，百雉九重，郡邑城池，人

倫宅宇，皆有法象，以配乾坤，爰資安

鎮之功，用叶乂康之福。臣等職當行

教，佐國立功，凡有所祈，理宜聞奏，況

奉詞旨，敢不上聞。

宣詞。

按如詞言，情旨丹切，莫因精感，上達真靈。臣等率勵法流，按依科式，敷壇列慕，法地像天，鎮龍綵於十方，貢詞誠於三境。以今清旦行道，請法衆等運茲初捻上香，願此香雲，騰空供養十方無上道寶天尊。臣等皈身、皈神、皈命，首體投地，以是捻香功德，上祝當今皇帝陛下。伏冀五山鎮地，永比鴻圖；八海浮天，長齊鳳曆。祚超周漢，聖越羲農。妃后皇儲，充光睿德。諸王公主，允契休符。混車軌於九圍，集梯杭於萬寓。今故燒香，自歸依道尊大聖衆至真之德。得道之後，保天長存，和與道合真。

以今清旦行道，請法衆等運茲二捻上香，願此香烟，騰空供養十方經寶天尊。臣等皈身、皈神、皈命，首體投地，以是捻香功德，歸流齋官某家，九世七玄，俾超夜府；六親五族，並證仙階。宅宇清寧，龍神鎮守，凶灾殄息，妖惡不興。今故燒香，自歸依經尊大聖衆至真之德。得道之後，昇入無形，

和與道合真。

以今清旦行道，請法衆等運茲三捻上香，願此香烟，騰空供養十方師寶天尊。臣等皈身、皈神、皈命，首體投地，以是捻香功德，歸流天地之內，有識含生，咸沐道風，盡登真果。齋官某灾祛未兆，福降無涯，俱乘妙道之功，永證長生之品。今故燒香，自歸依師尊大聖衆至真之德。得道之後，永天長存，和與道合真。

懺方，三啓，三禮。

重稱法位。

具位臣某等，謹同誠上啓，虛无至真三境天尊，十方無極大道，道德衆聖天尊，三十六部尊經玄中大法師，土府太皇太始五帝，中黃戊己應感真靈。臣聞道化未分，混沌之首，體玄功而不宰，任真一以無爲，泊乎二象分靈，三才設位，清濁配乾坤之質，晦明彰晝夜之殊。陰陽衆神，各司其職。於是構茲棟宇，代彼層巢，既取法於天關，遂主張於陰鷲。所以乾天兌澤，各有統臨，離火巽風，互明衰盛。順之則必符

貞吉，違之則自取悔尤。惟古及今，率

由斯道。齋官某爰因卜築，恐有犯違，神道難明，常情靡測。既畢功於土木，將展禮於香燈，懺罪希恩，祛灾謝過，大弘齋薦，上達至真。是用敷列法壇，按遵科典。蘭燈散彩，下照九幽；香穗凝烟，上通三境。轉經行道，普爲懺祈。犯忤靈祇，侵傷地府；或殘害物命，汙瀆靈蹤；或觸動龍神，違諸禁忌。或因力役，致有怨咨；或以遷移，不選方所，積成釁咎，因結灾纏；或在九宮八卦之中；或在十二支干之內；或犯陰陽刑殺七十二神，下繫地司。上言天府，憑今懺謝，並乞蕩除，使齋福普覃，善功遐被。降九龍符命，宣告諸天；運三寶威神，敕勒三界。極茲夜府，開諸光明，安帝業於九重，播玄休於萬國，五兵偃戢，百穀豐登。齋官某家存歿乂康，族屬昭泰，子孫忠孝，祚胤繁昌，落罪簡於陰曹，列仙名於真境，陰陽職秩，內外神靈，護法安人，濟時利物，共揚道化，助正却邪，遐及幽明，同臻妙道，上明天尊廣濟之澤，下

副臣等皈命之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來清旦行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之三十八

# 道門科範大全集卷之三十九

三洞經錄弟子仲勵編

## 安宅解犯儀

### 臨午行道

法事陞壇如式。

各禮師存念如法。

宣衛靈呪。

丹靈朱火，炎霞激風。赤輪剛運，天光行衝。迸威包羅，交變萬方。流金豁落，群魔滅蹤。辟奸破妖，明耀元功。金符召制，躡雲策龍。謠歌慶會，散花太空。神化宜運，四極安隆。伏御帝前，罔有不恭，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝願服，冠帶垂纓，關啓玄壇土地，方域神真。臣

今臨午行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇官衆等，謹同誠上啓，太上無極大道，元始天尊，太上道君，太上老君，十方無極大道，道德衆聖天尊，至真大帝，天帝，三十六部尊經玄中大法師，土府太皇太始五帝，中黃戊己應感真靈。臣等夙荷玄休，躬逢道化，五文散景，三洞開光，引至理於重玄，暢神功於妙用。獲參祕蹟，得以稟修，而告盟之初，立功爲本。凡有皈向，敢不上聞，爰有忱誠，謹當宣奏。

宣詞。

按如詞旨，誠切修崇。臣等忝職玄科，理宜開度。齋官某頃因繕緝，土木興工，慮犯真靈，願伸祈懺。是敢按三清之格，披九奏之儀，奉信列詞，請修齋直，冀憑關奏，上達至真。以今臨午行道，請法衆等運茲初捻上香，願此香

雲，騰空供養十方無上道寶天尊。臣等皈身、皈神、皈命，首體投地，以是捻香功德，上資宗廟尊靈，列聖昭穆，上登聖品，下福睿圖。皇帝德紹義農，明均日月，握金鏡以臨四海，調玉燭而育萬方，朝有忠賢，野無遺逸。今故燒香，自歸依道尊大聖衆至真之德。得道之後，保天長存，和與道合真。

以今臨午行道，請法衆等運茲二捻上香，願此香烟，騰空供養十方無上經寶天尊。臣等皈身、皈神、皈命，首體投地，以是捻香功德，歸流齋官某家九祖幽儀，生天悟道；七玄飛爽，證品登真。泊于宅宇龍神，陰陽將吏，各安所部，共洽無爲，轉崇秩於靈階，叶殊功於道果。今故燒香，自歸依經尊大聖衆至真之德。得道之後，升入無形，和與道合真。

以今臨午行道，請法衆等運茲三捻上香，願此香雲，騰空供養十方無上師寶天尊。臣等皈身、皈神、皈命，首體投地，以是捻香功德，歸流齋官某福樹長春，道風遐被，壽延祿永，罪滅災銷。

然後夜府寒庭，三塗六趣，俱超沉滯，同契至真。今故燒香，自歸依師尊大聖衆至真之德。得道之後，永天長存，和與道合具。

唱方，懺方，命魔，三啓，三禮。

重稱法位。

具位臣某與闔壇衆等，謹同誠上啓，金闕虛無九清上帝，土府太皇太始五帝，中黃戊己應感真靈。臣聞大道既分，聖人設教，取諸易象，法彼上玄。裁棟宇之規，代巢穴之制，以利天下，以覆羣生。乃命天地神祇，陰陽將吏，分階列品，互有主張。今古攸遵，吉凶無爽。齋官某頃因營繕，土木興工，恐穿鑿靈蹤，侵傷神位，犯休王之氣，違禁忌之方。爰啓壇場，用伸懺謝。臣等按河圖品格，披三洞典儀，率勵法流，精修齋直，稽顙於三元之下，披心於萬聖之前，懺悔罪瑕，祈恩請宥，冀因虔懇，感降真靈。謹爲弟子某，上請倉明救敗君，安闕天玄君，天休天陽君，解患却厄君，赤沙天官君，仙官計平君，始陽繕治君，青龍道化君，主安宅利

君，除灾却怪，誅滅故氣，收伏邪精，蠱毒摧鋒，凶妖殄息。又請漢明地皇君，無上監氣君，爐火玉女，前校大兵，主收居宅之中、井竈之鬼。又請楊方平石君，主收土氣土翁爲害之者。又請高倉天匠君，主收地中丘墓之氣，禁忌之神，使正氣流行，凶邪摧伏，居上清泰，常獲康宜，家有禎祥，門無夭橫，六親蒙福，九祖生天，壽祿增延，罪咎銷解，冤仇和釋，注訟沉零，內外清安，動靜昭暢。上冀聖圖悠久，祚曆遐延，萬國宅心，八紘順化，天清地朗，國富人歡，瑞謀休符，日書月至，風雲表貺，海嶽蘇舒。洎乎六趣九幽，有生含識，並沾洪福，各遂逍遙。宅宇龍神，陰陽正職，仙功懋賞，安鎮方隅，自幽及明，普令升泰。上明天尊廣濟之澤，下副臣等皈命之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來臨午行道之所，自然生金液丹碧，芝英百靈，衆真交會，在此

香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之三十九

### 道門科範大全集卷之四十

三洞經籙弟子仲勵編

#### 安宅解犯儀

#### 晚朝行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火持威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。羣生咸遂，惠遍神州，和與道合真。

鳴法鼓二十四通。

無上三天玄元始三炁，太上道君

太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣

今靜夜行道，謹奏為入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇官衆等，謹同誠上啓，太上無極大道，元始天尊，太上道君，太上老君，十方無極大道，道德衆聖天尊，至真大帝，天帝三十六部尊經玄中大法師，土府太皇太始五帝，中黃戊己應感真靈。臣聞太上垂文，元皇設教，陶融萬有，亭毒群方。三洞玉書，降九清而演妙；諸天大聖，殷至道以度人。佐國為先，慈救為本。凡有詞款，敢不上聞，齋意忱誠，謹當宣奏。

宣詞。

臣等依按詞誠，理宜關奏。齋官某以居宅之所，併有繕修，慮違忤神明，犯干禁忌，虔伸懺滌，以贖愆瑕。是敢遵按典儀，精崇壇墀，開玄都玉笈，依黃籙簡文，法地像天，修齋行道。以今靜夜行道，請法衆等運茲初捻上香，願

此香雲，騰空供養十方無上道寶天尊。臣等皈身、皈神、皈命，首體投地，以是捻香功德，歸流宗廟先靈，列登昭穆，凝神快樂，馭景逍遙，上祝皇帝陛下，昇聞上境，安鎮鴻圖，均兩曜而燭萬方，齊三光而育羣品。儲宮妃后，光贊休明。文武職寮，輔成睿化。今故燒香，自歸依道尊大聖衆至真之德。得道之後，保天長存，和與道合真。

以今靜夜行道，請法衆等運茲二捻上香，願此香烟，騰空供養十方無上經寶天尊。臣等皈身、皈神、皈命，首體投地，以是捻香功德，歸流齋官某家九世幽靈，遊神碧落，六親眷屬，列品仙都。洎乎宅宇之中，龍神將吏，鎮安其位，清蕩妖凶，克叶乂寧，永符貞吉。今故燒香，自歸依經尊大聖衆至真之德。得道之後，升入無形，和與道合真。

以今靜夜行道，請法衆等運茲三捻上香，願此香烟，騰空供養十方無上師寶天尊。臣等皈身、皈神、皈命，首體投地，以是捻香功德，歸流普天率土，含識衆生，遐及幽明，同均福祐。齋官

某家凶灾殄息，祿筭延長，永承道德之風，俱契真仙之果。今故燒香，自歸依師尊大聖衆至真之德。得道之後，永天長存，和與道合真。

唱方，懺方，三啓，三禮。

重稱法位。

具位臣某與闔壇官衆等，謹同誠上啓，虛無三境六御宸尊，十方得道衆聖天尊，土府太皇太始五帝，中黃戊己應感真靈。臣等獲奉至真，參修祕妙，功未加於動植，化未洽於生靈。每思佐國化人，引道贊法，奉揚玄奧，廣濟人天。齋官某以營葺所居，興工動役，或撻材運石，驚動龍神；或增下損高，犯違禁忌；或所居之地，有古跡靈墟；或穿鑿之方，有荒祠敗壘；或汙瀆仙境；或侵逼名蹤；或失五姓之宜；或乖二宅之利。因其繕飾，遂構灾凶，虔設壇場，遍申祈懺。臣等按天師格品，依正一法文，上請救敗君等一十二部天官將吏兵士，驅除故氣，清蕩妖邪，却地中土木之精，及遊尸屬鬼，解土公侵食之害，銷五方禁忌之灾，一切凶

妖，悉令除蕩，禎祥霧集，禍害冰銷。伏願太上衆尊，垂慈鑒映，降流真氣，覆祐其方。敕勒正神，鎮安其位，常符貞吉，永保康宜。上願帝道隆昌，皇風遠扇，三邊有泰，八海無波，疫毒不侵，星辰含度。洎乎泉扃夜府，長曙光明；蠢類有生，無失其所。齋官某家，上玄幽爽，證品生天，子孫傳忠孝之規，遠近享乂安之福，龍神密衛，動靜和寧，普沐玄功，並昇真界。上明天尊大慈之澤，下副信人至懇之誠，謹啓以聞。

十二願。

復爐。

香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之四十

## 道門科範大全集卷之四十一

三洞經錄弟子仲勵編

### 安宅解犯儀

一時行道

法事陞壇如式。

各禮師存念如法。

宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，各三十六人出。出者嚴裝顯服，冠

帶垂纓，關啓玄壇土地，方域神真。臣

今陞壇行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇官衆等，謹同誠上啓，太上無極大道，元始天尊，太上道君，太上老君，十方無極大道，道德衆聖天尊，至真大帝，天帝，三十六部尊經玄中大法師，土府太皇太始五帝，中黃戊己應感真靈。臣聞大道融真，元皇御運，五文開教，三洞宣行。天尊垂廣濟之科，太上播無疆之澤，陶鈞庶品，拯度羣生。臣億劫良因，被沐玄化，龍書鳳紀，玉札瓊篇，得以稟修，用期昇度，而告盟之始，約拯救爲先。凡有所陳，不容寢絕，況奉詞旨，敢不上聞，齋意忱誠，謹當宣奏。

宣詞。

按如詞言，情誠丹切。理宜開度，以付玄慈。竊惟五太之前，三靈分化，泊于太古，未雜澆漓，冬穴夏巢，懷道

抱德，各安所適，玄會無爲。自數兆陰陽，象垂棟宇，吉凶善惡，倚伏相乘。順之則代享禎祥，違之則人罹災沴。聖真引訓，愍濟爲心，懺罪祈恩，俾崇齋直。臣等相携同謁，率按典儀，式建壇場，以祈福祐。以今陞壇行道，請法衆等運茲初捻上香，願此香烟，騰空供養十方無上道寶天尊。臣等皈身、皈神、皈命，首體投地，以是捻香功德，歸流社稷尊靈，宗祧先聖，清都瑩質，紫極延祥，福被宸居，慶傳帝葉，比嵩衡而作配，與日月以齊明。太子諸王，承匡聖業。賢臣良輔，克贊謀猷。萬國梯航，群生昭泰。今故燒香，自歸依道尊大聖衆至真之德。得道之後，保天長存，和與道合真。

以今陞壇行道，請法衆等運茲二捻上香，願此香烟，騰空供養十方無上經寶天尊。臣等皈身、皈神、皈命，首體投地，以是捻香功德，歸流齋官某家九祖七玄，先靈幽爽，棲神絳苑，鍊魄丹臺，襲氣母以登真，御雲躡而託化，福資來裔，澤及存亡，克荷玄休，常承元

吉。今故燒香，自歸依經尊大聖衆至真之德。得道之後，升入無形，和與道合真。

以今陞壇行道，請法衆等運茲三捻上香，願此香烟，騰空供養十方無上師寶天尊。臣等皈身、皈神、皈命，首體投地，以是捻香功德，歸流齋官某家眷屬宗親，同滋禎貺，福延壽永，禍滅灾消。泊乎宅宇龍神，陰陽將吏，遷功茂賞，加爵增勳，納吉祐於中宮，蕩灾凶於外域。今故燒香，自歸依師尊大聖衆至真之德。得道之後，永天長存，和與道合真。

唱方，懺方，三啓，三禮。

重稱法位。

具位臣某與闔壇官衆等，謹同誠上啓，金闕虛無九清上帝，瑤臺瓊闕妙有高真，土府真皇大帝，應感一切真靈。臣聞道化既彰，玄風遐扇，生神變化，以暢神功。由是羽殿霞房，凝雲結氣，浮雲表象，應物效靈。上古聖人，法天體道，肇興宮室，以代穴巢，取則二儀，分靈五氣，爰設陰陽之位，乃明凶吉之



殊。天地正神，以司其任。善則延祥致福，克保安寧；惡則降禍流殃，蹈茲凶咎。遂著修禳之品，俾申祈謝之儀。況志在立功，職惟濟物，凡有投告，敢不上陳。齋官某以築室營居，不明禁忌，慮因締葺，犯觸神明。恐上犯天靈，四時六氣，違逆正道，延降凶衰。又恐旁犯太歲、太陰、飛廉、豹尾、陰陽、刑殺、支干衆神。又恐下犯地司，九宮八卦，地宮土府，陰境靈祇，興役運功，動違神道。又恐所居之地，歲月浸深；或是故園田墟，宮城遺址；或是神山靈跡，福地勝居；或是先哲古賢，丘陵墳墓；或是城隍社廟，郊祀壇場；或是敗壘故營，戰爭之地；或是盟壇誓處；或是廢市空塵；或是腐骨窮魂，尚爲依託；或是遊神之鬼，猶有所憑，凶怪時彰，灾妖或起，凡情靡測，禳謝無方。今按靈寶真經，正一科品，齋持法信，崇建道場，法地像天，祈恩悔過。臣等輒依科典，虔備焚修，關奏上真，解消灾咎，普十方而懺滌，仰三寶以皈依。伏冀大聖垂光，高真下濟，

敕四司官屬，五帝威靈，洗蕩過尤，帝流福祉，使龍神正職，安鎮其方，沴氣邪精，潛靈厚地，凶灾殄息，故氣消亡，居止又寧，存歿安泰。五瘟四毒，無害於人；水火刀兵，無傷於物。七玄開度，長夜光明，祿壽遐長，子孫忠孝，內無天橫，家有禎祥。帝澤宸波，永安於北極；五風十雨，咸若於中天。百穀豐登，五兵偃戢，飛沉蠢動，九夜三途，俱仗玄功，共均齋福。上明天尊大慈之澤，下副信人至懇之誠，謹啓以聞。

#### 十二願。

#### 復爐。

香官使者、左右龍虎君、侍香諸靈官，當令臣向來行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓，速達徑御至真無極大道、昊天玉皇上帝御前。

#### 出堂頌。

#### 出戶。

道門科範大全集卷之四十一

### 道門科範大全集卷之四十二

三洞經錄弟子仲勵編

#### 安宅解犯儀

#### 散壇行道

法事如式。

各禮師存念如法。

宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，各三十六人出。出者嚴裝顯服，冠

帶垂纓，關啓玄壇土地，方域神真。臣

今設醮行道，謹奉爲入意，其諸誠悃，已錄告聞，願得太上十方正真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與闔壇官衆等，謹同誠上

啓，太上無極大道，元始天尊，太上道君，太上老君，十方無極大道，道德衆聖天尊，至真大帝，天帝，三十六部尊經玄中大法師，土府太皇太始五帝，中黃戊己應感真靈。臣聞萬象未形，一元肇啓。虛無大道爲生化之根元，清淨真風乃陰陽之宗本。於是先分二氣，後顯三才。尊卑之位既彰，覆載之功攸著。冬穴夏巢之代，淳樸未移；上棟下宇之儀，易象方作。莫不裁形天地，取法乾坤，定方圓之規，列陰陽之數。順之則自天垂佑，福被無疆；違之則萬物延災，禍生不測。吉凶斯在，今古攸遵。況復處世多端，修心未至，動貽悔吝，易積愆瑕，非託上真，無由解謝。竊聞天尊設教，真文啓穰鎮之

科；大道垂慈；靈寶有懺祈之典。敢緣斯旨，輒備醮壇，瀝懇諸天，告盟五帝，冀蒙鑒佑，俯降威靈。俾天地靈司，陰陽僚屬，迴雲迂景，下察啓祈，采納丹誠，霧流鴻福。臣與齋官合壇衆等，無任瞻望天衢，激切欽竚，皈向之至，誠惶誠恐，稽首再拜，奉迎仙駕。

降真，上茶，初獻，散花。

臣謹重誠上啓九清上聖，三界威靈。伏聞至誠可以感神，作德而能銷變，景公懼禍而熒惑退舍，黃帝用道而蚩尤辟兵，蘋蘩蘊藻可以薦群神，齋戒沐浴可以祀上帝。自惟弗類，實懼乃心，法天象地，以建香壇，捧塊摘芹，而伸醮禮。遵靈寶祈恩之典，法真師謝過之儀，仰望真靈，俯矜凡悃。臣既承詞旨，敢不上聞，齋意忱誠，謹當宣奏。

宣詞。

按如詞言，誠爲至切。醮官某身同腐器，命若垂絲，禍福雖本於自天，感應實由於在己。此生何託，惟道是依。輒披肝膽之誠，上瀆清寧之鑒。所有興修觸犯，前後過愆，輒對真靈，

披陳解謝。醮官某家居宅之內，若犯觸天神者，請皇天上帝解謝之；若犯觸地神者，請后土九皇君解謝之；若犯觸東方青龍支干禁忌神者，請東方七宿星君解謝之；若犯觸南方朱雀支干禁忌神者，請南方七宿星君解謝之；若犯觸西方白虎支干禁忌神者，請西方七宿星君解謝之；若犯觸北方玄武支干禁忌神者，請北方七宿星君解謝之；若犯觸中央勾陳支干禁忌神者，請北斗七元星君解謝之；若犯八宅五宅一十四宅神者，請九老仙都君解謝之；若犯子、丑、寅、卯、辰、巳、午、未、申、酉、戌、亥十二支神者，請天上客星君解謝之；若犯甲、乙、丙、丁、戊、己、庚、辛、壬、癸十干大神者，請天上御史君解謝之；若犯乾、坎、艮、震、巽、離、坤、兌八卦大神者，請道德君解謝之；若犯建除滿平定執破危成收開閉神者，請天一貴人君解謝之；若犯天道、地道、人道、神道者，請長生君解謝之。伏願各安乃位，永奠厥居，赦罪宥愆，流恩注福，敷佐天育物之德，推

助道興化之心，保家宅之安寧，冀神明之協相，式彰洪造，俯慰凡情。臣與齋官合壇衆等，無任懺謝希恩之至，酒陳亞獻。

臣謹重誠上啓太上三尊、五老上帝、三寶衆聖、內外靈司、陰陽官屬、六甲禁忌、一切神明。伏聞真道杳冥，體無爲而化物；聖人數妙，因立教以垂文。善惡必彰，吉凶無爽。今謹有醮官某，伏慮運行舉措，違悞神明；相宅卜居，犯干禁忌。或移川塞澗，增下損高，土木興工，穿鑿傷性，不明陰陽之理，罔知衰旺之宜。況復古往今來，陵遷谷變，所居之地，終始難明。或是城邑遺基、神祠舊址，或是真壇福地、古廟靈蹤，或昔人戰鬪之墟，或先哲會盟之所，或曾爲窯竈，或舊有丘陵，或先聖壇場，或龍神窟宅，或叢林聚異，或水石藏靈。既迫俗居，寧無褻瀆，恐因觸犯，遂結灾衰。以今吉日良時，披心大道。按天師科格，遵靈寶文儀，虔請衆神，仰伸懺謝。若弟子某居宅之內，犯觸太歲將軍者，請紫微宮方伯君解

謝之；若犯觸太陰歲殺神者，請天上貴人君解謝之；若犯觸歲刑歲破神者，請鎮星君解謝之；若犯觸黃旛豹尾神者，請太白君解謝之；若犯土豹宅神者，請地侯君解謝之；若犯日遊月建神者，請羲和君解謝之；若犯太陰太陽神者，請乾坤君解謝之；若犯雷公霹靂神者，請紫微君解謝之；若犯觸咸池力士神者，請離兌君解謝之；若犯觸天狗地囊神者，請諸天父君解謝之；若犯觸年刑月害日惡時凶神者，請元女君解謝之；若犯觸青龍神者，請東王公解謝之；若犯白虎神者，請西王母解謝之；若犯觸朱雀神者，請炎帝君解謝之；若犯觸玄武者，請玄冥君解謝之；若犯騰蛇后土神者，請胡越君解謝之；若犯五土眷屬神者，請五靈老君解謝之；若犯陰宅陽宅刑福神者，請日月君解謝之；若犯飛廉郭忌神者，請太一君解謝之；若犯死喪縣獄天禍神者，請韓君丈人君解謝之；若犯金匱玉堂、天福宅德、天倉天府、天門地戶、人道鬼路神者，

請都統君解謝之；若犯大耗小耗、四激三刑、天羅地網、八魁九妖、弦望晦朔、陰陽滅没神者，請道化君解謝之；若犯父母眷屬、十二命坐神者，請延壽益筭君保護之；若犯六畜蠶命之位神者，請好生度命君衛護之。乞使七十二神、二十四吏、陰陽正職、內外神靈，安鎮其方，各居所部，屏凶衰於四境，除灾沴於八方，殃咎永消，休祥密降。增壽年於生錄，祿祚惟新，釋罪目於陰曹，疫癘無作。家傳孝悌，門襲忠良，常承至道之恩，克荷神明之佑。臣與醮官合壇衆等，無任懺謝之至，酒陳終獻。

### 重稱法位。

具位臣某等，謹同誠上啓九清十極衆聖高真，六甲三元陰陽正職，靈壇應感三界威靈。臣等依按明科，恭陳醮禮，荷真靈之降顧，享誠意之恪勤。啓謝既周，復升宮闕。雲輶羽蓋，將返虛无。延降失儀，薦陳乖禮。在上帝憫其罪咎，冀百神恕其愚庸。以百姓之心爲心，因斯民之利而利，求愈多而與

愈有，厚不困而生不傷。地平天成，陰誘默相。勿奪其鑿，庶逃故悞之愆；相協厥居，俾遂生成之理。臣等凝瞻法從，結想太空，極恨塵埃，難留聖躅。臣與齋官衆等，無任瞻望雲闕，激切攀戀，依歸之至，謹啓以聞。

復爐。

香官使者、左右龍虎君、侍香諸靈官，當令臣向來設醮行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，臣向來所啓，速達徑御至真無極大道、昊天玉皇上帝御前。

送神，化財，念善。

道門科範大全集卷之四十二

道門科範大全集卷之四十三

三洞經錄弟子仲勵編

安宅解犯懺方儀

十方

臣衆等今故燒香，歸身、歸神，奉爲齋官某家修齋行道。仰謝十方無極，太上靈寶天尊，十極天君，五老上帝，二十八舍，十二宮神，支干禁忌，八方主宰，上下神明。仰慮住居修造之所，侵傷八卦，忤觸九宮，上冒天光，下傷地脉。今故立齋行道，謝過希恩。伏冀大道垂慈，普賜開宥，罪瑕洗蕩，慶善永臻，眷屬咸安，龍神復位，得道之後，昇入無形。

三光

臣衆等今故燒香，歸身、歸神，奉爲齋官某家修齋行道。仰謝日月星宮，至真大聖，三光神仙，諸靈官。仰慮居宅修造之所，犯觸神明，負違禁忌，穢慢三光，不順星辰日月行運之期，結成

過咎，延致灾衰。今故立齋行道，謝過希恩。伏冀景曜潛敷，靈光下燭，神安乃位，人奠厥居，宅宇安寧，龍神警衛，幽關昭朗，動植舒榮，得道之後，昇入無形。

五嶽

臣衆等今故燒香，歸身、歸神，奉爲齋官某家修齋行道。仰謝五嶽真君，飛仙真人，名山洞府得道神仙，諸靈官。仰慮居宅修造之所，犯觸神明，或違天禁地忌，在五帝五嶽之司，結成過咎，未獲原除。今故燒香行道，謝過希恩。伏冀嶽府仙曹，名山職宰，特原罪犯，永錫休祥，壽祿增延，灾衰洗蕩，眷屬寧泰，門宇興昌，得道之後，昇入無形。

水府

臣衆等今故燒香，歸身、歸神，奉爲齋官某家修齋行道。仰謝扶桑大帝，暘谷神王，三河四海、九江水帝，十二河源、四瀆神君，水府神仙，諸靈官。仰慮居宅修造之所，閉塞泉源，侵傷水脉，違上善之性，虧潤下之功，輕忤聖

真，穢觸江海，結成罪咎，在水府之中，歷代纏綿，未蒙解釋。今故燒香行道，謝過希恩。伏冀副善利之慈，錫靈長之惠，福如川至，災逐冰消，洗罪垢以一新，疏慶源而不息，得道之後，昇入無形。

### 經寶

臣衆等今故燒香，歸身、歸神，奉爲齋官某家修齋行道。仰謝至真無上三十六部尊經，真文寶符，三洞正法，十方祕藏，侍衛經典，一切靈司。仰慮居宅修造之所，犯觸真靈，穢瀆靈蹤，侵傷福地；或三寶遺跡，經教所行，有衛法靈司，侍真官屬，在所居之地，非凡俗所知，因有犯違，結成罪咎，在三寶之府，未獲原除。今故燒香行道，謝過希恩。伏冀萬聖開光，衆真鑒祐，犯觸之罪，並乞蕩除，福善來臻，壽祿增益，龍神復位，人口莫居，動止霑榮，幽明開泰，得道之後，昇入無形。

### 安宅解犯十方懺謝儀

#### 東方

臣等奉爲齋官某，仰謝東方至真無極青帝，九炁天君，青龍東斗，角亢氏房心尾箕七星君，甲乙寅卯木德震神，少陽之氣九夷老君，勾芒太皞春王正神，帝車帝輅帝舍歲星木官。仰慮居宅之所，犯觸神明，負越禁忌，延致災殃。今故燒香，歸命靈寶天尊，修齋行道，謝過希恩。伏願解除所犯，賜以福祥，消中央土氣一切災凶，罪咎蠲平，災衰屏息，存亡俱泰，福祿惟新，得道之後，昇入無形。

#### 南方

臣等奉爲齋官某，仰謝南方至真無極赤帝，三炁天君，朱鳥南斗，井鬼柳星張翼軫七星君，丙丁巳午火德離神，太陽之炁八蠻老君，祝融火帝，熒惑夏神，帝車帝輅帝舍騰蛇九紫陰陽衆神。仰慮居宅之所，犯觸神明，負違禁忌，延致災殃。今故燒香，歸命靈寶天尊，

修齋行道，謝過祈恩。伏願解除所犯，賜以安寧，銷西方金氣一切災凶，罪咎蠲平，災衰靜息，存亡俱泰，福壽惟新，舉家貞吉，眷屬霑榮，蒙如所請，仰荷玄恩，得道之後，昇入無形。

#### 西方

臣等奉爲齋官某，仰謝西方至真無極白帝，七炁天君，白獸西斗，奎婁胃昂畢觜參七星君，庚辛申酉金德兌神，少陰之氣六戎老君，蓐收少皞太白秋神，帝車帝輅帝舍咸池刑殺陰陽衆神。仰慮居宅之所，犯觸神明，負違禁忌，延致災殃。今故燒香，歸命靈寶天尊，修齋行道，謝過祈恩。伏願解除所犯，賜以安寧，銷東方木氣一切災凶，罪咎蠲平，災衰靜息，存亡俱泰，眷屬又安，舉家貞吉，福壽惟新，蒙如所請，仰荷玄恩，得道之後，昇入無形。

#### 北方

臣等奉爲齋官某，仰謝北方至真無極黑帝，五氣天君，玄武北斗，斗牛女虛危室璧七星君，壬癸亥子水德妖神，太陰之氣玄枵辰星五狄老君，玄冥顯

項冬神水官，太一刑殺陰陽正神。仰慮居宅之所，犯觸神明，負越禁忌，延致災殃。今故燒香，歸命靈寶天尊，修齋行道，謝過祈恩。伏願解除南方火氣一切災凶，罪咎蠲平，災衰寧息，存亡俱泰，眷屬又安，舉家貞吉，福壽惟新，蒙如所請，仰荷玄恩，得道之後，昇入無形。

### 東北方

臣等奉為齋官某，仰謝東北方至真無極梵炁天君，下謝艮宮土府太陰之神，魁剛建破四殺神君。仰慮居宅之所，犯觸明靈，負違禁忌，延致災殃。今故燒香，歸命靈寶天尊，修齋行道，謝過祈恩。乞為罪隨懺滅，福與願來，衆惡蠲消，千災蕩散，存亡俱泰，祿壽惟新，眷屬安寧，子孫昌盛，蒙如所請，仰荷玄恩，得道之後，昇入無形。

### 東南方

臣等奉為齋官某，仰謝東南方無極太上靈寶天尊，已得道大聖，衆至真，諸君丈人，梵炁天君，風宮地戶招搖異神，三刑四殺六辛神君。仰慮居宅修

造之所，犯觸神明，負違禁忌，擾動龍神。今故燒香行道，謝過希恩。伏覲罪咎銷解，福善咸臻，存亡開泰，眷屬安寧，龍神鎮守，壽祿增延，蒙如所請，仰荷玄恩，得道之後，昇入無形。

### 西南方

臣等奉為齋官某，仰謝西南方至真無極梵炁天君，下謝人間方域、攝提坤宮、四維四極、乙癸神君。仰慮居宅之所，犯觸明靈，負越禁忌，延致災殃。今故燒香，歸命靈寶天尊，修齋行道，謝過祈恩。乞蠲觸犯之罪，隨懺銷平，灾咎不侵，凶衰靜息，禎祥荐至，祿壽增延，眷屬咸安，存亡俱泰，蒙如所啓，仰荷玄恩，得道之後，昇入無形。

### 西北方

臣等奉為齋官某，仰謝西北方至真無極梵炁天君，下謝青龍司命天門之神，亥宮乾位壬甲神君。仰慮居宅之所，犯觸明靈，違越禁忌，延致災凶。今故燒香，歸命靈寶天尊，修齋行道，謝過希恩。乞為罪隨懺滅，福與願來，凶灾靜息，福壽增延，祥瑞來臻，家安

人泰，子孫忠孝，存歿同榮，蒙如所啓，仰荷玄恩，得道之後，昇入無形。

### 上方

臣等奉為齋官某，仰謝上方至真無極梵炁天君，諸天至極，上聖高尊，日月星宿、八風五行、風雨雷電、陰陽正神，上謝乾儀天道，日遊月行，八龍九虎，太一十精，飛旗八殺，北斗七星，天上天下，一切神明。仰慮居宅之所，犯觸真靈，負違禁忌，穢慢三光，上不敬天道，下不畏鬼神，愆咎連積，延致灾殃。今故燒香，歸命靈寶天尊，修齋行道，謝禍祈恩。乞千灾蕩散，萬罪銷平，舉家蒙福，存歿安寧，祿延壽永，禍滅福生，蒙如所啓，仰荷玄恩，得道之後，昇入無形。

### 下方

臣等奉為齋官某，仰謝下方無極世界、神仙至真，高皇土府、九宮真人，四司五帝、十二仙君，靈洞川澤、五嶽尊神，下謝陰陽所運、八卦九宮、五行二宅、后土至真，地下侯伯，四正諸神，八部禁忌、守宅將軍、五土官屬，五土子

孫，及將軍太歲、豹尾黃幡、奏書博士、刑德衆神，七十二位內外神靈。仰慮居宅之所，犯觸神明，違越禁忌，延致灾殃，或五行刑剋，四殺侵凌，怪夢紛擾，居止不寧。今故燒香，歸命靈寶天尊，修齋行道，謝過祈恩。一懺罪滅，萬善咸臻，犯觸之咎，並乞銷平，舉家康泰，居止安寧，福壽增延，存亡同福，蒙如所啓，仰荷玄恩，得道之後，昇入無形。

### 安宅解犯都懺儀

#### 二十方

臣等今故燒香，歸身、歸神，奉爲齋官某家修齋行道。仰謝十方無極太上靈寶天尊，已得道大聖，衆至真，諸君丈人，日月星辰、三界諸天、五嶽水符、三寶威神，天上天下、十極尊靈，下及中黃九土、戊己黃神，土府五帝，六甲五行、九宮八卦、陰陽正神，太歲刑德，一切神明。切慮居宅修造之所，犯觸靈司，或侵傷地理，穢塞泉源，明違禁

忌，幽忤龍神，積成罪因，無門解謝。以今修齋行道，懺悔祈恩。伏冀衆聖開光，十方流貺，百神介福，五帝垂休，解除所犯，賜以自新，罪咎消平，灾衰洗蕩，眷屬寧泰，祿壽延長，宅宇鎮安，龍神守衛，得道之後，昇入無形。

#### 道門科範大全集卷之四十三

### 道門科範大全集卷之四十四

三洞經錄弟子仲勵編

#### 安宅解犯謝竈儀

##### 靜夜陞壇

法事如常。

具位某謹與本宅居住奉道某等，以今焚香，虔誠上啓，大聖司命竈君、龜君夫人，六癸玉女，光姑室女，竈下炊母，行火力士，火父火母，文墨小吏，擔柴力士，膏梁君子，竈上姘女，硯上童子，五方旺相竈君，大竈小竈君，紫微天神，玉池夫人，五方六府神，左扶天帝神，右房天帝神，左温天帝嬌孫，右温天帝嬌女，天上三十六竈君，地下三十六竈君，三元四始、五土衆神，主簿孝眷神，天禁地忌五行神，回靈將軍，日直土地，五方龍王天帝，竈君部屬，一切衆靈。伏以設祀受官，名已標於往古，化金爲器，事亦載於前經。黃帝行親祀之規，萬古敢非躬之祭。

某一家之內，良賤之人，旦夕所爲，無所知識，干冒神竈，憂念弗遑，出處公私，運謀造作，慮結連遭之事，或興禍橫之靈，啓謝未由，但多惶懼。今則揆茲良日，致祭獻之禮儀；告請衆神，乞慈憐而普降。中外神聖，允納虔祈，逐香霧以齋臨，念傾心而流貺，昭然聖智，靡怠情勤。弟子無任虔禱之至，頓首再拜，酒行初獻。

散花。

宣牒或詞。

以今焚香，重伸上啓，太古大聖，竈君部屬，竈中有位，內外感應，一切神靈。竊以繁昌三代，黃羊顯瑞於晨昏；萬世一時，白屋可加於日用。運作而威分火德，輝煌而道合太陽，名應上天，功宣下土，有變禍爲祥之理，示祛魔却怪之能，化生熟而福及古今，運靈通而恩如寰海，神威罔測，妙用無窮。但弟子某卑凡性識，塵俗行藏，老幼女男，尊卑良賤，起心運意，誤聖違神。建竈之初，營造之始，動土工而無論凶吉，加磚石而豈識利宜；或狀失

規模，駁雜新故；或泥塗不潔，式樣乖疏，擇日罕遇於良辰，奉祭莫遵於軌範，釜曾經於穢所，地或瘞於伏屍。眷屬親疏，或輕神而薄禮；大小誤錯，於未祭以先嘗。以至入宅樵薪，寧測於丘陵社廟；供時燒爨，焉知其風扶雷傷。困損誤修，道名觸諱。盃盂食器，罔同製於竈君；毛髮雞豚，亦冒衝於前後。湯水不防於忌諱，潑火燒灰；炊饌弗顧於重輕，高甌巨甑。曉夕無生於寅卯，水金乏祭於時辰。懺謝必伸，乞垂赦宥。以某不任精誠懇禱之至，再拜上香，酒陳亞獻。

散花。

謹重誠上啓，大聖司命五靈竈君，合坐一切衆聖。今者奉道弟子某，一家長少，再傾丹赤，共告諸神。乞念凡微，鑒其虔仰。俯開聖造，深布殊休。但弟子某合家幼艾等，從來之誤作故爲，咸伸悔謝；此去之垂恩降宥，惟卜自新。願仕公有遷達之榮，處私獲昌隆之福。風寒暑濕之候，各假恩光；炊蒸動作之時，尤加善貺。化生成熟，

皆仰自於神功，錫福儲祥，寔普承於惠渥。竈上姪女，紫微天神，扶烟焰以飛空，拘收燠赫；散神威而蕩惡，屏絕妖精。玉池夫人，蠲除烟火；高良君子，悅豫衆神。天帝天皇，集慶祥於家宅；司命司錄，注福壽於尊卑。投誠難比於漢張，致祭深敦於老婦。弟子某不任激切虔懇之至，再拜上香，酒陳終獻。

散花。

謹重誠上啓，大聖竈君，合座衆聖，共歆菲薄，俯納禱祈。弟子某發意精虔，傾心致謝，具陳凡愆，仰望聖恩。伏沐慈憐，普垂鑒念，禮陳薦獻，事畢祈禳，不敢淹留，冀回雲駕，歸自在紅霞之府，返逍遙飛焰之宮，永戴洪慈，誓遵虔奉。弟子某不任攀戀之至，再拜奉送。

### 安宅謝竈儀

#### 祭灶法

經云：黃帝採藥上崑崙山，見一



女子，帝乃怪而問之：此非所遊之處，何得來耶？女答曰：妾非人類，又非精靈，乃是竈中炊母也。雖通神化，而居人世。每遊此山，特候聖顏，欲親人間禍福。帝聞此語而云：願爲披宣。炊母曰：人間靈變，竈君爲先，在天爲星煞，在地爲直符，在人間爲竈君。凡有災禍，并由掌領，上至國邑，下及庶人。若依此有信奉之心，則能致福，敢陳至要，乞賜施行。凡竈有四十二神，其神有在日，有不在日，祭之必獲福慶。若神不在日，祭之乃招殃咎，并逐月所食之物不同，又須避其忌諱名字，不得觸犯。今並細述，俯乞標錄，以示人世。帝曰：名諱願聞。炊母曰：竈君姓張，名單，父名吉，母名利。有女六人：一癸酉，二癸未，三癸巳，四癸卯，五癸丑，六癸亥。又忌於竈前，赤形露體，披髮呪詛，諛誓嗔罵，大小悲啼；或進柴薪，以湯潑火，列燒柴頭，將銅漆器於釜中；或安刀斧掃帚之類，在竈上下；或燒亂髮爪甲、雞鴨禽毛，及桃李之木；或將灰竈前澆水。

已上之事，並不可犯，如有犯違，令人立見災禍。又忌對竈門安寢，及棄灰不潔之處。又不得竈前洗浴孩子。如上之事，犯之則令人患目貧困，瘡疥癰疽。唯宜常以每日，棄灰於南丙地，令人旺相，如上所列。若不依戒，災厄屢至，蠶稼不豐，口舌官私，枉橫所害。慎之慎之，必獲殊常之喜者也。

道門科範大全集卷之四十四

道門科範大全集卷之四十五


三洞經錄弟子仲勵編

解禳星運醮儀圖敘

謹按《道藏·靈臺經》云：日月，陰陽之精；五星，五行之精。日月交蝕，神有首尾。日建墜星，月孛五行之沴氣，曰彗星；紫炁天一，在紫微之旁，曰道星。其行天有遲疾順逆之不同，年月度數之各異，分一十二次，有七強五弱之宮。是爲廟爲王，凡二十八宿所躔之度，灾福攸分，其或失位。雖則吉星，亦復爲灾厄。若暗曜灾星，或臨吉方，乃有轉禍爲祥之應。以人行年，推步五星之曜臨照，所主灾祥，各有例說，影響無差。當宜依法禳解，可繪其聖像，以香花名果供獻。請有道士，轉《度人消灾經》，不得入鬼神祠廟，問病弔喪。又《十一曜經》云：如五星不順，凌犯宮宿，速令塑繪十一曜形儀，於清靜處建立道場，誦經行道。又《五

星祕授經云：以異花珍果，淨水名香，至心恭誠，以為供養，是皆太上示人以畏天懼灾之道也。杜天師舊有《河圖九曜醮儀》一卷，後有《十一曜懺》一卷，於三時行持，有所不備，多以消灾儀而兼行。今考《諸天文星曆》，補其闕典云：壇圖以當醮人四柱。今日者，推十一曜所臨宮，分作星壇，壇列四方之柱，以絳繩十二丈，經柱兩層。用黃紙作十二宮、二十八宿、四本，主大小運十一曜星官牌列絳繩之上，下安十一曜星燈，隨方供養。每位香花酒果，並如法。

運星壇圖



解穰星運儀

啓壇行道

法事如式。

各禮師存念如法。

宣衛靈呪。

五星列照，煥明五方。水星却灾，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘鸞散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣今建壇行道，謹奉為入意，其諸誠悃，已錄告聞，願得太上十方至真道炁，靈寶瑞光下降，流入臣身中，令臣所啓，速

達徑御至真無極大道、昊天玉皇上帝御前。

請稱法位。

具位臣某與合壇眾等，今故燒香，歸身、歸神、歸命，以是功德，歸流天子王侯，百辟僚屬，經籍度師，山林嚴棲、修真之士，同學之人，九親姻族，天下人民，飛行動植，一切眾生，及弟子某家親緣眷屬。今故燒香，普伸懺悔，皈命太上十方靈寶自然至真無上大道。乞賜原赦臣法眾等，及醮官一門眷屬，前世今生，無邊之罪，得免離三灾八難、十苦九厄之中，身得道真，飛行虛空，白日升天，侍衛道君，逍遙無上金闕七寶自然宮殿，永與道合，所啓通感，上御至真無極大道眾聖御前。

懺悔，宣真文。

重稱法位。

具位臣某與合壇眾等，同誠上啓太上無極大道，元始天尊，太上大道君，太上老君，昊天玉皇上帝，紫微帝座辰極天皇，上方諸天大帝，三十六部尊經玄中大法師，十一大曜真君，南北二斗

星君，二十八宿星君，十二分次周天乾象本命元辰星官，三界應感，一切真靈。臣聞元始垂慈，體太元而演道；青羅侍坐，憫欲界以申言。或分野之值灾，或兆民之逢厄，上感玉顏之志喜，昭垂金口之格言。謂日月五星之麗天，其行有度；歷太紫列星而失序，其變則灾。上屬帝王，下臨臣庶，以照臨之分次，示譴告之祿祥。爰授以乾文，俾推窮於曆數；復昇玄之神呪，可安鎮於經躔。皆天尊爲世以垂文，宜星曜變裁而爲福。奉爲某囿形下土，稟炁上玄，或惡曜以當躔，或吉星而失位，豈逃灾障，爰致祈禳，用遵藥笈之文，肅舉璿圖之醮。臣冒居教首，莫究緯書。天理西行，見聖深慚於關尹；中星不守，知機徒仰於吳仙。但知禮月以瞻星，或可利人而濟物。既承詞悃，敢不上聞。

宣詞。

諦詳詞語，灼見至誠。注想金容，惕若玉京之下；馳神象緯，燦然黃道之中。天鼓自鳴，瓊鍾間發。十方三

界，勃勃以來臨；二曜九星，皇皇而列照。騫林之會，儼其未散；玉衡之璣，齊而不差。盟信有孚，監觀在上。臣等謹爲沐浴五體，洒濯一心，依祕授以存思，按真詮而行道。異花珍果，與信香明水以將誠；朱履星冠，儼金劍霞衣而蒞止。敢忘夤略，祇俟感通。伏願太上三尊，十方大聖，敕勒靈寶官屬，侍經威神，一合同心，降臨壇所，清蕩內外，降伏妖魔，通達虛無，感降真靈，使齋功成就，無有窒滯。明辰行道，續更啓聞，謹啓。

十二願。

復爐。

香官使者、左右龍虎君、侍香諸靈官，當令臣向來建壇行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之四十五

## 道門科範大全集卷之四十六

廣成先生杜光庭刪定

### 解禳星運儀

#### 入夕行道

法事陞壇如式。

各禮師存念如法。

宣衛靈呪。

五星列照，煥明五方。水星却灾，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今建壇行道，謹奉爲入意，其諸誠悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某等，謹同誠上啓，太上無極大道，元始天尊，太上道君，太上老君，昊天玉皇上帝，天皇辰極，上帝高真，十方得道，諸君丈人，玄中大法師，十一大曜星君，圓穹上象、南辰北斗、二十八宿本命元辰星君，三界應感，一切真靈。臣聞道集虛而有容，強名太極；天積炁而無質，獨見三辰。日月爲陰陽之宗，盈縮辨寒暑之序，散爲五緯，經以列星。凡七曜之所纏，灾祥可驗；歷周天而失次，禍福爰私。惟其循黃道以无差，可以見國家之至治。三十五分，占逆順於乾綱；一十二辰，別華戎於坤紀。凡在範圍之內，悉歸臨照之中，修德而灾曜可禳，積行而德星或聚。信人事天機之應，如影隨響，答之符。奉道某久依三景之照臨，孰

外五行之生剋。遇灾而懼，居懷震惕之心；見善則遷，用迪泰來之慶。敢憑神呪，上格光靈。臣職雖效於箋天，學未諳於宣夜。晨昏有覺，視雞鵠以包羞；飲食無忘，尚豺獮之知敬。既承詞悃，敢不上聞。

宣詞。

按如詞語，諒徹層宸。大羅玉清，儼萬聖聞經之坐；太微帝座，闢三光受事之庭。咸俯景以下臨，並傾光而垂照。朝日夕月，采儀璘存注之方；祭斗榮星，準步躡空常之法。庶託霄宸之應，用禳運數之差。以今靜夜行道，請法衆等運茲初捻上香，願此香烟，騰空徑上，供養太上三尊、十方衆聖。臣等皈身、皈神、皈命，以是功德，上祝今上皇帝陛下。伏願帝德無爲，樞北辰而高拱；壽星有爛，正南面以靈長，一景璧連，五星珠貫，共告太平之瑞，式昭至德之萌。今故燒香，自皈依道尊大聖衆至真之德。得道之後，昇入無形，和與道合真。

以今靜夜行道，請法衆等運茲二

捻上香，願此香烟，騰空徑上，供養太上尊經、十方衆聖。臣等歸身、歸神、歸命，以是功德，歸流弟子某家億曾萬祖、九世先亡。伏願揭日月之明，破諸幽閉；睹星辰之列，復被靈光。煉形流火之庭，濯質黃華之水。爲星爲月，還生仁壽之鄉；成象成形，不外聖明之世。今故燒香，自歸依經尊大聖衆至真之德。得道之後，昇入無形，和與道合真。

以今靜夜行道，請法衆等運茲三捻上香，願此香雲，騰空徑上，供養太上三師、十方衆聖。臣等歸身、歸神、歸命，以是功德，歸流奉道某等一門眷屬。伏願君表儲祥，陰靈消慝，仁深信厚，土木垂休，禮重義榮，火金介福，水德潛開於上智，彗星無滓於太清，庶成積善之家，均燕無灾之福。今故燒香，自皈依師尊大聖衆至真之德。得道之後，昇入無形，和與道合真。

唱方，懺方，三啓，三禮。

重稱法位。

具位臣某等，謹重誠上啓，太上无

極大道，元始天尊，太上道君，太上老君，昊天玉皇上帝，天皇辰極，上帝高真，十方得道，諸君丈人，玄中大法師，十一大曜星君，圓穹上象，南辰北斗，二十八宿本命元辰星君，三界應感，一切真靈。臣聞天開碧落，宣精耀於三辰；星拱紫微，職推移於五緯。月三珥而天下喜，日再中而帝業隆，歲星明而穀稔國昌，鎮星留而邦寧福厚，太白尚義以戒窮兵，熒惑守心乃聞退舍，辰不失行則豐年樂歲，彗成夕見則除舊布新。暗虛爲建墜之星，所以爲日月之蝕；天乙乃道德之曜，所以制吉凶之宜。降於人而爲神，麗乎天而成象。盈虧有準，進退靡差。凡三百六十五度之多，與萬有一千餘里之衆，盡曰經常之宿，咸歸見伏之中，作福作災，或遲或疾。奉道某自惟一介之賤，均受兩儀之和。虎繞龍盤，每自戕於爐鼎；陽開陰閉，居不檢於樞機。悉由一念之差，遂致五帝之戾，虧仁義禮智之節，傷金木土火之行，鬼責人非，天灾物累。星辰凌犯，推運數之屯奇；

葉本休囚，致身宮之滯塞。陰陽爲寇，寒暑乖和，莫逢世道之亨，知自人爲之誤。奉道某洗心謝過，責己畏威，遵璿軸以鋪陳，締星壇而延佇。伏乞霄宸上聖，象緯群真，特施渙汗之恩，曲赦貫盈之咎，調平星度，安鎮乾文。三命五行，悉蠲於戰剋；列星七政，同賜於休祥。躔角而壽考耆龐，歷尾而嗣昆繁衍。心宿篤父子室家之好，房星固關鍵管籥之機，南斗盛而爵祿行，東壁明而賢能舉。奎爲武庫，罔或不充，胃爲天倉，咸臻有衍。畢晦絕踰垣之盜，鬼藏無敢室之妖，箕歛而口舌消，虛暗而凶喪弭，盡一天而徧告，佑舉室以咸宜。上願國壽延洪，帝圖悠久，時和俗阜，物富人安，式臻五紀之和，各遂群生之性，上明天尊廣濟之澤，下副臣等皈嚮之誠，謹啓以聞。

#### 十二願。

#### 復爐。

謹攝香官使者、左右龍虎君、侍香諸靈官，當令臣向來建壇行道之所，自然生金液丹碧，芝英百靈，衆真交會，

在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之四十六

### 道門科範大全集卷之四十七

廣成先生杜光庭刪定

#### 解禳星運儀

#### 設醮行道

法事陞壇如式。

各禮師存念如法。

宣衛靈呪。

東方：

九炁青天，明星大神。煥照東鄉，

洞映九門。轉燭陽光，掃穢除氛。開

明童子，號曰玄卿。備衛我軒，上對帝

君。收魔束妖，討捕兇群。奉承正道，

赤書玉文。九天符命，攝龍驛傳。普

天安鎮，我得飛仙，和與道合真。

南方：

三炁丹天，煥景流光。熒星轉燭，

洞照太陽。上有赤精，合契虛皇。開

明靈童，號曰華房。總統火兵，備守玉

堂。斬邪束妖，剪截魔王。北帝所承，

風火莫當。流鈴交換，翊衛壇場。正

道流行，敢有巴狂。我享上功，坐運魁  
罡。億劫長存，保天無疆，和與道合真。

西方：

七炁素天，太白流精。光耀金門，

洞照太冥。中有素皇，號曰帝靈。保

神安鎮，衛我身形。斷絕邪源，王道正

明。宮殿整肅，三景齊并。道合自然，

飛昇紫庭。靈寶符命，普惠萬生。元

皇正炁，來合我身。功加一切，天地咸

寧，和與道合真。

北方：

五炁玄天，元始徘徊。辰星煥爛，

光耀太微。黑靈尊神，號曰層威。統

冠飛天，仙裙羽衣。備衛五門，檢精捕

非。敢有干試，豁落斬摧。玉符所告，

神鎮八威。邪門閉塞，正道明開。映

照我身，三光同輝。策空駕浮，舉形仙

飛，和與道合真。

中央：

一炁黃天，調理乾坤。陶鎔陰陽，

總統玄真。鎮星吐輝，流煥九天。開

明童子，號曰天璘。元炁陽晶，焰上朱

烟。洞照天下，及臣等身。百邪摧落，

殺鬼萬千。中山神呪，普天使然。五  
靈安鎮，身飛上仙，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今陞壇，設醮行道，謹奉爲入意，其諸

誠悃，已錄告聞，願得太上十方至真道

炁，靈寶瑞光下降，流入臣身中，令臣所

啓，速達徑御至真無極大道、昊天玉皇

上帝御前。

請稱法位。

具位臣某等，謹虔誠上啓，虛無自

然元始天尊，太上大道君，太上老君，

昊天玉皇上帝，九皇至尊，十方上聖，

三十六部尊經玄中大法師，日月九曜

星君，南辰北斗、二十八宿、周天玄象、

本命元辰星君，三界應感，一切真靈。

臣聞剖判混茫，肇分清濁。二儀列位，

九曜流輝。生成垂不宰之功，照燭著

無私之德。古今不紊，曆象攸尊。所以順軌循常，則君臣蒙福；謫見垂戒，則家國同休。靈化克彰，神功斯在。天道不遠，有感必通。聖鑒匪遙，無祈不應。醮官某以星辰行度，有所照臨，伸螻蟻丹誠，懼爲灾厄。憂勞炯戒，虔仰至真，惟切禱祈，冀蒙福祐。臣等竊尋經首河圖，有披告之文；檢閱真科靈寶，有懺祈之典。敢緣慈訓，式備醮儀，延降尊靈，祀崇真聖。伏願下哀凡請，俯降道場，天光一臨，萬生抃悅。臣與衆等，無任瞻望聖駕，激切屏營之至，誠惶誠恐，稽首再拜，恭迎聖駕。

降真，獻茶。

初獻，散花。

重稱法位。

具位臣某等，謹同誠上啓，九皇至尊，十方上聖，五星六曜，三界威靈。臣聞天陽地陰，一合而成象；月盈日昃，互用以正時。分五緯以專司，行周天而有度。或重輪表瑞，或聚舍發祥，或爲至德之符，上廣無私之照。依躔順軌，灼爲治象之光；變色作灾，昭示機

微之朕。休戚上關於邦政，裁祥亦係於民生。某有命在天，交食乎地。槩六合而視己，何啻螻螟；均一炁以稟形，忍同草木。粗知爲善之最樂，終以寡過而未能。神歷其盈，會交此而賜罰；帝臨有赫，因迷復以降灾。尚通解謝之門，俾迪亨嘉之運。爰憑道範，肅敞星壇，騰精悃於鈞天，降光靈於玄象。臣今關奏，敢不上聞。

宣詞，亞獻。

諦詳詞語，灼見欽崇。太上巍巍，荷俯臨於法席；衆真濟濟，咸拱侍於虛皇。諒昭鑒於悃悃，必加憐於懇請。伏願正璿璣於玉斗，撫經緯於天圖，消五行衰敗之灾，解三命凶危之數，增長補短，去危即安，克膺耆艾之年，永息灾凶之運。臣等不任祈懇之至，酒陳終獻。

散花。

臣謹虔誠上啓，虚无上聖，九曜尊星。臣聞垂象上穹，照臨下土。金木水火，假休王以立功；春夏秋冬，任推遷而成歲。以康家國，以福生靈，大哉神

休，光贊天地。尚慮分野之內，有鈞己凌犯之期；躔次之中，有遲伏留逆之數。大則灾纏郡邑，爲兵水旱蝗；少則禍及行年，爲凶衰疾厄。兢兢憂懼，冰炭在懷，深恐履行多違，操守乖悞，六情積咎，三業成非。既積罪尤，更逢厄會，善功難著，惡作易興，非託醮祈，無由洗滌。是敢肅恭香火，精備醮筵，仰紫府以冥心，望丹霄而稽首，盡投素悃，罄露凡情。伏乞衆聖哀憐，列星憫護，降以真炁，陶以太和，照以靈光，沐以神澤，流恩降福，解厄消灾，和順五星，均明四景，無凌犯之變，無薄蝕之虞，萬象咸寧，百穀時稔，五兵戢息，四序調平，君聖臣忠，人安物泰。某或行運之內，宮宿之中，使灾不橫生，妖無妄作。一十二宮之分，各保休祥；二

黑帝真文爲解禳之；有過咎灾厄，在歲星宮者，請以青帝真文爲解禳之；有過咎灾厄，在太白星宮者，請以白帝真文爲解禳之；有過咎灾厄，在鎮星諸曜星宮者，請以黃帝真文爲解禳之。即使衆厄自消，千灾自殄，神安禮豫，益筭延齡，福祿惟新，凶衰不作，眷屬亨泰，公私利宜，門宇興隆，云爲叶泰，蒙如所請，永荷洪恩。臣等無任禳謝之至，誠惶誠恐，稽首再拜，獻湯。

祝真文，宣疏

臣謹重誠上啓，九清上聖，三寶真靈，乾象列星，坤儀主宰。今則禮成清夜，詞達昊穹。金闕真遊，駐屬車於塵世；璿霄上象，迂法從於星壇。心方切於欽承，儀已臨於賁餞。情不隨於文祝，願效進修；凡自與於仙違，徒深依戀。冀垂肆赦，允納虔祈，恍真衛以言旋，睇清光而順拜。臣等不任攀戀之至，奉辭仙駕。

發願。

復爐。

香官使者、左右龍虎君、侍香諸靈

官，當令臣向來設醮之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭烟，傳臣向來所啓之誠，速達徑御至真無極大道、昊天玉皇上帝御前。

送聖，焚燎。

道門科範大全集卷之四十七

道門科範大全集卷之四十八

廣成先生杜光庭刪定

運星醮啟祝儀

靜夜陞壇

法事如式。

具位上啓十一大曜星君，十二宮尊神，某本命星官大聖，黑符星真君，合座衆聖，伏望聖慈，俯從凡懇。以今奉爲入意，切以清氣爲天，布日月星辰之像；濁氣爲地，列女男禽獸之姿。日月薄蝕，則天下靡寧；男女構屯，則高穹所繫。人逢禍福，星實綱維。非託薰修，安能上告。某灾星在運，憂患頻臨，敬推中赤之誠，虔叩玄黃之曜。冥心稽首，感天心惠愛於凡情；香篆凌空，祈帝德消除於厄會。灾衰度脱，福壽昌隆，自天祐之，德施溥也。但某下情，不任虔祝之至。

次引醮官逐位行香，告星。

日宮：



具位上啓日宮太陽帝君，宮下仙衆。伏以日輝盛大，主太陽宮，居星爲衆象之尊，主世照萬生之命，形魂天地，掌握陰陽，金烏晝夜之巡行，蒼旻主司於善惡。每承運照，寔荷生成，謹備香燈，廣伸夤奉。伏冀分輝照耀，暗察衰危，希紀筭以堅強，望福祿而增廣。願依丹悃，永荷洪恩，爰有祝文，謹當宣奏。次宣符呪

太陽真君呪：

東望扶桑宮，稽首朝鬱儀。太陽洞明景，寥寥何所思。令我拜金色，候天望英姿。皇華將玉女，臨軒降此時。

月宮：

具位上啓月宮太陰皇君，侍從仙衆。伏以月宮至聖紫光上真，主北極之陰關，掌人身之右魄，巡遊不住，輝照無窮，明分短長，顯示善惡，動靜實由於斟酌，舒張全繫於行方，致吉凶而有缺有圓，降禍福之無差無忒。今則特伸丹禱，願賜鑒觀，遵太上之真符，赦生靈之罪咎，俾醮主某福如滄海，壽等椿松，灾害不生，尊卑寧謐，願依凡

悃，不負天庥，所有祝文，謹當宣奏。次宣符呪

太陰真君呪：

仰望顧八表，惟月孕陰精。中有大素皇，夫人駕綠駟。曜華光二極，混明照三清。懇懃求志道，五色下來迎。

木星：

具位上啓木星重華真君，侍從仙衆。伏以東極宮中歲星，聚貴青陽，應號木德司方，掌善惡於人間，示吉凶於天表，三炁乃春之一季，福曜則臨照於十方，益筭增年，延祥介福。今則特伸丹悃，願賜鑒觀，遵太上之真符，赦生靈之罪咎，俾醮主某福如滄海，壽等乾坤，灾害不生，尊卑寧謐，願依凡悃，不負天庥，所有祝文，謹當宣奏。次宣符呪

木德星君呪：

歲星乘木德，展轉耀東鄉。凌天姿潤澤，正色混明皇。尋華歌浩漾，擲水詠芝房。經時頻禱祝，獲福自然長。

火星：

具位上啓火星執法真君，侍從仙衆。伏以聖化威嚴，性情急速，王炁正

夏中之三月，變通巡人間之九圍，傾光可燭，聰明回福，易逢亨泰。今則特伸丹禱，願賜鑒觀，遵太上之真符，赦生靈之罪咎，俾醮主某福如河海，壽等松椿，灾害不生，尊卑寧謐，願依丹悃，不負天庥，所有祝文，謹當宣奏。次宣符呪

火德星君呪：

芒角森龍鳳，威光叱十方。丹罡耀午夜，朱火焰三邊。晶明符正炁，劍戟煥兵權。攬搶應滅跡，字彗敢當前。

金星：

具位上啓金星天皓真君，侍從仙衆。伏以少皞司方，主金門之造化；太白掌運，號素老之靈藏。王露三秋，方分西兑。大哉至道，難可披宣。照人而財祿潛臻，入垣乃官爵品正。仰之則增延壽祉，叩之則消解灾殃。今則所伸丹悃，願賜鑒觀，遵太上之真符，赦生靈之罪咎，俾醮主某福如江海，壽等松椿，灾害不生，尊卑康泰，願依凡悃，不負天庥，所有祝文，謹當宣奏。次宣符呪

金德星君呪：

太白凌清漢，騰霜耀素英。亭亭浮瑞彩，皎皎盛長庚。鋒高能禦寇，色潤每降兵。推窮符曆數，合道與長生。

水星：

具位上啓水星伺辰真君，侍從仙衆。伏以五行至要，水德爲先。王炁正冬，主張河海。性柔態善，潤澤生人。月合而官祿非常，正照乃壽福永固。仰瞻聖佑，得遂安寧，每虧虔罄之心。常謬愚迷之性。今則所伸丹禱，願賜鑒觀，遵太上之真符，赦生靈之罪咎，俾醮主某福如河海，壽等乾坤，災害不生，尊卑寧謐，願依凡悃，不負天庥，所有祝文，謹當宣奏。次宣符呪

水德星君呪：

妙哉符五炁，彷彿見真門。嵯峨當丑位，壬癸洞靈君。分輝凝皎潔，盼嚮赴思存。仙歌將舞蹈，良久上金天。

土星：

具位上啓土星地睽真君，侍從仙衆。伏以中皇最尊，五星爲首。四季朝於上帝，統御萬靈；十方照於下民，巡環衆類。嚴嚴衆毅，至聖至尊，遇之

則有灾殃，禱之則亦臻安吉。今則所伸丹禱，願賜鑒觀，遵太上之真符，赦生靈之罪咎，俾醮主某福如江海，壽等松椿，灾害不生，尊卑康泰，願依凡悃，不負天庥，所有祝文，謹當宣奏。次宣符呪

土德星君呪：

高穹符戊己，藏陸起重霄。五行尊暗曜，九土見光昭。甘石推留伏，陶巫筭沈寥。上仙垂雨露，伏地禮空謠。

羅喉星：

具位上啓羅喉星真君，侍從仙衆。伏以威德最嚴，羅喉大聖，一十二宮之輪照，十二分野之流行，占財帛則散遺，在祖業亡積聚。凡逢臨照，足有威權。每至魁罡，多生屯難。今則所伸丹禱，願賜鑒觀，遵太上之真符，赦生靈之罪咎，俾醮主某福如江海，壽等松椿，灾害不生，尊卑康泰，俯從凡悃，不負天庥，所有祝文，謹當宣奏。次宣符呪

羅喉星君呪：

神首循黑道，冥冥超至靈。暗明期朔望，陽德晦陰精。高鎮黃旛闕，矛

戟耀霜鈴。志心伺多福，稽首諷真經。計都星：

具位上啓計都星君，侍從仙衆。伏以昭昭在上，照天下之無窮；蠢蠢下凡，沐靈光之有自。深慮運逢窺盼，灾數當躔，非仗元功，無由解免。今則所伸丹禱，願賜鑒觀，遵太上之真符，赦生靈之罪咎，俾醮主某福如江海，壽等松椿，灾害不生，尊卑康泰，俯從凡悃，不負天庥，所有祝文，謹當宣奏。次宣符呪

計都星君呪：

處暗表陰德，豹尾鎮星宮。怒指摧山嶽，權雄暝太空。龍蛇生怪狀，變異忽昏濛。主人長壽樂，禳應在恪恭。

天一星：

具位上啓天一紫炁道星真君，侍從仙衆。伏以天有道星，名分道炁。至尊最貴，爲聖極靈。臨人則福祿榮昌，照命乃遷官加職。輝華莫測，王相無窮。今則所伸丹禱，願賜鑒觀，遵太上之真符，赦生靈之罪咎，俾醮主某福如江海，壽等松椿，灾害不生，尊卑康

泰，俯從下悃，不負天庥，所有祝文，謹當宣奏。次宣符呪

紫炁星君呪：

授制宗元帝，含精耀紫微。陰陽乘運極，幽顯闕靈機。玉輿登廣漢，金鈴布斗飛。四宿循周度，九土尊天威。

太一星：

具位上啓太一月孛彗星真君，侍從仙衆。伏以月孛至聖，暗曜星辰。稟性尊嚴，威風顯赫。禍福悉由於掌握，短長實系於秉持。每賴照臨，莫諧解謝。今則所伸丹禱，願賜鑒觀，遵太上之真符，赦生靈之罪咎，俾醮主某福如江海，壽等松椿，災害不生，尊卑寧謐，願依凡悃，不負天庥，所有祝文，謹當宣奏。次宣符呪

月孛星君呪：

太陰光玉緯，精魄育羣生。青桂黃華輔，鬱羅保素靈。毛頭分怪狀，彗尾或潛經。舍次流灾福，齋脩洞香冥。

黑符星：

具位上啓大聖黑符星真君。伏以天上劓星，人間威曜，揚阜旛而行天無

影，照赤子而動靜有灾，命運偶逢，屯危必至。今則所伸丹禱，願賜鑒觀，遵太上之真符，赦生靈之罪咎，俾醮主某福如巨海，壽等乾坤，災害不生，尊卑康泰，願依凡悃，不負天庥，所有祝文，謹當宣奏。奏天罡符

本命星：

具位上啓本命星官。伏以建生星斗，主特人命之降生；本命元辰，宰理衆生之性命。五體悉由於主掌，三灾咸賴於權衡。當投解謝之門，庶保長延之壽。今則所伸丹禱，願賜鑒觀，遵太上之真科，普赦生靈之罪咎，俾醮主某福如江海，壽等松椿，災害不生，尊卑康泰，願依凡悃，不負天庥，所有祝文，謹當宣奏。次宣符呪

本命呪：

本命尊威赫，元辰位豹宮。三元分品秩，六十衛躔躬。仙吏俾神化，真官亦治功。人倫無貴賤，終始賴含洪。

宣疏：

向來祭星功德，已遂周圓。專伸回奉十一大曜星君，大聖黑符，生日本

命星君，流年灾福星像。伏冀福星長照，威曜韜光，變禍爲祥，改灾作福。一十二宮之分野，盡賜貞庥；二十八宿之靈光，常垂蔭祐。身宮清淨，出處康寧，誓畢此生，永依大造。志心稱念大慈延壽，天尊不可思議功德。

道門科範大全集卷之四十八

# 道門科範大全集卷之四十九

廣成先生杜光庭刪定

## 南北二斗同壇延生醮儀

### 啓壇行道

法事陞壇如式。

各禮師存念如法。

宣衛靈呪。

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今設醮行道，謹奉爲入意，其諸誠悃，已錄告聞，願得太上十方正真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與闔壇衆等，今正爾燒香，以是功德，奉爲天子王侯，百辟僚屬、經籍度師、山林巖棲、修真之士、同學之人、九親姻族、天下人民、飛行動植、一切衆生，今故燒香，歸身、歸神、歸命太上十方靈寶自然至真無上大道。乞賜原赦臣法衆等，及醮主某家，前世今生，無邊之罪，得免離三灾八難衆惡之中，使智慧圓明，魂神澄正。出羣迷之徑，登衆妙之門，身得道真，飛行虛空，白日昇天，侍衛道君，逍遙無上金闕七寶自然宮，永與道合，所啓通感，上御至真無極道前。

禮十方，懺悔。

重稱法位。

具位臣某與闔壇衆等，謹同誠上啓，虛無自然元始天尊，太上大道君，

太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏聞大道無形，孰究希微之旨；至真降世，漸開汲引之門。感引誓於天師，降真旂於蜀郡。龍軒所至，玉局在前。首談北斗之經，次演南昌之旨。道存水火，職隸死生。明於離者，爲陽動之官，乃常靜而不變；習於坎者，稟一元之數，則密運以無方。是知經首之幽微，昭示定觀之宗趣。倘衆生持念之甚確，如兩極麗天之有常。不爲物遷，秉道樞而轉物；自臻神王，明智燭以全神。斯視聽言動之有規，致壽考康寧之咸備。矧茲指像而說法，使向道以回心。倘未悟於玄言，豈能超於灾障。當崇福善，馴至康榮。奉道某囿形器於兩間，稟精神於一炁，識暗衛生之理，智昏慮患之機，幸真科開悔謝之門，使迷徑有亨通之路，式啓紫

壇之醮，特延玄象之旂，對越光靈，道迎休德。屬臣關告，敢不上聞。

宣詞。

按如詞言，丹誠懇切。致兩極同科之敬，牋九天御曆之尊。心聲宣一至之誠，香穗燎衆芳之馥。飾黼座於玄虛之上，薦芝華於象緯之前。鶴袍端簡以情思，星壇發瑞；熊驛御空而達款，雲路生光。延佇之心，不寒而立；精純之念，有感必通。伏願太上三尊，十方大聖，玄中大法師，垂神鑒映，省覽所陳，敕勒靈寶官屬，侍經威神，絳章繡衣之官，擎羊陀羅之使，遊空飛步，臨集壇場，錄善表功。門聞穹壤，更覲流精，散炁營衛。臣及弟子等身，清蕩內外，降伏妖魔，通達虛無，咸降真聖，使齋功成就，無有窒滯。明晨行道，續更啓聞。

十二願。

復爐。

謹攝香官使者、左右龍虎君、侍香諸靈官，當令臣向來啓壇行道之所，自然生金液丹碧，芝英百靈，衆真交會，

在此香火爐前。當願十方仙童玉女，接待關煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之四十九

### 道門科範大全集卷之五十

廣成先生杜光庭刪定

#### 南北二斗同醮儀

##### 清旦行道

法事陞壇如式。

各禮師存念如法。

宣衛靈呪。

青陽虛映，耀日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，大道興行。慶雲流布，合景黃庭，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今清旦行道，謹奉爲入意，其諸誠悃，已錄奏聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇衆官等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣聞北斗居於坎位，元精所藏；南斗主於離宮，至神所寓。精降爲魄，用以守形；神凝爲魂，因以聚炁。羣生所系，兩極攸司。功寔濟於生靈，德普資於動用。自二儀既判之後，爲衆品受命之根。天陽地陰，一炁感應以相與；羣分類聚，萬物曲成而不違。咸資陶冶之能，以遂器形之化，增祿俸於士庶，注爵秩於人天，延促年齡，去留灾

福，凡處生成之域，難逃予奪之權。醮主某久慕仙宗，未超濁境，荷高穹之覆冒，沐斗極之照臨。處己治身，豈適中庸之道；待人接物，第深過舉之憂。進無衆善之修，退有後時之悔。意欲導迎景貺，掃去不祥。是敢奉靈寶之彝儀，展河圖之明訓，合醮乎南北二斗，徧仰乎天地衆真，謝過祈恩，禳灾懇福。臣獲參玄奧，備列真司，瞻參橫斗轉之餘，致晉接寅恭之始。既承詞悃，敢不上聞。

宣詞。

按如詞言，丹誠懇切。爰賴神明之來相，肆令戩穀之攸宜。作善降祥，效商書之明訓；遇灾而懼，聞周雅之格言。茲既露於丹衷，冀俯回於洪造，常使淳風溥扇，惠澤滂流，付醮主之精衷，明天尊之至德。以今清旦行道，請法衆等運茲初捻上香，願此香煙，騰空徑上，供養太上三尊，十方衆聖。臣等皈身、皈神、皈命，以是捻香功德，上祝皇帝陸下。伏冀睿圖隆永，聖壽遐延。握金鏡以低臨，萬方昭泰；儼珠旒而

端穆，八海澄清。朝有忠良，俗臻富壽。儲皇妃后，協贊昌期。公主諸王，保寧休運。火鼠燭龍之外，睽驢爭馳；虞泉蒙谷之鄉，車書混一。今故燒香，自皈依道尊大聖衆至真之德。得道之後，昇入無爲，和與道合真。

以今清旦行道，請法衆等運茲二捻上香，願此香煙，騰空徑上，供養太上尊經，十方衆聖。臣等皈身、皈神、皈命，以是功德，歸流弟子某家，九世七玄，億曾萬祖，親緣眷屬，往逝神儀。伏冀乘紫籙之玄功，上朱陵之仙界。陽光瑩質，流火煉形，黑簡落名，青宮注籍。逍遙真境，永祛流注之殃；利佑見存，克享安榮之福。今故燒香，自皈依經尊大聖衆至真之德。得道之後，昇入無形，和與道合真。

以今清旦行道，請法衆等運茲三捻上香，願此香煙，騰空徑上，供養太上三師，十方衆聖。臣等皈身、皈神、皈命，以是功德，歸流弟子某，灾躔弭息，厄運清消，至道資薰，靈真衛護。南昌司命，開丹籙以延年；北府帝君，削黑

書而落死。魂神澄正，萬炁長存。眷屬親緣，同霑景福。飛沉異質，蠢動殊形，咸沐玄休，共臻身吉。今故燒香，自皈依師尊大聖衆至真之德。得道之後，昇入無形，和與道合真。

唱方，懺方，步虛，三禮。

重稱法位。

具位臣某與闔壇衆等，謹重誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰，北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣聞七元在太微之北，爲造化之樞機；六司在朔方之東，經日月之終始。乃知火官以北爲貴，水神以中爲尊，一則旋乾轉坤，運動而機衡正；一則褒賢進士，盛明而爵祿行。體道德而垂光，助乾坤而育物。欲上延於祿壽，宜有禱於神真。某爰自宿生，至于今日，罪孽積如山嶽，福力輕若鴻毛，或違天地

覆載之仁，或負日月照臨之德，犯二炁五行之性，傷三光六紀之和，不悟因緣，罔知禁忌，違越經訓，冒觸星光，曾未懺除，慮成殃咎。今則歸真知命，悔過冥心，冀開大有之恩，俾獲自新之路。仰惟南宮六紀，北斗七元。斟酌化元，無一人不稟以爲命；生持教令，無一物不賴以爲生。肅嚴壇靖之規，夤奉蘋蘩之薦，投詞獻款，罄志皈誠，謝已往之非，補將來之短，拜迎百福，洗滌衆災，保家屬之團圓，祝封疆之寧謐。免息豕訟，使滯塞之通開；以致康榮，望祈求之稍遂。落死籍於至陰之境，上生名於洞陽之宮。皇圖長睹於休明，海宇永聞於富庶。滅烽卧穀，邊陲無介冑之人；薄賦輕徭，比屋有絃歌之士。百官拱極，萬姓奠居，宜衆志之咸熙，使萬邪之歸正，恩霑動植，澤被幽遐，先亡離苦以超生，異類乘時而變化。上明天尊大慈之澤，下副臣等皈命之誠，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來清旦行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之五十

# 道門科範大全集卷之五十一

廣成先生杜光庭刪定

## 南北二斗同醮儀

### 臨午行道

法事陞壇如式。

各禮師存念如法。

宣衛靈呪。

丹靈朱火，炎霞激風。赤輪剛運，天光行衝。迸威包羅，交變萬方。流金豁落，羣魔滅蹤。辟邪破妖，明耀元功。金符召制，躡雲策龍。謠歌慶會，散花太空。神化宜運，四極安隆。伏御帝前，罔有不恭，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣

今臨午行道，謹奏爲入意，其諸情悃，已錄告聞，願得太上十方至直道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇衆官等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣伏聞圓穹垂象，盈虛先七政之推；文曜交躔，旋斡自二司之始。斗宿天之星紀，啓義明於書雲；極星天之帝車，運玉衡而建月。號南斗者，乃居於丑位；稱北極者，實御於中央。喉舌化工，權輿曆象。三百六十五度，推尊天廟之提綱；萬有一千餘星，悉受斗杓之操柄。四序調於玉燭，三辰應於銅儀，盡由兩極之主張，叶贊一元之運

動。凡囿形於人世，皆稟氣於乾文。品固萬殊，理歸一揆。奉道某叨蓋輿之賦命，荷珠璧之儲精，水火爲受性之原，南北係降神之府，假四大之凡器，植一真之深根，敢不崇玄，庶幾反本。立壇象斗，環帝座以流光；酌水獻花，企辰樞而展信。式遵祕誥，嚴奉殊科。欽承咫尺之威，輒致再三之瀆。臣棲身祕館，通籍真階。躡紀步綱，愧彭氏女昇仙之效；然燈事斗，蔑鄧德誠伐叛之功。惟知宏教於玄壇，或可降祥於善類。既承詞悃，敢不以聞。

宣詞。

按如詞言，丹誠懇切。將上塵於帝所，亦徧御於星壇。洪惟共理之司，參輔無私之覆。民生均稟，日用相須。寶劍深潛，尚騰光於舍次；豐狐異類，猶展敬於魁杓。既抱最靈之資，宜識有生之本。道之真體，寄運用於水火之宮；天有常形，職變動於經躔之宿。爰舉同壇之醮禮，肅欽麗極之明威。耿耿天梁，跨河源而錯峙；煌煌玉斗，杓龍角以左旋。注想高穹，馳神玄象，



願下風雲之駕，俯歆蘊藻之羞。過者化，存者神，覃休家國；熾而昌，康而壽，均福顯幽。凝薰燎之芳馨，格湛恩之汪濊。以今臨午行道，請法衆等運茲初捻上香，願此香煙，騰空徑上，供養太上三尊，十方衆聖。臣等皈身、皈神、皈命，以是功德，上祝今上皇帝陛下。伏願離明並照，辰極齊尊。成象成形，擬諸身而高拱；自南自北，陶至化以來賓。天步無難，人文有爛。綱紀燦日星之序，地久天長；菽粟如水火之多，時和歲稔。今故燒香，自皈依道尊大聖衆至真之德。得道之後，昇入無形，和與道合真。

以今臨午行道，請法衆等運茲二捻上香，願此香煙，騰空徑上，供養太上尊經，十方衆聖。臣等皈身、皈神、皈命，以是功德，歸流某家上世先靈，親疏眷屬，陰宮夜境，滯爽幽魂，出朔都溟渤之鄉，造丹霍洞陽之境。抱日挾月，襲冲炁於陰陽；陶魄鑄魂，反真神於離坎。達生榮界，垂裕後昆。今故燒香，自皈依經尊大聖衆至真之德。

得道之後，昇入無形，和與道合真。

以今臨午行道，請法衆等運茲三捻上香，願此香煙，騰空徑上，供養太上三師，十方衆聖。臣等皈身、皈神、皈命，以是功德，歸流某家一門長少，骨肉至親。伏願坎宮除險厄之虞，南極介壽昌之祉。樞機將相，著福祿以川增；魁斗杓罡，驅凶魔而瓦解。懲忿窒慾而防患，積精累氣以全生。俾修喬年，長依至道。今故燒香，自皈依師尊大聖衆至真之德。得道之後，昇入無形，和與道合真。

唱方，懺方，命魔，三啓，三禮。  
請稱法位。

具位臣某與闔壇衆官等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣伏聞造物無物，莫非普植於羣倫；與

生俱生，孰是反求於一己。昧剛柔之負抱，孤健順之生成。迷本忘真，乘愆蹈過。莫悟擢形於斯世，端從稟氣於瀉鈞。倬彼胚胎之初，誠如渾沌之始。分化爐之真火神水，爲人身之丹田絳宮。離己之日凝魂，坎戊之月制魄。六府五藏，九竅百骸，皆次第以成形，泊圓滿而誕質。或富或貴，或賤或貧，各從情竇之萌，莫匪世羅之絆。六欲障虛明之性，七情斲久視之根。既與道以闊疏，宜行世之坎坷。天灾物累，鬼責人非，運元推屯否之臨身，斡厄消暑寒之相寇。倚伏之機，皆藏於危窵；避趨之路，宜誥於通津。玉局遺言，昭示解穰之法；紫庭祕誥，許陳懺謝之儀。可轉禍以爲祥，庶遷善而遠罪。今奉道某慮灾凶在運，憂惕于中，用遵金口之言，恭敬鬱庭之醮。伏乞虛無上聖，寥廓高真，示以自新，嘉其退省，敕下南宮六紀、北斗七元，迂景傾光，隕祥介福。深灾重患，隨罡指以蠲除；元炁真情，斡斗杓而增注。調平星度，安鎮天綱，五行無流逆之灾，

三命息刑妨之厄。固蒂深根而養壽，懷珠抱玉以全生。居之斯安，動罔不吉，均繁禧於眷屬，茂純嘏於門闌。上願國壽延洪，帝圖悠久，三邊不警，九譯歸仁。物類叶於泰通，平安遂性；重陰廓於豐照，離苦超生。願力難周，恩光無盡。上明天尊大慈之澤，下副臣等皈命之誠，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來臨午行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之五十一

### 道門科範大全集卷之五十二

廣成先生杜光庭刪定

#### 南北二斗同醮儀

#### 晚朝行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，天地交泰。玉符寶節，嘯命微幽。擲火持威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱消。萬神降格，扇景乘飈。羣生咸遂，惠徧神州，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今靜夜行道，謹奏爲入意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇衆官，同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣伏聞玄化流光，列宿垂曜。文昌上聖，掌丹籙以注生；紫微高尊，總玄都而布化。三光五帝，生育羣材，統御萬靈，普鑒幽顯。臣謹爲某家，按依科式，虔立壇場，崇設醮筵，披露誠懇，冥祈玄象，延降真靈。伏惟上聖衆尊，垂慈降鑒，分光迂景，采納丹誠。臣既奉情詞，敢不上奏。

宣詞。

按如詞言，良深懇切。念以積生慶會，獲遇明時，得睹仙科，遂延靈聖，伏依儀注，上備薰修。仰冀不棄凡塵，俯垂允納，侍觴於紫微之上，享饌於清夜之中，瑞炁騰空，真風臨席。以今靜夜行道，請法衆等運茲初捻上香，願此香煙，騰空徑上，供養太上三尊，十方衆聖。臣等皈身、皈神、皈命，首體投地，仰依南宮六紀、北斗七元，以是功德，皈流宗廟先聖，社稷尊靈。伏願證品玉清，垂休寶嗣，克昌鳳曆，永福洪基。今上皇帝，德邁堯湯，壽齊天地。后妃嬪主，光贊文明。太子諸王，輔成睿德。九圍宗道，咸臻清靜之風；萬寓宅心，共樂昇平之運。今故燒香，自皈依道尊大聖衆至真之德。得道之後，昇入無形，和與道合真。

以今靜夜行道，請法衆等運茲二捻上香，願此香煙，騰空徑上，供養太上尊經，十方衆聖。臣等皈身、皈神、皈命，首體投地，仰依南宮上聖、北極衆真，以是功德，歸流某家九先七祖，一切幽魂。伏願洪澤滂流，惠風遐扇。

宿瑕洗蕩，除北府之罪名；積釁消平，上南宮之生籍。延祥介祉，福及見存，暨乎有識含情，飛潛蠢動，皆承恩澤，悉遂人寰。今故燒香，自皈依經尊大聖衆至真之德。得道之後，昇入無形，和與道合真。

以今靜夜行道，請法衆等運茲三捻上香，願此香煙，騰空徑上，供養太上三師，十方衆聖。臣等皈身、皈神、皈命，首體投地，仰依南宮六紀、北斗七元，以是功德，歸流某。伏願壽筭遐長，災衰洗蕩，福祥臻集，眷屬康寧，家傳愷悌之風，戶出謙恭之義，凶魔遠竄，善瑞日臻，宅宇鎮安，龍神和輯，三官進紀，五帝儲休。今故燒香，自皈依師尊大聖衆至真之德。得道之後，昇入無形，和與道合真。

唱方，懺方，三啓，三禮。  
請稱法位。

具位臣某與闔壇衆官等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，

三十六部尊經玄中大法師，圓穹玄象，日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣聞三光麗天，萬物荷無私之照；五緯垂象，羣生蒙覆載之恩。所以南極注生，北宮主死，總領圖錄，統較幽明。粵自混茫，至于今日，紀綱不紊，曆數無差，上惟帝王，下該臣庶，咸依主宰，仰賴神休。弟子某詞悃所陳，已具敷奏，自惟積慶，叨荷玄功。而六氣運神，五帝演性，貞閑難固，流通易迷，旋隳福善之階，日踐愆違之境，或積生所構，或今世所爲，罪書綴五帝之篇，咎目鼓三官之筆，未曾祈懺，莫得蠲除。又恐宿曜行藏，交期所屬。行年經歷，厄會所臨。或故殺誤傷，深冤往債；或繫心起念，履惡爲非。上犯天元，下違坤德，觸陰陽禁忌，負日月神明，罪目惡緣，無邊無量，非憑懺謝，莫遂原除。伏聞南宮爲陽德之司，生成萬物；北極爲裁成之府，主制羣靈。生死吉凶，咸歸統錄。除灾解厄，實賴聖

慈。是敢披啓丹心，皈依玄象，虔伸醮祝，上叩尊靈，布心於靜境之中，露懇於清壇之下。伏冀司命司錄六宮，垂憫濟之恩；天輔天關七聖，降慈悲之澤。三雲命駕，俯降塵寰；八道凝光，曲臨醮席。命真僚而錫祐，開巨貺以延祥。特爲某上消天災，下禳地禍，除五星九宮八卦併冲之厄，解五緯三元凶星暗曜之灾。十神免臨照之虞，元命息刑妨之害。宥宅神之譴責，破鬼賊之憑凌。六甲五行，不罹衰敗；支干宮徵，無致衝妨。剪妖魔蠱毒之侵傷，絕惡鬼凶人之謀議。三官五帝之府，訟逮原消；先亡近逝之魂，考延解釋。託廕七星之下，儲祥六紀之司。福善雲臻，灾凶霧散。六情所犯，三業所爲，萬咎千愆，並蒙原貸。神明護佑，真炁降流，保其微脆之姿，克享堅剛之壽。上明天尊大慈之澤，下副臣等皈依之誠，謹啓以聞。

十二願。

復爐。

謹攝香官使者、左右龍虎君、侍香

諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之五十二

### 道門科範大全集卷之五十三

廣成先生杜光庭刪定

#### 南北二斗同醮儀

##### 設醮行道

法事陞壇如式。

各禮師存念如法。

宣衛靈呪。

五星列照，煥明五方。水星却灾，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今設醮行道，謹奉爲入意，其諸誠悃，已錄告聞，願得太上十方正真道炁，靈寶瑞光下降，流入臣身中，令臣所啓，速達徑御至真無極大道、昊天玉皇上帝御前。

請稱法位。

具位臣某與闔壇衆官等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣伏聞上極無上，大羅彌覆於諸天；玄之又玄，洪造實根於元氣。麗三辰而垂象，尊紫極以御圖。四布于方，七政綱維於南斗；西揭之柄，九天喉舌於上天。仰幹乾樞，俯包地紀。經傳玉局，稱兩極之同科；史驗銅儀，觀周天之有度。凡圓首方趾之肖像，皆南離北坎之降神。敢不皈依，冀回恩賜。奉道某冥心壇靖，凝睇經躔，潔荷羞乳

饌之蒸，滄火棗雲映之薦。九微騰焰，百末飛煙，有嚴秩秩之筵，佇降飄飄之駕。伏願九扇洞開於閭闔，十方悉下於輪輿。鶴蓋成陰，扈和鑾而有節；霓旌啓道，森儀仗以無譁。俯臨圭潔之場，曲副翹勤之請。臣與醮官闔壇衆等，不任激切延請之至，誠惶誠恐，稽首再拜，奉迎聖駕。

降真，獻茶，初獻，散花。

具位臣某，虔誠上啓，九清上聖，十極高真，北斗尊帝，七元輔弼星君，斗中真宰。臣聞元氣無形，斗杓於焉斟酌；周天有度，玉衡所以斡旋。建四時而成歲功，均五材而握民命。六度下降，自天子而達庶人；一年運行，起漢津而終營室。有尊帝以主仙道，建輔弼而佐斗功。刑德生殺之相參，官祿壽富之攸繫。虚心以存，則可禦邪而敵害；按法而步，端能招真以致仙。巍巍神功，紀贊莫盡。奉道某託迹光明之下，倫安臨照之中。清夜沈寥，仰光芒而肅敬；浮生膠擾，於香火之缺違。致於欲壽而康，遇灾知懼，許亟伸

於醮告，爰恭啓於壇儀，敬按金科，輒伸懇請。臣既承詞悃，敢不上聞。

宣詞。

按如詞言，丹誠懇切。諒徹九重之聽，不違片善之微。若弟子某等，身官滯塞，氣本休囚，憂致冤於陰陽，欲全生於覆載者，請貪狼太星君爲保護之；若命元羈蹇，星度刑妨，欲去危而即安，求轉禍而爲福者，請巨門元星君爲消解之；若彈冠願仕，干祿代耕，問官海之要津，躡天朝之華貫者，請祿存真星君爲遷達之；若福基不厚，產殖未饒，於義利之交興，願富仁之兼美者，請文曲紐星君爲增注之；若行全儒素，藝絕詞華，期志在崇高之美，得身膺寵擢之榮者，請廉貞綱星君顯佑之；若順考壽曆，欲致耆年圖安，以遺後昆，好德而全五福者，請武曲紀星君爲延益之；若嗣息未蕃，室家多難，思保松蘿之固，更延瓜瓞之綿者，請破軍關星君爲全護之。乞使某等志願感通，真靈降接，萬願咸遂，衆善興修。臣與闔壇衆等，不任所請之至，再誦大聖

北斗都管吉祥呪曰：北斗九晨，天中大聖。上朝金闕，下覆崑崙。調理綱紀，統制乾坤。大魁貪狼，巨門祿存。文曲廉貞，武曲破軍。高上玉皇，紫微帝君。大周天界，細入微塵。何灾不滅，何福不臻。元皇正炁，來合我身。天罡所指，晝夜長輪。俗居小人，好道求寧。願見尊儀，永保長生。三台虛精，六淳曲生。生我養我，護我身形。臣等稽首致恭，謹陳亞獻。

散花。

具位臣某謹虔誠上啓，九清至尊，十方上聖，南斗大帝，丈人司馬，六司星君，斗中真宰。臣聞日宮至陽之精，發軔於左界；南斗列星之紀，宣精於河源。謂準日以生成，雖稱南而在北。漢津黼黻，專賢良命祿之司；曆象樞機，主將相府庭之事。運會而靈圖正，盛明則君道興。倬爲躔度之元，寔主生民之命。傾心以請，無願不從。奉道某等徒聞挹酒之言，難接乘槎之武。仰觀分野，南北迷方；俯建壇場，坎离定位。薦苾芬於縟坐，伫盼蠻於煙霄。

有灾有患之禳除，延福延生之迓續。

奉道某若命元譴薄，祿氣單微者，請天府司命君爲增益之；若黑錄著名，青宮削籍者，請天相司錄君爲回改之；若壽曆不修，世途多梗者，請天梁延壽君爲延祐之；若衛生乖和，布筭有限者，請天同益筭保生君爲保全之；若厄難相凌，魂神不守者，請天樞度厄鍊魂君爲禳鎮之；若生意蕭條，事機糾逆者，請天機上生君爲啓迪之。即使奉道某對服寵靈，導迎休證，百祥紛委，衆惡伏藏，式昭感應之仁，少付傾虔之請。臣與衆等不任懇禱之至，誦大聖南斗六星天紀延壽頌曰：南斗六星，天中宰臣。上參元化，七政攸遵。下主揚州，吳越斯分。司命司錄，將相儲精。天梁天同，壽筭司明。樞機之宿，上天府庭。津梁雲漢，綱紀乾文。光耀明瑩，君道清平。掌理爵祿，褒進臣鄰。助天體道，利物安人。去留灾福，延促年齡。傾心求請，無願不成。魂神澄正，壽命增新。光靈所被，永享利貞。弟子某命，願得長生。臣等稽首

再拜，致恭謹陳終獻。

散花。

獻棗湯。

具位臣某，謹虔誠上啓，九清十極，三景諸真，北斗七元，南宮六紀，元辰本命，海嶽洞天，地水陰靈，虛空主宰，三界應感，一切真靈。臣等輒冒瀆天之罪，如陳類帝之壇，玉局暫扶，衆真侍座，寶珠將入，三獻畢陳。龍鶴天仙，促返玉京之駕；烏龜雲篆，將騰青札之煙。恐乖俯仰之儀，自速幽明之譴。睇回鑾而結戀，負芒棘以消愆。願賜哀憐，特加寬貸。一天星曜，還次舍以有常；三界仙班，返玄靈而無迹。神交如在，目送何從。惟知晨夜之仰瞻，庶表初終之皈依。臣與闔壇衆等，不任依慕激切之至，誠惶誠恐，稽首再拜以聞。

十二願。

復爐。

謹攝香官使者、左右龍虎君、侍香諸靈官，當令臣向來啓壇行道之所，自然生金液丹碧，芝英百靈，衆真交會，

在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之五十三

### 道門科範大全集卷之五十四

廣成先生杜光庭刪定

#### 南北二斗同醮寶燈儀

#### 靜夜行道

法事陞壇如式。

念靜天地呪，洒水。

具位臣某等，謹虔誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈，俯降燈壇，證明虔禱。謹奉爲宣意，其諸情悃，已對敷宣，以今關祝星燈，請衆誦天尊聖號，爲某等合門眷屬，解灾解厄，延福延生。稽首皈依，虔誠讚詠。

信禮無上大羅天星主紫微大帝。

臣衆等至心皈命樞宮大聖貪狼陽

明真皇君，斗中神仙，和諸靈官。

伏聞飛晨合景，樞星掌劫會之權；司政糾非，陽明主璇璣之運。上宰九天之化，中監五嶽之靈，下總人倫，傍分品類，定死生之有命，鑒善惡以無私。以今某恭款芻心，虔依妙範，至心皈命樞宮大聖貪狼陽明真皇君。伏願回光啓曜，垂淵鑒於玄壇；增祿延年，注生名於青簡。稽首皈依，虔誠讚詠。

信禮高上紫微垣、北斗第一貪狼星君。

貪狼延生，回真四靈。流輝下映，洞達玄冥。七元紀籍，名列紫庭。保身續壽，永亨利貞。耳目開爽，魂魄長寧，和願得長生。

臣衆等至心皈命璇宮大聖巨門陰精真皇君，斗中神仙，和諸靈官。

伏聞星有五門，俠三光而遠映；門開四照，合萬氣以騰輝。校天府之昇遷，主兆民之祿壽。委質難逃於淵鑒，通津寔類於明梁。以今某葺事瑤壇，馳誠金闕，至心皈命璇宮大聖巨門

陰精真皇君。伏願身度千灾，命延百福，天開神宇，氣襲真源。碧簡題名，固長年於劫石；丹臺紀籍，增上筭於靈椿。稽首皈依，虔誠讚詠。

信禮高上紫微垣、北斗第二巨門星君。

巨門延命，元靈散陳。丹田通暢，運合仙真。七元定籍，名列紫文。護身注壽，福慶維新。辟除妖惡，善瑞日臻。去來無礙，與神同倫。延命自然，上升玉宸，和願得長生。

臣衆等至心皈命璣宮大聖祿存真人真皇君，斗中神仙，和諸靈官。

伏聞偃息華蓋，徒知空步之名；潛洞太虛，莫測飛身之妙。八景九天之上，道契青籙以通真；五嶽四瀆之高，仙隸黃臺而受事。矧茲下土，實仰餘光。以今某潔己齋盟，法爲壇墀，至心皈命璣宮大聖祿存真人真皇君。伏願慶叶遐年，福資浩劫。三千萬之甲子，地久天長；一十二之靈門，陽開陰閉。脩閑白日，嚙味冲和。稽首皈依，虔誠讚詠。

信禮高上紫微垣、北斗第三祿存星君。

北斗度厄，高仙上靈。流輝遍照，內外肅清。七元錄籍，名列紫庭。扶身延壽，祿位長亨。臟腑開朗，動止咸寧。光運合景，與神同榮。度厄自然，上升玉京，和願得長生。

臣衆等至心皈命權宮大聖文曲玄冥真皇君，斗中神仙，和諸靈官。

伏聞星主玄冥，位司游擊。隱微潛耀，領北斗之三宮；福善禍淫，攝黑靈之五炁。或殄除凶勃，飛火甲於六天；或剪馘不祥，耀朱兵於四鄙。凡居動植，皆自生成。以今某嚴潔壇場，肅清塵垢，至心皈命權宮大聖文曲玄冥真皇君。伏願削罪除愆，落九陰之鬼錄；拘魂制魄，得七返之仙方。行藏無非橫之虞，視息合太和之慶，承資上善，永叶殊祥，稽首皈依，虔誠讚詠。信禮高上紫微垣、北斗第四文曲星君。

北斗消灾，玄黃開陽。仙靈隱現，朗徹十方。七元掌籍，名列紫房。衛

身益壽，長啓福祥。明真降祐，滌蕩凶殃。華精絜結，與神同鄉。消灾自然，上升玉堂，和願得長生。

臣衆等至心皈命衡宮大聖廉貞丹元真皇君，斗中神仙，和諸靈官。

伏聞杳靄崑臺之上，交映七門；隱芒金蓋之輝，潛通二景。絳木結素華之實，瓊津凝冶煉之膏。校錄上真，統攝鬼神之部；提綱下學，權輿生死之機。以今某澡雪靈襟，遵承科簡，至心皈命衡宮大聖廉貞丹元真皇君。伏願善履三光，削三灾於短景；順迎五運，植五福於深根。稽首皈依，虔誠讚詠。

信禮高上紫微垣、北斗第五廉貞星君。

北斗扶衰，真宗降靈。流霞散敷，仙仗交盈。七元典籍，名列紫營。固身養壽，慶合運并。高玄接引，優游五明。駕景飛翔，與神同靈。扶衰自然，上升玉庭，和願得長生。

臣衆等至心皈命闔陽宮大聖武曲北極真皇君，斗中神仙，和諸靈官。



伏聞玉樓炳景，隱飛華辰極之星；瓊簡燦文，紀迴度空常之道。定法輪之階級，考志學之功勤。飛芒耀於八門，無幽不燭；擲流金於萬里，有礙皆通。以今某委迹塵寰，宅心道域，至心皈命闔陽宮大聖武曲北極真皇君。伏願一念關陞，萬靈序佑。瀉明河於碧漢，克注遐年；聳巨嶽於瑤穹，永躋上壽。稽首皈依，虔誠讚詠。

信禮高上紫微垣、北斗第六武曲星君。

武曲散禍，玄映禦空。威靈備守，妖邪絕蹤。七元注籍，名列紫彤。榮身增壽，享福無窮。仙官扶衛，步躡雲中。真炁降集，與神同聰。散禍自然，上升玉宮，和願得長生。

臣衆等志心皈命瑤光宮大聖破軍天關真皇君，斗中神仙，和諸靈官。

伏聞天迴地轉，瑤光推空洞之輪；斗建星躔，靈皇紀運行之度。位尊上帝，威制羣魔。正氣所臨，萬物遂生成之性；飛網所指，百邪無逃遁之形。以今某滌垢舒壇，披誠奉教，至心

皈命瑤光宮大聖破軍天關真皇君。伏願道契丹臺，南上益長生之字；罪消幽府，北都鑄不死之名。四序營爲，盡叶光華之慶；全家視履，咸歸清浮之風。稽首皈依，虔誠讚詠。

信禮高上紫微垣、北斗第七破軍星君。

破軍益筭，明霞散敷。流光普浹，真炁潛扶。七元度籍，名刊紫書。治身添壽，常處歡娛。飛仙蹈舞，遊宴玄都。徹視表裏，與神同居。益筭自然，上升玉虛，和願得長生。

臣衆等至心皈命南斗第一天府司命上相鎮國真君，斗中神仙，和諸靈官。

伏聞天賦羣靈，均有自然之命；人懷大本，咸歸皇極之尊。欽之者，福所由生；敗之者，禍因而起。允爲宰制，實在司存。儻有祈禳，宜修誠懇。以今某洗心滌慮，養氣存神，夙懷嚮道之心，仰畏在天之象。至心皈命南斗第一天府司命上相鎮國真君。伏願天聽其衷，咸迪長生之道；人膺永命，悉無短折之凶。稽首皈依，虔誠讚詠。

信禮高上太微垣、南斗第一鎮國真君。

稽首南辰，第一之星。號曰司命，實掌命根。今有弟子，立壇告星。上奏天司，仰投化鈞。惟天上相，鎮國主兵。願賜分光，俯鑒丹誠。續以命元，永保安寧，和願得長生。

臣衆等至心皈命南斗第二天相司錄上將鎮嶽真君，斗中神仙，和諸靈官。

伏聞太微之初，道無常體；我生之後，物有定名。灾祥在德，而貴賤同差；吉凶由人，而賢愚靡間。眷茲主者，賦之自然。儻伸祈禱之誠，必獲昭彰之報。以今某正心專意，向道歸真，仰成象之著明，仗上靈之佑助，至心皈命南斗第二天相司錄上將鎮嶽真君。伏願恢洪上道，默收糾察之威；普度生靈，式序修禳之善。稽首皈依，虔誠讚詠。

信禮高上太微垣、南斗第二鎮嶽真君。

稽首南辰，第二之星。號曰司錄，實紀生人。今有弟子，燃燈告真。注

想丹天，長生之庭。惟天上將，鎮嶽主兵。迂景分光，鑒映翹勤。注名丹錄，永錫年齡，和願得長生。

臣衆等至心皈命南斗第三天梁延壽保命真君，斗中神仙，和諸靈官。

伏聞長生久視，乃大道之體常；保命延年，實凡情之所欲。在天則命固存而不易，在人則生必貴於不傷。欲其有延，豈無所禱，將叩司存之職，宜修瞻嚮之誠。以今某專意志明，仰天觀象，冀真靈而降格，俾壽考之增崇，至心皈命南斗第三天梁延壽保命真君。伏願誕布至心，茂迪綿長之筭；鋪張生德，永無夭橫之虞。稽首皈依，虔誠讚詠。

信禮高上太微垣、南斗第三延壽真君。

稽首南辰，第三之星。號曰延壽，主制年齡。今有弟子，象斗延真。冥心南極，河漢之津。惟斗天梁，濟度羣倫。願賜降接，得免災迍。續以遐壽，介福如春，和願得長生。

臣衆等至心皈命南斗第四天同益

筭保生真君，斗中神仙，和諸靈官。

伏聞數肇而存，多斯爲美；命降而短，長乃爲祥。苟方寸之不欺，庶年齡之益久。真靈昭格，精懇是求。以今某欲增耆艾之年，欽若昭回之象。道存恍惚，響應形聲，至心皈命南斗第四天同益筭保生真君。伏願大慈下濟，長如春日之生；遐筭巨增，永若高山之固。稽首皈依，虔誠讚詠。

信禮高上太微垣、南斗第四保生真君。

稽首南辰，第四之星。號曰益筭，御炁生神。今有弟子，醮告仙真。結志南昌，太微之庭。惟斗天同，壽命所經。願垂矜允，丹錄書名。介以耆年，永保無傾，和願得長生。

臣衆等至心皈命南斗第五天樞度厄文昌鍊魂真君，斗中神仙，和諸靈官。

伏聞二炁密移，亦有盛衰之理；五行迭運，豈無消息之機。彼有勞生，豈無厄運。真聖既司於救度，黔黎宜謹於忱恂。以今某恐懼飭躬，欽崇觀象，誓皈依於大道，願受度於真休，至

心皈命南斗第五天樞度厄文昌鍊魂真君。伏願命資百福，潛消不測之虞；身度三災，常保自身之慶。稽首皈依，虔誠讚詠。

信禮高上太微垣、南斗第五度厄真君。

稽首南辰，第五之星。號曰度厄，消蕩災迍。今有弟子，招真致靈。翹想朱陵，文昌之辰。惟斗天樞，開闔化鈞。願流道炁，制魄拘魂。賜以長年，善業增新，和願得長生。

臣衆等至心皈命南斗第六天機上生監簿大理真君，斗中神仙，和諸靈官。

伏聞仙人作德，恥一物之不知；聖道應時，爲中心之妙用。降衷立命，受氣賦形。眷掌握於生成，敢虔恭而請禱。以今某齋心嚮道，精意瞻天，仰思長育之恩，敢昧祈禳之禮，至心皈命南斗第六天機上生監簿大理真君。伏願體乾坤之生德，以運權衡；保性命以委和，咸歸道蔭。稽首皈依，虔誠讚詠。

信禮高上太微垣、南斗第六上生

真君。

稽首南辰，第六之星。號曰上生，掌握天經。今有弟子，好道希真。皈向离宮，星紀之庭。惟斗天機，組織乾文。願垂光景，庇護身形。監領簿錄，注福延齡，和願得長生。

諱經。

向來朝斗，祝燈功德，並已周圓。伏以道集虛而應物，運生化以無窮，天垂象以示人，在吉凶而可鑑。惟二司之真宰，乃萬象之元綱，自非夙習真源，安得今披寶蘊。以今醮官某潔清塵慮，恭命羽流，望辰極以舒壇，法璇璣而建斗。瓊鐘逸韻，誠通象外之天；玉篆凝煙，想見斗中之聖。伏冀六司合照，美成衆善之因；七政分輝，均賜全家之福。然願億曾萬祖，遠化近亡，盡離幽暗之鄉，俱入光明之界，上窮圓蓋，下布方輿，同沐勝緣，齊登道岸。稽首皈依無極大道。再念星移斗轉天尊，長生保命天尊，不可思議功德。

道門科範大全集卷之五十四

### 道門科範大全集卷之五十五

廣成先生杜光庭刪定

#### 北斗延生清醮儀

凡奉事上真，或不能法天象地，隨斗杓而建壇，先違道訓也，不如不修之爲愈。建壇之人，非內境清明，召魂集神，聽吾命而造化，形止極以伸懇焉，則不足以昭格，物雖豐而無益也，故以祝香爲先。次以叙陳科教，則道俗之倫，不是因緣，而信心衰焉，降聖難矣，故以叙事次之。既叙事已，不能紀述天文，對揚元妙，則無知北斗之尊也，故以述聖次之。既述聖已，不陳詞則誠不立，故以宣詞次之。然其陳情，請福禳灾，苟非行道發願，後已先人，無以契合聖意，故以三上香次之。既上香已，則吾之宿業重罪，不可不懺；玄功妙善，不可不勉。不如是，則罪不滅而福不降矣，故以懺悔次之。既懺悔已，又當思惟七元之德，誠如在焉，乃

可以幾其佑助，故讚德次之。既讚德已，又當皈依，以罄吾之誠願，庶幾神必饗焉，故以七皈依次之。既皈依已，可以濁醪之禮表心，故以三獻次之。既三獻已，威儀既備，恩貺卒獲，言功送神，仰空存慕，不可以有加也，故以散壇終焉，止系一詞。

祝香。

道香、德香、無爲自然香，以今爇向爐中，奏啓大羅三寶天尊，金闕玉皇上帝，中天星主紫微大帝，南辰北斗本命星君，周天河漢列宿羣真。仗此真香，普同供養。臣今奉爲弟子某家，宣科行道，請福禳灾，先當讚叙條章，對揚功德，庶使壇場之內，道俗之倫，悉乃見聞，盡生恭敬。仰祈恩祐，少契天心，理合敷陳，願垂昭鑒。臣聞太上立德，標清靜之高風；其次立言，演慈悲之妙典。編諸藥笈，藏在名山，時顯迹以度人，或垂科而拯世。具述下元之運數，敷陳本命之因緣，開度斯民，歸依大道，俾修心而養氣，容懺罪以延生，常於降聖之期，輒許精衷之禱。至

以三元八節，本命生辰，嚴置壇場，恭修齋醮，將嚴觀宇，或在家庭。持種種之香花，精意已享；列芬芬之酒果，明德惟馨。法天地以包羅，像威儀而薦獻。修齋則一日而至七日，隨力建功；命道則一人而至七人，請行法事。或諷其神呪，或認此真形，歸心北斗之尊，稽首紫微之下，伸懇於三官五帝，達誠於九府四司，薦福延生，消灾捍厄，用廣無邊之福，仰膺莫大之休，念真聖之母違，見邪宗而莫入，致灾衰之洗蕩，同罪業以消除，善果臻身，福壽資命，獲超昇於十極，免沉墜於三塗，茲皆啓祝之功，莫匪扶持之德。或有下元生人，國土遇札瘥之厄，瘟疫流行；歲年逢荒歉之灾，品物不遂。屍橫原野，氣結高穹，人多飢饉之虞，境有刀兵之禍。仰遵北帝，俯建星壇，表達凡情，口宣神呪，則可以降威靈於下土，列車騎於四方，布網千重，流火萬里，收五兵之妖氣，致百穀之順成，歲樂豐穰，民無夭折。又有下元生人，橫厄競起，瘟瘴難逃，多逢六洞之魔，枉

遇百罹之苦。憑凌第宅，常無安寢之期；妄作灾衰，巧伺扼窮之運。生魂禁錮，久病纏綿。或出處迍邐，或債財壅塞。祿有衰微之兆，命無通泰之祥，患害多端，言詞莫述。仰遵北帝，俯建星壇，奏表凡情，口宣神呪，則可以添神益筭，削死注生，妖祟蕩除，行藏吉利。又有下元生人，田多蝨蟻，境富蟲蝗，傷稼穡以無成，望豐登而莫獲。仰遵北帝，俯建星壇，精嚴田野之中，備列威儀之具，依科誦呪，飛奏表章，則可以昭格威靈中戒主者，致灾蟲之墜死，養粒食而倍多。又有下元生人，門庭祈系嗣之祥，婦女有妊娠之慶。或由六甲之內，胎氣損傷；或居十歲之中，年齡夭喪。良爲重身之日，長逢魔女之灾，懷妖氣以難全，飯精華而莫固。令有萎黃之疾，居多怪夢之憂，貓鼠狗猴，變形成像，暗吞子息，頻有死亡，貽父母之深憂，絕祖宗之遠裔。仰遵北帝，俯建星壇，表達凡情，口宣神呪，則可以感威靈於上界，降玉女於人寰，衛護閨闈，安和五臟，克保延彌之

吉，應多壽命之長。又有女人，分娩艱難，呻吟苦楚，良由鬼母之噉，致令血臟之衰，障閉彌旬，兢惶萬狀。仰遵北帝，俯建星壇，行道申誠，作法誦呪，則可以感煞童而下降，同玉女以來臨，衛草蓐以平安，保女男而爽利。又有女人，遇虎狼之眷屬，食子臟之精華，百計求男，一生無子。仰遵北帝，俯建星壇，淨嚴堂室之中，備列香花之獻，秉心一德，誦呪萬徧，則可以掃妖滅邪，克多生育。凡茲靈應，備載寶章，乃知衆尼之蠲消，盡屬七元之拯救。此蓋上真方便，至聖慈悲，篤志爲民，推誠澤物。苟若齋心布懇，備禮修辭，啓何願而不成，欲何求而不獲。以今某研思極慮，浴德澡身，致意真科，歸心妙道，建斯壇陞，法彼昊穹，隨方準杓，然燈像斗，恭陳法信，嚴備香花，請仙馭之光臨，鑒凡心之密禱。臣敬爲叙陳經首，敷繹真功，宣示衆官，俾遵法訓，檢其心志，彌更翹勤。庶令感格威靈，成就功德，然後依儀行道，續以啓聞。臣等凡情區區，無任讚嘆道力、延降神

光、精爽飛越、激切屏營之至。

道門科範大全集卷之五十五

### 道門科範大全集卷之五十六

廣成先生杜光庭刪定

#### 北斗延生捍厄儀

#### 靜夜行道

陞壇法事常式。

各禮師存念如法。

宣衛靈呪。

五星列照，煥明五方。水星却災，木德致昌。焚惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓，關啓玄壇土地，方域神真。臣

今靜夜行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣等身中，令臣所啓，速達徑御太上無極大道、昊天玉皇上帝御前。

重稱法位。

具位臣某與闔壇衆官等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣聞二氣陶鎔，五行變化，以康羣品，以育萬靈。懸命祿於九天，繫死生於七府。吉凶善惡，糾察無遺。罪福行藏，纖微必錄。上惟國祚，下及人倫，考較統臨，咸歸斗極。玄卿大帝，制六天而御萬方；高上玉皇，播洪慈而福三界。靈通應感，影響無差。臣等宿荷玄休，獲逢道運，正真垂教，幽顯蒙恩，輒披醮謝之科，特罄皈依之懇，精虔修奉，

以展誠祈。伏冀衆聖宣慈，九天流貺，俯矜凡陋，曲降真風，憫濟凡微，下臨壇度，開恩布澤，聽納禱祈。凡有投誠，理難寢絕，況奉詞旨，敢不上聞。

宣詞。

諦詳詞語，灼見至誠。不仗明威，安臻戩穀。願納蘋蘩之薦，俾依天地之仁。藹瑞氣於層空，沛爲德澤；扇靈風於合宇，廣布恩波。罔有神恫，迄無鬼責。弟子某重念叨居道蔭，允賴神樞。晨夜仰瞻，莫曉星躔之序；歲時相代，寧知醮謝之方。爰備香燈，肅陳淨供，稽首魁罡之下，冥心舍次之間。三百六旬，願隨杓而降福；七十二候，祈應律以儲祥。災與冰消，罪如瓦解。一身所向，式升進望之階；合屬甚康，均保方來之慶。以今行道，臣法衆等運茲初捻上香，皈命十方道寶，北宮至聖。以是功德，歸流醮官某行年之上，運命之中，九厄三災，十苦八難，星辰邃位，衝破臨身，非灾疾患以興殃，過咎貫盈而欲起。所冀逐風雲而俱散，騰香霧以蕩除，百福惟新，千

殃自解。今故燒香，自歸依道尊大聖衆至真之德。得道之後，昇入無形，和與道合真。

以今靜夜行道，臣法衆等運茲二捻上香，皈命太上尊經，斗中真聖。以是功德，歸流醮官某七祖先靈，一切幽爽。伏願聖澤旁流，惠風遐扇。宿瑕洗蕩，除黑簡之罪書；積釁消平，上朱宮之生錄。延祥介祉，福及見存。今故燒香，自皈依經尊大聖衆至真之德。得道之後，昇入無形，和與道合真。

以今靜夜行道，臣法衆等運茲三捻上香，皈命太上師寶，七元衆真。以是功德，歸流醮官某。伏願坎宮除險厄之虞，水德著聰明之性，靈根深固，性識高明。出入起居，罔有外邪之染；寢興食息，永無時疾之嬰。災逐永消，善隨日長。今故燒香，自皈依師尊大聖衆至真之德。得道之後，昇入無形，和與道合真。

懺方。

臣衆等至心皈命三清大聖，十極高真，北極紫微大帝，北斗七元星君，輔

弼星君，三十六部尊經，三官五帝，九府四司，二十鄉神仙，諸靈官。

臣衆等伏聞二氣委和，五行孕秀，生居人道，命屬天司。雖蠻夷華夏之殊方，黎庶侯王之異分，盡由生化，悉在照臨，荷恩貺以居多，或焚修而每曠，莫識綱維之妙，寧知蔭祐之功。迷本輕生，自取戾於一己；降年奪筭，應獲譴於上天。致使淪沒三塗，漂沉六趣。蓋忘本命，不愧人身，履此罪愆，如何救拔。其次違天逆地，暴物傷生，不道不仁，不忠不孝，縱五情而雜亂，同六賊以昏迷，侮慢師資，背違經訓，妬賢嫉善，樂禍喜災，恣有貪殘，結諸冤對，肆爲姦詐，害彼忠良。故使今生，動罹世患，或遇寇攘之劫害，或逢魔鬼之喪亡，或爲蟲獸之傷，或被官灾之厄，或家遭疫癘、人口死亡，或户有妖邪、資財虛耗。並是六天之鬼，五嶽之神，乘罪釁以侵凌，作灾衰而助虐，八難隨及，三厄駢臻，致使考禁祖先，搜別名字，無能逃者，可勝痛哉。頻招枉死之冤，莫盡考終之命。鬼官不錄，

死魄安歸？悟此因緣，當求懺謝。蕩百生之垢障，消累劫之過尤。然願解厄禳災，延生請命，致吉祥之止止，成福祿以穰穰，竟修道以證真，庶離災而免禍。況衆聖有修禳之路，諸天開懺悔之門，可以歸心，以干恩宥。今有醮官某備陳法信，依按科儀，拜醮真靈，輒伸誠悃，一心歸命三清大聖，十極高真，北極紫微大帝，北斗七元輔弼星君，三十六部尊經，三官五帝，九府四司，二十方神仙，諸靈官。伏願真慈廣運，道力感通，特垂昭鑒之仁，俯受凡愚之懇。竊慮醮官某自無始以來，至于今日，性天黯闇，心地蔽蒙，驅馳名利之場，桎梏塵勞之域，背迷真道，失入邪宗，多愛貪嗔，聚如浮沫，將沉地獄，迅若逝波，執著難回，愚癡自若，嗜慾恣而忠孝奪，利害勝而仁義亡。物我紛爭，是非交襲，恣屠殺而自奉，逞殘酷以爲能。誣善蔽賢，違天背地，邪淫積惡，侈靡爲生，肆運動而逆陰陽，妄修營而干禁忌。孜孜逐物，衮衮窮年，曾無懺悔之心，莫致修禳之請。庚

申甲子，徒錄愆非，本命生辰，反除年筭。致使魂神被繫，禍患來鍾，或重病不痊，或妖邪剋害，連年困篤，累歲連遭，塚訟徵呼，先亡復連。或上天譴責，或下鬼所誣，日積災殃，長多厄難。今則齋心念咎，滌慮求哀，祈萬罪以永消，解百冤而霧散。黑書削籍，丹錄記名，祖先解脫於九幽，親屬同超於三界。無災無害，對揚溥博之休；延福延生，企仰涵洪之澤。恩惟北方至聖，七元星君，主張造化，號令乾坤。雖九府四司，咸由宣納；而三官五帝，悉在統臨。好生洽於人心，膏澤霑于天下。苟罄芻蕘之懇，必垂日月之光。有罪斯原，無災不解。五行六害，四煞七傷，世厄多而難陳，大惠加而溥度。用建皇天之太極，長爲羣物之慈航。今故皈依，輒伸悔謝。伏願天心惻隱，凡懇布聞，削落罪愆，解除冤對，千災永殄，衆厄自消，慶及二親，榮分九族，先祖書名於紫策，子孫委質於丹墀，福祿來宜，年齡永固。又願臣及醮官等，道心開發，智慧性圓，洗蕩塵勞，祛除迷

妄，漸登妙果，重立玄功，名占仙籍之中，體合太虛之表，仍爲良士，並覺迷情，善及存亡，功霑水陸，永超俗網，升入金門，克扶真一之宗，俱契希夷之旨。得道之後，昇入無形。

三啓，三禮。

具位臣某與闔壇衆官等，重誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象，日月星辰，北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏念生處塵寰，迹惟浮穢，未明真理，多昧稟修。或屬念運心，乖違大道，行藏動息，犯冒真靈；或前代今生，愆瑕未滌；或立身履行，過咎旋增，結罪目於酆都，著凶危於地簡；或年逢厄滯，命值衰微，八祿當絕盡之期，三命遇休囚之數，五星行度，有所照臨，八卦飛旗，方罹刑厄；或興修任性，抵犯神祇；或烹宰恣情，因成冤

對。如上所說，曾未懺除，遂使厄滯多端，灾凶莫測，旦夕憂懼，不敢違寧。竊聞玉皇開慈憫之科，大帝垂醮陳之典，輒憑寶訓，爰備醮壇，冒瀆威靈，延降真聖。伏乞胎恩下俗，介福凡愚，許以自新，容其懺洗。仰冀玉皇上帝，七元尊神，特與某解除宿殃積罪，舊厄新灾，三命九宮之中，五行列宿之內，灾凶殄息，厄難開通。伏乞解除歲月日時、筭盡之厄，八卦九宮、五鬼絕命之厄，六壬三命、地網天羅、金木水火土五行衰絕刑剋之厄，眷屬六親、妨害之厄，公私口舌、非灾橫禍、囚繫之厄，惡人盜賊、侵暴謀害之厄，起造興工、侵傷觸犯之厄，四方五路、滯塞不通之厄，水陸遊行、舟車牛馬之厄，冤家債主、訴訟考注之厄，先亡家墓復連之厄，四方鄰里、破射直符注煞之厄，居止不安、財帛遺亡、神鬼益耗之厄。若子生人，有年月日時灾厄者，請北斗貪狼星君解除之；若丑亥生人，有年月日時灾厄者，請巨門星君解除之；若寅戌生人，有年月日時灾厄者，請祿存

星君解除之；若卯酉生人，有年月日時灾厄者，請文曲星君解除之；若辰申生人，有年月日時灾厄者，請廉貞星君解除之；若巳未生人，有年月日時灾厄者，請武曲星君解除之；若午生人，有年月日時灾厄者，請破軍星君解除之。乞使非禍不侵，灾衰蕩滌，魂神安鎮，夢寤正真，道氣內滋，元和溥洽，宿殃洗蕩，冤債消平，疫癘不侵，祿壽增益，存亡被澤，眷屬霑榮。即荷衆聖護持之恩，至真垂憫之賜，上明天尊大慈之澤，下副臣等皈向之誠，謹啓以聞。

### 十二願。

### 復爐。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

### 出堂頌。

### 出戶。

道門科範大全集卷之五十六

## 道門科範大全集卷之五十七

廣成先生杜光庭刪定

### 北斗延生儀

#### 設醮行道

陞壇法事如式。

各禮師存念如法。

宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣



今靜夜行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏聞人身難得，中土難生，假使得生，正法難遇。茲仙經之所載，非道力以難諧。能起信心，定由夙習。況我含元之極，常爲真聖之宗。玄德巍巍，明威赫赫，慕之者出生離死，奉之者保命延年。深妙難窮，存亡永賴。醮官某等一心歸命，萬慮屏除，謝天地之生成，感陰陽之化育，孜孜不倦，肅肅彌加，準式奉章，依儀悔過，信道心之深重，脩典

禮之精嚴，用罄禱祈，仰惟孚應。伏願日月賜照臨之德，乾坤全覆載之功，恩同雨露之私，澤比山河之大。使奉道醮官某等，頓消危厄，立保康寧，長符應驗之文，永合通靈之呪。三台五緯，溥施救護之仁；萬聖千真，悉效扶持之信。言猶未已，誠復有加。將一一以皈依，盡區區而護禮。庶照凡懇，上格天心。願冀感通，永資福壽。臣與醮官合壇衆等，不任激切顛俟之至，誠惶誠恐，稽首再拜，奉迎聖駕。

降真，獻茶，初獻，散花。

具位臣某等，謹重誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏聞巍巍功德，已深歸慕之誠；抑抑威儀，將遂馨香之薦。元酒上質，祈有合於天心；行潦由中，敢式照於帝座。上

願北斗七元星君，威容自在，聖德恢張，妙萬物以無私，度羣生而不息，廓高明之鑒，長敷造化之仁。使醮官某克副凡心，無違至願，被恩光而烜赫，漸惠澤以清涼。臣等虔奉之至，持北斗七元尊號、吉祥聰明神呪。

北斗七星，玉真仙靈。貪狼巨門，保臣長榮。祿存文曲，使臣聰明。廉貞武曲，衛臣安寧。破軍輔弼，護臣身形。恒居吉慶，永處福齡。注上生籍，除落死名。神清氣朗，洞達幽明。禦邪攝鬼，羣妖摧傾。學道修真，我願合成。七元扶衛，飛昇紫庭。弟子皈命，願得長生。

上香，亞獻，散花。

臣謹重誠上啓，闔座應感，一切真靈。臣等伏聞天恩罔極，圖報斯難，誠意有加，慇懃莫倦。再酌玄明之酒，仰酬昭鑒之威。上願北斗七元星君，幹造化於乾坤，運變通於品類。與天合德，長垂溥博之仁；以道爲心，無有聖凡之間。使醮官某精誠感格，志願圓諧，萬福來同，千灾永息。臣等不任虔

祝懇禱之至，持北斗七元消災延壽神呪。

北斗九辰，中天大聖。上朝金闕，下覆崑崙。調理綱紀，統制乾坤。大魁貪狼，巨門祿存。文曲廉貞，武曲破軍。高上玉皇，紫微帝君。大周天界，細入微塵。何災不滅，何福不臻。元皇正炁，來合我身。天罡所指，晝夜常輪。俗居小人，好道求靈。願見尊儀，永保長生。三台虛精，六淳曲生。生我養我，護我身形。弟子皈命，願保長生。

上香，終獻，散花。

臣謹重誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏聞祇嚴天道，須憑三獻之誠；誓戒凡心，敢墮七元之賜。恩將畢集，誠則無窮。上願北

斗七元星君，永垂盼蠻之仁，長賜生成之澤。使醮官某等，除殃滅罪，薦福延生，冥冥悉遂於感通，赫赫永昭於眷祐。臣等不任再三懺謝虔祝之至，持大聖北斗救苦神呪。

大聖北斗七元君，能解三災厄；  
大聖北斗七元君，能解四殺厄；  
大聖北斗七元君，能解五行厄；  
大聖北斗七元君，能解六害厄；  
大聖北斗七元君，能解七傷厄；  
大聖北斗七元君，能解八難厄；  
大聖北斗七元君，能解九星厄；  
大聖北斗七元君，能解夫妻厄；  
大聖北斗七元君，能解產生厄；  
大聖北斗七元君，能解復連厄；  
大聖北斗七元君，能解疫癘厄；  
大聖北斗七元君，能解精邪厄；  
大聖北斗七元君，能解虎狼厄；  
大聖北斗七元君，能解蟲蛇厄；  
大聖北斗七元君，能解劫賊厄；  
大聖北斗七元君，能解枷棒厄；  
大聖北斗七元君，能解橫死厄；

大聖北斗七元君，能解呪誓厄；  
大聖北斗七元君，能解天羅厄；  
大聖北斗七元君，能解地網厄；  
大聖北斗七元君，能解水火厄；  
大聖北斗七元君，能解刀兵厄。  
奉請七元君，大聖善通靈。濟度諸厄難，超出苦衆生。若有急告者，持誦保安寧。盡憑生百福，咸契於五星。三魂得安健，邪魅不能停。五方降真炁，萬福自來并。長生超八難，皆由奉七星。生生身自在。世世保心清。善似光中影，應如谷裏聲。三元神共護，萬聖眼同明。無災亦無障，永保道心寧。弟子歸命禮，願得壽長生。

具位臣某與闔壇衆官等，謹重誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣聞大古道全，人皆守樸。下元數盡，

世並澆漓。大聖垂慈，諸天開悔。依

科降聖，用洗滌於凡心；准教修辭，允  
哀憐於帝座。告成禮物，同菲薄之蘋  
繁；畢獻酒漿，類濁汙之行潦。但昭  
志信，以罄丹誠。用伸悔過之儀，願助  
還淳之性。庶不罹於咎犯，將獲免於  
愆尤。禮與誠隆，言隨意切。備威儀  
於此日，達詞意於今時。願絳節霓旌，  
難久留於下土；而雲車鶴蓋，亦將返  
於上穹。願賜恩波，永流惠澤，益茂生  
成之德，彌隆覆育之恩，克慰凡情，孔  
昭天道。使醮官某南宮注祿，北府除  
殃，戶納千祥，門招百福，子孫有衍，疾  
疫無侵，潛消水火之災，明保公私之  
吉。祖先解脫，冤債超昇，所願皆成，  
無求不獲，仰賴無極之慶，長臻莫大之  
休。然念臣法衆等，濁惡仍存，塵勞未  
滌，外乏威儀之具，內忘精一之心，未  
能遠降休祥，或復先招過咎。恩惟北  
斗七元星君，合座真聖，矜哀愚昧，咸  
在赦原。是嚮是宜，永副虔恭之請；  
如箕如翼，丕承遐遠之恩。拜送雲輶，  
不勝依戀。臣與醮官無任瞻望聖駕激

切奉辭依皈之至，以聞。

十二願。

復爐。

謹攝香官使者、左右龍虎君、侍香  
諸靈官，當令臣向來靜夜行道之所，自  
然生金液丹碧，芝英百靈，衆真交會，  
在此香火爐前。當願十方仙童玉女，  
接待蘭煙，傳臣向來所啓之誠，速達徑  
御至真無極大道、昊天玉皇上帝御前。

出堂頌。

出戶，送聖。

道門科範大全集卷之五十七

道門科範大全集卷之五十八

廣成先生杜光庭刪定

北斗延生懺燈儀

法事如常。

念天地自然呪，洒淨。

具位臣某謹同齋主某等，同發虔  
誠，焚香供養，北極紫微大帝，北斗天  
英貪狼星君，天任巨門星君，天柱祿存  
星君，天心文曲星君，天禽廉貞星君，  
天輔武曲星君，天衝破軍星君，左輔右  
弼星君，北宮衆聖。伏望真慈降格，燈  
壇證盟，祈禱入意。伏聞元始開教，普  
及於羣生；太上垂慈，咸臻於衆品。  
是以琅函玉笈，顯示齋科。金簡瑤編，  
敷宣醮法。大啓祈禳之路，廣垂懺謝  
之儀。凡稟生成，實宜信奉。今有修  
齋弟子某等，幸蒙真蔭，長處熙辰。但  
資富侈之情，莫悟操修之理。竊惟年  
運恐處，災纏是用，按黃籙之真儀，法  
雲天之列宿，精虔醮座，建立星壇。法

乾象之圓，隨斗杓之建。華光照曜，資續明破暗之功；仙梵虛徐，達薦福拔亡之懇。上願天真顧享，仙馭遐臨，鑒茲虔禱之誠，賜以殊祥之慶，灾消此日，福降今辰，果沐恩光，萬生抃悅。稽首皈依，虔誠讚詠。

臣衆等至心皈命樞宮貪狼陽明真皇君，斗中神仙，和諸靈官。

臣等仰惟真君，運轉圓穹，神配道樞之動；主張高漢，功儀天德之清。上符乾健之尊，下鎮嬴秦之分。統臨陽德，崇號正星，永耀神光，潛扶聖主，克保萬年之慶，長令下土之安。妙化永孚，玄功罔測。今奉道某仰託恩佑，幸與人倫，既蒙臨照之光，敢效皈依之志。謹依科式，建立星壇，備列香燈，嚴陳法信，皈命子生人本命所屬、北斗大聖貪狼星君。伏願天心降佑，聖力扶持，著生筭於青書，削過尤於黑簿，禎祥畢至，善貺來臻。稽首皈依，虔誠讚詠。

信禮高上紫微垣、北斗第一貪狼星君。

貪狼延生，回真四靈。流暉下映，洞達元冥。七元紀籍，名列紫庭。保身續壽，永亨利貞。耳目開爽，魂魄長寧。攝養精炁，與神同明。延生自然，上昇玉清，和願得長生。

臣衆等至心皈命璿宮巨門陰精真皇君，斗中神仙，和諸靈官。

臣等仰惟真君，循環太極，尊聖號於天璿；配合坤元，曜景光於土宇。下配無疆之地德，南臨莫大之楚藩。法律平施，陰刑所屬，德潛扶於女后，化允合於周南。永輔一人，君臨萬兆。信神光之默運，齊妙道以昭彰。今奉道某感荷生成，信崇因果，篤有歸依之願，寧無蔭佑之祈。謹按科儀，建成壇墀，具列香花之獻，嚴輸法信之儀，皈命丑亥生人、本命所屬、北斗大聖巨門星君。伏願充廣天心，將施惠澤，灾殃永殄，福貺來臻，十紀長安，一門共慶。稽首皈依，虔誠讚詠。

信禮高上紫微垣、北斗第二巨門星君。

巨門延命，玄靈散陳。丹田通暢，

運合仙真。七元定籍，名列紫文。護身主壽，福慶維新。辟除妖惡，善瑞日臻。去來無礙，與神同倫。延命自然，上升玉宸，和願得長生。

臣衆等至心皈命璣宮祿存真人真皇君，斗中神仙，和諸靈官。

臣等仰惟真君，動化所宗，允若天機之象；人倫攸屬，長垂真宰之功。主張火德之高明，統御梁邦之鎮靜。光昭善念，永殄凶人。長無邊鄙之虞，潛革蕭牆之禍。今奉道某仰叨玄造，肅奉崇威，盡忠孝之誠心，竭夤恭之素志。謹依科式，建立星壇，齋備信儀，粧嚴香火，皈命寅戌生人，本命所屬、北斗大聖祿存星君。伏願神心速應，聖力潛扶，千祥永萃於門庭，五福長資於命運，動爲亨泰，灾厄蕩除。稽首歸依，虔誠讚詠。

信禮高上紫微垣、北斗第三祿存星君。

祿存度厄，高仙上靈。流輝徧照，內外肅靜。七元錄籍，名列紫庭。扶身延壽，祿位長亨。臟腑開朗，動止咸

寧。光運合景，與神同榮。度厄自然，上升玉京，和願得長生。

臣衆等至心皈命權宮玄冥文曲真皇君，斗中神仙，和諸靈官。

臣等仰惟真君，抑揚萬物，長施輕重之權；消長四時，分正陰陽之候。主和柔之水德，資清潤之吳邦。天理攸司，邦基所續。無起邊陲之禍，有嚴征伐之威。神化昭明，聖功高妙。今奉道某欽崇至道，遵奉仙科，惟茲積善之因，自致皈依之路。謹依科式，建立星壇，備法信之精嚴，列香燈之煥爛，皈命卯酉生人本命所屬、北斗大聖文曲星君。伏願聖心昭假，道力扶持，視履康強，行藏清言，蕩千災於命位，資衆善於身宮。稽首皈依，虔誠讚詠。

信禮高上紫微垣、北斗第四文曲星君。

文曲消災，玄黃開陽。仙靈隱見，朗徹十方。七元掌籍，名列紫房。衛身益壽，長啓福祥。明真降祐，滌蕩凶殃。華精烝結，與神同鄉。消災自然，上昇玉堂，和願得長生。

臣衆等至心皈命衡宮廉貞丹元真皇君，斗中神仙，和諸靈官。

臣衆等仰惟真君，平直在天，善加臨於萬物；中和建極，爲綱目於五音。主土德而含光，分幽燕而作鎮。世有凶頑之罪，難逃殺戮之威。德在好生，功成滅惡。今奉道某去奢去泰，惟抱一以貢誠；載願載瞻，敢傾心而念道。謹依科式，建立星壇，備法信之精嚴，薦香燈之蠲潔，皈命辰申生人本命所屬、北斗大聖廉貞星君。伏願神功響應，聖澤滂流，災衰永蕩於一身，福祿長資於舉室，門庭叶慶，妖沴潛藏。稽首皈依，虔誠讚詠。

信禮高上紫微垣、北斗第五廉貞星君。

廉貞扶衰，真宗降靈。流霞散敷，仙仗交盈。七元典籍，名列紫營。固身養壽，慶合連并。高玄接引，優游五明。駕景飛翔，與神同靈。扶衰自然，上昇玉庭，和願得長生。

臣衆等至心皈命闔陽宮武曲北極真皇君，斗中神仙，和諸靈官。

臣等仰惟真君，化功動闕，德莫盛於闔陽；氣運宣通，數有全於六律。主敷榮於木德，長鎮守於趙邦。願去危而即安，永有豐而無歉。物富倉廩，慶洽邦家。今奉道某祇荷道恩，式崇天德，每罄皈依之願，長懷夤畏之心。謹按科儀，建成壇陛，嚴持鎮信，精設香花，皈命巳未生人本命所屬、北斗大聖武曲星君。伏願玄造廣開，靈休速降，長消災患，永保禎祥，四序康安，舉家清吉。稽首歸依，虔誠讚詠。

信禮高上紫微垣、北斗第六武曲星君。

武曲散禍，玄映禦空。威靈備守，妖邪絕蹤。七元注籍，名列紫彤。榮身增壽，享福無窮。仙官扶衛，步躡雲中。真烝降集，與神同聰。散禍自然，上昇玉宮，和願得長生。

臣衆等至心皈命瑤光宮破軍天關星真皇君，斗中神仙，和諸靈官。  
臣等仰惟真君，光杓指顧，能令四序之分；神柄推移，永作七星之主。類堅剛之金德，長統御於齊邦。部曲

精嚴，干戈整肅。長備禦姦之用，居多應敵之威。有此武功，式茲下土。今奉道某欽崇教法，祇奉威神，不敢怠於斯須，願少迴於盼蠻，皈命午生人本命所屬、北斗大聖破軍星君。伏願天心高鑑，聖澤下臨，玉簡延齡，金編紀善，永息惡曜凶星之照，長無年灾月厄之侵，眷屬寧康，住居安吉。稽首皈依，虔誠讚詠。

信禮高上紫微垣、北斗第七破軍星君。

破軍益筭，明霞散敷。流光溥浹，真炁長扶。七元慶籍，名列紫書。治身添壽，常處懽娛。飛仙蹈舞，遊晏玄都。徹視表裏，與神同居。益筭自然，上升玉虛，和願得長生。

臣衆等至心皈命北斗左輔右弼星君，斗中神仙，和諸靈官。

臣謹虔誠上啓，斗中真宰，七元輔弼真君，本命所屬星君，合座衆聖。今奉道某等精嚴醮禮，仰奉光儀，靜念端躬，虔心對聖。按仙科之儀格，事斗極之真靈。恭備香燈，式陳壇墀。蘭膏

共煥，訝芳蓮競發於中宵；寶焰齊明，狀列宿分輝於下土。沐靈光之并照，迷暗罪除；蒙懺法之敷宣，愚癡障解。今則祈恩謝過，事畢功圓。惟冀聖澤遐沾，恩光溥及。上願天長地久，國泰民安，風雨順調，方隅寧靜。次願奉道某等琅函玉笈，永昭積善之功；丹簡瓊文，益注長生之字。福符百順，家集千祥，乃子乃孫，盡忠盡孝，灾殃霧廓，慶瑞雲臻，四時克保於安康，一宅長蒙於利佑，九幽長夜，俱睹光明，一切有情，同登道岸。稽首皈依，虔誠讚詠。

誨經。

回向。

餞神，化財。

道門科範大全集卷之五十八

### 道門科範大全集卷之五十九

廣成先生杜光庭刪定

#### 北斗延生醮說戒儀

法事陞壇如式。

念淨天地呪，灑水，序立。

高功臨案。

具位臣某等，謹焚道德真香，虔誠奏啓，三清上帝，十極高真，神霄九宸列御帝君，上清日宮太陽帝君，月府太陰皇君，南斗六司延壽星君，北斗九皇解厄星君，東西中三斗星君，三台華蓋星君，銀河二十八宿星君，天元、人元、福祿星君，天司主照某本命元辰星君，當生行年一切星衆，三官大帝，考校罪福聖衆，北極四聖，導從仙官，靈寶教主，五師真君，泰玄都省上相真君，太極仙翁，沖應孚佑真君，九州都仙神功妙濟真君，僉書三省上相真君，玉堂演教侍宸仙衆，三界十方，一切真宰。咸望洪慈，俯垂洞鑒。臣今奉爲宣意，其

諸情悃，已對敷宣，諒沐天恩，鑒明祀事。臣伏聞夫建齋之始，先受修真之戒，以檢察身心，感格天地。今日道場，乃是弟子某建生本命上屬北斗某星君下降之日。北斗七星，在太微之北，爲人君之象，爲號令之主，斟酌元氣，臨制四方，以建四時，以均五行，運天地之中，而人稟之以爲命。第一曰陽明貪狼太星君，子生人屬之；第二曰陰精巨門元星君，丑、亥生人屬之；第三曰真人祿存真星君，寅、戌生人屬之；第四曰玄冥文曲、紐星君，卯、酉生人屬之；第五曰丹元廉貞剛星君，辰、申生人屬之；第六曰北極武曲紀星君，巳、未生人屬之；第七曰天關破軍關星君，午生人屬之。一主天，二主地，三主火，四主水，五主土，六主木，七主金。一主秦，二主楚，三主梁，四主吳，五主燕，六主趙，七主齊。一主陽德，二主陰刑，三主中禍，四主征伐，五主殺戮，六主五穀，七主兵戈。自一至四，爲魁魁，爲璇璣；自五至七，爲杓杓，爲玉衡。凡人之生，福祿壽命，

與夫眷屬奴婢，皆斗中主之。按太上老君言：凡人性命五體，悉屬本命星官之所主掌。本命神將、本宿星官，常垂廕祐，主持人命，使保天年。夫本命真聖，每歲六度，降在人間。降日爲本命限期，可以種種香花、時新五果，法天像地，請正一道士，或於宮觀，或在家庭，修齋設醮，啓祝北斗三官五帝、九府四司，薦福消災，奏章懇願，隨力建功，請行法事。功德深重，不可具陳。其有本命限期將至，自身不知，不設醮筵，不修香火，不能投告北斗，醮謝真君，及轉真經，認本命真君名號，此爲輕生迷本，不媿人身，天司奪祿，減算除年，致多夭喪。身謝之後，淪沒三塗，漂諸六趣，深可悲哀，自致斯苦。今日設醮弟子某伏念本命之日，稟氣受形之始，化生之本。道家大洞帝一之法，皆以本命之日，行持練神，結氣保命。生真誦度人之法，亦以本命之日，行持魂神，澄正萬炁，長存則知本命之根本，不可虛過。今日道場衆等，當知天命至重，不可輕禱。衆等雖佩

至真，參修大法，處身五濁，染迹六塵，啓奏之間，不無窒礙。先當澄神靜慮，仰奉戒約，清靜身心，上遵法訓。

天尊言：修齋行道，皆當一心請奉十戒，諦受勿忘，專精默念，動思自然，勿懷雜想，擾亂形神。能如是者，咸當諦聽。

第一戒者，不得傲忽聖真。常懷恭敬，仰對尊像，真應化身，心起精虔，供養無闕。天真大神，浮空而來，專懷注想，必獲降接。

第二戒者，不得輕慢經文。常懷信重，三洞大乘，開導愚迷，能發衆生無量道意。傳寫讀誦，一心玩味，從迷起悟，從悟成真，必證道果。

第三戒者，不得誹謗法門。常懷愛護，教化衆生，令各歸依，廣獲受度，紹隆正教，洪道明法，濟度存亡，助國化人，功垂永劫。

第四戒者，不得觸穢道場。常懷精潔，香湯沐浴，始近玄壇。不得以竈火焚香，穢柴造食，燈燭器皿，無染脂垢，食啖葷肉，無來取禍。婦人天癸未

絕者，不得升階。身有臭穢，不在呼使。雞犬及一切禽畜，不得相近。

第五戒者，不得放縱身心。常懷畏謹，不得臨壇高聲，呼罵叱喝，及對聖像，語笑輕忽，及貪睡眠，非時飲酒。華色過前，不得角眼斜視。鞠躬小心，如對君父。

第六戒者，不得爭競財利。常懷廉遜，施者受者，勿諂勿怨。令各懽喜，廣建功德，祿力溥霑，塵沙世界。

第七戒者，不得減省法事。常懷勤恪，行道誦經，燒香禮懺，使功德滿足。十極高真，盡得見聞，冤債永消，橫魔不值，人天獲果，幽顯蒙恩。使世間蠢動，一切含識，永入法門，不沉苦趣。

第八戒者，不得退轉道心。常懷堅固，勿因小嫌，便減誠意，發增上願，精進崇奉，天真懽悅，列名上清，九祖超昇，己身證道，見存眷屬，福田無量。

第九戒者，不得錯誤章奏。常懷審訂，大緣難遇，大善難成。若鹵莽滅裂，不加參對，則三天門下，有所遺却，

志願不伸，事屬徒勞，福力未沾，先獲咎戾，深可震懼。

第十戒者，不得擾亂形神。常懷專一，喜怒哀樂，不萌於心，務致清明，盡其在己。廣發大願，奉道修真，願先得道者，次第開度。

已上十戒，衆等能持否？

天尊言：修齋行道，四天帝王，與諸天真，皆駕飛雲緣輶，八景玉輿。侍從玉女，手執花幡，前導後從。獅子白鶴，嘯歌嚙嚙。燒香散花，浮空而來。瞻禮行道，觀聽法音，當先授十戒，然後行道，夷心靜默，專想不二，過中不味，內外清虛。諸天監觀，萬靈侍衛，不得自慢，以招禍災，進退雍容，不離儀格，天真懽悅，列名上清。

奉戒回向。

道門科範大全集卷之五十九

### 道門科範大全集卷之六十

廣成先生杜光庭刪定

#### 北斗延生道場儀

#### 啓壇行道

陞壇法事如式。

各禮師存念如法。

宣衛靈呪。

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣



今靜夜行道，謹奏爲入意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等以今奉爲弟子某伏值本命所屬、北斗某星君下降之辰，預夜就某處建立華壇，修設延生注祿靈寶清醮一壇，命臣等以今日日時，宣行齋法，薦福消災，奏章懇願，增延福壽，濟度存亡。臣竊以弟某身在塵寰，命由天府，若不醮謝真君，及轉經行道，則天曹命曆，無由添筭；陰司罪簿，無由落名。臣等見在，懇切專誠，理宜關奏。伏乞天恩蕩宥，赦除

弟子某億劫以來，至于今日，三業六根無邊之罪；或魂神被繫，禍患來鍾；或重病不痊，邪妖剋害；或塚訟徵呼；或先亡復連；或上天譴責；或下鬼訴誣，並願斷除，使身清靜，關奏感通，善達天司。得與弟子於本命限期，增祿增壽，使其立功濟物，功滿德就，侍衛帝宸無極道前。

懺悔。

重稱法位。

具位臣等，謹重誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏聞禪黎演教，開禳災度厄之門；玉局傳經，有削死延生之法。是乃遵依科教，開建齋壇，迎集天祺，袪除時沴，上延景貺，以弭餘迍。臣等啓事之初，告齋惟始，將宣行於道化，欲洪濟於斯人，延

永命於無窮，達至誠於有感。況奉詞旨，敢不上聞。

宣詞。

按如詞文，灼見誠悃。致苾芬而交薦，燎馥郁以上通。執鋒步斗，而百魁潛藏；披篆宣文，而千災蕩散。命霓裳於清館，設醮席於華堂。明燭騰輝，靈幡散影，鍾磬節空歌之奏，旌幢引仙馭之臨。諒精意之升聞，感衆真之來格。恩惟三清上聖，十極高真，垂神省覽，監察丹衷。乞勒監察使者，里域真官，奏事金童，傳言玉女，靈寶官屬，一合同心，肅清內外，營護道場。使臣等神氣不遷，思念立感，啓奏上達，齋功成就，庶使弟子某智慧性圓，道心開發，出羣迷徑，入希夷門，皈奉真宗，達生榮界。臣無任懇禱之至，謹稽首再拜以聞。

十二願。

復爐。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，

在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十

道門科範大全集卷之六十一

廣成先生杜光庭刪定

北斗延生道場儀

靜夜行道

法事陞壇如式。

各禮師存念如法。

宣衛靈呪。

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今靜夜行道，謹奏爲入意。其諸情愆，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣聞翕張元氣，北斗爲七政之樞機；號令羣生，北斗爲上天之喉舌。倬彼羣象，屬茲命元，以其運於天地之中，降其衷爲短長之命。分歲直而各主，總化生之大原。貴而王公，下而士庶，一均賦與，咸上稟於天元；密運回環，迭有臨於辰次。以一年而觀乎時運，凡六度降在人間。當其飈馭下翔，靈恩博濟，定壽數之期限，爲性相之本根。雖天道

公而無私，在物理求而必與。設醮弟子某素有道心之發，欲臻善果於身。醮謝真君，不忤靈期之虛過；投告北斗，仰資萬炁以長存。臣等備位真司，留心齋法。龍章鳳篆，披妙蘊以洪敷；寶笈琅函，助仙風而誕布。況奉詞旨，敢不上聞，齋意青詞，謹當宣奏。

宣詞。

按如詞文，誠切修奉。廣陳供養，備列威儀。燎以百和之香，德馨並達；明以九微之燭，心鑒遙通。奠金醴以交神，進瓊腴而薦品。大則法天像地，小則酌水獻花，備物以表誠，虔心而致告。求無邊之福利，夙夜勤劬；憑無上之法橋，存亡普度。以今靜夜行道，請法衆等運茲初捻上香，供養十方一切道寶。臣等皈身、皈神、皈命太上元始天尊，昊天玉皇上帝，九品上聖。以是功德，仰祝今上皇帝陛下。伏願景命有赫，萬壽無疆。玉帛駿奔，車書混一，日月合璇璣之度，陰陽均玉燭之和。河海晏清，干戈偃戢，無一夫之失所，得萬國之驩心，並降之瑞薦

臻，太和之氣浩作。今故燒香，自歸依道尊大聖衆至真之德。得道之後，昇入無形，和與道合真。

以今靜夜行道，請法衆等運茲二捻上香，供養十方一切經寶。臣等皈身、皈神、皈命太上玉宸大道君，紫微天皇大帝，九品上真。以是功德，歸流醮主某九世七玄，億曾萬祖，陰宮夜府，一切亡靈。伏願鍊沐神魂，昇入洞陽之境；超離鬼籍，別生景福之天。受仙官拔度之恩，斷鬼神連逮之役，慶流後裔，功及宗人。今故燒香，自歸依經尊大聖衆至真之德。得道之後，昇入無爲，和與道合真。

以今靜夜行道，請法衆等運茲三捻上香，供養十方一切師寶。臣等皈身、皈神、皈命太上金闕老君，紫微北極大帝，九品上仙。以是功德，歸流醮主某，屆茲元命之辰，別注殊常之福。遠爲期限，并龜鶴以齊年；除去害災，與珪璋而比德。所有行年之上，運限之中，或暗曜臨身，或黑符加運，或值運元之衝破，或當氣本之衰微，並願本

命星官、本宿神將，悉來擁護，無使傾危，回死注生，變凶爲吉。仰資道廢，並荷玄休。今故燒香，自歸依師尊大聖衆至真之德。得道之後，昇入無爲，和與道合真。

唱方，懺方，三啓，三禮。

具位臣某等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏以太上慈悲，爲衆生之父母；本命經訣，作當世之津梁。儻匪慈航，孰登道岸。自聖真之畀付，許寰海之宣行。永壽改元之初，至于今日；太清闡教之久，傳及小臣。不量弱質之凡，輒演真科之妙。伏乞九清重盼，三洞流光，憫以大慈，開以大有，赦除弟子某爰從歷劫，逮及今生，捨身受命，從苦入苦，漂沉六趣，混合衆生，或富或貧，或貴或

賤，或生夷域，或在中華，不悟正真，罔知經戒，務追時好，以取世資。失性任情，貪財背義。妬賢嫉善，不親勝己之人；冒法爲非，不顧陰司之錄。罪根深重，惡業縈纏。或得罪於穀父蠶母之神，或受報於陰考陽罰之數，違明真之科典，犯三元之品文。五帝四司，記其自爲之孽；三官九府，校其所作之非。被天司之減筭除年，無善功之消灾懺罪。魂神被繫，禍患來鍾。或連年而疾病不痊，或累歲而邪妖剋害，近則先亡連復，遠則塚訟徵呼。被下鬼之訴誣，蒙上天之加譴，連逮祖禰，流注子孫。今投解謝之門，乞免淪沒之苦。未赦者赦，未原者原，應其請福延生之求，聽其修齋設醮之願。所削落者，皆三灾九厄；所衛護者，有萬聖千真。易短促之年，爲延長之筭，變灾衰之運，爲吉慶之期。富貴聰明，處人中之殊勝；快樂自在，獲壽量之無窮。均福利於同居，覃恩光於後裔。上明天尊大慈之澤，下副臣等歸命之誠，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十一

道門科範大全集卷之六十二

廣成先生杜光庭刪定

北斗延生道場儀

設醮行道

法事陞壇如式。

各禮師存念如法。

宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利貞。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今靜夜行道，謹奏爲入意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某等，謹同誠上啓，虛無自然元始天尊，太上大道君，太上老君，昊天玉皇上帝，九皇上真，十方已得道大聖，衆至真，諸君丈人，三十六部尊經玄中大法師，圓穹玄象、日月星辰、北斗尊帝，七元輔弼星君，南極大帝，丈人司馬，六司星君，本命元辰，洞天海嶽，三界官屬，一切真靈。臣等伏以性命皆憑妙道之所生，形體皆爲本宿之所掌。一身之元辰，驛馬奉天令，以解除害災；七元之本命，星官察人爲，以增崇福壽。當有威儀之像世，必聞真聖之通靈。恭惟北斗本命真君，造化之樞機，陰陽之元本，主持人命，統御萬靈，有回死注生之功，示懺罪消災之法。然道爲萬氣之母，天乃百神之宗，命雖主於七星，事悉關於天府，故

五行共稟，七政同科。凡當元命之辰，普降衆真之駕。醮主弟子某仰延藻衛，披露精衷，揚典禮於靈壇，接威神於靜夜。雲璈迭奏，舉空洞之靈歌；寶笈重宣，紛鬱葱之佳氣。蕙肴豐苾，醴酒馨香，恭協靈期，敢忘本始。伏願八瓊駐景，三素飛駢，下天蹕於空中，降玉華於庭際。五色之彩雲覆地，仙仗來臨；九天之真氣弔壇，帝容有赫。萬靈侍衛，諸天下觀，監茲無貳之誠心，錫以難窮之壽筭，五福咸備，百禄攸宜，三世罪空，一身神集。使醮主弟子某業無報而自落，善有應而彌修，家生忠孝之孫，身積神仙之功行，生存受度，水陸霑恩。臣與齋官無任虔頌懇禱，俯伏望幸激切之至，謹稽首再拜，奉迎聖駕。

請聖，初獻，散花。

重稱法位。

具位臣某等，謹同誠上啓，三清上聖，昊天玉皇上帝，諸天帝座，三寶神君。臣聞六甲內馴，隨彼機衡之運；五行迭旺，示茲龜鳥之時。觀三百六旬

之中，皆七十二候之紀。一歲之運也，一星以主焉。試推甲乙之遷，潛格堪輿之應。碧霞殿上，以丙午歲而說消災之文；玉局座中，以乙未年而示延生之訣。丁丑、丁卯、丁巳，則玉女所直；甲子、甲寅、甲申，則三皇所司。關令尹以壬午日中，親逢太上；葛仙翁以庚寅日夜，遠降天真。是知本命之期，當有百靈之集。設醮弟子某香花作供，首體歸誠。瞻穹極之斗標，隨心控告；儼齋詞之醮席，注想尊靈。禮行初獻之儀，位降周天、諸天之聖。享神貴德不貴味，願歆明德之馨；香天以實而不以文，冀通款實之祝。忱詞致告，精懇備存，啓茲丹字之函，召乃紫清之蔭。乞回飈景，臨鑒齋盟，弟子青詞，謹當敷奏。

宣詞。

諦詳齋款，灼見至誠。爰求端命

於天，肅祗科醮，保比克生之質，永奉神靈。伏蒙上聖垂光，虛皇乃眷。咫尺清都之馭，真侶誥誥；雍容仙旆之臨，醉顏穆穆。駐仙儀於靖館，達誠悃

於帝聰。盼蠻相符，荷至神之不昧；希微有象，錫瑞應以潛臻。敢因元命之期，普洽自天之祐。臣與齋官無任歡呼抃蹈激切知歸之至，誠惶誠恐，稽首再拜，謹陳亞獻。

散花。

具位臣某等，謹同誠上啓，北辰帝座，斗中七星，五福十神，二十八宿，周天列曜，一切尊靈。臣聞有命在天，孰不資於洪造；維北有斗，寔統屬於羣生。爰自太極肇分，三光迭照，普斗柄之在上，號帝車而運中。獨稱象緯之尊，斡旋天地；密運化機之妙，稟貸生靈。粲然一星之光，蠢爾萬夫之命。醮官某志不忘本，念厥生之有初；命實開先，乃毓形於今日。戒先世迷真之故，懼天司奪祿之殃。嚴啓道筵，再伸獻禮。香炷交騰於瑞霧，星燈爛接於神光。法音琅琅，仙儀翼翼。天人相交之際，福祿來下之時，靈契斯通，至誠所感。願延命限，展壽域以無窮；錫以神禧，鞏福基而永固。北斗七千之神將衛護，南陵三千之使者追

隨，掃蕩災屯，消除魔鬼。五藏之神君常保，三生之男子長爲。婦人則云：守形之大，一不離身。帝座流輝，天精散彩，各守辰躔之次，共儲分野之祥。臣與齋官無任虔懇戰越之至，稽首再拜，謹陳終獻。

散花。

具位臣某，謹重誠上啓，五嶽十山，三河四海，十洲三島，四瀆九江，福地靖廬，洞天靈化，三府官治，一切威靈。臣等伏聞東啓明而西長庚，南有箕而北有斗。仰觀上象，煌煌有爛之文；維是七星，一一注生之本。宣至精於物表，斡洪造於天中。認本命所屬之星，設靈寶告真之醮。是爲知本，乃不輕生。設醮弟子某涓選休辰，式陳明薦，尚慮志雖自勵，行或匪彝。疏煩想於心胸，遷善遠罪；檢仙圖於軌格，好道求靈。增潔意以滋深，望靈休之疊委。今則嚴更未艾，悉周三獻之勤；玄感已通，願保百齡之永。伏冀三靈臻貺，萬聖流輝。落滅罪根，俾欽承於精曜；恢洪慶會，永無媿於人身。解三

災四殺之屯，除五行六害之苦，無七傷而有七元之護衛，無八難而有八天之監觀，夫妻保偕老之期，男女有宜家之慶，婦無產生之厄，鬼無復連之纏，疾病皆痊，疫癘無染，精邪伏匿，狼虎潛藏，官灾塚訟永消除，地網天羅俱解釋，交游無呪咀之事，往來無劫賊之虞，同處家門，並臻康泰。臣與設醮弟子無任傾虔屏營之至，稽首再拜以聞。

宣功德疏。

具位臣某等，謹重誠上啓，三清上聖，十極高真，海嶽神靈，天地仙衆，三界官屬，一切威靈。臣等伏以祇建明科，昭飭馨薦。上通霄極，奉絳闕之明威；延致真靈，煥玉光於空洞。三挹既清之醴，一陳仰告之詞，垂監在高，有祈無斃。伏念弟子某性無他好，惟善是修，聞而必行，惟齋克舉。靈辰荐及，元命忽臨，終夕之靈壇肇開，六度之雲駢下暨。皇明已燭，業障俱空，別延天府之命元，不絕人道之種子。更冀流以真氣，沃以太和，照以靈光，沐以神澤，使弟子某漸登妙果，重立玄

功，證妙道之虛無，具圓通於聖智，逍遙紫雲之際，昇入金闕之門，與萬聖以協和，超三界而自在，永不輪轉，壽量無窮，靜言仙路之開，皆自今日之始。

次乞弟子某家七先神識，九祖幽儀，沐浴流火之庭，步武朱陵之府。乘洞陽之氣，受記三清，離萬鬼之羣，遠辭泉曲。殃注永絕，逮役不聞，利佑後人，增延景福。次及父母兄弟、夫婦女男，盡滌罪瑕，咸蒙福佑。紫文注善，增福祿於玉帝案前；黃籍紀功，關姓名於太皇殿上。徧合門而受祉，延百載以蒙休。除九皇行度之災，雖刑衝而無爲迍害；免二運凶衰之數，值空絕而更益年齡。長幼康寧，族屬和睦。次乞兵偃刑措，道洽化醇。集大慶於邦家，無夷冠之患；布神休於黎庶，有謳歌之歸。混合車書，鎮安天地。陽九百六，制劫運以無憂；四輔千官，禮公忠而報國。湛恩及於庶物，授職徧於羣臣。凡居覆燾之中，同諗雍和之化。今則天香尚靄，仙衛將回，芝童執節以前迎，雲馭控飈而直上。臣等朝真班

退，告齋事終，已蒙天眷之臨，永共靈期之協。臣與設醮弟子某等，無任攀戀知歸之至，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十二

### 道門科範大全集卷之六十三

三洞經錄弟子仲勵修

#### 真武靈應大醮儀

佑聖醮儀，凡三本。一潛耀巢公觀，二大師史公浩，三近出一本。皆是單朝，於宿啓晝夜醮則不備。爰合三儀，并取杜天師光庭北帝齋儀、三上香兩節參修，增爲啓散，三時行道，作五卷，以備修設之用。

陞壇法事如式。

庭參。

具位臣某等，謹焚道香、德香、無爲自然香，虔誠再拜，啓請法主北極鎮天真武靈應佑聖真君，玄天元聖仁威上帝，聖父淨樂國王，聖母善勝皇后，北極天蓬都元帥蒼天上帝，北極天猷副元帥丹天上帝，北極翊聖保德真君昊天上帝，北極闕下列班真宰，雷霆鄧、辛、張三大元帥，雷門苟、畢二元帥，虛危二宿神君，黑虎大神劉天君，阜燾神君、崔、廬、鄧、竇四天君，馬、趙、關、溫四大元帥，城隍祀典，廟社神祇，三界

功曹，證盟真宰，悉仗真香，普同供養。臣等伏以圓蓋廓清，藹非煙之佳氣；北靈昭格，協降駕之靈辰。臣等澡灑蒙襟，宣行齋法，躬致庭參之禮，仰延宸宙之游，咸罄乃誠，續通精款，臣等無任俯伏皈依之至以聞。

發牒。

念呪灑淨。

恭聞天道高遠，無聲臭之可聞；神聽杳冥，惟陰陽之莫測。誠之所嚮，應乃無方。厥有靈官，克司請命。敢使一爐之芬郁，仰邀四直之威靈。冀賜感通，即垂降鑒。以今焚香，奉召年直功曹使者、月直功曹使者、日直功曹使者、時直功曹使者，惟願降臨，受茲祈叩。

恭惟使者，上下四方，最爲夙絕；超騰萬里，曾不須臾。玉闕金庭傳命，主叩闈之職；雲車風馬過都，如歷塊之稠。煩聖力之載馳，致神聰之四達。倘備精明之禱，曾徵壅遏之憂。今醮官某夙稟善緣，叨逢正法。晨昏香火，敢忘真聖之鴻慈；時節芹暄，用格靈

官之飈馭。庶祈仙駕下察，凡居于時，瑞霧騰空，祥風布地，演瓊科於翠笈，吐塵悃於丹心，仰仗先容，得諧上達，所祈所請，令即啓聞。

宣牒。

上來文牒，已具關宣。今則展禮塵居，馳誠妙域，雖深注想，無計上聞，式臨下降之辰，敢瀆高靈之聽。仰祈使者，即爲關聞。醮官某等所謀者通，所求者遂，所禳者却，所作者成，庶此微衷，不爲虛設。

說戒。

恭惟北方真武靈應佑聖真君，乃太上老君應化之身，屬北斗第六武曲紀星君。北方以虛、危二宿爲蛇，營室、東壁二星爲龜。龜有甲而扞衛一身，蛇如陣而首尾俱至，故有武之象。龜蛇合而爲真武，有神主之，是爲真君在天。上冠蒼玉之冠，衣玄色之衣，與天蓬、天猷、翊聖，號北極四聖。降於人間，則披髮跣足，仗劍以斬妖邪，部領六丁玉女、八殺將軍、六甲直符、十二神將，各一十二人，符吏百二十人，

神兵五十萬人，雷電風雨之神，常隨左右。真君多降於蜀中，緣蜀中有玄武縣。今避聖祖名，改爲中汪。自漢迄隋，隸成都。唐武德三年，分隸梓州。其縣有真武聖跡最多，後倚高山。山之上下，皆有觀，前臨大江。江中之石，自然成龜蛇之狀。近世無道士住持，更爲金仙道場，威靈亦常示現，及降語於成都。宋興之初，成都有燁灰李，置一閣奉事真君香火，真君降於其家，傳以五斗，經行於世。又有杜明，亦勤於崇奉，真君往往就明降語。咸平中，王均叛，賊帥遣卒召明。明往見賊師，殊不知口中歷歷道何語，賊師命送歸。移時，方知身在家，舉家驚喜。賊平後，遂罄金帛於天慶觀三寶院，擇地築基，建堂殿，塑真君像，及繪靈官侍從，以謝脫賊之厄。上元節，殿堂綵繪新成，遊者駢集。杜明遺，其弟擊磬，祇飭香燈。至夜，士女填溢。其弟於紗窗，窺映婦女。真君怒使自櫺，其眼幾破。及祥符五年，又降語云：天蓬哥來則是客，吾當爲主人坐，數有上



真降焉。一日，明奉香火之次，降語令

召道正明寂大師寒道沖曰：吾降此已數年，後吾於東都降現，以保帝祚，汝不得退前志。自此遂不聞真君之語，

十年後，京師聖水觀龜蛇現，若合符節。崇寧末，成都紀堂力學能文，聖壽寺劉氏命子弟從之游。真君降言，紀堂不孝後母，天曹已不收名字，後果無成，客死於藥水鋪。靖康初，京師失守，真君復降於成都。朝請郎揚廣因崇害其女，來玉局觀，設四聖醮，真君降于座，闔觀驚駭，真君爲其除崇。及言齋官衆等祖先以來事，一一目擊。又請江瀆神王，應時而至。地司主者，階下惶恐聽命。建炎中，廣都巢觀，夜夢真君遣人見召，心甚驚駭。至則真君降階相接，聖顏溫和，玉音清亮，待之如賓。覺而遂修醮儀，舉家奉戒，愈切崇信。所以奉祀者，不可輕媒於建齋之初，當知此戒，其戒有七，衆當諦聽。

第一戒者，不得信從邪道，禱祭魔法，諂求餘福，昏迷沉亂。常欲清淨身

心，歸依大道。

第二戒者，不得不忠不孝，不義不仁。常欲恭勤事上，慈愛接物，不忘道訓。

第三戒者，常念累世父母，過去親蘿，曾爲六天魔鬼枉死傷害，未盡天年，橫被傷殺。歸投正教，拔濟幽魂，使幽明存亡，均霑利澤。

第四戒者，真君降日，不得章奏之內，有犯諱字。謂告乞字又不得燒奏阜錢，并有油燈油紙，焚爇所奏。

第五戒者，真君降日，不得食葷辛雜肉，及黑鯉魚、雲臺菜、胡荽馬、齒莧、大蒜、七星魚等物，及不得令氣息相近。

第六戒者，婦人年未五旬者，不得令近神座。及童僕身上，氣息臭穢者，亦不得令詣前，常務蠲潔，以奉上真。

第七戒者，常若奏對真靈，不得北向涕唾，及旋溺不潔。

已上七戒，能持否？和云能持。真君昔奉天尊教敕，凡甲子、庚申，每月三七日，下降人間，受人之醮

祭，察人之善惡，修學功過，年命長短。衆等依科行道，當奉此七戒，以檢飭身心，無招罪戾，庶使真靈降格，歆納勤誠，魔精消伏，斷滅不祥，過去超生，見存獲慶，生人安泰，國土清平。衆當明知，無忘于心，奉戒如法。

請稱法位。

具位臣某等，謹重誠上啓，太上無極大道，三十六部尊經，玄中大法師，靈寶主教，五師真君，三天聖師，泰玄上相真君，玉堂演教侍宸仙衆，三界十方，一切真宰，悉仗真香，普同供養。宣意事悃已宣，聖聰昭聽。復念臣等謬以凡庸，輒司科教，懼檢身之弗類，恐獲戾于上真，僉請備員，不容遜職，蠲洗埃氛之累，宣行教典之嚴。伏望玉京山應供玄中大法師，靈寶三師，監齋大法師，降臨壇所，俯垂佑助，流真炁於臣等身中，令得齋事克成，衆真來格。某等不勝延佇懇禱之至，謹啓以聞。

回向。

道門科範大全集卷之六十三

道門科範大全集卷之六十四

廣成先生杜光庭刪定

真武靈應大醮儀

啓壇行道

法事陞壇如式。

各禮師存念如法。

宣衛靈呪。

東方：

九炁青天，明星大神。煥照東鄉，

洞映九門。轉燭陽光，掃穢除氛。開

明童子，號曰玄卿。備衛我軒，上對帝

君。收魔束妖，討捕兇羣。奉承正道，

赤書玉文。九天符命，攝龍驛傳。普

天安鎮，我得飛仙，和與道合真。

南方：

三炁丹天，煥景流光。熒星轉燭，

洞照太陽。上有赤精，合契虛皇。開

明靈童，號曰華房。總統火兵，備守玉

堂。斬邪束妖，剪截魔王。北帝所承，

風火莫當。流鈴交換，翊衛壇場。正

道流行，敢有巴狂。我享上功，坐運魁  
罡。億劫長存，保天無疆，和與道合真。

西方：

七炁素天，太白流精。光耀金門，

洞照太冥。中有素皇，號曰帝靈。保

神安鎮，衛我身形。斷絕邪源，王道正

明。宮殿整肅，三景齊并。道合自然，

飛昇紫庭。靈寶符命，普惠萬生。元

皇正炁，來合我身。功加一切，天地咸

寧，和與道合真。

北方：

五炁玄天，元始徘徊。辰星煥燦，

光耀太微。黑靈尊神，號曰層威。統

冠飛天，仙裙羽衣。備衛五門，檢精捕

飛。敢有干試，豁落斬摧。玉符所告，

神鎮作威。邪門閉塞，正道明開。映

照我身，三光同輝。策空駕浮，舉形仙

飛，和與道合真。

中央：

一炁黃天，調理乾坤。陶鎔陰陽，

總統玄真。鎮星吐輝，流煥九天。開

明童子，號曰天璘。元炁陽精，焰上朱

煙。洞照天下，及臣等身。百邪摧落，

殺鬼萬千。中山神呪，普天使然。五  
靈安鎮，身飛上仙，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今陞壇行道，謹奏爲宣意，其諸情悃，已

錄告聞，願得太上十方至真道炁，靈寶

瑞光下降，流入臣身中，令臣所啓，速達

徑御太上無極大道、昊天玉皇上帝御前。

請稱法位。

具位臣某與合壇衆官等，以今正爾

燒香，以是功德，奉爲天子王侯，百辟

僚屬，經籍度師，山林崑棲，修真之士，

同學之人，九親姻族，天下人民，飛行

動植，一切衆生。今故燒香，歸身、歸

神、歸命太上十方靈寶自然至真無上

大道，乞賜原赦臣等及醮主某家，前世

今生，無邊之罪，得免離三灾八難、十

苦九厄之中，身得道真，飛行虛空，白

日昇天，侍衛道君，逍遙無上金闕七寶自然宮，永與道合。所啓靈應，上御至真無極道前。

重稱法位。

具位臣某與合壇衆官等，謹同誠上啓，太上無極大道，元始天尊，太上大道君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣某伏聞金闕化身，誕玉宮而勇猛；乾元有將，視五嶽以齊名。萬真率仰於威靈，六合無逃於巡察，輒舉彤庭之醮，仰延阜纛之臨。恭惟北極佑聖真武靈應真君，丕揚神武之靈，茂著陰方之位，妙功不測，沖用潛通，曩京邑之上腴，有龜蛇之現象。允升地寶，恣涌神泉。掬清潤之雲漿，徧愈都人之疾；建琳琅之寶宇，遂成聖水之名。加以徽稱，昭其懿實，普及寰瀛之內，咸知變化之神。矧惟靖邦，素彰殊應。豈欽承之敢怠，冀孚佑以潛臻。臣職在宣揚，理

難緘默，況奉詞旨，敢不上聞。

宣詞。

按如詞言，丹誠懇切。臣等謹爲沐浴五體，澄煉六情，依崇真謝聖之科，祈注祿延祥之澤，施壇列纂，法地象天，所齋鎮信供養之具，證質丹誠。以今日今時啓壇，依儀行道，至某日某時，關奏上真，請福延生，祈恩謝過，輒依齋法，宿先以啓聞。恩惟太上三清，十方大聖，垂神鑒映，省覽所陳。乞敕勒靈寶官屬，土地真官，一合同心，併力營衛，掃蕩內外，清淨壇場，降伏妖魔，馘滅邪祟。使臣等心安神定，思念立感，啓奏御達，善功成就，無有窒滯，所願隨心。臣等雖佩正真，參修大法，處身五濁，染跡六塵，三關未調，六情放誕，先憑禁戒，然後登壇，格降上真，導迎靈貺。上明天尊大慈之澤，下副臣等歸向之誠，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來靜夜行道之所，自

然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十四

# 道門科範大全集卷之六十五

三洞經籙弟子仲勵修

## 真武靈應大醮儀

### 清旦行道

法事陞壇如式。

各禮師存神如法。

宣衛靈呪。

青陽虛映，耀日回靈。神虎辟邪，

飛天流鈴。摧奸滅兇，萬魔束形。九

微回道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今清旦行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆官等，謹同誠上啓，太上無極大道，元始天尊，太上大道君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞陰陽遞遷，惟北方負太陰之炁；水火各旺，獨真君爲水位之精。布政坎宮，參功宸極，成萬物之終始，司化機之翕張。贊襄上帝之陶鈞，總括百靈之機要。或飛行於太空之內，或徘徊於五炁之天，神旌舉而海岳動搖，劍炁衝而雲雷振響，沃氛電掃，威令飈馳。凡傾歸仰之心，必荷昭彰之祐。某潔蠲壇度，延企飈旂，攄精懇以欽承，佇威靈之感格。臣既承詞旨，敢不上聞。

宣詞。

諦詳詞語，灼見至誠。不仗明威，安臻戩穀。願納蘋蘩之薦，俾依天地之仁。藹瑞炁於層空，霈爲德澤；扇靈風於闔宇，廣布恩波。罔有神恫，迄無鬼責。以今清旦行道，請法衆等運茲初捻上香，願此香煙，騰空徑上太清宮中，供養真武靈應真君所化之身，金闕老君，三清玉皇上帝。伏願隆大道以垂慈，冠列真而敷佑，使邊燧徹警，兵鋒不鳴，在朝無欺君敗國之臣，四方有愛民保邦之吏，永無寇亂，同樂昇平。今故燒香，自歸依道尊大聖衆至真之德。得道之後，昇入無形，和與道合真。

以今清旦行道，請法衆運茲二捻上香，願此香煙，騰空徑上北極太常府，供養真武靈應真君所屬武曲星君，同北極衆聖。伏願示嘉應以宏敷，煥靈芒而遠燭，使醮主某九先七祖，不滯幽關。見在親蘿，俱消罪目。宿世絕冤魂之累，重陰除豕訟之呼。束勒群魔之精，斬馘六峰之鬼。恢洪梵炁，保

佑斯人。今故燒香，自歸依經尊大聖衆至真之德。得道之後，昇入無形，和與道合真。

以今清旦行道，請法衆等運茲三捻上香，願此香煙，騰空徑上神座，供養真武靈應真君。伏願體金闕之明威，爲玉京之元輔，巡行有截，斷滅不祥，使醮官某坎宮除險厄之虞，水德著聰明之性。修學云研經有素，採藻無雙，早階廡仕之華，便躡亨衢之峻。不修學云靈根堅固，性識高明。出入起居，罔有外邪之染；寢興食息，永無時疾之嬰。灾逐冰消，善隨日長。有官云奮揚廡仕，蹈厲高資，驟膺遷陟之榮，上結顛昂之眷，四海望經綸之業，百僚仰方重之儀。今故燒香，自歸依師尊大聖衆至真之德。得道之後，昇入無形，和與道合真。

### 重稱法位。

具位臣某與合壇衆官等，謹重誠上啓，太上無極大道，元始天尊，太上大道君，太上老君，太上昊天玉皇上帝，九皇上尊，十方無極，太上靈寶天尊，

已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞廓仙霧於層階，獲降時乘之駕；啓靈場於淨館，有疏肅設之嚴。盡小己之寅恭，荷威神之臨鑒。重念醮官某涉道甚淺，稟生多艱，浪煩造化之功，無補聖明之旦。間關世路，險阻備嘗，汗蔑塵容，姓名弗著。常懼或爲學始勤而終怠，或履世多過而寡功，或命曆之不遐，或福基之不厚。七月十五太上說經之辰，三月初三真君降生之日，有虧醮祭，實負兢惶。甲子庚申，禱祈疏禮；七元四聖，崇奉愆期。處猷穢以爲常，啖葷辛而罔擇，臨喪弔而近死烝，隨習俗而觀邪風。或認倘來之榮，縱恣而殃連上祖；或恃一門之富，驕淫而罪紀陰官。非法貪財，違道干進。皆自今而悛革，庶復祐於神明。伏願俯鑒沖誠，廣敷道蔭，使齋官某門庭榮盛，福祿增延，子孫蕃衍而克昌，夫婦諧和而偕老，倉箱歲益，金帛日增，永消不測之灾，長保無疆之壽。弟子臣某

重念邪正不兩立，善惡不並行，因淑世之教衰，致宵行之鬼盛，崇道者少，信邪者多，緣細民之貪心，欲小家之暴富，諂事耗鬼，剽奪里居，飽腥血於餓腸，示變恠於暮夜。或自空而擲瓦石，或乘後而盜資財。或戲謔陰人，往往而鬼胎乖露；或剋害小口，時時而變證驚癩。或吹口作聲而呼人姓名，或扣戶搥門而擾人居止，或般糞穢而狼籍，或隨盤合而留連，或託夢寐以相傳，或引先亡而作祟，或示財而見悅，或放火而相驚。凡茲至賤之祆邪，頗覺盛行於人世。無幽不察，願馳流火之鈴；有罪必誅，無惜巨天之戮。行太上之命，振真君之威，敢有土地之停留，先遣陰兵而誅斬。絕百邪之橫害，濟羣品以康寧。魔精滅而火死灰飛，灾難祛而雲消霧散。羣心仰祝，大庇是依，上明天尊大慈之澤，下副臣等皈向之誠，謹啓以聞。

### 十二願。

### 復爐。

謹攝香官使者、左右龍虎君、侍香

諸靈官，當令臣向來清旦行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十五

### 道門科範大全集卷之六十六

三洞經錄弟子仲勵修

#### 真武靈應大醮儀

#### 臨午行道

法事陞壇如式。

各禮師存念如法。

宣衛靈呪。

北方玄天，杳杳神君。億千變化，玄武靈真。騰天倒地，驅雷奔雲。隊仗千萬，掃蕩妖氛。雷公侍從，玉女將軍。鬼神咸伏，龍虎潛奔。咸震五嶽，萬靈咸遵。鳴鍾擊鼓，遊行乾坤。搜捕逆鬼，破碎魔魂。除邪輔正，道炁常臻，和與道合真。

鳴法鼓二十四通。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠

帶垂纓，關啓玄壇土地，方域神真。臣今臨午行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆官等，謹同誠上啓，太上無極大道，元始天尊，太上大道君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞資生資始，物咸稟於二儀；有義有知，人最靈於萬物。九天合德，三洞化形，神炁之三萬六千俱來扶衛，骨節之三百六十無不混通。但以邪僻侈而迷真，惡根深而蔽善，於陰陽之數盡，當小大之劫終。魔鬼流行，遏絕生人之壽筭；諂求餘福，類皆倒見之愚蒙。曾不省其本原日信，從其邪道，有昏迷沉亂之感，無忠孝仁義之名。本非死

期，橫被六天之傷殺；遽絕人命，致令衆怨之升聞。老少未盡其天年，魂魄無依於人世。遂使穢雜之炁，有盤結之多；真一之形，無保全之所。度彼下元之苦厄，憑茲真武之神君。剪伐魔精，拔濟魂爽，仗慈尊之力，部萬垓之兵，斬妖滅邪而六合清明，掃穢除氛而三光瑩淨，正法愈盛，邪炁消除，還天下之和平，解庶民之疑慮，萬國有安寧之慶，九幽停考對之聲，神功所施，萬劫咸賴。設醮弟子某夙叨真蔭，久處塵寰，每思作善之祥，專執事真之禮。草茅凡質，惟存葵向之誠；螻蟻偷生，素竊河流之潤。獲淹歲月，莫報恩光，爰因誕聖涓吉之辰，特設迎祥之醮，輒憑道侶，仰謝北靈，祇嚴上象之尊，敢怠方函之奏。忱詞可格，謄聞雖舉於舊章；神理難窮，昭禱率摠於精意。願回飈景，俯察丹衷，弟子青詞，謹當敷奏。

宣詞。

按如詞言，誠深皈奉。緬想五雲之座，載飛百和之煙。天帝羣真，如會

上元之殿；朔都主宰，前趨八景之宮。蕭臺森竦於太空，仙奏虛徐於碧落，衆真侍座，羣魔束形，敢不竭勵精誠，祇承盼饗，庶荷穹祇之貺，以覃家國之休。以今臨午行道，請法衆等運茲初捻上香，願此香煙，騰空徑上太清宮中，供養真武靈應真君所化之身，金闕老君，三清上聖，玉皇上帝。臣等皈身、皈神、皈命，以是捻香功德，上祝今上皇帝，福澄八海，壽等二儀。同日月之祥華，照臨莫極；廣乾坤之至德，覆燾無垠。百揆有倫，三邊罷警，千戈偃戢，襁負咸歸。隼楛狼鉤，梯山自至。冰蠶神獸，航海來庭。蠢動含生，悉登仁壽。今故燒香，自歸依道尊大聖衆至真之德。得道之後，昇入無形，和與道合真。

以今臨午行道，請法衆等運茲二捻上香，願此香煙，騰空徑上北極太常府，供養真武靈應真君所屬武曲星君，同北極衆聖。臣等皈身、皈神、皈命，以是捻香功德，歸流奉道某家，九世神儀，億先神識，超離長夜，升睹光明。

瑩神丹霍之庭，擢景洞陽之府。天衣耀彩，仙簡列名，流貺子孫，參真霄漢。今故燒香，自歸依經尊大聖衆至真之德。得道之後，昇入無形，和與道合真。

以今臨午行道，請法衆等運茲三捻上香，願此香煙，騰空徑上神座，供養真武靈應真君。臣等皈身、皈神、皈命，以是捻香功德，歸流奉道某家，六姻九族，眷屬絲羅，俱治勝緣，常蒙道佑，潛祛罪孽，密解災纏，債訟消平，冤仇和釋。凶人惡鬼，無謀害之機；暗曜黑符，免照臨之厄。神真佑護，動止亨通。今故燒香，自歸依師尊大聖衆至真之德。得道之後，昇入無形，和與道合真。

重稱法位。

具位臣某與合壇衆官等，謹同誠上啓，太上無極大道，元始天尊，太上帝君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞

靈應誕敷，請問爰從於妙行；妖氛鼓孽，斷除昔賴於威神。念末世之多難，致羣魔之再盛。敢興沴氣，以擾良民；欲冀肅清，用伸抑鬱。醮官某竊以城邑郊墟之下，妖孽所憑；山川林壑之間，精靈所舍。或依棲叢薄，或放蕩汀洲。雨嘯風嗥，鼓冤聲於四野；雲屯月晦，出燐火於中宵。儻遇茲姦，必傷正命。或自經溝壑，或受刃鋒鋌。或入火蹈河，時作癡癩之狀；或含酸茹苦，常懷驚怖之憂。醮官某等切恐舉世生靈，或被茲苦，伏冀真君，不違誓願，大展威靈，驅此妖邪，歸乎空寂，天清地靜，永絕憑陵，同與生靈，不勝大願。醮官某等竊以姦雄鬼域，躡宮殿以遊空；兇狡邪精，肆妖迷而誑物。或依棲樓閣，或居止山林。夜昏則燈火熒煌，野曠則笙歌雜還，布宣邪氣，竊取珍藏。禍虐生民，以覬牲醪之祭；矜持詐力，能收少壯之魂。儻遇茲姦，必傷正命。或久貧而亟富，或已得而復亡。轉徙無常，利貪人之禱祀；侵凌不已，致形體之沉淪。醮官

某等切恐舉世生靈，或被茲苦，伏冀真君，不違誓願，大展威靈，驅此妖邪，歸乎空寂，天清地靜，永絕憑陵，同與生靈，不勝大願。醮官某等竊以江湖河海，有潛蛟伏鱷老龜巨鼈之精；林麓山川，有封豕長蛇毒蟲猛獸之屬。乘其波險，遽起吞舟。伺彼足音，便懷肆毒。變生倉卒，死在須臾。儻遇茲姦，必傷正命。或罨繚山椒之下，或沉埋魚腹之中，或吸嘸邪氛、雷鳴鼓脹，或觸投猛噬、血濺形枯。醮官某等伏恐舉世生靈，或被茲苦，伏冀真君，不違誓願，大展威靈，驅此妖邪，歸乎空寂，天清地靜，永絕憑陵，同與生靈，不勝大願。醮官某等竊以蜀中云：坤輿鬼井之地，東南云：荆蠻閩粵之地，蟲毒興妖，山林田野之家，邪巫作怪。飛符噴水，割口焚身，呪詛指空，果聞枉天，精神在己，俄被拘囚。羹釜欲嘗，已中血蟲之害；鐵鞭微舉，遽驚僵仆之虞。儻遇茲姦，必傷正命。或嘯呼終日，或昏醉經年。或狂亂無端，認空花而作伴；或暗鳴不語，得暴疾以云殂。醮官某

等伏恐舉世生靈，或被茲苦，伏冀真君，不違誓願，大展威靈，驅此妖邪，歸乎空寂，天清地靜，永絕憑陵，同與生靈，不勝大願。醮官某等竊以塚墓丘陵之腐骨，化作屍蟲；嶄巖溟渤之腥嵐，起為煙瘴。或流傳飛疰，或漸漬熏陶。緣息未分，已有復連之兆；精神或憊，遂成中滿之痾。儻遇茲姦，必傷正命。或形臞骨立，或腹伏氣奔。或華蓋委垂，血不藏於靈府；或瓊池耗竭，水遂溢於丹田。醮官某伏恐舉世生靈，或被茲苦，伏冀真君，不違誓願，大展威靈，驅此妖邪，歸于空寂，天清地靜，永絕憑陵，同與生靈，不勝大願。醮官某等竊以無邊塵劫，流轉世間，已死冤魂，仇讎身後。或負違財貨，或殘害形軀，禍結冤纏，痛深報重。得便者必居人類，陽作交親；伺隙者必處幽途，陰為鬼祟。乘時造孽，待間中傷。儻遇茲姦，必傷正命。或纏綿疾病，或鬪合萬兵。或呻吟枕蓆之間，求生無路；或僵踣街衢之上，欲訴何門。醮官某等伏恐舉世生靈，或被茲苦，伏冀



真君，不違誓願，大展威靈，驅此妖邪，歸于空寂，天清地靜，永絕憑陵，一切有情，咸臻至道。上明天尊大慈之澤，下副臣等歸命之誠，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來臨午行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十六

### 道門科範大全集卷之六十七

三洞經籙弟子仲勵修

真武靈應大醮儀

晚朝行道

法事陞壇如式。

各禮師存神如法。

宣衛靈呪。

太陰化生，水位之精。虛危上應，

龜蛇合形。周行六合，威攝萬靈。無

幽不察，無願不成。劫終劫始，剪伐魔

精。救護羣品，家國安寧。敢有小鬼，

欲來見形。吾目一視，五嶽摧傾，和與

道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今靜夜行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，今臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆官等，謹同誠上啓，太上無極大道，元始天尊，太上帝君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞太極纔分，二炁列尊卑之象，元精既判，五行推變化之方。雖消長之無窮，實本源之有自。居坎則歸根復命，在艮則資始成終。是故陽生必自於陰方，而帝出始臨乎震位。資天一至精之奧，爲品庶泰陽之宗。故我真君，尊居北闕，發天地生成之德，運陰陽鼓舞之神，豈無自然而然哉，亦有因而致也。醮官某等恭披藥簡，歷究仙蹤，年紀開皇，國稱淨樂。陽精效瑞，覺孕秀之非

常；素魄載圓，表誕彌之過歷。降靈紫殿，毓德青宮。豁達不羈，肆神靈於天縱；清真自樂，視富貴以雲浮。行滿武當，身飛璇極，遵玉皇之妙教，鎮朔易之遐方。子丑交逢，首諸宮而獨冠；虛危夾輔，環列宿之增光。夫何十地化衰，六天魔盛，兇威漸肆，殺氣寢淫，既天闕於生靈，復蔽欺於天鑒，冤聲洞達，慈旨哀矜，妙行啓陳，侍童促召。風行雷動，既宣勇猛之威；電掃雲消，盡勦妖邪之類。至令品彙，咸荷扶持。醮官某等夙沐恩波，叨聞聖範，逮事香火，爰涉歲時，式逢星馭之按臨，敢薦芹誠之精潔，上以答芘休之德，下以伸悔謝之誠，仰埃涵容，俯慙塵黷，諒此高明之睠，必垂下視之恩，瞻望雲霓，不違咫尺，懇祈激切，敢不上聞。

宣詞。

按如詞款，備見乃誠。仰惟聖德巍巍，壓紫微之近侍；神功俊敏，宣玉帝之洪威。雖錫命於朔方，寔監觀於九有。儲精水德，鎮位星津。飄颻無

方，應人心而如響；聰明不爽，誅鬼類以無遺。茲誓願之所成，實宏區之仰賴。今醮官某心傾葵藿，禮寓蘋蘩，香噴瑞氣以氤氳，燈炷列星而晃耀，鳳蠟吐三春之秀，雪芽生雨腋之風。騰踏雲霄，既上資於風馬；光芒府庫，復薄薦於金錢。誦祕誥於清霄，延真游於菲席。以今靜夜行道，請法衆等運茲初捻上香，願此香煙騰空，供養三清上聖，昊天至尊，北極真武靈應真君。臣等皈身、皈神、皈命，以是運香功德，上祝今上皇帝。伏願二儀並固，三景齊明，仁格堯湯，化超羲皞。后妃嬪主，太子諸王，德贊紫宸，功扶皇極。文武卿佐，中外職寮，敷渥澤以無私，致雍熙而成化。干戈永戢，水旱不興，疫毒消沈，妖氛屏息。今故燒香，自皈依道尊大聖衆至真之德。得道之後，昇入無形，和與道合真。

以今靜夜行道，請法衆等運茲二捻上香，願此香煙，騰空徑上，供養北極真武靈應真君所屬武曲星君，北極一切聖衆。臣等皈身、皈神、皈命，以是

運香功德，歸流奉道某家，九世七玄，億曾萬祖，擢魂玄夜，鍊魄朱宮，浴流火以登真，列瑤編而證品，垂祥介福，利祐見存。今故燒香，自皈依經尊大聖衆至真之德。得道之後，昇入無形，和與道合真。

以今靜夜行道，請法衆等運茲三捻上香，願此香煙騰空，供養北極真武靈應真君，三界應感，一切威靈。臣等皈身、皈神、皈命，以是運香功德，歸流奉道某等，福善資薰，神明贊佑。五行三命，永無刑剋之凶；宿債前冤，盡契和平之樂。壽涯增廣，罪目清平。今故燒香，自皈依師尊大聖衆至真之德。得道之後，昇入無形，和與道合真。重稱法位。

具位臣某與合壇衆官等，謹同誠上啓，太上無極大道，元始天尊，太上道君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞驕

奢淫泆者，邪之所親；正直靖恭者，神之所好。雖至真之莫測，而此理之必然。恭惟聖道雖洪，正人是與。儻欲依棲於蔭佑，宜先洗滌於積愆。仰冀

大慈，俯昭丹悃。伏念醮官某等塵寰膠擾，世網縈纏，六賊外攻，三尸內誑。

庚申甲子，功果闕違，四序三元，薰修脫略。五辛雜糅，遂昏染於五情；三

獸熏蒸，乃醞成於三毒。美衣豐食，不念從來；謗語惡聲，罔知所戒。或規

圖財賄，歛怨世俗之小人；或殺害生靈，重傷天地之大德。見取直情之見，

心無悔過之心。細行不矜，正神遠離。百邪得計，萬死何堪。幸停天仗之雲

輶，敢瀝愚衷之血懇。仰祈肆赦，許與自新。伏願醮官某等，內湛靈臺，外齊

止水，三宮皎潔，六氣和平，常安不二之神，默守天元之妙。丹田固密，鍊成

養浩之功；瓊液降昇，超得谷神之要。呼吸灌三光之真炁，綿延齊九轉之遐

年，青篇標功行之書，黑簿落愆尤之字，常依正法，密借慈光，出入行藏，明

神協契，溫清寒燠，疫癘殄除，魑魅魍

魎之莫逢，富壽康寧之必致。上願天清地靜，國泰民安，同歸清靜之風，共樂昇平之化。上明天尊大慈之澤，下副臣等皈向之誠，謹啓以聞。

十二願。

復爐。

謹攝香官使者、左右龍虎君、侍香

諸靈官，當令臣向來靜夜行道之所，自

然生金液丹碧，芝英百靈，衆真交會，

在此香火爐前。當願十方仙童玉女，

接待蘭煙，傳臣向來所啓之誠，速達徑

御至真無極大道、昊天玉皇上帝御前。

出堂頌。

出戶。

道門科範大全集卷之六十七

### 道門科範大全集卷之六十八

廣成先生杜光庭刪定

真武靈應大醮儀

設醮行道

法事陞壇如式。

各禮師存念如法。

宣衛靈呪。

五星列照，煥明五方。水星却災，

木德致昌。熒惑削禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今靜夜行道，謹奏爲入意，其諸忱悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆等，謹同誠上啓，太上無極大道，元始天尊，太上大道君，太上老君，太上昊天玉皇上帝，九皇上尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞龍漢紀號之初，元始演法之日，敷五雲之妙座，會十方之衆真。上元仙宮，天樂自響，俄於良位，大震七聲，奄闢天門，下觀世界。黑毒血光之炁，自下而衝；太陽道境之中，俯目皆見。爰有妙行，發問異因，欲請威光，下除魔鬼，感天尊之慈訓，述真武之靈蹤。淨樂國王，善勝皇后，吞日光於夢寐，誕聖子於宮闈，稟自然之神靈，負過人之勇猛，輔行正教，難遏勤誠，誓斷天下之

妖魔，普救世間之羣品。武當修道，功

初獻，散花。

成於四十二年；白日登天，德正於北方水位。乃輟金童之侍，俾持招真之符。遙往朔都，召其神將。仙儀萃止，欵駕來斯。奉眷命於真皇，期肅清於下境。披髮而烏雲拂踵，跣足而白玉瑩空。躡八卦之神龜，騰蛇亦附；仗七星之寶劍，神水相隨。雷電揚威，風雲捧步。六丁玉女，六甲直符，毒龍猛獸之紛紜，巨虬獅子之圍繞，統吏兵之三十餘萬，判人鬼於七日之中，彌天之妖炁蕩除，作孽之冤魂解散，生人安泰，國土清平，復朝見於天尊，永臨鎮於北極。今醮官某閱殊勳於寶帙，難盡揄揚；奉真馭於靈辰，欲資祐助。爰擇儲祥之地，用伸延聖之儀。陳醪醴以惟馨，薦粢盛而有潔。列以九微之燭，散以百和之香。悉罄精衷，上祈冲鑒。庶被無疆之福祉，永依有赫之威靈。臣與醮官合壇衆等，無任佇望仰請之至，誠惶誠恐，稽首再拜，奉迎真馭。

具位臣某，謹虔誠上啓，虛無自然

金闕至尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞英靈混合，結萬炁以齊仙；澆偽茲生，有羣陰之變異。大則日月薄蝕，小則魑魅猖狂。自動化失，謬於中和；使品彙遂，乖於至理。洪惟大道，寔念黔黎。命靈天正肅之神，掃下土妄行之炁，一揮皂纛，咸殄渠魁。奉道醮官某等，久奉真光，每叨靈蔭，幸仙仗降臨於是日，望霄衢祗迓於皇威，少輸螻蟻之誠，以接龍鸞之馭。幸蒙降鑒，益謹欽承，據情悃之再三，對靈光於咫尺。臣既承詞悃，敢不上聞。

宣詞。

按如詞言，誠深皈奉。矧茲下土，寔仰餘威。驗若形聲，應同影響。言念某螻蛄末品，草芥微生，惟勤香火之修，莫究希夷之妙，動違科禁，恐獲譴尤，撫己兢惶，捫心怵惕，敬涓穀旦，肅

降真，獻茶。

建靈場。仰聖度之含容，祈天休之普洽。滌瑕蕩垢，即蒙一洗之恩；度厄延生，均荷維新之澤。臣等無任激切祈請之至，再拜，謹陳亞獻。

散花。

臣謹重誠上啓，虛無自然金闕至尊，十方無極，太上靈寶天尊，已得道大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞捧金闕之明威，化身示世；爲玉京之元輔，助正却邪。斷滅不祥，巡行有截。某久欽聖德，恭啓醮筵，少伸崇報之私，願被照臨之賜。深慮塵機荏苒，積不赦之深愆；業火焚燒，造無邊之巨釁。非投上聖，曷保微生。伏願與道圓融，荷天眷佑。雲行雨施，盡原已往之非；地闢天開，廣示自新之路。庶蒙陰相，得遂進修。臣等無任激切懇請之至，再拜，謹陳終獻。

散花，宣疏。

臣謹重誠上啓，虛無自然金闕至尊，十方無極，太上靈寶天尊，已得道

大聖，衆至真，諸君丈人，三十六部尊經玄中大法師，北極佑聖真武靈應真君，三界應感，一切真靈。臣聞上帝九門，惟精誠而可格；洪範五福，繫明德之能徵。輒以薰場，仰延霞旆，仙科粗息，凡悃畢陳。上簡帝心，徹大羅之渺渺；仰陳天聽，凌正色之蒼蒼。願遷無妄之灾，變作大來之福。酌醴已伸於潦薦，丹心惟效於葵傾。仰望洪慈，俯歆素志。今則丹輿綠輦，排天路以回軒；羽蓋瓊輪，望雲衢而返駕。臣等仰瞻鸞馭，已在雲霄，徒切傾心，奉送聖駕。臣等下情，無任激切攀戀之至，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十八

### 道門科範大全集卷之六十九

#### 道士修真謝罪儀

#### 啓壇行道

法事陞壇如式。

各禮師存念如法。

宣衛靈呪。

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束妖，討捕兇羣。奉承正道，赤書玉文。九天符命，攝龍驛傳。普天安鎮，我得飛仙，與道合真。

三炁丹天，煥景流光。熒星轉燭，洞照太陽。上有赤精，合契虛皇。開明靈童，號曰華房。總統火兵，備守玉堂。斬邪束妖，剪截魔王。北帝所承，風火莫當。流鈴交換，翊衛壇場。正道流行，敢有巴狂。我享上功，坐運魁罡。億劫長存，保天無疆。與道合真。七炁素天，太白流精。光耀金門，

洞照太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普惠萬生。元皇正炁，來合我身。功加一切，天地咸寧，與道合真。

五炁玄天，元始徘徊。辰星煥燭，光耀太微。黑靈尊神，號曰層威。統冠飛天，仙裙羽衣。備衛五門，檢精捕非。敢有干試，豁落斬摧。玉符所告，神鎮八威。邪門閉塞，正道明開。映照我身，三光同輝。策空駕浮，舉形仙飛，與道合真。

一炁黃天，調理乾坤。陶鎔陰陽，總統玄真。鎮星吐輝，流煥九天。開明童子，號曰天璘。元炁陽精，焰上朱煙。洞照天下，及臣等身。百邪摧落，殺鬼萬千。中山神呪，普天使然。五靈安鎮，身飛上仙，與道合真。

鳴法鼓二十四通。  
無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金

童，傳言散花玉女，五帝真符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣今靜夜行道，謹奏爲入意，其諸情悃，已錄奏聞，願得十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與闔壇衆官等，今故燒香，以是功德，歸流天子王侯，百辟僚屬，經籍度師，山林巖棲，修真之士，同學之人，九親姻族，天下人民，飛行動植，一切衆生。今故燒香，歸身、歸神、歸命太上靈寶自然至真無極大道。乞賜原赦臣法衆等，及修齋道士某，洎師資法屬，前世今生，往愆重過，得免離三惡輪迴之道，十苦八難九厄之中，身得道真，飛行虛空，白日昇天，侍衛道君，逍遙無上金闕七寶自然宮闕，永與道合，所啓通感上御至真無極道前。

懺悔，宣真文。

具位臣某與合壇衆官等，同誠上啓三清上聖，十極高真，十方靈寶天尊，

消愆滅罪天尊，大慈延壽天尊，長生保命天尊，九霄自然生神上帝，度人太皇，三十二天上帝，諸天天尊，諸天上帝，上清日月星斗河漢群真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎

天醫諸司官將，太上諸階經籙中仙官將吏，地府酆都大帝，幽陰聖衆，水府扶桑丹林大帝，閔苑真仙，人元五嶽五天聖帝，酆都地祇，合干元帥、太歲土火、溫司聖衆、州縣城隍之神，當境廟貌神祇，觀庭土地真官，法壇所隸諸司官將，三界提魂攝魄使者，四界直符功曹使者，醮筵主宰，一切威靈。恭望洪慈，洞垂照鑒。臣聞元始祖劫，強名之所難稱；虛無自然，飛玄之所開化。生天生地，成象成形。一氣之極流通，萬物之得咸備。人獨稱於最貴，必有根元；道本出於厥中，當知祖始。臣等自開闢以後，纏生死之緣。知輪迴之苦，而未出苦輪；知性命之真，而未全真性。徒以參經佩戒，演教宣科，求太上希夷之根，究有物混成之始，使知道

知身者，早還純而返素；而煉神煉氣者，速出有而入無。昔嘗告盟以參傳，約當溥度；今遇皈投而禮謝，事在可伸。弟子詞誠，謹當宣奏。

宣詞。

諦詳詞語，灼見至誠。激切之念已傾，方寸之誠不息。恭遵禁戒，備按典彝，建壇壝以肅嚴，望穹窿而懇請。惟堅一縷之念，上通十極之真。自知昧元烝於多生，散沖和於萬有，逐世緣而不修上道，縈愛習而莫返玄根，未能自誠，何以普度。盡從前而一洗，當自此以重修。臣等謹爲沐浴五體，澄鍊六情，法地象天，齋香奉信，以今日今時啓壇，依儀行事。至某日某時，延降上真，謝過懺愆，祈恩請命，輒依科法，宿以啓聞。恩惟太上三清，十方上聖，垂慈監映，省覽所陳，勅勒靈寶官屬、土地真官，一合同心，併力衛護，掃蕩內外，清靜壇場，降伏妖魔，滅滅邪祟，使臣等心安神定，思念立感，啓奏御達，善功成就，無有窒滯，所願隨心。臣等雖佩正真，參修大法，處身五濁，染跡六

塵，三關未調，六情放誕，仰賴禁戒，以檢身心。然後格降上真，導迎景貺，明晨行道，續更以聞，謹啓。

十二願。

復鑪。

謹攝香官使者、左右龍虎君、侍香諸靈官，當令臣向來肅啓行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待香煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之六十九

### 道門科範大全集卷之七十

#### 道士修真謝罪儀

#### 清旦行道

法事陞壇如式。

各禮師存念如法。

宣衛靈呪。

青陽虛映，耀日回靈。神虎辟邪，

飛天流鈴。摧奸滅試，萬魔束形。九

微回道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，和與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今清旦行道，謹奉爲入意，其諸情愴，已

錄奏聞，願得太上十方至真道炁，靈寶  
瑞光下降，流入臣身中，令臣所啓，速達  
徑御太上無極大道、昊天玉皇上帝御  
前。

請稱法位。

具位臣某與合壇衆官等，謹同誠上

啓，三清上聖，十極高真，十方太上靈

寶天尊，消愆滅罪天尊，大慈延壽天

尊，長生保命天尊，九霄自然生神上

帝，度人太皇，三十二天上帝，諸天天

尊，諸天上帝，上清日月星斗河漢羣

真，三官四聖，五師三省真君，九天天

曹，諸位真君，歷代傳宗啓教諸大師

真，雷霆神虎天醫諸司官將，太上諸階

經錄中仙官將吏，天下名山得道神仙，

地府酆都大帝，幽陰聖衆，水府扶桑丹

林大帝，閻苑真仙，人元五嶽五天聖

帝，酆都地祇，諸司元帥、太歲土火、溫

司聖衆、州縣城隍主者，當境廟社神

祇，福庭土地真官，法壇諸司官將，三

界提魂攝魄神兵，四界直符功曹使者，

醮筵主宰，一切真仙。恭望洪慈，洞回

淵鑒。臣等夤緣夙命，獲履法門，遵太

極之元科，佩上清之祕錄，廣宣奧旨，  
以效涓誠。今則玉宇澄清，寶壇嚴肅，  
奉霄綱而致款，跂真馭以垂臨，享此潔  
脩，應其昭告，既承詞旨，敢不上聞。

宣詞。

按如詞陳，情誠丹切。正一道士臣

某等叨承福會，願被真風，幸依清淨之

門，冀悟希夷之旨。而念塵勞障蔽，懊

惱攀緣，馳心徒繫於三清，委跡難逃於

陸海，功微毫髮，釁積丘山，五行爲命

運之裁，星曜構照臨之厄，非憑懺謝，

莫遂消禳。是以跪信質心，延真設禮，

命正一之淨衆，啓靈寶之清壇，夙奉薰

修，克期通感。以今清旦行道，請法衆

等運茲初捻上香，願此香烟，騰空徑

上，供養至真無上道寶。臣等皈身、皈

神、皈命，以是功德，上祝今上皇帝。

伏願寶圖鞏固，椿壽遐長。聖政日新，

建皇極立大中之道；帝德天輔，巨萬

世隆不拔之基。兆庶宅心，八方同軌。

文階武秩，叶贊熙朝。玉葉金枝，昭宣

景運。恩均遐邇，澤被幽明。蒙道化

以召和，沐玄風而交泰。今故燒香，自



皈依道尊大聖衆至真之德。得道之後，昇入無形，和與道合真。

以今清旦行道，請法衆等運茲二捻上香，願此香烟，騰空徑上，供養至真無上經寶。臣等皈身、皈神、皈命，以是功德，歸流正一道士臣某等，三師九祖，近化先亡，道俗親緣，尊卑眷屬。伏願削落地簡，灌鍊形魂，債訟息緣，冤仇罷對，入明霞之境，沐流火之庭，永出重冥，克登淨域。真師玄友，靈藥神丹，願拯昏迷，迴賜通感。今故燒香，自皈依經尊大聖衆至真之德。得道之後，昇入無形，和與道合真。

以今清旦行道，請法衆等運茲三捻上香，願此香烟，騰空徑上，供養至真無上師寶。臣等皈身、皈神、皈命，以是功德，皈流正一道士臣某等，師資長幼，法屬親蘿，既未脫於俗鄙，願廣恢於道廕。福庭崇觀，獲安處以無虞；琳扎青書，庶深潛而有得。永捐塵累，克闡真風，一子登仙，九曾受賜。今故燒香，自皈依師尊大聖衆至真之德。得道之後，昇入無形，和與道合真。

懺方，命魔，步虛，三禮。

重稱法位。

具位臣某與合壇衆官等，謹重誠上啓，虛無自然元始天尊，太上大道君，太上老君，昊天玉皇上帝，勾陳天上帝，北極紫微大帝，承天效法后土皇地祇，道經師三寶天尊，上窮圓蓋之高真，下極方輿之主宰，有靈有聖，今古師宗，醮筵合座真仙。恭望洪慈，普同昭鑒。臣聞清靜之教，大闡於西周；正一之風，宣行於東漢。自虛皇之造物，至道爲先；暨盤古之開天，神化爲主。東羅飛景，西列靈丘，南挹丹陵，北峙元闕。乃有上聖執符之帝，高真御極之尊，坐鎮九清，總攝三界，斡旋二氣，朝會萬神，廣扇慈風，聿臨下土。今遇天元之寶運，特敷龍漢之化源，溥濟人倫，俾登壽域。正一道士臣某，生逢昭代，長遇休期，得○玄門，獲披妙訓，師資開度，佩奉靈文，緣累○馳，沉迷邪境。三會五臈，有虧朝奏之功；八節三元，多昧進修之禮。六陽十直，崇奉愆期；甲子庚申，禱祈疏禮。齋分九

等，豈洞曉於真詮；功立三千，罔有依於聖訓。科禁至重，奉措多違，戒律威嚴，修持有闕。心非意亂，犯百八十條；識淺智愚，冒三百大戒。六情十惡，過積丘山；九結十纏，愆深巨海。釁盈黑簿，罪結冥司，致使殃咎日深，灾危旋至。所以叩玄關而有請，望丹闕以知歸，揆日投誠，披心效信，式敷壇席，備舉明科，稽首諸天，告盟三界，馨薦芬芳於百和，華燈洞煥於九光，五靈燦丹篆之符，八會演玄都之奧。監觀法事，三師垂保舉之恩；賞錄齋功，四司定祿命之簡。赦除罪咎，解釋灾躔。道果圓成，深造無爲之理；真源朗徹，獨觀衆妙之門。出生死根，離煩惱苦。三師九祖，乘善貺以逍遙；五族六親，沐神休而康泰。上願三光明曜，五緯循躔，氣序均調，生靈共慶。干戈偃息，三邊無烽燧之虞；稼穡豐登，九域富農桑之業。下逮三塗幽境，六趣同倫，涵泳神波，沐浴靈澤，普躋壽域，咸樂真風。道化所資，物情俱泰，上明天尊大慈之澤，下副臣等皈向

之誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來清旦行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待香烟，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之七十

### 道門科範大全集卷之七十一

#### 道士修真謝罪儀

#### 臨午行道

法事陞壇如式。

各禮師存念如法。

宣衛靈呪。

丹靈朱火，炎霞激風。赤輪剛運，

天光八衝。迸威包羅，交變萬方。流

金豁落，羣魔滅蹤。辟奸破妖，明耀元

功。金符召制，躡雲策龍。謠歌慶會，

散花太空。神化宜運，四極安隆。伏

御帝前，罔有不恭，與道合真。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝真符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今臨午行道，謹奉爲入意，其諸情愆，已

錄奏聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆官等，謹同誠上啓，三清上聖，十極高真，十方太上靈寶天尊，消愆滅罪天尊，大慈延壽天尊，長生保命天尊，九霄自然生神上帝，度人太皇，三十二天上帝，諸天尊，諸天上帝，上清日月星斗河漢羣真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎天醫諸司官將，太上諸階經籙中仙官將吏，天下名山得道神仙，地府酆都大帝，幽陰聖衆，水府扶桑丹林大帝，浪苑真仙，人元五嶽五天聖帝，酆都地祇，合干元帥、太歲土火、溫司聖衆、州縣城隍主者，當境廟社神祇，福庭土地真官，法壇諸司官將，四界直符功曹使者，醮筵主宰，一切真仙。恭望洪慈，洞垂昭鑒。臣等先緣積慶，獲奉皇恩，持真戒以修身，執靈符

而度命，愧無寸效，將迪元風。當激勵於精衷，用宣行於祕蹟。惟天在上，俯憐有禱之誠；況日之中，共仰無私之照。登齋既肅，薦歎惟勤，行道詞誠，謹當宣奏。

宣詞。

諦詳詞語，備述丹衷。仰冀感通，俯從至願。正一道士某，言念幸稟沖和之氣，獲歸恬淡之宗。雖身染俗塵，而心銘玄造，常虞懈怠，罔答生成。用諏涓吉之辰，特設祈禳之醮，虔伸丹悃，上瀆清虛，謝已往之愆尤，希將來之福祐。臣等遵依科簡，啓建壇場，披靈寶科文，按真仙品格，恭修齋直，匪懈晨昏。告上靈，關五億之天；達下懇，徧三千之境。冀回鑿祐，普降恩光，克洽靈心，恪酬至願。以今臨午行道，請法衆等運茲初捻上香，願此香煙，騰空徑上，供養太上三尊。臣等皈身、皈神、皈命，以是功德，上祝今上皇帝。伏願壽與天齊，福如川至，高出百王之上，長爲九有之尊，廟堂多稷契之忠，郡邑足龔黃之政，百蠻率服，多稼

豐登，物無扎傷，民安康靜，來航海梯山之貢，迎日書月至之祥，承靈寶之齋功，樂昇平之景運。今故燒香，自皈依道尊大聖衆至真之德。得道之後，昇入無爲，和與道合真。

以今臨午行道，請法衆等運茲二捻上香，願此香煙，騰空徑上，供養太上尊經。臣等皈身、皈神、皈命，以是功德，歸流正一道士某，多生上祖，奕世先靈，雖負其道骨仙風，莫諧輕舉空服乎。荷衣蕙帶，難脫沈淪，願乘靈寶之功，受以飛仙之錄。同列侍臣於上帝，并參法從於高穹。今故燒香，自皈依經尊大聖衆至真之德。得道之後，昇入無形，和與道合真。

以今午朝行道，請法衆等運茲三捻上香，願此香煙，騰空徑上，供養太上三師。臣等皈身、皈神、皈命，以是功德，歸流正一道士某，身輕體逸，如嬰兒之未孩；炁固神安，逢猛獸之不據。處春夏秋冬之序，無風寒暑濕之愆，六鑿不萌，百痾蕩散，法裔共膺於泰定，門庭永集於祥禧，有厄俱消，無往不

慶。今故燒香，自皈依師尊大聖衆至真之德。得道之後，昇入無形，和與道合真。

懺方，命魔，步虛，三禮。

重稱法位。

具位臣某與合壇衆官等，謹重誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微上帝，承天效法后土皇地祇，道經師三寶天尊，上穹圓蓋之高真，下極方輿之主宰，有靈有聖，今古師宗，醮筵一切真仙。恭望洪慈，洞回淵鑒。臣等伏聞蕭臺劫仞，高峙於紫清；貝闕珠宮，飛輦於碧落。蘊三天之妙炁，藏八會之靈文，生化羣倫，陶冶萬彙，既蒙亭育，敢憚欽修。臣等託跡凡籠，棲心仙教，授道之日，登壇以盟，約當上報國恩，奉行經法，凡有虔告，敢不以聞。正一道士某，跡離塵緣，生逢聖世，處黃冠之末學，即紺宇以深居，馘毒伐惡以積功，奉教宣科而濟世，仍纏俗網，每混常流。儉足靜安，不念赤松之戒；苟貪損志，莫遵翊

聖之文。於六陽十直，而憚持齋；於三會五臈，而忘懺罪。昧三關之調適，致六賊之相攘，營營齋醮之小緣，衮衮是非之苦海，貪多務得，乍喜還嗔。進止頻犯於壇規，宣演不知於禁忌，背違科戒，縱恣心神。三明六暗之中，但迷邪境；八節四時之內，罔有善功。百瀆自傾，氣亡液漏。三彭得計，禍結形枯。深憂先世以迷真，恐逐浮生之夭喪。求此懺穰之法，少伸首謝之誠。遵奉典彝，恪修齋直。玉華散景，龍煙凝車蓋之形；蓮焰騰輝，鳳燭燦芝蘭之氣。薦以蘋蘩之潔，藉以文彩之蠲，果實惟嘉，酒醴既旨，祈萬神之來享，格一德之精純，載揚微妙之音，上徹虛皇之聽。所冀三清上聖，十極高真，俯納微誠，特垂巨貺，命三官而掌錄，敕五帝以下觀，赦已往之罪瑕，錫將來之祿筭，密付長生之旨，潛敷駐世之方，飛天下觀，大勳保舉，雲凝靈府，名入真階。斷穀辟糧，食至和陰陽之氣；燒香接手，入太室璇璣之門。逍遙上清，超凌三界，得證無爲之果，永除墮

業之侵。上願國祚興昌，帝圖安鎮，海宇即臻於康靜，黎民共樂於昇平，歲贍倉箱，物無疵癘，恩波所及，幽顯俱霑，各遂攸宜，咸得其所。臣等功圓六度，道證三便，谷隱寒棲，克登真果，上明天尊大慈之澤，下副臣等皈命之誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來午朝行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之七十一

道門科範大全集卷之七十二

道士修真謝罪儀

晚朝行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。羣生咸遂，惠遍神州，與道合真。

鳴法鼓二十四通。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣今落景行道，謹奉爲入意，其諸情悃，

已錄奏聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆官等，謹同誠上啓，三清上聖，十極高真，十方太上靈寶天尊，消愆滅罪天尊，大慈延壽天尊，長生保命天尊，九霄自然生神上帝，度人太皇，三十二天上帝，諸天尊，諸天上帝，上清日月星斗河漢羣真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎天醫諸司官將，太上諸階經籙中仙官將吏，天下名山洞府得道神仙，地府酆都大帝，幽陰聖衆，水府扶桑丹林大帝，浪苑真仙，人元五嶽五天聖帝，酆都地祇，合干元帥、太歲土火、溫司聖衆、州縣城隍主者，當境廟社神祇福庭土地真官，法壇諸司官將，四界直符功曹使者，醮筵主宰，合座威靈。恭望洪慈，洞回昭鑒。臣與衆等仰承聖澤，得被真風，披三洞之真文，奉

九清之玉檢，晨興蠲潔，夕惕修持，蓋從受道之初，約以建功爲本。再肅威儀於清夜，恭陳凡悃於紫宸，瞻望真旂，導迎景貺，將祈監盼，用副齋精，行道詞誠，謹當宣奏。

宣詞。

諦詳詞語，灼見誠情。諒叶真慈，必關聖監。正一道士某叨逢景運，獲仰真宗。荷聖主之洪恩，出家入道；沐天尊之慈澤，潔志修行。佩受靈文，稟修玄教，未造沖玄之妙，有虧習鍊之功，罪日易彰，福田難構。用專誠而薦疑，庶引咎以自新，恭被壇場，精嚴醮席。法三洞焚修之格，披十華朝會之儀，演暢法音，敷揚大範，莫不諸天齊到，五帝列言，賞錄功勤，克期通感。以今落景行道，請法衆等運茲初捻上香，願此香烟，騰空徑上，供養九品高真，十方上聖。臣等皈身、皈神、皈命，以是功德，上祝今上皇帝。伏願堯天廣覆，舜日增明。保生延不拔之基，五山鞏固；司命益無疆之壽，歷劫綿長。國安民豐，欣樂乎太平之世；臣忠子

孝，敦睦乎大有之年。獬豸觸邪，屈軼指佞，慶雲呈瑞，景曜示祥。天威振犬羊之羣，五兵戰戢；土宇復關河之廣，九域同文。今故燒香，自皈依道尊大聖衆至真之德。得道之後，昇入無爲，和與道合真。

以今落景行道，請法衆等運茲二捻上香，願此香烟，騰空徑上，供養九品高真，十方上聖。臣等皈身、皈神、皈命，以是功德，歸流道士某家，九玄滯識，七祖神儀，咸承浩蕩之恩，並證逍遙之果。丹臺絳闕，景侍玉皇，霞殿雲房，親朝大帝。聽天鈞而自得，吟大洞以忘機，惠被無涯，福資來裔。三師四友，俱陟仙階；九夜三途，咸登道果。今故燒香，自皈依經尊大聖衆至真之德。得道之後，昇入無形，和與道合真。以今落景行道，請法衆等運茲三捻上香，願此香烟，騰空徑上，供養九品上仙，十方上聖。臣等皈身、皈神、皈命，以是功德，歸流道士某身中。伏願道性圓明，聖心開發。行運不逢於坎壈，相貌長新；流年永絕於凶衰，鬼神

廢祐。喜怒不留於胸臆，精神內固於丹田。養浩如春，住世生身之難老；虚心契道，超凡入聖以長存。今故燒香，自皈依師尊大聖衆至真之德。得道之後，昇入無形，和與道合真。

懺方，命魔，步虛，三禮。

重稱法位。

具位臣某與合壇衆官等，謹重誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微上帝，承天效法后土皇地祇，道經師三寶天尊，上窮圓蓋之高真，下極方輿之主宰，醮筵列聖，一切真靈。恭望洪慈，洞回昭鑒。臣等伏聞混淪蕩蕩，變通莫得而爲先；芒角明明，開闢於斯而是判。皇人筆傳於大梵，後聖總著於靈圖。大象聿成，洪源肇判。散精則開明三景，下鎮則敷落五篇。典誥旁流，淵微遠布，萬神敬聽，品物咸資。臣等生稟至愚，服膺上學，遵依玄教，對越上真。自稟命以修身，常飾躬而肄業。金文玉札，粗識於筌蹄；聖域仙階，莫窺乎影響。唯堅

誠信，冀獲感通，真格敷陳，尊靈必降。道士某託身道域，切庇霄真，未能謝絕於塵寰，徒自沉迷於世網。參經佩戒，雖加策勵之心；密行陰功，尚缺進修之力。機靈素昧，衆善弗臻，習氣未除，諸緣常染。細行分門於八百，未見指歸；威儀備列於三千，曾無精進。業根深固，道果難成。未登悟解之門，恐墮塵勞之障。今則首體投地，晨夕告天，稽按明科，嚴陳淨醮，經開玉笈，像禮金容，靈音振空洞之章，黎土集寶珠之衆。香傳七驛，達誠愀於虛皇；燈燦九微，破幽昏於夜壑。曲盡熏修之志，不違朝贊之勤。以格真靈，克諧昭應，萬神侍衛，三界監觀，奏簡玄都，列言丹陛。伏覬勅下三界，普告諸天，降福流恩，延生保命。智通玄悟，永息昏迷。厚祿遐齡，常居法廡。和平冤咎，消解灾凶。五行無刑剋之殃，三景息照臨之會。上解璇璣天文宿曜十二分次之厄，下解山川嶽瀆九宮八卦分野之灾，夙罪積愆，深殃重疊，前冤往債，故殺誤傷，三業六情，無邊過咎，自

今懺謝，咸乞蕩除。上願帝道永安，洪基益茂，三光朗照，四序均調，包舜海以涵濡，廣堯曦而照燭。五風十雨，常滋物產之豐；八穀九蚕，大足農民之望。氣無繆盪，歲免灾氛，普及羣生，旁資九有，咸承道果，俱契真乘，則上明天尊大慈之化，下副弟子謝罪之誠，謹啓以聞。

十二願。

復爐。

謹攝香官使者、左右龍虎君、侍香諸靈官，當令臣向來落景行道之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之七十二

道門科範大全集卷之七十三

道士修真謝罪儀

設醮行道

法事陞壇如式。

各禮師存念如法。

宣衛靈呪。

五星列照，煥明五方。水星卻災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁。

鳴法鼓二十四通。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今設醮延真，燒香行道，謹奉爲入意，其

諸情悃，已錄奉聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝御前。

請稱法位。

具位臣某與合壇衆官等，謹同誠上啓，三清上聖，十極高真，十方太上靈寶天尊，消愆滅罪天尊，大慈延壽天尊，長生保命天尊，九霄自然生神上帝，度人太皇，三十二天上帝，諸天尊，諸天上帝，上清日月星斗河漢羣真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎天醫諸司官將，太上諸階經籙中仙官將吏，天下名山洞府得道神仙，地府酆都大帝，幽陰聖衆，水府扶桑丹林大帝，閻苑真仙，人元五嶽五天聖帝，酆都地祇，諸司元帥、太歲土火、溫司聖衆、州縣城隍主者，當境廟社神祇，觀庭土地真官，法壇諸司官將，四界直符功曹使者，火池俵錢神吏，醮筵主宰，一切威靈。恭望洪慈，普回淵鑒。臣聞大道無象，握萬物於重

霄；真宰何私，育群生於率土。繩愆糾繆，昭如影響之隨；福善禍淫，密若枹鼓之應。視之不見，感而遂通。臣等奉按沖科，恪修妙典，五節香浮於翠輦，裊裊飛輕；九微煙散於含光，煌煌慧炬。花開瓊蕊，果薦金盤。萬象澄清，雅奏步虛之韻；九門高敞，遙迎策景之儀。伏願紫炁浮空，虛光遠燭。九色之節，駢羅八景之中；十絕之旛，搖曳九霄之上。雲車風馬，鶴馭鸞驂，辭大有之妙庭，降人間之真館，愍羣生之有請，錄片善之不遺，亨于克誠，開以自見。臣與合壇官衆，下情無任，虔切至恭，祇迎鶴馭。

降聖，初獻，散花。

再稱法位。

具位臣某與合壇官衆等，謹重誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微大帝，承天效法后土皇地祇，諸天天尊，諸天上帝，醮筵兩班，合屬高真。伏望洪慈，洞回照鑒。臣聞日月星辰，在碧漢瑤空之上；仙靈主宰，

居清虛林麓之間。或管攝於靈壇，或隱居於福地，或鎮一方之首，或爲五土之尊，錄善惡之二書，舉功過之兩簿，故無私諂，惟道是從。伏念臣等早筮真風，夙依道化，受法門之庥，寄琳館以安居，慚亡十善之因，何贊三清之惠。自從披戴，幾度光陰，未能感徹於神明，動有輕違於科戒。初勤未怠，有始無終，奉法心邪，慈仁不正，焚香失節，存念違言，慮三彭暗奏於愆辜，懼九府明書於罪目。今則輒傾丹悃，廣列香燈，請天界空界之羣真，延地府水府之衆聖，五嶽主宰，十洞靈官，願歆蘋藻之羞，錫以椿松之壽，先覬恩覃帝道，福及堯天，聖明與日月同輝，雨露共乾坤普潤，臣忠子孝，主聖父慈，干戈靜而四海來賓，法輪轉而九天垂化。五風十雨，高躋湯禹之年；海晏河清，式協羲軒之化。臣等叨承師訓，繆處職司，凡有皈投，理宜關奏，況奉詞旨，敢不上聞。

宣詞。

詞旨具宣，情誠懇切。披陳肝膽，

傾寫肺心，冀伸臣子之衷，庶謝謙躬之分。伏乞虛皇上聖，穹昊高真，咸賜威光，同垂盼響。然願道士某名書上善，命保長生，陰功累積於三千，靈藥克成於九地。紫文絳簡，鏤題久視之年；丹策青編，注上無窮之筭。仙曹紀籍，鬼錄除名。八景靈書，得煉炁修真之術；五文玉篆，獲飛騰沖舉之因。道行日隆，靈根頓悟。金木水火之厄，永不侵傷；青黃赤白之災，長希解免。其或五行否泰，三命屯遭，厄會相仍，衰危造次，今生過咎，前世餘殃，仰希含照之恩，咸賜赦原之惠。次乞先師煉度，宗派超升，離生死之苦門，證逍遙之道岸，同宗法屬，學道門人，俱霑浩浩之恩，克協生生之慶。臣某等下情無任，再拜，酒陳亞獻。

舉散花。

重稱法位。

具位臣某與合壇官衆等，謹重誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微大帝，承天效法后土皇地

祇，諸天天尊，諸天上帝，上窮圓蓋之高真，下極方輿之主宰，有靈有聖，今古師宗，醮筵兩班，合屬羣真。恭望洪慈，洞回淵格。臣聞虛無自然，乃三清之妙統；南極司錄，寔九府之總權。掌吉凶禍福之文，判長短死生之命，功則添而過還滅，善既錄而惡必除，故無阿黨之門，難用苟求之事。切念臣等下元脆質，三惑凡軀，雖承師匠之緣，指諭升騰之路。其奈靈文寶法，七百載而一傳；鳳篆龜圖，六甲周而一遇。非人不授，非道不傳。渺渺清虛，迢迢紫府，總得長生之路，應無短折之人。仰賴一志大乘，棄捐三惑，去離愛纏之網，咸除煩惱之緣。自然道合三生，人全得一，守身神而養壽，斥尸鬼以全齡。玄象難尋，有爲未捨，猶寄神仙之宇，尚居塵濁之間。道寡變通，習疏隱顯，性昏迷於至理，行不到於幽微。返致三災，來侵四大，按天師謝罪之式，建靈寶告真之壇。仰叩玄關，聿陳丹悃。伏願三官玉籍，赦違經破戒之愆；五帝瓊篇，釋故作誤違之罪。然



後功德山之法水，洗滌塵泥；智慧林之真風，昭甦朽木。破冤力士，保全持戒之身；護法神王，匡佑修行之士。門人十哲，徒弟四科，悟三教之玄微，睹衆真之戶牖。所冀真庭隆盛，四海欽崇，感至聖之親遊，傳無爲之妙訣。重念臣等在法門之日淺，或求師之未深，不知教法之宗，罕識威儀之理。遂致爲人作福，多無立應之功；依教行持，鮮有感通之效。切慮四司檢罪，上帝言非，以今皈命首陳，願希恩宥。更冀祈求感格，教法廣被於十方；禮念朝真，經誥普宣於四遠。人天敬仰，壇信清芳，皆霑潤澤之恩，盡獲雁鴻之福。臣等無任再三皈命懇請之至，酒陳終獻。

散花。

具位臣某，謹重誠上啓，上謝九清十極，萬聖千真，醮筵感降，一切真靈。臣等伏聞聖真遐邈，妙隱玄中之玄；道境高虛，端居象外之象。仗薰芳而按景，惟至懇以達神，元造無私，洞回昭鑒。臣等廣陳香炷，仰叩真仙，自揣行

藏，多生遭遇，處履吾皇之化，宣揚大道之風，福贊人天，溥資存沒，身披羽服，足履星壇，已逾十載之榮，早忝百生之幸。自恨三關未靜，一性猶昏。眼前之五欲六情，安能暫捨；身中之三灾九厄，寧不慚來。又慮學昧神明，情昏寶訣，難認忘筌之理，豈明脫識之門，晨夕忖思，將何首露。是以虔依科律，封奏心詞，度已往之愆辜，解未來之厄會。伏願洪慈廣布，錫雨露之深恩；浩福遐覃，贊山河之惠澤。青龍白虎，常施庇佑之功；皓鶴玄龜，克協年齡之慶。又慮瞻星望聖觸非常，身著異衣口談道，耽六賊而尤甚，食五味以仍多，不敬師尊，輕違天地，攀緣妄起，損害含生。願憑香火之功，俱獲消穰之路，所冀靈關朗照，慧性高明，得長生久視之書，悟大藥金丹之術。先師法屬，祖識宗親，盡離幽暗之鄉，俱入光明之界。飛潛蠢動，有識含生，普賴道慈，並躋壽域。臣等凝瞻法從，結想太空，極恨塵波，難留聖躅。臣等下情不勝攀戀之至，謹稽首奉送。

送聖，化財。  
向來，回向。

道門科範大全集卷之七十三

### 道門科範大全集卷之七十四

#### 道士修真謝罪十方懺儀

##### 東方懺謝不能知道之罪

衆等伏聞木生於三，得成形於天地；帝出乎震，育萬物於屯蒙。青龍司歲籥之先，北斗轉天關之始，少陽所蒞，盛德難名。今謹有佩籙道士某等，夙代清修，今生慶會，感師恩而畀付，依教法以操持。尚慚根器淺微，靈源障塞。行道而不能知道，未嘗觀空；養形而不能忘形，動皆執相。或馳說而自滿自圓，或聞道而若存若亡。富貴貧賤之間，不能齊物；喜怒好惡之觸，必致焚和。何以混天人之同塗，了生死之一致，負上聖獎成之大德，違玄師化度之格言，結罪目於三官，落仙名於五帝。敬伸懺謝，仰勾恩憐，謹齋香花法信供養之儀，至心皈命東方無極太上靈寶天尊，九炁天君，東鄉神仙，諸靈官。仰惟上德好生，至仁利物，青

書宥過，東華定仙，開虛無自然之心，授太一含真之道。匪遲匪疾，綿永永而不窮；無門無旁，洞皇皇之四達。化天下回心而嚮道，均聖人一視以同仁。得道之後，昇入無形，和與道合真。

##### 南方懺謝不能爲國報恩之罪

衆等伏聞虛中作離，萬物相見而長養；次二曰火，大人繼明而照臨。交於木而化育生靈，資於水而陶鑄品彙，至土所稟，大功克成。今謹有佩籙道士某等，生處中華，身陶聖化，惟皇在御，聽民所歸。俾承清淨之風，有補聖明之化。而以棲遲苟活，休息自安，無懷道抱德之實以化人，乏還淳返素之用而復古，飾人間之禮樂，希世上之功名，空叨水土之恩，濫處簪裳之列。南官仙籍，無梵行之可書；衡嶽陰曹，記愆尤之無數。惟聖人南面而聽治，惟國家盛德以御天，既請命於蒼穹，敢歸心於分野。謹齋香花法信供養之儀，至心歸命南方無極太上靈寶天尊，三炁天君，南鄉神仙，諸靈官。仰惟盛德在火，聖人嚮明，享壽考於萬民，綿

本支於百世。次願佩籙道士某等，六司宥過，三炁流光。在藏爲心以虛，受人而神應常靜；於時爲夏納陰，居內而火亦不流。俾能抱一而守中，庶可長生而度世。得道之後，昇入無形，和與道合真。

##### 西方懺謝不能補報祖先父母之罪

衆等伏聞嚴凝而義，物咸賴以西成；尊正而和，民率歸於兌說。先肅殺而輔大化，後靜退而表少陰。順天應人，剛中柔外。今謹有佩籙道士某等，世薰善念，身黍玄司，感父母之生成，荷祖宗之積累。而未閑禁戒，多昧稟修，八節不進於表章，五臘不嚴於祭祀。纔分形器，生生皆自於親恩；雖隔古今，世世有虧於子職。顧父母慈而無憾，惟天地公而無私。自作之孽難逃，不孝之愆無赦，敢忘悔艾，恭致首陳，馳誠於七寶金門，注想於西那玉國，乃上智問報恩之境，依元尊嘗說法之宮。謹齋香花法信供養之儀，至心歸命西方無極太上靈寶天尊，七炁天君，西鄉神仙，諸靈官。仰惟金光下

燭，玉簡昭回，祖先俱沐於昇遷，父母各增於殊勝。次願佩籙道士某等，西龜授道，謁仙母而鍊甲庚；金虎居離，交真龍而入戊己。無暴其氣而真元自守，不勞乎神而壽命無期，魔試不侵，心源自定。得道之後，昇入無形，和與道合真。

#### 北方 懺謝不報師恩之罪

衆等伏聞太極未分，含三才而混沌；五行既判，因一炁以循環。陽伏於內而萬物藏，辰居其所而衆星拱，樞機造化，主宰生靈。今謹有佩籙道士某等，識匪生知，理難自得，獲處道家之列，率由師匠之恩。始自訓提，知孝悌忠信之大本；迄于傳度，指虛無清淨之真乘。德參天地之高，恩踰父母之大。而以尊承素昧，給養有虧，負摳衣授道之恩，違歃血引盟之誓，泄機微於塵世，傳道祕於非人。至於遇禍以招殃，尚復怨師而咎道，想罪書於九府，恐身謝於三官，謂迎師則北面以尊崇，故謝過望坎宮而懇請。謹齋香花法信供養之儀，至心歸命北方無極太

上靈寶天尊，五炁天君，北鄉神仙，諸靈官。仰惟北辰掌握於仙名，壁宿主張於道術。宗師傳度，永隆弘教之心；保舉監盟，益務成人之美。無師不度，有翼必飛，俱詣功行之圖，共證昇仙之果。得道之後，昇入無形，和與道合真。

#### 東北方 懺謝行教宣科不精不法之罪

衆等伏聞神功不宰，爲天地之始終；妙本自然，運陰陽之動止。伸其轉物之手，授以出震之龍，變化有常，推移不忒。今謹有佩籙道士某等，本太上之子，爲道家者流，未能隱谷以存神，約以居鄺而演教。而以誠心易散，妙法難精，宣科而條理乖張，臨事而威儀跛倚，想法亂而六魔相笑，存思缺而萬神不居。願力么微，幽明無所依賴；性情撓亂，天人難以感通。不能契聖以契凡，孰爲成物而成務。恐黑書之紀過，憂仙籍之斷功，苟慢自陳，必貽陰譴。謹齋香花法信供養之儀，至心歸命東北方無極太上靈寶天尊，梵炁天君，東北方神仙，諸靈官。仰惟

申救四司，告聞九府，復功行於銖積寸累，赦過尤而霧捲雲披。驛意傳言，感應聲而上徹；升章謁款，俾隨願以克諧。然後抗志雲阿，棲身山洞，得逍遙於一世之上，息輪轉於三界之中。得道之後，昇入無形，和與道合真。

#### 東南方 懺謝不嚴敬奉經戒符籙之罪

衆等伏聞元化裁形，必有主張之者；靈風煦物，寔司命令之權。齊乎巽而振美盛明，輔以箕而歛揚鼓舞，大德至隱，百姓何知。今謹有佩籙道士某等，挺質凡胎，棲身道廕。優游琳宇，或不謹於焚修；左右洞章，或不嚴於敬重。佩籙而踰階越次，持齋而廢日亂時。官將吏兵，三會而不言功賞；衣冠劍履，常居而多見混淆。道力寡淺，而尸鬼交攻；戒行細微，而威神不護。通經而駁雜本旨，小智自私；行教而沿襲浮辭，大淳未至。所以奉天而事無響應，違科而罪與生俱。用陳懺謝之儀，以冀赦原之澤。謹齋香花法信供養之儀，至心歸命東南方無極太上靈寶天尊，梵炁天君，東南鄉

神仙，諸靈官。仰冀聖慈赦宥，靈澤漸陶。雷動風馳，散愆尤之紛委；清淵雲潤，沃念慮之恭莊。使保全性命之真，遂和同天人之際。隨符仙從，護法靈官，錄顯績之服勞，計仙真之保奏。得道之後，昇入無形，和與道合真。

西南方 懺謝不能虛己接物之罪

衆等伏聞承天至順，配剛健以成形；行地無疆，擴含弘而役物。陰功莫大，厚德難名。今謹有佩籙道士某等，稟秀五行，獨靈萬物，均有生於塵世，幸入道於玄門，益宜自化以修心，庶可虛含而接物。自以不能御氣，動必縱情，不和其心而與物交爭，不順其身而與世相忤，無一德而爲常安之術，合兩怒則多溢惡之言，護短而已不自知，歛怨而人豈無憾，繆於心而傷和氣，溺於言而污法身，與人並立而無以化人，僞道養形而未能造道。敢昧自欺之過，以貽天降之殃，敬負罪以首陳，誓責躬而悛改。謹齋香花法信供養之儀，至心歸命西南方無極太上靈寶天尊，梵炁天君，西南鄉神仙，諸靈

官。仰惟坤儀至信，地道流謙，願分厚德載物之休光，使有常善救人之功用。虛明道性，一順逆以和融；粹熟心聲，謹樞機而安定。福將自至，禍莫由生，更祈不動之仁，盡赦從前之罪。得道之後，昇入無形，和與道合真。

西北方 懺謝法天象地履斗驅神之罪

衆等伏聞太極含三，兩儀判而定位；乾元用九，萬物睹而流形。得一氣以貞純，御飛龍而不息，發揮入卦，保合太和。今謹有佩籙道士某等，宅志希夷，游心浩素，内存神而鍊道，外行教以化人。雖科法之具存，豈凡庸之是任。重以形神至濁，道行無聞，攢星斗於峨冠，飾雲霞於羽服。躡魁罡於履屐之下，地穢人凡；驅神鬼於掌握之中，功微德薄。踐八卦之文於壇墀，降十方之氣於身田。或養胎息於三元，暗竊陰陽之氣；或鍊內丹於九轉，高奔日月之光。素非仙相之人，冒學聖功之道。無非僭越，有犯光靈，敬伸懺謝之誠，以追譴尤之責。謹齋香花法信供養之儀，至心歸命西北方無

極太上靈寶天尊，梵炁天君，西北鄉神仙，諸靈官。仰惟乾元至健，天道弗違。錫以純陽，爲換塵凡之胎骨；示其要道，使知仙化之根元。四體安和，百神鎮守，庶精修於上法，得無愧於前功。得道之後，昇入無形，和與道合真。

上方 懺謝歷世不知覆載冒犯三光之罪

衆等伏聞梵炁彌羅，上極虛無之界；元綱流演，化開萬億之天。洪惟至道之尊，統御自然之化，神功不宰，浩劫長存。今謹有佩籙道士某等，自無始以來，至有形之後。一靈凋喪，莫還五太之淳；六賊沉迷，自致三生之業。曾超於慾界色界之內，復墮輪迴；嘗修於小乘中乘之因，自生退轉。或居中土而本原不返，或處殊方而聲教無聞。大乘之道果難成，三界之業輪易轉。戴天履地，負陰抱陽，莫酬覆燾之恩，動有乖張之罪。四序寒暄之愆忒，嗟怨天時；三辰經緯之昭明，犯衝光景。逆數千生之罪，貫盈萬種之愆。從此自新，願垂肆赦。謹齋香花法信供養之儀，至心歸命上方無極太

上靈寶天尊，三十六天帝君，玉京仙都，紫微金闕，三清三界，梵炁天君，上鄉神仙，諸靈官。仰冀大道宣慈，高真垂憫，下十方之世界，赦萬劫之愆尤。紫微太微，催促舉仙之運；南斗北斗，解消臨命之灾。元精滿於泥丸，真炁凝於靈府，神明來舍，臟腑清涼，慧性高明，福緣殊勝，得至人之降接，指道學之玄微，回化有情，同登無漏。得道之後，昇入無形，和與道合真。

下方 懺謝害物傷生之罪

衆等伏聞大方無隅，擴八紘而厚載；元形統地，含萬物以化生。惟后土之司權，分百靈之受事。不言而信，得一以寧。今謹有佩籙道士某等，有生於混沌之初，失道於洪荒之後。仁義禮智，與大偽之并出；賢愚善惡，稟天性之自然。率爲棄本之人，動有貪生之過。資萬物而致養，不知覆載之恩；縱一己而自安，不念飢寒之者。極口腹之欲而恣傷生類，侈服用之美而枉害成形。莫知反身，習爲常性。五嶽四瀆之府，罪目紛紜；艷都泉曲

之司，黑書委積。幸今世潛身於道廕，盡千生訟過於玄司，誓修未來，庶臻無咎。謹齋香花法信供養之儀，至心歸命下方無極太上靈寶天尊，高皇九土，十二仙真，后土太靈，四瀆五嶽，下方世界，一切神仙，諸靈官。伏願衆靈赴感，厚德有容，敷在宥之渥恩，赦無邊之深過，圓融善念，發開惠源。靜重柔和，咸與物而無礙；虛無清淨，早證道以長生。上窮碧落之高，下極黃泉之杳，人皆反本，物咸遂生。得道之後，昇入無形，和與道合真。

道門科範大全集卷之七十四

道門科範大全集卷之七十五

廣成先生杜光庭刪

上清昇化仙度遷神道場儀

此儀用黃籙修真十戒，用明真宿啓儀，乃五鍊生尸古儀。宿啓也，所以有遷拔、滅度之魂之句。萬福天師著《同學行道儀》，始自疾苦，至于終亡，皆須懺謝、救拔、解灾、悔過。且夫修道昇仙，非師不度；超凡證聖，非友不成。師猶父母也，同學爲兄弟也，得不敬孝友愛，承順和悅，以遵其教乎？師資同學，既離親戚，棲庇山林，骨肉遠矣，親愛疏矣，一旦有疾，惟門人同學爲其選備方藥，營修藥飲以療之。其或修短有常，奄從淪化，即當誦經行道，拜章上表，懺罪謝愆，以相遷度。生死道義，惟此爲先。師友淪沒，弟子同學皆當齊集，以高德者爲法師，其餘依位次第，沐浴更衣，可設壇出官，關啓行事。疾厄危切，亡歿極傷，應急就

修，不須宿啓，各在依位，主其職司爾。其事若宿啓，即依常法。

### 清旦行道

法事陞壇如式。

各禮師存念如法。

宣衛靈呪。

金真錄霞，煥映三天。飛雲丹霄，

諸天控輶。晨暉啓旦，陰翳俱捐。九

微震空，五星回旋。萬天感應，自然妙

玄。杳冥散佈，分形百千。玄珠光耀，

瑞降壇乾。幽明蒙惠，灌鍊金泉。魔

王恐懼，合景三田，與道合真。

鳴法鼓二十四通。

無上三天玄元始三炁，太上道君

太上老君，召出臣等身中三五功曹，左

右官使者，左右捧香，驛龍騎吏，侍香

金童，傳言散花玉女，五帝直符，直日

香官，合三十六人出。出者嚴裝顯服，

冠帶垂纓，關啓玄壇土地，方域神真。

臣今清旦，燒香行道，謹奉爲入意，其諸

情悃，已錄奏聞，願得太上十方至真道

炁，靈寶瑞光下降，流入臣身中，令臣所

啓，速達徑御太上無極大道、昊天玉皇

上帝、東極救苦青玄上帝御前。

請稱法位。

具位臣某與合壇官衆等，謹同誠上

啓，虛無自然元始天尊，太上大道君，

太上老君，昊天玉皇上帝，勾陳天皇大

帝，北極紫微大帝，南極注生上帝，東

極救苦青玄上帝，承天效法后土皇地

祇，十方太上靈寶天尊，諸天天尊，諸

天上帝，上清日月星斗河漢羣真，三官

四聖，五師三省真君，九天天曹，諸位

真君，歷代傳宗啓教諸大師真，雷霆神

虎大醫諸司官將，太上諸階經籙中仙

官吏兵，天下名山洞府得道神仙，地府

酆都大帝，幽陰聖衆，水府扶桑大帝，

閻苑真仙，人元五嶽五天聖帝，酆都地

祇，諸司元帥、太歲土火、瘟司聖衆、州

縣城隍之神，當境廟社神祇，觀庭土地

真官，法壇諸司官將，三界提魂攝魄神

吏，四界直符功曹使者，騰奏俵錢神

吏，醮筵主宰，一切真仙。恭望洪慈，

洞回昭鑒。臣等微生賤質，謬預法流，

早契神期，奉遵玄祕。未能超形物外，

隱影林巒，服道思玄，研習要妙。但人

間修尚，以香火爲功，濟拔幽塗，超昇上境，受法之日，約當奉行，救度人天，宣洪道德，況奉詞旨，敢不上聞。

宣詞。

按如詞旨，情深追慕。臣等謹爲共

相携率，依按典儀，歸命十方，冥祈三

寶，修齋行道，請命祈哀。伏願至道垂

慈，哀原羣品，陰罪陽過，咸乞消除。

使進品仙都，升神上境，式彰洪濟，少

副哀鳴。以今清旦行道，請法衆等運

茲初捻上香，願此香烟，騰空徑上，供

養太上三尊，臣等至心皈身、皈神、皈

命，以是功德，歸流宗祧先聖，社稷尊

靈，控御晨霞，宴遊霄極，旁敷德澤，蕃

大本支。皇帝聖壽延長，明齊二景；

仁風淳厚，德邁三宗。民俗阜安，兵戈

偃戢。今故燒香，自皈依道尊大聖衆

至真之德。得道之後，昇入無形，和與

道合真。

以今清旦行道，請法衆等運茲二

捻上香，願此香烟，騰空徑上，供養大

道尊經。臣等至心皈身、皈神、皈命，以

是功德，歸流仙化某，洎三師玄祖，法

俗先亡。伏願遊神紫極，鑄質廣寒，逍遙碧落之庭，縱適三清之境，消除塚訟，庇佑門徒。今故燒香，自皈依經尊大聖衆至真之德。得道之後，昇入無形，和與道合真。

以今清旦行道，請法衆等運茲三捻上香，願此香烟，騰空徑上，供養太上三師。臣等至心皈身、皈神、皈命，以是功德，歸流弟子某。伏願道業日新，智燈無量，心開意解，體悟自然，學道成真，名題青籙，觀宇肅靜，大小咸寧。今故燒香，自歸依師尊大聖衆至真之德。得道之後，昇入無形，和與道合真。

懺方，命魔，步虛，三禮。

重稱法位。

具位臣某與合壇官衆等，謹重誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微上帝，南極注生大帝，東極救苦青玄上帝，承天效法后土皇地祇，上窮圓蓋之高真，下極方輿之主宰，有靈有聖，今古師宗，醮筵主宰，合屬真仙。恭望洪慈，洞回昭格。臣等育

質三光，造形九炁，凡胎尸穢，漏質庸虛，宿慶彌綸，茲逢道運。幸生聖代，蚤佩黃裳，沐大有之垂休，睹真經之輔世，叨逢祕檢，繆奉丹盟，不揆凡材，輒居法任，科文肄業，香火傾心，爲己及人，祈恩請福。今有弟子某，奉爲仙化

本師某，早從師範，宗奉仙真，香火雖嚴，形神未鍊，靈根不固，天運有終，歸身太陰，託形幽夜。切恐平生舉動，悞犯真科，抵觸神明，冒干天地，違越禁忌，構此凶衰。又恐六甲五行、九宮八卦，互爲刑剋，莫遂考終。又恐先世流殃，惡人呪詛，宿冤往債，結釁所成，伏連傳尸，新故延染。考氣注訟，侵逼魂神。魍魎邪精，乘爲天害。遷化以後，超度無由。恐識滯鬼羣，殃延見在。是敢修齋行道，歸命至真，仰乞大慈，特垂惠澤，開釋幽對，超度先師，馭日紫霄，乘雲丹殿，北辭長夜，南上絳宮，演三洞之靈文，爲太平之教主，圓光附體，洞照太空，導引世人，永超長夜。所冀邊疆靜息，風雨均調，聖祚延長，皇圖永固。弟子某等道念增進，心識

光明，速登玄解之鄉，永作人天之庇。先師超度，塚宅鎮安，境界龍神，宮庭土地，遷陞階品，佑護生靈，下窮幽漠之鄉，俱被清升之澤。上明天尊大慈之化，下副臣等祈向之誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來清旦行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝、東極救苦青玄上帝御前。

出堂頌。

出戶。

道門科範大全集卷之七十五

# 道門科範大全集卷之七十六

## 上清昇化仙度遷神道場儀

### 臨午行道

陞壇如式。

各禮師存念如法。

宣衛靈呪。

謠歌空洞，帝君存壇。五帝校錄，受符三官。備衛四門，束魔去奸。流鈴擲火，陰穢焚殘。身佩金書，鍊液芝顏。玄靈受合，心動三關。騎獅跨鶴，控龍乘鸞。萬星守舍，千魔不干。道炁長存，萬仙悉安，與道合真。

鳴法鼓二十四通。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴莊顯服，冠帶垂纓，關啓玄壇土地，方域神真。臣今臨午行道，謹奉爲入意，其諸情悃，

已錄奏聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝、東極救苦青玄上帝御前。

請稱法位。

具位臣某與合壇官衆等，謹同誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微上帝，南極注生大帝，東極救苦青玄上帝，承天效法后土皇地祇，十方太上靈寶天尊，諸天天尊，諸天上帝，上清日月星斗河漢羣真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎天醫諸司官將，太上諸階經籙中仙官將吏，天下名山洞府得道神仙，地府酆都大帝，幽陰聖衆，水府扶桑大帝，閩苑真仙，人元五嶽五天聖帝，酆都地祇，合于元帥、太歲土火、溫司聖衆、州縣城隍之神，當境廟社神祇，福庭土地真官，法壇諸司官將，三界提魂攝魄神吏，四界直符功曹使者，騰奏俵錢神吏，醮筵主宰，一切真仙。恭望洪慈，

洞垂昭鑒。臣等擢形中土，稟質常倫，宿福所鍾，遭逢道運，得以凡賤，參奉正真，鍊氣凝神，動虧真寂，遊心屬想，未契玄虛。今有弟子某師弟相依，皆資昔會，恩均覆載，分等生成，仙化昇沉，自宜薦舉，事存明誥，敢奉丹誠，瀝懇玄津，冥祈景佑。今奉詞旨，敢不上聞。

宣詞。

按如詞言，誠深追慕。弟子某以仙化本師某，昔稟玄猷，棲神道域，而善功未著，仙扎無名，脩短有期，奄從常數，追傷痛悼，彌切誠祈，虔備壇場，奉修齋直。臣等謹爲考諸儀訓，廣作津梁，俾茲滅度之魂，出彼輪迴之域。以今臨午行道，請法衆等運茲初捻上香，願此香烟，騰空徑上，供養大道三尊。臣等至心皈身、皈神、皈命，以是功德，上祝皇帝萬壽，宗社隆昌，祚曆遐長，寰區清晏。三師九祖，天下人民，玄貺所覃，並登真道。今故燒香，自皈依道尊大聖衆至真之德。得道之後，昇入無形，和與道合真。



以今臨午行道，請法衆等運茲二  
捻上香，願此香烟，騰空徑上，供養太  
上尊經。臣等至心皈身、皈神、皈命，以  
是功德，歸流仙化道士某，消釋罪尤，  
解除過謫，出九幽之府，離五苦之庭，  
輪轉受生，常承福果，終得仙道，長樂  
無爲，遐及幽沉，溥該動植，九圍之內，  
庶類之中，賴此鴻休，成臻道化。今故  
燒香，自皈依經尊大聖衆至真之德。  
得道之後，昇入無形，和與道合真。

以今臨午行道，請法衆等運茲三  
捻上香，願此香烟，騰空徑上，供養太  
上三師。臣等至心皈身、皈神、皈命，以  
是功德，歸流弟子某等，真炁潛資，至  
人降接，內凝沖素，外却凶邪，北宮續  
易盡之年，南府注長生之籍，冤仇銷  
解，債訟和平，九族親姻，普天民庶，幽  
明動植，巨福均霑。今故燒香，自皈依  
師尊大聖衆至真之德。得道之後，昇  
入無形，和與道合真。

懺方，命魔，步虛，三禮。  
重稱法位。

具位臣某與合壇官衆等，謹重誠上

啓，虛無自然元始天尊，太上大道君，  
太上老君，昊天玉皇上帝，勾陳天皇大  
帝，北極紫微大帝，南極注生大帝，東  
極救苦青玄上帝，承天效法后土皇地  
祇，上窮圓蓋之高真，下極方輿之王  
宰，有靈有聖，今古師宗，醮筵列班，一  
切真仙。恭望洪慈，洞回淵鑒。臣等幸  
以福緣，得參真化。仙經祕篆，早遂稟  
修。竊按真經，深明旨教，師恩至重，  
義等天親，生化轉輪，當嚴薦奉。今有  
祈向，敢不謐聞。弟子某伏爲仙化本  
師某，往以善因，獲參真品，佩奉高妙，  
宗仰正真。而仙品未充，塵勞未靜，遽  
纏疾厄，遂至淪亡。雖常數之有終，由  
後人之貽釁，追悔莫及，荼毒難任，深  
憂積集之愆，尚累超昇之便，欲求懺  
悔，以福幽明。弟子某等伏自積劫以  
來，受生之後，上悖君父，不孝尊親，就  
僞棄真，背師欺友。或殺生殘忍，戕害  
無辜，妬妬賢良，輕凌親屬；或噉食物  
命，咀嚼葷辛，竊弄寶經，評論仙聖，忽  
略四大，穢慢三光，呪詛神明，自欺形  
影；或妄傳經教，輕泄天書，不合典

儀，犯干天憲；或愛人賄信，施用不  
公，榮潤己身，支贍親黨；或破齋毀  
戒，有犯玄科，下負人倫，上違經錄，名  
書黑簿，功落青編，惡至滅身，禍延師  
表。冥冥長夜，精爽何之。非自首陳，  
何能升濟。以今修齋行道，悔過知非，  
存歿罪愆，咸希除蕩。伏願至真大道，  
無上衆尊，告下酆都岱宗二十七獄，陰  
陽水火百二十曹，削除七世以來生死  
罪對，得居寬縱，放赦形魂，託生中華，  
受氣智慧，宗奉玄科，振揚法音，爲人  
天師，證虛無道。次願帝王萬壽，臣佐  
一心，四海同文，八紘共軌，三塗六趣，  
九夜重冥，睹見光明，免諸罪惱。蜺飛  
蠢動，率土普天，同賴洪恩，咸升福岸。  
上明天尊大慈之澤，下副臣等懺謝之  
誠，謹啓以聞。

十二願。  
復鑪。

謹攝香官使者、左右龍虎君、侍香  
諸靈官，當令臣向來臨午行道之所，自  
然生金液丹碧，芝英百靈，衆真交會，  
在此香火鑪前。當願十方仙童玉女，

接待蘭烟，傳臣向來所啓之誠，速達徑御太上無極大道、昊天玉皇上帝、東極救苦青玄上帝御前。

出堂頌。

出戶。

道門科範大全集卷之七十六

### 道門科範大全集卷之七十七

上清昇化仙度遷神道場儀

晚朝行道

法事陞壇如式。

各禮師存念如法。

宣衛靈呪。

神光朗耀，瑞氣帀旋。箕斗映輝，芝宇晏然。玉眸含真，寶壇純乾。變夜作晝，回子午前。太華流珠，丹鳳飛玄。息魔滅奸，高步祥煙。天真普集，齊到帝前，與道合真。

鳴法鼓二十四通。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴莊顯服，冠帶垂纓，關啓玄壇土地，方域神真。臣今落景行道，謹奉爲入意，其諸情悃，已錄奏聞，願得太上十方至真道炁，靈

寶瑞光下降，流入臣身中，令臣所啓，速達徑御太上無極大道、昊天玉皇上帝、東極救苦青玄上帝御前。

請稱法位。

具位臣某與合壇官衆等，謹同誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微大帝，南極注生上帝，東極救苦青玄上帝，承天效法后土皇地祇，十方太上靈寶天尊，諸天天尊，諸天上帝，上清日月星斗河漢群真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎天醫諸司官將，太上諸階經錄中仙官將吏，天下名山洞府得道神仙，地府酆都大帝，幽陰聖衆，水府扶桑大帝，閻苑真仙，人元五嶽五天聖帝，酆都地祇，合干元帥、太歲土火、溫司聖衆、州縣城隍之神，當境廟社神祇，福庭土地真官，法壇諸司官將，三界提魂攝魄神吏，四界直符功曹使者，騰奏俵錢神吏，醮筵主宰，合座真仙。恭望洪慈，洞垂淵鑒。臣等宿荷玄恩，稟以正氣，

歸依道化，參習真風，祕訣真文，靈科妙典，得諧披盼，天澤弘深。而弟子某以師匠之親，昔緣運會，道科所重，真訓所先，生死降升，更相度脫。今奉詞旨，敢不上聞。

### 宣詞。

按如詞言，誠深追慕。竊慮先師奄從仙化，神識何之，光景奔流，音容遼絕。向以生長濁俗，栖息玄門，功行未圓，修持多曠，難超道域，尚阻幽途，身謝三官，受嬰衆苦，緬惟幽夜，悲痛寔深。臣等輒按典儀，謹相携率，遵承科範，宗奉正真。仰憑開度之恩，願報生成之力。精嚴香火，冀表梯航。滌慮冥心，虔修齋直。以今落景行道，請法衆等運茲初捻上香，願此香烟，騰空徑上，供養太上三尊。臣等皈身、皈神、皈命，以是功德，歸流宗祧社稷，列聖尊靈，浮灑氣於九清，駕卿雲於八極，垂休介福，保國寧人。皇帝北極延祥，南山等祚，寰瀛康泰，中外輯和，朝有賢良，野無遺逸，萬方順化，同契無爲。今故燒香，自皈依經尊大聖衆至真之

德。得道之後，昇入無形，和與道合真。

以今落景行道，請法衆等運茲二捻上香，願此香烟，騰空徑上，供養太上尊經。臣等皈身、皈神、皈命，以是功德，上資先師某。伏願真乘導衛，至聖保持，浴神流火之庭，鍊魄洞陽之境，叅真玉闕，受號珠宮，贊大道之慈風，啓群生之慧路。及九玄七祖，經籍度師，保舉監盟，山棲同志，俱霑勝澤，并陟真階。今故燒香，自皈依經尊大聖衆至真之德。得道之後，昇入無形，和與道合真。

以今落景，陞壇行道，請法衆等運茲三捻上香，願此香烟，騰空徑上，供養太上三師。臣等皈身、皈神、皈命，以是功德，歸流弟子某家，億曾萬祖，親緣眷屬，普及幽明，存者承福祐之資，歿者獲昇遷之澤。泊乎周天八極，動植含靈，九夜三途，遊魂滯魄，荷太上宣慈之貺，沐天真濟拔之恩，克遂逍遙，永荷貞吉。今故燒香，自皈依師尊大聖衆至真之德。得道之後，昇入無形，和與道合真。

懺方。東青西素南丹北冥三時通用。

臣等伏聞至道玄通，隨機赴感。天尊廣濟，應念垂慈。悔謝則三業消清，懺除則九泉開泰。臣等以今轉經行道，歸命十方無極太上靈寶天尊，三光五嶽，三河四海，三十六部尊經。奉爲弟子某以先師某謝絕世塵，遷升真路。仰慮前緣往劫，此世以來，行教立功，宣科濟俗，違越禁戒，負犯幽明，傳法修身，逾真忤聖。後學爽金縉之信，師資罹輕泄之辜，功過相因，愆尤未解，因今懺悔，咸乞蕩除。伏願上聖弘慈，至真玄鑒，告盟三界，敕勒四司，五帝開恩，三官赦罪，地無報對，水絕盟言，永出輪迴，克昇長樂，刊功帝簡，垂祐法門。六道三塗，同臻勝善，禍沉九夜，福起十方。率土普天，咸登壽域。得道之後，昇入無形，和與道合真。

步虛，三禮。

重稱法位。

具位臣等與合壇官衆等，謹重誠上啓，祖師三清玉帝，昊天玉皇上帝，十方三界，一切真靈。恭望洪慈，普回昭

鑒。臣等夙荷玄休，早依道化，參修大法，佐國度人。緬惟稟奉之初，實自師資之力。而跡隨塵染，身遠林泉，乏棲神養素之功，虧利物濟時之效，感通誠寡，憂惕常深。弟子某竊惟先師某開濟恩深，師尊義重，幽明有隔，親奉無階，惟罄齋誠，仰伸崇薦。伏慮粵從曩劫，以洎此身，生化以來，功過參積。

或含慈拯物，演教度人，違負經科，冒犯禁戒；或施行道法，抑徇人情，乘勢愛憎，妄生嫌恨；或興修觀宇，遏水穿山，驚駭龍神，損伐林木，彼成此廢，功立過生；或傳法授經，不依年限，慈能累道，善必成非，五帝四司，未蒙原赦，三官九府，猶繫罪名，拘閉幽關，無由遷拔。以今修齋行道，謝過希恩，無量罪條，將希原宥。伏願三尊大聖，應感真靈，降罔極之恩，赦無涯之咎，事無巨細，咸乞蕩除。即使名度朱陵，釁消黑簿，太陰受鍊，丹霍遷神，輪轉福階，登真證品，克臻道果，永出化機。前代今生，億曾萬祖，存亡受福，動植霑榮，流向法門，垂休後學，大弘神化，常轉

法輪。臣等所謝所祈，仰通玄鑒，殃消昔劫，福降今辰。上願國祚延長，帝王萬壽，乾坤交泰，日月貞明，風雨順常，星辰合度，干戈弭戢，穀稼豐登，歲有禎祥，時無疵癘，幽明開泰，蠢動安全，普及含生，俱契常道。上明天尊大慈之澤，下副臣等歸命之誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來落景行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭烟，傳臣向來所啓之誠，速達徑御太上無極大道、昊天玉皇上帝、東極救苦青玄上帝御前。

出堂頌。

出戶。

道門科範大全集卷之七十七

### 道門科範大全集卷之七十八

#### 上清昇化仙度遷神道場儀

#### 設醮行道

法事陞壇如式。

各禮師存念如法。

宣衛靈呪。

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，游宴十方。五雲浮蓋，招神攝風。役使萬靈，上衛仙公，與道合真。

鳴法鼓二十四通。

發鑪。

無上三天玄元始三炁，太上道君，太上老君，召出臣等身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。

臣今設醮延真，燒香行道，謹奉爲入意，其諸情愫，已錄奏聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天玉皇上帝、東極救苦青玄上帝御前。

請稱法位。

具位臣某與合壇官衆等，謹同誠上啓，虛無自然元始天尊，太上大道君，太上老君，昊天玉皇上帝，勾陳天皇大帝，北極紫微大帝，南極注生大帝，東極救苦青玄上帝，承天效法后土皇地祇，十方太上靈寶天尊，諸天天尊，諸天上帝，上清日月星斗河漢群真，三官四聖，五師三省真君，九天天曹，諸位真君，歷代傳宗啓教諸大師真，雷霆神虎天醫諸司官將，太上諸階經籙中仙官將吏，天下名山得道神仙，地府酆都大帝，幽陰聖衆，水府扶桑大帝，閻苑真仙，人元五嶽五天聖帝，酆都地祇，合干元帥、太歲土火、瘟司聖衆、州府城隍主者，當境廟社神祇，福庭土地真官，法壇諸司官將，三界提魂攝魄神兵，四界直符功曹使者，騰奏俵錢神

吏，醮筵主宰，一切真仙。恭望洪慈，洞垂昭鑒。臣等伏聞寶珠傳道，難明喜慶之言；玉局授經，大啓流行之誓。師資踵繼，今古燈傳。自天上而達人間，法固分於精奧；惟高真之與初學，勢亦異於仙凡。均稱此道之有傳，超出化機之能幾。弟子某奉爲先師某忽驚處順，恐未超升，仰託醮功，上干道化。陳苾芬之嘉薦，敝圭潔之靈場，俛望真遊，鑒觀昭事。瓊輪羽蓋，泛灝氣於清空；月帔星冠，介沈寥於午夜。企百靈之交會，指九夜之仙津。臣與衆等不任瞻望激切延請之至，祇迎聖馭。

降聖，上茶，初獻，散花。

再稱法位。

具位臣某與合壇官衆等，謹重誠上啓，九清上聖，三洞師尊，十方三界，一切真靈。恭望洪慈，洞回淵鑒。臣聞混元函谷，控白鹿以西升；黃帝鼎湖，駕髯龍而高舉。莫不以長生爲本，却死爲先。且斯道之高玄，係志人之參究。然功難製錦，喻起繫風，既不勤於用心，豈能專於抱一。放懷慾境，任意塵

緣，嗜好日深，衰敗時積，氣亡液漏，血滅骨枯。既道運之漸凋，必生緣之加促。弟子某奉爲先師某生逢景運，名繫玄門，經教雖參，氣形未鍊，忽隨化而暫滅，恐積行之多違，仙品未克，生方尚阻。仰惟天尊設教，太上垂科，有仙度昇天之儀，有鍊化生尸之法，使神昇上界，魂超太陰，早入仙源，遠辭冥諦。是敢歸憑至道，建立齋功，因清淨之鶴袍，扣巍峨之虎闕。風飄清嘒，繞容曳之雲旗；露挹芳罇，瑩輝華之蘭席。臣等存神天界，端簡夜壇，騰報本之哀悰，格蓋高之睿鑒。濫司關奏，職在升聞，設醮心詞，謹當宣奏。

宣詞。

按如詞言，誠深追慕。諒必塵於天聽，願加憫於幽途。大施渙汗之恩，廣作津梁之路。伏念近化某自從歷劫，泊于此身，住世以來，所犯之罪，六情染累，三業縈牽，是乃反非，功不補過。或傳經授道，乖越明科；或怨法咎師，犯干天憲，違明真科典、三元品文，身沒幽關，受諸報對，無邊過咎，難

以備陳。以今歸命諸天，投哀上聖，罪無巨細，咸乞蕩除。開度窮魂，出離幽苦，鍊神丹霍，受化福堂，蛻骨成仙，餐霞吸景，累修不怠，積學成真，漸陟虛無，不淪生滅，分身散景，出有入無，與道合真，體玄接物。三師玄祖，超證仙班；九世先亡，升騰天路。庶獄咸消，於慘毒，三塗悉能於驅馳，六趣清升，四生均利。臣與衆等無任告真拔亡之至，酒陳亞獻。

散花。

重稱法位。

具位臣某與合壇官衆等，謹虔誠上啓，三清上聖，十極妙有高真，合壇應感，一切真靈。伏以滅迹去世，雖人道之有終；反胎藏形，由仙功之未滿。託質太陰之室，馳心浩劫之家。伏聞太上垂科，有鍊化生尸之法；高真演教，有仙度升天之符。使形神復返於霄途，俾體魄不拘於地府。五帝衛護，三界司迎，歷劫流通，仙家傳授。今有某追惟師匠，建立齋功，輒恃洪慈，求蠲往過。恐先師某身參大法，崇奉多

違，名係仙曹，修行中廢，積集罪咎，坐致終亡，青簡落名，冥官執過，天門障塞，地戶淹留，蒿里幽祇，橫生拘錄。仰希大有，昭洗宿殃，敕下三官，告盟五帝，舉善輟惡，起死迴骸。使翥景星衢，遊神洞府，積功而超六慾，證道而化羣迷，均善利於先曾，覃餘休於後葉。然後弟子某等安居樓觀，克世冠裳，驅塚宅之凶邪，却他人之妬妬。法燈相續，邁陶陵之清修；眉壽無期，追松喬之久視。世羅盡解，道念長新，無忌利物之心，上廣好生之化。臣與衆等不任再三祈請之至，有酒盈樽，謹伸三獻。

散花，祝真文，宣疏。

具位臣某，謹重誠上啓，九清上聖，十極高真，三界應感，一切真靈。臣等今則四弘誓滿，六度功圓。濟濟仙儀，儼鸞驂於空際；誦誦法從，整鶴轡於離庭。仙梵停音，清香罷祝。天浮瑞氣，映寶座之玲瓏；月散餘輝，滿花壇之皎潔。企天光而依戀，憫泉路以傾虔。願賜優容，俾倍扈從，使先化本師

某齋持玉簡，驂侍丹輿，飄裾碧落之庭，飛步朱陵之府。金書滌慮，挹道潤於中衢；玉液疏神，契德流於上善。均沐玄祖，覃福門人，惠澤所霑，羣生咸遂。臣等不任依戀之至，誠惶誠恐，稽首頓首再拜，奉辭聖駕。

十二願。

復鑪。

謹攝香官使者、左右龍虎君、侍香諸靈官，當令臣向來設醮延真之所，自然生金液丹碧，芝英百靈，衆真交會，在此香火爐前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝、東極救苦青玄上帝御前。

送聖，化財，回向。

道門科範大全集卷之七十八

道門科範大全集卷之七十九

廣成先生杜光庭刪

東嶽濟度拜章大醮儀

陞壇法事如式。

庭參。

具位臣某等，謹焚道香、德香、無爲自然香，虔誠啓請虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈，悉仗真香，普同供養。臣等伏以無私洪覆，雖持變化之權；有生羣黎，不無仁鄙之異。霄壤相去八萬里，在庶品難以周知；境域肇有十二州，實鬼神司其封守。察知作善而作惡，用是主死而主生。苟懷畏懼之心，當盡皈投之志。冒罪奏爲宣意，其諸情悃，已對敷宣。伏願天齊仁聖帝，洪恩下沛，誠有感而遂通；聖眷俯臨，

神無方而來應。擁群司而雷監，同衆聖以雲臨，暫離喬嶽之居，降赴香筵之請。憫見世銜哀之志，拔已亡負罪之魂，俾得脫於幽牢，庶獲登於道岸。今則壇場肇啓，儀範初行，引領既切於瞻依，注想實深於如在，惟企仙游之至，克諧齋事之成。臣等下情，無任啓請之至以聞。

說戒。

科曰：道以齋爲先。蓋古者祭祀必有齋，齋必有戒，先戒而後齋，所謂七日戒而三日齋也。散齋七日謂之戒。戒者，所以恭依準繩，不犯非僻，動遵戒律，無有愆違也。致齋三日謂之齋。齋者，所以齋潔心神，清滌思慮，專致其精，而求交神明也。周官太宰之職，祀五帝則掌百官之誓戒。前期十日，帥執事而卜日遂戒。又以大司寇蒞誓百官，戒于百族。夫以太宰掌治之官戒之，所以重其事；以大司寇掌刑之官蒞之，所以致其嚴。《禮記·郊特牲》亦言：卜郊之日，王立於澤，親聽誓命受教，諫之義也。獻命庫門

之內，戒百官也。太廟之命，戒百姓也。古人求交於神明，嚴其戒，重其齋，如此故祀圓丘而天神降，祭方澤而地祇出，格祖廟而鬼神享。雖然爲祭祀之齋，非心齋也。昔顏回受祖於夫子，自謂不飲酒、不茹葷者數月，而夫子未許之以心齋，欲其無聽之以耳而聽之以心，無聽之以心而聽之以氣。氣者，虛而待物，惟道集虛，虛者心齋。《周易》有云：聖人以此洗心，退藏於密，齋戒以神其德。蓋賢人受道於聖人，而聖人與神明合德者，必心齋而得道。故知祭祀之際，而後可以求心齋，則神明生與道合矣。後世道家設醮而謂之齋，蓋以五經所載祭祀之齋，異名而同歸，其致一也。今則東嶽之齋，上請九品高真降臨壇位，天齊仁聖帝省覽齋功，感格冥司，拯拔罪魂，天神於此而降，地祇於此而出，人鬼於此而享。今因齋而說戒，合壇之人，先受戒約，一歷耳根，永爲道種。即當檢束身心，屏絕外念，存想至真，使啓奏得行，祈禱必應矣。天尊所言，真科所傳，今

舉七條，衆當信受。

第一戒者，不得殺害，憫念有情，如己身命。殺生之人，有六種報：一者短命，二者多病，三者醜陋，四者形殘，五者地獄苦報，六者受六畜身、償他骨肉。今者不得於道場前後殺害衆生。

第二戒者，不得嗜酒。嗜酒之人，有四種罪：一者見世妨失，二者善法不行，三者多生睡眠，四者顛狂昏亂。今者不得於道場中，嗜酒淫逸，觸忤高真。

第三戒者，不得生叛背心，言不忠直。不忠之罪，有五種報：一者見被苦刑，二者破家滅族，三者處地獄報，四者得虎狼身，五者生在邊地、心無自在。今者於道場中，常行忠直，以俟藻鑒。

第四戒者，不得無孝順心，違逆父母。不孝之罪，有五種報：一者王法所加，二者有情棄薄，三者地獄受苦，四者受烏梟身、遞相殘害，五者既反人身、貧寒困苦。今者聞戒之後，常持孝

心，以俟天聽。

第五戒者，常行慈心。若見衆生臨命終時，爲作功德。昆蟲草木，尤不可傷。愛老憐貧，溥度一切，使不虛今日，道場聽聞戒法之命。

第六戒者，不得誹謗三寶，及有道士尊，乃至在家出家，一切道像。誹謗之罪，有四種報：一者常遭惡疾，二者死拘幽夜，三者舌根乖疏，四者常值冤家、人不愛敬。今者身遇說戒之後，常當恭敬三寶，積行累功。

第七戒者，今日道場之中，常當恭敬，不得懈怠。當須勉勵，內外精勤，日夜乾乾，毋怠毋忽。勤則利有，怠則利無，自利利他，便趨真極。

已上七戒，合道場人能持否？

天尊言：大道弟子受真戒者，次當發願，使我戒根牢固如崑崙山，戒行端嚴如玉京殿，戒光明照如日月珠，勤行精進，安樂道場，至真三清，爲我本源，以戒爲師，無陷邪教。昔有道士二萬六千人，持奉經戒，專心不退，依法修行。十二年中，地司保舉，諸天奏

名。一百年中，白日昇天。又有七萬二千女子，不奉經戒，反行毀謗，見世受苦，死入九幽。是知奉戒功德，不可思議。破戒惡業，難獲赦原。況今日道場，專以解過滌愆，拔亡度死，持戒修齋，尤當精進。諸天童子，金剛神王，三界五帝，神仙兵馬，皆來侍衛。況泰山之中，有三宮空洞之天。神房阿閣，金床玉几，皆群仙所集。若能恪遵上件戒法，則東嶽司命上卿、佑聖真君，與百靈衆真，降臨道場，紀錄齋功，原赦罪魂。若怠慢不恭，破齋壞戒，不足以濟度先亡，轉爲地官所罰，當受風刀之苦。同壇之士，審而行之。臣等無任激切之至，謹啓以聞。

道門科範大全集卷之七十九



道門科範大全集卷之八十

東嶽濟度拜章大醮儀

啓壇行道

法事陞壇如式。

各禮師存念如法。

宣衛靈呪。

東方：

九炁青天，明星大神。煥照東鄉，

洞映九門。轉燭陽光，掃穢除氛。開

明童子，號曰玄卿。備衛我軒，上對帝

君。收魔束妖，討捕兇群。奉承正道，

赤書玉文。九天符命，攝龍驛傳。普

天安鎮，我得飛仙，與道合真。

南方：

三炁丹天，煥景流光。熒星轉燭，

洞照太陽。上有赤精，合契虛皇。開

明童子，號曰華房。總統火兵，備守玉

堂。軒邪束妖，剪截魔王。北帝所承，

風火莫當。流鈴交換，翊衛壇場。正

道流行，敢有巴狂。我享上功，坐運魁

罡。億劫長存，保天無疆，與道合真。

西方：

七炁素天，太白流精。光耀金門，

洞照太冥。中有素皇，號曰帝靈。保

神安鎮，衛我身形。斷絕邪源，王道正

明。宮殿整肅，三景齊并。道合自然，

飛昇紫庭。靈寶符命，普惠萬生。元

皇正炁，來合我身。功加一切，天地咸

寧，與道合真。

北方：

五炁玄天，元始徘徊。辰星煥燦，

光耀太微。黑靈尊神，號曰層威。統

冠飛天，仙裙羽衣。備衛五門，檢精捕

飛。敢有干試，豁落斬摧。玉符所告，

神鎮八威。邪門閉塞，正道明開。映

照我身，三光同輝。策空駕浮，舉形仙

飛，與道合真。

中央：

一炁黃天，調理乾坤。陶鎔陰陽，

總統玄真。鎮星吐輝，流煥九天。開

明童子，號曰天璘。元炁陽精，焰上朱

煙。洞照天下，及臣等身。百邪摧落，

殺鬼萬千。中山神呪，普天使然。五

靈安鎮，身飛上仙，與道合真。

鳴法鼓二十四通。

發鑪。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今陞壇行道，謹奏爲宣意，其諸情悃，已

錄告聞，願得太上十方至真道炁，靈寶

瑞光下降，流入臣身中，令臣所啓，速達

徑御太上無極大道、昊天金闕玉皇上

帝御前。

請稱法位。

具位臣某等，謹同誠上啓，虛無自

然金闕七寶上帝，東宮教主太乙救苦

天尊，傳經演教歷代師真，東嶽泰山天

齊仁聖帝，淑明皇后，太子貴妃，殿上

炳靈公，西齊靈王，嶽下文武考校，一

切曹僚，三界應感，一切真靈。咸望洪

慈，俯回清鑒。臣聞七竅鑿而混沌死，

有情皆爭，五綦至而淫僻生，無主乃

亂。在既繁而既庶，將孰主而孰張。人君奉天道以建邦，必分之於牧伯藩屏；上帝握化權而御物，實付之於嶽瀆神祇。故主聖臣賢之任，操賞罰以御其生；在天地神祇之靈，方錄功而制其死。式俾積善積惡之衆，無逃一生一死之機。明既有於人非，幽必罹於鬼責。故護短飾非者，邦刑所不免；則藏奸匿慝者，天罰所必加。懲愆首過者，亦爲國法之含容；請命求哀者，必在冥司之解釋。爰有崇真之醮，實勤悔過之誠，稽首震方，皈心嶽帝，願託仁慈之鑒，廓開赦宥之門，察凡懇於今辰，拔罪魂於長夜。所啓玄感，上御至真無極道前。

懺悔，三啓，三禮。

臣謹虔誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，嶽下文武考校，一切曹僚，三界應感，一切真靈。願啓洪慈，俯昭丹懇。臣聞木旺東方，實謂藏魂之地；山臨魯國，尤崇望祀之儀。冠五嶽以獨

尊，總百神而爲貴。考博物之志，名尤重於天孫；按風俗之通，文有藏於金匱。壽分修短，驗武帝探冊之祥；簿有職司，見吉譽迓吏之至。信稟生於衆庶，皆係命於嶽靈。所由始而所由終，亦主生而亦主死。二十四獄，常糾惡以結奸；八十六司，必紀功而書過。用罄皈依之志，追思往逝之魂。慮因處世之難危，或染多生之罪垢。一入狴牢之內，難免拘囚；頻嬰捶楚之苛，不勝痛酷。用希恩而解釋，式致敬以禱祈。臣等即事有初，啓壇伊始，式准天尊之告命，敬宣醮主之詞誠，啓壇詞文，謹當宣奏。

宣詞。

諦詳詞語，深可悲哀。蓋哀死而悼亡，遂披肝而瀝膽。深慮罪愆之久積，魂繫陰司；或因按牘之未明，辱從獄卒。用陳情而控告，祈垂聽以哀矜。洗滌愆非，憐其不覺而不悟；曲從凡悃，知其克敬以克親。風馬雲車，俯齋壇而下降；霓旌絳節，迓仙馭以來臨。仰望真慈，下資冥福。臣等恪因淨宇，

肇舉洪儀，伏乞太上三尊，十方衆聖，垂神省覽，鑒察丹誠。乞敕勒此間土地里域真官，一合同心，併力營衛，掃蕩內外，清淨壇場，降伏妖魔，馘滅邪祟。使臣等心安神定，思念立感，啓奏上達，善功成就，無有窒滯，所願隨心。須節次依法行道，續更啓聞。

十二願。

復鑪。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待香煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之八十

道門科範大全集卷之八十一

東嶽濟度拜章大醮儀

清旦行道

法事陞壇如式。

各禮師存念如法。

宣衛靈呪。

青陽虛映，耀日回靈。神虎辟邪，

飛天流鈴。摧奸滅試，萬魔束形。九

微迴道，八威攝精。千真校錄，三元蕩

清。左嘯中黃，右策六丁。七轉八合，

周旋天經。聖化巍巍，大道興行。慶

雲流布，合景黃庭，與道合真。

鳴法鼓二十四通。

發鑪。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今清旦行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天金闕玉皇上帝御前。

請稱法位。

具位臣某等，謹虔誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。咸望洪慈，俯昭丹懇。臣聞五明官內，天尊深憫於輪迴；東極官中，太乙常救於苦趣。蓋爲黔黎之昧道，不知天地之貴人，隨欲海之漂流，逐愛河而沉溺。罪根已積，業網難逃，因貪生而喪生，由求苦而得苦，一辭人世，長繫陰司。故太上開濟度之門，惟真格有薦拔之品，許歸誠而懺罪，得解考以超昇。俗累未除，難免根塵之六；沖科廣被，必聞赦宥之三。豈不矜恤於蠢愚，尚可深懷於悔過。奉道某銜哀茹苦，瀝血輸

誠，嘆已切於逝川，念更深於幽囿。仰惟嶽府，實收召於亡魂；恭啓齋壇，冀感通於帝意。備著詞旨，敢不上聞。

宣詞。

按如詞言，深切哀憫。蓋送死可名於大事，且臨喪必倍於哀情。雖亡者不可復追，夜丹難守；然存者實懷思感，齋悃方伸。深惟管攝之冥司，實係崇高之岱岳。恐尚嬰於縲紲，當廣設於津梁。曲盡精誠，冀蒙鍊度，以今清旦，朝元行道，請法衆等運茲初捻上香，願此香煙，騰空徑上，供養玉清聖境元始天尊，十方道寶。臣等皈身、皈神、皈命，以是功德，上祝今上皇帝陛下。就中堯日，八方均被於照臨；歌詠舜風，萬類悉臻於繁阜。兵不用而干戈偃息，刑不試而囹圄空虛，德惟廣於好生，域盡臻於仁壽。黃旗南運，瑞氣長垂於斗牛；青海西還，哭聲無聞於戰鬼。敷錫五福，皆爲有道之民；泰治萬年，永保無疆之曆。今故燒香，自歸依道尊大聖衆至真之德。得道之後，昇入無爲，和與道合真。

臣聞珠口集真，格日月之停景；洞章嘯咏，致山嶽之吞煙。惟因流響之雲營，能感遊空之仙聖。以今清旦，朝元行道，請法衆等運茲二捻上香，願此香煙，騰空徑上，供養上清真境靈寶天尊，無上經寶。臣等皈身、皈神、皈命，以是功德，歸流醮主某等，住宅太歲尊神，逐隅支干禁忌，門丞戶尉，月煞日遊，不貽悞犯之殃，並與寧居之慶，亦罔恫而罔怨，各來顧以來歆，格猶可以度思，聽每聞於介福。今故燒香，自歸依經尊大聖衆至真之德。得道之後，昇入無形，和與道合真。

臣聞誦九天之寶章，得三官之考筭，披三洞之科典，致百靈之護持。倘依大範之巍巍，必膺遐福之簡簡。以今清旦，朝元行道，請法衆等運茲三捻上香，願此香煙，騰空徑上，供養太清仙境降生天尊，十方師寶。臣等皈身、皈神、皈命，以是功德，歸流醮主某等，合門昌盛，舉族繁榮，宜家必詠於桃夭，有子常歌於芣苢。禍殃掃蕩，若霧捲以冰消；福慶增隆，如嶽停而川至。

明經入仕者，速升於青紫；服田力穡者，累溢於倉箱。式彰善積之家，不憂鬼瞰其室。今故燒香，自皈依師尊大聖衆至真之德。得道之後，昇入無形，和與道合真。

懺方，三啓，三禮。

具位臣某等，謹同誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。咸望洪慈，俯昭丹懇。臣聞哀死事亡，要篤如存之志；履霜濡露，必懷追往之心。書籍滿牀，驗手容而可想；柩椁在案，知口澤之猶存。昔處生前，要知其疾痛痾瘥；今居沒後，敢忘其拘滯沉迷。路隔幽明，苦惱雖難於代受；情緣親愛，薦嚴專務於追修。神莫大於嶽宗，權常司於鬼錄，每察知於功過，式兼制於死生。深惟往逝之魂，愆尤難免；恐在拘囚之地，解脫無由。用罄凡誠，仰祈善貸，洗罪名於黑簿，煉生質於黃

華，速出泉關，早登道岸。上明天尊大慈之澤，下副臣等皈命之誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來清旦行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之八十一

道門科範大全集卷之八十二

東嶽濟度拜章大醮儀

臨午行道

法事陞壇如式。

各禮師存念如法。

宣衛靈呪。

丹靈朱火，炎霞激風。赤輪剛運，

天光八衝。迸威包羅，交變萬方。流

金豁落，群魔滅蹤。辟奸破妖，明耀元

功。金符召制，躡雲策龍。瑤歌慶會，

散花太空。神化冥運，四極安隆。伏

御帝前，罔有不恭，與道合真。

鳴法鼓二十四通。

發鑪。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今臨午行道，謹奏為宣意，其諸情愴，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天金闕玉皇上帝御前。

請稱法位。

具位臣某等，謹虔誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。咸望洪慈，俯垂丹懇。臣聞處震卦而為大塗，固當出萬物之首；登泰山而小天下，亦常居群祀之先。東乃始生之方，岱為管攝之地。生必東首，昔人知向背之宜；氣起東隅，造物全溫厚之致。固知嶽帝之德，實符天道之仁。德本好生，必欲赦除於有罪；仁惟濟衆，豈不廣布於洪恩。既司出入之機，寔制短長之命，苟有皈真而向道，必蒙釋死以興生。況死者人之所甚，哀懼久淪於長夜；而生者人之所大，欲願長處

於明時。況身有善惡之殊，故享年有壽夭之異。跡已絕於人世，遽至殂亡；魂必往於岱宗，未蠲罪累。須與求哀而懺悔，未能補過以滌除。奉道某家哀死悼亡，感今懷昔。念重泉之頓隔，無計攀援；惟妙道之可憑，仰干超度。爰企升中之地廣開，解厄之門于時。陽景方中，盡幽遐而徧照；晝漏停午，肅壇陞以無塵。想衆聖之來臨，顧凡情之上達，大頒善利，速度亡魂，臨午詞誠，謹當宣奏。

宣詞。

按如詞旨，深切悲哀。臣聞薤露易晞，悲傷莫及。樹風不靜，慘怛難言。深慮亡者陽過陰愆，未悟於安存之日；神誅鬼責，併臨於殞沒之時。不見昭昭之人寰，惟就冥冥之幽圉。爰奉九真之妙戒，式遵三洞之祕文。以今臨午行道，請法衆等運茲初捻上香，願此香煙，騰空徑上，供養玉清聖境元始天尊，十方道寶。臣等皈身、皈神、皈命，以是功德，歸流亡人某。冀洗多生之罪，獲逢肆眚之恩。精誠潛感於帝

心，曲垂慈憫；祈禱遙聞於天聽，俯賜哀矜。知其往日之愚迷，許以茲辰之悔悟，命獄卒而釋杻械，付司命而守形骸，早離幽滯之途，即達逍遙之境。今故燒香，自歸依道尊大聖衆至真之德。得道之後，昇入無形，和與道合真。

臣聞紫戶定錄，開度長夜之門；黃華蕩形，鍊成生身之質。自元始之垂教，皆無量以度人。以今臨午行道，請法衆等運茲一捻上香，願此香煙，騰空徑上，供養上清真境靈寶天尊，無上經寶。臣等皈身、皈神、皈命，以是功德，歸流亡過某等。伏願削除罪簿，罷對陰司，落滅惡根，脫蹤苦趣，決山火不流之獄，推雷雨作解之恩。身口意之愆尤，即從洗蕩；神祇鬼之攝制，共賜涵洪。得逢起死之期，俾受更生之化，遵達往亡之迷路，鑒納哀懇之誠心。今故燒香，自歸依師尊大聖衆至真之德。得道之後，昇入無形，和與道合真。

臣聞執圓規而主人，太皞顯司方之地；不崇朝而徧雨，公羊紀觸石之功。固惟喬岳之靈，務錫庶民之福。以今

臨午行道，請法衆等運茲三捻上香，願此香煙，騰空徑上，供養太清仙境降生天尊，十方師寶。臣等皈身、皈神、皈命，以是功德，歸流亡過某等。伏願愛河靜浪，苦海停波，曩因淪誘而不知，今日見聞而頓悟。嶽靈垂佑，浮飛爽於幽寥；空洞生神，歸混炁於梵輔。永脫沉淪之厄，速蒙鍊度之恩。今故燒香，自歸依師尊大聖衆至真之德。得道之後，昇入無形，和與道合真。

懺方，三啓，三禮。

具位臣某等，謹重誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。咸望洪慈，俯昭丹懇。臣聞會同五老，常聽法於天尊；光照九幽，因起請於法解。深憫三塗之厄，尤悲五苦之艱。考治罪魂，則有巨天力士；峻嚴陰獄，則有執法神兵。劍樹刀山，絕筋折骨。鑊湯鑪炭，粉質糜軀。鳥啄蛇吞，犁耕鋸

解。如斯苦惱，實可嗟吁。幸上聖之大慈，與說因緣之起；得真人之垂憫，俾知善行之修。率因三業之纏，亦自六塵之染。觸情徇意，不知石火之難停；受報罹殃，翻使夜扉之久閉。尚許革心而嚮道，皆得解考以滌尤。廣造福田，必仗琅函之經典；稱揚聖號，無踰東極之天尊。寔與斷疑惑之根，俾獲悟希夷之理。醮官某重念哀方深於死沒，罪恐積於生存，業網未除，法橋難上，須憑妙善，與滌前非。爰祇肅於齋壇，式具嚴於禱禮。名先嵩華，常驤首以遐瞻；勢面雲亭，寔注心而懇禱。丹輿綠輦，期飈忽以來臨；羽蓋霓旌，想葳蕤而下降。洞鑒精忱之意，宏開拔度之門。允同救苦之上真，隨聲應感；用濟沉淪之墜魄，委順成形。早逢南極之注生，兼得北都之部衛，漸階仙路，不滯迷途，普使存亡，均諧利樂。上明天尊大慈之澤，下副臣等皈命之誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來臨午行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之八十二

道門科範大全集卷之八十三

東嶽濟度拜章大醮儀

晚朝行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪滅惡，道炁周流。神光照夜，陰翳俱收。萬神降格，扇景乘飈。羣生咸遂，惠徧神州，與道合真。

鳴法鼓二十四通。

發鑪。

無上三天玄元始三炁，太上道君，太上老君，召出臣身中三五功曹，左右官使者，左右捧香，驛龍騎吏，侍香金童，傳言散花玉女，五帝直符，直日香官，合三十六人出。出者嚴裝顯服，冠帶垂纓，關啓玄壇土地，方域神真。臣

今靜夜行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天金闕玉皇上帝御前。

請稱法位。

具位臣某等，謹虔誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。咸望洪慈，俯昭丹懇。臣聞封取金泥，告代尚存於王者；文傳玉冊，定壽寔統於人倫。上連空洞之天，既稱仙境；下制死生之命，籍備陰官。顧惟近逝之亡魂，必有未消之黑簿。罪雖未取，當議罪於輕重淺深；志苟深懲，必許容於悲哀懺悔。咸與維新之路，俾知更始之期。矧度生度命之天尊，皆本東居而闡化；在唱恭唱諾之司馬，亦因東向以誦章。審知嶽帝之仁，不拒凡夫之請。醮官某等悼隙駒之易逝，便隔

幽明；懼氣馬之不良，常趨險路。生前造罪，曾違先覺之心；沒後罹殃，遂受無量之苦。墮地獄而必懷痛悔，在人世而當與追修。庶能格帝之心，或有回天之怒，業根罪網，霧捲冰消，善果福田，雲行雨施。三元育質，復聞太一之執符；八景具神，又得帝君之品命。今則嚴更報漏，初傳甲夜之籌；皎月當天，正廓層空之景。宜伸控告，用致齋誠，靜夜詞誠，謹當宣奏。

宣詞。

按如詞言，深切哀憫。臣聞非元始符命，不足以伸遷拔之階；非玉帝唱名，不足以造登仙之境。須憑至道，用濟亡魂，以無爲而革有爲之非，以無形而去有形之累，准沖科而啓瀆，冀仙馭以齊臨，更據哀痛之情，仰望矜憐之造。以今落景行道，請法衆等運茲初捻上香，願此香煙，騰空徑上，供養玉清聖境元始天尊，十方道寶。臣等皈身、皈神、皈命，以是功德，歸流醮官某家，合門眷聚，舉室尊卑。過往蒙休，早超登於仙路；見存獲慶，各終享於

耆年。皓首厖眉，表柱無慙於遼鶴；鮐背倪齒，支牀必取於靈龜。黃籙書削死之文，青華注增年之籍，驗天錫難老之瑞，蔑日昊大耋之嗟。今故燒香，自皈依道尊大聖衆至真之德。得道之後，昇入無形，和與道合真。

臣聞侍仙玉郎，生神首開於囊錦；長生大聖，度人先起於東方。以今夕景行道，請法衆等運茲二捻上香，願此香煙，騰空徑上，供養上清真境靈寶天尊，無上經寶。臣等皈身、皈神、皈命，以是功德，歸流醮官某家二門先祖，七世高曾。伏願並乘金簡之文，速達玉京之路。超躡三界，得保舉於魔王；升名九宮，遂朝謁於大帝。赴龍門之受會，獲鳥母之督仙，無復冢訟之纏綿，蔑有子孫之殃注。今故燒香，自皈依經尊大聖衆至真之德。得道之後，昇入無形，和與道合真。

臣聞九鍊更生，道實崇於濟死；十方無極，功莫大於度人。以今夕景行道，請法衆等運茲三捻上香，願此香煙，騰空徑上，供養太清仙境降生天

尊，十方師寶。臣等皈身、皈神、皈命，以是功德，歸流旁薦五姓，男女孤魂，四生異類。枯骸朽骨，未離幽滯之鄉；戴角披毛，不免鞭策之苦。冥漠魍魎，端蟻蛸蟻，喪精爽而全迷，抱血氣而無識。或不充於口腹，隕落溝渠；或橫被於干戈，膏濡草澤。崖顛谷墜，水溺火焚，喪身囹圄之中，絕命道途之側，皆罹冤枉之酷，未逢薦度之緣，出沒三途，輪迴六趣。伏願並乘道力，悉賴真慈。頓捨前日之愚迷，不爲陷墜；得遇今宵之接引，咸遂超昇。脫身魑魅之中，蛻迹塵沙之地，盡復生於人類，咸得聽於法音。今故燒香，自皈依師尊大聖衆至真之德。得道之後，昇入無形，和與道合真。

懺方，三啓，三禮。

具位臣某等，謹重誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真仙。咸望洪



慈，俯昭丹懇。臣聞管輅終年，自許登山而治鬼；處厚食祿，亦爲司命之策名。蓋三十六空洞之天，真靈必會；況七十二封禪之主，禮制尤崇。既兼統於幽冥，寔專司於禍福。雖書注於生籍，必先制於亡魂。考過計功，厥有正邪之異；升名落簡，豈無遲速之殊。苟非滌慮以洗心，詎可贖愆而補過。醮官某家，興哀痛首，隕淚傷心。畫像空存，豈見丁寧之語；奠觴雖舉，尤深慘切之情。歡娛頓阻於閨門，拘錄方歸於獄府。無文不度，式修可度之緣；無文不生，願結資生之果。欲請囑於詎士，難效前人；求會遇於少年，豈復同學。惟誦香林之妙法，且傳碧落之空歌。建立淨壇，燈熒煌而破暗；致恭靈寶，香馥郁以騰空。庶殫悃悃之誠，逕達崑崙之嶺。伏願霽冰霜於夜府，沛雨露於幽扃。五鍊陶鎔，俾得隨於生化；萬罪蕩釋，仍復睹於光明。死者有知，得諧頓悟；生者懷感，愈切皈依。溥及含情，均蒙濟度。上明天尊大慈之澤，下副臣等皈命之

誠，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來靜夜行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之八十三

道門科範大全集卷之八十四

廣成先生杜光庭刪

東嶽濟度拜章大醮儀

散壇行道

法事陞壇如常。

各禮師存念如法。

宣衛靈呪。

五星列照，煥明五方。水星却災，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，與道合真。

鳴法鼓二十四通。

發鑪。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，闕啓玄壇土地，方域神真。臣今靜夜行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天金闕玉皇上帝御前。

請稱法位。

具位臣某等，謹虔誠上啓，虛無自然金闕七寶上帝，東宮教主太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。臣聞至岱而柴巡，狩尚欽於虞帝；卜郊而望命，祀尤敬於魯邦。應木德而主仁，善能爲長；當春時之首歲，物所由生。固知嶽帝之仁，本好生惡殺而爲事；兼制天民之籍，亦注生出死而爲功。凡茲總總而林林，皆荷生生而化化。豈忍虐於呼號屠割之地，非欲留於幽囚囹圄之中。但緣有衆之愚蒙，罪皆自取；每循凡情之愛惡，欲固無窮。逞嬌姪而邪僞百端，恣姦巧而變詐萬

狀，罪未正則必使議罪，刑有律則不容逃刑。尚冀泣辜之仁，亦希讞獄之請。出其能改，豈不如圜土之罷氓；死或銜冤，詎使有棘林之哭鬼。用求哀而請命，願補過以懲愆，修大道緣以爲法橋，遵大道教以爲慧炬，求大道庇以爲法雲，依大道慈以爲法雨，庶沐漏泉之澤，早拔幽夜之魂，罄累日之恭勤，極凡誠之悃悃。注想太清之境，祈羽葆之降臨；歌詠步虛之章，企雲駢而來下。暫離金闕，前嘯九鳳和鳴；俯蒞凡筵，後吹八鸞翔舞。聖意感通於須臾之際，真馭往來於倏忽之間，必將人欲而天從，應許下情而上達。臣等無任虔誠，奉迎聖駕。

降聖，初獻，散花。

臣某等謹虔誠上啓，虛無自然金闕七寶上帝，東宮太乙救苦天尊，傳經演教歷代師真，東嶽泰山天齊仁聖帝，淑明皇后，嶽下文武考校，一切曹僚，三界應感，一切真靈。臣聞五嶽分奠於寰區，獨岱宗而爲首；百靈交會於嶽府，蓋民命之所司。非獨探策以爲符，亦

由出祥而顯化。樣石自立，曾孫果紹於唐宗；暴風所飄，祖龍終覆於嬴氏。在王者而尚司其成敗，況民編皆制其死生。爰念先亡，豈超流俗。觸情望行，或貪嫉愚癡而嗔恚；以物從欲，亦放僻邪侈以驕淫。三業爲伐性之斧斤，萬罪作喪身之鳩毒。昔居人世，罟獲陷阱而不知；今入幽關，枷鎖杻械之難免。正名定罪，雖有餘辜；沛澤流恩，尚希曲赦。大道本從於善貸，愚衷敢效於維新。爰仗黃冠，式陳淨醮。披肝瀝膽，備陳悔往之辭；引頸注心，尤切徯來之望。玉檢登封之地，想嚴駕於雲輿；石閭降禪之方，企虛徐於仙仗。惟恍惟惚而潛交精意，來寧來燕而大賜洪庥。不卑筐筥錡釜之供，特享蘋蘩蘊藻之薦。禮方行於初獻，誠既盡於一純。雖慙明德之惟馨，尚有祝詞之陳信。願察哀情於此日，早抽苦爽於陰扉。設醮詞誠，謹當宣奏。

宣詞。

諦詳詞語，灼見哀衷。何必遊曲阜之都，始能傾向；豈惟上大庭之庫，

方極瞻依。念亡魂之有歸，實嶽靈之兼統。肉其枯骨，用周十遍之經；界以生成，必洞九天之奧。資注筭於東斗，得受鍊於南宮。哀死悼亡，雖曰人歸於土；更生受化，復祈天與之形。臣等至誠，頓首再拜，謹陳亞獻。

散花。

臣某等謹同誠上啓，虛無自然金闕七寶上帝，東宮太乙救苦天尊，傳經演教歷代師真，東嶽泰山天齊仁聖帝，淑明皇后，嶽下文武考校，一切曹僚，三界應感，一切真靈。臣聞天非天民，元命皆由於自絕；人苟陷罪，上聖豈忌於恤刑。不令惡無所懲，未顯業皆自作。既路隔三清之遠，必獄沉九地之多。一落重陰，或經累劫。蓋南方號爲火翳，墜之者爛額焦頭；西方鐵曰金剛，入之者鎚心又腹。溟泠處於極北，則苦百毒之丘寒；普掠居於中央，則墜八達之風樹。銅柱屠割之異，火車鑊湯之殊，皆因往日之循情，故有茲時之受苦。況此東方之獄，亦有號於風雷；必關聖帝之神，豈不施其威柄。

幸天尊之光明徧照，不使全迷；雖陰司之考掠嚴行，豈無曲貸。用罄虔恭之志，冀蒙濟度之恩。名香已達於三天，旨酒方行於再獻，髣髴靈幡之至，依稀鑾輅之臨。伏願感通必至於交孚，哀痛詎令於無告。在穹窿日觀之下，早出幽明；近隱奧天門之中，即離苦惱。許悔惡而遷善，俾證道以登真。臣等恭虔，頓首再拜，謹陳終獻。

散花。

具位臣某等，謹重誠上啓，虛無自然金闕七寶上帝，東宮太乙救苦天尊，傳經演教歷代師真，東嶽泰山天齊仁聖帝，淑明皇后，太子貴妃，殿上炳靈公，西齊靈王，嶽下文武考校，一切曹僚，三界應感，一切真靈。臣聞龍漢出書已後，始廓向道之門；赤明開劫以來，惟以度人爲事。神靈普殖，仙化成人，聖母衛房而司馬在庭，主錄勒籍而司命定筭，豈欲毒斯民而苦其死，蓋將蕃庶類而與其生。然人爲或致於逆天，故陰獄必逢於陷地。冤仇所集，鬼神所誅，作不善因，受大苦報。賴有元

始之符命，許時刻以昇遷；亦有魔王之洞章，錄功勤而保舉。俾死魂之受鍊，得生炁以固根。北都羅酆，解厄即離於泉府；南昌宮闕，監生更賴於尊神。執錄把籍而齊到帝前，稟命賦形而周流宇內，皆承元梵之恢漠，各得下鎮於泥丸。醮主某深念亡魂，未登生界。在魯邦所瞻之地，猶滯泉鄉；思孔氏其萎之歌，久辭人世。況有禍殃之未洗，實爲楚毒之難勝。用懇請於仙游，備陳懺悔；仍掃除於淨宇，嚴列供陳。賫香信以誓心，朝真靈而謝過。今則樽行三獻，宵入五更，惟益勵於恭虔，庶仰希於眷佑。伏願洗除罪咎，鑿納精誠。肯旌三寶之功，消名黑簿；早被九龍之命，注祿青宮。乘晨景而希陽翹，開大有而通玄戶。稟形受鍊，得登流火之庭；隨願往生，遂躋仁壽之域。臣與醮主某等，下情無任虔祝之至。

十二願。

復鑪。

謹攝香官使者、左右龍虎君、侍香

諸靈官，當令臣向來靜夜行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌，出戶。

送聖，回向。

道門科範大全集卷之八十四

### 道門科範大全集卷之八十五

廣成先生杜光庭刪

#### 東嶽濟度上章大醮三時懺方儀

清旦

臣衆等至心皈命十方無極太上靈寶天尊，五嶽聖帝，四瀆源王，三界十方，一切神仙，諸靈官，虔誠懺悔。

伏聞仙官洞府，能解厄以除災；東嶽水司，寔主生而制死。萬方瞻仰，蓋因民命之所司；一念皈依，必獲帝心之回眷。願垂慈憫，俯察凡情，許令懺罪以懲愆，盡與滌瑕而蕩垢。今醮主某，切念亡過某，人生偶合於四大，形成已具於六根，因根生塵，積塵成垢，必惡積而不掩，致罪大而難逃。欲拔九夜之魂，須懺六根之罪。蓋以見因可欲，明匪心目內觀；不知色即是空，徒令物擾於外。非禮勿視，終有愧於顏淵；膠目而明，亦深慚於莊叟。悅美麗姚冶之態，耽青黃黼黻之觀。

況有見金而迷人，安能考詳而視履。如斯造罪，是謂眼根。今日今時，願從懺悔。又若欣褻語而側聽，得邪說而樂聞。遇遏雲繞塵之聲，豈無耽惑；聞急絃促柱之響，寧免流連。信從乎謬論狂謀，貪玩乎淫言穢語，不知非禮而勿聽，豈謂尚德而爲聰。如斯造罪，是謂耳根。今日今時，願從懺悔。又若美衣奇，爲悅綺羅之蘭麝。不知鼻徹爲顛，徒令顛困於中。如斯造罪，是謂鼻根。今日今時，願從懺悔。又若耽悅五味，留戀八珍，厭顏回之簞瓢，悅易牙之芻豢，但期口腹之足欲，不知鼎鑊之生冤。況復利口覆邦，巧言亂德。傷人矛戟，忌周雅之莫捫；主辱樞機，因張儀之尚在。徒令言有召禍，不知味即是空。如斯造罪，是謂舌根。今日今時，願從懺悔。又若一身求肆於安佚，不顧人勞；四體務極於優游，惟先自本。侈慾於高堂廣廈，淫心於美

食鮮衣，使之驕己以虧他，不免顰眉而悒快，語以害人而利己，必應動目以睚眦，常欲壞人以自成，豈念施恩而博濟。如斯造罪，是謂身根。今日今時，願從懺悔。又若心妄性本，意入情田，慳貪嫉妬之由生，喜怒哀樂之自出，不念宣尼之四絕，徒惑荀況之五綦。弗定天君，心猿屢放。莫持志帥，氣馬難拘。捨是爲非，從邪背正。養性豈知於寡欲，循情惟取於逕行。如斯造罪，是謂意根。今日今時，願從懺悔。如上懺悔，六根之罪。伏願高真宥罪，衆聖垂慈，許其覺後而覺先，錫以更生而更死，黑簿潛消於積業，朱陵即度於亡魂，垂裕後昆，常蒙道蔭。得道之後，昇入無形，和與道合真。

### 臨午十方懺

臣衆等至心皈命東方玉寶皇上天尊，九炁天君，一切神仙，諸靈官，虔誠懺謝。

伏聞在東爲木，於德主仁。人昧仁心，必乖仁德。不能懺洗，曷免愆尤。醮主某奉爲亡人某，懺悔不仁之

罪。爰自多生，以至今生，或忘惻隱之心，罔抱寬慈之志。在家靡愛親之念，孝養全虧；入仕無憂主之誠，忠勤頓闕。鰥寡孤獨，曷務撫存。疾苦困窮，弗思拯濟。推內溝而不被澤，深愧伊生；笑有刀而潛殺人，但如義甫。弃遺宗族，徒令相怨於一方；委遠弟兄，寧肯同居而共被。問津莫荅，擠壑是圖。既因六行之無聞，豈固一夫之不獲。如斯罪犯，有害寬仁。切慮亡過某身亡之後，墮落東方風雷之獄，或在東嶽聖帝考官之司，輾轉幽關，無由解脫。今日至心皈命東方世界玉寶皇上天尊，九炁天君。伏願敕下泰山，開度亡過某，盡洗不仁之罪，獲霑木德之恩。得道之後，昇入無形，和與道合真。

臣衆等至心皈命南方玄真萬福天尊，三炁天君，一切神仙，諸靈官，虔誠懺謝。

伏聞在火司南，於德爲禮。人乖火德，蓋昧禮經。身積愆尤，須求洗雪。醮官某奉爲亡人某，懺悔無禮之罪。自從多生，以至今生，或忌辭遜之

心，弗蘊恭勤之志。儀既乖於謙制，事赤失於履和，處卑賤而瀆尊，居幼弱而犯上，几席寧思於下坐，道途必務於先行，橫逆鄉黨之間，凌蔑君親之際。夷俟踞肆，常欲對於聖人；袒裼裸裎，不媿浼於賢哲。豈知顏子憂視聽言動之非，寧憶先王美動容周旋之中。墮與慢而兼用，驕與傲以相成，縱誕若斯，禮儀全失。今切慮亡過某身亡之後，墮落南方火翳之獄，或在南嶽聖帝考官之司，輾轉幽關，無由解脫。今日至心皈命南方世界玄真萬福天尊，三炁天君。伏願敕下南方，開度亡過某，盡洗無禮之罪，超昇快樂之天。得道之後，昇入無形，和與道合真。

臣衆等至心皈命西方太妙至極天尊，七炁天君，一切神仙，諸靈官，虔誠懺謝。

伏聞在金主西，於德爲義。人亡金德，蓋昧義方。身積愆尤，須求洗雪。醮官某奉爲亡人某，懺悔不義之罪。自從多生，以至今生，或忌羞惡之心，甘受爾汝之實。食祿耽寵，尤且後

君。刎頸結交，尚欲賣友。事已志於井辯，利寧尚於乾和，弗思孟氏之答梁，但效宋慳之悅楚。不勝其欲，則化從夏癸；可謂之殘，則惡類商辛。不能絕穿窬而無害人，豈知循漸摩而由正路。取非有而近於盜，況復適市而攫金；戮不辜而過於嚴，方且舞文而成獄。如斯罪慮，莫適由行。切慮亡人某身亡之後，墮落西方金剛之獄，事繫西嶽聖帝考官之司，輾轉幽關，無由解脫。今日至心皈命西方世界太妙至極天尊，七炁天君。伏願敕下西方，開度亡過某，盡洗不義之罪，獲聞至道之功。得道之後，昇入無形，和與道合真。

臣衆等至心皈命北方玄上玉宸天尊，五炁天君，一切神仙，諸靈官，虔誠懺謝。

伏聞在水居坎，於德爲智。人乖水德，蓋無智心。身積愆尤，須求洗雪。醮官某奉爲亡過某，懺悔無智之罪。自從多生，以至今生，弗辨是非之禮，但懷愚昧之情。不自知而不知人，豈舉直而能直，枉睫在眼而弗見，肩居

中而愈昏。我固有直於四端，徒成憤憤；寔當知於其二者，反自冥冥。凌禮犯義，不識愛敬於君親；捨信弃忠，豈知敦睦於朋友。光難回於反照，詐且並於今愚。道固易知而易行，剛欲背道；民有後知而後覺，尚愧齊民。徒勞蒙而履刑，不悟蹇而知止。罪誠難免，智已全迷。切慮亡人某身亡之後，墮落北方溟泠之獄，事繫北嶽聖帝考官之司，輾轉幽關，無由解脫。今日至心皈命北方世界玄上玉宸天尊，五炁天君。伏願敕下北方，開度亡過某，盡洗無智之罪，即生快樂之天。得道之後，昇入無形，和與道合真。

臣衆等至心皈命東北方度仙上聖天尊，梵炁天君，一切神仙，諸靈官，虔誠懺謝。

伏聞水居北方，善能利物。人無利物，貪愛資深。身積愆尤，須求洗雪。醮官某奉爲亡人某，懺悔貪愛之罪。自從多生，以至今生，不能損己以利他，惟務損人而益己。但知憂惟不足，豈知分無求多。計頃千百而爲田

翁，藏鏹鉅萬而爲錢虜。不知易滿百歲，有如隙駒；剛欲不拔一毛，以爲身禍。或欺孤兒寡婦，奪家產而不還；若爲坐賈行商，倍價直而自喜。謗僧毀道，全無喜捨之心；見餒遇寒，曾靡矜憐之意。賒貸取一倍之利，未滿欲心；賓友費十百之錢，已形慍色。況有殺人取貨，詎知分人以財。如此愆非，積成殃禍。切慮亡過某身亡之後，墮落東北方鑊湯之獄，事繫岱宗考官之司，輾轉幽關，無由解脫。今日至心皈命東北方世界度仙上聖天尊，梵炁天君。伏願衆聖垂慈，亡魂受度，盡洗貪愛之罪，得生快樂之天。得道之後，昇入無形，和與道合真。

臣衆等至心皈命東南方好生度命天尊，梵炁天君，一切神仙，諸靈官，虔誠懺謝。

伏聞東方木德，又欲廣生。人無好生，殺害爲甚。未能洗雪，曷克愆尤。醮主某奉爲亡人某，懺悔殺害之罪。自從多生，以至今生，惟甘適口之嗜肥，不念有生之畏死。彎弓挾彈，落

飛羽於雲中；垂網沉鈎，出游鱗於水底。濡沫未忘而鬻鬣已頓，搏風在念而羽翮皆摧。犬豕牛羊，皆極情而擊刺；鷄鶩鵝鴈，嘗循意以烹煎。聲呼號於刀斧之前，血淋漓於鼎俎之上。封刳解剝，不思均是色身；煮炙炮燔，但謂甘充口腹。思魯恭之馴雉，用意何殊；想西巴之放麕，存心曷異。非能不忍其死，徒令多喪其生，積此愆尤，寧無陷墜。切慮亡人某身亡之後，墮落銅柱之獄，事繫岱宗考官之司，輾轉幽關，無由解脫。今日至心皈命東南方好生度命天尊，梵炁天君。伏願衆聖垂慈，亡魂受度，盡洗殺害之罪，即生快樂之天。得道之後，昇入無形，和與道合真。

臣衆等至心皈命西南方太靈虛皇天尊，梵炁天君，一切神仙，諸靈官，虔誠懺謝。

伏聞南方火德，又在貌嚴。人失貌嚴，必居邪行。不求洗雪，曷免愆尤。醮主某奉爲亡過某，懺悔邪行之罪。自從多生，以至今生，或懷姪佚之

心，失守廉潔之操。擬求思於漢上，懋期會於桑中，美澤陂之蒲荷，贈溱洧之芍藥。有女懷春而誘於士，匪來貿絲而即我謀。盛服而強其委禽，踰牆而搜其處子。志希任達，梭折齒而不慙；情慕合歡，琴挑心而切喜。但知粉白黛綠，有美顏容；豈謂目挑心招，深乖禮義。事有形於盜嫂，跡且至於竊妻。積此罪愆，必貽殃禍。切慮亡人某身亡之後，墮落西南方屠割之獄，事繫岱宗考官之司，輾轉幽關，無由解脫。今日至心皈命西南方太靈虛皇天尊，梵炁天君。伏願衆聖垂慈，亡魂受度，盡洗邪行之罪，得生快樂之天。得道之後，昇入無形，和與道合真。

臣衆等至心皈命西北方無量太華天尊，梵炁天君，一切神仙，諸靈官，虔誠懺謝。

伏聞西方金德，又在禁非。人不禁非，偷盜爲甚。不求洗雪，曷免愆尤。醮主某奉爲亡人某，懺悔偷盜之罪。自從多生，以至今生，不貴西山之高，惟慕東陵之猾。目窺手探，晝伏夜

行。徒患其貪，若宋邦之向氏；不知其道，慙齊地之國生。曾非勤苦之得財，但務穿窬而取賄。擔囊負櫃，翻更喜於緘滕；抉門斬關，豈更憂於扃鍵。落帽而得藏揲，但若祖班；同舍而償誣金，豈如直子。赭裾而識，曾貽張敞之擒；察眉可知，難追卻雍之見。謾言先勇而後義，復有王藏而賴姦。積此非邪，遂成殃咎。切慮亡人某身亡之後，墮在西北方火車之獄，又關岱嶽考官之司，輾轉幽關，無由解脫。今日至心皈命西北方無量太華天尊，梵炁天君。伏願衆聖垂慈，亡魂受度，盡洗偷盜之罪，得生快樂之天。得道之後，昇入無形，和與道合真。

臣衆等至心皈命上方玉虛明皇天尊，一炁天君，一切神仙，諸靈官，虔誠懺謝。

伏聞天道貴正，以一存誠。人無正誠，背違天道。不能洗雪，曷免愆尤。醮官某奉爲亡人某，懺悔無信之罪。自從多生，以至今生，綺語妄言，背盟負約。軍已亡於甲冑，尚冀安

全；車非有於軌輓，猶言行可。金殊季布之諾，責在友朋；紳異子張之書，怨形州里。不念能開之金石，或且矯誣於鬼神。可復其言，終殘魯語。二三其德，遂愧周詩。浮偽虛誣，豈徒欺物而兼爲欺己；詭譎誕幻，不能動人而豈復動天。但欲掩世俗之聾盲，曾不畏日月之照臨，積失誠信，難免愆尤。切慮亡人某身亡之後，墮落冥途，事繫三元考官之司，無由解脫。今日至心歸命上方玉虛明皇天尊，一炁天君。伏願三官解釋，亡者超升，盡除無信之愆，得證逍遙之果。得道之後，昇入無形，和與道合真。

臣衆等至心皈命下方真皇洞神天尊，九壘土皇君，一切神仙，諸靈官，虔誠懺謝。

伏聞地道貴信，惟直以方。人無信直，背違地道。不能洗雪，曷免愆尤。醮主某奉爲亡人某，懺悔不正之罪。自從多生，以至今生，身如鈎曲，事異短方，捨正路而不由，蹈邪徑而常往，諂詐而害良善，姦詭而嫉正人。直

義不容，見夷吾編棧之喻；邦雖有道，無史魚如矢之心。毀譽不見於直行，機巧遂聞於無恥。童五尺而來，適市必務肆欺；詩三百而貴，無邪不知可蔽。用力惟從於回適，求福罔念於不回。積此愆尤，自貽罪戾。切慮亡人某身亡之後，墮在九幽之獄，事繫酆都泉曲考官之司，輾轉寒鄉，無由解脫。今日至心皈命下方真皇洞神天尊，九壘土皇君。伏願酆都罷對，泉曲宥魂，盡洗不正之愆，永證逍遙之果。得道之後，昇入無形，和與道合真。

### 靜夜都懺

臣衆等志心歸命十方太乙救苦天尊，東嶽天齊仁聖帝，淑明坤德大皇后，司命真君，炳靈孚佑王，護國顯應侯，西齊大王，十宮真君，六曹八十四司判官，一切神仙，諸靈官，虔誠懺謝。

伏聞古鏡含光，或緣垢穢；明蟾委照，尚被雲遮。鏡本無瑕，垢從外蔽；月非有翳，雲自傍生。垢既磨而鏡罔不明，雲盡捲而月無不照。況斯人之均稟，亦覺性之圓明。但性逐情

移，欲因物誘，心不存於養性，欲遂至於恣情，造罪造惡而弗知，忘本忘初而不返。倘或一朝而覺悟，即令萬罪以蕩除。故上天開大宥之門，在衆聖廣惟新之化。惠風鼓蕩，掃除色界之塵；法雨流行，洗滌多生之障。誠心皆容於懺悔，今日用罄於皈依。醮主某伏念亡過某，切慮生存之日，習邪勝正，背覺合塵，凌侮君親，暴蔑師長，不務仁心而愛物，常多己是而非人。貫朽粟陳，豈興哀於鰥寡；食鮮衣美，寧軫念於飢寒。罔羅水陸之禽魚，不管喪身失命；鞭撻門庭之奴僕，豈憐刻骨傷肌。喜驕傲而矜己自賢，好嘲諷而玩人喪德。權衡度量，有輕重大小之欺；契券質劑，有塗注改抹之妄。謗毀僧道，苦怯欺愚，多行呪咀而褻瀆鬼神，自恃豪強而背違天地，暴橫鄉黨，嫉妬賢良。見金寶而生貪，陰謀奪取；析田產而自厚，詎肯平分。私囑官吏而冤陷無辜，連結俠少而毆繫良善，姪良家子，汙比丘尼，假貸不還而背約食言，賣債取息則逞奸售偽。如



斯罪戾，盡出非邪。今日皈命高真，實懷痛悔；投誠嶽帝，惟務深懲。伏願沛澤流恩，滌瑕蕩垢，破幽牢於長夜，指覺路於迷途。釋罪東宮，速休考對；注生南極，即使超昇。出苦惱河，達逍遙岸，仍泊九玄七祖、六趣三途，俱脫陰曹，並生天道，冢訟不興於往逝，伏連無及於後人，利及存亡，功霑水陸。得道之後，昇入無形，和與道合真。

道門科範大全集卷之八十五

道門科範大全集卷之八十六

廣成先生杜光庭刪

靈寶崇神大醮儀

自然行道

法事陞壇如式。

各禮師存念如法。

宣衛靈呪。

五星高耀，瑞氣飛浮。元始集神，

天地交周。玉符寶節，嘯命微幽。擲

火揚威，奸凶無留。萬魔振伏，紛葩却

消。摧怪滅惡，道炁周流。神光照夜，

陰翳俱收。萬神降格，扇景乘飈。羣

生咸遂，惠徧神州，與道合真。

鳴法鼓二十四通。

發鑪。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，闕啓玄壇土地，方域神真。臣今靜夜行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天金闕玉皇上帝御前。

請稱法位。

具位臣某等，謹虔誠上啓，三清上

帝，十極高真，日帝月皇，南宸北斗，三

官五帝，四聖真仙，演教傳經歷代師真

聖衆，酆都嶽瀆、憲府洞天、水國雷司、

城隍温部、當境廟社，應感一切衆真。

咸望洪慈，洞昭丹懇。臣聞大而化之謂

之聖，聖能充塞於兩間；感而遂通謂

之神，神能通變於四海。本上穹之星

曜，作下土之威靈，代天而主制山川，

察民而虧盈禍福。善之極者，則臻其

福善；痾之深者，則肆以灾痾。儼然

無黨以無偏，必可以正而以直。天以

神而繩愆糾繆，人以神而降鑒儲祥。

神人既有於相依，天道必能於監照。

德斯孚佑，恩豈忽忌。醮主某幸處人

倫，切依神庇。當奉犧牲之祭，恐未盡

於嚴恭；敢陳蠲潔之修，庶獲伸於昭報。諷瓊篇之隱韻，歌碧落之洞章。欽仰元慈，用延景貺。某職當宣化，志在佐時，務積行以修功，期拯民而濟物。凡有陳露，敢不上聞，具有詞誠，謹當宣奏。

宣詞。

諦詳詞語，灼見至誠。非沖科何以感神道之睠旂，非道範何以增尊神之威福。是用輒憑道侶，恭演仙科，冀回有裕之天慈，重益無邊之神力。臣聞君不自治，付守令以主民；天本無言，委神祇而贊化。凡分職共理於靈祠福地，則承流宣化於壯縣名藩。害盈益謙，賞善罰惡。凡有吉凶之兆，皆能影響之隨。以今崇神行道，請法衆等運茲初捻上香，願此香煙，供養太上三尊，諸天上帝。以是功德，上祝神位。

伏願真乘頓悟，道果彌高，享神福之無窮，昇仙階之上品。然後福流國祚，保佑帝圖，四海晏清，八方寧靖。今故燒香，自皈依道尊大聖衆至真之德。得道之後，昇入無形，和與道合真。

臣聞秘言傳世，即爲衆妙之門；大道無形，常寓經綸之旨。教法本同一理，賢愚自異兩途。苟能靜慮以研機，乃可因心而會道。以今崇神行道，請法衆等運茲二捻上香，願此香煙，供養璇霄列聖，紫極高真。以是功德，上祝神位。伏願靈通益顯，神武維揚，徽稱廟食而永昌，仙職丹臺而高證。然後流恩幽趣，賜澤陰關，凡居狃狂之滯魂，速遂超昇於仙界。今故燒香，自皈依經尊大聖衆至真之德。得道之後，昇入無形，和與道合真。

臣聞開導群生，演先天之教典；根元萬善，義當主於師尊。證入之妙，已達乎先；希夷之風，有傳於後。眷茲信士，欽乃善功。以今崇神行道，請法衆等運茲三捻上香，願此香煙，供養嶽瀆帝王，地水仙衆。以是功德，歸流醮主某家。伏願恩休廣被，灾咎潜消。世襲科名，床滿崔琳之笏；家傳孝行，亢盈郭巨之金。經紀者則貨財有餘，在公者王事皆吉。福如川至，壽與嵩高。十日雨而五日風，民有秋成之

望；三年耕而九年蓄，世無憾歲之憂。比屋無虞，井厘康乂。今故燒香，自皈依師尊大聖衆至真之德。得道之後，昇入無形，和與道合真。

重稱法位。

具位臣某等，謹重誠上啓，三清上帝，十極高真，日帝月皇，南宸北斗，三官五帝，四聖真仙，演教傳經歷代師真聖衆，鄴都嶽瀆、憲府洞天、水國雷司、城隍温部、當境廟社，應感一切衆真。咸望洪慈，洞昭謝悃。臣聞三天十極，惟列聖之攸居；九州八紘，有神祇而主宰。蓋以帝御九重之宣命，使其神維四海以舒張。是以天與神爲用者，若水濟舟；神與人交孚者，如谷應響。民仍禍福則神目掣電，崇起灾祥則天監昭彰。或佐國以興功，或爲民而除害，木馬有流汗之異，金雞有唱曉之期，銅梁玉壘之殊功，汶水珠江之盛事。況以天不降其大任，地豈得乎太寧？山川隆不裂之基，人鬼兩不傷之理。此皆神道之匡衛，致令民命以恬安。醮主某素欽奉於神靈，每興修於

禴祭，未盡虔恭之禮，常懷兢惕之憂，慮招瀆侮之殃，難致安榮之喜。用是恭依妙典，肅建蘭場，列蘋蘩蘊藻之儀，薦心腹肺腸之請。仰靈光而設醮，俯對神御以宣揚。願回不測之威靈，俯鑒再三之懇禱。伏冀五星循度，躋年穀之屢豐；三階太平，俾雨暘之時若。民拱北辰之德政，士窺東壁之文章。商賈趨天市之垣，仕進躡文昌之府。農夫播種，願賜豐穰。嬪娣蚕桑，悉加充衍。更冀貪狼掃跡，天狗回頭。萬里妖氛，挽天河而一洗；千靈垂貺，整箕柄以重張。次乞郡縣肅清，萬境寧靜，里閭亡水火之患，方隅除疫癘之灾，和氣充盈，太平交享，盡荷裁成之化，俱蒙再造之恩。上明神君汪洋之德，下副兆民皈依之忱，謹啓以聞。

十二願。

復鑪。

謹攝香官使者、左右龍虎君、侍香諸靈官，當令臣向來行道之所，自然生金液丹碧，芝英百靈，衆真交會，在此香火鑪前。當願十方仙童玉女，接待

蘭煙，傳臣向來所啓之誠，速達徑御至真無極大道、昊天玉皇上帝御前。

出堂頌。

出戶。

道門科範大全集卷之八十六

道門科範大全集卷之八十七

靈寶崇神大醮儀

設醮行道

法事陞壇如常。

各禮師存念如法。

宣衛靈呪。

五星列照，煥明五方。水星却灾，

木德致昌。熒惑消禍，太白辟兵。鎮

星四據，家國利亨。名刊玉簡，字錄帝

房。乘飈散景，飛騰太空。出入冥無，

遊宴十方。五雲浮蓋，招神攝風。役

使萬靈，上衛仙翁，與道合真。

鳴法鼓二十四通。

發鑪。

無上三天玄元始三炁，太上道君，

太上老君，召出臣身中三五功曹，左右

官使者，左右捧香，驛龍騎吏，侍香金

童，傳言散花玉女，五帝直符，直日香

官，合三十六人出。出者嚴裝顯服，冠

帶垂纓，關啓玄壇土地，方域神真。臣

今靜夜行道，謹奏爲宣意，其諸情悃，已錄告聞，願得太上十方至真道炁，靈寶瑞光下降，流入臣身中，令臣所啓，速達徑御太上無極大道、昊天金闕玉皇上帝御前。

請稱法位。

具位臣某等，謹虔誠上啓，三清上帝，十極高真，日帝月皇，南辰北斗，三官五帝，四聖真仙，演教傳經歷代師真聖衆，鄴都嶽瀆、憲府洞天、水國雷司、城隍溫部、當境廟社，應感一切衆真。咸望洪慈，洞昭丹懇。伏聞天道杳冥，惟德是輔。神明正直，與人相依。敬洗滌於凡心，用感通於明德。英靈如在，精爽必申。恭惟神位，護國庇民，除害興利，名刊祀典，煥若列星，欣逢消吉之辰，恭展蕭香之薦，輿情共慶，庶類咸熙。幸垂盼響之符，少副勤劬之請。

降聖，初獻，散花。

臣謹同誠上啓，三清上帝，十極高真，醮筵證盟，一切真宰。願啓洪慈，洞回清鑑。伏聞惟神善貸救人而無棄

人，至聖弗居不德是以有德。以凡求聖，則疑於曠絕；以聖格凡，則出於慈光。恭惟神位，得一炳靈，降神下土。剪妖去孽，如拈木之無難；佐國興邦；乃奮威之有健。佳辰幸會，報德寧忘。黍稷瓜花，粗致欽崇之禮；聰明正直，佇回陰隲之私。今有詞誠，謹當宣奏。

宣詞，亞獻，散花。

詞文昭告，諒達聰明。今弟子某激切虔祈，曲盡心聲之發；洪靈不測，有如谷應之期。伏冀臨在上而質在旁，曲應凡庸之禱；聽思聰而視思敬，俯垂莫大之恩。伏聞自神自明，禮載前知之妙；作威作福，書明立極之端。惟淵懿之資深，斯眇綿而作炳。曠神明而洞照，本睿哲之流光。恭惟神位，天躔分曜，山岳英華，既乃聖而乃神，能立天而立道，威靈顯赫，徽號褒崇。某確意精修，蕙饋欽奉，伏冀英靈如在，妙化來歆，監其禮而錄其誠，聽其言而觀其行。神之愛子，民福無窮。衆等虔恭，謹陳終獻。

散花。

臣謹重誠上啓三清上帝，十極高真，醮筵證盟，一切真宰。咸望洪慈，俯回昭鑑。伏聞人爲天地之心，無心則天地空其用；神乃陰陽之本，亡本則陰陽蔑其靈。天不人不因，人不天不主。天人交感，則三才共治；神鬼相符，則一德潛寧。恭惟神位，與天爲徒，執古之道，受上帝之眷命，執下土之絃綱。惟我國家，欽崇祀典。無灾無害者，褒之廟號；有功有績者，錫以徽稱。俾能扶佑於邦家，迄又安寧於民社。醮主某御恩有日，報德失時，略伸芹薦之儀，用致心歸之切。今則禮周三獻，詞不再陳，祈大德之有容，福小民之無爽。而今而後，罪若露而見，睨即消；自東自西，福若河而值冬不決。道途平坦，家室安然，官私口舌并消除，火盜虎狼俱屏息，凡居出入，長賴神庥。但某等下情，不任虔祝之至。

十二願。

復鑪。

謹攝香官使者、左右龍虎君、侍香諸靈官，當令臣向來設醮行道之所，自

然生金液丹碧，芝英百靈，衆真交會，  
在此香火鑪前。當願十方仙童玉女，  
接待蘭煙，傳臣向來所啓之誠，速達徑  
御至真無極大道、昊天玉皇上帝御前。

出堂頌，辭師。

送聖，化財。

道門科範大全集卷之八十七

（吳亞魁點校）

# 025 道門通教必用集

經名：道門通教必用集。原題  
宋呂太古集。九卷。底本出  
處：《正統道藏》正一部。

## 目錄

序

目錄

卷一

矜式篇

太上出家經訓

玄門入道求出家法身十七願念

歷代宗師略傳

卷二

詞讚篇

啓堂頌

焚牒頌

智慧頌

奉戒頌

請師頌

唱道讚

華夏讚

三啓頌三首

玉京步虛詞十首

金闕步虛詞

步虛詞十首

玉清樂

上清樂

太清樂

白鶴詞(四首)

出堂頌

經儀三歸依讚

宿命讚

啓經讚

送經讚

解坐讚

七真讚

小學仙讚

焚章頌(二首)

焚詞頌

度簡頌

符戒頌

焚簡頌

山簡頌

水簡頌

三塗五苦頌

明燈頌

散花樂

古散花樂

五字散花樂

散花詞

焚朱表頌

解壇頌

還戒頌

辭師頌

奉送讚

難思議讚

祝鎮天真文

一鍊度真文

又一首

五方消灾真文正字

祝消灾真文

祝符戒

祝茭龍

十二念

十二願

巢儀十二念

普供養讚

祝八威真文

八威真文

卷三

讚詠篇

五方衛靈咒

五鍊生尸寶章

外壇讚詠

爲亡者皈依三寶懺罪

又一首

卷四

啓奏篇

高功上御案香祝

上手爐香祝

上洞案香祝

上手爐香祝

祝香後入意文

啓壇文

啓壇文

黃籙齋祝香入意後文

諸齋祝香陳願意後文

啓壇文

啓壇告真

宿啓白五師文

建壇發爐

啓齋五師前

清旦

臨午

靜夜

本命經文

真武經文

安宅經文

卷五

職佐篇

黃籙第一日：爲國歎經文

第二日：遷拔歎經文

第三日：消灾歎經文

懺悔

黃籙啓壇懺悔

散壇懺悔

消灾懺悔

遷拔懺悔

外壇開方

黃籙大齋第一度：召請祀典神祇

第二度：召請亡魂

第三度

沐浴度魂儀

咒施甘露法食儀

卷六

讚導篇

卷七

威儀篇

勅壇儀

杜天師殺劍咒

張無盡金籙儀中煞劍咒

楊次公敕水啓白

張無盡啓白

新修

卷八

威儀篇

第一時

第二時

第三時

第四時

第五時

第六時

第七時

第八時

第九時

卷九

精思篇

發奏

白事

陞壇

夜入戶呪

夜出戶呪

朝入戶呪

朝出戶呪

存思

步虛精思

釋訣

命魔咒

命魔說

誦經靜念訣

《道德經》精思存神訣

《度人經》精思存神訣

釋訣

《南北斗經》精思存神訣

《道德經》玄蘊咒

《度人經》玄蘊咒

《生神經》玄蘊咒

趙明舉法師存氣熏街歌

印章七元魁杓真形符

伏章步斗圖

步斗歌

道門通教集序

天師立教於西蜀，廣成終老於益州，故蜀之人奉道為盛，而儀注亦甚。詳第所傳，素無刊本，差誤實夥。頃觀中藏書既成，適左史簡池劉公、太常眉山朱公，官中都。元素因宗丞二江李公有請，得都下道經數百卷，皆吾蜀所缺者。其間科儀居多，乃令小師太古，參較同異，考古辨今。始自童蒙，訖於行教，綴緝成集，以貽後人，會掌兩川黃籙。四方同人，莫不輻湊，用是俾鋟諸木，與眾共之。予嘗患不善，斲者旁觀袖手，又從而指笑之，或則鉗口結舌，祕為己私，終身不肯吐一辭與吾徒。是正豈太上為人，則愈有愈多之意，教門缺典，不特此識者，尚同是念，以修正一廣成之風，不亦宜乎？嘉泰改元，辛酉季夏，江原樸庵道士呂元素書。

古者，天子祀天地，格神明，皆具犧牲之禮，潔粢盛，備衣服，先散齋，而



後致齋，以成其祭，猶慮儀不及物，與不成享也，而況士庶乎？是以太上談經立法，以好生惡殺爲務。繼之天師因經立教，而易祭祀爲齋醮之科，法天象地，備物表誠，行道誦經，飛章達款，亦將有以舉洪儀，修清祀也。是故歌雍詩頌清廟，使聲成文，謂之音可以通于神明，禱于上下，唱步虛，詠洞章，原其理也，亦無二致。自天師立教之後，而道家者流合規儀者，則失於聲音之學；得音聲者，失於規儀之備。亦猶公輸子之巧，不以規矩，安可以制其方圓乎？宋時鶴林呂氏，因詣京師，覽藏典而搜括道玄，編成集策，目之曰《通教集》焉。上自天子，下至庶人，爲國爲家，爲存爲亡，崇修醮祭，欽崇道教，無不旁通。抑亦使學人，必以規矩，而通達其教典。觀其用心，亦普矣。雲

臺何公，亦因而發明，而使人諳鍊科教，編類《鍊教集》通行於世。二書之中，互有得失，觀覽之者，不無疑焉。今錦城三井觀道士馬道逸，筮跡於簪裳者，積有年矣，留心於科教者，未嘗

時輟。於是混《通教》、《鍊教》二集，取其長者，類聚以成一家之書，鈔梓以廣其傳。囑予以叙其意，愚曰：講學之中，予每留心。科教之內，積年以來，予亦荒嬉。子以爲教，而弘是心，予敢不勉，以成其美。學人得此，以知軌範，志士修之，以通神明。是亦教門之盛事也，誰不予之。歲在元貞中秋，仁安觀長講弘道悟真大師韓混成謹序。

## 道門通教必用集目錄

慕道之初，必求標準，發願持戒，經訓具存。自漢及今，扶宗立教，人天師表，皆可模範，故立矜式篇第一：

太上出家經訓

歷代宗師略傳

童蒙入道，應和居先，起自啓堂，訖于辭聖，皆可讚頌，著於經科。點授之初，可無善本，故立詞讚篇第二：

步虛詞及讚頌

祝諸品真文符簡

五方消灾真文

十二願念

童子長成，教習音韻，單聲誦念，讚助行持，傳聞舛差，蹈襲蕪鄙，悉加釐正，俾就謹嚴，故立讚詠篇第三：

五方衛靈呪

五劫生尸章

外壇讚詠

法橋文

爲亡者歸依三寶懺罪兩章

安慰亡者并奉送文

舊本步虛篇第四：

今刪出步虛，添鍊教啓奏篇。

關奏啓白

上御案香

祝香後入意

啓壇文

黃籙齋祝香後文

宿啓白五師文

建壇發爐

啓齋五師前啓師

黃籙爲國三時告師

本命經文

真武經文

安宅經文

冠簡之初，必由讚佐，內外法事，

非止一條，文或未安，本或多誤，初步

宜謹，擇善而從，故立職佐篇第五：

三日歎經文

黃籙啓散懺悔

消災明真懺悔

開五方文

三度召請文

呪食儀沐浴儀

舉揚之職，分司威儀，節奏詳明，

音韻典雅，廣成著述，專立爲科，必得

其人，以動衆聽，故立讚導篇第六：

杜天師讚道儀序

開壇儀軌

宿啓儀軌

行道儀軌

諸懺舉方

轉經儀軌

齋堂儀軌

言功設醮儀軌

古稱威儀，今號都講，一壇節奏，

同著前篇，敕水戒嚴，啓經讚述，皆爲

緊要，尚多訛誤，故立威儀篇第七：

敕壇儀

九時引經文

高功之任，道德威儀，檄召存思，

百靈咸聽，各有儀注，考諸前人，集爲

一篇，以備講究，故立精思篇第八：

發奏訣法

白事說

升壇關奏說

朝夜出戶入戶呪

禮師存念法

鳴法鼓說

步虛命魔存思法

誦經靜念訣

開經蘊呪四首

出官精思存神訣

宣章讀太清銜說并歌

印章七元符并說

通天門符聚散形并呪

伏章步斗圖并歌

右八篇，皆從道教經科，及歷代宗

師、近世知名之士，參詳考究，集爲一

編，不敢少有臆說，以誤後賢。祕爲一

家之私，則非通論，爰鋟諸木，與同學

共有，爲傳道度人指教之須。吾儕勿

以輕授白衣之徒，自取悔吝。蓋此集

稍似詳備，彼必棄業背本，從事於斯，

他日敗亡，不無謗怨。其如老莊玄虛之

學，金丹養鍊之方，奉道之家，人人有

分，非此道之在世，係乎朝廷科制也。

通識之士，必以斯言爲然。嘉泰辛酉季

夏中潯江原鶴林道士呂太古書。

# 道門通教必用集卷之一

鶴林道士呂太古集

## 矜式篇

### 太上出家經訓

《出家因緣經》云：道士，凡有七階。天尊言：一者天真，謂體合自然，內外純靜。二者神仙，謂變化不測，超離凡界。三者幽逸，謂含光藏輝，不拘世累。四者山居，謂幽潛學道，仁智自安。五者出家，謂捨諸有愛，脫落囂塵。六者在家，謂和光同塵，抱道懷德。七者祭酒，謂屈己塵凡，救度危苦。所以名道士者，謂行住坐卧，舉念運心，惟道是修，惟德是務，持齋禮拜，誦經燒香，奉戒修身，然燈懺悔，布施願念，講說大乘，教導衆生，發大道心，造諸功德，普爲一切，後已先人，不雜塵勞，惟行道業，故得天上地下、六道四生，禮拜皈敬，最爲尊勝，不朝天子，不揖諸侯，作人天福田，爲三界依怙。

### 玄門入道求出家法身十七願念

一願不殺生命，斷聖種故。二願永不飲酒，敗習性故。三願永不血味，與體同故。四願不食五辛，障生天故。五願不犯姪欲，自亂心故。六願不說他過，人惡聞故。七願不貪財貨，爲妨道故。八願勤修功德，自莊嚴故。九願不惱亂人，成怨業故。十願利人不捨，不異我故。十一願永不妄語，人不信故。十二願永不懈怠，退道心故。十三願修學一切方便，成種智故。十四願永不盜一切物，必倍償故。十五願長內修齋，得齊心故。十六願常照諸法空靜，速進道故。十七願常敦默如愚，自安靜故。

### 已上並童子入道受持。

《昇玄經》云：爲道士者，與彼俗人，事事有反。目不多瞻，見好不驚。耳不聽讒，不聽亂聲。鼻不嗅香，芬芳之腥。口不嗜甘，茹犯衆生。心不想欲，財色華榮。手不好用，足不惡踐。此道士之行也。

《昇玄經》云：凡出家者，除去飾

好，服御巾褐，卑牀小屋，容身而已，不得奢侈。除病及遊，行就請外，淨居閑處，耽玄樂道，此謂聞道初門、大德之本也。

《定志經》云：昔有十二年少，處世閑樂，共作好食，酣飲嬉戲，或復論議爲道持戒之難易。天尊於大定見之，以此年少前世，各爲人師，祕悵經典，致諸弟子，亦多猶豫，今墮俗塵，因此微緣，猶可救度。天尊即化爲人，從會中過，因悉共語。化人曰：持戒甚易，不持反難。諸人聞之，僉然問曰：云何先生，持戒云易，不持反難？化人曰：立身如戒，不畏天子，不畏鬼神，何爲不易。如違戒者，是人悉畏，復畏鬼神，云何不難。於是十二年少，聞化人語，皆憶宿命，發心持戒，同證道果。

《法輪經》云：太上玄一真人告葛仙公曰，我昔受師訓，切厲備經，痛如刀割，尅如毒錐，俛仰伏事，恒不敢虧，痛不敢辭，毒不敢言，今成道果，難報師恩。

《太真科》云：道士修習經業，以

五千文爲先。講說通解，度人濟己，開化無窮，此爲大乘之人。

《太真科》云：開闢之初，聖真仙人，皆宣道氣，立法相傳。同宗太上，俱稱學士。以道爲事，事道有功，昇號道士。

《明威經》云：爲學不可不精，邪正相似，不可不明，不明墮於難境，明者班於易途。明與不明，由心詳辨。辨之之法，徧學衆經，歷試取驗，自然朗明，在世間法，出世間法，有爲無爲，無不究悉，自然測三清之妙趣也。

### 歷代宗師略傳

道家之學尚矣，黃帝、老子，清靜爲事。尹令莊列之徒，推而大之，流傳至樂臣公。公教蓋公，蓋公教曹參。其言之有效於經世者如此，況黃老之道哉。噫嘻，世尚奢泰，此道遂隱。神仙之學盛，禱祠之法興，自東漢而下，訖聖朝之初，蓬丘子賈善翔集以斯道鳴世者百餘人，爲《高道傳》。爰掇其尤者十數，去繁取要，著于經訓之末，俾吾徒知所矜式焉。

### 張天師

天師姓張，名道陵，字輔漢。性沉默好古，博極經史，兼明星緯。賑人之急，不擇疏戚，世以是推之，就弟子列者甚衆。章帝召不就，喟然與弟子決，唯王長留侍，乃入潛、衡，至中嶽，得九丹書。丹成，謂長曰：吾未有大功，豈敢遽服，宜須爲國爲家，除害興利，乃可輕舉。遂感太上下降，授以正一盟威之法，降羣魔玉女，別立二十四治，教人謝過祈福，設爲科教。蜀人化之，遷善遠罪。後於雲臺峰，太上遣雲輿下迎，白日上昇。

### 葛仙公

仙公姓葛，名玄，字孝先。自少好學，經傳子史，靡不該覽，名振江左。常好彈琴誦莊老，安閒恬淡，內足無求。乃入赤城山修道，復遊括蒼、羅浮、金精、閭皂、玉笥、天台等山，修行研誦，遂感太極三真人下，授三洞寶經，年十八道成，變化叵測。嘗集三洞之要爲九幽懺，著老子及諸經數十卷。一日告弟子鄭思遠等曰：吾爲吳主所

留，不得誦洞經，先作尸解，乃得升天。及期解化，支體柔軟，香炁滿室，至五日，大風忽起，燈燭皆滅，及火至，失尸所在。

### 王纂

道士王纂，居馬跡山，常以陰功救物。值西晉末，中原亂離，饑饉疾疫，民多斃無救。纂憫之，遂於靜室飛章告天，泣涕不已。經三夕，室中有光如晝。已而，祥風景雲，紛郁空際，異香天樂，下集于庭，介士旛幢，青童玉女，龍虎備衛。俄而，笙篳之音，自西北至。五色光中，仙官一人告纂曰：太上道君至。于是，百寶大坐，自空而下，道君乃據坐，纂拜首跪伏而前。道君曰：子憫生民，形于章奏，剗心抃血，感動幽明，地司列言，吾得以鑒眄于子。道君於是爲說陰陽代謝，人鬼升淪，六天群魔，敗軍死將，因衰伺隙，戕害生民，吾以陽威憚之，神呪伏之，自然弭戢。即命侍童授纂神化、神呪二經，及三五齋訣曰：勉而行之，真階可冀。纂按行江表，疫癘遂息。

陸天師

陸脩靜，字元德。篤好墳典，旁究象緯。既而歎曰：欲鍊形合道，與天俱畢，非此之謂也。遂精專道教，不捨寤寐，聞異人所在，雖遠必訪，棲于荆岫，而江漢之人，聆聲而赴，虛往實歸。宋元嘉末，文帝召不起。至明帝，欲以清靜，濟民於淳樸，素欽先生，乃禮致再三，遂奉詔出山。熊、虎、猿、鳥，悲鳴擁路，其感物如此。至闕，授館于外，俾朝野得師事焉。先生爲指別邪正，校核真僞，由是翕然一變頽俗，嘗以三洞經法糅雜，皆刊而正之。又著齋戒儀範，爲後世法。與陶淵明爲方外友，則其人可知也。元徽五年正月，忽謂門人曰：吾迫於恩命，違其宿尚，今將還舊山矣。弟子訝之，至三月二日，忽然解化，膚色輝映，異香芳郁。後三日，廬山諸徒見車從霓旌，紛然歸舊止，斯須不知所在。詔謚簡寂先生。

寇天師

寇謙之，字輔真。年十八，傾心慕道，幽感上玄。有仙人成公興，傭身於

其家。謙之一日算周髀音鼻，乃天儀也不合，公興因教之，應手而成。有頃，謂謙之曰：法師有志學道，可能與某遁乎。遂與之遊華山，採藥而食。謙之自是不復飢，一日謂：某出，當有人將藥相遺。但食之，果如所言。視其藥，皆毒蟲臭惡物，乃懼而出。興還具對，且歎曰：法師未易得仙，乃可爲王者師。復曰：某明日當去，及期果化。

謙之遂居嵩陽，不復出。神瑞二年夏四月一日，忽有二人，乘龍持麾來曰：老君至。斯須，太上乘九龍玉車，神仙導從，集於山頂，謙之虔心作禮。太上敕王方平引謙之前曰：吾得中嶽集仙宮主表，稱張道陵登真以來，修學之人無所師授。今有中嶽道士寇謙之，行合自然，宜處師位，吾故授汝以天師之任，及雲中音誦即華夏頌、步虛聲、新科經戒，汝宜宣之，佐國扶世，以化生民。謙之受訖，五雲臺殿俱隱。謙之自是志行日新。始光中，朝廷遣官召至闕下。司徒崔浩師事之，主上前席問道，禮遇甚恭，遂建都壇以舍之，由是天下

歸仰焉。天師嘗於中嶽，爲帝祈福，精誠通感，太上密授帝太平真君之號，是歲改太平真君元年。至九年正月，謂弟子曰：吾夢成公興，召我於中嶽仙宮。及五月羽化，有青炁若烟，自口中出，至天半乃消，其體漸縮，識者謂之尸解，年八十四。後沈猷見於中嶽頂，身作銀色，光明如日，由是知爲仙人。

王道義

道士王道義，魏時人。博覽羣書，明緯候。知終南有尹真之所，將弟子六七十人來居之，與道士尹靈鑒等四十餘人，敷洪道化，朝野欽奉。時歲歉，常住不充。道義大修觀宇，丁匠百數，而用度不乏，人咸知師之神化，陰有神助，由是樓觀殿宇，一一鼎新。令門人購集真經萬餘卷，皆自己力，未始求人。其性浩然無累，後室中嘗有人語弟子伺之，皆真仙集焉。永平中，返真之際，白雲異香滿室，踰日方散。里人有自外歸者，見道義乘鹿而去。

正一先生

司馬承禎，字子微。事潘師正，得

鍊形術，無不通妙。師異之，盡付陶隱居正一法，久之辭去，遍遊名山。抵天台，構層軒於壇上，目爲衆妙臺。武后召之，未幾去，與陳子昂、盧藏用、宋之問、王適、畢構、李白、孟浩然、王維、賀知章，爲仙宗十友。睿宗復召，命其兄承禕，宣命期以必來。既至，引入中掖，延問以術。先生曰：爲道日損，以至於無，爲凡耳目所知見。每損之，尚不能已，況攻異端，而增智慮哉？帝曰：治身則爾，治國若何？對曰：國猶身也，故游心於淡，合氣於漠，任物自然，而無私則天下治矣。帝歎曰：廣成子之言也。因請還山，賜寶琴霞紋帔，命公卿賦詩送之。明皇詔於王屋山，建壇室令居。時女真焦靜真，泛海詣蓬萊求師。至一山，見道者謂曰：天台山司馬子微名在瓊臺，身居赤城，真良師也。靜真還詣先生受道，未幾升仙。嘗降謂薛季昌曰：先生得道，高於陶都水，當爲東華上清真人。先生忽一日謂羣弟子曰：吾於玉霄峰東，望蓬萊有羣仙降駕，今爲東華青童

君召，必須往赴。俄頃化去，詔贈銀青光祿大夫，謚正一先生，帝親文其碑。先生嘗撰《修真祕旨》、《天也宮府圖》、《坐忘論》、《登真系》等行世。

### 李含光

道士李含光，年十三，篤好道學，雖處暗室，如對君父。工篆隸，人稱過其父。一聞之，終身不復作。師司馬正一先生，見之曰：真玉清之客也。戒曰抱虛，無而積功，其道無窮，託幽阜而滅迹，於德不淺，遂盡付寶書，俾先救人。含光既稟訓，忘情於身，周急於物，每啓齋醮，齋心潔己，不少怠。明皇詔見問理化，對曰：《道德經》者，君王師也。漢文行，而躋民於仁壽。又問金鼎，曰：道德者，公也。輕舉者，公中之私也。若求生徇欲，類於繫風，不亦難乎。帝嘉之，優禮以待。未幾，請還句曲。詔爲紫陽觀以居之。帝受福祚真經，請爲師不赴，於大同殿具辭遙請。仰號玄靜先生，嘗著《仙學傳》、《天玄異同論》。年八十有七，謂弟子：吾將往茅山。遂順化於時，祥

雲降，芝草生，位爲茅山仙官矣。

### 吳宗元

吳筠，字貞節。通經誼，美文辭。舉進士不中，去居倚帝山。天寶初，召至京師，請隸道士籍，依潘師正先生究其道。南遊天台，觀滄海，與名士相從，文詞傳至京師。明皇召見，與語甚悅，敕待詔翰林，獻玄綱三篇。帝嘗問道，對曰：深於道者，無如老子，陛下自求之於五千文可也。復問神仙治鍊，對曰：此野人事，非人主宜留意。筠每開陳，皆名教世務，以微言諷諫，天子重之。羣沙門嫉其見遇，高力士素事浮屠，共短筠於帝。筠求還嵩山，詔爲立館。嘗論谷神之妙，則有《玄綱論》。哀蓬心蒿目之遠於道，則有《神仙可學論》。疏淪澡雪，使無落吾事，則有《洗心賦》、《崑栖賦》。修胸中之誠而休乎天均，則有《心目論》、《契神頌》。若遊仙步虛、王化雜感之作，凡四百五十餘詩，權德輿集而爲序。後解化，詔謚宗元先生。

劉知古

劉知古，字先玄，沛人。中山靖王遠孫，上世官遊臨邛，遂家焉。母吳氏，感異夢而生，明慧秀正，不喜利名，惟從事於道，出家隸太清觀，受三洞經錄。至於八公寶章、三洞寶錄、丹經脉訣之旨，出生入死之道，罔不洞曉。睿宗召問，道業稱旨，特加崇錫，後還山。開元中，復召，爲民蠲疫，真人視色代脉，布氣除痾，民賴以安，十有八九。上寵錫不受，乞歸蜀，請以居第爲大千秋觀，上親書額，李邕文其碑。後因天長節，改爲天長觀，復議別營修。或有客至，授以黃白術，雖飛薨連構，頗極壯麗，所費萬計，未始資於人工畢。客復至，約於東陽伏牛山，既至其下，有古觀葺而居之，行三奔九道之要十年，忽室中有光，產丹芝一莖，扣之作金玉聲。忽夢神人謂曰：後山滴泉之下石中，有金魚跨之，可以升天矣。非此芝扣石，不可致。後訪之，以芝扣石，如風雷之震，巨石迸裂，得金魚，長三尺許，乘空飛騰，雲霧旋擁而去。真人嘗

爲母薦福，置九幽燈，金錄白簡式，至今遵用，幽冥利益，詎可量哉。又有《日月玄樞》、《指迷歌》行於世。聖宋宣和中，改爲仙隱觀，在成都北城內。

傅練師

傅仙宗，長安人。父倫，資陽令。仙宗幼好道家學，遂隱資陽山。未幾，有神人告，玉按山可修行，遂建千齡觀，居之一紀。一日，又有神數人告曰：某主，山神也。自師居此，某等日不遑安，況此未爲福地，州西平岡山可居。師然其說，鬼神侍衛，即至其所，建壇室以居。明皇崇道，召赴闕，過利州桔柏津，水怪爲民害。師以二石板，書符投水中，有二大魚曝於灘，腹下有丹字曰：赤鯉赤鯉，生居河水，不避仙官，理得其死。刺史具以聞，詔立師祠於津涘。至都，俾於上清宮設醮，帝親臨壇。師行事至，請東方青童君從官將吏。頃間，天兵遍壇之東，上恐懼。既罷，問修何道致此。曰：臣所修務，安人利物，恬淡簡易，澄之不清，攪之不濁，以此自勝故爾，上欽悅。久之，

乞還山，詔葺其觀，親書額，改曰應真。乾元三年十月十四日，忽聞空中云：太上有勅召，遂沐浴登榻而化。有人見之簡州，乘青驪而去，信尸解也。

閻丘先生

閻丘方遠，字大方。年十六，通經史。二十九，入道，師元澤。一日，澤謂曰：子不聞老氏云，吾有大患，爲吾有身。蓋身從無爲而生有爲，今却反本，是曰無爲。無爲者，言無即著空，言有即成礙，執有無即成滯。但於有無一致，泯然無心，則庶幾乎道，且釋氏以此爲禪宗。孔子謂：寂然不動者，其揆一也。老氏又云：迎不見首，隨不見後，此何物耶？子能默契，又何求焉。何必空山，長松之下。所惜者，子之才器，足可爲真門標表也。方遠受教而去，復事劉處靜、葉藏，資授道錄，慕稚川貞白之爲人，聲猷益盛。吳越錢鏐，欽其清尚，訪於大滌洞，築室以居之。昭宗累詔不赴，就賜命服，號妙有大師、元同先生，弟子二百餘人，惟十餘輩深得修真練神之旨。後一

日，忽沐浴端坐而化，及就壙，空棺而已。

### 杜天師

杜光庭，字賓聖。爲時名儒，試萬

言不中，遂入道，事應先生爲高弟。嘗謂道門科教，自漢天師、陸脩靜撰集以來，歲久廢墜，乃考真僞，條列始末，故天下羽籙，至今遵行。僖宗召充麟德殿文章應制。嘗時推伏曰：詞林萬葉，學海千尋；扶宗立教，天下第一。中利初，扈從幸蜀，因老於成都。王建據蜀，召爲皇子師。嘗謂徐光溥曰：余初學於上庠，書籍皆備，一月之內，分日而習。一日誦經書，二日覽子史，三日學爲文，四日記故事，五日燕閒養志。一月率五日終始。不五七年，經籍備熟。光溥，蓋蜀相，嘗師事之。天師始遇陳休復，復得神藥，後於成都朱仙依之，久唱撼庭，秋辭，卒不遇。一日，忽謂門人曰：昨夢朝上帝以吾爲岷峨主司。時方營真宮於青城山告成，遂披法服，禮辭昇堂，集弟子囑別而化。歸葬青城，但聞棺輕，啓之惟留一屣而

已。嘗著混元圖、翼紀聖賦、廣聖義、歷帝記、靈驗記、科教儀範、章詞表式、歌詩雜文數百卷，目曰《廣成集》，謚錫廣成先生號云。

### 蘇澄隱

道士蘇澄隱，居鎮陽龍興觀，通老莊，善攝養。開寶二年，太祖皇帝駐鎮陽，召之掖昇殿。上曰：師年逾八十，容貌甚少，是能養生，宜以見教朕。澄隱曰：臣之養生，不過精思鍊神而已。帝王養生，則異於是。老子曰：我無爲，而民自化；我無欲，而民自朴；無爲無欲，凝神太和。軒帝、唐堯，享國永年，得此道也。上嘉其說，寵錫殊厚。

### 張無夢

張無夢，字靈隱。篤孝，聞於鄉里，好清靜，通易。及冠，委資產於其弟，入華山，與种放、劉海蟾結交，事希夷先生，多得微旨。久之，遊天台赤城，結廬十餘載，修行精練，以內事形于歌詠，成百首，曰：《還元篇》。夏英公入山見之，得其詩歸輦下。王冀公

執政，英公以《還元篇》獻之，未幾以聞。真宗問以長久之策，無夢曰：臣野人，但於山中誦《老子》、《周易》而已，其他不知也。上令講《易》，即講謙卦。上曰：獨說謙何也？無夢曰：方大有之時，宜守以謙。上喜其說，除著作佐郎不受。一日，復召講《還元篇》，賜飲，遣使送金帛，皆不受。復賜處士先生號，亦不受。上因以歌賜行曰：混元爲教含醇精，視之無迹聽無聲。唯有達人臻此理，逍遙物外事沉冥。浮雲舒卷絕常勢，流水方圓靡定形。乘興偶然辭澗戶，談真俄爾謁王庭。順風已得聞宗旨，枕石還期適性情。玉帛簪纓非所重，長歌聊復寵歸程。明日遂行有旨，令台州給著佐俸，至山亦不請，其終始清節如此。年九十九，終于金陵。經三日，頂中白氣出，高三尺。有瓊臺詩行於世。碧虛子陳景元，蓋其弟子，得老莊宗旨云。

### 劉先生

劉從善，字順夫，自幼稚好道家學。於建隆觀，試業爲道士。天聖初，



承旨住景靈宮。上與太后欲受法籙，詔觀妙先生朱自英，於玉清昭應宮建壇，命從善同壇受籙。上嚴於孝享，遣使諭以先帝忌辰，令於神御前呪食。

乃編三洞經內呪偈，尋進呪食文。上嘉之，賜全素之號，仍以文頌諸宮觀。呪食之科，自從善始。時延寧宮成詔，撰聖像五藏銘應制者甚衆，唯從善稱旨，以金玉牌刻其文。仁宗不豫，召從善入內奏章，命執政代命。伏章訖，問曰：章達否？曰：已達。時晏駕已數刻，忽復精神明爽，傳宣曰：問葛將軍何神？從善曰：三天門下有神，曰中元葛將軍，主通章之神也。復傳宣，令設位。翌日，聖體遂康，諭左右曰：朕昨夜至天門，有葛將軍云，皇帝未合來，急借馬遣回，遂寤。上解御服，衽席金帛賜之，欲以先生號加錫，固辭。英宗朝丞相韓魏公，復請先生號賜之，又辭。熙寧三年七月二十八日，沐浴訖，集弟子于前曰：吾俟大風至，即去。須臾，果風作，如說而化。後有客自蜀還京，見先生乘白馬入蜀，祝云：

見吾徒，爲言之。由是知爲尸解矣。嘗撰集齋科，及拜章法，及有歌詩行世。

道門通教必用集卷之一

道門通教必用集卷之二

鶴林道士呂太古集

詞讚篇

啓堂頌

學道當勤苦，斂信運丹誠。燒香歸太上，真氣雜烟馨。惟希開大宥，七祖離幽冥。

焚牒頌

璿璣星運轉，玉漏響初傳。告牒真官訖，虔誠啓醮筵。忱詞祈肸鬻，發露倍精專。仰望真仙衆，依稀下九天。

智慧頌

智慧生戒根，真道戒爲主。三寶由是興，高真所崇受。泛此不死舟，倏欵濟大有。當此說戒時，諸天來稽首。

奉戒頌

道爲無心宗，一切作福田。立功無定主，本願各由人。虛己應衆生，注心莫不均。大聖崇至教，亦由雨降天。高陵靡不周，常卑故成淵。海爲百川

王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

請師頌

人各恭敬。

古儀請師，止是經、籍、度三師，作三翻請，且在正壇禮師存念之先，乃自己傳度三世之師。後人不加考究，誤以三師為天上仙官，故列為五師。今既如是，不可復改，可尊五師中三師，為天上鬱羅翹真人、真定光真人、光妙音真人。此乃天台葛仙公授經時，三師亦以見經教，授傳之祖，不忘所自也。如三清，亦號三師，已在正壇奉事，不可降為五師也。玄中所以主教，當在第一，三師次之，監齋又次之。

修齋行道，奉請玄中大法師降臨壇所。

修齋行道，奉請經籍度三師降臨壇所。

修齋行道，奉請監齋大法師降臨壇所。

雲輿已降，鶴駕來臨，齋事周圓，

還當奉送。

唱道讚

道場眾等，人各運心，眾和皈命，三寶一切念。

華夏讚

學言學行言。

三啓頌三首

樂法以為妻，愛經如珠玉。持戒制六情，念道遣所欲。淡泊正氣停，蕭然神靜默。天魔並敬護，世世受大福。

鬱鬱家國盛，濟濟經道興。天人同其願，縹緲入大乘。因心立福田，摩法法輪升。七祖生天堂，我身白日騰。

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，盡念稽首禮。

玉京步虛詞十首

稽首禮太上，燒香歸虛無。流明

隨我迴，法輪亦三周。玄願四大興，靈慶及王侯。七祖生天堂，煌煌耀景敷。嘯歌觀太漠，天樂適我娛。齊馨無上德，下仙不與儔。妙想朗玄覺，誦誦巡

虛遊。

旋行躡雲綱，乘虛步玄紀。吟詠帝一尊，百關自調理。俯命八海童，仰携高仙子。諸天散香花，蕭然靈風起。宿願定命根，故致標高擬。歡樂太上前，萬劫猶未始。

嵯峨玄都山，十方宗皇一。岌岌天寶臺，光明焰流日。焯焯玉林華，藉粲耀朱實。常念滄元精，鍊液固形質。金光散紫微，窈窕大乘逸。

俯仰存太上，華景秀丹田。左顧提鬱儀，右眄携結璘。六度觀梵行，道德隨日新。宿命積福應，聞經若至親。天挺超大才，樂誦希微篇。沖虛太和氣，吐納流霞精。胎息靜百關，寥寥究三便。泥丸洞明照，遂成金華仙。魔王敬受事，故能朝諸天。皆從齋戒起，累功結宿緣。飛行凌太虛，提携高上仙。

控轡適十方，旋憩玄景阿。仰觀劫仞臺，俯眄紫雲羅。逍遙太上京，相與坐蓮花。積學為真人，恬然榮衛和。永享無期壽，萬椿奚足多。

大道師玄寂，真仙有無英。公子

度靈符，太一捧洞章。舍利耀金姿，龍駕欵來迎。天尊眄雲興，飄飄乘虛翔。香花若飛雪，紛靄茂玄梁。頭腦禮金闕，携手遊玉京。騫樹圓景園，煥爛七寶林。天獸三百名，獅子巨萬尋。飛龍躑躅鳴，神鳳應節吟。靈風扇奇花，清香散人襟。自無高仙才，焉能耽此心。

嚴我九龍駕，乘虛以逍遙。八天如指掌，六合何足遼。衆仙誦洞經，太上唱清謠。香花隨風散，玉音成紫霄。五苦一時迸，八難順經寥。妙哉靈寶囿，興此大法橋。

天真帝一宮，靄靄觀曜靈，流煥法輪綱，旋空入無形。虛皇撫雲璈，衆真誦洞經。高仙凜手讚，彌劫保利身。

至真無所待，時或轡飛龍。長齋會玄都，鳴玉叩瓊鐘。十華諸仙集，紫烟結成宮。寶蓋羅太上，真人把芙蓉。散花陳我願，握節徵魔王。法鼓會羣仙，靈唱靡不同。無可無不可，思與希微通。

### 金闕步虛詞

始青黎元蓋，金香結朱烟。飛神總翹轡，稽首玉帝前。帝心浩以舒，錫吾太靈篇。是謂不滅道，萬天秉吾權。吾行空洞中，下仙昧其淵。

### 步虛詞十首

太極分高厚，輕清上屬天。人能修至道，身乃作真仙。行溢三千數，時丁四萬年。丹臺開寶笈，金口爲流傳。

大梵三天主，虛皇五老尊。尚難窺微妙，豈復入名言。寶座臨金殿，霞冠照玉軒。萬真朝帝所，飛鳥躡雲根。

濛濛如細霧，冉冉曳銖衣。妙逐祥烟上，輕隨綵鳳飛。幾陪瑤池宴，忽指洞天歸。佇立扶桑岸，高奔日帝暉。

旋步雲綱上，天風颯爾吹。飄裾凌斗柄，秉拂揖參旗。獅子嚙丹綬，麒麟導翠輜。飛行周八極，幾見發椿枝。

綠鬢頽雲髻，青霞絡羽衣。晨趨陽德館，夜造月華扉。搏弄周天火，韜藏起陸機。玉房留不住，却向九霄飛。

昔在延恩殿，中霄降九皇。六真分左右，黃霧繞軒廊。廣內尊宸御，仙

兵護道場。孝孫今繼志，咫尺對靈光。

寶籙修真範，丹誠奏上蒼。冰淵臨兆庶，宵旰致平康。萬物消疵癘，三辰效吉祥。步虛聲已徹，更詠洞元章。

宛宛神州地，巍巍衆妙壇。鶴袍來羽客，鳧舄下仙官。玉斝斟元醴，琅函啓太丹。至誠何以祝，四海永澄瀾。

水暎魔宮懾，燈開夜府明。九天風靜默，四極氣澄清。嘯詠朱陵曲，翱翔白玉京。至誠何以祝，國祚永安榮。

華夏吟哦遠，人聲自抑揚。沖虛歸道德，曲折合宮商。殿閣沉檀散，樓臺月露涼。至誠何以祝，多稼永豐穰。

### 玉清樂

地居天上接空居，萬象森羅遍八區。功用不知誰主宰，絳霞丹霧闕清都。碧落空歌黍米珠，十方勃勃入無餘。聞經慶喜難言說，九色龍騰八景輿。五色雲營鬣鬣屯，三三洞戶敞瓊門。何方道士通朱表，玉女飛函達上尊。

### 上清樂

紫清天上育華林，絳實朱柯竹葉深。

咀嚼繁英身不老，下觀烏兔換光陰。  
元君八氣號青靈，錦帔飛裙住玉城。  
把握帝符司道籍，袂除塵累濟羣生。  
九日宮中四老真，廣霞山上宴仙賓。  
鳴鐘鼓瑟行靈醕，碧落融融別有春。

太清樂

太一元君掌列仙，彤輝絳彩射芝田。  
功圓會遇刊冥籍，可待洪崖笑拍肩。  
金闕明光後聖君，流精煥彩結丹雲。  
不因太上相傳授，安得人間有玉文。  
五節清香半夜焚，天人玉女盡遙聞。  
味同氣合遙相應，絳節霓旌下五雲。

白鶴詞

白鶴初生在紫微，且當洞府養毛衣。  
借問仙人何日至，莫言不解伴雲飛。  
白鶴千年始一歸，山川依舊世人非。  
不因華表分明語，誰識當初丁令威。  
白鶴飛來下九天，數聲嘹唳出祥烟。  
日月相催人易老，不如修道學神仙。  
太一真人冰雪容，步虛來往本無蹤。  
蓬萊要去而今去，雲在窗前鶴在松。  
白鶴天生壽命長，翱翔仙境侍虛皇。  
千春一到華旌上，却歸霄漢自然鄉。

白鶴飛翔在玉京，往來三界現長生。  
修行若達神仙境，便乘真馭入雲庭。

白鶴詞

白鶴凝霜一頂紅，常居碧落杳冥中。  
三清好是逍遙處，天上人間事不同。

白鶴詞

八景戒期登祕宇，九清敷佑協祥經。  
曾雲頡頏瞻仙羽，暴日徘徊在福庭。

白鶴詞

胎化靈禽喚九天，雪毛丹頂兩相鮮。  
世人莫認歸華表，來瑞升平億萬年。

出堂頌

道以齋為先，勤行登金闕。故設  
大法橋，普度諸天物。宿世恩德報，道  
心超然發。身飛昇仙都，七祖咸解脫。

經儀三歸依讚

人各恭敬。  
至心歸依十方道寶，當願衆生起  
心回向，一切信禮。

至心歸依十方經寶，當願衆生心  
開悟解，受持轉誦。

至心歸依十方師寶，當願衆生普  
上法橋，無有障礙。

道場衆等，人各執簡，當心平坐，  
讚詠如法。

宿命讚

宿命有信緣，弱喪謂之無。皆欲  
眼前見，過日即言悠。大賢明道教，慘  
戚愍頑夫。依依念子苦。勤勤令我  
憂。

啓經讚

稽首虛皇天尊前。

送經讚

無量玄玄也。

解坐讚

為諸來生，作善因緣，如蒙開悟，  
仰荷聖恩。

七真讚

太上玄虛宗，弘道尊其經。俯仰  
已得仙，歷劫無數齡。巍巍太真德，寂  
寂因無生。霄景結空構，乘虛自然征。  
日月為炳灼，安和樂未央。

學仙絕華念，念念相因積。去來  
亂我神，神躁靡不歷。滅念停虛間，蕭  
蕭入空寂。請經若飢渴，持志如金石。

保子飛仙路，五靈度符籍。

濟我六度行，故能解三羅。清齋禮太素，吐納養雲芽。逍遙金闕內，玉京爲余家。自然生七寶，人人坐蓮華。仰嚼玄都棗，俯酣空洞瓜。容顏耀十日，奚計年劫多。法鼓會天仙，鳴鐘徵大魔。

靈風扇香華，燦爛開繁衿。太真撫雲璈，衆仙彈靈琴。雅歌三天景，散惠玉華林。七祖生天堂，由此步玄音。前世德未足，斯書邈難尋。信道情不盡，圖飛乃反沉。太上無爲道，弘之在兆心。

學道由丹信，奉師如至親。挹景偶清虛，孜孜隨日新。衆人未得度，終不度我身。大願有重報，玄德必信然。陰惡罪至深，對來若轉輪。

學道甚亦苦，晨夜建福田。種德猶植樹，積篋而成山。子能耽玄尚，飄爾升清天。修是無爲道，當與善結緣。太上至隱書，名曰智慧篇。拔苦由大才，超俗以得仙。靈姿世所奇，燁若淵中蓮。

人行各有本，皆由宿世功。立德

務及時，發願莫不從。善惡俱待對，倚伏理難窮。賢士奉法言，道亦在兼忘。解是大智慧，是爲太極公。寶蓋連玉輿，命駕御九龍。金華空洞經，捧香悉仙童。嘯歌徹玄都，鳴玉扣瓊鐘。

竦身凌太清，超景逸紫霄。保元持法綱，遊玄極逍遙。萬劫猶昨夜，千春如晨朝。巍峨蔭雲華，手攀寶林條。香烟自然生，玄階興扶搖。靈旛順風散，繁想應時消。滅智弘大混，無爲爲清謠。

#### 小學仙讚

學仙行爲急，奉戒制情心。虛夷正氣居，仙聖自相尋。若不信法言，胡爲栖山林。

#### 焚章頌

太上垂科教，勤行福壽長。延生依玉訣，請命奏金章。罪名除北府，生籍上南昌。見在保延壽，過去升福堂。

#### 又

太虛感靈會，命我生神章。一唱洞九玄，二誦天地通。混合自相和，九遍成人功。大聖讚元吉，散花禮太空。

祈真真必佑，請福福當洪。諸天並歡悅，一切稽首恭。

#### 焚詞頌

人生多障難，大道實矜憐。救度留科戒，咸令懺罪緣。愆辜編地府，疊結已聞天。發露祈真佑，冥心仰聖賢。虔恭禮三寶，願得壽長年。焚詞飛上界，奏名玉帝前。

#### 度簡頌

赤明開元圖，和陽通上靈。元始敷靈華，十部飛天書。開度九幽祖，萬遍道自俱。玉阜秀瓊林，生死福德廬。自無黃籙簡，苦根焉得除。旋行誦靈章，五老還相扶。

#### 符戒頌

稽首無上道，歸心元始尊。至真妙應主，開化飛玄門。妙戒怡五靈，金書警萬神。察命定錄籍，靈符度苦魂。乘雲朝玉帝，齊契玄中人。

#### 焚簡頌

天尊垂憫濟，救苦最爲先。金籙白簡妙，真符玄又玄。地府稟聖教，酆都禮此言。拔度諸業障，告盟削罪愆。

九幽咸解脫，亡魂生九天。

山簡頌

祈真登紫嶽，府，告命詣靈山，壇。玉女謠梵響，金童散香烟。書名通九地，列字上三天。永享無期壽，克成高上仙。

水簡頌

天尊留戒律，太上演真經。奉法須勤苦，功德貴精誠。虔心啓三寶，焚香告百靈。書名投水府，功勳達上清。

三塗五苦頌

三才及萬物，倚伏各有齡。終始代劫數，福盡天地傾。往返於五道，苦哉更死生。展轉三塗中，去來與禍并。

明燈頌

大道滿十方，華燈通精誠。諸天悉開曜，九地皆朗明。我身亦光徹，五藏生華榮。炎景照太無，遐想通玉京。

散花樂

散花林，散香林，散香花，滿道場，上真前供養。玉京山上朝真會，散花林十仙齊奏步虛音，滿道場，至真前供養。

空同一聲來月下，步虛三唱入雲間。

古散花樂

元始傳言齊受籙，道君開教盡皈依。小有洞中三秀草，玉京山上萬年桃。五色雲中呈綵鳳，一爐香裏見朱鬚。三真玉女持花節，一雙童子捧金爐。五色綵雲來覆地，九天真氣遶香壇。九龍闕上集真聖，八仙臺畔聽清謠。三島羽人朝象闕，九天仙子下瑤臺。五色彩雲隨步起，六銖仙服著身來。三島羽人來入座，十洲鸞鶴引沖天。太上散花陳我願，扣鐘鳴鼓會羣仙。萬朵蓮燈開夜月，滿壇香霧雜天花。

五字散花樂

絳節徘徊引，天花散漫飛。高真無染著，片片不沾衣。聖境三千歲，仙花始一開。如何金籙會，併奉列仙來。

八陛旋瑤級，千花漾錦英。六淳

并紫棕，煥麗不知名。淺淺黃金萼，勻勻碧玉英。天風隨羽蓋，吹滿九重城。

綽約縈空際，繽紛落坐隅。韶華長不老，何處覓仙都。

淨侶吟仙曲，人人讚善哉。萬花

興供養，飛舞自天來。寶葉開琪圃，珍柯在紫微。不教蝴蝶採，長伴綵鸞飛。几席延鸞馭，香燈建寶壇。丹心無可獻，碎錦酒雲端。碧綠相差次，紅黃造淺深。化工應自失，雕斲本何心。洞按爐烟起，無為道德香。同根無異氣，噴鼻更馨香。

散花詞

天上春常在，花開不計時。瑤壇沾瑞霧，芳氣更芬滋。玉宇千門啓，金爐百和然。芬芳盈法座，祇慄待羣仙。空裏花無際，元生玉帝宮。只來臨靖館，不去逐和風。

焚朱表頌

太空包有象，至道杳無形。神和通妙氣，應感達衷情。倏歛周八極，依稀降萬靈。散花陳素悃，委質表丹誠。

遠汎翔鸞蓋，遐攀倚鳳旌。烟宮高鬱鬱，雲闕上亭亭。瓊鳳出霄漢，金龍入太清。甘露洽人世，景福被幽冥。

### 解壇頌

眇眇空無象，悠悠感有情。敬則垂天貺，褻則被魔精。吉凶隨運起，否泰應緣生。道不貴珠玉，神惟在至誠。丹碧盡勤苦，懇歎竭衷情。自然通大聖，皆得降明靈。捻香陳所願，稽首冀嘉禎。天尊常寂靜，回心禮杳冥。

### 還戒頌

天尊大慈悲，說戒度衆生。威德被幽顯，果報感真靈。諸天來稽首，羣魔自束形。過去超八苦，見在保安寧。齋福行當息，相共送天真。流梵逸雲響，飛香雜烟馨。瓊鳳乘丹輦，金龍駕綠駟。生往皆快樂，家國悉安寧。

### 辭師頌

修齋已訖，仰荷洪恩，稽首歸依，奉辭玄中大法師。  
經法雖玄妙，崇奉悉因師。凡欲立善者，咸當禮敬之。氣專功易就，心慢悔難追。若能勤繫念，朝夕自仙飛。

修齋已訖，仰荷洪恩，稽首歸依，奉辭經、籍、度三師。

道以齋爲重，法以朝爲常。不信不奉者，焉能遊帝鄉。有骨入仙品，自然開紫房。玉女登雲臺，但見金銀房。是故謝三師，稽首禮虛皇。

修齋已訖，仰荷洪恩，稽首皈依，奉辭監齋大法師。

迢迢玉京山，仙都高巍巍。衆真乘虛步，朗朗長夜開。大道由人信，心至神自歸。修齋行道訖，稽首辭正師。

雲輿弗駐，鶴駕難留。後有告祈，還當奉請。

向來修齋功德，上祝皇帝聖壽無疆，咸賴善功，成無上道，一切信禮。

### 奉送讚

每句下有散花林三字

奉送諸天仙，金童捧金蓮。玉女颺琪花，直上寶臺前。

### 難思議讚

每句下和難思議

碧落天中法會時，寶珠初現甚纖微。大聖珠中傳妙道，無邊聖衆盡相隨。  
祝鎮天真文出九天生神齋儀  
玄上高靈，元始尊神，大聖徘徊，

萬真臨軒。三景散暉，瑞雲四陳，上吉較圖，推算九天。丹書赤字，自然真文，上告五帝，記名玉篇。萬神監映，日月盟言，願度願生，願神願仙。天地星宿，玄照帝，我身，三官九府，五嶽大神，溥告無窮，削除罪根。修齋行道，請福祈恩，元始大明，莫不納言。得與三景，同暉紫晨，輪轉不滅，身得飛仙。

### 一鍊度真文

元始太帝，高上玉皇，八天符命，普告十方，無上無下，無極神鄉。三十  
二天，隱韻靈章，五文結氣，八會流光。今日大有，萬善敷張，定名仙圖，列籍紫房。修齋行道，用拔先亡，幽關超度，冥夜開光。超登三界，景侍虛皇，冢訟絕息，見在興昌。萬靈監映，福祿殊常，灾凶掃蕩，眷屬安康。請如所告，金馬騰驤。

### 又一首

無上至真，大聖高真，布化運氣，三十二天。八會九光，自然成真，安鎮天地，保制劫年。元始符命，普告三元，下勅九地，上聞諸天，中告海嶽，名

山大川。今日上告，萬神咸聞，修齋行道，拔度幽魂，三官九府，削滅罪根，永度三塗，五苦之源，代代受福，記名丹篇，神生福堂，鍊化自然，生死開度，億劫長存，九天符命，金馬驛傳。

五方消災真文正字

東方青帝消災真文：歲星輔肝，角亢正真，氏房心尾，四景回旋，箕主七辰，正斗明輪，承氣捕非，掃除災羣。

南方赤帝消災真文：熒惑輔心，井鬼守房，柳星張翼，抗御四鄉，軫主七宿，回轉天常，召運保會，正道驛行。

西方白帝消災真文：太白檢肺，奎婁守魂，胃昂畢觜，主制七關，參總斗魁，受符北元。

北方黑帝消災真文：北辰輔腎，斗牛衛扉，女虛危室，豁落四開，壁總七星，執凶糾非，却災掃穢，明道輪暉。

中央黃帝消災真文：鎮星輔脾，迴度北元，魁魍主非，截邪斬根，魍魎魍魎，掃穢除氛，魍正玄斗，明度天關，九天符命，金馬驛傳。

祝消災真文

元始上天，三光高明，回景照曜，四方肅清，運度所衝，激揚流星，五分錯越，三統失寧，五斗總辰，七宿明靈。真君大魁，厥諱玉精。夫人皇妃，字曰育嬰，總御仙關，回轉諸天。今有弟子，恐有災星，懸告不祥，請以真文，赤書上陳，散髮謝愆，披露丹誠，乞垂玄監，回復天經，氣不妄越，災不橫生，焚燒真文，散烟玉庭，上景監度，普告萬靈，氣清三關，災滅九冥，陰陽調和，眷屬安寧，請以真文，風火驛傳。

祝符戒

元始上聖，玉帝高真，丹文告命，濟死度生。金籙妙戒，拯度幽冥。白簡寶符，九真仙經，解削罪咎，冤債和平。救苦真人，削除罪刑。察命童子，注上生名。護戒威神，引詣福庭。超離五苦，乘駕雲輶，輪轉得道，飛升上清。

祝菱龍

元始符命，下入重泉，幽關夜府，罪苦銜冤，通幽負信，魚龍告宣，魂魄

受鍊，得離冥關，神公往化，上昇三天，一如告命，菱龍驛傳。

十二念

一念天地交泰，二念大道興行，三念陰陽叶序，四念日月齊明，五念廟社安泰，六念聖筭延齡，七念兆民康輯，八念百穀豐盈，九念異人間出，十念災害不生，十一念休祥荐至，十二念治定功成。

十二願

一願乾亨坤順，二願道尊德隆，三願五行不忒，四願九廟來崇，五願一人有慶，六願四海會同，七願萬物茂遂，八願百穀滋豐，九願君唱臣和，十願俗洽時雍，十一願與道合契，十二願億載無窮。

又

一願乾坤明素，二願氣象清玄，三願聖人萬壽，四願化洽八埏，五願天垂甘露，六願地發祥烟，七願四時應節，八願百物生全，九願家多孝悌，十願國富才賢，十一願艷都罷對，十二願學道成仙。



古儀十二願念，總括無遺，方見願力之廣，以是願念，回向家國幽明。蓋科儀中文意，亦復如此，信古儀之盡善也。如巢觀先生願念，則不然。爲國專以國事，薦幽專以遷拔，消災專以祈禳。蓋其所著之儀，亦復如此故也。今並錄之，俾行持者自擇。

### 巢儀十二念爲國

一念天無氛穢，二念地無妖塵，三念神風靜默，四念日月照明，五念八景冥合，六念十方肅清，七念普受開度，八念民稱太平，九念萬神侍衛，十念諸天書名，十一念功德甚重，十二念咸得長生。

### 又遷拔

一願人無夭橫，二願澤及漏泉，三願冤仇解釋，四願苦爽昇遷，五願豕訟俱息，六願復連不纏，七願九龍馳命，八願魂門鍊仙，九願幽牢罷對，十願七祖生天，十一願朱陵受度，十二願坐致自然。

### 又消災

一願闔門康健，二願父母長生，三

願萬邪歸正，四願衆惡不萌，五願五路通達，六願宅舍安寧，七願營業稱遂，八願六畜興生，九願疾病痊差，十願財物豐盈，十一願橫事不起，十二願永享利貞。

### 普供養讚

人各存念，注想天尊，稽首歸依，焚香供養。願香氣氤氳，遍滿十方界，上至無上大羅天、仙都玉京、蕭臺絳闕、七寶紫微宮，元始天尊、虛皇太上、十方衆聖、三境真仙、寶藏靈文、玄中教主，敬發心回向，同入法門。願以此香烟，虔誠供養，供養普遍，皈命禮至真三寶。

### 祝八威真文

安墳、安宅

三光開明，迴轉天常，運推數終，百六乘綱。大劫交會，萬妖爭行，北酆不拘，放逸鬼宗，羣魔縱肆，妖閉天光。上帝有命，普告十方，演明天度，法教開張，宣道治民，攝除不祥。有何小妖，羣聚爲場，赤書玉文，檢攝鬼鄉，北酆三官，明速傳行，千魔束爽，萬鬼送形。流鈴交換，激氣太陽，金虎四邀，

天丁捕亡，大小齊到，不得匿藏。乞如所言，列奏上蒼。

### 八威真文

東山神呪，攝召九天，赤書玉字，制會酆山，束魔送鬼，所誅無蠲，悉詣木宮，敢有稽延。右東方北攝酆山，束送魔宗，符教所討，明列罪原。南山神呪威伏百方，群妖滅爽，萬試摧亡。右南方赤書玉字，九天真文，攝召萬氣，普歸帝君。右西方北山神呪，激陽起雷，流鈴煥落，鏗天振威，北部所部，萬妖滅摧。右北方敕攝北帝，遏塞鬼門，剪除不祥，莫敢當前。右中央

### 道門通教必用集卷之二

### 道門通教必用集卷之三

鶴林道士呂太古集

#### 讚詠篇

#### 五方衛靈呪

此咒固非讚詠篇所編，然患多出於耳聞口授，訛繆者多，故著于此，俾自童子時點授，則終身售用也。又按此呪，皆制邪之文，故皆有我字，或有改爲臣字，誤也。誦呪發爐存神之後，方是關奏上真，初無懺爾，並依金籙儀及藏經諸處契勘錄出。

#### 東方

九氣青天，明星大神，煥照東鄉，洞映九門，轉燭陽光，掃穢除氛。開明童子，備衛我軒，收魔束妖，上對帝君，奉承正道。赤書玉文，九天符命，攝龍驛傳，普天安鎮，我得飛仙。衆和，末句以下同。

#### 南方

南方丹天，三氣流光，熒星轉燭，洞照太陽。上有赤精，開明靈童，總御火兵，備守三宮，斬邪束妖，翦截魔王，

北帝所承。此呪皆以制魔伏鬼，不令干犯道場。凡行道之人，爾凡伏羣魔，皆屬北帝。北云北帝所承，或有以爲南方呪，改爲赤帝誦之，誤也。此爲害義，不得不明之。風火八衝，流鈴交換，敢有不從，正道流行，我享上功，保天長存，億劫無終。翦截魔王字藏中科儀，一曰魔凶，則韻方叶爾。

#### 西方

七氣素天，太白流精，光耀金門，洞照太冥。中有素皇，號曰帝靈，保神安鎮，衛我身形，斷絕邪源，王道正明，宮殿整肅，三景齊并，道合自然，飛升紫庭。靈寶符命，普惠萬生，功加一切，天地咸寧。

#### 北方

北方玄天，五氣徘徊，辰星煥爛，光耀太微。黑靈尊神，飛玄羽衣，謂黑靈尊神衣，飛玄之羽服，或有避爲飛仙羽衣，則害義。備守五門，檢精捕非，敢有干試，豁落斬摧。玉符所告，神振八威，邪門閉塞，正道明開，映照我身，三光同輝，謂身與三光同輝，或改爲三宮洞輝，誤也。策空駕浮，舉形仙飛。

#### 中央

黃中總氣，總統仙真，鎮星吐輝，流煥九天。開光童子，一十二人，元氣炎精，燄上朱烟，儀中並是燄上，或曰炎上，誤也。洞照壇所，及得我身。百邪摧落，却鬼萬千，中山神呪，普天使然，五靈安鎮，身飛上仙。

#### 五鍊生尸寶章

東方龍漢始青九陽梵華之氣寶章  
九陽迴妙氣，三景散元精。碧靄浮靈篆，青林粲淑英。超遙玉清府，遼邈蓬萊瀛。真化通無間，神風滋萬生。  
南方赤明丹光三陽梵靈之炁寶章  
浩劫開神運，龍文泛赤霞。八威奔電激，九鳳破凶邪。鍊度丹皇室，飛升元始家。炎明常繼照，靈慶襲晨華。  
西方延康素靈七陽梵英之氣寶章  
皇老儲靈粹，金精耀斗威。六天咸滅滅，萬寶復幽微。爽氣浮高闕，寒光靄素輝。空洞披玉勒，空洞之文，勒字玉簡，故云玉勒披開也。華麗九霄飛。  
北方開皇玄上五陽梵混之氣寶章  
五氣符元妙，諸天混太冥。神旌

飛羽黑，神旌以黑羽爲飾飛揚也。玉女散花青。紫策封天寶，玄文凜帝庭。玄天之文嚴，重祕于帝耳。文言爲凜也，玄天、玄風，皆誤。羣魔欽至化，萬國保安寧。

中央上皇中靈一陽梵寶之氣寶章混黃生一氣，感化結真形。上德持柔順，金光洞杳冥。建中該九極，執本統三辰。焯焯天端上，飛芒耀玉靈。

### 外壇讚詠

壇外法事，字字皆以拔度爲本，誠非細事，況是施主追悼之際，慘戚裝懷，謳歌詞曲，尤爲不便。今取前有偈頌及新添，以助行事，庶幾典雅。

### 開方偈趙明舉

先吟此偈，然後開方，四人送唱，以意稱揚。

六螭回馭息虞泉，城郭樓臺入暮烟。  
夜漏初傳人已靜，陰關仍闢鬼爲塵。  
玉隆有會如何向，里域分司守護堅。  
欲得大方隨處去，須憑真誥爲敷宣。

### 第一度召請諸神偈

新添以大聖仙元教主，四聲吟之。

龍駕相將下紫清，遍延羣望豎旛旌。  
諸神悉自無方至，雲裏追班聽蹕聲。

### 第二度召亡人偈

夜府多寒閉苦魂，女青天詔制辭溫。  
靈旛啓道招遊爽，符吏匆匆爲駿奔。

### 第三度召請偈

大道哀深六趣幽，長於苦海駕慈舟。  
紫壇夜永開方便，躋入洪鈞一氣收。

### 澡浴偈

先同誦八天梵文，令法師存想，取三十二天真氣入浴水，然後吟此偈。偈畢，一童子誦文，引科偈。

總因心垢難湔洗，苦海漂流不淨身。  
津津惡障未祛除，穆穆清光難禮覲。  
金龍負致長庚水，玉女分傳御坐香。  
三熏三沐整威儀，躡景乘虛朝太上。

### 引沐浴儀語新添

上來奉召，所薦亡者，已承溫詔，得出寒鄉。隨符吏之匆匆，不行而至；望旛竿之縹緲，應召而來。將朝對於軒墀，即受傳於符戒。先須澡身浴德，振衣彈冠，敬憑神呪，以護符請就，蘭湯而灌濯，四靈備衛，九氣密羅。澡浴儀文，請爲宣示。

### 法橋偈

普獻無邊聖，香煙散十方。願乘

七寶臺，垂光五濁世。永度人天衆，咸令上法橋。同會證無爲，勤修不退轉。

### 法橋文

合道場人，至心歸命，十極虛皇之聖，五靈引導之童。願賜慈悲，特垂救度。竊以欲海深而易溺，當究濫觴；道岸高而難登，孰爲援手。由性情之迷悟，致霄壤之升淪。嗟彼衆生，處於濁世，愛流成海，虐浪滔天，貪嗔騰汹，汹之波，結習自涓涓之滴，逐物而就，死者滿目，皆是反身。而達岸者，舉世實希，豈無汲引之門，救此漂淪之苦。惟太上憫衆生之俱溺，設妙法以爲橋，命十極天尊作聖涯之砥音紙柱，詔五靈童子爲道海之津梁，拔出迷途，達于彼岸，濟弱水三千萬里，搏音團剛風五百億重，不踰俛仰之間，即至逍遙之境，端在心源，自反法力，愈加一舉足而不失正因，九頓首而上朝元始，更惟衆聖密賜護持，庶令苦海之魂，俱遂法橋之上。

### 次和。

### 法橋大度天尊

引亡人上法橋。

次舉。

下橋偈

津梁苦海法為橋，太上慈悲願力

饒。虐浪中流逢砥柱，愛河斷岸得仙

船音影。公子靈幡祛壅滯，天尊援手互

招邀。接武下橋趨玉陛，大方無礙信

逍遙。

為亡者皈依三寶懺罪

亡過某等，已承告召，得屆道場，將

傳金口之戒言，祇佩丹文之簡籙，然未

祛於宿障，恐莫悟於至言，敬依三寶之

威光，為懺六根之罪累。蓋罪從心起，

滅心則萬咎冰消；志以道寧，見道則

一靈朝徹。宜在洗清情識，蠲潔性靈，

速捨妄以歸真，庶聞經而契道。夫作

善建齋，傳符受戒者，先當皈命無上至

真十方三寶，仰仗三寶聖力，為亡者懺

悔三業罪愆。故經云：若不皈依三

寶，是故善法無所依憑。合道場人，同

誠皈命。

皈命十方道寶，頂禮元始天尊，能

為所薦亡魂，解除身業罪。

懺悔亡者身業無邊罪，種種益難

量。舉止去來間，滯染諸塵垢。華飾

貪逸樂，傲誕世間人。今對大慈尊，一

心陳懺悔。願此身業罪，消除永不生。

清靜契神仙，永離三邊界。

皈命上清經寶，頂禮太上道君，能

為過去亡魂，解除心業罪。

懺悔亡者心業無邊罪，種種益難

量。嗔喜并愛憎，妄想從心起。嗜欲

兼虛妄，嫉妬世間人。今對大慈尊，一

心陳懺悔。願此心業罪，消除永不生。

智識迴開明，洞達希夷理。

皈命太清師寶，頂禮太上老君，能

為過去亡魂，解除口業罪。

懺悔亡者口業無邊罪，種種益難

量。兩舌及浮言，毀謗諸經教。噉食

有情物，窘辱世間人。今對大慈尊，一

心陳懺悔。願此口業罪，消除永不生。

絕彼是非言，常演真經教。

向來皈依三寶，懺悔勝因。惟願

亡人，往生天界。花臺寶蓋，雲際來

迎。絳節青幢，空中接引。騫林樹下，

常聽仙經。寶月池邊，惟聞雅梵。生

前萬罪，從此消除。歿後三塗，因今解

釋。乘龍駕鶴，道道十極之天；悟道

登真，自在三清之境。福流見在，再果

常來，此世他生，長親至道。洪惟上

聖，允鑒精誠，撈漉羣生，俱登道岸。和

不可思議功德

又一首

稽首歸依道，大羅元始尊。杳冥

開祖劫，混沌立元根，願垂清靜教，救

度此亡魂。衆和，往生神仙界，下同。

稽首歸依經，真文煥八方。鍊金

成鳳篆，揉玉寫龍章。願開金口演，救

度此亡魂。

稽首歸依師，三乘衆中尊。先天

垂愍濟，歷劫度迷昏。願垂無量法，救

度此亡魂。

懺悔亡者眼耳鼻舌身意罪，六根

六欲六情愆。管絃嘹唳少真音，耳紫綠

輝華非正色。眼蘭麝競裝馨香處，鼻車

馬爭驚馳騁時。身甘辛不節自傷神，口

喜怒無常惟奪算。意係六根之罪六根每引

輪回路，或以六根為三途，誤也。三寶常開

拯拔門。以今發露首前愆，總願罪根

盡消滅。

次懺慳貪瞋怒愚癡罪，邪姪偷盜殺生愆。謗經毀教不皈依，怨道咎師違誓約。身心妄想無休息，眼耳生貪不住時。未來過去及今生，三世罪根難可測。此日發心陳懺悔，從前障惱願消除。言詞既向道前陳，衆聖定於空裏鑒。不可思議功德，衆等各各彈指，爲亡者懺罪。願亡者身業消滅，心業消滅，口業消滅，六根消滅，冤債消滅，業障消滅，萬罪消滅。

願亡者衆罪如霜露，惠日普消融。今世與來生，受性常清靜。亡魂出長夜，滯爽達仙源。北都除愆過之文，南府注長生之字。詠讚仙歌空洞響，不聞地獄苦魂聲。衆等各發至誠心，亡者生天受快樂。已上兩篇，並出九幽儀，係廣成先生修定。

懺罪授戒訖，引亡人歸位，次安慰云：

亡者某等，已對三清，親傳九戒，即肅恭而諦受，宜寅畏以欽承。仍備肆筵，各惟就序，享芬芳之嘉薦，俟周滿

之洪因。齋主望靈，虔誠設拜。或咒食，即於此爲之。或未咒食，於此回向，出九幽儀。

送亡人法事 出回橋儀

今則齋事周圓，法筵斯罷。宜承善利，共沐殊勳。逐慧光而睹天尊，捧符命而登仙界。亡過某等，既已聞經聽法，必能見性知天，仰侍丹輿，便昇雲路，上昇仙橋，於此際登，朱陵府向。今時既得超生，各流恩福，齋主虔誠，謹當奉送。

偈

法筵勝會功圓滿，遠逝新亡盡往生。齊向昇仙橋上過，各齋功德禮三清。

道門通教必用集卷之三

### 道門通教必用集卷之四

鶴林道士呂太古集

啟奏篇

高功上御案香祝

玉華散景，九氣含烟，香雲密羅，逕衝九天。侍香金童，傳言玉女，上聞帝前，令臣所啓，咸乞如言。

上手爐香祝

道由心學，心假香傳，手執玉爐，心存九天。真靈下盼，仙旆臨軒，令臣關告，逕御三天。

上洞案香祝

朱陽九霄，蔚藹元晶。靈鳳來翔，上朝玉京。流結感化，仙道克成。願此丹禱，隨烟迅升。

上手爐香祝

百神羅刑，心存洞陽。左命真伯，右挹元皇。開發靈篇，大梵隆昌。紫烟上達，萬道丕張。

祝香後入意文

伏聞杳杳太清境，隔世幾塵；巍巍無上尊，與人絕迹。敬憑齋戒，輒布懇祈，願垂降鑒之私，少示感通之妙。遙瞻雲馭，暫離紫霄絳闕之嚴；駢列星冠，共啓玉匱珠籙之祕。用陳誠意，上瀆天顏云云。

啓壇文

伏聞雲層峨峨，天不悶感通之路；人道渺渺，聖常垂臨下之私。嚴敞家庭，恭修淨醮。薦蘋蘩於下土，通香火於上蒼，敢布愚衷，仰干洪造入意。今則恭葺仙科，仰延真馭，允謂建齋之始，初嚴事帝之誠。獮祭雖微，龍車望幸。惟喧囂之穢土，懼瀆高明；瞻彷彿之睟容，愈增戰慄。伏望雲輿鶴馭，下天門之九重；絳節霓旌，駐人間之五濁。玉虛三境，金闕萬靈，暫辭邈邈之天，下副虔虔之懇。命里域靈官，肅嚴醮席。敕衛壇將吏，驅斥妖氛。使精意感通，齋功成就，即荷上聖降臨之恩。臣云

啓壇文通用

臣聞湛寂高真，本無爲而善應；玄虛妙道，常有感以潛通。非虔仗於靈科，孰仰干於聖造。今則華壇既啓，醮禮將陳，先懇祝於皇靈，次披宣於道範。惟冀洞貫九天之上，咸使聞知；昭回三界之中，曲蒙感格。廣垂至德，兼覆含生。

黃籙齋祝香入意後文

洪惟黃籙寶齋，紫陽祕格，上可以鎮天安地，下可以保國寧家。濟存拔亡，延生度厄，萬天所重，千聖攸遵。教演九時，取則九陽之數；壇開三級，旁分三氣之華。配八卦於八方，定十干於十位。乾天門而巽地戶，良鬼道而坤人途。莫不弓旗鑑劍，以列於威儀；籩豆陶匏，以薦乎凡品。于以法天而象地，于以通真而召靈。臣等拜覬有初，謁真伊始，想玉階方寸之地，無敢不恭；瞻天顏咫尺之威，如在其上。伏望三清十極，萬聖千真，暫辭金闕之崇高，俯罄塵寰之湫隘，坐使環堵一塵之地，化爲清都太微之居，欽俟降臨，

不勝延竚臣等。

諸齋祝香陳願意後文

於是壇場初啓，闔闔洞開，肅清衆以無譁，罄丹衷而有恪。崇效天而卑法地，制備乾坤；左顧儀而右盼璘，門開日月。寓精意於蘊藻蘋蘩之內，格霄真於杳冥恍惚之間。七日戒而三日齋，敬效昔人之事帝；內盡志而外盡物，誓堅今日之推誠。開衆妙之寶壇，酬往年、今時之素願，旅延羽士，歌詠洞章。清蹕舉而雷動風馳，法水噴而雲行雨施。伏望星宮月殿，絳闕清都，玄之又玄，盡重玄之列聖。上極無上，遍最上之高真。降自天中之天，來從象外之象。遊空飛步，芝童執節以前趨；駕景乘龍，仙馭控飈而直下。來顧苾芬之薦，俯歆螻蟻之誠，貽貺存亡，覃恩幽顯，即荷上靈之監，敢忘丕應之符，欽俟降臨，曷勝延竚。臣某云

啓壇文

三界應感，一切真靈，願聞關奏，俯降香壇。既沐垂光，少歆懇悃，注想仙音清曉，羽衛森羅。飄飄垂風幄雲

軒，隱隱現霓旌絳節。至真所格，凡居爲，紫府丹霄仙仗來。臨塵世變，瑤池玉闕，暫停鸞駕，俯察丹衷，輒露微誠，仰干洪造。入意臣聞道常應人，天惟聽下。既有投誠之切，敢忘謹始之嚴。內竭精衷，外殫庶物。壇壝法規而則矩，陶匏尚質而去文。信幣交陳，各象五方之色；簪裳肅列，爰分衆職之班。燭龍交映於神光，香獸互凝於瑞霧。莫不溪毛蠲潔，華蘂繽紛。當尊卑奠位之初，乃天人交感之際，天威咫尺，雲氣晏清，祇僊降臨，務先嚴肅。伏願帝顏允瞻，閭闔齊開，萬乘啓途，百神戒道。獅子白鶴，擁天仗以來臨；龍青虬，輓帝車而倏至。不違凡悃，庶畢齋功，即荷衆聖降臨之恩。臣等。

### 啓壇告真吉用

並願蕭韶前引，軒蓋後隨。霧捲霓裳，雲浮月帔，風伯清道，雨師灑塵，界清蹕於天衢，散寶花於法界，迅飛部從，降格道場。幸披霧以觀瞻，願剴心而控懇。今有云云。

茲夕精誠爰啓，懇悃斯陳。請迎

之禮既殫，鑒格之情無爽。壇排圓級，位列高真。羣仙離碧洞瓊宮，衆聖下金樓玉殿，莫不幢幡引駕，寶蓋隨軒，雲臻如玉彩光天，霧集若星輝燦目。帝顏穆穆，凝黈纁以俟聽凡情；岱嶽嚴嚴，捧金編而鑒觀醮禮。南曹染翰，將錄善以上生；北府揮毫，俟紀功而落死。當此之際，有片善者，奚患三界之弗知；運此之心，有寸功者，勿訝衆真之弗錄。況夫精崇妙會，嚴設香壇，具十二念之善心，遵三九等之齋法者，孰謂聖賢之不接物，何疑幽顯之不沾恩。非道弘人，人能弘道。今則延仙游之瞻顧，按科法以關盟，敷叙凡誠，仰干洪造。伏願三清三境，十極十華，妙行真人，至真大聖，九天星象，三界威靈，放五色之祥光，蔭九華之寶蓋，迂臨法席，成就善功，咸所禱祈，即遂通感。臣與云云。

### 宿啓白五師文

醮筵乍啓，齋事云初。望三境之鬱羅，冥心注想；延九清之鸞馭，拜手翹勤。列冠珮之巍峨，接威神於恍惚，

切慮玉京金闕、紫府丹臺、日月星宮、璇霄斗極，高超象外，迴出人間，難通葵藿之誠，莫遂蘋蘩之薦。洪惟師寶，久廓道恩。凡茲設醮以建齋，須賴敷誠而達悃。今有某伏念素叨玄化，久沐真風，爰卜今辰，欽酬志願，吉凶更用禮盡恭而貌盡敬，應以實而不以文，重念臣道價未聞，真筌莫曉，誤蒙請命，承乏關宣。伏乞靈寶五師，道德衆聖，不違懇請，大賜含洪。分遣四司曹僚、五帝官屬，證明齋事，騰達願誠，省覽詞章，潛垂恩祐，乞使逐時關奏，祈禱感通，志願克諧，善功昭著，誓堅誠懇，仰答恩休。臣等云云。

### 建壇發爐

切以露丹懇於高天，心修事帝；俯紫霄於寸地，式按招真。屬聖凡交感之初，正壇陞吉蠲之始，爲摠誠悃，干冒天威。奉道某幸以宿因，獲生華旦，有域中四大之德，預天下萬物之靈。穀腹絲身，僅免啼號之患；天形道貌，幸全稟貸之仁。報未見於涓埃，念不忘於夙夜。謹涓吉旦，恭了初心，

方此漏箭初傳，更聲乍警，明九微燭，燒衆妙香，囂塵淨而天風清，陰氣升而夜光冷。凡三、四宵修敬之事，在一步履踐之初。伏冀几榻升聞，帝聰遙徹，暫出鴻濛之境，來臨圭潔之場。玉女金童，散天香而郁藹；霓旌絳節，雜花雨之繽紛。不遺一芥之賤微，少慰歷年之素願。天上云云。

### 啓齋五師前

臣聞先天立教，混元已退於無爲；歷劫度人，師寶上膺於眷命。是以玄中莅職，監齋糾非，經籍度之相傳，天地人之共賴，隨機赴感，有願必從。今建寶齋，並幽明而利濟；願臨塵界，垂恩惠以覃延。謹罄凡情，仰干師造。

### 清旦

切以大明生於東方，了無塵翳；平旦之存夜氣，豈有枯亡。雲車鶴駕之徘徊，野馬塵埃之不動，屬陳度命若消災，改儲福之愜，上瀆好生之慈。入意以今清旦行道，關奏上靈，伏望師真，俯垂恩祐。導達誠愜，如杲日之上昇；潛削愆瑕，若薄冰之渙散。使片善克

無於魔障，而洪恩覃及於幽明，感戴之心，始終在念云云。

### 臨午

齋事有嚴，謹終謹始，聖心之格，無黨無偏。觀聖人揭大中以示人，若曦馭正離明而燭下。無幽不照，萬物資之以生成；有感皆通，一念扣之而通達。爰當臨午，再至輸誠，敷露詞情，冒干師聽。以今云云。

### 靜夜

四氣朗清，天無氛穢，神風靜默，地絕妖塵。斗柄橫空，揭心詞於霄漢；月光洗夜，寒膽氣於骨毛。戰戰兢兢，克伸昭事；高高厚厚，諒賜聞知。用扣師真，庶周能事。今有云云。

### 本命經文

上象渾天，分三辰於經緯；太清立教，播二斗於坎離。宣本命之宏綱，闡玄靈之要訣。蓋人之根本，攸繫七元。天有斗魁，斟酌元氣，性命五體屬乎；主張壽夭，一生歸之予奪。凡律曆之周運，宜瞻六度，以降下人間，伸香火之皈投。故得三生之長爲男子，

修齋設醮，量力建功，酌水獻花，隨緣報本。既良辰之，每不虛度，必上壽之，所可增延，應似谷聲，答如光影。入意

### 真武經文

宴處太清，色相非無而湛寂；下臨北極，威權有赫以慈仁。視民如傷，切齒羣魔之肆擴；好生爲重，推心兆庶之興哀。輔正摧邪，消災降福，雖四十二年之修道，三千餘行之成功，本從金闕之化身，明示衆生之證果，所以周行六合，威攝萬靈。凡五瘟之小魔，與六天之故氣，白虹影裏，化作塵埃。雙睛電中，勦無餘類。故得邪妖殄滅，家國咸寧。每月三七之辰，是真君降凡之日，宜伸香火，以答恩休。

### 安宅經文

切聞有巢氏之世，食橡栗而栖木居巢；軒轅氏之時，易棟宇以待風花雨。使民人之老幼，安作息於曉昏。唯聖人利物之宜，爲天下所利之大。然陰陽有倚伏之變，寒暑有疵癘之邪，人或冒之，灾所不免。於是太上命神



靈而授職，爲凡夫衛宅宇，以分司、以太歲爲尊，以一年爲準法，好生之爲重務，去惡之居先立。天坑麻口之神，吞魔食鬼；豹尾黃旛之屬，護正摧邪。正位辨方，妥靈守職。宣太上威權之化，防衆生橫害之虞。豈期人有賢愚，罔明禁忌；神唯勇悍，莫問幽明。犯之則無故悞之分，干之則必示灾凶之變。幸惟太上，再閱凡夫，出符文以安寧，宣呪法以警戒，百神聽其令，幽鬼稟其盟，使悞犯者轉禍爲祥，皈投者却灾致福，人天蒙利，家國沾恩。

道門通教必用集卷之四

道門通教必用集卷之五

鶴林道士呂太古集

職佐篇

黃籙第一日：爲國歎經文

夫《道德經》者，無爲之文，自然之化，落落太漠之表，巍巍象帝之先，二氣資之以立根，三光持之以成象，細無不入，大無不包，其真以治一身，其土行賈切直音鮮足以治天下，其功以度羣品，而微妙則能致神仙。昔老子之過函關，授八十一章而徑去。漢文之從河上，蓋千七百年而僅傳，窮乎無窮，極乎罔極，以宣道德之要，以爲帝王之師。至如昇玄，演清淨之音，入衆妙門，而離諸染著，禳灾列懺悔之品，度一切厄，而所履平安。黃帝著陰符之書，可以用師於萬倍。青羅傳星曜之呪，可以用推運於五行。是皆抉一決切神道於幽微，闡玄宗之隱奧。誦之則聲參太極，研之則治化昇平，禍滅九陰，

澤含萬宇。慶流宗社，坐對無疆之休；稜格神人，潛消難解之厄。再伸偈頌，以盡讚揚。

先天立極治難名，恍惚希夷值本根。天步永清旋日月，道樞不動轉乾坤。靈源直斷羣迷徑，仙路宏開衆妙門。聖壽綿長皇極建，願言辰極與齊尊。

第二日：遷拔歎經文

夫《度人經》者，三洞上品，一乘妙言，參衆魔之歌音，宣百靈之隱韻。昔授於碧落之士，而藏於紫微之宮。梵氣彌羅，周十方無極之界；金真朗郁，煥八天空洞之章。文暢而曲不華，趣幽而義益奧。極玄中之妙旨，非世上之常辭。詠之者，名列玉房；聞之者，神飛金闕。萬帝設禮，羣妖束形，以至生天通微奧之言，清靜啓真常之性，十方嚴救苦之寶訓，九幽授心印之靈篇，普度天人，津梁生死，俾罷對於長夜，咸列名於上清。再引偈章，以伸濟度。玉書金簡度人深，流出慈尊廣大心。梵氣結成無極界，天風飄泛自然音。九幽破械冰消戟，八極飛香月滿襟。

稽首無英齊接引，神光一道破重陰。

### 第三日：消災歎經文

伏聞太極既判，兩儀肇生，闡妙道於虛無，寓至神於水火，斂純陰肅肅之象，宣至陽赫赫之精，氣氣不停，生生相續。實之以坎，畫於朔易之都；虛之以離，煥乎文明之位。陶鑄萬品，統御三元，五行得之以成，七政得之以運。道生於一，而著於水火之用；物散於萬，而極於水火之功。南北一經，蓋盡茲蘊。昔太上之下降，命天師之密傳。浮玉局於地中，敷揚祕訣；化鶴鳴之山上，親授靈文。可以薦福消災，可以注生削死，永除業障，漸入仙宗。且天童開護命之符，而真武有降福之願。上智廣真一之訓，報劬勞恩；靜觀達智慧之門，明解脫義。功德甚重，不可具陳。輒引偈章，以伸讚歎。

芝壇香靄露華稀，雲際風高鶴蓋飛。  
玉宇寥寥鳴警蹕，金光奕奕下丹墀。  
願傾法雨除塵垢，更乞仙丹造道微。  
兩卷真經香一瓣，自茲根極欲知歸。

### 懺悔

道家儀文，至於巢先生，號為大備。文字皆有所出，或儒書，或道書，剿裁鋪張，自有體製，一字不可移易。惟懺悔文，消災、遷拔兩篇，又多取莊子，使人聞之，洗濯疏瀹，有清心向道之意。未燭厥理者，或有改易，增加書字，殊為可笑。故書之，以告將來。

### 黃籙啓壇懺悔

臣法衆等，至心歸身、歸神、歸命十方無極太上靈寶天尊，圓穹列曜星辰，厚地洞天、海嶽醮筵，感降一切真靈。伏願大慈，洞回昭鑒，同垂巨澤，普降洪恩。臣聞天無親，而所輔在德；福無門，而所召在人。仰歸衆妙之門，必應羣心之用。寶笈著度人之法，獨步玉京；驛龍馳奏善之章，上朝金闕。每靈心之丕應，見天意之孔昭，皆太上垂慈濟拔之科，而天下奉道修為之路，盼蜚如答，神明罔違。伏念臣法衆等，暨齋官某等，生逢盛明，志慕虛靜，清天君而疏瀹，斷業障以皈依，謁欵在辰，齋明有翼，將以交三靈於恍惚，禱百順

以延長。尚慮宿運功微，前緣德薄，今生往劫，多縱罪根，俗骨凡胎，未階真品，雖道心之甚固，恐天聽之難聞。伏願上聖哀憐，洪恩蕩宥，拔九祖之魂於既往，貸三世之罪於將來，洗六根以一新，秉純誠而無貳。庶幾寡過，仰格上真，用修黃籙之科，延召紫清之福。臣等稽首禮謝無上至真三寶。

### 散壇懺悔

臣聞強名曰道，本清靜以無為；不測者神，有感通而必應。再蕩滌於尸穢，終對越於靈真。伏念臣等，仙品未充，業根尚在，雖稽參於寶籙，常諷誦於真經，宣舉教科，修行齋直，慮有違於道範，曾未沃於靈心，輒更澄練身形，洗除塵染，擴性天而一毫莫翳，拂心鑒而內境圓明，藉此修持，用祈感格。伏願衆真潤略，上聖涵容，凡朝謁非儀，壇壝不肅，千愆萬過，並乞貸原。臣等稽首禮謝無上至真三寶。

### 消災懺悔

臣聞盡天下之物，不足以交神明；修胸中之誠，斯可以應天地。矧乃玄

元之教，莫非清靜之門。儻三業六根

之過存，豈一精二純之能格。當齋科之謹始，欲塵累以先除，庶藉宣揚，以伸昭格。臣今懺悔奉道某等，因從曠功，逮及今生，有妙湛之體，而為情所昏；有虛明之用，而為物所蔽。欲惡盛而性有萑音完葦，聞見疏而智亦聾盲。不能外身而多身殃，不能緘口而多口過。意有所至，愛有所忘，積其有涯之生，造徧無邊之罪。今則對列真而懺悔，體妙道以修為。諸業生於諸根，塵塵是妄；有身孰不有患，物物迷真。爰即靈壇，盡祛往咎。心疏淪而內觀無礙，性虛靜而外境不移。謏謏之佞皆除，津津之惡悉去。已作之故業，永不蹈於覆車；未造之新殃，更不投於深窞。庶全身而遠害，無見利以忘真。伏願眾聖洞昭，皇靈遠燭，以瑤池之水，洒濯於羣心；以甘露之華，洗除於眾垢。衰相罪根之消滅，靈光慧性之圓明，恪遵儲福之科，用副延生之格。若非生日，行儲福科當改作恪堅為善之心，仰俟降康之澤。禍沉九地，福遍十方。臣

等稽首禮謝無上至真三寶。

### 遷拔懺悔

此懺悔之意，止為見存懺罪，將以清心靜念，昭事上真，非是為亡人懺悔，往往誤認旨意，引亡人姓名，不知人理大不相干。

臣聞探真精於象外，道本沖虛；發洪願於寰中，理歸清淨。非滌除於外慮，不見以將上靈；非懺洗於塵緣，不可以奉齋直。臣今懺悔奉道某等，自從曠劫，逮及今生，身口意之所為，天地人之六見。有身斯有大患，久積罪愆；諸業生於諸根，未祛惡障。耽染聲色，放蕩心形，血氣盛而爭鬪之患生，嗜欲盈而性命之情病，每背真而就偽，難解心而釋神。當齋事之啓行，恐層霄之有隔。欲以太玄之水，洗諸惡根；欲求六度之舟，達于道岸。植無漏果，塞眾邪門。洗除其五蘊、六塵，斷滅乎十纏、九結。一心已悟，萬罪皆空。誓從今日至來生，永不將身纏業網。伏願清都委鑒，紫極回光，察素悃之克勤，霈洪恩而允洽。陰愆陽過，悞

犯故為，或上世流注之殃，或六親連逮之役，上世六親，或宿世所造，或仇家所誣，毒風惡氣之侵凌，魔鬼凶人之傷害，並願道風掃蕩，流諸洗除，俾澄練於氣形，庶對揚於壇壝，拔九祖之魂於既往，證上仙之果於將來。九天不夜之長春，願陟洞陽之境；三業無根而自落，長辭萬鬼之羣。福遍滿於十方，禍永沉於九夜。臣等稽首禮謝無上至真三寶。

### 外壇開方

開方文非一，本無出於巢先生所修為善。其他，或紀五行之德，或叙鬼神之由，皆切當，無如止行此文。

九龍銜詔，遷升積夜之魂；六鬼交鋒，遏絕更生之路。太上昭垂於明訓，神公為掃於不祥。敬奉典彝，恭伸關告。欲冀明靈之感格，先憑梵唄音敗之稱揚。仰仗眾慈，同聲相應。

皈命東方主、玉寶皇上天尊，皈命南方主、玄真萬福天尊，皈命西方主、太妙至極天尊，皈命北方主、玄上玉宸天尊，皈命中央主、太乙救苦天尊，不

可思議功德。

以今焚香，虔誠告召地界主者，五方開路大神。伏望神慈降格，香壇證明，虔禱入意。竊以陰陽不測者，神之妙；變化無方者，道之真。惟太上以陰陽不測之神，盡變化無方之道。六通四關，其用長存，倏往忽來，洞然無礙。降神而赴感，體道以應人。受度者無間於存亡，皈真者豈分於遠近。當使千載之久，可頃刻而來；萬里之遙，如咫尺而至。臨詣醮席，參聽法音，朝上帝以登真，聽空歌而悟道。儻或所迫靈識，不即赴壇，一切地司，妄生邀截，致幽魂之阻滯，隔生路之開通，天憲甚嚴，真科不貸。今者齋官某家，大啓殊常之齋範，遍延三界之高真，星燈爛接於玉繩，香靄上通於金闕。聞諸天一聲之隱韻，百生之業障俱空；聽司馬九過之洞章，三萬之形神皆備。前亡後化，時刻昇遷，尚慮三世幽魂，九泉滯魄，未經薦拔，極用悲酸。乃請長生救苦之符，敬讓克勤之戒，將欲宣之於黃籙壇內，授之於太上

御前。先當告戒神祇，開闢五路使者，如不繫之舟，去來無礙。若出籠之鶴，騰翥自由。咨爾衆靈，廓開道路，所有文牒，謹當宣告。宣訖，上來文牒，遍諭柔祇。若無牒，即從道路下，云上來啓告，遍諭柔祇。宜爾神司，速依道訓。當界土地、里社城隍、守疆護界、一切正神，請闢道路，接引亡人。有關者速開，有津者速度。勿壅勿遏，勿稽勿停。有陰訟者，勿得拘留。有冤對者，勿得纏縛。東來而青騎將軍扶擁，西來而兌卦大神護持，南來而朱雀之地疏通，北來而玄武之方開豁。無遠無近，無親無疏。依女青之詔書，閱先靈之名姓。沿路關報，逐界申聞，撥發前來，斯須無滯。即使亡過某等，如晨風之趨林，如夜蛾之赴火，如水之東注，如馬之出奔，逕赴道場，領霑功德。若有六天故氣，孽鬼妖神，妄肆猖狂，敢生邀阻，請戮路左，以明天誅。道法甚嚴，天威難犯，度人功大，風火不停，道路山川，急急傳命，載伸偈頌，感格神靈。舉不可思議功德。

大聖玄元教主：

元始有命，上開八門，死魂受鍊，無量度人。天關一轉，飛天法輪。咨爾東方，震上諸神。咨爾南方，離上諸神。咨爾西方，兌上諸神。咨爾北方，坎上諸神。東北艮方，號曰鬼門。東南巽方，地戶所存。西南坤方，號曰人門。西北乾方，天門所經。地界主者，八方之靈。請闢道路，接引亡人。使詣靈壇，聽法聞經。領沾功德，保命生根。敢有拒逆，逼合鬼羣。翦形截首，風火無停。

今法衆等，合道場人，稽首皈依，至心奉請東方青帝、南方赤帝、西方白帝、北方黑帝、中央黃帝、開路將軍，鑒察弟子丹誠，開闢五方道路。

偈曰：

上來儀範戒柔祇，想爾八方盡遍知。應有關津蒙濟度，更無道路敢稽遲。亡魂已出寒庭獄，丹霍行升火鍊池。空洞謠歌齊讚詠，敢憑道力拯靈儀。

黃籙大齋第一度。召請祀典神祇  
沉寥戒夜，沆瀣澄空，佇神聽之格

思，控忱誠而惕若。入意以今恭率法衆，第一度召請古先帝王、道德衆聖、忠貞勳烈、歷朝文武重臣，凡該祀典諸廟福德靈享，伏願暫迂飈馭，降赴道場，領錄齋功，證明修奉。

伏以大道弘化，真一播靈，三清爲衆聖之先，彌羅冠萬天之首。旁分九氣，復品四人，踰劫歷之先，出陰陽之表，三界爲超凡之始，八梵爲元陽之初。上闢清圓，下凝方濁。玄黃交感，太素流形。對越在天，准尊元首。於是冬居營室，夏處層巢，飲血茹毛，結繩識事。迨及燧人鑽火，伏犧畫爻，炎帝肇基，有熊御世，帝嚳順天而行義，高陽任地以依神，夏后祖于唐虞，殷命法乎三聖，文武爲繼代之主，漢唐宗撥亂之君，莫不龍虎勃興，風雲際會。又況世分治亂，臣有忠良，莫非理國以輯民，皆務積功而累行。故在天爲星象，在地爲神明，德被羣生，澤流萬世，膺上帝之休命，授列職之仙班。故《混元圖翼》所載云：伏犧爲太一真君，神農爲南極真君，軒轅爲中黃太帝，少昊爲

太虛真君，帝嚳爲太玄真君，顓頊爲北宮真君，帝堯爲太微真君，帝舜爲太極真君，夏禹爲紫庭真君，殷湯爲北玄真君，武丁爲紫微真君，陽甲爲蒼元真君，文王爲太虛真君，武王爲太平真君，康王爲太華真君，穆王爲九元真君，漢高皇爲北帝賓友，文帝爲通玄真君，景帝爲太一真君，宣帝爲紫華仙伯，武帝爲玄成真人。凡諸神聖睿哲之君，皆證清高崇峻之位，曳裾八極，騰景九天。經若不傳，世莫能顯。復有忠臣賢佐、良輔元勳，位列仙階，名垂信史，或享世間廟食之盛，或主嶽瀆鬼神之權。故風后爲太華真人，力牧爲玄山真人，太山稽爲洞庭真人，蒼頡爲九華真人，容成爲應化真人，大撓爲玄光真人，奚仲爲太成真人，傳說爲左言上相，叔齊爲金闕僕射，伯夷爲太微侍郎，周公爲紫微都護，太公爲紫府道統，越范相爲金天真人，漢留侯爲太玄童子，東方曼倩爲歲星真人，楊子雲爲河源丞，孔安國爲太玄監。又《真靈位業圖》所載，召公、季子，皆爲南明北明

之公；齊恒、晉文，並領司命都禁之職。元規、幼輿，爲左司禁；元直、深源，爲侍帝晨。陶士衡爲河西侯，溫太真爲監海伯。凡諸賢哲，皆有典司，計年限以進陞，視功勤而超證。故北帝則三千年而一易，嶽瀆則六百載而始遷，武解爲地下鬼王，文解爲地下主者。至忠至孝，至貞至廉，初爲鬼官，轉升洞府。類皆百四十年而進補，入宴東華；階分二十七品以歷陞，方逃大劫。惟上天黜陟之甚闕，非下界耳目之可窺。諒累積於魏功，方漸登於仙位。況茲庸蜀井絡之地，實依曾昌建福之休。金馬碧雞之神，昭垂漢策；銅關玉壘之廟，大庇坤維。羣望分司，柔示列止。自蜀郡以類而推廣，遍率土皆有於綱維。山川九州，玉帛萬國，鬼神司之。幽隱廟貌，遍於邇遐，功憂在民，靡神不舉。今有奉道某家，遵九壇之典訓，奉三籙之爨儀，上極鬱羅之天，中該乾坤之界，下際洞淵之府，幽覃朔都之鄉。一念感通，百靈交會。凡天地水陸，遍祈而致禱；宜

山川鬼神，咸集於無方。伏願大恢得一之靈，悉自無方而至，爲奉碧簡招真之命，並筮金闕朝真之班，對揚天休，保安國祚。封掌生死。仍開方便之門；把握陰陽，盡躋皇極之世。伏願暫駐風雲之馭，俯歆蘋藻之羞，陰佑齋功，克諧願望，再伸偈頌，感格威靈。

帝王稽古代天工，異教同風建大中。元首股肱無二用，鬼神賢聖信兼隆。人間祀典思遺列，天上仙班答駿功。香火載嚴遵溥告，願驅雲馭格精衷。

### 第二度：召請亡魂

遊魂爲變，大夜不晨。必傾九色之金光，用掣重陰之鐵鎖。大方無礙，萬法昭融。

### 舉天尊

有物混成，寔生天地。圓清方濁，厥中生人。是名三才，各具道性。天長地久，無古無今，推盪陰陽，裁割昏曉。一氣不息，萬形以生，卓然有神，是爲造化。人居其內，上配兩儀，貴賤雖殊，賢愚有間。其所稟受，同此之初，負陰抱陽，圓首方趾。始從嬰孺，

精守神全，天真不虧，混沌未鑿，不慕富貴，不羞賤貧，雖含識知，純粹精白，名真實性，無邪僞心，得生爲人，所貴在此。洎及長大，身與世交，漸喪天真，熏煎人欲，赤子之性，日削月悛，林林而生，滔滔皆是，惟務逐物，不知愛緣。豈識此身，上配天地，始從胎育，降氣九天，十月既圓，萬神備守。一形既誕，七竅開明，頭布九宮，九真所蒞，中分五藏，各有一神。三魂處肝，欲人爲善。七魄居肺，欲人爲非。二十四真，分列三部，紫戶玉閣，絳宮丹田，中有真人，號曰赤子，天地神氣，三萬六千，關節機微，皆歸掌握。人之一身，豈不至貴。尤所貴者，唯吾一真，是厥初生，純粹精白，人能處世，各知自存。周身中神，欣喜踊躍。頂戴之星，光明照耀。其或精鍊，可致神仙。真正慈仁，亦能久視。如其反此，莫匪惡緣。神氣日衰，星光日暗。一真之性，至死不知。上辜大道，混成之緣，下負兩儀，受中之道。冥冥長往，與鬼爲徒。萬神悲哀，各去其體。或淪幽夜，或屬

鬼官。欲求超生，渺無涯涘。惟我太上，歷劫宣慈，於生死流，闢津梁路。神幡啓道，黃詔招魂，香水蕩瑕，法橋拯溺，靈符起死，妙戒歸真，雲篆遷神，法燈破暗，昭垂道妙，還復性真。使諸衆生，從死滅後，於諸苦趣，發回向心，認處天真，懺悔惡業，乘六通惠，出萬鬼羣，得睹天尊，說無上道，鍊形火府，度品南宮。各隨本人，根品深淺，其如頓悟，便超人天。以漸進修，復生正性。如上所說，具載真經。危哉一心，生死輪轉，使我太上，弘誓不忘。願諸衆生，皆得悟道。今有某家，熏修妙供，啓迪生方，謹即長途，以伸告召。當願亡者，各識天真，以本性靈，合諸魂氣。大聲疾呼，名姓不迷。廣進康衢，山川不隔。一念千里，彈指三生。即到道前，了無壅滯。再伸仙偈，招引亡魂。道通天地獨人倫，一聚天真萬寶身。逐物便淪生死海，觀身誰作聖賢人。精金百鍊猶諸性，流火重燒復本真。舉起神幡祛壅滯，盡招魂爽出迷津。

### 第三度

沉陰戒夜，鬼正可呼。滯爽迷方，道常善救。入意

#### 舉聖號

爰有太極，兩儀肇分。輕清爲天，三辰棋布。重濁爲地，萬物叢生。六合之間，有中有外。一氣之運，有正有邪。中有沖和，列爲人品。間氣之積，篤生聖賢。林林而居，混爲凡庶。乖戾所聚，是爲鬼魔。駁雜之餘，下爲禽獸。世界肇造，羣品自分。草昧倥侗，不安性命，從上古聖，制作是興。貴賤尊卑，華戎人獸，各得其所，無使顛隳。崑崙所臨，下爲中國，聖賢傳道，允執厥中，仁義定名，忠孝同出，以信以悌，以禮以刑，設爲多方，防其一念。一念適正，不踰其閑，爲天爲人，爲神爲聖。其如乖戾，鷙暴凶復，甘入魔羣，與諸天鬪。人道之內，缺犯綱常，一失人身，隨諸地獄，鐵城火繞，銅柱膏然，種種負債，冤冤報對，魍魎問影，髑髏稱孤，溟漠無依，吁嗟長歎。貪瞋癡業，無所解知，餓鬼旁生，隨業受報，諸趣

升墮，悉本於人。危哉寸心，力敵造化。一悟充積，先天弗違。一迷不迴，諸聖莫救。方寸之內，六趣輪迴。三界之中，歷劫往返。業火熾盛，焚燒大千。逝水渺瀰，飄淪八極。到此境界，奔迸倉皇，呼叫悲號，孰爲救度。惟我

大慈悲父元始天尊，放大光明，普照無外。於業力海，穩駕慈航。於虐焰城，沛爲法雨。玉顏惻隱，金手提携。以大神通，啓其真性。一彈指頃，盡出苦輪。一閉目間，各識宿命。衆生未度，悲願長存。盡諸未來，普令解脫。今者某家，仰依洪誓，大闡良因，親親仁仁，咸皆薦拔。自色欲界，及洞淵泉。自中華區，遍無量國。天人鬼獄，異趣殊倫，轉大乘轅，與之俱載。伏願各乘法力，俱到道前，瞻對天尊，平等受度。一聲空洞，洗清投芥之誠；萬類含生，盡入懸珠之竅。再伸偈頌，以攝遊魂。上從曇誓下淵泉，六合旁通遍大千。達者自居形器外，迷徒寧免死生纏。業輪盡逐攀緣轉，仙品誰知體悟遷。空際寶珠通竅道，冥心元始乞哀憐。

#### 沐浴度魂儀

伏以黃泉溟漠，凝濁滯染於神魂；黑壤幽陰，積穢沉埋於靈爽。昏昏長夜，難遂超昇。是以太上慈憐，元皇悲愍，垂洗滌塵勞之法，宣沐浴鍊度之儀，即使業網斷除，罪根蠲釋，今則嚴陳寶室，潔備蘭湯，設五香澡盥之儀，按三籙拯拔之格，奉請亡過某等，赴室沐浴，蕩濁流清，事畢嚴莊，歸位聽法。

伏以泉路幽深，寒庭積穢，使神魂而冥昧，至靈爽以昏蒙。非憑資薦之功，莫遂超昇之望。請法衆等，奉爲亡靈，上資往生仙界。念沐浴蕩穢呪：

天澄氣清，五色高明。日月吐輝，濯練身形。神津內渙，香湯氣精。光景洞曜，煥映上清。氣不受穢，五府納靈。罪滅三塗，禍消九冥。惡根斷絕，福慶自生。今日大願，一切告盟。身受開度，昇入帝庭。

伏以神飛仙境，須憑鍊度之功；魄離幽陰，可證昇真之果。斷除塵穢，速得往生。集和氣於身田，解宿冤於

業網。請法衆等，奉爲亡靈，上資往生仙界。念沐浴鍊真呪：

太上高真，九靈之精。使魂飛仙，上登紫庭。沐浴華池，身神澄清。精通太虛，萬氣自生。

伏以黃籙垂科，紫清設教，濟生度死，咸入法門。開流火之神庭，鍊陰除穢；激清華之法水，洗滌塵勞。可登清淨之鄉，得見虛無之聖。請法衆等，奉爲亡靈，上資往生仙界。誦丹陽鍊度亡魂呪：

龍漢蕩蕩，無形無名。渺渺億劫，皇道開明。神清朗曜，九魂吐精。玉虛澄輝，太霞高明。元始開化，諸天齊臨。三元道養，二象攝生。未度者度，未成者成。已死即化，已枯即榮。蠢動蛭息，一切冥靈。懷胎含孕，咸得受生。今日大吉，皆得光明。五帝鑒映，普告萬靈。天地神祇，及諸河源。五嶽四瀆，及諸名山。洞元洞虛，洞空洞仙。無極大聖，至真尊神。無窮無極，普鑒度生。地根斷絕，元都記名。衆真普應，一切咸聽。

伏以泉扃滯爽，因法力以超昇；苦海冥魂，聽仙音而解脫。速離濁浪，徑上清都，訖化人中，常居福壽。請法衆等，奉爲亡靈，上資往生仙界。念沐浴東井呪：

天河灌東井，石鏡水母精。圓光拂靈曜，玄暉瑩高明。元始扶重夜，天人逐月生。沐浴蘭池上，龍負長庚瓶。金童洒香水，玉女流五星。冠帶濯玉津，練度五仙形。體芳萬神降，乘景登高明。

伏以慈心救物，經法度人，開度羣生，咸令皈向。灌濯先資於清淨，魂靈始獲於逍遙。請法衆等，奉爲亡靈，上資往生仙界。念清水度魂呪：

巍巍道德尊，功德已周圓。降身來接引，師保自相携。慈悲妙法水，以用洗愚迷。永度三清岸，長辭五濁泥。

伏以激濁揚清，已周於品格；昇真度厄，用濟於幽明。今則沐浴既終，氛穢已蕩，神識清淨，苦惱蠲除。奉請亡人，儼新冠帶，來詣道前，恭禮慈尊，聽受符戒。請法衆等，奉爲亡靈，上資

往生仙界。念著衣冠帶呪：

五濁已清，八景已明。今日受鍊，罪滅福生。長與五帝，齊參上靈。形神俱妙，上生南庭。

今則沐浴既畢，嚴潔已成，霓衣楚楚以飄香，雲趾徐徐而離室。謹對三清之御座，宣聆九籙之真科，傳戒受符，超凡入聖，庶克成於妙果，期速證於仙鄉。神魂如存，俯從迎請。

### 呪施甘露法食儀

法師就坐，立誦元始天尊啓請呪畢，然後坐行呪食事。

元尊出教，高爲萬道之宗；歷劫度人，流演重玄之義。欲廣津梁之路，必先啓告之儀。冀洪造之鑒觀，作幽魂之依怙。天光所燭，甘露有靈。各堅誠感之誠，上格虛無之聖。誦玉清慧命啓請呪曰：

稽首冥慧虛無尊，稽首皈命重玄主。裁成天地無德稱，悉爲衆生作恃怙。慈悲五道轉輪魂，哀救三塗地獄苦。皈命金闕天中尊，皈命六度慈悲父。皈命玉清無上尊，已離生死長綿綿。



出有入虛無所待，能令枯朽變成仙。千劫萬劫難一遇，爲衆廣說業因緣。回骸起死永長存，使其形神無變遷。

聚則爲生，四體固資於飲啄；散則爲氣，一靈豈假於盤飧。知死之說，則形充空虛；達生之情，則氣吞萬象。苟性靈之不悟，則業識以相迷，魂氣何所不之，自爲封滯形骸，與物俱化，尤覺縈纏，想念一興，殃考俱至。負罪障，則業風披拂，備歷辛酸；思飲食，則飢火燎焚，無由飽滿。似茲顛倒，難得超升。是以太上慈憐，元尊悲愍，託香羞而見道妙，呪法水而作清涼。洒開冥路之重昏，沾溉衆生之內熱。功德至重，利益無邊。今有醮官某家，奉爲亡過某等，奄棄塵寰，恐沉幽夜。精展追思之念，恭修薦拔之壇。潔人世之蕙肴，仗天尊之法施。爾等各宜剗音枯心之實，味道之腴，音余飲神仙沆瀣之津，食太極冲和之氣。樂南面之說者，從然以天地爲春秋；復上首而生者，卓爾以死生爲夜旦。一言契悟，萬劫逍遙，更憑甘露之章，啓發自明之性。

### 誦開業道通真呪

功德金色光，微微開幽關。華池流真香，蓮蓋隨雲浮。千靈重元和，長居十二樓。急宣靈寶旨，自在天堂遊。

靈泉合抱於五行，利萬物而故幾於道；法水流通於百谷，受衆垢而無所不容。稟天一而爲尊，生上善而爲德，因地而爲曲直，隨器而爲方圓。以理推其源也，窮愈遠而極愈深；以道彰其用也，澄不清而撓不濁。外以洗蕩其六根十惡，不經於熱惱焦勞；外以灌注其九竅百骸，可至於金漿玉液。天尊設教，用濟幽牢，憑此讚揚，廣伸供養。

奉爲亡者，誦開咽喉普潤法食呪：

悲夫長夜苦，熱惱三途中。猛火入咽喉，長生飢渴念。一洒甘露漿，如熱得清涼。神魂生大羅，潤及於一切。

### 香

香飄無價，焚之而七返氤氳；道貫自然，祝之而九光馥郁。故道由心學，而心假香傳。作如是用，則非火非

烟；作如是觀，則非黍非稷。厥中不昧，其香遠聞。上達於三境十天，下徹於九幽五道。明其奧理，用薦亡魂，焚向爐中，廣伸供養。

### 奉獻諸天無價名香

返魂名香，返風名香，逆風名香，七色名香，天寶名香，香氣氤氳，周遍十方，廣伸供養。

### 花

玉京山上，自然生七寶之林；大有庭中，彌覆有八騫之樹。森羅煥麗，秀鬱青葱。食騫樹之葉，乃爲玉仙，一身若琉璃而洞徹；滄寶林之花，而變金骨，五藏如寶鑑以圓明。惟天真無染無著，一片豈有沾衣；故人世不種不生，五葉何得結實？金花玉藥，華池黃芽，妙無出於凡軀，鍊必成於仙骨，三花聚頂，九氣結形，憑此讚揚，廣伸供養。

### 奉獻諸天異境奇花

九靈太妙真花，五靈小妙奇花，碧藥黃金艷花，黃藥紫金耀花，閨苑青瓊瑤花，瓊林流光寶花，花光燦爛，照映

十方，廣伸供養。

水

混沌未分，元是一壺靈液；神奇已具，散爲九醞清糟。幾人識得聖賢，濟世須知厚薄。若能味乎味，始見醇乎醇。儻飲三盃，必通大道。謹將奉獻，願嗽芬馨，聚爲滿腹之陽春，散布漫天之甘露，貫三才於不言不笑，混萬物於一醉一醒，援琴而鼓白雪黃鵠，舉盞而邀清風明月，樂壺中之天地，遊物外之烟霞，慕道洪崖公，尋真白雲子，神仙妙藥，大聖靈丹，捧此靈漿，普伸供養。

奉獻諸天七種寶漿

日精寶漿，月華寶漿，星光寶漿，甘露寶漿，金液寶漿，靈光寶漿，玉匱寶漿，飲之無盡，周流十方，廣伸供養。

果

果因花結，當資種植之功；心靜道生，必假栽培之力。故有蟠桃紫棗，火棗交梨，近取於身，遠取於物。儻心田之瑩潔，則果實繁榮；或荆棘之叢生，則根苗枯槁。色如橘而甜如蜜，成

有歲而熟有時，有三千載而結成，有頃刻間而頓熟，咀嚼而精神爽快，玩味而性識清通。若結果而收因，當去華而務實。宜於此際，方寸了然。憑此讚揚，廣伸供養。

奉獻諸天瓊林珍果

空洞靈瓜，萬歲仙桃，金紫交梨，元光素棗，赤靈火棗，飛丹紫榴，香氣布濃，食之無盡，周流十方，廣伸供養。

飯

天人之糧，淡泊無味，事載黃庭；黍米之珠，登引無餘，功標靈寶。故茲上聖，唯嚙味於冲和；觀彼下凡，恣膏粱於厭飫。惟天厨之香飯四種，民民中種來；且世間之稻梁百鞭，粒粒從苦得。享福不耕而食者，宜思本始；知足有餘而得者，切莫輕拋。今法會之崇修，作蕙餽之珍供。故將香饌，廣度死魂。憑此讚揚，廣伸供養。

奉獻諸天四種香飯

豐山香飯，龍山香飯，青精香飯，太和香飯，香氣布濃，食之無盡，周流十方，普伸供養。

心花智果，金飯玉漿，靈寶慧香，苾芬法味，皆託物而顯道，宜即色以明心。各推廣博之誠，轉作無窮之施。願大地悉臻於飽滿，無一物不被於薰陶。更藉宜揚，以全啓迪。重聞反慧，照於太無，圓通衆妙；煉真光於法體，嚙味冲和。能取足於諸身，初不資於外物。呪食之後，冀汝亡靈，挹內景之靈芒，定中央之正位，飲靈樹瓊瑰之澤，食黃華璧玉之柔，道契杳冥，神凝遼廓，宅元房而偃息，助真化以周流。

奉爲亡者，上資往生天界。誦玉清大慈天尊甘露法食呪曰：

回首仰圓羅，合景挹靈芒。拘魂制七魄，思臍定中央。行住履虛無，寢息宴元房。飢飡黃璧華，渴飲瓊根漿。神旌命天魔，合體鍊真光。復照觀太無，長在空中遊。圓通泯波際，真化靡終期。杳冥無終始，行者當明知。寂寥忘理教，應運藏宏規。鑑道不自昭，要當先所施。會歸無二處，隨心自合離。

方雜乎芒芴之間，通變未乘於一

氣。欲反其知識之本，造形必自於三光。宜嘯詠於清謠，以發揮於生路。呪食之後，冀汝亡靈，負陰抱陽，稟日月高奔之氣，陶魂鑄魄，儲坎離交構之精。三宮滿盈，十相具足，早超通達之國，長遊智慧之門。

奉爲亡者，上資往生天界。誦三光澤嬰甘露法食呪曰：

浩晶生元氣，氤氳太空中。兩曜共明徹，五緯交相同。三光煥已明，寶氣盈三宮。帝鄉會九老，咽服百體豐。金華照光景，身與日月同。念道上聖前，萬劫壽無終。

天生蒸民，積三萬六千之神氣；世喪大道，隳一百八十之靈關。自蠹損於真根，莫敷榮於玉樹。神不自許，魄與鬼遊。欲反生源，必資梵唱。呪食之後，冀汝亡靈，得衆化之元精，復五神之真宅，白元右衛，公子左扶，頂飛翠蓋之浮，足有金蓮之擁，香雲覆體，甘露洒心，湛恍惚之元靈，養希夷之正氣。

奉爲亡者，上資往生天界。誦玉

清大悲雲宮陰生梵唱生魂浴魄呪曰：

雲根無垠，衆化之精。中凝七魄，內結三魂。二十四真，出入無門。杳冥之精，恍惚元靈。隨劫存亡，逐氣而生。內凝混樸，外養七經。五神植華，三台敷榮。紫闕素童，反魂歸嬰。騰雲而仙，騁霧浮空。中有玉京，號曰神公。左挾無英，右衛白元。玄獸遏後，丹禽擁前。上浮翠蓋，下擁金蓮。香雲凝空，甘露無窮。用之不盡，尋之不終。

九幽黑暗，六賊之所狴牢；一念虛明，大方初無畛域。欲優游於正處，宜咀嚼於太和。更仗寶章，以嚴法味。呪食之後，冀汝亡靈，挹甘露之零濛，永清心垢；隨玉音之歌嘯，坐致神遊。肴酒未清，八極周遍。

奉爲亡者，上資往生天界。誦九幽超生甘露法食呪曰：

冷冷甘露滋，法味難思議。騫林流七珍，永除飢渴想。受此法施食，生天登紫房。餘潤發清涼，遍及於一切。地獄幽沉，舉有鐵圍之固；天堂

遼廓，眇無階級之昇。憑萬道之金光，破九陰之泉路。呪食之後，冀汝亡靈，泰定發乎天光，吉祥生於虛室。玉樓十二，通嗽嚙於華池；泥丸九真，默朝參於上帝。此即昇天之徑路，長舒破獄之祥光，致極高明，得大自在。

奉爲亡者，上資往生天界，誦破地獄昇天呪曰：

茫茫艷都中，重重金剛山。靈寶無量光，洞照炎池煩。七祖諸幽魂，身隨香雲輿。定惠青蓮花，上生身永安。

三光流精，凝結爲洞真之體；一念不善，漂淪於衆惡之途。永下出於淵泉，必仰資於神呪。呪食之後，冀汝亡靈，反一氣之氤氳，凝九華之煥爛。混沌無竅，函乾坤造化之先；崑崙爲家，出雲雨冥濛之上。

奉爲亡者，上資往生天界。誦三光流精甘露法食呪曰：

妙道分一氣，氣中分陰陽。凝化日月精，燦然流三光。九華含九道，八色怡八方。煥爛洞真體，流精歸太茫。下生淵泉宮，上列無何鄉。縱體復飛

跡，忽然都相忘。七寶凝精潔，混沌雜華芳。嚙服九氣雲，此樂殊未央。

向來宣演靈章寶偈，並是元尊神呪、諸聖真詮、九丹妙訣、甘露法言，妙理難思，殊因莫測，總用資薦。亡過某等，享淡泊之正味，衆美皆從；得恍惚之元精，長生不死。仍推餘慶，垂芘見存，上窮圓蓋，下布方輿，俱沐良緣，齊登道岸。

### 施食

一切福田，施食爲先。當來淨土，衣食自然。是故供養，普獻諸天。

### 法食

香厨妙供，上獻天尊，中奉真聖，下及萬類含生，普同供養。

### 亡人食

所餘齋胙，回施冥路。食者充飢，免諸困苦。大道慈悲，引歸仙路。

道門通教必用集卷之五

## 道門通教必用集卷之六

鶴林道士呂太古集

### 讚導篇

廣成先生《讚導儀序》云：經科所稱，齋官之內，謂行齋道官也，今誤爲齋主。以道德尊高者爲法師，即高功也，明練法度爲都講，讚唱導引，法則軌儀，皆其職也。欲令羣官整肅，儀軌森然，須先鳴鼓擊磬。齊衆而後，陞壇讚唱。或都講年德稍高，不欲一一勞止，即於衆官之內，補一人執磬唱禮。蓋事出一時，元非古制。今知磬是也，已著爲定式久矣。蓋古儀尚簡，今法事煩多故也。高功法師，職在敷奏，進止俯仰，居衆之先。或昏耄不任，自可求退，不可委之他人，翻類冗職。監齋秉執科憲，彈糾愆達。若有虧犯，預須以罰簡告之。受罰之人，亦須甘心伏罪，不得使彈糾之際，彼此諠然取笑，衆人貽咎。玄聖侍經，則檢校壇場，主張法席。經科几按，供養所

須，施利敷張，皆須整治。況舊法於齋堂之內，即今之壇場也。置兩高坐，三時講讚。自法師以下明經者，請升法座。至誦經之時，衆官既坐，一人行淨，侍香行香，侍經行經。誦經既畢，收經安置，安於齋堂之中，嚴持供養，不得虛參職任，使几案縱橫，壇場汙雜，并外人凌冒，輕觸神真。侍香所職，具在簡詞，近者因循，多不供職。侍燈唯在勤勵，興廢合儀，徹曙續明，斯爲稱職。近有不經之士，不使侍經整飾壇筵，別置直壇之號。今之直壇，昔之侍經是也。六職之外，頗有冗員。蓋由蜀中於古儀之外，又有外壇法事，非衆職兼爲。事有懷曠，遂令三侍兼宣詞懺，分行外壇，致使侍經、侍香、侍燈本職者，而不問事。雖分委職事，亦須法事之服。當與檢按，庶合儀軌尤佳。又按金錄古儀，及黃錄舊法，宿啓之夜，及言功之時，皆先作自然朝，即禮十方，懺悔三禮是也。然後行事。故啓齋儀軌，止是戌時，迎官列位於玄師前，一人讀職狀訖，即投詞于正壇，上十方香，升內壇，上香，禮師，發爐，下俯伏，依然朝。次讀齋詞，大謝後宣戒。都講署職之官，受職宣科禁，發願，復爐，

出戶至玄師前補向。所以云：須明日晨曉，依法行道。此法自張天師、陸簡寂、寇天師、張清都，相傳至今，頗歷年代，皆以齋法出於自然朝，示不忘本也。近有庸流，不達古賢之情，先於玄師前，補署六職，宣科授簡，然後陞壇，仍云簡寂先生齋法謬誤。飾非謗說，詞理紛然，寡識無知，一至於此。尚有其黨，相做行之，不唯獲亂法之愆，實亦受謗賢之罪。達教君子，宜共斥之。東瀛子杜光庭書。

歷觀古儀，并無祝香、庭參，並發奏。楊公傑學士重修金籙儀節次，有祝香一節，乃是官道場之制班定。上香拜訖，令表白道士一員，具齋意，祝香訖，然後退就玄師前補職。今醮事祝香，則高功爲之。古儀非無參神，即宿啓是也。所以廣成先生反覆論之。是以補職說戒，居宣詞之後，乃是先關告上真，啓白修齋之意，初非降聖酌獻之時。自悟微子著《刊誤論》，徇一己之見，乃云：豈有徹祭之後，方且補職說戒。楊公傑承悟微之失，遂遷補職

說戒於啓事之先，大失歷世宗師本旨。今有參神，又有宿啓，又有啓壇之初，壇外關告，殆似屋下蓋屋，屋上張蓋者也。行之既久，難以改更。但直免壇下宿啓，及三日清旦關告，亦稍通也。謹取廣成先生，及楊公學士，及孫公教師所定節次，參詳古儀，編成讚道，做古便今，以助道化云。

#### 道門通教必用集卷之六

### 道門通教必用集卷之七

鶴林道士呂太古集

#### 威儀篇

#### 勅壇儀

並取杜天師、楊次公、張無盡三本契勘。

凡壇場正北，則都講按，便當地戶，謂壇外也。張萬福天師序事儀內載壇圖，以都講按爲威儀按，謂一壇威儀，皆自都講讚導也。則勅壇，當是都講爲之爾。楊傑次公乃云：選有威儀道士一員勅壇。是不知都講爲威儀也。又云：置劍水於地戶。不知都講所立，即地戶也。若壇不正北，則宜遷之。

#### 白事存想。

杜天師云：威儀法師，玄冠絳褐，立於地戶，上啓事具所受經籙治職。臣某伏聞運陰陽者，莫過於百靈；濟家國、幽明者，豈逾於大道。故碧落有灾祥之變，可以消穰；黃籙有拯拔之科，許令

修奉。臣等竊慕真化，叨稱治官，所歷山川，敢忘報效。今奏為某官於某處修建某齋，若干日夜，行道轉經，依科關奏。臣等澡鍊形氣，疏瀹精神，尅期奉行，敢不上達。伏惟太上布惟新之令，開覆育之恩，勅下真官，分司降鑒，使烟雲暫息於三景，風雨無施於四溟，懺謝必聞，啓傳無間。臣等不任望恩之至，精思念真，伏待報應。

楊公本云：白事前，先存三師在西，次存唐葛周三真君在前。唐君朱陽，晴通天冠，絳章單衣，執龍頭寶劍，左手持符。葛君衣服，同執玉戟。周君冠服，同執玉陽之節。

次存真官朱衣，乘九鳳乘斗，而下臨壇所收穢。

次存七星覆己頭上柄指前，勿令遮己目。然後白事，不若白事下存想，併存四靈在左右前後，日月五星在頭。  
此出杜儀

存想畢，以簡授侍者。

次握固垂手，召四靈。握固，以大指掐

中指中節，四指齊收于手心。

東方青龍，角亢之精。吐雲鬱氣，喊雷發聲。飛翔八極，周遊四溟，來立吾左。

西方白虎，上應觜參。英英素質，肅肅清音。威懾禽獸，嘯動山林，來立吾右。

南方朱雀，衆禽之長。丹穴化生，碧霄流響。奇彩五色，神儀六象，來導吾前。

北方玄武，太陰化生。虛危表質，龜蛇合形。盤遊九地，統攝萬靈，來從吾後。

次兩手捧心，足履丁字。

吾召四靈，四靈既集，即當遊帶，日挾月行。九州十六神將為吾使，太一星君部下，有十六神將，主知天下灾福。或有未嘗知聞，遂改為六十神將。天地水官同其休。

天地水字，作丁岡三才步，就劍水，出楊儀。舊儀，皆云天官、地官、水官，楊本為善。

次右手執劍。

五行所運，火木水土金。吾佩剛

劍，禁勅鬼神。二十八宿，隨吾指陳。

北斗七星，挾輔靈真。周流萬方，百福同臻。

次左手執水碗。

江河淮海非神水，謂呪水為神水，江河淮海皆凡水。有或改為凡水字，乃所見之誤。五龍吐出清天地。大帝服之千萬年，今日吾將淨妖氣。

次劍水相向呪曰：

謹請東方青龍，銜符帶劍，降真氣入吾水中。南方赤龍，銜符帶劍，降真氣入吾水中。西方白龍，銜符帶劍，降真氣入吾水中。北方黑龍，銜符帶劍，降真氣入吾水中。中央黃龍，銜符帶劍，降真氣入吾水中。吾水，非常之水，五龍五星真氣之水。吾劍，非凡之劍，九鍊堅剛，七星挾旁，踏躡北斗，跨踞魁罡，太一作水，枉張皆是作字，楊本是在字，作字為善。周流萬方，三本皆無以水噴天，以水灑地之句。清無過水，濁無過穢，以清蕩濁，以水治穢。亦無速去萬里，不得停止字。急急如律令勅攝。向破噴水，楊本如此，謂斗柄直時，所指為破。然壇場坐向或有不便，心存之可也。

次至西南方，誦淨天地呪。

洞中玄虛，晃曜太元。八方威神，

使我自然。靈寶符命，普告九天。乾羅荅那，洞罡太玄，斬妖縛邪，殺鬼萬千。中山神呪，元始玉文，我誦一遍，却鬼延年。按行五嶽，八海知聞，魔王東首，侍衛我真。凶穢消蕩，道氣長存。急急如律令。

次至西北方，誦安土地呪。

元始安鎮，溥告萬靈。嶽瀆真官，土地祇靈，左社右稷，不得妄驚。回向正道，內外澄清，各安方位，備守帝庭。太上有命，搜捕邪精。護法神王，保衛道場。皈依大道，永亨利貞。急急如律令。

次至東北方，誦淨壇呪。

吾是洞中太一真，頭戴天罡步四靈。守把龍力巽上立，迤邐旋行直至坤。地戶良宮須結界，不得分外停妖氛。禹步魁罡正乾亥，直至天門謁帝君。急急如律令。

次至東南，存天蓬元帥在上，誦呪。

本號北帝五靈元老呪，出正一考召斬邪引。

天蓬天蓬，九玄殺童。五丁都司，

高刁北公，七政八靈，太上皓凶。長顛巨獸，手把帝鐘。素梟三辰，嚴駕夔龍。威劍神王，斬邪滅蹤。紫氣乘天，丹霞赫衝。吞魔食鬼，橫身飲風。蒼舌綠齒，四目老公，天丁力士，威南禦凶。天驪激厲，威北銜鋒。三十萬兵，衛我九重。辟尸千里，祛却不祥。敢有小鬼，欲來見狀。鑿天大斧，斬鬼五形。炎帝裂血，北斗然骨。四明破骸，天猷滅類。神刀一下，萬鬼自潰。急急如律令。

次至西南，存天猷副元帥，誦呪。

天猷神將，威制羣魔。頭戴天圓，足履地方。冠帶九氣，結爲衣裳。日爲圓象，月爲圓光。身披北斗，六甲九章。左踞河魁，右倚天罡。能伏邪鬼，爍除不祥。神丁一諭，鬼穢消亡。急急如律令。

次至西北，存真武將軍，誦呪。謂真

武居右，黑殺居左。

太陰化生，水位之精。虛危上應，龜蛇合形。周行六合，威攝萬靈。無幽不察，無願不成。劫終劫始，剪伐魔

精。救護羣品，家國安寧。敢有小鬼，欲來見形。吾目一視，五嶽摧傾。急急如律令。

次至東北，存黑煞將軍，誦呪。

北方黑煞，五氣天君，光華日月，威備乾坤。走符攝錄，斷絕鬼門。行神布氣，辟除五瘟。左右吏兵，三五將軍，雷公霹靂，電掣風奔，刀劍如雨，隊仗如雲，手執帝鐘，頭戴崑崙，行遶天下，收捉鬼神。九州社令，血祀之兵，不許拒逆，敢有張鱗。鎮星縛手，北帝收魂，三台七星，持刀斬身。邪精魍魎，耳不得聞。聞吾呪滅，碎如微塵。急急如律令。

次至東南，誦解穢呪。

謹上請東方青帝，木官，解穢君吏九人。南方赤帝，火官，解穢君吏三人。西方白帝，金官，解穢君吏七人。北方黑帝，水官，解穢君吏五人。中央黃帝，土官，解穢君吏一十二人。天上直符解穢君吏，地下直符解穢君吏，今歲今月，今日今時，直符解穢吏兵、童子玉女，各百二十人，一合具官來下，

降此壇所，解除天厭地穢，人厭鬼穢，所有六畜禽蟲不淨之穢。仰破穢鳳凰，從前至後，自東及西，一一解除，密顯清淨，不得停止。急急如律令。

次至西方立，面東，存青帝君，誦東方呪。五方五靈，五老帝君，保國學仙。呪出《洞淵神呪經·消灾品》。

元精混沌，青氣散分。神童十二，保鎮肝魂。二七四五，變化雲營。九竈九社，老木不淳。神虎吐毒，劍擲火焚。掃滅青疰，光景妖氛。識神真正，安保帝君。急急一如東方九氣天君律令。

次至北方立，面南，存赤帝君，誦呪。

赤明開圖，炎精扇颺。三童一宅，煥赫浮飄。司明得失，萬帝宗朝。朱鳳吐火，金石化消。流鈴飛電，馘翦赤妖。束縛九醜，灰覆火燒。肅清皇祚，道德逍遙。急急一如南方三氣天君律令。

次東方立，面西，存白帝君，誦呪。金精耀景，太白西分。帝君靈符，

流飄素雲。召龍負水，殺滅赫烟。長牙巨獸，討捕兇羣。魄靈安鎮，我得自然。急急一如西方七炁天君律令。

次至南方立，面北，存黑帝君，誦呪。

元光豁落，五氣流行。雙闕上帝，萬神化生。安志守智，噉食炎精。蒼龍吐電，摧破魔兵。晶胡了切，晶振劍，奔飛火鈴。三天力士，收滅萬精。保家安國，道治昇平。急急一如北方五氣天君律令。

次至中央，存黃帝君，誦呪。

混沌元一，黃氣交馳。感覆真老，變化嬰兒。養育元氣，胞胎兩儀。日月騰景，星辰下垂。風火爭擊，矛劍交施。六天九醜，爽破心離。太上符告，何敢不隨。有生安樂，入道無爲。急急一如中央一氣天君律令。

次舉天尊敕身。若遷拔，可削法師袖劍，存神，望齋官。嚩水呪曰：

水無定形，以呪爲定。在吾手中，號曰神水。嚩天廓清，嚩地永寧，嚩人長生，嚩鬼滅形。一嚩如霜，二嚩如

雪，三嚩之後，萬邪斷絕。鬼魅潛伏，灾殃殄滅。南斗上生，壽同日月。急急如律令敕。

次誦敕身呪，想弟子身神，隨神呪各守宮室。

凡欲朝真謁聖，先當解穢淨身，俾形氣之肅清，庶天人之感格。

具位謹敕齋官某等，身中五體真官，五藏六腑，七政九宮，十二神室，四肢五體，筋骨髓腦，皮膚血脉，九竅榮衛，一百八十靈關，三百六十骨節，千二百形影，萬二千精光，左三魂，右七魄，三部八景，二十四神。某乃太上之子，元皇之孫，頭冠朱雀，足履玄武，左御青龍，右踞白虎，青龍扶迎，白虎扶送，朱雀導前持幢幡，真武從後負鐘鼓，使齋主某心不受邪，肝不受病，肺不受姦，腎不受昏，脾不受死，膽不受怖，胃不受穢。一身清淨，萬邪不干，吏兵導引，五神侍側。急急如律令。

次誦《黃庭經》五藏呪。

謹敕齋主某身中：心神，丹元守靈君；肺神，皓華虛成君；肝神，龍烟



含明君；腎神，玄明育嬰君；脾神，常在魂停君；膽神，龍耀威明君。重樓一十二真人，五藏六腑神體精。皆在心內運天經，晝夜存之自長生。急急如律令。

次誦《黃庭》面部呪。

謹敕齋主某身中：髮神，蒼華太元君；腦神，精根泥丸君；眼神，明上英玄君；鼻神，玉隴靈堅君；耳神，空閑幽田君；舌神，通命正倫君；齒神，鏗鋒羅千君。面部之神自相守，攝魂還魄永無傾。急急如律令。

次誦北斗都管消灾呪，存北斗加於齋主頭上，想魁蓋頂柄向前。

北斗七星，天中大神。上朝金闕，下覆崑崙。調理綱紀，指揮乾坤。貪狼巨門，祿存文曲。廉貞武曲，破軍輔弼。大同沙界，細入微塵。何灾不滅，何福不臻。元皇正氣，來覆弟子之身。天罡所指，日夜長輪。隔居小人，好道求靈。常見尊儀，願賜長生。高上玉皇，紫微帝君，保弟子處世，常享安寧。三台三台，生弟子來。三台三台，養弟

子來。三台三台，護弟子來。急急如律令。

當願齋主某等，淨身之後，氣爽神清，魂安魄暢。百關淨而華池充滿，諸漏消而丹府光明。茂對天休，潛祛世患，吉無不利，動則有成。稽首皈依無極大道。

次舉劍巡行至西南隅，誦消禁百怪口舌呪。

六甲九章，天圓地方。四時五行，日月為光。禹步治道，蚩尤辟兵。青龍挾我轂，白虎扶我行。熒惑前引，却除不祥。北斗誅惡，滅去凶殃。五神侍衛，周遊四方。左社右稷，為吾鈴縛。千口萬舌，惡人惡鬼，虎狼盜賊，緘閉伏藏。急急如律令。

次至西北，誦禹步八卦呪，出金鎖流珠引。思四靈訖，口誦呪，足禹步。總三步九跡：

右足八 右足六 右足二 右耦  
左足七 右足四 左足一  
左足九 左足五 左足三 左奇  
乾尊耀靈，坤順內營。二儀交泰，

六合利亨。配天享地，永寧肅清。應感元黃，上衣下裳。震登艮興，坎盛離明。巽旺兌生，虎步龍驤。楊本如此乾坤艮巽，虎步龍驤。震離坎兌，翼贊扶將。杜本、張本如此天門地戶，人門鬼門，為我者誰，昊天旻蒼。今日禹步，上應天罡，鬼神竇伏，下辟不祥。所求如願，萬靈敢當。急急如律令。

次結界，口誦呪，足履丁字九步：自自西北方，步至東北方，向東噴水。

左足知叶 左足知叶 左足知叶 左足知叶 左足知叶  
左足知叶 左足知叶 左足知叶 左足知叶 左足知叶

謹請東方青童君從官將吏，杜本有九千萬人乘東方歲星真氣，浮空而來，降臨壇所，行神布氣，搜索邪精，驅除鬼賊，有罪無赦。臣從東北隅結界，至東南隅。急急如律令。

杜本：降臨壇下，臣從東北隅結界，至東南隅行神布氣云云。  
張本同楊本，唯東南隅有一切邪穢，無動無作兩句。

次誦呪，丁步至東南方，向南噴

水。

謹請南方赤童君從官將吏，乘南方熒惑星真氣，浮空而來，降臨壇所，行神布氣，搜索邪精，焚燒鬼賊，有罪無赦。臣從東南隅結界，至西南隅。急急如律令。

次誦呪，丁步至西南方，向西噴水。

謹請西方白童君從官將吏，乘西方太白星真氣，浮空而來，降臨壇所，行神布氣，搜索邪精，誅斬鬼賊，有罪無赦。臣從西南隅結界，至西北隅。急急如律令。


次誦呪，丁步至西北隅，向北噴水。

謹請北方黑童君從官將吏，乘北方辰星真氣，浮空而來，降臨壇所，行神布氣，收索邪精，漂蕩鬼賊，有罪無赦。臣從西北隅結界，至東北隅。急急如律令。

次誦呪，散行至壇中丁步，向西北噴水。

謹請中央黃童君從官將吏，乘中央鎮星真氣，浮空而來，降臨壇所，行

神布氣，搜索邪精，埋藏鬼賊，有罪無赦。臣從上方結界，至于壇所。急急如律令。



次就地戶，上步七星，背建向破，謂正月建寅，背寅而步第一星，旋身入斗中，存天官、日月星宿、五嶽四瀆兵馬在目前，四靈並羅列在左右前後。次誦北斗七元星君神呪：

七曜靈靈，斗柄前星。貪狼操惡，

食鬼吞精。巨門烜赫，照耀登明。祿存奔驚，統攝天兵。霞衝文曲，光徹廉貞。威臨武曲，真人輔星。上天節度，破軍星君，四門閉塞，濁氣奔騰。常持斧鉞，手把天丁，威南一喝，膽碎心傾。令召巡檢，聽察尋聲，九州社令，無不呼名。誅鋤兇惡，獲罪非輕，凶逆者死，慈善者生。斷頭截足，杵碎身形，鬼妖蕩盡，人道安寧。治病除邪，敕到奉行。急急如律令。

次稱位請官。

具位今謹為某家修建大齋，依科行事。謹上請此下，便巡行至鬼門為止。

天仙兵馬、地仙兵馬、飛仙兵馬、真人兵馬、日月星宿兵馬、九宮五帝兵馬、三河四海、五嶽四瀆兵馬，各請嚴裝絡繹，同赴壇場。遶壇三匝，先看壇場寬狹，念呪。至各請嚴裝，處足到鬼門上，以劍首畫地，左轉三匝。◎蓋壇三重，◎上張天羅，橫畫七畫，☷下布地網，立畫七畫。☸所有伏尸故氣，土木百精，於道不順者，收付魁罡之下，入地萬丈，無動無作。急急如律令敕。

書鬼字，卓劍於鬼心噴水，隨水呪曰：

五行相推，罡最持威。六紀輔我，三台辟非。天迴地轉，陰陽闔開。長生度世，日月同輝。急急如律令。

天赦煌煌，地赦正方。禹步其至，百鬼伏藏。急急如律令。

噴水唱攝，即右旋身出斗，避踏星網踢印，使出呪云：一切邪穢，無動無作，叩齒三下畢歸位。

右轉畫鬼字，並重叠為之，謂之收一切邪穢印。

杜天師殺劍呪

太上有命，普告萬靈，促召天真，俱會帝庭。一一下降，雙皇翊精，監察禦邪，理氣攝生。若有不祥，干試神明，七神秉鉞，天鋒右征。揮劍前驅，煥擲火鈴，激命甲騶，虎卒天丁。風火齊戰，伐邪絞精，上威六天，下攝魔靈。魔靈既攝，萬凶滅神，戈擊電掃，姦妖無生。先皇建節，有命敢停，拒節違命，是誅汝形。各敬各慎，保茲黃寧，九天有命，萬神咸聽。急急如律令。

張無盡金籙儀中煞劍呪

太上有命，普告萬靈。命天將，統天丁，伐天鼓，揚天旌，揮金星，擲火鈴，捕無影，搜無聲，正泰階，掃攬搶，蕩邪風於十極，布真氣於八紘。天真下降，威光上清，羣魔匿跡，萬怪滅形，九天告命，萬神咸聽。急急如律令。

楊次公敕水啓白

河圖上瑞，示天意之昭明；金籙洪儀，遇聖時而建設。臣竊慕真化，叨稱治官，所禱應誠，敢忘報效。入意，餘同上。

張無盡啓白

太極函三，混茫無象。大塊吹萬，參差不齊。數有適來，道常善救。元始有玉文之旨，紫皇垂金籙之科。臣叨備法官，奉行真教，受辭祈禱，敢不奏聞。入意，餘同上。

又

真馭下翔，息神風而靜默；薰場中敞，掃穢氣之紛葩。十方煥空洞之玉光，四氣示澄清之天宇。豈容妖惡，敢爾尚存。當資劍水之神，以解壇場之穢。庶迴飈景，臨鑒齋明。入意臣等敢不澡鍊形氣，疏滄精神，解穢除氛，延真降聖。恩惟太上布惟新之令，天尊推至大之恩，申命真官，分司降鑒，使天無氛穢，地無妖塵，陰靄廓清，陽光爽霽，風師戢禁而纖埃不動，雲將揚輝而瑞氣浮空。庶誠悃之昇聞，格靈心之如答。臣俯伏思神念真，伏待報應。

又

至道之宗，隱妙用於混茫之首；神真之德，顯靈化於開闢之前。繇是

模範百王，生成萬彙。為沖虛道德之

祖，垂八景之靈文；繼玄元清淨之宗，降三天之寶籙。法傳正一，職治陽平，故輔玄傳教，天師受之，而攝邪歸正。水曰五行之首，有穢皆除；劍為百鍊之剛，無妖不斬。臣等早鍾宿慶，繼踵真風。黃素飛章，傳九鳳破穢之籙；青絲結紐，受十天召龍之文。約以行持，誓當濟物。既奉來詞之切，敢忘裂券之盟。入意臣等澡鍊華池之水，蕺揚大教之風。欽翊羽儀，掃蕩妖氛之氣；肅清雲路，前瞻睟穆之容。洪惟大有高真，太無上聖，廓雲霓而俯集，闢閭闔以來臨，申飭攸司，肅清壇壝，庶天人之昭合，俾幽顯之潛通，式副凡情，孔昭天道。臣等凝神碧落，結志丹霄，俯伏思神，恭俟昭報。

新修

伏以帝車所莅，豈容諸穢之停；心室未虛，庸有外邪之瞰。因事天而養性，敢除地以為壇。雖曰罔有不欽，猶恐未能盡善。欲奉崇真之禮，先陳解穢之儀。神呪所加，妖氛盡弭。入意，

後文如前。

臣等敢不洗清心地，結爲類帝之壇；蠲潔物儀，式展事天之禮。大懼妖塵之障，難迓飈歛之臨。伏願太上申敕千官，戒嚴萬騎。廓清四界，森藻衛於薰場；振袂羣凶，降飈旂於黼座。息凌雨震風於昏曉，瞻景星瑞日於晦明，庶茂對於明威，俾克成於釐事。臣等馳心丹陛，屏息紫壇，俯伏思神，恭俟昭報。

道門通教必用集卷之七

道門通教必用集卷之八

鶴林道士呂太古集

威儀篇黃籙九時啓經文

第一時

以今第一遍，爲國祈祥，祝延聖壽。雲集道衆，陞壇持念天尊聖號，轉誦《太上混元上德皇帝道德真經》。蓋此經者，從五太之初，二儀未判，靈風集妙，空洞凝華，寶章結於混成，玉字標於獨化，挺乎杳冥之際，煥乎玄黃之先，日月得之以照臨，乾坤資之而運載。於是虛皇上帝乃命元始天王，刊之於玉章，編之於玉簡，藏之於寶匣，集之於瓊臺，初祕上元，末流下土，降鑒有道，乃錫斯文。伏羲受靈圖，軒轅受符扎，高辛受經誥，大禹受洛書。故神道設教，垂文起於茲矣。洎及混元降聖，歷爲帝師，于時大道不行，人倫澆薄，故陳道德五千之旨，以示淳樸還返之源。其言也，大無不包，細無不

入，理窮衆妙，義同虛無，內以理身，外以經國，研之則聲參太極，行之則治化昇平，爲萬物之祖宗，作天地之根始。斯經尊妙，難盡稱揚，集此殊勳恭用，祝延今上皇帝。伏願聖躬安暢，辰極齊年，天書降而大業興隆，帝曆延而國根深固，干戈戢而寰宇靜，淳風振而泰階平，雨順風調，家豐國富。有生含識，俱契道真；異域遐陬，同歸正見。仰憑清衆，各運誠心，先持誦淨天地神呪、淨心口神呪、安土地神呪，玉清元始天尊、上清靈寶天尊、太清降生天尊、昊天玉皇上帝、上宮天皇帝、中天北極天帝、后土皇地祇、玉清虛無天尊、玉清大慈天尊、玉清大悲天尊、玉清大帝虛皇天尊、玉清後聖金闕天尊、玉清後聖瓊闕天尊、玉清後聖太平天尊、太平護國天尊、昌國化人天尊、成就國土天尊、興國太平天尊、玄都萬壽天尊、保制劫運天尊、難思聖德天尊、海空智藏真人、溥德妙行真人，不可思議功德。

次各轉《混元上德皇帝道德真

經》。

## 第二時

以今第二遍，正天分度，解禳陽九、百六之災，兵戈疾疫，水火旱蝗，饑饉之厄。憑合壇道衆，持念天尊聖號，轉誦《太上十一曜大消災神呪經》、《靈寶天尊禳災度厄真經》。蓋以四海之內，九地之中，上至帝王侯伯之尊，下及人民品物之衆，皆稟五行之推運，悉繫衆曜之照臨，善惡一興，禍福應見。天有陽九之數，地有百六之災，使日月之失昏，致星宿之錯度，大則憂形帝主，小則災及生靈，或乃兵革四興，或乃災祥競起，饑荒疾疫之苦，蟲蝗水火之虞。欲免災以除凶，當誦經而行道。昔者大羅天上，元始慈尊鳴法鼓而叩瓊鐘，召十方而集衆聖，說善惡之報應，示罪福之因緣，演出是經，愍茲未悟，功德深重，喜慶難言。凡有修崇，當勤諷誦。伏願七政齊而聖功顯，五星聚而國祚昌，潛消災變之虞，丕顯照臨之德，景雲呈瑞，妖氣屏收，世臻極治之安，人識有生之樂。仰憑清衆，各

持念上元日宮皇極天尊、中元月宮正一天尊、下元星宮衆妙天尊、運明廣照天尊、開輝保生天尊、日月光明天尊、清淨流光天尊、收魔滅惱天尊、凝彩光華天尊、護國永安天尊、日光真人、月光真人、星光真人，不可思議功德。次各轉《十一曜大消災神呪經》、《靈寶禳災度厄真經》。

## 第三時

以今第三遍，奉爲溥天之下，有功於國，應該祀典，諸廟福德正神，增助威光，保寧國界。憑合壇道衆，持念天尊聖號，轉誦《太上昇玄消災護命妙經》、《黃帝陰符經》，以伸回施。蓋以天不任察，司察者付之鬼神；君主無爲，有爲者委之臣子。以忠事國，以道相天，得聰明正直之心，稟仁孝公廉之行，生爲將相，位擢神靈，享廟食於人間，受封崇於有國。至若淮水石犀，李太守以石犀沉水爲誓，又劃水塹爲淮，不許越過其淮。以淮字讀者誤也。如秦太守之盛德；流汗木馬，見晉神君之殊功。王化一方，宣威四海，邦家賴以安鎮，士庶從

之禱祈。茲建黃壇，恭披紫策，庶憑道力，仰讚靈光。伏願福祐皇圖，永致萬方之泰定；名登仙籍，愈聞威力之變通。然後錫祐齋官，流祥舉室，無災不解，有願皆從。仰賴恩光，誓勤崇報。敬憑清衆，各持念玄元闡教天尊、興大福力天尊、慈濟永劫天尊、廣度衆厄天尊、大通靈應天尊、變見無邊天尊、神力無礙天尊、妙行真人、廣信真人，不可思議功德。

次各轉《昇玄消災護命妙經》、《黃帝陰符經》。

## 第四時

以今第四遍，爲齋官某家所薦上代家親一行亡人等，遷拔魂神，超昇淨界。憑闔壇法衆，持念天尊聖號，轉誦《太上洞玄靈寶無量度人上品妙經》。且洞玄靈寶者，則三洞中洞之一部。無量度人者，則中洞一部之一卷。修習之法，則一部多門；諷誦之篇，則此卷爲首。昔在浮黎真境，紀談受之，初祕於紫微上官，顯緘藏之蹟，實諸天之隱韻，爲大範之仙章。八角垂芒，本由

於宸翰；千祇列衛，溥度於人倫。其

或毓質圓方，稟和霄壤，少思寡欲，背  
偽歸真，端慮以潔齋，洗心而成誦，精  
專內積，純粹外充。信可以自晦而明，  
無幽不燭。類虛室之生白，由溫泉之  
盪邪。熙熙而陟春臺，濟濟而登壽域。  
至誠所及，介福何窮。《靈寶度人經》，  
讚歎難窮盡，集茲妙善，溥度亡魂。伏  
願上代祖先一行魂識，聞經之後，洞明  
真理，不昧本源，翱翔功德之林，解脫  
幽明之趣。靈書度命，斷宿累於迷  
途；丹火鍊形，宅報身於道域。然後  
上窮碧落，下際金輪，凡屬有情，齊登  
道岸。仰憑道衆，爲如上緣，各請持淨  
天地神呪、淨心口神呪、安土地神呪，  
玉清虛無天尊、玉宸妙道天尊、金闕至  
真天尊、太一救苦天尊、常濟苦海天  
尊、法橋大度天尊、香林說法天尊、度  
幽明真天尊、護魂無滯天尊、廣開方便  
天尊、隨願往生天尊、分配受生天尊、  
逍遙快樂天尊、大慈救苦真人、大悲拔  
罪真人，不可思議功德。

次各轉《太上洞玄靈寶無量度人

上品妙經》。

#### 第五時

以今第五遍，奉爲地府酆都大帝、  
陰宮夜境官屬、水府扶桑大帝、珠宮貝  
闕衆靈。憑合壇道衆，轉誦《太上老君  
常清淨經》、《生天得道真經》，溥伸回  
施。蓋以地司水府，兼考治於罪魂；  
北帝陰官，昔受傳於教敕。敬憑妙典，  
仰讚靈光，庶同仗於真功，悉舉遷於仙  
職，兼資長夜，盡睹光明。次及見存，  
咸消罪咎。仰憑清衆，各持念法藏瓊  
文天尊、慈周三界天尊、廣化六道天  
尊、龍王變度天尊、轉輪聖王天尊、法  
界應慈天尊、度人衆妙天尊、妙行真  
人、妙相真人，不可思議功德。

次各轉《元始天尊生天得道真  
經》、《太上老君常清淨經》。

#### 第六時

以今第六遍，爲九泉六道五姓孤  
魂等衆。憑法衆持念天尊聖號，轉誦  
《太上九幽拔罪心印經》、《十方救苦妙  
經》。蓋以萬劫沉淪，初本生於一念；  
九幽迷暗，實自昧於三光。既無濟度

之津梁，誰借超騰之梯級。屬開法會，  
廣濟沉魂，願聞正法之音，盡悟真常之  
理。仰憑法衆，各持念化三途天尊、救  
八苦天尊、除煩惱天尊、超生死天尊、  
色無盡天尊、空無相天尊、無邊際天  
尊、功德海天尊、大隱真人、救脫真人，  
不可思議功德。

次各轉《九幽拔罪心印經》、《十方  
救苦妙經》。

#### 第七時

以今第七遍，奉爲齋主某家解災  
度厄，祈福延生。憑合壇道衆，持念天  
尊聖號，轉誦《南北二斗延生真經》，以  
祈景貺。竊以人身難得，中土難生，假  
使得生，正法難遇。茲仙經之所載，惟  
道力以能諳，自起信心，定由宿習。昔  
我混元道祖，俯愍羣迷；正一真人，親  
傳藥笈。或受之玉局，或降自鶴鳴，皆  
九天八會之真文，三洞三清之上道，利  
益一切，津梁衆生。凡在見聞，豈更輕  
生而迷本；能勤讀誦，故令知命以歸  
真。爰祇建於寶壇，用披宣於奧旨。  
當願齋官某等，履茲修奉，伏此誦持，

北府除殃，南宮注祿，道心開發，慧性圓明，洗蕩塵勞，祛除迷妄，俾漸登於妙果，庶重立於玄功。善及存亡，功霑水陸，永超俗網，俱入金門，克符真一之宗，俱契希夷之旨。仰憑清衆，先持誦淨天地神呪、淨心口神呪、安土地神呪，玉清降福天尊、上清常湛天尊、太清靈變天尊、長生保命天尊、福生無量天尊、消災解厄天尊、延壽益算天尊、紫清介福天尊、九宮捍厄天尊、八卦護身天尊、寶策定壽天尊、金闕延祥天尊、自然智慧法身真人、玄妙虛無上德真人，不可思議功德。

次各轉《太上玄靈北斗本命延生真經》一卷，《太上南斗六司延壽度人妙經》一卷。

### 第八時

以今第八遍，爲齋主某家報答父母劬勞，深重大恩。憑合壇道衆，持念天尊聖號，轉誦《太上真一報父母恩重經》、《真武報父母恩重經》。蓋以一元初判，九氣結形，氣氣不停，生生相續。萬物至衆，唯人最靈。雖稟氣於陰陽，

實受形於父母。髮膚身體，遞代相傳。億劫以來，莫知其數。我相既立，始相旋衰。因我相故，遂有六親。枝派既分，源流漸失。論身世則古今雖異，致善惡則彼此相關。如影隨形，決不可離。昔者，西那玉國天尊演難報之恩，開皇劫中太上戒不孝之子，爲人後者，得不念哉。敬因黃籙之修，式演琅函之祕。上祝在堂父母者，伏願錫之上壽，等千歲之松椿；願俾茲顏，若春風之桃李。誓恭勤於菽水，庶少答於劬勞。過去父母者，身脫幽都，耳聆真諦，使九泉之下，無報對之冤，而三界之中，獲逍遙之樂，庶伸罔極，少慰永思。仰憑清衆，各持念無量化身天尊、度世聖王天尊、圓滿正智天尊、隨緣赴感天尊、遐宣道蔭天尊、隨功度人天尊、法解真人、太極真人，不可思議功德。

次各轉《太上真一報父母恩重經》、《真武靈應真君報父母恩重經》。

### 第九時

以今第九遍，奉爲三洞法錄官將

吏兵、三界功曹、四直使者、土地里域申奏等神，衛護靈壇官屬。憑合壇道衆，持念天尊聖號，轉誦《太清天童經》、《智慧觀身經》，以伸回施。蓋以四霄三晝，荷騰達於凡情；願滿功成，寔有勞於神助。雖章奏爲陳其遷賞，兼誦持重表於欽酬，更希保佑之恩，庶賴始終之賜。仰憑清衆，爲上因緣，各請念真靈感應天尊、靈應無窮天尊、常增上善天尊、光顯神功天尊、和神利物天尊、功德圓滿天尊、寶相真人、轉輪真人，不可思議功德。

次各轉《太上太清天童護命妙經》、《智慧觀身經》。

道門通教必用集卷之八

# 道門通教必用集卷之九

鶴林道士呂太古集

## 精思篇

### 發奏

古儀無關告土地，便外壇宿啓，後世增修爲文，止是啓告，尋置文牒。復有行法而居師位者，又加以印訣符呪，命召土地諸神，蓋出於《天心正法》。今遂爲成規，既坐命諸神，皆須如法文變神摺訣，方可施行。用考詳著于篇首云：

發奏：於天門設土地等神坐，法師於東南隅設坐。法師入坐，先存己身，如天師戴魚尾冠，披魚鬣衣，朱履。便摺變神訣：左手小指從四指後入中指根，四指曲摺掌心，用中指勾定小指，用大指摺中指中節。彈了大指，却摺第二指根。此乃本師印訣，存六甲六丁、四天門王、青龍白虎、朱雀玄武，羅列圍繞。次存土地申奏官屬，在天

門聽命，一一分明。然後宣召，入意指揮訖，發引遣表。法師左手摺印訣，二指升文，右手仗三昧火，劍四指根節，誦劍水呪。喫水訖，卓劍。于坐右卓劍訣，右手中指根節，彈向劍處。次焚香，仍摺前變神訣，想三台星在大指背，名七星訣。念文宣牒訖，遣牒誦呪，存太陽赤氣、太陰白氣、三台七星真氣，流注水中，執劍取氣。喫水訖，法師以舌主上腭，化爲金橋，令土地申奏，從橋上逕達天門。事訖，還神回向。出《天心正法》

### 白事

清都法師張萬福云：夫齋法精嚴，諸天上聖並垂降鑒，每事須合法度，不得遲留稽廢法儀。又大洞法師謝方來曰：凡高功啓奏之時，東向平立。都講以下，皆西向爲一班。平立，執簡鞠躬，調聲正氣，直詞小語，朴略典素。不得厲聲，過失煩飾，言詞取節，情理須中，勿事奇麗，失其誠意。凡諸祈請，先自悔過，然後白事。張法師又曰：行道登壇，皆香水盥漱，名曰蕩

穢。出亦盥之，名曰閉真氣。

### 陞壇

謹按張杜二公所定科儀。凡行事，先詣玄師前，列班唱道。至壇所地戶上，持呪旋遶，陞天門，上十方香。次至上級本位，上香行事，並不著壇下關告一節，不知自何人增爲，殊失旨意。蓋自禮師、存神、發爐，皆是整飭內外。靈官威儀訖，然後稱法位，上啓諸真聖。宣詞啓告，其理甚分曉直。須削壇下關告，無釋疑悞。

### 夜入戶呪

夜入戶呪立地戶之左，三叩齒，密念四明功曹、龍虎使者、正一生氣、侍靖素女，夜有所啓，願得開明童子、上元少女，與我俱入壇殿，通達所啓，皆得上聞。

### 夜出戶呪

元上太陰，八窗開明，向來所陳，少女通靈。事畢復位，萬神潛寧。

### 朝入戶呪

四明功曹、通真使者、傳言玉童、侍靖素女，爲我通達壇殿正神，上元生氣，降入我身。



朝出戶呪

出陰入陽，萬神開通。關奏事畢，請閉黃房。侍靖玉女，明備神宮。已上

出陸天師《明真科》

存思

簡寂陸天師曰：道以齋為先，齋以經為首。修齋禮請，以精思為先；奉經威儀，以靜念為本。本不正，則威儀失序，不合經典，豈能感通玄聖，致福慧邪用。博採衆經，標明至要，祖述修緒，以備修行。自為道法精思存神訣。

各禮師存念如法。正立，瞑目存神。

先存太上三尊，在天寶臺中，左有三十六部尊經，右有玄中大法師，十真五帝，群仙侍衛，如會朝之儀。

次存經師所在，心拜三過，籍師之

師。

次存籍師所在，心拜三過，度師之

師。

次存度師所在，心拜三過，自己之

師。

願我三師，上登高仙，為我開度七

祖父母，早登天堂，我身名入仙籍，永為真人。

平日寅時，當思青氣從肝而出，如雲之昇，帀繞壇殿。青龍獅子，備守前後。仙童玉女、天仙地仙、日月星宿、五帝兵馬，各九億萬騎。監齋直事、三界官屬，羅列左右，以雲氣往覆弟子居宅大小之身。

正中午時，當思赤氣從心而出，如雲之昇，帀繞壇殿。朱雀白鶴，備守前後。仙童玉女、天仙地仙、日月星宿、五帝兵馬，監齋直事、三界官屬，羅列左右，以雲氣覆弟子居宅大小之身。

入夜戌時，當思白氣從肺而出，如雲之升，帀繞壇殿。白虎麒麟，備守四方。仙童玉女、天仙地仙、日月星宿、五帝兵馬、監齋直事、三界官屬，羅列左右，以雲氣往覆弟子居宅大小之身。

又思五星、五嶽、五帝，備守身形。五藏之氣，仰昇紛錯，冠覆一身，如在烟霧之中。金華映蓋，體作金色，先從肺出，頂後有圓光，如日之象，照明十方，身中了然，盡見內外。然後修行妙

觀，洞入虛玄。晝夜三時，並用此法。

次鳴法鼓二十四通。

法鼓者，內集神氣，外威魔靈，法事所先也。當門上下齒相叩，名曰法鼓。每八通小停，三八二十四氣之象。張萬福天師曰：鳴法鼓，經說凡有三種。一上下相觸，不令耳聞；二纜令耳聞；三虛口緩頰，令有深聲遠響，此自入靖可矣。若法衆既多，一時煩聒，不令耳聞者為妙，如此則精審細密，便可一念專注，神氣安和故也。

已上存念叩齒，出《威儀自然經》及《金錄簡文》。

按陸天師所定精思訣，今所謂命魔存想，乃是為步虛而設。以步虛在命魔之後，先存想而後命魔，繼以步虛。其實步虛中事，所以皆與《玉京步虛經》相合故爾。今依陸說，詳著于篇。

步虛精思

陸天師曰：誦步虛經詞，先叩齒三通，嚙液三過，心存日月在己面上，從鼻孔中入洞房金華宮，光明出頂後，煥然作九色圓象，薄入玉枕，徹照十

方。隨我繞經旋迴而行畢，叩齒三通，嚙液三過。出《太上玉經隱注》

釋訣 亦是陸天師所釋

存日月在己面上。日色赤，有紫光九芒。月色黃，有白光十芒。日左月右，去自己面九尺。日之光芒直來，從左鼻入。月之光芒直來，從右鼻入。俱入洞房金華宮。金華宮者，從兩眉間直入五寸是也。光明薄入玉枕，出項後也。頭總名泥丸宮，眉間入一寸為明堂宮，二寸為洞房宮，三寸為丹田宮，四寸為流珠宮，五寸為金華雌一洞房宮，一曰玉帝宮，宮各一寸，故曰泥丸洞明鏡，遂成金華仙之類是也。存思畢，然後誦步虛之章。

按杜天師所著儀，命魔法師於鬼門上，望西而立。都講於天門上，望東而立，唱各思九色圓象、嚙液命魔密呪。自高功而下，各各存思。自楊公傑定金籙儀，遂著於天門上命魔。今不復易，因書本末，各從所見而行之。

### 命魔呪

黃中策氣斬妖宗，察制彊精斷邪

翁。太上有命太上房，急召北帝詣玉宮。受承威令宣魔王，五氣翦鬱與命衝。祕藏玉文方就隆，三天運明六天終。賢者哉

杜天師曰：此呪密念，不得令己耳聞。違之有咎，慎之慎之。右出《五符人鳥經》趙明舉法師曰：雖分九色，止玄元始而已。蓋九色自三氣為祖，青黃白是也。若細分紫碧等色，則繁而紊，止以三氣分為九氣爾。

### 命魔說

清都法師張萬福曰：天尊未說經之前，諸天三界魔王為萬鬼之宗，行威縱毒，殘害生人。天尊說經之後，羣魔伏化，衛道護法，匡御衆魔，保試修真之人，方入僊品。所以云：敢有干試，拒遏上真，金鉞前戮，巨天後刑。又云：大勳魔王，保舉上仙，道備克得，遊行三界，升入金門。又云：東送妖魔精，斬馘六鬼鋒是也。所以命魔者，命諸天魔王，保舉齋功，察制妖鬼。《步虛經》云：魔王敬受事，故能朝諸天。天魔並敬護，世世受大福。散花

陳我願，握節徵魔王是也。

### 誦經靜念訣

按杜天師讚導儀所著，誦經節次，至靜念如法，則法師依經存思，誦經蘊呪。然儀文中不著存思法，今依陸天師圖訣，錄之于編。

### 《道德經》精思存神訣

《太極隱注》曰：讀太上《道德經》，先燒香整服，禮三拜，心存玄中大法師太上老君、老君昔為玄中法師河上真人尹先生，誦經蘊呪曰：

玄玄至道宗，上德體洪元。天真雖遠妙，近緣泥丸君。雖遠而反近，緣泥丸君之宮乃玉帝所遊也，即腦中。宮室皆七寶，窗牖自分明。清靜常致真，駕景乘紫雲。日月左右照，昇仙長年存。七祖上生天，世為道德門。畢叩齒三十六通，嚙液三十六過，心存左青龍、右白虎、前朱雀、後玄武，坐八卦神龜、三十六獅子前，伏頭中七星，以斗杓前向。五藏五色之氣，如羅文覆蓋一身。三一真人，立經前。自己三師也千乘萬騎，備衛左右。了然分曉，然後誦經。

《四極科》曰：讀誦經文，當令心口相應，目無他視，心無他念，言句周竟，不得越略天音，三犯有責。

《太極隱注》曰：讀經五百言，叩齒三下，舌舐上下唇，咽液三過，使人不極也。

### 《度人經》精思存神訣

經云：行道之日，香湯沐浴，齋戒入室，東向叩齒三十二通，上聞三十二天，心拜三十二過，閉目靜思，身坐青黃白三色雲氣之中，內外翫冥。有青龍、白虎、朱雀、玄武、獅子、白鶴，羅列左右。日月照明，洞煥室內，項生圓象，光映十方，如此分明。密呪曰云云。

### 釋訣

叩齒心拜，存三十二天於四方，青龍在左，白虎在右，朱雀在前，玄武在後，白鶴獅子，各分列于前。日月在前面九尺，光照十方。以鼻引氣三十二過，無使耳聞訖，東向誦經。

### 《南北斗經》精思存神訣

向北正坐，叩齒二十四通，心存太上老君、三天法師、左右真人在上，心

拜三禮。次存南斗六星在右，北斗七星在左，虔誠祈禱，願意想十戒仙官，及南陵使者三千人，北斗七千神將，左右備衛，了然分明。次誦經蘊呪：

昔在東漢末，永壽改元初。天師乘白鶴，太上駕龍車。五雲自天下，仙仗來成都。地神湧玉局，其高可丈餘。太上升玉座，傳授九天書，削死延生法，七元總寰區。延壽度人經，六司皆有符。奉道修行人，讀之灾厄除。臣今誦靈篇，將吏陰相扶。會當立玄功，妙道證虛無。

### 《道德經》玄蘊呪

歷劫天人師，大聖玄元君，昔於太清宮，著書五千文。虞舜以至孝，傳於無上尊，事祕不示世，綿區無得聞。周末昭王時，飛天行紫雲，尹喜司幽關，瞻望迎鸞輪。西度流沙來，太上果到關，乃於日中時，再傳《道德經》。義無大不包，亦無細不論。臣今關真編，敷繹天地根。願依至道宗，家國沾殊恩。帝王保萬壽，終期朝帝閭。

### 《度人經》玄蘊呪

善哉元始尊，昔於始青天，懸珠如黍米，登引十方仙。說法以度人，寶章名洞玄。三十二天帝，內名隱諱全。三界大魔王，所歌空洞篇。大梵隱語音，皇人親以編。高真垂拯拔，傳世度宿緣。五劫開化久，所度無有邊。臣今東向誦，願與天齊年。帝王保安鎮，九祖俱升仙。功滿德就日，高舉昇雲烟。

### 《生神經》玄蘊呪

善哉元始尊，偃息黃房宮。希夷養太素，空碧練沖融。飛天來稽首，具陳劫運終。宜有大法行，廣度諸愚蒙。天尊拯悲智，玉笈開玲瓏。出示生神章，敷繹九氣宗。研心稽首誦，所度無終窮。臣今披雲錦，九遍成人功。功滿德就日，乘景乘雲龍。

### 出官，精思存神。

叩齒二十四通，臨目謂微開兩目也。先存三清在頂，道德衆尊，皆會于前。青龍、白虎、朱雀、玄武，在左右前後。己身長丈餘，遍體作金華之色。額門朱戶，闊開於頂上。真官吏兵，皆從頂門

出。虎賁將軍在鼻，天丁力士在肩，狼吏在頸，直使在兩頰，天騶在兩臂，甲卒在手指，察姦鉤騎在腹，三將軍在心，科車赤符在臍，三官僕射在胃，罡風騎置在膝，驛馬上章在脛，收氣諸吏在背二十四骨，社邑君青衣在前。直使功曹，擎持章按，一一分明。然後開目啓事畢，叩齒三通，嚙液三過。

宣章，讀太清銜說。


尹真人《問科經》及天師《問法經》云：天師告太上曰，見有讀太清畢，讀以聞者；或先讀以聞，後太清者；或先讀太清字，次讀以聞，次臣姓；或斷後讀太清者。有此不同，何者爲法。太上曰：以聞畢，次臣姓，次太清，次年號，各去三行，此寫章不易之法也。惟宣讀之時，讀以聞畢，長跪執板，先讀太清，細字略出聲。不可令高厲不得嚙液咳嗽，一氣宣讀，次臣姓，次年號，此天帝具法也。

趙明舉法師布氣熏銜歌


三氣由來合體成，元皇相好便分明。箇中的有玄無理，但恐時流學不精。

印章七元魁杓真形符


章中使印，諸經科儀，並不經見，如赤松子寶章曆，廣成先生章式，及金籙儀章式，亦不記載。須詢訪宿德謂言：吾爲童時，尚見前輩臨時以朱筆作此符於章文中，其高下作北斗象。蓋所以護衛章文，使之必達爾。最後，看廣成紫庭北陰儀，以黃絹篆七元符，裹卷詞文，封入函中，方信宿德之言不誣也。謹刊行之，併又其所以云：今易爲印者，後來之私意也。




太真都




以聞




臣姓




太清上




太清下



再拜




再拜




三將軍

印於章  
函之右




太歲

六甲陰陽符二道，自甲子乙丑，各有一符，下必以陰符陽符終之。甲子爲陽，乙丑爲陰，陽主陽界，陰主陰界。今騰章，係陽界事，當用陽符。而流傳多作陰符於函上用，並刻一符，並呪於其下。




中天大聖，飛天捷疾，收捉陽玉玉界之中，下方無道之鬼，付天一北獄，依律定罪。唐葛周將軍、真武將軍，卓劍相待。陽符



中天大聖，飛天捷疾，收捉陰玉玉界之中，五方無道之鬼，付天一北獄，依律定罪。唐葛周將軍、天地水三官敕。陰符

散形




中天 飛天  
大聖 捷疾

收捉陽玉玉界云云真武將軍  
至唐葛周將軍 卓劍相待

陰符准此。

### 伏章步斗圖



### 步斗歌

坎雙艮隻步交乾，震上雙行兌亦  
然。坤隻離雙單步巽，三台歸去便朝  
天。

存章思神法，孫公教師籍中具載。  
此蓋太上隱祕，雖存諸編冊，至於心  
法，自得之妙，不可言傳。以孫公既以  
宣露，且言吾徒，宜祕斯文，勿輕以告  
人。茲不復鋟板，多泄天祕，後之留意  
者，宜求之孫本，索其隱於先達云。

道門通教必用集卷之九

(吳亞魁點校)

# 026 道門定制

經名：道門定制。原題宋呂元素集成，胡湘龍編校。十卷。底本出處：《正統道藏》正一部。

## 目錄

### 序

- 卷一
- 議表狀
- 議稱臣
- 議衆真請狀
- 議文牒
- 議女青詔書並寶誥
- 議金錄白簡
- 議詞意
- 玄都律議章詞體
- 議太清銜
- 議衆真獻狀

龍簡說

平闕

議設醮降真

議書奏

議字體

釋太清銜上真并戊戌戊辰

議宣讀太清銜

議章後宮曹

議文牒

書章法

諸章通用謝罪

言功章謝罪

章後

太清銜

三清銜

年號

《玄都律》所載章忌

消灾保命延筭章

遷拔章

黃錄言功都章

爲國祈祥章

分解冢訴章

誓火章

文昌章

### 卷二

表狀

九皇御號

九皇請狀

請符命狀

申天樞院狀

申五師狀

申三府狀

申東嶽狀

逐時通進狀

請衆真狀式

預下抽魂牒申東嶽狀

申南極鍊度狀

諸司文牒

都牒

上界牒

中界牒

下界牒

預行抽魂牒

女青抽魂牒

城隍牒

五路牒

童子牒  
發奏文字引目

卷三

王欽若奏

批答

御製科教師賜紫孫虛白論奏獻錢馬  
事

黃籙羅天一千二百分聖位

- 第一狀
- 第二狀
- 第三狀
- 第四狀
- 第五狀
- 第六狀
- 第七狀
- 第八狀
- 第九狀
- 第十狀
- 第十一狀
- 第十二狀
- 第十三狀
- 第十四狀
- 第十五狀

第十六狀

第十七狀

第十八狀

第十九狀

第二十狀

第二十一狀

第二十二狀

第二十三狀

第二十四狀

第二十五狀

第二十六狀

第二十七狀

第二十八狀

第二十九狀

第三十狀

第三十一狀

第三十二狀

第三十三狀

第三十四狀

第三十五狀

第三十六狀

第三十七狀

第三十八狀

第三十九狀

第四十狀

第四十一狀

第四十二狀

第四十三狀

第四十四狀

第四十五狀

第四十六狀

第四十七狀

第四十八狀

第四十九狀

第五十狀

第五十一狀

第五十二狀

第五十三狀

第五十四狀

第五十五狀

第五十六狀

第五十七狀

第五十八狀

第五十九狀

第六十狀

第六十一狀

第六十二狀  
第六十三狀  
第六十四狀  
第六十五狀  
第六十六狀  
第六十七狀  
第六十八狀  
第六十九狀  
第七十狀  
第七十一狀  
第七十二狀  
第七十三狀  
第七十四狀  
第七十五狀  
第七十六狀  
第七十七狀  
第七十八狀  
第七十九狀  
第八十狀  
第八十一狀  
第八十二狀  
第八十三狀  
第八十四狀

第八十五狀  
第八十六狀  
第八十七狀  
第八十八狀  
第八十九狀  
第九十狀  
第九十一狀  
第九十二狀  
第九十三狀  
第九十四狀  
第九十五狀  
第九十六狀  
第九十七狀  
第九十八狀  
第九十九狀  
第一百狀  
洞府投龍奏狀  
土府投龍奏狀  
水府投龍奏狀  
消灾一百二十分聖位  
第一狀  
第二狀  
第三狀

第四狀  
第五狀  
第六狀  
第七狀  
第八狀  
第九狀  
第十狀  
第十一狀  
第十二狀  
遷拔一百二十分聖位  
第一狀  
第二狀  
第三狀  
第四狀  
第五狀  
第六狀  
第七狀  
第八狀  
第九狀  
第十狀  
第十一狀  
第十二狀  
卷四



雲篆符誥

三皇内秘隱文

鎮天真文

東方青帝鎮天真文

南方赤帝鎮天真文

西方白帝鎮天真文

北方黑帝鎮天真文

中央黄帝鎮天真文

消灾真文

東方青帝消灾真文

南方赤帝消灾真文

西方白帝消灾真文

北方黑帝消灾真文

中央黄帝消灾真文

鍊度真文

東方八天鍊度真文

南方八天鍊度真文

西方八天鍊度真文

北方八天鍊度真文

中央梵天鍊度真文

遷神生天寶誥

太上赦罪生天遷神玉文

太上遷神生天寶誥玉文

太上遷神登真度命出離生死玉文

太上鍊神登真玉清寶誥玉文

太上僊化成人神寶誥玉文

三府龍簡

洞府

土府

水府

金籙白簡

救苦符散形

救苦符聚形

長生簡文

長生符散形

長生符聚形

戒牒式

沐浴符

卷五

黃籙都疏

盟真大齋功德疏

消灾拜章功德疏

卷六

自序

齋品

議壇方位

議書章

封章符

陽符散形

陰符散形

青詞

寶誥

詞文式

黃籙詞文

卷七

安宅章

安墳墓章

祈嗣章

誅邪章

六甲救病章

南嶽魏夫人易名更籍生筭度厄救急章

祈雨章

祈晴章

消灾度厄章

太上消除蟲蝗灾食苗稼章

上清道士修真謝罪章

道士滅度拔出塗苦鍊屍受度朱章

卷八

八威真文

東方青帝八威真文

南方赤帝八威真文

西方白帝八威真文

北方黑帝八威真文

中央黃帝八威真文

召龍真文

東方青帝召龍真文

南方赤帝召龍真文

西方白帝召龍真文

北方黑帝召龍真文

中央黃帝召龍真文

解穰星運醮十一曜祝文

太陽真君真形符咒

太陰真君真形符咒

木星真君真形符咒

火星真君真形符咒

金星真君真形符咒

水星真君真形符咒

土星真君真形符咒

羅喉真君真形符咒

計都真君真形符咒

紫炁真君真形符咒

月孛真君真形符咒

南斗祝文

南斗第一天府司命上相鎮國真君

靈符

南斗第二天相司錄上將鎮嶽真君

靈符

南斗第三天梁延壽保命真君靈符

南斗第四天同益筭保生真君靈符

南斗第五天樞度厄文昌鍊魂真君

靈符

南斗第六天機上生監簿大理真君

靈符

北斗金玄羽章

北斗陽明金玄羽章

北斗陰精金玄羽章

北斗真人金玄羽章

北斗玄冥金玄羽章

北斗丹元金玄羽章

北斗北極金玄羽章

北斗天關金玄羽章

太極妙化混洞赤文

太上招真符

壇圖

安宅歸神符

祈嗣道場真文

東方青帝祈嗣真文

南方赤帝祈嗣真文

西方白帝祈嗣真文

北方黑帝祈嗣真文

中央祖炁玉曆寶文

削過玉文

東方始青削過玉文

南方太陽削過玉文

西方少陰削過玉文

北方太陰削過玉文

中央大黃削過玉文

卷九

文昌聖位一百二十分

第一狀

第二狀

第三狀

第四狀

第五狀

第六狀

第七狀

第八狀

第九狀  
第十狀  
第十一狀  
第十二狀  
第十三狀  
第十四狀  
第十五狀  
安宅七十二位神  
安墳神位七十二分  
更籍醮地府七十二司聖位  
黃籙羅天第一度召請神狀  
第一狀  
第二狀  
第三狀  
隨願往生道場奏狀  
第一狀  
第二狀  
第三狀  
第四狀  
太上慈悲道場九幽大齋奏狀  
第一狀  
第二狀  
第三狀

第四狀  
第五狀  
第六狀  
保胎祈嗣道場通用奏狀  
第一狀  
第二狀  
第三狀  
第四狀  
第五狀  
第六狀  
第七狀  
第八狀  
第九狀  
第十狀  
第十一狀  
第十二狀  
昇化遷度道場奏狀  
第一狀  
第二狀  
第三狀  
第四狀  
第五狀  
第六狀

第七狀  
第八狀  
第九狀  
第十狀  
第十一狀  
第十二狀  
冢訟燈牌  
卷十  
更籍換案道場五戒牒  
更籍道場申東嶽狀  
更籍道場地府牒  
黃籙等齋職榜  
夜齋榜  
傳度法籙請法詞券  
童子保帶式  
安宅醮竈君牒

## 道門定制序

至簡易者道，而至詳備者禮。凡人之所以事天者，道也。因事天而起至誠之心者，有禮存焉，此聖人垂世立教之本旨也。然於繁簡之間，當有所折衷，而不可過也。道門齋醮簡牘之設，古者止符篆朱章而已，其他表狀文移之屬，皆後世以人間禮，兼考合經教而增益者。所在無定式，或得之詳備，而失簡易之旨，使力所不逮者，不可跂及；或失之鹵莽，而使盡敬事天者，無所考定，不愜其意。元素常竊患之，欲別爲校定，使之適中，俾略者不得隱，而繁者不得踰，則事天奉道之禮，不因入而隆殺。其他有合講明，具于下方，當有能辯之者。淳熙戊申，唐安鄴江樸庵呂元素識。

## 道門定制卷之一

西蜀道士樸庵呂元素集成  
朱陵真隱性齋胡湘龍編校

### 議表狀

九皇請表，每位專奏一通，略入事言啓事，以某日取某日某時，設醮降真，以致望幸之意，不必全入願意。其他衆真申請狀，并土地三界等牒皆然。蓋俟登壇行道，自有章詞致禱。爾或醮事，止作一通。請諸聖者，止用請狀爲便。若表上列九皇號，不合格式也。

### 議稱臣

自上九皇外，其他衆聖，皆不須稱臣。蓋九皇猶人間之至尊，而衆聖雖帝位者，皆一方之帝，於九皇猶諸侯百官也。又高功奏事，有齋主名，不須著臣字。齋主詞中，書高功名者，不須著臣字。

### 議衆真請狀

黃籙羅天上真千二百位，雖欲多具請狀，竟不能徧。今取三皇文內所

延，召三府衆真，作三皇狀三通，伏乞三皇帝君同衆真降臨。至於三界牒中所請亦然。庶幾遞相關達，不致繁冗，而能周徧。

### 議文牒

漢天師主教，并領天樞都省進奏事。凡所章奏，上九皇者，必陳乞天樞院。凡所文移，必稱泰玄都省。行壇後，必尊天師銜，次列高功銜施行。蓋天師遺教，貽諸後人，必使遵行，以達幽顯，實古法也。近皆削去，行壇字後，專署天師銜，以爲文牒果自天上降下。牒後又作高功文跋奉行，可謂不典，莫若從古法爲宜。今於天師狀中，亦具申請銜位之意，庶幾曲盡人私。

### 議女青詔書并寶誥

嘗所載混洞赤文元始符命一節，乃女青律也。今遷拔舉用作牒，不過抽魂爾，只當以泰玄都省行壇，備坐施行。近有以爲詔書，當有制敕，乃撰造言詞對偶，別立格式云：三天門下，準敕降到。又或多開條項，如朝廷赦文之類者，不獨違礙，而又實出人爲，於

義未安。又東嶽主攝人魂魄，總統地祇，所以抽魂，必申牒東嶽，乞行下地水諸司照會。爾或有自嶽瀆地水城隍諸廟，凡諸幽嶽，皆有一牒，誠爲繁亂。蓋其以人意度之，謂一日一時之間，不能徧聞諸處。不知冥冥之中，神靈所加，不行而至，不須人慮所及也。又生天寶誥，亦有效朝廷誥敕計奏被旨之類，不獨取識者笑，實有累於教法爾。

### 議金錄白簡

簡錄功及幽冥，不可具述。獨張麗華尤爲昭著，記云：誦經至九過，適當懺罪之時，遂焚簡疏，則奏簡當在功德成就之時明矣。近有方發奏之時，先取救苦符盡焚燹，以爲亡者出離地獄，義有未安。蓋抽魂自有文牒白簡，當在傳度時宣告，使亡者乘道場所作功德，及願持戒懺悔自新之力，然後奠簡告下十方，赦罪釋冤。自此方爲出離地獄，上登朱宮爾。故經云：九幽地獄衆生，聞北帝廣爲啓請，心生悔過，願求解脫。天尊方爲說戒給符，此尤可據。又念呪篆符，不爲難事。但

能篆二十面，即可記憶，蓋符呪意義相合故也。人能嘗試之，則知此言不妄。

### 議詞意

青詞止上三清玉帝，或專上玉帝爲善。或有自九皇而下，至於十極諸天、三界真靈，皆列于詞中。豈有請命于上帝，就以遞告衆真歟？又朝廷所修詞文，不過六七十字，不用中謝伏念字，此乃表中格式誠爲謹嚴。且詞先入願意，欲直具事，因不可以對偶聯屬。雖云宣讀之便，不知詞文又有對偶，事意重複不嚴簡爾。又願意中，不必具壇中所行法事，自有功德疏開具。止云以某日某時啓事，取某日某時設醮滿散，大槩如此。蓋逐時宣讀功德，言語陳爛，亦倦人聽也。願意既已詳備於詞文，則直下精覈數語，以伸激切之誠。又舊有逐時行道，狀景作詞，從虛文也。今於黃錄，則以九時誦經所爲事，各奏一詞，庶幾行道誦經，意旨相合，亦以見齋主願力之普也，亦雅合爲國爲家、爲存爲亡、爲龍神土地、爲沙界含情之本意焉。若醮事，止用啓散心詞爲善。又有以黃紙書詞者，尤爲未

安。豈有臣子之詞，而以黃紙書？蓋青紙朱書，以代披肝瀝血之謂也。

### 玄都律議章詞體

律曰：章詞之體，欲實而不文，拙而不工，朴而不華，實而不僞，直而不曲，辯而不繁，弱而不穢，清而不濁，正而不邪，簡要而輪誠，則可以感天地，動鬼神，徑上天曹，報應立至也。違者，司非執法官吏從坐。

### 議太清銜

太清銜，五十二字疊成二寸四分，須令字畫分曉可讀，不得以字入字。或有促作一寸二分，無異塗抹。或則字數疏長，有違法度。凡司章奏，須在謹嚴，令齊整精密，不可苟簡。齋法中，惟朱章科禁最重。按三洞法師朱洞微旨要云：填太清銜，不隔時在。欲行事之時，書填入匣，以候行事。其謹嚴如此，可不勉之。

### 議衆真獻狀

三錄及諸齋醮所降上真，各有等差，不可違越。按金錄道場所降上真，止是每位奏紙錢馬一分，並不併合聖

位。今取千二百分上真聖號，契勘單位排定，庶無褻瀆。或消災盟真等醮，則隨宜奏納，做此修寫，並不得過百二十分。掌章奏者，先當具聖位一本，令高功關奏，都講延降，庶相脗合。否則，高功、都講，與獻狀三者，各不相干爾。

### 龍簡說

古者僊家修鍊之始，先投簡於三府，乞削過錄功，故有願神願僊之語。前賢取於三籙壇中，告畢齋功，重明志願，亦為佳事。以槿木為簡，表潔，《本草》：木槿似小葵花，淡紅，五葉成一花，朝開暮斂，其木白皙，故用之，音謹。以金龍負簡。又當如簡之長廣，作虛中版，底牀以置簡，其上置龍于虛以負簡。又有以土府龍則坐而鎮宅，蓋俗論也。所謂金龍驛傳，豈有坐而能傳置者哉。以青絲代截髮，青絲，每簡用二丈四尺。繫簡縻龍，三府各有巾數金鈕二十一口，每一簡，用七口。結於絲上，為龍之銜勒，以表堅固之義，加璧以致恭禮重幣也。天府之璧圓而青，土府之璧方而黃，水府之璧玄而六出。象水之成數

### 平闕空拔也

九皇聖號、恩宥、原赦、天威、鑒察、降臨、經教、飈馭、聖德，如此之類，皆平闕。若奏九皇章詞等，內有以次上真名位者，只須控一字。若專奏以次上真者，即當平闕。若土地諸神，更不必控。式中有圓窠者，亦是空一字。控一字者，皆是平闕。若奏其次諸聖文字及文牒中，有九皇及以上諸聖號者，皆須平闕。又章中不許抽破姓名，其他詞表諸文字，亦不可抽破，須遷就，令只在一行中最佳。

### 議設醮降真

大內道場，及東南醮事，止是設醮。一時酌獻，仍據所降上真位數治具。於降真時點茶，三獻禮畢，辭聖獻湯，要在詳緩，益加至誠，於義極當。蓋啓壇，乃是告齋。逐時行道，乃齋心存誠，行持懺悔。俟積善累功，行道事竟，然後憑此善力，延降上真，享此誠意，告畢齋功。所以啓事之先，先請五師證明，蓋謂此也。然百二十分，尚可備辦。至千二百分，器皿酌獻，稍似繁

多。但能多治具些，亦可行事，貴在齋醮，意旨分明爾。所以云修設某道場，至某日時設某大醮，一座幾分位是也。今蜀中醮事，自啓壇至三時，或九時行道，皆行酌獻。職事者已盡瘁勞苦，至設醮散壇之時，方是降真三獻、天人交感之際，往往疲倦，不能盡誠。曷若三日，或一日行道，專是奉事，香火齋心，養神求所，以致感通之實，宣力效勤於設醮之時，豈不佳哉。

### 議書奏

奏牘版行，意在滿修設者事天之願，而不枉散財；行科者無奏文舛繆之負。道童執筆者視之，便能通達事理，詳正字畫，契凡合聖，可以進望簪褐之階，異日為人行醮奏事，與簡牘相符合，亦教門可議之一端也。一舉而三者，皆有益焉。說者謂曰：是書之出，雖卑隸亦可為也，獨絕吾門執筆者簪褐之階爾，何得與有益之列乎？元曰：不然。此書雖稍似詳備，亦待道家以事宜而權重輕，夫然後脗合科教。若修設者至誠辦供，事天奉道，豈較是

哉。使其以阜隸爲之，吾不見其本心  
事天者也，尚何言哉。

### 議字體 校正

書字有前賢縱筆，及常俗所便者，  
點畫增減，不同位不可於奏文，止用蜀  
本，兀表正常。俗所訛繆者，具列集  
內，意亦美矣。然又間用古字，世所罕  
用，旁引散漫，卒難尋擇。俗字亦多，  
參錯在內，亦未爲善。今將先儒校定  
字體，編寫此書，自首至尾，務皆正體。  
集內俗字，並已削去，字義亦爲之訂  
正，使執筆謄寫者，剡奏諸天，申聞三  
界真司，開卷瞭然，明白易見。舉無古  
字隱晦俗書乖謬之失，可謂善美兩盡  
矣。

### 釋太清銜上真并戊戌戊辰

近有謂無天帝丈人，故釋之，曾不知儒家要讀  
未見書，方爲儒者。

按《玄都律》、《赤松子章曆》、并  
《戒律鈔》、《登真隱訣》諸處所載云：  
戊戌戊辰，其日太上丈人 太清丈人中之尊  
者也詣太上老君，太清中之尊也對校天下  
男女，應生者注玉曆。九炁丈人亦太清

丈人，主諸鬼神之職詣九老僊都君，太清之僊  
都非玄洲之僊都對校天下男女，應死者注  
死籍。天帝丈人玄都律所載詣天帝君，太  
清中東宮之一帝也對校天下男女爲罪過  
者，度著右契。此並太清上三天東宮之真章奏  
所關也天師還天曹，校揀留簿錄，分別善  
惡。此日閉天門，塞地戶，外事一斷，  
不得關啓。若遇吉日，得上言功章。  
蓋大慶之日，爲吏兵神將，普遷功賞。  
不得別奏餘章，違者考病百日。又  
云：其日或遇三元、三會、八節、本命，  
亦於上章不忌，謂此日正許人懺謝。餘  
日不許章後，古人寫年月日下，止云天門  
開時，蓋別有法，謂陽日子、寅、辰、午、申、戌  
日也當陰時，天門開。謂酉、亥時之類陰日  
丑、卯、巳、未、酉、亥日也當陽時，天門開。謂  
子、戌時之類吾儕不可不知。又如章文有  
臆度而改字礙理者，聊舉一端。言功  
章內，學法未備，俯仰之格，進止犯科，  
不合儀式。此高功自謂學未備請太上俯仰之  
格，致有進止犯科、不合儀式之罪此乃藏中專  
有俯仰節度儀格一卷，明拜跪進止之  
儀。如《生神經·序》云：一依俯仰，盟

真具典，南向長跪，以付飛天無極神  
王，此其事也。近有不知所出，改爲乏  
格亡格失格字，不知連上文，止是一  
句，遂徇意改易，從下減削文辭，牽就  
己意，皆爲未安。推此，其他可見也。  
實吾教利害，不敢緘默，故併及之。

### 議宣讀太清銜

按《尹真人問科經》、及《天師問法  
經》云：天師問老君曰：見有讀太清  
畢，讀以聞者；或先讀以聞，後讀太清  
者；或稽首再拜，下讀太清銜細字，次  
讀以聞，次讀臣姓；或斷後讀太清者。  
有此不同，何者是法？太上曰：以聞  
畢，次臣姓，次太清，次年號，各去三  
行，此寫章不易之法也。惟宣讀之時，  
讀以聞畢，長跪執版，先讀太清細字，  
次臣姓名，次年，此天帝具法也。近見  
有遷太清在臣姓之前寫者，蓋略有所  
聞，而不加詳審，壞亂章法，致令執筆  
不諳之者，從而好奇，不顧陰責。不惟  
章奏遭却，齋主道家司章奏者，與夫章  
中官吏，皆有從坐之譴，可不詳辯之？

### 議章後宮曹

醮無大小，所重奏章，幽明倚為莫大之利益。章後宮曹，月分玉女，於玄都律正一章儀所修旨要，所載具備，足可參考。蓋太上立教，使人遵行，其可輕忽。苟不如儀，生有奪筭掃除之罰，身後有泥途奔溺之苦。竊見近年刊行章文一冊，乃徇道童之見，削去宮曹玉女，以便忽略。不知高功伏章之時，存想宮曹玉女在前。通進章文，豈鬻字者所能知爾，詎可削去。又見其集中遷拔、消災、分解冢訟三章，小字箋注處，多是取定制集所校正者。其他章，亦有可取，亦有可議。如引定故事作對禹之類是也。況信自降筆至誠之士，誤為上真而敬事之。不知此即《翊聖傳》中所謂化見觀音之類爾。

### 議文牒

道家奏狀文牒，要須清淨典雅，蟬蛻挾法作成之語，方稱太上所以立教勸善之意。近有專從事於文字者，一模倣官府行移造為文牒公據之類，言詞蕪鄙，凌脅神祇。後署天師高功

銜，其實出於己意。神明聰直，豈可欺哉？不知奉道事天理趣，與法官考召治鬼之義大不同。況於官府文法，尤不相干也。彼皆恃此一切施為，誠有不便，或當有所修定，須得高識之士為之審詳，方可施用。元素苟有所見，不敢祕為一己之私，由是續有此四說，以祛障蔽，惟欲教明而辭達。凡我同袍，與夫崇設之家，必無因齋獲罪矣。

### 書章法

科云：凡書章，北向施案，筆硯悉異，不可使雜用者。閉炁書寫，不得與人言。字未竟，不得放筆。黃素，勿令破損飛落，牀席地上上剪裁，令幅廣一尺二寸，行闊一寸二分，行列一十七字，上空八分，下不通走蟻。常云下通走蟻，諸經所載，皆云下不通走蟻。臣字不得居頭，鬼字不得為首。不得垂生露死，抽破人姓名。以聞去再拜一寸二分，臣姓去以聞三行，太清銜去臣姓三行，太歲去太清銜三行。寫訖，焚香三。復點檢置於淨所，以候行事，違者奪筭。  
右出《道藏·玄都律》及《旨要》

### 官分

太上虛无丈人宮，正月、十二月  
 玄老僊都宮，二月，  
 太上三天太清宮，三月、四月  
 太上重道宮，五月，  
 太上九炁文昌宮，六月、七月  
 太上天帝宮，八月，  
 太上大道宮，九月、十月  
 玄都宮閏月  
 大上侍中左右監諸將軍宮。十一月

### 曹局

建玉曹赤靈宮，一日  
 太素曹太微宮，二日  
 太微曹北平宮，三日  
 都正曹太清下宮，四日  
 正一曹通明宮，五日  
 玄一曹上明宮，六日  
 太素曹高靈宮，七日  
 靈集曹紫微宮，八日  
 元靈曹侍春宮，九日  
 太清曹紫靈宮，十日  
 三水曹素女宮，十一日  
 司錄曹巨野宮，十二日



清叙曹西明宮，十三日  
玄正曹上降宮，十四日  
中都曹典平宮，十五日  
司非曹北府宮，十六日  
司姦曹南伯宮，十七日  
統部曹東明宮，十八日  
統錄曹西靈宮，十九日  
監考曹司命宮，二十日  
監司曹陽明宮，二十一日  
典考曹太陽宮，二十二日  
司官曹少陽宮，二十三日  
玄元曹太陰宮，二十四日  
太玄曹少陰宮，二十五日  
都司曹北辰宮，二十六日  
都候曹太白金宮，二十七日  
直使曹林明宮，二十八日  
直司曹陽明宮，二十九日  
典考曹啓明宮。三十日  
已上依朱洞微《旨要》契勘。  
玉女  
六句。每句一玉女當直，勿令差誤。  
甲子太玄玉女， 甲戌黃素玉女，  
甲申太素玉女， 甲辰拜精玉女，

甲午絳宮玉女， 甲寅青腰玉女。  
出玉清大洞錄上三部係左靈飛玉女，下  
三部係右靈飛玉女。

### 諸章通用謝罪

具高功位臣某，誠惶誠恐，稽首再拜，上言太上無極大道至真自然，金闕下臣實以下愚濁質，瑣陋凡材，叨承師匠之恩，獲處簪裳之列。臣某誠惶誠恐，稽首頓首，伏念臣學業未備，進止犯科，恐貽譴責之誅，深負兢惶之念，輒因關奏，恭具首陳，仰瀆高穹，冒干聖聽，臣奏爲入意。

### 言功章謝罪

具位臣某，誠惶誠恐，死罪死罪，稽首再拜，上言太上無極大道至真自然，金闕下臣自以下愚，謬參大法，功無塵露，釁積丘山，俯仰慙惶，形魂罔冥。臣某誠惶誠恐，死罪死罪，伏念臣實以凡微，幸籍前福，叨逢妙化，欣荷過分，既忝真司，職主救度，雖稟性庸瞽，誓罄丹衷，迨尋慈風，服膺妙訓，見義思勇，日夜疚心。因緣所值，敢不以聞，臣奏爲入意。

### 章後

以爲效信，恩惟太上分別，《言功章》云太上衆尊省理投誠，臣愚質穢氣濁，面奏無由，此意謂凡夫穢濁，未能輕舉面奏，所以云謹因二官直使等神，蓋神馳爾，此語不可減削。謹因二官直使、正一功曹、左右官使者、陰陽神決吏、科車赤符吏、剛風騎置吏、驛馬上章吏、飛龍神龍天僊、飛真騎吏等官，各二人出操。臣所爲弟子某家，修健某道場，謹上請天官君將吏兵，拜奏三天門下某章一通，上詣太上某宮某曹某玉女，伏須告報，臣某誠惶誠恐，稽首再拜，《言功章》添死罪死罪於惶恐下以聞小臣姓名，係某州縣某觀。古儀並不用某觀焚修受業字

### 太清銜

諸章通用，疊成二寸四分，仍令字畫分曉。

太清玄元、無上三天、無極大道、太上老君、太上丈人、天帝君、天帝丈人、九老僊都君、九炁丈人、百千萬重道炁、千二百官君太清。玉陛下

### 三清銜

爲國章言用一寸二分。

太上無形無名、虛無自然、無上三

尊、金闕七寶。玉陛下

年號

太歲甲子年月朔 日甲子某時，於醮壇中拜上。

《玄都律》所載章忌

戊辰、戊戌日不可上章。戊爲天門，辰爲地戶。戌將狗，辰將龍。遇戊，中宮土神。其日，太上諸君丈人，對校天下男女，生死善惡。龍遊五嶽，狗行河梁，中黃大神，備守天門。犯者，大神攝人魂魄。若戊辰、戊戌，卒有災殺。欲祈告者，但正心端坐，思過悔責，上天懸知，當爲寬停。候吉日，上章表，無不如願。

消灾保命延筭章

此乃杜天師所修，今依藏中《宣慈助化章》錄出。

即日稽首列詞，但弟子某獲以凡微，承稟道化，命係皇極，炁降九天，具神毓質，荷恩無極。而立身履行，失性任情，福眇過深，罪目盈貫，一旦灾極，拯護無門。伏惟道惟仁慈，好生濟物，洗心首露，積咎可原。又恐弟子某前

代今生，行藏所犯，六情十惡，日造愆非，三業十纏，累增結縛，沈淪網罟，自解無由。又恐九世七先，億曾萬祖，宿有違犯，連遠子孫。又恐命籍之中，五行遷革上，天度之內，九曜躔移，有所照臨，成其灾厄。又恐祖世以來，居官理務，賞罰失宜，民陷冤辜，俗嗟酷暴，怨恨呪詛，致結禍原。又恐住宅之內，土木興工，侵傷觸犯，違天地之炁，乖緯候之常，神明所責，成其灾厄。拊心静想，惶懼無涯。若涉巨川，罔知攸濟。惟一心歸命，求乞表章，上奏九天，以自分解。臣謹爲拜章上聞，上請南上君官將百二十人，治蒼果宮，主爲弟子某開天門，益壽命。又請壽命君官將百二十人，治安昌宮，主爲某增祿延年，解灾度厄。又請南昌丹秩君官將百二十人，治列庫宮，主爲某還著生年，脫下死籍，解罪咎於酆都之府，列姓名於曆紀之中。又請明堂絳宮君官將百二十人，治城炁宮，主爲某增生年，益壽算。又請天公君一人，衛郎三萬九千人，主爲某解患過厄，衛其生炁。過厄

乃度厄也。科云過度三灾八難，人多疑之，常有改易不是。又請玉曆素女千二百人，衣赤衣，主爲某收三魂，拘七魄，調理五藏六腑，安三萬六千神，洗除疾厄，延年益算。又請周玉君官將百二十人，治地理宮，主爲某致百二十生炁神，衣赤帟天衣，仗節制三魂、拘七魄，常不離身，扶衰度厄，延年益算。若某命在水中，水官轉而出之。命在地中，地官出之。命在火中，火官救之。命在木中，木神護之。命在冢墓，開而拔之。命在刑獄，破而釋之。命在拘攝，決而赦之。命祿將盡，續而益之。命祿已衰，扶而救之。即使疾厄不侵，灾橫不起，年算長遠，以爲效信，恩惟太上云云。

遷拔章

但弟子某即日奉詞，自惟宿福，屬值休明，大道流行，三洞垂教，至真大聖，拯護天人，得以凡微，崇奉正法。伏蒙太上大道、諸君丈人，垂慈蔭覆，累世以來，常荷福祐。今竊慮億曾萬祖，先亡近逝，家親眷屬，所薦亡靈，在生之日，及積劫因緣，種種所爲，無邊

罪咎，未蒙原赦，難得超升，輪回九幽，受對長夜，或在泰山岱宗二十四獄，北都羅酆三十七獄，八卦五方九幽大獄，及天地水府百二十司所在州縣陰官冥府之中，或在王官之下陰陽水火風刀考官曹屬之內。若非大道，亭毒之施，遷拔無由。但弟子某忝爲後嗣，追慕摧殞，若上爲下，夫爲妻者，可減此二句，止云但某恐某人云云。若欲用此意者，須得改正，不可全用此等字。恐亡人某冥冥夜府，不睹光明，往返輪迴，苦毒難處。是敢披心瀝懇，歸向法門，仗大慈之恩，求乞章表，解釋罪惱，拔度魂靈，詞情懇至，實切哀憫。臣謹爲拜章，上聞天曹，伏乞太上老君、太上丈人、天師、女師、三師君門下五炁君等，五炁君，科云：歷啓五炁諸君，藏本亦然。或云生炁、正炁君，皆無故書。留神平省，所上章書，通行上御，乞以道炁下流，覆衣弟子某家所薦先亡近逝、一切魂爽。臣謹爲上請東西南北主者吏兵，一合來下，主爲弟子某家遷拔所薦亡過某，及家親外姓、一切魂靈，出離長夜九幽之府，上升八天福堂之中。又

請拔贖亡人魂魄大將軍一人、兵士十萬人，一合來下，主於九天之上，九地之下，三官之中，四時五行，泰山岱宗二十四獄之內，北都羅酆三十七獄之中，依名遷拔所薦亡過某等，男子三魂七魄，女人三魂十四魄，解散考謫，和釋冤仇，進入道宮之中、安樂之地，利佑生人，子孫平安，死生蒙福，冢墓安靜，灾害不生，以爲效信，恩惟太上云云。

#### 黃籙言功都章

古儀黃籙止拜此一章，蓋家國幽顯，皆該羅之，故云都章。

但弟子某即日稽首，列詞具言，無上正法黃籙大齋，解除生死，先身今身，身口意業，上資國祚，下及羣生，保國寧家，禳灾却禍，增祿延年，解厄除殃，拔度九祖七先、一切魂爽，濟度存亡，惠及幽顯。謹齋十方鎮信，本命紋繒，油燭香花，諸供養具，證質丹誠，奉詞以聞。因臣行道，懺悔首謝，新罪宿愆，斷絕殃咎，濟度存亡，詞情丹倒，丹赤也。倒，顛倒。理在可申。臣謹率同法都講道士某等幾人，謹依下元黃籙簡文靈

僊科品，於某處設玄科之式，法天象地，以齋主弟子某家所齎金龍繒綵，施鎮十方，祈天請命，救度存亡，共相罄勵，刷心靜念，塗炭稽顙，歸命至真，以祈所願。三日三夜，九時行道，九遍誦經。以某日清旦爲始，登壇行事，合一十八時，祈請功成事立，謹即言功。解壇散席，投金龍於山水。丹書檣札，以奏言於靈壇。伏地拜奏黃素朱章一通，上聞九天。伏惟太上無極大道元始天尊、太上道君、太上老君、太上丈人、無上玄老、十方自然、靈寶天尊、已得道大聖、衆至真、諸天丈人、太帝天帝、玄中大法師、天師君，曲聆所奏，垂憫丹心。如蒙上御，乞勅典者，宣告十方。五老上帝、五嶽真仙、三官九府百二十曹、十界真靈，拔度弟子某家九先七祖，有緣無緣，冤親平等，一切幽爽，並令開度，得出長夜九幽之中，升入南宮，冠帶枯骨，反體生華，轉輪漏盡，化生福門。乞所在土地，營衛屍形，復神反舊，與景冥合。弟子某家前生今世，一切罪咎，並乞除蕩，和釋冤仇，度厄消

災，延生保命，存亡開泰，眷屬安寧。上願七曜圓明，二儀永固，陰陽調順，九穀豐盈，國富人歡，天下康泰，六合清靜，帝祚延長，疫毒消殄，善瑞日臻，克保元吉，永銜道恩。謹遷修齋所請

天仙兵馬、飛仙兵馬、真人兵馬、神人兵馬、地仙兵馬、日月星宿兵馬、九宮五帝兵馬、五嶽四瀆兵馬、三河四海兵馬，各九億萬騎。監齋直事、侍香金童、散花玉女、五帝直符、傳言奏事飛龍騎吏、臣等身中內外真官、靈寶官屬、守宮、宅將軍、此間土地里域真官、三界神祇，凡屬監臨衛護，宣通召命，營衛齋事，有功勤者，一切嚴裝，隨臣今章，上詣仙都，列受功賞，謁言真宮，進品上仙，加爵進一作帶秩，隨品署職，一作真高下等級，皆令崇達，一如太真之儀。臣等學法未備，俯仰之格，教中有俯仰節奏之格，專明朝謁拜跪之儀。進止犯科，不合儀式。恐四司所糾，五帝所執，千愆萬過，乞蒙赦宥，哀原未悟，不見罪罰。臣等身中五體真官，受功事訖，各還官府。使臣等學道得道，求真得真，一作仙

永爲真人，古儀無此句與三光七曜五炁長存，以爲效信，恩惟太上衆真分別云云。操臣所爲某家修設無量下元黃籙大齋，三日四夜，露請事竟，解壇遷職，復諸天位，重明功德，進拜黃素朱章一通，上詣三天曹云云。

為國祈祥章新添

即日稽首列詞，伏聞河圖已兆，克彰經緯之文；心畫既成，以通神明之德。皆聖道之昭格，至彝倫之叙陳。況皇天佑下而作之君師，宜百姓戴后而同乎日月。自天保之詩作，而下知報上；至洪範之極建，而福以錫民。屬當清裕之時，宛異鴻荒之世。重念齋主某既弗知於日用，孰仰答於天休，共懷衛社之忠，敢效封人之祝。今則恭修寶供，謹按冲科，請命高穹，歸心大道，敬求章表，上奏三天。臣猥以凡微，獲參祕奧，立功爲本，爲國居先，謹爲伏地，拜奏黃素朱章一通，上聞天曹，伏丐太上無極大道元始天尊、太上玉宸元皇道君、太上老君混元上德皇帝、太上丈人、天師、女師、三師君門下

五炁君等，留神平省，小臣所上章書，流以道炁衣覆，衣字，去聲。傳云：大道衣被萬物。感降真靈。臣謹爲上請營星君一人、官將百二十人，治洛逆宮，主逐捕羣兇，以安萬姓。又請日月天兵十萬人，衣赤幘紅衣，主理陰陽，辟斥寇盜。又請日男君千二百人，衣白衣，主祛伏逆人，革心順化。又請萬姓君一人、官將百十人，治和山宮，主伏天下之人，心腹不正、爲惡逆者。又請東西太白君官將百二十人，治九天乾宮，主制伏姦惡、好爲狂孽謀議者。又請人庫兵士二十萬人，搖天動地君、無上九炁君兵士，各十萬人，主攝制姦兇，捨逆從順，寶向王化，稽首闕庭，永釋戈矛，以息邊患。伏願聖躬和暢，睿算綿長，盛德邁於唐虞，神化高於文武，衍靈源於銀漢，隆大本於玉京，俾熾而昌，曰壽而富，徧中外官僚之品，懷忠良正直之心，然後風雨時而百穀豐登，灾癘消而萬民康乂，早諧恢拓，永保升平，以爲效信，恩惟云云。

分解冢訟章

三丈六尺，每行十七字。弟子下已空字數，臨時隨宜加減，足成十七字，免有遷動全本。

章信

黃素三十六尺，

紫羅命繒三十六尺，

丹砂一兩，銀刀一口長五寸，

命錢三貫六百文，祿米一十二升，

槐黃紙百二十張，上色筆一對，

上色墨一笏，薰陸香一兩乳香。

謹啓天曹地府冥司衆官，伏按正

一明科、天師儀典，大道垂法，濟護羣生，千二百官章，拯度存歿，十方衆聖，咸所證知。今弟子某所陳詞悃，欲冒哀憐。竊慮上世以來，先亡後逝，訴訟生人所在陰官冥府之中，神趣鬼趣之內，或有溺死之訟、燒死之訟、傷死之訟、絞死之訟、獄死之訟、囚死之訟、徒繫死之訟、折傷墮落死之訟、棒杖死之訟、毒藥死之訟、虎狼齧死之訟、產乳死之訟、自縊死之訟、自刎死之訟、損胎死之訟、被殺死之訟、雷霆震擊死之訟、精魅所惑之訟、強盜劫掠死之訟、

久病不痊死之訟、疫癘傳染死之訟、卒死之訟、饑餓死之訟、寒凍死之訟、熱渴死之訟、魘死之訟、瘡病死之訟、中惡死之訟、霍亂死之訟、癰疽死之訟、浮腫死之訟、壓死之訟、疾病不救死之訟、老死之訟、少死之訟、孤死之訟、獨死之訟、鰥死之訟、寡死之訟、客死之訟、露死之訟、死無棺槨之訟、屍骸不埋之訟、骸骨不合之訟、鳥獸殘啄之訟、焚屍之訟、漬骨之訟、車馬踐轢之訟、鑿掘穢汙之訟、已葬之訟、未葬之訟、葬非本墓之訟、葬不穩便之訟、葬犯禁忌之訟、地氣衝激高下四方之訟、七祖父母中外六親九族互相牽引之訟、育子不養之訟、有男女不舉沒爲奴婢之訟、同姓之訟、異姓之訟、無宅之訟、有宅之訟、有後之訟、無後之訟、責怒之訟、悲傷之訟、奄忽之訟、有寵愛之訟、有冤讎之訟、爭伐之訟、殺活之訟、慙負之訟、約誓之訟、呪詛之訟、枉濫之訟、死後受詰之訟、受考責之訟、受徒繫之訟、受謫役之訟、受二十四獄三十七獄罪報之訟、求寬赦之訟，如此

等訟，各有條領。若溺死之訟，訴其沉淪水符，屍形霑濕。燒死之訟，訴其髮膚焦灼，皮肉剥爛。傷死之訟，訴其身形殘毀，流連瘡血。絞死之訟，訴其繩約緊急，氣息壅閉。獄死之訟，訴其械鎖攀攣，不得解脫。囚死之訟，訴其囹圄幽嚴，道理不暢。徒繫死之訟，訴其枷杻在身，謫役苦劇。折傷墮落死之訟，訴其筋骨摧碎。棒杖死之訟，訴其身被考掠。毒藥死之訟，訴其腸胃潰爛。被虎狼齧死之訟，訴其肌膚噉食。產乳死之訟，訴其腸裂腥臊。自縊死之訟，訴其官私所逼。自刎死之訟，訴其所爲敗露。損胎死之訟，訴其未睹光明。被殺死之訟，訴其宿有冤對。雷霆震擊死之訟，訴其犯忤神明。精魅所惑之訟，訴其心思不正。強盜劫掠死之訟，訴其宿債未償。久病不痊死之訟，訴其沈滯困劇。疫癘傳染死之訟，訴其親戚不往，無人救療卒死之訟，訴其大限忽至，不通醫治。飢餓死之訟，訴其胃腑空虛。寒凍死之訟，訴其戰慄冰凍。熱渴死之訟，訴其炎赫

焦爛。魘死之訟，訴其精神怖悸，邪鬼制伏。瘡病死之訟，訴其寒熱顛倒。中惡死之訟，訴其暴病卒急，意不得伸。霍亂死之訟，訴其飢飽勞役，榮衛翻錯。癰疽死之訟，訴其皮膚膿血，臟腑潰爛。浮腫死之訟，訴其氣脉癢症，身體胖脹。壓死之訟，訴其筋骨糜潰。疾病不救死之訟，訴其不遇良醫。老死之訟，訴其筋骨疲頓。少亡之訟，訴其年志未成。孤死之訟，訴其幼無蔭覆。獨死之訟，訴其老無依托。鰥死之訟，訴其隻形難處。寡死之訟，訴其離別悲孀。客死之訟，訴其懷鄉隔越。露死之訟，訴其形無覆蓋。死無棺槨之訟，訴其體親土壤。屍骸不埋之訟，訴其不歸蒿里。骸骨不合之訟，訴其肢節分張。鳥獸殘啄之訟，訴其永失肌膚。焚屍之訟，訴求補復。漬骨之訟，訴求高燥。車馬踐轢之訟，訴其受害而與人異。鑿掘穢汗之訟，訴求遷移。已葬之訟，訴求修理。未葬之訟，訴求墳墓。葬非本墓之訟，訴求里域。葬犯禁忌之訟，訴求解謝。葬不

穩便之訟，訴求改移。地氣衝激高下四方之訟，訴其處所更相轉動。七祖父母中外六親九族互相牽引之訟，訴其生人違背恩紀。育子不養之訟，訴其天性忍害，不得生成。有男女不舉，沒爲奴婢之訟，訴其屈抑。同姓之訟，訴其宗枝散蔓，遞相疏隔。異姓之訟，訴其結托婚姻，中途背義。無宅之訟，訴其靡有所歸。有宅之訟，訴其補葺。有後之訟，訴無恩養。無後之訟，訴絕祭祀。責怒之訟，訴人侵欺。悲傷之訟，訴多阨枉。奄忽之訟，訴不獲詞。有寵愛之訟，訴其慕戀不斷。有冤讎之訟，訴其恃勢難言。爭伐之訟，訴其銜恨不了。殺活之訟，訴其所報不明。慙負之訟，訴其心有所慊。約誓之訟，訴其恩愛不絕。呪詛之訟，訴其忿怒盟誓。枉濫之訟，訴其情理不雪。死後受詰之訟，訴要生人作證。受考責之訟，訴要生人充替。受徒繫之訟，訴要見存拔贖。受謫役之訟，訴要生人求救。受二十四獄、三十七獄罪報之訟，訴要生人追拔。求寬赦之訟，訴要

生人功德。種種等事，各有訟言，並是怨結莫伸，因爲引注，將生人名字，訴於鬼官，連逮子孫，未有解絕，其人亡後所興諸訟，皆由不能自認，求對生人。大略雖合八十一訟，其中枝葉散蔓，變成百千萬種。又有生爲愆非，死受謫罰，湯煮火灼，風刀雷駭，負石鑿山，轉江壅穴，如此之目，復有百千萬條。悉由命歿之後，訟引子孫，更相攝對。又有陰司伏匿，幽冥訟逮，或值時不理，患難逼身，不勝哀憂，心悲口毒，劇言怨語，呼天喚地，辱罵光景，穢觸神祇，事徹幽明，皆由訟考。又恐立身醜惡，造業無量，犯諸科律禁戒，悉入考目。百年、五十年、四十年、三十年、二十年、十年、五年、三年、二年、一年、一月、一日、一時，積考相加，衆罪併集，歿命之後，餘考不息，纏綿累積。宿世以來，先亡後死，於此諸條，恐有負犯，受考之日，不自甘承，引鬼呼神，尤天怨地，上下遺殃，終不解釋。或有臨民理務，枉劾無辜，殺人取財，阨人受賂，因公行私，狼戾暴虐，離人骨肉，

奪人種親，破人和合，絕人恩愛；或信任邪佞，讒賊六親，持上逼下，怨酷競生，呪禱鬼巫，厭伏良善，拘收魂魄，禳鎮精神；或起土興工，犯諸禁忌，毀損堂廟，侵觸神明，穢黷靈蹤，真神責怒。如此罪考，轉爲注訟，亦無極數。又恐弟子某七祖以來，復有陰罪陽過，生罪死過，表裏沈鬱，內外積咎，無德無恩，不仁不孝，欺妄詐僞，非人所行。天地所不容，人神所共弃，命歿三官，皆被對罰，罪罪相及，世世結固，終無止息，魂爽難伸，不堪荼毒，亂訴鬼官，求引生人，代其罪苦。然幽司雖明，亦有曲佞，或聽理鬼言，檄召充對，致令弟子某累年灾厄，頻歲凶衰，夢想光怪，錢財耗散，營求不遂，告訴無門，向臣求乞，分解冢訟，墓注口章，救拔亡魂，解脫冤對。仰惟大道，聖功莫測，而以人爲軌迹遷訛，是敢唯罄丹衷，竭誠懇禱，依科遵奉，謹齋黃素、丹砂、錢米、紙筆、書刀、紋繒，上奏天官，以自分解。臣謹爲拜上口章一通，伏丐太上大道十方衆聖敕以典者，省理小臣所爲弟

子某，分解先亡後死冢墓注訟之氣，令使注訟消滅，屯害潛靜，人鬼異路，死生永隔。謹上請天官君將吏兵，各司所主，爲弟子某厭制墓氣，解散殃考，降神布炁，除諸灾患。又於酆都、泰山、河海、丘陵，詣諸謫役之處，三官九府，各隨原赦檢舉，必使解釋放免。謹按太上千二百官章，並正一真人所授南嶽魏夫人治病制鬼之法，爲弟子某請太玄君五人、官將百二十人。又請都侯君五人、官將百二十人，治太清宮。又請佑護將軍兵吏，執太玄真符，攝解冢墓殃注，訟逮復連之鬼，並陰宮官等，告下弟子某，角姓冢訟，交通所屬句芒之神；徵姓冢訟，交通所屬祝融之神；商姓冢訟，交通所屬蓐收之神；羽姓冢訟，交通所屬玄冥之神；宮姓冢訟，交通所屬句陳后土之神。及丘丞墓伯、地下二千石蒼林君、武夷王、左右冢侯、地中司檄、墓卿右秩、蒿里父老、諸地里域主者，並嚴絕弟子某冢訟之氣，復注之咎。若弟子某七祖父母、伯叔兄弟、中宗外族，爰及諸家冢

墓，所在有犯，十二月建，破王衰墓，八將六對，復絕禁忌，背向不正，輔次不明，左前右後，伏屍故氣，男女命座。若爲刑禍，虛耗不息，咎害子孫者，並爲解釋和合，補復死生，咸得安寧。又請太玄君一人、官將百二十人，治女渠宮。又請九地君一人、官將百二十人，治地理宮，一合來下，主爲某分解葬埋所犯，十二月建，破王虛耗，及十二土墓冢訟之鬼，一切皆消滅之。又請都星君五人、官將百二十人，治青蓋宮。又請誅殃君五人、官將百二十人，治倉明宮。又請太白中陳明星君五人、官將百二十人，一合來下，主爲弟子某七祖以來，前亡後死，連星不斷，星死復連，十二刑禍，還流逆殺，除落死次，止妨滅殃。又請赤天倉炁君五人、官將百二十人，主爲弟子某驅斥親疏遠近，及有異姓訟逮諸凶惡之鬼。又請無上高倉君五人、兵士十萬人，主收五墓之鬼，傷死來往，病祟生人。又請四明君官將百二十人，主消散考訟之鬼、不正之炁，致不安穩者。又請天昌君黃衣

兵士十萬人，主收弟子某家中百二十殃怪，及中外強殍十二月建刑殺之鬼。又請收神上明君官將百二十人，主收坎坷不寧、惡夢錯亂、魂不守者。又請蓋天大將軍一人、兵士十萬人，主爲弟子某辟斥故氣，斷絕注訟之鬼，却死來生，却禍來福。又請太白君十萬人，都官從事，考對殺君，各有種數百千萬人，一合來下，主營衛奉道弟子某之身，及家門眷屬，却死籍，注生名，斷絕祖世中外亡人，死注惡濁之氣，並令破散萬殃之鬼，不得伺候牽引，更相注逮。若下官故氣，假托形影，導從鬼兵，協逼亡人，致使連逮家門者，一依女青玄科，收治絕滅之。又請拔贖亡人魂魄大將軍一人、兵士十萬人，主爲弟子某家，遷拔所薦亡人某，男子三魂七魄，女人三魂十四魄，解散考謫，和釋冤仇，進入道宮之中、安樂之地。乞使所請天官君將吏兵，各隨本職，爲弟子某解除亡人受謫，療理衆苦，煩害之疾，盡得平安，克使訴訟不生，殃注絕息，使弟子某家先亡後死，中宗外族，異姓親

戚，奴婢僕妾，橫暴枉濫，流亡不葬，無後嗣之鬼。凡是前件八十一訟之事，及千萬種殃考注逮等，皆各潛寧休息，不得復動，作耗爲害。若欲怨望，覘伺間隙，搆扇禍害者，當盡收斥，即使永滅，不使更生。章御之後，賜弟子某家先亡後死，七祖九先，罪蒙原赦，魂升三天，冢墓安寧，考訟平靜。當令慶流後世，子孫隆茂，仁宦高遷，學業成就，營求果合，所向開通，壽命延長，灾衰度脫，老者反少，少者不老，夢寤真正，宅宇清靜，所有疾患，必獲痊瘥，九玄七祖，上升天堂，一切幽魂，速蒙解脫，以爲效信，恩惟太上分別云云。操臣所爲弟子某家，修建某道場，上請天官君將吏，拜奏三天門下，分解冢訟殃崇，保存拔亡，祈乞恩福口章一通。

右冢訟章，所以保存拔亡，無不詳盡。凡欲拜者，更不必上遷拔章，恐成褻瀆。

已上四章，并依古儀本，並取千二百官號經契勘。所請官將、官分所主事，並無舛誤。

### 誓火章

但弟子某衆戶等，即日稽首列詞。

伏念素以凡微，久叨道化，勞生汨沒，多積過尤。伏恐州縣之內，鄉井之中，居室聚落之處，深慮火灾，起於不備，有此兢惶，無門禳謝。伏聞正一大法、天師寶章，救度羣生，消穰厄運，至于天灾疾疫、水火旱蝗，聖力可以消穰，保安兆庶；靈僊可以救度，滅滅妖邪。是敢一心歸命，上憑大道，乞賜保護。臣不勝所見，謹爲弟子某等拜章，上聞天曹，伏丐太上老君、太上丈人、天師、女師、三師君門下五炁君等，留神平省，小臣所上章書，通行上御，乞以道炁下流，覆衣弟子某等之身，洗除疾厄，延年益筭。臣謹爲上請北上天官玄冥君一人、官將百二十人，主爲弟子某等家，除去東西南北四面八方火精之鬼，入地千尺，光怪不生，滅滅邪祟，保護州縣，及住居之內，灾癘無侵。又請北方壬癸水官、亥子將吏、河伯水源君、龍王官屬、玄武將軍、衛兵將吏百千萬衆，一合來下，主爲弟子某等家，收捕火



精之鬼宋無忌等，送壬癸水司，誓令禁止，使州縣之內，及弟子某等住宅之中，火災不起，怪異消除，境域安寧，鄉原肅靜，人口安泰，宅宇清吉，各保富饒，所向遂心，以爲效信。

### 文昌章

但進士某等，即日稽首列詞。伏念素以百官子孫，生長浮俗，因緣幸會，得遇道化，天地與之。蓋載師父，示以訓提，學禮學詩，爲儒爲士。五常要道，多昧於修行；三綱大倫，寧無於違犯。功輕毫末，過累丘山，日往月來，積瑕未滌，淵冰是懼，首謝無階。但以家本讀書，業當應舉，情由闇昧，智行不圓，日暮雖勤，亨衢尚壅，身名未遂，責望益深，不有請祈，曷伸志願。然念窮通有命，富貴在天，作善斯獲降祥，至誠而後能動，敢憑精禱，用罄純誠，思立善功，少圖寸進。而某等善雖修而未深，過欲伸於改悔，誓當恪遵訓誡，改往修來，以迓殊祥，以全儒行。竊聞元始出教，演二十七品齋科，流布人間，廣行善誘，方便弘濟，接引不遺，能

使枯朽之質，道生成之宜；頑鈍之資，發叡明之操。緣恃至恩，妄希亨變，詣臣自訴，求乞表章。臣以才薄，不明真奧，不勝所見，元元之情，理在可申。謂見此元元祈禱者，不勝激節，言無以及也。元元者，衆也。臣謹爲拜意，上聞天曹，伏丐太上老君、太上丈人、天師、女師、三師君門下五炁君等，留神平省，小臣所上章書，通行上御，俾茲儒術興行，才能並進，詩書發迹，文武允修，庶可使厚人倫，成孝敬，美教化，移風俗，仰副化貸之恩。臣謹依舊典千二百官章，上請夫子君官將百二十人，治紫蓋宮。又請東井清明君決，原缺一合來下，以溫潤清和英靈善爽之氣，附入進士某身中百二十節，布散肝膈之內，回心更意，洗濯五臟，安定神靈，衛其真氣，祛三尸，滅九蟲，除僞定真，去濁就清，背死向生，却禍來福，令使進士某等心志開通，曉達聖理，便利文筆，學業有成。次請五經孔氣君一人、官將百二十人，治九奇宮，主爲進士某等開通心志，受言不忘，智慧圓明，與衆有異。次請天王玉女

千二百人，衣青衣，主爲進士某等部領萬官，賜以印綬，運爲舉動，能通神明。又請玉曆素女千二百人，衣赤衣，主爲進士某等收錄魂魄，來附身形，紀姓名於玉曆玄中，注壽筭於丹書之上。若進士某等干望科名、圖謀成遂者，則上係列宿主之，乞告下南斗文昌宮東壁圖書府，賢良之宿、爵祿之司，並爲垂象宣精，舒光絢彩，善瑞臨照，寵錫科名。若進士某等願捧鄉書、利佑貢舉者，則陰有神靈主之，乞命職貢舉靈應神祇所在土地，聰明正直，並爲臨視文闈，覆考行藝，選掄高下，示以公平，使進士某等學行日新，休祥萃集，進取有準，場屋無虞，金榜有名，玉堂紀善，萬願成遂，百祿攸宜，清白傳家，公忠許國，書種不絕，儒風未振，以爲效信恩惟。

### 圓封

言功章改云三境元尊，內外函亦然。

太上無極大道  
高功全銜臣謹內封  
金闕老君玉陛下

方函

黄素朱章謹上詣

高功全銜臣謹外封

太清至尊玉陛下

木匣

用明黃絹或綾，作袋一隻，如其長廣。袋上縻

以帶作封頭，令高功於上作符印。

黄素朱章一木匣，上詣上清天樞

院，伏乞僊曹，引進太清至尊玉陛下。

高功銜不稱臣謹護封

每見有作兩重、三重木匣者，雖曰

精緻，然操伏朱章之時不欲久。木匣  
重疊，火力未能卒到，伏章既事而後，  
盡於人情為未安不。若木匣為善，又  
有以蠟封緘者，尤為犯禁。蓋藝紙不  
欲以然燈燭，況章奏乎？何者蠟近火  
則浸漬染汙也，豈可以世間所用，一例  
施之。

道門定制卷之一

道門定制卷之二

西蜀道士樸庵呂元素集成  
朱陵真隱性齋胡湘龍編校

表狀章詞紙並高一尺二寸

九皇御號

洞真大道金闕自然高真大聖元始

天尊金闕下

元始以一炁化生三才，於龍漢初劫，說洞真之  
道，開化人天，為萬道之祖。

洞玄大道玉宸元皇道君大聖靈寶

天尊金闕下

道君降生鬱芬天國，受教於元始，於赤明劫，  
說洞玄之道，開度衆生。

洞神大道金闕玄元老君大聖降生

天尊金闕下

老君始自開闢，歷為帝師，於開皇劫，說洞神  
之道，受元始教命，降生商周，開導衆生。

開天執符御曆含真體道昊天玉皇

上帝玉陛下

玉皇即朝廷圓丘所尊昊天上帝，是謂造物者  
也。真武降言，吾侍衛玉帝，唯見通明殿中，紅雲鬱

勃，即上帝臨御也，未嘗得瞻帝容焉。

上宮紫微天皇帝玉陛下

句陳口中一星，曰天皇帝，其神曰耀魄，實  
主御羣靈焉。

中天紫微北極大帝玉陛下

北極有五星，中一星為紫微大帝，又曰北辰，  
故云居其所而衆星拱之。四星為輔，出度受正。

承天效法厚德光太后土皇地祇

后土，即朝廷祀皇地祇於方止是也。王者所  
尊合上帝，為天父地母焉。

九皇請表

具高功全銜臣某，上言聖號金闕下，臣  
奏為鄉貫奉道齋主名家，伏為略入意以某日  
幾時，就某處開壇，命臣某等修建某道場  
一會，取某日子丑時，設某醮一座，延降上  
真幾分位滿散，今則祇嚴壇壝，肅舉科  
儀，臣猥以凡庸，謬參法錄，職司救度，  
仰輔生成，凡有投誠，敢不上達。臣誠  
惶誠恐，稽首頓首。臣欲望曲垂聖鑒，  
俯察凡情，擴大造以哀矜，傾慈光而降  
格，式副人天之望，肆覃家國、幽顯之休，  
庶使醮功，克諧圓滿。臣無任瞻天望聖  
激切屏營之至，謹具表奏請，以聞臣某  
誠惶誠恐，稽首頓首，謹言。

年號 月 日，具高功位臣某 上表

內簽上

小臣某奏為奉道某家，修建某道場，奏請聖駕事。

可漏式

聖號金闕下 具高功銜臣某謹封

方函式以次表狀，可漏方函做此

請表一函上詣

聖號 御前

具高功銜臣某謹封

九皇請狀

醮事九皇，奏請止作一張，只用此式，內簽同前。

具位全銜臣某。

伏念臣某恭參寶籙，叨克治官。告盟之初，約當敷揚妙道，拯護羣生。凡有投誠，寧容寢絕。臣今具奏鄉貫居奉道某家，伏為入意至滿散，今則華壇已備，祕範初行，仰望天慈，俯賜臨幸，須至奏聞者。

右臣某謹具狀冒罪，奏請聖號，伏候敕旨。

年號 月 日，具高功全銜臣某狀

請符命狀 拜章通用

具高功全銜臣某。

右臣某冒罪，奏為鄉貫居奉道某，入意同前至滿散。臣忝列真司，職當救度，謹為所薦亡過某，及一行亡魂、六道等眾，奉行太上符命，金籙白簡，及雲篆符誥，以伸拯救。切慮亡者，冥責未除，拘留夜府，無由解散，有妨濟度。謹錄狀上奏元始，具全銜金闕下伏望特軫宸衷，允臣所奏，敕下東岱嶽府，徧告地水二司，應干合屬去處，特為亡過某等，赦原罪犯，咸與惟新，盡赴道場，領霑功德，更冀布流道炁，覆護簡符，庶使有司，悉知遵奉。臣某干冒天威，不任惶懼之至，謹狀。

年 月 日 具高功全銜臣某狀

申天樞院狀

若消災等醮，却減去女青詔書四字。

具高功全銜某，不稱臣。

右某謹據，意同九皇表，至滿散。今則肅嚴壇墀，初舉科儀，奏事九清，必關樞府。謹先發請聖表狀幾函，仰干通進，載惟天師立教，俾使奉行。凡所文

移，必資仙職，謹錄狀奏聞天樞院，使三天扶教，正一輔玄，靜應真君。伏望聖慈，特為敷奏，所有章詞等，俟行道事竟，委當直等神，齎詣仙府申聞。其當壇合行女青詔命、都省文牒，欲乞俯憐凡昧，密假威光。凡所申嚴，俾知遵奉。見已祇嚴醮席，佇降真旂，仰冀降臨，證盟修奉。某干冒威靈，不任惶懼之至，謹狀。

年 月 日 具高功全銜某狀

申五師狀

具高功全銜不稱臣。

右某申為鄉貫居奉道某，入意同符命狀，至滿散。見已肅啓熏場，宣揚科範，謹錄狀申請靈寶玄中大法師、靈寶經師、靈寶籍師、靈寶度師、靈寶監齋大法師，伏望聖慈，特迂雲馭，俯降道場，敷奏詞誠，廉察齋事，庶使凡情上達，幽顯蒙恩。干冒聖威，某不任惶懼之至，謹狀。

年 月 日具高功全銜某狀

申三府狀

具高功全銜不稱臣。

右某申為鄉貫居奉道某，入意如前狀，至滿散。今則肅舉壇儀，導迎仙馭，徧請天皇狀云諸天上帝、日月星辰、上元天官、黃籙應感天府威靈，地皇狀云中元地官、下元水官、山洞靈嶽谿河江海水府威靈、九壘九幽地司眾聖，人皇狀云歷代人王帝主、得道神仙、祀典神祇、虛空主宰，某恭露天人皇內祕靈文，以伸延召。謹錄狀奏請玉虛上帝、甲子天皇君，一通寫甲申地皇君，一通寫甲寅人皇君。伏望聖慈，俯憐凡昧，迂景分光，熏被天書，俾通上界，下界、幽顯徧關眾聖，同降道場，庶使幽明，俱蒙恩造。干冒聖威，某無任惶懼之至，謹狀。

年 月 日 具高功全銜某狀

申東嶽狀 拜章通用

具高功全銜不稱臣。

右某謹據鄉貫居奉道某家，入意至滿散

憑仗齋功，專以追薦亡過某，及家親外姓，六道等眾，以祈濟度。見已嚴潔壇場，崇奉高真，歲行法事。伏按黃籙、玉匱明科，廣度幽爽。除已具奏玉清宮，乞降符命赦宥外，謹具狀申聞東嶽天齊

仁聖帝，伏望聖慈，鑒察凡情，俯降道場，證明修奉。仍乞體行符命，告下有司，釋放亡魂，來臨法會，庶令幽爽，得遂超生。干冒聖威，某不任惶懼之至，謹狀。

年 月 日 具高功全銜某狀

逐時通進狀

黃籙大齋所。

照會當所，今為奉道某家，修建道場，以今某法事，謹發某文，字若干函，上詣太上御前，須至申聞者。

右謹具申上清天樞院，伏乞省錄，特為通進，謹狀。

年 月 日 具高功半銜某狀

角封

狀申：上清天樞院 高功半銜某謹封

請眾真狀式

如火星、真武、文昌、東嶽，及諸等醮，合用尊狀請者，依此式。

具高功全銜不稱臣。

右某今為鄉貫居奉道某，略入意，至滿散。

今則肅舉壇儀，導迎仙馭，謹錄狀奏請聖號，伏望聖慈，矜憐凡昧，迂景分光，

俯降道場，證明修奉。干冒聖威，某不任惶懼之至，謹狀。

年 月 日 具高功全銜某狀

預下抽魂牒申東嶽狀

具高功全銜不稱臣。

謹據入意，至滿散。專為亡者某，及上

世先靈，家親外姓，一切亡魂等眾，建作功德，以伸薦拔。切慮所屬治司，未知亡者，已當祇受太上開度之恩，拘留亡魂，見受罪對。謹合具一行亡人姓名、死年月日，徧關冥司，摻括外須至申聞者。

右謹具申東嶽天齊仁聖帝殿下，伏乞聖慈，告下有司，合屬去處，依名檢放亡者，盡與暫停冥責，俟道場開壇，

奏請太上，原赦符命，續具關申，以憑濟度。某干冒聖威，不任惶懼之至，謹

狀。

年 月 日 具高功全銜某狀

申南極鍊度狀 此狀於奏簡時申發

具高功全銜不稱臣。

右某謹申為鄉貫某家，入意至滿散。專

為亡者，奏奠金籙白簡，以伸濟度。今則薦度功德，已遂圓諧，謹撥所薦亡者

某等，敬詣朱陵火府，祇受鍊度，謹具狀上申南極長生大帝、南斗六司真君、回骸起死真君、監生大神，伏乞聖慈，仰體元始符命，特為開流火之庭，鍊度亡者，俾蒙恩造，受化更生。干冒聖威，某不任惶懼之至，謹狀。

年 月 日 具高功全銜某狀

### 諸司文牒

#### 都牒

若用三界牒，使此式。若止用都牒請聖者，使後式，更不復用此白紙寫牒。

太玄都省行壇，牒當處里域真官：若在觀，云當觀護道龍神。

據鄉貫居奉道，入意如前，至滿散。今則潔備華壇，歲行法事。竊慮天人異致，凡悃難通，塵世誼卑，有諸觸犯，須至移文者。牒仰詳察事意，疾速奏達上穹。伏乞分遣仙官，監臨齋事，仍仰肅靜壇場，欽迓景輿，毋致稽緩，有觸天威。齋事告成，不忘效信，故牒。

年 月 日

牒 當處里域真官朱書

高功銜

天師銜

牒皮面式

實

高功銜

謹封

牒皮背式

其他皆同此式，只換所牒神名。

太上都省行壇，牒當處里域真官：牒三界等同。

#### 都牒

用白紙寫。若土地，已令抽魂，故不再牒。若消災，則添土地等神。

太玄都省行壇，牒三界功曹、四直使者：

據鄉貫居奉道某，入意如前，請表至滿散。

今則華壇已備，祕範初行。竊慮聖凡有隔，精意難通，塵世誼卑，有諸觸犯，須至移文者。牒仰看詳事意，速舉雲程，遍通三界，延降高真上聖，俯臨塵世華壇，即為奏傳，佇回昭報。仍仰肅靜壇場，欽迓景輿，無致稽緩，有觸天威。醮事告成，不忘效信，故牒。牒後如前

上界牒用白紙寫

太玄都省行壇，牒上界直符使者：

據鄉貫居奉道某，入意如前，至滿散。今

則華壇潔備，祕範啓行。切慮上穹遼邈，天府邃深，雲路迢遙，仙凡有隔，須至移文者。牒仰詳察事意，疾速奏達元陽之上，太虛之中，諸天上帝、日月星辰、上元天官、黃籙應感天府威靈，伏乞暫離天府，臨降道場，即為奏傳，佇回昭報。功成事就，不負效勤，故牒。牒後如前

中界牒用白紙寫

太玄都省行壇，牒中界直符使者：

據鄉貫，如前牒，至滿散。今則華壇嚴肅，祕範啓行。竊慮真司杳邈，地水幽深，凡味塵情，難獲通感，須至移文者。牒仰詳察事意，延請山洞靈嶽、谿江河海、水府靈宮、九壘九幽、地司僚屬，乞迴飈馭，俯降道場，即為奏傳，佇回昭報。功成事就，不負效勤，故牒。牒後如前

下界牒用白紙寫

太玄都省行壇，牒下界直符使者：

據鄉貫，如前牒，至滿散。今則華壇已備，祕範初行。竊慮靈司幽隱，洞府密

嚴，凡昧塵情，難獲通感，須至移文者。牒仰詳察事意，延降歷代人王帝主、諸廟福德神祇、得道神仙、虛空真宰，乞迴雲輅，俯降道場，即為奏傳，佇回昭報。功成事就，不負效勤，故牒。牒後如前。

**預行抽魂牒**用黃紙寫

太玄都省行壇，牒當處土地里域主者：

當壇恭奉玉帝敕命，佐天行化，濟度幽冥，凡有投誠，理宜關報。今據入意，專為三官九府、北都羅酆、九幽諸獄、城隍嶽瀆、泉曲寒庭、三塗五苦，所在治司州縣陰獄，一切未諧，出離死魂，九泉六道等衆，申奏三天門下，奉行元始符命、金籙白簡，傳授九真妙戒，用伸薦度，當壇見戒，敕有司肅嚴壇壝，剋日奉行。尚慮諸司，未知有此奉道之家，歸仗玄門，欲求薦拔。今合具所薦亡過某，及家親異姓，一行亡人等，姓名、死年月日，預行摺括，以憑濟度，須專告諭者。牒仰詳此事由，疾速關報，應于合屬所在冥司，預行拘抽，

未遂受生，一切魂魄，及九泉六道等衆，各請逐處主者，遞相催促，盡行追究，暫停幽閉，恭俟晝降元始符命，疾除罪簿，落滅惡根，出離幽關。仍仰專一，防護解赴。今來所建黃籙、盟真寶壇，所在城隍司一處收管，祇聽召請，押赴道場，領霑功德。仍請丁寧約束，經由關津等處，不得妄生邀截，以副太上好生之德。牒到奉行，故牒。牒後如前。

**女青抽魂牒**

牒奉敕，多做官誥體寫。若用正法中所載敕字，尤為典實。所有寫敕字呪文，具于後，切在至誠，用黃紙寫。

太玄都省行壇，牒當處土地里域等神：

告聞泰山岱宗、三官九府、嶽瀆酆都、地府水司、城隍社廟、八大魔王部屬，應于拘留，亡人去處。據鄉貫，入全意，至滿散。今竊慮所薦亡過某，及家親外姓，六道等衆，生存之日，積諸冤咎；亡歿之後，執對前非。今建寶齋，廣伸薦拔。恐拘所屬，未獲出離。須仗元始符命，詔出陰關。今具抽拔事

件：

修齋某家，所薦亡過某，及家親外姓亡人等，並逐一開具姓名、死年月日在前，隨牒追抽，務令依名，盡行釋放。若預下牒，用此則云。

修齋某家，已於幾月幾日，具所薦亡過某，及一行亡人等姓名，預行追抽去訖。今道場開啓，仰依前來姓名，盡行釋放。

所薦亡人某等，內有生前素積善功，或承歿後追修、已得受生者，仍下功德案，關照施行。如未受生，重有罪對，亦當遵奉，今來詔牒，特與赦原。

三界輪迴，修羅道、五姓人道、地獄道、餓鬼道、畜生道等衆，務令所屬溥行，放赦應期，同屆道場，領霑功德。

當壇恭準此一項，皆以朱書。元始符命，女青律條，許令告下十方無極世界、三官九府、百二十曹，應于合屬去處，依法抽拔七祖先靈、一切逝者，男子三魂七魄，女人三魂十四魄，早離風刀、三塗五苦之中，升度南宮，及胎更生，克得道真，以副太上好生者。牒奉

太上慈亡人某等，宜令所屬靈官，特與宥罪，疾速撥赴某大齋所，領霑度命功德。仍仰所在治司，不得妄生障礙。牒至準慈，故牒。牒後如前。

城隍牒用白紙寫

太玄都省行壇，牒城隍社令主者：

據入意，至滿散。當壇專為亡者，建作薦拔功德，除已備奏三天門下，乞賜原赦亡人罪咎，並關報合屬冥司，摻檢魂魄，合行聚集，祇聽呼召外，須至移文者。牒具如前，仰詳察前件事意，候諸處押到亡魂，並行聚集。俟當所豎太微神旛，召請之夜，廣差神吏，押赴寶壇，準此奉行，毋致違戾，故牒。牒後如前。

五路牒用白紙寫

太玄都省行壇，牒地界主者八方大神：

據鄉貫居奉道某家，以今月某日，值某之辰，修建某道場。今已潔備華壇，恭行法事。竊慮所薦亡過某，及一行亡人等，山河阻隔，分野異同，所歷關津，妄生遏截，須至移文者。牒仰詳察事

意，大關方隅，接引亡魂，來臨法會。仍仰所在關津主者，遵奉救度科法，毋致妄生障礙。牒到奉行，故牒。牒後如前。

童子牒用白紙寫

黃籙大齋所。

當所今月幾日幾時，填開壇發奏時候，奏聞玉清宮，奉行金籙白簡、救苦真符一牒改云長生靈符若干面，拔度一牒改云亡人某等，靈魂出離者。一牒改云牒具如前，仰承領上件白簡，徑詣十方無極世界，一牒云南方丹天世界一依符命，疾速施行，故牒。

年 月 日 時發

牒地府、火府齋簡童子

高功銜

發奏文字引目

所有發章，引須添：若有下官故氣，遏截章文，不使上達者，押赴天一北獄，依律定罪，以明天憲一節。

黃籙大齋所。

今為奉道某家，申發文字若干。函封印全，起至某官府投進，須至出引者。

右關某官吏，交領上件奏文，徑詣投納雲程，不請住滯。

年 月 日 時引

高功法師姓

女青牒中慈字呪

聚形慈

散形一 玉清 上帝 一 上清 大帝 一 太清 大帝 一 四門 一 五  
大輪王都天大法 六甲將軍 北極七  
主金木水火土 九天 十方護 元尊神 輔  
右 八人 元君 法神王 帝勅  
弼 金剛

道門定制卷之二

### 道門定制卷之二

西蜀道士樸庵呂元素集成  
朱陵真隱性齋胡湘龍編校

樞密使特行尚書、吏部都檢校、太傅、同中書門下平章事、修國史、上柱國臣王欽若奏。

右臣欽若，今奉聖旨，送降到羅天醮分科儀，令臣再詳校者。

伏以蕭香上達，冀表於精誠；真聖下臨，必期於通感。既真科之紛糅，伊道教以因仍，方屬叡明，允修祕奧。伏惟皇帝陛下，道惟稽古，言必則天，奉百神於圓丘，尊七祖於清廟，闢上清之僊宇，崇昭應之福庭。會真之宮，檢介丘之玉牒；太寧之館，闕方澤之黃琮。羅天之醮交修，金錄之齋繼建，尚慮科儀舛誤，品位參差，爰命羽衣，載刊寶秩。仍令迷昧，復備討論。仰受德音，虔遵詔旨。臣今已修整列羅天聖位九卷，並修到羅天科儀，集成一卷，標于卷首。但慙凡目，竊覘真階，奉天

徒仰於紫清，測漢莫窮於僊統，上遵宸宸，稍備朝修。其羅天科儀，品位共十卷，謹同上進。伏乞宣付崇文院三館都監劉崇超繕寫十五本，裝褫送臣處，用道藏印縫訖，降下會真、太寧、上清、太清、太平宮等處，庶令崇奉，永薦福祥，謹具奏聞，謹奏。

#### 批答

省奏具之。朕祇荷靈休，欽崇妙本。在宥萬國，冀底於阜康；懷柔百神，用延於貺施。惟宏開於真館，當嚴奉於齋科。願藏室之所傳，備存昔範；俾羽人之參校，庶協精心。申命輔臣，重加閱視。卿博通學府，研味道樞，既緝簡以斯成，爰削章而來上，恭勤所至，嘉尚良深，所奏知餘，依依三日。

#### 御製科教師賜紫孫虛白論奏獻錢

#### 馬事

凡修齋醮，奏獻錢馬，止以質誠效信，通達真靈。若分位稍多，即諸事有闕。古法但焚柴割髮，奏幣飛章，酌水獻花，冥心懇禱。由此觀之，奏紙之法，亦不假多而獲福，止在至誠矣。按

《道藏》，三錄齋者，上元金錄齋，帝主修奉，展禮配天，罷散設普天大醮三千六百分位；中元玉錄齋，保佑六宮，輔寧妃后，罷散設周天大醮二千四百百分位；下元黃錄齋，臣庶通修，普資家國，罷散設羅天大醮一千二百百分位。右三錄齋升降次第，及聖真位號，乃大中祥符年，詔推忠協謀同德佐理功臣丞相王欽若重修定，頒下在京宮觀，並天下名山福地收掌，以備朝廷修奉，或大臣為國，亦許修設，庶人不許奉修。又近降皇帝本命，及天寧節，逐年七次。藩方節鎮修建金錄道場，罷散設醮三百六十分位止。聖位具載新降科儀，永為定式。

靈寶道場，即消災遷拔拜章、奏獻

錢馬儀式，一百二十分止。

靈寶天公齋，及四十八壇小醮，奏

獻錢馬：

二十四分、三十六分、四十二分、六十分、七十二分、百二十分止。

右件儀式，并約科典，及朝廷新頒儀範，并令式節文，簡要排次，以便修



奉，不可過此數也。又安正一天師本命存修法云：奏紙一分，當用好紙畫馬一匹，僦一人而已，代形一人不畫口。由此觀之，今所奏錢馬，亦未合儀格，徒有費用，適以招譴爾。又世人多奏妝畫龍鶴星像、天地神祇，此尤迷謬之甚。徧檢經科，未有此式。大羅寥廓，上聖尊崇，一念纔興，隨機赴感，豈多奏錢馬而獲福佑邪？古人設法，惟以表信孝心，懺愆贖過，使人有信向之誠，又不可不奏獻也。惟明哲之士，詳而行之。僦，去念切，侍從也。

### 九皇進狀式

奉道具位 臣姓某，信錢，從馬，龍車。

右臣謹謹上進以聞，謹進。

年 月 日 奉道具位 臣姓某狀

### 圓封式

聖號 金闕下奉道具位 臣姓某狀進謹封

方函式 不使臣字

進狀一函謹上詣  
上清天樞院引進 高功半御姓某謹封

### 衆真獻狀式

奉道具位 姓某，信錢從馬若干分。  
右謹奏上聖號，伏望真慈，俯賜鑒納，謹狀。

年 月 日 奉道具位 姓某狀

圓封式 衆真狀同式，止云狀謹封

聖號 奉道具位 姓某狀奏謹封

羅天等醮聖號。

### 黃籙羅天一千二百分聖位

第一狀 五分，玉虛上帝衆真

玉虛上帝 出《玉清祕籙》

無上玉帝 出《三洞珠真》

太微玉帝 出《金闕八景朝會圖》

太微天帝 出《無上祕要》

少微太帝 出《無上祕要》，已上並稱真慈，

後同。

第二狀 三分，三寶帝君門下

清微天寶君

禹餘靈寶君

太赤神寶君 右出《三洞神籙》

第三狀 九分，九天上帝門下

鬱單無量天帝

上上禪善無量壽天帝

梵監須延天帝

寂然兜術天帝

波羅尼密不驕樂天帝

洞元化應聲天帝

靈化梵輔天帝

高虛清明天帝

無想無結無愛天帝 右出《玉清祕籙大有

金書》

第四狀 五分，太陽朱明上帝衆真

太陽炎極朱明上帝

皇天上清金闕帝君

混沌太无玄生高上虛皇帝君

蒼靈太光扶搖帝君

青真金闕梵行後聖帝君 右出《金闕八

景朝會圖》

第五狀 八分，東方八天帝門下

太皇黃曾天帝

太明玉完天帝

清明何童天帝

玄胎平育天帝

元明文舉天帝

上明七曜摩夷天帝

虛无越衡天帝

太極濛翳天帝

第六狀 八分，南方八天帝門下

赤明和陽天帝

元明恭華天帝

耀明宗飄天帝

竺落皇笏天帝

虛明堂曜天帝

觀明端靖天帝

玄明恭慶天帝

太煥極瑤天帝

第七狀 八分，西方八天帝門下

元載孔昇天帝

太安皇崖天帝

顯定極風天帝

始皇孝芒天帝

太皇翁重浮容天帝

無思江由天帝

上揲阮樂天帝

無極曇誓天帝

第八狀 八分，北方八天帝門下

皓庭霄度天帝

淵通元洞天帝

太文翰寵妙成天帝

太素秀樂禁上天帝

太虛無上常融天帝

太釋玉隆騰勝天帝

龍變梵度天帝

太極平育賈奕天帝 右出《無量度人經》

第九狀 十六分，先天聖母元君衆真

先天太后太一元君 見青羊宮碑，及《實

錄》，又太清詞云：太一元君掌列仙，故冠位首，乃

玄妙玉女混元帝寄胎降生，升天爲太一元君。唐明

皇尊封先天太后，本稱先天聖母元君，常見稱爲先

天元后者，未知所據，故併書之。

聖母元君

無上雌一帝真九光聖母

高上虛无玄元混化初真聖母

三天陽魂太極聖母

朱光洞陰二景聖母

三素洞陰太微聖母

大有空洞混沌化素靈妙生神聖母

九華空洞元陽飛生聖母

太陰神光玄極青帝聖母

無上極真太虛天皇聖母

元陽九元鬱靈皓真聖母

北極交靈瑤光太皇聖母

虛無元皇九天絕空聖母

萬炁絕冥紫光列紀聖母

三天真母上元夫人 右出《金闕八景朝會

圖》

第十狀 五分，太一三昧元君衆真

九天無量太一三昧元君

上元九華安妃 兩號出《大羅九天圖》

九炁素生元妃

東華靈妃

大洞迴元羽真 右出《金闕八景朝會圖》

第十一狀 四分，上清青童君衆真

上相方諸宮青童君 即東華木公上相青

童君

上宰西城總真王君

上保太丹宮南極元君

上傅白山宮太素元君 右出《太平經》

第十二狀 四分，四極真王門下

東極真王扶桑大帝

南極真王丹陵大帝

西極真王素靈大帝

北極真王洞陰大帝 東極、南極，即東霞

扶桑、丹陵大帝，舊本乃兩位，今而爲一，況於四極真王內重奏。

第十三狀五分。天真皇人衆真

自然大仙天真皇人

九老仙都君

九炁丈人

天帝君

天帝丈人右出《金闕八景朝會圖》

第十四狀五分，靈寶五師門下

玉京山應供靈寶玄中大法師

上古經師君

上古籍師君

上古度師君

靈寶監齋大法師按《道藏》，玄中主教，

昔老君亦莅此職，當位列三師之上，三師乃經法授受之師耳。

第十五狀三分，三元帝君門下

上元真都元陽七寶紫微宮總主上

真自然太聖賜福天官

中元太陰洞耀元君赦罪地官元虛

洞靈皇帝君

下元金靈洞陰太帝解厄水官洞真

太皇元光皇帝君右出《金闕八景朝會圖》

第十六狀八分，二皇五老帝君門下

甲子天皇君

甲申地皇君

甲寅人皇君右出《洞神乾監河圖醮法》

東方安寶華林青靈始老青帝九炁

天君

南方梵寶昌陽丹靈真老赤帝三炁

天君

西方七寶金門皓靈皇老白帝七炁

天君

北方洞陰朔單鬱絕五靈玄老黑帝

五炁天君

中央玉寶元靈元老黃帝一炁天君

五靈五老即五方五帝。舊本重奏，今按《中盟赤書自然錄》，靈威仰即青帝字，青帝注筭，餘皆同。

第十七狀十一分，十一大曜真君門下

日宮太丹炎光鬱明太陽帝君

月宮黃華素曜元精聖后太陰元君

日月二宮，出《金闕八景朝會圖》

東方木德始陽青皇上真道君歲星

真君

南方火德丹靈赤皇上真道君熒惑

星真君

西方金德太素少陰白皇上真道君

太白星真君

北方水德太冥陰元黑皇上道道君

辰星真君

中央土德祖炁中皇上真道君鎮星

真君

交初羅喉神首建星真君

交中計都神尾墜星真君

天一紫炁道星真君

太一月孛曙星真君右出《五斗醮》，並

《上清二景七曜儀》

第十八狀十分，十神太一真君門下

五福太一真君

天一太一真君

地一太一真君

四神太一真君

大遊太一真君

小遊太一真君

君棊太一真君

臣棊太一真君

民棊太一真君

直符太一真君右出《太一醮儀》

第十九狀十一分，北斗中星君衆真

北斗中高上玉皇尊星君

北斗中玄卿大帝

北斗陽明太尉府天蓬貪狼星君舊

作天英，今正之。

北斗陰精上宰府天内巨門星君舊

作天任，今正之。

北斗真人司空府天衝祿存星君舊

作天柱，今正之。

北斗玄冥游擊府天輔文曲星君舊

作天心，今正之。

北斗丹元斗君府天禽廉貞星君舊

本不誤

北斗北極太常府天心武曲星君舊

作天輔，今正之。

北斗天關上帝府天柱破軍星君舊

作天衝，今正之。

北斗洞明外輔星君

北斗隱光内弼星君 右出《河圖内篇》、

《九元醮儀》

第二十狀 十分，乾元聖母九皇夫人門下

北陰乾元大聖母

北斗元斗宮中魁精玄上真皇夫人

太星玄樞君

北斗玄魁宮中靈精上玄真皇夫人

元星北台君

北斗上精宮中靈妃元皇九極夫人

貞星上真君

北斗綱極宮中上靈神妃華皇夫人

紐星璇根君

北斗靈開宮中北上金蓋中皇夫人

綱星天平君

北斗紫極宮中安上晨華元皇夫人

紀星命機君

北斗運天宮中玉華靈皇夫人關星

元陽君

北斗帝席宮中左皇夫人

北斗上尊宮中右皇夫人 右出《河圖内

尤經》，并《五星空常訣》

第二十一狀 十分，南斗太帝衆真

南斗大帝長生大君

好生韓君丈人

注生大司馬

南斗天府司命上相鎮國真君

南斗天相司錄上將鎮嶽真君

南斗天梁延壽保命真君

南斗天同益筭保生真君

南斗天樞度厄文昌鍊魂真君

南斗天機上生監簿大理真君

南斗火鈴大將軍 右六星，出《南斗經》，

餘依舊例

第二十二狀 六分，東斗六陽星君門下

東斗陽度星君 東斗陽昌星君

東斗陽巨星君 東斗陽惠星君

東斗陽廣星君 東斗陽輝星君

第二十三狀 六分，西斗六陰星君門下

西斗陰燾星君 西斗陰受星君

西斗陰領星君 西斗陰筭星君

西斗陰召星君 西斗陰考星君

第二十四狀 七分，中斗七太星君門下

中斗大魁星君 中斗大理星君

中斗大籍星君 中斗大訓星君

中斗大申星君 中斗大固星君

中斗大濟星君 已上並出《金闕八景朝會

圖

第二十五狀 八分，三界五天大魔王門下

無色界大魔王 色界大魔王

欲界大魔王 青天大魔王

赤天大魔王 白天大魔王

黑天大魔王 黃天大魔王 右依舊儀

第二十六狀 六分，北帝四聖真君衆真

北極天蓬大元帥

北極天猷副元帥

北極翊聖黑殺儲慶應感保德真君

右出《神霄列象圖》

北極真武佑聖太一福神靈應真君

北宮擎羊使者

北宮陁羅使者右出《七元圖》

第二十七狀 二十一分，玉清上元真宰衆真

玉清上元真宰 玉清真宰上相

洞真左玄上宰 洞真右玄上宰

洞真左玄上相 洞真右玄上相

洞真左玄上卿 洞真右玄上卿

洞真九天金闕丈人

洞真太虛上真僊統

洞真金闕上僊侍郎

洞真金闕僕射

洞真玉虛僕射

洞真紫府侍郎

洞真玉清大監

洞真玉清大丞

玉清宮總真都司君

第二十八狀 十八分，洞玄左真上宰衆真

洞玄左真上宰 洞玄右真上宰

洞玄左真上相 洞玄右真上相

洞玄紫府道統 洞玄玄都大卿

洞玄紫府上相 洞玄玄都上相

洞玄左真上卿 洞玄右真上卿

洞玄玉虛侍郎 洞玄紫微大夫

洞玄紫微大監 洞玄紫微真令

洞玄極僊正都護

洞玄玉宸大丞

洞玄玄都大丞

洞微宮總僊都司君

第二十九狀 三十三分，洞神太極上相衆真

洞神太極上相 洞神太極真伯

洞神太玄上僊統

洞神三天護法都帥

洞神九天大兵統

洞神太微僕射

洞神太極僕射 洞神木部尚書

洞神火部尚書 洞神金部尚書

洞神水部尚書 洞神土部尚書

洞神太微護兵大卿

洞神極真益筭大卿

洞神紫府上僊大卿

洞神太極上僊大夫

洞神三天斬妖護尉

洞神碧虛上僊卿

洞神九天保命上僊監

洞神紫微七政大監

洞神金闕盟威大監

洞神扶桑暘谷大監

洞神太極上僊監

洞神玄都僊令大監

洞神太極僊府兵錄

洞神九天護府司直

洞神九天雲霧大監

洞神紫府校尉

洞神六虛明真監

洞神八極僊都護尉

洞神北極大監

太極宮總神都司君已上並出《大羅九天

圖

第三十狀 三十三分，紫微垣衆星君門下

紫微垣：帝座二星即天皇大帝、北

極大帝

太子星君 庶子星君 後宮星君

四輔星君 勾陳星君 五帝內座

星君

天柱星君 六甲星君 華蓋星君

御女星君 柱史星君 女史星君

尚書星君 大理星君 陰德星君

陽德星君 天牀星君 天一星君

太一星君 東蕃左樞星君

東蕃上宰星君 東蕃少宰星君

東蕃上輔星君 東蕃少輔星君

東蕃上衛星君 東蕃少衛星君

東蕃少丞星君 西蕃右樞星君

西蕃少尉星君 西蕃上輔星君

西蕃少輔星君 西蕃上衛星君

第三十一狀 二十一分，太微垣衆星君門下

太微垣：

五天帝座星君 太子星君

從官星君 三公內座星君

九卿內座星君 內五諸侯星君

幸臣星君 謁者星君

虎賁星君 郎位星君

內屏星君 常陳星君

東蕃左執法星君 東蕃上相星君

東蕃次相星君 東蕃上將星君

東蕃次將星君 西蕃右執法星君

西蕃上相星君 西蕃次相星君

西蕃上將星君 西蕃次將星君

第三十二狀 三十五分，天市垣衆星君門下

天市垣：

帝座星君 候星星君 官者星君

宗正星君 宗人星君 宗星星君

斗星星君 斛星星君 列肆星君

車肆星君 市樓星君 屠肆星君

帛度星君 南海星君 燕星星君

東海星君 徐星星君 吳越星君

齊星星君 中山星君 九河星君

趙星星君 魏星星君 河中星君

河門星君 晉星星君 鄭星星君

周星星君 秦星星君 蜀星星君

巴星星君 梁星星君 楚星星君

韓星星君 宋星星君

第三十三狀 七分，東方七宿星君門下

角宿天門星君 亢宿天庭星君

氏宿天府星君 房宿天駟星君

心宿天王星君 尾宿天雞星君

箕宿天津星君 心宿，即大火帝座，故曰天

第三十四狀 七分，南方七宿星君門下

井宿天井星君 鬼宿天鑽星君

柳宿天厨星君 星宿天庫星君

張宿天稱星君 翼宿天都星君

軫宿天街星君

第三十五狀 七分，西方七宿星君門下

奎宿天將星君 婁宿天獄星君

胃宿天倉星君 昂宿天日星君

畢宿天耳星君 觜宿天屏星君

參宿天水星君

第三十六狀 七分，北方七宿星君門下

斗宿天廟星君 牛宿天機星君

女宿天女星君 虛宿天卿星君

危宿天錢星君 室宿天廩星君

璧宿天市星君

第三十七狀 三十分，紫微外座衆星君門下

紫微外座：

上台虛精星君 中台六淳星君

下台曲生星君 文昌上將星君

文昌次將星君 文昌貴相星君

文昌司錄星君 文昌司命星君

文昌司寇星君 三師星君

三公星君 郎將星君

相星星君 太陽守星君

天尊星君 勢星星君 天牢星君  
天理星君 傳舍星君 閣道星君

附路星君 鈎星星君 天厨星君  
内厨星君 内階星君 八穀星君  
扶箱星君 天棊星君 天槍星君  
天戈星君

第三十八狀 四分，北極四相星君門下

北極左丞天相星君  
北極右丞天僊星君  
北極正法丞相星君  
北極天心丞相星君

第三十九狀 二十分，鄭分二十座星君門下

角亢，壽星之次，鄭分。  
大角帝座星君  
左攝提星君  
右攝提星君

招搖星君 梗河星君 帝席星君

周鼎星君 亢池星君 天田星君  
進賢星君 平道星君 天門星君  
平星星君 折威星君 陽門星君  
頓頑星君 庫樓星君 五柱星君  
四衡星君 南門星君  
第四十狀 十六分，宋分十六座星君門下  
氏房心，大火之次，宋分。  
日星星君 七公星君 貫索星君

天乳星君 西咸星君 東咸星君  
罰星星君 鍵閉星君 鈎鈴星君  
天輻星君 從官星君 積卒星君  
陳車星君 騎官星君  
騎陣將軍星君 車騎星君

第四十一狀 十五分，燕分十五座星君門下

尾箕，析木之次，燕分。  
女牀星君 天紀星君 織女星君  
漸臺星君 天江星君 天弁星君  
建星星君 天鑰星君 傳說星君  
糠星星君 農丈人星君  
杵星星君 魚星星君  
鼈星星君 龜星星君

第四十二狀

二十九分，吳分二十九座星君門下  
斗牛女，星紀之次，吳分。  
輦道星君 奚仲星君 天津星君  
河鼓星君 左旗星君 右旗星君  
敗瓜星君 匏瓜星君 天桴星君  
離珠星君 羅堰星君 天田星君  
狗國星君 天雞星君 狗星星君  
天淵星君 九坎星君 越星君  
趙星君 周星君 秦星君

代星君 魏星君 韓星君  
楚星君 鄭星君 燕星君  
晋星君 齊星君

第四十三狀 二十分，齊分二十座星君門下

虛危，玄枵之次，齊分。

車府星君 杵星星君 白星星君  
人星星君 司非星君 司危星君  
司錄星君 司命星君 蓋屋星君  
墳墓星君 虛梁星君 泣星星君  
哭星星君 壘壁陣星君  
天錢星君 天綱星君  
天壘城星君 璃瑜星君  
敗白星君 北落師門星君

第四十四狀 十五分，衛分十五座星君門下

室壁，娵觜之次，衛分。  
造父星君 王良星君 策星星君  
騰蛇星君 天廐星君 離宮星君  
上公吏星君 土公星君  
雷電星君 霹靂星君 雲雨星君  
羽林軍星君 斧鉞星君  
八魁星君 土司空星君  
第四十五狀 九分，魯分九座星君門下  
奎婁，降婁之次，魯分。

天將軍星君 左更星君 右更星君  
外屏星君 天溷星君 天倉星君  
天庾星君 天囷星君 鐵鎖星君

第四十六狀

二十一分，趙分二十一座星君門下

胃昂畢，大梁之次，趙分。

月星星君 大陵星君 積屍星君  
天船星君 積水星君 卷舌星君  
天讒星君 礪石星君 天街星君  
附耳星君 天高星君 諸王星君  
天節星君 九州殊口星君  
九旂星君 天阿星君 太陰星君  
天廩星君 天苑星君 芻稟星君  
天園星君

第四十七狀

二十二分，晉分二十二座星君門下

觜參，實沈之次，晉分。

五車帝座星君 三柱星君  
天漢星君 咸池星君 坐旗星君  
司怪星君 水府星君 四瀆星君  
天關星君 闕丘星君 參旗星君  
五井星君 軍井星君 屏星星君  
天廁星君 矢星星君 軍市星君

野雞星君 代星星君 丈人星君  
子星星君 孫星星君

第四十八狀 十五分，秦分十五座星君門下

井鬼，鶉首之次，秦分。

鉞星星君 積水星君 積薪星君  
南河星君 北河星君 五諸侯星君  
天樽星君 水位星君 外厨星君  
天記星君 天狗星君 狼星星君  
孤矢星君 天社星君 老人星君

第四十九狀 十分，周分十座星君門下

柳星張，鶉火之次，周分。

軒轅星君 御女星君 少微星君  
內平星君 酒旗星君 長垣星君  
天相星君 天廟星君 東甌星君  
天稷星君

第五十狀 九分，楚分九座星君門下

翼軫，鶉尾之次，楚分。

靈臺星君 明堂星君 左轄星君  
右轄星君 長沙星君 軍門星君  
土司空星君 青丘星君 器府星君

第五十一狀 六分，歲星所變六星君門下

歲星所變：

天槍星君 天猾星君 天衝星君

天棊星君 國皇星君 及登星君  
第五十二狀 五分，熒惑星所變五星君門下

熒惑星所變：

析旦星君 蚩尤星君 昭明星君  
司危星君 天機星君

第五十三狀 九分，鎮星所變九星君門下

鎮星所變：

五殘星君 六賊星君 獄漢星君  
大賁星君 炤星星君

絀流星君 絀春入

莠星星君 旬始星君 擊咎星君

第五十四狀 八分，太白星所變八星君門下

太白星所變：

天杵星君 天拊星君 伏靈星君  
大敗星君 司姦星君 天狗星君  
天殘星君 卒起星君

第五十五狀 七分，辰星所變七星君門下

辰星所變：

柱矢星君 破女星君 拂樞星君  
滅寶星君 繞廷星君 驚理星君

大奮祀星君 如玉帝座，舊本在五老帝君

下，乃紫微、太微、天市、天角、大火帝座，不知  
即星垣中帝座，況紫微垣帝座，乃天皇北極大  
帝，位列九皇，前後重奏者明矣。



第五十六狀 十二分，十二宮尊神門下

天稱宮尊神 天蠍宮尊神

人馬宮尊神 磨蝎宮尊神

雙魚宮尊神 寶餅宮尊神

白羊宮尊神 金牛宮尊神

陰陽宮尊神 巨蟹宮尊神

獅子宮尊神 雙女宮尊神 右並依舊儀

儀

第五十七狀 三分，三山真君門下

青城山五嶽上司九天丈人儲福定

命真君

潛山九天司命上卿保生真君

廬山九天採訪使者應元保運真君

右準元豐四年正月二十七日詔進號

第五十八狀 六分，三天大法師衆聖

三天扶教大法師正一輔玄靜應真君

女師君 嗣師君 系師君

左玄王真人 右玄趙真人

第五十九狀 十四分，九天司馬真君衆聖

九天司馬真君

九天玉輔上宰

九天四協侍宸

九天延壽益筭真君

九天度人不死真君

九天回骸起死真君

九天建生運炁真君

九天定貴續命真君

九天定祿萬福真君

九天執籙把籍真君

九天韓司主錄君

九天監生大神

九天度厄尊神

九天主女青律官 右依舊儀

第六十狀 十五分，天曹太皇萬福真君聖衆

天曹太皇萬福真君

天曹定名玉曆真君

天曹扶衰度厄真君

天曹消災散禍真君

天曹注生勾死真君

天曹延生保命真君

天曹司命真君 天曹司錄真君

天曹司非真君 天曹司危真君

天曹司刑真君 天曹司罰真君

天曹門下引進真官

天曹門下直日典者

天曹門下掠剩大夫 右依舊儀

第六十一狀 五分，五嶽真君門下

東嶽太靈蒼光青帝真君

南嶽慶華紫光赤帝真君

西嶽素光耀魄太明白帝真君

北嶽鬱微洞淵無極黑帝真君

中嶽黃玄太光含真黃帝真君

第六十二狀 五分，五嶽聖帝門下

東嶽天齊仁聖

南嶽司天昭聖帝

西嶽金天順聖帝

北嶽安天元聖帝

中嶽中天崇聖帝 右出《名山嶽瀆圖》

第六十三狀 十分，十山真君門下

東嶽佐命括蒼山真君

東嶽佐命羅浮山真君

南嶽儲副霍山真君

南嶽儲副潛山真君

西嶽佐命女几山真君

西嶽佐命地肺山真君

北嶽佐命河蓬山真君

北嶽佐命抱犢山真君

中嶽佐命少室山真君

中嶽佐命武當山真君 右出《太真道典》

錄

第六十四狀 十八分，太極上真衆聖

海上廣桑山主宰太極上真出《真誥》

及《韓混事跡》

五嶽司命右弼桐柏真人王君

太玄真人東嶽上卿司命大茅真君

定錄右禁郎司命中茅真君

三官保命小茅真君

九州都僊太史兼高明大使神功妙

濟太一定命真君

玄都御史吳真君

校錄水府黃真君

西山陳真君 西山周真君

西山彭真君 西山施真君

西山鍾真君 西山盱真君

西山時真君 西山曾真君

西山甘真君 上清真人許長史右

出《僊傳》及《茅山西山記》

第六十五狀 十分，下洞天僊官門下

王屋山小有清虛洞天僊官

委羽山大有空明洞天僊官

西玄山太元總真洞天僊官

西城山三元極真洞天僊官

青城山寶僊九室洞天僊官

赤城山上王清平洞天僊官

羅浮山朱明燿真洞天僊官

勾曲山金壇華陽洞天僊官

林屋山佐神幽墟洞天僊官

括蒼山成德隱真洞天僊官 右出《洞天

福地記》

第六十六狀 二十四分，二十四化僊官門下

陽平化僊官 鹿堂化僊官

鶴鳴化僊官 漓沅化僊官

葛瓊化僊官 庚除化僊官

秦中化僊官 真多化僊官

昌利化僊官 隸上化僊官

湧泉化僊官 稠稔化僊官

北平化僊官 本竹化僊官

濛秦化僊官 平蓋化僊官

雲臺化僊官 澣口化僊官

後城化僊官 公慕化僊官

平岡化僊官 主簿化僊官

玉局化僊官 北邙化僊官 右出《都功

錄

第六十七狀 二十八分，長生妙感真人衆僊

碧落侍中長生妙感真人

大慈普濟永元顯靈真君

元陽趙真人

景通陳真人

觀妙李真人

李隆真人

青城山薛真人

北宮真人安期先生

青城真人洪厓張先生

石鍾山天長劉真人

學射山通怡張真人

妙通嚴真人

保和王真人

歸元爾朱真人

玉珍山妙通朱真人

正陽鍾離真人

純陽呂真人

簡寂陸先生

興世館孫真人

白鶴山虛應張真人

昇真王先生

王屋山真伯夫人孫僊姑

抱樸小仙公

王屋山真一司馬先生

茅山玄靜李先生

廣成先生杜天師

傳教譚先生

傳教饒先生 右出《總仙》、《列仙》、《拾遺》

等傳

第六十八狀 三分，三元真君門下

上元道化真君

中元護正真君

下元定志真君 右依國朝封號

第六十九狀 十五分，上元官府僊官門下

上元左都司僊官

上元右都司僊官

上元紫微宮左府主生太陽火官

上元紫微宮右府主死太陰水官

上元紫微宮中府主生死罪錄官

上元太極左宮左府主生太陽火官

上元太極左宮右府主死太陰水官

上元太極左宮中府主生死罪錄官

上元太極右宮左府主生太陽火官

上元太極右宮右府主死太陰水官

上元太極右宮中府主生死罪錄官

上元考官 上元考士 上元考兵

上元考吏

第七十狀 十二分，紫微宮十二曹僊官門下

上元紫微宮：

明真曹僊官 監正曹僊官

梵行曹僊官 靈關曹僊官

禁神曹僊官 正神曹僊官

通明曹僊官 開明曹僊官

玉都曹僊官 南上曹僊官

元功曹僊官 三靈曹僊官

第七十一狀

十二分，太極左宮十二曹僊官門下

上元太極左宮：

明梵曹僊官 威靈曹僊官

太常曹僊官 太清曹僊官

宣威曹僊官 明都曹僊官

都靈曹僊官 太儀曹僊官

明法曹僊官 考正曹僊官

明威曹僊官 九都曹僊官

第七十二狀

十二分，太極右宮十二曹僊官門下

上元太極右宮：

司正曹僊官 四明曹僊官

監天曹僊官 司殺曹僊官

盟天曹僊官 幽都曹僊官

威儀曹僊官 太陰曹僊官

下元曹僊官 監司曹僊官

監靈曹僊官 太明曹僊官

第七十三狀 十五分，中元官府僊官門下

中元左都司僊官

中元右都司僊官

中元洞空青靈宮左耐犯明晨府主

生太陽火官

中元洞空青靈宮右紂絕陰天府主

死太陰水官

中元洞空青靈宮中七非恬照府主

生死罪錄官

中元南洞陽左宗天宮左諒事府主

生太陽火官

中元南洞陽左宗天宮右宗靈府主

死太陰水官

中元南洞陽左宗天宮中靈神府主

生死罪錄官

中元北酆都右陰天宮左連宛泉曲

府主生太陽火官

中元北酆都右陰天宮右泰殺九幽

府主死太陰水官

中元北酆都右陰天宮中罪氣咸池

府主生死罪錄官

中元考官 中元考士 中元考兵

中元考吏

第七十四狀

十四分，青靈宮十四曹僊官門下

中元洞空青靈宮：

靈都曹僊官 維正曹僊官

靈威曹僊官 黃神曹僊官

洞玄曹僊官 威仰曹僊官

靈紐曹僊官 嶽正曹僊官

洞天曹僊官 元都曹僊官

通真曹僊官 通明曹僊官

儀範曹僊官 九考曹僊官

第七十五狀

十四分，南洞陽左宮十四曹僊官門下

中元南洞陽左宮：

南昌曹僊官 考筭曹僊官

太陽曹僊官 機明曹僊官

都律曹僊官 九令曹僊官

格靈曹僊官 明都曹僊官

監天曹僊官 宣野曹僊官

監令曹僊官 丘丞曹僊官

九炁曹僊官 中神曹僊官

第七十六狀

十四分，北酆都右宮十四曹僊官門下

中元北酆都右宮：

司非曹僊官 九殺曹僊官

韓司曹僊官 執正曹僊官

督察曹僊官 役考曹僊官

攝氣曹僊官 司殺曹僊官

斗加曹僊官 主繫曹僊官

司微曹僊官 九幽曹僊官

開度曹僊官 寒夜曹僊官

第七十七狀 十五分，下元官府僊官門下

下元左都司僊官

下元右都司僊官

下元暘谷洞源青華方諸宮左青元

靈泉府主生太陽火官

下元暘谷洞源青華方諸宮右九泉

寒夜府主死太陰水官

下元暘谷洞源青華方諸宮中朔單

青靈府主生死罪錄官

下元清泠左南水宮左靈劫府主生

太陽火官

下元清泠左南水宮右長夜寒庭府

主死太陰水官

下元清泠左南水宮中靈寶劫刃府

主生死罪錄官

下元北酆都右羅酆宮左開度劫量

府主生太陽火官

下元北酆都右羅酆宮右泉曲鬼神

府主死太陰水官

下元北酆都右羅酆宮中通靈大劫

府主生死罪錄官

下元考官 下元考士 下元考兵

下元考吏

第七十八狀

十四分，洞源宮十四曹僊官門下

下元暘谷洞源宮

水明曹僊官 清水曹僊官

烈火曹僊官 三明曹僊官

簡對曹僊官 水令曹僊官

明範曹僊官 洞源曹僊官

檢會曹僊官 劫諒曹僊官

從水曹僊官 洞陽曹僊官

龍廡曹僊官 機會曹僊官

第七十九狀

十四分，左清泠宮十四曹僊官門下

下元左清泠宮：

明劫曹僊官 機齡曹僊官  
水梵曹僊官 罪福曹僊官  
簡會曹僊官 從氣曹僊官  
攝靈曹僊官 召龍曹僊官  
九河曹僊官 列女曹僊官  
開明曹僊官 度魂曹僊官  
檢精曹僊官 清正曹僊官

**第八十狀**

十四分，右羅酆宮十四曹僊官門下

下元右羅酆宮：

北元曹僊官 考正曹僊官  
九科曹僊官 四極曹僊官  
幽夜曹僊官 長劫曹僊官  
芒神曹僊官 三難曹僊官  
五法曹僊官 萬諒曹僊官  
毒刃曹僊官 長夜曹僊官  
溟波曹僊官 無極曹僊官

已上並出《三元品誠經》

**第八十一狀** 十分，太一司命君衆聖

本命太一司命君  
本命建生星斗君 即生年  
本命元辰真官 即生日  
本命驛馬真官

本命生月真官  
本命生時真官

本命運氣五福真官

本命大運真官

本命小運真官

本命行年運氣神將

右依司天監會到神位，皆稱聖慈。

**第八十二狀** 九分，天翁天母衆神

天翁神君 天母神君

天男神君 天女神君

雨師霧霈神 雲師屏翳神

風師飛廉神 雷師靈靄神

電師列缺神

右依舊儀，自此狀以後，稱靈慈。

**第八十三狀** 二十二分，扶桑大帝衆靈

水府扶桑大帝 水府暘谷神王

東海淵聖廣德王

南海洪聖廣利王

西海通聖廣潤王

北海沖聖廣澤王

漢江水帝龍王 楚江水帝龍王

浙江水帝龍王 湘江水帝龍王

吳江水帝龍王 五川江水帝龍王

楊子江水帝龍王 松江水帝龍王

荆江水帝龍王

江瀆昭靈孚應威烈廣源王

河瀆顯聖靈源王 淮瀆長源王

濟瀆清源王

馬當山上水府福善安江王

采石山中水府順聖平江王

金山下水府昭信大江王

**第八十四狀** 十二分，十二谿真門下

五雲谿真 武陵谿真 苧羅谿真

桐柏谿真 崑崙谿真 岷山谿真

幡豕谿真 沔池谿真 清遠谿真

中條谿真 浣沙谿真 巫峽谿真

右依舊儀

**第八十五狀** 十七分，太湖衆神門下

太湖神 洞庭湖神

丹陽湖神 鄱陽湖神

彭蠡湖神 九海北玄君

泗洲九谷君 河侯神

河伯神 河掾神

石源水母 蓬萊都水使者

水府馮夷君 水府波神君

湖中玉女 溟泠大神

大阜江龍神右依舊儀

第八十六狀 九分，九壘土皇君門下

第一壘色潤地土皇君

第二壘剛色地土皇君

第三壘石脂色地土皇君

第四壘潤澤地土皇君

第五壘金粟澤地土皇君

第六壘金剛鐵澤地土皇君

第七壘水制澤地土皇君

第八壘大風澤地土皇君

第九壘洞淵無色剛維地土皇君右

出《度人經》第五十卷

第八十七狀 十五分，酆都大帝衆聖

北陰酆都大帝

酆都佐理太上靈君

酆都助理玄滋天君 酆都上相君

酆都太傅君 酆都東明君

酆都南明君 酆都西明君

酆都北明君 酆都鬼官北斗君

酆都三官都禁郎

酆都水官司命君

酆都右禁司君 酆都主非使者

酆都執蓋郎

第八十八狀 六分，六洞僊官門下

酆都山紂絕陰天宮僊官

酆都山泰殺諒事宗天宮僊官

酆都山明晨耐犯武城天宮僊官

酆都山恬照罪氣天宮僊官

酆都山宗靈七非天宮僊官

酆都山敢司連宛屢天宮僊官

第八十九狀 十三分，酆都諸大魔王門下

酆都山紂絕陰天大魔王

酆都山泰殺諒事宗天大魔王

酆都山明晨耐犯武城天大魔王

酆都山恬照罪氣天大魔王

酆都山宗靈七非天大魔王

酆都山敢司連宛屢天大魔王

酆都玄司重正宗虛大魔王

酆都統僊升靈希微大魔王

酆都正真邵靈宛司大魔王

酆都雲樓玉紀明朗大魔王

酆都悲歌大魔王

酆都崇虛赤映靈由大魔王

酆都皇天九平大魔王

第九十狀 十分，十王真君門下

地府大素妙廣真君

地府陰德定休真君

地府洞明普靜真君

地府玄德五靈真君

地府最勝耀靈真君

地府寶肅昭成真君

地府等觀明理真君

地府無上正度真君

地府飛魔演慶真君

地府五華威德真君

右出《太一天尊醮儀》

第九十一狀 十七分，地府司錄神君衆聖

地府司錄神君 地府司命神君

地府司功神君 地府司殺神君

地府察命童子 地府太玄童子

地府夜光玉女

北酆寒池考獄靈官

九都使者 九龍符命使者

巨天力士 三天執罰大神

期劫考官 治罪淪劫官

治天憲官 九泉治罪典者

地府五帝考官

第九十二狀 九分，神慈九宮貴神

乾宮六白神 坎宮一白神

艮宮八白神 震宮三碧神

巽宮四綠神 離宮九紫神

坤宮二黑神 兌宮七赤神

中宮五黃神

第九十三狀 五分，五方五行神

東方甲乙寅卯木神

南方丙丁巳午火神

西方庚辛申酉金神

北方壬癸亥子水神

中央戊己辰戌丑未土神

第九十四狀 十二分，社稷衆神

太社神 太稷神 土翁神

土母神 穀父神 蠶母神

播種五穀神 樹木花果神

春句芒神 夏祝融神

秋蓐收神 冬玄冥神 右三狀，並依司

天監會到神位

第九十五狀 十分，左青龍君衆神

左青龍君 右白虎君 前朱雀君

後玄武君 侍香金童 散花玉女

香官使者 騰奏火官

當處城隍主者 住宅歲德尊神

第九十六狀 九分，九州社令神

冀州社令神 荊州社令神

青州社令神 徐州社令神

豫州社令神 雍州社令神

梁州社令神 兗州社令神

揚州社令神

右出《太真道典論》

第九十七狀 十四分，通章六玉女八從事

甲子左靈飛太玄玉女

甲戌左靈飛黃素玉女

甲申左靈飛太素玉女

甲辰右靈飛拜精玉女

甲午右靈飛絳宮玉女

甲寅右靈飛青腰玉女

右玉女，出《大洞錄》

錄章從事 通章從事 校章從事

齋章從事 禦章從事 刺章從事

呈章從事 定章從事

右從事，出《都功錄》

第九十八狀 十四分，驛亭令衆神

驛亭令 驛亭丞

建節監功大將軍

素車白馬大將軍 直使功曹

正一功曹 左官使者 右官使者

陽神決吏 陰神決吏

科車赤符吏 剛風騎置吏

驛馬上章吏 飛龍騎吏

第九十九狀 十一分，虎賁狼吏衆神

虎賁狼吏 察姦鈎吏 都官僕射

天丁力士 天騶甲卒

收烝食烝吏 收神食神吏

收邪食邪吏 收毒食毒吏

收凶食凶吏 追符破廟吏

第一百狀 九分，土地真官衆神

土地真官 里域真官

上界直符使者

中界直符使

下界直符使者

年直使者 月直使者

日直使者 時直使者

已上並依舊儀

右羅天一千二百分聖真位號，或

以朝廷降本三千六百分纂成，或所在各以傳錄者，互有得失。中間乃有兩分、三分，以至數十分，合爲一分者，復有前後重奏者，以其聖號稍異，而不加

詳審故也。如東華木公上相青童君，即上相方諸宮青童君；東霞扶桑丹陵大帝，即東極南極真王；五靈五老，即五方五帝之類，未可槩舉，故取頒降本，并哀集諸所傳，遞相參考，分序刪定，終以星躔分度，莫能詳究，嘗有請於二江宗丞李中大，乃蒙分指星躔，分度示下，因成全集。其間聖位高下，班次以降，本及古儀，參詳序列。所謂前後重奏，并聖位名號所自，並隨號箋註。

洞府投龍奏狀 二十四分

上元賜福天官 玄中大法師

監齋大法師

青城山五嶽上司九天丈人儲福定

命真君

東嶽飛僊真人 南嶽飛僊真人

西嶽飛僊真人 北嶽飛僊真人

中嶽飛僊真人

王屋山小有清虛洞天僊官

委羽山大有空明洞天僊官

西玄山太元總真洞天僊官

西城山三元極真洞天僊官

青城山寶僊九室洞天僊官

赤城山上玉清平洞天僊官

羅浮山朱明耀真洞天僊官

句曲山金壇華陽洞天僊官

林屋山佐神幽墟洞天僊官

括蒼山成德隱真洞天僊官

九僊寶室洞府龍神隨所在更改

山神主者 當直功曹

土地真官 驛龍騎吏

土府投龍奏狀 二十四分

中元赦罪地官 玄中大法師

監齋大法師 土府太皇上帝

東方土府大帝 南方土府大帝

西方土府大帝 北方土府大帝

中央土府大帝

第一壘色潤地土皇君

第二壘剛色地土皇君

第三壘石脂色地土皇君

第四壘潤澤地土皇君

第五壘金栗澤地土皇君

第六壘金剛鐵澤地土皇君

第七壘水制澤地土皇君

第八壘大風澤地土皇君

第九壘洞淵無色剛維地土皇君

戊己黃神 歲德尊神 太陽竈君

太陰井神 土地真官 驛龍騎吏

水府投龍奏狀 二十四分

下元解厄水官 玄中大法師

水府扶桑大帝 水府暘谷神王

東海淵聖廣德王

南海洪聖廣利王

西海通聖廣潤王

北海沖聖廣澤王

漢江水帝龍王 楚江水帝龍王

浙江水帝龍王 湘江水帝龍王

吳江水帝龍王 五川江水帝龍王

楊子江水帝龍王 松江水帝龍王

荆江水帝龍王 江瀆廣源王

河瀆靈源王 淮瀆長源王

濟瀆清源王 溟泠大神

太守潭龍神此位隨所在更改土地真官

凡稱揚天尊，及幡上所題，不可私

意隨宜，為一時新奇，須是出諸經懺法

中方可。又如真人神君聖號，亦須僊

傳所載，及朝廷封號為正。若降筆所

傳，皆未可信，恐遭神天咎責也。樸庵



書。

消災一百二十分聖位

第一狀 九分，九天上帝門下

鬱單無量天帝

上上禪善無量壽天帝

梵監須延天帝

寂然兜術天帝

波羅尼密不驕樂天帝

洞元化應聲天帝

靈化梵輔天帝

高虛清明天帝

無想無結無愛天帝

第二狀 六分，五師天師君門下

靈寶玄中大法師

上古經師君

上古籍師君

上古度師君

靈寶監齋大法師

三天扶教大法師正一輔玄靜應真

君

第三狀 八分，三元五老帝君門下

上元賜福天官

中元赦罪地官

下元解厄水官

青靈始老九炁天君

丹靈真老三炁天君

皓靈皇老七炁天君

五靈元老五炁天君

元靈元老一炁天君

第四狀 十一分，十一大曜真君門下

日宮太陽真君 月宮太陰真君

木星重華真君 火星執法真君

金星天皓真君 水星伺辰真君

土星地侯真君 交初羅喉真君

交中計都真君 天一紫炁真君

太一月孛真君

第五狀 十五分，北斗衆真門下

北斗高上玉皇尊星君

北斗玄卿大帝 天蓬貪狼星君

天內巨門星君 天衝祿存星君

天輔文曲星君 天禽廉貞星君

天心武曲星君 天柱破軍星君

洞明外輔星君 隱元內弼星君

北極天蓬大元帥 天猷副元帥

翊聖應感保德真君

真武佑聖靈應真君

第六狀 九分，南斗衆真門下

南斗長生大帝 可韓君丈人

注生大司馬 天府司命真君

天相司錄真君 天梁延壽真君

天同益筭真君 天樞度厄真若

天機上生真君

第七狀 十四分，東方南方列宿星君門下

角宿天門星君 亢宿天庭星君

氏宿天府星君 房宿天駟星君

心宿天王星君 尾宿天雞星君

箕宿天津星君 井宿天井星君

鬼宿天鑽星君 柳宿天廚星君

星宿天庫星君 張宿天稱星君

翼宿天都星君 軫宿天階星君

第八狀 十四分，西方北方列宿星君門下

奎宿天將星君 婁宿天獄星君

胃宿天倉星君 昂宿天日星君

畢宿天耳星君 觜宿天屏星君

參宿天水星君 斗宿天廟星君

牛宿天機星君 女宿天女星君

虛宿天卿星君 危宿天錢星君  
室宿天廩星君 璧宿天市星君

第九狀 八分，九天丈人真君衆真

青城山五嶽上司九天丈人儲福定

命真君

潛山九天司命真君

廬山應元保運真君

九天大司馬真君

九天建生運炁真君

天曹太皇萬福真君

天曹定名玉曆真君

天曹門下引進真官

第十狀 十一分，東嶽青帝真君衆聖

東嶽泰山青帝真君

南嶽衡山赤帝真君

西嶽華山白帝真君

北嶽恒山黑帝真君

中嶽嵩山黃帝真君

本命生年真官 本命生月真官

本命生日真官 本命生時真官

水府扶桑大帝 地府酆都大帝

第十一狀 七分，三元四靈神君

上元道化真君 中元護正真君

下元定志真君 左青龍君  
右白虎君 前朱雀君 後玄武君

第十二狀 八分，土地真官三界四直使者

土地真官 上界直符使者

中界直符使者 下界直符使者

年直使者 月直使者 日直使者

時直使者

遷拔一百二十分聖位

第一狀 九分，九天上帝門下

鬱單無量天帝

上上禪善無量壽天帝

梵監須延天帝

寂然兜術天帝

波羅尼密不驕樂天帝

洞元化應聲天帝

靈化梵輔天帝

高虛清明天帝

無想無結無愛天帝

第二狀 六分，五師天師君門下

靈寶玄中大法師

上古經師君

上古籍師君  
上古度師君

靈寶監齋大法師

三天扶教大法師正一輔玄靜應真

君

第三狀 八分，三元五老帝君門下

上元賜福天官

中元赦罪地官

下元解厄水官

青靈始老九炁天君

丹靈真老三炁天君

皓靈皇老七炁天君

五靈元老五炁天君

元靈元老一炁天君

第四狀 十一分，十一大曜真君門下

日宮太陽真君 月宮太陰真君

木星重華真君 火星執法真君

金星天皓真君 水星伺辰真君

土星地侯真君 交初羅喉真君

交中計都真君 天一紫炁真君

太一月孛真君

第五狀 十一分，北斗衆真門下

北斗高上玉皇尊星君

北斗玄卿大帝 天蓬貪狼星君  
 天內巨門星君 天衝祿存星君  
 天輔文曲星君 天禽廉貞星君  
 天心武曲星君 天柱破軍星君  
 洞明外輔星君 隱元內弼星君  
**第六狀** 九分，南斗衆真門下  
 南斗長生大帝 可韓君丈人  
 注生大司馬 天府司命真君  
 天相司祿真君 天梁延壽真君  
 天同益筭真君 天樞度厄真君  
 天機上生真君  
**第七狀** 八分，九天丈人真君門下  
 青城山五嶽上司九天丈人儲福定  
 命真君  
 潛山九天司命真君  
 廬山應元保運真君  
 九天大司馬真君  
 九天迴骸起死真君  
 九天主女青律官  
 天曹太皇萬福真君  
 天曹直日引進真官  
**第八狀** 十分，天齊仁聖帝衆聖  
 東嶽天齊仁聖帝

南嶽司天昭聖帝  
 西嶽金天順聖帝  
 北嶽安天元聖帝  
 中嶽中天崇聖帝  
 水府扶桑大帝  
 江瀆廣源王 河瀆靈源王  
 淮瀆長源王 濟瀆清源王  
**第九狀** 十二分，北陰酆都大帝威靈  
 北陰酆都大帝 佐理太上靈君  
 助理玄滋天君 酆都上相君  
 酆都太傅君 酆都東明公  
 酆都南明公 酆都西明公  
 酆都北明公 酆都鬼官北斗君  
 酆都無鞅大力魔王  
 陰境飛雷電吏  
 地府察命童子  
**第十狀** 十四分，紂絕陰天宮仙官威靈  
 酆都山紂絕陰天宮僊官  
 酆都山泰殺諒事宗天宮僊官  
 酆都山明晨耐犯武城天宮僊官  
 酆都山恬照罪氣天宮僊官  
 酆都山宗靈七非天宮僊官  
 酆都山敢司連宛屢天宮僊官

地府五帝考官 地府巨天力士  
 三天執罰大神 地府司命神君  
 地府司祿神君 地府司功神君  
 地府司殺神君 地府牛頭獄卒吏  
**第十一狀** 十分，上元道化真君衆神  
 上元道化真君 中元護正真君  
 下元定志真君 建節監功大將軍  
 素車白馬大將軍 當旬通章玉女  
 左青龍君 右白虎君  
 前朱雀君 後玄武君  
**第十二狀** 十分，土地真官衆神  
 土地真官 騰奏火官  
 當境城隍主者 里域主者  
 上界直符使者 中界直符使者  
 下界直符使者 年直使者  
 月直使者 日直使者  
 時直使者

道門定制卷之三

皇風

三星

正天分度

天皇內象

赤書隱文

制御乾坤

天皇內象一切真靈伏乞同

天皇帝君降臨道場將冀

天皇帝君降臨道場將冀  
五星循軌  
雨耀揚光  
天降殊祥風凝和氣仰乞  
中國封域之內神符寶緒道體  
高穹綿萬寓以騰歡歌九功而  
為叙一如  
天皇帝君律令  
年 月 日高功衛 宣奏

安鎮國祚 保佑群生  
永滅灾癘 掃蕩妖氛

天皇內祕隱文上召  
天府上象一切真靈伏乞同  
天皇帝君降臨道場將冀  
五星循軌  
雨耀揚光  
天降殊祥風凝和氣仰乞  
中國封域之內神符寶緒道體  
高穹綿萬寓以騰歡歌九功而  
為叙一如  
天皇帝君律令  
年 月 日高功衛 宣奏

地 皇 內 龍 唐 凡  
巽 巽 巽 巽 巽 巽  
巽 巽 巽 巽 巽 巽  
巽 巽 巽 巽 巽 巽  
巽 巽 巽 巽 巽 巽  
巽 巽 巽 巽 巽 巽

東雷 萬 吉 贊 聖 靈 總 皆  
東雷 萬 吉 贊 聖 靈 總 皆  
東雷 萬 吉 贊 聖 靈 總 皆  
東雷 萬 吉 贊 聖 靈 總 皆  
東雷 萬 吉 贊 聖 靈 總 皆

道門定制卷之四


西蜀道士樸庵呂元素集成  
朱陵真隱性齋胡湘龍編校

雲篆符詰

三皇內象

皇 內 龍 唐 凡  
皇 內 龍 唐 凡  
皇 內 龍 唐 凡  
皇 內 龍 唐 凡  
皇 內 龍 唐 凡

地皇內祕 玉字丹書  
山川靈嶽 谿谷江河海水靈官  
九壘九幽地司僚屬伏乞同  
地皇帝君降臨道場將冀稼穡  
豐穰兵戈偃戰無山崩河決之  
害有地平天成之功次乞社令  
城隍所司疫癘不生禍災不作出先  
靈於夜府執對於司一如  
地皇帝君律令  
宣奏



人皇內文 玉字丹書  
歷代人皇帝主當境諸廟神祇得道  
神僊聖衆伏乞同  
人皇帝君降臨道場將冀政敷有教  
道泱無垠頌與熙洽之時物格純和  
之治車書混一  
禮樂興行 次乞修  
黃籙大齋某所居之內少長安寧子  
孫蕃衍家傳孝悌世習詩書永無  
兵革之驚共樂絃歌之化一如  
人皇帝君律令  
宣奏

保寧國界 佑護羣生  
屏除妖惡 掃蕩災氛  
人皇帝君律令  
宣奏



地皇內祕 玉字丹書  
山川靈嶽 谿谷江河海水靈官  
九壘九幽地司僚屬伏乞同  
地皇帝君降臨道場將冀稼穡  
豐穰兵戈偃戰無山崩河決之  
害有地平天成之功次乞社令  
城隍所司疫癘不生禍災不作出先  
靈於夜府執對於司一如  
地皇帝君律令  
宣奏

地皇內祕 玉字丹書

地皇內祕 玉字丹書  
山川靈嶽 谿谷江河海水靈官  
九壘九幽地司僚屬伏乞同  
地皇帝君降臨道場將冀稼穡  
豐穰兵戈偃戰無山崩河決之  
害有地平天成之功次乞社令  
城隍所司疫癘不生禍災不作出先  
靈於夜府執對於司一如  
地皇帝君律令  
宣奏

地皇內祕 玉字丹書  
山川靈嶽 谿谷江河海水靈官  
九壘九幽地司僚屬伏乞同  
地皇帝君降臨道場將冀稼穡  
豐穰兵戈偃戰無山崩河決之  
害有地平天成之功次乞社令  
城隍所司疫癘不生禍災不作出先  
靈於夜府執對於司一如  
地皇帝君律令  
宣奏

天皇第一百二十五、二十六兩字相合，又一百六十一、六十二兩字相合。地皇第二百十七、十八兩字相合。已上格式，並從中盟錄較勘排定。

鎮天真文出《華堂內禁度人經》

東方青帝鎮天真文

肅祿 茲 誦 誦 益  
通 能 息 之 氣 逆  
風 飛 陰 解 之 氣  
能 能 能 能 能 能

角龍負河，護世却非。真王下降，萬惡俱摧。世土永延，億劫無衰。

右雲篆，上告青靈始老九炁天君，伏願寅賓出日，光被萬方，與物為春，功均庶品，萃茲衆妙，叢祐一人。守寶曆以至仁，體乾元而不息。謹奏。

年 月 日 高功銜 宣行  
南方赤帝鎮天真文

肅 祿 茲 誦 誦 益

陰 能 風 厥 誦 惟  
通 能 能 能 能 能  
能 能 能 能 能 能

赤帝命靈，萬法開通。魔鬼滅種，世無灾凶。神符玉文，皇道永豐。

右雲篆，上告丹靈真老三炁天君，伏願聖人嚮明，萬邦作式。火王盛德，日月等乎照臨；壽祝南山，天地齊其長久。謹奏。

年 月 日 高功銜 宣行  
西方白帝鎮天真文

能 能 能 能 能 能  
能 能 能 能 能 能  
能 能 能 能 能 能  
能 能 能 能 能 能

玄女素纈，把符紫清。受命玉階，

斬伐百精。世土蕩蕩，君主晏平。

右雲篆，上告皓靈皇老七炁天君，伏願九金純粹，七炁和平，三農無害於秋成，萬國常均於兌說。后妃皇子，女御嬪嬙，承僊母之休光。龜臺紀善；協聖君之治化，鳳闕儲祥。謹奏

年 月 日 高功銜 宣行

北方黑帝鎮天真文

能 能 能 能 能 能  
能 能 能 能 能 能  
能 能 能 能 能 能  
能 能 能 能 能 能

黑靈北帝，總攝天門。消穰世土，剪滅妖氛。神霄玉書，保天無傾。

右雲篆，上告五靈玄老五炁天君，伏願高真降監，五素流光，衆星拱乎北辰，尊皇居而益固，黃鍾養乎元氣，保聖壽以無疆。謹奏。

年 月 日 高功銜 宣行

中央黃帝鎮天真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

天皇稟氣，保鎮萬方。擲火流金，昭除不祥。黃老律令，世土永康。

右雲篆，上告元靈玄老一炁天君，伏願極世界三千之廣，息陰陽百六之災，九廟僊游，億年福庇。雲行雨施，澤萬國之黎元；地久天長，增一人之聖筭。謹奏。

年 月 日 高功銜 宣行

消災真文 出《五篇真文經》

東方青帝消災真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

右雲篆，上告木德歲星重華真君，乞為奉道某家，主攝星官，正天度數，解除命運刑剋之災。願於東華之宮，降神布炁，保肝護魂。謹奏。

年 月 日 高功銜 宣奏  
南方赤帝消災真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

右雲篆，上告火德熒惑星執法真君，乞為奉道某家，主攝星官，正天度數，解除命運刑剋之災。願於洞陽之宮，降神解患，養炁守心。謹奏。

年 月 日 高功銜 宣行  
西方白帝消災真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

右雲篆，上告金德太白星天皓真君，乞為奉道某家，主攝星官，正天度數，解除命運刑剋之災。願於素靈之宮，布炁降神，靜魄安肺。謹奏。

年 月 日 高功銜 宣行

北方黑帝消災真文

𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎

右雲篆，上告水德辰星伺辰真君，乞為奉道某家，主攝星官，正天度數，解除命運刑剋之災。願於玄元之宮，布炁降神，通血守腎。謹奏。

年 月 日 高功銜 宣行

中央黃帝消災真文

𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎

右雲篆，上告土德鎮星地侯真君，乞為奉道某家，主攝星官，正天度數，解除命運刑剋之災。願於太玄之宮，布流道炁，保固黃庭。謹奏。

年 月 日 高功銜 宣行

鍊度真文 出《諸天內音玉字經》

東方八天鍊度真文

𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎  
 𠄎 𠄎 𠄎 𠄎 𠄎 𠄎 𠄎 𠄎

右雲篆，上告東方九炁天君，伏乞承元始符命，告下東方無極世界，開長夜九幽之府，為奉道某家，拔度亡人某等魂識，庶使死魂受鍊，僊化成人。謹奏。



年 月 日 高功銜 宣行

已下四方，古語並同，止換各方、某炁、某方無

極世界。

南方八天鍊度真文

南方三炁天君、南方無極世界。

𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎

堡 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎

西方八天鍊度真文

西方七炁天君、西方無極世界。

𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎

𠄎 𠄎 𠄎 𠄎 𠄎 𠄎

𠄎 𠄎 𠄎 𠄎 𠄎 𠄎

北方八天鍊度真文

北方五炁天君、北方無極世界。

𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎
𠄎	𠄎	𠄎	𠄎	𠄎	𠄎	𠄎	𠄎

# 爽靈符

中央梵天鍊度真文

中央一炁天君、中央無極世界。

齋 齋 齋 齋 齋 齋 齋 齋 齋 齋

齋 齋 齋 齋 齋 齋 齋 齋 齋 齋

齋 齋 齋 齋 齋 齋 齋 齋 齋 齋


遷神生天寶誥

太玄都省行壇

據鄉貫奉道某家，以今月某日，備列


法信文儀，就某處修設某道場，薦拔亡過某，於某年某月某日某時，以疾身亡，享年幾歲，欲乞早蒙開度，當壇依紫陽玉匱科格，請遷神生天玉篆寶誥，給付亡過某執憑受生者。

太上赦罪生天遷神玉文



告下北陰酆都大帝，十大地獄宮王、主者、僚吏，拔度亡人某，消滅大罪，塞遏邪源，形神昇度，謁帝天闕，福智自生，驂侍龍軒，真炁長存，一如玉文告行律令。

太上遷神生天寶誥玉文



告聞三官九府、百二十曹、五帝考官、天牢地牢主者，拔度亡人某，準依符

命，部衛形魂，上朝帝庭，冤仇和釋，與道合并，神昇南闕，受鍊更生，一如玉文告行律令。

太上遷神登真度命出離生死玉文




上通高清，下及太寧，天慈赦宥，

三界空冥，九幽罪魂，五道冥靈，億曾萬祖，苦爽遊精，削除罪錄，落滅惡根，速證生方，氣識充盈，超度亡人某，上登天堂，鍊質澄神，真心洞明，本性通靈，


一如玉文告行律令。

太上鍊神登真玉清寶誥玉文



九天保命延生真符，上開八門，變化上清，下通九地，三十七獄，悉停考掠，執罰法官，朝謁帝軒，宿冤赦宥，進爵受生，超度亡人某，隨品命秩，與神齊并，一如玉清寶誥奉行律令。

太上僊化成人生神寶誥玉文



超度亡人某，進爵加秩，隨品命遷，捧誥朝真，計功酬賞，超凌三界，逍遙上清，一如生神寶誥奉行律令。

右誥，付亡人某，執憑超度，符到奉行。

年 月 日 出給

高功位

三天扶教輔元體道大法天師

三府龍簡


洞府

今謹有鄉貫奉道某家，以今月某日，值某之辰，某等幾人，修建無量下元黃籙大齋。自某日歲事，至某日滿散。今則行道事竟，投簡靈山、靈潭、中宮。

願神願仙，長生度世，飛行上清，五嶽真人，至聖至靈，乞削罪錄，上格九天，請詣靈山，金龍驛傳。

太歲某年 月 日於某山洞天告聞

具位 姓某




土府

願神願仙，中皇九土，戊己黃神，土府五帝，乞削罪名，請詣中宮，勒簡太玄，金紐白信，金龍驛傳。

太歲某年 月 日於某家住宅中宮

告聞

具位 姓某




水府

願神願仙，三元同存，九府水帝，十二河源，江河淮濟，溟泠大神，乞削罪錄，上格九天，請詣水府，金龍驛傳。

太歲某年 月 日於某江某潭告聞

具位 姓某



簡皮

告聞某處洞天具位姓某 謹封

一云某處龍潭

一云住宅中宮土府

金籙白簡

篆文依藏經中本，及諸處善本校正。

元始符命，金籙白簡，救苦真符，

告下十方無極世界、三官九府、百二十曹、五帝考官、九幽地獄、巨天力士、執罰神兵、司命司錄、司功司殺、牛頭獄卒、三界大魔，拔度亡人某，出離地獄，永辭長夜，睹見光明，萬罪蕩除，冤仇和釋，承此太上九真妙戒，拔度功德，

上生天堂，一如告命。

太歲某年 月 日於某大齋中告下

救苦符散形

元始天尊太上 帝君混合鍊  
道君太上老君 神溉胞九壘

土皇空 左右奉命 紫戶定錄  
洞九朝 司馬洞謠 五昆 神府神霄

開度長夜 三靈總御 六炁咸  
陰貫陽胞 合慶幽寥 遵明梵


司命司錄 總統三靈  
司功司殺 明示都符

中理五炁 曇誦演越 九陽  
混合百神 承命三清 思化

覆靈 大明 得天 輔翼  
宥靈 合日 之精 玉帝

九幽 急急如 叩齒  
齊并 律令 三通

救苦符聚形



長生簡文

元始符命，金錄白簡，長生靈符，告下南方丹天世界、朱陵火府、南昌上宮、長生大君、韓君司馬、司命司錄、延壽益筭度厄尊神、回骸起死監生大神，超度亡過某，上登朱宮流火之庭，玉眸鍊質，黃華蕩形，名書紫策，受化更生，乘此金錄度命功德，時刻升遷，一如告命風火驛傳。

太歲某年 月 日於某大齋中告下

長生符散形



玉宸上帝  
玄照超品




合明天司  
玄中澄輪



太一右府  
左那仙府



三元  
混合



九真  
齊生



胎靈八君  
胎門八神



日月合并  
南極長生



玉宸上帝下南昌急急如律令度生急急如勅



長生帝君  
注生帝君

丹老帝君會


精帝君



三官北酆九壘重陰



九地九水皆觀光明




峨峨朱陵  
岱嶽土司



南斗上生  
飛龍驛傳

長生符聚形



二簡封皮

白簡，乃是告下十方、南方，遷拔亡人，即非給與亡者，不可上寫給付亡人某字，并不可使傳度師字。

救苦真符告下  
十方無極世界  
長生靈符告下  
南方丹天世界

高功銜 某 謹封  
高功銜 某 謹封

戒牒式

右舊本戒牒，謹按經云，以下義理，未甚貫穿。今取《九真妙戒經》，別從校定一式，庶見生者為先靈求請、傳授太上金錄度命九真妙戒壇牒。謹按《元始天尊九幽拔罪經》云，世人命過，應入九幽，黑簿書名，無由解脫。若有夫妻男女、門人同學，奉為亡者建立道場，請授九真妙戒，莫告金錄靈符，告

下地司，燒除黑簿，俾諸亡者，應時解脫，魂升南宮，因緣輪轉，得為九宮真人。今謹有奉道某家，修建某道場，請為所薦亡者，傳授九真妙戒，莫告金錄白簡，救苦長生靈符，汝宜諦聽，靜念在心，當來託生人中，持為身寶。爾時，元始天尊告宣戒言，今具于後：

- 一者敬讓，孝養父母；
- 二者克勤，忠於君主；
- 三者不殺，慈救衆生；
- 四者不淫，正身處物；
- 五者不盜，推義損己；
- 六者不嗔，兇怒凌人；
- 七者不詐，諂賊害善；
- 八者不驕，傲忽至真；
- 九者不二，奉戒專一。

牒具如前。

妙戒靈符，威禁至重，今依科出給戒牒付亡過某。佩受之後，如法修行，自有察命童子、護戒威神，隨念覆護。受戒之者，宜堅正念，永斷惡根，積善累功，以期超證。謹牒。

年 月 日 出給

傳度師高功銜

戒牒皮面

傳度師 姓名 謹封

戒牒皮背

太上金籙度命九真妙戒壇牒，給付亡人某佩受。

古儀尚簡而實，今也好奇而煩。


呂氏所校定制集，考之大藏，按諸經科，稍有窒礙，未可輕取。如遷拔傳度，古者止是九真戒牒、金籙白簡而已，出《九幽拔罪經》中，所載分明。後因行之法士，造作寶誥，倣效朝廷誥命出給，其徒以謂法官存時，曾受職品，救濟有功，故云進爵加秩，隨品命遷，捧誥朝真，計功酬賞是也。樸庵於是姑亦從之，刪定一式，補於集中，觀其前篇，講議亦詳。近來更有生天妙籙符命、公據由憑之類，多端撰造，漸失本真，趨利爭名，豈顧因果。且如九龍符命，多本異同，莫知所據。與破地獄符，仍給亡者，已承追抽詣壇，懺罪參真，受戒之後，於義未通。又見戒牒中列具，第一初真戒，敬讓，孝養父母；

第二念真戒云云，尤為可議。按經云，一者敬讓，孝養父母；二者克勤云云，具載備矣。不知初真、念真戒，乃是廣成先生所著科儀，發明經旨，啓悟幽明，却豈容混壓天尊金口所宣，相紊教法。當為講明，以告知者。恐無識之徒，飾非以自惑，亦何足怪哉。

### 沐浴符

此符朱書火化，投於浴盆中，道衆齊誦八天大梵文，法師默念三光呪，搯訣取炁，吹入浴室中，然後行儀。

太上沐浴度魂真符出《上清濟度祕法》



右奉太上符命，普為亡過某等，澡身浴德，浣濁流清，蕩除累世業愆，洗滌多生罪垢，使神魂之清淨，宜冠帶以趨朝，佩戒持經，登真悟道，一如符命，準此奉行。

年 月 日 下

高功半銜

道門定制卷之四

## 道門定制卷之五

西蜀道士樸庵呂元素集成  
朱陵真隱性齋胡湘龍編校

### 黃籙都疏

按金籙儀中都疏式作兩班，班首銜具疏言功，蓋以齋已，豈能知許多功德，今作高功銜，庶合事儀。

具高功全銜臣姓某，奏為鄉貫奉道齋生姓某，入意主所伸凡愆，干冒天威，臣高功名，謹率同法，都講道士姓某等幾人，恭按僊科，奉行法事。今者仰蒙聖恩垂佑，大願圓諧，謹具三日四夜功德，品目如後。

某日申時開壇：逐項各占一行寫

高功庭參祝香，道衆臨壇受職，  
申發三府表牒，跪受修真十戒，  
宣諭彈罰科條。

宿啓建齋：

投詞關白請師，都講敕水淨壇，  
高功關奏上真，宣啓壇建齋儀，  
監齋懺悔罪愆，宣露三皇隱文，

宣啓壇請聖詞。

某日清旦行道：

宣爲國清旦儀，出官關閱吏兵，

宣布鎮天真文，宣爲國祝聖詞，

宣爲國五段懺。

臨午行道：

宣爲國臨午詞，宣爲國禳災詞，

宣二十方懺儀。

静夜行道：

宣爲國静夜儀，宣祝祀典神祇詞，

宣爲國都懺儀。

某日清旦行道：

宣遷拔清旦儀，宣布鍊度真文，

宣薦拔亡人詞，宣遷拔五段懺。

臨午行道：

宣遷拔臨午儀，宣祝地水二府詞，

宣二十方懺儀。

静夜行道：

宣遷拔静夜儀，宣遷拔六道詞，

宣遷拔都懺儀，拜奏遷拔、冢訟朱章。

某日清旦行道：

宣消災清旦儀，宣布消災真文，

宣消災懺罪詞，宣消災五段懺。

臨午行道：

宣消災臨午儀，宣報父母恩詞，

宣二十方懺儀。

静夜行道：

宣消災静夜儀，宣祝申奏等神詞，

宣消災都懺儀，拜上消災朱章。

某日子時設醮：

高功關奏上真，出官關閱吏兵，

拜上言功朱章，宣羅天大醮儀，

延降三府衆真，三獻散花旋繞，

宣奏修齋心詞，宣奏散壇詞誠，

宣祝三府龍簡，道衆復職納簡，

辭師奉送上真。

外壇法事：

開闢五方道路，召請諸廟神祇，

召請所薦亡人，召請六道有情，

建設香湯沐浴，升度無礙法橋，

奉爲亡人懺罪，傳授九真妙戒，

奠告救苦真符，奠告長生靈符，

出給遷神寶誥，呪施甘露法食，

點懺破獄神燈，教誡九泉六道，

關祝七元星燈。

第一時，爲國祈祥，祝延今上皇

帝，聖壽無疆，道衆各持念：

淨天地神呪、淨心口神呪、

安土地神呪，

玉清元始天尊、上清靈寶天尊、

太清降生天尊、昊天玉皇上帝、

聖祖天尊上帝、上宮天皇帝、

中天北極大帝、后土皇地祇、

元天大聖后、玉清虚无天尊、

玉清大慈天尊、玉清大悲天尊

玉清太帝虚皇天尊、

玉清後聖金闕天尊、

玉清後聖瓊闕天尊、

玉清後聖太平天尊、

太平護國天尊、昌國化人天尊、

成就國土天尊、興國太平天尊、

玄都萬壽天尊、難思聖德天尊、

保制劫運天尊、海空智藏真人、

普德妙行真人，不可思議功德。

已上聖號，各持一十遍，各轉《太

上混元上德皇帝道德真經》一卷。

第二時，正天分度，消禳國界陽

九、百六之災，兵戈疾疫、水火旱蝗、饑

饉之厄，各持念：

上元日宮皇極天尊、  
中元月宮正一天尊、  
下元星宮衆妙天尊、  
運明廣照天尊、開輝保生天尊、  
日月光明天尊、清淨流光天尊、  
凝彩光華天尊、收魔滅惱天尊、  
護國永安天尊、日光真人、  
月光真人、星光真人、  
不可思議功德。  
已上聖號，各持一十遍，各轉《太上十一曜大消灾神呪經》一卷，《太上禳灾度厄真經》一卷。

第三時，奉爲普天之下，有功於國，諸廟福德正神，增助威光，保寧國界，各持念：  
玄元闡教天尊、興大福力天尊、  
慈濟永劫天尊、廣度衆厄天尊、  
大通靈應天尊、變現無邊天尊、  
妙行真人、廣信真人、  
不可思議功德。  
已上聖號，各持一十遍，各轉《太上昇玄消灾護命妙經》一卷，《黃帝陰符經》一卷。

第四時，奉爲齋官某家，所薦亡過某等，遷拔神魂，超生淨界，各持念：  
淨天地神呪、淨心口神呪、  
安土地神呪、  
玉清虛無天尊、玉宸妙道天尊、  
金闕至真天尊、太一救苦天尊、  
法橋大度天尊、廣開方便天尊、  
常濟苦海天尊、護魂無滯天尊、  
香林說法天尊、分配受生天尊、  
隨願往生天尊、逍遙快樂天尊、  
大慈救苦真人、大悲拔罪真人、  
不可思議功德。

已上聖號，各持一十遍，各轉《太上洞玄靈寶無量度人上品妙經》一遍。  
第五時，奉爲地府水府，靈司曹局，陞陟僊階，削落存亡罪咎，各持念：  
法藏瓊文天尊、慈周三界天尊、  
廣化六道天尊、龍王變度天尊、  
轉輪聖王天尊、法界應慈天尊、  
度人衆妙天尊、妙行真人、  
妙相真人，不可思議功德。  
已上聖號，各持一十遍，各轉《太

上生天得道真經》一卷，《太上老君常清靜經》一卷。

第六時，奉爲三界輪迴，九泉六道，五姓孤魄，薦度幽爽，超升淨方，各持念：  
化三途天尊、救八苦天尊、  
除煩惱天尊、超生死天尊、  
色無盡天尊、空無相天尊、  
無邊際天尊、功德海天尊、  
法解真人、救脫真人、  
不可思議功德。

已上聖號，各持一十遍，各轉《太上十方救苦妙經》一卷，《太上九幽拔罪心印經》一卷。  
第七時，奉爲齋官某一家等，消灾度厄，保命延年，各持念：  
淨天地神呪、淨心口神呪、  
安土地神呪、  
玉清降福天尊、上清常湛天尊、  
太清靈變天尊、長生保命天尊、  
消灾度厄天尊、延壽益筭天尊、  
九宮捍厄天尊、八卦護身天尊、  
金闕延祥天尊、玉書注祿天尊、

紫清介福天尊、寶策定壽天尊、自然智惠法身真人、玄妙虛無上德真人、不可思議功德。

已上聖號，各持一十遍，各轉《太上玄靈北斗本命延生經》一卷，《太上南斗六司延壽度人經》一卷。

第八時，奉為齋官某家，報答父母劬勞深重之恩，各持念：

無量化身天尊、度世聖王天尊、圓滿正智天尊、隨緣赴感天尊、遐宣道德天尊、隨功度人天尊、法解真人、太極真人，不可思議功德。

已上聖號，各持一十遍，各轉《太上真一報父母恩重經》一卷，《真武靈應真君報父母恩德經》一卷。

第九時，奉為法錄吏兵、三界雲程、申奏土地、功曹使者、里域龍神，增益威光，各持念：

真靈感應天尊、靈應無窮天尊、常增上善天尊、光顯神功天尊、和神利物天尊、功德圓滿天尊、

寶相真人、轉輪真人，不可思議功德。

已上聖號，各念一十遍，各轉《太上太清天童護命妙經》一卷，《洞玄靈寶智慧觀身經》一卷。

三日四夜吟詠法事：

啓堂頌、奉戒頌、三啓頌、請師頌、焚牒頌、焚詞頌、焚簡頌、焚牒頌、三途五苦頌、山簡頌、水簡頌、往生頌、出堂頌、還戒頌、解壇頌、回向頌、步虛詞、白鶴詞、玉京步虛詞、金闕步虛詞、玉清樂、上清樂、太清樂、散花樂、僊家樂、唱道讚、華夏讚、智慧讚、歸依讚、定坐讚、啓經讚、聞經讚、七真讚、送經讚、解坐讚、普供養讚、辭師讚、奉送讚、持衛靈呪、持上香呪、持發爐呪、持五星呪、誦屍寶章、持九曜呪、持命魔密呪、持入戶呪、

持出戶呪、發十二大念、發十二大願、禮師存念、

禮十方天尊、禮無極大道、禮三洞真經、禮靈寶真師、歎三洞經蘊、祝三皇內文、祝鎮天真文、祝鍊度真文、祝消災真文、祝金錄白簡。寶壇鎮信：

本命紋繒紫羅三十九尺、黃道絹三十六尺、十方鎮綵、十方筆墨案紙硯筭、十方龍璧、十方淨巾、十方弓旗鑑劍、命錢三貫六百文、祿米一十二升、油一十二斤、炭一百二十斤、造獻寶幡若干對。寶壇進貢：

九皇至尊，凡信錢馬龍車九分；羅天列真，信錢從馬一千二百分；

三皇，凡信三分；

諸廟神祇，錢馬六十分。道場散後，詣青城山寶僊九室洞天，投奠金龍玉璧素簡一面，設醮一



座，奏納二十四分。洞府水府，各隨所在聖迹去處改寫。

詣某州、某江、某潭水府，投奠金龍玉璧素簡一面，設醮一座，奏納二十四分。

於齋主某家住宅中宮、土府，投奠金龍玉璧素簡一面，設醮一座，奏納二十四分。

寶壇奉為所薦亡者：

出給九真妙戒牒若干道，

奠告救苦真符若干面，

奠告長生靈符若干面，

出給生天寶誥若干道，

奉上亡人等經文、陰財，各一分。

右臣謹冒罪、具疏、奏聞太上開天執符御曆含真體道昊天玉皇上帝玉陛下。

奉道弟子某，伏以入文訖，仰惟大道，俯賜證明，謹疏。

年 月 日 高功全銜臣姓某疏

黃籙羅天醮行遷拔日，為亡者作一疏，作齋官常名，全入意具薦拔日所作功德，及第四時所轉經課，後如常式。

於薦拔追亡人之時，坐前宣讀，庶有分付。夜齋疏一本，略入意具第六時所轉經課薦拔。

### 盟真大齋功德疏

或二日夜，據所行法事減削寫。

某鄉貫奉道某，入意謹具一日兩夜功德品目于後。命三洞道士某等幾人，依紫陽玉匱科格，奉行法事。

幾日申時開壇：

高功庭參祝香，申發三府表牒，

敷演智慧十戒，都講敕水淨壇。

宿啓建齋：

高功關奏上真，宣盟真啓壇儀，

都講懺悔罪愆，宣布鍊度真文，

宣啓壇請聖詞。

幾日清旦行道：

宣出官朝奏儀，宣盟真清旦儀，

初奏修齋詞誠，宣五段懺方儀。

臨午行道：

宣薦拔臨午儀，重奏修齋心詞，

宣十方懺罪儀。

靜夜行道：

宣解考行道儀，三奏修齋心詞，

宣遷拔都懺儀。

某日子時設醮：

宣冥陽大醮儀，延降三府上真，

出官關閱吏兵，

拜上遷拔朱章或冢訟。

宣設醮散壇詞，辭師奉送上真。

外壇法事：

開闢五方道路，召請所薦亡魂，

建設香湯沐浴，升度無礙法橋，

解釋三業罪愆，傳授九真妙戒，

奠告金籙白簡，宣付生天玉篆，

呪施甘露法食，點懺破獄神燈，

教誡九泉六道。

第一時，奉為所薦亡人某等，遷拔

神魂，超生淨界，道眾各持念：

淨天地神呪、淨心口神呪、

安土地神呪，

玉清元始天尊、上清靈寶天尊、

太清降生天尊、昊天玉皇上帝、

聖祖保生天尊、上宮天皇大帝、

中天北極大帝、后土皇地祇、

元天大聖后、太一救苦天尊、

九幽拔罪天尊、朱陵度命天尊、

火鍊丹界天尊、隨願往生天尊、

逍遙快樂天尊、大慈救苦真人、大悲拔罪真人，不可思議功德。

已上聖號，各念一十遍，各轉《太上洞玄靈寶無量度人上品妙經》。

第二時，奉為三界輪迴，六道有情等衆，濟度幽爽，早超淨方，各持念：

化三途天尊、拔八苦天尊、

除煩惱天尊、超生死天尊、

色無盡天尊、空無相天尊、

無邊際天尊、功德海天尊、

大隱真人、救脫真人，

不可思議功德。

已上聖號，各持一十遍，各轉《太上靈寶自然至真九天生神章經》一過。

第三時，奉為三界四直功曹、法錄吏兵、申奏官屬，增益威光，騰達章奏，各持念：

靈應無窮天尊、常增上善天尊、

光顯神功天尊、和神利物天尊、

寶相真人、轉輪真人，

不可思議功德。

已上聖號，各持一十遍，各轉《太上昇玄消災護命妙經》一過。

進貢：

九皇上真，金錢雲馭寶馬九分；

三府列真，凡信錢馬一百二十

分；奉上亡者，金錄白簡、九真戒牒、

生天玉篆，各一副，經呪、陰財，各一

分。

右方功德，並已周圓，端用資薦亡

過某，或有文於此下云云伏以云云，克承道

力，頓悟本心。隨金簡而出幽冥，遷善

遠罪；入朱陵而蒙鍊度，受化更生。

仰惟大道證明，俯賜開度。謹疏。

年 月 日 奉道姓某 疏

消災拜章功德疏 諸醮並宜換易寫

某鄉貫奉道入意，謹具功德品目于

後，命道士某某等幾人，依科奉行法事。

某日申時開壇：

高功庭參祝香，申發表狀文牒，

跪受智慧十戒，都講敕水淨壇。

啓壇建齋：

高功關奏上真，宣消災啓壇儀，

都講懺悔罪愆，宣布消災雲篆，

宣奏啓壇詞誠。

某日清旦行道：

高功關奏上真，宣消災清旦儀，

出官關閱吏兵，初奏清旦詞誠，

宣五段方懺儀。

臨午行道：

宣消災臨午儀，重奏修齋詞誠，

宣懺謝十方儀。

靜夜行道：

宣消災靜夜儀，三奏修醮詞誠，

宣二十方都懺儀。

某日子時設醮：

高功關奏上真，出官關閱吏兵，

拜上黃素朱章，宣三獻設醮儀，

延降三府上真，宣設醮散壇詞，

辭師奉送上真。

第一時，奉為某家消災度厄，保命

延生，道衆各持念：

淨天地神呪、淨心口神呪、

安土地神呪，

玉清元始天尊、上清靈寶天尊、

太清降生天尊、昊天玉皇上帝、

上宮天皇帝、中天北極大帝、

后土皇地祇、長生保命天尊、

延壽益算天尊、消災度厄天尊、

紫清介福天尊、寶策定壽天尊、  
金闕延福天尊、玉書注祿天尊、  
福生無量天尊、青羅真人、  
妙行真人，不可思議功德。

已上聖號，各持一十遍，各轉《太  
上玄靈北斗本命延生真經》。

第二時，奉為某家，解禳星運刑剋  
照臨之災，各持念：

玉清降福天尊、玉宸妙道天尊、  
金闕至尊天尊、運明廣照天尊、  
清淨流光天尊、開輝保生天尊、  
八卦護身天尊、九宮捍厄天尊，  
不可思議功德。

已上聖號，各持一十遍，各轉《太  
上十一曜大消災神呪經》一卷。

第三時，奉為三界雲程、申奏土地  
等神，增助威光，騰達章奏，各持念：

真靈感應天尊、和神利物天尊、  
常增上善天尊、靈應無窮天尊、  
神力無礙天尊、常來擁護天尊，  
不可思議功德。

已上聖號，各持一十遍，各轉《太  
上昇玄消災護命妙經》一卷，《太上太

清天童護命妙經》一卷。

進貢：

九皇至尊，凡信錢馬龍車九分；  
三府上真，凡信錢馬一百二十分。

右方功德，並已周圓，恭以崇奉聖

號，隨道場合回向者，上真列寫，不必具三清上聖。  
十極高真以下，祈禱隨宜，或有文字於此寫。某  
伏以云云，伏請大道證明，謹疏。

年 月 日 奉道姓某

道門定制卷之五

## 道門定制卷之六

西蜀道士樸庵呂元素集成  
朱陵真隱性齋胡湘龍編校

自序

定制集備於大緣，而遺於衆醮。  
奉道深信之士，以無善本考校為不滿，  
囑以後集補其遺，庶幾師門之意，義不  
可辭，爰加參考與前，集為全書，尚有  
當別，白疏于下，其如未至，有俟賢達。

齋品

廣成先生曰：齋有二十七等，備  
在三洞經中，各有品題，標明所主，世  
所修奉，今著左方。

太一齋：十神太一主之

帝王修奉，展禮配天。

九天齋：九天生神帝主之

匡護國家，保制劫運。

金籙齋：上元天官主之

保佑帝王，安人鎮國。

玉籙齋：中元地官主之

保佑六宮，輔寧妃后，上以為帝王

之齋；或大臣藩鎮，為國祈禳，亦許修奉。

黃籙齋：下元水官主之，事關上元、中元二宮。

普資家國，徧濟存亡，開度七祖，救拔三塗。

盟真齋：

宗廟遷拔，及臣下拔亡，皆可兼奉。

洞淵齋：以北帝為主。

祛除疫癘，掃蕩邪氣。

九幽齋：

然燈破暗，解救亡魂。

五鍊齋：道士修行之人滅度修設。

滅度遷神，安靈拔罪。

正一齋：傳度經籙，授法付道。

傳神傳籙，崇正除邪。

右十品齋法，皆有科儀。其餘一

十七品，詳在廣成《黃籙序事儀》中，或

雖有名題，科儀不備。復有河圖衆醮

五十壇，廣成先生皆有儀範，因事制

法，世亦罕知，常所修崇，僅有數品。

其他規範，備載藏書，大槩多解禳之

法。

河圖內篇三宮辰曜解禳星運醮：

十一曜為主

解禳災運，致福延年。

河圖元紀南北二司延生同醮：事

南北斗

延生削死，治病消災。

玄靈北斗七元延生醮：

專奉七元，凡禱必應。

祈雨九龍醮、祈求雨雪醮：

為國為民，降致雨澤。

五帝安宅醮：

鎮宅解犯，安神辟邪。

紫庭北陰醮：專奉北斗

深災重患，所向不通，人有妖邪，

宅多虛耗，仕進不利，沈冤不伸，嚴潔

功行，三醮之後，必獲異應。

河頭代命斷除復連水醮：

連年災患，後嗣夭亡，鬼祟憑凌，

先亡復連，先修章醮，保存拔亡。醮罷

行此，以十四人代形十物為誓，具舟舫

於河邊，遣送斷除，故云河頭。

消災益算醮：

上章乞恩，祈禳請禱。

正一傳度醮：

傳受符籙，保佑女男。已上並係

廣成先生修儀制法。

儲福定命醮：九天丈人為主，生日修之

丈人真君，說開天經，言人生日，

當念人身之貴，報父母之恩，修此亦知

衛生愛身之理。

更籍換按續命延生醮：

奉事東嶽，及七十二司主，病患危

急，深災重厄，請受五戒，改往從新，力

求感應。

東嶽延生醮：

專奉嶽皇，延生懺罪。

北極真武醮：

專奉真武，降福祛邪。已上並係

尉僊巢公觀制儀。

文昌祈祿醮：

祈禱功名，延致爵祿。

祈祥保嗣醮：《度人經》第四十四卷有

《祈嗣經》

祈保嗣續，疏迪慶源。

六甲保胎醮：《度人經》第三十六卷有

《保胎經》

醮告六甲六十神將，保毓胎元，克獲圓滿。

正一安墳醮：

保寧冢墓，解犯安神。

誓火禳災醮：

告謝火星，消禳回祿。

九幽拔罪醮：九幽懺法爲主

救度亡人，拔苦懺罪。

隨願往生醮：十方天尊真人爲主。

接引亡者，隨願往生。已上衆醮，

大則連宵累日，次則日夜終宵，皆可隨事上章，祈恩請命。或力有未充，事當修奉，單朝行道，亦可爲之。

靈寶洞玄自然拔亡醮：有儀

明太上自然之旨，救拔亡靈。

道士昇化遷度醮：有儀

道士滅度，薦福遷神。

上清修真謝罪醮：

道士修真，消災懺罪。

廣成先生曰：醮者，祭之別名也。

香花燈燭，果酒茶湯，降天地，致萬神，禳災禱福，兼利天下。其法出於《河圖》

龍文元化帝瑞神經》，率以涓潔爲先，精神爲本，丹心苦志，以希感通。隨所祈禳，修詞拜表，精楷典實，務在嚴恭。其或鹵莽滅裂，欺誕真聖，自貽罪譴，何福善之能致乎？勉之，勉之。

### 議壇方位

廣成先生三籙序事，皆以五方真文於啓壇夜宣布，施於五方之案，各以金龍鎮之，所以辯方正位，俟大醮言功，方收真文度祝，隨章焚奏，揚煙於青空，此實壇場之綱領。蓋行道之時，存想爲要。東西南北，各有思存，不容牽就。間有好爲異論者，以上帝所臨，皆當正北，不問堂宇向背，皆以帝座爲北方。一念之蔽，乃使天地四方易位，殊非通論，不可遵行。


### 議書章

竊見書章，多拘當日。或宮觀家居，屋宇寬敞，有幽閑之地，可令當日，清心爲之。不然，則必爲鐘鼓音聲，內外來往，潰亂于前，心境不清，何由無錯誤漏忘之失，往往至于大謬。事既逼迫，不容更易，醮主大有不滿之意，


殊爲大害。若章文非有他隱密事，可預日事靜時，令修寫點檢密封，留太清細字，當日書真，庶無錯誤，亦爲允當。雖稍戾科文，事當從權，遠勝膠柱而大繆也。

### 封章符

高功封章之時，函上書符所傳，謂之開天門符。歷考之，非也。符出六甲籙中，謂之陰陽符。如甲子屬陽，符則卓劍。乙丑屬陰，符下三畫。又出真武三陣法書所載，亦分陰陽。又有散形呪，今所書三畫，乃是陰符。章函既達天，當用陽符，不可不辯。今著于篇，與衆共曉。



陽符聚形



陰符聚形

### 陽符散形



中天飛天  
大聖捷疾

收捉陽玉玉界五  
方無道之鬼付天

一北獄依律治罪  
唐葛周三將軍  
**十** 真武將軍  
卓劍相待

陰符散形

中天 飛天  
大聖 捷疾  
收捉陰玉玉界五  
方無道之鬼付天

一北獄依律治罪  
唐葛周三將軍  
**三** 天地水  
三官敕

青詞

唐天寶四載，敕太清宮行事官，皆具冕服，停祝版，改為清詞，書於紙上。

見杜佑《通典》，唐奉老君為聖祖，置太清宮奠謁祠事甚嚴，故有此敕。逮及宋朝，真宗皇帝更以青紙謂之青詞。青青之義，各有攸始。

寶誥

寶誥出於法書，謂行法之人，生有職品，解化之後，令給寶誥，陞陟階秩。所以最後兩符云：隨品命秩，與神齊并。又云進爵加秩，隨品命遷之語。今則一例施用，頗多致疑。若亡者非是受法錄、有階品、功勤之人，合除去最後兩符為宜。

詞文式 歐陽文忠公撰

皇帝本命道場青詞

維某號某年，歲次某甲子某月、某朔

某日，某甲子嗣天子臣某，謹遣某人於某州某宮觀，開啓本命道場，三晝夜罷散日，設醮一座。謹上啓太上開天執符御曆含真體道玉皇大天帝陛下，伏以寶祚無疆，蒼穹垂佑，吉日式臨於元命，醮科爰舉於舊章，薦誠懇以惟精，延聖真而並集，仰希靈貺，敷錫眇冲，四時叶序以和平，品彙均休而康泰，無任懇切之至。謹詞。

皇帝為晉國夫人杜氏建薦拔九幽齋詞

生而有盡，是謂物常。道本無形，實資冥助。虔依僊宇，載肅淨場。追懿德之已遙，冀明靈之垂祐。

河南府平陽洞及北海水府投送龍簡詞

九區至廣，萬物類居。惟川嶽之宅靈，繫真僊之總治。載稽道祕，實有舊章，粲然玉簡之清文，宛若金鱗之瑞質。茲為鎮信，輔以精誠。伏願冲鑒昭臨，純祺錫羨，保邦家之永固，均動植以蒙休。

詞文止欲簡要，前集已詳言矣，今

取歐陽公三詞載于此，庶可矜式。又黃籙詞文，三奏九奏，皆不能該及家國、幽明、鬼神六趣。頃者二江范公禮部設大供，始取九時誦經所為事，作九詞，逐時分奏，雅合儀軌。今取啓散等全文，刊行并注其所取於道經者，以備有取法云。出儒書者，士夫自知也。

黃籙詞文

啓壇

芝壇肅敞，藥笈飛華。天風泛八會之音，八會靈書、九芒雲篆寶雲森五明之座。《九幽經》：寶雲玉座，《升玄經》：五明宮內

極帝鄉而望華，啓齋範以輸誠。羽葆瑤旌，繽紛而來下；金書玉字，開度於無窮。肆回道德之光，少答人天之望。

祝聖

受丕顯命，申上帝之真符；資最上乘，致封人之精悃。益厚至仁之眷，肆超錫夢之齡。對揚天休，永作神主。地方千里者九，坐收四海之功；山呼萬歲者三，莫紀兩宮之算。時高、孝宗兩宮體道不息，與天長存。《度人經》：保制劫

運，使天長存。

### 爲國界禳災

龍文保運，雲護八威之章；《度人經》：赤書玉字、八威龍文，保制劫運，使天長存。鳳曆紀圖，天開千歲之統。九廟隕祉，三靈薦休，杜六極於未形，溥羣生而咸遂。惟一其德，治還太古之風；於萬斯年，人躋皇極之世。天殃盡弭，化日長春。

### 爲國界祀典神

升壇演教，式揚祈穀之科；翊聖真君云：黃籙齋，爲祈穀福時壇。爲國儲祥，第切傾葵之志。際天所覆，靡神不宗。既哀對於明靈，宜導迎於顧享。誕膺帝祉，增耀德威。助元化以密庸，保萬邦而嘉靖。

### 遷拔

天高地厚，共傾報本之誠；雷動風馳，莫急度人之施。巢時寶儀：龍漢出書於大有，赤明開圖於上清，爰從歷劫而來，皆以度人爲急。又云度人功大，風火不停，道路山川，急急傳命。悼種親之永隔，《度人經》：歷劫種親冀冲鑿之旁昭。矜彼沈冤，消其注訟，《北斗經》冢訟考注之厄拔，出泉曲之府，《度人

經》：北都泉曲府進入道宮之中。《遷拔章》：進入道宮之中，安樂之地。捨妄歸真，永斷羣迷之網；《北斗經》：出羣迷徑還元反本，畢升衆妙之門。《老子》：玄之又玄，衆妙之門。

陸擢地水二司僊班乞除存亡罪籍

蕩蕩神鄉，茫茫淵府，總治沉冥之域，未登勝妙之庭。尚賴洪慈，曲加普濟，幽械化飛於甘露，陰扉朗煥於太霞。《救苦經》：火翳成清署，劍樹化鸞林。《度人

經》：泛景太霞把籍帝前，洗四生之多罪；

《度人經》：執籙把籍，齊到帝前。歸班天上，

詠八極之清遊。神遊八極永息苦輪，咸躋道岸。

### 六道有情

迷津未返，濁海無涯。僊列聖之流光，憫重昏而洞照。自知宿命，《九幽經》：天尊以六通慧，令諸罪人閉眼靜思，俄頃之間，自知宿命，一一明了。頓悟本心，睇以陽翹之華，《生神章》：苦魂沈九夜，乘晨希陽翹。濯其幽夜之爽。咀玉音而鍊魄，沃金液以生神。《度人經》：玉音攝氣，《清淨經》：金液鍊形。出離九幽，指丹天而授化；飛凌三界，廓玄路以登真。南方丹天，鍊度之

所，超凌色界、欲界、無色界之上。

### 消災

同室相依，半生多難。夫婦同誠陳往愆而自省，託妙供以祈哀。釋冤而萬罪除，扶衰而九厄解。導以延生之炁，誘其爲善之衷。宿業潛消，不隨六塵之網；六根：身、色、香、味、觸、法。世緣早辦，終依大有之庭。《度人經》：大有妙庭。偕與含情，永歸元化。

報父母劬勞時偏侍太夫人

劬勞萬劫，恩重以難酬；喜懼一心，憂深而未解。願鑒由中之請，薦開無上之慈。特拯亡而固存，俾遠惡而從善。青宮錫命，《生神章》：東華青宮，出九龍寶命，使救九幽玉匿死魂，宿名有善。舉爲僊化之人；《度人經》：仙化成人碧簡增年，巢儀：丹臺紀善，碧簡增年。永斷塵勞之障。更祈介福，敷錫有情。

爲申奏等神言功

載嚴法會，普告於千真；翕受殊釐，徧周於一切。萬範克舉，《度人經》：萬範恢張。羣靈駿奔。茂集無疆之休，實繫顯相之助。宜頌大賚，首及靈司，暨

茲昭事之流，寧免犯科之瀆。共伸懺謝，仰俟赦原。

### 散壇

古儀無啓散詞，止是心詞而已。後人增之，實有不通。啓壇，致望幸之意，尚或少通。散壇則未伸再獻，先辭上聖，無如仍宣心詞爲佳。天師著儀，文義亦爾。三獻罷，自有專啓寅饒上真，如欲用詞，須三獻事畢，宣奏惟允。

鸞輿肅駕，振萬騎以遄歸；《度人

經》：億乘萬騎，浮空而來。龍驛言功，傳達章表，則遣金龍傳驛。絕九天而直上。凡在三元之內，俱蒙一洗之恩。沐道化之玄虛，味瓊章而飛躍。宿心允契，感涕自零。返僊仗於雲中，神遊已邈；望鈞天於帝所，夢想空深。

### 洞府投龍簡

齋功克展，天鑒孔昭，尚宣五老之符，祝龍簡呪、上帝五老赤書丹文告下十方之府。馳金龍之雲騎，風火不停；叩寶室之巖扉，煙霞未隔。肅陳嘉薦，終罄菲誠，庶幾時萬之休，周洽大千之界。

### 土府

祈恩上帝，錫命中宮，申金鈕白信之盟，龍簡文扶玉書赤文之祕。萬神咸

聽，《度人經》：萬神咸聽九地潛孚。盡原幽翳之魂，削除罪錄；更列華清之奏，投簡有記名上宮，列簿華清。升化僊庭。

### 水府

精嚴玉簡，祇詣珠宮，鑒黃籙之殊勳，覬九霄之清聽。并走羣望，肆通萬靈，合庶彙以昭蘇，偕七玄而獲濟。愛河自竭，法海常清。

歐陽文忠公詞內所上啓玉帝御號，即本朝事實內元上尊號，後準徽宗皇帝專委丞相張無盡再加校正。《金籙科儀》注定玉帝聖號云：太上開天執符御曆含真體道昊天玉皇上帝，即與泰壇郊祀昊天上帝爲一定之號。又準聖旨，於天下州府天慶觀內起建昊天玉皇上帝之殿，以專嚴奉。今諸天慶觀中，太師魯國公所寫殿額，自可遵承。況《道藏》中無盡《金籙儀》，並巢先生刊行《黃籙儀》內，皆同此號。惟知教法者，自能通貫。嘉泰辛酉春，元素謹識。

## 道門定制卷之七

西蜀道士樸庵呂元素校定  
朱陵真隱性齋胡湘龍編校

### 安宅章

即日列詞具言，但弟子某家，夙奉大道，精勤香火，以自防保，長少無他。伏用忻悅，而以胎生凡類，崇奉多違，慮延考炁。復自忖思，以某年月日，興動土木，營建此宅，安立門戶，增置屋廬，恐非吉日良時，多有觸犯土王之氣，太歲、太陰、太陽、大將軍，當時司命，古儀是此時，謂立屋之時。他本誤看，故爲此間，非也。今改爲當時，庶分曉。十二月建，大耗小耗，十二刑殺，大時小時，十二時神。或犯天禁地忌，天空開大道天空及開日，皆宜修，他本改爲空開者非。便利之宜。又慮此屋，或是古人刑牲盟誓之地，丘陵古墓之墟；或下有潛屍埋骨伏匿之魂；或舊爲寺觀壇場祠廟之所。綿歷年代，主宰非一，恐因觸犯，慮致災凶。某入宅以來，居止不利，夢寐醜惡，光怪



四起，錢財耗散，灾患紛紜。若無灾，可禳此一節，便入下文。合門尊卑，憂惶在念，

詣臣求拜章書，分解禁忌，安宅利居，具如所列。臣以才薄，不勝所見，謹爲伏地，拜上朱章一通，上聞天曹。伏丐大道神炁、五嶽將軍、六甲神明，及某家守宅三將軍、二十四吏兵、三萬六千神將，主爲弟子某家，安隱音穩宅舍，消却四方惡逆，水火盜賊，口舌灾耗，一切伏匿，使公私通泰，門戶興隆，所願果合。臣謹爲上請五方安宅大將軍，各千二百人；守宅大將軍，千二百人；護宅大將軍，千二百人；保宅大將軍，千二百人；鎮宅大將軍，千二百人。一合來下，同心併力，主爲弟子某家，安隱宅舍，保宜人口，子孫昌盛，光怪伏匿，惡口赤舌，一切消滅，不祥鬼賊，祛逐遐荒。乞爲弟子某宅中，東安青龍，西安白虎，南安朱雀，北安玄武，八卦利居，五方鎮宅。弟子某家所有誤犯，千禁萬忌之炁，應章破散，被受重恩，以爲效信，恩惟太上分別云云。上請天官君將吏兵，拜奏收除，起土造宅，作舍移徙，

凶耗、禁忌、觸犯、傷害之炁，一切消滅，安利宅居，保宜人口，乞恩朱章。

### 安墳墓章

即日稽首，列詞具言。某幸以宿緣，奉屬太上大道，諸君丈人，因三寶香火，以自保護，從昔受恩，實用慶幸。但天師科典，拯救存亡，濟國利人，自幽及顯。凡在生死，咸使安全。今弟子某，切慮亡過某冢墓之所，尚有刑尅，未獲安寧。既歿者非宜，即殃貽後世，冢墓注訟，爲子孫之殃。求乞章書，以爲救拔。臣不勝所見，謹爲拜章，上達天府。伏望太上老君、太上丈人、天師、女師、三師君門下五炁君，留神平省小臣所上章文，通行上御，降以道炁，覆衣弟子某家存亡眷屬之身，所有亡人某冢墓之所。安葬之日，或犯陰陽四時，天地禁忌，一切刑殺；或山崩石殞，風雨淹漬，樵牧踐踏，火燭焚燒；若新葬，又滅此項。或興工動土，穿鑿岡原，致令魂魄不安，龍神不守；或水泉漂蕩，骸骨遺亡；或冢墓崩摧，土石填塞，魂爽驚越，流泛無依；此等事，可以隨

宜去取。或葬日時辰，所向方位，動有犯觸，干忤幽明，非五姓之宜，非四時之便，犯天羅地網，刑殺魁罡，四殺不藏，六神不沒；或犯凶神暴鬼，月殺日遊，魂被拘執，無所告訴；或子孫男女命位之上，有所不具；或八殺六對，八將八卦，六對十二時辰。有所不同；或逼近古廟神祠，鬼神所擾；或近古陵巨冢，爲威勢所侵，冥路幽陰，無由自顯。如上所列，並乞天道慈佑，告下所主神明，爲解救原除，和諭安定。或山脉斷絕，連而續之；魂神驚散，存而撫之。使亡者安泰，子孫興昌，冢墓注訟，一切斷絕，封樹繁滋，鬼邪奔散。臣謹爲上請都官從事君一人，官將百二十人，又請通達五經博士君一人，官將百二十人，主爲某家遷拔亡人某等三魂七魄，女人三魂十四魄，免謫役罪罰，遠離愁苦，上昇福堂，斷絕注連，永享貞吉。又請安穩冢墓從事吏十二人，上爲亡人某等佑護冢墓之所，四方清靜，塋域安寧，千載萬年，永無驚擾。若有摧折樹木、沙土瓦石，在坵墓之內堆壓屍骨

者；或狐狸鼯鼠、蟲蛇木根，侵傷形骸者；或水脉泉源、流漿滯泥，浸漬骸骨者；或冢墓穿穴、骸骨分張，風吹雨濕、不得安寧者；悉爲宣理，斬削洗除，破決滯水，祛逐蛇鼠，撲滅野火，收斂骸骨，趁斥狐狸，割剔草木根蔓，立使安穩，無有侵害，致爲恚恨驚怖。所請天官君將吏兵，應章來下，遷拔亡人，安鎮墳墓，使生者康泰，死者安寧，灾橫不興，凶惡不起，夢寐真正，疾厄不侵，壽祿延長，人口清吉，被受重恩，以爲效信，恩惟太上分別云云。操臣謹爲某家，上請天官君將吏，拜上遷拔亡人安穩冢墓朱章。

### 祈嗣章

即日稽首列詞，但弟子某素以胎生，千載有幸，得奉大道，伏受玄恩。伏惟太上垂慈，好坐濟物，宿愆許懺，積咎可原。臣切慮弟子某，前生今世，行違神明，心無惻隱，仁慈不著，忠孝有虧，因公行私，兼貧擅富，焚山竭澤，落子墮胎，毀卵覆巢，驚棲發蟄，善輕毫末，過積丘陵，致令嗣續孔艱，日深危

懼，承傳所繫，依仗無門，特罄丹衷，向臣求乞，拜上謝過禳灾祈祥保嗣朱章一通，上聞天曹。伏乞太上老君、太上丈人、天師、女師、三師君門下五炁君，留神平省小臣所上章書，通行上御。乞以全音氣上，所賜與之謂乞以，所請求之謂乞今，此乞乃是太上降以道炁。東青西素、南丹北玄、中央二十五正真自然生炁，謂天一、地二、天三、地四、天五，生數也。下覆弟子某身中，保命延生，扶衰度厄，呵斥千二百絕滅種嗣故炁之鬼，令使慶源不壅，殃注斷除，乃子乃孫，以嗣以續。臣謹爲上請東戎南蠻、西夷北狄、中央三秦君，各領兵士百二十人，一合來下，主爲弟子某家，解除億曾萬祖、九世七先、眷屬親姻、前亡後夭，八十一注訟，悉使蕩除，庶令生孽繁榮，子孫不絕。又請南昌注生司命主司僊官、九天定命注生僊官、注生大司馬、北斗注生僊官，各領吏屬，一合來下，主爲弟子某，解冤釋結，消除前世今生、毀卵覆巢等一千六百二十過咎，並令解散，落滅惡根，三界並注生名，天人結爲眷屬。若弟子某

所犯過咎至深，注當絕嗣，亦乞上奏高上至尊，此指玉帝，謂令天帝上奏玉皇，以廣太上好生。特爲原赦，以廣太上好生之德。又請十方保嗣他本云祈嗣者保胎君、十方保嗣保胎神王、長生大聖、六甲六丁神將、玉女十二從官，各九億萬騎，一合來下，主爲弟子某室某，養育胎根，庶令金樓玉室，得保無虞，辟斥萬魔，破胎爲殃之鬼，務令止絕，夢寐真正，俾先亡後夭，並不得變形易影，入夢爲害；萬殃之鬼，勿令伺候罅隙，殘胎絕孕。又請扶衰度厄君官將百二十人，又請九宮八卦大神兵士百二十人，一合來下，主爲弟子某家，開生門，益壽命，塞死戶，養胎根，使四季平安，灾衰不起，死亡斷絕，嗣息蕃昌，水火刀兵，不相凌犯，克保宜吉，永銜道恩，以爲效信，恩惟太上分別云云。

### 誅邪章

但弟子某宿有積幸，奉屬大道，常蒙覆蔭，伏用欣榮，而修奉多違，動招考責。某自頃以來，爲外殍鬼賊，妄相刑剋，數爲崇害，或更有事意，從此添入。若願

意詳載，此不必更寫。性命危迫，披告無門，向臣求乞章書，以自分別。臣不勝所見，謹爲冒罪拜章，上聞天曹。伏願太上老君、諸君丈人、天師、女師、三師君門下五炁君，垂神平省小臣所上章文，即得上達，賜以道炁，覆衣弟子某一門之身。臣伏尋外殍邪鬼，與弟子某家，非有相關。先聖垂言，非鬼不祭，不合妄爲祟患，復連平民。《正一科文》、《女青鬼律》、合伸誅翦，以安萬姓。臣謹爲上請誅殃君官將一百二十人，治倉明宮；又請都星君一人，官將百二十人，治青蓋宮；又請誅符破廟吏，又請天皇敢健吏，各領兵三十萬人，一合來下，主爲弟子某家，除蕩客死，外殍異姓，非所祭祀之鬼，妄爲復連者，收而斬之，誅而滅之，斷而絕之，悉令分別，立使清淨。又請收除男女，凡殃病死、腥死、牢獄死、刀兵虎狼死、燒死之鬼吏兵，各五十人，主爲收除外鬼他神，非祭祀及妄來復連平人者，向炁嘗不同祭祀，各分殊門異戶，不復相關，立須斷絕，不得妄相侵犯。如欲輒違天

條，復來侵害弟子某家者，當須河水逆流，白石上浮，穰繩千丈，馬角六尺，可更相求。不能如此，天別地絕，千年萬歲，無相侵擾。又請東西南北中央五方斷訟神君各一人，官將各十二人，五方所領兵士等，主爲弟子某家，閉絕復連，歲復月連，月復日連，日復時連，皆令閉絕，使某家有灾獲解，有病獲痊，性命安全，魂神澄正，邪精摧伏，正炁宣行，萬苦千殃，豁然除散，被受大道罔極之恩，伏惟太上分別云云。上請天官君將吏兵，拜上斷除外邪鬼神彊殍客死之鬼妄爲剋害斷絕誅滅寶章一通。

右章文，欲奏之者，先於他所，除淨室焚香。法師結界閉戶修寫訖，密行點檢，封入章函印護。及時，取於壇中行事，不復宣讀，依法伏章，密奏焚之。文字章詞中，亦不得指言上此章宣儀，關告亦然。恐爲鬼祟所知遏截，不得上達。謹之，謹之。

#### 六甲救病章

請六甲神官狀黃紙朱書，隨章焚之  
法師具位。

今爲弟子某，解救危疾，制伏羣邪，上請六甲神官、從事兵將，各依章中所請施行。

謹具神官，列位于左：

- 甲子王文卿從官十八人，
  - 乙丑龍季卿從官十六人，
  - 丙寅張仲卿從官十四人，
  - 丁卯司馬木卿從官十二人，
  - 戊辰李楚卿從官十人，
  - 己巳何文昌從官十三人，
  - 庚午馮仲卿從官十七人，
  - 辛未王文章從官十五人，
  - 壬申侯博卿從官十三人，
  - 癸酉孫仲房從官十一人。
- 已上十神，官將各百二十人，兵士十萬人。

- 甲戌展子江從官十四人，
- 乙亥龐明心從官十三人，
- 丙子邢孫卿從官十六人，
- 丁丑趙子玉從官十四人，
- 戊寅虞子卿從官十三人，
- 己卯石文陽從官十五人，
- 庚辰尹佳卿從官十三人，

辛巳楊仲公從官十一人，  
壬午馬子明從官十五人，  
癸未呂威明從官十三人。  
已上十神，官將各百二十人，兵士  
十萬人。

甲申扈文長從官十六人，  
乙酉孔利公從官十四人，  
丙戌車元昇從官十二人，  
丁亥張文通從官十人，  
戊子樂石陽從官十四人，  
己丑范仲陽從官十四人，  
庚寅褚進卿從官十五人，  
辛卯郭子良從官十三人，  
壬辰武雅卿從官十一人，  
癸巳史公來從官九人。  
已上十神，官將各百二十人，兵士  
十萬人。

甲午衛上卿從官十八人，  
乙未杜仲陽從官十六人，  
丙申朱伯衆從官十四人，  
丁酉臧文公從官十二人，  
戊戌范少卿從官十人，  
己亥鄧都卿從官十三人，

庚子楊仲升從官十七人，  
辛丑林衛公從官十五人，  
壬寅丘孟卿從官十三人，  
癸卯蘇他家從官十一人。  
已上十神，官將各百二十人，兵士  
十萬人。

甲辰孟非卿從官十四人，  
乙巳唐文卿從官十一人，  
丙午魏文公從官十六人，  
丁未石叔通從官十四人，  
戊申范伯陽從官十二人，  
己酉成文長從官十五人，  
庚戌史子仁從官十二人，  
辛亥左子行從官十一人，  
壬子宿上卿從官十五人，  
癸丑江漢卿從官十三人。  
已上十神，官將各百二十人，兵士  
十萬人。

甲寅明文章從官十六人，  
乙卯戴公陽從官十四人，  
丙辰霍叔英從官十二人，  
丁巳崔巨卿從官十人，  
戊午使元光從官十四人，

己未時通卿從官十七人，  
庚申華文陽從官十五人，  
辛酉邴元玉從官十三人，  
壬戌樂進卿從官十五人，  
癸亥左古松從官九人。  
已上十神，官將各百二十人，兵士  
十萬人。

右謹錄狀，隨章上奏太上老君、諸  
君丈人，伏乞道慈，允臣所請，告下六甲  
神官，為弟子某隨章奉行。謹狀。

年 月 日 具位臣姓 某 狀

章信並須精潔，以明通感。

白素四十尺、祿米一石二斗、命錢  
一千二百文、代形衣兩件、奏納司命六  
甲六丁等錢馬七十分。

章文此章救危疾，制羣邪，救身神，和正炁。

若遇病者，司命日拜章尤善。如水命人，己丑、乙未。  
木命人，庚申、辛酉。火命人，壬子、癸丑。土命人，  
甲寅、乙卯。金命人，丙午、丁巳。若未可遇，急欲上  
章救病，卜吉日為之。

即日列詞具言，但弟子某幸以宿  
緣，遭逢道化，稟神皇極，命係玄曹，得  
奉太上大道、諸君丈人，真化所被，道  
炁所覆，獲自防保，負荷重恩，而修積

無聞，不明科典，動靜違貪，愆咎日深。自頃以來，或自身，或某人。身嬰疾厄，綿遠旬日，未獲痊平。伏恐某七祖九玄，及先身人世，積行所犯，違忤神明，罪目貫盈，未會懺拔；或先亡遠逝，幽執九泉，考對未原，殃孽重疊，不勝甚苦，延及生人；或是己身受生以來，陰罪陽過，負越禁忌，聚結罪尤；或故殺誤傷，前冤往債，未伸悔謝，咎責日深，拘閉生魂，致茲疾苦；或是五行刑厄，三命衰微，宿曜所臨，神殺所犯，行年之上、太歲之中，或有刑妨，致茲危厄，旦夕憂迫，性命是虞。詣臣自訴，乞求章文，救解災疾。臣不勝所見，謹爲冒罪伏地，拜上朱章，上聞天曹。伏丐太上老君、太上丈人、天師、女師、三師君，謹依五帝靈飛左右六甲明科具典，上請甲子王文卿，及一旬十神暨從官，各領官將百二十人，自然兵士十萬人，及時來下，主爲弟子某，收坎宮姦邪之鬼，治丹田三宮下元所病之炁，中外彊殄，立令消滅。重請長生君一人，吏十二人，陳亮仁君一人，吏十二人，主於某身

中內鎮肝臟，令肝炁流行，病根釋去，絕滅無藉，斬伐凶惡，歲月日時，傳相啓付。又請甲戌展子江，及一旬十神暨從官，各領官將百二十人，自然兵士十萬人，及時來下，主爲某和諭家親竈神、住宅禁忌，助道興化，收捕衆邪，立令消滅。重請趙公子一人，吏十二人，呂威明一人，吏十二人，主爲某安靜中田，鎮心守神，衛護心臟，使真正通靈，上應三元，下安絳宮，赤子之府，外制萬邪，歲月日時，傳相啓付。又請甲申車元昇，及一旬十神洎從官，各領官將百二十人，自然兵士十萬人，及時來下，主爲某辟斥外殄之鬼，先代刑禱呪詛之鬼，冢墓注訟考逮之鬼，悉令除滅，所苦和平。重請杜虎圭一人，吏十三人，又請祇念君一人，吏十二人，主爲某調平脉炁，安守肺臟，使靈液流通，華蓋清潔，歲月日時，傳相啓付。又請甲午衛上卿，及一旬十神洎從官，各領官將百二十人，自然兵士十萬人，及時來下，主爲某行太陰官符命，收捕內外精邪，伏屍蠱道，諸有違犯流俗、禁忌

之炁，立令消滅。重請陳子平一人，吏十二人，又請通身君一人，吏十二人，主爲某調和命源，安靜炁海，鎮守腎臟，制伏外邪，使血液宣行，凶惡消殄，上通膽腑，真炁堅強，所疾痊平，靈真密佑，歲月日時，傳相啓付。又請甲辰孟非卿，及一旬十神洎從官，各領官將百二十人，自然兵士十萬人，及時來下，主爲某收除三十六代以來，先亡往逝、留殃死次、盟禱呪詛、注訟考逮，復連生人連染疾病之鬼，一切消解，疾瘵痊復，災厄和平。重請何文章一人，吏十二人，又請趙子玉一人，吏十二人，主爲某鎮守太倉脾宮，調理脾炁，五臟和暢，百關宣通，真炁流行，邪惡消弭，歲月日時，傳相啓付。又請甲寅明文章，及一旬十神洎從官，各領官將百二十人，自然兵士十萬人，及時來下，主爲某收除五瘟百毒，時行疫癘，內外彊殄，八方五方，行病鬼炁，及所居之內，伏屍鬼賊，金銀銅鐵，木石器用，怪魅衆精，爲疾患者，一切除斬，立令消滅。重請馬超圭一人，吏十二人，又請姜威

明一人，吏十二人，已上六次所重請十二官，並係天醫。主爲某安守身中三萬六千神，千二百形影，萬二千精光，左三魂，右七魄，五臟六腑，三百六十骨節，一切神炁，常令澄正，永保安寧，疾厄痊平，延年益祿。又請六丁玉女、六甲玉女、

六甲陰陽正神、天蓬、天內、天衝、天禽、天輔、天心、天英、天任、天柱神將，即時來下，保衛某之身，所疾痊除，百神依護，榮衛血脉，流通真炁，年壽延益，永保利貞。謹請中宮從事十二人，承接章文，爲某清蕩內外，澄正身心，調和血炁，祛除邪惡，誅斬鬼賊，制魄拘魂，保護三宮，鎮安赤子，使六甲將吏，各守所部，青龍保肝，白虎護肺，玄武守腎，朱雀鎮心。黃庭真人，和脾清胃，血液流注，榮衛宣通，靈藥潛資，神符密降，禳除疾惱，增祿加年。司命真神，再定錄籍，書名生品，青簿之中。死戶削名，殃咎消弭。天醫將吏，六甲衆神，有功勞者，三會之日，都章言功，克保全生，以爲效信，恩惟太上老君、太上道德衆尊、諸君丈人、天師、女師、

三師君門下五炁君，省理分別，垂再生之澤，開罔極之恩。臣愚質穢氣濁云云。操臣所爲弟子某，久嬰疾苦，上請六甲官將、真神從官、自然兵士、天醫衆神，收除凶惡，療治疾苦，拜上乞恩救疾朱章一通。

南獄魏夫人易名更籍生筭度厄救

急章

廣成先生曰：凡人年災月厄，筭盡相臨，本命祿絕，行年妨害，宜奏此救急大章。災難消除，福祿立降，先須章信，以表延益。

銀環一雙，筭子一百二十枚，青絲命縷一丈二尺，祿米一十二斗，信錢一千二百文，命繒紫羅二丈四尺。

奏章操伏，晝向東，夜向北。

章文

即日稽首具詞，但弟子某濁質凡胎，千載有幸，得奉大道，受命皇極，以自保全。而以下愚，施行多違，招延不利，此年坎坷，疾病相尋，恐九厄頻凌，三災頓集，天羅所繞，地網所纏，壽命短促，年筭窮盡，妖邪神鬼，所見侵侮，

泰山岱宗，所可橫召，無功自拔，旦夕恐怖。雖復罪穢，從道而生，唯一心歸命大道，求乞救拔，置信請命，詣臣自訴。臣不勝所請，謹爲露出中庭，於太虛之下，北斗之前，伏地拜奏大章一通，上聞天曹。伏丐太上老君、太上丈人、天師、女師、三師、慈父聖母，降罔極之恩，原赦弟子某萬死之罪，俾厄中得濟，危中得安。臣謹爲上請弟子某本命生年生月生日生時星官，各領官將功曹使者，齎持弟子某年命簿錄，上達玉帝陛下，隨事奏對司命門下，分別章書，除刑止殺，削落罪簿，易短爲長。若弟子某覆行背違，壽限短促，玉曆無籍，左契無名。主生之文三元削錄，司命較書，南宮不取，天帝不原者，並爲迴停申借，更籍易名，三歲一期，展轉延益。又請調星度筭君、轉名易形君、脫死上生君各五人，官將千二百人，一合來下。又請太陰之下考召君吏，與臣身中功曹使者，上請北斗御女宮中，主爲弟子某，抽贖死簿，更籍易名。又於東華宮，請九龍符命，告下東嶽泰山府二

十四獄掾吏、七十二司官僚，爲弟子某更定生名，削除死籍，和釋考責，還遣三魂七魄，歸附身中，無令放逸。又請太上三天玉女千二百人，三環結角，衣五色玄黃之衣，着獅子之履，口含雄黃之藥，手捧玉漿，吐哺真炁，共相濟療弟子某之身，自頂至踵，緣肌纏骨，調和六腑，安鎮五臟，精血充滿，百病除瘥，夢寤真正，得度九厄之中。又請天中敢健吏兵千二百人，一合來下，於弟子某居宅之中，收捕精祟，萬邪爲害，令內外清潔，神明防衛，使弟子某身康體健，真炁降流，補潤四肢，安寧五臟，調理百關，厄中得度，短中得長，徹滅短籍，著名長生玉曆之中，千罪萬過，一切赦除。蒙恩之日，臣謹爲仰宣太上五戒，勸諭弟子，悛惡修善，伏從科戒，不使復犯，以今爲新，以爲效信，恩惟太上分別云云。操臣所爲弟子某齋，銀環命縷，錢米紋繒，質信效誠，上請天官君將吏兵，拜上易名更籍生筭度厄救急大章。

### 祈雨章

即日列詞具言，但某幸以塵微，得值道化，玄功濟物，真教宣行，幸屬太上帝道，諸君丈人，道炁覆育，叨膺祿秩，士民設，改爲生值。仰荷玄恩。然修奉多違，延致災沴，封境之內，驕陽踰時，坐虧農功，深虞凶歉。伏念邦國所大，食爲民天，歲或不登，何所依怙。竊慮星文之內，分野躔災，曆數之中，地境鍾運。遠近焦灼，民吏震驚。又恐撫治乖宜，刑賞不當，賦歛過重，民庶冤愁。士民設醮，可削此項。又恐四民愚而不究本原，輕厭稻糧，致貽責罰，內自循省，冰炭在懷，雖山川禱祠，杳無通感，翦爪待罪，必求於天。他本云：山川禱祠，牲牢蠲潔，不惟瀆天，亦復慢神，茲惟致請命于天之意。詣臣求乞章奏，臣不勝所見，謹爲伏地拜章，上聞天曹。伏乞太上老君、太上丈人、天師、女師、三師君門下五炁君，留神平省小臣所上章書，通行上御，垂大慈之澤，哀憫生民，勅下上官典者，分別五行，區定律曆，羅列八卦，標明節候，使陰陽叶序，風雨以時。臣謹

爲上請九海北溟君一人，官將百二十人，治河天宮，主天下水炁，風雷合符，興雲下雨。又請天公正炁君一人，官將百二十人，治中天宮。又請海中玉女千二百人，衣赤衣，興雲致雨。又請河上真人君，官將百二十人，治北方大海宮，主爲天下萬民，合符致雨。又請四洲九谷君五人，官將百二十人，治泰山宮。又請九江海玄君，官將百二十人，治九河宮，並主水炁泉源，降致風雨。又請河伯、呂公子三十六人，主興雨水。又請河伯、使水帝子三十六人，合符降雨。又請靈臺宮漢明君一人，官將百二十人，攝召天雷地雷之炁。又請小玄冥君一人，官將百二十人，主攝河伯水帝、十二谿玉女、九江河平侯、將佐掾吏、部水鬼神。又請九江平玄君、泰山宮中九谷君、四水九谷君、陽成宮九侯君、湖中玉女，千二百人，一合來下，與太社城隍，正直聰明。一切靈響，同心協力，上奉天命，召攝雷電，水炁風雲，合符下雨，收制旱魃之鬼，應章消滅，使穀稼滋榮，百卉繁茂，

風雨調順，歲獲豐登，國有蓄儲，民用粒食。所請官將吏兵，與風師雨師、零星先農等有功勤者，上詣三天，乞行遷賞，以爲效信，恩惟太上省理云云。上請天官君將吏兵，拜上弭旱祈雨朱章。

### 祈晴章

即日具詞，但某獲以凡庸，奉屬太上帝道，諸君丈人，命稟上玄，籍係天府，叨領民社，郡縣可通用之，民庶云：叨居覆載。宿荷聖恩，而修奉多違，遭值災運。自某時日以來，封境之內，苦雨爲災，霖霖未已，黎民惶懼，昏墊音玷是虞。況望歲之期，嘉穀爲本，農功既廢，饑饉必臻。竊慮九地之區，分野灾咎，三辰之度，躔次差移，律曆推遷，值茲灾否。又恐某理務乖舛，賞罰不明，下民愁歎，致成霖潦。士民自祈禱，則去此項。又恐下民瞽暗，罔恤農功，棄賤稻糧，天降責罰。捫心省己，若蹈淵冰，惟一心歸命，求乞章表，上奏九天，以自分解。臣謹爲拜章，上聞天曹，伏乞太上老君、太上丈人、天師、女師、三師君門下五炁君，垂好生之澤，賜育物之仁，拯救

淪胥，以安生齒。臣謹爲上請九海北玄君，官將百二十人，治中內宮，主止霖澤之炁，以致晴爽。又請天公正炁君一人，官將百二十人，治中天宮，主消雲靜雨，收斂陰霾。又請河上玉女千二百人，衣白衣，上詣天曹，請止霖雨，移風雷雲雨，衆神各還所署，使風雨調順，水沴蠲消，三景揚光，四時叶序，農功無失，稼穡有秋，無漂溺之憂，洽生成之願，克保元吉，以爲效信，恩惟太上分別云云。拜上消灾止雨祈晴朱章。

### 消灾度厄章

但弟子某生居人世，宿有善緣，得奉真麻，恭聞道化。但以凡夫迷謬，冒觸憲綱，或則違聖背真，或乃興工動土，俯纏五蘊，上昧三光。賦形天地，而不知天地之回旋；生麗陰陽，而莫曉陰陽之逆順。動乖至理，居即成愆，未盡懺穰，將來禍患。又恐流年運限，值衝破之灾；本命元辰，逢刑剋之厄。天羅地網，誰知逃避之門；祿筭壽齡，孰致延益之數。用是歸投大道，虔奉至真，謹備法信之儀，恭修蘋藻之獻。

詣臣求乞表章，臣雖不明氣候，輒承所請，謹爲弟子某上請壽筭君五人、保命君五人、消灾君五人、散禍君五人、扶衰君五人、度厄君五人、解羅網君五人、官將百二十人，一合來下，速詣天曹地府、古廟靈壇，社稷將吏、司命曹屬，尋弟子某家，自無始以來，生於心，行於事，一切罪惡、記名惡簿之中者，盡爲赦除；自有形以來，命於天，麗於數，一生壽祿、定分黃籙之內者，咸爲延益。有灾有厄，速爲消穰；有病有殃，悉爲解散。易禍敗而增福祉，變疾苦而致康寧。一切屯遭，悉令渙散。臣膳其精意，上詣天曹，伏乞大道垂慈，至真密鑒，察臣所奏，特與弟子某削除罪籍，紀錄善功，增延壽筭之期，厚益福祿之數，祛除疫癘，解釋灾殃，祈動止以安寧，保公私而吉慶，運爲稱意，出入利宜。次乞子孫均蒙福利，門有吉祥之慶，家無疾癘之侵，人人悉賴於洪庥，世世永依於道蔭，恩惟太上云云。

### 太上消除蟲蝗灾食苗稼章

即日稽首列詞，自以宿福，獲承道



化，早塵官列，深荷天恩，任重才輕，常虞顛沛，匪躬勵節，敢不勤渠。但慮執法不明，紀綱弛壞，違天地好生之旨，爽帝王慈育之仁，民未小康，物或失所。況國以人爲本，本固則邦寧；人以食爲天，食豐則人泰。所以禁游惰，斥繁奢，惜人力也；勸農桑，務耕織，惜人時也。力不廢，時不違，順天時，享地利，則四國交樂，萬方叶和，君無爲於上，人悅豫於下，國之大本，政之大經，有古之所貴也。今以羸民瘠土，併力倍功，晝夜忘疲，從事稼穡，苗既繁碩，將及有秋，而延致災凶，螟蝗爲害，嗷嗷悲怨，聲聞于天。實某等政繆化涼，德寡才匱，叩心責己，悔過祈恩，緬念穡夫，爲增憂懼。惟齋沐稽顙，一心歸命，乞求表章，上奏三天，伏丐太上大道、諸君丈人、三師君、上官典者，垂恩省察。臣披按詞情，不勝所見，臣謹爲依正一天師科典千二百官佐國救人之法，上請天田君，官將百二十人，治北門宮，主保育稼穡，辟却蝗蟲之暴。又請三炁陽元君，官將百二十人，治黃

雲宮，主收蟲蝗螟螻之傷。又請四野五野七野九野都平君、城隍山川注氣社稷神君，護其禾黍，並使美熟，無令傷害，辟斥蟲蝗。又請五穀君，官將百二十人，治天水宮，主令百穀，秀實有收，辟却蟲蝗，不使侵害，水旱和釋，年歲豐登。又請南山白虎將軍吏兵，一合來下，收攝境內蟲蝗蝥蟥，並令消匿。乞敕勒所在土地山林孟長社令城隍，同共收絕。章御之後，凡上下共業，併蒙原赦，螟蝗災異，咸得解除，使稼穡有成，公私共濟，人民安泰，國土清平，恩惟太上云云。

#### 上清道士修真謝罪章

即日奉詞，但某等自以冥頑下士，輪轉因緣，宿慶所鍾，遭逢道運，上帝領籍，名係皇篇，師寶甄收，身參治錄，不揆短閭，葵藿傾陽，棲跡靈壇，結志上道，玄理幽邈，披盼無窮。伏聞太上宣慈，老君垂教，發揮道妙，啓迪人天。養性鍊神，在極虛而篤靜；利人應世，務持儉以守柔。先所見聞，後當開導。儻不能自反，則何以敷暢於真風；不

植善因，則何以傳誠於上界。伏蒙太上大道、諸君丈人，垂慈拯護，不賜罪罰，使臣等超絕塵累，得處法門，助道化人，同歸玄路。而臣等居塵接物，混俗同塵，功業未聞，罪惡彰積，恐延殃上世，貽過三師，身謝三官，風刀考謫，朝夕在念，不敢自寧。悔過清齋，投詞露請，歸誠稽首，懺謝道前。臣見其元元之情，理在可申，臣謹爲拜章，上聞九天，伏丐太上大道衆尊，曲聆所奏，垂憫丹心，如蒙上御，願爲宣告三官五帝、五嶽衆靈。伏乞拔度某等三師九祖，升上南宮，冠帶枯骨，反體生華，轉其幽識，受化僊門。已遷之靈，進品丹庭。勒某等之名，刻書於九天金格寶藏神僊錄籍之中。臣謹爲上請九炁青天青帝天君、青腰玉女，從甲乙官將、青龍兵馬九億萬人，一合來下，降入某等身中，安鎮肝腑之宮。又請三炁丹天赤炁天君、太丹玉女，從丙丁官將、赤龍兵馬三億萬人，一合來下，降入某等身中，安鎮心腑絳宮。又請元陽大帝之山一炁之天，黃帝天君、太帝真人、

子丹黃庭、天蒼玉女，從戊己官將、黃龍兵馬十二億萬人，一合來下，降入某

等身中，安鎮脾腑之宮。又請七炁素天白帝天君、太素玉女，從庚辛官將、白龍兵馬七億萬人，一合來下，降入某等身中，安鎮肺腑之宮。又請五炁玄天黑帝天君、夜光玉女，從壬癸官將、黑龍兵馬五億萬人，一合來下，降入某等身中，安鎮腎腑之宮。又請三元九府、五嶽四瀆、九宮真人、神僊玉女、兵馬騎乘，各九億萬人，一合來下，降入某等身中，分布宮腑，安鎮身形，五臟六腑，三元九宮，一身之內，隨逐營衛，和魂檢魄，保神養精，攝炁鍊僊，骨髓凝僊，血脉成真，朝服元精，五芽芝英，漱滿玉池，津液自生，身得飛行，過度三灾八難衆惡之中，千凶萬毒，莫不消亡，慧性疏明，洞悟幽理，神僊降接，與道合真，使上不累三師、九祖，下可度六道、四生，咸得光明，俱無結縛。某等未入道之前，既參真之後，千愆萬罪，並乞除蕩，修真行教，以今爲新，所奏上達，表御帝前，特垂照省，普關萬靈，

以爲效信，恩惟太上云云。

### 道士滅度拔出塗苦鍊屍受度朱章

上言謹按文書，臣以凡愚，獲參經法，日念自新，結縛未解，敢冒禁律，干忤天真，臣某誠惶誠恐，稽首頓首。臣竊見經旨明戒，可憑經言，自非先身，累德立功，名書瓊簡，不得妄見經法。預以見者，皆應升度，或功德未足，運應滅度，身經太陰，寄形地官，因緣期訖，得還故宅，屍形受度，魂神上昇，靈首昭垂，誠宜修奉，敢緣慈訓，冒瀆宸聰。臣謹奏爲某府某州某縣、某觀某人，以某月某日，伏值某人某齋辰，就某處建壇，乞爲依科，修奉上清昇化僊度遷神道場幾晝夜，自某日某時啓事，至某日某時，設醮滿散，所伸意者，干冒天威。但弟子某即日奉詞，代爲亡師姓名年某歲元命某甲子某帝領籍，謂年命納者，如木命人，屬青帝。某月某日某時生，受命某天。如五帝之屬木命人，即青天。在世之時，早慕大道，登壇佩籙，供養修持。但身履下土，穢濁所牽，功德未滿，運數終窮。於某年某月某日某時，以某疾去世，神託太陰，寄形土

宮。如未葬，云今停樞殯宮，以須良日，遷還蒿里。功德未備，尚阻超生，恐爲土府所見驅逼，不相容安，魂魄飛揚，屍形靡寧，搖動考對，注逮見存，死者不安，生人多難。但弟子某等，忝爲法嗣，踰天屬之親，懷追遠之痛，敢緣大道慈悲之化，經法度人之恩，向臣求乞章書，拔度存亡，臣謹爲冒罪，伏地拜章，上聞天曹，伏丐太上老君、太上丈人、天師、女師、三師君門下五炁君等，留神平省小臣所上章書，通行上御。乞以道炁下流，覆衣弟子某所薦亡師某，及先亡近逝，一切魂識。臣謹爲上請素車白馬大將軍一人，兵士十萬人。又請大言君一人，官將百二十人，主知亡過道士某魂魄閉繫所在。若輪三途五苦，神趣鬼趣，艷山六天，九幽諸獄者，盡爲度脫解救之。若弟子某高玄七祖，道俗先亡，新死眷屬，前生今世，宿對罪囚，記於三官，結於九府者，請十方飛天僊官，盡爲解除，悉皆和釋。乞以臣章，告下三官九府所在冥司，神趣鬼趣，一切幽獄，錄亡人生時建善之功，開拔魂神，

反胎更生。願九天上帝，五帝尊神，還其肌膚，復其魂神，三元養育，九炁結形，通其榮衛，布以精華，應轉者轉，應度者度，應生者生。願亡者所屬某嶽某山，如木命人，屬東嶽泰山。真靈正神，爲符下九土地官，各依部界，營衛屍形，一如盟真科旨，當使形安神守，魄不散揚，章御之後，咸得赦原，早獲受生，轉超福境，冢墓、靈樞安靜，灾害不生，以爲效信，恩惟太上分別求哀。

右前後集所刊章文，並依藏本校勘。所請天官，悉以太上所授《天師千二百官章經》，一一對定刊行。竊見近來所刊章本，如文昌襪水襪火等，不惟文辭礙理，而所請官，皆以私意，臆度撰造。遍考《千二百官章經》，並不具載。如《言功章》，自當於願意內，除去備龍壁繪綵，及建壇所在，某日清旦，至某日亥時，行道事訖之類；而乃反爲重復。不當於天師所立定章文內，削去況降筆爲教門之魔；而鬻字道童，不曉科教，妄執管見，不知於醮官高功利害非輕，且有言詞倒錯，文字脫漏。上

官典者，有所遺却，淪沒三官，不能上御之譴，然於教法不容。不辨識者，必能察之。嘉泰辛酉仲夏，退庵呂元素謹識。

道門定制卷之七

道門定制卷之八

西蜀道士樸庵呂元素校定  
朱陵真隱性齋胡湘龍編校

八威真文

此名出《元始五老經》，篆文亦然，召龍真文全出。

東方青帝八威真文

東方青帝八威真文  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎

正音

別以小紙書，附於真文上宣讀。

東山神呪，攝召九天。赤書符命，

制會酆山。束魔送鬼，所誅無蠲。悉詣木宮，敢有稽延。

右謹告聞東方鎮宅大將軍，乞為奉道某家，保護住宅東方木王之炁，甲乙之方，寅卯之位，惟冀百邪不入，萬惡祛除，犯觸消平，居止安泰，一如東方青帝君符命。

年 月 日高功半銜姓 某 告行

以下四方並同，後語止換方位支干。若於安墳，及祛邪等醮，於用可隨宜改正。後文祈禱，庶幾脗合。

南方赤帝八威真文

𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎

正音

北攝酆山，束送魔宗。符教所討，明列罪原。南山神呪，威伏八方。羣妖滅爽，萬試摧亡。

南方火王之炁，丙丁之方，巳午之位。

西方白帝八威真文

𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎

正音

赤書玉字，九天真文，攝召萬炁，普歸帝君。

西方金王之炁，庚辛之方，申酉之位。

北方黑帝八威真文

𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎

正音

北山神呪，激陽起雷。流鈴煥落，鏗天振威。北酆所部，萬妖滅摧。

北方水王之炁，壬癸之方，亥子之位。

中央黃帝八威真文

𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎

正音

勅攝北帝，遏塞鬼門。翦除不祥，莫有當前。

中央土王之炁，戊己之方，辰戌、丑未之位。

召龍真文

東方青帝召龍真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

正音

下制東河，溟海水神。大劫洪災，蛟龍負身。水府開道，通徑百千。上帝赤文，風火無間。

右雲篆上召東海廣德龍王、水府

官屬，伏乞降臨道場，保安境土，興雲致雨，救濟生靈，殄滅凶荒，祛除旱魃，一如青帝天君符命。

年 月 日具位姓 某 宣行

已下四方語並同，止換龍王號。  
南方赤帝召龍真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

正音

南方赤帝，太伯龍王，神呪流行，普掃不祥。洪水飛災，上召蛟龍，開除水逕，千道萬通。敢有干試，攝送火

宮，赤書所告，莫有不從。

南海廣利龍王右語同前  
西方白帝召龍真文

𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎  
𠄎 𠄎 𠄎 𠄎 𠄎 𠄎 𠄎 𠄎 𠄎 𠄎

正音

西山神呪，八威七傳。符水上龍，召山送雲。在所校錄，同到帝門。輔衛上真，斬滅邪源。若有不祥，截以金

關。赤書符命，風火驛傳。

西海廣潤龍王右語同前

北方黑帝召龍真文

召龍真文  
召龍真文  
召龍真文  
召龍真文  
召龍真文  
召龍真文  
召龍真文  
召龍真文  
召龍真文  
召龍真文

正音

九河傾訖，鳥母羣飛。蛟龍通道，

水陌洞開。赤文玉書，驛龍風馳。

北海廣澤龍王右語同前

中央黃帝召龍真文

中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文  
中央黃帝召龍真文

君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望

君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望

君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望

君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望  
君祿所望

正音

中山神呪，召龍上雲。制會黃河，

九水河源。不得怠縱，善惡悉分。千

妖萬姦，上對帝君。莫有干試，太陽激

熾。赤書玉字，宣告普聞。

中央九江水帝、水府一切龍神

解穰星運醮十一曜祝文


右十一曜真形符篆，出太上玉匣

正法，用黃羅絹或紙朱書，以穰本命照

臨之厄。焚奏佩帶，消灾治病，出入往

來，所向皆吉。

太陽真君真形符呪



東望扶桑宮，稽首朝鬱儀。太陽


洞明景，寥寥何所思。今我拜金色，候

天望英姿。皇華將玉女，臨軒降此時。

右乞為奉道某，解穰灾運，增益年

齡，謹奏。以下並同

太陰真君真形符呪




仰望顧八表，惟月孕陰精。中有

太素皇，夫人駕綠駟。耀華光二極，混

明照三清。殷懃求至道，五色下來迎。

木星真君真形符呪




歲星乘木德，展轉耀東鄉。臨天

滋潤澤，正色晃明皇。尋花歌浩漾，擲


水詠芝房。經時頻禱祝，獲福自然長。

火星真君真形符呪




芒角森龍鳳，威光叱十方。丹剛  
耀五夜，朱火焰三邊。晶明符正炁，劍  
戟煥兵權。攙搶應滅跡，孛彗敢當前。

金星真君真形符呪




太白凌清漢，騰霜耀素英。亭亭  
浮瑞彩，皎皎盛長庚。鋒高能禦寇，色  
潤每降兵。推窮符曆數，合道與長生。

水星真君真形符呪




妙哉符五炁，髣髴見辰門。嵯峨  
當丑位，壬癸洞靈君。分輝凝皎潔，盼  
蜚赴思存。仙歌將舞蹈，良久下金天。

土星真君真形符呪




高穹符戊己，藏陸起重霄。五行  
尊暗曜，九土見光昭。甘石推留伏，陶  
巫筭沈寥。上仙垂雨露，伏地禮空謠。

羅喉真君真形符呪




神首循黑道，冥冥超至靈。暗明  
期朔望，陽德晦陰精。高鎮黃幡闕，矛  
戟耀霜鈴。至心俟多福，稽首諷真經。

計都真君真形符呪




處暗表陰德，豹尾鎮星宮。怒指  
摧山嶽，權雄暝太空。龍蛇生怪狀，變  
異忽昏蒙。主人長壽福，禳應在恪恭。

紫炁真君真形符呪



受制宗元帝，含精耀紫微。陰陽  
乘運極，幽顯闕靈機。玉輿登廣漢，金  
鈴步斗飛。四宿循周度，九土尊天威。


月孛真君真形符呪



太陰光五緯，精魄育羣生。青桂  
黃華輔，鬱羅保素靈。旄頭分怪狀，彗  
尾或潛經。舍次流灾福，齋修洞杳冥。

南斗祝文符出《南斗經》，祝出《南斗儀》

南斗第一天府司命上相鎮國真君  
靈符



稽首南辰，第一之星，號曰司命，  
實掌命根。今有弟子，立壇告星，上奏  
天司，仰投化鈞。惟天上相，鎮國主  
兵，願賜分光，俯鑒丹誠。續以命元，


永保安寧，弟子歸命，願得長生。

右謹奏上天府司命真君，乞為奉道某，增延命祿，消解灾殃。謹奏。

年 月 日具位姓 某 宣奏

已下右語同，止換六星聖號。


南斗第二天相司錄上將鎮嶽真君靈符



稽首南辰，第二之星，號曰司錄，

實紀生人。今有弟子，然燈告真，注想丹天，長生之庭。惟天上將，鎮嶽主兵，迂景分光，鑒映翹勤。注名丹錄，永錫年齡，弟子歸命，願得長生。

南斗第三天梁延壽保命真君靈符




稽首南辰，第三之星，號曰延壽，

主制年齡。今有弟子，象斗延真，冥星南極，河漢之津。惟斗天梁，濟度羣


倫，願賜降接，得免灾屯。續以延壽，介福如春，弟子歸命，願得長生。

南斗第四天同益筭保生真君靈符



稽首南辰，第四之星，號曰益筭，御炁生神。今有弟子，醮告仙真，結志南昌，太微之庭。惟斗天同，壽命所經，願垂矜允，丹錄書名。介以者年，永保無傾，弟子歸命，願得長生。


南斗第五天樞度厄文昌鍊魂真君靈符



稽首南辰，第五之星，號曰度厄，

消蕩灾屯。今有弟子，招真致靈，翹想朱陵，文昌之辰。惟斗天樞，開闔化鈞，願流道炁，制魄招魂。賜以長年，善業增新，弟子歸命，願得長生。


南斗第六天機上生監簿大理真君靈符



稽首南辰，第六之星，號曰上生，掌握天經。今有弟子，好道希真，歸向離宮，星紀之庭。惟斗天機，組織乾文，願垂光景，庇護身形。監領簿錄，注福延齡，弟子歸命，願得長生。

北斗金玄羽章出《北斗金玄羽章》

北斗陽明金玄羽章




貪狼延生，回真四靈，流輝下映，洞達玄冥。七元紀籍，名列紫文，保身續壽，永亨利貞。耳目開爽，魂魄長寧，攝養精氣，與神同明。延生自然，上升玉清，弟子歸命，願得長生。



右謹奏上天蓬貪狼太星君，乞爲奉道某，消灾度厄，增福延生。謹奏。  
年 月 日具位姓 某 宣奏


已下右語同，止換七星聖號。  
北斗陰精金玄羽章



巨門延命，玄靈散陳，丹田通暢，運合仙真。七元定籍，名列紫文，護身注壽，福慶惟新。辟除妖惡，善瑞日臻，去來無礙，與神同倫。延命自然，上生玉宸，弟子歸命，願得長生。

右語同前。


北斗真人金玄羽章



祿存度厄，高僊上靈，流輝徧照，內外肅清。七元錄籍，名列紫庭，扶身延壽，祿位長亨。臟腑開朗，動止咸


寧，光運合景，與神同榮。度厄自然，上昇玉京，弟子歸命，願得長生。

北斗玄冥金玄羽章




文曲消灾，玄黃開陽，仙靈隱見，朗徹十方。七元掌籍，名列紫房，衛身益壽，長啓福祥。盟真降祐，滌蕩凶殃，華精烝結，與神同鄉。消灾自然，上升玉堂，弟子歸命，願得長生。

北斗丹元金玄羽章




廉貞扶衰，真宗降靈，流霞散敷，仙仗交盈。七元典籍，名列紫營，固形養壽，慶合連並。高玄接引，優遊五明，駕景飛翔，與神同靈。扶衰自然，上昇玉庭，弟子歸命，願得長生。

北斗北極金玄羽章



武曲散禍，玄映御空，威靈備守，妖邪絕蹤。七元注籍，名列紫彤，榮身增壽，享福無窮。仙官扶衛，步躡雲中，正真降籍，與神同聰。散禍自然，上昇玉宮，弟子歸命，願得長生。

北斗天關金玄羽章



破軍益筭，明霞散敷，流光普浹，真炁長扶。七元度籍，名列紫書，治身增壽，常處歡娛。飛仙蹈舞，遊宴玄都，徹視表裏，與神同居。益筭自然，上昇玉虛，弟子歸命，願得長生。

太極妙化混洞赤文




灑	灑	灑	灑	灑	灑	灑	灑	灑	灑	灑	灑	灑	灑	灑	灑
灑	灑	灑	灑	灑	灑	灑	灑	灑	灑	灑	灑	灑	灑	灑	灑
灑	灑	灑	灑	灑	灑	灑	灑	灑	灑	灑	灑	灑	灑	灑	灑
灑	灑	灑	灑	灑	灑	灑	灑	灑	灑	灑	灑	灑	灑	灑	灑
灑	灑	灑	灑	灑	灑	灑	灑	灑	灑	灑	灑	灑	灑	灑	灑
灑	灑	灑	灑	灑	灑	灑	灑	灑	灑	灑	灑	灑	灑	灑	灑
灑	灑	灑	灑	灑	灑	灑	灑	灑	灑	灑	灑	灑	灑	灑	灑


玄師曰：太極妙化，神靈混洞。赤文章書，天真皇人，降玉隆騰勝天，授虛皇天尊靈寶大法，謂東華上卿、洞神大夫，領下元生籍左官，及諸仙官，曰九霄總梵、八帝治天，非混洞赤文，不能攝化九陽而明天度。是以神霄玉清虛皇天，泛上靈景華九陽清真虛梵之炁而成天境；丹霄南極玉文天，泛丹靈妙宰洞陽景真元梵之炁而成天境；碧霄太虛真極天，泛廣靈太華上陽元真靈一之炁而成天境；玉霄玉靈素華天，泛玉靈素華純陽至真元一之炁而成天境；太霄太虛真元天，泛太靈洞華三陽九真太一之炁而成天境；琅霄素靈皓元天，泛素靈皓華六陽洞真至一之炁而成天境；紫霄玄靈上極天，泛元靈紫華清陽妙真天一之炁而成天境；景霄妙靈寶華天，泛妙靈寶華景陽精真虛一之炁而成天境；青霄玉華無極天，泛青靈玉華元陽天真純一之炁而成天境。赤文化混洞，混洞化彌羅，總天元九炁之道，下復九因，至八梵真言，亦此文化也。是以太丹

田內，有帝宮宛利城棄賢世界，梵寶丹靈赤帝君所治，中有朱陵之府、流火之庭、火炎之宮，赤明之館，丹丘火池，元始天尊鍊真文之所化。梵也天中，中下二真，由不能得此，吾以此文、混沌梵元圖，並付之於汝，此去六天、運亨、壬辰、合度、庚子、政化、自然、敷露，其諸秘妙符文，應皆莫可測矣。


正東震上青書赤榜云 震宮洞青之炁




東南巽上黃書黑榜云 巽宮梵行之炁



正南午位朱書白榜云 離宮洞陽之炁



西南坤上黃書黑榜云 坤宮梵陽之炁



正西酉位白書青榜云 兌宮少陰之炁




西北乾上黑書黃榜云 乾宮梵通之炁



正北子位黑書赤榜云 坎宮洞陰之炁



東北艮上黃書黑榜云 艮宮梵元之炁



右八榜八纂，列于下級之邊。

亥上為天門，青書黑榜。天門在亥上，謂以六陰所極之地也，非取乾位。後人謂乾巽為門戶，誤也。


巳上為地戶，黃書赤榜。巳為六陽所極之地

寅上為日門，黃書青榜。三陽之地  
中上為月門，黃書白榜。三陰之地


右四榜，列于中壇之四隅，用長纂

八枚。青繩纏定


東方卯地朱書青榜云 青華元陽之門




東南辰地白書黃榜云 始陽生元之門




下方巳地黃書赤榜云 九靈皇真之門




南方午地黃書赤榜云 洞陽太光之門




西南申地白書黃榜云 元陽高晨之門




西方酉位黑書白榜云 通陰金闕之門




西北戌位白書黃榜云 九僊梵行之門




上方亥位青書黑榜云 大羅飛梵之門



北方子位青書黑榜云 陰生廣靈之門



東北寅地白書黃榜云 靈通禁上之門



右十榜二十八纂，列於內壇之四

邊。


三級門榜二十四枚，刻木板為之，上下畫飛僊雲炁之形，務取精巧。三級之外，立花柱，高三尺，以大青繩五百尺縻之，名曰護淨隔凡。壇之下級，開天門地戶、日門月門。下級之上，安十方香案。三級皆隨廣狹，設薦褥。

天師張萬福曰：昔遊江漢，所在宮觀，皆築土構木作壇，建立纂榜，並皆如法。其纂雕木漆畫，安蓮花芝草，上置火珠。其榜額，即雲龍鸞鳳擎捧，或金銅蓮花裝飾。凡遇修建，布置安排，醮罷撤去，仍置大漆函匣，盛貯方表法儀。三官帳在壇之東，五師位在壇之西，各作帳幄。備圓像几案，供養如式。三官主三元考校之籍，證錄齋功。五師為開度之宗師，資存念之首，皆宜列位於齋壇左右也。

伏見張、杜二先生壇圖，止是設三級壇行事，別無堂殿鋪置。像設之儀，所以上級安三尊像，壇之左右設三官、五師幄，一如朝廷圓丘之儀，此方見古意也。

九祖位在東南，遷拔九幽，洗滌玄祖，宜設位座，遙對壇所也。土地位在西南，關召敷奏，傳感上玄。凡建齋壇，土地為首，亦宜設位，遙對壇所也。


太上招真符



右青紙朱書，如三皇文長短。上下標軸，施之於壇中。

玄中監齋三師位符，皆非天篆，乃世人意，不必施用。


壇圖




右並取張、杜二先生序事儀，契勘編集，以備稽考，精修之士，當有取焉。

安宅歸神符


東方




南方




西方




北方



中央




乾宮神




坎宮神




艮宮神




震宮神




巽宮神




離宮神




坤宮神




兌宮神




堂




門




門




門




門




門




井




大門




中門




後門




安宅



竈



竈





之。

右符二道，用青紙朱書，隨牒奏

祈嗣道場真文 保胎道場通用

東方青帝祈嗣真文



正音

祈彥荒正，北台元旋，梵形結生，

帝火洞遷。求離柏名，希樓都玄，天觀

浩劫，女房幾延。景命神魔，綠英回

檀，威屢碧戚，華瀾過壇。公都阿吏，

雲符月淵，仙握流微，慶落孤賢。東方

九炁，保胎真文，上奏諸天，祈嗣延生。

右靈篆，上告三界無極神鄉延生

之府，東方無極保胎神王、長生大聖、

無量度人，乞為奉道某同室，若衆緣止云等

赦宿愆於曩劫，降元炁於萬天，掃蕩河

源，斷除胎注，保承傳於慶緒，開孕化

於生門，善果臻身，吉祥如意。謹奏。

年 月 日高功半銜姓 某 宣行

南方赤帝祈嗣真文

祿祿 瑩瑩 纒纒 纒纒 纒纒 纒纒  
 纒纒 纒纒 纒纒 纒纒 纒纒 纒纒  
 纒纒 纒纒 纒纒 纒纒 纒纒 纒纒  
 纒纒 纒纒 纒纒 纒纒 纒纒 纒纒  
 纒纒 纒纒 纒纒 纒纒 纒纒 纒纒  
 纒纒 纒纒 纒纒 纒纒 纒纒 纒纒

正音

九獸鬱無，曠圖日殊，酆曲鬼神，  
 正頤溫甦。望祕蕭竟，案蓋玄胡，舊井  
 逼府，渾謀宛迤。雅協仙梵，芝格乘  
 徐，建土生屈，道玄庶吳。律攬角媒，  
 乾卑漫狐，萬畔逸度，天耀傳侔。

西方白帝祈嗣真文

緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇

正音

羅肩野垂，騫尼偃池，矧婁尹虛，  
 機泰迎埤。宴月霞昇，玄默瀆齊，景瑤  
 綠瑒，交攀近師。宛樂大藪，勤封陂  
 時，骨夜求睹，部目引宮。歌逾昭樂，  
 鼎瑄赤容，飛屢耿名，仙庭泊峰。

北方黑帝祈嗣真文

緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇  
 緇緇 緇緇 緇緇 緇緇 緇緇 緇緇

正音

苟蕪猴餘，琬具凝浮，威曠安迎，  
 冥居抽臺。涇澥尸枚，九真迷崖，阿都  
 子他，平奚海嘉。魯登丞丕，曷樹頤  
 陀，木罔魁溟，玄除願華。斗畢觀齒，

明塑灑差，洞鎮希閱，天句衢羅。

中央祖炁玉曆寶文

正音

真陽開化，梵炁流通，金闕在上，玉府居東。鬱結五文，煥散九空，妙炁自然，蘊奧難窮。三靈共貫，萬聖攸宗，參稽學行，標紀真功。以神俱契，

與道合同，安鎮生錄，億劫無終。

削過玉文

舊本注云：祈嗣保胎通用，可謂重疊，永清研之恐誤，曷若用之於上清修真謝罪之屬，宛合意旨。

東方始青削過玉文 黑書青紙

東方始青，陽霞寶真。玉符告命，上召震庭。青帝真君，監生度人。玉司主錄，制魄拘魂。削兆死過，度兆生宮。得乘綠輶，飛昇霞宸。

右準《四極明科》，修崇已後右語並同

寶齋，不解其方，有失次第，動入罪鄉。今奏玉司真符，乞為奉道某同室某等，今欲易之識名，未審入此為然否，更在取日如何。解除罪犯，咸與赦原。太微冠帶於七祖，南宮返形以上仙，使後世子孫，永保綿綿，得奉虛皇，俱契玄元，一如青帝玉司君符命。

年月日 高功半銜 宣告

南方太陽削過玉文 青書紅紙

南方太陽，丹靈洞天。玉符告命，上召左宮。赤帝真君，保生度人。玉司主錄，鍊化精神。削兆死過，度兆生宮。得乘絳輶，飛昇丹宸。

西方少陰削過玉文 黃書白紙

西方少陰，皓靈通真。玉符告命，上召素天。白帝真君，濟生度人。玉司主錄，斷截邪凶。削兆死過，度兆生宮。得乘素輶，昇入飛宸。


北方太陰削過玉文 白書黑紙

北方太陰，玄精通靈。玉符告命，上召玄天。黑帝真君，長生度人。玉



司主錄，開度幽源。削兆死過，度兆生宮。得乘綠輶，飛昇玄宸。

中央大黃削過玉文 朱書黃紙



高皇玉真，上聖九玄。玉文固魄，保形鎮神。三鍊九成，我道自然。超度酆都，永離刀山。三塗五苦，不拘我身。上告玉司，注我名真。青綠紫簡，得道之篇。三元齊景，九帝同軒。得策紫虛，上造帝宸。福流七祖，同獲上仙。

道門定制卷之八

道門定制卷之九

西蜀道士樸庵呂元素校定  
朱陵真隱性齋胡湘龍編校

文昌聖位一百二十分

第一狀

- 鬱單無量天帝
- 上上禪善無量壽天帝
- 梵監須延天帝
- 寂然兜術天帝
- 波羅尼密不驕樂天帝
- 洞元化應聲天帝
- 靈化梵輔天帝
- 高虛清明天帝
- 無想無結無愛天帝

第二狀

- 玉京山應供靈寶玄中大法師
- 上古經師君
- 上古籍師君
- 上古度師君
- 靈寶監齋大法師

第三狀

- 上元一品賜福天官
- 中元二品赦罪地官
- 下元三品解厄水官
- 青靈始老九炁天君
- 丹靈真老三炁天君
- 皓靈黃老七炁天君
- 五靈元老五炁天君
- 玄靈元老一炁天君。

第四狀

- 日宮太陽帝君
- 月府太陰皇君
- 木星重華真君
- 火星執法真君
- 金星天皓真君
- 水星伺辰真君
- 土星地侯真君
- 交初羅喉真君
- 交中計都真君
- 天乙紫炁真君
- 太乙月孛真君

第五狀

- 南斗長生大帝
- 好生韓君丈人
- 注生大司馬
- 南斗天府司命上相鎮國真君
- 南斗天相司錄上將鎮嶽真君
- 南斗天梁延壽保命真君

南斗天同益筭保生真君

南斗天樞度厄文昌鍊魂真君

南斗天機上生監簿大理真君

第六狀

北斗中高上玉皇尊星君

北斗玄卿大帝

北斗天蓬貪狼星君

北斗天内巨門星君

北斗天衝祿存星君

北斗天輔文曲星君

北斗天禽廉貞星君

北斗天心武曲星君

北斗天柱破軍星君

北斗洞明外輔星君

北斗隱元內弼星君

北極天蓬大元帥

北極天猷副元帥

北極翊聖儲慶保德真君

北極佑聖治世福神靈應真君

第七狀

紫微垣：

相星星君 總百司，掌邦教，佐帝王，安邦

國，集衆事。

四輔星君 輔佐北極

尚書星君 主納言諮謀

陽德星君、陰德星君 二星主周魯鎮撫

文昌上將星君 建威武

文昌次將星君 曰尚書正左右

文昌貴相星君

文昌司祿星君 賞功進祿

文昌司命星君 曰太史，主滅咎

文昌司寇星君 曰大理佐理實

第八狀

太微垣：

三公內坐星君

元卿內坐星君

上台司命上星星君 主天子

上台司命下星星君 主文

中台司中上星星君 主諸侯三公

中台司中下星星君 主卿大夫

下台司祿上星星君 主士

下台司祿下星星君 主庶人

少微處士星君

少微議士星君

少微博士星君

少微大夫星君 少微四星，黃籙則賢士舉。

進賢星君

東壁左星星君 主文章圖書府

東壁右星星君 星明，則王者興道術，行國

變。君子已上，並出《晉史·天文志》。

第九狀

青城山五嶽上司九天丈人儲福定

命真君

潛山九天司命上卿保生真君

廬山採訪使者九天應元保運真君

九天大司馬真君

九天定貴續命真君

九天定祿萬福真君

天曹太黃萬福真君

天曹定名玉曆真君

天曹引進真官

第十狀

先聖周文憲王

第十一狀

至聖文宣王

第十二狀

東嶽天齊仁聖帝

南嶽司天昭聖帝

西嶽金天頤聖帝

北嶽安天元聖帝

中嶽中天崇聖帝

地府酆都大帝

北府生祿保壽侯

水府扶桑大帝

江瀆昭靈孚應威烈廣源王、

河瀆顯聖靈源王

淮瀆長源王

濟瀆清源王

第十三狀

七曲山司祿主者執貢舉真君

英顯武烈忠佐廣濟王

第十四狀

太清九炁文昌宮僊官

太清紫蓋宮夫子君謂師也，非宣父。

太清東井清明君

清明決了吏

太清九奇宮五經孔炁君

太清主印綬天王玉女

太清玉曆素女

當旬通章玉女

第十五狀

上元道化真君

中元護正真君

下元定志真君 建節監功大將軍

當處土地正神 當境城隍主者

監護貢闈正神 臨視考校正神

已上聖號，內有周公、孔子、英顯

三位，各依班次在前，庶便於降真，仍

別備錢馬奏獻，不在百二十分之數。

安宅七十二位神或作四狀，或作兩狀

住宅歲德尊神、太陰夫人、上元唐將

軍、中元葛將軍、下元周將軍、太陽大

將軍、太陰大將軍、左青龍君、右白虎

君、前朱雀君、後玄武君、東方甲乙寅

卯木神、南方丙丁巳午火神、西方庚辛

申酉金神、北方壬癸亥子水神、中央戊

己辰戌丑未土神、六甲將軍、六丁玉

女、九宮貴神、八卦大神、日遊月建神、

春勾芒神、夏祝融神、秋蓐收神、冬玄

冥神、天神、地神、十二命坐神、四激三

刑神、八魁九坎神、弦望晦朔神、陰陽

滅沒神、天德歲德神、日德月德神、天

殺地殺神、陰殺陽殺神、天厭地厭神、

生炁死炁神、雷公霹靂神、金鑽玉堂

神、奏書博士神、黃旛豹尾神、大禁小

禁神、伏兵大禍神、歲刑歲破神、招搖

咸池神、天羅地網神、蠶官蠶命神、畜

官畜命神、大墓小墓神、喪門弔客神、

天狗地囊神、官符病符神、金神七殺

神、陰宅陽宅神、天福宅德神、天倉天

府神、天門地戶神、人道鬼路神、五土

眷屬神、主簿孝眷神、年刑月害神、日

惡時凶神、五鬼旺符神、大耗小耗神、

倉庫厨堂神、司命竈神、本宅土地、井

泉龍神、飛廉郭忌神、門丞神、戶尉神。

安墳神位七十二分

土府太皇君

陰陽元君

蒿里老人

第一壘色潤地土皇君

第二壘剛色地土皇君

第三壘石脂色地土皇君

第四壘潤澤地土皇君

第五壘金粟澤地土皇君

第六壘金剛鐵澤地土皇君

第七壘水制澤地土皇君

第八壘大風澤地土皇君

第九壘洞淵無色綱維地土皇君

土中司命神

五土眷屬神

元德地元卿

皇德地元庭上皇

帝德地虎口土龍君

王德地元心土大將軍

原德地元福土令

水德地土下令長

里德地始甲土父母

福德地始玄土宗正

昌德地土下二千石君

東方甲乙寅卯木神

南方丙丁巳午火神

西方庚辛申酉金神

北方壬癸亥子水神

中央戊己辰戌丑未土神

九宮貴神 八卦大神

太陰太陽神 日遊月建神

今年太歲神 當處土地神

天柱山神 功曹山神 官國山神

冠帶山神 大墓山神 小墓山神

句陳山神 沐浴山神 天劫山神

刑劫山神 地劫山神 地尸山神

傳送山神 伏屍山神 穀將山神

始生山神 天倉山神

已上一十七將係內從

青龍山神 白虎山神 朱雀山神

玄武山神 天牢山神 司命山神

行痕山神 了戾山神 印山山神

笏山山神 綬山山神 大德山神

鈎鎖山神 玉堂山神 金鑽山神

天門山神 華蓋山神 生炁山神

死炁山神 陽炁山神 陰炁山神

已上一十一將係外從

**更籍醮地府七十二司聖位**

地府管諸司都僉押案判官

地府管天下人生死案判官

地府管生死句押推勘案判官

地府管天下人齋僧道案判官

地府管人修功德案判官

地府管人自看經案判官

地府管人三夏月齋戒案判官

地府管取天人案判官

地府管注生貴賤案判官

地府管死事案判官

地府管掠剩案判官

地府管增延福壽案判官

地府管官職案判官

地府管曹吏案判官

地府管陳詞狀公私案判官

地府管追罪人照證案判官

地府管瘟疫案判官

地府管宿業疾病案判官

地府管山林鬼神事案判官

地府管水府案判官

地府管飛禽案判官

地府管畜類案判官

地府管盜賊案判官

地府管一十五種善生案判官

地府管一十五種惡死案判官

地府管欺昧案判官

地府管行雨地分案判官

地府管無主孤魂案判官

地府管人平等案判官

地府管風雨案判官

地府管僧道案判官

地府管城隍案判官

地府管刑獄案判官

地府管觸犯宅神案判官

地府管土地案判官

地府管精怪案判官  
 地府管魍魎案判官  
 地府管久疾失魂案判官  
 地府管枉死案判官  
 地府管索命案判官  
 地府管涼汗案判官  
 地府管行黃病案判官  
 地府管磨勘案判官  
 地府管放生案判官  
 地府管殺生案判官  
 地府管施藥救人案判官  
 地府管善簿案判官  
 地府管惡簿案判官  
 地府管忠孝案判官  
 地府管姦逆案判官  
 地府管注財案判官  
 地府管注禍案判官  
 地府管胎生案判官  
 地府管卵生案判官  
 地府管濕生案判官  
 地府管化生案判官  
 地府管水族案判官  
 地府管長壽案判官

地府管催生案判官  
 地府管積貯案判官  
 地府管還魂案判官  
 地府管夭折案判官  
 地府管五逆案判官  
 地府管劫掠案判官  
 地府管墮胎落子案判官  
 地府管鰥寡孤獨案判官  
 地府管減促福壽案判官  
 地府管行毒藥案判官  
 地府管陰謀行妒案判官  
 地府管引路案判官  
 地府管罔象案判官鬼祟也  
 地府管都察案判官

**黃籙羅天第一度召請神狀**

**第一狀**

三狀內，皆有蜀中君臣神祇，其或他郡國，各有山川群望，隨所奉事增減。

太皞伏羲氏、女媧氏、炎帝神農氏、燧人氏、帝堯、帝舜、夏禹王、殷成湯王、殷高宗、后稷、舜之臣，周之祖周文

王、周武王、漢高祖皇帝、漢孝文皇帝、漢光武皇帝、唐高祖皇帝、唐太宗皇帝、蜀竇王、蜀望帝、蜀魚鳧王、蜀昭烈皇帝。

**第二狀**

義仲、和仲、義叔、和叔、臯陶、禹之臣殷阿衡伊尹、殷相傅說、齊太公、魯周文憲王、周公燕召公、鄧文絳侯蕭相國、平陽懿侯曹相國、文成留侯、淮陰侯韓王信、舞陽樊侯噲、西漢文翁廬江伯、自比以下，皆功德於蜀。東漢高公陳留伯、蜀相鼈靈、諸葛武侯王、壽亭侯關將軍、西鄉侯張將軍、龐靖侯、唐相李衛公、忠定張公。

**第三狀**係祀典神

廣佑英惠王、昭靈廣惠王、英烈昭惠顯威濟王、英顯武烈忠佑廣濟王、廣利大王、東嶽孚應炳靈君、翊順英濟威武侯、金馬靈光侯、靈格惠應豐澤王、佑德助順靈濟昭烈王、孚佑王、威濟侯、南康郡王、生祿保壽侯、慈姥善應夫人。或有封境內，合供養神祇，亦可添。其如淫祀，不該祀典，不可添。

隨願往生道場奏狀

第一狀

洞真大道金闕自然高真元始天尊  
洞玄大道玉宸元皇道君靈寶天尊  
洞神大道金闕玄元老君道德天尊

第二狀

東極宮中大慈仁者尋聲赴感太乙救苦天尊  
大聖隨願往生天尊  
東方多喜國土玉寶皇上慈悲救苦天尊

南方大堂國土玄真萬福好生救苦天尊

西方西那國土太妙至極平等救苦天尊

北方浮黎國土玄上玉宸大慈救苦天尊

東北方妙樂國土度仙上聖溥濟救苦天尊

東南方難勝國土好生度命無量救苦天尊

西南方耀真境界善救莊嚴瓊光真人

苦天尊

西南方宛黎國土太靈虛皇溥度救苦天尊

西北方鬱單國土無量太華惠化救苦天尊

上方鈞天國土玉虛明皇徧慈救苦天尊

下方鬱察國土真皇洞神廣濟救苦天尊

玉京化主靈寶玄中大法師

靈寶上古經師

靈寶上古度師  
靈寶監齋大法師

第三狀

東方華林境界惠靜莊嚴靜境真人

南方梵天境界端化莊嚴真老真人

西方金光境界利益莊嚴法寶真人

北方真定境界救度莊嚴救苦真人

東北方碧霞境界妙寂莊嚴真定真人

人

西北方妙道境界真僊莊嚴濟苦真人

上方玄都境界紫霄莊嚴妙行真人

下方水運境界淨土莊嚴太極真人

第四狀

大慈溥濟真人

東嶽天齊仁聖帝 地府酆都大帝  
水府扶桑大帝 當處土地真官

太上慈悲道場九幽大齋奏狀

第一狀

玉清元始天尊 上清靈寶天尊  
太清道德天尊

第二狀

太乙救苦天尊 上元賜福天官  
中元赦罪地官 下元解厄水官  
青帝護魂真君 赤帝養炁真君  
白帝侍魄真君 黑帝通血真君  
黃帝中主真君

第三狀

靈寶玄中大法師上古經師君

上古籍師君 上古度師君

監齋大法師 飛天神王

大慈大悲妙行真人

大慈大悲溥濟真人

察命童子 護戒威神

五帝考官 九府考官

第四狀

地府酆都大帝 水府扶桑大帝

東嶽天齊仁聖帝九壘土皇君

四明真公

紂絕陰天宮大魔王

泰殺諒事宗天宮大魔王

明晨耐犯武城天宮大魔王

恬照罪氣天宮大魔王

宗靈七非天宮大魔王

敢司連宛屢天宮大魔王

第五狀

地府太素妙廣真君

陰德定休真君

洞明溥淨真君 玄德五靈真君

最勝耀靈真君 寶肅昭成真君

太山正道真君 無上正度真君

飛魔演慶真君 五化威靈真君

第六狀

六曹判官、五嶽掾吏、巨天力士、

執罰神兵、九億鬼王、牛頭獄卒吏、諸

獄靈官、土地真官、四直申奏使者。

火星道場，於消灾百二十分內，去

五嶽本地水府三元四神，兩幅填火星

官屬兩班。

一狀

熒惑星君，其精所變：

析旦星君、蚩尤旗星君、昭明星

君、司詭星君、天攙星君、赤疇星君。

熒惑星，其氣所變：

天陰星君、晋若星君、官張星君、

天惑星君、天崔星君、赤若星君、蚩尤

星君。

一狀

南方主夏祝融神

南方丙丁巳午火神

南方朱雀將軍

火精神君

保胎祈嗣道場通用奏狀

第一狀

清微天寶君

禹餘靈寶君

太赤神寶君

鬱單無量天帝

上上禪善無量壽天帝

梵監須延天帝

寂然兜術天帝

波羅尼密不驕樂天帝

洞元化應聲天帝

靈化梵輔天帝

高虛清明天帝

無想無結無愛天帝

第二狀

先天太后太乙元君

九靈太妙白玉龜臺夜光金真萬炁

祖母元君

無上雌一帝真九光聖母

高上虛無玄元混化初真聖母

三天陽魂太極聖母

朱光洞陰二景聖母

三素洞陰太微聖母

大有空洞混沌化素靈妙生神聖母

九華空洞元陽飛生聖母

太陰神光玄極青帝聖母

無上極真太虛天皇聖母

元陽九元鬱靈皓真聖母

北極交靈瑤光太皇聖母

虛無元皇九天絕空聖母

萬炁絕冥紫光列紀聖母

三天真母上元夫人

九天無量太一三昧元君

第三狀

靈寶玄中大法師 上古經師君

上古籍師君 上古度師君

靈寶監齋大法師

第四狀

上元賜福天官

中元赦罪地官

下元解厄水官

青靈始老九炁天君

丹靈真老三炁天君

皓靈皇老七炁天君

五靈玄老五炁天君

玄靈元老一炁天君

第五狀

日宮太陽真君 月宮太陰真君

木星重華真君 火星執法真君

金星天皓真君 水星伺晨真君

土星地侯真君 交初羅喉真君

交中計都真君 天乙紫炁真君

太乙月孛真君

第六狀

北斗中尊星君 北斗玄卿大帝

天蓬貪狼星君 天內巨門星君

天衝祿存星君 天輔文曲星君

天禽廉貞星君 天心武曲星君

天柱破軍星君 洞明外輔星君

隱元內弼星君

第七狀

北極天蓬大元帥

北極天猷副元帥

北極翊聖保德真君

北極佑聖靈應真君

第八狀

南斗長生大帝 好生韓君丈人

注生司馬 天府司命真君

天相司錄真君 天梁延壽真君

天同益筭真君 天樞度厄真君

天機上生真君

第九狀

青城山九天丈人真君

潛山九天司命真君

廬山應元保運真君

九天大司馬真君

九天玉輔上宰

九天四協侍宸

九天建生運炁真君

九天定貴續命真君

九天定祿萬福真君

九天衛房聖母

九天監生大神

九天度厄尊神。

第十狀

天曹太皇萬福真君

天曹定名玉曆真君

天曹引進僊官 本命生年星官

本命生月星官 本命生日星官

本命生時星官



第十一狀

東嶽天齊仁聖帝

南嶽司天昭聖帝

西嶽金天順聖帝

北嶽安天元聖帝

中嶽中天崇聖帝

地府酆都大帝

生祿保壽侯

江瀆廣源王

淮瀆長源王

第十二狀

左青龍君

前朱雀君

土地真官

中界直符使者

年直功曹使者

日直功曹使者

水府搏桑大帝

河瀆靈源王

濟瀆清源王

右白虎君

後玄武君

上界直符使者

下界直符使者

月直功曹使者

時直功曹使者

昇化遷度道場奏狀

第一狀

東極宮中大慈仁者太乙救苦天尊

九幽拔罪天尊

鬱單無量天帝

上上禪善無量壽天帝

梵監須延天帝

寂然兜術天帝

波羅尼密不驕樂天帝

洞元化應聲天帝

靈化梵輔天帝

高虛清明天帝

無想無結無愛天帝

第二狀

九靈太妙白玉龜臺夜光金真萬炁

祖母元君

上相方諸宮青童君

上宰西城總真王君

上保太丹宮南極元君

上傅白山宮太素元君

上元賜福天官

中元赦罪地官

下元解厄水官

青靈始老九炁天君

丹靈真老三炁天君

皓靈黃老七炁天君

五靈玄老五炁天君

玄靈元老一炁天君

第三狀

靈寶玄中大法師

上古籍師君

靈寶監齋大法師

嗣師君

左玄王真人

太極徐真人

第四狀

北斗中尊星君

天蓬貪狼星君

天衝祿存星君

天禽廉貞星君

天柱破軍星君

隱元內弼星君

第五狀

南斗長生大帝

注生大司馬

天相司錄真君

天同益算真君

天機上生真君

第六狀

大洞祖師司命太玄真人

上古經師君

上古度師君

女師君

系師君

右玄趙真人

北斗玄卿大帝

天內巨門星君

天輔文曲星君

天心武曲星君

洞明外輔星君

好生韓君丈人

天府司命真君

天梁延壽真君

天樞度厄真君

中洞祖師閣皂山真人

鄭真人

抱樸小仙翁左卿仙侯真君

簡寂陸先生

昇真王先生

興世館孫真人

王屋山真一司馬先生

茅山玄靜李先生

第七狀

青城山九天丈人真君

潛山九天司命真君

廬山應元保運真君

天曹太皇萬福真君

天曹門下引進仙官

九天司馬真君

九天玉輔上宰

九天四協侍宸

九天主女青律官

第八狀

東方無極飛天神王

南方無極飛天神王

西方無極飛天神王

北方無極飛天神王

東北方無極飛天神王

東南方無極飛天神王

西南方無極飛天神王

西北方無極飛天神王

上方無極飛天神王

下方無極飛天神王

第九狀

地府酆都大帝 佐理太上靈君

助理玄滋天君 上相君

太傅君

第十狀

驛亭令 驛亭丞

建節監功大將軍

素車白馬大將軍

當旬通章玉女 當境城隍主者

騰奏火官

第十一狀

上元道化真君 中元護正真君

下元定志真君 左青龍君

右白虎君 前朱雀君 後玄武君

第十二狀

土地真官 里域主者

上界直符使者

中界直符使者

下界直符使者

年直使者 月直使者

日直使者 時直使者

冢訟燈牌

行各七盞，中安三宮三燈，計八十七盞。

燈七盞，奉為三界萬天、十方八

極，乞解冢訟，斷除復連。燈七盞，奉

為天曹六司、掌籍官屬，紀功錄善，削

死注生。燈七盞，奉為三官五帝、四司

曹屬，和釋冤仇，消平注訟。燈七盞，

奉為酆都大帝、一切官屬，原赦祖禰，

一切冤囚。燈七盞，奉為水府大帝、一

切官屬，消解殃考，誓絕盟言。燈七

盞，奉為五嶽十山、佐命官屬，消除訟

逮，止息牽連。燈七盞，奉為城隍主

者、祀典神祇，放釋幽牢，解除呪詛。

燈七盞，奉為九陰長夜、諸獄幽徒，念

道歸真，轉昇淨境。燈七盞，奉為上代

家親、先亡眷屬，開明心地，超達人天。

燈七盞，奉為前生今世、債主冤家，永

斷冤讎，並皆解脫。燈七盞，奉為外道

行病、鬼王等衆，各回正念，無復憑凌。

燈七盞，奉爲一切不具足、受苦衆生，懺悔前非，生具足相。

道門定制卷之九

道門定制卷之十

西蜀道士樸庵吕元素校定

朱陵真隱性齋胡湘龍編校

更籍換案道場五戒牒

太上更籍換案續命延年道場五戒壇牒

據某入事意畢，當壇看詳，願悃備見至誠意者，改往自新，歸投大道，欲求啓迪，得以進修。謹按明科，爲傳太上五戒，俾勤行勿怠，降福消災。謹按太上言，天地有司過、司善之神，錄人善惡，以延促壽命。又有三台北斗君，分身散景，常居人頭上，記人功過。又有三尸神在人身，每到庚申日，輒詣天曹，言人過惡。月晦之日，竈君亦然。是日，三官五帝、太一司命、北斗司察鬼、太一八神使者，下詣青靈洞陰北酆三宮，考校世人生死罪福、功過業報。《因緣經》云：天帝常召注筭童子，操青黑二簿，遊行人間，檢量罪福，隨注善惡，上奏天司。司命隨其罪之輕重，

大則奪紀，小則奪筭，罪有餘責，殃及子孫。校定善惡，不輟須臾。善則司命、司錄即與延年，惡則六天魔鬼收繫魂魄。又言，凡世人壽限，皆爲地司所轄，諸天諸帝，按簿檢察，籍定生死，毫分無違。若能自知善力微渺，罪目繁多，恐爲三界官屬、察命童子，收攝神魂，絕其生炁，或疾病纏綿，或灾厄重困，或運臨凶惡，或命在顛危，急致修禳，割財爲信，披露丹誠，建置道場，咨白陰司，更籍換案，首謝所犯生身罪咎，發無上勝心，受太上五戒，即保魂神澄正，壽考康寧，功德巍巍，不可思議。恭對道前，傳受戒品：

第一戒者，當止息慳心，常修宮觀，廣建福田，濟貧拔苦，造像寫經，使壽考康寧，後昆繁盛。

第二戒者，當止息貪心，常懷慈儉，修齋設醮，行道誦經，燒香讚歎，使福田無量，利益衆生。

第三戒者，當止息嗔心，常懷歡喜，遠離人我，慈忍一切，恬淡安閑，使身心和暢，病苦不侵。

第四戒者，當止息妬心，常懷退省，後已先人，柔軟清潤，巧說方便，使一切見聞，悉開智慧。

第五戒者，當止息妄心，常懷正靜，觀想皆空，內外清虛，以合真道，使幻身得度，九祖生天。

牒具如前，今給付某，請如法遵奉，令地司保奏諸天，記名十極神王、三界四司，告下陰府，特爲易短促之年，爲延長之筭，灾苦病患，悉得蠲除，奉持不退，當獲善神擁護，福慧莊嚴，重立玄功，證虛無道。牒到奉行，勿令懈怠，故牒。

年 月 日

給持戒弟子某

傳度師高功銜

大聖持齋護世天尊

大聖持戒濟物天尊

更籍道場申東嶽狀

高功具位姓名

右某據大明國鄉貫奉道某，入事意畢，

當壇恭按僊科，奉行醮事，爲弟子某對太上御前，傳授五戒，俾令佩服，改往

修來。尚慮弟子某，善力么微，罪目盈貫，校定功過，實關岱宗，恐冥官所劾，減筭除年，招延灾患，投詞有請，合具敷陳，謹錄狀申聞東岱嶽泰山天齊仁聖帝聖前，伏乞聖慈，俯憐懺悔，告下所屬靈官，特與弟子某改更簿籍，許以自新，重注生年，解除灾患，庶令枯朽，重拜生成。某干冒聖慈，不勝戰慄之至，謹狀。

年 月 日具位姓 某 狀申

更籍道場地府牒

醮儀，奏納東嶽玉案一隻，筆墨硯筭一副，皆令精好。案紙一百幅，七十二司錢馬七十二分，筆七十二枝，硯子木爲，筭子、墨、案紙，各七十二件。

泰玄都省行壇牒 地府更籍七十

二司判官：

據鄉貫入意畢，當壇看詳，願意灼見

至誠，恭按玄科，合行拯護。伏聞元始符命度人之法，有絕而得生之言；五嶽丈人龍躡之書，有命盡更延之說。謹爲延降高真，恭對道前，傳授太上五戒，俾勤行不怠，却死延生。尚慮弟子某地司記過，陰籍書名，罪咎未除，難致

安吉。謹令備筆墨硯筭案紙七十二分，上獻靈司，乞爲弟子某改更簿籍，別與爲新，須至移文者。

牒具如前，請詳察事意，遵奉教科。特與弟子某，別注生名，落除罪簿，蠲消病否，過度灾危，錄其持戒之功，更賜將來之福。牒到奉行，謹牒。

年 月 日牒

高功銜姓某押

三天扶教正一輔玄靜應真君判泰

玄都省張

黃籙等齋職榜

黃籙大齋壇

據某，略入事意至滿散，恭以上聖尊崇，真儀嚴重，必資衆職，同寅協恭，對越清光，敷揚妙典，庶使圓成勝事，副彼欽崇，具職品于後。

班首法師，請某州縣宮觀道士姓名

充。

班首，職在高功之上，必以道德尊高者，方當此選。苟無其人，別使之可也。

高功法師，請某州縣宮觀，具位職

銜法師姓名充。

六職高功，須受大洞籙，方居師任。如未及大洞，則靈寶中盟亦宣行。蓋齋法出於靈寶故爾，出杜天師儀。又云都講以下，並不用法師字，惟高功一人稱之，謂教法故也。

都講，請某州縣宮觀道士姓名充。

監齋，請某州縣宮觀道士姓名充。

侍經，請某州縣宮觀道士姓名充。

侍香，請某州縣宮觀道士姓名充。

侍燈，請某州縣宮觀道士姓名充。

知磬，請某州縣宮觀道士姓名充。

此外更有知章表一員，合請後生精明、

音韻清暢者一員爲之。蓋章表，醮中緊要法事，若衆職中年高目昏、進對疏簡者，或當宣章表往往乖誤，非唯冒瀆，不滿施主之意。

知供養，執手鑪，直壇、佐壇等職，

隨事具之于末。

右伏請各揚乃職，守講僊科，交通

天人，以格殊貺，共成勝事，毋致怠荒。

年 月 日

榜 齋壇

都講、監齋不列銜，蓋並在彈糾之限。

高功法師

班首法師

夜齋榜

姓 押

姓 押

夜齋利濟，正欲廣傳經教科儀，皆以兼濟四生

六道爲事。凡大醮勝緣，幽明鬼神，一切有情，皆俟望利益所及也，則施主法師，皆當推此心，普利六趣，不可循舊習，拘於五姓孤魂，此實爲美大功德。舊無夜齋榜，後人增加，言辭多蕪鄙，略無啓導訓教之言。今別修定，庶幾太上救度之意。又見大醮，召諸第三度，多在當時，坐席又去壇場疏遠，倉卒呼來，略具盤飧喧湔片時餉，焚紙遣去，甚非使之聞經聽法之意。當同亡者，一夜召請，臨壇授戒，次夜設斛津濟，再爲勸誡，然後遣送，方表大緣濟度之義。

黃籙大齋壇

據略入意至滿散，兼爲三界輪迴、九泉六道等衆，當境五姓孤魂，奏吉金籙白簡，給付九真戒牒，開建太上慈悲津濟夜齋，以伸濟度本壇。今竊慮所薦天人道等衆，修羅道等衆，五音姓人道等衆，地獄鬼官、冥吏、獄卒、幽徒等衆，常以地獄道爲受罪亡魂，則五音人道，皆是亡魂，不免重復。此以官吏卒爲地獄道，皆在利益之限。蓋上有天人修羅道故爾。餓鬼道等衆，旁生道等衆，旁生謂禽獸則旁首而生，人則上首而生，草木則下首而生，出《莊子·成法師疏注》。深墮輪迴之途，久沉生死之海，去年既遠，生分

別心。天人則矜恃福勝，我慢自驕；修羅則嗔忿強梁，妄作威福；人衆則以富貴貧賤，爲天命所惑，而不加修進；地獄官吏則持心慘刻，不起慈悲；旁生則既墮異趣，難自超離；餓鬼由饕餮無厭，飢火焚灼。率由一性不悟，致令六趣沈淪。今當奉爲建立善功，開明本性，各宜依憑太上道力，諦受九真戒言，懺悔多生，所作不善，堅持正念，不起邪思，改往自新，逋相勸勉。於今日道場中，各得悔悟。內有已先得度者，願推方便，開曉未聞，自天人眷屬、地獄官曹，堅固善心，更超勝地。人道等衆，識固有之善性，捨妄歸真。旁生餓鬼之徒，惡業固深，許容懺悔。凡在此席，各體訓言，庶使早出輪迴，同歸善域。尚慮內有強梁蠶鬼、外道妖邪，惡念不悛，強生分別，不相誘諭，務起爭心，恐怖亡魂，擾攘善事，深屬障礙，須至開諭者。

右具如前，各請遵依上件告誡，以生死輪迴爲鑑，速回正念，永遂超升。如內有諸強魂惡爽、妄肆猖狂，仰當處

土地里域主者，押赴天乙北獄，天乙北獄，事考治鬼案之司。依律定罪施行，以明天憲，各宜知悉。

年 月 日

榜 夜齋壇所

高功法師 姓 押

傳度法錄請法詞券出《道藏·受經錄儀》

法辭

弟子具手詞於師，誓盟欽奉不敢違背之意，升壇師為裂券傳度，後人改為四六語詞，寫於錄首，非投詞請法之意，合先具此辭於未行事之時，詣度師投之。


具鄉貫奉道弟子某，年甲月日生，稽首投詞，某宿命因緣，得奉大道，隨事入意，若童子受符，則父母代言。若道士請信進受，則隨先所授錄，令進受某錄，一一詳言之。謹齋寶繒準黃金之信，奉詞上聞，恩惟度師先生，垂愍有心，副此飢渴之望，俾得佩受，永為身寶。若參佩之後，輕泄至真，傳非其人，某當身謝三官，不敢怨道咎師。如違手詞，依科受罪。謹詞。

年 月 日奉詞詣度師某錄先生門下

錄券

國號太歲某朔日甲子，某錄法師姓

名，普告天地水府，名山大川，應化真靈，風雷雲雨，當所主司，同垂鑒證。今有某州縣里，男女弟子，姓名年甲，好道樂法，志願長生，墨詞自誓，請受某錄，依法奉行，不敢輕師慢道，背違盟誓。今與弟子某，分環破券，對三官眾聖，申約弟子，若違今誓，身沒鬼官；若遇三灾八難，眾惱逼身。驗試僊道，不敢怨道咎師，甘心自責，一如太上老君律令。



左畔如前逆寫，來合符文。左右文各占五寸，中等書符。右券文用半幅，黃素一尺二寸。從兩頭書，合十二行。朱書真正，不得行草脫漏。令均調行所，中間滿書符文。用金環一隻，或以銀代青絲貫之，鋪於券上，書刀一口，以刻金環。師、弟子立約，畫一割券，師收左，弟子收右，終身藏之，不敢違墮。

童子保帶式

帶長五尺，青紫為之。其義當是弟子同服師資之訓，書銘于紳，以致不忘之意。



弟子某於度師某公門下請受某錄謹書諸紳永堅皈向之盟

安宅醮竈君牒

北極驅邪院牒 司命竈君二十四

神：

據入事意，竊慮建造竈位，甄泥不潔，位置非宜，及於平時，有所觸犯。今因醮修，併伸禳謝，須至奉牒者。

牒具如前，請詳察誠意，速為祛斥住宅之內妖異故氣，不得停留，及諸魔魅精怪，並行屏逐，務令宅宇肅淨。仍請各安位署，保護居人，火盜公私，永臻安吉。所有觸犯，亦當遵奉正法，咸與原除。牒到奉行，毋致違戾。故牒。

年 月

法師銜

道門定制卷之十

(吳亞魁點校)

## 027 道門十規

經名：道門十規。原題明張宇初撰。一卷。底本出處：《正統道藏》正一部。

### 道門十規

正一嗣教道含無為闡祖光範  
真人領道教事臣張宇初撰進

伏聞聖人以神道設教，太上以虛無為宗，其廣演宏敷，自歷劫以來，愈彰愈著，原其本也，雖有道、經、師三寶之分，而始自太上授道德五千言於關令尹，其所謂無為不爭之旨。始殷三代之初，則廣成子蒙黃帝問道於崆峒，等而上之，道所由立，出乎太上一也。修諸己而合夫內聖外王之道者，則有關、文、莊、列諸子之遺言；治諸世而驗夫清靜無為之化者，則有蓋公、曹參

二公之善政。迨我祖天師立教於東漢，葛仙公、許旌陽演派於吳晉，曰教則有正一、全真之分，曰法則有清微、靈寶、雷霆之日，非究源以求流，必忘本以逐末。然吾道之盛，宋元已稱，特至我朝，欽蒙太祖高皇帝御注道德上下經，立成道門上範，清理道教，崇獎備至，謂道教之設，中古有之，如黃帝謁廣成子於崆峒，祖天師鍊丹於龍虎，役使鬼神，禦灾捍患，所以歷代不磨，禱祈有應，無不周悉。永樂初元，首蒙皇上聖恩申明，眷諭彌篤，務令一遵太祖成憲。由是觀之，吾道之光赫，又豈前之所企及也哉。永樂四年夏，伏蒙聖恩，委以纂修道典，入閣通類。切念臣宇初匪材涼德，學識淺陋，忝竊是懼，徒承乏於遺宗，曷負勝於重任，然雖撫躬慊慊，詔命莫辭，兩承勅旨之頒，時蒙宣室之問，揆之駑劣，慚悚益增，稽之遭遇，喜懼交集。又念吾道自近代以來，玄綱日墜，道化莫敷，實喪名存，領衰裘委，常懷振迪之思，莫遂激揚之志。茲蓋伏遇聖明御極，神睿統天，偃

武修文，成功定難。聖德合於天心，禎祥疊見；皇猷孚於華夏，道德斯昌。實道門千載一時之遇，成太平萬世不湮之典。是用旦夕，搜采前代定規，羣師遺則，撰成《道門十規》，志在激勵流風，昭宣聖治，永為奕世繩規，玄門祖述，庶幾上不負朝廷崇獎之恩，下有資道流趨學之逕。其茂闡玄元之化，益宏清靜之宗，陰翊邦祚，大振教謨，深有望於將來，期永規於厥後也乎。

道教源派，始自太上三代之前，則黃帝問道廣成子，即太上也，及曰生於殷末，仕於周初，在文王時為柱下史，迨武王時遷藏室史，其所著則道德上下經，其徒則有關、文、莊、列、亢倉、柏矩之流，其言則修齊、治平、富國、強兵、經世、出世之術，互有之矣。見之太史氏曰：道家者流，精神專一，言廣易操，斯可知矣。故所謂先黃老而後六經，甚則以黃老倫於刑名，則為過矣。其曰元始靈寶，乃混沌之初玄元始三氣化生，其本則一。後之闡化，則有祖天師、許真君、葛仙翁、茅真君諸

所宜首務也。

仙之派，世降之久，不究其源。各尊派系，若祖師之曰正一，許君之曰淨明，仙公之曰靈寶，茅君之曰上清，此皆設教之異名，其本皆從太上而授。凡符籙、經教、齋品、道法之傳，雖傳世之久，各尊所聞，增減去取，或有不同，而源委則一。內而修之，則有內外丹之傳。其見諸經典者，諸子未嘗言之，丹砂藥術，其曰修鍊止性命神氣之說。自秦漢以來，方士競出，若文成五利之以金石草木，徒殺身取禍，遂世稱方術矣。外而施之，則有禱禱祠祝之事。自寇、杜、葛、陸之徒，其說方盛。由後之師匠，增損誇誕，奔競聲利，而世曰異端矣。然二者，太上之初所未彰顯，後之不究其本、不探其源者，流而忘返，眩異失同，則去太上立教之本，虛無清靜、無爲不言之妙日遠矣。凡習吾道者，必根據經書，探索源流，務歸於正，勿爲邪說淫辭之所汨，遂乃遞相鼓惑，深失祖風。蓋經曰：虛無自然，道所從出，真一不二，體性湛然，圓明自足，是開立教之源，以爲入道之本，

民，福集禍消，存亡蒙惠。苟若口誦心

道門經籙、太上三洞諸品經典，乃元始天尊、靈寶天尊、太上道德天尊金口所宣，歷劫相傳，諸師闡化。若元始說經，當以度人上品爲諸經之首。靈寶說經，當以定觀內觀爲要。太上立教，當以道德日用爲規。內而修己，則虛皇四十九章經、洞古大通生天清靜諸經最爲捷要。外而濟世度幽，則黃帝陰符經、玉樞北斗消灾救苦五厨生神諸經、玉樞朝天九幽諸懺，是皆入道之梯航，修真之蹊徑。是以從道之士，先當恭敬神明，焚修香火，積誦經誥，皈依大道，首宿今之業垢，召福澤之良因。故經曰：一切神仙真人，皆以無上要言，得成道果。仙師云：經以斂心，經以著念，使晨夕能焚誦不輟，消除魔障，增廣道緣，誠爲方便中第一事也。凡持誦之士，必當齋戒身心，洗心滌慮，存神默誦，誠如對越上帝，默與心神交會，心念無二，句字真正，調聲正氣，神暢氣和，庶幾有功，則玉音攝氣，靈韻交孚自然，和天安地，善俗化

違，形留神往，不存誠敬，手怠足揚，雖日誦千百卷，於己何益，又豈能消灾散禍也哉。若爲人持誦，猶當持敬存誠，以致齋主之敬，以通信嚮之誠，庶不致虛受齋供布施，爲之祈福消愆，自然有感。如或語言接對，嬉笑談諧，思念不專，熏穢披誦，不徒無益於齋主，反以貽愆於己身。似此皆然，深宜規戒，兼以年代之遠，經文訛舛，多後代師德之所撰注，謬誤不無，因生輕慢。如或有疑，自信不篤，則守以一誠，慎勿鼓和輕薄浮妄之徒，擅生慢毀，自貽厥咎。其太上諸品經籙，若祖天師所受，則盟威都功；葛仙翁所受，則中盟四仙；茅真君所受，則上清大洞。其餘符籙彌多，皆所以福國裕民，寧家保己，是以歷代崇奉皈依者，皆獲感應，隨所禱叩，旋有異徵，其太上設教之驗，信不誣矣。然而代深年遠，其或字畫訛謬，句讀乖舛，有之不得，一槩非議，毀訾四方，博識師德，善加考證詮次，申送教門改正刊行，猶爲善果之一助也。



坐圜守靜，爲入道之本。蓋太上立教度人，正爲超脫幻化，了悟生死。若非究竟本來，了達性命，則何所謂學道之士也。經曰：積心善行，絕世所欲，不興妄想，無有染著，不滯有無，永絕生滅，是名真人。近世以禪爲性宗，道爲命宗，全真爲性命雙修，正一則惟習科教。孰知學道之本，非性命二事而何；雖科教之設，亦惟性命之學而已。若夫修己利人，濟幽度顯，非明性命根基，曷得功行全備。況自上古以來，太上歷劫化現，諸師之修鍊成道，皆自靜定之工，庶得道功克就，神通自在。迨宋金之初，重陽王祖師遇鍾呂之傳，始立全真之教。蓋本經曰：養其無體，體故全真。是教則猶以坐圜守靜爲要，五祖則太上、東華、鍾、呂、海蟾也，七真則丘、劉、譚、馬、郝、孫、王也，其下綿延，暨王苗祈完之輩。殆今學之者衆，皆以真功實行爲本。其初入道，先擇明師參禮，開發性地，懋守修真十戒，白祖師、馮尊師堂規等文，收習身心，操持節操，究竟經典。

既知入道之門，然後擇山水明秀、形全氣固之地，創立菴舍，把茆蓋頭，聊蔽風雨，風餐露宿，水跡雲蹤。次結道伴，惟務真素樸實之人，晨夕爲侶，供送飲食，草衣木食，簞食瓢飲，但獲止饑蔽寒而已。直候百日，立基十月，胎圓三年。圓畢，或留圜，或出定，惟斷絕人事，情消緣滅，去來自由。其或有

力之家，布施齋糧，衣鉢隨分，自給而已，不得妄貪過取，亦不得假設誇誕之辭，驚世駭俗，務吊虛名。其補破遮寒，乞食化衣，真功苦行，槁木死灰，乃磨勵身心分內之事，庶不負四恩，殃及九祖，苟或退怠，則羣魔作障矣。其供圜道伴，竭力扶持，寒暑疾厄，務盡勤勞，亦積己之功、成人之善也，不得假以禪宗棒喝，互爭人我，取世非議。所究丹經，惟《石壁記》、《龍虎經》、《參同契》、《悟真篇》、《翠虛篇》、《還源篇》、《指玄篇》、《大道歌》、《崔公入藥鏡》、《金丹四百字》，并《諸仙語錄》，皆誘人修真入聖之梯航，所宜潛心研究，庶無差慝。其旁門左道之言，不許經目留

心，悞己惑人，甚則毀謗經典，借證其非，則貽冥譴必矣。

齋法行持，乃上古籲天禱祭之禮。自靈寶天尊受元始說經以來，爲立教之本，其目最多，其文最浩。然自太極徐真人、仙翁葛真人、朱陽鄭真人三師而下，則杜、葛、陸、寧、項、寇，又其最名世者。由是而分，則有林、田、金、白諸師，遂有東華、南昌之分，派雖不同，而其源則一。故符篆呪訣，亦相去不遠，是皆後之師德，各立宗門，接引後來之一端，初無二道也。舍此數派，稱爲正宗，餘不足師者多矣。世傳《三籙內文》、《金書玉鑑》、《道門定制》、《立成儀》等書，已有定規，凡行持之士，必廣參博究，務明性命根宗，累積真功實行。凡遇行持，必須齋明盛服，潔己清心，先鍊諸己，後可度魂。必齋戒以通神明，外絕塵務，內鍊形神。非符籙簡札之事，不得妄與；凡陞壇朝叩之次，務積一誠。精思默存，爲衆所模範，庶上可以感天地鬼神，下則不負幽冥之苦趣。如三籙之設，金籙惟帝王可建。

玉籙惟后妃可建，黃籙則士庶可建，大小各依分數，不可僭亂定規，一遵太祖皇帝立成儀範，恪守爲則。凡其符籙、簡札之類，亦不得增損移易。其壇儀科典，皆設像陰陽，取則經緯，一無妄建，苟不以誠敬齋莊爲本，惟務鍾鼓喧譁、旛花眩彩、語言嬉笑、舉動輕浮，何以對越上帝，通誠三界，不惟無以感召休祥，亦且反增罪業矣。傳曰：鬼神無常享，享於克誠，誠則有神，其理甚著。故澗溪沼沚之毛，蘋蘩蘊藻之菜，皆可羞之鬼神，薦之上帝也。此所以爲高功鍊師者，必擇同道端潔諳通之士，同壇共事，庶無貽咎於己，亦爲齋主消愆。而致福其所，用雲樂之外，其餘鐃鈸鈴鐸之類，不得雜用，甚爲褻瀆。至若趙歸真、林靈素之徒，偶爲世主之所崇尚敬禮，即爲富貴所驕，有失君臣之分，過設誇誕之辭，不以慈儉自守，亦取議當時後世多矣，是切爲後戒。

道法傳緒，清微始於元始天尊，神霄始於玉清真王。自歷代傳緒以來，

清微自魏祖二師而下，則有朱、李、南、黃諸師，傳衍猶盛，凡符章、經道、齋法、雷法之文，率多黃師所衍。神霄自汪、王二師而下，則有張、李、白、薩、潘、楊、唐、莫諸師，恢弘猶至。凡天雷、艷嶽之文，各相師授，或一將而數派不同，或一派而符呪亦異，以是訛舛失真、隱真出僞者，多因而互生誘惑。

凡行持之士，必有戒行爲先，次以參究爲務，先求巖谷明師、草衣木食之士，開發萬法根宗，精勵香火，止佩一法、一籙、一職。苟能晨夕鍊神養氣，修持不怠，與神明交格，言行無慊，何患法之不靈，將之不祐，雖職小法專亦驗。苟惟務虛名，奔逐聲利，必求參當世顯達爲師，誇名眩世，不修香火，荒怠修持，佩法縱多，徒若商賈之負販，籙職貴於高大，出處務於誇眩，耽肆酒食，矜伐怨欲，不異井巷巫覡之徒。未嘗留念神明，輒誇符呪之驗，呼儔誘類，第相鼓惑，甚則假以謝師犒將，徵索酒食，誠有悞於叩祈，且深乖於教範。又輒妄爲人師，以盲引瞽，內無功

行，外結是非，深爲大戒。果爲高行之士，惟務致虛守靜，一念不生，萬緣俱寂，性天道法，心地雷霆，不落萬緣之窩臼，惟究向上之真宗，斯爲上士也。又等圓光附體、降將附箕、扶鸞照水諸項邪說，行持正法之士所不宜道，亦不得蔽惑邪言，誘衆害道。凡行符水之士，務以利濟存心，以丹砂藥術兼濟，不得妄受資財，反與鬼神構怨，以至法術不驗。亦不得濫授道法，輕泄玄機。雖入道之人、崇教之士，言行不莊、慢忽香火者，亦宜寶祕，慎勿妄傳，而況市井屠釣之徒，苟利眩名，輒納爲徒，浮談誑語，自貽律譴，罪所不原。

住持領袖。凡名山福地、靖廬治化、叢林宮觀住持之士，或甲乙往還，或本山推舉，必得高年耆德、剛方正直之士，言行端莊，問學明博，足爲叢林之師表、福地之依皈者爲之，庶足儀刑後進，準則前修。其居是者，務必慈仁儉約，德量含弘，規矩公正。先開接引之方，導愚畜衆；次謹焚修之職，請福消愆。裕國祝釐，莫大於報本；尊經

闡教，莫大於推誠。其畜衆之方，先嚴戒行規矩爲要，警以罪福因果之報，田糧委庫職管紹，賦稅任砧基應充，飲食修造，各謹司存，晨昏以神明爲謹，修葺爲心。五湖四海，高人羽士，或挂搭安單，栖冬結夏，設知堂一負，廣於接待，素食粗衣，隨緣安駐，務令身口安

閑，逍遙無念，庶進道有基，身心無慮，其刻苦修持者，猶當周給。其入山檀施，喜捨隨緣，或建齋設醮，薦祖度親，隨力行持，一遵齋科，大小濟利，母校所施厚薄。經曰：一切諸福，皆自歡喜中來，一切布施，生歡喜心，種種善果，福報無邊。其官貴賓客往還，素麪一餐，遇夜則宿，不得干與公事，延留惹非。朔望宣明訓戒，開示激揚，務修本面家風，究竟本宗事業，毋貪富貴，毋嗜喧囂，因而爭相倣效，華衣美食，廣廈細氈，昧公營私，出入騎乘，呵擁僕御，交接權勢，以致教化不行，源汙流濁，甚則耽迷聲色，外飾內乖，不畏香火、神明、靈壇、古跡，私畜俗眷，穢褻神祇。所轄住持，宜聞於有司，處決

下山，不得蒙昧阿私，有壞規法。其後進不遵、輕薄之流，不習本宗，惟圖頑橫，自貽過咎，必宜依律遣斷，庶獲規繩嚴肅，教範宣揚，如或一槩容情，罪宜均受。近者郡邑道寮，儀範猶乖，紀綱不振，所合整肅，一守定規。

雲水叅訪。凡出家之人，上離父母之親，下棄祖宗之嗣，志在出世離塵，必當以超脫幻化、了悟生死爲心。苟若仍前，汨迷塵網，晝夜奔波，無有出期，與俗何異。經曰：學道之士，以清靜爲本。睹諸邪道，如睹仇讎；遠諸愛慾，如避臭穢；除苦惱根，斷親愛緣。是故出家之後，離情割愛，舍妄歸真，必當以究明心地、修養性天爲務，操修戒行，磨鍊身心，隻笠簞瓢，孤雲野鶴。或遇名山洞府，挂搭安單，叅竭明眼師匠，問道親師，切究性命根宗，深探道德之要，悟徹宗門，玩味法乳，不於利名挂意、富貴留心。雖飢寒風暑之切身，不易其操；雖困苦貧賤之役心，不奪其志。忍辱藏垢，言行謙和，卑下柔弱，精神純一，心存柔遜，性

戒剛強，務居山林巖洞、人跡稀絕之地，草衣木食以養生，巢居穴處以守道，各依師授，修鍊本來。其出外叅求，風餐雨宿，忍凍受飢，躡屨擔簦，携包頂鉢，不懼萬里之遙，務登名師大匠之門，一言之下頓悟，萬劫之果遂周。致凡出處之間，悉遵白祖師、馮尊師、諸師匠堂規、叢林儀範而行，凡有過失，悉依責罰。其或非實際悟明、真積力久、性天瑩徹、塵垢磋磨、好爲人師以自大者，必擇而師之，不得惟慕虛名，趨媚顯達，貪迷聲利，不究實地工夫，至乃前工盡廢，業障徒存。其雲朋霞友之徒，亦須志合道同，方乃不生魔識，共成道願，先擇後交，猶爲自戒。苟或師友得人，堅心苦行，普資羣品，度脫幽沈，則臣事三境，超神八極，爲不難矣。

立觀度人，爲出家接續之首務。凡名山洞府、洞天福地、古跡靈壇，皆古昔仙真靈跡去處。其欲香火綿遠，必以度人爲先，須擇名器之家，資性淳良，庶可訓誨。苟非道材法器，汎濫收

錄，或不成材，肆暴爲非，罔守戒訓，不惟貽玷玄門，又且成敗興廢所繫。或多來歷汗雜，出處卑微，甚則累辱冠裳，尤宜自慎。必得其人，然後聽言觀

行，察審詳實，爲其登名臘籍，長幼各依齒叙，不得徇私，紊亂書記。會衆舉試，道門經典，務要習熟諳通。掌籍類名，申送道司，俟度牒開通，依例申名，朝廷關給，方可簪披爲道士。既頂冠裳之後，掌籍常加，鈐束房長，晨夕訓戒，務守清規，恭敬神明，焚誦經誥。

凡係本宗科典經書、齋醮道法、詞意榜語，必當貫熟該通，潛心究竟，出處語默，修習爲常，行有餘力。若儒之性理，釋之禪宗，更能融通一貫，猶爲上士。暇日則舉唱法事，焚香揮塵，論道參真，或吟詩撫琴以自怡，或佩法坐圜以自究。或有應緣經醮，務必齋戒存誠，一遵前訓。藜羹糲食，楮被布衣，乃出家常事，不得溷同世俗，故違規矩，博奕肆酒，交友奸邪，長幼參商，支分派別，考試不中，舉唱不齊，視科典爲文具，因果爲虛談，歌談妖豔之詞，汨沒利名之域，貪迷富貴，耽戀紛華，不究本面家風，日墜祖宗基業，輕則議罰，容以自悔，重則一遵戒條，下山除籍，庶激勵於將來，使四方之遵守。

金穀田糧，多累朝給賜田土，或前代師德所置祖產，前後檀越所施，專爲瞻衆香燈之用。其常住庫堂，設職管紹出納。其各寮院，宜遵常住定規，長幼輪次管紹。其租課金穀簿書庫堂，則都監上座監臨掌之，寮院則房長掌之，以下者，止依臘叙長幼輪管。凡一歲賦稅科差，殿堂修造，房院修葺，春秋祭祀，時序薦誦，吉凶弔賀，關防火盜，必以瞻衆爲先，悠久爲志，務要公同出納，明白登載，不得指私爲公，各畜私財，互分各據，擅自支遣。務令老安幼懷，香燈不乏，報祀以時，修葺勤謹，賦稅預備，則上下雍睦，香火悠久，公私無窘逼之憂，官觀無興替之患，疾病互相扶持，死亡務從儉約薦送，俱不得昧公營私，虧瞞入己，苟求衣食，欺誑神明，租課湮沒，修造不舉，祭祀荒違，以致科差點充，上下靡寧，甚則攘

竊非爲，有乖教法，不懼天理之誅，有負檀施之願。在公庫則衆職舉行，方丈會衆查理議罰，計其輕重，甚則更替，輕則罰倍，其數入庫公用。其寮院，則尊長舉行，亦會衆着查理，輕重亦照常住行之，申呈方丈，從公遣逐。如衆職互相容蔽，以掩己私，尊長姑息不言，暗相護恃鄰眷，亦宜舉行公議，以明去就，懲一戒百。其常住田土，例不許賣，亦不得私立契約，破蕩賣易。其應充科役，宜遵定制，設碇基道人支應，庶不一槩汗雜，染習澆風，切須自慎，神鑒孔昭，各宜勉之。

宮觀修葺。凡名山福地，真靈香火之所，多宋、元、本朝所建宮宇，上以祝釐福國，下以容衆安單，每因兵燹之餘，遂乃廢弛不舉。其各宮觀，若殿宇、法堂、齋堂、官舍、雲堂、道館、兩廡、庖庖，所不可無。雖戶有田糧，或所任非人，沈匿租課入己，肆非妄爲，毀滅神像，傾頽屋舍者多，務以科差藉口，甚則典賣常住器皿、房屋，卒爲瓦礫榛蕪，終身不思芟整者有之，或各

汨沒利名之域，貪迷富貴，耽戀紛華，不究本面家風，日墜祖宗基業，輕則議罰，容以自悔，重則一遵戒條，下山除籍，庶激勵於將來，使四方之遵守。

金穀田糧，多累朝給賜田土，或前代師德所置祖產，前後檀越所施，專爲瞻衆香燈之用。其常住庫堂，設職管紹出納。其各寮院，宜遵常住定規，長幼輪次管紹。其租課金穀簿書庫堂，則都監上座監臨掌之，寮院則房長掌之，以下者，止依臘叙長幼輪管。凡一歲賦稅科差，殿堂修造，房院修葺，春秋祭祀，時序薦誦，吉凶弔賀，關防火盜，必以瞻衆爲先，悠久爲志，務要公同出納，明白登載，不得指私爲公，各畜私財，互分各據，擅自支遣。務令老安幼懷，香燈不乏，報祀以時，修葺勤謹，賦稅預備，則上下雍睦，香火悠久，公私無窘逼之憂，官觀無興替之患，疾病互相扶持，死亡務從儉約薦送，俱不得昧公營私，虧瞞入己，苟求衣食，欺誑神明，租課湮沒，修造不舉，祭祀荒違，以致科差點充，上下靡寧，甚則攘

竊非爲，有乖教法，不懼天理之誅，有負檀施之願。在公庫則衆職舉行，方丈會衆查理議罰，計其輕重，甚則更替，輕則罰倍，其數入庫公用。其寮院，則尊長舉行，亦會衆着查理，輕重亦照常住行之，申呈方丈，從公遣逐。如衆職互相容蔽，以掩己私，尊長姑息不言，暗相護恃鄰眷，亦宜舉行公議，以明去就，懲一戒百。其常住田土，例不許賣，亦不得私立契約，破蕩賣易。其應充科役，宜遵定制，設碇基道人支應，庶不一槩汗雜，染習澆風，切須自慎，神鑒孔昭，各宜勉之。

有私財，分煙異爨，因而做習成風。昨蒙聖恩清理，其凡係前代真仙古跡靈壇，豈宜廢弛，必合依時修葺。或户下田糧，荒熟不等，賦稅輕重，又或產去稅存不時，各須臨田查理，開報有司，立碑刻石，毋致湮滅。與公庫職負公同出納，務以修葺贍衆爲先，專設直歲一員，知庫一員，每歲修補漏爛，整築牆籬，潔淨道路，肅清壇宇，蓄築山林，使神明有所依栖，四衆亦獲安逸。如田糧所用不敷，或資於經醮，或藉於題注，衆力經營，隨宜整葺，亦不得假此名色，在外交結官貴，誘透商賈，強人謀爲，非出善願，因而招惹是非，返爲宮觀之累。如或田糧香花，可充修造，肥己不爲，故行穿鑿山林，有傷風水，赭伐林木，以充口腹。同處職眷，遞相覺察，聞於道司，舉行定奪。如悛過自新，方許同處。其或頑愎不遵，聽自有司區處，務在革替一新，常川修葺，庶無傾廢，永振前規。凡在玄門，各宜遵守。

道門十規

（吳亞魁點校）

## 028 虛皇天尊初真十戒文

經名：虛皇天尊初真十戒文。  
一卷。底本出處：《正統道藏》  
洞真部戒律類。

謹按虛皇天尊言：出家超俗，皆宿有良契，故能獨拔常倫，若慎終如始，精至修鍊，當福及七租，慶流一門。所謂九層之臺，起於累土，千里之行，始於足下，入道之門，積德之基，亦必由此始。開度之時，宜受初真之戒，其戒有十，爾當受之。

第一戒者，不得不忠、不孝、不仁、不信，當盡節君親，推誠萬物。  
按傳曰：仙經萬卷，忠孝為先。蓋致身事君，勤勞王事，所以荅覆庇之恩也；修身慎行，善事父母，所以荅生育之恩也；事師如事父母，所以荅教誨之恩也。民生於三，事之如

一，乃報本之大者，加以仰不愧於天，俯不忤於人，敬信神明，所以荅造化之恩也。併前三事，謂之四恩。至於祝國延禧，除妖却害，化民為善，裨王化之所未及，乃出家之忠也。生則誘其親，以惜福向道；死則為之，遷神福鄉。其處己，則離諸恩愛，息諸塵緣，專精一心，勤於學道。道功既就，則雖億劫種親，皆得超度，上可以報四重之恩，下可以濟三途之苦，迺出家之孝也。至於不仁者，欺心妄作，越禮非為；不信者，虛誕自矜，華辭惑眾。要當知大忠者，不昧其心，至一物不欺；大孝者，不悖於理，至一體皆愛。然則一語欺心，非忠也；一事悖禮，非孝也。故忠孝為諸戒之首，百行之源，學者之先務也。若能依上遵守而行，則可以盡節君親，推誠萬物矣。

第二戒者，不得陰賊潛謀，害物利己，當行陰德，廣濟群生。  
夫陰賊潛謀者，是暗中使人為非，教唆詞訟之謂也。令人入於陷阱憲網

之中而自得快樂，害物利己之念，迨不可勝言。若或返照迴光，化人為善，則廣陰德，普濟群生，斯迺入道之第一義也。

第三戒者，不得殺害含生，以充滋味，當行慈惠，以及昆蟲。

蓋不殺生者，所以存仁愛也。夫禽獸旁生，性命同稟，有夫婦之配，有父子之情，有巢穴之居，有飲食之念，愛憎喜懼，何異於人。能懷惻隱之心，不忍殺戮而食，以證慈悲之行，不亦善乎？或心雖仁民愛物，而迹迺混俗眾中，有所未便，則不起意殺、不下手殺、不眼見殺三淨，是則飲食隨緣，又何殺生之有？且聖賢於肉食，固未常必其有無，而仁愛之及物，亦何常間乎彼此，如網解三面，跡遠庖厨，釣而不綱，弋不射宿，啓蟄不殺，方長不折。德惠之普，人蟲草木，一視同仁。後之不肉食者，果能然乎？又當知人生衣食之豐儉，皆因前世修積之淺深，今日分應所受，迺能節之，則當來之福益厚，

莫可量也。果能如是，則慈惠以及昆蟲，豈虛言哉。

第四戒者，不得淫邪敗真，穢慢靈炁，當守真操，使無缺犯。

蓋不淫邪者，所以戒亂倫也。夫有家者，特為繼後承先而設，故憑媒議通書娉，明白婚娶。又為酒食，以召鄉黨僚友，以厚男女之別，則夫婦之道，禮所當然，實不犯他人之色，又何淫之有？娼妓之徒，名曰下賤，正以其苟合，亂人倫也。若親此輩，是與等矣。然前代仙師亦有遊戲妓門者，蓋或以試鍊道心，令見境不動，或從化導有緣，令背塵合覺。後之凡夫，或引以證己，實乃左道濫遊，真妄不同，仙凡異致。端人正士，自善主張，未必溺於其所惑也。其出家超俗者，皆因宿有善慶，所以獨拔常倫，果能頓息塵緣，斷絕色慾，精修道行，當證仙階，福及九祖，慶流一門。經曰：仙人道士，非有靈質，積精養炁，以成真者，此也。然或初基，未明志節，早宜修省，以勗將來，

毋負善因，復墮塵網，當守真操，使毋缺犯，則福德日新，道功可就矣。

第五戒者，不得敗人成功，離人骨肉，當以道助物，令九族雍和。

夫不敗人成功者，蓋聞人有一善，則贊和之，聞有諸惡，必當掩之，使之成功，不至喪德。又不離人骨肉者，或見有親族不和，父子、夫妻、兄弟、師友，因矛盾而至參商者，當以道勸勉，使之雍和，令不離間，則人倫不廢，道義兩全，實聲真之要路也。學道之士，宜各體知。

第六戒者，不得讒毀賢良，露才揚己，當稱人之美善，不自伐其功能。

蓋誠為入道之門。語者，心之聲也；語之妄，由心之不誠也。心既不誠而謂之道，是謂背道求道，無有是處。但遇賢良而讒毀之，則露才揚己，自伐功能，皆非正士之所宜有，必當稱人之美善，庶幾成己之功勤，此固學者之深戒也。

第七戒者，不得飲酒過差，食肉違禁，當調和氣性，專務清虛。

夫不飲酒者，所以戒亂性也。蓋酒本以行禮，浹洽和氣，古人主賓百拜，終日而不至醉，示有節也。後人嗜慾無厭，縱飲謀醉，遂至形骸顛倒，禮法喪失，或以致病，或以構禍，罔覺其非，儻隨平日酒量深淺，減節飲之，不使過量，又何亂性之有？且食肉違禁者，如牛之有功，犬之有義，鴈之有序，鯉鱸朝斗，此等之肉，又安忍食之？能推此心，戒而不食，則可以調和氣性，感格真靈，專務清虛而道業日新，玄功時著矣。凡所學者，宜自慎焉。

第八戒者，不得貪求無厭，積財不散，當行節儉，惠恤貧窮。

夫人之貧富，命稟生初，悉已前定。若生財有分，用盡還來；若胎骨受貧，廣求不富。能明此理，一切取覓，付之自然。非己之財，不妄取；非義之財，不苟得；合得之財，隨分取。可不陷於貪求無厭之慾，亦有積而不散，致招殃禍者。然吾黨之士，先須識破幻假，以惠恤貧窮，節

儉謹守，隨緣度日，勿苦貪求常，使心地虛閑，物欲消遣，久則自然與道合真矣。

第九戒者，不得交游非賢，居處雜穢，當慕勝己，棲集清虛。

夫初心出家，未能獨立，須仗叢林，或結道伴，遞相扶持，不至偏頗。然友分三等，有雲朋霞友，有良朋知友，有狂朋恠友。凡有志節、鍊心地、究罪福、絕塵情、逍遙方外，同志相求，遂與為友，此等謂之雲朋霞友，以其心與雲霞相似，塵事礙他不住故也。又有習學經書，高談闊論，此等謂之良朋知友，以其不鍊心，亦不能作惡故也。又有一等，不治心地，不習經典，不顧罪福，出語乖訛，作事狂橫，觸著一毫，便起爭鬪，誇張逞俊，恃力恃勝，欺壓良善，相率成黨，此等謂之狂朋恠友。此三等人身謝之後，各有安置去處，隨其功業，各得受報。其雲朋霞友，昇入無形，遊宴玉京，或為神仙，或為天官；其良朋知友，塵心未盡，不出人

倫；其狂朋恠友，受了十分供養，全無功德，填還口債，或墮酆都，或墮旁生，輪迴苦惱，若到如斯，悔之何及。如上三友，宜審擇焉。學者思之，各尋長便，當慕勝己，棲集清虛，不負父母遣子出家之心，不孤聖朝開教度人之意，所宜體悉，庶獲成功。

第十戒者，不得輕忽言笑，舉動非真，當持重寡辭，以道德為務。

按古云：端謹嚴重，不富即貴；輕浮薄劣，不夭即貧。而輕忽語言，脅肩諂笑，曲學阿世，小人之歸，實非正士之所宜有。況持重寡辭，動容中式，乃進道之要，誠達者之所當為。若能恪守力行，何患乎高尚之不至歟？

虛皇天尊初真十戒文

（吳亞魁點校）



# 029 洞玄靈寶天尊說十

## 戒經

經名：洞玄靈寶天尊說十戒經。  
一卷。底本出處：《正統道藏》  
洞玄部戒律類。參校本：敦  
煌S.6454號抄本。

天尊言：善男子、善女人，能發自然道意，來入法門，受我十戒、十四持身之品，則為大道清信弟子，皆以勇猛飛天齊功，於此時<sup>①</sup>進心不懈退者，即超凌三界，為上清真人。

一者不殺，當念衆生；二者不得妄作邪念；三者不得取非義財；四者不欺，善惡反論；五者不醉，常思淨行；六者宗親和睦，無有非親；七者見人善事，心助歡喜；八者見人有憂，助威作福；九者彼來加我，志在不報；十者一切未得，我不有望。

次說十四持身之品：

與人君言則惠於國，與人父言則慈於子，與人師言則愛於衆，與人臣言則忠於上，與人兄言則友於弟，與人子言則孝於親，與人友言則信於交，與人夫言則和於室，與人婦言則貞於夫，與人弟言則恭於禮<sup>②</sup>，與野人言則勤於農，與賢人言則志於道，與異國人言則各守其域，與奴婢言則慎於事。

天尊言曰：修奉清戒，每合天心，常行大慈，願為一切，普度厄世，謙謙尊教，不得中怠，寧守善而死，不為惡而生，於是不退，可得拔度五道，不履三惡，諸天所獲，萬神所敬，長齋奉戒，自得度世。而為偈曰：

一切修學人，誓願成真道。慈悲念戒文，道聲斷煩惱。

洞玄靈寶天尊說十戒經

十戒經（敦煌S.6454號抄本）

天尊言：善男子、善女子，能發自然道意，來入法門，受我十戒、十四持身之品，則為大道清信弟子，皆與勇猛飛天齊功，於此而進心不解退者，則超凌三界，為上清真人。

次弟子對師而伏。

一者不煞當念衆生；  
二者不媼犯人婦女；  
三者不盜取非義財；  
四者不欺，善惡反論；  
五者不醉，常思淨行；  
六者宗親和睦，無有非親；  
七者見人善事，心助歡喜；  
八者見人有憂，助為作福；  
九者彼來加我，志在不報；  
十者一切未得道，我不有望。

次說十四持身之品：  
與人君言則惠於國，  
與人父言則慈於子，  
與人師言則愛於衆，

與人兄言則悌於行，  
與人臣言則忠於上，  
與人子言則孝於親，  
與人友言則信於交，  
與人夫言則和於室，  
與人婦言則貞於夫，  
與人弟子言則恭於禮，  
與野人言則勸於農也，  
與沙門道士言則心於道，  
與異國人言則各守其域，  
與奴婢言則慎於事。

天尊言：修奉清戒，每合天心，常行大慈，願爲一切，普度厄世，慊慊尊教，不得忠怠，寧守善而死，不爲惡而生，於是不退，可得拔度五道，不履三惡，諸天所護，萬神所敬，長齊奉戒，自得度世。

十戒經

此法實玄妙，免汝九祖役。是其人不受，令人與道隔。非人而取受，見世被者責。死墮三塗中，可切阻□益。

大唐天寶十載，歲次辛卯正月乙酉朔廿六日庚戌，燉煌郡燉煌縣玉關

鄉豐義里開元觀男生清信弟子張玄誓，載廿七歲，但爲肉人無識，既受納於形，形染六情。六情一染，動之弊穢；或於所見，昧於所着，世務因緣，以次而發，招引罪垢，歷世彌積。輪迴於三界，漂浪而忘返；流轉於五道，長倫而不悟。伏聞天尊大聖演說十戒、十四持身之品，依法脩行，可以超昇三界，位極上清。玄誓性雖愚昧，願求奉受，謹詣三洞法師中岳先生馬，奉受十戒、十四持身之品，脩行供養，永爲身寶，懃盟負約，長夜地獄，不敢蒙原。

（前缺）自得度世。

十戒經（十戒經盟文P.2347）

大唐景龍三年，歲次己酉五月丁巳朔十八日甲戌，沙州燉煌縣洪閔鄉長沙里冲虛觀，女官清信弟子唐真，戒年十六歲，但爲肉人無識，既受納有形，形染六情。六情一染，動之弊穢；或於所見，昧所於着，世務因緣，以次而發，招引罪垢，歷世彌積。輪迴於三界，漂浪而忘返；流轉於五道，長淪而弗悟。伏聞天尊大聖演說十戒、十四

持身之品，依法脩行者可以超昇三界，位極上清。真戒性雖愚昧，願求奉受，謹賚法信，謹詣北岳先生關，奉受十戒、十四持身之品，脩行供養，永爲身寶，懃盟負約，長幽地獄，不敢蒙原。

十戒經（十戒經盟文P.2350）

太歲甲寅正月庚申朔廿二日辛巳，沙州燉煌縣龍勒鄉常安里，男官清信弟子李无上，年廿七歲，賚信如法。今詣沙州燉煌縣效穀鄉无窮里三洞法師中岳先生張，求受十戒、十四持身之品。無上肉人既受納有形，形染六情。六情一染，動之弊穢，或於所見，昧於所著，世務因緣，以次而發，招引罪垢，歷世彌積。輪迴於三界，漂浪而返；流轉於五道，長倫而弗悟。輒依科賚信如法，求乞奉受，脩行供養，永爲身寶，懃盟負約，長幽地獄，不敢蒙原。

（前缺）得度世。

十戒經（十戒經盟文P.3770）

至德二載，歲次丁酉五月戊申朔十四日辛酉，燉煌郡燉煌縣懸平康鄉洪文里，男生善信弟子王玉真，載十六

歲，賫信如法。今詣燉煌郡燉煌縣平康鄉安昌里三洞法師中岳先生索，求受十戒、十四持身之品。玉真肉人既受納有形。形染六情。六情一染，動之弊穢；或於所見，昧於所着，世務因緣，以次而發，招引罪垢，歷世彌積。輪迴於三界，漂浪而忘返；流轉於五道，長淪而弗悟。輒依玄科，賫信如法，求乞奉受，脩行供養，永爲身寶，憊盟負約，長幽地獄，不敢蒙原。

十戒經（十戒經盟文 貞松堂藏本）

太歲甲寅正月庚申朔廿二日辛巳，沙州燉煌縣洪池鄉神農里，女官清信弟子陰志清，年十一歲，賫信如法。今詣沙州燉煌縣效穀鄉无窮里三洞法師中岳先生張，求受十戒、十四持身之品，志清肉人既受納有形，形染六情。六情一染，動之弊穢，戒於所見，昧於所着，世務因緣，以次而發，招引罪垢，歷世彌積。輪迴於三界，漂浪而忘返；流轉於五道，長淪而弗悟。輒依玄科，賫信如法，求乞奉受，脩行供養，

永爲身寶，憊盟負約，長幽地獄，不敢蒙原。

（十戒經盟文P.3417）

大唐景雲二年，太歲辛亥八月生三月景午朔廿四日己巳，雍州櫟湯縣龍泉鄉淳臺里，□□清信弟子景仙，年廿七。景仙肉人無識，受納有形，形染六情。六情一染，動之弊穢；或於所見，昧於所着，世務因緣，以次而發，招引罪垢，歷世彌積。輪迴於三界，漂浪而忘返；流轉於五道，長淪而弗悟。伏聞天尊大聖演說十戒、十四持身之品，依法脩行，行者可以超昇三界，位極上清。景仙雖昧，願求奉受，謹賫信如法，詣雍州長安縣懷陰鄉東明觀里中三洞法師中岳先生張，受十戒、十四持身之品，脩行供養，永爲身寶，憊盟負約，長幽地獄，不敢蒙原。

洞玄靈寶天尊說十戒經

①「時」，敦煌本作「而」。

②此句敦煌本作「與人弟子言則恭於禮」。

（吳亞魁點校）

# 030 天尊說禁誡經

經名：天尊說禁誡經。一卷。  
底本出處：敦煌S.784號抄本。

(前文原缺)惡兩(缺字)飲酒啖肉含血之類，穢辱(缺字)自是欺忽四輩，不得傲(缺字)不得背師叛道、違盟犯約，不(缺字)傳非其人，不得汗辱法身、不尊(缺字)受道人同席而坐，不得與(缺字)卧，不得與非受道人同盤而食，不得(缺字)道人同屋而寢，不得非受道人傳其衣服履屨器用法具，不得假借法衣與非受道人，不得調冒凡俗、愚癡等輩，不得訾毀聖文、非其異學，不得同學攻伐、更相彼我，不得弃真就僞、不崇師法，不得遊行、屠估、淫欲、偷盜非法之家，不得交遊非類毀道之門，不得侵損三寶、常住衆物、四輩信施、齋誠財物，不得引諸凡俗、費耗常

住三寶財物，不得不持經誡、使四輩輕慢、生諸罪業。常當持奉經誡，誦習修行；常當清齋潔己，想念仙真；常當念道、念經、念師，專誠不怠；常當燒香禮拜，懺謝罪愆；常當沐浴精心，行道啓願；常當燃燈照耀，佐天光明；常當月滿晦朔，集諸同志，懺悔說誡；常當持護法身衣服法具，勿交凡俗；常當洒掃壇靜，勤心供養；常當思念三師，早得仙道，我身開度；常當爲國主人王，大建功德，聖祚興隆，巍巍無極；常當爲天下人民、百姓男女，作諸福田；常當爲三塗五苦、一切衆生，咸離苦惱，悉成仙道；常當爲九祖七玄、父母男女、表裏親屬，滅罪除愆，造諸福業；常當以無上妙法，開度未聞；常當以至真玄業，化導一切；常當以三洞大法，爲諸衆生，廣設舟航；常當講說教化，開度愚，悉使知罪福；常當以諸誡法，傳度天人；常當抄寫寶經，流通讀誦，常住供養，作永劫福田；常當教化乞取，爲諸有緣，建立玄壇靈觀，使一切歸投；常當隨處發心，造無

上法身，真應化像，一所在安置，作一切虔誠；常當造諸幡花帳座、幢蓋法具，種種莊嚴，供養天尊；常當住持常住財物、米麥繒綵，作過去未來一切福田；常當勸化同志，共發善願，廣立法門，使有緣衆生，隨分獲果；常當住持三寶，使不破壞；寧壞我身，作細微塵，不當壞天尊經誡；寧當犯猛虎毒蛇，不當犯天尊科禁；寧當煞身害命，不得違天尊盟誓；寧當損身兩眼，不得損天尊威儀；寧當入大火坑，不得入不淨非法之處；寧當坐卧鐵床，不得坐卧非受道人床席；寧當食諸猛火，不得食非法之食；寧當出身中血至數千斛，不得出非法之言；寧當棄千金之寶，不得捨其法服；寧當投諸廁溷，不得染諸色欲；寧當千日不食，不得一日不持經誡；寧當不惜身命，不得不護誡根；寧當割身取肉，不得取常住財物。所以尔者，誠爲法藥，能除生死重病；誠爲法舟，能度生死苦海；誠爲利刀，能割生死纏縛；誠爲明鏡，能見生死顛到；誠爲香水，能洗

生死垢穢；誠爲甘露，能除妄想飢渴；誠爲惠燈，能除生死暗惑；誠爲法雲，能遍一切；誠爲法雨，能潤一切；誠如大海，能吞一切；誠如大山，能生一切；誠如陽春，能生萬物；誠如盛夏，能長一切；誠如秋天，能成萬物；誠如冬月，藏斂一切。能持誠者，不畏天子，不畏鬼神，見世諸天童子、金剛神王、三界五帝、神仙兵馬、將軍力士，各千二百人，常來侍衛，辟斥凶灾。官家口舌、桎械架鎖、惡魔邪鬼、水火刀兵、虎狼毒蟲、一切痛惱，永不干門，過去生天，神仙奉迎。七祖母、見前男女，同獲福慶，永享自然。若破誠不持經法，及有人勸說，善巧方便，譬喻誘引，種種言詞，壞其誠行，不行師法，見世水火刀兵，桎械牢獄，考楚萬端，惡風邪鬼，顛閑狂病，眉須隨落，遍身洪爛，舉體生瘡，手攣腳跛，虎狼毒虫，怨家債主，種種來對。求生不得，求死不得，百痛備經，一旦身死，便入九幽十八地獄，吞火食炭，碓擣磔磨，溲湯煎煮，鐵犁耕舌，足履刀山，手

攀劍樹，動經萬劫。縱得受生，還爲六畜，貧窮下賤，盲聾啞啞，手足攣跛，形容醜陋，飢寒長病，萬痛切身，或爲蟲魚螻蟻，諸雜形骸，各隨分受，永劫輪迴，與道無緣。汝等男女，宜諦思焉。天尊曰：昔有道士二萬六千人，持奉經誠，惠心不退，依法脩行，十二年中，地司保舉，諸天奏名；一百年中，自日昇天。今在梵度天中，列爲真人，更進上法，轉入至真，漸超梵行三清門，練神入妙，變化自然，永斷生死，湛寂無爲，常樂我淨，與道同源。又有七萬二千女子，違師背道，就僞弃真，不奉經誠，破壞誠根，反行誹毀，落在邪門，見世受業，種種備經，死入地獄，辛苦難言，今在九幽，尚未得原。吾故告汝，各宜慎焉。

天尊曰：夫人生身，皆是前身種善，持奉經誠，得生人中。而能於此身，行諸觀想，體解真道，知身無常，不淨臭穢，四大五物，皮膚骨肉，暫相依據，和合少時，業盡即散，還歸灰塵，隨業受報，生死輪迴，展轉變化，往反無

停，識身浮假，聚散須臾。當除衆惡，斷諸苦根，反視內聽，清淨身心，長齋奉誠，誦詠靈文，朝夕願念，廣建福田，晝夜不懈，內想思真，勤行至道，守一存三，練神化景，反本還源，形神同飛，逍遙上清，永脫生死，長樂自然。若不於此身，發生智惠，作愚癡想，煞生偷盜，邪淫顛到，慳貪瞋怒，綺妄無實，惡口兩舌，祝咀罵詈，放縱六根，十惡三業，廣造惡緣，不信宿命，罪福因緣，任運生死，皆言自然，執計有身，放蕩聲色，流浪世間，隨境是非，輪迴縱欲，不遵經誠，背道疑真，莫修過去，當來善業，一朝命盡，形化灰塵，神逝魂沈，受苦九幽，萬劫得生，非人身形，隨業緣對，痛惱備經，始懷怨訴，悲響振驚。吾雖大慈，無奈之何，甘雨不能榮枯木，慈父不能喻癡子。苦哉痛哉，汝等男女，既得受生，貴爲人身，當自脩行，持齋奉誠，禮拜燒香，行道誦念，布施發願，造像寫經，求師問道，建立玄壇，先人後己，救度貧窮，放生贖命，懺悔祈恩，忍辱精進，勇猛容非，安心定志，

講說教化，開度天人，住持三寶，廣設  
橋梁，諸天稱慶，克獲道真。爾時太上  
道君，及諸仙真聖衆，天龍人鬼，三塗  
五苦，一切衆生，同蒙福利，稱善而退。

天尊說禁誡經

（吳亞魁點校）

## 031 赤松子中誠經

經名：赤松子中誠經。一卷。  
底本出處：《正統道藏》洞真部  
戒律類。

### 赤松子中誠經序

昔公明子皋過宋，見大夫薛瑗有子一十人，六人僂跛癩臂顛癡，一子獄死，三子盲聾瘖瘡。子皋遂問：大夫所行之行，如何而禍至此？薛瑗對曰：今蒙先生顧問，實以衷腸之事奉告先生。予爲國之宰相，未曾舉一人，不曾接一士，見賢如讎，約截不令入。見人遺失，予如有所得；見人有得，予如有所失。恨身不爲之耳。皋曰：大夫所行，如此之行，須至滅門矣。千述萬病，殃及子孫，受諸惡報，何至如此乎？薛瑗聞先生所說，神色憂懼，心魂

茫然，稽首知過，寧許改乎。子皋語大夫曰：天雖高而察其下，行兇惡者必殃，行善事者必福，改往修來，轉敗爲成，不患晚矣。吾昔年曾於先生處，傳得赤松子誠箴一軸，能依此行，治身萬病，及拔見世子孫。吾今知大夫所作用心，從來皆錯，予將此誠箴，奉傳與大夫，但依此而行之，必知天之驗也。

於是開篋取經，授與薛瑗。瑗拜而捧之，皋遂辭而去。得後數年還來，到國見大夫諸子，所疾並皆差矣。子皋見諸子疾愈，問大夫曰：予別後，得何良醫妙術，郎君所損諸疾皆痊。對曰：兒子亦不值良醫，別無方術。頃年於先生處，得《中誠經》，遂改過悛心，見人有所失，爲之慘然，見人有所得，內有喜悅，舉賢薦能，自退祿位，已前所貯金帛錢穀，散惠孤貧，救濟窮困，寬心饒借，與物無競，齋沐追薦君父，不淫服飾，不貪美味，敬天地，信鬼神，知足儉約，兒子各各自愈。子皋語大夫曰：速哉，速哉，天之報善也，過於響應聲、影應形。今大夫一心行善，男女

百病皆差，何況行一千餘事乎。薛瑗乃將千金拜上子皋，以酬賜經之恩，乞先生見受。子皋曰：予得大夫金亦無用處，可自留陰惠施人，唯抄此經，授與未悟之人，便是大夫報恩極也。於是先生乃辭大夫而去。

### 赤松子中誠經

軒轅黃帝稽首，問赤松子曰：朕見萬民受生，何不均匀，有富貴，有貧賤，有長命者，有短命者，或橫罹枷禁，或久病纏身，或無病卒亡，或長壽有祿，如此不等，願先生為朕辯之。

赤松子曰：生民煢煢，各載一星，有大有小，各主人形，延促衰盛，貧富死生。為善者，善氣覆之，福德隨之，衆邪去之，神靈衛之，人皆敬之，遠其禍矣。為惡之人，凶氣覆之，災禍隨之，吉祥避之，惡星照之，人皆惡之，衰患之事，併集其身矣。人之朝夕，行心用行，善惡所為，暗犯天地禁忌，謫譴罪累，事非一也。人之朝夕，為惡人神，司命奏上，星辰奪其筭壽，天氣去之，地氣著之，故曰衰也。黃帝又問曰：人生壽命，合得幾許。對曰：人生墮地，天賜其壽四萬三千八百日，都為一百二十歲，一年主一歲，故人受命，皆合一百二十歲，為犯天地禁忌，

奪筭命終。又問：或有胎中便夭，或得數歲而亡，此既未有施為，犯何禁忌。赤松子對曰：此乃祖宗之罪，遺殃及後。自古英賢設教，留在仙經，皆勸人為善，知其諸惡，始乃萬古傳芳，子孫有福。夫人生在天地之中，稟陰陽二氣，皇天雖高，其應在下，后土雖卑，其應在上。天不言而四時行，地不言而萬物生，人處其中，恣心情慾，凡人動息，天地皆知，故云天有四知也。人不言報天地之恩，發言多怨天地。天生烝民，以乾坤表父母，日月表眼目，星辰表九竅，風動火力為煖氣，壽命終時，總還歸土。天上三台北辰司命司錄，差太一直符常在人頭上，察其有罪，奪其筭壽。若奪一年，頭上星無光，其人坎坷多事；奪筭十年，星漸破缺，其人災衰疾病；奪其筭壽二十年，星光殞滅，其人困篤，或遭刑獄；奪其筭壽三十年，其星流散，其人則死。時去筭盡，不周天年，更殃後代子孫。子孫流殃不盡，以至滅門。人不自知過犯，只言短壽。故天不欺物，示之以

影，晝夜陰陽，雷電雨雪，虹霓交暈，日月薄蝕，彗孛飛流，天之信也；地不欺物，示之以響應，及生萬物，江河流注，乃至枯涸，山崩地動，惡風振木，飛沙走石，水湧蟲蝗，饑荒天旱，瘡癘疫，地之信也；鬼神不欺物，示之以禍福，恠異災祥，是鬼神之信也；國主不欺物，示之天地，和星辰，順災殃，滅四方，歸萬姓，安人君之信也。人之所行，發言用意，莫言天地如此。故聖人云：皇天無親，惟德是輔，畏天命，畏大人，畏聖人之言。凡人逐日私行善惡之事，天地皆知其情，暗殺物命，神見其形，心口意語，鬼聞人聲，犯禁滿百，鬼收其精，犯禁滿千，地錄人形，日行諸惡，枷鎖立成，此陰陽之報也。皇天以誠議，故作違犯，則鬼神天地禍之也。黃帝又問神仙善惡之兆，見蒙福祐，更可為朕審而述之。赤松子對曰：修身、制命、治性之法，清朝常行吉氣，專心記念，善語、善行、善視。一日之內，三業不生，三年之內，天降福星，皆為福報也；如人清朝，常行惡



語、惡行、惡視，教人爲惡日造，三年之內，禍患及身，亡財滅口，地加妖氣，人必衰矣。天之九醜，是人間之九橫。夫善者，惡之符；惡者，善之信也。又云：善人者，惡人之師；惡人者，善人之資。吉者，凶之證；凶者，吉之餘也。有善人常遇灾衰，多般禍患，先人之餘殃也。故一生修善之人，不必擇良時吉日，凡用使之時，自然得凶中之吉，百靈潛護，神煞避矣；一生爲惡之人，縱揀得吉日良時，及至用日，却值吉中之凶，惡神害之，福神避矣。但世人終日常修善行，自然天增福壽，和氣霞光，此乃形影之道也。欲得不衰不耗，與天相保，天地禁忌得失，修身制命之道，今具言之。人爲一善，神意安定；爲十善，氣力彊盛；爲二十善，身無患害；爲三十善，所求遂意；爲四十善，般富娛樂；爲五十善，子孫昌盛；爲六十善，不遭誤犯，惡人牽累；爲七十善，所學顯貴；爲八十善，獲地之利；爲九十善，天神護之；爲一百善，天賜其祿，逢遇聖賢；爲二百善，

揚名後世，子孫受祿；爲三百善，三世子孫，富貴利樂；爲四百善，四世子孫，富貴遷祿；爲五百善，五世子孫，受封超爵；爲六百善，世世子孫，忠孝富貴；爲七百善，世世出賢哲人；爲八百善，出道德人；爲九百善，出聖人；爲一千善，出群仙。古跡善政，天道所錄，見身加筭，進位登仙，福及子孫，生賢出聖也。若人爲一惡，意不定；爲十惡，氣力虛羸；爲二十惡，身多疾病；爲三十惡，所求不遂；爲四十惡，坎珂衰耗，凡事乖張；爲五十惡，終無匹偶；爲六十惡，絕滅子息；爲七十惡，陰鬼謀害，爲八十惡，水火爲灾，非橫燒溺；爲九十惡，貧寒困弱，瘡疥風顛；爲一百惡，天氣害之，橫事牽引，刑法惡死；爲二百惡，地氣害之，盜賊爲灾；爲三百惡，世世出下賤人；爲四百惡，世世子孫，窮賤貧乞；爲五百惡，子孫絕嗣；爲六百惡，世世子孫，盲聾瘖瘂，出癡顛人；爲七

百惡，出五逆不孝犯法子孫；爲八百惡，出叛臣逆子，誅滅親族；爲九百惡，出妖孽之人，夷滅族類；爲一千惡，世世子孫，異形變體，爲禽獸不具之狀，積惡之殃滿盈，禍及數世矣。此爲司命奪筭，星落身亡，魂拷酆都，殃流後世。黃帝又問曰：司命奪人筭壽，世人作何罪所招？赤松子對曰：伏以世上之人，自犯悔咎，却言天道不平，有屈不自分雪，呪詛怒天，囚禁枷鎖怒天，饑貧疾病怒天，寒暑霜雪怒天，晝夜短長怒天，自爲惡事，祈呪於天，逆四時，違五行，對三光，裸體赤露，便利向三光星辰社廟之前，見日月薄蝕不救，貪自歡樂，不敬天地鬼神，不孝父母，呵罵風雨，毀拆聖人典教，破壞社廟，穿掘墳墓，取亡人財物，欺詐盲聾瘖瘂之人，竊盜金帛，將穢污潑他人屋舍，妄外破除衣服，以不淨器物盛諸飲食，厭呪生人，埋符地下，妬賢嫉能，養諸蠱毒，殺害物命，遺無頭文狀，讒損平人，發覺他人私事，閉塞道路，填築溝渠，偷他人物，抛弃用藥，斫伐他人樹木、苗稼、花果、園林，損害六畜，穢污井竈、宮觀、廟宇、自身孝服，

唱歌作樂，放火燒山，破除他人產業，涸絕池沼，捕採水族龜鼉魚，與人結交，違背盟誓，輕慢神道，姦詐誣罔，口是心非，惡言讒鬪，僻要諍訟，教人官事重告，裸露對人，披髮飲食，損善益惡，濶己侵人，酷信邪師，教人非法，攻殺無罪，執正爲非，恃勢邪巧，入輕爲重，春行殺伐，夏誅諸命，秋則見惡不改，冬則開掘地藏，離他人骨肉，好殺惡生，自重輕人，欺孤凌寡，敗他成己，危他取安，借貸不還，譽己毀彼，和惡逐勢，賣弄他權，陰毒面慈，見殺加怒，知過不改，見善不從，背親向疏，慢高傲下，不受父母、師友教誨，妻妾讒鬪，取小下言語，輕弃骨肉，施恩却悔，樂短他人窮，監窺他密事，調謔姦他妻妾，非道而行，奪人恩愛，竊他善事，自言己有，以重罪牽引平人保證，輕慢上下，不擇尊卑，恃酒凌物，用物不當，拋棄飲食，輕賤衣服，非分求覓，不避危亡，得新忘故，棄本逐末，知恩不報，欺誑謾人。

右所書過犯八百餘件，略而言之，

不可具載。但世人有所犯，皆犯本照星辰，奏聞上帝、七星、六律、四時、八風、九宮、五行，先令司命奪筭，令人短壽，令諸殃禍，延及子孫。黃帝又問曰：人犯天地禁忌，奪筭有數，人之罪如何？赤松子曰：人爲天地之本，當爲善伏緣。世人外貌和柔，內懷陰妬，觸犯禁忌，罪累非一，被司命一一錄奏，應是世人遭刑殺者；或兩軍相持，陣場死者。一爲自身有犯，宿業相讎，二爲五運相交，太一伐之，數值遷移之歷運，合受磨滅之灾殃。黃帝又問赤松子曰：朕聞先生所說，世人違犯，卧不安席，罪可解乎？對曰：罪有可解者，有不可解者，世人偶行非道，心能悔過，是可解也；若聞不信，知過不改，爲惡轉多，心毒熾盛，不可解也。赤松子曰：人行善道，天地鬼神，賜福助之，增延壽考，無諸惡事，何以不爲善道。但世人尊敬天地、三光，不犯禁忌，孝愛父母，和順兄弟，憐愍孤獨，救接貧病，敬重師長，古來聖賢、鄉里老人，教示不違，卑謙恭敬，每遇風雨、寒

熱，惡星恠異，日月交暈，虧犯薄蝕，皆宜念善，敬遠鬼神，祭祀天地，上錄其功，增延祿筭。見人爲惡，勸人修善，若遇善人，敬而從之，或見凶危，將心救護，自就艱難，與人平穩，將己輕事，替人重役，勸人不爲官事口舌爭訟，尊理義井溝渠，修填道路。不以小失其大，不以大棄其小，見人有所失，爲其痛切；見人有所得，爲之內喜。扶羸護弱，施恩濟惠孤貧，恭謹卑遜，讓祿他人，天錄中功，亦增遐壽，子孫獲福。如有志信不違，心崇道德，不避危險，救溺江湖，無淫外色，不侵他人屋宅、產業，不非理損害物命，好生惡殺，禮敬不虧，常習經書，恩不忘報，惠人不悔，寬懷忍辱，盡忠盡孝，不逞威儀，不枉用財物，不愛華麗之服修饌食，不非分殺命，自我作古，人無不親，無自賢，無自善，無自解，無自富，無自矜，無自專，無自譽，無自重，無自尊，無自大，無自用，無自可，大錄下功，皆增筭壽。又加筭倍多者，人能事君、盡忠、事父、盡孝，不傲慢，敬師長，開悟童蒙，光讚

師傅，修身謙讓，和睦上下，撫愛均平，不聽讒邪，直心用行，婦人孝順，翁婆敬順，夫婿清貞潔行，飲氣吞聲，參省晨昏，和顏悅色，無私奉上，並蒙加筭，延壽增祿，災橫消除，男女聰慧。人有折壽薄福者，臣弑君，子弑父，事師違背，業成忘師，悖亂無禮，不識親疏，逞恣自我。婦人違背父母，不孝翁婆，輕賤夫婿，口舌誹謗，鬪亂六親，盜竊囓慵，比鄰爲惡，皆奪福壽，惡病纏身，生遭人憎，死墮地獄。黃帝又問曰：更有人間至妙之道，可得聞乎？赤松子曰：夫人修持善惡，自起於心，心是五賊之苗，萬惡之根。夫人之心擬行善，善雖未成，而善神已應矣；心起惡，惡雖未萌，凶神已知。故君子千日行善，善由未足；片時造惡，惡便有餘。至如僭奪吞併，亦起於心，有得有失，會在天道。又有起心害人，未必便得，乃其死生枯榮，亦由運也。經云：天有五賊，見之者昌，失之者亡。教法五德，行之者昌，背之者亡，行之爲溫、良、恭、儉、讓，仁、義、禮、智、信，背之

爲惡、逆、貪、妬、殺、兇暴、亂、欺、誑、詐、佞。世人多行五背，心常九念：見他人家榮貴，說他往日風塵，起心願他流貶；見人富貴，笑他往日貧窮，願他破散；見他財帛豐盈，起心教人劫奪；見他妻妾美麗，起心欲作姦非；見他屋宅宏壯，起心欲擬焚燒；欠他債負，起心願債主身亡；借貸他人財物不得，起心懊惱恨多；見他偶有危難，說他往日之非；自生身父母，早願亡歿，要財物、屋宅。此是愚人九念。是以天地鬼神惡之，賜其殃禍，奪其筭壽也。心行五德之人，常懷九思：見他榮貴，自思福業緣薄；見他穀米盈倉，自思不勤力營種；見他金玉資財，自思非我所有之物；見他美色妻妾，自思匹偶不生亂心；見他屋宅宏壯，自思弊陋且安；見他舊曾於己不足遭官府，起救接之心；欠他債負，目下未有還填，長思憂負勤償之；或欲借貸他人財物，自思舊無恩力；見他事養君親，常思無辛勤酬答世人。能終日行此九思，棄前九念，爲上智明慧人

也，見世獲於福祐，慶流子孫，橫禍非災不可及也。黃帝又問先生曰：智人何等次之？對曰：有三等。皆爲仁者之人。上智者，明天文，察地理，不學自曉，不教自解，默而識之，辯音律，鑒賢愚，心慈愍，不輕人，識成敗，知進退，別存亡，此人雖貧而終富，暫卑而終高，此上智人也；中智者，通會經書，常存禮敬，見賢思齊，扶危救弱，惠施不悔，忠孝不虧，言不傷物，卑遜溫謙，此未學而終悟，雖未顯而終達，此中智人也；下智者，修善人也，改往修來，就業而思學，篤信善惡之事，不侵他人財物，保命惜身，會道理，識文法，自能好弱，自怕災衰，如此兢兢而無過失，不遭橫禍，此下智人也。

黃帝言曰：善哉，善哉，此言不可數於功德，謹依所說，錄示衆人，作大津梁。諸群臣稽首而退，依教奉行。

赤松子中誠經

（吳亞魁點校）

## 032 唐太古妙應孫真人 福壽論

經名：唐太古妙應孫真人福壽論。唐孫思邈撰。一卷。底本出處：《正統道藏》正一部。

聖人體其道而不爲也，賢人知其禍而不欺也，達人斷其命而不求也，信人保其信而靜守也，仁者守其仁而廉謹也，士人謹其士而謙敬也，凡人昧其理而苟非爲也，愚人執其愚而不憚也，小人反其道而終日爲也。福者，造善之積也；禍者，造不善之積也。鬼神，蓋不能爲人之禍，亦不能致人之福，但人積不善之多而煞其命也。富貴者，以輕勢取，爲非分也；貧賤者，以佞盜取，爲非分也。神而記之，人不知也。夫神記者，明有陰籍之因。又按《黃庭內景》云：夫人有萬餘神，主身三尸九

蟲，善惡童子錄之奏上，況有陰冥之籍也。愚痴之人，神不足；神有餘者，聖人也。亦不可一二咎而奪其人命也，亦有爵被人輕謗，及暴見貶黜，削其名籍，遭其橫病者，多理輔不法所致也。理輔不正不死者，其壽餘祿未盡也；正理輔而死者，筭盡也。貧者多壽，富者多促。貧者多壽，以貧窮自困，而常不足，不可罰壽；富者多促，而奢侈有餘，所以折其命也，乃天損有餘而補不足。亦有貧賤、飢凍、曝露其屍不葬者，心不吉之人也。德不足，是以貧焉；心不足，是以死焉。天雖然不煞，自取其斃也。不合居人間，承天地之覆載，戴日月之照臨，此非人者也。故有官爵之非分，車馬之非分，妻妾之非分，已上謂之不仁之非分也有屋宇之非分，粟帛之非分，貨易之非分，已上謂之不儉之非分也則神而記之，三年、五年、十年、二十年不過此，過此，神而追之則死矣。官爵之非分者，崎嶇而居之，賄賂而得之，德薄而執其位，躁求而竊其祿，求其躁取而必強，強而取之非分也，即有

灾焉、病焉、死焉，神而記之，人不知也。車馬之非分，市馬恠其價而焉，欲其良水草而不時，鞭勒而過度，奔走而不節，不知驅馳之疲，不知遠近之乏，不護嶮阻之路，畜不能言，天哀力竭，此非分也，神已記之，人不知也。妻妾之非分者，所愛既多，費用必廣，淫泆之道，必在驕奢，金翠之有餘，蘭膏之有棄，惡賤其紋綵，馱飫其珍羞，人爲之難，余爲之易，人爲之苦，余爲之樂，此非分也，神已記之，人不知也。童僕之非分者，以良爲賤，以是爲非，苦不憫之，樂不容之，寒暑不念其勤勞，老病不矜其困憊，鞭撻不問其屈伏，陵辱不問其親疏，此非分也，神已記之，人不知也。屋宇之非分者，人不多構其廣夏，價不厚而罰其工，人以不義之財，葺其無端之舍，功必至飾，必明斤斧血力，木石勞神，不知環堵之貧，蓬戶之陋，此非分也，神已記之，人不知也。粟帛之非分者，其植也廣，其穫也勞，其農也負，其利也倍，蓄乎巨廩，動餘歲年，盜賊之羈縻，雀鼠之巢穴，及

乎困農負債，利陷深冤，此非分也，神已記之，人不知也。衣食之非分者，紋綵有餘，餘而更製，箱篋之無限，貧寒之不施，不念俛露之凌布素之不足，以致蠹魚鼠口香豕腐爛，此非分也，神已記之，人不知也。飲食之非分者，一食而其水陸，一飲而取其弦歌，其食也寡，其費也多，世之糠糲不充，此以臆膩有棄，縱其僕妾，委擲泥塗，此非分也，神而記之，人不知也。貨易之利厚，不爲非分，利外尅人，此爲非分。接得非常之利者，祥也。小人不可以輕而受之，其所鬻者賤，所價者貴，彼之愚而我之賊。賊而得之者，禍也；倖而得之者，灾也；分而得之者，吉也；屈而得之者，福也。夫人之死，非因依也，非痾瘵也，蓋以積不仁之多，造不善之廣，神而追之則矣。人若能補其過，悔其咎，布仁惠之恩，垂憫恤之念，德達幽冥，可以存矣，尚不能逃其往負之灾；不然者，其禍日多，其壽日促，金之得盈，福之已竭，且無義之富，血屬共之，上之困焉，下之喪焉。

如此者，於我如浮雲，不足以爲富也。人若奉陰德而不欺者，聖人知之，賢人護之，天乃愛之，人以悅之，鬼神敬之，居其富而不失其富，居其貴而不失其貴，禍不及也，壽不折矣，攻劫之患去矣，水火之灾除矣，必可保生全天壽矣。

唐太古妙應孫真人福壽論

（吳亞魁點校）

## 033 太上感應篇

經名：太上感應篇。原題宋李昌齡傳，宋鄭清之贊。三十卷。底本出處：《正統道藏》太清部。

### 進太上感應篇表

臣瑩微言，凝旒重道，深嘉太上之格言；鋟梓迄工，幸畢微臣之素願。輒僭聞於淵聽，用祇答於宸恩。臣惶懼惶懼，頓首頓首。臣竊觀寶藏之諸經中，有瑤編之大訓，本慈悲而救物，爰諄複以誨人。謂善惡感召之由，端類樞機之發；而禍福應驗之理，捷於影響之隨。千二百懇懇之辭，億萬載昭昭之誠，然必賴明良之敷闡，迺能率衆庶以皈依。恭惟皇帝陛下垂拱視朝，緝熙典學，講貫雖專於六籍，搜羅旁及於羣

書。道訪窈冥，繼聖祖下風之請；化流清靜，邁漢皇當日之規。怡神政事之餘，玩意天人之際，將推行而傳遠，故哀集以加詳。羲畫丁寧，冠驪珠之八字；甘盤叙贊，擅鴻筆於一家。煥乎，函笈之光；榮矣，簪裳之遇。臣么麼無取樸野，何庸焚修濫廁於竹宮，名姓誤塵於楓陛。曩已躡教門之陞，擢今又叨睿旨之使。令寵拜賜金，冒司鏤牒，誓竭眇綿之力，少伸報效之私。慨念先臣，每懼斯文之廢闕；不圖回祿，愈增吾道之宣明。董摹刻以既周，謹緘熏而恭進。伏望皇帝陛下俯留一覽，誕布四方，俾爾民皆遷善之歸，自樂從於教化，則是書爲扶世之助，庶不負於君師。臣謹以所刊御題《太上感應篇》一部八卷，隨表上進以聞。臣瑩微惶懼惶懼，頓首頓首，謹言。

紹定六年八月 日，右街鑒義主管教門公事，太一宮焚修臣胡瑩微上表。

### 太上感應篇叙

先儒有言：天理人欲，同行異情。故飲食男女，謂之欲矣。然於其間，理欲所由分，邪正所由辯，於是善惡殊途，相去遠矣。使皆以飲食男女爲人欲，則是閉口枵腹，然後可以得飲食之正；絕滅種類，然後可以得人倫之正。是惡有此理哉？使夫人而渴飲飢食，男室女家，舉是兩端，驗之心術之微。達之家國天下，念念不離乎天理之正，則是諸惡莫作，衆善奉行也已。夫如是，則《感應篇》不必有可也。奈之何好善，未必能如好好色；惡惡，未必能如惡惡臭。始而涓涓，終而滔滔。始而萌于一念慮，終而散爲千萬端。善念不勝惡念之多，君子不勝小人之衆也。此《感應篇》所由作，而注者之功，出入三教、網百家，因事引類，旁引曲證，孜孜勸人爲善之意也。是書在故宋時，嘗刊版于虎林之東、太一宮前，有李宗題識：諸惡莫作，衆善奉行八

大字。其時大儒，若真西山先生、鄭安晚丞相，皆有序引內附已。七十餘年，其爲版不存久矣。余鄉備員永嘉莫府，時刊積善錄諸書。今入吳，得《四書集注》，并《小學》善本，皆已勒諸梓，欲復刊是篇，則心力有所不遑矣。吳人溫懷仁君壽，家藏是篇，恒恐磨滅，於是捐金刊諸梓，不足則募施者以足之。經始於至正七年之冬，更九年秋八月，刊工告完。君壽刊是篇時，以余有意爲善也，實謀於余。余力雖不能振之，而時時勉之，以有終始，則余不爲無助。刊完乞余爲之序，故不敢以俗陋辭。承德郎平江路總管府推官許昌馮夢周叙。

《太上感應篇》，舊出《道藏》宗季刊版臨安太一宮。其首題八字，蓋宋理宗御書。其以次序述之者，鄭安晚丞相，真西山先生，餘皆其時宗工鉅儒。觀其意，無非勉人爲善之意也。懷仁生長吳下，自先人以來，莫不好善。至於懷仁，克守先業，今犬馬之

齒，且望五十。竄身民籍中，及保父母遺體，要皆不敢爲惡之所致也。於是敬以此篇刻諸梓，庶與四方善人，因是篇也，日加修省，幾不孤太上開示之旨，叙者、注者誘掖之意云。平江溫懷仁謹叙。

史遷述《老子傳》，參舉萊子史儋之倫，未始定于一，殆不知孰爲老氏者。而葛稚川以爲所歷非一世，所出非一人，其論去遷遠矣。遷之言曰：無爲而自化，清靜而自定，則老氏者，吾不知其爲天人也耶。唐興，推其祖之所自出，躋於上帝，尊之也至矣。今讀其所著道德之篇言：用天下國家者，莫詳焉。至其窮極微妙，旁羅祕隱，於是莊周列禦冠之徒，始以其說，滂洋乎天下，而莫適於實用。載讀感應靈篇，與蜀士李昌齡之註，是殆推本道德之旨，發明禍福之端，究詰天人之證，嚴於訓戒，以警悟人心者乎？雖然人道邇，天道遠，人之盡，天之合也。蓋曰：善而無所勸則沮，惡而無所戒則流，使人知所勸而勉於善，知所戒而

懼於爲不善，則夫保衛良心，適其情性之正，惕然不敢自肆，以速戾于厥躬，有關於治化審矣。天以天爲，不可不信；以己爲，不可欺；以人爲，不可逆；以物，不可不愛。順而行之，何往非福；反是，則禍之招也。可不謹與？論者曰：順德者祥，反正者殃，此天道也。爲善以邀福，不幾於有所爲而爲之乎？蓋視履考祥者，理也。小善未孚，覬心已生，則人事之作止，而天道之遠邇係焉，故貴乎誠之也。或者又曰：顏夭而跖壽，慶富而憲貧，董秦之官爵，黔婁之衣巾，天之報施，又何難謀之若此。蓋修人事而契天道，所以盡性也；順天道以修人事，所以至命也。人性無一之不善，則是訓；是行而不貳其心，抑亦可以立命矣。故知戒懼之不可忘，而充於至誠之久；知是心之不可妄用，而達於清靜無爲之妙。讀是書者，所當盡心焉。迺若注釋之搜冥抉怪，旁引曲喻，是又當嘉其用心之塵而審取焉，則可矣。紹定癸巳季夏，中澣九峰真逸陳奐子

敬父序。

太上無言，不得已而言。其言《感應篇》云者，律程嚴備，途徑朗分，策之使趨，尼之使辟，總一千二百七十有四字，始之曰：禍福無門，唯人自召。終之：諸惡莫作，衆善奉行。指歸精切，不過此一十六字。愚夫愚婦，易知易行。李註言逾十萬，不既多乎矧蔓，而爲序爲跋未已也。且天地之間，惟一感應。心吾心也，無欠無假，感之在我，應之亦在我。故善者常福，不善者常禍。感而爲應，應復爲感。循環無端，有以類至，宜非可以文寶索也。彼託文字而傳者，削之又削之，至於不容削；繇文字而悟者，忘之又忘之，至於無可忘。銷聲剥華，呈真露樸，心與道混，隨感隨應。若是，則文字誠不足尚矣。雖然動而之乎情，其不謬於感應者，幾何人哉。性命之薄，文字之滋也。集衆妙以鈎其玄，揭諸微以昭其信，曾謂疏略簡淡之辭，可以振遺響於大道將隱之後耶。編牘爛熳，主一善而已。使人人果能以善爲感應根，則

諸福之物，皆其心官統之。雖太上此篇，藏諸金匱可也，吾亦將守中焉。端平乙未長至後三日，方厓龔幼采謹跋。

是書也，以感應名篇，豈苟云哉。世人每以感應二字，作一句輕讀過，豈知有感。此有應感者，在我應者，在彼固未有，無感而自應者也。幸今吾邑刊是書，則人皆可以有是書矣。人有是書，要須心有是書。使心無是書，雖模以紙侈其帙，壓架充棟，猶無書也。詩曰：上帝臨女，毋貳爾心。心乎，心乎，其有是書之心乎。嘉熙戊戌歲閏月朔日，谷口鄭大惠謹題。

《太上感應篇》之作，正所以開千萬世愚夫愚婦，爲善之門也。感隨於應，應孚於感，其機甚速，可不謹哉。若夫感不在物而在心，應不在近而在遠，則士君子者，尤當默會於自然之中可也，真氏子其勉之。熙戌立夏後十靜軒先挺跋。

太史公作《伯夷傳》有曰：近世操行不軌，專紀忌諱，而終身逸樂，及原累世不絕。或擇地而蹈之時，然後言

行不由，徑非公正，不發墳而遇笑禍者，不可勝數也。范孟博誠諸子：吾欲使汝爲惡，惡不可爲；使汝爲善，則我不爲惡。合二子之論而觀之，而感應之說遂窮。使後世爲善者懼，爲惡者肆，未必不繇此也。余謂有天道，有人道。福善禍淫，天之道也；趨善遠惡，人之道也。爲人行人而已，而禍福何知焉。《感應篇》之作，爲不能擇善而行者設爾。人心未嘗無所畏，上焉畏義，其次畏禍。讀是書者，見爲惡得禍之可畏，充畏禍之心，而畏善之心萌焉，則庶矣。端平丙申二月既望，里人葉應輔謹書。

世謂感應之云，獨出於老佛氏，非也。書有作善降祥之訓，易有積善餘慶之言，大抵皆此理也。顧嘗思之，所謂善者，果何事耶？傳稱活千人者有封，而殺降者殃及三世。然則有志於善者，必其權足以生人、殺人，然後可也。陋巷簞瓢之士，將焉從而用力乎？否則嚴禱祀，以徼福於鬼神；植因果，以希報於冥漠。此又利心之尤，



而不足以言善者也，然則當奈何。余聞諸孟子曰：鷄鳴而起，孳孳爲善，舜之徒也。又曰：存其心，養其性，所以事天也。夫鷄鳴而起，未與接物，善焉乎施，存心養性，此人事也，於天何與？嗚呼，知乎此，而後知爲善之本矣。益天命之性，賦之於人本，皆至善自。夫汨之以私，亂之以欲，然後反善而之惡爾。心者，所以主乎性者也。吾能兢畏齋果，如臨君父，如封神明，則本心常存，而性不失矣。循性而行，何往非善，是爲不負天之所予者，此既所以事天也。鷄鳴而起，孳孳一善者，爲此而已。苟存乎此，則天下之善，皆此焉出。雖功被萬物，澤及百世，亦自是而充之爾。予故曰：此爲善之本也。李公註《感應篇》以諭人，子懼世人不求諸內，而求諸外，顧以力弗足而怠焉。又或出於僥求覬幸之私，而反流於不善也。故書之篇末，以告觀者，庶不失感應之本指云。端平二年上元日，西山居士真德秀敬跋。

七天昌謹齋心三復太上感應之旨，

金輝玉映，如日之必燥，雨之必潤，炊之必熟，種之必生也。恭惟皇上御灑，八字簡明，二理該貫，真三十六部之喉衿，萬八千篇之管轄也。敬閱大丞相妙贊，心鏡了然，輪關透鑄，隨筆呈露，所以開人心之蒙昧，獨步杳冥之日月也。若夫李君集註，世網蝟如，懲妄破譎，迎刃解散，所以去人心之危疑，直躋霄漢之風雲也。是理也，吾儒講之熟矣。達者施於政，窮者蹈於身，未嘗不深切著明也。是書之旁引曲諭，特以發明是理，其有功於輔教者哉。君子由是而行，夫己之所未行，以覺夫人之所未覺，庶愚夫愚婦，皆知遷善遠罪，極而至於天人一心，物我同視，始不辜刊行是書者之本意也。時嘉熙戊戌夏五朔，謙堂陳天昌謹書。

天道福善禍淫。人之積善積惡，殃慶各以類至。間有爲善而得惡，爲惡而得善，或者修省之念，從而怠焉，是未明夫熟與未熟之論耳。老氏言：禍兮福所倚，福兮禍所伏。倚伏之幾，誰其尸之？惟君子率性而行，不雜以

僞，正其義而不謀其利，明其道而不計其功，此《感應篇》之本旨也。觀是書者，無徒知之，宜允蹈之。嘉熙戊戌夏至，易隱太初子應辰謹跋。

### 紀述靈驗

昔峨眉令奉議郎王湘，紹興辛巳歲，因觀此篇，焚香誓行數十件事，後氣疾昏悶殊絕，更衣而卧，男女環泣。覺身在半空，聞哭聲微如蜂蠅。少頃，有人云：王湘方欲行《感應篇》，真樂善者，且速放還。已而遂甦。

遂寧府周箴，因獲此篇，日逐觀閱，又好與人演說。紹興二十一年二月二十一日，暴死。經日還魂，謂妻曰：有人追去陰司，見庭下皆立籃縷人，各有力士，執州府旗號管押。箴被驅立本州旗下，顧盼左右，半是鄉里餓死者，心甚恐怖。俄頃，呼至殿下，瞻殿上坐者，如人間畫星官像，呼箴喻曰：汝本在饑饉籍中，今以汝欽奉《太上感應篇》，為人演說，汝雖欲行，未及一二，然聞而回心，為善者多，亦有行持，而證仙果者，皆因汝之功，今一槩追至，已改注壽祿籍訖，放還之後，堅固善心，可證大道，不復來此。箴既

出，忽一吏戒曰：汝還陽間，更宜將《感應篇》廣行流布。若一方受持，一方免難；天下受持，天下豐治。傳受之士，功業不淺。非但脫水火盜賊疾苦之厄，凡能平心待物，亦可祈求男嗣，添注壽祿。廣而充之，可造神仙。箴因省敬，錄其事以警世人。噫，即此知彼，二人福興，一念而報應已。若是其有信心力行，更相開導，引接未來，積之以漸，持之以久，則天地鬼神，森列昭布，豈無助於冥冥之中哉。

台州仙居縣城西王竺，有次男王淨，年四歲，嘉定乙亥六月十二日午時生，因戊寅年二月二十三日，竺帶出閑嬉，被邪祟侵害，回家不能語言。至二十六日戌時，身死。竺情切發心，命工刊《太上感應篇》印施，欲求亡男王淨魂魄，再投母胎，人為兒子。果蒙感應，妻黃四九娘已卯春有妊。至前三月二十八日夜，夢到黃巖縣定光觀黃籙普度大會，附薦所同亡男王淨，共轎歸家。夢覺，胎妊微動。至十月十八日申時，生長男子，捨在東嶽行宮，取

名師回。至乙酉年，妻復有孕，得病甚篤。四月二十八日，命工上此篇板，即有報應。次日下手刊行，病則繼痊。此段報應，乃邑士施秉文得之於妻弟鄭時俊見居巖嶼。

新都楊道機，字明夫。云吾鄉友人學諭宋子止，一日嘗與子言曰：慶元改元，夏六月十二日早，有雲遊道人，以久病死於所居之壁後。至晚，忽引首相視，若有言者。因詢之曰：貧道死，良久而甦，略有怪事，願聽其說。貧道姓張，天彭人也，家以酒業破蕩，遂慕道流，落於嘉眉黎雅間，口傳《太上感應篇》緣化，以充旦暮。至雅安，有一茶肆，日供齋饌，令貧道念誦此經。雖為至誠轉誦，然止能誦其半，而未究全篇，每以為愧。數日前，以病故卧於此，適早困絕。初夜之時，見一鬼吏，呼之前行，至一官府，恍若嘉州憲司。方入門，見飢餓者無數。又過一門，有一大庭，見庭下旗幟羅列，鎗戟滿前。有一人坐於廳上，遂引至前，問曰：爾在生之日，誦《太上感應篇》，何

故止誦其半。貧道竟不敢答。又曰：汝雖有過，而亦有功，令還人間，更受辛苦百日。吏遂引出，謂曰：汝以誦經，不及全篇，所以至此。今既生還，若到人間，可究全篇，及化世人誦念此經，即可免汝之罪。言訖而覺，又泣而告曰：貧道所見如是，恨此身穢惡，不能化人，乞爲作一方便，以《太上感應篇》普勸念誦，一以願奉道之人，消災集福；一以少贖貧道，不誦全篇之罪。□知《太上感應篇》，其爲冥司取重如此，雖誦而不全，其報應尚爾，況知有《太上感應篇》，而略不念誦奉行者乎？

簡州進士王巽，於開禧丁卯之冬，染病困篤，爲陰府所攝。比至一山，樓宇壯麗，金釘朱門，金字大書曰：東嶽府。內則廊廡清肅，階陛峻嚴。有青衣道士數輩，如以職役於下。仰視殿左一碑，高可丈餘，乃金書一《太上感應篇》。誦讀敬禮而出，復經從一所在，宛如官府，榜曰：速報司。方竦然，而身已至於庭矣。人亦衆聚，有繫

縛者，有從容者，半可面識，似各以善惡照對所拘，不相存問。俄聞乎巽姓名曰：太上聖訓，汝既面覩，切宜欽奉，從此當持殺戒。聞之釋然，其疾頓愈。

黃巖縣郭進士楊琛，因覩刊《感應篇》，遂占助一版。甲午春，夢神人告曰：已排君在第三甲第十七名，意謂應在科舉。次日，刊局發版樣請金，乃刊琛名在第二卷第十七版。丁酉春，版將成就，刊局欲再作小卷，刊施本文，使人便於持誦，庶幾由誦而覺，由覺而行。進士沈球，因內子項氏有娠多病，發心刊施。至三月庚申日，刊成。刊者捧版至門，項氏即產，不移時刻，母子俱慶，且無少艱至。若真大圭竭誠，募刊是篇，繼獲嗣續。及凡能至誠助刊者，亦多獲嘉應。今不敢隱其感應之實，姑述其略，用勸善男信女，恪意受持。正真在我，則自應於彼矣。

## 太上感應篇卷之一

李昌齡傳 鄭清之贊

太上曰：禍福無門，唯人自召。

傳曰：一念未起，則方寸湛然，有同太虛。何者為善，何者為惡，及一念纔起，趣向不同。善惡既殊，禍福即異。此太上所以言：禍福無門，唯人自召也。大抵一念起處，即禍福之門。篇中之言，皆其事也。昔衛仲達初為館職，被攝至冥司。冥官命吏呈其善惡，二錄比至，則惡錄盈庭，而善錄纔如筋。小官色變，索秤稱之。既而，小軸乃能壓起惡錄，地為之動。官乃喜曰：君可出矣。仲達曰：某未四十，安得過惡如是之多乎？官曰：不然，但一念不正，此即書之，不待其犯也。仲達曰：然則小軸中，所書何事？官曰：朝廷嘗大興工役，修三山石橋。君上疏諫止之，此諫藁也。仲達曰：某雖言之朝廷，初不從於事，何益而能有

如是之力乎？官曰：朝廷雖不從，

然念之在君者，已是向使聽從，則君善力何止如是，將見乘此而立獲度世矣，尚安得而攝君乎。奈何惡念太多，力已減半，不可復望大拜後果，止於吏部尚書。嗚乎，仲達之惡，止是空有其念。尚至一旦損盡，合作宰相之福。況本自猥薄，而又多直犯者乎？於此益知，一念起處，信為禍福之門也。是故趙康靖公槩，嘗置餅豆二物，於几案間。每一念起，必隨善惡以豆別之。善則投一白豆於白餅中，惡則投一黑豆於黑餅中。初則黑豆絕多，既而漸少，久而善惡二念都忘，餅豆二物亦俱棄而不用。此蓋消磨，至於瑩徹，無復可以記別者也。嗟乎，世人方寸之間，波瀾萬丈，尚何望如趙康靖之至于瑩徹乎？將見損福，如衛君也。

贊曰：

福本自求，孽由自作。同出念慮，分為善惡。吉凶感召，影響酬酢。毋待已形，所貴先覺。致力於斯，俯仰

無作。

善惡之報，如影隨形。

傳曰：善惡之報，而以形影為言者，謂作善得善，作惡得惡，亦猶形之必有影也。昔曹彬忠誠事君，謙恭自處，不急貨利，不樹私恩，振乏絕，恤鰥寡，喜愠莫見。不以富貴驕人，雖帥師征討，未嘗妄殺。初破遂州，諸將皆欲屠城，公獨執為不可。及伐金陵，必先焚香誓衆：城下之日，無得妄殺一人。舉此二端，餘悉可見，前後全活，可勝言哉。又如捨怨而雪昌言，自誣而救全斌，緩決新婚之吏，不傷已蟄之蟲，皆盛德也。是故諸子皆賢，令瑋琮瓌繼領旄鉞，少子玘追封王爵，實生光獻太後，以至濟陰生享王爵，子孫昌盛，近世無比。然則為善之報，豈不如影隨形乎？聞中國計使薛文傑，常與內樞密吳英有隙。一日，閩主鱗使巫徐彥視鬼宮中。文傑因令以英將反為對，鱗信而殺英。時英久典閩兵，軍士悅附。聞英冤死，無不切齒。適吳

人攻建州，鱗發兵救之。軍既發，乃

逗遛不進，必欲得文傑而後行。鱗不得已，以檻車械送。軍士得之，嚮食立盡。初文傑之為鱗造此車也，謂舊制無他苦，於是自出新意，車內皆周植鐵鉗，鉗皆內向，使檻送者居中，不得動轉，動即為鉗所刺。其意必有所主，無何未及施用，至是乃身自嘗之。然則為惡之報，豈不如影隨形乎？

贊曰：

理有施報，出於自然。如種五穀。刈獲有年。如植荆棘，久則蔓延。易稱善惡，必以積言。勿以其事，責諸目前。

是以大地有司過之神，依人所犯輕重，以奪人筭。

傳曰：按《北帝大伏魔神呪》等經，下方正北，有一大海，穢惡腥黑，莫測邊際。中有一山，高十萬六千里，上參碧落，下入風泉，名曰北都羅酆山。山近水面，有一大洞，名曰陰景天宮。周回三萬六千里，中有三十

六獄。獄中草木，皆稟自然惡毒之氣，鋒鋸風利，甚於劍戟。主此洞者，名曰太陰天君。助治四人：一曰東斗，斗中生炁君；二曰西斗，斗中成須君；三曰南斗，斗中司命君；四曰北斗，斗中司命君。此洞之外山上，別有六洞。六天大魔，各主其一，即太陰天君外、六曹也。互相關報，主執罪罰。六大洞官之下，又有三小官官：一曰天官，二曰地官，三曰水官。專主刑名之職，最為追呼要司也。三官之下，又有九令土主，即九州之主也。五嶽府君，二十四炁，乃二十八宿之陰獄。以至河海掾吏，丘陵溪洞主者，各各秉命，列為屬吏。夫酆都者，天地司過之都司也。九令五嶽者，酆都之子司也。令獄以下，所有冥曹，又屬令嶽之子司也。分司列局，因事授職，千千萬萬，何可勝言。不聞嶽司，近又置舉意司乎。其司共有五案六員判官，專主關達人之事始，即人之起意處也。善惡功過，纖悉皆書。既

書達於更生虞公，御史呂公，所主之司，此司得之。又復籍為二簿，達於豐道中嶽、定子定奪二司。定子司，則皆青蓮寶座。定奪司，則皆荆棘蒺藜。予本二司，亦自紹興二十八年，置至乾道，八年校幼。以善而僧紀福者，四方上有二千八有六人；以惡而將入荆蒺者，四方却有八千七百六十一人。便可見其為善者少，而為惡者多也。大抵荆蒺之嶽，端為欺詐姦邪者設，行住坐卧，荆蒺蒙縛，極為苦楚。嗚呼，今日身被蒙縛，豈不亦猶昔日欺詐姦邪，人被蒙縛乎？若夫減奪之說，則當隨文引證，茲不復載。

贊曰：

天地鬼神，森列昭布。陰誅冥責，列於刀鋸。依過定罪，毫髮不恕。筭既可奪，壽豈難注。不睹不聞，宜益戒懼。

筭減則貧耗，多逢憂患。

傳曰：道藏《紀筭錄》云：清齋一旬，增筭十紀。清齋一日，增筭十

旬。清齋者，心齋也。一經減筭，即為有過之人。貧耗憂患，何所不有。昔奉符令錢若愚，早歲補官，姦險狠悞，在處多不成任。晚益迍蹇，子女淪喪，觸目無聊，因投詞於龍虎山，叩頭禱謝。是夕，夢一神叱曰：汝姦險狠悞，奪筭將盡，尚何謝為。未幾果卒。櫟陽尉郭鄴，官不得調，奇蹇迍蹇，無所不至。雖至親密友，亦漸疏斥。每倦悶間，即見二物，狀如猿狖，跳躑其旁。心大惡之，祛亦不可，避亦不可。忽一日，乃自言曰：吾乃主世之虛耗者也，君既獲罪，故吾得以擾君，今數滿當去，可享安矣。果如言。此皆減筭則貧耗，多逢憂患者也。嗚呼，與其至此，孰若速自澡雪，無令至此乎。

贊曰：

人之賦壽，如木有根。隨其生植，脩短所存。沃以膏潤，枝條苾芬。乃或戕伐，枯悴日聞。栽培傾覆，天何心云。

人皆惡之。

傳曰：按《七星移度經》，陰匿闇昧，伏姦藏欺，不義不仁，無恩無德，北斗定為大惡人。陰匿暗昧，伏姦藏欺，不義不仁，固大惡；無恩無德，亦大惡歟。大抵無德無恩，則功不及人；陰匿闇昧，伏姦藏欺，不義不仁，則害必及物。其為不善，實皆一也。今為人而至使人皆惡者，必自取也。昔丁晉公與寇萊公，同在政府。天下之人，識與不識，聞萊公之名，則必許為忠；蓋聞晉公之名，則必目為姦諛。聞一善，必以歸萊公，未必皆萊公所為也；聞一不善，必以歸晉公，未必皆晉公所為也。物論如此，而鯨波之設竟如此，豈非功不及人，而害多及物乎？經云：喜集則福生，怨積則禍至，信不誣矣。昔杜祈公知乾州，歲未滿，改知鳳州。二州之民，爭于界上，一曰：我公也，汝奪之。一曰：今我公也，汝何有焉。張忠定再鎮蜀，蜀中之民，無不鼓舞，相慶如赤子之久失父母，知公之來，必能復鞠我也，至今尸而

祝之，社而稷之。然則二邦之民，所以喜二公者，為何如？嗚呼，與其怨積，孰若喜集，戒哉。

贊曰：

西子不潔，掩鼻過之。滄浪之濁，潔足是宜。美惡自取，尤人何為。梟獍蝮蠍，唾逐恐遲。愛人不親，反己可知。

### 刑禍隨之。

傳曰：太虛真人南嶽赤君曰：人若遇我以禍，但以福往，自然福德之氣恒生於我，害氣重殃自生於彼，此學道之大行也。然則刑禍隨者，豈非害氣重殃，恒在於身乎？苟為不然，胡為所至輒與刑禍會也？不聞盧劉之事乎？昔盧嬰氣質文貌，皆足過人，人與之交，必遭橫禍。時元伯和為軍司馬，聞而不信，召與之飲。宴未終，而節度陳少游已遣軍吏，縛伯和而去矣。或以告少游，少游亦不信曰：伯和自當有罪，嬰何預焉，吾將薦而官之。及至潼關，則上已幸奉天矣。又有劉甲者，亦如嬰之為

人，人與之交，必及於禍。士子王建，獨謂不然。但人偶有灾耳，甲何預焉。甲聞大喜，急往謝之，相與談論，久之乃退。未幾，建遂失火。人因目為鴛鴦，或遇諸途，無不急走遠避，惟恐避之之不速也。嗚呼，盧劉如此，而所至輒如此，赤君之言，豈不然也。

贊曰：

人之隱慝，為於無形。厭然掩覆，更竊美名。高談理義，自詭廉清。謂可欺世，永享安榮。孰伺其後，人禍天刑。

### 吉慶避之。

傳曰：南嶽壽星告太極真人徐來勒曰：若能刻意為善，自然動與福會。然則吉慶避者，豈非不能刻意為善，而至然乎。大抵非吉慶避之，其福德淺薄，自不能與吉慶會也。昔宋太宗作端拱樓，聞董羽善畫龍水，召之使畫於壁。羽用意精妙，半年乃成，自謂天下絕筆。及太宗引嬪御登樓觀賞，無何，太子見龍大驚，立

命汗漫，半年工夫，一旦無用。彘使皇子不驚，董羽恩數，豈在明日。范文正公鎮鄱陽，有書生獻詩甚工，自言平生未嘗一飽，可謂天下之至飢者。時士夫盛習歐陽，率更字墨，本直千錢，薦福寺碑，乃其本也。公備紙墨，使匠打千本，俾售于京。無何，震霆暴作，碑遂碎為數片，百萬之錢，一旦失望，彘使碑不擊碎，書生享用，其有窮乎？於此益知吉慶避者，非吉慶避之，其福德淺薄，自不能與吉慶會也。

贊曰：淑慝以類，吉凶在人。譬如儀鳳，不棲荆榛。虺蜴之窟，豈產珠珍。冰雪凝沍，寒谷不春。一氣所感，當識其因。

### 惡星灾之。

傳曰：按《十一曜大消灾神呪經》，欲界衆生，不脩正道，不知有五行推運，十一曜照臨，主其灾福。至如土火留伏，金木凌犯，羅計孛逆，日月薄蝕，乃至州縣播遷，人民灾難，水

火蟲蝗，刀兵相犯，悉皆由也。又按

《七星神呪經》，天地設位，乃建五行，巡歷天下，察無道之國，觀不祥之人。凡處虛域之內，蠢動含生，命係于天。星辰凌犯，彗孛衝破，遂生兵灾，水旱流離。知而逃形，可全自己。逆之遇害，凶釁微生，黎民死亡，淪沉苦海。然則人之有灾，要當自省，其可但歸惡於星歟。大抵惡自人為，星因灾之。非星之惡，而人心自惡耳。宋景公時，熒惑守心。子韋曰：禍當，君可移於臣。公曰：相所以治國家也。曰：可移於百姓。曰：百姓死，寡人將誰君。曰：可移於歲。曰：歲飢，人餓必死。子韋曰：君有至德之言，三天必三賞君矣。是夕，熒惑退三舍。張士平知青州，忽夫妻失目，因棄官家居，日夜禱謝。一日，忽有一書生踵門曰：吾乃太白星官、五帝星君，以子久志於道，且禱謝勤至，遣吾下降，為子療治。既而不施一劑，惟於宅南，鑿開一井，取水滌之，一滌遂

愈。嗚呼，熒惑本主灾厄疾病，今也乃能為宋公退舍；太白本主灾怪刑律，今也乃能為士平療眼。然則星果惡歟？惜人不知人間，一年三百六十五日，上應周天三百六十五度，度主一日，皆二十八宿主之。嗚呼，人在世間，日日節節，皆屬星卦主攝，為善不免予福，為惡不免予灾，是豈星之惡歟？

贊曰：天道云遠，太空冥冥。我與視夜，瞻彼列星。熒惑退舍，善言足憑。天人相與，如影赴形。視履考祥，甘后之經。

### 筭盡則死。

傳曰：按《赤松子中誠經》，人有違犯，皆被本命星辰奏聞上帝，七星六律，四時八風，九宮五行，先令司命奪其筭紀，授以禍殃。然則人有禍殃乃至於死，豈偶然哉？必其作諸不善，奪筭至盡，故至然也。惜人莫悟，浮生短世，膏火相煎，日失一日，彈指便過。況惡習難拔，修行者少，

迷惑者多。業識茫茫，無有是處，求之日用，不免與物浮沈蕩然，不反於膠膠擾擾之場。欲其無過，其可得乎？今日以某事，減若干筭；明日以某事，減若干筭。減奪不已，會有盡時。既乏正修，又多過失，一死之後，便有三惡險道，歷然在前，或為畜生，或為餓鬼，或墮地獄，皆未可必。不聞王咨以處官刻核，而死受牛身乎？費宜以操心點劣，而死為餓鬼乎？陳堂以恃蔭凌人，而死墮地獄乎？此皆死有餘責，而淪入三惡者也。孰謂一死便了，更無餘事乎。

贊曰：紂有天命，忽焉以亡。文拘羸里，與齡益長。覆却萬變，善慶惡殃。我命在我，誰云不常。彭殤壽夭，寸心自量。又有三台北斗神君，在人頭上，錄人罪惡，奪其紀筭。

傳曰：三台共有六星，每台二星。上台司命，中台司功，下台司錄。上

帝署為天曹，俾主生死壽夭。人有三魂，上應三台，篇言三尸，上詣天曹，言人罪過，即上詣三台也。若夫北斗，乃紫極都曹，為天地日月江河海之元，合陰陽木火土金水之德，象陳北斗，精應玉清，三界十方，皆所統御，斡旋氣運，斟酌死生。六甲生人，各稟一元之氣，方得圍形為人，具足一軀，皆北斗也。主持人命，使保天年，亦北斗也。又按《九真帝君九陰混合縱景萬化隱天秘訣》，人兩眉間却入一寸，號曰明堂。北斗帝君、太陰九妃，常處其中。又按《業報因緣經》，七星之氣，常結為一星，在人頭上，去項三尺。其人為善，則光大而明；為惡，則光小而暗。又按《北斗傍通圖》，七真曰：吾每月初三，及二十七日，必一下降，受人醮祭，察人善惡。然則三台北斗，在人頭上，錄人罪名，奪其筭紀，信不誣矣。

贊曰：人之一身，肖貌天地。反而求之，萬

物皆備。此心最靈，不行而至。神明所舍，動息弗離。福祈禍禳，無乃兒戲。又有三尸神，在人身中。每到庚申日，輒上詣天曹，言人罪過。

傳曰：三尸言人罪過，非獨篇中言之，諸書亦皆言也。一云上尸名彭踖，中尸名彭躒，下尸名彭躄。一云上尸名青姑，好伐人目；中尸名白姑，好伐人五臟；下尸名血姑，好伐人胃命。一居人頭，能令人多思欲，好車馬；一居人腸，能令人嗜飲食，好恚怒，多忘少氣；一居人足，能令人耽色慾，喜殺害，關節搔擾，五臟踴動。每至庚申日，與身中三魂，上詣天曹，言人罪過。大抵三尸言過，乃其職也。按經所說，修真之人，先當絕去。一云三守庚申三尸伏，七守庚申三尸滅，守者不寐也，不欲三尸得以言其過也。一云寅日三尸游兩手，當去兩手指甲；午日三尸游兩足，當去兩足指甲。此名斬三尸，隨所在而去之。嗚呼，與其百守庚



申，盡去指甲，孰若清心寡欲，無使三尸所能惱人者數事，得以干吾方寸乎？昔僧契虛，志慕清虛。一日，因山行為異人捧子所導，至稚川仙都。稚川曰：子能絕三彭之仇乎？契虛莫悟。捧子曰：彭者，三尸之姓也，當居人身，伺察善惡。庚申之日，悉錄以聞。然則三尸言過，孰謂不然，內則守心，外則去甲，此修行之初法也。

贊曰：

柳子罵尸，義正詞直。奮筆抗辯，出於有激。其實七情，交相蝨賊。投機乘間，肆其侵蝕。非彼巧訴，繫我逸德。

月晦之日，竈神亦然。

傳曰：竈之為神，號曰司命。司人一家，良賤之命，過無隱露，纖悉皆言。一云竈神，狀如美人，貌有六女，即六癸玉女也。月晦日，詣天曹，白人罪。大者奪紀，小者奪筭。一云竈有三十六神，能轉禍為福，除死定生，驅逐妖邪，遷官益祿。若依時祭

禱，所願必從。祭竈有日，或以晦日，清淨竈前，香花酒果，謝之亦吉。一云在天為五帝直符，在地為五音太歲，在人間為五音竈君。竈中黃帝，即世之司命，常將世人罪狀及過惡奏聞。陰陽二景，記之黑簿。嗚呼，竈之為神，明察如是；職主奏告，又如是。世人行事，但取快一時，豈問家有竈神，而恐懼修省乎。

贊曰：

祀典所錄，竈其一焉。神靈棲之，是或當然。余苟無過，子亦奚言。一有不戒，獲罪於天。無所禱也，醮祭可捐。

凡人有過，大則奪紀，小則奪筭。

傳曰：紀之為說，一云十二年為一紀，一云三百日為一紀。筭之為說，一云百日為一筭，一云一日為一筭。大抵三百日自不可奪，況十二年乎？一日猶不可奪，況百日乎？謹按經云：人之受生，所得之筭，皆記在諸天。太上勅勒諸天諸地，日月星斗，天真聖人，將軍使者，天神童

子，天地飛仙，三界四司，嶽瀆官屬，執錄把籍，巡行考校，三日一言，十日一奏，百日一結，不輟須臾。若修善立功，則便可延年；萬一造罪，則立見減筭。又按趙業，被攝至上清校勘，所見一吏，方呈押戊申生人錄。其錄首具人之姓字，又降行橫列六十甲子日辰。其日有功或過，皆書其下，如無亦書無。功則延年，過則減筭。與經中之言，皆無以異，孰謂減筭為無耳。紹興初，符仲信者，赤手起家，方且稱意。年三十五，忽至不起。方委頓間，自言恍然，如處曠野。俄見數人遙呼曰：恩主胡為，在此相與。引至一處，乃一官府。仲信因卧門側，一吏自門引頭曰：豈鼎州符仲信乎？數人曰然。吏曰：此人本合飢寒，以好施，故能起家壽；本五十有九，以不燒香，睡起晚，今皆削盡。數人曰：不燒香，睡起晚，皆小過，何至如是？吏曰：不燒香，即是無敬奉天地之心；睡起晚，即是有多淫之意。豈

為小過？數人相顧，大驚曰：厚德如符公，尚猶以此奪盡紀筭，人其可自恣乎。嗚呼，所謂過者，不待出於語言，見於行事，然後謂之為過。但凡念起于中，稍涉不正，即名為過。仲信之過，便可見也。

贊曰：命曰迓續，可演而伸。命曰斷棄，促亦有因。細行不謹，終累正真。罪大惡積，乃滅其身。惟德是輔，皇天無親。

其過大小，有數百事。欲求長生者，先須避之。

傳曰：數百事者，即篇中自非義而動下，迄死亦及之之說是也。欲求長生之人，先須避者，非餘人不必避也。謂求長生之人，則尤當謹避，必使己行淨如明珠，雖纖塵微翳，亦不可使有也。苟尚有之，未得為無過之人也。昔許真君行符施水，治病救災，於民最有大功。上帝猶譴其七世不祀祖先，且有貪殺匿三種之罪，必待特赦，然後拔宅輕舉。女仙

楊正見久以遇師，登真有日。上帝亦譴其少時，父母貫錢輸稅，正見不合，擇取二文圓好者匿之，名曰隱藏官物，更復謫留人間一年。又如陶隱居之修《本草》，孫真人之著《千金方》，皆是主於濟活，惟是中間，略取虻蟲水蛭之類，以備藥使。上帝亦譴其功雖及人，反害物命，但得尸解而已。又如紫虛元君，與茅君同在清虛宮，校勘天下真仙得失之事。頓落者，四十七人。復上者，纔二人。蓋為抱淫慾之心，行上真之道，非止被落，又將被考三官。然則欲求長生者，是可有纖毫微翳乎？大抵欲求長生之人，於篇中所謂數百事之說者，須得謹避也。

贊曰：神仙可學，不死可致。博採方藥，鍊神養氣。外誘紛然，可慕可喜。寧保此心，果無纖累。欲成仙道，先修人事。

是道則進，非道則退。

傳曰：道之為說，見於諸書者，其說

甚多。然曉而易見者，無若《中庸》之說之為著明也。《中庸》曰：天命之謂性，率性之謂道。大抵性也者，道之體也。道也者，性之用也。人欲未起之前，湛然方寸，即性之天也，道之體也。於日用間，能自率性，不為人欲所移，即性之用也，道之體也。今日用之間，動靜語默，豈非道乎？是故孔子曰：何莫由斯道也，行而是，是道也；行而非，非道也。可行則行，可止則止，即太上所謂進退也。第人不能率性，常使如人欲未起之前，所以倒行逆施，以是為非，以非為是，當進而退，當退而進也。昔趙清獻公嘗曰：吾晝之所為，夜必焚香九拜，告之于天，不敢告者，不敢為也。蘇黃門書陰君之言曰：晝之所為，夜必記之，于紙不可記者，不可為也。此皆能自率性，不使於進退之間，或有是道非道之失者也。能知此者，有幾人耶。

贊曰：

道則在是，明白坦夷。所謂常道，民

之秉彝。試反諸心，能別是非。一念不昧，良能真知。外是求道，斯則自欺。不履邪徑。

傳曰：太上曰：大道甚夷而人好徑。夷者，平也。徑者，不正之路也。即吾儒所謂澹臺滅明，行不由徑之徑也。在人履踐言之，即人之履踐不正處也。履踐不正，自一念始。一念起處，其可不謹。昔李退夫隱居南嶽，日以不得遇師為恨。一日尋幽訪深，忽聞空中有彈碁聲。舉頭視之，則見二人坐於木杪，相對而弈。退夫大喜，亟往致敬。方問道間，俄有田婦出傍，不覺反顧，則二奕者已失所矣。退夫不悔，事已無及。張木為浮梁令，縣有一廟極靈，能為人禍福，令至必祭以斗酒，隨酌輒盡，木疑為妖，既祭，度其醉，撤席執之，果一老猿，已大醉矣。將戮于市，猿俄醒曰：某死固不問，然數年所貯，極為可惜。君雖至廉，然縣道闕乏，不為無補。木纔問處，則

猿已躍身而去矣。自此百計蹤跡，竟不可得。嗚呼，一念纔差，遂至如此。所謂邪徑，即此便是。

贊曰：

道若六路，曾蔑多岐。跬步弗謹，溪谷險巖。視聽言動，以禮自持。九思三省，猶恐失之。捨而他適，顛覆奚疑。

不欺暗室。

傳曰：太上所謂不欺暗室，即《中庸》所謂君子戒慎乎，其所不睹；恐懼乎，其所不聞；莫見乎隱，莫顯乎微。《詩》所謂相在爾室，尚不愧於屋漏。大抵暗室者，所可欺處，能不欺於可欺，真不欺也。不聞翊聖真君不欺之說乎？真君戒張守真曰：但潔身守正，不欺方寸，自然默符天理。以此事君，何懼之有？然則不欺為行，豈細行哉。昔張建章奉使渤海，中流遇風，波濤如山，自分必死。俄見一青衣，乘一小舟而至曰：仙官召君。方恍惚間，則已達岸。仙官曰：君平生不欺暗室，上

帝所知，波濤無足慮，但復登舟，吾當遣人護子。建章竟得將命而返，於是棄官學道，遂獲登真。韋行式採訪西川，其姪子威侍行，有老兵名曰丁約，日侍左右。子威覺其不凡，方欲詰問，則約已求別曰：吾神仙也，上帝嘉子不欺暗室，遣吾下降，更加審察，今果不欺，得道必矣，但尚餘兩塵耳。子威曰：何謂兩塵？約曰：儒謂之世，釋謂之劫，道謂之塵，兩塵即兩劫也。嗚呼，世人於青天白日之下，尚敢公然行欺，況暗室乎？是故超凡入聖，常聞於古人，少見於今日也。必欲不欺，在我而已。

贊曰：

境有明暗，心無顯幽。一念之舉，十日已周。形諸事為，洪水橫流。袞袞撻市，何必外求。不愧屋漏，心正身修。

積德累功。

傳曰：德也者，日新之謂也。功也者，日用之謂也。苟能閔閔然，如農夫之望歲；汲汲然，如商賈之營財。

今日積其德，明日又積其德，今日累其功，明日又累其功。夫所謂天仙，一千三百善行之，只在四年；地仙，三百善行之，只在一年。第人不能，多至中廢，不聞穿石禮樹之說乎？紫虛元君曰：昔有傅先生者，自少好道，入焦山石室中。積七年，忽遇太極真人，授以木鑽，使之穿一盤石。戒曰：石透，吾當度汝。石厚五尺餘，傅穿之不息，積四十七年，石忽穿透。太極真人，果來度之。又南嶽夫人曰：昔有一人，勵志於道，然不知求道之方。惟日夕禮一枯樹，求乞長生，如是不已。積二十八年，樹忽生華，有汁如蜜。其人取華，并汁吞之，立獲度世。嗚呼，積德累功，雖不在於鑽石禮樹，便可以見其積德累功。大抵有其志者，無不成也。

贊曰：

聖賢有順，成已成物。仁以己任，道由性率。小善必為，細務無忽。事在悠久，效非倉卒。能辦肯心，斷無

乾沒。

慈心於物。

傳曰：佛告普眼曰：我今此身，地水火風，四大和合。四大各離，今者妄身，當在何處？即知此身，畢竟無體，和合為相，實同幻化。四緣假合，妄有六根，六根四大，中外合成。妄有緣氣，於中積聚，似有緣相，假名為心。此虛妄心，若無六塵，則不能有。四大分解，無塵可得，於中緣塵，亦歸散滅。畢竟無有，緣心可見。然則世人胡為，而妄執此心，以為心乎，況不善用，而不慈乎。嗚呼，此說微妙，姑置勿論。請以慈之，一字言之。佛言：我有四無量心，一曰慈，二曰悲，三曰喜，四曰捨。太上曰：吾有三寶，一曰慈，二曰儉，三曰不敢為天下先。諸聖尚爾，況於人乎。按經所說，燈燭焰上，別有一種微細衆生，吞食其光，以為性命。人氣一吹，隨吹即死。是故諸佛戒人，不得以口氣吹滅燈燭。迦葉尊者未出家時，嘗令其妻

壓油飲牛。妻不樂曰：我不忍見此等微細衆生，粉骨碎身。然則諸聖所以慈其心者為如何？惟其如是，所以於一切物，不遺微細，一切護念。昔寶文王敏仲七世不殺，又好放生。至敏仲身，乃自生疑。一日，咨決於小法華曰：以某所見，不殺不放，一切付之無心可乎？師厲聲曰：公大錯，公大錯，豈作空解耶？面前露柱，亦自無心，著幾箇露柱，能救得世間一箇苦惱衆生？諸佛菩薩，其說不爾。可急懺悔，無自貽戚。敏仲駭然汗洽，再發心放一百萬命。其後持節淮甸，適歲飢，出按拯濟。舟次清河，忽聞汹汹聲，如數百人爭鬧，疑是飢民。遣人跡之，了無所見。心忽自悟，於是策杖循河而行，則見數十婦女，濯管岸側，汹汹之聲，正出管中蛤蜊也。悉命以粟易之，得數十斛，親為誦經持呪，投之中流。既而復自疑曰：吾平生放此，可謂多矣。萬一感恩，來為眷屬，豈不癡鈍？是夕，即夢文殊現身

其前，慰諭之曰：我於往世，亦曾生蜺蛤中來。但堅汝心，無自疑沮。敏仲至此，始大信異，因著一書，以示勸戒。王渙宣和年間，大病濱死。忽夢一金佛告曰：汝平日放生，已及萬命，自合延壽。我今傳汝一方，可急買茯苓、黃芩、地骨皮、甘草四味，等分和劑餌之，無不愈者，渙如戒修。合一劑，果愈。孰謂諸聖於一切物，不遺微細；一切護念之說，為不然乎？大抵慈為萬善之本，心若不慈，善何以立？

贊曰：萬物同體，均受於天。樂生畏死，此性則然。忍肆其暴，剗割烹煎。肖翹蠕動，皆在所憐。視物猶己，仁術乃全。

### 太上感應篇卷之一

## 太上感應篇卷之二

李昌齡傳 鄭清之贊

忠孝。

傳曰：東卿司命曰：有蕭邈之才，絕衆之望，養其浩然，不營富貴。或至貞至廉，不食非己之食，不衣非己之衣，紛華不能散其正氣，萬乘不能激其名操。或先世有功，流逮後嗣，易世練化，改氏更生。此皆有應仙格，當登仙品。然必多歷年所，始得漸進。至於至忠至孝，則今日謝世，明日便當補為地下主者，復從地下主者，便當進補仙階。大抵忠也者，人臣之大節。孝也者，人子之本事。使為臣而皆不忠，則為君者，復何望於臣；為子而皆不孝，則為父者，復何望於子。如此則君臣之分，父子之倫，一切喪矣。人不禽獸如，必夷狄如也。惜其不知忠孝，乃超度之本，得獲度世，莫此為速，不聞呂公誨、蘭公期之事乎。昔呂公誨為御

史中丞，正色直言，傾動朝野。一日獨坐，悅見一青衣授以一丹曰：此清涼丹也，上帝非久南游炎州，命子糾正羣仙，彼州大熱，故先以此賜公。再拜吞之，不啻冰雪下咽。未幾，果捐館。時朱明復初登第，在湘江見公，跨一玉角鹿，左右皆青衣小童，吏兵數百，前後呵擁。明復迎揖曰：君其已仙乎？公曰：吾此行侍上帝南游，不及欵曲，乃口占一詩曰：功行偶然書玉闕，衣冠無限葬塵埃。我今從帝為司糾，更遣何人直栢臺。言訖不見。蘭期家世孝悌，聚口百餘，上下和睦，略無間言。一夕，有一真人降自斗中曰：吾乃斗中孝悌王也。夫孝至於天，日月為之明；孝至於地，草木為之生；孝至於人，王道為之成。子能孝悌，吾所以親眄於子，既得見吾，得道必矣。後果如言。然則至忠至孝，其於度世，豈不捷疾。嗚呼，忠孝者，既如此，則不忠不孝者，當如何哉。

贊曰：

非忠無君，非孝無親。捨是二者，獸而不人。莊周放蕩，命義是遵。釋氏空寂，報恩猶勤。戴天履地，孰逃其身。

友悌。

傳曰：有子曰：君子務本，本立而道生。孝第也者，其為仁之本與。司命使者，以父子、兄弟、夫婦，為三綱。本之與綱，字殊而義一，若棄本捨綱，倫何以立？大抵能踐其實，則上下相安而不渝；苟尚其文，則悔吝易生而必瀆。昔姚栖雲，家不甚富，惟仰給農桑。生三歲，其父為其兄無子，代之遠戍，遂死于邊。栖雲既喪，迎魂以葬，廬於墓側，終身號慕。縣令蘇徹捐俸買田，開阡刻石，以表其事。府尹渾瑊列狀以聞，有詔褒賞，旌表門閭，名其鄉曰孝悌，社曰節義，里曰愛敬。始自栖雲，凡十五世，同居聚口數百，歷三百餘年，無一人異詞。經五代離亂，子孫保守墳墓，不相離散。又有張誠者，亦田家也，累世同居，聚口一百七十

有餘，內外和睦，略無間言。衣服之類，皆無常主。每旦，家長坐堂上，子弟列堂下，以次受職，罔不祇勤。自祖瑄至誠，凡六世同居，幾二百餘年，始終如一。嗚呼，若二家者，真所謂實踐者也。尚虛文者，能如是乎？

贊曰：

父母之身，分為兄弟。一本而出，安有異體。愛其枝葉，以護根柢。史謂豆箕，詩歌棠棣。如埴如篴，神相愷悌。

正己化人。

傳曰：孔子曰：君子正其衣冠。又曰：席不正不坐。嗚呼，衣冠、几席，尚當使正，況行己乎。又曰：子帥以正，孰敢不正？又曰：不能正其身，如正人何？此皆聖人行己之大法也。然則人之行己，其可不正。惟其正也，人皆敬之。人知敬處，即其心已化處，又何待區區而化之哉。昔司馬溫公，為人正直，名聞海內。其居洛也，風俗為之一變，莫不敦尚

名教，不急貨利，人隨貧富，皆自足，後生晚輩知畏廉恥，欲行一事，必相戒曰：無為不善，恐司馬端明知。呂申公正直敢言，傾動朝野。時王安石出守常州，移書於公曰：某客京師二年，于茲疵吝，積其心胸，每不自勝。及詣長者，即廢然而反。德人之容，使人意消。今於晦叔，見之滎陽呂公，心與道潛，湛然方寸。其為崇政殿說書也，日以正心修身之說，勸導人主。每自言曰：若身修心正，不假他術，而天下自化。是以所居則躁人化，聞風則薄夫敦。胡公瑗之為蘇湖二州教授也，每解經至有要義，必懇切為諸生言其所以治己，而後治人。然則諸君所以正己者，為如何哉。以此化人，夫誰不化。

贊曰：

表正影直，源清流泚。枉己直人，萬無是理。聖賢何術，舉斯加彼。瑕而戮人，三軍見齒。大學修身，家齊國治。

矜孤。

傳曰：孤也者，未能有成，親已蚤世。或母死而父或再娶，或父死而母再行。其者父母俱亡，藐然孤露，不幸至此，情況何堪。王令捧負提携，寢興衣飲。主之者信存惻隱，亦必不如親父母之情愛之為親切也，可不矜乎。世人但知孤為可輕，而不知其中亦有因孤而能養成大器者。昔張鄧公士遜方在襁褓，父母皆卒。及長，安貧讀書，勤苦不倦，竟能登科，致位台輔，以賢德稱。此至貧之孤者也，自立如是，非能養成大器者乎？呂中丞誨幼失所怙，勵志為學，不妄交游。洛陽之人，多不之識。及登第，人方知為呂正惠公之孫，歷官言職，以勁正稱，此貴家之孤者也。自立如是，非能養成大器者乎？然則孤可輕乎，愚於矜孤之下，不書矜孤，而輒書此者，正欲不幸而孤者，以此為法，皆知自勵。右以矜孤言之，則前輩行之，視以為常，初不以為奇特。查龍圖家道甚

貧，嘗聚親族之惇獨者養之，祿賜所得，隨施輒盡。與人交情分切，至廢棄孤露者，待之尤厚。嘗有一同僚女，貧為人婢。公聞而贖之，嫁于士族。呂正惠公端與故相馮道、耀帥趙文度，皆鄉里世舊。道子病廢，公分俸給之，又薦文度之子紹宗于朝官之。非真實矜孤，能如是乎？

贊曰：

方幼而孤，何怙何恃。懷抱無依，疾誰視。吾幼及幼，人子亦子。放麈違命，謝麝泣矢。能推是心，乃合天理。

卹寡。

傳曰：寡也者，方當盛年，夫忽告殞，形單影隻，觸目無聊。況女幻男癡，百事未舉者耶。此即孟子所謂：窮而無告者也。禍變如此，非窮極歟。欲語誰吐，非無告歟。為其夫者，雖云死矣，冥冥之間，烏得無念。昔徐擇之判北京。趙士恍自仁興來，留為幹官。士恍與擇之三子俱相得。無何，士恍遽以病卒。

擇之父子為辦喪事且津，遣其妻子甚厚，又命小吏趙沂護送至京。沂畢事歸參，忽作士恍語謝曰：士恍不善攝生，以方壯之年，遽就鬼錄，荷公父子周卹之恩甚至，不惟死骨得歸，老母、妻子皆得平達鄉舍，無復流落失所之歎。區區此心，不勝感激。陰君亦以此敬歎，將有以厚報君矣。中貴黃述奉詔持扇帕，至彭澤迎賜北使。無何，舟師王貴中路病卒。其舟，乃兩浙漕司官舟。貴死，舟當歸官。其妻泣訴曰：舟今歸官，妾一家十口，餓且死矣。願得一言，使貴長子得繼父業，不勝感幸。述至鎮江言之，漕使即日刺其子為兵，付以父舟。是夕，宿丹陽。明見貴操一小舟，遠遠從煙波間來，泣具拜曰：貴雖身死，長子已得繼業，一家十口，不復憂矣，實荷公恩。言訖不見。嗚呼，此固顯顯，姑置勿論。竊觀寡婦，人中立志，大有遠過人者，不可不書。趙公槩年七歲而孤，其母勵志教篤，竟能登天聖五年

第三人第。初遇郊恩，法當任子。公請以封其母為郡太君。宰相曰：公為學士，擬封不遠。公曰：母八十有二，朝夕不可期，願及今以為榮許之。李公筠年三歲而孤，其母秦氏有姿色。或有誘之使嫁，母怒叱曰：夫婦義屬天倫，死生命由真宰。我寧餓死，其可再嫁。於是篤意教筠，竟能登第，官至耀帥。然則寡可輕乎，愚於卹寡之下，亦復書此者，正欲使一切寡婦，皆知所法云。嗚呼，似此之人，天必報者，重乎倫也，何止子貴在己哉。

贊曰：寡而守義，賢哲所重。折脛露筋，婦節尤勇。臺築懷清，暴秦是奉。況其無告，寧不為動。誰或躡之，不難不竦。

敬老。

傳曰：老也者，閱世之久，更事之多，袞袞年少，無限淪喪，龐眉皓首，獨保康強，可不敬乎。開寶初，有鄆州盧縣尉許永者，詣匭進狀曰言：

父瓊九十七，長兄八十一，次兄七十九，水身七十五，願得一近便差遣，以就榮養。太祖命召其父，既至，敷奏詳敏，詞氣不衰。太祖大加敬歎曰：卿一門如此，必有大過人者。瓊曰：亦無他，但累世義聚不分耳。太祖曰：此即卿大過人處。立命賜襲衣腰帶、銀裝鞍勒一副，馬一疋，御茶三十斤，雜綵三十段，與近便差遣一任，從其志也。吳元嗣亦享高壽，時聖節根括老人，惟元嗣一門，有八十、九十者，一百以上者，八人。內吳琬一名，一百一十有四，步履輕健，氣不少衰。詢其履踐，亦累世義聚不分。詔賜一官，旌表門閭。門外又築二所義順土臺，立二株華表鶴柱，異其禮也。至尊尚爾，況餘人乎。竊嘗求之本朝，處高位而享其高壽者，惟張退傳，九十一；文潞公，九十二；趙康靖，八十六；張文定，八十五；陳文惠，八十二；曾宣靖、富文忠，皆八十以上。又求其次，趙清獻、龐莊敏、向文簡、李文

正，皆七十以上，已不及也。又求其次，曹武惠、薛簡肅、王懿敏、呂文穆、呂文惠、寇文愍，皆六十以上，又不及也。又求其次，种司諫，恰六十；劉集賢，恰五十；王內翰、尹舍人、王待制、錢宣靖，皆四十以上，遠不及也。又如石徂徠，恰四十；蘇內翰，三十九；趙舍人，三十六；王御史，三十八。此則尤可惜也，名利場中，彈指便過，還有於自己分上，做得些工夫者乎？如或未然，即是空來人世，浪走一遭。於諸佛所謂：願我壽命長，勤行一切善，願我福德盛，廣濟一切人之說，皆蹉過也。嗟乎，少年但知負才輕侮老輩，不知壽居五福之先。縱有多才，不知其地，於事何益？昔楊大年與周翰、朱昂，同在禁掖。時二公皆已老，楊方弱冠，每輕侮二公。翰大不堪，因好謂曰：君莫侮我老，老亦終留與君。昂從傍搖手曰：莫與，莫與。厥後大年，壽止四十有九。然則老也者，欲到其地，豈不難乎？可



不敬乎？

贊曰：

學養三老，禮尊高年。為近於親，家國所先。天與之壽，俾華其顛。人而弗敬，是名褻天。矧復耆德，敢不禮焉。

懷幼。

傳曰：孔子曰：少者懷之。孟子亦曰：幼吾幼，以及人之幼。蓋幼者，年方童稚，未有識知。為之長者，固當矜憐而撫卹之也。虐而視之，非人道矣。故父母有幼子，則當盡其恩勤；兄有幼弟，則當極其友愛。他人有幼者，亦當推吾恩愛之心，等而視之，不宜分別彼此也。若夫吾之子弟，則愛之；他人之子弟，則不愛，亦非所以盡懷幼之道也。況夫幼者，位則居卑，力則孱弱，卑者易侮，弱者易凌。苟無慈愛之心，則將挾長以自肆矣。在彼者，必無辯口，以別是非也；必無強力，以較勝負也。如痿者之被杖，無所逃避；如瘖者之受讒，不能辯明。其苦可勝

道哉，甚矣，風俗之薄也。婦人之性，類多忌刻，為母之德不均，愛子之心始偏。己之所生，則親之；妾之所生，則薄之。其為繼母者，又往往不恤前人之子。如閔子騫之母，冬寒，衣其子以纊，而衣子騫以蘆花，使之御車是也。子騫之母猶爾，其他可知。由是孤孽幼稚，橫罹慘毒者多矣。閭巷之人，規併財產，則為尊長、為兄姊者，為贅壻者，乃有不慈不義、凌虐其卑幼者矣。巧飾訴牒，偽立契約，囑牙保以曲證，賄吏胥以舞文，使之困苦抑塞，無所赴愬，甚則陰謀詭計，損傷其性命者有之。嗚呼，尚忍言之哉。昔者李知本一門，子孫百餘，長少雍穆。陽城兄弟，孤惇相依。前輩救荒，則以收養孤幼為先。若此者，足以盡懷幼之道矣。

贊曰：

堯衰孺子，聃慕嬰兒。仲尼之志，少者懷之。在厥初生，淳德未漓。易致凌虐，可無保持。所以孤幼，周仁

先施。

太上感應篇卷之二

### 太上感應篇卷之三

李昌齡傳 鄭清之贊

昆蟲草木，猶不可傷。

傳曰：按經所說，諸類衆生，一身具足一切形質，隨造隨成。無明為卵生，煩惱包裹為胎生，愛水浸潤為濕生，歛起煩惱為化生。於此四生，人復析為十二類生。於十二類生，每類又各有八萬四千種類差別。總而言之，則一十二類，便有一百萬八千之多。然則衆生種類差別，何其多歟。但即其日用觀之，目睹珍奇，便起貪想；舌味肥脆，便起殺想；意攀華麗，便起慾想。非獨眼舌意三為然，耳鼻身三，亦復如是。如是妄想，如是顛倒，念念不停，泊合眼後，更只紛然，做主不得。臘月三十日，脚忙手鬧，做得主乎。佛所謂十二類生，一百萬八千種類差別，端起乎此。昔佛在世，游化諸國。獨有一國，化不能從。及遣目連，傾國而

至，衆疑問佛。佛言：此一國人，於往昔世，本一聚蜂。目連本一樵夫，

因採薪觸著樹枝，羣蜂驚擾，爭欲螫之。目連謂曰：汝等本有佛性，以惡業流轉至此。今也尚有小忿，欲逞毒乎。願我早登聖果，首度汝等。

是時，羣蜂若有所悟，領納在心。今故見之，悉皆隨順。又在瞻婆，則中迦羅池畔，為衆說法。時有一蛤，聞法歡喜，躍出池上，潛身草間，傾誠諦聽，偶為一聽法人，拄杖刺殺。命終之後，生忉利天，為忉利主，復從忉利，日往佛所，聽說妙義以開悟，故證須陀洹。然則昆蟲一類，雖曰微物，其為有知，與人異乎？又如草木一類，在吾儒言之，固若有生而無知，驗以佛書則亦不可一槩謂為無知。按《傳燈錄》，昔有一僧，久為梵摩淨德及其子羅喉羅多受供養，以道眼未明，虛霑信施，命終之後，乃於淨德園中，生為木菌，日充淨德父子蔬食。他人欲取，不復可得。然則草木一類，亦一槩謂為無知可

乎？若曰昆蟲草木，尚不可傷，人則尤不可傷也。

贊曰：恭惟哲皇，弗踐螻蟻。濂溪之庭，草觀生意。有生有知，此性無異。吾仁所充，際天極地。不見其間，一物可棄。

宜憫人之凶。

傳曰：太上言樂人之善，而首言憫人之凶。當知所謂凶者，乃凶人為不善之凶，非凶喪之凶也。大抵人之性真，上與諸聖一體無二，能自率性，則便可為聖為賢。若但任情，不免為凶為忒。是故太上書以告人，使人皆知，導之以善。不然，則永為凶人，不復反於善矣。太上告真武曰：一切衆生，競赴善惡，輪轉生死，無有窮已。汝宜普為斷除邪見，察其罪福，增益功行，逐月輪，定日分，遊奕世間。善者，以福加之；不善者，以善解之。然則太上所以憫乎凶者，為如何哉？昔巢州居民餐啜之外，競啗水族。不知每年十二

月二十五日，乃玉帝奏告三清、遊歷諸天、下觀世界、予決罪福之日。其日，九天採訪使者、日月星宿、天地百神、嶽瀆社廟，皆得條具以聞。一日，玉帝召中天北極紫微大帝問曰：南贍部洲吳國分野，地號巢州，善惡如何？北極奏曰：此方居民，實是凶惡，殺害物命，不知紀極。深恐積日之久，冤魂愈結，非連地地蕩為大湖，不足以蕩除累年殘忍殺害、厭觸腥穢之氣。玉帝曰可。北極既退，召真武告曰：汝為三界遊奕，檢察善惡，豈不知巢州之民，造如是惡。厭穢之氣上犯玉帝勝游，日月為之無光，星辰為之失次乎？玉帝有命，盡令全城陷歿。此事屬汝，可速奉行。真武曰：千里之廣，未必一一皆然。若一例陷歿，恐多冤濫。容臣下降，更問地祇回奏。北極曰：彼州神祇，皆已奉勅，遷往他所矣。真武乃大嘆曰：痛哉，一物之命，尚在輪回，未易出離，況此千里盡為水界，展轉相害，大冤愈結，何

可救拔。又復力請，自差部下天罡神將，再行審驗。既而，天罡化為大鼈，浮遊溪面，先是守倅差人嚮取，次及百姓，亦復如是。天罡回奏，真武又請自降，於是化為一雲遊道人，巡街乞水，如是七日，家家腥穢。最後一家，號曰焦婆，水獨清淨。真君詰之，婆曰：某一家三口，久厭腥穢，蔬食而已。真君曰：吾非人也，此州不遠，當蕩為大湖，誠欲救之，已不可矣，汝宜速往他所。未幾，雨果暴至，洪亦隨發。一州千里，頃刻之間，波濤如山，浩渺無際。是日，真君復降，告焦婆曰：汝可便主此湖。數日婆死，其子及婦亦死，遂得為神，因名其湖曰焦，從婆姓也。然則天真所以憫人之凶者為如何？書曰：汝無忿嫉于頑，亦此意也。贊曰：

樂人之善。傳曰：吾之一字，最能成就一切行願。人發善願，天上聞之，聲如爆竹。諸佛無不護念，上真無不主持，心契故也。按《唐文粹》，昔高邁見鄉之俊傑，主寶融寺經藏院長明燈，精進成就，喜而發願，銘而頌之。已而，迫於多事，斯文莫構。忽染目疾，朦朧，如隔綃縠。每自嘆恨，不審得罪之由。一夕，夢神告曰：子於長明燈，其有負乎？邁應聲而寤，寤而起，起而作頌，明日目愈。然則諸佛所以護念於善者為如何？按《啓聖錄》，程嗣昌常在密州，見郊西鎮人好食鳥雀。獵徒數輩，日常打捕，或碎首冗胸於鷹鵠爪觜之下，或拗脚折翅於網羅罝罟之中，或被箭穿，或遭彈擊，哀聲悲切，所不忍聞。於是夜起露立於星斗之下，仰天告曰：某欲將家藏一切所食衆生，並同七世父母因緣戒殺圖子一本，覆板印行，庶幾此方皆知改悔。今日正當真武真君下降之日，願憑聖力，俾獲

流通。覆畢印行，攔頭彭景亦請一本，歸示其妻。其妻華氏三娘，一見大怒，擄破投之穢處。移時買得一魚，操刀欲膾。魚忽跳躍，觸破其眼，血遂迸流。俄化為蟲，緣遶其身，處處啣噬。方喧傳間，監鎮孰向，恍見一神，立于其前，自言吾是真武，察知此地有一大善，乃興化軍程嗣昌，印施戒殺圖子。不謂婦人華氏，乃敢擄破擲之穢處，罪惡深重，即當死矣。其他不悔之人，亦當獲罪。俟吾二十七日再降，更看如何。然則上真所以主持於善者為如何？嗚呼，上真與佛，皆已久住解脫，樂人之善，尚爾如此。况人正在苦海，可不然乎。求之世間，非無人也。胡文定見李文靖澹然無欲，又能濟之以學，喜曰：若此人者，八九分地位人也。見王所公儼然不動，加以篤學，又曰：若此人者，亦八九分地位人也。邵康節見司馬溫公忠厚友悌，恭儉正直，喜曰：若此人者，腳踏實地，八九分人也。見韓欽

之論事上前，無所回避，又曰：若此人者，可謂至清而不耀，至直而不激，至勇而能溫，誠難能也。又如杜正獻聞人有善，喜若己出。劉集賢聞人有善，稱道不已。文潞公見人有善，惟恐弗及。韓忠獻聞一小善，必曰琦所不及。若數君者，非真實樂善已，到於樂則惡可已也之地，能如是乎？

贊曰：

人無不善，出於天性。胡為忌嫉，私心之勝。克伐怨欲，交相為病。惟其無我，此心不競。見人之善，如月在鏡。

濟人之急。

傳曰：諾詎羅尊者曰：若人大智慧，耿耿籠中燈。若人大福德，飄飄海上漚。若人大方便，乙乙空中雨。今也於人之急，力能濟之，即所謂大方便也。如雨普潤，其為及物，可勝言哉。所謂急者，非一而已。在疾病，則以湯劑為急；在死喪，則以後事為急；在飢乏，則以飲食為急；

在婚媾，則以奩橐為急。此外又有無限，不可悉陳之急。但能各隨其急，方便濟之，皆為濟人之急也。昔許叔微少嘗以登科為禱。一夕，夢神告曰：汝欲登科，須憑陰德。叔微自念家貧無力，惟醫乃可。於是精意方書，久乃通妙，人無高下，皆急赴之。既而，所活愈多，聲名益著。復夢其神授以一詩曰：藥有陰功，陳樓間處，堂上呼盧，喝六作五。是年，登第六名進士第。上一名陳祖言，下一名樓材。及注闕用，陞甲恩如第五名，授職官以歸，與詩中言無一字差。此則濟人之急者也。范文正知邠州，暇日載酒率僚屬登樓觀賞。初舉觴，俄見數輩衰經往來，營理喪具。公遣人問之，乃一寄居官方卒，賙殮棺槨之具，皆未有。公為撤宴，厚賙卹之。此則濟人死喪之急者也。范忠宣知慶州，歲大飢，餓殍滿路，無粟以賑。公請發常平封椿粟麥，郡官皆不許曰：須奏乃可。公曰：人不食七日即死。奏而

後發，豈能及事。即日發之，且曰：諸君但勿與，吾當自坐。此則濟人飢乏之急者也。查道未第時，嘗遊湘漢間，假貸於人，得錢十萬。途次適見故人，以嫁女理財甚急，即罄囊與之，略無吝色。此則濟人婚媾之急者也。用心如此，烏得無報其後。許叔微竟能發第，范文正官至叅政，范忠宣官至丞相，查道官至侍從，非其報歟。大抵人處世間，於人急處，自當如此。

贊曰：君子周急，非相為私。如人在窶，脩綆弗施。有力不用，猶已殺之。揖遜拯溺，無乃自欺。以己望人，其急可知。

### 救人之危。

傳曰：《雲笈七籤》曰：能救一人之命，當延一紀之年。若所救又是善人，延壽又當倍之。然則於人之危，其可不救。所謂危者，死生之命也。昔王均亂蜀，朝廷忿蜀再亂，命雷有終將兵平討，意欲屠城。時蜀士范

璨尚氣節，范璉好讀書，文鑒大師有名行，皆蜀中所素敬者。因相率從間道出迎王師，叩頭告曰：蜀人懦弱，城中皆平民，其脅從者，特畏死耳。城下之日，願無肆戮，鋤其凶黨可也。三人者，皆堂堂丈夫，且陳議慷慨，忘身為物，出於至誠。有終為之改容曰：不聞長者之言，屠城必矣。由是一城之民，得脫於死，范與鑒之力也。章郇公得象之高祖仔，事閩為建州刺史。其夫人練氏有智識。仔嘗出兵二將，後期欲斬之。夫人救之，得免二將，後仕南唐為將，攻破建州時，仔已死矣。夫人居建州，二將遣使，厚以金帛遺夫人，並以一白旗授之曰：吾屠城，夫人植旗于門，吾以戒士卒勿犯也。夫人反其金帛并旗，弗受曰：君幸思舊德，願全此城，必欲屠之，吾家與衆俱死耳，不願獨生。二將感其言，遂不屠城，練之力也。范氏今為蜀中望族，子孫蕃衍，有官者常百數人。章氏亦為建之大族，位至卿相

者相踵，皆練氏後公其一也。嗚呼，二家所救如此，而天之報之，亦如此。此固非世常有，但於水火盜賊、饑寒疾疫、刑獄逼迫、逆旅狼狽、一切危急，皆能如此存心。事體雖不相侔，其為救危，則皆一也。

贊曰：孺子及井，怵惕皆有。器將墜地，觀者舉手。轉危為安，起痿而走。彼難既脫，我喜亦厚。以仁存心，必無悔咎。

### 太上感應篇卷之三

### 太上感應篇卷之四

李昌齡傳 鄭清之贊

見人之得，如己之得。見人之失，如己之失。

傳曰：文殊問道場於維摩曰：如何是道場？維摩曰：平心是道場。趙州問道於南泉曰：如何是道？南泉曰：平心是道。然則平心，即道歟，道場歟。歐陽文忠修好賢樂善，常以平心為難。彭中丞思永好學不倦，常語人曰：吾不為他學，自幼即學平心。然則平心果難歟，須自學歟。大抵心之為物，即體非有，隨用非無，必欲平心在我而已。夫復何難。前輩為難者，歎無人也，示後學也。世之見人得失，不能如己之得失者，必不曉此。惟其不曉，是以物我常勝，罪來集身，如水歸海，日成深廣，尚何足以道場與道之說而告之哉。昔薛瑗身相燕國，不能平心，見人有得，如己有失。見人有失，如

己有得。未嘗薦一士，舉一賢，有可

稱者，嫉之如仇，遏截使不得進。晚

歲，一子死於獄，餘皆盲聾啞，偃

僂顛癡。時公明子臯見而憐之，因

詰責曰：此皆緣汝心行不好，罪當

滅門，諸子雖爾，未足以盡子之罪。

瑗聞大懼，懇求救護，子臯於是以赤

松子中誠授之。瑗誓志力行，僅全

一子。所謂中誠，果何書哉。竊嘗

伏詩，其與此篇，無以異也。大抵皆

是指出人之錯用心處，其為拔罪，最

為有力。薛瑗敬受中誠，而能得免

滅門。周筮宣揚此篇，而能得脫餓

死，不有力乎？嗚呼，世間萬事，轉

頭即空，惟有惡因，長為身累。今注

此書，正所以發明此說也。知有此

書者，不可不求一讀，既讀不可不

行。信能如是，異日生死路，當得大

力也。

讚曰：

百篇之書，穆誓殿後。人之有拔，視

若己有。民不協極，未離于咎。洪

范之君，錫福均受。非曰為人，待己

則厚。

不彰人短。

傳曰：馬伏波戒子孫曰：聞人有

過，如聞父母之名，耳可得聞，口不

可得而言。此已自盡夫太上所謂：

不彰人短之說也。至於龜山先生則

又為之語曰：口固不可得而言，耳

亦不可得而聞。此則又出於馬伏波

之說，向上一頭地也。大抵人處塵

勞，不能無短。然短自其短，何與於

我。在我只消一箇不聞不知，則其

短，終不自我而彰。苟或一語彰之，

則其短不免傳播。聞望自此而減，

素守自此而墮。詰此之由，咎當誰

執。當知好彰人短，君子有所不為，

小人為之而無忌憚也。昔龜城之

民，有祝期生者，為人猥薄，好彰人

短。人有體相不具者，譏笑之；妍

美者，嫉毀之；愚昧者，輕侮之；智

能者，評品之；貧者，鄙薄之；富

者，訕謗之。官僚，則訐其陰邪；士

友，則發其隱由。門閥才望，皆出其

右，無可擬議者，則必巧求其短曰：

乃祖微人也，乃父鄙人也，母家工商也，妻家駟儉也，其弟不良也，厥子不肖也。有小過者，亦必溢詞增飾，以成其短。事無巨細，一切如此，乃至以無為有，以十為百，以疑似為端的，以偶然為故犯，以不得已為優為，以錯誤為情實。度其人可欺，即面折之，衆辱之，過毀之。待他人亦如此，待親族亦如此，平生知識，無不在其貶剝中。甚者，目父母為頑嚚，目兄弟為管蔡。或教人興訟，已復和之；教人詛罵，已復證之。習之既久，不以為非。晚年忽病，舌黃每作，必須砭刺出血，數升乃已。既而復作，又須刺之。一歲之間，作者五七，痛苦切至，殆不可言，竟至舌枯而卒。此事與道士章齊一好嘲諷人，竟至嚼舌而死一也。然則彰人之短，是可為乎？

讚曰：我所自立，欲為聖賢。彼亦人耳，何獨不然。邂逅有過，尚可滌湔。一播其迹，終身之誓。是以掩惡，君子

貴焉。

不銜己長。

傳曰：老子曰：良賈深藏若虛，盛德容貌若愚。孔子曰：君子之道闇然而日彰，小人之道的然而日亡。大抵人之為人，其可略無所長。苟有所長，自當如是。要在益加韜晦，善自涵養，必使日新又新，然後可以成德。苟或不然，不免輕躁銜露，自呈褊淺，豈所謂：盛德容貌若愚，君子之道闇然而日彰也哉。是故歐陽文忠公修長於文章，每對客論談，則言政事，而不及文章。蔡端明襄長於政事，每對客論談，則言文章，而不及政事。此皆自晦者也。惜人不知，多至自銜。昔李泌極聰慧，年七歲，已能文，嘗賦《長歌行》曰：天覆吾，地載吾，天地生吾有意無。不然絕粒升天衢，不然鳴珂遊帝都。焉能不貴復不去，空作昂藏一丈夫。一丈夫兮一丈夫，平生志氣多良圖。請君看取百年事，業就扁舟泛五湖。歌成，莫不稱賞。獨張九齡力戒之

曰：藏器於身，古人所重。今君早得美名，必有所折，宜自韜晦，庶幾成德。況童子乎？若為歌詩，但只賞風景，詠古今，勿自揚己為妙。泌若有悟，泣謝再三，從此不復自銜。鄉使不已，安能成德，為一代之名相乎？當知人有所長，切忌自銜。

讚曰：

三才並立，曰天地人。綱紀兩間，繫人一身。自賢而聖，由聖而神。頃刻滿假，其德不新。顏淵如愚，端可書紳。

遏惡揚善。

傳曰：遏惡揚善，在易謂之君子，在篇謂之善人。《易》曰：火在天上，大有大有包容之象君子，以遏惡揚善，順天休命。然則遏惡揚善，即為順夫天德，休物之命乎？天之休命，果在是乎？大抵人非堯舜，安能每事盡善。其不善者，即名為惡。我能為之遏之，使之不至自棄，復得勉而從善。人誰不貴於善，一言一行，苟有可取，即名為善。我能為之揚之，

使人皆得聞知，爭相率而為善。天之休命，豈不然乎？天之休命，本如此；我今於物，亦如此。豈非順天休命乎？《中庸》曰：舜，其大智也與，隱惡而揚善。舜尚如此，況餘人乎？是故趙康靖公槩，專以掩惡揚善為務。邵康節公雍，樂道人之善，不及人之惡。此皆得夫遏惡揚善之說者也。惜人不知，成人敗人，皆在一言。言之出口，其可不謹。昔寇萊公之在鎮也，因生日，造一山棚，為監司所奏。上大怒，玉音甚厲，謂王文正公旦曰：寇準每事必欲效朕，何也？文正曰：寇準誠賢能，但駸耳。上曰：但駸耶。遂不復問。曷非文正一言，則山棚之怒，安得便霽；賢能之說，安得上聞乎？王文康公曙治蜀，盜無輕重皆論死。有謗其大苛，會劉燁召還。真宗問曰：凌策與王曙治蜀，孰優？燁曰：凌策值歲豐，故得以平易治之。王曙值歲斂，慮民為盜，不得不繩以法，易地則皆然也。真宗善其言。

曷非劉燁一言，則大苛之疑，安得遽釋；皆然之語，安得上聞乎？此遏惡揚善，太上所以稱為善人，《易》所以讚為順天休命者也。

讚曰：

善惡之念，實同一初。舉抑進退，如轉轆轤。遏彼揚此，繫其機樞。春意所感，百蟄昭蘇。易順休命，其天心乎。

推多取少。

傳曰：推多取少，似主兄弟言之。

大抵義屬大倫，臨財自當如是。苟

或反是，義復何在。況財者，尤貴乎

義。天之察人，多在乎此。今日取

多，豈遂多乎？今日取少，豈遂少

乎？昔薛包與兄弟析產，奴婢取其

老者，田疇取其荒頓者，器物取其弊

折者。徐積與二叔析產，先請二叔

畢取所欲，惟餘一篋圖書、兩間弊

屋，積怡然受之，略無愠色。又如：

魏公咸熙之略取一二種，東染世衡

之但取圖書，杜正獻行之盡與諸昆

杜神童淳之悉與季弟。此皆推多取

少者也。至於官爵，亦有推而受者，如申積中兩遇郊恩，悉推以官其二弟。徐禧恩命已下，復推以待其兄之子是也。彼錙銖必校，尺寸必爭者，旋踵破敗，何足以此而語之哉。

讚曰：

知雄守雌，大白若黑。不貧為寶，老氏之嗇。自廣狹人，豈曰盛德。意防侈大，身務儉抑。徒以財言，未盡天則。

受辱不怨。

傳曰：按《涅槃經》，昔有一人，讚佛

為大福德相。聞者乃大怒曰：生纔

七日，母便命終，何者為大福德相？

讚者曰：年志俱盛而不卒，暴打而

不瞋，罵亦不報，非大福德相乎？怒

者心服。大抵惟有福德，方能如是。

惟能如是，乃有福德。固非局量褊

淺者之所可窺，不聞本朝大福德

者？昔呂蒙正拜參政，將入朝堂，有

朝士於簾下指曰：是小子，亦參政

耶。蒙正佯若不聞。既而同列，必



欲詰其姓名，蒙正堅不許曰：若一知其姓名，終身便不能忘，不如不聞也。富文忠公少時，嘗有詬之者，文忠聞如不聞。或以告之，文忠曰：恐罵他人。曰：明呼公名弼。曰：天下豈無同姓名者。竟至不問。此固文士，或亦能之。若夫武臣，而亦能者，誠亦可取。狄武襄為真定副帥。一日，宴孫沔。有劉易者，亦與座，易素疏訐，見優人以儒為戲，乃勃然曰：黥卒乃敢如此。甚至詬罵武喪不絕口，俄又擲樽俎而起。時孫沔觀武襄氣殊自若，不少動笑，語愈溫易。歸方自悔，則武襄已踵門求謝矣。王吉為添差都監，從征劉旰。吉謹願寡語，狀若無能，動輒為同列詬斥。吉不問，惟盡力王事，奮不顧身，竟能衝破賊軍，遷統制。非氣量超越，能如是乎？此皆有前程，享福德處。孰謂佛語，為不然乎。讚曰：

和氣平，笑觀物變。虛舟飄瓦，吾又何怨。受寵若驚。傳曰：太上於《寵辱章》曰：寵為下，得之若驚，失之若驚，是謂寵辱若驚。今於此篇又曰：受寵若驚，然則受寵，果若驚乎？大抵福兮禍所伏。當受寵時，不無盛滿。萬一盛滿，則便有無限禍事，伏乎其間。一旦寵失，禍必勃至，豈不果可驚乎。是故君子受之，常若驚也。昔王文正公旦初登第，知平江，即通判鄭州，尋拜右正言知制誥，改集賢殿修撰，遷翰林學士，拜工部侍郎，參知政事，加同平章事。從封泰山，祀汾陰，兼玉清昭應宮，使迎奉聖像，天書刻玉。兗州太極觀奉上寶冊，使拜太尉，兼侍中，晚年官益重。每家人出賀，必止之曰：遭遇如此，愈增憂懼，何可賀也。及為朝修使，自禁中乘車輅出都門，百官餞送，莫不交口稱賞公之榮遇。公則不然曰：但覺反側不安耳。他人處此，能如

是乎？張忠定公詠之，拜吏部侍郎也，謂所親李旼曰：今蒙聖恩，擢為天官少宰，可畏，可畏。若轉下而思，則身不危；轉上而思，則恐必敗。慄慄若有懼色。他人處此，能如是乎？惟其如是，所以能有其寵。苟或不然，不免立取禍敗，不聞盧多遜與種放之事乎？盧多遜初拜參政，服用漸侈。其父億即愀然不樂曰：吾家世儒素，一旦富貴，遂至如此，未知稅駕之地矣。多遜不能念父之言，竟以事敗。種放初為朝廷所召，聲名大振。其母即恚謂放曰：吾勸汝勿聚徒，無求名，今果為人知，不得安處矣。放不能念母之言，竟以名敗。此皆受寵不能若驚者也。讚曰：

顏子不校，隨會能賤。下惠袒裼，師德唾面。稱美當時，垂芳記傳。心

交口稱賞公之榮遇。公則不然曰：

犧尊青黃，乃木之災。孤犢衣繡，寧活草萊。軒冕所寄，外物儻來。貪榮保存，禍身之胎。夫知道者，可不懼哉。

太上感應篇卷之四

# 太上感應篇卷之五

李昌齡傳 鄭清之贊

## 施恩不求報。

傳曰：君子有心於施恩，無心於求報。苟有心於求報，即是利在於報。初非為人，報未必可求，而怨必先之，烏足謂之恩哉。是以不求之報，常見於無心之恩。昔尚霖為巫山令，邑尉李鑄最强悍，無何感疾，遽至困劇。霖憐之，因請所托，尉拭淚以老母少女對。及卒，霖為割俸，送其母及其函骨歸河東，且為嫁其女于二族。一夕，夢尉如生時，拜且泣曰：公本無子，感公之恩，已為力請于帝，今得為公之子矣。是月，霖妻果孕。明年解官，沿流而歸，每遇灘險，必見尉隱約立岸上，如指呼狀。將抵荆渚，又夢尉曰：某明日當生府，公必以小合送及生府。公果以小合貯粟米，為糜粥之須，因呼之曰合，名之曰穎。及長，極寬厚，敏於

仁，篤於孝，官至大理寺丞。宇文英迪初領黔江都獄，民有扶愛之者，常訴漕臺官吏，適坐事繫獄，官吏恨之，必欲文致于法。英迪為之不平，力為辯雪，竟從輕斷。又三年，英迪沿檄道，由南賓泝流而歸。時六月，忽大雨，水遂暴至，波濤如山，中流纜絕，舟人拱手，坐待傾覆。俄見一小舟冉冉出沒於煙波間，遠來相救。既濟，乃扶愛之也。相顧大驚曰：吾昔日平黔之獄，初非有意於君。君今日冒險而來，亦豈知將溺者之為我，豈天意故以彰其事乎？相與感嘆者久之。嗚呼，當霖之為尉也，不過曰同官，當如是而已，安知有今日為子之報乎？當英迪之為愛之也，不過曰斷獄，當如是而已，安知有今日救溺之報乎？此皆無心之恩，不求之報者也。曷使有心，則未必然也。古語云：恩雖亂施，有不期而自會；怨不可作，恐窄路之或逢。真至言也。

贊曰：

怵惕惻隱，仁心自生。內交要譽，利心乃萌。仁本天理，遇物而亨。利則人欲，其未必爭。毫髮千里，宜謹權衡。

## 與人不追悔。

傳曰：老子曰：既以為人，己愈有；既以與人，己愈多。大抵人之臨財，多至吝嗇，一毛不拔者有之，與而復悔者有之。今也乃能與而不悔，非真實樂施，安能如是，福德自此而長，豈不愈有愈多乎？昔柳仲塗少時，飲于酒肆，見一書生將謁魏守，求貲葬其父母。仲塗問：所費幾何？書生以二十萬對。仲塗即日歸家，罄其所有，得白金百兩、見錢數萬，以與悉之，略無吝色。范文正公賞遣其子堯夫，歸姑蘇取麥。舟次丹陽，見故人石曼卿以三喪未舉，不得歸，盡以五百石麥舟付之。既歸，未及言，文正曰：見故人否？堯夫以曼卿三喪未舉為對。文正曰：何不以麥舟付之？曰：付之矣。堯夫怡然，喜見于色。若二公者，是有

悔乎？此固偉人，宜有此舉。然求之其次，不為無人。比李謙者，富室也。嘗值歲歉，出粟千石，以貸鄉人。明年又歉，人無以償。公即對衆焚券曰：債已了矣，不須復償。明年大熟，人爭償之，一無所受。明年又大歉，公復竭家貲，設粥以濟，賴以全活者，動以萬計，死者復為瘞之。或曰：子陰德大矣。公曰：陰德猶耳鳴，己自知之，人無知者。子今已知，何足為德。李浩然者，亦富室也，拯濟貧困，積四十餘年，未嘗少怠。若二公者，亦有悔乎？其後，柳范益通顯，二李孫皆登第，所謂愈有愈多，豈不然乎？

贊曰：為德不終，古人所賤。與其諾責，寧有己怨。君子不吝，果於為善。貨惡棄地，藏己則淺。隨力所及，斯為方便。所謂善人。

傳曰：孔子曰：善人，吾不得而見之矣。得見有常者，斯可矣。然則

善人者，當何修何飾，而能到其地乎？曰：無他，但能踐篇中之言，即能到其地也。篇之言曰：為臣當忠，為子當孝，兄弟當曉，夫婦當和，正己化人，慈心於物，不欺閭室，不履邪徑，進退以道，積累有功，卹寡矜孤，敬老懷幼，憫凶樂善，濟急救危，不銜己長，不彰人短，遏惡揚善，取少推多，受辱不怨，受寵若驚，施恩不求報，與人不追悔，人得人失，如己得失，乃至澤被昆蟲，仁及草木，所踐如此，非善人歟。昔李文正公昉既致政，因上元張燈，太宗命安輿迎之，坐之御榻之側，手酌御樽，且選果核之珍者賜之曰：如卿者，真善人君子也，兩在相位，未嘗有傷人害物之心，此朕所以念卿也。公歸語其子曰：吾雖無奇功偉績，驚世駭俗，然未嘗蔽人之善，忌人之進，不欺暗室，度德守分。於此四者，自謂允蹈。今蒙聖上崇獎，對羣臣前，以善人君子見稱。夫善人君子者，男子極善極美之稱也。孔子

尚云：不見吾何人而敢當之乎？汝曹當念聖上崇獎之言。吾平日所踐四者之說，於君忠，於親孝，修謹自立，庶幾可以無忝。其子宗諤，亦能恪守先訓，為一時聞人。叅政李公穆之死也，上即時臨喪，哭為之慟，既而顧左右曰：天不使好人為朕輔佐耶，何至奪之之早？宗諤問文正曰：從叔為事何如，而能使聖上痛惜如此？公曰：叅政公清簡亮，恬澹寡欲，直不忤物，曲不苟合，乃至學術之該博，識量之深粹，真大雅君子矣。加之善與人交，敏於從政，是故捐館之日，識與不識，莫不交口嘆惜。不然，何以感致萬乘之尊，親臨其喪，為之長慟乎？嗚呼，二公所踐，真可謂允蹈夫篇中所謂善人之說也。得名善人，豈為過哉。

贊曰：乾卦六陽，元為善長。寸陰不容，純乎天象。受天之中，在人能養。推而行之，安利勉強。陽長陰消，此心天廣。

人皆敬之。

傳曰：蓋巨源為縣令，因買羅於公廳上，手自開托。其侍婢從屏間見之，即恚曰：不意今日，乃來伏事一箇羅絹牙郎。因求去，不可留。范諷為御史中丞，有一閹吏，隸臺已四十餘年，事二十餘中丞矣。每能道丞之賢否，丞賢當聲喏時，所執之杖必橫，否則直，此語久矣。喧傳為中丞者，惟恐其挺之直也。一日挺直，諷驚問故，則曰：比見中丞約客喻庖者，至于數四，某私意異時作相，亦復如此，每事喋喋，豈不煩碎，心實鄙之，不覺挺之直也。諷愧謝者再三。嗚呼，此皆舉措偶失，已不為婢僕所敬，況能使人皆敬之乎？當知人皆敬者，必其真可敬也，不聞溫公與劉大諫之事乎？昔溫公之赴闕也，衛士見之，莫不以手加額。乃至百姓，亦復遮道告曰：公無歸且留，相天子，活百姓。時王闢之過青州，道見村民數百，亦復歡呼踴躍，皆喧傳曰：司馬作相，吾儕大快活矣。

公薨，京師之民為之罷市，而弔鬻衣以奠。四方會葬者，數萬人力。至嶺南封州父老，亦皆相率而至，炷香於頂相九百餘人。非人皆敬之，能如是乎？劉大諫之在宋也，人皆謂：若過南京不見劉待制，如到泗州不見大聖。及薨，耆老士庶，乃至婦人女子、田夫野獠、市井小民，莫不爭持香劑、誦佛書以哭。公門為填壅不得入，因設大爐於廳下，以受其香，香價為之踴貴。非人皆敬之，能如是乎？又如王沂公之在閣下，楊文公性恢諧，一時僚友，無不被其狎侮。至公則曰：第四廳舍人不敢奉戲。陳襄、陳烈、周希孟、鄭穆，皆以知天盡性為學，天下之重為己任，士人宗之，號曰四先生。雖誕突盜傲，不可率者，亦不敢失禮於其門。富文忠公嘗乘小徇，過天津橋。人隨觀之，市中為之一空。徐孝節廬于墓側，城中之人，日往致敬，市中亦為一空。申顏特立獨行，每過市肆，市人為之起。邵康節每出遊，城

中士夫，無不倒屣而迎。此亦人皆敬者，非真可敬，能如是乎？

贊曰：

敬心之生，得於未施。林宗之中，紫芝之眉。至于君實，走卒所知。匪求于人，人則即之。不然回紇，曷拜子儀。

天道祐之。

傳曰：天道祐之之說，即《易》所謂：自天祐之，吉無不利之說也。大抵天道無親，常與善人。不言而善應，不召而自來。我果有，以格之；無有，不為所祐也。昔劉器之既登第，不即就選，復歸從學，每以漆雕開，斯未能信為戒，大為溫公所知。初拜諫官，即抗疏二十有四，甄別朝臣邪正。又抗疏一十有九，論章子厚小人不可用，人皆為縮頸公則不問。及子厚用事，公遂走竄人言，春循梅新，與死為鄰，高竇雷化，說著便怕。凡此八州，公歷其七，雖盛暑畏途，亦必令所屬監督。日行一程，或泛海冒險，人皆謂公必死，

公則安然，年八十，未嘗一日病。時公貶所，有一納粟者，揣知子厚意，自求為子厚殺公。子厚即日，自選人擢為本路運判。其人飛馭，徑至距公貶所，纔二十里而止，明日將有以處公，左右莫不為懼。無何夜半，忽聞鍾鳴，則運使者若為物擊暴，吐血而死矣。彘使運使不死，公則必死，非天道祐之，能如是乎？庚子與者，亦吉人也。其父出守巴西，遷寧蜀而卒。子輿扶護而歸時，秋水方壯，灩澦微露水面。而瞿唐之流，尤為湍悍，天又欲雨，舟人大懼。子輿因仰天大哭，一慟未終而水已退，減二十餘丈。既過，水復如初。彘使水不退減，事知如何，非天道祐之，能如是乎？當知天道祐之，特在我而已耳，況忠孝者，百行之冠冕乎？所謂善者，此其首也。

贊曰：天者公理，當然而然。非有好惡，孰司其權。與善輔德，助順尚賢。惠迪之吉，動相周旋。誰祐我者，在己

之天。  
福祿隨之。

傳曰：詩曰：樂只君子，福祿申之；樂只君子，福祿膍之。此即篇中隨之之說也。大抵善人君子，其吉祥愷悌，足以招致福祿。是故所至不求而自然來，宜有若隨也。昔富鄭公以直言危論為諫官，既知制誥。宰相不悅，因薦公使不測之虜。時歐陽文忠公上書，引盧杞薦顏真卿使李希烈事，言宰相欲害公也。書入，不報及公使虜一言之間，乃能使虜之君臣，相與誦公之言，修好中國，不用兵者，幾百餘年。使回除樞密直學士，又除翰林學士，又除樞密副使，皆力辭不受。踰月，除樞密使，又辭。上必待公，綴班乃坐。豈非福祿隨之而然乎？此固大福大祿，非粗能有成者之所敢望。然各在其身言之，但凡有成，皆福祿也。醫官甄百里者，本鄙野庸夫也，然能善用其心，病無大小，皆急赴之。一日，上不豫，或薦其能，一服果愈。

於是寵冠諸醫，出入宮禁半年之間，金如熟薄所積，已二萬餘片。酒如上樽，亦常貯三千餘餅。此雖未足，謂之福祿。然在甄身，比之曩日，非福祿乎？當知福祿隨之，亦在我而已耳。

贊曰：顏天陋巷，夷餓首陽。貧歸原憲，刑及范滂。福祿之應，幾於反常。當知數子，日月爭光。此福此祿，千載明昌。

衆邪遠之。

傳曰：衆邪者，不正之類也。其類不一，故曰衆邪。大抵邪正殊途，勢不兩立。正之所至，邪自不容。譬如日輪照於冰山，日固自如，冰當自釋。所謂遠者，求之于古，如禁呪之不能加曇顯，素娥之不敢出梁公是也。昔道士陸脩靜等，善呪術，能呪僧衣鉢，及宮殿梁柱，皆飛舉振動，高自矜誇，以為神仙輩也。時法師曇顯聞之，斥曰：爾曹未遇勅敵，敢以小術自肆？遂以稠禪師袈裟置

地，使呪之，道流併力作法，逾時不能動。顯即自取置梁間，使呪梁柱，亦不能動。修靜等慚縮無人色。如武三思，嘗買得一妾，名素娥，真絕色也。每宴朝士，出以自誇。一日，約狄仁傑。仁傑將至，娥遂深匿不肯出。武入呼之，則入堂奧隙中，聲若屬絲曰：妾本花月之妖，梁公正人，何敢出也。自此遂不復出。求之于今，如方公諸君是也。若方謙之者，清靜自居，味道為樂者也。時所居之方，多病山瘧。謙之書名與之，無不立愈。或請其方，謙之曰：嘗聞心正，可以治邪。吾居貧，無財可施，但日誦法輪《道德經》，隨喜衆善，慈悲靖惡，自謂可以自治，亦可治邪，如是而已。此則見名而遠者也。張乖崖者，始終挺然，無所屈撓者也，與高士傅霖相善。一日，款于近郊，夜飲劇談。時彼方大疫，諸鄰多有病者。是夕如洗，頓然皆愈，明見鬼物云云。若為二公而去，此則聞聲而遠者也。彭公達者，淡然寡

欲，廉謹不苟者也。嘗知湖州，州宅素號多怪，前後守臣，不獲安處。及公到官，乃至解去，未嘗問其怪之有無，其怪亦不敢輒呈伎倆，始終帖然，殊無小撓。此則見之而遠者也，非我有以服之而然乎？至於張玄感之任淮南漕也，則不然矣。到官之後，日為鬼物所撓。時有一武弁善治鬼，因命治之。既至，叱曰：運使尊官，朝廷重任，爾等何鬼，輒敢干之？鬼乃大笑曰：我豈比你班行，苟且取奉，以求薦舉。自此益塗糊上鵠下突不可制，豈非兩皆無以服之乎？贊曰：有道之世，其鬼不靈。清明在躬，物無遁情。無邪爾思，所存者誠。泰字既定，迅雷不驚。是氣無餒，何物敢撓。

### 神靈衛之。

傳曰：神靈者，聰明正直者也，在處皆有之也。所敬者道德，所與者忠孝，所契者正直，所取者陰德，然則

人其可無是四者乎？苟果有之，神靈無不衛也。昔韓魏公自成德移帥中山，將至沙河。前驅回白：水暴至，不可前。公曰：業已至此，避之何益？命速具舟。既濟，行李未絕而波濤如山，後騎猶有未得渡者。時徐濟之民，皆見公方渡時，有神龍偃截上流，水為之立淺。梅公儀嘗知滑州，夜報河決。公即躬率官屬，分役兵夫，夜趨河上，隨處堤塞。正窘急間，明見一白鬚老人，載一舟楫，往來佐助。意其豪民，心大喜之。及水定，天亦曉，命吏請之，則白鬚老人不復見矣。此皆神靈衛之者也。

### 贊曰：

神之為道，聰明正直。洋洋在上，鑒臨微側。呵禁不祥，以奉有德。匪求于神，彼則受職。惡人反是，神所罰殛。

### 太上感應篇卷之五

# 太上感應篇卷之六

李昌齡傳 鄭清之贊

所作必成。

傳曰：世間無不成之事，天下皆可作之人。苟有其志，無不成也。昔張仲賓之祖，本一善謀利者，但以翻然改圖，篤意教子。其子仲容、仲賓，果皆登第。明年，仲安又登第。于令儀本一市井小民，亦以翻然改圖，篤意教子。其次子傑，姪子傲，亦皆登第。然則有志之士，欲有所作，是有不成者乎？況能力行衆善者乎？竇公之事，便可見也。竇公禹鈞者，燕山人也。初夢其祖謂曰：汝無子，又不壽，曷不早修陰德，以回造化。禹鈞惶懼，於是內外姻婭，有喪未舉，有女未嫁，皆助成之。乃至焚券嫁僕夫之女，得金還去失之人，苟可修德，無不為者。又於所居，建四十間屋，聚萬卷書，延文行師儒，居之師席，有志之士，聽

其自至。由是英俊四集，由公門而貴者前後接。武公之身，官至左諫議大夫，年八十，無疾而卒。今為洞天真人，晚得五子，皆登第：儀，禮部尚書；儼，禮部侍郎；侃，左補闕；偁，參大政；僖，起居郎。嗚呼，欲長壽而得長壽，欲得子而得五子，欲官爵而有官爵，好修德而得登真。然則世間所作，是有不成者乎？

贊曰：

求仁得仁，叔齊伯夷。孳孳為利，盜跖之歸。天既與善，惡亦稔之。貪回陰狡，動遂其為。成效美惡，要終可知。

神仙可冀。

傳曰：張楊閱《道藏》，見一壁魚，身有五色，爛然奪目。及開經卷，則神仙字處，蠹蝕殆盡，乃知壁魚蠹蝕神仙字，遂能身有五色也。何諷買得一軸道如經，中有一物，狀如髮捲，規可四寸，循環無端。既而截斷，則頭尾兩皆水出，滴可升餘。徧以問

人，無能知者。一日，遇一得道者，舉以問之，則曰：君遇此物而不能羽化，命也。此乃壁魚三蝕神仙字，使立降，可得還丹。復取其水服之，便得換骨。諷歸，取經畢讀，則一軸之中神仙字處，字字果皆蝕盡。又知壁魚三蝕神仙字，遂能化為脉望也。嗚呼，一蟲尚爾，況以人冀神仙，其有不可冀者也。大抵人之與仙，性真本一。第以情勝，遂失其真。一旦反真，塵情俱盡，即神仙也。況能濟之以善，求之于古，如子房之忠，吳猛之孝，王進賢之不失婦節，蘭期之友于兄弟，劉翊之損己分人，趙素臺之濟窮卹死，許真君之行符施水，嚴平君之以善導人，周伯持之收瘞遺骸，李五郎之不欺斗斛，陳安世之不殺物命，李奚子之拯濟飢禽，楊敬直之閑則凝神，唐若山之性無忿恚，乃至黃萬祐之鮮過，景相之酷好放生。劉平阿本一醫人，吳睦本一縣吏，劉妍本一妓女，鮑靚本一

店家，賀生本一屠兒，丁約本一兵卒，朱狫本一劫盜，李正玄本一獵人，此皆自人而得仙者也。求之于今，如晁公迥之為靜居天主，章公文起之為司命真君，王公素之為玉京侍郎，呂公晦之為上帝司糾，韓公琦之主紫府，富公弼之司崑臺，王公叟之掌翊聖鐵輪，金公三之為佑聖風伯，張公孝基之為嵩山主者，竇公禹鈞之為洞天真人，乃至歐陽公脩之主神清，王公安國之主靈芝，呂公湊之主羣玉，石公延年之主芙蓉，陳公靖之判司直，田公承君之主維陽，此亦自人而得仙者也。按經云：今中元二品左洞陽官所，總地上九皇土壘、四維八極。其靈官僚屬，共有九萬九千九十九萬衆，皆是在世有功之人，受度而得進補其職。如吾鄉臺法何公熙志以注《金剛經》有補於世，死後乃得補為西嶽點檢，歷數官。此雖嶽府，是亦受度，孰謂神仙為不可冀乎？其間亦有欲冀而終不能冀者，非仙之不可冀也，所踐未足

冀乎仙也。不聞二真人之言乎？鍾離曰：仙之求人，甚於人之求仙。洞賓曰：人常以不得見吾為恨，雖日見吾，而不能行吾言，於事何益？此皆嘆人不能冀夫仙也。

贊曰：

神仙之說，多謂渺茫。求而不得，漢武忝皇。亦如釋教，地獄天堂。天堂果有，必處忠良。地獄果有，小人之鄉。

夫欲求天仙者，當立一千三百善；欲求地仙者，當立三百善。

傳曰：天仙地仙之有差，在乎立善多寡之有異。篇中已自言之，固不在論。請以百尺竿頭、更進一步之說言之，庶幾已得仙者，不復從墜，一向超升；未得仙者，不假他求，即日便到。釋迦曰：仙有十種，一曰地行仙，二曰飛行仙，三曰遊行仙，四曰空行仙，五曰天行仙，六曰通行仙，七曰道行仙，八曰照行仙，九曰精行仙，十曰絕行仙。既而又曰：是等皆是不循正覺，別修妄念，存想

固形，遊於山林，人不到處，壽千萬歲，斯亦輪回，妄想顛倒，報盡却來，散入諸趣。堅固服餌，而不休息，食道圓成，名地行仙。堅固草木，而不休息，藥道圓成，名飛行仙。堅固金石，而不休息，化道圓成，名遊行仙。堅固動止，而不休息，氣清圓成，名空行仙。堅固精液，而不休息，潤德圓成，名天行仙。堅固精色，而不休息，吸粹圓成，名通行仙。堅固呪禁，而不休息，術法圓成，名道行仙。堅固思念，而不休息，思憶圓成，名照行仙。堅固交遘，而不休息，感應圓成，名精行仙。堅固變化，而不休息，覺性圓成，名絕行仙。鍾離曰：仙有五種，一曰鬼仙，二曰人仙，三曰地仙，四曰神仙，五曰天仙。既而答大道之問，則又曰：道本無問，問本無答。萬物之中，最靈最貴者，人也。若能窮萬物之理，盡一己之性，窮理盡性，以至於命。全命保生，以合乎道。自然與天地齊其堅固，而同其長久矣。一者不悟大道，惟務速成，正令心若死灰，形如槁木，神識內守，一志不移，定中以出陰神。然窮其歸，究竟只名清虛之鬼，不得為純陽之仙，名曰鬼仙。二者暫於人中，得聞大道，然業重福薄，或以魔退，或僻在一偏，確守不變，絕五味者，不知有六氣、忘七情者，不知有十戒、行



咽漱者，笑吐納之爲錯著採補者，指清靜之爲愚，好接物以奪天地之炁者，不肯休糧、好存想而採日月之精者，不肯導引孤坐閑息者，不知有自然屈體勞形者，不識於無爲，但能延年安樂而已，名曰人仙。三者法天地升降之理，取日月生成之數，身中用年月，日中用時刻，識龍虎，配坎離，辯水源清濁，分氣候早晚，收真一，察二儀，別三才，分四象，列五行，定六氣，聚七寶，序八卦，行五行，九州顛倒，氣傳子母，液行夫婦，三田反復，燒成丹藥，永鎮下田，練形住世，長生不死，名曰地仙。四者已得地仙，用功不已，超凡入聖，却反三山，名曰神仙。五者已得神仙，傳道於世，於道有功，爲人有行，功行滿足，超居洞天，便得效職，列爲仙官。若又於天地有犬功，於古今有大行，從此漸進，仙階陞擢，歷任三十六洞天，反於八十一陽天，復從八十一陽天，超入虛無自然之境，名曰天仙。然則釋迦所謂正覺，鍾離所謂大道，果何說哉。夫正覺即大道，大道即正覺也。大抵必欲識取自心，不落情解，不聞僧那之說乎？僧那曰：欲明自心，但於日用中，行住坐卧，常自審諦思察。遇色遇聲，未起覺觀。時心何所之，是有耶？是無耶？既不落有無處所，自然心珠獨朗，常照世間，無一塵許間隔、剎那頃斷續之相，此即正覺，即此大道

也。是故呂真人既因不學鍊金，而得度世矣。又因聞應無所住而生其心之說，而胸次始得豁然。既得胸次豁然矣，又嘗飯僧於潭之興化。孫真人既以留意方書，而得度世矣，又嘗咨決於唐之宣律。既得咨決於宣律矣，又嘗聽《寶塔品》於成都之無名行僧。此即百尺竿頭、必欲更進一步者也。若夫立善，自當然也；縱不求仙，亦當然也。

贊曰：

禮儀三百，威儀三千。待人而行，人道乃全。積功累善，必有後先。條目嚴備，毫髮罔愆。是乃仙道，以人合天。

若或非義而動，背理而行。

傳曰：孟子曰：理也，義也，人心之所同然者也。孟子所謂義，理也，大抵義理在人，不可非背。苟或非背，不免追隨汨沒，闖草駟僮，無所不至矣。其肯清靜自居、味道為樂乎？請以一二君子言之，庶幾稍知愧恥。昔郭延卿以文行著名，厭世澆薄，葺

園圃於水南，居之凡二十餘年，足跡未嘗至城市，少則與張文定、呂文穆游。張、呂相繼作相，薦之于朝，得職官不肯就。時錢文僖惟演為留守、謝絳為通判、尹洙為掌書記、歐陽脩為推官，皆一時文行之士，慕其為人。一日屏騎從，同謁延卿，對談良久。延卿以陶樽果藪進，文僖愛其野逸，引滿不辭。至晚，吏報申牌府吏牙甲羅列庭下。延卿徐曰：公等何官，而從吏如是之多？洙指文僖曰：此留守相公也。延卿曰：不圖今日肯顧野人。相與大笑，更進數盃。暨日入公辭歸，延卿送出曰：某老病，不能造謁，幸勿訝。文僖登車，茫然自失，如入神仙之境，既而嘆曰：此人視富貴為何等事乎？此則士大夫中，清靜自居、味道為樂者也。杜五郎者，本田家也，亦確然有守。所居距縣三十里，惟兩間小屋，一其自居，一其子居之。枵然一榻，更無他物。時繁陽尉孫軫，慕其為人，乘閑謁之，良久曰：某村

民無能，何為見訪？軫因問何以不出？笑曰：無用於時，無求於人，偶不出耳。又問：何以為生？曰：曷

居邑南，有田半頃，與兄之子共耕。

兄子既娶，自度不足贍，盡以付之。

因携妻子至此，適鄉人有兩間閑屋，

因借居之。初則賣藥擇日以自給，

及兒子長成，鄉人又以三十畝田令

佃。耕有餘力，又傭於人，自此稍

足，不欲與人爭利，醫卜之類，一切

罷廢。又問：終日有何所為？曰：

端坐而已。又問：曾看經否？曰：

二十年前，曾看一本《淨名經》，初見

其議論的當，心頗愛之，今已忘却，

經亦不知所在矣。對語移時，氣韻

瀟灑，言辭精簡。軫大敬嘆曰：真

有道之士也。自此數數訪之，此則

田野間清淨自居、味道為樂者也。

彼非義背理而無所不至者，視此得

無愧乎？

贊曰：

理本法意，義為條式。原情定罪，一

毫不易。銖銖戒謹，猶差於石。矧

越繩矩，肆為頗僻。人而不誅，底天之辟。

以惡為能，忍作殘害。

傳曰：天道常與善人，爾乃以惡為

能；天地之大德曰生，爾乃忍作殘

害。違天背地，非爾而誰？所謂能

者，不自以為非也；所謂忍者，殊無

惻隱也。諸惡之中，莫此為甚。殘

害之中，莫此為慘。地獄之設，端為

是人。異時牛頭阿旁之屬，亦豈恤

爾而不加毒手乎？請以不忍之說，

急速救之，庶幾不至已作而不可復

救。昔西域僧名覺稱者，來入中國。

楊文公億一見，即加禮。既而求去，

不可留。因命譯者問之，則曰：我

土全不食肉，今入中國，在處皆屠殺

猪羊，懸肉市肆，甚不忍觀。吾意不

樂居此，暫到五臺，禮文殊即歸矣。

山谷詩，有厥牙已作小兒拳之句。

張閣一見，即蹙然不樂，指為忍人。

此但詩人狀物，初非忍者。蓋閣為

河內推官，而通判葛繁惟蔬食誦經，

閣亦斷肉，故有此語。若使世人皆

能有悟，如覺公，如張公，於一切物，

常存不忍，愚保其必不致以惡為能，

而忍作殘害也。今故首表出之，然

後略叙因果。昔陸孝政欲收一聚

蜂，收不可得，即怒，盡以熱湯沃之，

死無遺者。未幾，復於其地，忽為一

大蜂所螫而死。周昂嘗晝寢，戶上

有一燕巢，三雛呢喃待哺。昂怒，悉

以蒺藜與之，三皆胸裂而死。其後，

三子皆暗。金華寺有栢數株，忽生

毛蟲，色黃，而長近二寸，蠹食枝葉，

莫知紀極。寺僧秀榮惡之，悉命掃

除埋瘞，或棄於柴積。其徒秀仁，又

取柴積曬於日中。俟蟲死，方以供

爨。數年，秀榮卒時，寺內別有一僧

亦卒。既而得還，語秀仁曰：某到

陰司，見秀榮荷鐵枷，坐烈日中，有

萬萬毛蟲，緣遶嚙噬，若不可忍。秀

仁聞而大懼，不數日，亦發背而卒。

大慈寺僧修準新開一軒，四面皆竹，

攔檻上多有蟻子緣遶。修準怒，立

伐其竹，盡取蟻子，棄於火中。未

幾，忽患癬瘡，頭面尤甚。命醫視

之，醫曰：此名蟻漏瘡，不可療也。未幾，遂卒。又如王愈忿鵠之噪，而生斷其舌，其後竟死舌瘡。張霖忿蛙之鳴，而沃以熱灰，其後忽為湯爛。然則人之於物，是可以惡為能，忍作殘害乎？既作，得無罪報乎？

贊曰：智伯之賢，盆成之才。明推丹朱，捷稱惡來。受天異稟，如木產材。用以為善，其孰禦哉。以能濟惡，豈不可哀。

### 陰賊良善。

傳曰：陳平多陰謀，自知必當無後。公孫弘好陽與，其後不復顯聞。大抵陰謀不免陽與，陽與便有陰謀。譬如彈丸擊物，最為暗中施之。餘人皆不可施之，良善則尤不可也。蓋良善者，民之望也。在一國，則一國重；在一鄉，則一鄉重。其可陰賊之乎？昔李林甫未顯時，在槐壇遇一道士戒曰：君名已列仙籍，縱不白日上升，亦必為二十年太平宰相。異時，事權在手，切記吾言，不

得妄有陰賊。林甫既貴，不復憶記，一味怙寵，多所賊害。久之，復夢道士責曰：君豈忘吾言乎？今果獲罪矣。於是命吏引入一處，林甫耳中，惟聞瀟瀟風水聲。既至，則府署嚴飭，帳榻華侈。林甫復自喜曰：正令居此，亦自不惡。道士笑曰：此乃鱗介所居，其間苦事，最為慘毒。君尚以為不惡，欲如何而後謂之惡乎？林甫駭然，汗洽而寤。此則以陰賊良善，而將生水族者也。許文規被攝至冥司，以曾活一人，得延一紀而還。既出，望見一門，守衛甚嚴。許以問吏，吏曰：此都獄也，但凡世間讒譖忠良、毀敗善類、常行陰賊之人，死後無問貴賤，皆當治罪于此。此則陰賊良善，而必入地獄者也。孰謂為之，為無罪乎？當知明白洞達、坦然易見者，近乎陽也；姦險狠愎、深而難知者，近乎陰也。平生宅心於陰，死而復歸於陰，理之必然，亦無足怪。所謂水族，所謂地獄，非陰界歟？

贊曰：犯法舞法，冒法則均。鬪殺謀殺，同於殺人。至於定罪，輕重不倫。舞設智數，謀秘鬼神。發必命中，亦中其身。

### 暗侮君親。

傳曰：在人臣言之，一味姦諛，肆其欺罔，暗侮也；在人子言之，空事虛文，情實不至，暗侮也。但凡為臣為子，而不能盡其所以事君事親之誠，皆暗侮也。使為臣而皆暗侮其君，為子而皆暗侮其親，則為君為親者，尚何望於為臣為子者乎？害教叛道，莫此為甚，太上所以言之。昔曹武惠彬方在宥密，常公服危坐，如對君父。既歸私第，亦必閉閣宴居，不敢妄通賓客。五鼓纔動，即待漏於禁門。如此八年，雖雪霜甚寒，未嘗輒易其操。王文正公旦雖在私第，亦如在朝。一日，歸自朝中，即冠帶入靜室，默坐不出。家人惶恐，亟遣其弟詢之趙公安仁。安仁曰：適議事，公不欲行，未決而歸，必憂國家

耳。彼暗侮其君者，視此得無愧乎？郭琮幼喪其父，獨有母在。常懷罔極之嘆，凡三十年，不茹葷，不飲酒，朝夕虔禱，必欲為母祈壽。其母張氏，果得一百四歲，耳目不衰，飲食不減。孟熙者，市井人也，日以販賣果實，養其父母。雖不知學問，而於溫清定省出告反面之道，皆能曲盡其至，知學問者，往往不及。其父死，寢苦於地，不食鹽酪，哀毀過節，幾至滅性。如是三年，始終如一。彼暗侮其親者，視此得無愧乎？惟其不敢暗侮，所以曹氏、王氏二家特盛。郭琮明詔褒賞，旌表門閭；孟熙因掘地，於鋤下得金，遂成富室。然則天於忠孝，其報之也，曷嘗爽乎？

贊曰：

恭不侮人，偽無戴爾。事父事君，恭莫大此。不用吾情，是欺而已。有既面目，為人臣子。借曰未知，神明彰矣。

太上感應篇卷之六

### 太上感應篇卷之七

李昌齡傳 鄭清之贊

慢其先生。

傳曰：先生者，所以傳道、授業、解惑者也。片言之悟，一字之傳，皆所自也，其可慢乎？昔胡安定瑗之為先生也，如錢藻之淵篤，孫覺之純明，范純仁之直溫，錢公輔之簡諒，皆一時知名之士，其於先生，則不啻如子弟之事父兄，未嘗聞其慢也。孫明復之為先生也，如石介之該通，張洞之辯博，皆魯之尤賢。而有道者，其於先生，行則從升降揖，拜則執杖履而侍，肅然其恭，亦未嘗聞其慢也。又如待制彭汝礪，少嘗師事嗣廬倪天隱。及官保信，即迎天隱置于齊閣，執弟子之禮甚恭。天隱死，母猶未葬，明年妻亦死，又且無子。公為葬其三喪，又為嫁其女于同年進士宋渙。尚書王存，少嘗師事穎川陳俊。俊死無子，存為立其

弟之子官之，由是俊妻得有所托。此則又能不忘先生於既死之後者也，況敢慢之於在生之日乎？其間或有慢者，特輕薄小人耳。惜其不知為先生者，大有不可慢處。其開悟未達，陰德最大，克昌厥後，皆未可知。王公之事，便可見也。昔王先生者，家極貧，以教導村童為業。晚得一子，已八歲，不能養，捨與西寺僧為童。其僧一見，知其英物，即令就享，不惜錢帛資之。咸平中，舉賢良方正，其後為參政，作樞密，名位烜赫，官業過人，是為王文康公。曙，其名也。文康之子益柔，官至龍圖學士。益柔之子謹行、謹言，皆至大夫，有賢德，嘗與康節諸公游。然則為先生者，是可慢乎？

贊曰：

父生師教，二者並言。傳道授業，孰為本源。服有衰絰，心喪三年。人倫所重，天道亦然。慢其所敬，惡莫大焉。

叛其所事。

傳曰：僚屬之於長吏，卒伍之於部轄，僕妾之於主翁，皆所事也。所謂叛者不待，真敢叛之，然後謂之叛也。但凡緩急非所倚，利害不相卹，即為叛也。請以一二僕卒言之，庶幾出於僕卒之上者，稍知愧耻。昔僕夫趙延嗣，事舍人王鄰幾為僕夫。鄰幾知制誥，不逾年而父子俱卒，家素貧無以為養。延嗣義不捨去，竭力養其三女，凡十許年，未嘗識女之面。及三女長成，即詣京訪舍人之舊宋翰林白、楊侍郎徽之，放聲大哭，具道所以。二公驚訝曰：汝之所為，吾儕不及。於是合金迎三女歸京，擇良配嫁之，著得名士。時徂徠先生石守道，特為傳之，以激世之不能篤於義者。王逵初事屯田郎中李曇為僕夫，後應募為兵，以選入棒日軍。適曇父子坐事，繫御史臺獄，平生親舊，無一人敢餉問者。獨逵日守臺門，供其飲食，如是四十餘日，未嘗少怠。及獄具，貶為南恩州。駕從者，皆辭去，獨逵送之，曇

忽感恚自盡。逵為經理後事，哭之如親父子，見者無不墮淚。泊事畢，方敢捨去。時司馬溫公亦為傳之，以戒世之薄乎義者。然則世之受知於人，臨利害而輒相棄背者，曾不若趙延嗣、王逵之為僕卒也。

贊曰：君師長治，及其受恩。皆曰所事，分有常尊。情義攸托，施于子孫。奴僕報主，犬馬戀軒。我思嬰曰，作于九原。

誑諸無識。

傳曰：《楞嚴》云：眩惑無識，疑誤衆生，死後便當墮入無間。然則誑之為罪，豈為輕哉。昔亳州太清宮有一道人，氣貌甚揚，每携一小鑪，於老君殿下，煨藥而賣。衆方集，必指老君像大言曰：我乃彼之師也。衆頗惑之，莫不皆欲多得其藥。一日，方指像大言，忽火自鑪出，飛入其身。須臾焰發，五體烘燒。衆皆以水沃之，沃不能滅，號呼跳躍，不勝其苦。良久，面老君像，俯伏如待

罪狀。視之，則已死矣。時楊克勤聞之於驗屍官甚的。張懷素者，亦偉然其人也。自言道術通神，飛走之屬，皆能呼遣。至言孔子誅少正卯時，彼正在旁，諫其太早。又言漢楚成臯之戰，彼正登高觀戰。姦如蔡卞，尚猶惑之，每對客言及，必極口稱嘆，惟忠肅陳瓘不信。其後事敗抵罪，名士多被污蟻，惟忠肅獨免羅織。然則誑諸無識，其掇禍終可免乎？大抵誑妄之人，但知貪財，不復畏罪。為僧人，則挾談空而誑；為方士，則挾丹藥為誑；為師巫，則挾鬼神而誑；為醫卜，則各挾其術而誑。安知誑妄為罪，非獨掇禍，又當墮大地獄乎？

贊曰：笑烈於怒，志慘於兵。侮玩給惑，殆非人情。淵魚可躍，漚鳥易驚。矧我同類，萬物之靈。以誑為巧，掩耳盜鈴。

傳曰：人倫有五，曰君臣，曰父子，

曰兄弟，曰夫婦，曰朋友，居于其一。然則朋友之道，豈為輕乎？況諸同學，平日相處於硯席之間，雍容笑語，非不親厚，其可妄起嫉心，而輒加毀謗乎？昔郭尚書贊初作賦，即有聲時，同學李勉深忌其能，潛加毀謗，由是贊連上不中選，其後竟先登第。及再知貢舉，而勉方以明經充選，詔下之日，勉大悔而歸。贊聞之，亟命親厚者召還，俾復就選，遂得中第。然則郭之所長，終可掩乎？今復賴之，得無愧乎？惜其不知前輩同學，未嘗不相親厚也。昔韓億少與李若谷同學，又嘗同途赴試，共有一被一氈。每出謁，則互為僕從。是年，李先登第，受許州長社簿。將之官，李自為其妻控騾，韓從後為負一籠。既至界所，惟餘八百見錢，中分為二，一哭而別。明年，韓亦登第，後皆官至參政，世為婚姻，有相謗乎？又如趙安仁少嘗與宋元興同學，元興蚤世，裔嗣衰替。安仁既貴，屢以清俸濟之，又為訓其

諸子，手寫《周易》、《論語》、《老子》、《孝經》。凡七子，人各授以一帙。此則尤能不忘同學於既死之後者也。彼不忠厚者，烏足以語此哉。

贊曰：儀泰交訾，敗於傾覆。涓牘胥忌，喪身則足。相觀而善，道盛仁熟。借使非才，石可攻玉。須友以成，千祿百福。

### 虛誣詐偽。

傳曰：虛也者，漫浪不根也。誣也者，妄有污讟也。詐也者，詭計百出也。偽也者，矯飾過情也。離而言之則有四，合而言之皆不誠也。大抵誠者，天之道也。思誠者，人之道也。今乃捨誠而習，為虛誣詐偽，即是戾天之道，而失人之道也。既戾天道，又失人道，不入三惡，其將何歸？是故藥山曰：欲識餓鬼道者，即今之多虛少實，令人不信者是。藥山曰：你欲識地獄道，只今鑊湯煎煮者是；欲識餓鬼道，即今多虛少實、不令人信者是；欲識畜生道，見今不識仁義、不辯親疏者是，豈須披毛戴角、斬截倒懸？欲識人天，即今洗淨盛儀、持餅摯

鉢者是也云云。夫多虛少實，在虛誣詐偽中，特四之一耳。其從墜之速，尚至如此，況兼其四，而皆犯之乎？從墜之說，姑置勿論。且以一二誠實之士言之，庶幾皆知自克。昔李及為監司，既替登對。神宗問曰：麥價幾何？及曰：臣於職事，無不盡公，獨不知麥價耳。他日欲得一官，為諸路按察，宰執屢薦其人，終不能當上意。一日，上自言曰：向時不知麥價者為誰？宰執問故，上曰：朕欲周知四方利病，須忠誠信實人，方可委任。如麥價不知，有甚撰一箇不得。於是召及，遂蒙信用。王隱者，本皇城司一健步也。時河決大發，丁夫隨處築塞。上遣數輩健步，往來偵視。先有兩輩至言：決流已塞，水復故道。俄而隱至，其言亦然。既而又曰：初來時，頗覺津流未斷，恐尚煩聖慮。上怒拘之。少頃報至，則水勢暴猛，復衝壞大捷，橫注數郡矣。上因召隱慰諭，立遷小校，自是補擬校列，多蒙超擢。

及東宮擇親衛指揮使，已得劉謙，尚闕一名。上曰：王隱誠實可用，即已補之。其後，位至侍衛步軍都指揮使、保寧軍節度使，得任子恩，前後凡一十七人。然則二公誠實，豈不愈於虛誣詐偽，而速入惡趣者乎？

贊曰：不誠無物，命之曰虛。言不可復，其實也誣。偽則奪真，詐反近愚。以此行已，誰食其餘。骨肉猜阻，況於國都。

### 攻訐宗親。

傳曰：《禮》曰：親親，則諸父昆弟無怨。所謂親親者，各親其親也。身既列為族屬，上復同乎祖先，其可不相親乎？求之前輩，無若范文正公言之最為切當也。文正曰：吾之宗族，居於吳中者甚多。在吾固有親疏，在祖先視之，則均為子孫，無親疏也。且祖先以來，積德凡百餘年，至吾身而後發。今為大官，若或獨享富貴，不復少卹宗親，異日何以

見祖先於地下？今日亦何顏以入家廟乎？是故恩例俸賜，必以均及宗親。又於姑蘇近郊，買良田四十頃為義莊，以養羣從之貧者。且擇長而賢者一人，主其出入。每人日給米一升，歲給縑一四。乃至嫁娶喪葬，肯有贈給。其子純仁，尤能克紹其志，惟守廉儉，俸祿所得，盡以廣義莊，前後任子之恩，必先及疏屬。身歿之日，勿子五孫尚有未官者。如公父子，其於親親之說，可謂允蹈者也。又如彭尚書思永，其撫宗族有恩。張康節公昇，常分俸以及九族。趙夫又世開，嘗捐金以賙族人之貧不及筭者。吾恭安公存，嘗收卹族人之孤嫠者，為之株娶。此亦能親親者也。既能親親，何自而有攻訐之失乎？所謂攻訐者，即今之彼我必爭，絲毫必校，或相忿嫉，或相傾奪，皆是也。不待如何，然後謂之攻訐也，戒哉。

贊曰：己惡當攻，待人必恕。以訐為直，聖

人所惡。於厚者薄，尤可愧懼。根本平時，視若行路。不務睦蘇，彝倫攸斁。

虛靜天師頌

人之性，湛然圓寂。涉境對動，種種皆妄。一念失正，即是地獄。敬誦斯文，髮立汗下。煨燼心火，馴服氣馬。既以自鏡，且告來者。

太上感應篇卷之七

## 太上感應篇卷之八

李昌齡傳 鄭清之贊

剛強不仁。

傳曰：孔子以剛為近仁，太上以剛為不仁，聖人之言，豈相戾哉。孔子所取之剛，乃剛毅之剛，確然不奪乎內，君子之剛也，有殺身以成仁，故曰近仁。又曰棖也，慾焉得剛。太上所戒之剛，乃剛強之剛，忿然常見乎外，小人之剛也，凌人暴物，焉得仁哉，故以不仁。又曰強梁者，不得其死。又曰：堅強者，死之徒。大抵剛強之剛，不能自戒，則便有不仁之失，在乎其間。太上所以斷而書曰：不仁也。昔桓範，持節都督青徐諸軍事。初到徐州，與郡守徐岐爭屋，便欲引節斬岐。岐奏于朝，範以理屈坐免。及知冀州時，呂昭才為鎮北將軍，冀屬鎮北。範以昭才仕進出其後，意輕之，語其妻曰：吾寧能三公長跪，不能為呂子展屈。

妻曰：君在徐州，便欲引節斬岐，人皆謂君難為作下。今到冀州，又不欲為呂子展屈，人必謂君難為作上。範忿其言，以刀環撞其腹，妻墮胎死。強梁如此，非不仁乎？包孝肅內剛不屈，僚屬有所關白，多面折之。至於所言中理，亦未嘗不怡然而改，由是人皆服其剛而不愾。此即剛毅之剛，與剛強之剛，有所不同。而太上、孔子言，之所以亦有異也。竊嘗論之，縱非剛強之剛，而用剛不已，亦不保其無失。楊文公億以文章獨步，帝頗愛之，竟以剛不容物，讚之者衆，帝眷遂衰。王內翰禹偁亦以文章獨步，帝有意於用之，亦以剛不容物，沮之者衆，命竟不下。然則用剛不已，豈不有累於身乎？二公尚爾，况餘人乎？

贊曰：剛非克剛，暴而無親。強非自強，必多上人。是謂凶德，又焉得仁。善念斯絕，何惡不臻。釐爾多福，枯木難春。

狼戾自用。

傳曰：狼戾自用，按如佛說，譬之惡馬，言難調也。難調如馬，當為無等人乎。是故太上於《法輪經》，嘗以不自用故彰勉人。今於此篇，又以狼戾自用為戒。而吾夫子亦曰：愚而好自用，賤而好自專，如此者，灾及其身。三教聖人，言皆如此，其可不戒？大抵狼戾自用者，則吾友知識，必不親近；性命道德，必不喜聞。日用之間，一切拗強，能無失乎？惜其不知從善如流。君子所踐，其可自用，况狼戾乎？昔李文正公昉每自言曰：周顯德末，吾為翰林學士。丁太夫人憂起，復充職。時禮部侍郎竇儼嘗責吾曰：夫魚袋之取事君夙夜匪懈之義，以黃金為飾者，亦身之華也。子居太夫人憂恩詔抑奪，不當有金玉之飾。吾遽謝不敏，自是每誌于心曰：夫為人子者，喪禮固非預習，然三年之制，苟不中禮，非惟有虧名教，亦何面目處身於搢紳之列乎？於此益知竇君



之言，真長者也。正叔先生過范堯夫治所，謂堯夫曰：聞舊帥死，公始代之數日，便設筵張樂，宴犒軍將，有之乎？曰：有之。先生曰：當初只合打散，使知所以不給財食者，舊帥亡也。堯夫面熱汗洽，愧集于中。明日追送先生于界上曰：非先生遠出，不聞此言賢矣哉。二公臨事，從善如此，是宜名振當時，而澤流後裔也。狼戾自用者，是可望乎？

贊曰：

仲虺有方，自用則小。善必難遷，狂不可矯。吝心封閉，私眉膠擾。懷諫陵物，惡積釁兆。災及其身，乃其自召。

是非不當。

傳曰：莊子曰：彼亦一是非，此亦一是非，果且有彼是乎哉？果且無彼是乎哉？此則超出於是非之外視是非，固若無是非也。苟或尚與世接，不免事有是非。一是一非，皆計利害。在一國，則計一國之利害；在一家，則計一家之利害。孰謂不

然乎？是故荀子曰：是是非非之謂智，非是是非之謂愚。愚之為言，猶言不顧利害，而妄有非是是非也。敗人之事，不為愚乎？惜其不知處心平正，不敢妄有非是是非，即日便當度世。不聞尹鄒之事乎？昔尹師魯與人談論是是非非，無所隱避，不為苟止，亦不苟隨，惟務窮盡道理乃已。臨終之日，先以手書別文正。文正馳至，則公已沐浴衣冠，端坐而逝矣。文正哭之慟，公復張目曰：已與公別，何用復來，死生常理，希文豈不曉乎？言訖，復揖而逝。鄉非平日是是非非，無所隱避，死主之際，能如此乎？鄒宿為內殿崇班，正直無二，是是非非，未嘗妄發。至於背義貪殘，恣殺物命，皆所不作。竟為真武真君收錄，署之部下。慶曆初，任鄭州監酒。日忽風雹大作，下一無蓋銅棺，公即端簡入卧其中。不剎那頃，復下一蓋，自與棺合。震霆一聲，則其棺已在半空，冉冉向北而去矣。今為北極壽限司判官，每

歲一次，隨真武真君下降，勘算世人善惡功過，校量壽限長短。鄉非平日，是是非非，不敢妄發，真武真君其肯以此重職而輕付之乎？二君如此，而超度如此，彼非是是非者，當如何哉。

贊曰：

誰毀誰譽，三代直道。是非之公，如辯白皂。小智既鑿，臧否顛倒。醜正朋邪，跖廉夷盜。天鑒不迷，出日杲杲。

向背乖宜。

傳曰：向也者，趨向之謂也。背也者，違背之義也。當向而背，當背而向，即太上所謂乖宜也。乖宜之事，君子有所不為，而小人為之，而無忌憚也。昔王資政存議論平恕，無所向背，志有所守，確不可奪。溫公嘗稱之曰：並馳萬馬中，而能駐足者，其惟王存乎？是以始自束髮，至於老耄，歷事五朝，所持一心，屢更變故，所守一道。劉忠肅贊嘗論助役十害在位者，責其向背，下司農寺，

詰令分析。公曰：臣所向者忠直，所背者邪佞。所向者義，所背者利。所向者君父，所背者權臣。政令如此，獲罪固已自分。然助役終為天下害，願陛下勿忘臣言。人皆為公縮頭，公則不問。若二公者，其於向背有乖宜乎？至於李師中、吳孝宗之流，便不然矣。李師中平日議論，與荆公大不合。及荆公權盛，師中復欲合之，於舒州作一亭，榜曰傳巖。以荆公曾倅舒，而又始封舒也。吳孝宗初對策，力抵熙寧新法。及荆公得君，孝宗復為十卷巷議，以上荆公言：閭巷之間，皆言新法之善。荆公鄙之。乖宜如此，為君子耶？為小人耶？

贊曰：事得其宜，此之謂義。見理必明，用心勿貳。從違既決，禍福頓異。毋遠仁賢，毋近邪偽。惟順人道，斯合天意。

虐下取功。傳曰：燭遇暗則成破暗之功，舟得

水則成載物之功。大抵水到渠成，功當自立，固無待乎取也。苟有意於取之，則便有虐下之失在乎其間。功未必立，而禍必先之矣。所謂虐取其財，虐用其力，皆為虐也。請以虐取其財言之。蓋財者，人所急也。不聞王咨、馬絳之事乎？昔王咨以強鷙處官。紹興初，為四川都轉運司幹辦公事。被檄推井潼川，躬自詣井，盡令井戶承認大額，合認五十斤者，必令倍認百斤，利其沒官，而官自煎也。未幾，井戶皆至破敗，咨亦暴卒，遂受牛身。當死之夕，其友楊使君舉家皆見咨來求救，則公裳下已穿出一尾矣。明日鄰家，果生一牛。又有馬絳者，亦為幹官。性尤苛虐，每出督錢，不問額之虛實，物之盈縮，一切必欲多得。稍不滿意，便敢肆暴，人因呼為馬刷子，言其好刷錢也。或以咨事戒之絳曰：正令即日，便生兩尾。亦所不問，既而，疽發于背之左，數日又發于右，兩疽相對，宛如杖脊，深可寸餘，洞

見五臟。僚友省問，無不驚駭。至是，始自伏曰：後之刷錢者，要當以某為戒。肉爛至盡，一息方絕。又如李諮無子，陳恕兵死，林特子孫皆死非命，亦虐下也。

贊曰：世有健吏，不畏簡書。斬刈民力，以充苞苴。囊橐既溢，復獻羨餘。高爵易享，華屋可居。身及孫子，其終何如。諂上希旨。

傳曰：主知生死罪福之科，為之都司者，無若酆都。酆都北帝之下，惟玄滋天君，助理四君、六天大魔、天地水三小官官，不顯姓字。其於僚屬，見於《真誥》者，皆世之忠直之士。求之其上，如邵公爽為南明公，吳季札為北明公是也。求之其次，如賈誼為西明都禁郎，臧洪為鬼官北斗君、天門亭長是也。又求其次，如紀瞻為北天修門郎，溫嶠為監海開國伯是也。曷嘗有諂上希旨者，得與其列乎？大抵事君貴忠，一言

之諂，即名不忠，不忠之臣，天所必譴，何望超度。昔唐高宗將立武昭儀為后，畏大臣異議未決。一日，召李勣、長孫無忌、于志寧、褚遂良等計之。遂良等皆持不可，勣獨不出，志寧顧望不對。後數日，帝復密以訪勣。當此之時，使勣能以一語諫止，在勣不失為忠，在唐亦不至有宗室之禍。勣則不然，卒以陛下家事，無須問外人為對。由是帝意遂決，昭儀立，而唐之宗室殲矣。觀勣之意，不過私己畏禍，以求自安。不知己竟不可私，禍竟不可畏。身死未幾，赤族發冢，禍皆及之。孰謂諂上希旨，為無禍乎？又有郭崇韜者，亦坐此也。崇韜既居顯位，自見功高，心懷反側，於是白帝，欲立劉后，意在自固。不知人心難知，易至反背。其後，殺崇韜者，乃劉后也。然則諂上希旨者，是可為乎？為之得無禍乎？

贊曰：諂上迎合，希旨開先。所謂逢君，罪

莫大焉。主意未決，或可變遷。一語從臾，惡力遂堅。喪身亡國，毋寧怨天。

受恩不感。

傳曰：按《法苑珠林》云，人之受恩，譬如種穀，種雖因地，非雨不生。洎至穀成，不可只言因地，不言雨恩也。又按《智度論》云，受恩不感，甚於畜生。嘗讀柳文，見一則事，益知受恩不感，畜生有所不忍為者。為人而不及於畜生，豈不甚於畜生乎？昔薦福寺，有一鶻栖於浮屠之上。冬之夕，必取鳥之可以盈握者，不殺而左右轉易，以暖其爪掌。及旦，復完而縱之。既縱，必極目遠觀，鳥東沒則西飛，西沒則東飛，意不欲復相見，而再攫之也。嗚呼，鶻之為物，但知攫物決裂而食。今於一夕，暖爪掌之鳥，乃能如是，彼受恩不感者，豈不畜生所不為乎？惜乎不知感恩之人，最為近道。非感恩，便為近道。即其感恩，則其平日履踐，從可見矣。宣和中，士夫有徐

文中者，嘗游東都。所役兵偶為車轆，蹙不能行。遇一道人，傳以少藥，步履如初。兵大感激，徧遊天下，訪求其人，少致謝悃。一日，復遇諸途，哭泣拜謝。道人曰：吾施恩於人者多矣，未嘗有一人，得如子者。於是授以祕訣，兵遂得道。文中聞之，詣兵問道。兵曰：清靜是道，簡易為上。文中頓若有省，竟亦得道。孰謂無有感恩，而能得道乎？世之如兵者，有幾人乎？

贊曰：

世有忍人，甚於豺虎。藉其卵翼，報以折斧。人道斯絕，無君無父。翳桑衛盾，漆身沒豫。負恩報恩，施者勿顧。

念怨不休。

傳曰：德山示衆云：毫釐繫念，三途業因，瞥爾情生，萬劫羈鎖。此但念念在法，為累尚爾，況念怨之念，念念不休者乎？當知念怨不休，最能令人自縛，永劫不得解脫，淪入三途，其速如箭，不聞懺法。所謂若無

怨懟，無有惡道之說乎？謹按經云，怨習交嫌，發于銜恨，是人命終、未捨暖觸以前，便有飛石投櫃、匣貯車檻、甕盛囊撲等事，現于其前。此即念怨不休，死當墮入地獄者也。又云：貪恨為罪，是人罪畢，得出地獄，遇蟲成形，名蟲毒鬼。此即念怨不休，又當墮入鬼趣者也。又云：蟲蠱之鬼，蠱滅報盡，生於世間，多為毒類。此即念怨不休，又當墮入畜趣者也。佛語無誑，孰謂為不然乎？其間，又有已墮三惡，而念尚不休者。如冀州之盜，既以劫盜，而死墮地獄矣，尚以郡守張冀法外殺之為念，念而不休，必欲追冀到獄是也。如《毗婆論》所載之鬼，既以積罪而死墮鬼趣矣，尚以女子於五百世前曾一殺之為念，念而不休，竟至復斷女子之命是也。如楊褒廐中之騾，既以惡業而死墮畜趣矣，尚以得道王鶴舊嘗與之有怨為念，念而不休，竟至歸殺王鶴是也。然則怨之一字，豈不最能令人自縛，永劫不得

解脫乎？不聞第三十祖璨大師之言乎？第三十一祖道信大師向璨致敬曰：願和尚慈悲，乞與解脫。璨曰：誰縛汝？信曰：無人縛。璨曰：既無人縛，何用更求解脫？信於言下有悟，遂得解脫。使璨此言廣行流布，則不休必休，不解脫必解脫矣。

贊曰：夷齊不怨，志於求仁。禮人不答，孟子反身。情恕理遣，無物不春。卻克記笑，暴骨交鄰。一念芥蒂，萬惡之因。

### 太上感應篇卷之八

## 太上感應篇卷之九

李昌齡傳 鄭清之贊

輕蔑天民。

傳曰：輕蔑天民，此特刻核之輩，旋踵及禍，固無足道。請以一二愛民君子言之，庶幾皆知則效。昔韓忠獻公琦，初為益利路體量安撫使，拯濟飢民，所活者一百九十餘萬。及鎮河北，適河決，歲又大飢，公復多方措劃，賑濟安輯，所活者又七百餘萬。富文忠公鎮清社，適河決，八州之民，全入京東。公勸民出粟，得十餘萬斛，隨處貯之，以濟殍者。且括公私閑舍，得十餘萬區，散處其人，使便薪水。明年麥熟，各計地里遠近，受糧使歸，所活者五十餘萬。滕章敏元發知鄆州，適淮南京東飢。公葺城外廢營一千二百餘間，以處流民，所活者五萬。李允則知潭州，適歲飢，公請發廩賑而後奏，運司不許。公曰：須奏後發，安能及事。

於是請以家財為質發之，所活者五萬。陳大惠堯佐知壽州，適歲飢。公曰：與其令率，孰若身先。於是自出己錢，以濟貧民。吏民爭出為助，所活者數萬。王懿敏素知太原，適汾河大溢，水灌平晉，將灌州城。公急備舟，明日水至，民得無恐。且勸大姓出粟賑濟，所活者十萬。胡文恭宿為楊子尉，適大水，民多漂溺。公出私錢，雇舟以濟，已溺而復活者數千。曾中書鞏知洪州，適大疫。公自州及縣，乃至市鎮亭傳，皆貯湯劑以待病者。兵民有病而無舍可居者，皆以官舍舍之，所活者數千。蘇文忠軾知杭州，適大疫。公出私橐作湯劑，遣吏挾醫，分坊救療。兼作病坊，以處病者，所活者數千。輕蔑者處此，能如是乎？惜其不知，居民之上，自當如是。

贊曰：父天母地，氣均體同。宗子家相，下及百工。相為鞠育，以裨化功。豈縱其上，擠民困窮。匪民之戕，自戕

其躬。

### 擾亂國政。

傳曰：老子曰：治國若烹小鮮。陸象先曰：天下本無事，庸人擾之。大抵治貴行其無事，況政者所以正民也。有司久已奉行，民亦安以為便，其可妄意改變，以從己說乎？若從己說，未必有便於民，適所以自取擾亂。激昂喜事之言，其可盡信。昔杜祁公經撫關中，布衣有張洞者，鬚髯黑面，青衣布裘，持一詩代刺為謁曰：昨夜雲中羽檄來，按兵誰解掃塵埃。長安有客面如鐵，為報君王早築臺。及補以一官，尋以贓敗。韓魏公鎮陝右，布衣有姚嗣宗者，上書論事，且獻崆峒詩曰：踏破賀蘭石，掃清西渭塵。布衣能辦此，可惜作窮鱗。及補以官，無異冗吏。呂許公在朝，布衣有雷簡夫者，以薦召對，其氣可以吞敵。及敷奏，亦復詳敏。朝廷便欲大用，許公堅持不可。累官至三司判官，與嗣宗為人無異。江少虞守吉州，布衣有李戒者，上書

論事，且言少學仁義之道，不在顏回下。又言三皇不聖，惟孔子聖。孟軻以下，皆不足道。韓子華知成都，亦復以此說進。子華惑之，及與荆公同判三司，即薦其人。未及引用，發狂而卒。然則激昂喜事之言，其可信乎？是以趙、韓、王為相，每有新進喜事之人，投進利害文字，一切不顧。季、簡、穆為相，凡封事建議，務更張喜事激昂、搖鼓掉闔、浮薄新進之徒，一切屏去，當時皆稱二公為相得體。鄉使輕信，豈不易致擾亂乎？

贊曰：政者正也，容私則偏。貪夫殉財，夸者喜權。理為勢奪，法以情遷。賞罰易置，紀綱棄捐。害于而國，爾身曷全。

### 賞及非義。

傳曰：昌黎曰：行而宜之之謂義。大抵義之為言，猶言宜也。非義者，不宜及而及之之謂也。不宜及而及之，君子其肯為乎？景德中，北虜寇

邊。河朔郡縣，屢罹其毒。主兵之將，為自安計，莫肯少挫其鋒。時李居正以小官催征稅於一鎮，忿其凶獷，鳩集市人，召募丁壯，奮力擊之，因深入其穴，奪所掠婦人老幼，各還其家。在位者因壯其勇，終無一人肯議其賞，惟張忠定詠密以聞奏。奏至，上大喜，立為居正遷數官，召為閣門祇候。居正承恩，罔知所自。或以忠定告，居正急往見之，見終不獲。因厚賂閹者，俾傳人榜子，忠定竟不出，但批紙尾曰：公臨財廉，臨陣勇，臨事勤，臨民仁，加之謹畏，此報國之大效也。所謝近私，不及相見。居正得之，愈於一見，捧玩佩服，弗離于身。居正及賞，可謂義矣。史吉為延州指揮使，康定中，夏虜寇延州永平。寨主與監押，皆欲引兵匿深山，俟虜去始歸。吉率所部數百人，遮城門，立於馬前曰：寨主、監押，欲何之？二人以實告。吉曰：如此，兵則完矣，如城中百姓，芻糧何往還之？跡何可掩？異日，

為有司所劾，吉為指揮使，不免於斬，願先斬於馬前，不然，不敢以此兵從。二人慚懼，引轡而返。虜忽圍城，吉復率眾拒守。數日虜去，寨主、監押，皆以完城遷一官。二人及賞，非非義乎？嗚呼，吉雖身不及賞，其後官至團練使，三子皆受命，一女嫁郭遠為郡夫人，是尤愈於二人非義一官之賞也。

贊曰：

不義而貴，垂戒孔聖。不義而侯，光武失政。賞盜勸姦，國何以令。爵及惡德，是褻天命。所以冢宰，詔王八柄。

刑及無辜。

傳曰：刑也者，所以懲惡也。無其惡，而輒刑及之，即太上所謂無辜也。人間私語，天聞若雷。無辜籲天，天不聞乎？蔡州百姓有錢舉者，誣其弟為異姓匿家財二十餘萬，不公與均分。前後官吏，皆受舉錢，不公其斷。惟干證人朱惜姐始終一詞，無所阿順。及許州通判徐沂，被差

就蔡州置獄根勘，沂復失於鹵莽，為推司楊仲和轉弄，反將朱惜姐勘斷臀杖十三。沂自此，即每事磨勘不行，聞天慶觀有道士裴君叟者，善章奏。自備香信，就觀連設三醮，以祈景貺。君叟初伏地投詞，即如鼾睡。明日始龍起曰：某到天門，見北極大帝帶領佑聖院善惡都判真武真君入奏：通判在蔡州不合，枉斷干證人朱惜姐臀杖十三事。且怒目指揮曰：徐沂心詞只留在此，恐金錄照問，汝奏對有差，不得還矣。某遂急回，事有之矣？沂曰：有之。言訖汗洽，不勝摧沮，未幾果卒。又有士子楊之奇者，晨出探榜。其妻在家，亦僦驪往水門，迓其父母。無何，中路逢一醉人，羅織毆擊，僦者潛遁，無人解勸，遂至官。時溫仲舒判開封，但見醉者面有爪痕，不問曲直，一例決遣。婦人大慚，不食者已累日矣。其夫亦下第從外歸，見妻被杖，不勝其忿，詣府申說。仲舒不聽，於是夫妻赴水而死。是夕，仲舒

即夢城隍司責曰：子太鹵莽，妄決良人，吾已關報東嶽。及奏聞上帝，禍將至矣。明日上知，仲舒以下，皆罷職。又有幽冥之譴，當如何哉。

贊曰：

過小則赦，罪疑惟輕。聖人之意，刑期無刑。矧是無辜，而弗哀矜。犴獄所及，排根引繩。冤檻充斥，可不痛懲。

殺人取財。

傳曰：劫盜迫人於險，醫家乘人之危，其為殺人，同是為財，罪皆一也。請以醫家言之，庶幾病者不遭毒手。不恤緩急，妄索事分，殺人也；不問有無，必欲多得，殺人也；懶墮睡眠，輕視人命，殺人也；辯察不明，用藥差互，殺人也；見不即治，俄至增劇，殺人也。有此五失，挾術行醫，其於殺人，甚於挺刃。挺刃之下，不當要害，尚有可活；一甌之下，五臟俱壞，是有活乎？昔顏畿以病就醫，遂至殞命。既而復蘇，氣息微細，死生不分，十有三年。陳景仁

妻張氏，亦有微疾，醫者誤投血隔之藥，遂至不起。既死之後，陰府不收，魂神蕩越，散遊無定。所至輒為界分土地驅逐，不勝其苦。一日，因景仁出郊，適與相值，遂得合為一體。自此，景仁即恍惚如狂，獨歌獨語。時其父尹京，適中使秦中立過治所。中立素事真武，因為奏聞北極，蒙真武真君憐其天橫，即日度令受生，更不經從陰府。孰謂醫者不殺人乎？惜其不知醫之為術，升墜最速。昔薄拘羅尊者，於往世施一訶梨勒果，救一病僧。以是因緣，於九十劫中，常生人天，未嘗有病。其最後身，值佛出家，證阿羅漢果，於五百眾中，獨為上首。王叟以針刺為生，不計錢數，所理多效。一日告眾曰：吾明年夏初，不可留矣。及期果去，所居之地，香氣不絕者累月。劉燼亦行醫，雖勞不倦，所療亦多效。及死葬之日，但空棺耳。此皆醫家能善用心，而立獲度世者。本朝丁逢吉善醫，其子度、第二人及

第，至觀文殿大學士。張仲和善用其張仲景法，療治傷寒。其後二子奇、兆，皆相繼及第。張行甫亦行醫，子孫典大邦、作提轉者，今已數世。此亦醫家能善用心，而克昌厥後者也。信相菩薩至一地獄，見一罪人，熱鐵灌身，鐵釘釘體，稽首問何罪所致？佛言：此人前世常為針師，妄施砭刺，是以此報。目蓮尊者，晨朝出城，見一餓鬼哭泣告曰：我之此身，有類塊肉，無有手足，及眼耳鼻等，被諸禽蟲，長時噉食，何罪所致？目蓮曰：汝前生行醫，不精其術，妄投藥餌，使彼病者不得全活，是以此報。蔡州神尼于惠普者，嘗與客坐。有牽二牛而過堂下者，尼曰：此牛前行者，是一官人，坐入人罪。後行者是一醫人，坐誤殺人。因呼其前世名字，二牛皆應。此亦醫家不善用心，而墜三惡者也。嗚呼，善不善業，備錄在前；或順或違，爾宜自擇。

贊曰：

財怨之府，利爭之因。積而不散，猶能禍人。殺越于貨，乃欲保身。額領貪吏，吞噬富民。籍沒死徙，疑無蒼旻。

傾人取位。

傳曰：元始上帝曰：妃后臣僚，隸於紫微垣中，但有品位，則隸五嶽四瀆。大抵一官一職，各有義命。義命當有，則今日拜樞密，明日作宰相，不足為難。義命若無，只做一日，亦不可得。孰謂為不然乎？昔蘇易簡先在禁林，李沆後入。既而沆除參政，蘇不悅，因上步虛詞十篇，以自見意上，即日俾參大政，拜命不數日而卒。夏侯嘉正以文詞稱旨，除右拾遺，直史館，兼秘閣。意猶不足曰：吾喜作文，且好黃白，但得水銀銀錢一文，知制誥一日足矣。上聞許之，制未下而卒。李繼凝有才幹，為樞密直學士，因詔對太宗，許以大用。歸與兄弟言之，大喜醉後，忽感風眩而卒。李巨源權中丞，太宗器之，嘗面加獎諭，將有進用之

意。偶以鞠獄，左遷知閬州。一日，驛遞堂帖，促令乘傳歸闕。巨源啓封大喜，一笑而絕。豈非義命所無，只做一日，亦不可得者乎？況傾人而取之者乎？若傾人取之，又不免有一段因果，如彌德超、盧多遜，旋踵及禍是也。昔德超見樞密曹彬勳望隆重，帝眷甚厚。因誣以不軌，極口傾之，由是彬罷樞密，而德超拜樞密矣。不數日，趙普再秉鈞軸，力為辯雪。帝悟，即日遠竄德超，而待彬如故。盧多遜見宰相趙普位望特重，因諷王祐使為己助，悉力傾之。祐不從，乃自為計，中以陰事。由是普罷相，而多遜拜相矣。既而事狀明白，趙普復相，而多遜遠竄朱崖。然則人之有位，是可傾而取乎？躁進者，當以此戒。

贊曰：

工本代天，位必稱德。沾沾淺夫，置命用力。徒傷雅道，無益於德。如螳窺蟬，黃雀鼓翼。天道好還，視我傲則。

誅降戮服。

傳曰：太上曰：兵者，不祥之器，非君子之器，不得已而用之。樂之者，樂殺人也，不可得志於天下。是故吉事尚左，凶事尚右。偏將軍處左，上將軍處右。殺人衆多，則以悲哀泣之。戰勝，則以喪禮處之。況所持之器，皆星宮所主。刀名大房，虛星主之。劍名失傷，角星主之。弓名曲張，氏星主之。矢名傍徨，熒惑主之。弩名遠望，張星主之。戟名大將軍，參星主之。然則器可亂用，人可樂殺乎？不聞王顯之事乎？王顯以使相知定州。一日，有道士破冠弊褐，鬚若剛鬣，笑則口角至耳，自稱鄴都觀主持，刺為謁曰：昨上帝牒到，二萬蕃魂，本觀未敢收入死籍。公若果於殺之，則名蓋當世，奪壽十年，二者惟自擇。公以為狂，叱起之。未幾，契丹引兵獵梁門。適天雨大雪，虜弓皆破不可用。顯記庫中有弓弩材木數千，因命工連夜斲削，乘其不備，縱兵擊之，蕃兵大



敗。明日築京觀斬首，恰二萬級。方悟道士之言，已無及矣。及奏于朝，上大喜，召以樞密。顯離定州，纔十三日而卒。嗚呼，此皆合死之魂，但以果於殺之奪壽尚爾，況已降且服者乎？當知誅降戮服，誠當獲罪。蔡居厚知鄆州，有梁山濼劫賊五百來降。公悉戮之，明年以兵部侍郎奉祠金陵，疽發于背，命道士設醮禳謝，因令所親王拱代作心詞。明日居厚卒，又明日拱卒。既而拱還曰：適到陰司，主者責曰：汝為儒者，乃敢為人詭作心詞，欺誑上帝。拱曰：皆居厚命意，拱但行詞而已。俄見數鬼引出，居厚枷繫聯貫，極為枯瘠。又見二鬼，持一桶血，自頭澆灌，澆即大叫，左提右掣，如垂絕狀。既蘇復澆，既澆復絕，片時之間，如是數四。遙告拱曰：子歸，切便語吾夫人，令急救我，我在此，只是理會鄆州一事。然則誅降戮服，是可為乎？

刑典議辟，鬪殺則輕。禦敵斬馘，是曰應兵。事不獲已，冥恕以情。乃若降服，奚俟兵刑。被固易殺，天道神明。

貶正排賢。

傳曰：世有伯樂，然後有千里馬。千里馬常有，而伯樂不常有。世之人才，其於遭遇，亦復如是。使在位者，人如伯樂，則有德量者，便可作宰相。識大體者，便可作護官。有方略者，便可付兵權。能鎮撫者，便可寄方面。有風力者，便可作監司。廉於財者，便可主財穀。知愛民者，皆可作守令。如此，則小大之職，各得其人，野無遺才，而百事舉矣。若夫正賢之士，則尤當柄用，庶幾朝廷有人，中外知畏，不敢妄有所窺，可貶排乎。若貶排人，即是故去其人，將逞其欲。是以樂於甄拔者，太上無不收錄；而妄有貶排者，太上亦無不深譴。昔韓崇拔一袁安於書佐，位至司徒，人皆謂崇有君子之鑑，譬之昏夕夜光。袁安正賢，從可

見矣。崇亦以此為太上所知，立命仙官王瑋玄授以泥丸紫戶之法，遂得度世，今在艷都，為定錄府左理中監，主始學仙者。本朝諫議大夫謝泌，最為知之，不妄許可。平生所薦，不過數人，皆至宰相。每發薦牘，必焚香望闕，再拜曰：老臣又為陛下，求得一人矣。文正、王旦，皆其薦也。臨死之日，盥沐焚香，服羽衣端坐而逝。頭不少欹，非尸解乎？此即樂於甄拔，而立為太上收錄者也。陳後主時，幸臣有司馬申者，好陷害人。一日，晝寢於尚書省。忽有一聚惡鳥，飛集其身，啄其口吻，血流被席。人皆指為陷害之報。周世宗時，有陶穀者，亦好陷害，李崧之族誅，魚崇諒之不用，皆其一言。及死，葬于昭覺寺之後。墓門屢掩屢開，寺僧塞以堅石。一夕，雷雨大作，墓門又洞開，雖觸體亦無矣。豈非妄有貶排，而為太上深譴者乎？孰謂貶正排賢，為無罪乎？

贊曰：

賢人正士，體國愛民。苟用於世，大庇斯人。排貶之害，非止其身。國患莫恤，民隱孰伸。貽禍大矣，厥罪惟鈞。

太上感應篇卷之九

### 太上感應篇卷之十

李昌齡傳 鄭清之贊

凌孤逼寡。

傳曰：矜孤卹寡，上文既已定為善人。凌孤逼寡，今復定為罪目。然則孤可凌，而寡可逼乎？惜其不知已得度世者，尚猶不忘念其孤寡，况未得度世者乎？昔石光祖師，真定初之官，道過潭州，聞園通院有道者姓郭，善種菜，隨時新奇，供衆取足，因往訪之。道者素啞，及見公來，則發語琅然，且以密語告，公遂致仕，沐浴安卧而逝。其道者，亦復不見。是夕，上於崇政前，恍見光祖乘空而來，奏曰：臣本北極佑聖院真武真君部下副參謀官。郭道者，乃北極下檢法使。皆以微過，謫降人間，今數滿當還。念許時食祿，且有少請，故特來謝。臣兒庭之未請朝政，願垂訓誨，無令尸祿有玷父風。言訖不見。月餘，潭州奏至，乃知光祖果

已化去陳喻言：本閩州一士子，以下第，久留京師。因遊百梁山，忽於天壽洞被二青衣攝去，宣示玉皇金籙，引至中天北極殿下，賜以金紫衣，充佑聖院真武真君部下，副注生死善惡壽命長短判官。一日，隨真君下降，忽聞哭聲。俯聽，乃其妻也。因懇真君求通音信，真君許令寫書。取人間遞角封誌，差直符送下本州倅廳。既而拆不可開，召其妻至乃開。書中具道遭遇真君本未，且再三囑曰：切在撫育諸孤，保守戶門。噫嘻，此皆已得度世，繫念尚爾，況未得度世者乎？所謂塚訟端起乎此。苟為不然，太上胡為列為都章，使人上章求解乎？

贊曰：

孤寡無告，文王必先。加以仁政，猶或難全。嗟我一本，兄弟顛連。忍肆其虐，俾悼所天。乃如之人，後報亦然。

棄法受賂。

傳曰：太上曰：曲直輕重，而首以

棄法受賂為言者何哉？蓋棄法必因受賂，賂一入則以直為曲，以曲為直，一切皆不問矣。惜其不知一法一律，鬼神皆得主知。棄法受賂，爵祿便當減奪。昔范魯公質未顯時，坐封丘茶肆中，手所持扇，偶題：大暑去酷吏，清風來故人之句。忽一恠陋人前揖曰：酷吏冤獄，何止如大暑也。公他日，當深究其弊。因携其扇去。公惘然者久之。後數日，道過一廟，廟門有一土木鬼，狀貌酷類嚮所見者，扇亦在其手中，公大異之。及大用，遂首議律條繁廣、輕重無據，吏得因緣為姦。周祖因詔公詳定，是名刑統。孰謂鬼神，不主知乎？侯鑑為江夏令，與勝緣山長老居約有舊，每乘暇必訪之，訪則院家必已為具。一日又至，則延待殊闕。鑑恠問之，居約曰：公每到，土地必先報曰：相公來。此番不報，是以失於延待。鑑大驚，密諭居約，使問土地，所以不報之由。是夕，居約復得夢曰：侯鑑本合作宰

相，與吾有所統攝，是以常報。近為受胡氏白金六十兩，枉斷一事，天曹已削下宰相名籍，但得作監司而已，與吾無復統攝，故不復報。然則爵祿，孰謂無減削乎？惜其不知，不棄法者，便當度世。昔王昌遇，本潼川一推司，以不敢棄法受賂，竟為上帝收錄，白日上昇，今為保和真人。王老志，本濮州一推司，亦以不敢棄法受賂，竟遇鍾離，授以道要，遂能前知禍福。徽廟時，嘗召至，賜號洞微。嗚呼，存心如此，是宜上與道合，豈吏人能之，而士夫反不能乎？贊曰：倫不受馬，辟召猶記。震畏四知，乃免於累。物欲一遷，情態必異。苞苴行歟，成湯所忌。如欲守法，瓜李遠避。

以直為曲。

傳曰：路冲知鳳翔，聞翊聖真君降言，因設醮請問立身行己之要。真君曰：盡力事君，濁財勿顧，邪事莫問，整雪刑獄，救療人民，動合王道，

自為吉人。積愆為咎，必有沈淪。然則處刑獄之任者，可不盡心而整雪乎？況敢以直為曲乎？請以一二大老言之，庶幾皆知則效。昔韓魏公鎮大名，魏之訟牒最多，事無巨細，公皆親決。雖在病，亦許通報，決之卧内。或以任勞過當，勸公分委僚屬。公曰：兩訟在官，人之大事。或生或死，或予或奪，在吾一言，其可輕忽？身沒之後，今為紫府真人。歐陽文忠，時之大儒，每與客論談，不言文章，而惟言政事。張舜民恠而問之，公曰：文章正以潤身，政事乃可及物。吾昔貶官夷陵，方當壯年，未厭於學，欲求史漢一觀。公私皆無，因取架閣陳年公案，一一披閱。其間枉直，多是乖錯，以無為有，以枉為直，違法徇情，滅親害教，無所不有。每自歡曰：夷陵褊小尚如此，天下固可知也。於是仰天誓心曰：自爾遇事，益加勤謹，不敢少忽。迨今三十餘年，出入中外，忝塵三事，以此自將。以人望吾，必以吾

為翰墨致身；以吾自觀，實是當時誓心一言之報。身歿之後，今為神清洞仙官。然則以直為曲者，身歿之後，當如何哉？

贊曰：直道而行，無偏無黨。是曰善人，所當崇獎。誣以為曲，罰其可賞。善人何辜，反受其枉。既殺望之，恭顯焉往。

以曲為直。

傳曰：事有直而不能自直，理有曲而不自知曲。此兩訟所以紛拏，待有司而後決也。為有司者，自當公心，剖析片言，則曲曲直直，無不冰泮。縱遇盤錯，亦必迎刃而解。尚安有以曲為直之失乎？彼以曲為直者，特其不能公心，必因徇託也。昔益州府君劉公，初為連江尉。民有爭田、十年不決者，郡以屬公，公得其姦，立為剖決，曲直遂判。人皆謂公為神，不知公非神也，特公心爾。及去官，得直者候於建州，屏人告曰：某有好香數斤，聊為長者壽。

發而視之，乃黃金也。公笑謝曰：君事本直，非私君也，其敢以公事受私賂乎？堅却不受，時皆偉之。其後，公之二子原父、貢父，俱以文墨顯名。孰謂處官公心，無其報乎？又有劉安民者，本丹稜一縣吏也，持心平正，素為吏民所敬。民有訟，不即詣縣，必先詣公，陳曲直，決可否，然後行之。公亦自負，受而不辭。直即直許其直，曰理直也，可行也。曲則直數其曲，曰此曲也，不應法也，行之必有失也。由是一縣之訟，為之頓省。其後，二子皆相繼登第，長汲，官至朝散大夫。少子湜，官至承議郎直祕閣提點、梓州路刑獄。一女嫁與楊筠，亦有官，迨今遂為望族。孰謂吏能公心，無其報乎？大抵曲曲直直，無不蒙福；而直曲曲直，無不受禍也。戒哉。

贊曰：曲則背理，為佞為邪。是曰惡人，胡可蔽遮。獎以為直，蠹國敗家。惡人何幸，乃見寵嘉。德裕竄斥，非敏

中耶。

入輕為重。

傳曰：書曰：罪疑為輕。《論語》曰：如得其情，則哀矜而勿喜。此皆聖人卹刑之大意也。然則輕可入而使為重乎？是以君子謹之。昔王縉為兩浙路提刑，每斷死囚，必焚香奏天，然後行下。一日暮坐，恍見一神人雲冠絳服，手持數軸公案。又見一玉女長帔大袖，手持一角公文。立于簷間，遙告縉曰：此汝平生所奏事目，一一皆合情法，無有枉濫。上帝嘉汝，已為汝父延壽一紀，兼為汝倍增紀福矣。汝之二孫，異日亦當皆作監司，更宜自勉。言訖而沒。李龜祥亦居憲職，素稱清謹。一日暮，出三井橋，忽睹十數人，叫屈稱冤，兩兩三三，漸來相逼。龜祥大懼，回馬馳歸，陡覺委頓。召諸子戒曰：汝輩異日入仕，切不得注受獄官差遣。如吾平生，自謂清謹，安知今日尚有此事。坐此鬱鬱，竟至不起。嗚呼，二公皆一時知名之士，王

公如此，而李公乃如此，豈李公尚有未謹處乎？況入輕為重者乎？請為更陳一二，庶皆知戒。昔歐陽遇判大理寺，有溧陽縣令余紹卿者，坐事繫獄，罪不當死，而遇輒坐以死。歸法之日，人皆冤之。自此行住坐卧，即見紹卿隨逐，不捨心，不自安，遠詣廬山九天採訪使者，觀設三日黃壇，解謝其事。初夜分，已見紹卿在側，心大惡之。明旦再投心詞，方俯伏間，忽被數鬼擒捉，擲之殿下，流血被體，移時而卒。李若水為淮南司理時，有劫賊五人，事敗繫獄，且言曾與僧人自成為黨。既而，五人已就戮，而僧方追出。僧言：實未嘗為盜。若水於此從輕可矣，而乃堅執賊語為實。夜以濕紙糊僧口鼻，厭以土囊，須臾，臍腹皆裂而卒。月餘，獄吏李能無故大叫曰：和尚不干我事，特司理驅使爾。言訖而卒。明日，推司劉元亦暴卒。又明日，若水亦苦小腹絞痛，號呼而卒。又明日，知軍孫誥、判官趙禹，亦皆

暴卒。未幾，若水一門，死喪殆盡，無復遺類。嗚呼，若水受禍，可謂酷矣。自成之死，臍腹至于拆裂，不為酷乎？此必上帝震怒也。

贊曰：法重失入，罪懼及疑。二罪併論，其怒可知。國典尚爾，法吏奚為。唐臣羅織，赤族是宜。稔禍垂臭，竟死何裨。

### 見殺加怒。

傳曰：按《涅槃經》，死者於嶮難處，無有資糧；去處懸遠，無有伴侶；晝夜常行，不知邊際；深邃幽暗，無有燈明；入無門戶，無有處所；雖無痛處，不可療治；往無遮止，到不得脫。嗚呼，人至如此，誠亦可憫。當見殺時，可加怒乎？昔誌公在世時，有二道人打伴而行。一人就園買瓜，園子怒曰：諸大家初未買，汝要買耶？拒而不賣。一人既往，園子乃喜賣之，且慰諭曰：汝渴熱耶？既賣一瓜，又與一瓜，二人私自怪詫，以問誌公。誌公曰：園子五

百生前，坐罪赴法時，汝二人適出其旁。買得瓜者，蓋嘗為之不忍，故今見之而喜。買不得者，蓋嘗出自作自受之語，故今見之而怒。此但偶出一語，結憾尚爾，況加怒乎？王曇略嘗殺一牛，牛見刀抵突，曇略怒，逆刺其目，然後殺之。大抵人畜無間，當見殺時，皆當方便救護。救而不獲，只得為助悲歎，何可加怒。

### 贊曰：

人之有罪，情不可恕。彼自伏法，我獨何預。加以憤疾，是曰遷怒。判死投筆，見者始悟。哀矜庶獄，王政所務。

### 太上感應篇卷之十

# 太上感應篇卷之十一

李昌齡傳 鄭清之贊

知過必改。

傳曰：顏子不貳過，孔子稱之。不貳者，念起于中，即念而改，不復貳於行事也。太抵過貴乎改，過而不改，真為過矣。其過也，可勝言哉。是以君子一聞其過，無不速改。昔寇萊公準，自少富貴，享用過奢。及拜樞密，賞賚尤厚，賓客聚觀，莫不稱歎。獨一老妪，潸然墮淚。公驚問故，則曰：太夫人捐館時，欲求一縑作衾襚不可得，安知相公有今日耶？公撫膺大慟，自此即折節從儉，不復敢奢。蔡文忠齊平生好飲，飲必至醉。時太夫人已老，心頗憂之。一日，存道先生過其治所，戒以一詩曰：聖君恩重龍頭選，慈母年高鶴髮垂。君寵母恩俱未報，酒如成病悔何追。公得詩大慚，自此即戒酒，非親舊不對飲，終身未嘗至醉。司

馬溫公方五歲時，擘一青皮胡桃，擘不能脫，一婢以熱湯沃脫之。既而，女兄從外來，問為誰脫？公曰：某自脫。其父從旁叱曰：小子安得謾語。公自此有省，平生不敢謾語，一切待人以誠。徐節孝積初見安定先生，頭容稍偏。安定厲聲曰：頭容要直。公即悟曰：頭容要直，此心其可不直。自此未嘗少曲其心，或問立身行己之要，必大書正直二字與之。若數君者，其於過也，是有知而不改者乎？

贊曰：

日月之食，其更也明。人豈無過，改必以誠。設辭飾詐，遂非匿情。過上增過，善心曷生。不吝一語，貴乎力行。

知善不為。

傳曰：應世真人曰：取小所以就大，積一所以成億。《易》稱：餘慶必歸積善。大抵善貴乎積，知之不可不為，為之不可不力。譬如種物，初雖至微，灌溉培植，不見其長，有

時而大。當知於日用間，誠不可以小善為無益而弗為也。不聞元君之言乎？元君曰：人有善，則心定體安；十善，則氣力强壯；二十善，則無諸疾病；三十善，則所求皆得；四十善，則昌熾富樂；五十善，則子孫繁息；六十善，則遭厄得脫；七十善，則天神護之；八十善，則得地之利；九十善，則尊賢顯榮；一百善，則寶瑞降；二百善，則後代名布；三百善，則後代大富；四百善，則後代清貴；五百善，則後代長壽；六百善，則後代忠孝；七百善，則後代智慧；八百善，則後代道德；九百善，則後代賢聖；一千善，則後代神真；二千善，則身為衆人師聖、真仙將吏；三千善，則為國師聖、真仙將吏；四千善，則為天下師聖、真仙主統；五千善，則為鬼靈師聖、真仙魁帥；六千善，則為神明師聖、真仙卿大夫；七千善，則為諸天師聖、真仙公卿；八千善，則為三天師聖、真仙皇帝；九千善，則為元

始五帝君；一萬善，則為太上玉皇帝。是故前輩於善，知無不為，為無不力。昔者丞相李昉，嘗語人曰：吾於《論語》節用而愛人，使民以時一句，終身行之，尚不能到，即是嘗力行矣。楊應之學士，聞一善言，必書而記，即是知無不為矣。賈內翰黯以狀元及第，自言得於文正者不欺二字，平生用之不盡，即是未嘗欺矣。劉大諫安世，以敢言得名，自言得於溫公者至誠二字，平生行之，未嘗少離，即是無不誠矣。若使人人皆如諸君，則積一成億，夫復何難？

贊曰：

郭公善善，國何以亡。見善雖喜，用心不剛。悠悠害道，反昧否臧。是以君子，志於自強。惟日不足，汲汲皇皇。

自罪引他。

傳曰：按經所說，一切世間，生死相續。臨命終時，未捨煖觸以前，一生善惡，俱時頓現。大抵臨終所現境界，即吾平日心地境界。地藏罪珠，

即吾之心珠。閻王業鑑，即吾之心鑑。且今作一不善，曷嘗不往來常在胸次乎？不聞趙普一聞道士牌末火字之言，自知必是秦王庭美。王韶一聞刀十八丈打過賢心下得否之語，遽至發背而卒。然則自罪引他，

是有益乎？昔趙業以明經中選，授巴州清化令。忽精神遊蕩，奄然如夢，被逮入冥。初至，即見妹婿賈奕在彼，心已大怖。蓋嘗與奕同殺一牛，至是為奕所引。欲與分罪，奕詞甚辯，無以自明。俄見一鑑，徑可丈餘，懸於空中。明見奕鼓刀業負門，有不忍之色。奕始伏，業遂得還。

又有常氏美娘者，其夫楚椿卿有一妾，姓馬氏，名春奴。椿卿愛之。常氏不勝其忿，乘椿卿出，以大杖捶殺之。及椿卿死，常氏改嫁程選。將產，凡三日，子不能下。方委頓間，恍見馬氏在前，常氏惶懼，好語告曰：我當初實無意殺汝，時行杖者稍過，遂盡汝命，曷不少寬我耶。馬氏曰：我死實主母意，胡可妄引他

人？持之愈急，竟至不起。然則自罪引他，竟可免乎？既知有罪，曷若勿為乎？

贊曰：

孽惟自作，感本自貽。痛加悔艾，庶或可追。不思己過，反累人為。縱脫罪罟，上天難欺。分謗受惡，遷善之基。

壅塞方術。

傳曰：所謂方術，但凡挾術以求售者，皆是也。一語沮遏，使不得售，即壅塞也。灌口白沙村，有一泰山廟極靈，齋祭殆無虛日。一日，有醫卜數輩同遊，道逢一人極貧，衆頗輕之。其人忿然投身江中，俄頃抱出一龍，謂衆人曰：汝輩各以醫卜，救人疾急，皆是近道。此後於貧素之士，切不得輒持二心。嗚呼，醫卜為術，而神人謂之近道，可壅塞乎？又不聞雲安女龍之言乎？昔翟乾祐在世時，專以考召著名。每念雲安一邑，而江流之險，乃有一十五處。一日作法，召其灘神，俾悉平之。是

夕，應召而至者，一十四灘。獨有一灘，召不能至。天師大怒，必欲召之。既至，乃一女人，峨冠大袖，慨然進辭曰：天師稟天行化，妾一水神，何敢抗拒？第有未安，不容不稟。觀君之意，不過欲便舟楫。而不知從事舟楫者，日常倍利，縱有少費，不足為損。洽江小民三四百家，無田可耕，無桑可織，全仰為人挽負以資其生。今若盡平灘險，在舟楫固甚便，在彼小民其於衣食為如何？太上之意，必不如此。深恐異時獲罪，不免負累，更宜裁之。天師嘆曰：汝之所慮，非吾所及。於是復命十四灘之神，令各復其險。是夕，風雨哮吼，雷霆震擊。明日視之，一十五灘驚波濤，宛然如故。以此觀之，非獨方術不可壅塞，但凡服力以糊口者，亦皆不可壅塞也。昔范文正公在浙西時，兩浙饑，殍殮相枕。公以吳俗喜佛事，因召諸寺主僧，諭以穀貴工賤，責令處處修造。官亦大興工役，倉廩吏舍之類，亦皆

葺之。由是工技服力之徒，日糊口於公私者，無慮千數。一方賴之，不至轉徙。公之意，豈亦雲安神龍之意乎？

贊曰：小道可觀，第恐其泥。君子之學，亦必游藝。所謂方術，聖人不廢。醫卜星曆，皆以濟世。我獨壅之，難乎免戾。

### 訕謗賢聖。

傳曰：賢聖有三，在佛家言之，三乘中人是也；在道家言之，五種仙是也；在吾儒言之，孔孟諸君是也。立教雖各不同，心地法門則皆一也。不聞《頗邪論》所謂：孔子是儒童菩薩，顏子是光淨菩薩，老子是摩訶迦葉之說乎？嗚呼，賢聖遠矣，但毀其書，即訕謗之也。然佛家一書，多有毀者，何哉？不過以其談空而言之也。惜其不知如來性如虛空，虛空性是如來，具足真淨明，妙虛徹靈通，而住持真淨明，妙虛徹靈通者，如來也。終日真淨明，妙虛徹靈通，

而未嘗真淨明，妙虛徹靈通者，凡夫也。儻能於諸所有，一切空却，必使赤灑灑、露裸裸，淨如虛空，然後真淨明，妙虛徹靈通，了然却現，上與如來，一體無二。孰謂為不然乎？不聞龐老但欲空諸所有，不欲實諸所無之說乎？龐老前身，是維摩居士。維摩前身，是金粟如來。其為此言，必非欺誑。然於此有悟有不悟者，特其根器，人各不同也。昔杜祁公不信佛法，每對客輒嘲笑，張文定以為佞佛。醫人有朱其姓者，出入於二公之門，嘗欲方便，勸導祁公，久而未獲。一日，公病召朱。朱以讀《楞嚴》未了，不即往。既至，公大怒曰：《楞嚴》為何等書耶？吾但知有孔孟而已。朱出袖中首軸呈之。公覽訖，畢索餘軸，不覺遽盡十卷，乃大嘆曰：果奇書也。因拉朱醫同謁文定，責其不早以告。文定笑曰：譬如失物，既已得之，不必詰其得之之晚。公自此即若有得，大加深信。又有徐鉉者，亦名士也，未



嘗知有佛書。中主以一帙《楞嚴》授之曰：久看，當見精理。旬餘，復表上曰：臣讀之數過，如一器中傾，入一器中，此絕難曉。中主哂之。嗚呼，祁公一覽，而遽盡十卷；徐鉉踰旬，而不曉一字，非根器乎？

贊曰：人亦有言，護疾諱醫。聖賢立論，切中百非。既不能行，乃肆詆譏。陳賈議旦，叔孫毀尼。言出童叟，奚其弗思。

### 侵凌道德。

傳曰：按經所說，昔者善財童子，為修菩薩行，勤求一切菩薩法，徧參五十三位大善知識，然後得證菩提。善知識者，是大導師。一語之下，能令漆桶底脫。其為益也，豈為小哉。所謂道德，即其人也，非獨釋老為然。自古知名之士，亦未嘗有不因大善知識，有以磨發激勵，然後光華烜赫，名聞千古。如子房之於黃石翁，武侯之於龐德翁，李藥師之於虬鬚翁，顏魯公之於張志和，李太白之

於賀知章，杜少陵之於司馬子微是也。然則道德於人，為無益乎？可侵凌乎？昔尹公師魯謫官大梁，與老衲法眼禪師遊。一日，謂法眼曰：某邇來頗以退靜為得。法眼曰：盍若退靜兩忘，公即有省，死生之際，了然不亂。節度判官朱炎，久讀海眼，未知趣入。一日，問講僧義江曰：此身死後，此心何在？江曰：此身未死，此心何在？炎即豁然，遂能盡通一經之旨。侍郎曾開久慕禪悅，未有所契。一日，謁圓悟，咨決其事。圓悟捻出雲門趙州須彌山放下，著兩則公案示之，曾即豁然，平生疑情，至此始釋。歐陽文忠不信佛老，及守亳社，聞後唐山隱者許昌齡有道，延入郡齋，日與之語，每有所得，自以為喜。然則道德於人，為無益乎？

贊曰：道尊德貴，萬類所宗。惟忌與怠，有慊于中。外示凌轢，蓋其凡庸。以僭則逆，以傲則凶。宇宙雖廣，遏惜

厥躬。

太上感應篇卷之十一

## 太上感應篇卷之十二

李昌齡傳 鄭清之贊

射飛。

傳曰：太上曰：混沌既分，天地乃位，清氣為天，濁氣為地，陽精為日，陰精為月，日月之精為星辰，和氣為人，傍氣為獸，薄氣為禽，繁氣為蟲。種類相因，會合生育，隨其業報，各有因緣。然則人之與飛，有以異乎？《肇論》所謂：天地與我同根，萬物與我一體，非誑語也。然飛之所以與人異者，特福業不同，軀殼異耳。竊嘗攷之載籍，誠有自人而淪入其中者，亦有自仙而遊戲其中者。劉安民本一富家，以好尚虛名而道無實，至死後乃為鳳凰，經六十年，復得為人。於此生中，勤苦修道，始得尸解，今在清華宮中。黃安世本一儒士，以志慕飛騰而心不精至，死後乃為飛鴻，經九十年，復得為人，於此生中，精進修行，始得上昇，今

在皇曾快樂天，非自人而淪入飛中者乎？遼東華表柱，嘗有一鶴飛集其上。人欲射之，鶴語人曰：有鳥有鳥丁令威，去家千載今來歸。城郭雖是人民非，何不學仙塚纍纍。唐明皇在沙苑，嘗射一鶴。既中，又復矯翅，直向西南飛去。及次年，幸蜀於明月觀，乃見箭在壁間。問箭所自，道衆曰：去載重陽日，青城道士徐佐卿帶此而來，留之而去。始知其鶴，乃佐卿也。非神仙遊戲其中者乎？

贊曰：大道之世，人無殺機。烏鵲之巢，可俯而窺。機心一萌，鷗鳥高飛。鶻且有義，鴉亦稱慈。人胡不仁，以弋為嬉。

逐走。

傳曰：上已略陳太上之言，今當以佛語為證。佛言：一切衆生，實本清淨。因彼妄見，妄習遂生。因彼妄習，生死相續。生從順習，死從變流。純想即飛，必生天上。情想均

等，不飛不墜，復生人中。想明斯聰，情幽斯鈍，情多想少，流入橫生，重為毛羣，輕為羽族。大抵七趣輪回，未入正修，有所不免。今為異類，未必不前身曾受人身；今受人身，未必不前身曾為異類。是以諸佛菩薩、大道至真，常切教人，使知生死路頭，最為可畏。不聞密婆私詫阿羅漢於往昔世曾作獼猴，驕梵波提於往昔世曾受牛身乎？又不聞夫周詢、蔡君謨皆蛇精乎？按東齋記，周詢知安州，一日，遊園中，園吏見一大蛇垂首欄上。視之，乃周詢假寐。君謨知福州，以疾不視事。每夕，輒夢遊鼓角樓上，憑鼓而睡時，通判責鼓角將不打三更，對以有大蛇據鼓，不得近。君謨既愈，與通判說病中所夢，正與鼓角相同。然則七趣輪回，未入正修，是可免乎？當知今之逐走者，異日未必不為走者所逐。欲免輪回，不為人逐，當見逐時，要當力行救之。昔者，河間王久病無生意。忽一道者，自稱玄俗，

詣門請醫。既而，餌以刀圭，王即吐出十數小蛇，病亦隨愈。王驚問故，玄俗曰：此王六世餘殃所致，吾非人也。為王於往世中，救一母鹿，其鹿乃麟母，仁感天地，是以上帝遣吾下降，為王救療。然則見逐，可不救乎？李嬰、李洎，嘗逐一鹿，解其四脚，掛于樹枝。先取雜臟為炙，將共食之。俄有一巨人，長可三丈，持一巨囊，鼓步而進，嬰、洎幾為所及。既而，畢取其炙，納之囊中，入山而去。須臾，嬰、洎皆暴卒。然則見走，是可逐乎？

贊曰：后稷之棄，牛羊弗踐。猩猩人言，猿性柔善。有生有知，其則不遠。忍充鼎載，甘其肥雉。虎兕可逃，人甯難免。

發蟄。

傳曰：《月令》曰：仲秋之月，雷始收聲，蟄蟲壞戶。季秋之月，蟄蟲咸俯在內，皆瑾其戶。仲春之月，雷乃發聲，啓戶始出。蟄者，藏也。壞

者，益也。益者，益小其戶也。挂者，塗也，盡塗其戶也。一蟄一啓，皆與氣候相應，以成變化。然則蟄者，是可發乎？是以太上書以戒人，諸佛尤切加護。昔僧惠覺，嘗跨溪造一曼殊室利堂，將板築於水際，念言：方冬，百蟲皆蟄，不可輕傷其生。於是就溪設三晝夜道場，誓言板築之日，一足多足，乃至無足，願垂加護，悉令遠離。及期，掘地及泉，乃至橋成，不見一蟻。又有宋時老者，嘗以父病，禱於永祚寺藥師殿前。既而疾愈，備具香信，欲就殿建一道場，以答靈貺。寺僧義昭曰：此殿藥師座下，有一聚蜂，積年既久，種類頗多，今正蟄時，恐至驚擾，或多傷殺，曷若移就別殿。時老不聽，僧乃預期禱於佛前曰：設齋之日，願運神力慈悲，覆護在窠內者，暫食舊蜜，無得出戶。在窠外者，且令安住，無得輒驚。及期，燈燭騰光，鏡螺聒耳，一晝二夜，不見一蜂。嗚呼，此雖二人願力，實亦諸聖加護

之力也。孰謂為不然乎？贊曰：盛德之主，澤及昆蟲。板築必時，閉藏在冬。人且塞向，壞戶則同。跂行喙息，生意畢通。養痾伸屈，在吾仁中。

驚棲。

傳曰：太上戒人無得驚棲，與孔子弋不射宿之說，意皆一也。大抵鳥之已棲，亦猶人之已寐，忽然有驚，豈不舉家驚擾。衆人視之固有間，普心不二者視之，則猶己也。昔螺髻仙，行第四禪出入息，坐一樹下，兀然不動。鳥謂之木，棲其髻中，遂生數卵。螺髻禪覺，知頂有卵，即自思曰：我若便起，不免鳥驚，鳥若不至，卵必盡壞。於是復入禪定，俟其雛生，一一飛去，然後乃起。又有大樹仙者，居旻伽河側，棲神入定，積年之久，形如槁木。遊禽棲集，遺尼拘律，果於其肩上，暑往寒來，垂蔭合拱。一夕，忽從定起，欲去其樹，又恐鳥驚，於是安忍方便移之，移訖

乃起。天美其德，賜號大樹。此皆已證果位也。其於一物一命，普心如是，况福力淺薄者乎？惜人不知李奚子、陳安世，皆以不敢驚棲而能證果。李奚子本一山嫗，每遇大雪，鳥無安枝，往往飛集其家，遂留不去。嫗濟以穀，且不敢驚。上帝謂有仁心，賜令度世，今在鄆都，位貌特重。陳安世，本權叔本家一傭力人，平生不踐生蟲，不殺物命。每出入，見飛禽當道，必下道引避，不欲驚之，亦以此故，遂得上升。當知登真之人，未有不因慈心於物，而能得到其地。

贊曰：凡厥有生，各安汝止。夜以安身，人物等耳。聖人之憂，一物失理。弋不射宿，魯論所紀。驚棲雖微，害人矣。

填穴。  
傳曰：自人觀之，固一穴也。自彼觀之，為一穴乎？莫不自視為金房玉室、邃館瓊臺。不聞于焚宅南、大

槐樹下，有一聚蟻自國其穴，為大槐安乎？又不聞王沂宅後，有一大檀樹蘿覆其上，下有聚蟻自國其穴，為大檀蘿乎？蟻之自國其穴為槐安，為檀蘿，亦猶鰕之自國其穴為長鬢，燕之自國其穴為烏衣，各尊其居，物物莫不皆爾，無足深恠。然則穴可填乎？若填其穴，即是屯塞其門，絕其出路，豈不覆族盡死穴中乎？按經所說者，有比丘得六神通，與一沙彌同處林野。比丘定中，見其沙彌七日當死，因作方便善言，諭曰：父母思汝，汝可暫歸，八日却來。沙彌既歸，八日果來。比丘恠之，復入三昧，觀察其事，乃知沙彌於歸路中，一蟻穴流水將入，急脫袈裟，聚土壅水，令不得入。以此因緣，延壽一紀。宋郊、宋祁，兄弟同行，逢一異僧，相曰：小宋當大魁天下，大宋亦不失甲第。後十年，大宋復遇諸途，僧乃大驚曰：公豐神特異，如能活數萬命者有之乎？大宋曰：某素貧，安得有此？僧曰：姑思之。大

宋良久曰：比堂下有蟻穴，忽為暴水所浸。某急編竹橋以度，豈此是耶？僧曰：必是也。小宋今歲當首魁公，終不出其下。比唱第，小宋果大魁，章獻太后乃謂弟不可以先兄，因命大宋為第一，小宋為第十。然則穴可填乎？

覆巢。

傳曰：按太上《保嗣章》，但凡嗣續哀絕，皆是往世覆巢毀卵、焚山竭澤、墮胎落子，犯一千六百二十條章之人，然則巢可覆乎？大抵衆生，若大若小，莫不各有其所依止。其中敷乳產生，各自藏護。今覆其巢，即是奪其依止之所，產生莫遂，不絕嗣乎？謹按《本草》，人有覆鶴巢取其雛者，是年六十里內，連月不雨。蓋鶴能群飛激雲，雲散則不雨。又按

內攫，鷓雛纔破殼，即出巢外。其母防其顛墜，或為日曬，必取帶葉樹枝，周插巢畔，日常兩換。葉萎則其雛已去，未萎則其雛尚在。人因覆巢，畢取其雛。孰謂巢居者為無知乎？請為更陳一二，庶皆知戒。昔溫璋尹京兆，置鈴索於廳前，使冤訴得以速達。一日獨坐，屢聞鈴聲，跡之無人，但有一鷓飛集其上。璋曰：必有覆其巢，而取其雛者。既而果得其人，因為杖之。元汝之元豐中，為魯山宰。忽有鶴雀銜一草衣，墜于庭下，立命物色。果煎肉者，脫此草衣上樹，將覆其巢，取雛供賣。元亦校之。然則巢可覆乎？當覆巢之時，安知不悲鳴求救乎？第人莫曉其語，烏得九天禽語，書而使之觀乎？白龜年於嵩山東巖下，遇李太白曰：吾與汝父樂天皆已仙矣。因出一軸素書授之曰：讀此，可辯九天禽語、九地獸言。更修功行，仙亦可冀。龜年如戒，果得其效。一日過路州，太守知其如此，延與之坐，適有二雀啾唧過庭。守曰：彼何言哉？龜年曰：彼言城西民家，廩有餘粟可共就食，驗之果然。良久，厩馬仰首

而斯。守曰：彼何言哉？龜年曰：槽中料熱不可食。問之亦然。

贊曰：

昔聞羽族，巢必近人。欲遠蛇鷓，惟人是親。詎知冠履，心甚不仁。既肉其雛，厥巢是薪。鳳凰高翔，臯獍來馴。

傷胎。

傳曰：胎生一類，按如佛說，雜染輪回，欲顛倒故。和合滋成，橫豎亂想，故有胎過蒲曇，人畜龍仙，其類充塞。嗚呼，人畜龍仙，明是不同，佛乃列為一類，何哉？蓋雜染同而輪回亦同故也。人知愛胎，彼不愛乎？按仙傳，白龜年因入仙洞，得一軸素書，遂能辯九天禽語、九地獸言。一日過潞州，太守知其能，延與之坐。適將吏驅三十羊過庭下，中有一羊，鞭不肯行，又且悲鳴。守曰：羊有說乎？龜年曰：羊言腹有羔，將產；俟產訖，甘就死。守乃留羊，不殺驗之。既而，果生二羔。劉道原為蓬溪令，既解官，宿秦氏家，

夢一婦人泣訴曰：某乃秦氏妻也，夫有一妾，不肯相下，某怒痛捶，遂盡其命。為妾所訴陰君，處某已死，且以某為狼，謫罰為羊，見在秦氏欄中，明日將充君庖，某死固自分，但腹有羔，若因某受烹，業愈重矣。願賜一言，得免甚幸。黎明言之，則已烹矣。舉家大哭，納羔其腹，瘞之別墅。然則胎可傷乎？

贊曰：

鹿以麝繫，腸斷而死。鱔或就烹，屈身護子。物之牽愛，甚於愛己。人亦有娠，以續以嗣。胡不反思，舉斯加彼。

破卵。

傳曰：信相善薩白佛言：有諸衆生，無有子息，孤獨自居，何罪所致？佛言：是人前生為人暴惡，不信罪福，捕雛食卵，令諸飛禽各失其子，悲鳴叫裂，眼中血出，是以此報。佛語如是，而太上《保嗣章》言之，亦如是。然則卵可破乎？按《鞞婆沙論》，衆生流轉，至為卵生。識居其

中，為卵所纏，為卵所裹，須自啄破，雛乃得生。其為業也，從可知矣。又云：鶴、鴈、鴛鴦、孔雀、鸚鵡、鵠、鶻、千秋、金翅等鳥，或龍或人，皆卵生也。竊嘗不以為然，鳥固卵生，安有人而亦卵生也。及見耆尸、復鉢尸、徐偃王事，乃知人從卵生，誠亦有之。昔闔地佗有一商人，入海採寶，得二鵠鳥，一失一生，隨意所化，毛色可鸛。俄生二卵，卵破雛生，乃二童子，後皆出家，證阿羅漢，一名耆尸婆羅尊者，一名復鉢尸婆羅尊者。按《徐州地里誌》，昔徐君官人，娠而生卵，卵破兒生，長而仁智，襲君徐國。生時偃故，故名偃王。孰謂人無卵生者乎？支遁少時，嘗與其師難問物類。遁謂：物卵未生，不足為殺。師不能屈，取一鷄卵投之于地，殼破雛行，久而俱滅。蓋魂識也。遁乃感悟，終身蔬食。李道念好食雞卵，晚得奇疾。太守褚澄投以蘇汁，即時吐出一十三物，剖開皆雞羽翅爪距，悉具立能飛行。道

念大懼，自此不敢復食。然則卵可破乎？竊嘗論之，卵生之中，卵至多者，無若魚類。大則無慮數千，小則不減數百。若殺一魚，其為破卵，可勝言哉？李沖元將殺一鮎，先夢一皂衣嫗曰：妾腹中，有五千子。妾生，五千子亦生。妾死，五千子亦死。敢望哀憐，特貸一命。元遂放之。富商楊序宣和間，夢神告曰：子逾旬當死，若能救活億萬命，乃可獲免。序曰：大期已迫，物命有限，未易滿數。神曰：佛書有云：魚卵不經，鹽漬三年，尚可再活，曷不圖之？序於是大書神語於通衢壁間。由是，人皆知戒，見人殺魚，即從取卵，投之江中。如是月餘，復夢神曰：億萬之數，已是過滿，壽可延矣。既而果然。大抵我能救物命於臨危，則我命亦無不延於欲絕。贊曰：有生之形，其性則具。混沌曷死，以鑿之故。暴彼無知，豈曰公恕。元鳥生商，聖靈所寓。隱顯莫測，寧不

戒懼。

太上感應篇卷之十二

# 太上感應篇卷之十三

李昌齡傳 鄭清之贊

願人有失。

傳曰：《涅槃經》云：諸修心人，要當以六法平等智力，攝制自心，必使於運用時，一切平等。云何為六？一者如響平等智力，二者如鏡像平等智力，三者如幻平等智力，四者清淨平等智力，五者世法平等智力，六者集因緣平等智力。大抵具如是之智，便當有如是之力。世間萬法，豈不如響、如像、如幻乎？如是了知，豈不為智？豈不清淨所集，因緣亦復平等乎？當知願人有失，特其未到此地耳。博州鼓角樓，每至三更，即有一鬼掩鼓不能擊，直更者屢受杖，不能制。聞齋禪師有道行，因往問之。師曰：何不捉住？兵曰：鬼何可捉？師曰：但禁氣勿言，即可捉也。兵如戒，果能捉之。鬼曰：吾於此邦，所畏者，惟齋禪師、黃二

叔二人而已。太守已下，皆無所畏，更何有於汝哉。既而，訪尋黃二叔，乃一老圃，三十年以鬻菜為業，初無他長，惟是菜之老嫩，束之大小，價之高低，持心不二而已。嗚呼，持心不二，而遂為鬼神敬畏，當知持心有二者，必為鬼神戲侮也。不聞余副使之事乎？李士衡奉使高麗，武人余英為之副。凡高麗所得禮幣，及諸贈遺，士衡皆不關意，一切委之副使。副使慮過海船漏，盡以士衡之物藉船底，獨以己物置其上。無何，果遇大風，船幾傾覆。舟人請減所載，倉忙間不暇揀擇，信手捻出，棄之中流。少頃風定，試自點檢，則所棄皆副使之物。士衡之物，宛然獨在，無一失者。反受如此，安知非海神戲侮而至然乎？

贊曰：民不堯舜，伊尹自咎。獨為君子，伯玉所否。欲並生哉，無負高厚。維彼厲人，挽衆同醜。是誠何心，不愧飛走。

毀人成功。

傳曰：佛告首迦長者曰：善業有十，能令衆生得大威德。一者於諸衆生，無嫉妬心；二者見他得利，生歡喜心；三者見他失利，起憐憫心；四者於他名利，生欣悅心；五者見失名譽，助懷憂惱；六者發菩提心，造佛形像，奉施寶蓋；七者於己父母，及賢聖所，恭敬奉事；八者勸人棄捨少威德業；九者勸人修行大威德事；十者見無威德人，不生輕賤。離垢菩薩曰：忘懷於衆，從善如流，對治除嫉妬之心，感果得大賢眷屬。大抵於人，無所妬毀，在我必增威德，在彼不無感悅。異日因緣會遇，不為大善知識，必為大善眷屬。孰謂為不然乎？澶淵之役，契丹受盟而歸，萊公每有自多之色，上亦頗以為得。冀公忌之，譖于上曰：澶淵之役，寇準以陛下為投瓊與虜博耳。苟非勝虜，必為虜勝，非為陛下劃久長計，此即春秋城下之盟，諸侯猶且耻之，陛下以為功乎？

危人自安。

上由是大沮。待準寢疏廣州之役時，轉運王罕以按部至海州，郡守冲簡以蠟圓告急。罕進至惠州，廣民又躍馬求救。罕下令，每村使三大戶，各募壯丁二百人。又帖所屬每縣，各募弓兵二十人，又親募驍勇者二十人以自衛。既而，得暴掠者十餘人，皆腰斬以徇。洎至廣州，子死賊手，亦不哭。自此，南門不閉，糧運得通，賊乃引去。時提刑鮑軻駐軍潮州，乃日遞一奏，言罕畏怯不戰。而諫官李兌從而為助，罕由是降一官，謫監信州商稅，軻獨受賞。嗚呼，萊公之功，可謂大矣；王罕之功，亦不小矣。冀公李兌一言，遂至如是。若二公者，為善業乎？知對治乎？當知異日感果，必無大威德業，亦無大賢眷屬也。

贊曰：

三后協心，治臻成康。蕭規曹隨，漢基遂昌。李訓忌注，甘露禍唐。事不已出，乃肆講張。敗國多矣，已寧不傷。

傳曰：須菩提白佛言：世尊，善男子、善女人，發阿耨多羅三藐三菩提心，云何應住，云何降伏其心。佛言：善哉，善哉，善男子、善女人，發阿耨多羅三藐三菩提心，應如是住，如是降伏其心。須菩提一聞此言，早已默笑曰：唯所謂如是，果何義哉？大抵我欲降伏，便可降伏，如是而已。夫復何為彼危人自安者，能曉此乎？惜其不知一大藏教，與今篇中所說，只是論箇心字。今也乃欲置人於危，求己之安，為降伏乎？人果危而已果安乎？多見得罪於天，禍將自及也。昔王文正公旦與王冀公欽若，同在政府。一日，上出喜雨詩以示二府。文正袖歸語同列，上詩有一字誤寫，須進入否？冀公曰：此亦無害。既而，密以奏，上大怒，明日厲聲責文正曰：昨朕詩中有一字誤處，何不奏來？文正以下，皆再拜謝，獨馬知節不拜，具以實奏，且盛稱王曰：不辯真宰相也。

蘇文忠在杭州，上欲用之。王禹玉曰：軾詩中，曾有惟有蟄龍知之句。陛下龍飛在天而不敬，反求蟄龍知乎？上曰：自古稱龍者多矣，如荀氏八龍，孔明卧龍，豈乃人君方言龍哉。既退，章子厚責禹玉曰：相公豈欲覆蘇公之族乎？禹玉曰：此舒亶之言也。子厚曰：舒亶唾，可食乎？嗚呼，此皆危人太甚者也。曷非聖上明察，二公受禍，其有輕乎？諒於如是之說，尤不曉也。

贊曰：坎以習教，蠱以振民。蹇以正邦，屯以經綸。君子居險，志則為人。天助者順，其道大伸。王衍三窟，祇以殺身。

減人自益。

傳曰：人生十年，尚有童氣。二十弱冠，或可望成。使有前程，自當奮發。若無其福，不免蹉跎。既而妻子累心，家計在念。或處官，而官事擾擾；或營利，而市道區區。不覺不知，大期遽至，空身赤手，無一自



隨，正令氣焰炙天，亦所不免。不聞本淨禪師之言乎？侍郎楊晉卿問本淨曰：此身生時，從何處來？死後歸何處去？師曰：如人夢時，從何而來？睡覺時，從何而去？曰：究竟如何？曰：夢時不可言無，覺時不可言有。雖有有無，而無往來之所。貧道此身，亦復如是。因說偈曰：視生如在夢，夢裏實是鬧。忽覺萬事休，還同夢時悟。智者會悟夢，迷人信夢鬧。會夢如兩般，一悟別無悟。富貴與貧賤，亦復無別路。師之此言，可謂盡矣。世間萬法，無一非夢。郭從義鎮河陽，於洛中造一大第，凡千餘間，皆以香栢為之，乃至以文梓為梁，花石發地，穿池引水，築山種果，周設碾磴，廐庫亭閣，無不備具。第成，約費白金五千錠。次年，被召還都，暮抵其第。秉燭周覽，尚未及徧，時朝會有期，不容久駐。飯罷少憩，侵星而出，既朝復歸，行至東都乃卒，不復再至。家人不能居，獻之于官，官以賜涪王。涪扶

鳩王徙，房陵遂為閑館。陳恭公於潤州，治一大第，亦極閎壯，軒亭池館，綿亘數百餘步。第成，公已疾，但得肩輿一登西樓而已，繼亦遂卒。人因名其第為三不得曰：居不得，修不得，賣不得。云：回視卜築之日，非一夢耶。於此益知減人自益，適足自減。不聞太上所謂：或損之而益，或益之而損之說乎？

贊曰：

益下損上，民悅無疆。薄人厚己，理不可常。六爻無咎，謙尊而光。盈虛消息，相為抑揚。求自益者，鮮不覆亡。

以惡易好。

傳曰：我之此身，耳聞眼見，身覺意知，明明是有。按如佛說，地水火風，四緣假合，妄有六根。四大若離，我此妄身，當在何處？我之此心，作善作惡，見於日用，明明是有。按如佛說，四大六根，中外合成，妄有緣氣，於中積聚。似有緣相，假名為心。既知此理，離幻求覺。按如

佛說，依幻說覺，亦名為幻。若說有覺，猶未離幻。說無覺者，亦復如是。然則我身、我心，及求覺者，皆名為幻。況彼外物，何者非幻？而於其中，妄分好惡乎？毗舍浮曰：假借四大以為身，心本無生因境有。前境若無心亦無，罪福如幻起亦滅。四祖曰：境緣無好醜，好醜起于心。心若不強名，妄情何從起。黑梵志嘗運神力，以兩手掌各擎一株合勸梧桐花，供養於佛。佛言放下，著梵志放下左手一株。又言放下，著梵志又放下右手一株。又言放下，著梵志曰：世尊，我祇擎兩株花，一時放下了，我今空身而住，更教我放下箇什麼？佛言：我非教汝放捨其花，只教汝放下外六塵、內六根、中六識。若能於此三者，一切放捨，無放捨處，即是汝免生死處。梵志當下豁然，得大解脫。唐德宗時，吳元卿為六官使。時洛陽花卉盛開，元卿頗生愛著。忽空中有聲曰：虛幻之相，開謝不停。能壞善根，仁者安

用嗜之？元卿豁然，亦得解脫。是以王文正不好金玉帶，呂文穆不好能照二百里鏡，蓋曉此也。以惡易好者，何足以此而告之哉。縱於佛書，卒未有悟，曷不以吾儒己所不欲，勿施於人之言，而自悟乎？王旦爲相，有以玉帶因其弟爲獻曰：此帶絕好。公曰：身自負重，使人道好，好不亦勞乎？故平生所繫，止於賜帶。呂文靖爲相，有因其婿以古鑑求售曰：此鑑能照二百里外。公曰：吾面不過楮子大，何用照二百里？

贊曰：

子路敝緼，不羨狐貉。幻銅爲金，呂仙耻學。素乎貧賤，君子所樂。紫色奪朱，鄭聲亂樂。穿窬之智，曾不俯作。

以私廢公。

傳曰：國爾忘家，主爾忘身，公爾忘私，臣之分也。其可以私而廢公乎？苟或以私廢公，不免以是爲非，以賢爲否，敗亂國事，莫此爲速。是以君子不敢爲也。趙康靖公槩，初與歐陽文忠脩，同在館閣。槩重厚寡言，脩頗輕之。及脩以其甥穢事

連逮，上怒獄急，二府皆欲文致其罪，羣臣莫敢言。槩獨慨然上疏曰：歐陽脩以文學爲近，臣不可以閨房曖昧事輕加污讟。臣與脩蹤跡素疏，脩之待臣亦薄。所惜者，朝廷大體耳。或謂槩曰：公不與歐陽公有隙乎？公曰：以私廢公，槩所不取，何敢爲乎？至和中，趙抃爲御史，范公鎮爲諫官，以論陳恭公事有隙。熙寧中，王介甫執政，恨景仁數訐之于上前，欲因事中之。一日，上問景仁於介甫。介甫曰：請問趙抃，便可知其爲人。及問趙抃，則曰：忠臣也。上曰：卿何以知其爲忠？曰：嘉祐中，仁宗違豫，鎮首請立皇嗣，以安社稷，非忠臣乎？既退，介甫切責曰：公不與之有隙乎？抃曰：何敢以私廢公，某所以直言不隱者，先國家而後私讎也。若二公者，真可謂公爾忘私者也。

贊曰：

公以理勝，私以利言。利慾一啓，天理泯然。流靡之極，盜賊相挺。起

於有己，反側陂偏。託公濟私，抑又甚焉。

太上感應篇卷之十三

# 太上感應篇卷之十四

李昌齡傳 鄭清之贊

竊人之能。

傳曰：碧陵迦婆蹉過河，忽聞蓮香河神責之曰：尊者為阿羅漢，何故偷我香？蹉曰：香自至鼻，何名為偷。竊嘗三復斯言，大有深旨。大抵香塵自如，以我鼻根，起諸顛識，分別曰香。按如佛法，即名為偷。當知竊人之能，以為己能，真為偷也。昔高齡晚而祭酒，道氣不交，靈助無主。是以羣邪纏互，急行其禍。保命真君謂許長史曰：高齡之無德也久矣，鬼訟之紛錯也積矣。又嘗鑿敗古人碑銘，以為己文。水官譴其蔽善以自操，陰賊於鬼神，特列于訟事之首以告，其罪必不免矣。未幾果卒。然則他人之能，是可竊乎？不聞石曼卿之事乎？曼卿死後數年，夢其友關詠曰：吾平生作詩多矣，自以陽平代意一篇，詞意深

美，最為得意。然世人空有稱之，能令此詩盛傳於世，在永言耳，詠覺頭為增演其詞隱度人、迷仙引，使人歌之。他日復夢，曼卿來謝。嗚呼，詩不得彰，尚以為請，况竊一以為己能者乎？

贊曰：見賢思齊，見聖克由。萬善備足，在人反求。思不如舜，以為己憂。安有羊質，傳以貔貅。欺人自欺，亦孔之羞。

蔽人之善。

傳曰：自古以來，技而知名後世者，未有不因於人，如滕王元嬰之工蛟蝶，公孫大娘之舞劍，曹剛之琵琶，米嘉榮之歌。但以主建官詞，及唐賢詩句，偶及之耳。所謂善者，但凡稍有所長，皆為善也。使不得彰，即蔽之也。不聞許君晉公之事乎？昔許真君在世日，嘗修一觀，欲記其事，偶得一片古碑，文已磨滅，因刻去舊文，勒其新記。自是，即恍惚不安。一日，徐步庭際，忽聞空中有聲

曰：許君，許君，速詣水官求救。不然，恐有不測之釁。許愕然，炷香虔祝，願聞求救之由。良久，復聞曰：所刻舊碑，雖已磨滅，而當時作文之人，見詣水官，訴君奪彼之名，顯君之名。由是水官將有執對之命，宜早圖之。許君於是訪尋舊文，別為立石刻之。是夕，復夢一神謝曰：蒙君再顯吾名，無以相報，請作水陸大醮，普告萬靈，庶得三官舉名，可以證道。許君如戒修之，後果得道。

贊曰：

蔡州既平，憲宗命道士至境，設醮於紫極宮。官本吳少誠生祠，裴晉公廢以為官。設醮之日，霹靂大震。韓公所作平淮西碑，其石本少誠德政舊碑。是日，流汗成泥。旬餘，即有中使至，磨去韓公平淮之作，復刻少誠德政之文。蓋上於夢中，了有所見也。嗚呼，文字尚爾，况其善又甚於文字者乎？

蔽賢之罪，是謂不祥。原其初心，忌人所長。玉在木潤，珠生夜光。物

有良貴，猶難掩藏。嫉能壅善，欲蓋而章。

### 形人之醜。

傳曰：醜也者，乃妍醜之醜也。形也者，形容之形也。如聶崇儀之好嘲，章齊一之善謗是也。崇儀能詩好嘲，雖僚友亦所不問，竟坐謗政，竄死登州，橐葬道傍，無不罵者。章齊一能詩好嘲，人有醜行，必形于詩，由是盛傳，不復可掩。其間不無溢惡，甚至破人婚姻，隔人眷屬。竟以此故，晚得惡疾，嚼舌而卒。然則人之有醜，是可形乎？惜其不聞黃坑之事，聞必戒也。武弁有段邁者，嘗過黃坑。從者於馬前，拾取數斤髑髏。中有一片，其上隱隱有逃走奴字，蓋黥蹤入骨也。是夕，從者即夢一人，以手障面，從而索骨，且曰：我羞甚，切急為我深藏，無令人見，我當有以報君。從者驚覺，立為瘞之。他日再過黃坑，復夢前索骨者告曰：曷感君恩，去此數步，地下大有伏藏，聊以為謝。如戒掘之，果

獲財至十餘萬。然則形人之醜，安知異日，亦無其報戒哉。

### 贊曰：

美如昭君，圖畫故錯。矧茲利口，過於丹腹。所謂形容，巧於描摸。衆既喧播，終難洗濯。以我片言，陷人大惡。

### 訐人之私。

傳曰：訐也者，不但形容，直訐之也，如呂吉甫輩是也。曾子宣之為司農卿也，呂吉甫代之，遽乞令天下，言司農未盡、未便等事。張粹明之為司農卿也，舒亶代之，盡納丞簿，言司農不了事件。周師厚為湖北提舉，有供給酒數十瓶，託監鹽張商英賣之。商英以告察訪蒲宗孟，宗孟劾奏其事，師厚坐此降官。張商英為館職，囑舉子於判監舒亶。亶繳奏其簡，商英亦坐此奪官。夫豈不知子貢所謂惡訐為直之說乎？厚德之士，其肯然乎？韓魏公琦為相，每見文字有攻人隱惡處，必手自封記，不令人見。陳忠肅瓘在言路，

知無不言，然彈擊不以細，故未嘗及人之私。蘇丞相頌在杭州日，有要人以私事囑公，公不聽。其人後當言路，乃懷忿，極口詆公，或勸公上其曩日請託書札。公笑曰：訐人之私，吾豈為之？胡公宿知洞州。前

守滕公大興學校，費錢數千萬。未訖罷去，羣小斐然興謗，皆以滕公費錢不明。自通判以下，皆不肯書其簿。公於坐中折之曰：諸君佐滕，候幾時矣。假有不減，奚不早告，陰拱以觀。俟其去，乃書字之，豈美事乎？一坐大慚，乃書。為人至其於厚，涼薄其相距，便萬萬遠矣。

### 贊曰：

訐異於直，聖人惡之。謂其陰險，乘機抵讖。指天信誓，握手笑嬉。利害小及，反眼相持。匪兇匪虎，彼何人斯。

### 耗人貨財。

傳曰：耗人貨財，使之門戶彫零，子孫狼狽，為彼人者，其為罪也，豈為小哉？文奇之事，便可見也。文奇

以燒煉游于兩蜀諸貴之門，凡留意於爐火者，無不為其所欺。富商有李十五郎者，積貨累萬，惑奇之術，三年之間，掃地殆盡，為識者所笑，遂至自經。奇乃捨去，復於劍州僦一屋，於中煨藥。無何火發，延燒一坊，奇倉皇走避，迷入林中，遽為鷲獸所逐。既而，深入溪谷，復為鷲獸所隨。俄頃天明，已為捕者所獲。獄具斬于燒藥之所，以謝居民。然則他人貨財，是可耗乎？他人貨財不可耗，己之貨財，亦可耗乎？請為更舉一事，庶幾為子弟者皆知所戒。王祖德紹興乙丑，死于秦州。一日，其妻與其子暮坐堂中，恍見祖德從外歸，責曰：吾聞家中已議賣宅，宅乃祖業，安可輒以。又曰：吾平生所寶，黃筓、郭熙山水，李成寒枚，凡十軸。聞亦持出，令人議價。吾下世未幾，家不至貧，何至如是？吾思家甚切，無計可歸，幸值中元，得暫歸耳。若不速改，吾將禍汝。其妻大懼，不復議賣。以此觀之，他財我

財，皆不可耗。

贊曰：

女魅致貧，窮鬼疾富。為妖為孽，理不可究。人性至貴，族親黨友。亦獨何心，妬人所有。公劉好貨，惟民之厚。

離人骨肉。

傳曰：骨肉者，血屬也。此皆人之大倫，何可離間。不聞張嵩山之事乎？昔張孝基為同郡一富人婿。富人止有一子，偶有微過，家人共嫉，因逐出之。未幾，富人病，臨死盡以家財付孝基。後數年，孝基見富人子乞丐于路，因召問曰：能灌園乎？曰：如得就養，幸甚。既而有餘，復召問曰：能管庫乎？曰：得灌園已自幸，得管庫，尤厚幸也。於是使之管庫。久而，其子益馴謹，無復故態。孝基念言：彼實父子，我其可但利其財，使此一段美事因循蹉過乎？於是盡舉家財還之，時人莫不稱嘆，以為古所未有。孝基死後，其友數人因遊嵩山，道逢一貴

人，旌旗滿野，騶御聯翩，如守土大臣新上任狀。竊視專車者，乃孝基也。相與前揖，請問所以致此之由。孝基曰：即還財事也。語脉未終，忽已不見。噫嘻，為人婿而如孝基者，世間有幾人耶？他人處此，能如是耶？昔杭州有一士子，亦為富人婿。富人病且死，念其子方三歲，乃命其婿主其貲，作遺書付之曰：他日分財，以十之三與子，七與婿。及其子長成，乃訴于官。時張忠定為郡守，閱遺書，以酒酌地曰：汝之婦翁，真智人也。為其子幼，故作此計，使汝勤加撫育耳。苟或不然，其子不免死於汝手。乃命以七與子，以三與婿，二皆泣謝而去。嗚呼，以此婿而望嵩山，則嵩山脚踏實處，固已遠在天上，安得不為神仙？以此婿而求之他，則此婿一折而伏，尚為知義，豈不愈於狼戾不情，不足倚伏者乎？其望嵩山，尤天遠矣。

贊曰：

古有太宗，輯正昭穆。姬典之訓，亦

聯宗族。後世義聚，重其親睦。聖如周公，間于二叔。長舌諱言，慘彼螫毒。

太上感應篇卷之十四

太上感應篇卷之十五

李昌齡傳 鄭清之贊

侵人所愛。

傳曰：許真君在世日，嘗於南昌誅一蛇精。道侶願從者，無慮千數。真君止選素所知者三百人，與之偕行。既而，夜宿山下，又慮其修行無力，因向火取三百塊炭，變為三百美人，遣令試之。及明驗視，惟吳猛、施道一二人，衣無炭跡。餘二百九十八人，皆是與炭合者。當其合時，豈不人人視為一美婦人，安知特一塊炭乎？大抵皆慾習未斷，易至如是，況不知修行者乎？昔陶穀奉使江南，崖岸高古，風采凜然，雖燕談，未嘗啓齒。韓熙載謂所親曰：吾觀是人初非端士，其守可隳，當令諸公一笑。乃選名妓，得秦弱蘭者，衣以弊衣，使詐為驛子之女，旦暮擁篲，掃灑驛庭。弱蘭有絕色，陶為之動，遂失謹獨之戒，因作郵亭詞數闋，使

弱蘭歌之。後數日，李主大張燕，以巨鍾酌公，公嚴毅如初。於是出弱蘭，使歌所贈詞以侑之。穀乃大慚，竟至醉吐茵席。李主自此，待之薄矣。及歸，朝廷已知，不復任用。文潞公在蜀，頗多燕集，有飛語聞。適御史何聖從，名郊，謁告歸蜀，生因令密訪其事。郊將壓境，潞公為之濯。張少愚，名俞，白公曰：聖從之來，亦不足慮。前任漢州，適同郡會，有營妓善舞，聖從愛之。至問之姓，妓曰：妾姓楊。聖從曰：所謂楊臺柳也。俞即取其項帕，題詩其上曰：蜀國佳人號細腰，東臺御史惜妖嬈。從今喚作楊臺柳，舞盡春風萬萬條。因命其妓，作竹枝詩歌之。聖從為之大醉，此可以見其守也。公曰：姑密之。及聖從至，果自嚴重。潞公宴之，因迎其妓雜府妓中，使歌少愚之詩以侑之。聖從亦為之醉，既而喧傳，遂達聖聽。及歸，不復引見。潞公之謗，由是遂息。嗚呼，陶穀固無所守，聖從素稱

方直，奚亦爾耶。大抵形之于言，即是已動于中矣。豈非慾習未斷，妄認幻軀，自生愛見而然耶。

贊曰：

人之愛己，甚於璠璣。人之愛子，亦如予乎。推其所愛，他莫不如。奚獨殘忍，肆其侵漁。美人寶玉，幾覆漢車。

助人爲非。

傳曰：一本云：教人爲非，大抵皆是成人之惡，不能導人以善。不聞佛之言乎？佛言：說法教化，名爲法施，能令衆生出於聞道。以是因緣，於未來世，得七種報：一者衆生聞法，頓除嗔恚，我於來世，得成上色；二者衆生聞法，慈心不殺，我於來世，得壽命長；三者衆生聞法，不盜他財，我於來世，多饒財寶；四者衆生聞法，開心樂施，我於來世，身得大力；五者衆生聞法，癡措頓除，我於來世，得無礙辯；六者衆生聞法，信心不惑，我於來世，信心明了；七者衆生聞法，方便隨順，我於

來世，得菩提道。然則導人以善，豈不愈於助人爲非乎？請為各舉一事，庶皆知戒。元豐間，李之純凡三任為成都漕，仁民愛物，蜀人安之。按察之餘，尤留意於掩骼埋胔。小吏徐熙，本眉人，頗知為善。之純專以委之，熙亦身任其責。一日，市西金花街百姓有王彬者，以病入冥司，見朱紫，數官聚廳而坐，召熙前曰：適天符下，李之純以葬枯骨有功，更與知成都府一任。汝以主行文書有力，賜汝一子及第。汝為誠慤，人必汝信，歸可宣言，庶皆知勸。元祐三年，李之純果加寶文閣直學士，知成都府。徐熙有子，名適，亦於其年李常寧榜下登第。此即助人為善，而亦獲其報者也。政和間，有旨大修西內。時王疇為轉運，以科擾罷職，詔起徽猷宋昇為都轉運，俾主其事。昇用意太過，大索牛骨灰，用塗宮壁，貴令光潤。然下令太峻，民至殺牛馬、發塚取骨以應，尚猶不足。時孫貺、韓容，皆為幕屬。貺不喜其

事，引疾罷去。容獨建議，請發城外五代時十數叢塚以足用。宣和間，貺忽暴卒，至泰山，所見一門，榜曰清夷。吏以鐵叉逼令供滅族狀。貺曰：某當初，正以此罷，恐誤耳。俄見數鬼引出二囚，皆大枷鐵杻，各有一鬼從傍，以鐵扇揮擊，扇皆鐵釘，流血被體。視之，乃疇、昇也。一辯乃伏。貺臨出，則容亦追至。吏復以鐵叉，逼令供滅族狀。容曰：我固有罪，父祖何辜？若令舉族皆滅，不亦過乎？俄聞殿上曰：只令供房絕狀。貺還言之。未幾，容之一房，果皆死盡。此即助人為非，而立獲其報者也。然則助人為非，是可為乎？

贊曰：

佐獲得嘗，佐鬪得傷。善惡以類，人事之常。助傑為虐，同底滅亡。抱薪于火，沃沸以湯。灼爛之禍，如券取償。

逞志作威。

傳曰：《寇萊公六悔銘》曰：官行私

曲，失時悔；富不儉用，貧時悔；藝不少學，過時悔；見事不學，用時悔；醉發狂言，醒時悔；安不將息，病時悔。公之此言，真寡悔之大法也。愚愛其言，故特取之，以為逞志作威者戒。逞志作威，後不悔乎？昔何浹以錄事參軍，提舉梓州路常平倉，所至暴橫，捶撻吏民以立威。吏民畏威，竄匿無地，甚至氣陵提轉，直出其上。每牒州縣，必云：未得官司指揮，其提轉文牒，不得施行。運副李竦、判官陳亢，與之議事，不合輒叱罵之，知州白事，必下馬於門外，循廊而進，往往已近座榻，尚猶不起。又欲廢廣安軍，衆議以旁去他郡甚遠，不可廢。郡官有張辟方者，得其父集賢校理何涉所撰《鼓角樓記》，其中具言不可廢，因以呈之。浹曰：凡事當從公議，此何足憑。李竦等因奏其狀，詔罷本任。既罷，沿路奏竦等事，無所不道。及至京師，下開封府鞠問，浹索紙萬幅以答狀。府司如數與之，既

而，每幅但大劃一字竟坐。上書：不實有四，事皆屬妄誕，獄具奪官。當此之時，浹不悔乎？惜其不知逞志作威，天所不許。昔杜荀鶴未顯時，夢一僧戒曰：汝必得君，若逞志作威，則必死矣。及梁祖開國，荀鶴乃怙寵肆暴，且謀殺素不悅者。事未及行，忽夢一神叱曰：汝豈忘神僧之言乎？帝將罪汝，未幾果卒。贊曰：

威如之吉，本於反身。有威可畏，儀度是循。望之儼然，自可服人。嚴其在己，非以虐民。無有作威，書戒爾臣。

### 辱人求勝。

傳曰：按藏教，佛在世時，人有以行車為業者，家養二牛。一牛生子，其角長廣，名曰長角。一牛生子，禿頭無角，名曰禿頭。一日，因行車，適與一行車者值。因各誇其牛壯，遂請以牛賭上峻坡。既而，禿頭進步稍遲，其主怒罵曰：禿頭畜生，何不速行？禿頭忿然眼赤，愈更放緩，由

是遂輸。蓋忿其衆辱之也。嗚呼，畜生尚爾，況於人乎？當知辱人求勝，誠不可也。昔邵陵王綸鎮郢服，吳規為之客。適張纘出鎮湘東，綸餞于郊，規亦與坐。時纘方貴，意頗輕規，忽舉杯屬規曰：吳規奉慶，汝今日得與此宴。規大怒，即起歸。其子翁孺，聞而為之氣結而卒。規悼兒憤纘，俄亦不起。其妻不勝忿怒，尋亦殞命。時人為之曰：張纘一杯酒，殺吳氏三人。然則人可辱乎？徽州婺源縣有俞彥輔者，平生使氣，凌轢鄉里。凡田宅有便於己者，必以術吞之，至老尚不知悔。紹興壬戌，忽大病，病中屢作馬嘶。久之，手足皆化為蹄，數日遂死。孰謂辱人求勝，為無害乎？惜人錯見，但知以勝人為強，不知勝人非強，而自勝為強。不聞老子所謂勝人者，有力自勝者強之說乎？

贊曰：人或受辱，攘臂相睨。匪臨以威，則扼以勢。怒不敢言，蓋有所制。威



去勢窮，靡不反噬。一能勝予，禹心惕厲。

### 敗人苗稼。

傳曰：敗人苗稼，此特田夫野獠所為，固無足道。請以前輩務農重穀、講究水利，一二美事言之，庶幾後之臨民者，皆知則效。高通議賦知唐州，土曠人寡，歷五代至本朝，領縣四，戶六千百五十有五。公至，相視田原，知其可耕所不至者，人力耳。於是大募兩河流域民，計口受田，增戶一萬一千三百八十有一，給田三萬一千三百二十有八。乃至山林藁莽之地，悉變為良田。張學士綸為江淮發運副使，疏五渠，導太湖，以灌民田。復歲租米者，六十萬斛。許司封遜，知興元，大修山河、堰溉民田者，四萬餘頃。魯冀州有開初知確山，興廢陂以灌民田者，已數千頃。程修撰師孟知石州，凡汾晉諸州山谷，有水可以灌民田者，悉相其地，醜而為渠，闢田凡一千餘頃。許公規知丹陽，適大旱，公冒禁決練湖

以救民田，歲大穫者一萬餘頃。練湖冒決者死。陳諫議省華初知櫟陽邑，有鄭白渠可以引水灌民田，久為鄰邑疆占。公至，陳本末，申諸司，由是壅遏之弊，一旦盡去。水利均及灌民田者，一千餘頃。王刑部濟初主龍溪簿縣，有陂塘綿亘數十里，先為大姓輸課，而獨專其利。公至，悉奪以灌民田，由是一邑無愆亢之患。苗待制時中，初主寧陵簿邑，有古河歲久湮廢。公至，請發卒疏導，以灌民田。由是一邑之田，盡成沃壤。

贊曰：

不稼取禾，詩諷其上。地惟不食，昔人乃葬。孰奪農時，民無蓋藏。孰剥民力，使不得養。害及養人，天必降喪。

### 破人婚姻。

傳曰：禮曰：有夫婦，然後有父子。然則婚姻之道，可謂大矣，其可破乎？或破之未合之前，或破之既合之後，皆為破也。恩愛殺人，甚於挺

刃，孰謂為無害乎？昔鄭和中少時，與王氏女結婚。無何父卒，家道漸微，女家遂有休親之意。其兄王固，為萬州推官，實主其義，然迫於公論，不得已，復令就婚，生一子，偶不育，因遂隔絕和中，不復使歸。王氏數遺以衣服，固輒罪其送者。和中由是益怨憤，遂感心疾而卒。王氏女一夕，夢和中告曰：吾已訴之陰司，見已送衢州東嶽，追人根勘。時王氏女已改嫁陸嵩為妻，嵩時為濟州教授。月餘固死，凡當時與奪親之議者，無不皆死。惟王氏女實無背夫之意，故得獨存。其後王固之子，娶徐氏僅二年，亦為女家所奪。非其報歟？恭倅楊紘，怒其婿姚拱不學無術，遣之使歸。拱求與妻別，亦不許，女怨憤，遂感疾而卒，紘命殯于僧舍。婿至，殯所門鎖自掣，扇亦自開。其母聞之，不勝感愴，數日遂卒。後十餘年，紘至殯所亦暴卒。然則破人婚姻，是可為乎？

贊曰：齊女不娶，終以失國。子哲

委禽，幾於漁色。夫婦大倫，相配以德。孰間其成，胥讒作慝。百世之祀，一語之賊。

太上感應篇卷之十五

太上感應篇卷之十六

李昌齡傳 鄭清之贊

苟富而驕。

傳曰：坐井觀天而小物，逸居無教以自甘。馬前呈晏御之能，龍斷奮螳螂之臂。繁臺閣上，區區求捧硯之名；蔡水河邊，我我熾軟盤之醜。此皆苟富者之所以為驕者也。爾自為驕，誰美爾為驕哉。惜其莫悟，我今苟富而驕，則異日便當有苟富而驕之罪，太上明以示戒，豈不然乎？不聞老子所謂富貴而驕，自遺其咎之說乎？孔子曰：齊景公有馬千駟，死之日，民無得而稱焉。伯夷、叔齊餓死於首陽之下，民到于今稱之。大抵苟富者如是而已，道充者未易測量。昔范文正公未遇時，與劉先生讀書于長白山。日煮二升粟米，俟其凝，割為四塊，旦暮各食其二，其後皆至參政。韓億、李若谷少嘗同途赴試，共有一被一氈。每出

入，則互為僕從，其後亦皆參政。朱昂拾桐子而讀書，孔延之斫松明而讀書，其後皆為侍從。李行簡家貧乏紙，聚木葉而學書；李虛舟家貧無書，動輒假本於人，其後皆至待制。杜衍少極貧，常往來於孟洛間，傭書自給，其後官至樞密。王隨少極貧，嘗道人飯鏹，被執到官，其後官至參政。然則道充者，與苟富者，豈不萬萬遠乎？又如石徂徠為舉子時，讀書于南都。時侍郎王濟聞其窮困，因宴客，餉以盤殮。却而不受曰：今日固好，明日如何？橫浦幼年處學，正當苦寒，衣衾不備。鄉里富人，有以襲衣為送者，亦却不受曰：志處貧困，正是做工夫時節。若不痛自節抑，則貪欲心生，廉耻喪矣，工夫安在？若數君者，所守如此爾。苟富者，可得驕乎？

贊曰：

財以苟得，背義傷仁。經營莫夜，白日驕人。穿窬揚揚，華軒綉茵。夸示陶富，笑譏憲貧。成敗飄忽，西風

庾塵。

苟免無耻。

傳曰：佛言：我有二白法，能救一切衆生。何名二白？一曰慚，二曰愧。慚者，不自作罪。愧者，不教他作。慚者，內自羞耻。愧者，發露向人。慚者，羞人。愧者，羞天。無慚愧者，名為畜生。此《涅槃經》之說也。又言：慚耻之服，於諸莊嚴，最為第一。慚如鐵鈎，能制非法。若離慚耻，則失功德。心若慚愧，怨罪兩空。此《遺教經》之說也。而吾夫子亦曰：行己有耻。《禮經》亦曰：臨難毋苟免。今也苟免，而又復無耻，為何等人乎？大抵耻之於人，不可須臾離也。苟無其耻，則無耻之耻，無不為矣，豈復更問。昔僧願成，好符籙，善禁呪。王雱幼乎夜啼，願成一呪即止。雱大敬之，薦于章申公子厚。時子厚察訪荆湖南北二路，有意經略溪洞。或言蠻人多行南法，畏符籙。子厚至辰州，即令願成同張裕、李資明夷中等，先入江

南受降。願成等至洞，乃敢逞欲不檢，大至穢亂蠻婦。酋首元猛不勝其憤，盡將裕等剗散于柱，次至願成，願成搏頰求哀。猛素事佛，貸而不殺，遂得清脫。既歸，猶以入洞之勞，得紫衣師號，自稱廉訪大師，乘大馬，擁撾劍以自隨，略無愧色。是有耻乎？平日誦經，所謂二白鐵鈎之說，果安在乎？樊太博立與致政

屯田王揆，里閭親交，俱老于鄉。一日，王揆作六快活詩，以議時政。憲漕捕立以脅揆，立義簿無守，悉以揆平日游從之事賣之，以求苟免。由是揆坐謗讟，削籍遠竄。立獨以告發免罪，尋復加秩。其誥詞中，有為爾交者不亦難乎之句。當時清議，從可見也。立猶昂然拜命，略無三禡之羞，是有愧乎？平日讀書行己，有耻之說，果安在乎？

贊曰：苟免偷活，無耻求容。為子不孝，為臣不忠。漢隕張禹，晉隕賈充。始患得失，終蹈姦凶。何以懲之，伯夷

之風。

認恩推過。

傳曰：太上曰：教人修心，即修道也。教人修道，即修心也。大抵即心是道，未言修道，先富治心。是以前輩治心，將躁則安之，將邪則正之，將求則捨而抑之，將濁則清而澄之。行止於是，造次於是，久而物冥乎外，神鑑乎中，自然心地坦然，一道平正。認恩推過之念，固亦無自而起。昔王文正為相，萊公使人私公，求為使相。公大驚曰：將相之任，何可求耶？且吾不受私。準憾其言。已而制出，除準為武勝軍節度使，同門下平章事。準入對泣謝曰：非陛下知臣，安得有此？上曰：此王旦薦也。準始愧服，以為弗及。李文正為相，士夫有以差遣為請者，公察其可用，則必正色却之，既而擢用，絕口未嘗與言。子弟曰：曷不使之知乎？公曰：用賢人主之事，若使之知，即是我徇私情而市私恩也。恩欲歸己，怨使誰當？

若二公者，肯認恩乎？魏仁溥事周為相，世宗性褊急，峻於刑戮。內職近臣有忤旨者，仁溥必歸罪於己。以營救之所活者，十常七八。曹武惠初與王全斌同伐蜀，全斌殺降卒三千餘人，武惠諫，不聽。及歸，上大怒，必欲鞫勘。武惠乃自誣伏，全斌由是獲免。及武惠再受命，伐江南，上面戒曰：此番無得如在西川時，妄亂殺人。武惠始以實對，且曰：初所以堅自伏者，不欲使全斌獨得罪也。由是帝益重之。若二公者，肯推過乎？當知認恩推過之人，特其不能治心，不免旋踵及禍，安得以太上修道即修心之說，而告之哉。

贊曰：欲人之悅，恩不我有。懼之之謗，過必我受。認恩推過，怨怒之藪。己掠其名，誰執其咎。冰炭置腸，扁鵲驚走。

### 嫁禍賣惡。

傳曰：太上曰：生我者神，殺我者心。今也嫁禍於人，而禍還自及；

賣惡於人，而惡竟自歸，非自殺乎？昔姚孜慶曆間，同舒州桐城縣主簿王虎，被檄前往大雲倉，盤量上供米麥。孜受監專等金銀財物，虛擡欠折正數小麥八千餘石，回申上司。虎但見姓書名，初不知之。及事敗，送壽州根勘。孜不欲獨受贓名，乃將元受金托一隻，銀托五隻，漆為漆托，副以他物，遣親信送與王虎。度虎不受，先教所差人詐稱中路溺水，書偶漬壞，請暫留信菴，俟歸別取書來。虎不疑，留之。未幾，上司忽有文字，備坐壽州勘院公文，追攝王虎起獄，照對姚孜受贓公事。虎至此始悟為孜所賣，悔已無及。泊到獄，孜乃厚誣王虎，以為實同受贓。尋於王虎家，抽到元受托子，集行人驗視，果皆良金。虎語塞不能對，俄至氣結而卒。孜因百計厚賂推勘，盡將所坐坐之，孜遂得脫。後數年，通判潞州。一日出遊淮上，而王虎遊魂亦遊，隔岸遂得執孜，不復放捨，自此即恍惚如狂，常若與人歐擊，甚

至口鼻流血。既復蘇，如是三年，每年必五七作。醫巫法錄，皆不能治。時錢延年知潞州，陳冕為運使。因為聞奏朝廷，乞暫差道錄宋之才到州救度之。才既到，即為聞奏真武真君，初焚奏牘，則孜已從卧榻趨出俯伏於真武案前，細自陳白：當初實是孜起心受贓，非干王虎之事。孜泊事發，又不合嫁禍於虎，至令虎冤死，敢望慈悲，特賜原赦。時錢延年命吏從傍錄其語，俟醒示之，孜大慚，即日致仕，未幾遂死。郭黃中知雲安軍，十里外有西霞宮。公一日，詣宮燒香，夢主宮之神告曰：公惠顧此邦，邦人受賜多矣。然事有隱匿，不敢不告。明日當有解屠牛者至，九人之外，公宜察之，庶幾罪不枉。及詰旦巡檢司，果縛九人解來，有一兵自稱捕獲，欲請功賞。蓋牛乃兵殺，嫁禍九人，而又執之，以希賞也。公一詰，遂伏。嗚呼，一則已塵真君聖聽，一則先為主官所知。然則嫁禍賣惡，是可為乎？天誅陰

譴，豈遂已乎？

贊曰：

禍福自己，善惡由心。謹其在我，外患莫侵。嗟彼姦慝，城府險深。陷穽是設，干戈相尋。潛雖伏矣，上帝汝臨。

沽買虛譽。

傳曰：南嶽夫人曰：人隨俗習，要求華名。譬如燒香，衆人皆聞，不知熏以自燔，燔盡則氣滅，名立則身絕，是故高人哂而遠之。希夷真人戒种放曰：名者，古今之美器，造物者之所深忌。天地間，無完名。子名將起，必有物敗。然則名之於人，豈不重乎？有其實者，尚爾不可，况沽買乎？昔盛俊民，參政度之子也。少以逸才自負，舉進士殊等，聲名益振，人莫敢為之先。及庭試，王拱辰居第一，俊民大不平之。他日，夢遊陰府，謁主者，請問所以坎壈之由。主者曰：公乃隋越國公楊素後身，已更數世矣。率貧不自振，因說在隋時事受報，自當如此，此生亦終坎

壈福業雖異，才不易也。俊民聞之大沮，後果無成而卒。嗚呼，以昔日之楊素，而為今日之俊民，固已自天而墜矣。然不失男身，是猶愈於受

女身者。李庶為尚書，以清辯知名。徐陵一見，大加敬嘆，自謂弗及。庶亦頗以自負，初未得子遽卒。其妻元氏，改適趙起。一夕，夢庶哭曰：我明日當生於七帝坊十字街南東入窮巷劉家為女，彼家極貧且多女，必不見養。萬一又死，那知更入何處。幸念夫妻舊恩，急來乞取我去。元氏不答。庶曰：卿意似憚趙君，吾當自告。既而，趙亦得夢，與元氏同。黎明持金，訪求其家，則果生一女，已覆在水盆中矣。趙急救取以歸。嗚乎，以昔日之李庶，為今日不舉之女，則甚墜也，豈不又甚於楊素之墜乎？安知非聲名籍盛時驕矜輕薄之報乎？

贊曰：

中必形外，名以實實。盛德至善，英華日出。譽假甘陵，聲浮少息。巴

豆瘡成，梘鞭價溢。案以春秋，誅心之筆。

包貯險心。

傳曰：持地菩薩白佛言：我念往昔普光如來出現於世，我為比丘。但凡要路津口，田地險隘，有不如法，妨損車馬，我皆平填，或作橋梁，或負沙土，如是勤苦。經無量佛出現於世，至毗捨浮佛現在世時，國王延佛設齋。我於爾時平地待佛，毗舍摩頂，謂我當平心地，則世界地一切皆平。我即心開，見身微塵，與世界微塵，等無差別。微塵自性，不相觸摩，得證圓通，號曰持地。然則心地，其可不平，險可貯乎？大抵小人行險以僥倖，固非智慮所能防者。昔侍中曹利用以勳舊自處，雖太后亦嚴憚之。凡內降恩澤，利用多執不行。所執既多，其有三執，而又降出不已者，亦不得不行。久而遂為小人所窺，凡有求而三降不行者，必又一請。太后曰：侍中已不行矣。請者曰：臣已告得侍中妳婆，或言

告其親眷，言已許矣，利用實不知也。已而降出，但以三執不獲行之。

由是太后大怒，曹芮之禍端起乎此。陳貫為三司副使，有一胥極猾，潛通權倖，省中之事，率以咨之，當聲喏時，為使副者陽為伸欠，如不敢當其禮狀。貫聞而不平，必將逐之。胥知其意，奉事彌謹。歲餘，舉無留事，陳亦稍以善侍，偶因燕客付錢，委令辦集。不知其心者，包貯也。明日，其胥乃携十歲女孩，鬻于東華門街曰：陳省副某日請某客，令我為之辦集宴席，所需十未具一。為之奈何，今賣此女，須得若干錢，方可辦也。因結皇城司密邏者，俾潛以聞。朝廷信之，幾欲便行黜降。賴宰臣辦解，乃已歲餘，竟以此罷。嗚呼，二人設心，不為險乎？其險如此，是可防乎？

贊曰：險心萬仞，内生五兵。義府微笑，林甫柔情。對面莫測，禍福若驚。自詫智數，妙於神明。詎知造物，視於

無形。

挫人所長。

傳曰：羅仲信問龜山曰：盡其心者知其性，如何是盡心底道理？龜山曰：未問盡心，先須理會心是何物。夫心者，明白洞達，廣大靜一。若理會得了然分明，然後可言盡心。理會未得，心盡箇什麼？大寂禪師曰：人之心性，譬如寒月。當其寒時，水結為冰。及至煖時，冰釋為水。衆生迷時，結性為心。衆生悟時，釋心為性，亦復如是。嗚呼，此皆教人，使知識心明性也。挫人所長者，能知此乎？昔穆修有詩名，多游京洛。有題其詩於禁中壁間者，真宗一見，大加賞嘆，問為誰詩，左右以穆修對。上曰：有文如此，公卿何不薦來？晉公一言沮曰：此人行不逮文。由此一語，上不復問。晉公此心，為明白洞達，廣大靜一乎？為釋心為性乎？此其所以死無其地也。張乖崖在蜀，有錄事參軍以老病廢事。公責之曰：胡不歸

乎？明日參軍即求去，且以詩別，其略曰：秋光都似宦情薄，山色不如歸興濃。公驚謝曰：此吾過也。同僚中有如是詩人，而吾不知，豈不為過。因固留慰薦之。使於盡心知性之學，釋心為性之說，無所悟入，能如是乎？此其所以了達生死於未死之前，已能前知月日，密記於遺像之上也。古語云：一念纔差，霄壤有間。

贊曰：人有片善，如睹瑞物。長養成就，勿使撻拂。誰生伎心，乃底湮沒。揜彼良貴，增我怠忽。害已損人，禍深刺骨。

護己所短。

傳曰：或問孫真人曰：養性之說，願得聞之。真人曰：夫養性者，養成自性也。要在百行周備，雖絕藥餌，可保延年。苟獲德行不充，雖日餌金丹玉液，亦自無益。然則人於日用，短可護乎？苟或護短，則日用莫不皆短，可勝言哉。惜其莫悟於

短不護，久而養成自性，不復有短，即名全體善人，去仙何遠？昔黃萬祐修道於黔南無人之境，王建迎至成都，盡禮師事。一日，請問服食之法。萬祐曰：吾非神仙，亦非服食之士，惟能虚心養氣，仁其行而鈔其過耳。既而懇歸，不復可致。劉誼世為名閥，少又登第，不十年，官至二千石。崇寧間，嘗知漢陽，每遇暇日，必詭服微行，往來於大別山中，日與田夫野獠語，凡郡政便否、民間疾苦，無不詢訪。事有未便，度其可革，歸即革之，竟遇異人，遂得度世。若二公者，其於短也，是肯護乎？復有短乎？此其所以養成自性，終能得登仙品。請為更陳其次，庶幾好護短者，各知切戒。李及歷躋臚仕，臨死之日，乃召其子謂曰：吾平生無他過，惟知杭州日，偶市白集一部，此為恨耳。蔡君謨嘗以小吳牋大書特書，以美其事。黃宗旦知蘇州，王質為通判。一日，捉獲盜鑄錢者一百餘人，送獄根勘，喜謂質曰：

此皆某以術陰鈎得之。質愀然曰：事發無蹤，公以術陰鈎，而置之死地，尚為喜乎？宗旦不覺身去，坐榻謝曰：微君之言，吾幾失矣。大抵前輩率多如此，求之今世，豈無人耶。欲為其人，即其人也。

贊曰：隱諱之疾，無藥對治。怙非迷復，終凶可期。衆善難入，萬惡所基。先聖有過，幸人之知。彼護短者，賢於仲尼。

### 太上感應篇卷之十六

## 太上感應篇卷之十七

李昌齡傳 鄭清之贊

乘威迫脅。

傳曰：王文正當國，天禧初，薛簡肅為江淮發運，入辭，公無他語，但云：東南民力竭矣。張士遜為江西轉運，入辭，公亦無他語，但云：朝廷推利至矣。大抵致君澤民，自當如此。今也居上位而不卹州縣，作州縣而不卹小民，即迫脅也。昔宋宣公綬判三司，朝廷有旨，盡放天下逋欠，稽期不報者，尚有六十八州。公上疏論例，乞委監司責近限覈實。由是獲實放者，凡數百萬；釋械繫者，三千二百六人。王文穆欽若判理欠憑，由司建言，乞盡蠲天下宿負，以廣恩澤。自乾德至咸平，所放者，凡一千餘萬；釋械禁者，三千餘人。陳侍郎布亮當三司戶部時，榮州煮鹽、歲久澹竭者，一十八井。而有司督課如初，籍沒者，三百一十五

家。公反覆論例，悉還所籍，歲蠲虛額三十餘萬。此皆有其位者，無其威乎。其所以爾者，不欲重困民力也。乘威迫脅者，能如是乎？又有一文，亦不敢妄取者，請悉陳之，庶晚輩皆知寬卹。國初，王贇方奉使，均兩浙雜稅。錢氏舊法，畝稅三斗。公至，悉令畝稅一斗。朝廷責其擅減。公曰：今兩浙已為王民，其可復循偽國之法。畝稅一斗，自贇方始。王拱辰請推河北鹽，張方平力諍曰：河北舊法，犯者皆死，民請均額，隨稅輸納，禁乃獲弛。今若復議，即再摧也。由是上悟，即日除之。民至，為公作佛事者七日。李允則知潭州，馬氏暴斂州人出絹，謂之地稅絹。屋每間，輸絹一丈三尺，謂之屋輸絹。耕牛每歲輸米四斗，牛死亦輸，謂之枯骨稅。公至，一切除之。陳世卿知廣州，廣有計口買鹽之害。公至，奏乞除之。由是五羊之民，始有完衣足食。廣人歌曰：邵父陳母，除我二苦。蓋前守

邵曄，鑿內濠以泊舟，民免颶風之害故也。嗚呼，與其乘威迫脅，而民怨神怒，孰若寬卹，而萬口稱讚乎？不聞喜集則福生，怨積則禍至之說乎？

贊曰：強齊之威，存衛却狄。夾谷之威，三軍辟易。相如一怒，秦王是叱。解紛救患，斯謂有力。暴物殄民，豺虎不食。

### 縱暴殺傷。

傳曰：按《持地經》，殺生之罪，能令衆生墮入三惡，及生人中，得五種報。一者以苦惱衆生，故一捨煖觸，即墮地獄，受諸苦惱。二者以無慈惻行乖人，故地獄罪畢，又當墮入畜生，受人屠割。三者以貪著滋味，故畜生罪畢，又當墮入餓鬼，日困饑渴。四者以斷人命，故餓鬼罪畢，雖得人身，多是短命。五者以殺害時，使彼衆生衆苦競集，故不獨短命，又復多病。佛語如是，豈不然乎？惜其不知人之與畜，軀殼雖異，命無兩

般。但詩自觀，我今有病，肯遂死乎？不免求醫問卜，以求速安，大限若至，亦肯死乎？又不免祈天禱地，以求增筭。我既畏死，彼不畏乎？我既貪生，彼不貪乎？昔張道幾好弋獵，其父祖墳側長林，巨麓禽獸成叢。道幾日與數輩惡少，從事其間，四面皆設網罟，號曰漫天。一網所獲，無慮數百。既而不暇拾取，但從上壓殺，分挈而去。又嘗於明陽觀側，射殺一兔，其兔絕小，而白耳有缺處。自此即恍惚如狂，盡將平日獵具焚之，築一庵於觀側，日處其中。一日，有二兔直前，作人語曰：吾為兔已三百年，住在張氏東墳，今為汝殺。一曰：吾為兔已一百八十年，隱於明陽觀側，曾為鷹搦，損吾一耳，力竄得脫，今又二十年矣，但凡鷹犬網罟，吾悉能避，不虞君之用弩矢也。吾已訴於上天，當償吾命。未幾果卒。劉翔亦好獵，每遇興發，寒暑不廢。前後傷殺，不知其數。紹興七年，忽得奇疾，背生三物，似



鼈而黑，隱隱在皮肉間。又數日，頭足皆具，儼然三鼈也。已而能動，或以魚誘，則闖然引頭，如欲食狀。稍久，左右齧食，痛不可忍。如是月餘乃死。死後五日，憑其子婦語：我坐平生殺傷物命，故獲斯報，見今冥司治我正急，可速取獵具焚之，庶幾知我有懺悔之心。然則縱暴殺傷，是可為乎？犬抵殺為十業之先，其可縱暴？

贊曰：刑以止辟，兵以禦變。哀矜決獄，喪禮處戰。殺非得已，於此可見。仁民愛物，寧別貴賤。殘賊之夫，獸心人面。無故剪裁。

傳曰：按《道藏》，絲帛珍寶，主之者，上天有織女三星。布帛製裁，主之者，上天有女宿四星。然則無故剪裁，是可為乎？不聞蠶本馬鳴化身為之之說乎？昔馬鳴大士於往世中，曾為毗舍離國王。其國有一類人馬其形，而無其衣。王乃運其神

力，分身為蠶，彼乃得衣。厥後，其王復生中印度。馬人感戀，悲鳴不已，因號馬鳴焉，即第十二祖也。大抵片衣蠶千命，按如佛說，身服絲帛，尚當還債，况復無故輒敢剪裁。是以漢文帝所幸，夫人衣不曳地。唐文宗嘗出袖，以示羣臣曰：此衣已三浣矣。晉文公衣不重帛，子夏衣若懸鶉，季文子無衣帛之妾，晏嬰妾不衣帛，董威結殘繒為衣，號曰百結，祭彤衣無兼副，皆惜福也。又不聞無故剪裁，身後皆當獲罪乎？紹興初，郭普州印之之女，名引鳳者，被攝至冥司，見無數罪人。有一婦人，姓趙，名十二，絀在廊下。前列數堆物帛，皆片碎端足，及新舊無數衣服。引鳳問曰：此何罪耶？吏曰：此人好服綺羅，耗剪端足，奉命一一補綻，復令成匹，乃得釋去。趙士周之夫人全氏，既死數日，憑語女使來喜曰：我平生耗費纏帛履韉之物，及洗頭濯足分外，使水陰司罪我，日加捶撻，苦不可言，幸為我達

此意於士周。舉家聞之，不勝感愴。然則無故剪裁，謂為無罪可乎？况治容誨淫，獲罪尤重，其可不戒。贊曰：雲箔春滿，紅女宵興。毫忽所積，丈疋乃成。墻屋被繡，輿臺衣輕。孰念墮指，寒機不停。母誚公孫，布被釣名。

非禮烹宰。

傳曰：世固有鞭魚作鱠而取其紅者，亦有清蟹以槽而取其活者。此皆不仁之甚，淪入三惡，其速如箭，固無足論。夫豈悟物皆有知，與我初無異乎？人知愛親，如鄧芝所射母猿，既顛落矣，其子急為拔箭塞瘡，背負而去。不愛親乎？人知愛子，如何詮所射母鶴，既中腹矣，復忍死引觜，飼雛乃落。不愛子乎？人知敬夫，如環王國野象，牡既死矣，衆牝復環守不去，必待悉力瘞之乃散。不敬夫乎？人知愛妻，如章子明所射鴛鴦，既斃其雌，煮之釜中矣，其雄遙見，不顧沸釜，投身其中，

一鳴而絕。不愛妻乎？人知念恩，如山神所義，鸚鵡一聚。鸚鵡嘗僑居於遠山，遠山禽獸愛之，不敢加害。既歸，遠山燒發，鸚鵡復相率入水，濡翅向空而灑。山神義之，立為滅火。不念恩乎？人知修怨，如劉永錫所畜之犬。永錫知千乘縣，適有客至，食以饅頭。永錫以一與犬，客曰：犬彘人食，古人所譏，况珍味乎？犬不食，瞪視而去。其夜，伺客睡，排門而入，客識其意，登梁避之。既而果登榻，已不見人，吼怒作氣，自撲而死。不修怨乎？人知戀主，如魏大諫所養之馬。當死之日，魏祝之曰：吾賴爾力，可謂多矣。爾今有病，吾為療治，亦已至矣。如必不可，可出門外，切勿斃於吾前，吾不忍也。馬即雙跪前足，如辭別狀，起而歔歔，纔出門，即氣絕。不戀主乎？人知卹孤，如昌黎所記之猫。二猫俱育，一猫遽死，一猫為乳其孤。不卹孤乎？人知從諫，如仁喜所祝之蜂。僧仁喜嘗欲建一佛祠，

人有以一巨檀為施者，僧往伐之，則巨蜂數萬，圍集其上，匠不敢近。僧祝之曰：汝以惡業至此，吾作佛事，汝不吾避，三日不去，必將火汝。及期，不見一蜂。不從諫乎？人知修證，如南海五百蝙蝠，穴於枯樹。一日，有一聚商人，附火其下。中有一人，誦阿毗達磨藏。無何火發，樹遂被焚。五百蝙蝠以貪聽法音，不忍捨去，俱斃於火。既而受生，皆得為人，聰明靈利，棄家學道，並登聖果。其後，迦尼色迦與脇尊者，招集五百賢聖，於迦濕彌羅，作《毗婆沙論》。其五百賢聖，即昔日五百蝙蝠。不修證乎？大抵人之與物，本自無異，所以異者，福力業力，及軀殼耳。又不聞不殺之為力乎？昔峽崛摩羅，本一國王，初最好殺，以悔罪出家巡乞。至一人家，適其家產難危急，抱持摩羅求救。摩羅曰：吾初入道，安能救汝？俟歸問佛。既歸，佛言：汝可急回於產母榻前，抗聲稱曰：我從聖賢法來，未曾殺生，兒聞

此言，無不產者。摩羅如戒，兒果誕生。嗚呼，此但一稱不殺，其於度厄有力如是，然則非理烹宰，其於淪溺，豈不亦有力乎？

贊曰：士苟無故，不殺犬豕。七十食肉，其重如此。賓祭之用，乃不獲已。敢徇口腹，肆情刀匕。視彼傷生，其痛猶已。散棄五穀。

傳曰：天倉五穀，在二十八宿，乃危星主之。大抵人以食為天，一日不食，如飢火何。是以聖人務農重穀，天子親耕以勸農，春夏祈穀于上帝。然則五穀，可散棄乎？昔三川飢，物斛翔踴，民至採山芋野葛以給，死者無慮十五。時王法進以功滿當仙，既上升矣，復為民力請於帝。帝曰：人處三才之大，體天地之和，得人形，生中土，不為易得。夫天運四時之元，地稟五行之秀，生五穀百果，以養斯民。惜人不知天地育養之恩，輕棄五穀，厭捨絲麻，使農耕

之夫、紡織之婦，身勸而不得飽，力竭而不得禦寒，又從而不得其勞，曾無愛惜。此其所以為神明所責，天地不祐也。近地司嶽瀆，皆列章上言，世人厭擲五穀，不貴衣食之本。昨已勅太華之府，收五穀之神，使之種作不成，漸至飢餓，以示責罰，庶幾少懲其心。然旋奉太上慈旨，以大道好生，當先救物。比者歲飢，實民自取，然民不知所自，固無懺請首原之路。汝今當為上官侍童，入侍天府，可暫還人世，普告下民，使知悔罪，寶愛農桑，不敢耗散，此亦汝之陰隲也。法進稟令而歸，言訖復去。劉元真亦得道者也，少夢道人啗以一桃，遂能辟穀。一日，於終南道中，逢一貴人，訶殿甚盛。元真謂曰：且以吾民為念。貴人領之。同行者問曰：彼何人耶？元真曰：彼山神也，上帝以麥大熟，人不知愛，使收其二，吾故為民請之。少頃，風雨大作，麥敗十二。於此益知所謂五穀誠不可輒棄散也。况人受用，

各有定數，譬如有錢千貫，日用一百，則萬日方盡。日用一貫，則千日乃盡。與其千日，孰若萬日方盡乎？昔者豐稷尚書，每言吾少時，親見雪竇以惜福教人云：人無壽夭，祿盡乃死。元厚之死而復生，自言：初到陰司，主者謂曰：君祿未盡，異時官至兩府，然須惜福乃可。厚之自此每事減損，雖一杯飯，必先減後食。但凡奉養，皆不敢過，其後果能致位執政，壽逾七十。然則人有薄福，可不惜乎？杭州五雲山志逢大師，一日宴坐于普賢殿中。俄見一神，跪膝其前。師曰：汝為誰乎？神曰：護戒神也。師曰：吾嘗患有宿愆，汝知之乎？神曰：師有何罪？然亦有一小過，既蒙相問，不敢不告。且如滌鉢水，亦施主物，師每棄之，非所宜也，自此當有小病。言訖遂隱。其後，志逢果患胃病十三年。嗚呼，食餘之物，棄之尚爾，何況其他乎？

贊曰：衛士棄食，元宗議形。戲賊生稻，士行痛懲。以食為命，所繫非輕。尊之曰天，至敬之稱。圭米粒粟，珠玉莫勝。勞擾衆生。傳曰：邵伯溫初入仕，請益於程頤先生。先生曰：但凡奉行官司文書，於其急處，能寬一分，則民間便受一分之賜。噫嘻，先生之言，可謂仁矣。大抵人心欲安，我不欲安乎？人身欲樂，我不欲樂乎？若以安樂自處，而以勞擾待人，真不仁也。請以前輩臨民，不敢少有勞擾，一二言之，庶幾皆知則效。呂文靖提點兩浙刑獄，適京師大建宮觀，伐木南方。有司責限太峻，民有死於役者。又復斥為亡命，捕繫妻子。公上疏論列，以為窮冬水涸，民太苦於挽運，須稍緩程役，且俟河流通快，遣卒送之良便。上悅從之，由是知其愛民憂國之心，遂至大用。司馬池為光山尉，適大內火，諸縣調發竹木，州牒縣三日畢輸。池以土不

產大竹，轉市蕪黃，非三日可至。乃別與民立定期限，過期者罪之。時盛度為太守，聞之大怒。既而光山輸竹，為諸縣之先。范文正公鎮青社，會河朔艱食，青社之賦輿，就博州置場收受。民大困於輦置，而河朔斛斛不甚貴。公戒民每斛就本州納價三鍰，委幕屬輓金，就博州坐倉，倍價招買。時斛斛為厚價，所誘來者山積，五日遂足，而餘金尚有數年，公悉按等給還民間。王濟主龍溪簿，時福建諸郡，皆科鶴翎以為箭。羽既非常有之物，官又迫促過酷，民大不堪。公諭民一面以鶴翎代輸，仍急附驛聞奏。朝廷從之，旁及他郡。噫嘻，諸君臨民，皆能如是，彼勞擾者，觀之得無愧乎？

贊曰：

曰逸曰安，羣情所欲。一歲役民，三日已足。斧斤以時，網罟不數。山川又寧，鳥獸孳育。庸人擾之，鳧鶴斷續。

太上感應篇卷之十七

## 太上感應篇卷之十八

李昌齡傳 鄭清之贊

破人之家，取其財寶。

傳曰：事出無心，偶至破之，為惡已自不小。若為財寶，而輒至破之，真大惡也。請以能為已破家者，復歸其產，一二美事言之，庶幾後之臨民，或遇此事，皆能如是，於已破者，方為有益。劉敞知揚州，州有雷陂，舊屬民，由官奪之，蓄水以便漕運。歲久陂壞，漕運亦未嘗賴此，久而為毫族所占，田主屢訴不獲。公到任，立判還之，由是田主三十六家、男女三百餘口，復得其田，不獲飢餒。侯叔獻為汜縣令，縣多沒官田。有一李誠莊，方圍十里，河貫其中，最為膏腴。佃戶百家，皆成奧族，舊估價一萬五千貫未賣。賈魏公當國，又欲增價五千貫賣之。陳道古銜命而來，與叔獻議增其價。叔獻太息曰：郎中知此本末否？李誠者，在

太祖時為酒務專知，以不能救護當物，為溢水所損。估所損價，當五千貫，勒誠償之。是時，朝廷出度支錢，預俵民間，令買鵬翎箭桿弓弩材木，以備軍需。及李重進叛，方議起兵，而預買之物皆莫集。太祖大怒，凡欠負官錢者，皆籍其產。而李誠者，實非預領官錢之人，官吏畏威，不敢開析，一例抄沒。誠之子孫，遂至破碎。惜相國未能雪正，給還其田，莫若更損五千貫，俾誠子孫買之。在官司，已得倍利；在誠子孫，亦不至於狼狽。郎中以為何如？道古曰：某實不知苟利於人，何所不可？於是損價五千貫而去。叔獻乃以此議召，誠子孫諭之，皆泣拜曰：實荷公恩，柰家貧何。叔獻復召衆佃，諭田：汝輩本出下戶，以得李莊之利，今皆復為倉廩，變為豪民，官賣此田，而李貧獨患無力，萬一為他人所得，勢必撤廩拆屋，離業而去，豈復容汝輩復享厚利耶？曷若百家共贖此錢，俾李氏請買，我則為汝寬

其限責，如此則田復歸李氏，而汝輩亦得久遠佃食，兩獲其利，不亦可乎？衆皆拜曰：願如公言，由是誠之子孫，復得此田。彼破人之家，而取其財寶者，能如是乎？惜其莫悟天堂地獄，端由乎此，作何所見，乃敢如此。

贊曰：人之成家，基於艱苦。前遺後承，俯捨仰取。誰歟寇攘，輸掠其聚。當路之狼，苛政之虎。相在爾室，鬼瞰其戶。

### 決水放火，以害居民。

傳曰：水火漂焚，世間禍害，莫此為酷。今乃決水放火，以害居民，罪其輕乎？此其所以不為上真所容，明神必戮也。天聖二年，大名府黃河燥口，忽壩埽俱破，水遂橫流，其勢頗猛。時韓魏公判北京，忽一吏馳報，燥口有一大龜，久為燥患。龜若潛伏，水自安流。龜若出浮，水必汎濫。今出浮矣，為之柰何？時使臣鄭圭奉命，適至提所，一箭射殺其

龜。既而為龜所訴，閻羅追攝鄭圭，使與龜對。其日，適遇真武靈應真君下降，颯呖羅山，校勘生死，遂蒙真君雪正，將燥口妖龜，向空碎為微塵，不使人間復有此物為人之害。仍命直符押還鄭圭，復歸人間。然則水可決乎？李轅事母最孝。薄暮，忽有客欲來投宿，轅適臨溪烹鷄，客謂必以相款。既而具飯，乃脫粟也，客大怒，不食而出。轅實告曰：母病思肉，山居無有，故烹一雞，不及君也。客怒愈甚。是夕，即從屋後，乘風放火，將及其廬，忽天雨反風，火即隨滅。既而，鄰里聚觀，乃見一人卧在火中，所執火炬尚猶在手。細視，乃客也，且自言曰：我俠士也，以亡命至此，不謂主人待我如是，當縱火時，明見一大神，狀如神君，立於空中，叱火令反，故至反及，今則死矣。言訖遂絕。然則放火，是可為乎？

贊曰：長民之官，苟且畏避。遇水失防，與

決何異。救焚不力，亦放之類。歸咎天災，逃責人事。原情定罪，心迹無二。

### 紊人規模，以敗人功。

傳曰：人之立功，功雖歸己，然宗廟社稷，天下生靈，實皆賴之。彼無能者，其可紊其規模，而幸其敗乎？雖曰敗彼之功，實是敗國之事。其為利害，自不為小，豈無罪乎？寰朔之役，楊業奉命副潘美進討。既至虜，又攻陷寰州，業謂美曰：賊鋒方銳，卒未可戰，宜引兵出大石路，先遣人諭雲朔守將，俟大軍離代州日，即令將兵先出，我師若至應州，虜必悉衆來拒。此時朔州吏民，便可盃入石碣谷內，仍分強弩千入，使守谷口。所有騎士，悉令援於中路。如此，則三州之衆，必萬全矣。監軍王侁沮之，計不得行，且責業曰：君之此言，豈畏死乎？業曰：吾非畏死，行即死矣。且祝美曰：吾去，公等可於谷口張功，兵分強弩為左右翼，以為吾援。吾轉戰至此，縱兵擊之，必

大捷也。美如其言，陳于谷口。既而，王侁乃以虜為已遁，欲爭其功，引兵而去。業至，不見一兵，撫膺大哭，復奮身決戰，手刃數百人，身被十數鎗。力乏，遂為賊擒。不食，三日乃死。非侁沮之，功不立乎？是以識者曉此，凡任其責，必先預為之計。貝州之役，明鎬為將。軍中有

所奏請，多為樞密夏竦所沮。時文彥博為參政，大不平之，因自請前往督戰，且面奏曰：「巨在軍中，請得便宜，行事更不中覆。」上從其請。既至，有牢城卒董秀、劉炳者，請穴地而入。既而，日夜穿掘，晝則伏於穴內，夜則棄土水中。穴成，從教場中出。既出，登城殺守者官軍，繼進皆得乘絙而上。賊帥王則於是與其徒張巒、卜吉等，突圍走出。巒、吉死於亂，兵則為官軍所獲。夏竦猶言，賊恐非真。及檻送至京，方且語塞。卿非潞公，預為之計，功不敗乎？

贊曰：杜預平吳，羊祜之功。元齡善謀，如

晦必從。事業既立，勳名俱崇。曾是偏心，齊輒盡東。彼則敗矣，吾亦何庸。

損人器物，以窮人用。

傳曰：損人器物，以窮人用。而太上書以為戒者，亦不善用心之一也。不善用心固有罪，又有因此而構成莫大之禍，結成無窮之怨者，此則尤當獲大罪報也。然則損人器物，以窮人用，其可不戒？昔華嚴和尚妙於華嚴，又且樂於講說，以是得名，從之者衆。然好嚴餅鉢，聽徒三百餘衆，皆爭效之。中有一僧，道行獨高，寢疾不出者，已數月矣。有一琉璃寶鉢，頗珍惜之。一日，有一客僧來自遠方，餅鉢莫具，或令從病僧暫借。初拒不許，力告乃從。且戒至切，齋罷宜速見還。既而持還，無何失足，墮地破碎。病僧大怒詬罵，良久乃絕。後數年，華嚴移住嵩山時，病僧弟子及借鉢客僧，皆在會中。一日，方講說間，忽聞寺外蕭蕭作風水聲，華嚴已知，亟呼客僧坐之背

後。少頃，有一大蟒，長可十丈，努目張口，徑趨而入。衆將驚散，華嚴止之，且以錫杖約住蟒曰：「汝於三百衆中，道業最高，只為多瞋，不從吾教。今果至是，尚為一鉢，欲害其僧耶。因命大衆，為授三皈三敬，及誦經呪，為作懺拔。蟒乃卷身而出。華嚴召其弟子，謂曰：「適來大蟒，乃汝師也，累劫修行，將證果位。但以臨終一怒，遂至如此。若不遇吾，必吞其僧。若吞其僧，定墮地獄。自此流轉，何時而已。」又白衆曰：「明日，山後茶毗亡僧既至，乃昨日大蟒已碎首而死矣。茶毗訖，華嚴又召其弟子告曰：「汝師明年，當於裴家託生為女。臨產稍艱，必至怒害其母，則業愈重爾。及期，汝可急往救之，但呼其名，作吾傳語，必無他矣。已而果然。嗚呼，彼修行者，只為一必，尚至如是，況不知修行者乎？意其怒時，怒懷毒意故也。」

贊曰：制器尚象，蓋取諸易。或任私智，紊

亂成式。輕重權衡，增損丈人。肆其欺謾，甚於毀擲。民無則焉，豈非凶德。

見他榮貴，願他流貶。

傳曰：民凡有四：曰士，曰農，曰工，曰商。而榮貴者，獨出其上。福凡有五：曰富，曰壽，曰康寧，曰攸好德，曰考終命。而榮貴者，亦出其上。然則得到其地，豈偶然哉。皆其夙植德本，故能如是。彼不及者，其可妄生憎嫉而起念，願其流貶乎？國初，盧多遜貶朱崖，李符白宰相趙普曰：朱崖雖在海外，而水土不甚惡；春州雖在內地，而至者無生還。曷若改竄春州，外示台坐寬貸，而實置之必死之地。普不答。未幾，符亦坐事，竄宣州。上怒未已，普於是以前符語奏，即日改竄春州，到任未浹旬而卒。寇萊公之貶也，丁謂之力居多。初議竄地時，丁謂與馮拯同在中書，謂當秉筆顧拯曰：欲與竄崖，又恐遠涉鯨波，乃擬竄雷州。未幾，謂亦坐事當竄。拯

時猶在中書，適當秉筆笑謂曾參曰：鶴相始欲竄寇於崖，且有涉鯨波之嘆，今且煩相公遠涉鯨波一巡。遂與竄崖。然則見他榮貴，願他流貶，是可為乎？

贊曰：

名爵儻來，初匪實觀。媿彼花畦，抱甕以灌。風露潔鮮，煙雨散漫。榮枯瞬息，何足把玩。作如是想，忌心冰泮。

見他富有，願他破散。

傳曰：第二十祖闍夜他，問第十九祖鳩摩羅多曰：我家素信三寶，而常縈疾瘵。凡所營作，皆不稱遂。至如鄰家，久為旃陀羅行，而身常勇健，所作和合。彼何幸，而我何辜耶？羅多曰：善惡之報，有三時焉。世人但見仁夭暴壽，逆吉義凶，便自亡因果虛罪福，殊不知影響相隨，毫釐靡忒，縱經百千萬劫，亦不磨滅。時闍夜陀頓釋所疑。羅多曰：汝雖已信，而未能明，業從惑生，感因識有，識依不覺，不覺依心。心本清

靜，無生滅，無造作，無報應，無勝負，寂寂然，靈靈然。汝若入此法門，便可與諸佛同矣。嗚呼，世之見人富有，而願他破散者，能曉此乎？縱令富而不賢，會有敗日在我，則不可起心，而願其破散也。周義夫，虹縣人，其家大富，霸于一方，頗多恣橫。鄰郡有孫識之者，嘗從容戒之。義夫輒怒罵曰：小鬼何知，敢預我事。及識之登第，為本路漕，義夫猶怒罵曰：彼為監司，亦柰我何。一日，識之按郡至虹，適義夫撻人于市，為被撻者所訴。識之因諷，令訴其不法，即日送所司根勘。無何，首事者偶死于獄。議之，遂勅奏官吏，移送他郡。義夫竟坐謀殺處死，子孫皆編管家籍于官。不數年，識之移漕河北，適當軍興，闔家皆死于虜，一旦破散，無異義夫，非其報乎？錢若水為同州推官，富家有失一小女奴，為其母翁所訴，州委錄參根勘。錄參舊有求於富家不獲，因劾富家，以為父子共殺女奴，投尸水

中。獄具上于州，州委官審覆，亦無異辭。惟若水疑之，堅不署字，因自出己錢，密令人訪尋女奴。既而得之，民遂得脫。若非遭遇若水，為富民者，亦不免為一義夫矣。以愚觀之，非獨富民拜賜，錄參亦自拜賜，富民若死，錄參其有安乎？

贊曰：

龍驤之舟，可航萬斛。一葉掀舞，積羽猶覆。鵬鷗逍遙，各適所欲。賦量不同，安分斯足。內熱自焚，如飲鳩毒。

見他色一作室美，起心科之。

傳曰：生死輪迴，不得解脫。無非五陰，無非五蘊。義本一同，特譯家翻處，字稍異耳。何名五陰：歷歷分明，色陰也；領納在心，受陰也；心緣此理，想陰也；行用此理，行陰也；汗穢真性，識陰也。何名五蘊：四大所成，色蘊也；領納苦樂，并不苦樂，受蘊也；取種種境，想蘊也；諸心所法，貪而不息，行蘊也；於所緣境，了別為性，亦名心意，採

集所攝，識蘊也。一切世人，其於聲色，妄生惑著，莫不皆由乎此，使於色空有悟，豈至是耶？昔張寶知成都，有華陽李尉者，妻貌絕美，蜀中知名。寶有意於私之，因上元士女出游，密令人伺其出入，微服竊窺，一見果絕色也。於是徧託尼姑姪子，密諭此意，妻初峻拒，久而亦似有意。無何，李尉適以贓敗，寶因劾奏于朝，送獄根勘。獄具竄于嶺外，遂死于路。寶乃厚賂尉母，強委禽焉。蓋尉妻嘗有庸奴其夫之恨，至是故亦樂從。寶得妻大喜，妻亦滿愜其意，於是相歡，旦暮不捨。無何妻病，恍惚常見李尉在傍。未幾，遂至乎卒。寶亦得病，夢妻告曰：妾感公恩，不敢不報，尉已訴於上天，取公期在旦夕。公若深居，未必得便。苟或輕出，必為所執。一日暮坐，遙見堂下竹間，有一紅袖招之，意謂尉妻。偶忘其告，疾趨急赴。既至，乃尉毆且罵曰：你這賊，若不以紅袖招汝，汝肯來乎？良久，口鼻

流血，踣地乃卒。於是當知起心私之，誰目男子；然默含許意，實出女人。與其輕許而撥禍至是，孰若確然有守，於此生中，度此一報身乎？嚴武少時，與一軍使鄰居。軍使有女頗美，武竊窺愛之，因百計誘至其家，遂與俱遁。既而，軍使知之，詣闕進狀。詔出，制使收捕。武懼罪，夜醉女子，解琵琶絃縊殺，沉之于水。明日，制使至，則已無獲。由是獲免。及在蜀得病，明見女子在前責曰：妾之從君，固是失行，然實無負於君。君縱懼罪，曷不捨我而去，乃至見殺，真忍人也。妾已訴于上天，期在明日。武慚懼請命，黎明果卒。於此益知，女人稍有姿色，往往易至如是。使其一念不移，凜然冰雪，彼雖欲私，可得私乎？愚所以斷而言曰：起心私之，雖自男子；默含許意，實出女人也。游賞之地，墻壁之間，其可不謹。

贊曰：

子夏有言，賢賢易色。先聖之訓，必



曰好德。哲婦傾城，賢德之賊。心失其正，至於狂惑。降志辱身，一念之忒。

### 太上感應篇卷之十八

### 太上感應篇卷之十九

李昌齡傳 鄭清之贊

負他貨財，願他身死。

傳曰：李約為兵部員外郎，嘗舟行，與一商胡舟楫相次。商胡忽病革，邀約相見。既至，乃以一夜光遺約，且以二女為託，女皆絕色。明日胡死，財寶數萬，一舟之人，莫不窺覷。約乃悉籍其數，寄之于官，一女立為配，乃殮。當殮之時，復以所得夜光含之，人無見者。其後，胡屬來理財寶，約請官發，視夜光在焉，一時士夫，莫不稱嘆。魏子都暮行，逢一書生踣於道左，言苦心痛。子都下馬，為之撫摩。俄頃遂卒，視其囊中，乃有一卷素書，十餅黃金。子都為賣其二，以辦葬事。餘八枕其腦下，素書置之其傍。後數年，有從子都問屍所在？子都引至墓下。既而發開，金書俱在。子都聲名，由是大振。此皆前輩盛美，載之方冊，鏗錡

炳耀，盪人耳目，固非負他貨財，願他身死者之所能行也。然亦不可不略舉一二，庶皆知戒。永嘉有徐輝者，以賈販為業。嘗在丹陽，貸一大駟錢一千餘貫。未及償而駟死，遂默不言。駟家不知，亦不復索。其後，輝生一子，頗聰俊，輝切愛之。八歲乃病，召醫市藥，所費不可勝計。久而貨財耗盡，病猶未較。病子一日，忽語輝所親尼濕師曰：我欲歸去。尼曰：此汝家也，父母如此愛汝，汝復何歸？子曰：我乃丹陽人也。昔徐公貸我錢千緡，幸我死不償。今故託生其家，自來取之耳。言訖遂絕。又有白元通者，嘗欠東市楊筠見錢五貫四百文，未償而筠忽死，遂昧其事。死後，乃生筠家為驢。一日，筠子乘之入市，忽作人語：我乃白元通也，只為欠爾父見錢五貫四百文，遂至如此。今南市賣馱家，亦欠我錢，正如其數，可速賣我於彼，得錢償爾債便了也。筠子如其言，兩日驢死。然則負他

貨財，願他身死，豈遂己乎？

贊曰：

子胥報德，捐金於瀨。季札許劍，冢木是掛。在亡雖殊，我心匪懈。寄命託孤，名節攸賴。欺死之人，蠅蚋所嘬。

干求不遂，便即呪恨。

傳曰：不知愧耻，惟務干求，自非廉士。若以不遂，而便即呪恨，尤小人也。烏得韓昌黎責己待人之說，范忠宣責人恕己之說，而告之哉？昌黎曰：君子責己也，重以周；其待人也，輕以恕。重以周，故不怠；輕以恕，故人樂為善。忠宣曰：吾平生所學，惟得忠恕二字，一生用之不盡，乃至立朝事君，接待僚友，親睦宗族，未嘗須臾離也。又嘗戒其子弟曰：人雖至愚，至於責人則明；人雖至明，至於恕己則昏。爾曹但能以責人之心責己，恕己之心恕人，聖賢地位，不患不到。事干求者，能曉此乎？求之世間，其不手干求者，誠亦鮮矣。請為更舉一二，庶皆知

愧。扈郎中褒，嘗語人曰：昔知蘇

州吳縣，蘇州士夫，寓居者衆，其於請求，莫不皆爾。惟致政大監富巖，三年未嘗有一事相委。丘太博舜卿亦言，嘗知洪州新建縣。洪之右族，多撓官政。惟致政郎中王述，安貧杜門，衣食不足，未始告人。二公廉節，可謂過人，賢矣哉。

贊曰：

是心無欲，如水之平。一或有求，波浪勃興。視彼從違，起吾愛憎。少拂其意，怨怒相乘。盍亦反思，慾窒忿懲。

見他失便，便說他過。

傳曰：為人而偶至失便，亦其災也，其可便說其過。若說其過，即是幸災樂禍，況太上明以戒人，是可為乎？昔何申錫將拜命，忽得疾遂死。妻哭之慟，其嫂有姓趙者，從其旁沮曰：爾夫生平之日，恣遊妓館，視爾旁若無人，何必如是耶？妻自此即愛歇，不復追憶。一夕，趙氏忽夢申錫曰：死生有命，何可笑人。爾亦

只餘四年，死時更不如我。趙氏驚

覺大懼，及期果然。蓋死之時，其夫遠出未歸，庶生二子，皆亦癡幼，真不如也。李熊最能文，篤於孝而敏於行，鄉里稱之。無何得疾，一劑之失，遂至不起。妻雖有孕，兒猶未生，舉家驚憂，罔知所措。其妹婿有何時者，乃揚言於外曰：此郎平日自稱善處置事，此時為我處看。識者聞之，莫不薄其為人。越明年，其身亦死。然則見其失便，是可說乎？我之為人，果無過乎？

贊曰：

孟明一眚，終以霸秦。四十九非，遽得日新。跬步有失，未足觀人。從而下石，奚其不仁。是謂樂禍，災及其身。

見他體相不具而笑之。

傳曰：晉侯使卻充徵會于齊，齊頃公帷婦人使觀。卻子登，婦人笑，卻子怒。成公二年，遂有伐齊之舉。郭子儀病甚，百官造省者踵至。姬侍滿前，未嘗屏去。及盧杞至，則悉

屏之。或問其故，子儀曰：彼外陋中險，左右一見，必至笑侮。異日得權，吾族無遺類矣。子儀卓識，其與頃公，便自萬遠。又如平原君美人，笑蹙者槃跚行汲而被誅；趙縣人笑孟嘗君為眇小丈夫而被殺。此皆前車覆輒，為可戒者，惜人莫悟。人之有立，在乎器識，初不在於體相。體相雖劣，而器識有餘，其可輕乎？昔盧携風貌不揚，語又不正，呼其名携為彗，蓋短舌也。嘗以文上尚書韋宙，韋氏子弟輒肆輕侮。宙曰：盧雖人物不揚，觀其文章，有首有尾，異日必貴。其後，盧果策名，立登廊廟，獎拔京兆，至為福建觀察。王冀公欽若神貌疏瘦，舉止山野，復贅於頸。嘗以文謁錢公希白，希白頗蔑視之。適有術者在坐，乃驚嘆曰：此乃人中之貴，何可輕也？公曰：中堂內，便有此等宰相乎？術者曰：第恐不免，事不遠矣。不數年，果登台輔。孫文懿公亦風貌不揚，嘗赴試京師，詣縣乞判憑賣田。邑

尉李昭言戲曰：似君人物，有幾人耶。是年，文懿以第三人及第。不數年，判審官。是時，昭言方以選人赴調，一見大慚乃歸。侯元功亦貌陋形劣，初預薦鄉人，以年長貌醜不足敬，輕薄子作紙鳶畫其形於上，引線放之。元功適見，乃大笑，作臨江仙詞，題其上曰：未遇行藏誰肯信，如今未表名縱。無端良匠畫形容，當風輕借力，一舉入高空。纔得吹噓身漸穩，只疑遠赴蟾宮。雨餘時候夕陽紅，幾人平地上，看我碧霄中。是年登第，位至執政。然則見他體相不具，是可笑乎？

贊曰：聖人踐形，不以貌具。尊足者存，盲心是懼。未知駸蔑，或失子羽。美好長大，智族為輔。指不若人，奚必知惡。

見他才能可稱而抑之。

傳曰：見他才能可稱而抑之，此特小人忌前，非君子之所敢為也。王文公旦久疾不愈，上命肩輿入禁中

勞勉，數四曰：卿萬一不諱，使朕以天下事付之何人？公曰：以臣之愚，莫若寇準。上曰：柰剛褊何？公曰：若他人，則非臣所知。準遂大拜。呂申公乞致事，上曰：卿既不可留，誰可代者？公曰：陛下必欲用英俊經綸之士，臣所不知。如欲圖任老成，鎮靜百度，周知天下良苦，無若堯佐。陳遂大拜。錢樞密若水，喜汲引士類，孜孜靡倦，後進多出其門。歐陽文忠脩喜推轂賢士，未嘗有忌前好勝之心。苗待制時中為司農丞，體量梓州路常平役法第事，書成上之，薦能吏十有餘人，後皆進用。杜祁公衍歷知州提轉安撫，其有文學政事，殊行絕德，雖不識面，未嘗不隨能引用。孫中丞抃與唐介具中復，初不相識，但聞其勁正，遂力薦之，及為御史，皆有風力。章郇公與文潞公，初不識面，但聞其磊落，一見即力薦之，其後出將入相，果有過人。張忠定詠與張希顏，聲迹莫聞，但因殿直范延貴言

其橋道驛傳皆完葺，田萊墾闢，野無墮農，肆無賭博，市易不爭，更鼓分明，乃大笑曰：希顏固能吏，天使亦好官員。即日同薦，後皆有稱。若諸君者，其於才能，肯抑之乎？

贊曰：天之生才，將使用世。所貴先達，崇獎後繼。祁奚舉讎，祐甫拔滯。治功斯立，國事以濟。嫉賢忌能，鮮不階厲。

### 埋蠱厭人。

傳曰：按《玄都律》，過滿二千七百為一害，害者家出巫男覲女。然則生為巫覲，已是先世。獲罪之人，今於此生，又復為人，埋蠱厭人，即是益重其過，異日從墜，又豈今世之比乎？當知淪入三惡，其速如箭，真所謂嗚呼哀哉者也。昔簡州知郡季南壽，被攝至陰司，斷一陰獄。其獄乃熙州巫王自成，發遣鬼兵，殘害高震家二小口，又殘害張元家數頭牛畜。南壽惟律書斷云：王自成輒行邪法，殘害生人，及諸牛畜，合以鐵杖

決脊，送下無間，備受衆苦。無間罪畢，又當配為外道孤魂，一家子孫，悉令淪墜。所有門戶，亦當磨滅。然則埋蠱厭人，是可為乎？又有起心而使之為者，則罪又當重於巫也。按《妖怪錄》，昔呂用之伏誅軍人，發其中堂，得一石函，內有一枚銅人，長可三尺，身被桎梏，口貫長釘，背上疏列高駢鄉貫間里，官品姓字，為厭勝法，是以高駢每為，用之所制。嗚呼，高駢既為，用之所制，用之奚為，而又及於戮乎。當知埋蠱厭人，未必果能害人，適所以自速其禍，戒哉。

贊曰：巫蠱之興，漢幾中絕。信惑左道，其禍斯烈。傳奕試呪，胡僧反蹶。守用鬼兵，凝之死越。矢激則反，祇自作孽。

### 用藥殺樹。

傳曰：用藥殺樹，太上書以為戒者，不欲傷物之生也。是以辛靈以扶正草木，而能得仙；高柴以方長不折，

而孔子特稱其行。然則用藥殺樹，不獲罪乎？不聞伊鉢龍王以傷損樹葉，而墮入龍趣；太一洞龍以發怒傷稼，而謫受馬形乎？大抵大道好生，雖一物亦不可輒傷其生，況樹木中，亦有聖人託生其中。如《水經》所載，伊尹生於空桑是也。又有修行錯路，精神飛入其中，如《業報經》所謂韓元壽化為木精是也。又有中含靈性，無異於人，如錢師愈所斫松根是也。又有竊樹起禍，而先為樹神所知，如錢仁伉所竊牡丹是也。上文數事，姑置勿論。請以錢師愈、錢仁伉二事言之，庶皆知戒。昔東峽山飛來殿，有一古松。大觀間，為皇城使錢師愈從者斧其根，脂遂流溢。越明年，殿直錢吉過寺，夜夢一老叟告曰：吾非圓首方足，特植物中含靈性者，昨被錢師愈者，斧吾膝，取脂代燭，今尚流血。幸君為吾告長老，令急補治，庶幾不為盲風撼，得終天年，拜賜不淺。吉黎明遂行，不及告及，見縣令錢鉞，因與言

之。鉢至寺驗視，與吉所說無異，急為涪之。元師府檢校司徒錢仁伉所居，與中軍都虞候金沼相鄰。沼家有一本牡丹，每花開無慮三百餘朵，色丹如血，稜如金盃，加以餅子頂上，各有絲紋，一一如自然蛺蝶之狀，真奇品也。每開必張宴，伉必與坐。一夕，伉乃洪飲擊劍，裋服中單，背負大藍，腰插匕首，踰牆而入，竊取而歸，沼不知也。當竊取時，空中有聲，細如蜂蠅曰：一花三百朵，含笑向春風。明年三月裏，朵朵斷腸紅。明年花開，沼乃張宴，伉亦與坐，一見大怒。既歸，以刃決腸而卒，果符詩中之語。嗚呼，錢伉為花而死，神已先知於竊花之時。然則用藥殺樹，是可為乎？

贊曰：仁及草木，王業興周。蒼蔚朝濟，詩人隱憂。天壤生植，和氣所游。非理戕賊，無異斷溝。社櫟見夢，寓言匪浮。太上感應篇卷之十九

## 太上感應篇卷之二十

李昌齡傳 鄭清之贊

恚怒師傅。

傳曰：李至陽作《亢官賦》，其序略云：予少時苦羸疾，殆不勝衣。庚寅冬至，夢一道官，金碧明煥，一巨殿，一寶床，巋然其中。一金龍，蟠踞其上。碧髯金鬣，光體天地。旁有一道士，轉盼若電，顧謂予曰：此亢官也。大象無停輪，宜遠拜之。汝他日當事，此龍積疾亦愈。予將拜之，龍輒先拜。至道初，太宗立真宗為皇太子，命公與李沆同為賓客。太宗戒真宗曰：二臣皆宿德重望，不可輕待。吾選正臣輔導於汝，宗基固本，吾無慮矣。真宗恭稟皇訓，見必先拜，果符亢官之夢。楊礪未顯時，嘗寓居僧舍。一夕，夢至一府，一衣冠狀貌甚古，引礪至一宮殿。有三十餘真人，皆王者服，秉圭南向而坐，礪因拜之。最上一人，前

列一案，案上皆簿籍，橫列世人姓字。礪竊視，乃見己名獨冠其首。因再拜，請問休咎。專案者指示一人，謂曰：此來和天尊也。異日，當為汝主。其後，礪為襄王記室，歸語其子曰：吾觀襄王儀表，真所夢來和天尊也。然則為帝師傅，豈偶然哉。隨事諫正，自當如此，何可恚怒。聖君明主，必不然也，姑置勿論，請以一二善教導者言之，庶為師傅者，皆益加奮勵，不以恚怒而輒挫其志，不以束脩多寡而輒二其心。昔鄧至善教導，又能遇人以誠。其後子孫，皆躋膺仕。熙寧九年，神宗御集英第進士，時長子綰已為翰林學士，侍立上前，及唱名至其季弟績，綰下殿謝。又唱名至其二孫，又下殿謝。上顧而笑，王恭公從旁稱美曰：此其父鄧至善盡誠教導所致也。王文康公，英宗御后其父本以教授村童為業，過三十，生即不受。晚得一子，即文康也。以貧甚不能養，捨與西寺僧為童。僧教令讀書，且

以錢帛資助，竟登高第，舉賢良方正，拜樞密，遷給事，歷羣牧，及中丞，繼以尚書、工部侍郎、參知政事，俄遷同中書門下平章事。有二子，季子益柔，官至龍圖閣學士，有能名。孫男二人，謹言謹行，皆為大夫，與康節諸君游，亦有賢德。然則為師傅者，其獲報豈為小乎。大抵世人薄福，開悟者少，迷惑者多，我能方便勸導，臨機有悟，隻字皆師，一句入神，萬劫為種。此天所以熾其報也。不聞嚴君平以能導人於善，而能立證仙階；葛孝先以與人好說好話，而亦能度世乎？此則又非但得子孫貴顯而已也。

贊曰：

萬乘之主，臣所受教。矧惟後學，可無則倣。傳道解惑，訓以忠孝。悅而誠服，恭匪笑貌。忿傲一萌，心獨無校。

抵觸父兄。

傳曰：孔子作《孝經》，每夕必簪縹筆，衣絳單衣，面向北辰磬折，良久

乃拜。曾子抱河洛，七十二子皆從，蓋有禱也。及作《春秋》，亦復如是。一夕，夢有一道黑氣，從斗而下，直落案前。既開，乃微旨也。當知二書旨意，即斗極旨意。斗極位次玉皇，德符大道，持大造之柄，為三界之尊。斗極所予，即三界真司所以定而為福也。斗極所奪，即三界真司所以定而為罪也。然則二書之訓，是可叛乎？又按佛書，佛告阿難，左肩擔父，右肩擔母，如是遶須彌山百千萬匝，流血沒踝，猶不足以報其一日乳哺之恩，豈應輕出一語恚怒。又云：父母生養，劬勞辛苦，十月妊娠，三年乳哺，長養教誨，艱苦備嘗，冀其成立，才藝過人。以是思念，昊天難報。又云：若能供養父母，及家尊長，柔和恭遜，離羸言兩舌；棄捨慳慳，常修真實信。能行此七法，定為三十三天稱嘆接引，使居其處。然則父兄可抵觸乎？昔張義每旦，必告天謝愆。一日，被攝至陰司。陰君示以黑簿，簿中罪目，

一一皆已勾破，惟餘一事不勾。細視，乃義少時，於刈禾處，張目反顧其父，又微罵數語，以此不赦。蓋天律，不孝之罪，不通懺悔故也。義大懼，即日削發為僧，入山修道。又有李登者，以四舉不第，遠謁葉靖天師，請問休咎。靖默坐良久曰：汝曾侵占汝兄屋基，又敢興訟，至令受辱，上帝已削汝祿籍矣。後果無成而卒。於此益知，人於父兄，真不可輒抵觸也。

贊曰：

父頑母嚚，負罪引慝。小弃匪怨，彎弓而射，不友不慈，正用吾力。至誠所感，天理融液。未克己私，造次荆棘。

強取強求。

傳曰：強取強求，求之世間，多有如此。是以神仙試人，試多不過。昔曾慥於藥市，遇一道人，風貌甚古，手挈大瓢，中貯蚪粟，雜以一丹，告衆人曰：吾今信手捻出，每人授汝一粒，只看有福，當得吾丹。自旦至

暮，斛粟已盡，而一丹獨存，乃大笑。世之無人，遂置丹於玉局枯椽樹下。明日椽遂敷榮，方知道人乃呂翁也。大抵世人愚迷，作福者少，以福薄故，無自超度。況此闐闐，波波汲汲，尤難其人。真人之意，豈欲以此而激發之耳。請為更陳一二，庶幾強取強求者，稍知愧耻。昔孫泰於義興軍置一莊，錢已支半，忽聞有老嫗長慟數聲。因召問之，則曰：老婦逮事君翁，于此積有年矣。不幸子孫不肖，遽至破賣，不無悲耳。泰為惻然，明日即求出宅，復令其子掌之，自此不復再至。其後，有子名展，進士及第，入為省郎。張正議問與种世衡善，及持父喪，世衡遺以汝州田十頃，固辭不受。使者在途，而世衡已卒，其子用父命，不復受。蕪廢者，凡五十年。元豐中，郡守劉斐請以田給州學，朝廷不許，命還种氏。劉秘丞道原家極貧，然一文不敢妄取於人。冬寒歸自洛陽，皆無其具。司馬温公以一二衣韉，及一

事貂褥，贖之固辭，強之乃受。及至潁川，悉封以反。温公嘆曰：於先不受，於他人其肯受乎？曹修古者，四御史之一也。明道初，為御史雜知。因上言請太后還政，謫守興化，暴死于室。郡僚及鄉之賢者憐之，相與率錢數十萬，以贈其家。修古有女始笄，告其母曰：先人忠節，名聞天下，今不幸以直言謫死，且君子不家于喪，此錢決不可受，以免我先人全德。哭而不謝，遣之送者，固請一文，竟不肯受。求之天下，有幾人耶？捨此一報，身後安知不為呂翁收錄耶？

贊曰：負蝨困載，壁蝸高粘。物貪猶爾，人欲可占。而況天道，虧盈益謙。器滿則覆，露行必沾。何以見伐，虞公無厭。

### 好侵好奪。

傳曰：塗定辭，得道者也。居一石室，家貯五十萬錢，戒家人無妄取。去世數日前，乃歸語家人曰：吾平

生買物，必過所售價與之，冀其間以多為辭，即以所貯錢賞其廉。今終吾身，竟無一人以多為辭者，信知廉於財者，世俗果無人也。竊嘗靜觀，廉於財者固少，而好侵好奪者，何其多耶。惜其莫悟，我今好侵好奪，按如佛說，與盜賊同。異日受生，便當得貧賤之報，孰謂為不然乎？況有冥訟，卒未可脫。昔陸茂與留質鄰居，茂不已侵占其地，質以文契蠹損，官不能辯，竟為所侵。茂死數年，僧有懷德者，以病入冥，見茂桎梏受捶，因問其故，乃曰：只為侵占留質宅基，今尚拘此，和尚若還，切告為吾，說與家人，急令割還，庶幾早得出離。僧還言之，家人即日割還，質家堅不肯受，地遂成墟。郁丙亦與張先鄰居，忽遭回祿，俱成灰燼，先死奴年。同邑有湯福者，以病入冥。丙見福泣曰：吾舊與張先鄰居，吾屋柱址，已盡吾界，簷溜所滴，實張先所有。吾利其地，巧訟于官，竟強奪之。所奪不過三尺，而幽冥

之譴，不謂乃爾，吾今已伏辜矣，約使家人還之。然張先之子，見已徙居陝府，吾兒亦流落寓居建昌。況幽冥路隔，加以道路遙遠，非君無以通達，此意切告。為吾一出，拉吾兒令急割還，庶幾一段事了。不然拘此，無由出離。福還言之，由是傳播。嗚呼，二人報應，昭彰如是，豈陰司故以警于世耶。當知好侵好奪，無有不招惡報。

贊曰：爭田遜畔，一念權輿。爭則不足，遜則有餘。意見少差，隘曠頓殊。蝸角所競，蚊睫之居。達人大觀，八荒為衢。

### 虜掠至富。

傳曰：所謂虜掠，非因兵火，安得有之。但凡處官而侵漁百姓，剽竊公帑，即虜掠也。不聞撲滿之說乎？按《西京雜記》，在《漢書》名之曰鈔，顏師古釋餅也。其餅以陶為之，有竅，可內而不可出，人以貯錢。逮其滿，撲而取之，故云撲滿。多藏厚

亡，豈不然乎？當其聚時，惟恐不滿。洎至錢滿，撲碎乃已。餅破錢盡，兩皆成空。昔劉承勳為德昌宮使。李氏承吳王基緒，保有江左，久籠山澤之利，國帑甚富。德昌宮乃其外府也，金帛多貯其中，簿籍殺亂，不可鈎考。承勳專掌庫事，乃盜用無筭，窮奢極侈，富冠一時，家畜聲妓，多至百數。嘗指妓中一青衣曰：此女奴教其優劇，止學師巫持刀勅水一藝，所費已二千餘緡，即此而觀，富可知也。及金陵平，太祖薄其為人，止令為一鎮將，竟至貧困，餓死街中。然則虜掠至富，終能享乎？況身後之報，有三惡險道為可畏者。按《成都記》，昔文潞公出判長安，一日到犇牛堰，堰牛作人語，稱潞公名曰：我與文彥博二十年同官，今日有何面目，復出見之。堰卒以告，公命牽至。牛一見公，即伏地垂頭，淚下如雨，鞭亦不起。公大嘆曰：此公平生好偷官錢，今日果獲此報。因命宅庫支與二十貫錢，俾

增其料。當知虜掠至富，徒自墜也。贊曰：不辯禮義，萬鍾盜粟。白晝攫金，禦人於國。匱而藏諸，惟恐不足。施及孫子，田廬是鬻。瞻烏爰止，于誰之屋。

### 巧詐求遷。

傳曰：幼而學之，壯而行之，貴行己也。況登仕版，又與處鄉不同。忠直公廉，乃吾本事。今也求遷，而先濟以巧詐，則心術已自不是。置之廊廟，能忠直乎？出而臨民，能公廉乎？姦邪傾奪，闖茸駟儉，正是此輩。是以太上特著于篇，而前輩大老亦多抑而不用。若夫恬退之士，則道充乎內，用見乎外。其銖視軒冕，塵視金玉，雖欲處以要職，不由其道，亦不進也。李垂明道中知絳州，解官歸闕。閭門祇候李康伯謁曰：舜工文學議論，稱於天下，諸公皆欲以制誥處，公惟宰相以未曾相識，故未獲耳，盍一見之。垂曰：我若謁丁崖州，則乾興初已為翰林學



士矣。今已老大，每見大臣不法，輒面折之，安能隨羣逐隊，趨炎附熱，看人眉睫，以冀推輓乎。侯叔獻初為一尉，縣多盜賊。一日，有強盜十六人經其邑，叔獻盡擒獲，親押至府。時季絢尹開封慰諭之曰：公之才能，吾所深知，可一見本府推官，當與同狀論薦。叔獻曰：本以公事至府，事畢歸邑。若投謁求薦，非某志也。竟不一見。譚端明世勳為秘書正字，時蔡京得政，其子攸提舉修書，館中諂事者，皆越次陞擢。獨世勳編書竟日泊如也，六年不遷一官。狄密學在河中時，內臣旁午有矜權寵者，欲引援之。斐答以他語，已而謂所親曰：吾湘潭一寒士，今官至侍從，晚節安能夤緣近倖以希進哉。即謝絕之。嗚呼，若數君者，恬退如此，而擢用乃如此，豈待巧詐而後然耶。

贊曰：

惟器與名，天命天秩。惟德與才，名器不失。為臣之道，公廉忠實。劉

曄憂死，敗於智術。丁謂巧心，終於貶黜。

太上感應篇卷之二十

### 太上感應篇卷之二十一

李昌齡傳 鄭清之贊

賞罰不平。

傳曰：按《大藏》，天地初判，便有男女。以資生故，各貪積聚。以積聚故，遂相侵盜。以不盜故，相與推一。智者立之為王，使主賞罰，號曰平等。然則賞罰為用，非今日矣。昔王叟最有膽氣，每以賞罰不平、老於行伍為恨。或聞妖恠誕妄之事，即扼腕切齒，思欲除之。久聞翊聖真君靈異，因求出籍，日奉香火，早晚兩時，必再拜殿下，抗聲告曰：不平之事，實所不甘，今已老矣，身死之後，願得伏事左右，以備驅策。真君許之。死後數年，有設醮於殿上者，忽聞空中有聲曰：何不召吾道士？張守真曰：真君之下，從來止供養四位，不知君是何神，願顯名字。俄又言曰：吾乃昔日王叟也，已蒙真君收錄，使掌鐵輪，位在四將

軍下。後有醮祭，無相忘也。嗚呼，王叟發願如是，而真君收錄果如是，孰謂賞罰不平，上真不得而主知乎？大抵賞也者，所以勸功。罰也者，所以懲惡。若捨賞罰，何以勸懲，此太上所以著之于篇，而真君所以收錄王叟也。請為更舉一二，庶後之主兵柄者，皆知取法。劉旰之役，軍士爭挈人頭，以求賞給。乖崖曰：當奔突交戰之時，豈暇獲其首級，此必死後剪來，知後是誰。段倫曰：學士此言，果神明也。當時隨倫為先鋒，入賊用命者皆中傷被體。主帥已令，赴營將理。公曰：可悉昇來。既至，先錄其功，帶首級者次之。於是軍情大愜，以為賞罰至當，相顧懽躍。甘陵之役，惟定兵邀賞，怨憤幾至譟于城下。時韓魏公為帥，裁以兵律，察其橫于軍中不可教者，摔首斬于軍門。士有死于陣者，厚賻其家，卹其孤，使繼衣廩。恩威既信，士氣百倍。然則賞罰，可不平乎？

贊曰：賞罰在天，福善禍淫。賞罰在人，信如石金。彼則自取，我何容心。懲勸失當，亂亡相尋。明效大驗，著在古今。

### 逸樂過節。

傳曰：誌公和尚與梁武皇帝，論及樂事，請帝出死囚數人，以驗其說。既而，命囚各持滿水，周行庭下。戒曰：杯水不溢，當貸汝死。繼命作樂，以動其心。良久視之，無一溢者。帝乃嘆曰：汝聞樂乎？曰：不聞。師曰：彼正畏死，惟恐水溢，安得聞樂。陛下若亦如此，常懷畏懼，則逸樂之心，自然不生。慧遠禪師語大尹張秘曰：逆境易打，順境難打。逆我意者，只消一箇忍字，不片時間，便過了。若遇順境，則諸事順適我意，無你回避處。譬如磁石，與針相逢，不覺不知，定是合做一處。無情之物，尚猶如此，況我有情，全身在情裏作活計者耶。二師之言，可謂至矣。大抵人處順境，心無恐

懼，其於逸樂，不能無失。昔蔣希魯知成都，妓籍中有陳鳳儀者，姿技絕人，希魯愛之。每宴席，未嘗離側，以此招謗，朝廷知之。及潞公為代，頗懲其失，雖妓女滿前，未嘗一顧。一日，因宴客，襟紐偶脫，自上弗獲。鳳儀從旁上之，公轉鄉微笑。鳳儀曰：相公亦有覷人時耶。自此意愜，即多與語，有飛語聞。朝廷因令御史何郟，密察其事。郟至漢州，見妓女有楊其姓者，舞態頗妙，偶曰所謂楊臺柳也。以此一語，人因傳之，遂達聖聽。然則逸樂之地，可不謹乎？二公尚爾，況餘人乎？是以杜正獻衍食於家，惟一麪一飯，或羹其儉，則曰：某本一措大，名位壽福，冠冕服用，皆國家所有。一旦去身，復一措大，何以自奉。范文正公仲淹，嘗自言曰：吾每夜就寢，必計一日食飲奉養之費，及書所為之事。若相稱，則鼾睡熟寐，無復愧耻。苟或不然，則終夜不能安枕。呂申公公著，每自言曰：好衣不近節士體，

梁穀似怕腹中書。富鄭公弼亦曰：守口如餅，防意如城。謹畏如此，有逸樂乎，況過節乎。當知前輩行持，本自如此，非獨二師，言為然也。

贊曰：居無求安，仁亦用力。大禹乘橈，陶侃運甓。楚禍日戒，易厲夕惕。我獨何人，弛然寢食。昔賢有訓，寸陰尺璧。

苛虐其下。

傳曰：處官而酷責吏民，主家而過撻婢僕，皆苛虐也。不聞王君貺之父，以平生仕宦，棒不妄施，有子八人，皆登仕版，而君貺又為天下第一乎？又不聞袁廊之母，以平生過撻婢僕，死後乃墮地獄，備受衆苦乎？此皆善惡果報，顯顯為可戒者。又有一等過撻孕妾之人，未言孕妾腹中之子，先已受害，絕人後嗣，罪豈輕乎？惜其莫悟，我今無子，彼乃有之，即因果也。我必欲有，果能有乎？必欲使無，彼果無乎？況嗣續事大，予奪由天，造化自有妙處。昔

費孝先以卦影著名，時奉禮郎揚紹言因詣其肆，求決一卦。視影，乃二婦人共生一子。紹言大驚，告以實曰：某艱於得子，因置一妾，今妾有孕，而老婦亦孕，豈此是耶？孝先曰：姑驗之，及妾臨產，午夜乏人，妻自抱持子生，而妻腹亦失。豈妾當生子，其妻不能無語，故亦孕之，姑以塞其意乎？造物玄妙，其巧如此。佛言：處於富貴，為人之上，好行鞭撻，恣行捶打，死墮地獄，數千萬歲，受諸苦毒。地獄罪畢，生水牛中，貫穿鼻孔，挽船牽車，大杖打撲，償其宿業。又曰：身生惡瘡，以鞭撻衆生故。然則吏卒婢僕，可苛虐乎？況孕妾乎？佛語如是，而太上之語亦如是，其可不戒。

贊曰：

公侯士庶，第級相承。輿臺牧圉，奔走服乘。分雖有異，情則可矜。夷蠻閩隸，列於禮經。彼亦人子，仁哉淵明。恐嚇於他。

傳曰：觀音菩薩於怖畏急難之中，能以無畏施於衆生，得證圓通，斯為第一。是故閻浮衆生，皆號之為施無畏者。然則恐嚇於他者，當如何哉。是以君子不為，每遇人有怖畏，無不力行安慰。惜其不知好驚怖人，一死之後，便當生為麀鹿。夫麀鹿為物，晝則避畏諸獸，動輒驚走，睡則掛角樹枝，弓曲而睡，睡即手足驚散，既驚復睡，既睡復驚，自昏達旦，竟無一睡之安，蓋其報也。其有居人之上，而恐嚇於他，乃至保頭吏卒及諸惡少，肆行恐嚇，以圖利者，豈曉此哉。不聞李舜卿以佃戶張三欠租，必欲令還，遂至自經。孫季明以女使來喜，與小奴作過，必欲研究，尋亦投水而死。未言身後果報，時下已自不安。雖其自殺，實我殺之。試取《太上業報因緣經》一觀，當知此言不妄。

贊曰：

古者善政，莫如人安。鴻鴈還定，蛇蛟結蟠。悍吏叫號，股栗膽寒。善

良氣塞，駭懼百端。孰任其責，字民之官。

怨天尤人。

傳曰：閻浮世界，素號闕陷。人處其中，安得每事稱意。其不稱意者，乃其分也。大抵積累薄而享用亦薄故也。然則天可怨乎？人可尤乎？非徒無益，適所以自及於禍。昔胡昂落魄不事事，每以累舉不第，灑酒罵天。太平興國初，羈游河朔中途，忽有一幅黑紙，從空而下，落於馬前。昂取視之，皆黃字天篆，乃上帝譴昂之詞。昂素精篆籀，讀畢怒曰：何浪語也。擘捨擲之，躍馬而去。俄頃，片雲忽起，雨亦隨至，霹靂一聲，則人馬俱仆，昂遂震死。僕夫收拾行裝，急奔前店，則風清日麗，子無纖翳。著作佐郎焦俊明，早歲登第，久而不遷，每以轆軻怨天，尋又上章致禱。是夕，即有一幅素書，墜于爐前。細視，乃天篆一十六字。俊明不能辨，聞何仙姑有道，持往問之。姑曰：此天篆，不必問。

俊明苦告，乃曰：蓋云受金五兩，折筭十年。枉殺一人，死後處分。果有諸乎？俊明語塞不能對。當知人須自省，不可輒怨尤也。

贊曰：

楚求諸侯，投龜而詬。紹屺官渡，田豐不宥。亮敗祈山，痛自引咎。三數其罪，子夏敬受。試觀諸人，孰賢孰否。

訶風罵雨。

傳曰：孔子曰：迅雷風烈必變。又曰：若有疾風迅雷甚雨，則必變。雖夜，必興衣服冠而坐，蓋畏天也。豈若小民，夏暑雨，惟曰怨；冬祁寒，亦惟曰怨乎？惜人不知，風者，天地之使。天有八風，應乎八節，陰陽以之變化，萬物以之生育，是故王者順八風，行八政，當八卦。立春日，條風至，赦小罪，出稽留。春分日，明庶風至，正封疆，修田疇。立夏日，清明風至，出幣帛，禮諸侯。夏至日，景風至，辯大將，封有功。立秋日，涼風至，報一切，祀四鄉。

秋分日，閻闔風至，解懸垂，不張琴瑟。立冬日，不周風至，修城郭，守邊城。冬至日，廣莫風至，誅有罪，斷大刑。雨者，河伯之使，其神素衣玄冠，乘朱鬣白馬。其衆皆有兩隊，一名左落千，一名右落千。每隊各有五萬軍馬，簇于雲端。下其雨種，雨隊在前，風車在後，雨之多少，各有其數。雨種有二，一如世之馬牙硝，名曰乾雨；一則以二小項瓶兒中貯，人間少水，即常時所降雨也。太上曰：吾自造化天地以來，或號元始，或號虛皇，在雨中即為雨師，在風中即為風伯。然則風雨之過，可訶罵乎？昔太公為灌壇令，期年風不鳴條。文王一夕，夢一美婦人，當道哭曰：妾乃東海太上神女，嫁為西海之婦，灌壇正當歸寧之路，其令有德，不敢以疾風暴雨過，何日可得歸耶？文王明日，即召太公。太公出境不數里，則風雨已大至矣。世之訶風罵雨者，有德如太公平乎？

贊曰：

堯舜之世，十雨五風。洪範咎證，曰狂曰蒙。人事不修，變異乃逢。敬天之怒，寅果嚴恭。惟曰怨咨，小民之恫。

鬪合爭訟。

傳曰：曾子曰：犯而不校。老子曰：上士不爭。佛氏曰：我得無爭三昧，人中最為第一。又曰：六度萬行，忍為第一。昔張公藝九世同居，高宗幸其家而問本末。公藝書忍字以對，高宗為之感泣，賜以縑帛而去。則知凡事有不平者，忍忍可也。不忍必至於爭，爭之不止，必形於之，訟之有司，則遭禁錮囚繫者有之，笞箠敲榜者有之，傷肌膚殘手足者有之。其耻辱痛楚，莫得以告。父母與之憂感，妻子與之涕泣，兄弟與之驚惶，親舊與之嘆息。傾慳囊以求勢援，具酒食以賂吏胥，幸而旬日事勝，亦庶幾矣。不幸積年累月，翻來覆去，自邑而至郡，自郡而至監司，自監司而至臺部。其所競者甚小，而所害者甚大。所爭者不數緡，

而所費者已百倍，殆未免竭家財以用之，鬻田園以繼之，於親則失養，於妻則失愛，於子則失教，日不暇奔走於訟庭之間，受制於官吏之手，雖有高堂大廈，安得而居乎？煖衣飽食，又安得而自享乎？嗚呼，爭訟日甚，怨仇愈深，如火燎原，不可撲滅。使其初之，能忍其患，必不至於此極也。雖然訟有出於不得已者，固人之所未免，況峻鬪爭競，教人以訟，而規求其財，以圖口腹之欲，吾未見不殃及其身，又遺患於子孫矣。更請以一二釋紛解鬪者言之，庶幾欲解不得，解者皆得。《遭值經》云：布施有二，財施者，人道中有；法施者，大悲中有。然則法施功德，豈為小哉。今於兩地忿爭，能以一語布施，使之兩得安樂，亦法施也。昔李無競調官東京，至朱仙鎮，見二丐者爭打於道曰：我終年乞丐，得錢數百，被你借用，頑不肯還。無競見其毆擊頗猛，因以己錢代償。一乃捨去，一曰：君能為吾解鬪，真善人

也。吾住在隆和曲，他日訪我，必當有報。無競行既數里，復自念曰：彼丐者也，而欲謝我，豈異人乎？既至東都，乘暇訪之，果得其人，延無競至其廬。飲以酒，無競辭。復進以桃，無競重拂其意，略取二枚懷之。中途取看，乃紫金也。崔煒於開元寺，見一乞食老嫗足蹶，覆人酒甕，被當壚者毆擊良苦。煒趨解曰：酒直幾錢？當壚者曰：直一貫。煒即脫衣，為之代償。老嫗不謝而去，異日復遇諸途，乃曰：昨蒙為吾解難，不敢忘也。吾善治贅疣，今有越井崗艾少許，聊以為謝。若遇贅疣，即可以此治之，不過一灼，無不愈者。其後，遇一僧人，贅垂于耳，一灼立愈。僧因引至一家，其家大富，主人有贅，一灼亦愈。由是知名，延之者衆，一旦遂成富室，煒不敢忘，日夜在念。一日，復遇一人告曰：老嫗者，乃鮑姑也，鮑靚女，葛洪妻也。行此灸於南海者，積有日矣。然則見人爭訟，當鬪合耶，即當

解釋耶。

贊曰：

理到之言，解紛排難。讒邪昵昵，亦足為間。疑忿友集，悔咎滋蔓。公子二爭，卒為國患。吁嗟口給，賈福以販。

妄逐朋黨。

傳曰：太上以二十四門簡要攝念之法，授普濟真人曰：好殺損傷，以慈悲攝。偷盜劫奪，以分義攝。邪淫放蕩，以貞潔攝。慳貪恠惜，以布施攝。瞋怒鬪爭，以歡喜攝。愚癡顛倒，以方便攝。綺語浮華，以簡正攝。妄言虛誑，以信順攝。惡口呪詛，以誦念攝。兩舌罵詈，以讚歎攝。飲酒食肉，以齋戒攝。誹謗毀，以講說攝。踞傲輕慢，以禮拜攝。剛強豪健，以柔弱攝。不信罪福宿命，以因緣攝。執繫有無，以中道攝。是非彼我，以平等攝。貪濁汙穢，以清淨攝。堅固不移，以輪轉攝。造作不休，以無為攝。局守不變，以圓通攝。躁競不安，以靜定

攝。憂悲不樂，以逍遙攝。煩惱不釋，以解脫攝。大抵世人惡習，卒未易除，是故太上開示此法，使知攝制也。今乃妄逐朋黨，不免綺語浮華，妄言虛誑，兩舌罵詈，是非彼我，按如此法，參以此篇，當知此曹，皆當得罪於太上者也。不聞《朋黨論》乎？《論》曰：君子以同道為朋，小人以同利為朋。人君但當退小人之偽朋，用君子之真朋。歐陽之言，可謂至矣。昔契丹與夏人大戰于黃河外，時范文正公被命鎮撫河東，請以兵從。杜正獻公以契丹未必來，兵不可妄出。文正大怒，至以語侵正獻，正獻不以為恨。既而，契丹果不來。若二公者，皆世俗指為朋黨者也。至論國事，矛盾乃爾，黨可逐乎。司馬君實與范景仁相得懽甚，皆自以為莫及。嘗曰：吾與子生同志，死同傳，用捨大節，皆不謀而同，所論三大事，其言若出一人，相先後，如左右手。又曰：吾與景仁兄弟也，不同者姓也。及論鐘律，則反

復相非，終身不能相一。君子是以知二公雖同，非苟同也，黨可逐乎？大抵入而處家，出而處鄉，事無巨細，皆當付之公論，其可但以朋黨，輒妄逐乎？

贊曰：

言有是非，折之以理。人有異同，視其臧否。獨立似介，或非端士。道同志合，必也君子。辯別正邪，朋黨決矣。

太上感應篇卷之二十一

# 太上感應篇卷之二十一

李昌齡傳 鄭清之贊

用妻妾語。

傳曰：荀子曰：妻子具，而孝衰於親。中下之人，率以如此。若夫賢婦，豈其然乎？沈澤之年二十五，即廢學謀利。其妻石氏最賢，力諫不聽，乃苦告翁姑曰：新婦姊妹皆嫁為士人妻，今沈郎不肯讀書，令媳婦歸寧，羞見親戚。今日備束脯，乞為擇師，勉令就學，不敢望其亨達，但成一好秀才，不辱門下，亦賢夫矣。翁姑從之，後五年，澤之果登第，官至正郎。賢矣哉，石氏言念如此，而收效果如此。其不賢者，曷不以此為法，而乃悍妬陷夫於惡乎？不聞水丘之事乎？度支員外郎王瀆再娶高氏，前妻子經大不孝，奉養殊闕。瀆死數年，經有二子，皆已成立，相繼暴卒。經亦喪明，始悔前非，克己反善，每自言曰：此皆水丘婦，及其

兄弟教我，使我至此。每旦及夕，必策杖詣母定省，高氏力止，終不輟。經卒，水丘婦亦病癩卒。若經者，真所謂用妻妾語、違父母訓者也。幸已知悔，尚至如此；若不知悔，更當如何？

贊曰：

趙衰守原，寺人薦進。問而得賢，猶不可訓。陽之從陰，理則非順。美甚徐公，言以私徇。謀及婦人，雍氏尤信。

違父母訓。

傳曰：按藏教，父母及子，有相感業。神乃入胎，依地水火風，衆緣和合，漸得增長。一七日，如藕根；二七日，如稠酪；三七日，如鞋韞；四七日，如温石；五七日，有風觸胎，名攝持，兩臂兩脛及頭，五種相現；六七日，有風名旋轉，兩手兩脚四相現；八七日，手足十指，二十四相現；九七日，眼耳鼻口，及下二穴大小便處，九種相現；十七日，有風名普門，吹令堅實，及生五臟；十一七

日，上下氣通；十二七日，大小腸生；十三七日，漸知飢渴，飲食滋味，皆從臍入；十四七日，身前身後，及左右二邊，各生一百五十條脉；十五七日，又生二十種脉。一身之中，共有八百吸氣之脉，至是皆具。十六七日，有風名甘露，皆為安置二眼，通諸出入息氣；十七七日，有風名毛拂，能令眼耳鼻口、咽喉胸臆，一切合入之處，皆得通滑；十八七日，有風名無垢，能令六根清淨；十九七日，眼耳鼻舌四根成就，得三種報：曰身，曰命，曰意；二十七日，有風名堅固，二脚二十指節，乃至一身二百大骨，及諸小骨，一切皆生；二十一七日，有風名生起，能令生肉；二十二七日，有風名浮流，能令生血；二十三七日，生皮；二十四七日，皮膚光悅；二十五七日，血肉滋潤；二十六七日，髮毛爪甲，皆與脉通；二十七七日，髮毛爪甲，悉皆成就，母所飲食，行住坐卧，兒皆辛苦；二十八七日，生屋園池河等

八想；二十九七日，各隨自業，或鰲或白；三十七日，鰲白相現；三十一七日，至三十四七日，漸得增長；三十五七日，支體具足；三十六七日，不樂住腹；三十七七日，生不淨、臭穢、黑暗三想；三十八七日，有風名籃花，能令長舒兩臂，轉身向下；次有一風，名趨下，能令頭下足上，以向生門。然則父母生育，功侔造化，其為恩也，豈為小哉。洎至生矣，又須湔濯以時，乳哺無缺，疾病救療，臨履扶持，然後得成為人。既成人矣，又須男教以學，女則教以女工。迨遷長成，婚嫁時至，擇婚辦嫁，耗精損神，事尚未周，晚景已逼。況人命無常，流光易失，今日雖存，明日難保，正令曾閔報德之日，已自不多，萬一蹉過，生死永隔，不復永報之日。苟有訓誨，其可輒有所違。昔劉建德所生母病，其妻送至尼寺，遣二婢供侍湯藥。母不樂往，妻甚悍，劉不能制。母死，乃大罵曰：我必訴汝於陰。不數日，妻卒。數日，

劉卒。妻方大殮，忽雷霆一聲，腹皆拆裂，臭聞數里，雖至親亦皆走避，無一在者。然則用妻妾語，違父母訓，是可然乎？元漏七七，今用《法苑珠林》，其日手足掌生。

贊曰：厲人生子，恐肖其貌。欲其夙成，古有胎教。舍曰晉言，無匪忠告。袖簡當持，義方宜蹈。為人子者，胡不慥慥。

### 得新忘故。

傳曰：謝少原之婦，刈薪而失著簪，哭其哀。或問其故，則曰：不忘舊也。此事遂收入《文選》。魏王與龍陽君共船釣魚，得十餘枚，盡棄之。君乃泣曰：王始得魚甚喜，後得益多，遂至棄前所得。今臣得拂枕席，爵至人君。四海之內，美人甚多。聞臣得幸，畢褰裳而趨。臣亦同所得魚，將棄去矣，烏得無涕？王乃令曰：敢言美人者族。此亦收入《文選》。大抵人貴不忘其初，得新忘故，即忘初也。造怨掇禍，端起乎

此，孰謂無害乎？昔張文節在政府，國封時節入見莊獻。莊獻見其二婢陋甚，因命國封，令為別置少者，國封如戒。文節一見，乃指二老婢謂曰：此皆久在左右，若遂出之，則無所歸矣。如今姝者，皆未笄，嫁與少年，前程未可量。若使守一老翁，何益於事？即日面奏嫁之。范文正以吏部員外郎出守，時有三婢從。及官太歷二府，乃至於薨，凡十年，不增一人，亦未嘗輒易。賢矣哉，此固厚德，然不足以盡二公盛美。即此而觀，則其他皆可知也。

贊曰：

故舊不遺，民德歸厚。惟蓋不棄，猶念其久。糟糠之妻，貧賤之友。故劍弗求，短檠何有。世事或然，天理則否。

### 口是心非。

傳曰：《論語》一書，學而時習一語，獨冠其首。大抵學貴乎習，不習不足為學。念起于中，即念而習。事至于前，即事而習，即時習也。所謂



學也，不惟讀書。但凡入孝出悌，泛愛謹信，乃至親仁，皆為學也。惜人不此是習，而乃以口是心非為習。不聞《楞嚴》所謂姪習、貪習、慢習、瞋習、詐習、誑習、怨習、見習、枉習、訟習，如是十習，死後皆當受地獄六畜之報。昔庾道季以久病，醮告保命真君曰：庾道季身處陽官貴勢，不能順天用法，憤憤慢信，心口不同。自少及長，善功無一，積惡不改，罪目已定，死在旦夕。方欲修德，以求濟免，不已晚乎。數日果卒。嗚呼，當其口是心非時，安知已得罪於天乎？

贊曰：顏子之過，於心不貳。言出于口，乃與心異。方其矢詞，寧不內媿。鹿馬附姦，鳳爵獻媚。又其甚者，足香之類。

貪冒於財，欺罔於上。

傳曰：忠也，廉也，人臣大節。今乃貪冒其財，而又敢欺罔其上，所為如是，臣節安在。多見旋踵破敗，而子

孫狼狽者，必矣。昔曹翰奉使江南，中主日以食物珍果餉翰，翰必連器血合圓悉留之。既而，純銀果合都盡。間用稜合，即不受。中主不得已，令近臣督工匠鍛金造器，用猶不足。一日，宴於便殿，出兩副水晶盤盞以為飲器。翰屢目之，因以賜。翰

猶曰：此珍異之物，歸當以獻天子。父母若見，必欲取之。奈何中主，又加賜二副。前後所獲，無慮數十萬。及南征所掠金寶，亦鉅萬。且上言

曰：臣於潁州造一佛寺，鄉見廬山東林寺，寺有五百鐵羅漢，願載以歸。上許之，於是調發官船十餘艘，載其所獲，各以羅漢置其上。時人目為押綱羅漢。太平興國初，為威遠軍節度，強取民間絲帛菽粟，為汝陰令孫崇望所奏。獄具免死，流登州，家籍于官。死後數年，子孫有乞丐於海上者。梁迥以閤門使使江南，亦冒于貨，誅求無度。及後主餉以時果食物，若貯以金銀雜寶之器，迥則喜而受之。苟或貯以他器，則

怒而不受。前後所獲，尤倍於翰。上聞大怒，尋亦得罪。與其如此，而旋踵破敗，孰若忠廉有守，永保富貴乎？

贊曰：利則危國，義不忘君。苟志於義，廉潔忠勤。處心以利，姦欺自文。裝橐歸報，鞭靴表聞。貪廉忠偽，義利之分。

造作惡語，讒毀平人。

傳曰：人本淵清玉潔，我若造為惡語，以讒毀之，萬一不獲昭雪，罪其輕乎？或至反受宜也。石介以黨議起，罷監歸徂徠山，得病而卒。會山東舉子孔直溫謀反，或云直溫嘗從介學，於是夏英公曰：仁宗曰：介實不死，北走胡矣。尋有旨，將介妻子盡行編管。又出中使，令與京東部刺史，取發介棺，以驗虛實。時呂居簡為轉運，謂中使曰：今發冢而棺空，則介果北走矣，雖孥戮未足為酷。萬一屍在，未嘗叛去，即是朝廷無故剖人家墓，何以示後世耶？於

是與中使計議，但責凶肆人，及會葬，門生親識，軍令狀以應詔。既而奏上，仁宗亦已悟。英公之譖尋有旨，放介妻子還鄉，人皆多居簡之有識。未幾，英公死，仁宗將往澆奠，吳奎曰：「夏竦多詐，果已死耶？」仁宗憮然。既奠，復躊躇者久之，於是命大闡，去竦面羈，以驗是否。一時士夫，皆謂剖棺之報。嗚呼，夏竦欲破介棺，而身死亦去面羈。破棺去羈，相去一間，孰謂一語之惡為報乎？

贊曰：常情不美，喜聞是非。一語之醜，郵傳四馳。或出諧謔，以資笑嬉。樂謗盈篋，曾母下機。流矢中人，駟不及追。

### 毀人稱直。

傳曰：立身行己，要當行其在我者，必使正直，無諸邪曲，斯為直矣。苟或身未能直，但以毀人為直，則近乎訐，烏得謂之直哉。昔鄒浩以極諫得罪，世猶疑為賣直。張繹先生

曰：君子之於人也，當於有過中，求其無過；不當於無過中，求其有過。世皆以為知言。夫為人，如鄒浩，可謂無愧。以諫得罪，不失為忠，世猶疑為賣直。以此觀之，當知毀人稱直者，不惟得罪於太上，先當得罪於清議也。竊嘗論之，毀之一字，最為惡毒，甚至妄有汙讟，使人無以自辨，往往有不測之禍，起乎其間，咎當誰執。其為罪也，豈為輕乎？李叔卿為郡功曹，最號廉謹，同僚嫉之。有孫容者，宣言於眾曰：「叔卿妻其妹，在吾視之，狗彘也，夫何足道。由其一語，事遂傳播，叔卿坐此，抑鬱不得志，遽至自殺。其妹亦悲憤，詣府門一哭，遂自經。不數日，忽雷雨暴作，震霆一聲，則孫容已斃於雷斧之下，置屍於叔卿之門。及葬，雷又發冢，竟至腐爛，骨肉狼籍。世之好毀者，豈慮此乎？」

贊曰：古者交絕，不出惡聲。諫必焚草，懼其沽名。直雖正道，訐豈人情。羊

證安忍，麟經晚成。耻言人過，漢俗致平。

### 罵神稱正。

傳曰：孔子不語怪力亂神。又曰：敬鬼神而遠之。不語者，不欲輕議也。敬即畏也。聖人尚爾，況餘人乎？神也者，聰明正直者也。爾自稱正，神不正乎？為人而正，自當如此，何預於神，乃敢慢罵。不聞阮瞻之事乎？阮瞻作《無鬼論》，忽有一客踵門求見，相與談論，名理才辨，瞻不能折。良久，論及鬼神，瞻復堅執，不以為有。客忽作色，罵曰：「鬼神之事，上古聖賢，皆以為有。子獨抗言，執以為無，吾即鬼也。忽變為異形，須臾消滅。瞻嘿然心沮，歲餘遂卒。然則罵神稱正，是可為乎？又不聞舍利弗之事乎？昔舍利弗在耆闍崛山，時有一鬼，名優波伽吒，語伽吒鬼曰：「此人今日新剃鬚髮，吾當往打其頭。既而，舍利弗果患頭痛。目連告曰：「此優波伽吒鬼打汝頭也。此鬼打耆闍崛山，能令碎

如糠糲，況打人而不苦痛乎？汝真大德大力人也。不然，則應手粉碎矣。嗚呼，此果位人也，但以新剃鬚髮，尚為所侮，況身未必正者乎？正令身正，何預於神，乃敢罵之，戒哉。贊曰：

成湯數桀，首曰慢神。天地社稷，日月星辰。國有常祀，禮典是循。祭非其鬼，淫祠勿親。敬而遠之，孔訓可遵。

### 太上感應篇卷之二十二

### 太上感應篇卷之二十三

李昌齡傳 鄭清之贊

#### 棄順效逆。

傳曰：石碣曰：賤妨貴，少凌長，遠間親，新間舊，小加大，姪破義，六逆也。君義臣行，父慈子孝，兄愛弟敬，六順也。棄順效逆，所以速禍也。大抵逆順之說，要無出於此也。

昔長安大姓范偉，積產巨萬，乃冒武公縣令范祐為祖父。持祚為縣令時，黃勅家不徭役者，五十餘年。更西事，下戶調發，皆至困弊，偉獨自若。及劉敞尹長安，遂發其事，抵罪家籍于官。周總以累舉不第，遂往譙郡，拜都吏周吉為父，日處諸子之列。三代名諱，一切用焉。明年偶得一解，其父以詩責之，總得詩大沮，慚恨遂卒。為人如此，豈非所謂棄順效逆者邪，惜其不聞南極壽星真君之言。太極真人徐來勒嘗遇南極壽星真君，請問壽夭吉凶之事。

星君曰：天道福善而禍淫，神明賞順而罰逆，君能刻意為善，恭己順天，靜將道宜，動與福會，如此則我命在我，不為司殺所制，鬼神所執，不求壽而自壽，不務生而自生。苟或隳綱紀，違天地，肆愚悖，侮神明，反仁慈，虧忠孝，明則刑網理之，幽則鬼神誅之。及將死而言善，過盈而求悔，亦不可得。按如星君之言，棄順效逆，是可為乎？

贊曰：

公無不順，私無不逆。公本理義，私出胸臆。抑情徇理，所向端直。一念有差，萬事倒植。惠吉逆凶，維帝之則。

#### 背親向疏。

傳曰：孔子曰：不愛其親，而愛他人者，謂之悖德。不敬其親，而敬他人者，謂之悖禮。大抵親疏之分，不可不明。悖禮悖德，不可不戒。昔申積中本宣義郎起之庶子，祖母乃翰林學士楊元素之姑。時元素有子，嬰疾不事事。積中始生，元素以

中表故，取以為子。既而，元素連舉二子，而積中亦知所出，嘿不敢言，益盡孝謹，讒間不入，元素愛之。凡兩遇奏薦，皆力辭不肯受，推以官其

二弟，誓志以科目自奮。元豐五年，果登進士。第後數載，元素卒於餘杭，積中扶護以歸。既葬終喪，復為弟妹選名族，辦婚嫁。事畢，即盡以家財付二弟，拂袖而出。且作《歸宗

議》一篇數千言，以示親屬。大抵言

所生所養，恩皆一也。所養既粗報，所生亦不可後。既歸，拜其父母，且訪尋所生母杜氏。久而得之於閭閻中，杜氏垢面跣足，殆不聊生。子母抱持大哭，感動行路。粵二十年，父母死。既終喪，復以先疇盡歸諸兄，徒手而出，僦屋以居。或勸令略受一二，積中堅不許曰：楊家貲產，十倍於此，吾猶棄如弊屣。今於諸兄生計，其忍割取，以自資乎？士論莫不偉之。時許光疑為轉運，論薦于朝，降詔褒美，賜以一官，除永興等路提舉學事，未幾乃卒。許公復同

宣和殿學士薛嗣昌、中書舍人宇文黃中，列言于朝，再降詔，官其一子。噫嘻，世間如積中者，有幾人耶，真所謂善處者也。

贊曰：

人之至親，莫如父母。昆弟同氣，如足如手。演而伸之，族至于九。等□雖殊，情義當厚。捨而之他，悖德奚取。

指天地以證鄙懷。

傳曰：天有三十二覆，地有三十二載，天覆地載，各理一炁。人居其中，順吉逆凶，其應如響。小心寅畏，尚虞獲罪，況敢輒以鄙懷，指以為證，不亦瀆乎。昔王沂公之父，雖不學問，而酷好儒士。每遇故紙，必掇拾滌，以香水收之。嘗發願曰：願我子孫，以文學顯。一夕，夢宣聖拊其背曰：汝敬吾教，何其勤歟。悵汝已老，無可成就，當遣曾參，來生汝家。晚年果得一子，乃沂公也，因以曾字名之，竟以狀元及第，官至中書侍郎、門下平章事。李景遜母

鄭氏，酷教諸子。一日墻壞，得一甕錢。鄭氏焚香祝曰：豈天地愍我子母孤寡，特以賜乎。然妾所願，惟願諸子學業有成，仕而受俸，此錢非所願也。復自拵之，其後景遜果登第，官至太子少保。嗚呼，王君一言如此，鄭氏一言如此，而天地應之果如此，孰謂指天地以證鄙懷，而天地不譴責乎？

贊曰：

魯莊誓母，殊失孝慈。不仕誓墓，人誚義之。戴履兩間，十目難欺。心迹洞然，自可無疑。皇天后土，詎聽淫辭。

引神明而鑑猥事。

傳曰：一身有一身之神，一宅有一宅之神。腦神經根名泥丸，眼神明上名英玄，耳神空閑名幽田，鼻神玉壘名靈堅，齒神鐔鋒名羅千，舌神通命名正倫，髮神蒼英名太元，重樓十二名太一，肺神皓華名虛神，肝神龍煙名舍明，膽神龍耀名威明，心神丹元名守靈，脾神常在名魂停，腎神玄

冥名育嬰，掌神存想名景寧。乃至玉童君、玉女君、道父君、道母君、師父君、師母君、飲海君、合命君、三十六獅子君、丹田君、上和中和下和老君、三元真君，皆身之神也。門戶之鬼名丞伯，開閉之鬼名士伯，供大門鬼名真公，小門鬼名小真，宅舍之鬼名奚子都，房門鬼名萬倫，竈君守吏名炎景，厠上守吏名奴之，道上之鬼名烏子丁，道上守吏名尸供，此一宅之神也。當知在在處處，主之者，莫不各有其神。猥褻之事，其可輒引為鑑。昔王少逸久繫幽獄，陶弘景曰：此人以懟憾告靈，故掇斯禍於此。益知神明，誠不可輒引之也。

贊曰：傳謂要盟，神所弗聽。秦人呪楚，其德不競。祝吏矯舉，隨懼脩政。鄭不禳火，孔寧禱病。聰明正直，焉用口佞。施與後悔。

傳曰：明道中，太平州旱蝗相繼，民

大乏食。忽山澤間，生一種烏味草，民採以食，賴以不飢。至道中，環慶路飢，五穀絕種。忽蓬生蔽野，結實如粟，可以充腸。熙寧初，淮浙路飢。忽菌生被野，甜軟頗美，可以作羹。元豐間，青淄大飢。忽山石間，生一種石麪，雜以少麪，即可作餅。聖曆間，梓州大饑。真武真君化為一叟，逐日入城，貨賣蒸熟菹菹，所濟者衆。建隆末，河北路飢。又復化為一商，運到十五萬斛粟麥入城。物到而商不復見，官取拯濟，旁及數郡。大抵荒歉者，災也數也，復生如是物者，天地本心也。真君亦如是者，亦天地之心也。今也，稟天地之和，具天地之象，而略無天地之心，將何以稱為人哉。惜其不知上士處世，大慈平等，兼濟為德，一滅一生，即登勝果。不聞周惠化諸君之事乎？周惠化好施窮困，辛苦不倦。一日，智觀真人化為乞人，乞食街中，試驗其事。周果樂施，即日度之，今為西華真人。劉寬好濟窮困，

未嘗輒廢，竟為太上收錄，今為童初府帥上侯，主始學道者，折象家世豐財。每以多藏厚亡為戒，不惜千金，隨施輒盡，上帝嘉之，賜令度世。劉白雲亦家富，初不知有修行之事，但以樂於施與，不惜錢帛，竟遇樂真君授以道要，遂得仙去。賢矣哉，此皆以樂施而立登勝果者也。曷嘗有一施與後悔者，得造其列乎？當知施與一事，立功最速。縱不一一證果，亦必各獲其報。不聞陽君諸公之事乎？陽伯雍好施義漿。一日，遇一異人授以一升玉種，子孫皆大富貴。裴延年兄弟三人，皆好惠施。一日，有一老人踵門乞漿，兄弟待之盡敬。老人曰：觀君兄弟，皆長者也，積德如此，豈無其福？安史之亂，為老人所引，入一洞中，由是得脫兵難。其後，兄弟皆至大官，舉家壽皆過百。奚百三本一貧者。一日，見一道者，詣一鋪家，乞一文錢，鋪家睚眦不與。百三嫉之力自，探腰間一文授與。是夕，即夢道者與之云贊。及

覺，頤贅果落。湯樞密既死數日，夢其孫曰：吾在生雖剛褊，然無大過。今歲歉，若能為吾發廩拯濟，遠勝為作佛事，於吾亦有所賴。其孫即日，以五百石米，付縣令孫君貺賑濟。是夕，復夢樞密含笑曰：吾即生天矣。此皆以樂施，而各獲其報者也。施與後悔者，可望此乎？佛言：施食一事，當得五種福報：一者命施，所得福報，世世長壽，財富無量。謂人乏食，七日必死，我能施之，使之復活，故曰命施。二者色施，所得福報，世世端正，見者懽喜。謂人乏食，色必憔悴，我能施之，使復充悅，故曰色施。三者力施，所得福報，世世多力，永無減耗。謂人乏食，必至羸弱，我能施之，使復強健，故名力施。四者安施，所得福報，世世安穩，不逢災患。謂人乏食，必愁身危，我能施之，使復安樂，故名安施。五者辯施，所得福報，世世通達，言為人採。謂人乏食，困不能語，我能施之，使復能語，故名辯施。大矣

哉，此但施食一事，所獲福報，尚猶有五，況施一切合施之處，一切皆施者乎？

贊曰：

行道求福，移粟望民。施必祈報，霸者假仁。要譽於外，矯情匪真。一或失據，怨天尤人。五穀不熟，稊卑足珍。

假借不還。

傳曰：假借不還，求之世間，多有如此。夫豈知生雖不還，死後復當還乎？吏人有陳益者，從吳宗嗣借二百千錢，崖不肯還。宗嗣責曰：我若前生負爾錢者，今以此還。若不爾負，而爾負我者，爾當作驢以還於我。逾年，獨坐廳事，恍見陳益負錢來還，不知其死，急呼詰之，則已潛入厩舍，跡之不見。俄頃，馬生一駒，因詢陳益在否，則其日果已卒矣。張陳二有一女，名佛兒，年十五，忽暴卒。半日後還曰：初被二鬼捉去，過叉嶺，復見二鬼以一黑被裹將二人，納之陳家，次將一花被裹

奴，且曰：汝負他家一千五百錢，今當還之。忽有一綠衣前曰：此人亦

悟般若，姑恕之失足。遽墮池中，驚悸乃寤。其父明日，因往叉嶺詢訪，果有陳家，夜生三狗，一斑二黑。斑者，偶墮池死。急歸取錢，以還其家，陳不肯受。於是相與將錢，施於黃巖寺，為作佛事，以贖過咎。然則假借，可不還乎？與其如此，孰若生而還乎？

贊曰：

晉食秦粟，三施不報。兵連禍結，失國是悼。銜鹿疇恩，誰謂虎暴。一飯不忘，賢者之操。無負於心，神人所勞。

分外營求。

傳曰：人處世間，或貴或富，或賤或貧，莫不各有定分。陰注陽受，皆宿業也。分外營求，是可得乎？昔劉頎頗能文，自謂魏科，必當高掇。時翊聖真君降言于終南山，頎因持香請問。真君曰：子文雖優，然賦命淡薄，君安分退守，可保餘年。萬一

過求，必損汝壽。頑不之信，竟至無成而卒。然則一爵一第，信有定分。雖一解，亦不可求而得也。吳公誠官至大夫，年踰七十，將下致仕。忽夢神曰：子尚有七百千俸金，在官未請。公詰旦視券，果如其數，因戒子弟無得請，子弟如戒，不復形言。未幾乃死，子弟嘆曰：豈夢寐，不足信耶。是夕，復夢神曰：掛冠後，所請半俸，非七百千乎？子弟駭然，悔已無及。然則一壽一祿，信有定分。雖是合得，亦不可盡而有也。夏侯嘉正未第時，有劉童子者，善聲骨，嘗謂公曰：公惟得聲貴，其他皆弱。已俸外，有百金橫入，不病則死。其後，官至正言直史館，充益王生辰，使得數百千金弊，方輦歸私第貯之，以為潤屋，忽一緡自地起立，久而方仆。公驚，遽感疾卒。然則一錢一錙，信有定分。雖橫入，亦不可得而有也。又不聞陰司，有掠剩使之說乎？裴璞死後，為隴右三川掠剩使，夢其友韋元方曰：凡世人一飲一

啄，乃至財寶，皆有所籍。其獲有限，若過其數，吾皆得而掠之。章昱死後，以罪配為揚州掠剩鬼，夢僧人珉楚曰：世間若我等輩，千千萬萬，不可勝紀。凡市易獲息，各有定數。若踰其數，吾皆得而掠之。然則世間不如意者，豈即此輩有以掠之耶？

贊曰：性之所欲，有命存焉。富有不求，無間執鞭。居易以俟，行險疾顛。思不出位，身名則全。百爾君子，無由甫田。

### 力上施設。

傳曰：不恤其力，而驅迫過酷，即太上所謂力上施設也。夫豈知貪成為罪，便當死墮惡趣乎？貪成者，謂貪役人力，以成其事。按如李虛舟所書，便可見也。嘉祐中，沈遇知杭州。所經諸堰，皆集堰牛，以備牽挽。時方大暑，監官以下，皆露宿堰上，以伺水之出入。忽聞以行第相呼者曰：明日有何生活？一曰：明

日沈幾之子過此，知杭州，吾輩又一番勞苦。一曰：沈幾早有子知杭州耶。因嗚噎悲嘆。衆官審其言氣，似非俗流，使人跡之，乃堰上數牛。有墮淚者，乃大嘆曰：安知此牛，非沈幾之親舊乎。虛舟聞而大書，以為力上施設者戒，然多有不知戒者。昔盧秉為鹽事提舉，創開一河，專用運鹽。時秋雨連，農事未畢，秉乃日役數千丁夫，於泥雨中驅迫穿鑿，民大不堪。東坡因為作詩，中有人如猪與鴨，投泥相濺驚之句，便可以見其驅迫過酷也。嗚呼，使見虛舟所記，得無懼乎？

贊曰：千仞之縲，挾以賁育。苟有顛墜，出之崖谷。胡為妄施，縱意苛酷。濟人之資，反為民毒。所賴聖君，敷錫五福。

太上感應篇卷之二十三

# 太上感應篇卷之二十四

李昌齡傳 鄭清之贊

淫慾過度。

傳曰：按《道藏》，人者，物之靈也，壽本四萬三千二百餘日，其神三萬六千元陽真炁，本重三百八十四銖，內應乎乾☰，人不知保，而使之散，是以中道夭闕。乾者，六陽具而未知動作施泄也。知此修行，即神仙也。自年十五，至二十五，施泄不止，則氣虧四十八銖，存者其應乎姤☱，嗜慾之甚，加十歲焉。則又虧☱，嗜慾之甚，加十歲焉。則又虧四十八銖，存者其應乎遯☶。又不知養，更加十歲，又虧四十八銖，存者其應乎否☷。至此，乃天地之中氣。又不知養，更加五歲，其虧七十二銖，存者其應乎觀☶。又不知養，更加五歲，其虧九十六銖，存者其應乎剝☶。又不知養，八八六十四卦，其氣終矣，元氣盡矣，其應乎坤☷。坤者，純陰也。惟安穀而

生，故名苟壽。人至於此，去死不遠。況腎堂者，玄關也。心腎合為一脈，其白如線，其連如環，中廣一寸二分，包一身之精粹，是為九天真一虛和之妙氣，至精活命之深根。五臟六腑，百關百脈，金津玉液，日月光華，悉皆在焉。常能存固，則二部之海，應刻一之候，其潮自生，至于生門。大抵壬為一命之本，腎乃金室下元，故名壽海。尾閭不禁，則滄溟竭矣。不聞歧伯之言乎？黃帝問岐伯曰：余聞上古之人，春秋皆度百歲，而動作不衰。今時之人，年至半百，而動作已衰，將世異耶？人失之耶？歧伯曰：上古之人，其知道者，法於陰陽，和於術數，食飲有節，起居有常，不妄作勞，故能形與神俱，而盡終天年，度百歲乃去。今時之人，以酒為漿，以妄為常，醉以入房，以慾竭其精，以耗散其真，不知持滿，不知御神，務快其心，逆於生樂，起居無節，故半百而衰。而《黃庭》亦曰：長生正慎房中。急急

者，即衆生業重處也。惜其不知女色於人，按如佛說，是衆苦本，障礙本，殺害本，憂愁本，是以達者遠之。任惠恭晚年益康強。或問其養生之術，公曰：讀《文選》有悟耳。曰：敢問悟處。曰：石韞玉而山輝，水懷珠而川媚是也。蒲傳正知杭州，鄉老有李覺者來謁，年已百歲，而色澤光潤，有同嬰兒。公曰：願聞攝養之術。曰：某術至簡且易，亦無他，但絕慾早耳。然則淫慾可過度乎？室慾之說，可不踐乎？邪淫之說，別載見他室美，起心私之，並行多隱僻僻段。贊曰：為善害己，則不可誨。使其有益，終身宜佩。戒之在色，養生為最。能畏聖言，沒齒無悔。縱慾傷生，以死誰對。

## 心毒貌慈。

傳曰：心毒貌慈，如李義甫輩是也。李義甫貌極恭柔，每與人言，必嬉怡微笑。然陰賊褊急，根之於心。少有忤意，輒中傷之。人皆號為笑中



刀，亦號為人猫，言其似柔而實害物。厥後，竟至竄死于嵩。然則毒用其心可乎？大抵世人毒心，多有如此。夫豈知一死之後，便當墮入惡趣。昔盧瑱有女使名小金者，忽為一女鬼所擾，屢易巫祝，終不能治，復為禱之佛前。一夕，夢一老人乘一獅子，狀如菩薩，謂瑱曰：擾小金者，本東鄰吳家媳婦，姓朱名十二，為平生毒心，死後墮入蛇趣。見社天竺寺大楮樹下，下通地穴，歲久成精，故能變化。汝欲免難，可急於一善人家潛避，則彼自不敢來。瑱如戒，果不復至。然則人之於心，當毒用乎？當善用乎？一則死墮蛇趣，一則鬼不敢近，二者之間，爾宜自擇。

贊曰：鷲鳥將擊，必匿其形。人之為窳，蓋覆若平。軟語怡色，仇敵不驚。烏喙鳩毒，尚或可懲。所謂人猫，不虛得名。

穢食餒人。

傳曰：穢食餒人，吾儒亦自言之。《曲禮》曰：毋反魚肉是也，謂已歷口也。若以因果言之，不惟捐福，定當掇禍。不聞拭眼禪師、瞿永壽之事乎？昔拭眼禪師棄位出家，以目有雙瞳，為弟所疑，乃佯為目疾，常以帕子揩拭，人因以拭眼稱之。然所至輒有光氣，益自不安。一日，因寺家煮粥，乃脫褻衣抖擻於釜上。是日，其光即落。然則穢食餒人，不捐福乎？瞿永壽以販米為業。紹興乙卯中，路忽聞米價翔踊，乃於稻田取水潤米，不知其田已下糞矣。既而，片雲忽起，震霆大作，永壽心自知非，度必不免。因探腰間一緡授與同行，祝令歸遺其母。作是語已，天復開霽，遂得脫免。然則穢食餒人，不掇禍乎？按如佛說，又不止於如是。一死之後，定當墮為猪狗，為蜚蜋，為餓鬼，可不戒乎？

贊曰：不義之良，仲子必哇。盜餐力吐，不污齒牙。蹴爾而與，乞人所嗟。養

或不敬，三牲何加。以畜待人，奚其薄耶。

左道惑眾。

傳曰：左道者，妖術也。以妖為術，烏得不敗。侯莫陳利月以左道得幸，至鄭州防禦使，奢縱不法，多戕殺人。趙普使人廉得其事，削籍刺配商州。繼又力請除之，得旨遣使剖心，以示其眾。尋復中悔，遣使貸之。無何，使者馳騎遇濬，而踣及掀出。易馬而行，既至，則已剖腹磔尸於驛樹矣。李曇其子，學妖術事敗，父子俱繫御史臺獄。獄具，曇貶為南恩州別駕，諸子皆配嶺外，仍即日監防出城。既而，從者辭去，曇遂自殺。楊千自言得墨子法，能役使鬼神，召致食物，雖物在拳握，可以術取。又能練丹乾汞，與人蒲搏，無能勝者。乃至破肩鑰，變形貌，無不能之。一時貴要，悉皆推重，賜官賜服，頗自矜負。未幾事敗，竟至伏誅。明崇儼精於妖術，凡物在千里外，片時皆能立致。一日，獨寢室

中。無何，為鬼所刺。既死，刀子猶在心上，人皆謂為役鬼過苦，鬼殺之也。然則左道惑衆，是可為也？

贊曰：

奇哀之民，周有禁防。子不語怪，恐其亂常。仁義禮樂，百王紀綱。日用飲食，不過農桑。文成五利，見誅武皇。

短尺狹度。

傳曰：《舜典》曰：同律度量衡。

《大傳》曰：聖人南面治天下，必自人道始。人道事凡有九，而立權度量居其先。《王制》曰：布帛精麤不

中數，幅廣狹不中量，不鬻于市。

《月令》曰：仲秋之日，同度量，平權衡，正鈞石，角斗甬。《孟子》曰：

度，然後知長短。昔者周公，朝諸侯於明堂，制禮作樂，頒度量而天下

服。度謂丈尺高卑廣狹，量謂豆區斗斛筐筥之所容受。大抵人心不

平，設此以持其平也。今乃不準其平，而短狹其用，即是冒太上之禁，

失自心之平，非但欺人，徒自欺也。

不聞心神之說乎？江南處士朱貞白曰：世言不欺神明，吾謂非天地百神，但不欺心神，即不欺神明也。或問迂叟曰：事神乎？曰：事吾心神，不黍稷，不犧牲，惟不欺之為用耳。嗚呼，能曉此者，有幾人耶？惟其不曉，所以短尺狹度，靡所不為。

贊曰：

枉尺直尋，君子所耻。物不中度，不鬻於市。毫髮無私，銖較黍累。敢飾盜心，剪棄公理。尺度何損，損己多矣。

輕秤小升。

傳曰：天有斗秤之官，人有斗秤之用，在二十八宿，則張星主之。在此篇，則太上定為罪目。大抵銖銖升合者，細民日用之急。一文一鏹，得之甚難。故一銖一銖，一升一合，皆不可得而輕，亦不可得而小也。按《五雷雲篆》，陳後主時，市中震殺一人，背有字曰：

衡心輕重

得道者李居正識之，乃斗秤輕重四字。又按《法華經》，當說經時，有十

羅刹女，並其子及眷屬，佛前發重誓，護此經曰：如殺父母罪，亦如壓油殃，斗秤欺誰人，調達破僧罪。犯此法師者，應獲如是殃。然則輕秤小升，其為罪也，豈為輕乎？是以程嗣昌不置輕重斗秤，而立為真武真君察錄，書入善簿。黎永正造作空中揆係之秤，拆底隆量之斗，立為上帝譴責，命所在神靈，陽警而陰理其罪。英顯武烈屢警不悟，竟至雙瞽其目，妻竄兒死，乞丐街中。此皆載於方冊，其可不畏？

贊曰：

衡生於鈞，稱物平施。升轉斗量，出納所寄。乃欲求贏，揜人聽視。縱爾私欲，託諸公器。升秤不欺，欺心可畏。

以偽雜真。

傳曰：以偽雜真，如廬山下盧常，以魚膏雜置油中；建隆觀前黃禹，以牛脂為燭是也。積日既久，皆為震霆所擊。大抵欺誤於人，獲罪最重。非獨二事為然，但凡食飲之須，藥品

之用，乃至金帛市易，稍有欺誤，皆所不可。不聞二仙之事乎？昔呂洞賓初學道時，遇一異人授以養道之法。洞賓曰：願聞其說。曰：煮銅為銀。洞賓曰：有變乎？曰：有變，尚在五百年後。洞賓曰：誤了五百年後，人不願學也。以此一語，遂得名藏天府，竟遇鍾離，遂得度世。李臻性溫約，未嘗有失於人。一日，遇一道人，自稱姓張名齊物，授以黃白之術。臻曰：某賦命淺薄，不願學也。齊物乃大驚曰：君之所見，非吾所及。於是抽簪，引以為劍，劃地地開，投身其中，地復隨合，乃神仙也，其後臻亦得道。然則以偽雜真者，烏得不墜？盧常、黃禹一死之後，當如何哉？

贊曰：讎偽假真，物害猶細。人之亂常，家國攸繫。行如市賈，姦貪險穢。自詭盛流，黨同附勢。一為所欺，誤食鳥喙。採取姦利。

傳曰：太上言：以偽雜真。又言：

採取姦利者，謂所採取，又非但以偽雜真也。昔楊丙所居，瀕大河。歲積芻茭，幸河決，倍取其利。時趙昌言知天雄軍，兼知其事。因秋渣，丙復誘姦民穴堤。堤吏告急，昌言命吏徑從丙家，畢取所積芻茭，以充堤用。仍將丙送獄根勘，獄具抵罪。自此，其害遂絕，邊河居民，無敢為姦利者。孫南金出繼為一富家子，恃其有力，交結官吏，助訟亂政，靡所不為。因一二十大獄，官吏所得無幾，已獨厚有所竊，求田問宅，益自矜負。至乃銷錢造器，竭澤捕漁，以酒換麻，造船置碓，侵漁水利，占奪民田。但凡人所不敢為者，彼無不為；人所不敢取者，彼無不取。如是數年，忽得惡疾，飲食不進，枯脊如豺。及死，人皆傳甚已作驢云。然則採取姦利，是可為乎？

贊曰：利以姦言，取以採說。推其用心，千委萬折。寘毒斯救，厝火乃撤。術

以險售，害由念烈。螫聞嚙幽，射于壁蠹。

壓良為賤。

傳曰：壓良為賤，此特撥無因果者之所敢為。夫豈知今為婢僕，皆前生造罪積惡、過滿一千八百之人，其有實非此曹，我乃置於此曹之列，即所謂壓良為賤者也。有識之士，其肯然乎？昔馬涓其父，以中年無子，因置一妾，極姝麗。每理髮，見公必引避，如有沮喪之狀。公怪問之，則曰：某父本守某官，不幸死，去家甚遠，無力可歸。故至鬻某，今猶未經卒哭。約髮者，實素帛，暫以絳綵蒙其上，不欲公見，初無他也。公為惻然，即日訪尋其母還之，且厚有資助。是夕，即夢一羽衣曰：天錫爾子，慶流涓涓。明年果生一子，因以涓字名之，即巨濟也。及長赴試，羽衣復入夢曰：汝欲及第，須十三魁。既而，魁太學，魁鄉薦，乃至唱名為天下第一，屈指果十三魁。羅城使程彥賓，進攻遂寧。城下之日，左右

以三處女獻，皆蔚然有姿色。時公方醉，謂女子曰：汝猶吾女，安敢相犯。因手自封鎖，置于一室。及旦，訪其父母還之。皆泣謝曰：願太尉早建旄節。彥賓曰：旄節非敢望，但得死時無病，便是好也。其後，官至觀察，年九十七，無疾而卒。諸子皆有官。孰謂作如是事，無如是報乎？以此觀之，當知壓良為賤者，定當得罪。

贊曰：婁敬輓輅，衛青僕奴。賤不可忽，良可壓乎。重耳揮盃，見怒秦姝。女不可賤，而況丈夫。為民父母，其將何如。

### 謾驀愚人。

傳曰：凡涉謾驀，皆所不可。若及愚人，尤不可也。昔毛烈以不義起家，人有善田，必百訂窺覷，必得乃已。有陳祈者，三弟皆幼，乃盡舉田產，低價質于烈家。俟三弟長成，畢行分割，然後備錢，密行抽贖。烈乃挾之收錢，不即與頒，久遂謾驀。祈

屢訴不得直，遂詣嶽祠投牒。未幾烈死，明日祈死。既而祈還，言烈在嶽司，哀告之曰：吾平生作此，凡十三契，契亦見在某處某匱中。公歸，切煩語吾家人，令急檢各還其家，庶可減罪。不然，罪益重矣。張該有一宅，頗宏壯。以闕用，典千緡在張俊家。俊心愛之，乃厚遺牙儉，作斷絕契。契成，換其首張，用作絕契。後數年，該以乏用，詣俊就絕。俊出契示之，乃絕契也。該語塞，灑淚而出，仰天呪曰：願爾子孫異日亦復似我，欲語不能。厥後，俊之子孫，果皆失音而死。然則謾驀於人，是可為乎？雖非愚人，亦自不可。

### 贊曰：

見瞽必貌，入虛有人。閭室謹獨，出門如賓。處心不欺，視物則均。氓之蚩蚩，至愚而神。孰愚黔首，自愚者秦。

### 貪婪無厭。

傳曰：老子曰：知足者富。又曰：罪莫大於可欲，禍莫大於不知足。

又曰：名與身孰親，身與貨孰多，得與亡孰病。甚愛必大費，多藏必厚亡。知足不辱，知止不殆，可以長久。墨子曰：非無安居也，無安心也；非無足財也，無足心也。莊子曰：鵬與籬鷄，大小固不相侔；椿與朝菌，脩短殆不相若。要之各安其安，各適其適。此皆聖賢格言，臨財可以為法。嗟乎，世人衣不過被體，衣千金之裘者猶以為不足，不知鶉衣緼袍者固自若；食不過充腸，羅萬錢之食者猶以為不足，不知簞食瓢飲者固自樂；室不過蔽風雨，峻宇雕牆者猶以為不足，（不知）蓬戶甕牖者固自安；器不過適用，玉杯象筋者猶以為不足，不知汗尊杯飲者固自適。惟其如此，是以常無足心。夫豈悟世間萬事，轉頭即空。我之此身，終亦變滅。所不滅者，一精明耳。與其於變滅處，區區徒自勞苦，孰若於不變滅處，略作工夫耶？昔波斯匿王問釋迦文佛曰：我今迫於頽齡，終當變滅。佛言：曾

見恒河水否？王曰：某三歲時，蓋嘗見之。佛曰：汝今六十，復曾見否？王曰：昨又見之。佛曰：與汝三歲時所見，其水云何？王曰：宛然無異。佛曰：汝面雖皺，而汝見精性未曾皺。皺者為變，不皺者非變。變者受滅，彼不變者元無生滅。王即當下有悟，始知身後捨生趨生，初無斷滅。第三祖商那和修問優波毬多曰：汝年幾耶？毬多曰：我年十七。祖曰：汝身十七耶？性十七耶？毬多曰：師今髮白，為髮白耶？心白耶？祖曰：我但髮白，非心白也。毬多曰：我身十七，非性十七，亦復如是。大抵生死之身，有無循環，環無起處，亦無盡處。況此心流注，中間無間，見漚起滅，特妄想耳。人從初識，至動相滅時，義亦如是。若使世人皆能於此有悟，則一點精明，長是了然。一出頭來，何患無福。所謂財物，何所歉闕？

贊曰：人之處世，其與幾何。朝露垂穎，秋

葉辭柯。其生有涯，奚必求多。鹿臺之址，驪宮之阿。窮富極貴，化為陂陁陂音坡。

呪詛求直。

傳曰：所謂呪詛，不待形於奏牘，但凡忿爭之際，妄有呼召，即呪詛也。按《呪誓章》，若有呪詛，則九地之下，東南西北，四面八方，山澤之內，五土之上，受人呪詛不正邪鬼，刑禱呪誓考炁之鬼，伏連傳屍之鬼，五丘五墓之鬼，妖精作祟禍害之鬼，下官故炁土精之鬼，破殺虛耗五瘟疫炁之鬼，邪魅妖恠之鬼，兇殃破射之鬼，五方五土復注刑尅逆殄之鬼，伏匿留停不退惡逆之鬼，拘絞之鬼，刑殺之鬼，疫毒之鬼，乃至一切凶惡之鬼，皆得乘間伺隙，行其禍害。若非上章求解，得天師門下斷鬼大將軍、破廟大將軍、斷除呪誓大將軍，為之下降，分別解散，未易斷除。然則呪詛求直，是可為乎？昔張中家，初以父子忿爭，動輒指天罵日。及其子與其姪爭分，亦復祀鬼投神，互相詛

害。不數年間，死喪殆盡，所存惟不預者一房，然亦衰破，不及前矣。又有楊長者，出入一寡婦家，頗似親密，人或議之。寡婦素悍，不勝其忿，乃告天祀鬼，以詛其人。不一而年，寡婦與楊長，兩不相去一日而死。意其當時，實無其事，而必欲自明耶？抑實有之，姑以塞謗耶？不然，安有兩不相去一日而死者。事之有無，皆所不知，然亦可以為戒。

贊曰：

周官五聽，辭色莫隱。豈以口舌，蓋其肝腎。敵國交盟，王澤斯泯。多言數窮，不如一忍。苟聽於神，何以示信。

太上感應篇卷之二十四

# 太上感應篇卷之二十五

李昌齡傳 鄭清之贊

嗜酒悖亂。

傳曰：雪峰、巖頭、欽山三大禪師，自湘中入江南，至吳山下。欽山濯足洞前，見一菜葉順流而下，喜曰：此山必有道人，吾輩可沿流尋之。雪峰曰：汝智眼太濁，他日如何辨人。彼不惜福，至棄菜葉，住山奚為？鄭昇之宣和間，被攝至冥司。冥官數曰：汝平生好飲，飲必不盡餘瀝，甚至淋漓几案，積已數石。因命吏押至一處，有一大甕，腐水滿中，必令呷盡。昇之驚悸遂寤。然則人有少福，其可不惜，況酒者最能亂性，苟或酷嗜，日在醉鄉，烏得無失？昔吳有為樞密使，陳執中罷相，舉以自代。因侍宴醉睡，忽拊牀呼其從者，明日黜為西京留臺。刁約有俊才，劉沅為集賢相，欲引令修起居注，竟以荒飲無度，帝竟不悅，命

竟不下。趙昌言為樞密，日與陳象、董儼酣飲，人因為之語曰：陳三更，董半夜。上怒，兩皆罷職，昌言貶為崇信軍司馬。郭贄為參政，以入對酒氣熏烝御座，左遷南京。蘇易簡為學士，因大飲衄血，感疾而卒。王全為殿中丞，以大醉臍裂而卒。此皆前輦覆轍，孰謂嗜酒為無害乎？況悖亂乎？孔子曰：惟酒無量不及亂，與篇中之言，亦皆一也。

贊曰：周戒群飲，漢禁糜穀。酒以成禮，烏可縱欲。紂為池亡，卓因甕辱。醉鄉之徒，遯世逃俗。欲修其身，鴟夷可覆。

骨肉忿爭。

傳曰：佛曰：我得無爭三昧，人中最為第一。又曰：六度萬行，忍為第一。老子曰：上善若水，水善利萬物而不爭。又曰：夫惟不爭，故無尤。又曰：以其不爭，故天下莫能與之爭。又曰：天之道，不爭而善勝。又曰：聖人之道，為而不爭。

《論語》曰：君子無所爭。又曰：君子矜而不爭。《禮記》曰：道途不爭險易之利，冬夏不爭陰陽之和。然則人於骨肉，可忿爭乎？骨肉者，血屬也。得為骨肉者，莫不皆是夙緣，豈偶然哉。昔顧況為著作佐郎，晚得一子，名非熊。無何暴卒，況追悼哀切，常哭吟曰：老人失愛子，日暮哭成血。老人年七十，不作多時別。非熊在冥司聞之，亦大感愴，力懇冥官求歸。官亦憐而許之，既而果得復來。為孫年三歲，尚記得在冥時事。及長，登進士第，官至大理寺丞。洪濤，其父亶為諸王府教授。濤以太廟齋郎，補太學生，好學淳固，登熙寧二年進士第，為石州司戶參軍。忽夢一冥使，授以一紙公文曰：石州司戶參軍洪濤卒。濤大懼，冥使曰：不必憂，不半年，却當復來為洪氏子。及期果卒。時妻徐氏，已妊至半年，果誕一男，狀貌與濤酷類。然則得為骨肉，非宿緣乎？其忿爭者，不能忍順故也。異

日受生，因緣會遇，便當得二種不美之報：一者愛別離苦，今之鰥寡孤獨者是也；二者怨憎會苦，今之乖爭離背者是也。世人但知二者為苦，而不知實由前世不能忍順骨肉忿爭，故獲斯報。

贊曰：

天一生水，違行曰訟。勢近情親，其爭易縱。風自火出，詎能無鬪。家人嗃嗃，貴在嚴重。反身威如，齊家妙用。

男不忠良。

傳曰：得為男子，道釋二教，皆以為難，皆以為貴。然則造物所以生之者為如何？望之者為如何？今也既得為男，而乃苟且汨沒，不能以忠良自效，非獨辜負己靈，實亦辜負造物。不聞前輩為男子者乎？昔杜正獻衍，其父早卒，公遺腹生，其母改適河陽錢氏。祖父卒，二兄遇之無狀，至以劍斫其腦，其姑救解乃免。因詣河陽，歸其母，繼父不能容。徑往孟洛，以傭書自資。富室相里氏，

一見奇之，遂妻以女。明年舉進士，殿試第四，補揚州推官，歷知縣、通判、提轉、都轉運，除待制，除直學，判三司，判審官，知天雄，知永興，知

并州，宣撫河東，拜樞密，尋以吏部侍郎，同中書門下平章事，出知兗州，自少好學，及貴，喜推獎後進，為人廉潔，事上以不欺為忠，推於人行己為信。是以動靜纖悉，謹而有法，放其大節，真偉然也。范文正仲

淹生二歲而孤，其母改適朱氏。及長，知其家世，感泣而去。於南都學舍，自掃一室，晝夜講誦，飲食起居，人所不堪。公益刻苦，六年之中，遂能盡通六經之旨。諫議姜遵一見奇之，遂妻以女。年二十，舉進士，判河中為司諫，知睦州，徙蘇州，知開封，知饒州，徙潤州、越州，知永興，知延州，知耀州，徙慶州、環州，路經略安撫，沿邊招討，使改邠州，進樞密，拜參政，除陝西四路安撫，遷戶部侍郎，知青州。初入仕，即上宰相萬言書。及進用，所行之事，皆無出

於此書。雖弄翰戲語，亦不外此。是以人皆推敬，名振一時。若二公者，其為男子，真無愧也。

贊曰：

乾道成男，六陽與俱。剛德寔長，萬事所趨。一失其位，字曰非夫。姦險側媚，乃陰之徒。為魯男子，其庶幾乎。

女不柔順。

傳曰：《禮經》曰：男帥女，女從男，夫婦之義，由此而始。又曰：婦人者，幼從父兄，出嫁從夫，夫死從子。大抵女貴柔順，苟不柔順，不免或至悍妬，不孝不義，端起乎此。《仙源》曰：吾與侍講六十年為夫婦，滎陽呂公未嘗有一日面赤。使不柔順，能如是乎？又有莫筌者，非但柔順，又能有立，真節婦也。昔周謂以布衣謁太祖，遂見信用，委寄繁劇，奔走嶺塞，不得歸者二十六年。其家素貧，婦翁欲奪其妻，莫筌堅不許，但守貧安分，以伺其夫之歸。奉舅姑益謹，日事蠶績，躬任機杼，勤苦自營，閨

門有法。雖鄉里淑婦靖女，亦未嘗有識其面。聞其風者，幃箔竦然。及二子長，築室于外蓄書，命師篤之以學。晚年產業漸厚，舅姑漸老，於是祔塋選美丘，且大為壽坎，松檟茂密，盡得其制。有上腴田數百頃，皆筌手所自置。又為其夫經營別墅，水竹交映，亭閣相望，誠他婦之罕能。於二十六年中，一婚二嫁，皆得望族。其夫在官，亦修高節。及歸，俱已皓首，筌復勸夫休官，相與老於林泉。時皆號之莫節婦云。

贊曰：女之美稱，曰淑曰令。柔貴有立，順必以正。無違夫子，必戒必敬。蔡琰非烈，班姬知命。不忌不淫，婦德之盛。

不知其室。

傳曰：《易》曰：家人利女貞。《象》曰：家人女正，位乎內；男正，位乎外。男女正，天地之大義也。然則男女正位，義同天地，豈為輕乎？近年潮倖余嗣，被攝至司命。官道問

使者曰：何法可以彌災？使者曰：但於除夕，取桃符板，碎為一籃，密念天皇、地皇、人皇、三綱、五常十字，瘞之通衢，如此可弭一年之災。嗚呼，三綱者，父子、兄弟、夫婦也。一誦其倫，為力如此，沉踐之者乎？是以君子謹重其事。劉庭式既定婚，入太學。越五年，果登第。及歸，則定婚女子已雙瞽矣，家又不振。庭式涓日成禮，女家不可，曰：女子已為廢人，何可奉箕箒？庭式曰：喪明於定婚之後，於義有所不可。竟娶之，生二子。及倖高密，盲女得疾死，庭式哀哭良切。時東坡為太守，慰諭曰：余聞哀生於愛，愛生於色。子娶盲女，愛從何生？庭式曰：某之所亡者妻，所哭者妻而已，不知有目與無目也。若緣色生愛，緣愛生哀，色衰愛絕，於義何有？今之揚袂倚市，目挑心招者，皆可以使為妻乎？東坡撫其背曰：真丈夫也，不惟今世罕見，古亦未聞。盲女所生二子，皆相繼登第。鄭通

叔初與夏氏女定婚，及入太學，遂登第。既歸，則夏氏女已啞。其伯似欲別擇，通叔堅不可曰：此女某若不娶，平生遂無所歸，況以無恙而成婚，因疾而遽棄，豈人情哉。竟娶之，其後，通叔官至朝奉大夫。啞女所生一子，亦有官。嗚呼，二公但於定婚之後，守義已自如此，真所謂能踐聖人之言者也，肯不和平乎？其不和者，不過為些夷虜，或別有所愛，何足以此而告之哉。

贊曰：刑于寡妻，文王之治。相待如賓，卻缺可帥。試人以財，觀德於醉。內心所形，閨室尤邃。身修家齊，於斯易易。不敬其夫。

傳曰：《昏義》曰：男教不修陽事，不得適見于天，日為之蝕。婦順不修陰事，不得適見于天，月為之蝕。然則夫婦失道，適見日月，義豈輕乎？昔杜珪為武平令，忽雙目俱盲。其妻乃侍郎吳育之女，日夜望極禱



告。每拜，必盡七七四十九數，竟能感真武化身下降，為之療治，而徹視如初。杜企為人怯弱，其妻張氏素輕視之，晚益多病，不能支持，張不一顧。無何，張先企卒。既殯棺破，乃化為蟒，徑奔林間。然則妻之於夫，可不敬乎？嗚呼，因果之說，姑置勿論。請以一二賢婦言之，庶皆則效。昔宇文邦彥，其妻黎氏，刻苦立家，喜觀書，略通大體，手自編錄，以相其夫。且督勵諸子從學，甚至其子粹中兄弟，果及第，歷詞掖，登翰林，至右轄，鄉里稱尊。其家至今有黎氏手編國朝以來制誥論言集尚在。歐陽文忠公，其母韓國夫人，幼歸歐陽，即能盡其婦道，克相其夫。夫死，公始四歲。夫人守節自誓，親教以學。家貧乏紙，至以蘆荻劃地學書。公竟以學富，歷館閣，修起居，知制誥，為學士，拜樞密，除叅政，官至太子太師。若二人者，真所謂無愧於為婦者也。其不敬者，若非悍婦，必蕩婦也，何足道哉。

贊曰：三從之義，所重在夫。身仰望者，天可逃乎。舉按上食，迴文織圖。乃捐箕箒，視若庸奴。買臣見棄，終載後車。

每好矜誇。

傳曰：老子於《曲則全章》曰，不自是故彰，不自伐故有功，不自矜故長於跂者。《不立章》又曰：自是者不彰，自伐者無功，自矜者不長。《易》曰：謙謙君子有終吉。《象》曰：天道虧盈而益謙，地道變盈而流謙，鬼神害盈而福謙，人道惡盈而好謙。謙尊而光卑，而不可踰君子之終也。然則矜誇於人，可不去乎？謝子與伊川別一年，忽得相見。伊川曰：相別一年，做得甚工夫？謝子曰：只去得一箇矜字。曰：何故？曰：子細點檢，得來病痛，盡在這裏。若按伏得，這箇罪過，方有進向處。伊川點頭。大抵前輩，其於矜誇，無不切戒，非獨公也。昔顧雍封侯三日，而家人不知。謝安對客圍棋，捷書

至而客殊不覺。曹武惠充江南，入見閤門，所進榜子，止稱奉勅江南，幹當公事。回向文簡時拜僕射，上亦自為殊命，密令李昌言往觀公意。昌言盛稱眷倚殊越，公但唯唯。楊礪建隆初殿試，唱名為天下第一，真宗不記，問公幾年。及第，礪亦唯唯。真宗由是，愛其不以科名自伐。文潞公至和中，首議立英宗為嗣。及神宗問之，公但言韓琦之功，上由是重其善不自伐。大抵皆是蓄德深厚，固非局量褊淺者之所能及也。

贊曰：

人有疵德，起於自矜。驕念既實，中虛不靈。有過孰告，有忿莫懲。顏無伐善，禹不爭能。匪聖匪賢，斗筭易盈。

常行妬忌。

傳曰：嗟乎，世人終日造罪，而不自以為罪。且如妬忌一事，婦人尤甚。豈知一死之後，便當墮入三趣乎？一者地獄，二者鬼趣，三者畜趣。昔崔起妻蕭氏，性嗔妬，不信善惡。其

父教之誦經，不能從。未幾暴卒，夢其侍婢素玉曰：我在生，聞人說地獄，心實不信，今果見之。俄頃，已見蕭氏卧在鐵床，猛火自起。驚悸遂寤。非地獄乎？劉伯玉妻段氏，性妬忌。伯玉嘗於其前，誦《洛神賦》曰：娶婦如此，心可無憾。妻曰：君意似美水神而輕我，我死後何患不為水神。是夜即自沉，復夢伯玉曰：君美水神，我今為水神矣。伯玉自此，不敢渡水。婦人有過此者，必自壞其粧，然後敢濟。不然，則波濤暴發。人因名其地為妬婦津云。非鬼趣乎？梁武皇后郗氏，既死數月，乃化為蟒，作人語曰：妾以在生嫉妬，常懷慘毒，忿恚一發，如火熾然，損射於物。今受蟒身，身既長大，無物可食，兼無窟穴可以藏身。每一鱗下，各有無數蛆蟲，晝夜啜嚙，苦痛切至。奈何梁武，於是為修懺法，以贖其罪。非畜趣乎？然則人而常懷妬忌者，是可為乎？贊曰：

妬則傾人，忌難為下。孰使之然，心猿意馬。胡不反思，求在我者。擇善可師，勝己如射。女子小人，不知命也。

太上感應篇卷之二十五

無行於妻子。

太上感應篇卷之二十六

李昌齡傳 鄭清之贊

傳曰：《禮經》曰：嫁女之家，三夜不息燭，思相離也。取婦之家，三月不舉樂，思嗣親也。釋之者曰：重世變也。然則女之父母，所以望其婿者為如何？夫之父母，所以望其婦者為如何？今也既娶而輒至，對以無行，使之身處深閨，欲去不能，欲住不可，抑鬱怨憤，情何以堪。此即輕薄小子，所以無前程處也。造物其肯容乎？昔楊大同隨其兄之官。在官舍，遇一婦人，抱一女孩，遂與之合，自此即枯瘠如豺。一夕，復遇其婦人，告以實曰：我乃爾三生前妻也，此女即爾女也。爾為商於池州，顧戀不歸，我貧困無以自給，遂投井死。上帝約法，以爾逐利忘家，至今妻子身死非命，雖別有善業，當得一第，然終不享後。果如其言。史堂

微時已娶，及登第，傲然自負，大有當時不得富貴家女為妻之悔。遂薄其妻，不與同寢。其妻鬱鬱不得志，因感疾，凡數歲，堂不一顧。妻益飲恨，臨終隔壁呼堂謂曰：我今死矣，爾忍不一視我耶。堂終不顧。及死，心自不安，乃從邪說，謀為厭勝，以土器蓋其面，兼以索加木束縛而殮。是夕，此女夢其父曰：女託非人，生懷愁恨，死受厭勝。然彼亦以女故，壽祿皆削盡矣。明年果卒。然則無行於妻子，是可為乎？惜其不知一文一藝，空中小蚋；一技一能，日下孤燈。無德以將，適自為累，何足道哉。

贊曰：下我者妻，事我者子。下則易褻，事則易使。所以常情，或多慢視。道之不行，其端在是。施于閨門，必恭敬止。

失禮於舅姑。

傳曰：出嫁為婦，所當尊事者，無非舅姑。然世之悍婦，多有失禮，夫豈

知不孝之罪，天所必誅乎？昔支祖宜妻喻氏，一夕夢神告曰：汝前生為牟容妻，以久病殄殍。汝姑日為進食，汝怒其煩，輒至吐而叱之。臨終，又指天罵曰：姑七十而不死，我三十九而乃亡，何不平乎？以此一語，司命聞奏。帝怒，命雷神擊汝。既至，而汝氣已絕。明日雷神當行前命，幸汝此生却能敬事舅姑，或可脫免。喻氏惶恐，哭泣告天。適英顯行空，力為論奏，果蒙原貸。紹興間，顧德稱妻張氏，一夕，亦夢神告以宿生之事，且曰：汝明日當斃於雷斧。張寤，果聞雷聲，自分必死。於是易服，出于門外桑樹下，立默自念曰：死固不免，奈姑老驚恐何。俄聞空中有聲曰：此念極是，上帝已知，特赦汝矣，自此更宜勉於為善，廣以告人，庶皆知戒。既而，天果開霽。然則婦於舅姑，可無禮乎？惜其不知孝於舅姑，便當度世。昔感玄符世稱孝婦，舅姑性嚴，玄符奉事彌謹。每謂妯娌曰：我得人

身，生于中國，尚為女子，亦所闕也。今父母皆死，惟舅姑為尊。雖被打罵，亦所不問。一日，忽有神人降于其室，授以靈藥，遂得上昇。韋蒙妻許氏，亦善事舅姑。有一女，極聰慧，暴卒。既而復還，言至陰司，司命以小真呼之曰：汝九世祖，有功於國，有惠於人，近已擢為地下主者，行將授地仙之品。汝曾祖、汝祖、汝父三世，皆已生天。汝母心志於道，孝事舅姑，當陟仙品。汝亦合居丹陵之闕，且歸齋沐，太一使者行將至矣。明日，許氏及小真，果皆上昇。然則失禮者，烏得無禍。

贊曰：

女之從人，更姓改族。繼彼世紀，謂之天屬。上奉尊章，義均似續。胥惠胥誨，我撫我鞠。慢其逮事，不孝之戮。輕慢先靈。

傳曰：眉州鮮于氏，因合小兒藥，磔一蝙蝠為末。未及和劑，明旦視之，則有數枚蝙蝠圍聚其上，目皆未開。

蓋識母氣，故致然也。一家為之灑淚，自此合藥，不復敢用。郴州山丁射一母獺，并生得其子，以獻李規。規剝母獺皮，曬之日中，獺子一見，即奪取抱持，號叫不食而死。嗚呼，畜生尚爾，況於人乎？所謂輕慢，但凡齋祭不謹，葬不即辦，拜掃不勤，皆輕慢也。高邦佐簿眉山，忽丁父憂，於二七夜，被攝至冥司，見其父責曰：汝齋祭不誠，僧與庖者，皆不嚴潔。惟今夕所請僧宗順有定力，加持誦念，密契陰司。兼所誦《大明神呪經》及所奏《九天生神章》，皆於我功德有餘，傍及諸囚。然則齋祭可不謹乎？王景芬有一子，極聰慧，無何暴卒。臨終，忽自言曰：且留取某，待某長大，必能葬翁婆。景芬大駭，始謀葬其父母。然則葬可緩乎？孔墳丁母憂既葬，歷官至秘書丞，始歸焚黃。其母忽現其前，責曰：汝棄吾去，盜發吾家，至折吾臂。歲時祭享，寄二女家。為子當如是耶？陰司本欲罪汝，以警於世。

為汝處官修謹，姑且置之。自此切須勤視墳冢，歲設一祭，以寧山神，亦以安我。然則拜掃可不勤乎？況輕慢又甚於三者乎？

贊曰：

天子七廟，士祭其先。禮有等別，敬則同然。阼階朝服，懼讎之喧。刻木而事，如奉所天。毋曰既往，洋乎在前。

違逆上命。

傳曰：所謂上者，君父也。稍失勤敬，即違逆也。不聞《九幽拔罪經》、《教化地獄經》之說乎？《九幽經》云：昔普掠獄中，有諸罪人，驅上刀山。中有一人，踐鋒履刃，了無所苦，北帝異之。天尊曰：此人生前，曾受九真妙戒、救苦真符，吾故以神力覆護。一者敬讓，孝養父母；二者克勤，忠於君主；三者不殺，慈救衆生；四者不淫，正身處物；五者不盜，推義損己；六者不嗔，兇怒凌人；七者不詐，諂賊害善；八者不驕，傲忽至真；九者不二，奉戒專

一。此道家之說也。《地獄經》云：地獄諸受罪人，銜悲白佛言：作何善行，得離斯苦？佛言：當勤孝養，供養父母，敬事師長，歸奉三尊，勤行布施持戒，忍辱精進，禪定智慧，慈悲喜捨，怨親平等，無有二相，不欺孤老，不輕下賤，護人如己，不起惡念。如是修行，即為已報佛恩，永離三塗，無復衆苦。是故名為《罪業報應教化地獄經》，此釋氏之說也。然則上命，可違逆乎？

贊曰：

事君致身，義無苟且。言必稽首，召非俟駕。命承解揚，節握司馬。真卿死詔，小白拜下。逆命之刑，幽顯不赦。

作為無益。

傳曰：世間萬事，轉頭即空。惟有好事，所獲福報，世世生生，隨身受用，無有窮已。是以無益之事，識者有所不為。不聞前輩之所為乎？昔蘇文忠知杭州，浚二河，修六井，築長堤，種麥其上，以備堤用。民受其

利，至以公姓名其堤為蘇公堤云。邵曄知廣州，城瀕海，每蕃舶到岸，多為颶風所中。公至，為開內濠，以泊舟楫。由是，颶風不能為害，無遇疾者，民至為公醵錢作佛事，以祝公年。及卒，有墮淚者。喻仲寬知順昌，閩人生子，才過三數臨產，即先具盆水，溺之盆中，謂之洗兒，建劍尤甚。公至，作《戒殺子文》，召父老坐廡下，親酌酒，出文以勸。不半年間，所活者已千數，民至以喻字名子。張忠定再鎮成都，慮民艱食，或復為盜，於諸邑田稅內，歲折米六萬斛。至春，則籍城中細民，計口給券，依元價糶之。由是，一城之民雖遇荒歉，不至甚饑。陳堯佐為廣南西路漕。嶺南風俗，病不服藥，惟禱于鬼，病多死者。公悉出家藏集驗，刻石于桂州驛舍。土人賴之，至呼為佛。王覲知成都，城無閑田，中下之戶，死者多從火葬。公至，委官根刷在城未有葬者，得萬餘喪，以官地瘞之。凡此，皆所謂有益者也。

贊曰：人與天地，並立為三。財成輔相，化育可參。立功立言，百聖不慚。草木俱腐，豈分所甘。罔之生也，夢寐沈酣。

### 懷挾外心。

傳曰：婦德、婦言、婦功、婦容，雖皆婦人美事，然婦人大節特在乎，確不可奪。大節一墮，四皆無用。然則懷挾外心，是可為乎？蓋有外心，則不免心挑目許，乘間投隙，疾赴急趨，久而情好愈密，其視夫壻，旁若無人，禮義廉恥，必不復問，往往有不測之禍，起乎其間。是以君子貴乎謹獨，上帝亦多以此取人。黃靖國嘉祐間為儀州判官。忽一夕，被攝至陰司。陰君曰：卿官儀州，有一美事，卿知之乎？因命吏取百葉簿示之，乃醫工聶從志，於某年月日，有華亭主簿楊某妻李氏，淫奔從志。從志辭以亂種，必不可。李不能強，大慚而退。奉上帝勅，聶從志特與延壽一紀，子孫奕世登科，李氏

送獄治罪。竊讀甫畢，已見數鬼引出一婦人，先以刀剖其腹，繼以沸湯沃其腸，名曰湔滌。乃李氏也。既而得還，以語從志。從志駭曰：此固有之，然妻子亦未嘗與言，不謂已書陰籍。人於閻室，是可欺乎？其後從志子孫，果皆登第。又有何澄者，亦以醫術著名。政和間，孫已之以久病不愈，其妻于氏召澄看脉。一再見，乃引澄入于密室，耳語澄曰：妾以良人久病，典賣殆盡，願以此身酬藥之直。澄正色曰：娘子奚為出此語，但安心勿憂，當為療治。若欲以此相汙，必不可。不惟使某永為小人，娘子亦不得為賢婦。縱免人責，天譴其可逃乎？于氏大沮而退。澄一日假寐，恍見一神引至公署。判官曰：汝醫藥有功，且不於艱急中亂人婦女。奉上帝敕，賜汝一資官職，五萬貫錢。未幾，東官得疾，詔訪草澤。澄於是得效其力，一劑遂安，賜官賜錢，宛如其數，自此大富，醫道益振，京師號為之何

藥院云。嗚呼，二婦慕之如此，而二公拒之如此，誠亦人所罕能。是以立為上帝所取，為二婦者，何以處於天地間乎？

贊曰：

純臣正女，其心無二。諸葛一門，仕吳蜀魏。各守名節，不相誘致。弗嫁刑耳，污手斷臂。言言婦烈，傳亞忠義。

自呪呪他。

傳曰：呪詛一事，篇中言之者四。大抵人貴乎生，死貴乎度。今也處生而有呪有詛，不免速歸于死；既死而有執有對，不免禁固滯留，無由出離，往往有不待死，而立如所呪之言者。昔堰典妻嘗與人私，又嘗竊鄰家一巾。鄰家詬罵，典乃自呪呪他曰：若我妻果與人私，及竊汝手巾者，當為雷霆所擊。否則，汝亦如之。是夕，即雷霆大震，果皆斃於雷斧之下。典脇下有字曰：癡人保妻貞，將身以為質。妻脇下亦有字曰：行姦為盜，當使皆知。郭引鳳

紹興己卯被攝入冥，見一婦人，鬼卒以鐵丸，大小如蒸餅，填塞其口。繼以百鍊銅汁，擘其口灌之。既絕復蘇，既蘇復灌，如是數四，苦不可言。引鳳曰：此何罪耶？鬼卒曰：此人生前好行呪罵，故獲斯罪。然則自呪呪他，是可為乎？

贊曰：

呪詛垂戒，諄復數四。爽惟聖言，當有微意。口舌之過，人所輕視。至援神明，或指天地。易犯難贖，深可戒忌。

偏憎偏愛。

傳曰：偏憎偏愛，世固有之，而後妻尤甚，惜其莫悟。我為人妻，夫不幸死，遽至棄去。不復更恤其家諸穉呱呱，亦不復問為妻為母，當如是耶？婦人大節，至此已喪，其可更於後夫子女，又敢虐遇，尚何以稱為人哉。李常曰：卓乎，天下之習不能蔽者，程正叔一人而已。龜山曰：觀其《論婦人再適》，至云：寧餓死，不可再適。若不是見得道理分曉，

如何敢下這般言語。大抵婦人大節，惟此而已。大節一喪，復何足道。請以一二因果，少以警世。徐鉉曰：建安有張興者，妻死再娶。前妻之子為後妻所虐，興不能制。一日，忽見前妻入門，責後妻曰：人誰不死，誰無子母之情，爾奚為虐我所生？我已訴于陰府，與我十日限，使自告汝。汝若不改，定當殺汝夫婦。後妻大懼，自此不復敢虐。張開娶孔氏，生五子，無何遽卒，再娶李氏。李氏悍妬，虐遇五子。五子哭于孔氏冢前，孔氏忽自冢出，哭撫其子。既而，取其子帛巾，題詩其上，以贈張曰：不忿成故人，泣涕每盈巾。死生今已隔，相見永無因。合裏殘妝粉，留將與後人。黃泉無用處，浪作冢中塵。有意憐男女，無情亦任君。欲知腸斷處，明月照孤墳。五子得詩，以呈其父。父以訴于連帥，連帥繳奏于朝，李氏特配嶺南。然則為後妻者，當知是乎？偏憎偏愛，是可用乎？

贊曰：憎必知善，愛當知惡。所見一偏，是非顛錯。盧杞姦邪，德宗不覺。黨錮所懲，元禮孟博。欲得其平，好惡無作。

太上感應篇卷之二十六

太上感應篇卷之二十七

李昌齡傳 鄭清之贊

越井。

傳曰：漢天師既成道矣，又復勸人造橋鑿井，謂之立功。大抵井之為用，利濟廣博，越而過之，即為觸穢，烏得無罪。不聞吳湛、李鄂之事乎？昔吳湛為縣吏，所居臨荆溪。溪有一泉，極為清徹，衆人賴之。湛為築籬遮護，不令穢入。忽於泉側，得一白螺，置之甕中。每自外歸，則厨中飲食已辦，心大異之。一日潛窺，乃一女子自螺而出，手自操刀。湛急趨之，女子大窘，不容歸殼，實告湛曰：吾乃泉神，上帝以君敬護泉源，且知君鰥居，命吾為君操饌。君食吾饌，當得道矣。言訖不見。李鄂為河山令，縣有河山巖，巖半有一脉清泉，次第流注，逐處各有一崖斛承之，如鑄出狀。鄂一日携家出遊，無何，侍婢雪兒輒就斛浣巾，立

為震霆所擊，即而視之，則其斛已碎。別安一斛，於下流矣。然則井泉當遮護乎？可觸穢乎？比見世人，多不曉此，故悉陳之。

贊曰：

伯益作井，清潔為德。養而不窮，寒衆可食。奈何弗敬，視同瓦礫。耿恭端拜，枯甃涌溢。有神司之，功利無極。

越竈。

傳曰：按《祭法》，王為群姓立七祀，竈居群祀之中。按《月令》，四時共有十二祀，竈居夏之三祀。太上曰：世間惟太一火神，檢察世人善惡長短，世人不知，其觸犯者衆。玄元道君曰：奉吾道者，醮祭家竈，及祀拜先亡外，不得淫祀他鬼。天師門下科令者祀竈，當用社日，春向門左，秋向門右。黃帝曰：凡欲求乞男女，生產平安，婚娶和合，壽命延永，學問聰明，仕宦遷進，人皆愛敬，貴人歡喜，宅不虛耗，家得平安，舟車無虞，田蠶稱意，市易和合，訟訴

得直，盜賊不侵，口舌永息，疾病痊安，伏連斷絕，呪誓解散，瘟疫永除，乃至禳厭破射，祛逐虎狼，皆當祭祀竈神。昔陰子方為人至孝，又有仁恩。適臘日晨炊，忽見竈神現于其前。子方再拜，每值臘日，即祠祀之。自此大富，比於邦君。至其孫陰識，有女為后，遂得封侯。是故陰氏子孫，世世祀竈。然則竈可越乎？

贊曰：

竈司火政，烹飪自出。有相之道，祀典所秩。功在養人，釐爾家室。蚤莫從事，可不祇栗。或取媚焉，又溺方術。

跳食。

傳曰：食者，入口之物。稍有不潔，已自不可，況跳過乎？昔盛文肅度以病入冥，所見極昏黑，恍然如行曠野。道逢故相沈義倫曰：喜君得還，切煩語吾家人，某死後，頗以汗脚鞮為苦。及還，呼沈之子諭之。沈子但悲泣不已，竟莫曉所謂汗脚

鞮者為何等事。及服除，徹靈座，乃見一緇弊鞮，掛在靈榻橫枕之上，方悟汗脚鞮者此也。然則食可跳乎？

贊曰：

艱鮮之奏，天下為烈。利常用近，一日不闕。利常則玩，用近則褻。人苟無知，或致輕蔑。以食為天，敬心毋越。

跳人。

傳曰：貧富貴賤，固若不同。得具人形，則皆一也，其可輒跳。昔劉温叟以病，命其子弟合藥。藥中有使天靈骨者，温叟一見，即愀然不樂，亟命致奠瘞于郊外。翟林嘗送正叔先生西遷，道宿僧舍。坐處偶背聖像，先生曰：轉倚勿背。林曰：豈以其徒敬之，亦當敬耶？先生曰：但凡具人形貌，皆不當慢。龜山聞而大賞其語，喜曰：見似人者，尚不敢忽；則於人也，從可見矣。苟於似人者，輒生慢易，則於其流，必至忽人。彼跳人者，能曉此乎？

贊曰：

德稟天地，秀鍾五行。人皆堯舜，此性之良。由拱荷篠，禹式耦耕。仲尼大聖，猶畏後生。騎項踞廁，失德之萌。

損子墮胎。

傳曰：按《真武靈應纂記》，舒州金部員外郎王堯，家有一女，患鬼胎，二年不下。父母憂慮求醫，莫能審察。其女覺而大怒，乃於門中自縊。空中聞人大叱曰：不得枉了性命，是汝宿債。乃請法師于家設醮，懇禱家事。真武遂俄紅光，附王氏言：前生嘗為藥婆，貨賣毒藥，與人打取胎孕，內有貴命枉殺，尋復從墮，卒難出離。上帝震怒，罰令永劫為恒沙毒蛇，今只餘此一生人身。昨日園中，若不遇吾，已為蛇矣。又按《郭普州記》，信可有女，名引鳳，初被二鬼追攝，遍歷一十八獄。每門各有一廳，最後一門，大書地獄二字。有一王者，坐一特殿。殿下列數百婦人，各有小兒抱捉，號呼索命。有孕兩三月而自毒其胎者，有



因挂麝香而偶至墮者，有因爭鬪而觸損者，有為精魅所擾而遂壞者，有因怒兒啼哭打擲至死者，有因視兒不謹死非其命者，有因闕乳而死者。王者一一詰問，莫不桎梏在身，枯瘠可憫。引鳳既而得還，具白其父。信可因大書于天寧寺壁，以為世戒。然則損子墮胎，是可為乎？惜其不知人身至貴，得人身者，誠亦為難。竊嘗涉獵外典，但凡人死，若非大善直生天堂，大惡直入地獄，半善半惡，未有去處，不免又受中有。既受中有，又須陰司注擬，有可去處，然後得生。不聞邵康節同胎女子，一墮胎後，凡二十年，始得受生。又嘗兩現母前，非中有乎？不為難乎？按如佛說，神既入胎，四種始立。堅凝為地種，潤濕為水種，暖熱為火種，動轉為風種。處母生藏之下，熟藏之上，五繫自縛，如在革囊，如在羅網，起不淨想、瑕穢想、牢獄想，晝夜恟惶，急欲趨出。母食多食少，太膩無膩，大熱大冷，色欲過度，當風

差久，游行馳走，有所度越，兒皆不安，亦復受諸苦惱。及生墮地，或以衣受，或以衾受，苦亦如之。如是處胎始終，三十有八七日，於胞胎中，自然生十一種風，關通整合，使之筋脉、肌骨、機開、孔竅，皆得流通，然後得成為人。若以道家之說言之，玉清之炁生人上一，是為泥丸。上清之炁生人中一，是為絳宮。太清之炁生人下一，是為丹田。玄元始合為九炁，生人九戶。二十四炁，生人二十四體。三百六十神，生人三百六十骨節。八十一分神，生人八十一關節。東方八天七宿，屬陽明，生人三魂。西方八天七宿，屬陰精，生人七魄。南方八天七宿，屬丹元，生人天炁。北方八天七宿，屬北極，生人玄津。無量妙一結為紫戶，天中王炁，上為腦精。每一月，即有一天之炁下液。如始一月，鬱單無量天真胞命元一黃演之炁下液。乃至第九月，無想無結無愛天嶽府命元自然玄照之炁下液是也。九炁既液，

又有甲子水神為之調暢血脉，潤澤三焦；甲戌土神為之調理肌肉，使不偏枯；甲申金神為之堅固爪齒，養育真牙；甲午火神為之和悅五臟，混合百神；甲辰風神為之保固胎息，呼吸陰陽；甲寅木神為之濯鍊筋骨，通貫百骸。但凡一身之中，五臟六腑，筋骨髓腦，皮膚血脉，精臟水臟，二萬八千形影，一萬二千精光，三萬六千出入，八萬四千毛竅，莫不各有其神。若以北斗論之，則一元所受，百歲在生。運之盛衰，身之度數，無非斗也。當生之時，九天司馬在庭。九天為之稱慶，太一為之執符，帝君為之品命，主錄為之勒籍，司命為之定筭，五帝為之監生，聖母為之衛房，天真地祇，三界備守。經所謂得還人道，擢形太陽，驚天駭地，貴亦難言，豈不然乎？於爾何負，而乃敢殺之，罪其輕乎？所以爾者，不過以家業不厚，而厭薄其多；野合淫奔，而急欲滅口。今有平生無子，或有而又復不育，或有而

身不及見，或臨老而子已先死，皆其報也。

贊曰：

厥初生民，爰字爰育。四極攸奠，三綱以續。孰殘其生，使斃于腹。虎不食子，仁性猶復。嗚呼人哉，忍彼荼毒。

行多隱僻。

傳曰：隱僻者，非止一事。大抵淫亂人家，最能損行，瀆倫亂種，獲罪最重。昔李登，年十八，魁鄉薦。繼又連發三薦，自謂狀元及第，不足為難，每自憤鬱。時葉靖法師有道行，通幽達冥，無不驗者。因熏沐，詣師請問。師曰：俟為詢之。他日為人上章，適天門未開，見諸判官，皆森列門外。師試以登事叩之，一曰：某即主科舉者也。李登初生，上帝賜以玉印。年十八，魁鄉薦。十九作狀元，五十三作右相。緣魁薦時，窺一鄰女，事雖未諧，因怒其父，摺以他事，繫之于獄，坐此展退十年，降為第二甲第二十八人。及再發

薦，橫役其兄屋基，甚至興訟，坐此展退十年，降為三甲第三十八人。及三發薦，在長安邸中，淫一美婦，懼其夫知，先陷以罪，坐此又展退十年，降為第四甲第四十八人。及四發薦，又挑鄰家室女，屢與之合，坐此帝怒，責其不悛，立命有司削其祿籍。今皆盡矣，死在旦夕，何望登第。師還，無所隱，悉以告之。登大沮，尋以病卒。嗚呼，豈但一死而已哉。異日受主，便當得絕嗣之報。政和間，吳公路被攝至冥司，主者命公路勘斷數囚。囚皆美男子、美婦人，荷枷立庭下。詢之，皆姦事也。公路罔然，未知處決。俄見一吏，抱巨冊至。公路揭開，乃陰律也。其辭曰：姦人妻者，得絕嗣報。姦人室女者，得子孫淫泆報。即秉筆依律處判。既而得還，因與同舍生金景行言之，遂聞于世。今前街後市，誇掉風流，無相公等福可折不仁之輩，並已見報，屈指可數。然則隱僻之行，是可為乎？

贊曰：古有隱慝，震廟必書。人行陰惡，鬼神所誅。閭室屋漏，通道大都。迹或容掩，心不可誣。幸人知過，維德之符。

晦臘歌舞。

傳曰：晦者，月晦也，乃司命竈君奏言世人功過之日。臘者，五臘也，乃五方五老五炁天君攢會生人善惡之日。其日，五炁天君朝會玄都，統御人間地府五嶽三萬六千陰陽之神，校定生人善惡、罪福、榮祿、壽筭、吉凶、生死等事，一一籍于錄中。正月初一，名天臘。集於九炁青天安寶華林青龍闕中，校定神炁時限長短，及禱求胤嗣、申達玄祖等事。五月初五，名地臘。集于三炁丹天梵寶昌陽丹臺朱闕，校定官祿福相、血肉盛衰等事。七月初七，名道德臘。集於七炁素天七寶金門素靈皓闕，校定骨體枯盛、學業、文籍、名宦等事。十月初一日，名歲臘。集於五炁玄天洞陰朔單鬱絕玄滋黑靈闕

中，校定祿料耗散、官祿衰微、壽筭將盡、疾病輕重、變化飲食等事。十二月臘日，名侯王臘。集於玄都洞元玉宸玉寶戊己金闕元始天帝上元八景殿中，校定生死處所、受祿分野、遊魂恠夢，乃至衆惡、灾祥、否泰、迺厄時日，及驛馬衰旺等事。嗚呼，凡遇此日，萬一有過，一書黑簿，罪可贖乎？況酆都北帝太陰天君，亦於此日，引出生人久遠先祖、父母、眷屬，乃至幽獄鬼魂，取問住在陰司年代遠近，及問積罪結疊，所致端由，墳墓見在何處，子孫名為何人。既得子孫兄弟親姻九族名姓，即攢集校定，以為生人罪狀。如積劫未有追贖，定當延累生人。此日，先靈眷屬，皆得釋放，各歸本家，受領享祀。為子孫者，自當憑仗道法，祭祀追贖。信能如是，按經所說，幽冥之間，一一得福。然則晦臘之日，當追贖乎？可歌舞乎？

贊曰：陰難駐。計吾所作，善惡何務。功過莫掩，內省知懼。酣歌于室，寧不敗度。朔旦號怒。傳曰：按《道藏》，初一日為朔，十五日為望，十八日為頗，月盡日為晦。凡遇是日，皆當謹二炁交會。又曰：月之三日、十三日、二十三日，其夕，三魂棄屍，散遊于外。月之朔望，及月晦日，七魄亦復流蕩，散遊于外。上真人曰：晦朔之日，當清齋入室，沐浴塵垢，正席而坐。所以爾者，檢制魂魄，而消滅屍鬼也，不睡尤佳。《玉燭寶典》曰：月之朔旦，士女皆當湔裳斟酒於水湄，以為度厄。然則可號怒乎？大抵朔旦者，月首也。旦者，又一日之首也。如人一步之初，一月所為，端起乎此，其可不謹，況瞋為功德劫賊，最能燒人善根。但瞋火起時，善念何在？不聞唐若山以篤尚正真、性無忿恚，遂能親遇太上乎？華嚴首坐行業素高，但以臨終一怒，遂至為蟒

乎？

贊曰：

月旦曰吉，兆其嘉祥。告朔之禮，奉以餼羊。意在謹始，敬共以將。怒為悖德，焚和自傷。宜定泰宇，以發天光。

太上感應篇卷之二十七

# 太上感應篇卷之二十八

李昌齡傳 鄭清之贊

對北涕唾及溺。

傳曰：楊子雲著論，以為春秋之際，晝夜平等，謂日出於卯之正東，入於酉之正西故也。桓譚乃著為新論以難之曰：子雲之論，乃人間之卯酉，非天上卯酉。天上卯酉，當北斗極極者，天樞也。樞者，天軸也。天之有極，亦猶蓋有保斗，天雖轉，而北極不動，亦猶蓋雖轉，而保斗不移。自人觀之，北固北而非天正中。然春秋之際，日之出入，常在南斗。當知天如蓋轉，北道常遠，而南道常近。春秋晝夜，曷嘗等乎？子雲語塞不能折。於此益知斗為天中，無足疑也。是故元始上帝稱北極為中極，寶上真人稱北斗七星為中天七星，而吾儒亦云：斗為帝車，運于中央，臨制四方，分陰陽，建四時，均五行，移節度，定諸紀，孰謂為不然

乎？昔者天皇北極北斗七星化生，自七寶蓮中，結為光明，飛于中極，去地九千九萬餘里，化為九大寶宮，乃紫微垣大虛宮勾陳之位，掌握符圖，紀綱元化，為衆星之主領。貪狼配天為天元，主身。巨門配地為地元，主命。祿存配火為日元，主福。文曲配木為月元，主祿。廉真配土為江元，主官職。武曲配水為河元，主壽。破軍配金為海元，主妻兒。每星各有三十六宮，每宮各有三十六曹，三界十方，百靈衆真，皆所隸屬。然則中天北極，不為尊乎？宅尊之所，可觸穢乎？若以《長生經》言之，則所謂北者，又不待須是正北。但凡春東、夏南、秋西、冬北，月建所指，皆為犯北斗柄也，減損壽命，最為急速，戒哉。

贊曰：克己之目，非禮勿動。不顧而唾，無義有勇。溺及簣中，擢髮是恐。立不易方，君子所重。矧彼居北，衆星之共。

對竈吟詠及哭。

傳曰：按《黃帝竈經》，竈門不得歌詠哭泣、呪罵叫噉，與篇中所言，亦皆一也。世人但知竈為一聚塼土，安知有大威力，不可冒犯，乃如是耶？昔嵩山有一廟，極靈異。殿上惟有一竈，絕不可近，近則有禍。由是遠近祈祀，殆無虛日。一日，有一禪師至廟，直入殿中，以拄杖擊竈三下曰：汝本泥土合成，聖從何來？靈從何起？乃敢恁麼烹宰衆生？言訖，又打三下，竈乃應手破墮。須臾，有一青衣，峨冠踊出，向師拜曰：某實此廟竈神，久愛京報，今蒙禪師為說無生法忍，已得脫離此處，將生天矣，敢不敬謝。師曰：此是汝本有之性，非吾強言。神復再拜而沒。人因號師為破竈墮云。其後有僧，復以此話問曰：某久在左右，不蒙方便，啓發此竈，得何宗旨，遽得生天？師曰：我只向道，汝本泥土合成，更無別箇道理。僧方佇思，師曰：會麼？曰：不會。師曰：本

有之性，什麼不會？僧作禮。師曰：墮也，墮也。破也，破也。其僧亦大悟。嗚呼，此竈但以一聞禪師之言，遂能得悟無生法忍。然則吟詠及哭者，豈不掇干瀆之禍乎？

贊曰：食不語言，宴非嘆所。哀樂以類，各有攸處。吟詠及哭，烏可妄舉。匪惟瀆神，惡失其叙。敬爾執事，謹其默語。

### 又以竈火燒香。

傳曰：按天師門下科令，竈下灰火，謂之伏龍屎，是故不可燒香。竊嘗披閱教典，香火避忌，又不只此一事。如油漬紙撚，不可熬紙錢，謂之枉積蠟錢。東嶽壘積如山，天地陰陽諸司，皆所不受。又如供養真武，夏月不可用李子，冬月不可用石榴。延降上真，不可燒乳頭香、檀香，謂之浴香。月季謂之不時華，金桐謂之鬼華。凡此皆當避忌，與其不避而自取冒犯，孰若敬遵其教乎？

贊曰：

火在周典，出納有時。夫燧取日，潔誠可知。敬心所寓，以祭以祈。拾彼餘燼，或非其宜。一物不苟，神之聽之。

### 穢柴作食。

傳曰：柴雖不爨，炁實上蒸，此穢柴所以不可作食也。不聞勞薪練炭之事乎？昔荀勗嘗在帝座，適膳夫進飯。勗曰：此必勞薪所炊。帝不之信，立召膳夫問之，則果以一故車脚供爨。楊收雖常飯，必以炭炊。一日，李璋宴其二子，亦以炭炊。二子終不下筋，惟略餌果實而已。其門下僧聖剛諫曰：他物縱不可食，炭炊之飯亦何嫌乎？二子曰：凡以炭炊，當先燒炭令熟，然後入爨，故名鍊炭。不然則尚有煙炁，此吾所以不食也。嗚呼，車脚供爨，而荀勗識為勞薪；炭失於煉，而二子尚嫌煙臭。況穢柴造食而奉祀乎？

贊曰：

稷曰明粢，祭有先飯。蔬食齊如，變色盛饌。敬天之祿，無敢或慢。火

齊必得，飭彼薪粢。賓祀貴潔，人神奚間。

### 夜起裸露。

傳曰：按《道藏》，日月各廣八百四十里，日行乎乾，月行乎坤，日得月魄而清，月得日魂而明。清明者，其氣也。精華者，其質也。陰陽者，其道也。烏兔者，其象也。卯酉者，其路也。晝夜者，其度也。交會者，其用也。大抵晝屬陽，夜屬陰，夜即百靈交會之時，不欲裸露者，恐冒犯也。不聞黃三狗、袁清之事？昔朱守成凡三夕被盜，皆不能入。賊首黃三狗發怒，必欲一逞其志。既而又至，才入第二重門，則見火光赫然，有數輩甲士喝聲叫捉。三狗惶懼，爭路走出，不覺誤傷其黨。獄成，所見甲士，乃守成家所事真武幘軸上數員從神耳。單州妓女楊素真，單獨一身，厚有所積。武弁袁清因百計誘引，相與結為夫婦，盡載所有，同歸京師。舟次孟陽，即夜醉素真，沉之重淵。無何，適值真武行

空，救之復活。然則深更僻處，孰謂無神明乎？夜起可裸露乎？

贊曰：

處必掩身，視不下帶。凡在形色，動如敬戒。安肆則偷，夙夜匪懈。豈曰幽閔，而可縱敗。于以考祥，無勞著蔡。

### 八節行刑。

傳曰：上清真人曰：八節之日，皆當謀諸善事，不可恚怒忿爭，此皆天人大忌，獲罪非小，況敢行刑。大抵其日，乃元始天尊分遺天尊、天君、天帝，神仙兵馬，無鞅數衆，教化人間，開度群品。北斗南辰、四司五帝，亦復下降，條錄罪福。且如日行赤道，月行黃道，乃其常也。至於立春，則日行青道，出黃道東。三素元君上詣天皇大帝，游宴元景，行道受仙，度仙上聖天尊同始青天君下降。立夏則日行赤道，出黃道南，太極上真三元真人上詣紫微宮，游宴玄景，行道受仙，好生度命天尊同始丹天君下降。立秋則月行白道，出黃道

西，太素上真白帝君上詣玉天玄皇高真，游宴元景，行道受仙，太靈虛皇天尊同始素天君下降。立冬則月行黑道，出黃道北，上真人帝君皇祖上詣高上九天玉帝，游宴洞景，行道受仙，無量太華天尊同始玄天君下降。春分則日復行青道，出黃道東，太微天帝君上詣高上玉皇，游宴始景，行道受仙，玉寶皇上天尊同青靈始老帝君下降。秋分則月行白道，出黃道西，南極上真赤帝君上詣上閔風臺九靈夫人，游宴明景，行道受仙，太妙至極天尊同皓靈皇老帝君下降。夏至則日行赤道，出黃道南，扶桑公大帝上詣太微宮，遊宴受景，行道受仙，玄真萬福天尊同丹靈真老帝君下降。冬至則月行黑道，出黃道北，太霄玉妃太虛上真上詣太皇宮太微天帝，游宴清景，行道受仙，玄上玉晨天尊同五靈元老帝君下降。但凡含炁之流，每至是日，各有變化，翾飛蠕動，草木飛沉，隨緣感應，改故易新，輕者或更重，重者

或更輕，善惡回換，炁象之運，自然而然。上學之士，每於此日，自當存想祈謝，因變行化，習吉除凶，進善黜惡，陞明棄闇，入正治邪，鍊偽成真，勵思登聖，開度群品，生成萬彙，仰副太上衆真如是之意。彼行刑者，何物小子，乃敢爾耶？

贊曰：

元氣流行，各有分度。斗轉星移，鼎新革故。賞罰代天，順其象數。節序闡端，生意攸寓。奉時承休，宜戢威怒。

### 唾流星。

傳曰：神降自斗而天師生，虛危分秀而真武生，女節感星而白帝生，流星入口而葉君生。然則星之所以分靈孕秀者，為如何哉？流星者，亦星之一也。《楞嚴經》曰：或見二日，或見兩月，乃至暈適珮玦，彗孛飛流，負耳虹霓，皆為惡相。《爾雅》曰：奔星為約，約即流星也。彗星為攙，捨即孛星也。世人但知奔流為妖，而不知奔流非妖，妖實自召，

要當恐懼，修省急修。所以禳解之德，其可輒唾？不聞景公三語之善，熒惑為之退舍乎？

贊曰：

流星天使，飛翔大空。占彼順逆，灾祥所鍾。隕石宋微，墜營亮終。有動于上，敢不敬恭。厭勝之說，出於齊東。

指虹霓。

傳曰：《演孔圖》曰：霓者，斗之亂。

精斗失度則投霓應。《河圖稽曜鈎》

曰：鎮星散而為虹霓。《春秋運斗

樞》曰：星散為虹。當知虹霓者，信

為斗星餘氣著于形色者也。昔者，

孔子修《春秋》，製《孝經》。既成齋

沐，向北斗自陳所以著書之意。忽

有赤虹，自天而下，化為黃玉刻文，

孔子跪而受之。孰謂虹霓，非斗星

餘炁乎？苟或指之，烏得無罪？

贊曰：

蛟竦在東，詩人莫指。白虹貫日，軻度易水。騷喻小人，飄風同旨。上象或變，灾異所起。見者聳然，其可

慢視。

輒指三光。

傳曰：太上曰：若見日曜月曜，北斗南斗，則鄭重扣頭，請乞祐護，上言呼稱，至聖至尊、真宰真君，矜哀凡冗，赦宥過咎，即再拜，不得輕慢，反招殃累。然則三光可指乎？三光者，日月星也。日月已疏于下，請以北斗南斗、五老五星、二十八宿言之。大抵世人作福者少，造惡者多，是以累歲連遭，連年困篤，鮮有安者。若蒙東方九夷胡老君、歲星重華君、角亢氏房心尾箕七宿君主攝者，可解寅卯辰甲乙歲月日時上三命刑害之灾。東方九九八十一萬步中，五灾九厄，土害之炁，可以辟斥。正月、二月、三月，可保無他。若蒙南方八蠻越老君、火德熒惑君、太陽南斗君、井鬼柳星張翼軫七宿君主攝者，可解巳午未丙丁歲月日時上三命刑害之灾。南方八八六十四萬步中，五灾九厄，金害之炁，可以辟斥。四月、五月、六月，可保無他。

若蒙西方六戎氏老君、金德太白君、奎婁胃昂畢觜參七宿君主攝者，可解申酉戌庚申歲月日時上三命刑害之灾。西方六六三十六萬步中，五灾九厄，木害之炁，可以辟斥。七月、八月、九月，可保無他。若蒙北方五狄羌老君、水德辰星君、太陰北斗君、斗牛女虛危室壁七宿君主攝者，可解亥子丑壬癸歲月日時上三命刑害之灾。北方五五二十五萬步中，五灾九厄，火害之炁，可以辟斥。十月、十一月、十二月，可保無他。若蒙中央三秦儉老君、土君、鎮星君、魁魼魍魎魍魎勾陳七宿君主攝者，可解辰戌丑未戊己歲月日時上三命刑害之灾。中央土害之炁，可以辟斥，地祇積崇，可以解除，四季之內，可保無他。然則三光，可輒指乎？

贊曰：

帝堯南面，中星是窺。舜齊七政，璿玉衡璣。兢業觀仰，以審百為。照臨在上，幽隱弗遺。彼妄指者，凡民

無知。

久視日月。

傳曰：太陽日君為陽官總司，列二十八宿為屬吏。太陰月君為陰官總司，總五嶽二十四炁，治山為地司，三河四海九江十二溪為水府。每一年有二十四炁，每一節炁即太陽日君首至，當節合巡宿中。此日太陰月君亦至。其日，則二十四炁治山。二十四炁君，各攢集世人善惡、灾福、壽祿、生死等事，上於所屬之嶽。本嶽司命，又復騰奏于當節陰陽二君所巡宿中。立春節，按虛宿湧泉治陰官左監神炁君奏事。雨水節，按危宿北平治陰官右監神炁君奏事。驚蟄節，按室壁二宿稠稷治陰官左監察炁君奏事。春分節，按奎宿主簿治陰官右功炁君奏事。清明節，按婁宿蒙秦治陰官左領功炁君奏事。穀雨節，按胃宿平蓋治陰官右領功炁君奏事。立夏節，按昴宿雲臺治陰官左監功炁君奏事。小滿節，按畢宿澁口治陰官右監功炁君

奏事。芒種節，按觜參二宿公慕治陰官右都炁君奏事。夏至節，按井宿玉局治陰官左察炁君奏事。小暑節，按鬼宿平岡治陰官左功炁君奏事。大暑節，按柳宿北邙治陰官右察炁君奏事。立秋節，按星宿葛瓚治陰官右領炁君奏事。處暑節，按張宿後城治陰官左都炁君奏事。白露節，按翼宿本竹治陰官右監察炁君奏事。秋分節，按軫宿秦中治陰官左領神炁君奏事。寒露節，按角亢二宿陽平治陰官左平炁君奏事。霜降節，按氏宿鶴鳴治陰官左長炁君奏事。立冬節，按房宿滴沅治陰官右長炁君奏事。小雪節，按心尾二宿庚除治陰官右都領炁君奏事。大雪節，按箕宿隸上治陰官左都監炁君奏事。冬至節，按斗宿真多治陰官右領神炁君奏事。小寒節，按牛宿昌利治陰官左都監炁君奏事。大寒節，按女宿鹿堂治陰官右平炁君奏事。然則日月，可久視乎？

贊曰：

古者人君，朝日夕月。出納寶錢，職掌炁越。竹官望拜，漢祀猶設。典禮寢廢，寅恭或闕。瞪視奚為，爝火自滅。

太上感應篇卷之二十八



# 太上感應篇卷之二十九

李昌齡傳 鄭清之贊

春月燎獵。

傳曰：程嗣昌平生戒殺，未嘗輒事烹庖。因在密州，見數輩獵徒打捕鳥雀，或碎首穴胸於鷹鴟爪嘴之下，或拗脚折翅於罝罟網罟之中。是夕，即露香告天曰：輒欲將家藏一切所食衆生並同七世父母因緣戒殺圖子，覆板印行，庶幾此邦，或知改過。既而印行，攔頭有彭景者，亦請一本，其妻華氏一見，即大怒，奪取搯破，棄之穢處。明日，買得一魚，操刀欲鱠，魚忽跳躍，觸破其眼，血流滿地。須臾皆化為蟲，緣遶其身。方喧傳間，監鎮向孰况見真武真君曰：吾察知此地，有一上善，乃興化軍客人程嗣昌，印施戒殺圖子。不謂婦人華氏，乃敢搯破，罪惡深重，自不容逃。其餘不改之人，亦當獲罪。俟吾二十七日再降，更看如何。

然則燎獵，是可為乎？惜人不知一切衆生，皆有佛性，導之以義，亦無不曉。昔韋南康鎮蜀時，有一鸚鵡甚慧。馴養者曉以佛理曰：若欲念佛，當由有念，以至無念。即仰首奮翼，若聽若承。及使念佛，則默然不答。或詰其不念，則唱言阿彌陀佛一聲，意若有悟：以有念為緣生，以無念為真際也。一日，不震不仆，斂翼委足，揜然而絕。焚之，有舍利十。公為立塔瘞之，號曰鸚鵡塔。孰謂無佛性乎？衛敬瑜妻李氏，年二十而寡。父母欲嫁，誓志不許。所居有雙燕，一日，忽孤飛。李氏感之，謂曰：能如我乎？因以縷誌其足。明年復來，孤飛如故。李作詩曰：昔年無偶去，今春猶獨歸。故人情既重，不忍復雙飛。又明年復來，則李氏已死。或告之已死及葬處，即徑往墓側，悲鳴不食而死。人因瘞之，號曰鸞塚。孰謂不尚義乎？太上戒人燎獵，而以春月為言者，蓋春月乃萬物發生之際，若縱燎

獵，獵之傷殺，尚猶有數；一火之過，是有數乎？《月令》一書，亦自言之，其可不戒。

贊曰：

周典夏苗，擇取不孕。則知春蒐，弊禽尤靳。意在訓兵，非殺之徇。鳥獸孳尾，生理方順。焚林而獵，仁者奚忍。

對北惡罵。

傳曰：薄拘羅尊者未證果時，嘗罵人喫飯遲為牛銷草，至為羅漢，尚不免有牛飼之報。善住天子作維那時，嘗罵客僧為眼瞎漢，及作天子受天福盡，亦不免有眼瞎之報。孰謂惡罵為無害乎？況對北乎？北者，至尊所居，有北辰焉。辰有五星，第一星即天皇帝，第五星即北極大帝。斗有九星，第七星破軍，號曰天之上帝，玄陽天關搖光太明太上玉皇道君，其為尊也，餘皆可知。按《本生經》，元始上帝曰：若有信心男女，於上春日，一心齋戒，肅爾神明，設九光醮，迎請紫光聖母，并七

元君，虔恭奏獻，縱有十惡重罪、冤家苦報，如九日輪照於冰山，應時消釋，福壽增延，無量天真俱來擁衛，如見世圓滿，子孫昌盛，所有福德，如彼甘泉，隨汲隨發，受用無量，命終之後，超生大梵真天。然則對北可惡罵乎？不聞劉俊本命醮祭而果蒙宥罪，虔婁為父禱祈而果獲延年乎？又不聞李答奉事而有子衛公，為唐功臣；武侯有女效彭女奉事，而亦獲上昇乎？此皆載於教典，其事甚衆，姑摘一二以示世云。

贊曰：

人之北面，尊歸我后。天之北極，曰辰與斗。俯仰之際，宜無所苟。一朝對櫛，管寧追咎。居如不容，矧敢滕口。

無故殺龜打蛇。

傳曰：應世真人曰：一切翽飛蠢動，皆不可殺。若夫龜蛇二物，尤不可殺。若輒殺之，或至殺有靈者，其陰精定當害人。是以識者，常切救護。昔劉彥向，其父為湖州刺史僚

屬，從銀坑回，有以一大龜為獻者曰：得此龜者，壽當千歲。其父即日，復自送于坑所。父歿，彥回為房州司士。忽山水暴至，平地數尺，一家驚恐，未有所之。俄有大龜，似欲引路，從龜而行，歷十餘地，皆得淺處，遂脫水難。是夕，復夢大龜曰：

昔在銀坑，嘗蒙先使君救脫之惠，今故奉報。孫真人在世時，嘗因山行道，見村民擊一青蛇，公力救之。月餘，再過其地，遙見一少年馳騎而至，迎公以歸。既至，乃一王居，有一絳服者出謝曰：昨日小兒癡騃，幾乎遇害，幸先生救之。此間血屬甚多，無不感激，故遣長兒迎致，略摠謝悃。既而引入深宮，復有一妃，携一青衣小兒，出拜致謝，再三延留。凡三日，珍饈美膳，縑綃珠玉，無不有之。先生皆卻不受，惟受上帝所頒龍宮三十仙方以歸。今千金方，蓋有得於三十方者也。然則殺龜打蛇，是可為乎？

贊曰：

龜預四靈，蛇先百蟄。豫且之網，不免於執。白帝之精，當道而泣。豈期無知，患或偶及。苟遇識者，宜拯其急。

如是等罪，司命隨其輕重，奪其紀筭。筭盡則死，死有餘責，乃殃及子孫。

傳曰：如是等罪，上文各已隨事演注，茲不復論。請以七趣受生因果言之，庶幾各知。七趣輪回，不得真淨，皆一虛妄，殺盜淫習，尚隨順爾。經云：一切世間，先死相續，生從順習，死從變流。臨命終時，未捨暖觸，一生善惡，俱時頓現。死逆生順，二習相交，純想即飛，必生天上。若飛心中，兼福兼慧，及與淨願，自然心開。見十方佛一切淨土，隨願往生，情少想多，輕舉非遠，即為飛仙。大力鬼王，飛行夜叉，地行羅刹，遊於四天，所去無礙。其中若有善願善心，護持我法，或護禁戒，隨持戒人；或護神呪，隨持呪者；或護禪定，保綏法忍。是等親往如來坐下，情想均等，不飛不墜。生於人

間，想明斯聰，情幽斯鈍，情多想少。流入橫生，重為毛羣，輕為羽族，七情三想，沉下水輪。生於火際，受氣猛火，身為餓鬼，常被焚燒，水能害己，無食無飲，經百千劫，九情一想。下洞火輪，身入風火，二交過地，輕生有間，重生無間。二種地獄，純情即沉，入阿鼻獄。若使心中，有謗大乘，毀佛禁戒，誑妄說法，虛貪信施，濫膺恭敬，五逆十惡，更生十方阿鼻地獄。循造惡業，雖則自招，衆同分中兼有，元地如是。地獄、餓鬼、畜生、人及神仙，天洎修羅，精研七趣，皆是昏沉，諸有為相，妄想受生，妄想隨業，於妙圓明，無作本心，皆如空華，元無所有，但一虛妄，更無根緒。此等衆生，不識本心，受此輪回，經無量劫，不得真淨，皆由隨順殺盜淫故。何名七趣：一者天趣。經云：諸世間人，不求常住，未能捨諸妻妾恩愛，於邪淫中，心不流逸，澄瑩生明，命終之後，鄰於日月，如是一類，名四天王天。於己妻房，姪

愛微薄，於淨居時，不得全味，命終之後，超日月明，居人間頂，如是一類，名忉利天。逢欲暫交，去無思憶，於人間世，動少靜多，命終之後，於虛空中，朗然安住，日月光明，上照不及，是諸人等，自有光明，如是一類，名須臾摩天。一切時靜，有應觸來，未能違戾，命終之後，上昇精微，不接下界，諸人天境，如是一類，名兜率陀天。我無欲心，應汝行事，於橫陳時，味如嚼蠟，命終之後，生越化地，如是一類，名樂變化天。無世間心，同世行事，於行事交，了然超越，命終之後，遍能出超，化無化境，如是二類，名他化自在天。如是六天，形雖出動，心迹尚交，自此已還，名為欲界。乃至色界一十八天，無色界四天，是諸天人，按如佛說，皆是不了妙覺明心，積妄發生，妄有三界中間，妄隨七趣沉溺，補特伽羅，各從其類。二者仙趣。經云：復有不依正覺，修三摩地，別修妄念，存想固形，遊於山林，人不見處，

有十仙種：堅固服餌而不休息，食道圓成，名地行仙；堅固草木而不休息，藥道圓成，名飛行仙；堅固金石而不休息，化道圓成，名遊行仙；堅固動止而不休息，氣精圓成，名空行仙；堅固津液而不休息，潤德圓成，名天行仙；堅固精色而不休息，吸粹圓成，名通行仙；堅固呪禁而不休息，術法圓成，名道行仙；堅固思念而不休息，思憶圓成，名照行仙；堅固交遘而不休息，感應圓成，名精行仙；堅固變化而不休息，覺悟圓成，名絕行仙。是等皆於人中鍊心，不修正覺，別得生理，壽千萬歲。休止深山，或大海島，絕於人境，斯亦輪回，妄想流轉，不修三昧，報盡還來，散入諸趣。三者阿脩羅趣。經云：是三界中，復有四種阿脩羅類。若於鬼道，以護法力，成通入空，此阿脩羅從卵而生，鬼趣所攝。若於天中，降德貶墜，其所卜居，鄰於日月，此阿脩羅從胎而出，人趣所攝。有脩羅王執持世界，力

洞無畏，能與梵王及天帝釋四天爭權，此阿脩羅因變化有，天趣所攝。別有一分下劣脩羅，生大海心，沉水冗口，旦遊虛空，暮歸水宿，此阿脩羅因濕氣有，畜生趣攝。四者人趣。經云：為人豪貴，或為國王，或為長者，從禮事三寶中來；為人端正，顏色潔白，姿容第一，從忍辱中來；為人精進，無有懈怠，樂為福德，從精進中來；為人安詳，言行審諦，從禪定中來；為人才明，了達深法，講說妙義，開悟愚蒙，聞其言者信為珍寶，從智慧中來；音聲清徹，從歌詠三寶中來；為人潔淨，無有疾病，從慈心中來；為人多怖，音聲嘶破，從地獄中來；為人暗鈍，懈怠多食，語不明了，又復怯弱，樂友癡人，偏喜黑暗，從畜生中來；為人不淨，從豬中來；為人兇惡，從蝮蛇中來；無庶幾心，從狗中來；狼戾自用，從羊中來；好美飲食，恣殺物命，無有慈心，從豺狼鷹中來；不能安詳，及不忍事，從獼猴中來。又云：為人

脩長，恭敬人故；為人短小，輕慢人故；為人醜陋，好瞋恚故；生無所知，不學問故；為人顛愚，不教人故；短命多病，好殺生故；無有資生，常苦貧困，好偷盜故；無有子息，亂人妻故；子女姪亂，亂人室女故；鰥寡孤獨，虐遇子女故；為人饑餓，好獨食故；為人奴婢，負債不償，不禮三尊故；為人醜惡，遮佛燈故；生水牛中，為官酷虐，刻剥小民故；生麀鹿中，驚怖人故；生諸龍中，好調喜故；身生惡瘡，療治不效，鞭撻人故；人見歡喜，對人歡喜故；人見不喜，對人不喜故；長官囚繫，桎械在身，籠閉衆生故；為人吻缺，好釣魚故；生裸形國，輕衣唐突佛精舍故；生馬蹄國，著屐踐佛地故；生穿胸國，布施作福生悔心故。又云：彼梟倫者，酬足復形，生人道中，參合頑類。咎徵參於愚類，狐倫參於庸類，毒倫參於狼類，蛔倫參於微類，食倫參於柔類，服倫參於勞類，應倫參於文類，休徵參於明

類，循倫參於達類。是等皆以宿債畢酬，復形人道，皆無始來，業計顛倒，相生相殺，不遇如來，不聞正法，於塵勞中，法爾輪轉，此輩名為可憐憫者。五者地獄。經云：此等衆生，自業所惑，造十習因，受六交報。云何十因：一者姪習，二者貪習，三者慢習，四者瞋習，五者詐習，六者誑習，七者怨習，八者見習，九者枉習，十者訟習。云何六報：一切衆生，六識造業，所招惡報，從六根出。一者見報，招引業果。此見業交，臨命終時，先見猛火，滿十方界，亡者神識，飛墜乘煙，入無間獄。二者聞報，招引業果。此聞業交，臨命終時，先見波濤，沒溺天地，亡者神識，降注乘流，入無間獄。三者嗅報，招引惡果。此嗅業交，則臨終時，先見毒炁，充塞遠近，亡者神識，從地踊出，入無間獄。四者味報，招引惡果。此味業交，則臨終時，先見鐵網，猛燄熾烈，周覆世界，亡者神識，下透挂網，倒懸其頭，入無間獄。五

者觸報，招引惡果。此觸業交，則臨終時，先見大山，四面來合，無復出路，亡者神識，見大鐵城，火蛇火狗，虎狼獅子，牛頭獄卒，馬頭羅刹，手執鎗稍，驅入城門，向無間獄。六者思報，招引惡果。此思業交，則臨終時，先見惡風，吹壞國土，亡者神識，被吹上空，旋落乘風，墮無間獄。於此六報一一報中，又各發明二種惡相，此即名為地獄十因六果，大抵皆是衆生迷妄所造。若諸衆生，惡業圓造，入阿鼻獄，受無量苦，經無量劫，六根各造，乃彼所作，兼境兼根，則入八無間獄。身口意三，作殺盜淫，則入十八地獄。三業不兼中間，或為一殺一盜，則入三十六地獄。見見一根，單犯一業，則入一百八地獄。由是衆生別作別造，於世界中，入同分地，妄想發生，非本來有。六者餓鬼。經云：是諸衆生，非破律儀，犯菩薩戒，毀佛涅槃，諸餘雜業，歷劫燒然，後還罪畢，受諸鬼形。若於本因，貪物為罪，是人罪畢，遇物

成形，名為恠鬼。貪色為罪，遇風成形，名為魅鬼。貪惑為罪，遇畜成形，名為魅鬼。貪恨為罪，遇虫成形，名為蟲毒鬼。貪憶為罪，遇衰成形，名為癘鬼。貪傲為罪，遇烝成形，名為餓鬼。貪罔為罪，遇幽成形，名為魘鬼。貪明為罪，遇精為形，名為魍魎鬼。貪成為罪，遇明為形，名役使鬼。貪黨為罪，遇人成形，名傳送鬼。是人皆以純情墜落，業火燒乾，上出為鬼。餓鬼一趣，尤為至苦。以諸貪故，雖有所思，終無所得。以諸嫉故，見人飽滿，已常飢乏。以毒害故，身自出火，還自焚燒。以驕慢故，福力至微，一切小鬼，已皆不勝。昔佛在維耶離國，晨出有八萬四千餓鬼哀告曰：我等先身，雖嘗見佛，不知有佛。雖嘗聞法，不知有法。雖嘗見僧，不知有僧。我不作福，轉教他人，亦不作福。見人作福，言常笑之。見人作罪，意常歡喜。以種行至惡，墮此趣中，已七萬歲。每見小水，尋復不

見。若見大水，即為鬼神羅刹遮護。雖值大雨，身亦如處熱沙。幸望哀救。佛因教令持水奉佛及僧，遂得免苦。阿難在迦毗羅城，見一餓鬼，自稱面然，告阿難言：汝後三日，決定命終，墮我等趣。阿難告曰：當作何計，可以免此？面然曰：無非施我等食，令得飽足，因得出離，則汝亦得脫免。阿難投佛，佛言：汝欲施食，當先施一淨器，置食其中，誦我陀羅尼呪七遍。出於戶外，彈指七下，施諸鬼神。彼得出離，則汝亦得脫免，兼得延年。即說呪曰：那摩薩縛怛他羯多縛路枳帝唵三跋羅三跋羅吽。阿難信受奉行，果得脫免。七者畜趣。經云：鬼業既盡，則情與想二俱成空，方於世間，與元負人，怨對相值，身為畜主，酬其宿債。物怪之鬼，物銷報盡，生於世間，多為梟類。風魅之鬼，風銷報盡，多為咎徵一切異類。畜魅之鬼，畜死報盡，多為孤類。蟲蠱之鬼，蠱滅報盡，多為毒類。衰癘之鬼，衰窮

報盡，多為蛔類。受炁之鬼，氣銷報盡，多為食類。綿幽之鬼，幽銷報盡，多為服類。和精之鬼，和銷報盡，多為應類。明靈之鬼，明滅報盡，多為休徵一切諸類。依人之鬼，人亡報盡，多為循類。是等皆以業火乾枯，酬其宿債。傍為畜生，亦皆自虛妄業之所招引。若悟菩提，則是妄緣本無所有。又云：從是畜生，酬償先債。若彼酬者，分越所酬，此等衆生，還復為人，反徵其剩。

如彼有力，兼有福德，則於人中，不捨人身，酬還彼力。若無福者，還為畜生。償彼餘直，當知用錢物，或沒其力，償足自停。如於中間，殺彼身命，或食其肉。如是乃至經微塵劫，相食相誅，猶如轉輪，互為高下，無有休息。不聞兜調以貢高好罵，而死受狗身；李六郎以放債倍利，而亦身死為狗乎？

贊曰：

不善所積，降殃有餘。積既由漸，餘亦難除。樂厲沈虐，族黨畢誅。秦

稔苛酷，子嬰素車。施報對立，效驗匪虛。

太上感應篇卷之二十九

### 太上感應篇卷之三十

李昌齡傳 鄭清之贊

又諸橫取人財者，乃計其妻子家口以當之，漸至死喪。若不死喪，則有水火、盜賊、遺亡、器物、疾病、口舌諸事，以當妄取之直。

傳曰：魏明太后常幸絹藏，命王公嬪主從行者百餘人，各自負絹，稱力取之。時尚書令李崇、牽武王融，負絹過重，各足蹶顛仆。崇傷腰，融損足，惟侍中崔光止取兩疋。太后恠其取少，對曰：臣兩手惟堪兩疋。由是衆皆大沮，慚愧無地。嗟乎，世人臨財，多是如此，准其如此，是以橫逆之財，亦所不問。夫豈悟太上有如是之戒，冒之便當掇如是之禍乎？昔韋公幹為瓊州牧。瓊多烏文、呿陁，皆奇木也。公幹驅匠，沿海採伐，至有不中程而以斤自刃者，又竭夷獠膏血，鞭撻過酷。及受代具二大舟，一實烏文器雜以銀，一實

去陶器雜以金，浮海而歸。行未百里，二舟俱沒。非水災而折之者乎？呂師造為池州刺史，剽竊公帑，侵漁百姓，厚載而歸。舟泊竹篠，忽有一道士，狀如狂醉，躍入舟中，直穿而過。隨所穿處，火即隨發，一舟之物，盡成煨燼。惟舟與人，了無所傷。非火燒而折之者乎？丁晉公貶朱崖，至龍門南彭婆店，忽遇巨盜，盡失所有。所寶玉枕，今在穎陽富家，盜所質也。非盜賊而折之者乎？馬襄為西川漕。劉旰之亂，襄忙惶間，親持五十兩大銀十錠，以竿送下井中。亂定，取不可得。繼募水工，窮水而取，水輒隨發，竟失所在，不復可得。非遺亡而折之者乎？金昱世患白癩，傳至昱身，已三世矣。時何奎有道術，能知禍福。昱往問之，奎曰：汝家必有他人功德，或供養之具，亡者無依，憑之作祟爾。昱歸問母，母曰：今佛前紗窗乃圍城中所得。急撤起，醮祭遣之，病果獲愈。非疾病而折之者

乎？劉沼被命點檢蜀宮時，內庫珠寶無算，頗招物議。及解職，乃自請押綱，以塞前謗。無何，初至新都，忽遇羅今璠，遂為所殺，盡劫而去。非口舌而折之者乎？然則折當之說，孰謂為不然乎？

贊曰：

貪者一得，萬有餘喪。財恃而出，狼籍莫狀。廉者不取，乃無盡藏。福祿傳家，舉世所上。請擇於斯，天理無妄。

又枉殺人者，是易刀兵而相殺也。

傳曰：所謂枉殺取功，於時者言之，不過有三。一者斷獄，二者用藥，三者破胎。斷獄不明，忽至失錯，非枉殺乎？用藥誤謬，遽至不起，非枉殺乎？破胎損子，賊及無辜，非枉殺乎？殺人之罪，天所不赦。不有人禍，必有陰誅。雖曰殺人適足自殺，太上所謂易刀兵而相殺，此皆是也。昔者，趙時為無為軍教授。夜夢一囚訴冤曰：某不幸為祖鞠枉殺，死魂無歸，奈何。時曰：祖公明習法

律，又處已廉謹，安有枉者？囚曰：不然。某死雖非祖意，然寔因其一疑，遂致移獄，竟以死論，冤有所自，非鞠而誰。某已訴之于天，鞠不久矣。月餘果卒。此但一疑，遂成枉殺。然則斷獄，可不審乎？婦人楊阿剩自幼貧病，晚益狼狽。臨終乃自言曰：我前身本一男子，行醫但按本草，失於詳審。一日，有一婦人自稱病蠱，不復辨其是孕，遽以芫花酒下之。是夕，婦人及腹中二子俱斃，即是我一舉而殺三人也。陰司罪我，受苦滿足，罰受女身，今已三反世世，常為賤隸，長困飢渴，多病少安。可語世人，當用藥時，要當以我為戒。然則用藥可不謹乎？婦人有穎娘子者，厭多子，自毒其胎者，屢莫乾道。戊子又孕，亦復毒之以藥，血遂洞下，伏枕者六年。臨終之日，明見十數小兒，前後挽撮，語聲琅然。一家老稚，莫不皆聞。良久遂卒。然則破胎損子，可不戒乎？

贊曰：

挺刃殺人，初非有異。止不嘗藥，猶名為弒。伯仁之死，茂洪所致。持法不平，操刀無二。犴獄鹵莽，罪亦稱是。

取非義之財者，譬如漏脯救飢，鳩酒止渴，非不暫飽，死亦及之。

傳曰：財非己有，起心取之，即不義也。又有至不仁者，取及死人，尤不義者也。昔王玄象為下邳太守，民垣有一古塚，日初昇，即見一女子立于其上，迫而視之，則遂隱玄。象聞之，立命發掘剖棺，乃一女子，年可二十，姿貌如生，謂玄象曰：妾乃東海王女也，不日當生。塚中之物，任君悉取。惟妾此身，切不可害。玄象見女子臂有玉釧，又復斬而取之。女子哭曰：此番又是死矣。奈何其玄象，尋亦以此伏誅。為玄象者，真不仁矣。惜其不知太陰鍊形，古來本有。昔趙成子死于山谷之下。後五年，山行者見其五臟復生，以手披之，於五臟間，各得一枚小石。知必異人，因併吞之。又五年，有一老

翁，幡然白髮，來至屍所。其山行者所吞五石，劃時從口吐出，飛入成子身中，成子遂能起行。山行者立至殞命，繼遂服滅，盜石故也。然則塚可發乎？物可劫乎？

贊曰：

董卓盜漢，郿塢是築。曾不旋踵，太炆然腹。崇在江陵，剽劫行戮。白首東市，何有金谷。漏脯鳩酒，未足為毒。

夫心起於善，善雖未為而吉神已隨之；或心起於惡，惡雖未為而凶神已隨之。

傳曰：田子與隰子登臺。田子悵然南望，未嘗言伐木也，而隰子已知其意，明日盡伐向南之木。曹公下鷄肋之令，未嘗言退師也，而楊脩已知其退師。大抵意有所向，即是已露，人尚可得而察，況鬼神乎？昔王文正公旦初釋褐，知臨江獄，有一囚罪當死，公求計出之，久而未得。一夕不寐，至五鼓時，忽然有得，急趨出，則吏卒半皆已起，驚呼相向。公恠

而問之，則曰：直更者，方擊五鼓，忽聞空中有聲曰起，公將出矣。方起整衣，則公果出。公默然心契，因引囚出問，竟為平反。胡宿通判宣州，有一囚，獄成當死。公疑之，引出審問，囚憚楚榜不敢言。公一日，正衣冠，焚香堂上，靜而思之，俄而假寐。忽夢一神告曰：殺人者，吳姓也。公急引囚，屏左右細問，囚始實告：某旦起之田，見一人已卧街中，被姓吳者目。死者之婦，令執某到縣。久聞姓吳者與此婦姦，不得其實，何敢言也。公命推究，殺人者，果吳姓也。然則太上所謂心起於善，善雖未為而吉神已隨之；或心起於惡，惡雖未為而凶神已隨之。豈不然乎？

贊曰：

陽萌於子，猶在地中。芸生泉動，仁氣已通。陰萌於午，尚積虛空。靡草遽死，殺氣已鍾。陰陽所兆，善惡則同。

其有曾行惡事，後自改悔，諸惡莫作，



衆善奉行，久久必獲吉慶，所謂轉禍爲福也。

傳曰：老子曰：善之與惡，相去何若。竊詳三復斯言，大抵善惡二途，初不相遠，特在日用一念起處，有是，有不是。爾儻能知此道理，常切點檢，則自然全體是善，福德無有不增，災禍無有不轉。況太上明有科令，許令以福削刑，以德削罰乎？又不聞抱朴子之言乎？子曰：立功為上，謝過次之，以護人疾病為上功，以忠孝和順仁信為本行。能如此者，則道合陰陽。雖未拜太上，亦為仙矣。然則人之有過，可不改乎？昔阿那律於往昔世本一劫賊，夜至佛寺，見佛燈欲滅，拔箭挑之，燈忽大明，威光耀目。那律悚然，即時捨去。自此諸惡漸滅，福德日增，竟能得道，徹視第一。朱狇亦一劫賊，以事敗深入終南、少室等山，日夜懺悔。真人馮君憐之，授以道要。修之不怠，凡二十八年。轉入東阮修之，又一百四十七年。竟能輕舉。

楊仲和本許州推司。天聖中，被差至蔡州鞠獄。以枉斷公事，為北極繳奏，將受重罰。仲和悔懼，立捨吏役，誓修百善，以贖前過。每遇往來僧道、貧乏道人、鰥寡孤獨、死喪疾急，無不拯卹。如是數年，家道一空，甚至無以自給。止有一子，亦復賣與他人。朝夕惟奉真武真君，香火未嘗少怠，竟以勇於改過，為真君憐憫，化為道人，授以十二真君靈籤，俾之養道。繼蒙東嶽收錄，補為麻溪注祿主簿，朝廷追封悟本真人。吳睦亦一縣吏，以枉刻人民，為民所訴。睦惶懼避罪，遠入深山。忽遇真人孫君，為之誦經講道，談論禍福。睦即心開，盡出平生所為不善之罪，搏頰懺悔，竟蒙真君授以道要，亦得上昇。然則太上所謂轉禍為福，豈不然乎？

贊曰：悔而作誓，聖經錄秦。變夷用夏，衮筆書麟。念狂作聖，觀過知仁。六陰盡剝，一炁為春。吾觀其復，君子

若人。故吉人語善、視善、行善，一日有三善，三年天必降之福。凶人語惡、視惡、行惡，一日有三惡，三年天必降之禍。胡不勉而行之。

傳曰：伯夷目不視惡色，韓昌黎一視而同仁，視善也。燕肅公一言而天下奏讞不死，呂文靖一言而天下不稅農器，語善也。高柴仁及草木，黃萬祐澤及飛禽，行善也。必欲三者皆善，在我日用而已，夫復何難？陳舉曰：為善者，必享福報。積陰德者，子孫必昌。不殄天物，不肆淫盜，不毀正教，善事也。救死扶傷，急人患難，無縱隱賊，陰德也。不作善事，不積陰德，則惡趣無所不入。昔李光玄精勤求道，積有年矣。一日，於少室山遇一異人，明告之曰：爾今求道，惟當提拔世人耶？惟當只了自己耶？若只自為一身，神仙不取。然則為善固佳，又須提拔世人。提拔當如何？開示悟入是也。《妙法蓮華經》七卷之言，其要亦盡在開示悟入四

字也。

贊曰：

太上立言，至正大公。金科玉條，訓迪愚蒙。厥有深旨，見諸篇終。舍爾舊惡，開其新功。一念遄返，萬善畢通。仁哉妙造，生生無窮。

太上感應篇卷之三十

(吳亞魁點校)

## 034 太微仙君功過格

經名：太微仙君功過格。一卷。  
底本出處：《正統道藏》洞真部  
戒律類。

### 太微仙君功過格序

《易》曰：積善之家，必有餘慶；積不善之家，必有餘殃。道科曰：積善則降之以祥，造惡則責之以禍，故儒道之教，一無異也。古者聖人君子、高道之士，皆著盟誡，內則洗心鍊行，外則訓誨於人，以備功業矣。余於大定辛卯之歲，仲春二日子正之時，夢遊紫府，朝禮太微仙君，得受功過之格，令傳信心之士。忽然夢覺，遂思功過，條目歷歷明了，尋乃披衣正坐，默而思之，知是高仙降靈，不敢疏慢，遂整衣戴冠，滌硯揮牋，走筆書之，不時而就，

皆出乎無思，非干於用意，著斯功格三十六條、過律三十九條，各分四門，以明功過之數，付修真之士明書日月，自記功過，一月一小比，一年一大比，自知功過多寡，與上天真司考校之數，昭然相契，悉無異焉。大凡一日之終，書功下筆乃易，書過下筆的難。即使聰明之士，明然頓悟罪福因緣、善惡門戶，知之減半，慎之全無。依此行持，遠惡遷善，誠為真誠，去仙不遠矣。

西山會真堂無憂軒又玄子序。

### 太微仙君功過格

功格三十六條

救濟門十二條、教典門七條

焚修門五條、用事門十二條

過律三十九條

不仁門十五條、不善門八條

不義門十條、不軌門六條

凡受持之道，常於寢室床首，置筆硯簿籍，先書月分，次書日數，於日下開功過兩行，至臨卧之時，記終日所為善惡，照此功過格內名色數目，有善則功下注，有惡則過下注之，不得明功隱過。至月終計功過之總數，功過相比，或以過除功，或以功折過，折除之外者，明見功過之數，當書總記訖，再書後月，至一年則大比，自知罪福，不必問乎休咎。

功格三十六條

救濟門十二條

以符法針藥救重疾一人為十功，

小疾一人為五功，如受病家賄賂則無功，治邪一同。凡行治一度為一功，施藥一服為一功。

傳一符一法一方一術、令人積行救人，每一術為十功，如受賄而傳，或令人受賄，則並無功。

傳人保益性命符法藥術等，每一事為五功，如受賄而傳為一功。

救一人刑死性命為百功，免死刑性命一人為百功，減死刑性命一人為五十功，救人徒刑為四十功，免人徒刑為三十功，減人徒刑為二十功，救人杖刑為十功，免人杖刑為八功，減人杖刑為六功，救人笞刑為五功，免人笞刑為四功，減人笞刑為三功，救謂非自己主事，得門竭力救之是也；免謂自己主事，特爽原免者是也。如依法定罪則無功，如私家減免婢僕之屬，同此論功。

救有力報人之畜一命為十功。謂駝、騾、牛、馬、驢畜等。

救無力報人之畜一命為八功，謂山野禽獸之屬蟲蟻飛蛾濕生之類一命為一功。

賑濟鰥寡孤獨窮民百錢為一功，貫錢為十功，如一錢散施，積至百錢為一功，米麥幣帛衣物，以錢數論功，饒潤窮民債負，亦同此論。濟饑渴之民一飲一食皆為一功。

濟寒凍之民暖室一宵為一功。救接人畜筋力疲困之苦一時為一功。

葬無主之骨一人為五十功，施地與無土之家葬一人為三十功，若令出備租課則無功。埋藏自死者、走獸、飛禽、六畜等一命為一功，若埋藏禽獸、六畜骨殖及十六斤為一功。

平理道途嶮阻及泥水陷沒之所一日一人之功為十功，若造船橋濟渡、不求賄賂者，所費百錢為一功，一日一人之功為十功。

教典門七條

自己受救人法錄經教一宗為二十功，受保護自身法錄經教一宗為十五功。

於高士處求救人法錄經教一宗為八功，求保護自身法錄經教一宗為四功。

功。

傳受行法官一人為百功，度錄生弟子一人為五十功，度受戒弟子一人為三十功。

以救眾經法付人為五功，保養性命經法付人為四功，演道經論付人為三功。為朋友間相受也。

自己注撰救眾經法一宗為三十功，保養性命經法一宗為二十功，謂得功驗者讚道之文一篇為一功，謂詩詞歌頌等若詠無教化者則無功。

自己簡編救眾經法一宗為十功，保養性命經法一宗為五功，讚道之文一篇為一功。

雕造經教所費百錢為一功，貫錢為十功，印造散施與人小經一卷為十功，謂千字已下者大經一卷為二十功，謂千字已上者並謂上聖正典有教化者，非談論興亡勝敗之書及詠風月之文。

焚修門五條

修聖像、壇宇、幢蓋、幡花、器皿、床坐，及諸供養之物，費百錢為一功，貫錢為十功，如施與人錢物，修置百錢

爲半功，貫錢爲五功，或以什物一件爲一功。

旦夕朝禮，爲國爲衆，焚修一朝爲二功，爲己焚修一朝爲一功。

章醮，爲國、爲民、爲祖先、爲孤魂、爲尊親，祈禳災害，薦拔沉魂，一分爲二功，爲己一分爲一功，爲施主一分爲一功，若受法信則無功。

爲無告孤魂告行拔亡符命一符爲十功，祖先尊親一亡爲十功，爲平交親知及卑幼一亡爲五功，爲施主一亡爲四功，若受法信則無功。

爲國爲民，或尊親先亡，或無主孤魂，誦大經一卷爲六功，小經一卷爲三功，聖號百遍爲三功，爲平交親知及卑幼誦大經爲四功，小經聖號爲二功，爲施主誦大經一卷爲三功，小經聖號爲一功，若受法信則無功。爲己禳謝，誦大經一卷爲二功，小經聖號爲一功。

### 用事門 十二條

興諸善事，利益一人爲一功。

講演經教及諸善言，化諭於衆，在席十人爲一功，百人爲十功，人數雖

多，止五十功。

以文章詩詞，誠勸於衆，一篇爲一功。

化人出財，修諸功德，一貫爲一功。

勸人官門鬪訟，免死刑爲十功，免徒刑爲五功，免杖刑爲二功，免笞刑爲一功。

勸諫人鬪爭，一人爲一功。

舉薦高明賢達有德之士用事，一人爲十功。

讚揚人之善道，一事爲一功。

掩遏人之惡業，一事爲一功。

勸諫人令不爲非、不廉、不孝、不貞、不良、不善、不慈、不仁、不義，一人迴心爲十功。

自己著紙衣一件爲二功，著布素籠衲之衣一件爲一功，謂有而不著者是功，著紈帛者無功。

自己飲饍，有而不食者爲三功，晚而不食者爲二功，素食下味爲一功，素食中味爲半功，素食上味爲無功。謂有上味及素饌佳餚而故不食者，止甘淡薄籠糲中下之

味者爲功；若無上味而食中等之味者，非爲功；若無中味而食下味者，亦非爲功。蓋有而故不食者爲功。

### 過律三十九條

#### 不仁門 十五條

凡有重疾告治，不爲拯救者，一人爲二過，小疾一人爲一過，治不如法爲一過，不愈而受賄百錢爲一過，貫錢爲十過。

修合毒藥，欲害於人爲十過，害人性命爲百過，害人不死而病爲五十過，害一切衆生禽畜性命爲十過，害而不死爲五過，舉意欲害爲一過。

學厭禱呪咀邪法，欲害於人爲十過，害人性命爲百過，害人不死而病爲五十過，害人六畜一命爲十過，令病爲五過，舉意欲害爲一過，厭禳人家，令見恠異，欲取財賄爲十過，得財百錢爲一過，貫錢爲十過。

謀人死刑，成者爲百過，不成爲五十過，舉意不作爲十過；謀人徒刑，成者爲四十過，不成爲二十過，舉意不作

為八過；謀人杖刑為十過，不成為八過，舉意為五過；謀人笞刑為三過，不成為四過，舉意為三過。凡為官吏，入人罪者，同此論。為行法官，妄入鬼神罪者，亦同此論。

心中暗舉惡事，欲殘害於人，一人為一過，事成殘害一人為十過，心意中邪姪雜想非理之事，一事為一過。

凡言舉惡事，欲殘言於人，一人為一過，事成為十過，惡語向師長、尊親為十過，向善人為八過，向平交為四過，向卑幼為一過，言約失信為一過，揚人惡事為一過，掩人善事為一過。

故傷殺人性命為百過，誤傷殺性命為八十過，以言遽殺者，同使人殺者，為六十過。

故殺有力報人之畜，一命為十過，誤殺為五過；故殺無力報人之畜，飛禽走獸之類，一命為八過，誤殺為四過；故殺蟲蟻飛蛾濕生之屬，一命為二過，誤殺為一過；故殺傷人害物者、惡獸毒蟲為一過。謂虎、狼、蛇、蝎、毒蟲之屬使人殺者同上論。

見殺不救，隨本人之過減半，無門可救，不生慈念為二過，助讚殺生為五過。

見若救得而不救者為十過，無門可救，不生慈念者為一過。

見人有憂，不行解釋而故暢快者為五過。

見人畜死，不起慈念者為一過。凡言慈念者，謂見苦不能得救，止以持念聖號經文，迴向以結善緣也。

役使人畜，至於疲乏力倦，不矜其苦而剛使役者，一時為十過，加之鞭笞者，一杖為一過。

用水陷溺路徑，使人畜出入行履艱難者，一時為十過。

摧毀船橋，使不通渡者，一時為十過。

不善門 八條

毀壞功德、聖像、壇宇、幢蓋、幡花、器皿、床具及諸獻供之物，百錢之直為一過，貫錢之直為十過，以巧言說人，毀壞百錢之直為半過，貫錢之直為五過，見而不觀為一過，讚助為五過。

以言指斥，毀天尊聖像為二十過，真人為十五過，神君為十過，見毀滅不勸為一過，讚助毀滅為五過，毀滅經教，與此同論。

每遇齋日及諸節令吉辰，故不朝真為二過，因私務不及並非齋日為一過，因公務不及無過，為食酒肉葷辛及犯觸不朝真為五過，忌日誤朝真為一過。

遇節辰食晚食為二過，常日晚食為一過。

齋醮供聖鎮信之物，一物不備為一過，章詞一字差錯為一過，誤違科律格式，一事為一過，威儀有失，一事為一過，唱念不專為一過，宣科讀狀，奏對詞表，差錯一字為一過，三時朝真，一時有失為五過，供養進獻之物，一物不備為一過，一物不潔為一過，及不如法為一過。

應受施主法信錢物，非理使用，百錢為一過，貫錢為十過。

薦亡符簡文字等，一字差錯為一過，脫漏一字為一過，符文差錯脫漏為

十過，修寫書篆不如法爲五過。

誦念經典，漏一字爲一過，漏一句爲五過，音釋乖背，字音交差，一字爲一過，念誦語句錯亂，有失文意，一句爲五過，若念誦之時，心意不專爲五過，邪淫雜想及思惡事爲十過，住經語惡事訖續念經爲十過，語常事爲五過，接陪賓侶爲三過，語善事爲一過，不依誦經法式爲五過，念經發嗔怒爲十過，凌辱他人爲十過。凡言十過，其功全無，並是虛念。但一過去功一分，十過去功十分，所以不用也。

### 不義門 十條

教唆人官門鬪訟，死刑爲三十過，徒刑爲二十過，杖罪爲十過；答罪爲八過。

教唆人鬪爭，一人爲一過。

教人爲不廉、不孝、不義、不仁、不善、不慈，爲非作過，一事爲一過。

見賢不薦爲一過，見賢不師爲一過。

見明師不參授典教爲二過，不依師之教旨爲十過，反叛師長爲五十過，

違師教公爲三十過，尊長父母同此論。

良朋勝友不交，設爲一過。

窮民不濟爲一過，復加凌辱一人爲三過。

偷盜人財物，或教人偷盜，百錢爲一過，貫錢爲十過；若見偷盜，不勸爲一過，讚助偷盜爲五過，米麥幣帛衣服，並論錢數定過。

不義而取人財物，百錢爲一過，貫錢爲十過。

欠人財物，抵諱不還，百錢爲一過，貫錢爲十過，因而謀害，其過加倍。

### 不軌門 六條

傳教法，隱真出偽，欺罔弟子，一事爲五過；如受法信，百錢爲一過，得人不傳爲一過，傳非其人爲十過。

注撰煙粉傳記、詩詞、歌行，一篇爲二過，傳與一人爲二過，簡編一篇爲一過，傳與一人爲一過，自己記念一篇爲一過。

食肉，故殺性命食之爲六過，買肉食之爲三過，違禁肉故食爲六過，誤食爲三過，過齋日食之爲十過，食後入壇

念善爲十過。

飲酒爲評議惡事，與人飲一升爲六過，無故與不良人飲一升爲二過，無故與常人飲一升爲一過，助姪權飲一升爲十過；爲和合事理，與友人飲，祭酒、待賓、服藥，皆不坐；遇齋日飲致醉，或酒後入壇念善爲五過。

五辛無故食之，一食爲一過，食後持念經一大卷爲十過，一小經爲五過，一聖號爲一過，齋日食之爲五過。

受觸極親爲五十過，近親爲三十過，遠親爲二十過，良家爲十五過，受觸之後，入壇念道、朝真、禮聖及齋日犯觸隨儀，每一過爲五過。

太微仙君功過格

(吳亞魁點校)

## 035 水鏡錄

經名：水鏡錄。一卷。底本出處：《萬曆續道藏》。

### 太上感應篇

太上曰：禍福無門，惟人自召，善惡之報，如影隨形，是以天地有司過之神，依人所犯輕重以奪人算，算減則貧耗，多逢憂患，人皆惡之，刑禍隨之，吉慶避之，惡星災之，筭盡則死。又有三台、北斗星君等，常在人頭上，錄人罪惡，奪其紀筭。又有三尸神在人身中，每到庚申日，輒上詣天曹，言人罪過。月晦之日，竈神亦然。凡人有過，大則奪紀，小則奪筭，其過大小，有數百事。欲求長生者，先須避之，是道則進，非道則退，不履邪徑，不欺暗室，積德累功，慈心於物，忠孝友悌，正己化人，矜孤恤寡，敬老懷幼，昆蟲草木，猶不可

傷，宜憫人之凶，樂人之善，濟人之急，救人之危，見人之得，如己之得，見人之失，如己之失，不彰人短，不銜己長，遏惡揚善，推多取少，受辱不怨，受寵若驚，施恩不求報，與人不追悔，所謂善人，人皆敬之，天道佑之，福祿隨之，衆邪遠之，神靈衛之，所作必成，神仙可冀。夫欲求天仙者，當立一千三百善；欲求地仙者，當立三百善。苟或非義而動，背理而行，以惡爲能，忍作殘害，陰賊良善，暗海君親，慢其先生，叛其所事，誑諸無識，謗諸同學，虛誣詐僞，攻訐宗親，剛強不仁，狼戾自用，是非不當，向背乖宜，虐下取功，諂上希旨，受恩不感，念怨不休，輕蔑天民，擾亂國政，賞及非義，刑及無辜，殺人取財，傾人取位，誅降戮服，貶正排賢，凌孤逼寡，棄法受賂，以直爲曲，以曲爲直，入輕爲重，見殺加怒，如過不改，知善不爲，自罪引他，壅塞方術，訕謗聖賢，侵凌道德，射飛逐走，發蟄驚棲，填穴覆巢，復胎破卵，願人有失，毀人成功，危人自安，滅人自益，以惡易好，

以私廢公，竊人之能，蔽人之善，形人之醜，訐人之私，耗人貨財，離人骨肉，侵人所愛，助人爲非，逞志作威，辱人求勝，敗人苗稼，破人婚姻，苟富而驕，苟免無耻，認恩推過，嫁禍賣惡，沽買虛譽，包貯險心，挫人所長，護己所短，乘威逼脇，縱暴殺傷，無故剪裁，非理烹宰，散棄五穀，勞擾衆生，破人之家，取其財寶，決水放火，以害民居，紊亂規模，以敗人功，損人器物，以窮人用，見他榮貴，願他流貶，見他富有，願他破散，見他色美，起心私之，負他貨財，願他身死，干求不遂，便生呪恨，見他失便，便說他過，見他體色不具而咲之，見他才能可稱而抑之，理蠱厭人，用藥殺樹，恚怒師傅，抵觸父兄，強取強求，好侵好奪，虜掠至富，巧詐求遷，賞罰不平，逸樂過節，可虐其下，恐嚇於他，怨天尤人，呵風罵雨，鬪合爭訟，妄逐朋黨，用妻妾語，違父母訓，得新忘故，口是心非，貪冒於財，欺罔其上，造作惡語，讒毀平人，毀人稱直，罵神稱正，棄順效逆，背親向疏，指天地以



證鄙懷，引神明而鑑猥事，施與後悔，假借不還，分外營求，力上施設，淫慾過度，心毒貌慈，穢食餒人，左道惑衆，短尺狹度，輕秤小升，以偽雜真，採取姦利，壓良爲賤，謾驀愚人，貪婪無厭，呪咀求直，嗜酒悖亂，骨肉忿爭，男不忠良，女不柔順，不和其室，不敬其夫，每好矜誇，常行妬忌，無行於妻子，失禮於舅姑，輕慢先靈，違逆上命，作爲無益，懷挾外心，自呪呪他，偏憎偏愛，越井越竈，跳食跳人，損子墜胎，行多

隱僻，晦臘歌舞，朔旦號怒，對比涕唾及溺，對竈吟詠及哭，竈火燒香，穢柴作食，夜起裸露，八節行刑，唾流星，指虹霓，輒指三光，久視日月，春月燎獵，對北惡罵，無故殺龜打蛇。如是等罪，司命隨其輕重，奪其紀筭，筭盡則死，死有餘責，乃殃及子孫。又諸橫取人財者，乃計其妻子家口以當之，漸至死喪。若不死喪，則有水火盜賊、遺亡器物、疾病口舌諸事，以當妄取之直。又枉殺人者，是易刀兵而相殺也。取非義之財者，譬如藥者救饑，鳩酒止渴，

非不暫飽，死亦及之。夫心起於善，善雖未爲，而吉神已隨之；或心起於惡，惡雖未爲，而凶神已隨之。其有曾行惡事，後自改悔，諸惡莫作，衆善奉行，久久必獲吉慶，所謂轉禍爲福也。故吉人語善、視善、行善，一日有三善，三年天必降之福；凶人語惡、視惡、行惡，一日有三惡，三年天必降之禍。胡不勉而行之。

### 梓潼帝君戒士子文

梓潼帝君曰；聰明正直而依仁，寧無所擇；寬厚忠信而好義，是用相仍。故憑有感之精衷，曲示無聲之教化，咨爾有衆，聽子格言。蓋聞富貴在天，得失有命，知之者，安於自然，而罔或控告；昧之者，貪於必得，而有所祈求。或謂精神交而夢寐通，或謂祭祀豐而神祇格。宮殿樓觀，務碧瓦之舉飛；陛戟右廊，誇朱欄之雕翠。從茲末務，失其本真，不知進退，存亡係彼，三班四屬，行藏用舍。考茲五部六臺，既有司存，豈容計取，然不可一拘於前定，又不可迷昧於進脩。故脩身勵行

者，天必降之百祥；而反道敗德者，神亦奪其五福。理所著者，人弗知之。是故運數冥符，而反受其殃；災星顯照，而或蒙其吉。造化以之倚伏，神明由是乘除，凡厥儒流，恭行教化。汝等勿欺天遠，毋謂神幽，毋言暗室可欺，毋道明庭不畏，毋凌孤寡，毋侮老成，毋取不義之財，毋淫非己之色，毋厚結它人而親戚岐路，毋義交異姓而兄弟鬩牆，毋恃己長，毋攻人短，毋好逸樂，毋縱遊畋，毋負才名，毋挾官貴，毋厚仙釋而薄於父母，毋敬鬼神而慢於師資。苟有負於吾言，端不逃於天。憲政生平渡彥者，累困於場屋；一旦精明者，遽登於鄉書。皆有寅緣，固非造次。世之腹誹心謗者，往往得以藉口；人之面譽背毀者，悠悠姑以欺心。彼司文衡，而豈得以私；此權祿藉，而故先有取。濟濟多士，天其或者臨之；巍巍成功，吾則是之取爾。播告中外，咸使聞知。

### 又文

今歲取士，不止一端，要在得人，

以副衆望。一以陰功孝行爲上，一以處己謙和爲賢。苦學者，則酬其勞；高才者，則遂其志；傲忽者，未免黜落；輕薄者，姑示勸懲。文章假之，以定其去留；神明司之，以公其予奪。人不自省，明示訓言：嘗謂唯士無能，苦學爲能；居貧不富，成名即富。上無分於貴賤，人切在於勤勞。凡夫且先較德業之短長，故有司始定文章之優劣，不可謂前定而不能力學，豈可以宿緣而自怠操脩。名雖曰士，初無士行之寸長；身雖曰儒，徒爲儒服之觀美。不敬天地，不信神明，狎侮老成，輕慢前輩，違逆父母而逸樂度日，怠忽師長而放蕩無時。試不遂，則罪有司之不公；榜初張，則謂庸流之濫得。責人者，不能於責己；議人者，乃所以議天。或恃己之見，而遏人之能；或銜己之長，而攻人之短；或矜所學，而忽略一世；或恃一解，而輕視衆人。立身不正，則以曖昧貪饕爲能；用心不減，則以機巧變詐爲勝。較短論長，而不從公道；奪彼與此，而弗恤人

言；面譽背毀，而求苟合於人；口是心非，而絕不容於物。外貌雖慈祥，徒巧言而美語，中情多狠暴，好潛賊而陰謀；不擇乎友，而交不義之朋；不和其室，而淫非己之色。捨己田，耘人田，失云多矣；作無益，害有益，損孰甚焉。預鄉薦者，自爲志得意滿，不復進修；入省闈者，則曰功名遂，直可唾取。恃才傲物，挾長欺孤。常交貴結援，而每誇等流；以隻字片文，而蔑視同輩。在市道則和合貿易，以覬其所得；遇州縣則鬪合爭訟，以滿其所求。不忠不孝，甘心冒法而喜爲；非禮非仁，直情徑行而弗顧。游畋無度，博奕廢時，耽飲而自喪其神，逞威而乃敗於德，致屢困於場屋，安敢望於榮華。况三年初無伏案之功，而一旦遂萌登科之望。稍無成，直歸之命運；纔有力，專務於禱祈。不知天憲之難逃，深恐人心之愈惑。出處語嘿之際，天必察之；進退予奪之間，神所司者。豈容倖取，不可計求，苟有行業之可書，奚患飛騰之不遂。邇者營業相傳

之後，屢有聲名儒冠世守之家，反被黜落，不知營業之子，安分讀書，無形顏色，每見儒冠之後，自恃名族，多有矜矜。神明公取，專激勵於輕薄之流；天道左旋，用獎予於淳樸之士。若能自悟，晦迹韜光，望欲有成，勞心苦志，曲盡陰功之事，務存忠孝之心。反乎，上古淳樸之風無流，末劫偷薄之俗自然，詩禮傳家，科名復舊，謙和處己，氣象如初，天不負人，人宜力學，凡爲士者，各宜戒之。

### 陰德延壽論

一念所覺，固所以得三元之壽考；一德之脩，尤所以培三元之壽脉。甚矣，念之不可以不覺，而德之不可以不脩也。老子曰：我命在我不在天。紫陽真人曰：大藥脩之，有易難也，須由我也。由天，若非積行施陰德，動有羣魔作障緣，是可以自信矣。道人郭太史，精於談天者也，應天得書，後之星翁推步，必來取法，曰五行四柱，曰星辰運限，如是而富貴壽考，如是而貧賤疾苦，如是而凶惡夭折，若鏡燭影，

若契合符。世之人，似不能逃其數者及其究也。合於書者固多，其不合者亦不少，是何歟？豈人生宇宙間，或囿於數，或不囿於數歟？蓋嘗攷之，其推玄究微，既條列于前，至其後則曰：陰功可延壽，吉人依舊無凶。又曰：隨緣應物行方便，縱犯凶星亦不虞，是必有見矣，不然，壽夭休論命，脩行本在人。孫思邈真人何以有此言歟？太極真人徐來勒嘗遇南斗壽星，問壽夭吉凶之事。星君曰：天道福善禍淫，神明賞善罰惡，人能刻意爲善，靜與道合，動與福會，如此則我命在我，不爲司煞所執，不求壽而自壽，不求生而自生。苟或隳綱紀，違天地，肆愚悖，侮神明，背仁慈，虧忠孝，明則刑網理之，幽則鬼神誅之，是不知所積、冥冥中奪其筭而夭其壽者矣。陰德如于公治獄，子爲丞相，徐公積善，袞袞公侯，在所不論。昔比丘得六神通，與一沙彌同處林野，比丘知沙彌七日當死，因曰：父母思汝，可暫歸八日復來。沙爾八日果來，比丘恠之，入三昧，察其

事，乃沙彌於歸路中，脫袈裟壅水，令不得入蟻穴，得延壽一紀。孫叔敖兒時，見兩頭蛇，恐他人見殺而埋之。母曰：吾聞有陰德者，天報之福，汝不死也。後爲楚令尹。又竇禹鈞夜夢祖父謂曰：汝年過無子，又壽不永，當早修陰德。禹鈞自是脩陰德罔倦。後又夢其祖父語曰：天以汝陰德，故延壽三紀，賜五子，榮顯後居洞天之位。范仲淹爲之記。由是觀之，三元壽考，固得於一念之覺；三元壽脉，又在於一德之脩也。或曰：陰德曷從而脩之。曰：凡可脩者，不以富貴貧賤拘，亦不在勉強其所爲，但於水火、盜賊、饑寒、疾苦、刑獄、逼迫、逆旅、狼狽、險阻、艱難，至於飛潛、動植，於力到處，種種方便，則陰德無限，量而受報如之矣，善乎。西山之記曰：遇至人，得真法，雖云修養所至，亦陰功之報也。此予所以參贊書後，復作論曰《陰德延壽》。九華澄心老人李鵬飛述。

### 放生文

蓋聞世間至重者，生命；天下最

慘者，殺傷。是故逢擒則奔，蟻虱猶知避死；將雨而徙，螻蟻尚且貪生。何乃網於山，罟於淵，多方掩取；曲而鈞，直而矢，百言扶羅。使其膽落魄飛，母離子散，或囚籠檻，則如處罔罟；或被刀砧，則同臨剛戮。憐兒之鹿，舐瘡痕而寸斷柔腸；畏死之猿，望弓影而雙垂悲淚。恃我強而凌彼弱，理恐非宜；食他肉而補己身，心將安忍。由是昊天垂憫，古聖行仁，鮮網著於成湯，畜魚興於子產。聖哉，流水潤枯槁以囊泉；悲矣，釋迦代危亡而割肉。天台智者，鑿放生之池；大樹仙人，護棲身之鳥。贖魚蝦而得度壽，禪師之遺愛猶存；救龍子而傳方孫，真人之慈風未泯。一活蟻也，沙彌易短命爲長年，書生易卑名爲上第；一放龜也，毛寶以臨危而脫難，孔愉以微職而封侯。屈師縱鯉於元村，壽增一紀；隋侯濟蛇於齊野，珠報千金。拯已溺之蠅，酒匠之死刑免矣；捨將烹之鰲，厨婢之篤疾瘳焉。貿死命於屠家，張提刑魂超天界；易餘生於鈞艇，

李景文毒解丹砂。孫良嗣解贈燉之危，卜葬而羽蟲交助；潘縣令殺江湖之禁，去任而水族悲號。信老免愚民之牲，祥符甘雨；曹溪守獵人之綱，道播神州。雀解啣環報恩，孤能臨井授術，乃至殘軀得命，垂白壁以聞經；難地求生，現黃衣而入夢。施皆有報，事匪無徵，載在簡編，昭乎耳目，願隨所見物，發慈悲心，捐不堅財，行方便事。或恩周多命，則大積陰功；若惠及一蟲，亦何非善事。苟日增而月累，自行廣而福崇，慈滿人寰，名通天府。蕩空冤障，多祉萃於今生；培積善根，餘慶及於他世。倘更助稱佛號，加諷經文，為其回向西方，令彼永離惡道，則存心愈大，植德彌深，道業資之速成，蓮臺生其勝品矣。

### 殺生七戒

世人食肉，咸謂理所應然，乃恣意殺生，廣積冤業，相習成俗，不自覺知，真可為痛哭流涕，長太息也。計其迷執，略有七條，開列如左，餘可例推。

一曰生日不宜殺生。哀哀父母，

生我劬勞。己身始誕之辰，乃父母垂亡之日。是日也，正宜戒殺扣齋，廣行善事，庶使先亡考妣，早獲超生，見在椿萱，增延福壽。何乃頓忘母難，殺害生靈，上貽累於親，下不利於己，昔唐太宗萬乘之主，生日尚不為樂。本田舍翁多收十斛粟，乃賀客盈門，歡宴累日，不知其可也。世有生日，飯僧誦羅、脩諸善事者，亦賢矣哉。

二曰生子不宜殺生。凡人無子則悲，有子則喜，不思一切。禽畜亦各愛其子，慶我子生，令他子死，於心安乎？夫嬰孩始生，不為積福，而反殺生造業，亦太愚矣。有一獵人，暮夜大醉，視其幼子為獐，礪刃將殺之。妻泣諫不聽，竟剖其腹，出其腸。已而安寢天明，呼其子，與入市鬻獐肉。妻哭曰：昨汝所殺者，子也。其人舉身自擲，五內崩裂。噫，人畜雖殊，愛子之心一也，安可殺歟。

三曰營生不宜殺生。世人為衣食故，或畋獵，或漁捕，或屠宰牛羊猪犬等，以資生計。而我觀不作此業者，亦

衣亦食，未必其凍餒而死也。殺生營生，神理所殛，以殺昌裕，百無一人，種地獄之深因，受來生之惡報，莫斯為甚矣，何苦而不別求生計乎？嘗觀見屠羊者，垂死而口作羊鳴；賣鱗者，將亡而頭如鱗嚙。此二事，近在鄰居，即非傳說。我勸世人，若無生計，寧丐食耳，勿得造殺而生，作此冤業也。

四曰宴客不宜殺生。良辰美景，賢主嘉賓，蔬食菜羹，不妨清致，何須廣殺生命，窮極肥甘，笙歌饜飫於杯盤，宰割冤號於砧几。嗟乎，有人心者，能不悲乎？若知盤中之物，從砧几冤號中來，則以彼極苦，為我極歡，雖食且不下咽矣，可不悲乎。

五曰祭先不宜殺生。亡者忌辰，及春秋祭掃，俱當戒殺，以資冥福，殺生以祭，徒增業耳。夫八珍羅於前，安能起九泉之遺骨，而使之食乎？無益而有害，智者不為矣。或曰：梁丑帝以麪為犧牲，世譏其使祖宗不血食。噫，血食未必珍，蔬食未必惡，為人子者，貴乎慎脩其身，而不覆先宗祀，斯

善矣，奚取於祀之必用血也。禴祭勝於殺牛，易垂明訓；牲養猶爲不孝，聖有嘉謨。奚取於祀之必用血也。

六曰祈禳不宜殺生。世人有疾，殺牲祀神，以祈福祐，不思己之祀神，欲免死而求生也，殺他命而延我命，逆天悖理，莫甚於此矣。夫正直者爲神，神其有私乎？命不可延，而殺業具在，種種淫祀，亦復類是。《藥師經》云：殺種種衆生，解奏神明，呼諸魍魎，請乞福祐，欲冀延年，終不可得，所謂命不可延，殺業俱在也。種種淫祀，如殺生求子，殺生求財，殺生求官等，及其得子、得財、得官，皆本人分定，非鬼神所爲也。偶爾滿願，遽謂有靈，信之彌堅，行之愈篤，邪見熾然，莫可救療，悲夫。

七曰婚禮不宜殺生。世間婚禮目，問名納采，以至成婚殺生，不知其幾。夫婦者，生人之始也，生之始而行殺，理既逆矣。又婚禮，吉禮也，吉日而用凶，事不亦慘乎。凡人結因，必祝願夫婦諧老，爾願諧老，禽獸願先亡

乎？嫁女之家，三日不息燭，思相離也。爾以相離爲苦，禽獸以離爲樂乎？信乎，婚之不宜殺矣。

如上所列，甚拂常情，達人覽之，必以爲確論。倘能全戒，善莫加焉。其或不然，量力除減，或去四、五，或禁二、三，除一事則消一業，減一殺則杜一冤。若未能斷絕腥羶，且先應市買見物，不加親殺，亦免大愆，積養慈心，漸入佳境。得斯文者，更望展轉流通，近相勸化，能勸一人不殺，如救百萬生靈，勸至十人、百人，以及千萬億衆，陰功浩大，善果無窮，但肯信行，決不相賺。

#### 勸殺牛歌

我勸世人，勿食牛肉。服耕效勞，反遭殺戮。爾食何來，忍爲烹鬻。吁嗟此牛，莫云是畜。六道輪迴，互相報復。焉知夙生，非爾眷屬。豈謂無知，臨死覘觫。口不能言，流淚若哭。皮解體分，猶張兩目。目匪徒張，看爾反覆。能保他年，不變爲犢。念我同生，貪纔縱欲。只愛口甜，不思中毒。有

飯充饑，得蔬已足。適口物多，何必牛肉。鑒戒甚明，勿食是福。

水鏡錄

（吳亞魁點校）



張繼禹 主編

中華道藏

華夏出版社

『十五』國家重點圖書出版規劃項目

主 編 張繼禹

本冊主編 吳亞魁

華夏出版社

# 中華道藏

第四二冊



# 目錄

001 洞玄靈寶三洞奉道科戒營始	.....	一
002 三洞奉道科誠儀範(敦煌本)	.....	二八
003 洞玄靈寶道學科儀	.....	四二
004 洞玄靈寶千真科	.....	五七
005 三洞道士居山修鍊科	.....	六八
006 太上洞玄靈寶法身製論	.....	七八
007 洞玄靈寶鐘磬威儀經	.....	八〇
008 玄門十事威儀	.....	八三
009 神人所說三元威儀觀行經(敦煌本)	.....	八九
010 正一威儀經	.....	九六
011 正一修真略儀	.....	一〇三
012 傳授三洞經戒法錄略說	.....	一一〇
013 洞玄靈寶道士受三洞經誠法錄擇日曆	.....	一二五
014 洞玄靈寶三師名諱形狀居觀方所文	.....	一二八
015 醮三洞真文五法正一盟威錄立成儀	.....	一三〇
016 三洞衆戒文	.....	一三九
017 三洞法服科戒文	.....	一四六
018 受錄次第法信儀	.....	一五〇
019 要修科儀戒律鈔	.....	一五九

020 齋戒錄	.....	二四五
021 玄壇刊誤論	.....	二五一
022 三洞修道儀	.....	二五七
023 太上出家傳度儀	.....	二六一
024 道門科範大全集	.....	二六六
025 道門通教必用集	.....	四七八
026 道門定制	.....	五三四
027 道門十規	.....	六三九
028 虛皇天尊初真十戒文	.....	六四六
029 洞玄靈寶天尊說十戒經	.....	六四九
030 天尊說禁戒經(敦煌本)	.....	六五二
031 赤松子中誠經	.....	六五五
032 唐太古妙應孫真人福壽論	.....	六六〇
033 太上感應篇	.....	六六二
034 太微仙君功過格	.....	八一
035 水鏡錄	.....	八一六